


THEOLOGIA NATURALIS

Christian von Wolff





<36603903500014

<36603903500014

Bayer. Staatsbibliothek

Q. 1. 2. 3. 4. 5. 6. 7. 8. 9. 10.

40 Ph. sp. 204 - (1)

R

THEOLOGIA NATURALIS

METHODO SCIENTIFICA
PERTRACTATA.

PARS PRIOR,
INTEGRUM SYSTEMA
COMPLECTENS,

QUA
EXISTENTIA ET ATTRIBUTA
DEI A POSTERIORI
DEMONSTRANTUR.

AUTORE
CHRISTIANO WOLFIO,
ACADEMIÆ MARBURGENSIS
P. T. PRO-RECTORE.

EDITIO NOVA PRIORI EMENDATIO.
CUM PRIVILEGIIS.

FRANCOFURTI & LIPSIAE, MDCCXXXIX.
PROSTAT IN OFFICINA LIBRARIA RENGIERIANA.

110700000
T
110700000
BAYERISCHE
STAATS-
BIBLIOTHEK
MÜNCHEN

REVERENDISSIMO AC CELSISSIMO

S. R. I. PRINCIPI AC DOMINO

DOMINO

**FRIDERICO
CAROLO,**

EX S. R. I. COMITIBUS DE SCHOENBORN,
PUCHHEIM, WOLFSTHAL &c.

EPISCOPO BAMBERGENSI

ET WIRCEBURGENSI,

FRANCIÆ ORIENTALIS DUCI,
SACR. CÆSAREÆ REGIÆQUE CATHOLICÆ
MAIESTATIS CONSILIARIO ACTUALI INTIMO
ET CONFIDENTIALI, EQVESTRIS ECCLESIAE
AD S. ALBANUM PROPE MOGUN-
TIAM PRÆPOSITO,

&c. &c. &c.


FACULTATIS JURIDICÆ IN ALMA IMPERIALI
OTTONIANO-FRIDERICIANA
FUNDATORI MUNIFICENTISSIMO,

EIUSDEMQUE

RECTORI MAGNIFICENTISSIMO,

DOMINO CLEMENTISSIMO.

REVERENDISSIME AC
CELSISSIME S. R. I. PRINCEPS,
DOMINE CLEMENTISSIME,



Nemo scientias earumque
cultores ac promotores
melius protegit, quam
qui multiplicem illarum
in Divinis atque huma-
nis fructum expertus de pretio ex se
statuit.

DEDICATIO.

statuit. Quovis enim Argo oculatior in pervidendis utilitatibus, quæ vel summum inventorum acumen facile effugiunt. Raro ac prorsus singulari exemplo hoc ipsum doces, REVERENDISSIME ac CELSISSIME PRINCEPS, qui in virtutem eminentem, qua Princeps & Præsul vere magnus nonnisi ad Summa contendis, *non solius Germaniæ, sed Europæ universæ oculos convertisti.* Eam admiran-
tantur omnes; meritis condecorare encomiis valet nemo. Ego me admiratorem profiteor summum, & philosophus facta REVERENDISSIMÆ CELSITUDINIS TUÆ attenta mente rimor, ut boni Principis ac Præ-

DEDICATIO.

fulis vigilantis in ea nascatur idea facem
prælatura ad videndum ea, quæ Prin-
cipem ac Præfulem reddunt magnum;
Quocunque enim mentis aciem inten-
do, nil nisi quod augustum deprehendo.
Bonum & magnum Te probas Princi-
pem, cum omnem curam ac sollicitudi-
nem ad felicitatem subditorum firman-
dam & augendam convertas &, quæ
animo præclare concepisti prudentia
summa, sumtu maximo perficias. Ob-
stant plerumque magnis moliminibus
sumtus faciendi, ut perficiantur. Ve-
rum enimvero propria REVEREN-
DISSIMÆ CELSITUDINI
TUÆ munificentia non finit Magnifi-
centiæ poni limites. Sint modo magna
&

DEDICATIO.

& excelsa, quæ sumtus exigunt, eos in publicam utilitatem & splendorem profundi non videtur arduum atque difficile. Loquatur pro me melior forma, in quam a primis Regiminis initiis Ducatum, qui imperio Tuo subest, siue status civilis, siue militaris, siue literarius spectetur, felicissime redelegisti! Loquatur Academia, in Metropoli florens, a Te instaurata, ornata & aucta, & in ea Dotis insignis accessio munificentia Tua facta atque ordo Ictorum a Te primum introductus, Te fundatorem munificentissimum veneraturus in omne ævum! Loquatur Domus disciplinaris maximo sumtu nec sine maximo subditorum emolumento resuscitata,

DEDICATIO.

ta, ut habeant homines, quibus otia vitia dare solent, quod agant! Loquatur Aquæductus in Metropoli excitatus, opus sumtuosum atque stupendum! Loquatur Palatium Ducale, quod superbas Romanorum structuras non æmulatur, sed superare videtur, regium Urbis ornamentum! Loquatur denique, ut alia taceam, Mausolæum magnificum, quod Tui & Agnatorum Tibi Præsulum memoriam sempiternam posteritati commendabit! Quem Te Principem, eundem & Præsulem præbes, ubivis magnum & ad Summa contendentem. Cum enim in Te virtutes, ceteræ omnes singulare quid spirent; Pietas inprimis in DEUM
RE-

DEDICATIO.

REVERENDISSIMÆ CELSITUDINI TUÆ quasi propria existimari debet, qua nihil Tibi pretiosius, nihil antiquius. Eandem cum Magnificentiā, quæ Tibi summa est, amico vinculo copulasti, ut singulari in Te splendore fulgeat. Loquatur denuo pro me exemplum, quo gregem fidei Tuæ commissum instruis quotidie, ut Te præeuntem sequatur! Loquatur vigilantia, quæ Præsulem maxime decet virtus, Tanta in Te, ut sortem fere humanam superare existimetur! Loquantur tot Ædes DEO sacratæ non modo in Principatibus Tuis, sed conterminis etiam locis, in quibus ubivis singularia munificentiae Tuæ conspiciuntur

b

DEDICATIO.

ciuntur monumenta, quæ Pietatem
Tuam feris nepotibus commendabunt!
Quem Te Principem & Præsulem,
eundem & Litteratorum Mecænatem
ac Scientiarum & artium bonarumque
litterarum Protectorem præstas, ubivis
magnum & munificentissimum. Te
dudum hoc nomine venerantur, quot-
quot ad Scientias & artes perficiendas
& amplificandas atque bonas litteras
colendas animum appellunt, ut, quæ
toto orbe celebrantur, de iis dicere
supervacaneum existimem. Quam-
obrem cum in publicum a me profe-
ratur opus, quod totius Theologiæ
naturalis Systema methodo demon-
strativa adornatum, naturalem DEI
cogni-

DEDICATIO.

cognitionem ad summum claritatis,
evidentiæ ac certitudinis gradum eve-
hens, ad sinceram in DEUM pietatem
plurimum profuturum complectitur;
non mihi e longinquo petenda est ra-
tio, cur REVERENDISSIMO ac
CELSISSIMO NOMINE TUO
eidem splendorem conciliare ipsumque
Posteritati, cui semper sancta erit me-
moriam TUAM, commendare voluerim.
Quodsi enim feris etiam nepotibus
constabit, REVERENDISSIMAM
CELSITUDINEM TUAM opus,
quod humillime offero, gratioſo vultu
adſpexiſſe; Gratia TUA, qua autorem
complexus es, omnem ei addet auto-
ritatem. Servet Te DEUS, PRIN-

DEDICATIO.

CEPS REVERENDISSIME A'C
CELSISSIME , ut Te Protectore
& Mecænate Scientiæ, artes ac bonæ
litteræ omnes indies majora capiant
incrementa ! Ita vovet !

REVERENDISSIMÆ
CELSITUDINIS TUÆ

humillimus cultor

CHRISTIANUS WOLFIUS.



PRÆFATIO.

Arduum aggredimur opus, dum omnem de DEO doctrinam, quæ naturæ lumine cognoscitur, methodo accurata tradere constituimus. Neque enim adeo facile est exasciatis de DEO dare demonstrationes: ut non miremur, alios hunc laborem prorsus intactum reliquisse, alios magno conatu nihil egisse. Nostro tamen ævo non una de causa apprime necessarium Systema Theologiæ naturalis, in quo doctrina de

PRÆFATIO.

DEO concatenata ratiociniorum serie ad certitudinem evehitur, ne de veritatibus tanti momenti quis dubitare possit, nisi sua culpa. Constabit enim Systema nostrum legentibus, non vulgari opus esse Ontologiæ, Cosmologiæ generalis atque Psychologiæ notitia, ut vis demonstrationum percipiatur, qua assensus extorquetur. Quamobrem si quis desideret demonstrationes de DEO ad captum vulgi ignavi compositas, quæ tamen nomen tam augustum tueantur, propterea quod sibi & aliis persuadere conatur veritatem omnem esse captu facilem; is a se exigere sciat, quod impossibile: neque enim existimandum est ardua nullo negotio perfici. Rideretur sane, nec immerito, qui veritatum sublimium in Astronomia convinci vellet Geometriæ & Trigonometriæ prorsus ignarus. Neque minus rerum intelligentibus se deridendum propinat, qui, cum adhuc peregrinus & hospes sit in omni Ontologia, Cosmologia & Psychologia, lucem in Theologia naturali quærit, cum in luce meridiana caligare debeat, qui ex tenebris in eam subito prorumpit. Nemo igitur iudicem competentem de Systemate

te

PRÆFATIO.

te nostro sese existimet, qui nondum perspectis methodi legibus in opere logico fusissime traditis & nullo in Ontologia, Cosmologia generali atque Psychologia studio collocato iudicium deproperat, nec ægre ferat, si iudicium adeo deproperatum tanquam temerarium a rerum intelligentibus contemnatur. Si quis vero inoffenso pede in Systemate nostro cum fructu perlegendo progredi voluerit; ne ad id accedat, antequam principia ontologica, cosmologica & psychologica familiaria experiatur, res ipsa postulat. Quodsi ergo bene præparatus omnem attentionem ac patientiam attulerit ad lectionem; eum ad distinctam & certam DEI cognitionem perventurum confidimus: nihil enim tradimus, nisi distincte explicatum & sufficienter demonstratum. Si cui nimis molestum videatur tanto apparatu instructum ad Theologiæ naturalis tractationem accedere; is suum non esse agnoscat, quod philosophorum est, & quod suum est agat, philosophis relinquens, quod ipsorum est, nec importune sese alienis negotiis immisceat. Non invidet ipsi philosophus, quod in ea cognitione ac-

PRÆFATIO.

acquiescat ejus animus, quam subobscuram & dubitationibus obnoxiam in se experitur, suis videns oculis, non alienis: permittat vero, ut & ipse pro suo ingenii modulo quærat veritatem, in qua acquiescere possit. Si quis denique Matæologus non condonanda audacia eo temeritatis processerit, ut per demonstrationes rigidas mutato genere veritatem in errorem noxium converti somniet; is per nos in regno tenebrarum inter cæcos luscus regnet. Hanc mihi rationem esse intelligat, cur insulsis commentis in toto hoc opere nihil reponi consultum visum fuerit; sed veritatem, quam profiteor, in aprium producere unice studuerim. Etsi autem a meis laudandis procul absim, in honorem tamen DEI, cujus causa agitur, profiteri cogor, Theologiam naturalem hætenus ea luce caruisse, qua in præsentē opere eandem perfudimus. Attributorum divinorum notiones dedimus distinctas, ut intelligantur & eorum ab iis, quæ in anima nostra quidpiam affinitatis habent, differentia clarissime perspiciatur. Nodos intricatos & solutu difficilimos non secui, sed solvi, ut nihil amplius super-

PRÆFATIO.

superfit, quod perplexum videri possit. Qui philosophus audio & veri nominis philosophiam hactenus non satis agnitam profiteor, terminis cognitionis historicæ ac philosophicæ non, quod vulgo fieri solet, confusis, sed sollicitè discretis, rationes eorum, quæ DEO tribuuntur, intrinsecas dedi, cum sine iis non fruamur luce, qua eget intellectus, superior cognoscendi facultas, ad videndum, quæ rebus insunt. Vanus autem est metus, quasi periculoso admodum ausu omniscientia affectetur: qui enim omniscientiæ notionem in hoc opere evolutam animo distinctè comprehenderit, quantum inter eam & cognitionem philosophicam intersit discrimen abunde perspiciet. In Demonstrationibus denique omnem conservo evidentiam, non admissis principiis nisi in Ontologia, Cosmologia & Psychologia sufficienter stabilitis, aut in anterioribus jam demonstratis, & legitima ratiociniorum

PRÆFATIO.

concatenatione ex assumtis deducto , quod demonstrandum erat. Quantum cognitio ex hoc opere hausta ad omnem praxin moralem afferat adjumentum , re ipsa nobis ducibus in philosophia practica experietur , qui eam sibi comparaverit. Exhibemus igitur in hoc volumine , quod sub titulo partis primæ Theologiæ naturalis in publicum prodit , integrum scientiæ nobilissimæ Systema , in quo singula fusius exponuntur, quam huc usque factum ab aliis & nonnulla traduntur, quæ aliorum attentionem hactenus effugerant. Stabilita existentia entis, a se, ex ejus attributis ostendimus, nec mundum hunc materialem, nec elementa rerum materialium, nec animas nostras esse a se; sed, admittendum ens a se ab iis diversum, cui ea insunt attributa, per quæ ratio sufficiens contingentis existentiae ceterorum omnium dari potest. Hoc ipsum ens a se DEUM appellamus & quænam ipsi tribuenda sint, ut

ut ceterorum omnium dependentia ab eodem clarissime perspiciatur, evidentissimis demonstrationibus evincimus. Quoniam vero notiones distinctæ rerum ab iis haud raro non agnoscuntur, qui in confusis acquiescere solent, nostrum esse duximus, ut ubivis consensum cum Scriptura sacra demonstraremus: neque enim solum hoc pacto avertuntur querelæ injustæ, quasi terminorum receptorum & in Scriptura sacra vel obviorum, vel ejus menti conformiter explicatorum significatus immutetur; verum etiam usus Theologiæ naturalis, quem habere debet, haud postremus stabilitur, ut scilicet ad revelatam manuducat, & revelatæ defendendæ inserviat. Et ita exemplis luculentis docemus, quantum adjumenti præstet nostra philosophandi ratio ad demonstrativam Scripturæ sacre interpretationem & sensum verborum Scripturæ profundum eruendum: id quod usui fore Scripturæ

PRÆFATIO.

ræ sacræ interpretibus & commentatoribus nemo sanus in dubium vocare aufit. Ceterum si cui sufficiens fuerit acumen, is ex attenta operis hujus per-
lustratione abunde convincetur, Theologiam naturalem non admittere demonstrationes veri nominis, nisi admissis essentiis rerum necessariis, admissio nexu rerum omnium in hoc universo, admissa summa hujus universi, quæ in mundum aliquem cadere potest, perfectione, & theoriam nostram elementorum, quam in Cosmologia stabilivimus, unacum Psychologiæ rationalis paradoxis inexpectatam multis Theologiæ naturalis capitibus lucem affundere, quæ absque hisce subsidiis ab omni obscuritate non liberabuntur. Sumat methodi gnarus, si volupe fuerit, essentias rerum esse arbitrarias, non dari rerum omnium in hoc universo nexum, & mundum eo, qui existit, meliorem esse possibilem; quod impossibile sit DEO vindicari attributa, quæ ipsi tribuuntur, Scriptura sacrâ consentiente, re ipsa
expe-

experietur. Neque vero hæc principia recenter in philosophiam & Theologiam introducuntur, nec unquam suspecta fuisse Theologis. Quis enim est, qui nesciat, ante *Cartesium* essentiarum necessitatem unanimiter defensam fuisse a Philosophis & Theologis, D. *Thoma* non alia de causa asseverante, DEUM rem nullam quoad determinationes essentielles aliter facere potuisse, quam fecit? Nonne plures sunt e Societate JESU, quos inter (a) *Sebastianum Isquierdum*, *Antonium Perez* atque *Maurum* laudavimus, qui cum *Augustino* mundum hunc esse optimum defenderunt? Quod enim summa mundi hujus adspectabilis perfectio cum libertate DEI in decernendo ac creando summa consistat, & viri perspicacissimi perviderunt, & a nobis evidentissime demonstratum. Nonne denique Theologi orthodoxi omnes unanimi ore confitentur,

(a) not. §. 406.

PRÆFATIO.

DEUM esse sapientissimum atque unum, & decreta Socinianorum temporaria rejiciunt? Ex nostris autem demonstrationibus patet, sine rerum omnium nexu sapientiam DEI summam concipi minime posse, & decretis temporariis eundem repugnare, cum æterno autem decreto optime consistere, nec præscientiam & dependentiam mundi ab uno DEO, absque nexu isto demonstrari posse. Enimvero in nostro Systemate existentiam DEI & ejus attributa demonstravimus a posteriori, quatenus supponimus mundum hunc & animas nostras existere, atque ex iis, quæ de mundo in genere spectato cognoscuntur, existentiam DEI & quæ ipsi insunt colligimus juxta monitum Apostoli (b), quod Divinitas Numinis ex mundi opificio perspicitur. Quamobrem cum hodie plurimis probetur modus *Cartesii* existentiam DEI a priori demonstran-

(b) Rom. I, 20.

PRÆFATIO.


strandī ex entis perfectissimi notione, non tamen satis accurate procedatur; parte altera Theologiæ naturalis ostendemus, quomodo sit procedendum, ne in demonstrando quidpiam desiderari possit. Et quoniam vulgo de atheismo non satis accurata est tractatio; ejus quoque notionem in ea evolvemus, fundamenta evertemus & errores agnatos cum ipso sæpius confundi solitos refellemus. Addemus alia selectiora quædam capita, de quibus jam apertius dici nihil attinet. Quemadmodum vero Theologia naturalis est scopus, ad quem tendunt disciplinæ Metaphysicæ anteriores omnes peculiaribus voluminibus a nobis explicatæ; ita ipsius usus per omnem philosophiam practicam latissime sese diffundit. Neque enim existimandum est, doctrinam de DEO ideo addisci, ut animo teneatur, vel subtiliter de eodem disputetur; sed tota quanta ad praxin tendit, ut DEUM tanquam DEUM in omnibus actionibus nostris veneremur & ipsi serviendo, quem-

ad-

PRÆFATIO.

admodum decet, reddamur felices. Optime igitur sibi consulat, qui in distincta DEI cognitione, quam offert Systema nostrum, indies magis magisque proficere studebit, ut in philosophia practica percipiat fructus, quorum particeps non fiet nisi dogmatum Theologiæ naturalis convictus. Atque ita tandem futurum spero, ut religionis naturalis insufficientia & revelatæ excellentia atque necessitas rectius agnoscatur: id quod maxime vovemus! Dabam Marburgi Cattorum die ultima Martii A. O. R. 1736.





THEOLOGIÆ NATU- RALIS PROLEGOMENA.

§. I.



Theologia naturalis est scientia eorum, quæ *Theologiæ naturalis definitio.*
per Deum possibiliæ sunt, hoc est, eo-
rum, quæ ipsi insunt, & per ea, quæ ipsi
insunt, fieri posse intelliguntur.

Definitionem hanc Theologiæ natu-
ralis jam dedimus in Discursu prælimi-
nari Logicæ præmissio (§. 57.), ibidem-
que jam reddidimus rationem, cur can-
dem ita definire voluerimus. Vulgo

definitur per scientiam de Deo rebusque divinis ex principiis
rationis acquisitam. Nec habet hæc definitio, quod sit a no-
stra diversum. Res enim divinæ illæ sunt, quæ ideo possibiliæ
concepiuntur, quod detur Deus ipsique talia insint attributa.

Et quamvis a nobis non addatur, scientiam istam ope princi-

(*Wolfs Theol. Naturalis*).

A

pio-

piorum rationis aut, ut alii loqui amant, solo naturæ lumine esse acquirendam, recto nimirum usu facultatum animæ, quæ per naturam ipsi insunt; id tamen per se intelligitur. Theologiam enim naturalem tractamus tanquam partem philosophiæ. Omni autem philosophiæ hoc proprium est, quod solo naturæ lumine, hoc est, recto usu facultatum animæ, quæ ipsi per naturam insunt, acquiratur ad eam spectans possibile cognitio. Quod igitur de omni philosophia intelligitur, id ut in definitione partis ejusdem exprimat opus non est. In Discursu autem præliminari jam ostendimus Theologiam naturalem esse philosophiæ partem. In vulgus porro notum est Theologiam naturalem ita dici in oppositione ad revelatam, quæ de Deo rebusque divinis agit, quatenus per revelationem divinam nobis innotescunt. Pars illa philosophiæ, quæ de Deo agit, in scholis gentilium, unde vocabulum petiit, simpliciter Theologia dicebatur, cum revelatione divina, quæ nobis est, destituerentur. Enimvero postquam vocabulum in scholas Christianorum receptum ad denotandam cognitionem Dei rerumque divinarum ex illis libris, quos divinitus autoribus suis inspiratos fide firma teneamus, hauriendam; necesse omnino erat, ut ea distingueretur a cognitione Dei rerumque divinarum naturæ lumine acquirenda. Unde vocabulum Theologiæ generalem accepit significatum, quod nempe sit scientia de Deo, & dividi cæpit in naturalem & supernaturalem seu revelatam, quarum illa tradit, quæ de Deo ex lumine rationis seu naturæ cognosci possunt, hæc vero ea, quæ lumine revelationis de eodem nobis innotescunt. Et Theologiæ quidem revelatæ per eminentiam tributum est hoc nomen, ita ut solitarie positum non accipiat nisi de revelata, ac Theologi nomen remanserit solum iis, qui in Theologia revelata aliis præstantiores habentur; eodem vero non decorentur philosophi, qui naturali Dei cognitione excellunt, ut ut olim teste *Laëtantio* de ira Dei c. 11. & *Augustino* de civitate Dei lib. 18. c. 14. Theologi dicti fuerint non modo philosophi ob Theologiam naturalem, verum ipsimet Poætæ ob fabulosam, quam profitebantur, Theologiam. Gentiles nimirum *Theologiam* distinguebant in *fabulosam, naturalem & civilem*.

Illa Poëtarum, ea Philosophorum, hæc Principum civitatis erat. Illa notante *Varrone* ad theatrum, ea ad mundum, hæc ad urbem maxime accommodata erat. Illa complectebatur Poëtarum de Diis commenta, quæ *Mythologia* nomine hodie insigniuntur; ea Deum exhibebat tanquam causam primam rerum contingentium, quæ in mundo hoc adspectabili observantur; hæc ex naturali & fabulosa composita a civibus & Sacerdotibus in urbibus colebatur. Et civilem quidem theologiam a Politicis facilius coercende multitudinis causa inventam esse haud obscure docet *Aristoteles* Metaph. lib. 12. cap. 8. ubi theologiam fabulosam seu mythicam & civilem tanquam spuriam rejicit & solam naturalem probat. Per impietatem vero theologiam naturalem cum civili confundunt athei, dum theologiam omnem pro figmento Politicorum habent. Ceterum cum civilis gentilium theologia spuria esset, nec veri Dei cognitionem traderet; Gentiles ab Apostolo athei dicuntur Ephes. II. 12.

§. 2.

Quæ in Theologia naturali traduntur, demonstranda sunt. Theologia naturalis scientia esse debet (§. 1.). Quamobrem cum scientia sit habitus demonstrandi, quod affirmamus, vel negamus (§. 594 Log.) ; quæ in Theologia naturali traduntur, urique demonstranda sunt.

Cur in Theologia naturali requirantur demonstrationes.

Hæc ita consequuntur, si sumamus theologiam naturalem scientiam esse debere, quemadmodum vulgo sumitur: num recte sumatur ex propositione sequente patet, an vero sumi possit, ex ipsa tractatione constabit. Nobis enim propositum est, quæ de Deo recte docentur, teste scriptura sacra, ex principiis rationis demonstrare, quatenus teste Apostolo Rom. I. 20, Dei attributa per contemplationem hujus universi nobis innotescunt.

§. 3.

Qui Theologie naturali studet, certam de Deo acquirit Cur Theologia natu-

ralis scientia esse debeat.

cognitionem. Qui enim theologiæ naturali studet, is quæ de Deo cognosci possunt demonstrare discit (§. 2.). Quamobrem cum propositio aliqua nobis certa sit, quam sive directe, sive indirecte demonstrare valemus (§. 568 *Log.*); qui theologiæ naturali studet certam de Deo cognitionem acquirit.

Patet igitur ratio, cur in definitione theologiæ naturalis sumatur, eam scientiam esse debere. Certam enim de Deo cognitionem intendimus: quamobrem cum sine demonstratione non perveniatur ad cognitionem certam eorum, quæ sub sensus minime cadunt; quæ de Deo docentur, demonstranda utique sunt, consequenter recte sumitur theologiam naturalem esse scientiam (§. 594, *Log.*). Quodsi objicias vulgum demonstrationes non capere, immo eruditorum plurimos hac in parte non altius sapere vulgo, consequenter præstare ut alia, quam demonstrativa methodo tractetur theologia naturalis; haud difficilis est responsio. Theologia enim naturalis non vulgi gratia, sed eruditorum causa traditur. Et, si qui inter eruditos aut eos, qui literis operam navant, hebetioris sunt ingenii, quam ut demonstrationes capere possint; nec ipsi eam ad se pertinere existiment. Necesse autem est ut consulatur ceteris, qui certum ab incerto distinguere valent; ne incertitudine ad atheismum ducantur. Ceteris satisfacit cognitio minus exarsciata, qui sibi certi videntur, cum non sunt.

§. 4.

In Theologia naturali demonstranda existensia Dei: demonstrandum quoque est, quenam ipsi convenient & quenam per ea fieri posse intelligantur.

li quenam Etenim Theologia naturalis agit de Deo, quem non videmus (§. 1.). Quamobrem cum in ea affirmetur, Deum existere, cum alias nulla esset Theologia naturalis, nisi existeret Deus; existensia Dei demonstranda est (§. 2.). *demonstranda.* Quod erat unum.

Cum Deus sit ens (§. 134. *Ontol.*), necesse est ipsi convenient determinationes quædam essentielles (§. 142. & 143. *Ontol.*)

Ontol.) & attributa (§. 146. Ontol.). Quamobrem cum in Theologia naturali doceri debeant ea, quæ Deo conveniunt, & quænam per ea, quæ ipsi insunt, fieri possint (§. I.); in eadem unique demonstrandum est, quænam ipsi conveniant & quænam per ea, quæ ipsi insunt, fieri posse intelligantur. *Quod erat alterum.*

Atque adeo patet, definitione nostra Theologiæ naturalis comprehendi ea, quæ in eadem doceri debent, ut adeo verendum non sit, ne eidem insistendo condamus Theologiam naturalem, in qua desiderantur, quæ apprime in eadem tradenda. Etenim vi ejusdem agendum erit de existentia & attributis divinis atque de dependentia rerum finitarum contingenter existentiam a Deo, consequenter de creatione & conservatione hujus universi. Ea vero sunt, de quibus in Theologia naturali agitur. Equidem communiter in eadem quoque de cultu Dei traduntur, quæ beneficio rationis de eodem cognoscuntur. Quoniam tamen de eodem agemus, quando in Jure naturæ officia hominis erga Deum demonstraturi sumus; argumentum hoc in eadem non attingemus.

§. 5.

In Theologia naturali supponenda est aliqua definitio Dei nominalis. In ea enim demonstranda est existentia Dei (§. 4) *Cur definitio Dei nominalis in Theologia naturali sumenda.* Enimvero si demonstrare volueris, Deum existere, necesse est ut supponas, quidnam hoc vocabulo indigiri velis. Demonstrans nimirum existentiam Dei ostendis, existere istiusmodi ens, quale Deum vocas. Ubi vero sumis, quidnam per vocabulum Dei intelligi velis, etsi per ea, quæ sumis, non appareat, eas istiusmodi esse possibile, definitionem nominalem condis (§. 191 Log.). Quamobrem existentiam Dei demonstraturus, consequenter in Theologia naturali, definitionem quandam Dei nominalem supponere debes.

Definitiones nominales Dei plures formari possunt, adeoque in arbitrio nostro positum est, quamnam eligere velimus.

mus. Non tamen perinde est, quamnam eligamus, cum pro diversitate definitionis nominalis diversa prodeat existentiae divinae demonstratio: demonstrandum enim ens istiusmodi existere, quale Deum vocas. Definitio itaque nominalis ea seligenda, qualem requirit demonstratio, quam dare decrevisti. Qui in Geometria sublimiori versati methodi leges ipso usu perspexere; nihil hic affirmari norunt, quod quid insoliti habeat. Dabimus autem posthac ipsimet oculatam fidem.

§. 6.

Unde attributa divina deducenda.

Ex definitione nominali, qua utimur ad demonstrandam existentiam Dei, deducenda quoque sunt ipsius attributa. Ponamus aliquem in demonstranda existentia Dei hac uti definitione, quod sit ens, in quo continetur ratio sufficiens existentiae contingentis hujus universi, seu, quod eodem redit, qui est causa efficiens sufficiens mundi hujus adspectabilis, aut, si mavis, quod creavit coelum & terram. Ubi demonstraveris Deum existere; non aliud demonstraisti, quam existere aliquod ens, in quo continetur ratio sufficiens existentiae contingentis hujus universi, seu quod coelum & terram creavit. Quamobrem cum de Deo, quem existere evicisti, non aliud constet, quam quod de eo sumisti, & quod instar determinationum essentialium consideras (§. 142. 143. *Ontol.*); eidem quoque tribuere nequis, nisi quod vi hujus definitionis, veluti in nostro casu ideo, quod rationem sufficientem existentiae contingentis universi in se continet, seu quod coelum & terram creavit, eidem convenire intelligitur, consequenter cujus ratio sufficiens in definitione ista continetur. (§. 56. *Ontol.*). Ex definitione itaque nominali, quae in gratiam demonstrandae existentiae divinae sumitur, deducenda quoque sunt ipsius attributa seu cetera, quae eidem conveniunt.

Qui elementa Geometriae primis labris degustarunt, abunde perspiciunt, fieri debere quod hic praecipitur, ubi cer-

ram

tam de Deo cognitionem naturalem habere volueris. Et enim si quadratum definis, quod sit figura quadrilatera, æquilatera, rectangula; quæcunque eidem convenire demonstras, ea ideo ipsi convenire ostendis, quod habeat quatuor latera, quod latera sint æqualia, quod anguli sint recti. Ita si in Conicis parabolam definis per curvam, in qua rectangulum sub latere recto & abscissa æquale est quadrato semiordinatæ; quæ parabolæ convenire demonstras, ea ipsi ideo tribuenda esse ostendis, quod rectangulum istud quadrato semiordinatæ æquale sit. Immo per rerum naturam aliter id fieri nequit. Pone enim te Dei existentiam demonstrasse supposita hac definitione nominali, quod sit mundi hujus adspicibilis, seu cæli terræque creator, attributa vero derivare ex eo, quod sit ens absolute perfectissimum. Non ante constabit, attributa, quæ Deo tribuis, eidem convenire, quam ubi ostenderis, ens istud, quod cælum atque terram creavit esse absolute perfectissimum. Quando vero perfectionem summam ex definitione nominali, quam in demonstranda existentia Dei supponebas, deduxisti; quæ inde porro concluduntur, ea non minus ex eadem definitione fluunt. Tribuuntur enim Deo, quia summa ipsi convenit perfectio. Perfectio summa ipsi tribuitur, quia est cæli terræque creator. Quæ igitur eidem tribuuntur ob perfectionem summam, ea ipsi tribuuntur ideo, quod cæli terræque conditor sit. Quamdiu igitur non eviceris summam perfectionem convenire creatori hujus universi; tamdiu nec patet Deo convenire ea attributa, quæ vi perfectionis summæ eidem vindicas, nec ex adverso patet existere aliquod ens, cui ista attributa tribuenda veniunt. Apparet adeo quam sit necesse, ut cum definitione nominali Dei, quam demonstrandæ existentia ipsius substernis, connectantur attributa ipsius, immo ea omnia, quæ de Deo demonstrare intendis. Hinc vero simul intelligitur, quanta imperfectione laborent systemata Theologiæ naturalis, in quibus iste attributorum divinorum cum definitione nominali, quæ in demonstratione existentia ipsius supponitur, nexus desideratur, & cur impossibile sit ut satisfaciant iis, qui certum ab incerto discernere demonstrationis usu didicere.

§. 7.

Qualis esse Definitionem nominalem, quæ existentie divine demon-
debeat de- stranda substernitur, non plura ingredi debent, quam quæ de-
finicio Dei ducendis inde attributis ejusdem conveniunt. Ex definitione
nominalis. enim nominali, qua uteris ad demonstrandam existentiam Dei,
 deducenda sunt ejus attributa (§. 6.). Quamobrem cum non
 alio fine condatur, quam ut inde attributa divina deducas (§.
 562. Log.); nec plura eam ingredi debent, quam quæ his inde
 deducendis sufficiunt.

Non est, quod excipias, ubi demonstranda existentia Dei,
 demonstrandam esse existentiam illius entis, quod Dei nomi-
 ne indigitant omnes. Etenim ubi demonstrasti existere istius-
 modi ens, cui ea insunt, quæ in definitione nominali de Deo
 sumuntur, & postea ostendis eidem enti ob ea, quæ in defini-
 tione ista eidem tribuuntur, convenire alia quoque attributa;
 hoc ipso evidens est existere aliquod ens, cui conveniunt
 omnia ista attributa, quæ ex definitione nominali deduximus,
 consequenter existere Deum, qualem Scripturæ sacræ testimo-
 nio convicti credimus Christiani. Definitionem adeo Dei no-
 minalem in systemate Theologiæ naturalis assumptam nemo
 reprehendere potest, nisi ostendere possit ea, quæ de Deo in
 eadem sumuntur, non sufficere attributis, quæ eidem tribui
 solent, inde deducendis: quod ubi acciderit, in leges methodi
 impigisse dicendus est autor, nullo autem pacto alicujus im-
 pietatis ideo accusari potest. Si quis vero postulet, ut defini-
 tioni Dei nominali plura ingerantur, quam quæ attributis di-
 vinis inde colligendis sufficiunt, is præcipit quæ methodo de-
 monstrativæ adversantur & certæ cognitioni contraria sunt.
 Audiendus igitur non est. Quænam vero ad hoc sufficiant,
 ut attributa divina ex definitione nominali deducere possis;
 ipso opere experimur, ubi Theologiam naturalem methodo
 demonstrativa adornamus, & ceteri perspiciunt, ubi animum
 advertunt ad modum, quo Deo attributa convenientia vindic-
 cantur. Ceterum quod præsens propositio urget, singulare
 non est, sed ad communes methodi demonstrativæ regulas re-
 ferendum (§. 730. 836. Log.).

§. 8.

§. 8.

*In Theologia naturali non assumenda sunt principia demon- Qualia
strandi, nisi quæ vel experientia, vel demonstratione nituntur principia in
aut in numerum definitionum nominalium referuntur. In Theologia
Theologia enim naturali nil affirmandum, nil negandum, nisi naturali
quod demonstrari possit (§. 4), ut nimirum certa sit Dei co- sint assu-
gnitio (§. 5 (8 Log.)), consequenter agnoscamus vera esse, quæ menda.
de Deo docentur (§. 564. Log.). Enim vero in numerum prin-
cipiorum demonstrandi non assumuntur nisi definitiones no-
minales, experientiarum indubitatarum, axiomata & propositiones jam
demonstratarum (§. 562. Log.). Ergo nec in Theologia naturali
præter definitiones nominales assumi possunt principia alia, nisi
quæ vel experientia indubitata, vel demonstratione nituntur.*

Hæc & alia, quæ ad methodum spectant, non alio fine in Prolegomenis præmittuntur, quam ut caveamus, ne præjudicium præcipitando reprehendant methodi ignari, quod laudare debebant: immo ne zelo ignorantie socio damnent & in impietatem vertant, quod cognitionem Dei extra omnem dubitationis aleam ponit. Talia enim fieri posse utinam ne doceret experientia! Ceterum probe notandum est non sufficere, ut assumantur quæ vera sunt; sed nos certos quoque esse debere, quod sint vera. Certitudo autem illa vel a posteriori est, vel a priori. Quamobrem non alia admittimus principia, nisi quæ vel experientia indubitata, vel demonstratione nituntur, ubi a definitionibus nominalibus discesseris, quas esse arbitrarias nemo non novit. E. gr. verum est, dari ordinantem, ubi datur ordinans, si principium hoc intelligatur de ordine contingente, non autem de necessario. Nolim tamen hoc assumi absque demonstratione, ne exceptionibus obnoxia sint, quæ præcaveri poterant, ubi cum eo nobis negotium fuerit, qui vel negat esse Deum, vel dubitat num sit Deus, & ut satisfiat illis, qui nonnisi evidentia ad assensum compelluntur. Similiter verum est dari ordinem in hoc universo & ordinem in universo esse contingentem. Nolim tamen hæc sine pro-

batione sumi; sed demonstrandum utrumque est, ex eadem, quam modo dixi, causa. Quamobrem non probo, si quis argumentatus:

Ubi datur ordo, ibi datur ordinans.

Atqui in universo datur ordo.

Ergo datur ordinans, hoc est, Deus.

sibi videtur existentiam Dei demonstrasse. Deficit argumentatio non modo in eo, quod assumantur, quæ nec satis determinate enunciantur, nec probantur, cum tamen per se evidentia non sint; verum etiam quod per saltum ab ordinante in universo concludatur ad Deum eo sensu, quo ipsi conveniunt attributa in Scriptura sacra eidem tributa. Supponitur enim hic definitio nominalis, nos vocabulo Dei indigitare autorem ordinis in universo. Enimvero probandum est, auctori ordinis in universo convenire illa attributa, quæ Deo in Scriptura sacra tribuuntur. Sed quam sit difficile, ut hisce singulis satisfacias, alibi jam ostendimus, quando nimirum methodum demonstrandi existentiam Dei ex ordine naturæ in Horis Subsecivis A. 1730. trim. autumn. n. III. p. 640. & seqq. contemplaremur.

§. 9.

Differentia In Theologia revelata seu supernaturali non opus est, ut, Theologia quæ de Deo docentur, ex definitione aliqua nominali deducatur. Theologia enim revelata nititur hoc principio: Quicquid Scriptura sacra de Deo affirmat, illud ipsi convenit, ad quoad methodum. eoque omnis certitudo resolvitur in auctoritatem Dei dicentis, qui nec ipse falli potuit, nec fallere potest alios (§. 613. Log.). Quamobrem ibidem sufficit ostendere, quod talia attributa enti illi, quod Deum vocat, tribuit Scriptura sacra, & explicandus est significatus vocabulorum, quibus illa indignantur, atque demonstrandum, significatum iisdem tribui ex mente loquentis (§. 969. Log.): quo facto cum certi simus, enti huic, quod Dei nomine insignitur in Scriptura sacra, convenire talia attributa, & intelligamus, qualia ista attributa sint, non opus est ut demon-

demonstretur, attributa ista simul eidem enti tribui posse, consequenter ut omnia ex aliquo assumpto, adeoque ex definitione aliqua nominali, deducantur.

Hæc differentia, quæ inter Theologiam naturalem & revelatam intercedit, probe notanda, ne, quod in Theologia revelata succedere certi sumus, idem quoque in naturali fieri posse existimemus. Alia longe est ratio eorum, quæ credimus; alia vero, quæ scimus. In philosophia certi non sumus, enti alicui prædicata quædam simul convenire, nisi quæ iisdem indigitantur vel in eodem singula observamus, vel ex eo, quod de eodem assumimus, consequenter ex aliqua definitione nominali, omnia simul deducamus. Jam cum Deus invisibilis per essentiam suam in sensum non incurrat, nec attributa ejus observari possunt. Deducenda igitur sunt ex primo quodam assumpto, per quod vocabuli *Deus* significatum explicamus, hoc est, ex definitione nominali: quo facto demum constat, omnia illa prædicata, quæ Deo tribuimus, eidem enti convenire posse. Quamvis autem negari minime queat, certam de Deo cognitionem ex Theologia revelata hauriri posse, etiamsi vocabulo Dei denotari ens tibi prorsus ignotum sumas, ubi ad eam accedis, nec in eadem, quæ Deo tribuuntur, inter se connectantur, ut perspiciamus, quæ eidem tribuuntur, omnia eidem enti convenire posse; nil tamen obstat, quo minus, quæ de Deo in Scriptura sacra docentur, etiam inter se & cum prima quadam notione, quæ definitionis nominalis loco est, connectantur, quemadmodum jam alias docuimus (§. 979. *Log.*). Immo connexio attributorum divinarum inter se & cum prima quadam notione ipsa præeunte & facem præferente Scriptura sacra fieri poterat, quatenus scilicet ex eadem Scripturam per Scripturam explicando eruuntur rationes, cur Deus sibi tribuat hæc prædicata, quales erui posse pro comperto habemus: cum enim per eas pateat, quomodo per unum eorum, quæ Deo insunt, intelligatur cur insit alterum, quæ Deo in Scriptura sacra tribuuntur, a gnaro methodi haud difficulter deinde singula eo ordine disponuntur, quo unum eorum, quæ in Deo sunt, nostro

concupiendi modo a ceteris dependet. Neque inutile est eorum, quæ Deo tribuit Scriptura sacra, nexum ex ipsa Scriptura sacra deducere. Ita enim patet revelationis & rationis consensus, quo & autoritas Scripturæ sacræ haud leve accipit pondus penes eos, qui eam in dubium vocant, & veritas Theologiæ naturalis haud parum firmatur penes ceteros.

§. 10.

*Cur in
Theologia
naturali
existentia
Dei non
sit pluribus
argumentis
probanda.*

In Theologia naturali nec opus est, nec fieri commode potest, ut existentiam Dei pluribus argumentis evincas; sed unum sufficit. In Theologia enim naturali ex definitione nominali, qua utimur ad demonstrandam existentiam Dei, deducenda quoque sunt ipsius attributa (§. 6.). Quamobrem cum diversi modi demonstrandi existentiam Dei diversas supponant definitiones nominales; si existentiam Dei pluribus argumentis demonstrare volueris, ejus quoque attributa ex pluribus definitionibus nominalibus deducenda erunt, aut demonstrandum, ens illud, quod per plures definitiones nominales indigitatur, esse unum idemque, quatenus ex eo, quod in una definitione sumitur, deducitur quod sumitur in altera. Quamobrem aut plures condendæ erunt Theologiæ naturales, in quibus idem traditur diverso modo, aut una reduci debet ad alteram, ita ut partem quandam nanciscantur communem, ne labor inutilis in eodem bis, ter, quaterve addiscendo multiplicetur. Pluribus adeo argumentis in Theologia naturali existentia Dei commode demonstrari nequit. *Quod erat unum.*

Quodsi unico argumento demonstraveris existentiam Dei & ex eadem definitione nominali, qua uteris in demonstranda existentia, cetera quoque deduxeris, quæ eidem conveniunt (§. 6.); utique certus es, Deum existere & ipsi convenire ea omnia, quæ ex definitione nominali assumpta deduxisti (§. 568. Log.), consequenter agnoscis verum esse, quod existat Deus & quod talia ipsi prædicata conveniant (§. 564. Log.). *Quam-*

Quamobrem cum Theologiam naturalem alio fine non addiscamus, quam ut agnoscamus verum esse, quod existat Deus & quod talia de ipso sint affirmanda; argumentum unum ad demonstrandam existentiam Dei sufficit. *Quod erat secundum.*

Poni denique existentiam Dei pluribus argumentis demonstrari, & demonstrationes omnes esse legitimas; singulis argumentis certus evadis existere Deum & talia de ipso prædicanda esse (§. 568. *Log.*), consequenter dum secundo, tertio, quarto uteris argumento, id verum esse agnoscis, quod verum esse jam nosti (§. 564. *Log.*). Quamobrem cum non opus sit, ut docearis verum esse, quod verum esse jam agnoscis; nec firmior sit assensus, qui pluribus demonstrationibus nititur, quam qui ab una pendet, quia assensus per demonstrationem extortus integer est, nihil ancipitis amplius admittens, seu omnem oppositi formidinem excludens, quemadmodum ex modo demonstrationis *n. 2.* intelligitur; pluribus argumentis demonstrandi existentiam Dei in Theologia naturali opus non est *Quod erat tertium.*

Qui plus præsidii in pluribus argumentis, quam in uno positum esse existimant, probabilia cum demonstrativis confundunt. Rationes enim probabiles plures simul fortius subinde stimulare possunt assensum, quam una; demonstrationes autem plures non magis convincunt, quam una. Rationes imbecilles non majus acquirunt robur, ubi conjunguntur, ita ut tandem vi demonstrationis non cedant, quemadmodum sibi persuadent, qui multitudine argumentorum delectantur vim demonstrationum nunquam in se ipsis experti. Præstat uno argumento uti, quod vi assensum extorquere valet, quam multa imbecillia congerere, quæ per se ad convincendum invalida sunt.

§. II.

Theologia naturalis principia ex Ontologia, Cosmologia & Principia Psychologia petit. Etenim in Theologia naturali demonstranda Theologie sunt, naturalis.

sunt, quæ de Deo docentur (§. 2.). Quoniam itaque methodo demonstrativa tradenda, ex Ontologia Cosmologia & Psychologia principia petere debet (§. 96. *Disc. prælim.*).

Cur in Theologia naturali ex Ontologia, Cosmologia & Psychologia principia peti debeant demonstrandi, in Discursu præliminari, quem Logicæ præmisimus, jam docuimus: alibi adeo jam dicta denuo repetere nolumus, præsertim cum eorum, quæ in hisce Prolegomenis monemus, fidem oculatam daturi simus in ipsa tractatione. Citationes abunde loquentur, quot & quænam principia ex singulis istis disciplinis sumenda sint. Nec alia de causa Theologiam naturalem post Ontologiam, Cosmologiam & Psychologiam tractamus, quam quod illarum auxilio in Theologia naturali indigeamus. Propositionis vero præsentis usus hic est, ut Ontologiæ, Cosmologiæ ac Psychologiæ studeamus, antequam ad Theologiam naturalem accedamus: nisi enim principia, quibus in demonstrando utimur, familiaria experiamur, vim demonstrationis, qua assensus extorquendus, non percipimus, immo multa ne quidem satis intelligimus.

§. 12.

*Theologia
naturalis
usus in re-
futandis
atheis.*

Per Theologiam naturalem optime refutantur athei & erroris sui redarguuntur. Negant enim athei dari Deum, qualem nimirum Christiani veneramus: sit enim quod vocabulo Dei primam rerum causam indigint, quam aliis prorsus attributis, quam divinis indutam comminiscuntur. Enimvero in Theologia naturali demonstratur existentia Dei, demonstrantur quoque quæ ipsi conveniunt attributa (§. 4.). Quamobrem cum propositionem veram demonstrando contraria refutetur (§. 1035. *Log.*); per Theologiam naturalem, si nimirum methodo demonstrativa traditur, athei optime refutantur.

Idem etiam hoc modo ostenditur. Atheus negat dari Deum, negat Deo convenire attributa, quæ autoritate Scripturæ sacræ permoti Deo tribuimus. In Theologia naturali de-

mon-

monstramus Deum existere, demonstramus attributa, quæ ei conveniunt (§. 4), & patebit ex ipsa tractatione ea non esse alia, quam quæ Scriptura sacra Deo tribuit. Quamobrem ex ea discimus, quomodo atheus convincendus existentiz & attributorum divinorum (§. 990. *Log.*), consequenter quomodo efficiamus, ut ipsi certum sit, Deum existere & ea ipsi convenire attributa, quæ ipsi tribuuntur (§. 982. *Log.*), adeoque falsum esse agnoscat Deum non existere, nec ipsi convenire attributa, quæ eidem tribuuntur (§. 564. *Log.*). Erroris igitur sui per theologiam naturalem, si demonstrativa tractetur methodo, redarguitur atheus (§. 623. *Log.*).

Usum hunc Theologiæ naturalis nemo non agnoscit. Absolum vero est, si qui contendunt, Theologiam naturalem hunc usum amittere, ubi demonstrativa tractetur methodo, cum nonnisi ex accidente eidem conveniat, quando diversa ab hac methodo tractatur, ut scilicet probationes sufficienter non evolvantur, nec quæ de Deo traduntur inter se connectantur. Quando vero quis probationi non prorsus evidenti cedit, ejus parum firmus est assensus: fieri enim potest ut objectionibus in dubitationem adducatur, qui extra omnem dubitationis aleam se jam positum esse sibi videbatur.

§. 13.

*In Theologia naturali tradendæ sunt notiones distinctæ eorum, quæ de Deo docentur. Etenim in Theologia naturali demonstrandum est, quod Deo convenit, & quod per ea, quæ de Deo in ipsi insunt, fieri posse intelligitur. Ponamus itaque demonstrandum esse, quod Deus sit sapientissimus, seu quod ipsi conveniat sapientia perfectissima. Quoniam Deo tribuis sapientiam perfectissimam, quia ipsi ea inesse demonstrare vales, quæ ad sapientiam perfectissimam requiruntur (§. 349. *Log.*); necesse est ut singulas, quæ notionem sapientiz perfectissimæ ingrediuntur, notas recenseas (§. 79.). Sapientiam igitur perfectissimam notione distincta explicare teneris (§. 88. *Log.*). Et idem eodem*

dem modo patet de attributo, immo in genere de prædicato quocunque alio.

Nimirum in iis, quæ experientiae fide admittuntur, subiecto tribuere possumus, quod notione distincta explicare minime valemus. Ita iridi tribuimus colores, quibus cum superbire observamus, etsi nullius eorum notionem distinctam habeamus. Sacharo tribuimus dulcedinem, utut, quid sit dulcedo, distincte alteri explicare minime valeamus. Enimvero si demonstrandum esset, iridi hos, quibus superbit, non alios colores tribuendos esse & sacharo dulcedinem convenire; nemo non, qui quid sit demonstratio novit, ultro largitur, demonstrationem ante dari non posse, quam in casu priore notiones distinctas colorum, in posteriori dulcedinis habueris. Quamobrem cum in Theologia naturali vi demonstrationis Deo vindicentur, quæ ipsi conveniunt; quin eorum quoque notiones distinctas habere debeamus, nisi inanem in demonstrando operam consumere velimus, vel exemplorum inductione admittere tenetur, qui rationes perspicere nequit. Et in sequentibus palam fiet, nihil a nobis affirmari, quod non distincta notione explicetur, ut & intelligi, & cum altero communicari possit.

§. 14.

*Quo sensu
accipienda
vocabula in
Theologia
naturali.*

In Theologia naturali vocabula, quibus significantur ea, quæ Deo tribuuntur, sumenda sunt in significato recepto. Et enim in omni philosophia a recepto significato verborum recedendum non est (§. 142. Disc. prælim.), nec termini philosophici semel recepti sunt immutandi (§. 147. Disc. prælim.). Quamobrem cum Theologia naturalis philosophiæ pars sit (§. 57. Disc. prælim.); vocabula, quibus significantur ea, quæ Deo tribuuntur, sive communia fuerint, sive in numero terminorum philosophicorum reperiantur, in significato recepto sumenda.

Cur hoc in specie de Theologia naturali urgeamus, quod
jam

jam generaliter de omni philosophia evicimus, rationes speciales subsunt. Paucissimi enim sunt, qui diversimode enunciata eadem esse posse intelligunt & nullo non tempore matæologorum proprium fuit verba philosophorum in alienum eumque perversum sensum vertere, ut errores noxios per fallaces consequentias inde inferre atque ipsis imputare possint. Philosophi igitur est, ut caveat ne significatus vocabulorum immutatione argumentum ab invidia ducendi ansam suppeditet consequentiariis.

§. 15.

In Theologia naturali significatus vocabulorum, quibus attributa divina & operationes in Scriptura sacra indignantur, catus, quem is retineri debet, quem in hac habent. Etenim Theologia naturalis inservire debet convincendis atheis, dari istiusmodi ens, S. S. retinendus. quale Scriptura sacra Dei nomine insignit (§. 12.). In eadem vero existentia & attributa divina una cum operationibus eiusdem demonstranda sunt (§. 4.). Quamobrem ut palam sit, non alia de Deo demonstrari in Theologia naturali, quam quæ Scriptura sacra de eodem docet; necesse est vocabulis, quibus attributa divina & operationes ejusdem indignantur, non alium tribui significatum, quam qui in Scriptura sacra ipsis tribuitur. Retinendus adeo est is, quem in Scriptura habent.

Idem etiam sic ostenditur. Quando inter nos de Deo sermo incidit, non aliud ens intelligitur, quam quod Scriptura sacra hoc nomine insignit. Quamobrem quando quæritur, num Deus etiam lumine rationis agnosci possit, & ut affirmativa evincatur Theologia naturalis conditur (§. 1.4.); in ea demonstrandum est, existere istiusmodi ens, quale Deum appellat Scriptura sacra, consequenter cui ista conveniunt attributa, istæ operationes, quæ Deo in Scriptura sacra tribuuntur. Ne igitur in verbis sit dissensus & hoc non obstante consensus in re demum prolixis ambagibus sit evincendus; necesse omnino est, ut vocabulis, quibus attributa divina & cetera Deo in Scriptura

(*Wolfii Theol. Naturalis*) C sacra

sacra tributa insigniuntur, non alius tribuatur significatus, quam quem in Scriptura sacra habent.

Ut consensus Theologiæ naturalis cum Scriptura sacra manifestior evadat, nos in ipsa tractatione vocabulis singulis vindicabimus significatum, quem ipsis tribuit Scriptura sacra & ejus identitatem cum nostro, si non statim appareat, demonstrabimus. Sunt enim plures, qui cum verbis Scripturæ notiones parum distinctas, nec satis determinatas jungunt, quibus hoc pacto consulere nostrum esse judicamus.

§. 16.

*Qualis sit
significatus
vocabulo-
rum isto-
rum in S. S.*

Quoniam verba, quibus in Scriptura sacra indignantur attributa divina, non definiuntur, in significatu communi quia sumantur dubitandum non est (§. 971. Log.). Quamobrem si in Theologia naturali significatus vocabulorum, quibus attributa divina una cum operationibus ejus indignantur, retinetur, quem in ea habent; vocabula eadem sumuntur in significatu recepto.

Atque ita patet, non præcipi quæ sibi mutuo repugnant, dum in Theologia vocabulorum, quibus quæ Deo conveniunt, significantur, & significatum receptum, & in Scriptura sacra obvium urgemus.

§. 17.

*Theologia
naturalis
explet sci-
endi deside-
rium.*

Theologia naturalis exsatiat animum sciendi cupidum.
Etenim contingentia in mundo non habent rationem sufficientem actualitatis suæ in serie successivorum, sed in ente alio extra seriem istam constituto, eoque necessario (§. 90. Cosmol.). Quamobrem cum in Theologia naturali demonstratur, ens istud esse Deum & per ea, quæ Deo insunt, reddatur ratio ultima illius actualitatis; animi vero sciendi cupidi desiderium tum expleatur, ubi rationem sufficientem fuerit assecutus, ut non supersit amplius, quod quæras: per Theologiam naturalem animus sciendi cupidus exsatiatur.

Ex

Ex ipsa tractatione veritas propositionis præsentis multo magis patet. Videbimus enim attributa divina esse rationes ultimas omnium eorum, quæ sunt. Quamobrem cum intellectui non ante fuerit satisfactum, quam ubi ultimas rationes fuerit assecutus; absque Theologia naturali ut sciendi desiderium expleatur fieri minime potest. Atque hinc in philosophia practica aliquando ostensuri sumus, quod Theologia naturalis plurimum conferat ad perfectionem intellectus humani.

§. 18.

Theologia naturalis inservit divinitati S. S. evincendæ. Eius utilitas in divinitate S. S. evincendæ.
Etenim in Theologia naturali demonstratur, Deum existere; demonstratur quoque, hæc ipsi convenire attributa & hæc per ea concipi operationes divinas (§.4.). Quamobrem cum in Theologia naturali vocabulis, quibus attributa & operationes divinæ indignantur, eundem tribuamus significatum, quem in Scriptura sacra habent (§. 15); ex ea absque ulla difficultate intelligitur, in Theologia naturali eadem demonstrari de Deo, quæ de eodem docet Scriptura sacra, consequenter homo solis naturæ viribus adjutus agnoscit vera esse, quæ de Deo tradit Scriptura sacra (§. 544 Log.). Quamobrem cum in ipsa Theologia naturali demonstreretur consensum hunc Theologiæ naturalis cum Scriptura sacra esse aliquod requisitum divinæ revelationis (§. 464.); per eundem probabilis fit Scripturæ sacræ divinitas (§. 578. Log.). Præterea ubi de voluntate divinæ agimus in Theologia naturali, præter hoc requisitum divinæ revelationis traduntur adhuc alia absque iis, quæ in Theologia naturali docentur, nec intelligenda, quantum sufficit, nec rite applicanda. Quoniam itaque divinitas Scripturæ sacræ evincitur, dum probatur ei convenire requisita divinæ revelationis; Theologia naturalis eidem evincendæ inservit.

Vel hoc nomine Theologia naturalis negligenda non est a Christianis, etsi omnia, quæ in eadem demonstrantur, leviori opera ex Scriptura sacra addiscantur. Etenim non modo aliis,

qui Scripturæ sacræ divinitatem vel impugnant, vel in dubium vocant, eandem probare tenemur, verum etiam ubi nobismet ipsis subinde scrupuli injiciuntur eos animo eximere debemus. Huic autem scopo Theologia naturalis inservit, quatenus divinitatis Scripturæ sacræ evincendæ modum & principia tradit.

§. 19.

Manuductio ad Theologiam revelatam.

Quoniam *Theologia naturalis* divinitati Scripturæ sacræ evincendæ inservit (§. 18.), in Scriptura sacra vero traduntur, quæ ad Theologiam revelatam spectant; *ad Theologiam revelatam nos manuducit.*

Ad evincendam divinitatem Scripturæ sacræ non sufficit solus consensus Theologiæ naturalis cum eadem; quem admodum ex iis intelligitur, quæ ad veritatem propositionis præcedentis adstruendam in medium adduximus. Quamobrem nec consensus iste solus animadversus nos ad Theologiam revelatam manuducit, &, ubi quosdam manuducit, id nonnisi ex accidente est. Inde enim est, quod qui Naturalistæ vocantur ita studeant Theologiæ naturali, ut revelatam prorsus contemnant, aut saltem insuper habeant. Notandum vero communiter in Theologia naturali non doceri criteria revelationis divinæ, ut adeo præter ejus cum Scriptura sacra consensum, qui sua sese sponte tradit, non doceantur alia. Hunc igitur defectum nos supplevimus, ne Theologiam naturalem usu quodam, quem habere poterat, eoque admodum præclaro privaremus. Cæterum hinc Theologiæ naturalis addiscendæ necessitatem perspiciunt, qui revelatæ operam navant.

§. 20.

Quomodo Naturalistis confutandis inserviat.

Theologia naturali Naturalistis confutandis inservit. Naturalistæ enim sunt, qui Theologia naturali contenti revelatam vel rejiciunt, vel saltem cognitu minus necessariam judicant. Enimvero inter criteria revelationis divinæ in Theologia naturali referemus, quod objectum ipsius cognitu necessarium (§. 451) & attributis divinis conforme esse debeat (§. 452.). Quamobrem

obrem eadem suppeditat principia, quibus ad Scripturam sacram applicatis, evincitur Theologiæ revelatæ necessitas atque veritas. Naturalistis itaque confutandis inservit.

Non est quod objicias, proflare exempla in contrarium, quæ apertissime loquantur, dari Naturalistas magno numero, ubi Theologia naturalis maxime excolitur, ita ut non desint qui hinc sibi aliisque persuadere conantur, Theologiam naturalem in præjudicium revelatæ excoli. Enimvero id non vitio disciplinæ, sed autorum fieri solet, qui in Theologia naturali negligunt principia, quibus revelatæ necessitas evincitur. Quamobrem nos defectum hunc suppleturi non modo criteria revelationis divinæ, sed alia quoque inseruimus principia, quibus ad Theologiæ revelatæ necessitatem comprobendam habemus opus & unde in philosophia practica principia propiora deducuntur, quibus in ea stabilienda opus habemus. Accedit quod ad Naturalistas, quos Theologiæ naturalis studium a revelata alienare videtur, in viam reducidos conducat, si in hac tradenda quoad methodum observentur, quæ de eadem monuimus, cum usum Logicæ in interpretanda Scriptura sacra exponeremus (§. 979. & seqq. Log.) & applicato criterio de veritatum revelatarum cum attributis divinis consensu, ratio convenientiæ ex Theologiæ naturalis principiis reddatur, utut ex iisdem demonstrari minime possint.

§. 21.

Theologia naturalis principia tradit juri naturali. In *Ufus Theologie naturalis in Jure naturali* traditur discrimen actionum bonarum atque malarum (§. 68. *Disc. Prælm.*). In actionum bonarum numero etiam sunt officia erga Deum, quæ sine principiis Theologiæ naturalis cognosci minime posse vel exinde intelligitur, *li.* quod ratio eorum desumenda sit ex iis, quæ Deo conveniunt. Præterea in Jure naturali evincendum est, Deum nos obligare ad actiones eas committendas vel omittendas, quæ sunt juris naturalis: id quod absque principiis Theologiæ naturalis fieri

minime posse intelligitur. Apparet itaque Theologiam naturalem principia tradere Juri naturali.

Quando Jus naturale tradituri sumus, satis superque patebit, quoties ad Theologiam naturalem nobis sit recurrendum. Inprimis autem tenendum est, quod in philosophia morali ostensuri sumus, officia erga Deum in omnes omnino actiones liberas influere, quas esse bonas in Jure naturali demonstraturi sumus, & omnem omnino virtutem ad gradum sublimiorem evehere atque studium virtutis in universum mirifice facilitare. Quamobrem usus Theologiæ naturalis, quem hic commendamus, maximi fieri debet & illorum præsertim attentionem meretur, qui formandis aliorum moribus præsunt. Usus omnis non rectius intelligitur, quam ubi eundem ipso opere experimur. Quæ igitur de usu Theologiæ naturalis inculcantur omnium optime comprehenduntur, ubi eundem consequi studemus. Quem præsens promittit propositio, cum in philosophia practica sperari jubemus, quam cum principiis Theologiæ naturalis connectemus. Patebit autem eum esse multo ampliorem, quam ex dictis sperari poterat. Nostrum enim non est asserere, quæ quod sint veritati consentanea, intelligi nondum potest.

§. 22.

Unde Theologia naturalis juvetur. *Scriptura sacra Theologiæ naturali adjumento est.* Et enim in Scriptura sacra ea quoque de Deo docentur, quæ ex principiis rationis de eodem demonstrari possunt: id quod nemo negat, qui in lectione Scripturæ sacræ fuerit versatus. Suppeditat igitur Theologiæ naturali propositiones, quæ in ea demonstrari debent, consequenter philosophus eas non demum invenire, sed tantummodo demonstrare tenetur. Enimvero qui & in veritatibus inveniendis, & in jam inventis demonstrandis versati fuere, ultro consentitur facilius esse veritates jam inventas demonstrare, quam nondum inventas reperire, immo

immo demonstrari posse inventas, quas reperire non poteramus, etiamsi arte inveniendi pollecamus, propterea quod de iis cogitandi antea non suppeditabatur. Apparet itaque Scripturam sacram Theologiae naturali adjumento esse.

Non defunt Theologi (quos inter *Ruardum Andalam* nominasse sufficiat in Compendio Theologiae naturalis, quod in Syntagmate Theologico-Phyfico-Metaphyfico legitur, (§. 14. Proleg. pag. 6.) contententes, perfectiones, decreta & opera, quae in Scriptura sacra Deo tribuuntur, seposita Theologia naturali, nec recte intelligi, nec explicari posse. Quemadmodum vero non probamus illorum sententiam, qui Scripturae sacrae interpretem philosophiam faciunt; ita quoque a veritate alienum existimamus, doctrinam de Deo, quatenus Scriptura cum Theologia naturali communia tradit, sine hac intelligi in illa minime posse. Etenim si notiones cum verbis Scripturae jungendas ex Theologia naturali petere deberemus, metuendum omnino erat, ne in Scripturam invehemus sensum a mente ejus alienum. Praestat notiones verbis Scripturae jungendas independentem a Theologia eruere, ut constet quinam sit verborum Scripturae sensus & quanam de Deo doceat Scriptura: ita enim ex notionum identitate rectius deinde judicabitur de consensu, quo ad stabilendam divinitatem Scripturae sacrae opus habemus. Quando vero propositiones in sensu Scripturae ad Theologiam naturalem transferuntur, ac in ea ex ceteris tanquam ex principiis demonstrantur, nemo arguari potest nos in eam invehere, quae ab eadem aliena sunt.


§. 23.

Datur Theologia naturalis. Ex sequente enim tractatio- *An detur* ne elucescit, dari Deum, & ejus non minus existentiam & at- *Theologia* tributa demonstrari posse, tum & ea, quae per eadem fieri *naturalis.* posse intelliguntur. Quamobrem cum in Theologia natu-
rali

rali hæc demonstrari debeant (§. 4.), quin ejus possibilitas in dubium vocari minime possit palam est (§. 170. *Ontol.*).

Negat *Socinus* in Prælectionibus theologicis cap. 2. dari Theologiam naturalem, quod integri dentur populi, qui nulum penitus sensum aut suspicionem divinitatis alicujus habent, nec præstantissimi quidam philosophi huc pervenire potuerint, ut Deum hæc inferiora curare suspicarentur. Enimvero a multorum ignorantia non recte colligitur cognitionis impossibilitas (§. 79. *Ontol.*). Qui negant existentiam Dei & attributa ejus ex principiis rationis demonstrari posse, non rectius erroris sui convincuntur, quam ubi demonstrationes ipsas exhibemus. Quamobrem contra eos, qui cum *Socino* sentiunt, adstructuri dari Theologiam naturalem, ad tractationem provocamus. Judicent enim, num alia doceantur in philosophia, quæ firmiori nituntur fundamento.

Prolegomenorum Finis.



THEOLOGIÆ NATURALIS

P A R S I.

Q U A

EXISTENTIA ET ATTRIBUTA DIVINA A POSTERIORI DEMONSTRANTUR.

C A P U T I.

De Existentia Dei & Attributis independentibus.

§. 24.



Existit ens necessarium. Anima humana existit (§. 21. *Psychol. empir.*), seu nos existimus (§. 14. *Psychol. empir.*). Quoniam nihil est sine ratione sufficiente, cur potius sit, quam non sit (§. 70. *Ontol.*) ; ratio sufficiens detur necesse est, cur anima nostra existat, seu cur nos existamus. Hac adeo ratio aut in nobismetipsis continetur, aut in ente quodam alio a nobis diverso (§. 53. *Ontol.*). Quod si ponas nos rationem existentiae habere

Entis necessarii existentia.

D

bere

bere in ente, quod denuo rationem existentiae suae in alio habet; non pervenietur ad rationem sufficientem, nisi tandem in ente aliquo subsistas, quod existentiae suae rationem sufficientem in se ipso habet. Aut igitur nosmetipsi sumus ens necessarium, aut datur ens necessarium aliud a nobis diversum (§. 309. *Ontol.*), consequenter ens necessarium existit.

Haftenus non evicimus nisi existentiam animae nostrae contra Materialistas (§. 21. *Psychol. empir.* & §. 47. *Psychol. rat.*), quorum hypothesein de materialitate animae evertimus (§. 50. *Psych. rat.*). Quoniam tamen iidem non negant nos existere, quatenus nobis nostri sumus consci, consequenter existentiam animae tanquam entis sui ipsius consci admittere tenentur; existentiam quoque entis necessarii vi illationis praesentis admittere tenentur. Et quoniam Idealistae nonnisi animarum realem existentiam concedunt, corporum vero negant (§. 36. *Psych. rat.*), qui autem Dualismum profitemur, existentiam animae immaterialis admittimus (§. 39. *Psych. rat.*); existentiam entis necessarii ex animae nostrae existentia illatam & Idealistae admittere tenentur, & Dualistae admittere tenentur. Praesentis adeo propositionis demonstratio ab omni hypothese philosophorum independens: id quod necessario requiritur, siquidem universalis esse debet, ut, non obstantibus sententiarum divortiis, assensum cujuslibet extorqueat. Neque etiam per saltum procedit demonstratio, inferendo quod ex assumpto inferri minime potest, quemadmodum faciunt illi, qui ex eo, quod ante certum quendam annorum numerum in utero materno geniti fuerint, colligunt animam tum coepisse, consequenter non semper extitisse: quo admissio, evidens foret ens necessarium diversum esse debere ab anima nostra, cum nos idem adhuc in dubio relinquamus. Etenim certum est, animam a parentibus cum corpore generari non posse (§. 700. *Psych. rat.*), etsi Materialistae idem asserere teneantur in gratiam hypotheseos suae (§. 701. *Psych. rat.*), & saltem maxime probabile eam praexistere ante formationem foetus in utero (§. 704. *Psych. rat.*). Quamobrem ex eo, quod non habeamus memoriam alicujus status ante nativitatem, multo mi-

nus ante generationem corporis in utero, inferre haud quamquam datur, nos ante formationem corporis in utero materno minime extitisse. Cautè igitur ac provide incedimus, ne in demonstrationes, quas validas esse volumus, tacite irreperant errores vel controversiæ difficillime definiendæ, exceptionibus locum præbituræ, si attenta mente perveſtigentur probationes. Eadem cautione etiam utemur in ſequentibus.

§. 25.

Ens neceſſarium non indiget vi entis alterius ad exiſtendum. *An ens ali-*
 Ens enim neceſſarium rationem ſufficientem exiſtentia ſua in ſe ^{ad ſuppo-} habet (§. 309. *Ontol.*) adeoque in ente nullo alio a ſe diverſo. ^{nat.}
 Exiſtit igitur, etiamſi ens aliud ab ipſo diverſum nullum exiſtere ponatur (§. 118. *Ontol.*), conſequenter vi entis alterius ad exiſtendum non indiget.

Idem etiam ſic oſtenditur. Ponamus ens neceſſarium indigere vi entis alterius ad exiſtendum. Per ea igitur, quæ ipſi inſunt, nondum intelligitur, cur exiſtere potius debeat, quam non exiſtere: ut enim intelligatur, requiritur etiam vi entis alterius ab ipſo diverſi. Quoniam adeo ratio ſufficiens exiſtentia in ipſius eſſentia non continetur (§. 56. *Ontol.*); non erit ens neceſſarium (§. 309. *Ontol.*): quod cum hypotheſin everſat, abſurdum eſt.

§. 26.

Quoniam ens neceſſarium non indiget vi alterius ad exiſtendum (§. 25.), vi propria exiſtit, ſeu ſibiſmetipſi ſufficit ad exiſtat.
exiſtendum.

Quomodo quid vi propria exiſtat, diſtinctè explicare minime valemus. Quomodo quid exiſtat vi alterius, abunde intelligitur: quotidie enim experimur cauſarum efficientium in effectus influxum, quo ad actualitatem perducitur, quod antea non erat. Atque hinc magis negante, quam agente ſenſu ens quodpiam a nobis dicitur vi propria exiſtere, ita ut idem

sonet ac non existere vi alterius. Nimirum quando intelligimus, quid sit existere vi alterius, ea removemus ab ente; quod propria vi existere ponitur.

§. 27.

*Ens a se
& ab alio
quodnam
dicatur.*

Ens illud, quod vi propria existit, sed quod non indiget vi entis alterius ut existat, dicitur *Ens a se*: quod vero indiget vi alterius ut existat, *Ens ab alio* appellatur.

Nimirum hic quoque notandum est, *Ens a se* a nobis dici negante magis, quam agente sensu, ut a se esse ponatur, quod non esse ab alio intelligitur.

§. 28.

*Aseitas
quid sit.*

Aseitas est independentia existentiae ab ente alio.

Terminus hic cum sit in Theologia naturali receptus, cum ut explicaremus consultum duximus.

§. 29.

*Entis a se
existentia.*

Datur ens a se. Ens enim a se non indiget vi entis alterius, ut existat (§. 27.), adeoque per ea, quae ipsi insunt intelligi potest, cur potius existat, quam non existat, consequenter rationem existentiae suae sufficientem in seipso habet (§. 56. *Ontol.*). Quamobrem cum sit ens necessarium (§. 309. *Ontol.*), ens vero necessarium existat, seu detur (§. 24.); ens a se datur.

Hanc propositionem ideo addimus, quod Deum definituri paulo post in definitione nominali loco generis posituri sumus ens a se. Antequam vero id fiat, evincendum nobis est, ens a se non esse animam nostram, nec esse mundum hunc materiale, si ejus existentiam realem admittas, quemadmodum admittimus, qui Dualismum profiteamur, admittunt etiam qui Materialismo addicti sunt. Etenim quam primum constabit, ens a se esse ab anima & mundo materiali diversum, ipsa necessitas postulabit, ut ipsum peculiari quodam nomine insigniamus. Diversitatem igitur adstructuri inquirere teneamur in attributa entis a se, ex aseitate deducenda, ut appareat,
num

num eadem animabus nostris, num corporibus, adeoque mundo huic materiali repugnent. Animadversa enim repugnantia inter attributa entis a se & animam atque corpora palam erit, illud ab his esse diversum.

§. 30.

Ens a se independens est. Ens enim a se non indiget vi *Independentis* alterius, ut existat (§. 27.), adeoque existere potest, *ria entis a* etiam si præter ipsum ens aliud non existat. Quamobrem cum *se.* essentia non minus (§. 300. *Ontol.*), quam attributa & modorum possibilitates proximæ immutabilia sint (§. 313. *Ontol.*), ut adeo ens sine determinatione aliqua essentiali, vel quodam attributo existere nequeat; nihil datur in ente a se, quod rationem sui habeat in ente alio. Ens igitur a se independens est (§. 851. *Ontol.*).

Terminus independentiæ philosophicus est, neque in Scriptura sacra occurrit. Insunt tamen ea, quæ ex independentia fluunt, & cum eadem necessario connexa sunt, ita ut his positis ponatur quoque independentia tum in essendo, tum in existendo, tum in operando, quemadmodum loquuntur scholæ: id quod suis locis annotaturi sumus.

§. 31.

Ens a se rationem existentiae in essentia sua habet. Ex- Undenam enim ens a se independens est ab omni ente alio (§. 30.), con- *sit existen-* sequenter & existentiae suæ rationem in alio non habet (§. 851. *ria ipsius.* *Ontol.*). Habet igitur eandem in se (§. 70. *Ontol.*). Quamobrem cum in essentia contineatur ratio sufficiens, cur quid eidem vel actu insit, vel inesse possit (§. 168. *Ontol.*); ratio existentiae entis a se in essentia ipsius contineri debet.

Hinc & ens a se hoc ipso distinguitur ab entibus ceteris, quæ sunt ab alio, quod existentia ipsius fluat ex essentia ejusdem, cum in entibus ceteris idem non obtineat. Quare & *ens a se* definiri poterat per illud, quod rationem existentiae

sua sufficientem in essentia sua habet : unde patet ejus cum ente necessario identitas (§. 309. *Ontol.*). Quodsi verbis magis communibus idem efferre libuerit ; dicendum erit : ens a se esse illud , ex cujus essentia necessario fluit existentia , ut scilicet concipi non possit nisi existens , quam primum animo observantur determinationes ipsius essentielles. Singularis hic character est entis a se , qui probe notandus & qui conducit tum ad ens a se agnoscendum , tum ad cavendum , ne pro talibus nobis obtrudantur , quæ non sunt. Sane ubi entis ortus nos latet , & in eum inquirentes inanem operam sumimus , facile delabimur ad præcipitandum judicium , ipsum non cœpisse & hinc ipsi tribuimus necessitatem in existendo , quasi vera existentia ratio sufficiens allegari possit necessitas. Existentia in genere considerata necessaria non est , adeoque necesse est detur ratio sufficiens , cur in ente aliquo potius necessario sit , quam contingens. Ratio continetur in essentia (§. 158. *Ontol.*) , adeoque per determinationes essentielles entis intelligitur , cur existentia potius necessaria sit , quam contingens , consequenter hæ ipsæ determinationes essentielles sunt ratio existentia necessaria. Nempe per determinationes qua tales intelligitur , cur enti competat existentia : ex eo vero , quod determinationes istæ essentielles sunt , fluit existentia necessitas tanquam ex fonte necessariorum (§. 303. *Ontol.*). Ut idem evidentius pateat , non piget ex propositione præsentē ulterius deducere , quæ ad hunc scopum conducunt. Utile enim est ut in argumento tam arduo nihil prætermittatur , quod eidem lucem aliquam affundere possit.

§. 32.

*Qualis sit
existentia
entis a se.*

Quoniam ens necessario existit & ejus existentia absolute necessaria est , si hujus ratio sufficiens in essentia ipsius continetur (§. 308. *Ontol.*) ; ens a se necessario existit & ejus existentia absolute necessaria est.

Apparet adeo nexus necessarius inter aseitatem & existentiam necessariam , quem cum esse , ut uno posito ponatur etiam alterum , propositio sequens cum corollario præsentē probat.

§. 33.

§. 33.

Ens necessarium est ens a se. Ens enim necessarium non *Entis ne-* indiget vi entis alterius ad existendum (§. 25.). Sed ens, quod *cessarii at-* non indiget vi alterius, ut existat, est ens a se (§. 27.). Ergo *tributionem* ens omne necessarium est ens a se. *a seitas.*

Idem etiam sic ostenditur. Existentia entis a se est absolute necessaria (§. 32.), & rationem existentiz suæ in essentia sua habet (§. 31.). Quamobrem cum ens necessarium sit, cujus existentia absolute necessaria, seu quod rationem sufficientem existentiz suæ in essentia sua habet (§. 309. *Ontol.*); ens necessarium est ens a se.

§. 34.

Ens a se existit ideo, quia possibile. Etenim ens a se habet rationem sufficientem existentiz in essentia sua (§. 31.) *se existat.* consequenter per essentiam ipsius intelligitur, cur existat (§. 56. *Ontol.*), atque adeo ideo existit, quia hanc habet essentiam. Enim vero per essentiam ens possibile est (§. 153. *Ontol.*), ita ut essentia possibilitas ejus intrinseca absolvatur (*not. §. cit.*). Ens igitur a se existit, quia possibile.

Nimirum ens a se possibile, quia determinationes essentielles, quæ eidem tribuuntur, contradictionem nullam involvunt (§. 85. *Ontol.*): existit autem, quia has determinationes habet essentielles. Quamobrem cum determinationes ejus essentielles sibi mutuo non repugnent, quia sunt hæ ipsæ determinationes, per quas ut non existens concipi nequit; ideo concipitur existere, quia possibile. Atque hoc est privilegium entis a se, quod ideo existat, quia possibile: quæ enim sunt ab alio, ideo nondum existunt, quod sint possible. Et inde est, quod ex possibilitate in genere non concludatur existentia, nec existentia in genere aut in se spectata possibilitate determinetur (§. 171. 172. *Ontol.*). Nam in ente a se singulari quadam ratione fit, cur per id existat, per quod possibile, scilicet quia per has ipsas

ipsas determinaciones, quarum combinatione oritur possibilitas intrinseca, determinatur existentia.

§. 35.

*Existentia
entis a se
cur careat
initio.*

Ens a se nullum existendi initium habet. Etenim ens a se necessario existit & ejus existentia absolute necessaria (§. 32.). Quamobrem simpliciter impossibile, ut non existat (§. 279. Ontol.). Ponamus igitur esse aliquod existendi initium: necesse erit, ut antea non extiterit, consequenter impossibile non est, ut non existat: quod cum repugnet demonstratis, absurdum est, adeoque ens a se nullum existendi initium habet.

De existentia entis a se eodem modo ratiocinamur, quo de possibilitate, propterea quod ideo existit, quia possibile (§. 34.). Quemadmodum enim possibile necessario tale est, ac ideo quæri nequit, quando possibile quid esse cœperit; ita quoque existentia entis a se necessaria est, nec quæri potest, quando cœperit.

§. 36.

*Cur fine
careat.*

Ens a se nullum existendi finem habet. Ponamus enim ipsum habere existendi finem. Non igitur simpliciter impossibile est, ut ens a se non existat, consequenter existentia ejus necessaria non est (§. 279. Ontol.): quod cum sit absurdum (§. 32.); ens a se nullum existendi finem habere potest.

§. 37.

*Impossibi-
litas ortus
& interitus
entis a se.*

Ens a se nec ortum est, nec interire potest. Etenim ens a se existendi initium non habet (§. 35.). Sed quod oritur ex-
& interitus istere incipit, cum antea non existeret (§. 541. Ontol.), adeo-
que existendi initium habet. Ens igitur a se ortum non est.
Quod erat primum.

Similiter ens a se nullum existendi habet finem (§. 36.). Sed quod interit, existere desinit, cum antea existeret (§. 541. Ontol.), adeoque existendi finem habet. Ens igitur a se inte-
rire nequit. *Quod erat secundum.*

Hinc

Hinc apparet, ens a se non dici quasi ortum a se, non ab alio. — Etenim ortus a se implicat contradictionem. Nimirum si quod ens a se oriretur, in eodem contineri deberet ratio sufficiens hujus ortus, qua posita poneretur & ipse (§. 118. *Ontol.*). Enimvero ens oritur, dum existere incipit, cum antea non existeret (§. 541. *Ontol.*). Quamobrem si quod ens a se oritur, antea non existeret, consequenter nec ratio quædam sufficiens poni potest, per quam & ortus ponatur. Oriri adeo debet absque ratione sufficiente, consequenter ortus a se contradictionem involvit (§. 31. *Ontol.*).

§. 38.

Ens a se annihilari nequit. Ponamus enim, si fieri potest, ens a se annihilari. Existere igitur definit, cum antea existens annihilationis sequenter interit (§. 541. *Ontol.*). Enimvero ens a se interire nequit (§. 37.). Ergo nec annihilari potest. *Impossibilitas annihilationis entis a se.*

Existencia necessaria, unde pendet interitus impossibilitas (§. 37.); ex essentia ejus entis quod a se est fluit (§. 31.). Unde annihilatio essentia ejusdem non minus repugnat, quam ortus quicunque.

§. 39.

Existencia nec initium, nec finem habens dicitur *Æternitas*: unde *Æternum* appellatur, quod nec initium, nec finem habet existendi, seu si nullum assignari potest tempus, quo existere cœpit & quando existere desinet. *Æternitas quid sit.*

Scholastici æternitatem definiunt per durationem interminabilem, indivisibilem & independentem. *Interminabilitas* est exclusio termini a quo & termini ad quem, seu negatio initii ac finis, consequenter duratio interminabilis ea est, quæ nullum habet initium, nullum habet finem. Atque hæc Scholasticorum definitio nostræ consona. Si duratio distincte explicetur, sine relatione ad existentiam successivorum intelligi nequit. Dicimus enim durationem existentiam simultaneam cum pluribus successivis (§. 578. *Ontol.*). Quamobrem

obrem aut supponenda sunt entia alia, ab eo, de cujus duratione loquimur, diversa, quæ continua serie sibi invicem succedunt, dum illud existit, aut series quædam mutationum concipienda in ente, quod singulis istis coexistere concipitur, dum durationem ejus cogitamus. Ens a se existere potest, etiamsi extra ipsum ens aliud ab eo diversum non existat (§. 27.), adeoque duratio non potest concipi per relationem ad entia successiva extra ipsum coexistentia. Utrum ipsi conveniat series quædam mutationum, nec ne; definiri nondum potest, consequenter nec licet durationem concipere per relationem ad mutationes intrinsecas sibi mutuo succedentes. Quamobrem consultius erat in definitione æternitatis abstinere a vocabulo durationis, præsertim cum nulla urgeat necessitas, ut eodem utamur. Æternitatem esse indivisibilem ex eo, quod sit interminabilis, demonstrari potest. Definitionem adeo non recte ingreditur Indivisibilitas (§. 836. *Logica.*). Æternitatem esse independentem demonstrare tenemur, cum per se evidens non sit, existentiam initio ac fine carentem esse independentem ab alio, immo non desunt, qui dependentem æternitatem admittunt, seu defendunt enti cuidam existentiam interminabilem competere posse, utut in existendo dependeat ab alio. Cavendum itaque erat confusionis evitandæ gratia, ne definitionem nominalem æternitatis præter necessitatem controversiis implicaremus. Ceterum quando dicimus, nullum assignari posse tempus, quo quod æternum est cæpit vel existere desinet; id non ita intelligendum est, quod ob ignorantiam nostram id fieri minime possit, sed quod ipsa rei natura hoc non patiatur: sit ita, quod per inconstantiam loquendi significatus subinde mutetur, a qua philosophia nostra abhorret.

§. 40.

Nullum dari potest tempus, quo æternitatem metiri licet.

*Æternitatem num
metiri liceat.*

Sit enim tempus quantumlibet magnum, quod dicamus *T*, æternitatis mensura. Quoniam magnitudinem metimur, si iterata mensuræ applicatione determinatur mensurari ad mensuram ratio (§. 438. *Ontol.*); tempus *T* ad æternitatem applicari debet,

bet, quoties fieri potest, ubi idem metiri volueris. Enimvero cum in æternitate nullum sit initium (§ 39.), reperiri minime potest, ubi applicationis mensuræ initium fieri debeat. Et quia nec finis in eadem datur (§. cit.), nec concipi potest numerus, quo indigitetur, quoties tempus T sit sumendum, ut æternitati fiat æquale vel eam superet aliqua sui parte. Nullum igitur dari potest tempus T, quo æternitatem metiri licet.

Vulgo homines æternitatem instar temporis infiniti imaginantur: sed æternitatem Dei esse quid diversum patebit inferius. Atque tum constabit, eandem esse temporis prorsus heterogeneam, nec cum eodem comparabilem.

§. 41.

Immensum dicitur, quod mensuram omnem respuit, seu *Immensum* quod in se tale est, ut metiri ipsum non detur. Unde & *imsum* quid telligitur *Immensitas* quid sit, abstractum nempe, quo *immen-* *fit.* *sum* dicimus.

Inconstantia loquendi immensum quoque appellatur, cuius ingens est magnitudo, sed quæ a nobis mensurari non potest, veluti cum distantiam fixarum immensum dicere solemus.

§. 42.

Æternitas immensa est. Etenim in se talis est, ut eam *Immensitas æterni-* metiri minime liceat (§. 40.). Est igitur immensa (§. 41.). *tatis.*

Unde qui æternitatem tempus infinitum imaginantur; immensum tempus eandem appellant: quod non improbandum, ubi tibi negotium fuerit cum vulgo, non cum philosopho. Vulgus enim, cui confusæ tantummodo sunt notiones, ægre concipit, quæ ab imaginibus separantur. Ac subinde utile est, ut æternitatis immensitatem temporis idea intelligibilem aut si mavis imaginabilem eidem efficias: quod quomodo fieri possit, in sequente propositione ostendere libet.

§. 43.

Quomodo

Si tempus quoddam stupendæ magnitudinis, hoc est, tantæ immensitas tum, quantum dari posse non cogitaveras, distincte percipere cognoscere æternitatis veris, idque pro mensura æternitatis accipi non posse cogites; imaginabilis immensitas æternitatis efficietur quodammodo intelligibilis, seu efficiatur imaginabilis. Quoniam ideam temporis non habemus, nisi quatenus successiva in continua serie nobis representamus (§. 572. Ontol.) ; tempus quoddam stupendæ magnitudinis nobis representaturi cogitemus, omne spatium, quod sphaera illa comprehendit, cujus diameter est dupla fixarum a centro terræ distantia, arena adimpleri & singulis millenariis aut, si magis arri-

ferit, millenariis mille elapsis unum arenae granulum amoveri, donec tandem nullum relinquatur. Cum distantia fixarum tanta sit, docente *Hugenio* in *Cosmotheoro* lib. 2. p. m. 116, ut pene septingenta annorum millia insumiturus sit globus tormenti bellici continua velocitate, qua exploditur incedens, priusquam ad proximas stellarum inerrantium perveniat ; globus autem tormentarius, quemadmodum experimentis definitum a *Mersenno* in *Ballisticis Phœnomenis* prop. 39. p. 139. & ejus fide sumitur ab *Hugenio* loc. cit. p. 106, intervallo unius minuti secundi seu pulsibus arteriarum singulis centum circiter hexapedas seu 600. pedes *Parisienses* conficiat ; quanta sit spatii arena repleti vastitas, quantus arenae qua repletur numerus, quantus annorum, quo arenae granula singula auferuntur, ut nullum amplius super sit, haud obscure intelligitur. Quod si ergo cogites, stupendum hunc millenariorum numerum, qui omni arenae granulatim amovendæ sufficit, ne mensuræ quidem loco adhiberi posse, ubi de magnitudine æternitatis incidit questio (§. 40.) ; æternitatis immensitas quodammodo imaginabilis evadet. Habes hic tempus stupendæ magnitudinis, & , ubi volueris, idem distincte percipere datur. Etenim ex datis inveniri

veniri potest distantia fixarum proximarum a terra in hexapedis vel etiam pedibus ope regulæ trium (§. 310 *Arithm.*), modo notes in reductione annorum 700000, tot adjiciendos dies intercalares, quos prodeunt, ubi 700000 per 4 diviseris, cum annus unusquisque quartus sit intercalaris: quamvis in præfente negotio tanta scrupulositate opus non sit, vbi spatium arena replendum pro arbitrio assumere licet. Data sphaeræ semidiametro inveniri potest ejus soliditas (§. 556. *Geom.*) & quantum spatium occupet arena in vase cylindrico contenta, reperiri idem licet (§. 541. *Geom.*): unde numerando arenæ granula, quæ in spatio digitali continentur, numerus arenularum in isto vase, ac inde porro in vastissima ista sphaera definitur (§. 302. *Arithm.*). Quodsi ergo eum, qui prodit, numerum porro vel per mille, vel millies mille, prout libuerit, multiplices; stupendus ille annorum nūmerus prodibit, qui spatio tam vasto evacuando impendendus ex hypothesi. Atque jam multo magis intelliges, quid sibi velit æternitatis immensitas, cum ne tanti quidem numeri replicatione exhaustiri possit (§. 40.). Patet igitur immensitatem æternitatis imaginabilem effici, ut de ea cogitantes in stuporem veluti raptantur, ubi tempus stupendæ magnitudinis distincte percipere coneris, idque pro mensura æternitatis accipi non posse cogites.

Calculus apponere nolimus, quem Geometriæ elementaris gnari facile addent, si e re ipsis videatur. Qui vero sunt in Mathesi hospites, a calculorum tricis abhorrent, adeoque si is apponeretur ipsos non juvat. Notamus potius, usui hic esse Arenarium *Archimedis*, in quo summo ingenii acumine arenæ granula determinat, quæ sphaera Terræ concentrica & ad fixas proximas usque extensa capit, & tantum numerum intelligibili modo effari docet. Cum enim non deessent alii, qui vel grana arenæ innumerabilia in Tellure pronuntiarent, vel saltem tantum reperiri posse numerum desperarent, qui numerum granulorum arenæ excederet; ipse con-

trarium demonstraturus ostendi, recto characteristicae artis usu intelligibili modo effari nos posse numerum, qui major sit numero arenæ totam sphaeram mundanam ad fixas usque protensam adimplente.

§. 44.

Entis primi & ultimi definitio.

Ens primum dicitur, ante quod non existit aliud. Ens ultimum vero appellatur, post quod non existet aliud.

Vocabula *primum* & *ultimum* sumuntur hic in significato recepto: ecquis enim est qui nesciat, in omni multitudine illud dici primum, ante quod aliud obvium nobis non est; ultimum autem, post quod non deprehenditur aliud, ad istam scilicet multitudinem pertinens, respectu cuius quid primum dicitur vel ultimum.

§. 45.

Quodnam ens sit primum & ultimum.

Ens a se est ens primum & ultimum. Ens enim a se nullum existendi initium habet (§. 35.). Impossibile itaque est, ut ante ipsum extiterit ens quoddam aliud. Ens præterea a se rationem sufficientem existentiae suæ in essentia sua habet (§. 31.), cumque sit ens necessarium (§. 33.), vi entis alterius ad existendum non indiget (§. 25.), adeoque ne nostro quidem concipiendi modo spectari potest aliquod ens tanquam ante ipsum existens. Erit igitur ens primum (§. 44.). *Quod erat unum.*

Similiter ens a se nullum existendi finem habet (§. 36.). Impossibile igitur est, ut post ipsum, hoc est, ubi existere desit, ens aliquod existat. Est igitur ens ultimum (§. 44.). *Quod erat alterum.*

Ex demonstratione liquet, primitatem entis a se excludere prioritatem & temporis, & ordinis omnis entis alterius; ultimationem vero posterioritatem tantum temporis, non ordinis, ut adeo *primitas* denotet præexistentiam independentem, *ultimatio* vero dicat negationem successionis dependentis, qualis spectatur in hominibus, quorum posterius ab ipsis in existendo dependentes iisdem succedunt.

§. 46.

§. 46.

Ortus & interitus essentiae entis a se repugnat. Ens enim *Ortus & interitus* a se existentiae suae rationem sufficientem in essentia sua habet *cur essentia* (§. 31.) , adeoque essentia ipsius posita ponitur etiam existentia *entis a se* ejusdem (§. 118 *Ontol.*) , consequenter eadem salva non ex- *repugnet.* istentia poni nequit (§. 28 *Ontol.*) . Non existentia igitur essen-
tiae entis a se repugnat (§. 310 *Log.*) . Enimvero cum illud o-
riatur, quod existere incipit, cum antea non existeret; ex ad-
verso autem intereat, quod existere desinit, cum antea existe-
ret (§. 541 *Ontol.*) ; ortus & interitus non existentiam involvit.
Uterque igitur essentiae entis a se repugnat.

Mox apparebit, cur non sufficiat nosse, quod ens a se
nec oriri, nec interire queat (§. 37.) ; sed quod praecise constare
debeat, essentiam entis a se non ferre, ut oriatur & intereat.
Ita nimirum facilius agnoscemus, quale sit ens a se, ut ipsum
a ceteris distinguamus, nec per errorem aseitatem tribuamus
enti, quod est ab alio, nec a se esse potest. Nemo igitur ac-
cuset nimiam subtilitatem in iis, in quibus nunquam nimium
subtiles esse possumus evidentiam conservaturi, quam tanti ar-
gumenti dignitas postulat, & quam conservari non posse cer-
tum est, nisi exceptiones praeviae pracludantur.

§. 47.

Ens a se non est ens compositum. Etenim ens a se per es- *Aseitas cur*
sentiam suam oriri ac interire nequit (§. 46.) . Enimvero ens *repugnat*
omne compositum oriri ac interire potest (§. 542 *Ontol.*) . Ens *composi-*
igitur a se compositum esse nequit. *tioni.*

Cum ortus & interitus essentiae entis a se repugnet (§. 46.) ,
per essentiam vero entis compositi ponatur (§. 542. *Ontol.*) ;
aseitas & compositio sibi mutuo repugnant.

§. 48.

Ens a se extensum esse nequit, & quod est extensum a *Extensio*
se esse nequit. Ens enim a se non est compositum (§. 47.) , *aseitati re-*
adeo *pugnans.*

adeoque partes, a se invicem distinctas non habet (§. 531. *Ontol.*). consequenter cum extensum omne habeat partes, quarum unaquæque extra alteram existit (§. 549. *Ontol.*), ens a se extensum esse nequit.

Ex adverso quod extensum est habet partes, quarum una extra alteram existit (§. 549. *Ontol.*), adeoque ens compositum est (§. 531. *Ontol.*). Quare cum ens a se compositum esse non possit (§. 47.); nec quod extensum est a se esse potest.

Atomi materiales cum sint extensæ, a se esse nequeunt.

§. 49.

Simplicitas entis a se. **Ens a se est ens simplex.** Ens enim a se compositum esse nequit (§. 47.), adeoque nullas prorsus habet partes (§. 531. *Ontol.*). Est igitur ens simplex (§. 673. *Ontol.*).

Simplicitas enti a se essentialis est, quemadmodum facile apparet. Deducitur enim ex eo, quod compositum esse non possit (§. *præf.*), compositio autem negatur de eo, propterea quod ortus & interitus eidem repugnat (§. 47.). Quamobrem cum uterque eidem per essentiam repugnet (§. 46.); compositionis per essentiam expers est, adeoque simplicitas eidem essentialis.

§. 50.

Cur mundus non sit ens a se. **Mundus adspectabilis non est ens a se.** Mundus enim hic adspectabilis est ens compositum (§. 62. *Cosmol.*); sed ens a se compositum esse nequit (§. 47.). Mundus igitur hic adspectabilis non est ens a se.

Supponimus hic cum Dualistis & Materialistis mundum adspectabilem extra ideam mentis existere. Nimirum si mundus adspectabilis revera extra mentem nostram existit, non est ens a se. Aseititas cum enti composito per essentiam ipsius repugnet, quemadmodum modo observavimus (*not.* §. 49.) per essentiam quoque mundo huic adspectabili repugnare debet.

Pro

Probe vero notandum est, mundo adspectabili repugnare aseitatem, quatenus est compositum, ne plus sumatur in conclusione, quam eidem inest. Etenim cum constet corpora, ex quibus tanquam partibus componitur mundus (§. 119. *Cosmol.*), esse substantiarum simplicium aggregata (§. 176. *Cosmol.*); eo ipso nondum patet, aseitatem repugnare his ipsis substantiis simplicibus, adeoque corporum elementis (§. 182. *Cosmol.*).

§. 51.

Mundus adspectabilis est ab alio. Mundus adspectabilis Cur sit ab non ens a se (§. 50.), adeoque vi propria non existit (§. 27.). *alio.* Quoniam itaque vi alterius indiget, ut existat; ab alio sit necesse est (§. 27.).

Et sic ab alio non idem est ac productum esse ab alio (§. 27. *Theol. nat. & §. 541. Ontol.*). Quamvis itaque ostenderimus mundum hunc adspectabilem, quem realiter existere supponimus, esse ab alio; hoc ipso tamen nondum evictum est, quod ab alio productus sit. Etenim si elementa rerum materialium sunt a se, mundus rationem compositionis sufficientem in ipsis habens erit quidem ab alio, nimirum ab his ipsis elementis, sine quibus existere non potest, nec tamen dici poterit, quod sit ab elementis productus.

§. 52.

Elementa rerum materialium non sunt entia a se. Quoniam enim corpora omnia sunt elementorum aggregata (§. 176. *Cosmol.*); corpora quoque, ex quibus tanquam partibus componitur mundus (§. 119. *Cosmol.*), consequenter mundus ipse existere nequit, nisi existant elementa. Et quia si alius mundus & que possibilis ac is, qui existit (§. 101. *Cosmol.*), existere deberet, elementa alia existere deberent (§. 570. *Cosmol.*); hisce existentibus elementis mundus alius quam hic existere nequit. Quamobrem cum mundus hic adspectabilis non sit ens a se (§. 50.), consequenter nec ens necessarium (§. 33.); nec elementa rerum

Cur elementa non sint entia a se.

(*Wolfii Theol. Naturalis*)

F

rum

rum materialium entia necessaria, consequenter nec entia a se sunt.

Idem etiam per indirectum ostenditur. Ponamus elementa rerum materialium esse entia a se. Eorum igitur existentia erit absolute necessaria (§. 32.). Quamobrem cum alia existere deberent elementa, si alius existeret mundus (§. 570. *Cosmol.*), nec hæc elementa alio modo coexistere possint (§. 571. *Cosmol.*), adeoque positis hisce elementis hic quoque ponatur mundus; hic etiam mundus necessario existit & ejus existentia absolute necessaria est. Est igitur ens necessarium (§. 309. *Ontol.*), adeoque ens a se (§. 33): quod est absurdum (§. 50.).

Qui sumit mundum, quatenus est ens compositum, non esse ens a se, elementa tamen a se esse posse; vi imaginationis a se invicem separat non separanda. Etenim in corporibus nihil datur substantiale præter entia simplicia (§. 177. *Cosmol.*), materia vero & vis motrix tantummodo phænomena substantiata sunt (§. 300. *Cosmol.*), quæ tanquam diversæ substantiæ apparent (§. 301. *Cosmol.*). Dum corpora percipimus, anima sibi confuse repræsentat substantiarum simplicium mutationes intrinsecas (§. 98. *Psychol. rat.*). Quamobrem cum elementa rerum singula vi quadam prædita sint (§. 196. *Cosmol.*), unde status eorum internus continuo mutatur (§. 197. *Cosmol.*), atque adeo elementa absque hisce statuum mutationibus existere minime possint; impossibile quoque est, ut elementa existere concipiantur absque mundo hoc adspectabili, sed is ponitur positus elementis, nec tolli potest nisi sublati elementis. Quodsi ergo mundo adspectabili existentia absolute necessaria tribui nequit, nec elementis tribui potest, cum diversam ab hisce existentiam minime habeat, sed elementorum existentia sit existentia ipsius mundi. A veritate procul absunt, qui elementa rerum considerant tanquam materiam ad varias formas suscipiendum aptam, sine quibus existere possit, de natura rerum judicantes ex notione operum artis, quorum materia existit, antequam eidem certam figu-

ram inducit artifex. Ut igitur impedimenta superemus, quæ imaginatio facessere poterat, probe perpendenda sunt, quæ de ortu corporum ex elementis capite integro (§. 215. & seqq. *Cosmol.*) tradidimus in Cosmologia. Si qui fuerint, qui theoriam elementorum, quam ibidem stabilimus, rejiciunt; illis quoque nullum circa existentiam eorundem dubium suboriri potest, consequenter præsens propositio eos minime tangit. Quoniam vero iidem elementorum loco vel assumere debent atomos materiales, vel materiam uniformem, quæ diversas figuras recipere potest; igitur in eorum gratiam ostendere libet, nec atomos materiales, nec materiam uniformem concipi posse instar entium a se.

§. 53.

Atomi materiales non sunt entia a se. Atomus enim *Cur atomi* materialis est particula in se divisibilis, sed cui dividendo nullæ *materiales* interum natura causæ existunt (§. 186. *Cosmol.*), unde conse- *non sint* quitur figuræ immutabilitas, cum sine divisione mutatio figuræ *entia a se* concipi non possit, & vi continuitatis absoluta densitas. Determinationes adeo intrinsecæ sunt continuitas, partium actualium exclusio, figura ac moles immutabilis, indivisibilitas ex defectu dividendi, absoluta densitas. Sed quicquid horum cogites, siue etiam omnes istas determinationes simul perpendas, non tamen intelliges, cur atomi materiales existere debeant. Quamobrem cum determinationum istarum aliz in numero essentialium, aliz in attributorum numero sint (§. 143. 146. *Ontol.*); in essentia atomorum materialium ratio existentiz non continetur (§. 56. *Ontol.*). Non igitur sunt ens a se (§. 31.).

Non minus necessarium est, ut ens a se rationem existentiz in essentia sua habeat, consequenter per determinationes constantes, quæ ipsi insunt, intelligatur, quod existere debeat (§. 56. *Ontol.*), quam triangulum tres habere angulos (*not.* §. 31.) Quamobrem atomorum materialium aseitatem admitti minime posse palam est. Neque sufficit atomorum necessariam

existentiam sumi: eam enim sumi posse probandum est. Enimvero ne quidem possibilitatem atomorum materialium ostenderunt Atomistæ, tantum abest, ut de eorum existentia necessaria evincenda cogitaverint. Quemadmodum vero necessitas in existendo sumi nequit, ita nec necessitas figuræ ac molis sumi potest, sed probanda: probari autem eam non posse, vel exinde intelligitur, quod, si in atomis materialibus subsistamus, nondum perveniatur ad rationem sufficientem compositionis (§. 686. *Ontol.*). Poteramus igitur aseitatem remove ab atomis materialibus vel hoc nomine, quod ne quidem possibiles sint, cum impossibile existere non posse certum sit (§. 132. *Ontol.*). Sed placuit inservire hypothesi.

§. 54

Cur materia uniformis, seu indivisa non possit esse ens a se.

Materia indivisa seu uniformis non potest esse ens a se.
Etenim in materia indivisa seu uniformi ob continuitatem non distinguuntur nisi partes possibiles & præterea eidem tribuitur divisibilitas. Sed neque per uniformitatem, neque per partium actualium exclusionem, neque per continuitatem, neque per divisibilitatem intelligi potest, cur istiusmodi extensum necessario existere debeat. Unde eodem, quo in propositione præcedente, modo patet, materiam indivisam seu uniformem non posse esse ens a se.

Repetenda hic sunt, quæ ad propositionem præcedentem modo annotavimus, etenim quæ ibidem de existentia necessaria atomorum materialium dicta sunt, ea quoque ad materiam uniformem indivisam applicari possunt ac debent. Ceterum cum spatium imaginarium ab hac materia non differat, nisi in eo, quod illud indivisibile, hæc divisibilis sit; eodem etiam modo patet, spatium imaginarium non posse esse ens a se, consequenter plurimum falli, qui spatium vel pro ipso Deo, vel pro attributo quodam divino, veluti pro immensitate ejus habent.

§. 55.

Quale ens sit mundus.

Mundus ad spectabilem non est ens necessarium, sed contingens.
Mun-

Mundus enim adspectabilis non est ens a se (§. 50.) Quamobrem cum ens necessarium sit ens a se (§. 33.) ; mundus hic adspectabilis ens necessarium esse nequit. *Quod erat unum.*

Porro cum mundus hic adspectabilis sit ens ab alio (§. 50.), vi alterius indiget cur existat (§. 27.) consequenter per ea, quæ ipsi insunt, non intelligitur, cur potius existat, quam non existat, atque ideo rationem existentiz suæ in se non continet (§. 56. Ontol.). Est igitur contingens (§. 310. Ontol.). *Quod erat alterum.*

Poteramus quoque idem cum dependentia ab alio adhuc aliter ex contingentia eventuum in mundo demonstrare; sed ne in argumento arduo nimis multa præsupponamus, hac potius via incedere libuit. Addemus tamen deinceps (§. 58.) demonstrationem inde petitam in eorum gratiam, qui in Cosmologicis satis sunt versati.

§. 56.

Elementa rerum materialium sunt entia ab alio atque contingentia. Neque enim entia a se sunt (§. 52.). Unde eodem, quo superius (§. 51.), modo patet, quod sint ab alio. *Quod erat primum.* *Elementa qualia sint entia.*

Et cum ex iis, quæ in propositione præcedente demonstrata sunt, patet, ex eo, quod quid sit ab alio, deduci quod sit ens contingens; elementa quoque in numerum entium contingentium referenda veniunt. *Quod erat secundum.*

Tota nimirum demonstratio propositionis superioris (§. 51) & præcedentis applicari potest ad præsentem.

§. 57.

Non impossibile est mundum hunc adspectabilem & elementa ejus non existere. Mundus enim adspectabilis ens contingens est (§. 55.), adeoque necessarium non est (§. 311. Ontol.), *An possibile sit mundum non existere.*

Ontol.) , consequenter eius existentia absolute necessaria non est (§. 309. *Ontol.*). Non igitur impossibile est , mundum hunc adspectabilem non existere (§. 279. *Ontol.*). *Quod erat unum.*

Elementa rerum materialium sunt entia contingentia (§. 56.). Unde eodem , quo ante , modo patet non esse impossibile , ut elementa ista non existant. *Quod erat alterum.*

Posterius etiam sic ostenditur. Ponamus impossibile esse , ut elementa rerum materialium non existant. Quoniam in elementis continentur rationes ultimæ eorum , quæ in rebus materialibus deprehenduntur (§. 191. *Cosmol.*) ; positis hisce elementis ponitur etiam hic mundus (§. 118. *Ontol.*). Quodsi ergo impossibile fuerit , ut elementa rerum materialium non existant ; impossibile etiam erit , ut mundus hic adspectabilis non existat : quod cum sit absurdum (*vi num. 1.*) impossibile quoque non est , ut elementa rerum materialium non existant.

Equidem non ignoro , eos , qui creationem cum *Spinoza* per necessariam emanationem ex essentia divina explicant , admittere , ens aliquod posse esse ab alio & hoc tamen non obstante necessario existere. Sed non moramur eos , qui non ex notionibus sufficienter resolutis ratiocinantur sumentes in gratiam hypothesis , quod commodum visum fuerit , aut tacite supponentes , quod probare non possunt. Inferius autem ostendemus , notionem istam creationis esse deceptricem , a veritate procul remotam.

§. 58.

Cur mundus cum suis elementis non sit ens a se.

Mundus cum elementis suis non potest esse ens a se, sed ens ab alio est. Contingentia enim in mundo non habent rationem sufficientem actualitatis suæ in serie successivorum , sed in ente extra seriem ipsam constituto , eoque necessario (§. 90. *Cosmol.*). Quamobrem mundus hic existere non potest , nisi existat ens aliud necessarium ab ipso diversum. Indiget adco vi alterius ad existendum , consequenter non est ens a se (§. 27.).

(§. 27). Et quia rationes ultimæ eorum, quæ in rebus materialibusprehenduntur, in elementis continentur (§. 191. *Cosmol.*), consequenter rationes ultimæ successione in mundo adspectabili continentur in mutatione status elementorum interni (§. 197. *Cosmol.*), hæc vero sufficiens non est (§. 90. *Cosmol.*); igitur nec elementa existere possunt nisi existente ente necessario ab ipsis diverso. Indigent igitur & ipsa vi alterius ad existendum, adeoque entia a se non sunt (§. 27.).

Quoniam adeo mundus cum suis elementis existere nequit, nisi existat ens necessarium, adeoque vi alterius indiget ad existendum (*per demonstrata*); necesse est eum cum elementis suis esse ens ab alio.

Hanc propositionem non alio fine addimus, quam ut uramur ad existentiam entis a se evincendam contingentia, quæ inest huic rerum seriei, & vi cuius a seitas removeretur a toto hoc universo. Inprimis etiam utile est ad veritatem propositionis præsentis facilius percipiendam, ne difficultatem facesset imaginatio, probe perpendi, in corporibus nihil dari substantiale præter entia simplicia (§. 177. *Cosmol.*) nec dum contingentia in mundo adspectabili percipimus, aliud quid ab anima representari quam substantiarum simplicium mutationes intrinsecas (§. 98. *Psych. rat.*).

§. 59.

Anima non est ens a se. Anima enim per essentiam & naturam suam sibi representat hoc universum (§. 66. 67. *Psychol. rat.*) & universi huius ideam continuo quoad omnes status (§. 190. *Psych. rat.*), etiam in somno producit (§. 191. *Psych. rat.*). Quemadmodum vero alii mundi possibiles sunt, in quibus ad actum deducerentur possibilia, quæ in præsentem actum non consequuntur (§. 101. *Cosmol.*); hæ animæ ideo existunt, quia hic existit mundus, & huic mundo cœxistunt, quia hanc habent essentiam atque naturam. Quamobrem cum impossibile non sit, mundum hunc adspectabilem non

Cur anima non sit ens a se.

non existere (§. 57.); nec impossibile erit has animas non existere. Non igitur existunt necessario (§. 279. *Ontol.*), consequenter necessariae non sunt (§. 309. *Ontol.*). Quamobrem nec entia a se esse possunt (§. 33.).

Demonstratio propositionis praesentis adhuc subsistit, etiamsi cum Idealistis sumas, mundum tantummodo idealiter existere in animabus. Etenim cum alii quoque possibiles sint mundi, ratio dari debet, cur haec potius existant animae, quam aliae mundum quendam alium sibi repraesentantes, quam in ipsis animabus reperire minime licet. Demonstratio propositionis praesentis multo evidentior est in hypothese harmoniae praestabilitae, etsi ab eadem minime pendeat. Etenim in hac hypothese anima per naturam & essentiam suam non potuit uniri nisi huic corpori, cum in systemate influxus physici & causarum occasionalium indifferens sit ad unionem cum quolibet corpore (§. 719. *Psych. rat.*). Quamobrem cum corpus humanum sit pars hujus mundi adspectabilis, utpote ad eundem eodem modo pertinens, quo cetera corpora ad ipsum spectant (§. 61. *Cosmol.*); quod animae haec contingenter existere debeant, quia mundus contingenter existit, evidentissimum est, utpote non exituræ nisi existeret mundus.

§. 60.

*Aseitas
cum simp-
licitate
non reci-
procat.*

Non omne ens simplex est ens a se. Etenim animae humanae sunt entia simplicia (§. 48. *Psych. rat.*) & in horum numero etiam sunt elementa rerum materialium (§. 182. *Cosmol.*) Enim vero nec animae humanae (§. 59.), nec elementa rerum materialium sunt entia a se (§. 52.). Non omne igitur ens simplex a se est.

Aseitas igitur ex simplicitate minime fluit. Quoniam vero ens omne compositum non potest esse a se (§. 47.), consequenter vi alterius indiget ad existendum (§. 27.), adeoque ab alio est (§. *cit.*); non sine ratione quaeri poterat, cur non aequè quod compositum non est, hoc est, ens simplex (§. 685. *Ontol.*), sit ens a se. Etenim aseitas non fluit ex eo, quod
quid

quid partibus careat, adeoque oppositam composito essentiam habeat, sed quod talis sit essentia, quam sine existentia concipi repugnat, ita ut positis determinationibus essentialibus ponatur & ipsa existentia (§. 31.).

§. 61.

Anima est ens ab alio idemque contingens. Etenim non *Cur anima* est ens a se (§. 59.), adeoque vi propria non existit (§. 27.), *sit ens ab* consequenter vi alterius existere debet, seu ea ad existendum *alio,* opus habet (§. 53. *Ontol.*). Est igitur ab alio (§. 27.). *Quod* erat unum.

Quoniam anima ab alio est *per demonstrata*; vi propria existere nequit (§. 27.), consequenter non est ens necessarium (§. 26.), adeoque contingens (§. 311. *Ontol.*). *Quod erat* alterum.

Demonstratio propositionis prorsus eadem, qua superius evicimus contingentem & ab alio ente dependentem existentiam mundi & elementorum (§. 55. 56.).

§. 62.

Ens a se diversum est a mundo, elementis & animabus no- *Cur ens a se* *stris.* Etenim ens a se continet in essentia sua rationem suffi- *sit diver-* cientem existentiae suae (§. 31.). Mundus, elementa & animae *sum a mun-* humanae cum non sint entia a se (§. 50. 52. 59.); nec rationem *do, elemen-* existentiae suae in essentia sua continent. Quamobrem essentia *ris & ani-* entis a se diversa est ab essentia mundi, elementorum & anima- *ma,* rum (§. 183. *Ontol.*): nimirum id, unde pendet necessitas in existendo, essentiis illorum entium commune non est cum essentia entis a se. Ens igitur a se diversum esse debet a mundo, elementis & animabus nostris.

Propositio praesens non modo insinuat ens a se esse aliud, quam mundum, elementa & animas humanas: id enim idem foret ac asserere, quod non sint entia a se; verum id urget, quod alterius prorsus generis sit, quam mundus, elementa & *(Wolfii Theol. Naturalis)* *G* ani-

animæ humanæ, atque adeo essentiam habere debeat prorsus singularem. Diversitas illa ex sequentibus elucescet. Cum enim mundus, elementa & animæ nostræ sint entia finita; ens a se infinitum & perfectissimum esse deprehendimus.

§. 63.

Ratio sufficiens existentia entis ab alio in quo quaerenda.

Ens ab alio non continet rationem sufficientem existentia suæ nisi in ente a se. Si neges: contineat ens ab alio rationem sufficientem existentia in ente, quod itidem est ab alio. Quoniam ens ab alio indiget vi alterius, ut existat (§. 27.), veluti vi entis A; nondum intelligis, cur ens primum ab alio existat, nisi ubi constet, cur existat A & ita porro in infinitum. Quamobrem fieri non potest, ut perveniatur ad rationem sufficientem, quando in ente ab alio subsistis (§. 56. *Ontol.*). Enimvero cum ens a se non indigeat vi alterius, ut existat (§. 27.), adeoque ens omne vel sit a se, vel ab alio (§. 53. *Ontol.*), ratio vero sufficiens existentia entis ab alio non continetur in ente aliquo, quod itidem ab alio est *per demonstrata*; necesse est ut contineatur in ente a se (§. 70. *Ontol.*).

Propositionem hanc generalem præmittimus, ut inde per modum corollarii deduci possit, quæ sequitur.

§. 64.

Ratio sufficiens existentia mundi elementorum & animarum ubi quaerenda.

Quoniam mundus hic adspectabilis (§. 51.), elementa rerum materialium (§. 56.) & animæ humanæ sunt entia ab alio (§. 61.); entia vero ab alio rationem sufficientem existentia suæ non agnoscant nisi in ente a se (§. 63.); *mundus hic adspectabilis, elementa rerum materialium & animæ humanæ rationem sufficientem existentia suæ non habent nisi in ente a se.*

Propositio hæc magni momenti. Est enim fundamentum omnis cognitionis Dei a posteriori, quemadmodum ex subsequentibus intelligetur.

§. 65.

§. 65.

Enti a se talia tribuenda sunt prædicata, qualiâ ad hoc requiruntur, ut intelligatur, cur hic potius mundus adspectabilis cum elementis suis quam alius & hæc potius animæ quam aliæ existant. Et enim ens a se continet rationem sufficientem, cur hic potius mundus adspectabilis cum elementis suis, quam alius, & hæc potius animæ quam aliæ existant (§. 64.). Per ea igitur, quæ enti a se insunt, intelligatur necesse est, cur hic mundus cum suis elementis & animæ humanæ hæc potius existant quam mundus alius aliæque animæ humanæ; immo simpliciter cur hic mundus cum elementis suis & animabus humanis existat potius, quam non existat (§. 56. Ontol.). Quamobrem enti a se tribuenda sunt ea prædicata, sine quibus non intelligitur, cur hic mundus adspectabilis cum suis elementis hisque animabus existat potius quam alius cum animabus aliis.

*Qualia
prædicata
enti a se
tribuenda.*

Pater adeo modus perveniendi ad cognitionem attributorum divinorum.

§. 66.

Si existentie mundi adspectabilis & animarum humanarum Quot entia ratio in ente uno, quod a se est, reperiri potest; plura admitti a se admitti non possunt. Neque enim novimus præter mundum adspectabilem, quem, si ab imaginatione discesseris, ab elementis ejus separare minime licet, quemadmodum jam supra ostendimus (not. §. 58.), & animas humanas hunc sibi mundum per essentiam & naturam suam sibi repræsentantes (§. 66. 67. Psychol. rat.), & horum existentie rationem sufficientem quærimus in ente aliquo, quod a se est (§. 64.) Quamobrem si per ea, quæ enti uni a se insunt, cur hic mundus adspectabilis cum animabus humanis existat intelligitur; ens hoc unum sufficit ut existant (§. 56. Ontol.), consequenter quia existentiam istius-

modi entis propterea admittimus, quod eo admissio intelligamus, cur hic mundus cum animabus humanis existat (§. 65.); præter ipsum aliud gratis admitteretur, adeoque admitti nequit.

Non inculcat propositio, nisi quod communibus notionibus conforme. Quotiescunque enim effectus alicujus causam efficientem quærimus, in una acquiescimus, non modo quando manifesta est, verum etiam ubi latet, quamprimum agnoscimus eam effectui producendo sufficientem. Expresse tamen hoc inculcandum erat in arduo, quod tractamus, argumento, ut omnibus exceptiunculis, quibus locus esse poterat, occurreremus. Quodsi regeras præter entia, quæ sunt ab alio, & a nobis cognoscuntur, forsan dari adhuc plura, nobis ignota, quæ rationem existentie suæ non agnoscunt in ente eodem, in quo ratio sufficiens existentie mundi adspectabilis & animarum nostrarum continetur; hæc quidem objectio nos minime ferirer, quibus sufficit dependentiam mundi hujus adspectabilis & animæ nostræ ab uno ente, quod a se est, certo cognovisse; inferius tamen evincetur, si alia adhuc entia præter mundum hunc adspectabilem & animas nostras existant, eadem omnia, quot & qualicunque tandem sint, rationem existentie suæ sufficientem in ente unico habere posse. Neque reprehendendum est, quod primo tantummodo evincimus, non nisi unum esse ens a se, a quo mundus hic adspectabilis & animæ humanæ dependent, & postea adstruitur ens a se nonnisi unicum esse: etsi enim prioris probatio superflua videatur, non tamen talis deprehendetur, cum prius evincendum sit, antequam posterius probari possit. Nec in his destituimur exemplo veterum Geometrarum, quos demonstrandi artifices merito veneramus. Sanè *Euclides* ante demonstravit, si trianguli latus unum continetur, angulum externum esse majorem quolibet interno opposito, quam probaret eum esse æqualem duobus oppositis simul sumtis, quia posterius demonstrari non poterat, nisi ante certo constaret prius. Non igitur peccamus in regulas bonæ methodi, quod ante probemus tantummodo ens unum a se sufficere existen-

tiæ contingenti hujus mundi & animarum nostrarum, quam demonstretur non dari nisi ens unicum a se: immo quod in demonstrando priore per gradus incedamus.

§. 67.

Per *Deum* intelligimus ens a se, in quo continetur ratio *Dei definitio nominalis* sufficiens existentiae mundi hujus adspectabilis & animarum nostrarum.

Hæc est illa definitio nominalis, quam in gratiam demonstrationum in Theologia naturali sumimus (§. 5.). Equidem evinci poterat, si mundus hic adspectabilis revera existat, non tantummodo idealiter, quemadmodum Idealistis videtur, animarum humanarum existentiae rationem sufficientem in eodem ente contineri, in quo continetur ratio sufficiens existentiae mundi, consequenter animarum in definitione mentio fieri non debebat (§. 836. Log.). Enimvero cum hic aliquid dandum sit iis, qui methodi leges non habent perspectas, animarum quoque mentionem expressam facere libuit, ne quis argutetur, definitionem tantummodo satisfacere Dualistis & Materialistis, non vero simul Idealistis, cum tamen existentiam Dei independentem ab omnibus hypothesebus evincere velimus, ita ut satisfaciatur omnibus, quascunque tandem hypotheses amplectantur, quibus sectæ principales nituntur. Quamobrem animarum expressa fieri debebat mentio, ut definitionem nominalem etiam admitterent Idealistæ, qui mundo nonnisi idealem in animabus existentiam tribuunt.

§. 68.

Definitio nominalis Dei, quod sit ens a se, in quo continetur ratio sufficiens existentiae mundi hujus adspectabilis, est finitionem Scripturæ sacre conformis, seu eadem est, quam Scriptura sacra supponit. Etenim nemo ignorat, Scripturam sacram his inchoari verbis Gen. I. 1. *In principio creavit Deus cælum & terram.* Nemo ignorat, libros a Mose conscriptos esse lingua Hebraica. Constat vero, Hebræis non fuisse vocabulum, quo mundum tanquam nomine suo insignirent. Quamobrem

mundum appellaturi, coelum dixere & terram. Verba igitur Scripturæ initialia ita vertuntur : In principio creavit Deus mundum, hunc scilicet adspectabilem, quia de hoc, non alio mundo loqui Moſen manifestum est. Affirmat vero Deum creasse mundum consequenter mundus non existit necessario, neque adeo in se continet existentia suæ rationem (§. 309. *Ontol.*); sed in Deo. Ait porro Moſes, Deum creasse mundum in principio, hoc est, quando nondum erat ens ab alio, nihil scilicet erat præter Deum. Cum adeo Deus existeret, antequam quicquam inciperet, quod ab alio erat; necesse est Deum esse ens a se (§. 27.). Ex contextu itaque pater, in Scriptura sacra supponi, Deum esse ens a se, in quo continetur ratio sufficiens existentia mundi hujus adspectabilis, consequenter eandem supponi definitionem Dei nominalem, quam nos præmisimus (§. 67.).

Probe hic notandum, nos tantummodo affirmare, quod Scriptura sacra eandem definitionem nominalem Dei supponat, quam nos in gratiam demonstrationum supponimus; nequaquam vero contendere, quod in verbis Scripturæ initialibus præter istam definitionem nihil contineatur. Etenim Scriptura sacra enunciat modum, quo mundus hic adspectabilis actualitatem consecutus, nempe quod id factum fuerit per creationem, quemadmodum & in sequentibus demonstrabimus. Jam vero vocabulo *Deus* tanquam subjecto convenire debet aliqua notio, vi cujus ipsi creatio tanquam prædicatum tribui potest. In definitione itaque Dei creationis expressa mentio fieri nequit, nisi propositionem identicam efficere volueris. Sume enim, si ita visum fuerit, per Deum hic intelligi ens a se, quod mundum hunc adspectabilem creavit; verba *Moſis* hunc habebunt sensum: Ens istud, quod mundum hunc adspectabilem creavit, mundum hunc adspectabilem creavit. Ast hoc incommodum vitatur, ubi definitionem nominalem substituis, quam supponi evicimus. Propositio enim, quæ prima est in omni Scriptura sacra, hunc habebit sensum: Ens istud a se, in quo ratio sufficiens

ens existentiae hujus mundi adspectabilis continetur, eundem creavit. Atque in hoc significato eandem demonstrabimus inferius: ubi constabit per ea, quae definitioni nominali insunt, modum, quo mundus hic adspectabilis actualitatem consecutus, determinari. Absurdæ igitur sunt illorum vociferationes, qui indefinenter clamant, definitionem nominalem, quam dedimus, esse impiam, propterea quod non expressam faciat mentionem creationis in eo sensu, quo vocabulum sumit Scriptura sacra. Poteramus eas contemnere, nisi multiplici utilitate & exterorum notitiæ, & posterorum memoriæ commendarentur.

§. 69.

Datur Deus. Datur enim ens a se (§. 29.) & in eo ratio sufficiens continetur, cur mundus hic adspectabilis cum elementis suis & animabus humanis existat (§. 64). Quam obrem cum vocabulo Dei consentiente Scriptura sacra (§. 68.) indigeretur ens a se, in quo continetur ratio sufficiens existentiae mundi hujus adspectabilis & animarum humanarum (§. 67); *Deus datur.*

Atque ita evicimus existentiam Dei in significato vocabuli, qui est Scripturæ sacre conformis, consequenter hujus ipsius Dei, de quo loquitur Scriptura sacra. Patebit vero ex sequentibus, cetera attributa, quæ Deo tribuit Scriptura sacra, ex definitione, quam in demonstratione existentiae ipsius supponimus, non violato rigore demonstrationis deduci. Et ut appareat in singulis rationis cum Scriptura sacra consensus, ubi vis ostendemus attributa, quæ Deo competere vi definitionis nostræ evincemus, non alio sensu eidem tribui in Scriptura sacra. Ceterum attributa alia ex genere, quod in definitione posuimus, alia vero ex differentia specifica deducuntur. Genus est aseitas (§. 67). Quamobrem vi generis ipsi vindicanda sunt attributa ex aseitate fluentia, & in anterioribus inde deducta.

§. 70.

*Quomodo
Deus exi-
stat.*

Deus vi propria existit, independenter ab omni alio ente, ac sibimetipsi sufficit ad existendum. Deus enim est ens a se (§. 67). Vi igitur propria existit (§. 27.) & quidem independenter ab omni alio (§. 30), ac sibimetipsi ad existendum sufficit (§. 26.).

§. 71.

*Qualis sit
existentia
ipsius.*

Existentia Dei est absolute necessaria. Deus enim est ens a se (§. 67.). Quamobrem cum ens a se necessario existat & ejus existentia absolute necessaria sit (§. 32.); Deus necessario existit; & ejus existentia absolute necessaria.

Impossibile adeo est Deum non existere, ut adeo non sit absurdus, quam negare existentiam ejus, qui non potest non existere.

§. 72.

*Undenam
sit necessi-
tas existen-
tia Dei.*

Deus per essentiam suam existit. Deus enim ens a se est (§. 67.). Enimvero ens a se rationem sufficientem existentiae suae in essentia sua habet (§. 31.). Quamobrem & Deus in eadem existentiae suae rationem sufficientem habet, consequenter posita essentia divina ponitur etiam simul existentia ipsius (§. 118. Ontol.). Existit igitur per essentiam suam.

Hinc apparet cur existentia Dei sit absolute necessaria. Fluit enim ex essentia divina *per prop. praef.* Quae vero ex essentia fluunt, sunt absolute necessaria (§. 315. Ontol.). Atque adeo necessitas existentiae per essentiam infertur.

§. 73.

*Criterion
essentiae
divinae.*

Quamobrem si quis Deum ita concipit, ut per ea, quae ipsi tribuit tanquam determinationes essentiales, eum non existere non repugnet; is essentiam veri Dei non agnovit.

Criterion hoc discernuntur falsi Dii a vero Deo: Gentiles itaque,

itaque, qui admiscere Deos genitos, adeoque contingenter existentes, hinc erroris sui redarguuntur.

§. 74.

Deus est æternus. Est enim ens a se (§. 67.). Quare cum *Æternitas* ens a se nullum existendi initium (§. 35.), nullum finem habeat *Dei*. (§. 36.); Deus initio ac fine existendi caret. Jam vero æternum est, quod nec initium, nec finem existendi habet (§. 39.); Deus igitur est æternus.

Qualis sit hæc æternitas, inferius demum intelligetur. Hic sufficit negante sensu defendi, nullum assignari posse tempus, quo existere cœpit & quo existere desinet.

§. 75.

Quoniam Deus æternus est (§. 74.), adeoque existendi *Sempiternitas* initio ac fine caret (§. 39.); nullum fingi potest tempus, quo *nitas Dei*. non exiit, aut existit, aut exiturus est, consequenter semper exiit, existit & exiturus est, ac ideo *sempiternus* est. Et enim *sempiternum* dicitur, quod omni tempore conceptibili existit.

Vulgo æternitas & sempiternitas synonyma habentur, nec id improbandum, cum sempiternum non sit, quod non sit æternum. Nil tamen obstat, quo minus sempiternitatem æternitati contradistinguamus, sempiternitati vindicantes vi corollarii præsentis significatum, quem vi originis habet. Atque hoc sensu sempiternitas fluit ex æternitate.

§. 76.

Deus juxta Scripturam sacram est & in eadem dicitur Consensus æternus eodem sensu, quo eundem æternum esse ostendimus. S. S. quod Deus exiit: dicitur Psalm. XC. 3. antequam terra formare- æternita- tur. Terra formata fuit in principio *Gen* I. 1. quando scilicet *tem Dei*. quid existere incipiebat, quod antea non exiiterat. Deus igitur exiit. antequam quidpiam existere inciperet, quod antea non exiiterat, adeoque existendi initium nullum habet. Porro

(*Wolfii Theol. Naturalis*)

H

Psalm.

Psal. CII. 29. de Deo dicitur, quod anni ejus non defecturi sint, ubi de interitu cœlorum a Deo factorum sermo est. Affirmatur itaque, existentiam Dei nullum habituram esse finem. Enimvero æternum nobis dicitur, quod nullum existendi principium, nullum quoque finem habet (§ 39.). Deus itaque juxta Scripturam eo sensu æternus est, quo eundem æternum esse evicimus (§. 74.). *Quod erat unum.*

Deus tam in testamento veteri, veluti *Gen.* XXI. 33. & *Jes.* XL. 8. quam in novo, veluti *Rom.* XVI. 26. appellatur *Deus æternus*. In Scriptura sacra (quod collatione dictorum, in quibus vocabulum æterni vel æternitatis occurrit, patet) æternitas opponitur durationi terminabili, quæ definitio annorum numero constat. Ita vita beatorum post hanc vitam a resurrectione mortuorum dicitur æterna in oppositione ad hanc vitam, quam certo annorum numero definiri constat *Matth.* XXV. 26. Omnis duratio terminabilis duplicem habet terminum; scilicet terminum a quo, unde incipit, & terminum ad quem, in quo definit. Quamobrem si existentia continuatio opponitur durationi terminata, vel id fieri solet respectu termini a quo, veluti cum Deus dicitur fuisse ab æterno *Hab.* I. 12, vel respectu termini ad quem, veluti cum vita ventura æterna appellatur *Matth.* loc. cit. & Deus esse dicitur in æternum, *Psal.* XC. 2. vel respectu termini utriusque, veluti quando Deus æternus appellatur, qui ideo esse dicitur ab æterno in æternum *Psal.* loc. cit. Et cum soli Deo æternitas respectu termini utriusque competat, ideo olim dicebatur καὶ ἰζοχρόνιος æternus *Bar.* II. 20. 22. 35. & olim agnoscebatur solus, qui sit æternus 1. *Maccab.* I. 25. Deus igitur æternus vocatur in Scriptura sacra, quia nullum habet existendi initium, nullum existendi finem, adeoque æternus dicitur eodem sensu, quo eundem æternum esse ostendimus (§. 74.). *Quod erat alterum.*

Nemo miretur, quod primum evincamus Deo in Scriptura

ptura sacra tribui æternitatem, quam ipsi competere demonstravimus, & deinde demum probare eum quoque æternum dici eodem sensu, quo nos probavimus, eum esse æternum. Cum enim definitiones nominales arbitrariæ sint, nobis quidem vocabulo æternitatis significatum tribuere licet, quemcunque voluerimus; non tamen inde sequitur, eundem significatum eidem vocabulo competere in Scriptura sacra. Quamobrem probandum est, Scripturam sacram vocabulum æternitatis non alio sumere sensu, quam quo a nobis accipitur. Quoniam vero Scripturæ sacræ consentaneum est, quod secundum eandem Deo tribui posse constat, etiamsi vocabulum, quo id indigitatur in ipsa minime occurrit; ideo requiritur, ut consensus in re sigillatim evincatur, antequam consensus in verbis monstretur. Ceterum hinc simul discitur, quod probaturus Deum esse æternum, non tantummodo allegare debeat dicta Scripturæ sacræ, in quibus æternus appellatur; verum etiam evincere teneatur, quid æternitatis nomine indigitetur in Scriptura sacra. Etenim si in nuda allegatione dictorum, in quibus æternus vocatur, acquieveris; tantummodo nosti Deum in Scriptura sacra vocari æternum & ipsi quidpiam tribui, quod æternitatis nomine insignit; sed quod sit æternus & quidnam Deotribuendum, ut æternus dici possit, nondum tibi exploratum est.

§. 77.

Deus secundum Scripturam sacram est sempiternus. Apoc. Consensus
 l. 48. Deus vocatur *is, qui est, & qui erat* (vel, veriente Ca. S. S. quoad *sestione, fuit*) *& qui venturus est.* Existencia igitur Dei refer-*sempiterni-*
 tur ad tempus præiens per verbum temporis præsentis *est*; ad *tatem.*
 tempus præteritum per verbum temporis præteriti *erat vel fuit*;
 per verbum temporis futuri *venturus est* denique ad tempus
 futurum. Pone adeo tempus quodcunque præiens & dicen-
 dum ex mente *Joannis*, quod hoc tempore sit. Pone tempus
 quodcunque præteritum, & affirmandum erit, quod illo tem-
 pore Deus existerit. Pone denique tempus quodcunque fu-
 turum,

turum, & ajendum, Deum tempore isto exiturum. Constat vero præter tempus præsens, præteritum atque futurum non posse fingi tempus aliud (§. 584. *Ontol.*) Secundum Scripturam adeo Deus omni tempore conceptibili existit, seu nullum fingi potest tempus, quo non existat, consequenter sempiternus est (§. 75.).

Vocabulum sempiternitatis in Scriptura sacra nuspiam legitur: sufficit autem rem termino denotatam in eadem contineri. Neque reprehendendum est, quod termino aliquo discernamus attributum aliquod divinum ab alio, quod in Scriptura sacra peculiari nomine non insignitur, propterea quod communis loquendi modus in ea, qua scribebatur, lingua nomen peculiare non ferebat: etenim in ipsa Theologia revelata occurrunt termini *ἀΐωνα*, quibus tribuitur significatus Scripturæ sacræ conformis quoad rem denotatam; occurrunt termini alii in Scriptura sacra quidem obvii, sed quibus tamen tribuitur amplior significatus, quam quem in S. S. habent, etsi quoad rem eidem conformis. Neque vero inutile est peculiari nomine indigitari hoc Dei attributum, quod omni tempore conceptibili existat. Quando enim de officiis hominis erga Deum acturi sumus in philosophia practica, ostensuri sumus, quantum in ea influat sempiternitatis cogitatio. Jam vero terminorum is usus est, ut rerum facile meminerimus. Juvanda igitur cogitatio eorum, quæ in praxin utiliter influunt, quovis modo possibili. Omnem præterea theoriam & praxin officiorum erga Deum, ex principiis Theologiæ naturalis demonstraturi sumus. Quamobrem cum ad contrahendas & distinctius concipiendas demonstrationes faciant termini; hoc ipso patet, cur sempiternitatem, etsi ex æternitate fluentem adeoque cum eadem necessario connexam, ab ea distinguamus.

§. 78.

Consensus

*S. S. quoad
existenti-
am essen-
tialem.*

Juxta Scripturam sacram existentia Deo essentialis est, quemadmodum ante evicimus. Etenim Moysi mittendo a. Israëlitas & percontanti de nomine Dei mittentis, ut haberet quod respon-

responderet Israëlitis quæsituris, quodnam sit nomen mittentis, respondit Deus *Exod. III. 14.* Sic dices filius Israël: QUI EST misit me ad vos, vel, quemadmodum *Castellio* textui Hebraico magis conformiter vertit, ERO mittit me ad vos. Cum præter eum, qui Moſen ad Israëlitas mittebat, non sit Deus alius *Jes. XLIV 6*; non est ipsi nomen, quo ab aliis Diis tanquam sui similibus distinguatur. Distinguitur tamen ab ente quocunque alio per determinationes ipsi essentielles & alteri enti cuicunque incommunicabiles. Quamobrem nominis loco esse poterat determinatio essentialis, quæ enti alii convenire nequit. Jam cum Deus dicat, se vocari *Ero*, quod existere nunquam sit desiturus, adeoque quocunque tempore conceptibili de eo dici possit, quod exiturus sit, necesse est, existentiam inter determinationes essentielles referri. Paret itaque juxta Scripturam sacram existentiam esse Deo essentialem, ut non possit concipi possibilis, quin simul concipiatur ut existens, quemadmodum antea demonstravimus (§. 72. 73.).

Idem prorsus eodem modo probatur ex nomine Dei proprio *Jehovah*, quod in veteri Testamento ipsi tribuitur. Descendit enim *יהוה*, quod est esse, ut adeo nomen *איהיה Ero*, de quo ante diximus, idem explicet.

§. 79.

Deus nec ortus est, nec interire potest. Est enim Deus *Impossibilis a se (§. 67.)*. Enim vero ens a se nec ortum est, nec interire potest (§. 37.). Ergo Deus nec ortus est, nec interire potest. *Impossibilitas ortus & interitus Dei.*

Idem etiam eodem modo ostendi poterat, quo supra impossibilitatem ortus & interitus de ente a se evicimus.

§. 80.

Deus annihilari nequit. Etenim Deus est ens a se (§. 67.). *Impossibilitas annihilationis Dei.* Quamobrem cum ens a se annihilari non possit (§. 38.); nec Deus annihilari potest.

Idem de Deo probari poterat ex existendi necessitate, perinde ac propositio præcedens. Pone enim Deum posse annihilari. Existere igitur desinet, ut nihil ejus amplius actu superfit (§. 540. *Ontol.*). Non igitur impossibile est, ut non existat, consequenter existentia ejus necessaria non est (§. 279. *Ont.*): id quod absurdum (§. 71.). Idem absurdum sequitur, si ponamus Deum fuisse ortum, cum quod oritur existere incipiat, quando antea non existebat (§. 541. *Ontol.*), & quod interit existere desinat, quando antea existebat (§. *cit.*).

§. 81.

Ortus & interitus *Ortus & interitus essentia divine repugnat.* Repugnat enim uterque essentia entis a se (§. 46.). Quamobrem cum *cur divina* Deus sit ens a se (§. 67.); essentia divina tam ortus, quam *essentia re-* ritus repugnare debet. *pugnet.*

Pone nimirum ens aliquod ortum esse ab alio, eo quidem sensu, quo nos vocabulum ortus accipimus (§. 541. *Ontol.*) & quo communiter accipi solet: impossibile est, ut ens istud sit Deus, cum essentiam eam habere nequeat, quæ Deo competit (§. 73.). Pone ens aliquod interire posse, aut interiisse: impossibile eodem modo deprehenditur, quod fuerit aut sit Deus.

§. 82.

Falsorum *Qui adeo Dii dicuntur orti ab aliis seu ex iisdem nati, aut* *Deorum* *numero hominum exempti in Deorum numerum translati; veri non* *character.* *sunt, sed falsi Dii (§. 81.).*

Hinc patet, Deos gentilium, Græcorum & Romanorum, qui partim ex aliis Diis nati, partim ex hominibus nati in Deorum numerum translati perhibentur, non fuisse Deos veros, sed falsos. Unde porro liquet, apud Græcos atque Romanos non fuisse vera Theologiae naturalis principia, ut adeo Paulus Ephesios sine Deo in mundo fuisse dicat, seu atheos appellet Eph. II. 12. Qui enim falsos fingit Deos, qui per essentiam, quam ipsis tribuit, Dii esse non possunt, nec præter

eos Deum alium admittit, is utique existentiam veri Dei negat, atque adeo atheus est.

§. 83.

Deus est ens simplex, & corporeus esse nequit. Etenim Deus est ens a se (§. 67.). Ens vero a se simplex est (§. 49.). Ergo & Deus ens simplex est.

*Simplicitas
& immaterialitas
Dei.*

Porro ens a se compositum esse nequit (§. 47.), adeoque nec Deus compositus esse potest. Quamobrem cum corpus omne sit ens compositum (§. 119 *Cosmol.*); Deus quoque corporeus esse nequit.

Supra jam ostendimus (*not.* §. 49.). simplicitatem esse enti a se essentialem & idem adeo expers esse compositionis per essentiam. Unde intelligitur esse Deo essentialem simplicitatem & essentiae ipsius repugnare, ut habeat corpus.

§. 84.

Quoniam fieri non potest, ut Deus sit corporeus, qui Diis corpora humana tribuunt, seu Deus admittunt corporibus humanis praeditos; falsos Deos fingunt.

*Falsorum
Deorum
character.*

Unde denno patet Deos, quos coluere Græci atque Romani, non fuisse veros Deos: constat enim, quod ipsis tribuerint corpora humana, qua etiam de causa non absurdum ipsis videbatur, Deum ex Diis atque Deabus eodem modo nasci, quo homines ex hominibus nascuntur, & ex hominibus natos Deificari seu Deos ex iis fieri. Dubium, quod Scriptura sacra movere videtur, dum Deo tribuit organa & artus corporis humani, mox ex instituto solvemus.

§. 85.

*Deus non est extensus. Pone enim, si fieri potest, Deum esse extensum. Quoniam extensum omne habet partes, quarum unaquaque extra alteram existit (§. 549. *Ontol.*). Deus ex partibus constat a se invicem distinctis. Quare cum simplex*

*Extensio
cur Deo
repugnet.*

plex

plex partibus careat (§. 673. *Ontol.*); Deus simplex esse nequit: quod cum sit absurdum (§. 83.), Deus extensus non est.

Deum scilicet materialem faciunt, qui eidem extensionem tribuunt (§. 141. *Cosmol.*). Unde & Materialistæ negant Deum sine extensione concipi posse, utpote qui tantummodo entia materialia existere admittunt (§. 33. *Psychol. rat.*). Equidem non desunt, qui simplicitatem Dei rident, propterea quod Deum in punctum mathematicum converti nugantur: enim vero hi sunt, qui notionem entis simplicis non habent, a nobis in Ontologia prolixè explicatam, imaginaturi quod nonnisi rationis acumine pervestigari potest.

§. 86.

Cur Spatium non sit Deus.

Quoniam spatium in abstracto, seu secundum communem notionem, a nonnullis philosophis adoptatam (§. 611. *Ontol.*), sine extensione concipi nequit (§. 594. *Ontol.*), Deus autem extensus esse nequit (§. 85.); impossibile quoque est spatium esse Deum, vel aliquod attributum divinum.

Henricus Morus in Enchiridio Metaphysico part. I. c. 5. f. 165. & seqq. Tom. I. operum philosophicorum spatium ipsam substantiam divinam esse contendit, & Josephus Raphson in Conamine mathematico-metaphysico de Spatio reali seu ente infinito ejusdem vestigiis insistens, spatium facit attributum divinum, ipsam scilicet immensitatem. Supponit autem uterque notionem spatii imaginariam, de qua diximus alibi (§. 599. 611. *Ontol.*). Quoniam corollarium ad refellendum hunc errorem apposuimus; ideo quoque supponenda erat spatii notio imaginaria, quamvis per notionem realem multo clarius pateat, spatium non posse esse Deum. Cum enim spatium sit ordo simultaneorum, quatenus coexistunt (§. 589-590. *Ontol.*), quod adeo non datur, nisi quatenus simultanea existunt (§. 600. *Ontol.*), nemo non videt, quam foret absolum affirmare, quod Deus sit spatium, vel quod spatium sit aliquod

aliquod attributum divinum. Absit autem, ut ex notione spatii reali consequentias molestas neccas adversus eos, qui notione spatii imaginarii delusi sibi persuasere, spatium esse aliquod Dei attributum, vel ipsam divinam substantiam!

§. 87.

Insensibile dicitur, quod sensu percipi nequit. Imaginabile vero vocatur, quod vi imaginationis representari potest.

Hinc quoque in specie intelligitur, quid sit *invisibile*, scilicet quod visu percipi nequit, hoc est, quod videri minime potest. Et eodem modo idem intelligitur de sensibus ceteris.

§. 88.

Deus insensibilis, nec imaginabilis est. Cum enim sensationes animæ sint representationes compositi (§. 83. *Psychol. rat.*), quod simplex est sensu percipi nequit, adeo ut ne quidem composita omnia sensu percipi possint (§. 99. 100. *Psychol. rat.*). Est vero Deus ens simplex, nec corporeus (§. 83) adeoque nec compositus esse potest (§. 119. *Cosmol.*). Deus igitur sensu percipi nequit, consequenter insensibilis est (§. 87.). *Quod erat unum.*

Insensibilis & imaginabilis definitio.
Cur Deus sit insensibilis, nec imaginabilis.

Porro phantasmata, hoc est, ideæ vi imaginationis productæ (§. 93. *Psychol. empir.*), sunt itidem representationes compositi (§. 178. *Psychol. rat.*). Quamobrem ut ante patet, Deum vi imaginationis representari non posse. Imaginabilis itaque non est (§. 87.). *Quod erat alterum.*

Posterius etiam hoc modo ostenditur. Vi imaginationis producuntur perceptiones rerum sensibilibum absentium (§. 92. *Psychol. empir.*), vel quales nobis erant, cum res sensu perciperemus (§. 91. *Psychol. empir.*), vel quatenus ex iis, quæ sensu antea percepimus, dividendo ac componendo quædam finguntur (§. 144. 145. *Psychol. empir.*), & quod ita fingitur, ei objectum simile ars producere valet (§. 148. *Psych. empir.*),
(*Wolfii Theol. Naturalis*) I ut

ut adeo sensu quoque percipi possit, (§. 84. *Psychol. rat.*), consequenter sensibile efficiatur (§. 87.) Quicquid igitur insensibile est, idem nec imaginabile esse potest (§. 87.). Quamobrem cum Deus insensibilis sit per demonstrata; nec idem imaginabilis esse potest.

Quos Dei simplicitas male intellecta offendit, hi ipsi sunt qui Deum imaginari cupiunt. Et qui sensibus adeo intenti sunt, ut animum ab iis avocare nondum didicerint, vel nescii pro nihilo habent, quod nullo modo imaginabile est, consequenter sensibilibus prorsus dissimile. Inde profecto est quod quidam Deum faciant extensum & immensitatem divinam per eam extensionem imaginentur, quam spatio imaginario tribuimus.

§. 89.

Invisibilitas Dei.

Quoniam Deus insensibilis est (§. 88.), visibile vero sensibile (§. 87.); Deus quoque est *invisibilis*, consequenter *videri nequit* (§. cit.).

Fluit invisibilitas ex simplicitate & hinc pendente immaterialitate divina, quemadmodum ex demonstratione propositionis præcedentis intelligi potest. Poterat invisibilitas inde in specie demonstrari, cum natura visionis simplicitati repugnet. Sed de hac repugnantia rectius paulo post dicemus.

§. 90.

Cur Deus nec pingi ne sculpi possit.

Dei imago aliqua nec pingi, nec sculpi potest. Imago omnis representatio entis compositi est (§. 85. *Psychol. rat.*), & quod quidem pingitur, in superficie seu tabula (§. 88. *Psychol. rat.*), quod vero sculpitur in solido representatur (§. 89. *Psychol. rat.*). Enim vero Deus ens simplex est (§. 83.), adeoque compositus esse nequit (§. 685. *Ontol.*). Quamobrem nulla possibilis ejus imago, neque adeo pingi, nec sculpi potest.

Pro-

Propositionis præsentis veritas tota pender a simplicitate Dei, ut adeo de omni ente simplici negari debeat, quod hic de Deo negatur. Et idem tenendum est de propositione præcedente (§. 88.). Constat animam esse ens simplex (§. 48. *Psych. rat.*). Quamobrem ejus simplicitas in causa est, cur nec ipsa pingi, nec sculpi possit, seu quod nulla ipsius effingi possit imago, neque pictura, neque sculptura, & cur eam nec videre aut alio sensu percipere, nec imaginari liceat.

§. 91.

Deus per figuras hieroglyphicas representari potest. Ex-
enim nil obstat, quo minus ea, quæ Deo insunt, propter ali-
quam similitudinem generalem per res materiales tanquam per
signa indigentur & ex iis figura quædam componatur, quæ
pingi & sculpi potest. Quamobrem cum res, quibus istius-
modi significatus imponitur, significatum hieroglyphicum ha-
beant (§. 151. *Psychol. empir.*), & figuræ, quas inde compo-
sita phantasmata significatum hieroglyphicum habentia repræ-
sentant, hieroglyphicæ sint (§. 157. *Psych. empir.*); quin Deus
per figuras hieroglyphicas representari possit dubitandum
non est.

*Possibilitas
figurarum
hierogly-
phicarum
de Deo.*

Comenius in Orbe picto cum Deum pingere non posset, figuram hieroglyphicam pinxit. Pingit enim triangulum cum circulo inscripto, radiis undiquaque in orbem diffusis & circumcirca nubes sibi invicem imminentes: circulus vero medium figuræ occupat. Circulus designat æternitatem, triangulum circumscriptum Trinitatem in unitate, nubes totum spatium mundanum, radii undiquaque in orbem diffusi vero denotant dependentiam rerum omnium a Deo & quod circulus cum triangulo circumscripto medium occupat locum & nubes aliquo intervallo ab eodem removentur, hoc ipso indigitur Deum esse ens primum idque prorsus independens ab universo hoc mundo adspectabili seu rebus omnibus extra ipsum existentibus. Beneficio igitur hujus figuræ Deus representatur tanquam ens æternum atque triunum ab omni

alio ente independens, sed a cujus virtute reliqua omnia in essendo & existendo dependent, consequenter si a Trinitate discesseris, quæ non nisi lumine revelationis innotescit, hac ipsa figura hieroglyphica satis apposite repræsentatur definitio illa nominalis Dei, quam supra dedimus (§. 67.). Probe vero notanda est differentia, quæ inter imagines Dei, quarum impossibilitatem adstruximus (§. 90.), & figuras hieroglyphicas, quarum possibilitatem hic docemus, intercedit, ne figuras hieroglyphicas de Deo pro imaginibus Dei habeamus. Qui pingit & sculpit figuram Dei hieroglyphicam juvandæ memoriæ & recordationis gratia; is non pingit, vel sculpit imaginem Dei, seu sibi facit effigiem Dei. E. gr. inferius demonstrabimus, Deo competere omnium quovis momento præsentium in toto universo notitiam, seu, quod perinde est, Deum sibi esse conscium omnium eorum, quæ quovis momento in toto hoc universo contingunt. Ostendemus etiam hoc Dei attributum in scriptura sacra *oculi* vocabulo denotari. Quamobrem si eadem magistra Dei hoc attributum seu Deum ipsum mediante hoc attributo tibi repræsentet per oculum in centro universi positum & undiquaque per vasta mundi spatia radiantem, quemadmodum in templo quodam me vidisse memini, & hanc figuram pingi cures, ut pictura in conclavi oculis tuis opposita in memoriam tibi revocet, Deum quoque sibi conscium esse ejus, quod nunc in quovis conclavis angulo agis; nullum Dei pingi ac sculpi nesci imaginem fecisse dici potes divinitate in idolum transmutata. Facile apparet, idem dicendum esse de quovis ente simplici alio, veluti de anima nostra, quæ hic de Deo dicta sunt. Etenim fluunt ex immaterialitate Dei, adeoque applicari possunt ad ens omne, quod materiale non est, sive substantia fuerit, sive accidens. Eadem de causa figuræ hieroglyphicæ virtutum & vitiourum, quamvis vulgo dicantur imagines, in numerum tamen imaginum rerum referri non posse, ita ut sint imagines representationum virtutum ac vitiourum, non vero ipsarum virtutum ipsorumque vitiourum.

§. 92.

Deus est ens primum & ultimum, hoc est, omnibus entibus Primitas praeexistit independenter, nec quicquam ipsi succedit dependenter ab & ultima-
eo. Etenim Deus ens a se est (§. 67.). Sed ens a se est ens *rio Dei.*
 omnium primum ac ultimum (§. 45.), quod ita ceteris omnibus praeexistit, ut ipsum in existendo non dependeat ab alio, & cui nullum succedere potest eidem simile, quod in existendo ab ipso dependeat (*not. §. cit.*). Deus igitur est ens primum & ultimum & entibus ceteris omnibus ita praeexistit, ut in existendo non dependeat ab alio, nec ei ullum ens ipsi simile succedere potest, quod in existendo ab ipso dependeat.

Attributum hoc divinum probe notandum est, ne confusis notionibus, quæ nobis tale quid non cogitantibus insinuant, intenti ad Deum transferamus, quod homini proprium. Etenim primus homo non alium habuit, qui ipsam præcessit, dependenter tamen ab ente alio extitit, atque adeo ejus præexistentia dependens fuit, ut hinc Deus non eodem sensu sit primus in serie omnium entium, quo primus homo is fuit in serie omnium hominum seu generis humani. Ceteri homines omnes, qui primum sequuntur, dependenter ab eo præexistunt aliis. Quilibet itaque eorum succedit aliis, sed dependenter non modo ab eo, cui proxime succedit; verum a ceteris omnibus qui præextiterunt. Unde patet existentiam hominis, involvere præexistentiam & successionem dependentem, quatenus in generis humani serie alios sequitur, alios præcedit. Existencia divina in eo ab humana prorsus diversa est, utpote nullum respiciens terminum, quemadmodum existentia dependens respicit.

§. 93.

Deus est incorruptibilis. Deus enim ens simplex est (§. Incorrupti-
 83.), adeoque partibus caret (§. 673. Ontol.), consequenter *bilitas Dei.*
 fieri nequit ut dissolutione in partes existere desinat, adeoque

intereat (§ 541. *Ontol.*). Quamobrem cum incorruptibile sit; quod dissolutione in partes interire nequit (§. 666. *Psychol. rat.*); Deus incorruptibilis est.

Idem etiam sic ostenditur. Deus est ens simplex (§. 83.), adeoque eodem modo, quo entia composita, consequenter corpora (§. 119. *Cosmol.*), interire nequit (§. 697. *Ontol.*). Enimvero corpora corruptibilia sunt (§. 667. *Psychol. rat.*): Deus igitur corruptibilis esse nequit, consequenter incorruptibilis est (§. 666. *Psych. rat.*).

Immo idem hoc quoque modo evincitur: Deus simpliciter interire nequit (§. 79.), omnisque interitus essentiae ipsius repugnat (§. 81.). Quamobrem nec fieri potest, ut dissolutione in partes intereat, consequenter incorruptibilis est (§. 666. *Psych. rat.*).

Quodsi demonstratio indirecta magis placeat; pone Deum esse corruptibilem. Fieri adeo potest, ut dissolutione in partes intereat (§. 666. *Psych. rat.*). Interitus adeo omnis essentiae divinae non repugnat; quod absurdum (§. 81.). Vel Deus partes habet, adeoque ens simplex non est: quod denuo absurdum (§. 83.).

Corruptibilitas rerum materialium est: unde Deus hoc ipso distinguitur a rebus materialibus, quod eodem, quo ipsae, modo interire non possit, seu istiusmodi interitus, qualis rebus materialibus competit, essentiae ipsius repugnet. Quodsi propositio primo vel secundo modo demonstretur; ejus ope demonstrari potest adhuc specialius atque adeo clarius, nullum posse concipi modum, quo Deus interire potest, quod ex principiis generalibus evicimus superius (§. 79.), quemadmodum ex propositione sequente apparet.

§. 94.

*Cur Deus
interitus
omnis ex
pers.*

*Nullus potest concipi modus, quo Deus interire possit. Etenim ens omne aut simplex est, aut compositum (§. 685. *Ontol.*). Jam si ens simplex interire debet, non interire potest nisi*

nisi per annihilationem (§. 698. *Ontol.*): composita vero interire possunt citra cuiuspiam annihilationem (§. 542. *Ontol.*), nimirum cum essentia entis compositi consistat in modo, quo partes ipsius inter se junguntur, partium dissolutione, adeoque corruptione (§. 666. *Psych. rat.*). Quare cum Deus nec annihilari possit (§. 80.), nec corruptibilis sit (§. 93.); nullus concipi potest modus, quo interire possit.

Equidem corruptionis corporum varii dantur modi, sed qualescunque tandem sint, in eo omnes conveniunt, quod partes, quæ conjunguntur, a se invicem divellantur. Atque adeo sufficit removere corruptionem in genere, ut removeantur omnes species. Quemadmodum vero incorruptibilitas fluit ex simplicitate, ita annihilationis impossibilitas ex aseitatem seu potius existendi necessitate, quæ entī a se competit.

§. 95.

Deus in S. S. incorruptibilis dicitur eodem sensu, quo eum incorruptibilem esse probavimus. Etenim Rom. I. 13. Apostolus Deum vocat ἀφθάρτον in oppositione ad hominem, quem φθαρτὸν vocat. Recte vertit locum istum vulgaris interpres: Mutaverunt, scilicet gentes, gloriam incorruptibilis Dei in similitudinem imaginis corruptibilis hominis, sit ita quod Castellio magis ad veritatem dicti, quam ad proprium significatum vocabuli attentus ἀφθάρτον vertat per immortale & φθαρτὸν per mortale; Læberus vero in vernacula significatu generaliore illud vocabulum durch unvergänglich & hoc durch vergänglich, cum priori alias in Scriptura respondeat ἀπαράβατον Hebr. VII. 24. quod non transitorium significat, uti etiam vertit Castellio, vulgaris ad significatum verbi proprium non respiciens per sempiternum I. Cor. XV. 53. Apostolus mutationem, quam corpora in resurrectione mortuorum subibunt, his describit verbis: Δεῖ τὸ φθαρτὸν τῷ ἐνδύσασθαι ἀφθαρσίαν; quod bene vertit vulgaris: oportet corruptibile hoc induere incorruptionem,

Consensus
S. S. quoad
incorrupti-
bilitatem
Dei.

nem. Nec a significato proprio verbi hic recedit *Castellio*, qui ita vertit: *oportet hoc corruptibile incorruptibili natura indui.* Retinet quoque *Lutherus* significatum vocabuli proprium specialem, cum utatur voce *verweslich*, non vero *vergänglich*. Et notandum quidem est eo in loco Apostolum mortale a corruptibili & immortale ab incorruptibili distinguere. Eam enim corporum nostrorum mutationem fore ait in resurrectione, ut, cum in hac vita sua natura esset corruptibile, in vita altera futurum sit incorruptibile, cumque jam esset mortale *θνητὸν*, olim immortalitatem *ἀθάνατον* consecuturum sit. Jam corpus humanum non modo vivum est, verum etiam mixtum, quatenus scilicet singulæ ejus partes ex materia mixta constant. Moritur homo, dum vita privatur: at corrumpitur, dum mixtio solvitur. Corpus mortuum adhuc corpus humanum est, cum adhuc integra & salva sit maxima ex parte structura ejus, si non integra, in qua essentiam ejus consistere constat (§ 276. *Cosmol.*). Sed tum demum corrumpitur, quando putrefactione dissolvitur mixtum, ut in particulas minimas resolvatur totum corpus sicque ejus intereat structura. Pater itaque corruptibile hic dici, quod dissolutione in partes, unde compositum est, interit, & incorruptibile, quod ita interire nequit, quemadmodum nos vocabulum sumimus (§. 666. *Psych. rat.*). Atque hoc pacto manifestum est, Deum incorruptibilem dici in Scriptura eodem sensu, quo nos probavimus, eum incorruptibilem esse (§. 93.).

Deus quoque incorruptibilis dicitur, 1. Tim. I. 17. ubi vocatur βασιλεὺς τῶν αἰώνων ἄφθαρτος θεός, Rex seculorum incorruptibilis Deus, ubi ab incorruptibilitate petitur ratio, cur ipsi imperium in secula, seu tempus quodcumque conceptibile competat. Sed ne nimis longe recedendum nobis esset in interpretando a scopo, locum priorem, quo usi sumus in probanda propositione præsentē, præferre volumus huic. Ceterum propositionis præsentis probatio confirmat, quæ de usu

usu linguarum authenticarum in Scriptura sacra interpretanda dicta sunt (§. 978. Log.), scilicet num versio rite facta, seu an voces linguæ authenticæ & in versione iisdem respondentes eandem rem designent. Vidimus enim interpretes non constanter proprio inhaerere verborum significatui, etsi nulla urgeat necessitas, ut ab eodem recedant, & nunc hunc interpretem, nunc alium retinere proprium. Ita vulgatus interpretes vocabulum ἀφθαρτος rite vertit, non tamen vocabulum ἀπαράβωτος & contra *Castellio* rite vertit posterius, non tamen prius in utroque loco, sed rite in uno, minus exacte in altero, quemadmodum etiam facit *Lutherus*, etsi non idem æquipollens substituant, ubi a proprio significato vocabuli recedunt. Neque vero existimandum est, non multum referre, utrum Deum dicas immortalem, an incorruptibilem; utrum quid dicas sempiternum, an non transitorium. Cum enim Scripturæ sacræ autorem principalem agnoscamus ipsum Deum, & nemo non largiatur, Deum non sine ratione vocabulum unum præferre alteri; perinde censeri non debet, quodnam vocabulum adhibeas in versione, ubi utrumque fundit sensum verum: perit enim emphasis, quam intendit Deus, consequenter sensus, quem prodit versio, non prorsus idem est cum eo, qui convenit textui authentico. Clarissime hoc perspicitur in loco Rom. I. 13. ubi amentix accusantur gentes, quod idola specie humana vel animantium brutorum finxerint, propterea quod Deus per naturam suam sit incorruptibilis, cum e contrario quæ speciem habent hominis, vel animantis sint entia materialia, adeoque corruptioni obnoxia (§. 667. *Psych. rat.*), consequenter divina natura iisdem repugnet. Amentem enim omnino se probat, qui talem fingit Deum, cui natura divina repugnat. Ex immortalitate Dei amentia ista non eadem evidentia probatur. Dabimus alibi exempla, quæ idem adhuc clarius loquentur. Notandum præterea, quia significatus vocabuli ἀφθαρτος ex I Cor. XV. 53. apodictice probari potest, ut contra interpretationem nulli exceptioni sit locus, nisi contextui vim manifestam inferre volueris; locum hunc esse classicum de vocabuli istius significato. Unde hinc fructuosam loci classici notionem abstrahere licet.

§. 96.

*Consensus
S. S. quoad
invisibilitatem.*

Deus in Scriptura sacra dicitur invisibilis. Deus invisibilis dicitur Col. I. 15. & 1. Tim. I. 17. Cum dubium nullum sit vocabula sumi in significato recepto, ubi contrarium nulla necessitas urget; non est qui dubitet, Deum dici invisibilem, quia videri nequit, quemadmodum visibilia videmus (§. 87.). Non vero sine ratione in loco priore Deus dicitur ὁ ἀόρατος, is qui invisibilis est. Etenim hoc ipso significatur, quod invisibilitas sit Deo essentialis.

Ex eo, quod invisibilitas Deo essentialis, ratio redditur, cur impossibile sit, ut hominum aliquis videat Deum. Atque hinc porro intelligitur emphasis, quæ inest verbis Apostoli 1. Tim. VI. 16. *Deum nullus hominum vidit, sed nec videre potest.* Cum enim, præsertim ob verba antecedentia, quod Deus lucem inhabitet inaccessibilem, facile quis suspicari posset, nullum hominum vidisse Deum propter impedimentum aliquod accidentale; Apostolus addit, quod nec videre possit, quia scilicet obstat impossibilitas ex parte ipsius Dei, utpote per essentiam suam invisibilis, quemadmodum aliunde cognitum supponit. Notes velim, verba Apostoli non allegari posse ad probandam invisibilitatem Dei, cum ex contextu citra dubitationem erui non possit ratio, cur impossibile sit, ut homo videat Deum, propterea quod nondum cognita aliunde invisibilitate Deo essentiali ex contextu non appareat, utrum emphasis, quæ verbis Apostoli inest, querenda sit in impossibilitate, quæ est ex parte subjecti cognoscentis, an in impossibilitate, quæ datur ex parte objecti cognoscendi. Adesse aliquam emphasin in verbis Apostoli, per se patet, quoniam simpliciter dicere poterat, nullum hominum vidisse Deum, vel nullum hominum Deum videre posse, consequenter non sine ratione utrumque conjungat, ut adeo vulgatus interpret particulam *sed*, quæ in textu græco non extat, menti tamen Apostoli convenienter addat excitaturus attentionem ad emphasin latentem, quam lector in se facile desiderari passurus erat. Enim vero ipsa emphasis ex contextu, qui eam ambiguum relinquit, explicari non potest: explicanda igitur

igitur est per collationem verborum Apostoli cum aliis Scripturæ locis, qualia in probanda propositione præsentē in medium adduximus. Quodsi animum ad hæc adverteris, ideam quandam exemplarem nancisceris interpretationis Scripturæ per Scripturam, & differentie dictorum classicorum & minus classicorum. Nimirum Scriptura per Scripturam explicatur, si in demonstrando sensu verborum Scripturæ tanquam principiis uteris iis, quæ per alia Scripturæ loca manifesta sunt. Ita in præsentē casu ratio, cur nullus hominum Deum videre possit, quæ per contextum dubia videri poterat, redditur ex eo, quod per essentiam suam sit invisibilis: id quod ex aliis Scripturæ locis manifestum est. Redditur autem impossibilitatis videndi Deum ratio, ut plenius mentem Apostoli assequamur, utpote inculcaturi, se non posse reperire verba, quibus ea, quæ Deo insunt, intelligibili modo exprimat. Dicta classica in eo differunt a ceteris, quæ classici non sunt, quod in illis sensus verborum demonstrativa quidam ratione adstrui possit, non suppositis aliis aliunde cognitis: ast non classicorum opposita ratio est, per ea enim sensus verborum ambiguus relinquitur, ita ut per alia aliunde cognita demum decidendum sit, quinam is esse debeat. Ita in nostro exemplo loca, quæ in probanda propositione adduximus, sunt classica de invisibilitate Dei; cum enim invisibilitas recensetur inter attributa divina, necesse est ut rationem intrinsecam habeat in ipsa essentia divina (§. 157. *Ontol.*) atque adeo quidpiam denotet, quod per modum Deo inexistentis spectatur. Enimvero quando Deus dicitur nunquam visus ab homine, nec videri posse ab homine, inde inferri nequit invisibilitas per modum Deo inexistentis, quemadmodum ante vidimus, adeoque locus iste de invisibilitate classicus non est, ipse ex classicis interpretandus, ne a mente Apostoli aberremus. Magni momenti est loca classica a non classicis distingui: illa enim sola ad probationem dogmatum adhibenda, ut constituatur analogia fidei certa atque immota, cui convenienter explicari debent loca minime classica, ne a vero sensu aberretur & ut tota sensus amplitudo exhauriatur. Quodsi discrimen inter dicta classica & minus classica non ob-

serves dogmata probaturus, probationes objectionibus obnoxie fiunt, nec acumine utentibus satisfaciunt veritatem in dubitationem adducentes.

§. 97.

Consensus

*S. S. quoad
impossibi-
litem ef-
figiei divi-
na.*

Juxta S. S. nulla potest sculpi, aut pingi Dei imago. Gen-
tes, quæ Divinitatis imagines sibi fecerunt, dicuntur stultæ, quod
gloriam Dei incorruptibilis mutaverint in similitudinem ima-
ginis corruptibilis hominis, & volucrum, & quadrupedum, &
serpentium Rom. I. 23. Additur *ibid.* 25, verrente *Castellione*,
quod Dei veritatem in falsitatem transtulerint. Ex mente igitur
Apostoli omnis imago, qualiscunque tandem fuerit, repræsen-
tat rem sua natura corruptibilem. Deus vero incorruptibilis est.
Ejus igitur imago nulla fieri potest. Deum esse per naturam
suam incorruptibilem verum est (§ 93.), adeoque falsum, eum
esse per naturam suam corruptibilem. Qui imaginem Dei a-
liquam pingit, vel sculpit, qualiscunque tandem ea sit, Deum
fingit per essentiam suam corruptibilem, adeoque missa veri-
tate quod falsum est amplectitur, consequenter Deum ve-
rum in falsum vertit, seu veritatem Dei in falsitatem trans-
fert,

Equidem in veteri testamento severæ leguntur prohibi-
tiones Iſrælitis factæ, ne more gentium ceterarum cultus di-
vini gratia imagines Dei sibi faciant *Exod.* XX 4. 5. *Levit.*
XXVI. 1. *Deut.* IV. 15. & seqq. & minus obsequentibus, facti
absurditas exprobratur *Jes.* XLVI. 5. & seqq. cap. XLIV. 10.
& seqq. enimvero inde ostendi nequit impossibilitas imagi-
nem aliquam Dei formandi aliunde supponendi. Non vero
opus est, ut eam per ambages probemus, cum absque ambagibus
evidenter admodum ex dicto *Paulino* probari potuerit. De moralitate
facti autem agendi locus hic non est. De eadem agemus alibi, quando
officia erga Deum, ea imprimis, quæ ad cultum Dei externum faciunt,
exposituri sumus. Impossibilitatem formandi aliquam Dei imaginem
Apostolus demonstrat ex incorruptibilitate Dei: nos eandem deduximus

ex simplicitate ejusdem (§. 90.) Enimvero hæc sibi mutuo minime repugnant. Nimirum constat, Deum ideo esse incorruptibilem, quia simplex est (§. 93.). Quamobrem si impossibile est aliquam Dei imaginem fieri, quia per essentiam suam incorruptibilis; impossibile est talem fieri; quia simplex est. Maluit autem Apostolus impossibilitatem formandæ imaginis Dei deducere ex incorruptibilitate, quam ex simplicitate divina, ut stoliditatem gentilium ad ipsum vulgi captum redargueret; id quod ipsi propositum fuisse, verba manifesta loquuntur *Rom. I. 21. 22.* Nos vero tantummodo intendimus evidentiam rationis, omnem moralitatem actus, quemadmodum modo diximus, seponentes.

§. 98.

Dei per figuras hieroglyphicas representatio S. S. conformis. Consensus
Dens in visionibus Jesaie cap VI. 1. Ezechiel c. I 25 & seqq. S. S. quoad
c. III. 23. c. VIII. 2. 4. atque Johanni factis Apoc. IV. 2. & seqq. figuras hieroglyphicas
apparuit instar hominis in solio excelsio & magnifico sedentis
Similiter constat, cum Christus in Jordane a Johanne baptizatus,
re ut, Spiritum S. descendisse sicut columbam, Matth. III. 16.
& Christum in visione Johannis facta apparuisse instar agni
Apoc. V. 6 Columbam non fuisse imaginem Spiritus S. nec agnum imaginem Christi proprie sic dictam, per se patet (§. 85 *Psych. rat.*). Cumque imago Dei aliqua nec pingi, nec sculpti possit (§. 90.), ipsa Scriptura sacra consentiente (§. 97.), immo ne tale quid fiat severe interdiente (*not §. cit.*); nec persona in solio sedens imago proprie dicta Dei esse potest. Necessesse igitur est, ut istæ representationes propter aliquam similitudinem generalem aliquid Deo, Spiritui S. & Christo conveniens tanquam per signa indigant. Nimirum cum persona in solio sedens representet Regem, cui est imperium in alios, & solium excelsum & magnificum denotet imperii magnitudinem, non modo ex numero subditorum, verum etiam ex illimitatione imperii æstimandam; nemo non videt, in visionibus *Jesaie,*

Ezechieli atque *Johanni* factis indigitari summum Dei idque prorsus illimitatum seu absolutum in creaturas intelligentes, quales sunt homines atque angeli, imperium. Columbae commendantur ob sinceritatem *Matth.* X. 16. Sinceritas consistit in consensu actus externi & interni, simulationi opposita, in qua actus externus ab interno dissentit. Quamobrem cum Spiritus S. sit spiritus veritatis, qui testimonium perhibet de Christo *Joan.* XV. 26. & testimonium reddit spiritui nostro, hoc est, animam nostram certam reddit, quod simus filii Dei *Rom.* VIII. 16, immo qui nos veritatis eorum, quæ Deus in S. S. revelavit, convincit; columba sinceritatem tanquam singularem Spiritus S. virtutem denotat. Nemo nescit agnis mansuetudinem esse naturalem, nec minus ipsis convenire patientiam in ferendis injuriis. Quamobrem cum constet mansuetudinem *Matth.* XI. 29. & patientiam in ferendis injuriis *1. Petr.* II. 23. in Christo emuisse & has virtutes in ipso singularem a nobis attentionem mereri; quod per agnum repræsentetur ad significandam mansuetudinem & patientiam in ferendis injuriis dubitandum non est. Quoniam itaque res, quibus istiusmodi significatus imponitur, significatum hieroglyphicum habent (§. 151. *Psychol. empir.*) consequenter imagines earum figuræ hieroglyphicæ sunt (§. 157. *Psychol. empir.*); figuras hieroglyphicas Dei Scripturæ sacræ non adversari palam est.

Figuræ istæ hieroglyphicæ omnem habent significatum, quam per naturam suam admittere possunt. Nostrum jam non est scrutari integrum, sed pro instituti ratione sufficit ostendisse, quod significatus istiusmodi subsit, qualis ad figuras hieroglyphicas requiritur, & docuisse, quomodo Scripturæ exemplo eademque in gistra figuræ hieroglyphicæ Dei rerumque divinarum fieri possint: neque enim difficile est abstrahere hinc modum figuras hieroglyphicas formandi, quem iis consentientem esse, quæ de figuris hieroglyphicis (§. 151. & seqq. *Psych. empir.*) tradidimus, facile agnoscitur.

§. 99.

Deus juxta S. S. est ens primum ac ultimum eodem sensu, Consensus quo idem ante evicimus. Etenim Deus affirmat Apoc. I. 8, se S. S. quoad esse α & ω. Nemo ignorat, α esse primam alphabeti græci li- primita- teram, ω vero esse ejusdem literam ultimam, consequenter ne- tem & ul- mo non videt, sensum verborum non esse proprium, sed me- timatio- taphoricum. Sensus igitur non alius, quam hic esse potest, nem Dei, Deum esse entium omnium primum & ultimum, quemadmo- dum α est literarum omnium alphabeti in ea, qua Johannes scripsit, lingua prima & ω ultima. Quod vero Deus se dicat primum & ultimum in oppositione ad entia omnia, ex eo haud obscure colligitur, quod Johannes moneat, quod se esse α & ω dicat Dominus, qui est, qui erat & qui venturus, hoc est, qui omni tempore conceptibili existit, ita ut nullum fingi possit, quo non existat (§. 77.). Sicuti itaque litera α prima est in serie literarum alphabeti, quia eam non præcedit alia; ita quoque Deus primus est in serie entium, quia ipsum non præcedit ens aliud, consequenter quia ipse omnibus entibus præexistit independenter. Est adeo Deus ens primum juxta S. S. eodem prorsus sensu, quo eundem ens primum esse evicimus (§. 44. 92.). Similiter sicuti litera ω ultima est in serie literarum alphabeti, quia post ipsum non sequitur alia; ita quoque Deus ultimus est in serie entium, quia post ipsum non existit aliud, consequenter ipsi non succedit aliud dependenter ab eo. Est adeo Deus ens ultimum eodem prorsus sensu, quo eum ens ultimum esse supra evicimus (§. 44. 92.).

Jer. XLIII. 6. Deus dicit de se ipso: Ego primus & ego novissimus, seu ultimus, consequenter tantis ambagibus non videbatur opus ad probandum, quod Deus juxta S. S. sit ens primum & ultimum. Enimvero cum addat hæc verba, absque me non est Deus & ex contextu appareat, Deum se vocare primum & ultimum in oppositione ad idola gentilium; evidens est, verba ista

ista hunc habere sensum, quod ante Deum Israëuitarum non extiterit Deus alius, nec futurum sit tempus, quo post eum extiturus alius, nec in præsente præter ipsum existat Deus quispiam alius, consequenter quod ipse solus sit Deus ac impossibile sit præter hunc Deum unum dari adhuc alios. Et si igitur eadem videantur verba, sensus tamen non idem est, quo supra Deum esse ens primum & ultimum adstruximus. Per consequentiam tamen ex eo, quod Deus Israëuitarum sit solus Deus, nec præter ipsum possibilis deprehendatur Deus quispiam alius, inferri potest, eum esse ens primum & ultimum eo sensu, quo supra idem evicimus, & modo ex loco Apocalypseos evidenter admodum adstruximus. Deus Israëuitarum solus Deus est, nec ante ipsum fuit Deus alius, quemadmodum modo vidimus. Idem vero fecit omnia, cœlos extendit solus, terram stabilivit, nec ullus cum ipso fuit, *Jes. XLIV. 24*, hoc est, totum hoc universum solus produxit sine ullo alterius auxilio. Creatus autem fuit mundus in principio *Gen. I. 1*, quando scilicet præter creatorem non existerat ens aliud. Deus igitur Israëuitarum, qui ante se non habuit Deum alium, est entium omnium primum, adeoque; entibus omnibus præexistit independenter ab alio. Jam quoniam hic ipse Deus independenter ab omni ente alio entibus ceteris omnibus præexistit, *per modo demonstrata*; ut existat, vi entis alterius non indiget, adeoque ens a se est (§. 27.). Enimvero ens a se est entium omnium ultimum (§. 45). Deus igitur Israëuitarum, qui solus Deus est & præter quem non datur Deus alius, est entium omnium ultimum, consequenter ens nullum dependenter ab eo, ipsi succedere potest.

Apparet hinc ex identitate verborum non statim inferri posse consensum Scripturæ cum philosophia; sed animum advertendum esse ad verborum sensum, ut ex hujus identitate inferatur consensus. Patet autem porro, posse ab incautis dicta ad probandam aliquam thesin adduci, quam per se

non probant, quæ tamen instar principii ad probandam eandem adhiberi possunt. Neque alio fine ostendimus, quomodo ex eo, quod Deus sit primus & ultimus, nec præter ipsum detur Deus alius, consequatur, eum esse omnium entium primum & ultimum, quam ut exemplo aliquo ostenderemus, qua cautione opus sit, ne probationes ex Scriptura sacra petitiæ sint deficientes, nec tanquam spurixæ rejiciantur, quæ ad genuinam formam reduci possunt.

§. 100.

Deus juxta S. S. ens simplex est, non compositum. Et. *Simpliciter* enim Deus juxta S. S. est ens omnium primum (§. 99); *con-*sequenter ante ipsum non existit aliud (§. 44.). Cum igitur ut *S. S. con-*existat ente alterius ad existendum non indigeat; ens a se est *formis*. (§. 27.). Enimvero ens a se ens simplex est (§. 49), non compositum (§. 47.). Deus igitur juxta S. S. ens simplex est, non compositum.

Ex propositionis præsentis demonstratione intelligitur, quod principia philosophica profint ad inferendas ex Scriptura sacra conclusiones, quæ totidem verbis in eadem non leguntur. Hinc Theologi, veluti *Musaui* in peculiari dissertatione, defendunt usum principiorum rationis in Theologia revelata, cujus adeo dogmata philosophiæ auxilio amplificantur.

§. 101.

Quoniam ens simplex extensum non est (§. 675. *Ontol.*), *Extensio* Deus autem juxta S. S. ens simplex est (§. 100.), idem quoque *juxta S. S.* *Deo non* *competit.* *extensus esse nequit.*

Quando itaque Deus implere dicitur cælum & terram de omnipræsentia sua locutus *Jerem. XXIII. 24.* id non eodem modo intelligendum est, quo corpus aliquod spatium replet (§. 124. *Cosmol.*), quasi mundo coextensus sit, extensione active penetrabili præditus, quæ opposita est extensioni passive penetrabili, qualis spatio tribuitur. Utraque enim penetrabili-

tas imaginaria est, ac inter abortus imaginationis utique referendum, si Deus extensionem corporum penetrare dicatur sua extensione, quemadmodum corpora extensionem penetrant spatii. Sensus verborum pendet a modo omnipræsentiae divinæ, adeoque hic explicari nec debet, nec potest.

§. 102.

*Consensus
S. S. quoad
immaterialitatem.*

Deus juxta S. S. corporeus esse nequit. Etenim juxta S. S. extensus esse nequit (§. 101). Sed cum corpora omnia sint extensa (§. 122. *Cosmol.*), quod extensum non est, corporeum esse nequit. Deus igitur juxta S. S. corporeus esse non potest.

Idem etiam sic ostenditur. Deus juxta S. S. per naturam & essentiam suam incorruptibilis est, ita ut incorruptibilitas eidem repugnet (§. 95.). Sed corpus omne corruptibile est (§. 667. *Psychol. rat.*). Ergo Deus juxta S. S. corporeus esse nequit.

Equidem Deum non esse corporeum, ex spiritualitate ejus probari poterat: diserte enim Deus dicitur Spiritus Joh. IV. 24. & de Spiritu negatur, quod habeat corpus, quale est humanum, Joh. XXIV. 30. Enimvero cum de spiritualitate Dei hic agi nondum possit, siquidem evidentiam sectemur, quam nobis sanctam esse jubet methodus demonstrativa, nec ex eo, quod de Spiritu negetur corpus humanum ex carne & ossibus constans, citra omnem dubitationem inferatur, cum omni prorsus destitui corpore ac prorsus immaterialem esse; evidente consequentia contenti esse maluimus. Præstat enim evidente consequentia propositionem aliquam ex Scriptura sacra inferri, quam per dicta, quorum interpretatio exceptionibus obnoxia, immediate eam probari. Quæ enim necessaria ac evidente consequentia ex Scriptura sacra inferuntur, non minus eidem conveniunt, quam quæ totidem verbis in eadem leguntur. Sane inferius patebunt rationes, cur Deus non inspiraverit autoribus sacris, quæ ex iis, quæ inspiravit, necessaria consequentia inferri possunt, nisi occasione singulari urgente.

§. 103.

In Scriptura sacra Deo tribuuntur membra corporis hu- *Quo sensu*
 mani metaphorice, significatu quodam generali, qui attributo *Deo tri-*
 cuidam divino & usui illius membri communis est. Tribui in *buan-
 tur*
 S. S. Deo membra corporis humani nemo ignorat. Ita Deo *corporis*
 tribuuntur oculi *Psaln. XXXIII. 18. Amos. IX. 3.* tribuitur fa- *humani*
 cies, *Gen. III. 8. c. IV. 14. 16. 1. Petr. III. 12.* tribuuntur ma- *membra*
 nus, *Psaln. XXV. 6. 1. Petr. V. 6.* tribuuntur pedes, *Jes. LX. in S. S.*
 13. 14. Cum Deus sit incorporeus juxta S. S. (§. 102) nec o-
 culos, nec faciem, nec manus, nec pedes habere potest. Quam-
 obrem hæc membra corporis humani proprie ipsi tribui ne-
 queunt: tribuuntur itaque nonnisi metaphorice. Nemo igno-
 rat per metaphoram vocabula a propria significatione in alie-
 nam transferri ob similitudinem. Vid. Vossius Rhet. lib. 4 c. 4.
 §. 1. Similitudo consistit in identitate eorum, quæ rebus plu-
 ribus insunt (§. 195. *Ontol.*). Necesse igitur est, ut organis
 istis corporis humani, quæ Deo tribuuntur, & attributis divinis,
 ob quæ eidem tribuuntur, quædam insint, quæ eadem sunt, vel
 ut communiter loquimur, ut organa ista corporis humani &
 attributa quædam divina in quibusdam inter se conveniant.
 Organum materiale & attributum divinum, quod nihil mate-
 riale habet (§. 102.), inter se convenire nequeunt, nisi quoad
 usum organorum, ita ut in Deo concipiatur possibile, quod
 per organum istud possibile est homini. Datur adeo significa-
 tus quidam generalis illorum vocabulorum, quibus designan-
 tur ista corporis humani membra, qui attributo cuidam divino
 & usui horum organorum communis est, consequenter in S. S.
 organa ista Deo tribuuntur in significatu hoc generali.

Dedimus jam supra (*not. §. 91.*) exemplum, dum explica-
 vimus significatum generalem, in quo oculus tribuitur Deo.
 Suo autem loco ex instituto explicaturi sumus omnium mem-
 brorum corporis humani Deo in S. S. tributorum significa-

tum generalem, in quo eidem tribuuntur. Directricis notionis loco est propositio præsens, quæ adeo inter regulas hermeneuticas speciales, aut, si mavis, specialissimas recte refertur.

§. 104.

*Vis activa
Dei.*

Deus præditus est vi activa. Est enim ens simplex (§. 83.). Jam cum elementis rerum materialium tanquam entibus simplicibus (§. 182. *Cosmol.*) & animabus humanis tanquam entibus itidem simplicibus (§. 48. *Psychol. rat.*) vis quædam activa insit (§. 196. *Cosmol.* & §. 53. *Psychol. rat.*), adeoque vis activa sit illud, quod dux hæ entium simplicium species diversæ inter se commune habent; quin omni enti simplici vis quædam activa competat dubitandum non est (§. 232. 234. *Ontol.*). Deus igitur vi quædam activa præditus est.

Qualis sit hæc vis activa, nondum definimus. Patebit ea ex sequentibus. Unde cum nondum constet, utrum Deus sit ens finitum, an infinitum; cavendum tantummodo erit, ne per præcipitantiæ ad Deum transferamus, quæ de vi activa finita, quæ experimentis nostris subjacet, & cujus in nobis ipsis ideam habemus, in Ontologia demonstrata & ad elementa rerum materialium in Cosmologia, ad animas nostras in Psychologia rationali applicata fuere. Quodsi enim quis inconsulta applicatione inciderit in errores manifestos, præcipitantiæ suam accuset, minime vero notionum alibi explicatarum falsitatem crepet.

§. 105.

*Actuositas
Dei conti-
nua.*

Deus continuo actuosus est. Deo enim competit vis activa (§. 104.). Jam ex vi activa continuo sequitur actio, nisi eidem resistatur (§. 728. *Ontol.*): in Deo autem tanquam ente simplici (§. 83.), adeoque partibus (§. 673. *Ontol.*), consequenter virium contrariarum subjectis (§. 28. 341. *Ontol.*), carente vires sibi mutuo contrariæ concipi non possunt, cumque independenter ab omni ente alio existat (§. 70.),

70.), nec extrinseca impedimenta fingi possunt. Deus igitur continuo actuosus est.

Propositionis præsentis ac præcedentis veritas independenter ab ipsis patebit per ea, quæ de attributis divinis demonstraturi sumus, intellectum & voluntatem Numinis respicientibus. Ceterum eadem cautio hic commendanda, quam modo ad propositionem præcedentem inculcavimus.

§. 106.

Deus etiam juxta S. S. continuo actuosus est, seu ab a- *Consensus*
gendo nunquam cessat, ipsique vis activa competit. Etenim S. S. quoad
cum Judæi Christo vitio verterent, quod hominem in Sabbatho actuosita-
sanasset, exemplo Dei se tueretur *Job. V. 17.* Pater meus, in- *tem conti-*
quit, usque modo operatur & ego operor. Nimirum mira- *nuam.*
culosa sanatio hominis infirmi erat opus divinum. Talia opera Sabbatho non esse illicita cum exemplo Dei probat; verba ejus sensum alium habere nequeunt, quam quod Deus continuo operetur, ita ut nullo tempore adeoque nec in Sabbatho ab operatione cesseret. Atque adeo patet, Deum continuo actuosum esse juxta S. S.

Jam quoniam actio seu operatio non ponitur, nisi posita vi activa (§. 723. *Ontol.*), cum Deus juxta S. S. continuo agat seu operetur, ita ut nullum ne fingi quidem possit tempus, quo ab agendo cesseret; Deo juxta S. S. competit vis activa, nec quicquam datur, quod impedire possit, quo minus actio continuo sequatur.

Habemus hic exemplum modi interpretandi S. S. ex contextu per antecedentia: etenim si verba extra contextum spectes, quid sibi velit particula *ἕως ἄρτι usque ad nunc*; seu, ut Vulgatus vertit, usque modo, non plene intelligitur. Ast ubi eadem ad antecedentia in contextu refers, protinus intelligitur, hacce particula indigitari, quod Deus etiam illo momento, quo Christus verba ista proferebat, adhuc operetur, adeoque

per totum sabbathum operationem suam continet : unde consequens est, quod alio tempore multo magis ab operatione sua non cesset. Convenit hic interpretandi modus cum regula investigandi significatum vocabulorum, quem juxta communem loquendi modum habent (§. 150. Log.).

§. 107.

*Vivum
quid dica-
tur.*

Vivum dicitur, quod habet principium activum in se. Quamobrem cum in principio activo contineatur ratio, cur vivum agat sine motore externo (§. 866. Ontol.), vis vero activa rationem sufficientem actualitatis actionis contineat (§. 721. Ontol.); vis activa est principium activum, consequenter *quod vi activa præditum est, vivum est.*

Sane corpora animalia dicuntur viva, quia absque impulsu externo moventur, adeoque principium quoddam activum in se habent. Et ex adverso corpus mortuum esse judicant omnes, quando motus isti a principio interno provenientes omnes prorsus cessant. Quale sit principium istud, in genere non definimus, cum definitio generis saltem nominalis sit ab observatione communi pendens. Horologium motu intrinseco partium destituitur, sed impulsore externo opus habet, veluti pondere ac elatere: vivum igitur non dicitur.

§. 108.

*Vita in quo
consistat.*

Vita igitur in continua actuositate entis alicuius consistit. Actuosum vero est, quod vi intrinseca in se actuat, quæ per essentiam seu determinaciones intrinsecas constantes in eodem possibilia intelliguntur, quemadmodum ex anterioribus jam constat.

Ita in corpore humano per structuram ejus internam fieri potest, ut sanguis cum ceteris fluidis continuo circuletur in corpore toto. Et hæc ipsa circulatio interno quodam principio perficitur. Quamdiu igitur hæc circulatio perficitur, corpus actuosum in se est, ac ideo vivere dicitur, & vita ejus non consistit nisi in continua sanguinis circulatione.

§. 109.

§. 109.

Animæ humane vivunt per naturam suam & vita ipsis essentialis est. Etenim animæ humanæ vi quadam prædita sunt (§. 53 *Psychol. rat.*), qua omnes earum actiones producuntur (§. 60. *Psychol. rat.*) & omnia actuantur, quæ per facultates earundem fieri posse in iisdem intelliguntur (§. 55 *Psychol. rat.*). Vivunt itaque animæ humanæ. Cumque vis illa, per quam actuosæ sunt (§. 108.), quatenus quæ in ipsis possibili intelliguntur actuat, sit ipsa earundem natura (§. 68 *Psychol. rat.*); animæ per naturam suam vivunt.

Vita animarum qualis sit.

Quoniam anima continuo actuosæ est (§. 190 191 *Psych. rat.*) & in hac continua actuositate vita ipsius consistit (§. 108.), actuosæ vero est propter vim (§. 60. *Psychol. rat.*), in qua essentiam eius consistere constat (§. 66. *Psych. rat.*); ideo per essentiam animæ intelligitur, cur vita ipsi competat, consequenter ratio vitæ ejusdem in essentia ipsius continetur (§. 56. *Ontol.*). Vita igitur animæ essentialis est.

Quæ de vita animæ evicimus, notioni communi conveniunt: nemo enim animæ non tribuit vitam, propterea quod ipsammet suarum cogitationum autorem agnoscit. Unde distincta explicatione facile eliciuntur, quæ ad probandam propositionem præsentem adduximus.

§. 110.

Elementa rerum materialium vivunt per naturam suam. Vita elementorum. Hæc enim elementa vi quadam prædita sunt (§. 196 *Cosmol.*), ob quam status eorum internus continuo mutatur (§. 197. *rerum materialium. Cosm.*), ut adeo continuo actuosæ sint (§. 108.). Vivunt itaque elementa singula (§. cit.) Et quoniam per naturam elementorum non intelligimus nisi principium mutationum intrinsecarum intrinsecum, quemadmodum per naturam universam in mundo intelligimus principium mutationum in mundo eidem intrinsecum (§. 503. *Cosmol.*); vis vero activa elementorum prin-

principium mutationum in elementis intrinsecum est (§. 880. *Ontol.*): vis illa activa est natura elementorum, quatenus per eam actuantur, quæ per essentiam ipsorum in ipsis possibilia. Sed propter hanc actuositatem elementa vivunt (§. 108.). Vivunt igitur per naturam suam.

Nihil absurdi est, elementa rerum materialium vivere, etsi communiter ignoretur. Ipsa enim elementa vulgo non agnoscuntur, neque adeo mirum videri debet, quod etiam ignoretur, quæ ipsis competit, vita. Et quamvis composita sint elementorum aggregata (§. 176. 182. *Cosmol.*); non tamen ideo sequitur, omnia corpora esse viva. Neque enim vita est in composito, sed in simplici, phaenomenorum fonte. Quamobrem non obstat, ut deinceps vita ab illa diversa in composito aliquo insit, sicque differentia inter corpus vivum & non vivum oriatur. Et quamvis corpori omni vis motrix, quæ activa est (§. 137. *Cosm.*), inesse intelligatur (§. 170. 135. *Cosm.*); hæc tamen nonnisi phaenomenon est (§. 296. *Cosm.*), & composito inesse intelligitur non per se, sed quatenus inest elementis (§. 180. *Cosm.*). In corpore autem vivo intrinsecum quoddam motuum principium per se inesse intelligitur, unde motus spontanei oriuntur absque impulsore externo.

§. III.

Vita Dei.

Deus est vivus. Etenim Deus vi activa præditus est (§. 104) & continuo actuosus (§. 105.). Quamobrem cum ens vivat, quod vi activa præditum (§. 107.) & in continua actuositate vita ejus consistat (§. 108.). Deum esse vivum dubitari nequit.

In quonam vita ejus consistat, nondum definiri potest: definietur autem infra suo loco, ubi natura Dei fuerit perspecta. Ceterum notandum est, quantum fallantur, qui sibi persuadent, vitam Dei, quam in continua actuositate consistere debere agnoscunt, repugnare simplicitati superius evictæ (§. 83.) ac propterea eidem extensionem tribuere, ut ipsorum judicio

dicio actuosus totus adeoque vivus concipi possit. Etenim cum vis proprie dicta eademque vera ac realis non insit nisi in ente simplici, vi compositi nonnisi phænomeno existente (§. 296. *Cosmol.*) per illam explicabili (§. 191. *Cosmol.*); ens quoque simplex, utpote sine vi activa non conceptibile, sine vita concipi nequit & vita propriissime sic dicta eidem inest. Quod vero est entis simplicis inseparabile attributum, id eidem repugnare haud quaquam potest. Fons vero erroris is est, quod veram substantiæ simplicis notionem minime habentes punctum mathematicum sibi imaginantur, in quo nulla deprehenditur realitas, sed saltem defectus omnis extensionis: quasi vero substantia simplex & punctum istud Mathematicorum imaginarium sint unum idemque. Poteramus in genere evincere, vitam esse omni enti simplici essentialem & Deum ideo concipiendum esse tanquam vivum, quia agnoscitur simplex.

§. 112.

Deus juxta S. S. est vivus & quidem eo sensu, quo nos Vita Dei eundem vivum esse ostendimus. Multa sunt S. S. loca, in quibus Deus dicitur vivus. Quod si vero attente consideraveris omnes in contextu circumstantias, id fieri intelligitur, ut Deum tanquam actuosum & vi activa pollentem concipiamus. Ita Jos. III. 10. Deus vivens esse dicitur in medio Israëlitarum, ut fidem habeant Josuæ asserenti, quod gentes, quarum terras occupare debebant, extirpaturus sit. Deo itaque vita tribuitur, ut intelligatur, ipsum posse disperdere gentes, consequenter vi maxima activa præditum esse: vis enim magna esse debet unus, quæ prævalere debet adversus multos. Vivus adeo in S. S. dicitur eodem sensu, quo eundem vivum esse ante ostendimus (§. III.).

Similiter Deum viventem appellat Ezechias 2. Reg. XIX. dum ejus auxilium implorat adversus Sennacheribum Regem Assyriorum. Etenim cum invocans: *inclina, inquit, aurem tuam & audi: aperi, Domine, oculos tuos & vide, audi* (Wolfii Theol. Naturalis)

M omnia

omnia verba Sennacherib, qui misit ut exprobraret nobis Deum viventem. Ridebat Judæos Sennacherib, quod sibi blandirentur, quasi Deus adversus arma ipsius auxilium sit laturus, ne iisdem succumbant, provocans ad gentes alias a se devictas, quarum idola flammis feralibus commiserat. Ezechias itaque Deum precibus suis interpellans, ut in ruborem det Regem fastuosum cum idolis Deum verum in eundem censum referentem, Deum verum viventem appellat in oppositione ad idola, Equidem in versione *Castellonis* Deus hic loci non vivens, sed immortalis appellatur: sed versio vulgata, quam etiam sequitur *Lutherus* in vernacula, cum textu Hebraico convenit, in quo Deus dicitur אלהים חי. Nemo vero Lingua Hebrææ gnarus est qui nesciat, חי vivum denotare, non immortale. De idolis affirmat Ezechias, quod sint opera manuum hominum ex ligno & lapide facta, ac præterea nihil, ut adeo facile fuerit Assyriis ea in ignem mittere, gentesque, quas devicerunt, frustra eorum opem imploraverint. Deo autem vero tribuit aures, qui & blasphemias Regis Assyriorum audire, & preces populi sui exaudire possit; tribuit oculos, ut videre possit, quid molitur Rex Assyriorum; tribuit potentiam, qua hostis fastuosi molimina irrita facere possit. Petir igitur a Deo, ut opem ferat sibi adversus hostem superbum Divinitatis contemptorem, ut inde intelligat, Deum & audire, quæ loquuntur, & videre, quæ faciunt homines, nec impune ferre contemptum sui, ipsumque colentibus præsto esse adversus quoscunque hostiles insultus, hincque colligat Deum esse vivum, nec comparari posse cum Diis gentium ceterarum, quæ cum non sint nisi opera manuum humanarum lignea & lapidea, vita omni destituuntur, ut nec eorum, qui ipsos colunt, preces audire, nec iis opem ferre, nec hostilia adversus ipsos molimina videre possint. Ex sensu & locali motu organorum corporis, quo actiones externæ perficiuntur, vita hominum colligitur, tum quatenus corpori,

pori, tum quatenus animæ competit. Quamobrem cum Deo vero vita tribuatur in oppositione ad idola; eodem sensu tribuitur, quo anima & corpus hominis vivere dicitur. Vivum dicitur corpus humanum, viva dicitur anima, quatenus principium activum in se habet (§. 107.). Etenim hanc notionem generalem a vivente corpore abstraximus (§. 150. *Log.*) ac ideo exemplo corporis humani illustravimus (*not. §. cit.*) & ex eadem demonstravimus (§. 109.), animæ humanæ vitam esse essentialem. Quoniam itaque ex eadem quoque demonstravimus (§. 111.), Deum esse vivum; evidens est in S. S. Deo vitam tribui eodem sensu, quo nos eundem vivum esse ostendimus. Immo quod Deo competat vita juxta S. S. eo sensu, quo nos eundem vivum esse evicimus, hoc quoque modo probatur, si rem tantummodo, non vero simul nomen spectes. Deo vitam competere supra ostendimus ex hisce principiis, quod vi activa præditus & continuo actuosus sit (§. 111.). Quamobrem cum & secundum Scripturam Deus vi activa præditus (§. 104) & continuo actuosus sit (§. 105.); eadem demonstratio juxta S. S. consistit, consequenter juxta eandem Deo vita competit eodem prorsus sensu, quo nos eandem ipsi competere demonstravimus.

Quod vero Deus quoque in S. S. vivus dicatur eodem sensu, quo nos eundem vivum esse probavimus; hoc modo probari potest. Deus vivus dicitur in S. S. *loc. cit.* non tamen definitur, quid per vitam intelligi velit. Non alia igitur vitæ notio supponi potest, quam quæ a rebus viventibus, dum eas intuemur, abstrahi potest (§. 972. *Log.*). Et sane Ezechias *loc. cit.* Dei vitam ex eo colligi vult, unde vitam hominis colligimus. Enimvero quæ a rebus viventibus, quas præsentibus intuemur, abstrahitur vitæ notio, ea est, qua nos in demonstranda vita animarum humanarum atque Dei utimur (§. 107.). Deus

itaque in S. S. vivus dicitur eodem sensu, quo nos eundem vivum esse demonstravimus.

In novo fœdere Deus non uno in loco dicitur vivus: Sed ubivis ex contextu apparet, eum vivum dici vel in oppositione ad falsos Deos, quos colebant gentiles, ita ut vita allegetur tanquam proprium veri Dei, vel in relatione ad potentiam. Prius imprimis apparet ex Act. XIV. 15, ubi Paulus & Barnabas Iconienses dicunt, quod ipsos convertere velint a Diis vanis ad Deum verum, qui fecit cœlum, & terram, & mare, & omnia quæ in eis sunt. Verus enim Deus est is, qui autor est hujus universi (§. 67.), ipsa Scriptura consentiente (§. 68.): & cum ipsi tanquam vero Deo vita comperat, qua carent omnes falsi Dii, quales cum Græcis colebant Iconienses, verus Deus vita distinguitur a falsis, ac ideo Paulus & Barnabas Deum verum vocant τὸν Θεὸν τὸν ζῶντα Deum illum, qui vivit. Posterius elucet ex I. Tim. VI. 17, ubi divites prohibentur confidere divitiis incertis, jubentur autem confidere Deo vivo, qui præstat nobis omnia abunde ad fruendum. Vidimus autem in anterioribus utroque modo Deo vitam tribui eodem sensu, quo nos eidem vitam vindicavimus.

§. 113.

*Unde Deus
vitam ha-
beat.*

Deus vitam habet in se, independenter ab omni ente alio. Etenim Deus vi propriæ existit, independenter ab omni alio ente (§. 70.), atque adeo existere potest, etiamsi præter eum non existat ens aliud. Enimvero Deus vivus est (§. 111.). Vivit igitur, etiamsi præter eum non existat ens aliud, consequenter vitam in se habet independenter ab omni ente alio.

Indirecte idem concluditur hoc modo. Ponamus Deum habere vitam dependenter ab ente quodam alio. Ratio igitur cur vivit continetur in ente alio ab ipso diverso. Quamobrem cum implicet ut sit Deus, nec tamen vivat (§. 111.); existere nequit

quit, nisi ens præterea aliud ab ipso diversum existat; id quod cum sit absurdum (§. 70.), vitam habere debet independentem ab omni ente alio.

Atque hoc ipso vita Dei distinguitur a vita omnis entis alterius. Etenim elementa vitam habent a Deo, nec vivunt nisi dependenter ab eo. Idem dicendum est de vita animarum. Utrumque patebit per ea, quæ de creatione & conservatione rerum omnium finitarum inferius demonstraturi sumus. Corpora nostra habent vitam dependenter ab aliis corporibus, veluti ab aere, sine quo respirare non possumus; a cibo ac potu, sine quo vitam conservare non licet; a calore externo, quo carere nequimus.

§. 114.

Deus juxta S. S. vitam habet in se, independentem ab omni Consensus ente alio. Disertis verbis affirmat Christus Job V 26, Deum S. S. quoad habere vitam in semetipso. Scriptura sacra vocabulum vitæ *independentiam* accipit eo sensu, qui abstrahitur a corpore humano vivo, quem *vita Dei* admodum paulo ante docuimus (§. 112.). Vita corporis nostra *vita Dei*, stria rebus externis pendet (not. §. cit.). Quamobrem cum Christus hoc ipso Deum viventem distinguat a viventibus ceteris, quod vitam habeat in seipso; non aliud docere intendit quam quod Deus habeat vitam independentem ab omni ente alio.

Est adeo character Divinitatis vitam habere in seipso, hoc est, independentem ab omni alio ente, etiam juxta S. S. Quamobrem cum Christus affirmet, Patrem dedisse filio vitam habere in semetipso, quemadmodum ipse vitam in semetipso habet; recte inde infertur, Christum esse verum Deum, patri cœqualem.

§. 115.

Talia Deo tribuenda sunt prædicata, ut per ea intelligatur, Qualia Deo
cur mundus hic adspectabilis cum animabus nostris potius existat, tribuenda
quam prædicata.

quam non existat, & cur ipse potius existat quam alius. Etenim Deus est ens a se, in quo continetur ratio sufficiens existentiae mundi hujus adspectabilis & animarum nostrarum (§. 67.). Quoniam itaque per rationem sufficientem intelligitur, cur quid potius sit quam non sit (§. 56. *Ontol.*), per ea, quae Deo insunt, intelligi potest, cur mundus hic adspectabilis cum animabus nostris existat. Enimvero non impossibile est mundum hunc adspectabilem cum elementis suis (§. 57.), consequenter animas humanas, quae per essentiam & naturam suam eundem sibi repraesentant (§. 66. 67. *Psychol. rat.*), non existere. Quamobrem per ea, quae Deo insunt, intelligi potest, cur mundus hic adspectabilis cum animabus humanis potius existat, quam non existat. Porro alii mundi possibili sunt, in quibus ad actum deducerentur possibilia, quae in praesente actum non consequuntur (§. 101. *Cosmol.*), cumque animae sint entia simplicia, in quibus per essentiam & naturam ipsorum repraesentatur aliquod universum (§. 66. 67. *Psychol. rat.*), quin aliae quoque animae per essentiam & naturam suam alios mundos posibles sibi repraesentantes etiam posibles sint, dubitari nequit. Per ea igitur, quae Deo insunt, intelligi potest, cur hic potius mundus adspectabilis, quam alius existat, & cur haec potius existant animae humanae, quam aliae. Quamobrem patet talia Deo tribuenda esse praedicata, ut per ea intelligi possit, cur hic potius mundus adspectabilis cum animabus hisce existat, quam alius cum animabus aliis, & cur potius existat, quam non existat.

Ecce tibi scalam, per quam in Deum ascenditur. Etenim jam patet, quomodo in cognitionem attributorum divinarum pervenire possimus. Quae enim haecenus de Deo praedicavimus, ea ipsi competunt tanquam enti a se, nec ad agnoscendum Deum & a rebus creatis distinguendum, multo minus ad cultum divinum sufficiunt. Ceterum mutatis mutandis Idealistae quoque propositionem praesentem admittere tenentur. Etenim Idealista, qui mundo nonnisi existentiam idealem

lem in animabus hominum tribuit (§. 36. *Psychol. rat.*), cum hoc non obitante plures mundos possibiles agnoscere teneatur, quia possibilitas ab actuali existentia minime pendet, plures admittere tenetur animas, quæ sibi diversos mundos possibiles per essentiam & naturam suam repræsentare valent & quibus existentibus mundi isti idealiter existunt. Quamobrem porro admittere tenetur, per ea, quæ Deo insunt, intelligi posse, cur hæc potius quam aliæ animæ existant & in his potius animabus hic mundus adspectabilis, quam in aliis alius idealiter existat, & cur hæc animæ potius existant, quam non existant, & in his animabus hic mundus adspectabilis potius idealiter existat, quam alius. Utrobique eadem procedunt attributa, ut adeo Idealismo, etsi is a nobis minime probetur, labes atheismi adspersi minime possit.

§. 116.

Quoniam Deo ea tribuenda sunt prædicata, quæ ad hoc *Qualis vis* requiruntur, ut intelligi possit, cur mundus hic adspectabilis *Deo* cum animabus humanis potius existat, quam alius cum anima-*petat.* bus aliis, & cur idem potius existat, quam non existat (§. 115.), Deo autem vis comperit (§. 104), per quam continuo actuosus est (§. 05.); *Vis, quæ Deo inest, talis concipi debet, qualis ad hoc requiritur ut intelligatur, cur mundus hic adspectabilis cum animabus nostris potius existat, quam alius cum animabus aliis, & cur idem potius existat quam non existat.*

Deus ens simplex est (§. 83.). Entia simplicia distinguuntur per vires ipsis intrinsecas, per quas actuose sunt & vivunt, quemadmodum ex collatione eorum quæ de rerum materialium elementis in Cosmologia & de animabus nostris in Psychologia rationali demonstrata sunt, abunde constat. Quamobrem Deus quoque vi, quæ ipsi intrinseca est, & per quam ipse actuosus est ac vivit, a ceteris entibus simplicibus differt. Patebit vero deinceps, quod etsi vis ista ex earum genere esse videatur, ad quod vires animabus essentielles pertinent, eam tamen ab his differre quemadmodum finitum ab infinito.

§. 117.

*Mundi
existentis
unitas,*

Mundus tantummodo unus existit. Etenim aut mundus non existit nisi unus, aut mundi plures existunt. Ponamus plures existere mundos: Aut mundi isti erunt similes, aut dissimiles. Quod si mundi plures existentes fuerint similes, nihil prorsus, ne minimum quidem, datur in mundo uno, quod non etiam eodem prorsus modo sese habeat in altero, ut adeo discrimen intrinsecum ne fingi quidem ullum possit (§. 195. *Ontol.*). Quamobrem perinde est, siue mundus A dextro, & B sinistro loco constituatur, siue B occupet dextrum, A sinistrum, nec per ea, quæ mundo utrique A & B insunt, intelligi poterit, cur A potius dextro, quam sinistro sit loco & B potius sinistrum, quam dextrum teneat locum, consequenter nulla datur ratio, cur mundus A dextro, B sinistro sit loco, quam cur potius contraria ratione sese res habeat (§. 56. *Ontol.*). Quamobrem cum sine ratione sufficiente nil quicquam esse possit (§. 70. *Ontol.*); plures mundi similes simul existere nequeunt.

Si plures fuerint mundi diversi, ratio eorum, quæ in uno contingunt, reddi nequit ex iis, quæ contingunt in altero. Ponamus enim, si fieri potest, rationem eorum, quæ in uno mundo contingunt, reddi posse ex iis, quæ contingunt in altero. Mundi igitur isti inter se connectuntur (§. 10. *Cosmol.*); simul adeo aliquam rerum coëxistentium atque successivarum seriem constituunt, consequenter mundus nonnisi unus sunt (§. 59. *Cosmol.* & §. 329. *Ontol.*), contra hypothesin. Quoniam ratio eorum, quæ in uno mundo contingunt, reddi nequit ex iis, quæ contingunt in altero *per demonstrata*; nulla mutatio inde sequeretur, si ordo coëxistendi mutaretur. Ex iis itaque, quæ pluribus mundis insunt, intelligi nequit, cur hoc potius ordine coëxistant, quam alio, consequenter ordinis coëxistendi nulla datur ratio sufficiens (§. 56. *Ont.*). Quamobrem cum sine ratione sufficiente

ficiente nil quicquam esse possit (§. 70. *Ontol.*) ; nec plures mundi dissimiles simul existere possunt. Quoniam itaque mundi plures existere nequeunt simul, sive fuerint similes, sive dissimiles *per demonstrata* ; mundus nonnisi unus existit.

Hanc propositionem ideo apponimus, ne quis circa ea, quæ de modo pervestigandi attributa divina modo evicimus (§. 115. 116.), difficultates facessat. Quodsi quis principii rationis sufficientis vim & efficaciam animo nondum comprehendit; is poterat tantummodo sumere, talia concipienda esse attributa divina, ut sufficiens ratio reddi possit existentiae mundi hujus adspectabilis sive realis, sive idealis. Constat enim mundum non esse ens a se (§. 58.), consequenter rationem existentiae ejus sufficientem in Deo quærendam esse, sive plures adhuc alii mundi eidem coexistent, sive ipse tantummodo existat solus (§. 67.). Majore tamen evidentia demonstrantur, quæ sequuntur, atque multo facilius, si præsens propositio instar principii admittitur. Immo non deerunt, qui sine probatione sumi facile largientur, præter hunc mundum adspectabilem, quem solum cognoscimus, non existere alium, præsertim cum & Scriptura sacra, quæ Deum nonnisi unicum admittit, nonnisi unius mundi mentionem faciat & cum a Deo productum esse doceat, cum antea non existeret. Non vero opus esse judicamus, ut propositionis, quæ instar lemmatis nobis est, cum Scriptura sacra conformitatem evincamus.

§. 118.

Ratio objectiva dicitur, quæ desumitur ab objecto. *Rationis*

Ita ratio objectiva existentiae mundi est, quæ desumitur *objectivæ* ab ipso mundo. Et in Moralibus ratio objectiva moralitatis *definitio*. dicitur, quæ desumitur ab ipsa actione.

§. 119.

Datur ratio objectiva, cur hic potius mundus existat, quam *An detur*
alius. Ponamus enim nullam dari rationem objectivam, cur *ratio obje-*
 hic potius mundus existat, quam alius: cum ratio objectiva *ctiva ex-*
 (*Wolfii Theol. Naturalis*) N *istentia*
 de *mundi.*

desumatur ab objecto (§. 118.); nihil inest mundo huic ad-
spectabili, cur ipse potius existat quam alius (§. 56. *Ontol.*).
Quoad Deum igitur perinde est, siue hic mundus existat, siue
quicumque alius, consequenter nec Deo insunt, per quæ intel-
ligi potest, cur hic potius existat mundus, quam alius. Quam-
obrem nulla datur ratio sufficiens, cur hic potius existat mun-
dus, quam alius: quod cum sit absurdum (§. 70. *Ontol.*),
ratio utique objectiva datur, cur hic potius mundus existat
quam alius.

Qui excipiunt, rationem sufficientem esse voluntatem Dei,
atque adeo rationem objectivam nullam requiri, illi supponunt
voluntatem agere sine motivis: id quod absurdum esse docui-
mus alibi (§. 889. *Psych. empir.*). Immo repugnat ipsa rationis
sufficientis notio. Ex eo enim quod quis quidpiam vult, non-
dum intelligitur, quod hoc potius sit, quam non sit: constare
debet, cur hoc potius velit, quam aliud. Id vero est, quod
sine ratione objectiva concipere non datur.

§. 120.

*Unde de-
sumatur.*

*Ratio objectiva, cur hic potius mundus existat, quam ali-
us, desumenda est ab eo, quo duo vel plures mundi a se invi-
cem differunt.* Datur enim aliqua ratio objectiva, cur hic po-
tius mundus existat, quam alius (§. 119.). Quamobrem cum
ea ab ipso mundo sit desumenda, qui existit (§. 118.); aut quæ-
renda erit in his, quæ hic mundus cum aliis communia habet,
aut in iis, quæ eidem propria sunt, consequenter in eo, quo a
ceteris differt. Quoniam quoad communia mundus unus al-
teri salvo omni respectu, quem habere possunt ad Deum, sub-
stitui potest (§. 181. *Ontol.*); per communia ista intelligi ne-
quit, cur unus potius existat mundus quam alius, consequen-
ter ratio, cur hic potius existat quam alius mundus, in iis
quærenda non est, quæ ipsi cum mundis ceteris communia sunt.

Quam

Quamobrem in iis quæri debet, quæ sunt propria, consequenter in eo, quo mundus hic adspectabilis a ceteris differt.

Quænam sit ista ratio, suo constabit loco; hic doceri nec potest, deficientibus principiis ad demonstrationem necessariis, nec debet, cum propositio generalis sufficiat ad ea deducenda ex anterioribus, quorum gratia adjicitur.

§. 121.

Deus mundos omnes possibiles sibi representavit & hunc ex ceteris elegit. Deo talia tribuenda sunt prædicata, per quæ intelligitur, cur mundus hic adspectabilis cum animabus nostris potius existat, quam non existat, & cur ipse potius existat quam alius (§. 115.). Enimvero datur ratio objectiva, cur hic potius mundus existat quam alius (§. 119.), eaque consistit in eo, quo is a ceteris mundis æque possibilibus differt (§. 120.). Quoniam itaque mundus hic adspectabilis non est ens a se, sed ab alio (§. 50.), adeoque vi propria existere nequit (§. 27.); inter ea, quibus is differt ab aliis, referri nequit vis propria ad existendum requisita. Quamobrem per ea, quæ Deo insunt, intelligi haud quaquam potest, cur hic potius existat mundus quam alius, nisi supponatur Deum differentiam mundi hujus adspectabilis a ceteris, consequenter mundos omnes possibiles distincte sibi representasse (§. 38. *Psych. empir.*) & ob differentiam istam hunc ex ceteris elegisse.

Representatio omnium mundorum possibilium in Deo & hujus ex ceteris electio.

Si quid mundo inesset, unde ejus actualitas sequeretur, tale vero non inesset mundis ceteris possibilibus; inde inferri non poterat, Deo inexistere mundorum omnium possibilium ideas & ipsum hunc ex ceteris elegisse. Sed istiusmodi quid ne fingi quidem in mundo potest, nisi in manifestam contradictionem incidere velis, quatenus mundum facis ens a se, quem esse ens ab alio supraevicimus (§. 58.), vel verba dare, quæ sunt sine mente sonus, quatenus fingis vim ad existendum propriam, sed a Deo dependentem, quæ insit huic mundo adspectabili, non vero ceteris.

§. 122.

*Intellectus
Deo asser-
tus.*

Deo competit intellectus. Etenim Deus sibi distincte repræsentare valet omnes mundos possibles & in his mundum, qui existit, adspectabilem (§. 121.). Quamobrem cum facultas res distincte repræsentandi sit intellectus (§. 275. *Psychol. empir.*); Deo competere intellectum evidens est.

Nondum definire licet, utrum intellectus divinus quemadmodum humanus concipi debeat per modum facultatis, an per modum actus: posterius enim demum in sequentibus demonstrare licebit. Non tamen hinc metuendus est aliquis error, quod definitione intellectus, qualis homini competit, utamur ad probandum, Deo competere intellectum. Sit enim, prouti inferius ostendetur, intellectus divinus purus actus, non nuda possibilitas sibi res repræsentandi, qualis est facultas (§. 29. *Psychol. empir.*): Quoniam tamen quod actu est idem quoque possibile est (§. 170. *Ontol.*), nullus hinc metuendus est error, si in Deo possibile sumitur, quod in eo actu est. Sufficit nimirum inferius probari, actu inesse, quæ tanquam possibilia fuere adstructa, eaque semper inesse.

§. 123.

*Voluntas
libera Deo
asserta.*

Deo competit voluntas libera. Etenim Deus ex pluribus mundis possibilibus hunc adspectabilem elegit ut existat (§. 121.), cumque præter Deum nihil existeret, dum mundum eligeret (§. 92.), semetipsum ad hanc electionem determinavit, adeoque sponte eundem elegit (§. 933. *Psychol. empir.*). Quamobrem cum ex pluribus possibilibus aliquid sponte eligendi facultas supponat libertatem voluntatis (§. 941. *Psych. empir.*); Deo voluntatem liberam competere evidens est.

Poteramus instar principii assumere, quod voluntatem liberam habeat, qui ex pluribus possibilibus sponte quid eligit: nemo enim est, qui hoc concedere recusat.

§. 124.

§. 124.

Deus est spiritus. Deus enim est ens a se (§. 67.) intellectu *Spirituali-* (§. 122.) & voluntate libera præditum (§. 123.). Enimvero *tas Dei.* ens intellectu & voluntate libera præditum spiritus est (§. 643. *Psyb. rat.*). Deus igitur spiritus est.

§. 125.

Quoniam *Deus* est ens a se (§. 67.), adeoque indepen- *Qualis sit* dens (§. 30.), idemque spiritus (§. 124.) ; *spiritus indepen-* *spiritus.* dens est.

Hinc Deus a nonnullis definiri solet , quod sit Spiritus independens, nec male: neque enim datur Spiritus alius, qui sit independens præter Deum , quemadmodum ex inferius demonstrandis uberius patebit. Quoniam vero ex definitione Dei, quam dedimus (§. 67.), deduximus , Deum esse Spiritum independentem ; methodi gnarus facile perspicit, ex eo, quod Deus sit Spiritus independens , deduci posse definitionem Dei, quam supra dedimus. Etenim ex independentia fluit aseititas , ex aseitate autem supra collegimus (§. 64.), quamvis non immediate, mundum hunc adspectabilem, elementa rerum materialium & animas humanas rationem sufficientem existentiae suæ non habere nisi in ente a se. Perinde igitur est, siue Deum definias per spiritum independentem, siue per ens a se, in quo continetur ratio sufficiens existentiae mundi hujus adspectabilis & animarum nostrarum , quemadmodum in Geometria perinde est , siue parabolam definias per curvam, in qua abscissæ habent rationem duplicatam semiordinatarum, siue per curvam , in qua rectangulum ex parametro in abscissa æquale est quadrato semiordinatæ , cum ex uno assumpto demonstrari possit alterum. Methodi ignorantiae tribuendum, si qui Dei, quam dedimus, definitionem reprehendunt & tanquam atheismo patrocinantem criminantur , propterea quod creationis pro productione ex nihilo sumptæ, non expressa in eadem fiat mentio , quasi vero methodus jubeat definitioni inseri, quæ ex eadem legitima ratiociniorum concate-

natione deduci possunt. Etenim creationem Deo per definitionem nostram competere in eo significato, qui communiter vocabulo tribuitur, suo loco ostendemus. Qui nostram definitionem tanquam spuriam rejicit, is quoque tanquam spuriam rejicere debet eam, qua Deus dicitur spiritus independens, Theologis præclaris dudum probatam, cum una alteri æquipolleat, adeoque una in locum alterius surrogari possit: sit ita, quod nobis commodius visum fuerit nostra definitione potius uti, quam altera. Immo si quis voluerit, immutata demonstrationum nostrarum serie definitionem alteram systemati inferere, is definitionem Dei nominalem differat, donec demonstratum fuerit de ente a se, quod sit spiritus independens, atque deinde demum ad Deum applicet, quæ de ente a se demonstrata fuere. Enimvero ut plenius intelligatur, quomodo ex independentia fluat aseitas, propositionem sequentem addere juvat.

§. 126.

*Aseitas
spiritus
independ-
entis.*

Spiritus independens est ens a se. Si enim independens est, nihil ipsi inexistit, cujus ratio in ente quodam alio ab ipso diverso contineatur (§. 851. Ontol.), consequenter nec ratio existentia ipsius in alio quodam ente continetur, adeoque nec vi alterius, sed propria existit (§. 56. Ontol.). Est igitur ens a se.

§. 127

*Quale ens
rationem
sufficien-
tem exi-
stentiæ
mundi in se
contineat.*

Ens, in quo continetur ratio sufficiens existentia mundi hujus adspectabilis & animarum nostrarum, omnes mundos possibiles sibi representare valet atque hunc ex ceteris elegit. Probatur eodem prorsus modo, quo ante (§. 121) evicimus, Deum omnes mundos possibiles sibi representare posse atque hunc ex ceteris elegisse.

Mirum non est, probationem esse prorsus eandem. Cum enim per Deum ibidem intelligamus ens, in quo continetur ratio sufficiens existentia mundi hujus adspectabilis & animarum nostrarum (§. 67.), eadem est in utraque propositione

notio

notio subiecti. Quamobrem cum demonstratio procedat ex iis, quæ de subiecto sumuntur in eius notione; eadem quoque esse debet huius & superioris, hoc est, revera ejusdem propositionis. Nimirum sive dicas, triangulum habet tres angulos duobus rectis æquales, sive affirmes, figura tribus lineis rectis terminata habet tres angulos duobus rectis æquales, propositio una eademque est, adeoque & eadem erit demonstratio, quocunque modo eandem enuncies.

§. 128.

Ens, in quo continetur ratio sufficiens existentie mundi huius adspectabilis & animarum nostrarum, intellectu & voluntate libera gaudet, atque adeo spiritus est. Probatur denuo eodem istudens. prorsus modo, quo ante evicimus, Deum intellectu & voluntate libera gaudere (§. 122, 123.), atque adeo spiritum esse (§. 124.).

Nimirum Deum habere intellectum, probavimus ex eo, quod omnes mundos possibiles sibi repræsentare valeat (§. 122.). Deum habere voluntatem liberam intulimus inde, quod ex mundis possibilibus hunc elegerit (§. 123.). Denique Deum esse spiritum ex eo collegimus, quod intellectum & voluntatem liberam habeat (§. 124.). Quamobrem cum ens, in quo continetur ratio sufficiens existentie mundi huius adspectabilis & animarum nostrarum, omnes mundos possibiles sibi repræsentare valeat & hunc adspectabilem ex iis elegerit (§. 127.); eodem quoque, quo supra, modo patere debet, quod intellectu atque voluntate libera gaudere ac ideo spiritus esse debeat.

§. 129.

In spiritu independente continetur ratio sufficiens existentie mundi huius adspectabilis & animarum nostrarum. Etenim & anima-spiritus independens est ens a se (§. 126.). Jam mundus hic adspectabilis & animæ nostræ rationem sufficientem existentie non habent nisi in ente a se (§. 64.), quod Spiritus est (§. 128.).

Dependen-

tia mundi

& anima-

rum no-

strarum a

spiritu in-

Ergo dependente.

Ergo ratio sufficiens existentiz mundi hujus adspectabilis & animarum nostrarum in Spiritu independente continetur.

Atque ita probavimus æquipollentiam definitionis nostræ de Deo & definitionis apud Theologos dudum receptæ, quod Deus sit spiritus independens. Unde porro liquet, quam parum sint methodi demonstrativæ gnari, qui definitionem nostram atheismo favere sibi persuadent aliisque persuadere nituntur. Nec mirari debent, quod finem non inveniant ipsorum criminationes nisi penes sui similes ac penes eos, qui cum artifice in arte sua credere in animum induxerint, pro artificibus præcipitantiam habent, qui non sunt. Ceterum non piget æquipollentiam harum definitionum demonstrasse. Inde enim discere licet, quomodo in eandem inquirendum sit, ne temere impugnemus, quæ aliis sine dubitatione admittendis æquivalent.

§. 130.

Consensus
S. S. quoad
intellectum
Dei.

Deo secundum S. S. competit intellectus eo sensu, quo eundem ipsi vindicavimus. Eam animæ partem, quæ notiones format, judicat & ratiocinatur, *Aristoteles* de Anima lib. 3. c. 4. τὸν νῦν appellat, & eam per modum facultatis considerat, quatenus animæ tribuitur, quia intelligere potest. Pater itaque Græcis τὸν νῦν dici eam animæ facultatem, quam nos intellectum vocamus (§. 325. *Psychol. empir.*) sumendo vocabulum in significato recepto: unde & interpretes Latini in loco citato *Aristotelis* νῦν per intellectum vertunt. Et in hoc etiam significato vocabulum Græcum sumitur & a vulgata per intellectum redditur *Apoc.* XIII. 18. Deo tribuitur νῦν sive νῦς *Rom.* XI. 34, ubi magna fiducia pronunciat Apostolus, neminem perspexisse νῦν κυρίου aut ipsi a consilio fuisse, ubi de reconditis Dei judiciis de gratiæ divinæ dispensatione loquitur. Equidem bene hunc locum vertit *Castellio*: *neminem novisse, mentem Domini, & Lutherus* in vernacula, *niemand habe*
des

des Herrn Sinnerfant, atque adeo vocabulum $\nu\acute{o}\varsigma$ non videtur hic accipi pro intellectu in ea significatione sumro, quem nos eidem tribuimus, & qua idem sumit *Aristoteles*: quodsi tamen contextum attenta mente perpendimus, evidenter admodum inde probatur, Deo in hoc loco tribui intellectum, qualem ipsi competere probavimus. Etenim Apostolus probaturus judicia Dei esse penitus recondita & rationes eorum adeo abstrusas, ut a nobis pervestigari non possint, quærit: quis cognovit $\nu\acute{\epsilon}\nu\ \kappa\upsilon\rho\acute{\iota}\varsigma$, mentem Domini, aut quis ei fuit a consilio? Qui decernit quidpiam, is iudicat, quid fieri debeat: iudicium vero intellectus operatio est nostro sensu acceptæ (§. 325. *Psychol. empir.*). Rationes decreti cum sint id, ob quod decernens hoc potius fieri debere iudicat, quam aliud (§. 56. *Ontol.*); supponunt in decernente notiones (§. 49. *Psych. empir.*), quæ eidem intellectus nostro sensu accepti operatio sunt (§. 325. *Psychol. empir.*). Quamobrem cum decretorum divinorum rationes nobis incognitas pronunciet Apostolus, quia $\nu\acute{\epsilon}\nu\ \kappa\upsilon\rho\acute{\iota}\varsigma$ non cognoscimus; perinde est ac si diceret, nobis eas non esse perspectas, quia videre non possumus, quæ sunt in intellectu divino. Unde cum Deo $\nu\acute{\epsilon}\nu$ tribuit, intellectum omnino eidem tribuit eodem sensu acceptum, quo nos vocabulum sumimus. Hinc non invito contextu verba Apostoli vertere licebat: ecquis novit ea, quæ sunt in intellectu divino? quemadmodum ipse 2. Cor. II. 1. affirmat, neminem nosse quæ sunt Dei, seu actiones Dei internas, nisi Spiritum Dei, prouti nemo novit quæ sunt hominis, seu actiones ipsius internas, nisi Spiritus hominis qui in ipso est. Quando igitur Dei $\nu\acute{\epsilon}\nu$ non cognoscere dicimur; dubitandum non est quin vocabulum $\nu\acute{\epsilon}\varsigma$ sumatur pro intellectu eo sensu accepto, qualem Deo tribuimus.

Quodsi tamen per tantas ambages incedere nolimus probaturi Deo tribui in S. S. intellectum nostro sensu acceptum, idem facilius hoc modo evincitur. Nota dicuntur Deo ab æ-

(*Wolfii Theol. Naturalis*)

O

terno

terno omnia opera eius *Ad. XV. 18.* Opera ejus sunt mundus & omnia, quæ in eo sunt *Ad. XVII. 24.* Ab æterno igitur tam mundum integrum, quam singula, quæ in eo sunt, adeoque & coëxistentia, & successiva in universa rerum serie eorumque inter se nexum sibi repræsentavit (§. 48. 51. & seqq. *Cosmol.*). Cum igitur singula, quæ in universa rerum serie continentur, a se invicem distinxerit; eandem sibi distincte repræsentavit (§. 38. *Psychol. empir.*), consequenter ipsi competit intellectus secundum S. S. qualem nos eidem vindicavimus (§. 275. *Psych. empir.* & §. 122. *Theol. nat.*).

*Consensus
S. S. quoad
volunta-
tem Dei.*

§. 131.

Deo secundum S. S. competit voluntas eo sensu, quo ipsi voluntatem ante vindicavimus. Multa sunt S. S. loca, in quibus Deo tribuitur voluntas, ut superfluum videri possit talia adduci loca, quæ nemini ignota esse possunt, nisi qui S. S. nunquam legit. Enimvero cum Interpretes plura vocabula per voluntatem vertant, quemadmodum etiam *Lutherus* in versione Germanica facit; e re esse videtur, ut propositionis præsentis veritas accuratius evincatur. Quando *Christus Matth. VII. 12* *Omnia, inquit, quæcunque vultis, ut faciant vobis homines, & vos facite illis*; dubitare æquis auit, sermonem ibi esse de voluntate, quæ hominibus competit, atque adeo velle ibidem esse actum voluntatis humanæ? Porro nemo non videt, Christum supponere eam voluntatis libertatem, qua ex pluribus æquæ possibilibus eligere possit homo, quod ipsi placet, consequenter hominibus tribuere voluntatem liberam in eo significato, quo nos vocabulum accipimus quoad homines (§. 941. *Psych. empir.*). Aut enim fieri potest, ut homo non minus ea faciat, quæ ut alii sibi faciant, vult, aut ut ipsis faciat, quæ ut alii sibi faciant non vult. Pone enim alterutrum tantummodo esse possibile: frustra jam erit præceptum Christi. Si tantum-

tummodo fieri potest ut faciant homines, quæ sibi ab aliis fieri volunt; per naturam suam ad hoc faciendum cum sint determinati, non opus est ut id a Christo præcipiatur, & hoc ipso contrarium prohibeatur, omni lege præceptiva contrarii ejus, quod præcipitur, prohibitiva existente. Nec est quod excipias, inculcari tantummodo actionis commissionem, prohiberi ejusdem omissionem: præterquam enim quod exceptio contextui repugnet, ex quo apparet Christum id agere, ut homines ab injuriis inferendis abducat, ipsam quoque voluntatis libertatem confirmat, cum æque possibile esse debeat, ut homo faciat aliis, quæcunque sibi ab aliis fieri vult, & ut hoc facere omittat. Quod si homo tantummodo facere possit, quæ ut alii sibi faciant, non vult; frustraneum prorsus est præceptum Christi, nec ad impossibile ulla datur obligatio. Pater itaque fieri posse, aut ut homines faciant aliis quæ sibi ab aliis fieri volunt, aut ut faciant aliis, quæ ut alii sibi faciant nolunt, consequenter Christum supponere in hominibus liberam ex his eligendi facultatem, adeoque liberam voluntatem, qualem (*loc. cit.*) stabilivimus in Psychologia. In textu Græco extat verbum θέλει, consequenter dubitandum non est, nomen ab hoc verbo descendens θέλημα significare voluntatem eo sensu acceptam, quo nos vocabulum Latinum accipimus. Jam plura extant Scripturæ sacræ loca, in quibus Deo tribuitur θέλημα, veluti *Matth. VII. 21. cap. XXVI. 42. Joh. V. 30. cap. VI. 38. cap. VII. 17. Rom. IX. 19. Eph. I. 5.* Dubitandum itaque non est, quin Deo tribuatur in S. S. voluntas eodem prorsus sensu, quo ante eandem ipsi vindicavimus.

Probe notari velim, Scripturam sacram, quando de voluntate hominis loquitur, supponere notionem communem adeoque vocabuli significatum nullibi explicare. Idem tamen deinde vocabulum transfert ad significandum voluntatem Dei, non obstante differentia, quæ inter voluntatem humanam & divinam intercedit, ex dogmatis de voluntate divina perspi-

cienda. Eundem igitur morem etiam nos sequimur citra errandi periculum : quem qui reprehendit , ipsam Scripturam sacram incautus virgula censoria notat. Notandum præterea , nos in probanda voluntate divina dedisse exemplum etymologiæ in interpretationem Scripturæ sacræ influentis, ut verus vocabuli significatus innotescat, quatenus nempe inseruit ad detegendam certius rem isto denotatam , etsi non faciat ad notionem rei eodem indigitatæ eruendam.

§. 132.

Consensus Deus in Scriptura sacra dicitur & juxta eandem est spiri-
S. S. quoad tus eodem sensu, quo nos eundem spiritum esse probavimus. Deus
spiritua- juxta S. S. habet intellectum (§. 130.) & liberam voluntatem
litatem. (§. 131.). Est igitur spiritus eo sensu, quo eundem spiritum
 esse ante evicimus (§. 643. *Psychol. rat.*). Quod erat unum.

Porro Deus dicitur spiritus, in textu Græce πνεῦμα Joh. IV. 24. Jam cum Jac. II. 26. corpus (humanum scilicet) καρὶς πνεῦμα, sine spiritu, mortuum dicatur, evidens est animam humanam spiritum appellari, consequenter eum esse vocabuli πνεῦμα in Scriptura sacra significatum, quo anima hominis spiritus est. Cumque Rom. VIII. 16. Spiritus Dei dicatur testimonium reddere spiritui nostro, quod simus filii Dei; nemo non videt, animam dici spiritum in S. S. quatenus intellectu, consequenter & voluntate libera, utpote ab intellectu pendente gaudet (§. 275. 880 *Psych. emp.*), adeoque eodem sensu, quo nos vocabulum spiritus sumimus (§. 643. *Psych. rat.*) & animam spiritum esse demonstravimus (§. 645. *Psych. rat.*). Scriptura igitur vocabulum spiritus ab anima ad Deum transferens, supposito significatu, quem habemus, quatenus anima sui ipsius conscia est, Deum eodem sensu spiritum appellat, quo nos eundem spiritum esse evicimus (§. 124.).

Quoniam vulgo ens immateriale & spiritus pro synonymis habentur; spiritualitatem probatam esse plurimi sibi persuadent

dent ostensa ejusdem immaterialitate. Quamobrem cum supra evicerimus (§. 102.), Deum juxta Scripturam sacram non posse esse corporeum, seu, quod perinde est, esse immaterialem; hoc ipso spiritualitatem ejus jam demonstratam esse putabunt. Enimvero etsi verum sit, spiritum omnem esse immaterialem; non tamen ens omne, quod immateriale est, ideo quoque spiritus est. Sane brutorum animæ sunt immateriales (§. 752. *Psychol. rat.*), non tamen spiritus (§. 753. *Psych. rat.*). Et vidimus nec Scripturam sacram spiritualitatem inferre ex sola immaterialitate, sed ex intellectu liberaque voluntate. Quando autem Christus *Job XXIV. 39.* affirmat, spiritum non habere corpus ex carne & ossibus constans, quale est humanum; inde ne quidem inferre licet spiritum omni prorsus materia destitui, tantum abest ut inde probari possit ex immaterialitate recte inferri spiritualitatem, quemadmodum jam supra (not. §. 102.) monuimus.

§. 133.

Deus juxta S. S. non habet corpus, quale corpus humanum est. Etenim Deus docente Christo spiritus est *Job. IV. 18. S. S.* 24. Eodem vero Doctore spiritus non habet corpus ex carne & ossibus constans, quale humanum est *Job. XXIV. 39.* Deus *mano simile habere* igitur corpus non habet, quale est humanum. *non potest.*

Notandum hic in utroque loco citato occurrere vocabulum *πνεῦμα*. Et Deus *πνεῦμα* dicitur, & *πνεῦμα* corpus, quale humanum est, habere non posse affirmatur. Neque enim sufficit in versione utrobique vocabulum spiritus extare, cum satis constet interpretes diversa vocabula Græca & Hebraica eodem vocabulo vertere.

§. 134

Quoniam corpus humanum habet organa sensoria & manus atque pedes; *Deus juxta S. S. organa sensoria, qualia sunt hominibus, veluti oculos & aures, atque manus & pedes habere nequit.* *Cur non habeat organa sensoria & alia corporis humani.*

Deduximus hoc supra (§. 103.) in probando significatu metaphorico membrorum corporis humani Deo tributorum ex immaterialitate Dei per consequentiam ex S. S. eruto (§. 100. & seqq.). Quoniam tamen ex spiritualitate idem citra ambages colligitur, quemadmodum jam supra (§. 102.) annotavimus; nostrum fuit demonstrationem ex Scripturæ sacræ principiis immediate derivatam hic loci apponere. Ceterum hinc simul intelligitur, si quis propositiones de Deo in S. S. contentas in ordinem redigere voluerit, ut unius ex altera appareat ratio, alio ordine esse opus, quam quo in philosophia digeruntur. Neque id singulare est: etenim in ipsa philosophia non eodem ordine se invicem excipiunt propositiones, ubi principia demonstrandi, quæ inter definitioni nominali Dei inprimis locus est, variantur. Patebit hoc ex demonstratione existentiae & attributorum divinorum a priori, ubi eam cum demonstratione a posteriori, quam nunc damus, conferre voluerit. Immo in Mathesi idem obtinere nemo ignorat, qui vel diversa Geometrarum de sectionibus conicis scripta fugitivo oculo percurrit.

§. 135.

*Cautio in
demon-
strandis
attributis
divinis ad-
bibenda.*

Quæ de intellectu humano & voluntate humana vel observantur vel demonstrantur; absque demonstratione Deo tribui non possunt. Etenim cum intellectus humanus admodum limitatus sit (§. 654. *Psych. rat.*), perfectissimus vero illimitatus (§. 652. *Psych. rat.*), & similiter voluntas humana admodum limitata sit (§. 655. *Psych. rat.*), voluntas vero spiritus perfectissimi illimitata (§. 653. *Psych. rat.*), ac spiritus anima humana diverso gradu perfectiores possibiles sint (§. 657. *Psych. rat.*); Deo tribui nequeunt, nisi quæ animæ cum spiritibus omnibus & ipso spiritu perfectissimo communia sunt, propterea quod de eadem nobis innotuerint. Quamobrem antequam quid Deo tribuatur, quod de intellectu humano vel voluntate humana aut observatur, aut demonstratur, demonstrandum est ea communia esse atque adeo Deo recte tribui posse.

Hæc

Hac cautione opus habemus, ne ab intellectu humano ad divinum, vel a voluntate humana ad divinam argumentati ipsi tribuamus, quæ non conveniunt, consequenter in errorem incidamus. Et jam intelligitur, quomodo exinde nullus sequatur error, quod Deo tribuatur intellectus atque voluntas, differentia inter intellectum divinum & humanum ac inter voluntatem divinam & humanam nondum perspecta, usi notione intellectus & voluntatis, qualem ab anima humana abstraximus.

§. 136.

Quæ ex limitatione intellectus humani voluntatisque humane propria consequuntur; ea Deo tribui nequeunt. Cum Deo non enim intellectus spiritus perfectissimi illimitatus sit (§. 652. *tribuenda. Psych. rat.*), intellectus vero hominis admodum limitatus (§. 654. *Psych. rat.*) & præterea voluntas spiritus perfectissimi illimitata sit (§. 653. *Psych. rat.*), voluntas vero humana admodum limitata (§. 655. *Psych. rat.*); spiritus vero intellectu & voluntate libera ab aliis substantiis distinguatur (§. 643. *Psych. rat.*); differentia inter spiritum perfectissimum & animam humanam qua spiritus est (§. 645. *Psych. rat.*), alia intercedere nequit, quam quod illius intellectus & voluntas limitibus prorsus destituantur, hominis vero intellectus & voluntas determinatos admittant limites. Similiter quia spiritus ceteri possibiles diverso gradu anima perfectiores sunt (§. 657. *Psych. rat.*); differentia animæ qua spiritus & aliorum spirituum intellectum & voluntatem limitatam habentium non nisi in harum facultatum limitatione diversa consistere potest. Quæcunque igitur ex limitatione intellectus & voluntatis animæ deducuntur, quatenus intellectus humani ac voluntatis humanæ limitatio est, ea animæ soli competunt, utpote rationem sui sufficientem non habentia nisi in eo, quod animabus humanis qua spiritibus proprium (§. 118. *Ontol.*), consequenter nulli spiritui alii convenire possunt, adeoque nec Deo (§. 124.).

Non-

Nondum demonstratum est Deum esse spiritum perfectissimum, cui intellectus illimitatus & voluntas illimitata competit (§. 652. 653. *Psych. rat.*). Quamobrem nondum demonstrari potest, Deo tribui non posse, quæ intellectui limitato & voluntati limitatæ in genere spectatæ conveniunt.

§. 137.

Idem porro expenditur.

Antequam demonstretur, num Deus sit spiritus perfectissimus, nec ne; quæ intellectui limitato & voluntati limitatæ tantummodo conveniunt, ei tribui nequeunt. Cum enim spiritus perfectissimus habeat intellectum illimitatum (§. 652. *Psych. rat.*) & voluntatem illimitatam (§. 653. *Psych. rat.*), antequam demonstretur, utrum Deus sit spiritus perfectissimus, nec ne, non constat utrum intellectus ipsius sit limitatus, an illimitatus, & utrum voluntas ejusdem sit limitatæ, an illimitata. Quamobrem cum intellectui illimitato non conveniant, quæ tantummodo limitato convenire possunt, nec voluntati illimitatæ competant, quæ tantummodo limitatæ competere possunt; antequam demonstretur utrum Deus sit spiritus perfectissimus, nec ne, ignoratur num ei tribui possint, quæ nonnisi intellectui limitato & voluntati limitatæ propria sunt, adeoque tribui nequeunt.

Patet adeo, quomodo evitari possit præcipitancia, quæ per abusum notionis intellectus humani & voluntatis humanæ Deo tribuuntur, quæ ipsi convenire nequeunt. Absit itaque ut incauti ex suo modulo judicent alios. Enimvero cum notio intellectus & voluntatis, quam habemus, nulli nobis sit usui ad deducenda ea, quæ intellectui ac voluntati divinæ propria sunt; in iis investigandis alia via incedendum. Notionis ductricis loco erit, quod superius demonstravimus (§. 115), convenienter notioni Dei sumtæ (§. 67.), quemadmodum postulat methodus (§. 6.).

§. 138.

Qualis Deus sit spiritus.

Deus est spiritus necessarius. Deus enim spiritus est (§. 124.)
idem.

idemque necessario existit (§. 71.). Quamobrem cum spiritus necessarius sit, qui necessario existit (§. 662. *Psych. rat.*); Deus spiritus necessarius est.

Quoniam Deus tanquam spiritus necessarius a spiritibus contingentibus quoad existentiam differt (§. 662. *Psychol. rat.*), necessitas vero in existendo ex aseitāte fluit (§. 33.); ideo de Deo etiam qua spiritu necessario prædicari possunt, quæ de Deo respectu existentiae necessariae prædicantur. Ita Deus recte dicitur spiritus æternus (§. 74.), spirituumque primus & ultimus (§. 92.).

§. 139.

Animæ humanæ spiritus contingentes sunt. Etenim animæ *Quales a-* humanæ spiritus sunt (§. 645. *Psych. rat.*), eademque entia con- *nimæ bu-* tingentia (§. 61.), consequenter non sunt entia necessaria (§. 310. *manæ sint* *Ont.*), nec ideo necessario (§. 309. *Ont.*), sed contingenter existunt *Spiritus.* (§. 294. *Ontol.*). Quamobrem cum spiritus contingens sit, qui contingenter existit (§. 662. *Psych. rat.*); animæ humanæ sunt *Spiritus contingentes.*

Atque ita patet realitas notionis spiritus contingentis, quam in Psychologia sumimus, etsi ibidem nondum demonstrari posset spiritum contingentem esse possibilem, adeoque animas humanas in eorum numero esse. Neque vero mirum videri debet in Theologia naturali demum demonstrari propositionem, cui in Psychologia rationali, si scholæ ordinem sequaris, locus esse debebat. Anima enim humana, quemadmodum cetera omnia, per ea, quæ inferius demonstrabuntur, tota a Deo dependet. Quæ vero a Deo dependent, non demonstrantur nisi in Theologia naturali, ubi illa rerum omnium a Deo dependentia stabilienda. Ceterum propositione præsentē utemur tanquam principio, ubi de creatione animarum agemus.

§. 140.

Deus ratione præditus. Deus enim spiritus est (§. 124.). *Ratio Dei* Quare cum spiritus omnis rationalis sit (§. 673. *Psychol. rat.*), *asserta.*
(*Wolffii Theol. Naturalis*) P adeo-

adeoque ens ratione præditum (§. 451. *Psychol. rat.*) ; Deus quoque ratione præditus est.

Equidem hætenus non habemus notionem rationis, nisi spiritui finito competentis, qualis est anima nostra ; sed sufficit Deo tribuendam esse rationem hic agnosci & in dubio relinqui, utrum eodem prorsus sensu ratio tribuatur Deo, quo hominibus, an aliqua differentia inter utramque intercedat & qualis ea sit. Ne vero quis suspicetur, facile in errorem incidere nos posse, nisi differentia illa observetur ; recolenda sunt quæ paulo ante (§. 136. 137.) eo fine dicta. Sufficit hic agnosci, Deum referendum esse in numerum entium, quæ ratione prædita sunt: id quod repugnat hypothese impiæ, quæ natura rerum dicitur Deus.

C A P U T II.

De Intellectu Dei & attributis independentibus.

§. 141.

*Quod Deus
seipsum &
omnes
mundos
possibiles
agnoscat.*

Deus omnes mundos possibiles atque semetipsum cognoscit. Etenim Deus omnes mundos possibiles sibi repræsentavit (§. 121.) & hunc ex ceteris cum eligeret (§. cit.), ejus a ceteris differentiam intime perspexit (§. 120.). Quoniam itaque tam mundi hujus adspectabilis, quam ceterorum omnium possibilium ideam distinctam habet (§. 38 *Psychol. empir.*) ; eorum, quæ cuilibet mundo insunt (§. 11. *Psychol. rat.*), consequenter & sui ipsius sibi conscius est (§. 12. *Psychol. rat.*) adeoque & omnes mundos possibiles, & semetipsum cognoscit.

Dum terminum cognitionis ad Deum transferimus, quo actio animæ denotatur, qua notio vel idea rei acquiritur (§. 52.

(§. 52. *Psych. empir.*), tamdiu de Deo loquimur humano more, donec differentia cognitionis divinæ ab humana penitus fuerit perspecta. De Deo enim humano more loqui discimus, ut cum decente modo cognoscere valeamus. Et sine in hoc Deum cognoscendi ordine præeuntem habemus ipsam Scripturam sacram (not. §. 131.), cum prægnantes ejus sint rationes. Etenim eorum, quæ in anima nostra deprehendimus, notiones nobis esse possibiles agnoscimus (§. 717. 718. *Log.*), consequenter ex iisdem, dum ratiocinamur, nullum nobis subnasci potest dubium, quin possibilia inde colligantur. Notiones vero alias non habemus a posteriori; sed ubi aliquas nobis comparavimus per arbitrariam compositionem (§. 712. 714. *Log.*), determinationes variabiles mutando in alias (§. 716. *Log.*), ejus ante a priori demonstranda realitas (§. 720. & seqq. *Log.*), quam quid firmiter inde colligi possit. Quam vero sint difficiles istiusmodi demonstrationes, nec ad cujusvis caput, abunde constabit ex inferioribus, ubi existentia Dei ejusque attributa a priori demonstraturi sumus. Accedit quod exceptionibus obnoxie sint, quæ non a quovis facile eliminantur. Ecquis ergo non intelligit, hoc pacto Theologiam naturalem reddi difficilem & perplexam, si non omnibus, attamen plurimis? ubi itaque existentiam Dei ejusque attributa a posteriori demonstramus, præter necessitatem difficultates in eandem inveheremus. Porro non adeo facile est, quemadmodum incautis videtur, comminisci notiones generales, quæ enti finito & infinito sine omni discrimine competunt, ubi incautus in iis admittere non vis, quæ enti infinito repugnant, usus vocabulis ad decipiendum nonnisi eos aptis, qui sufficiente acumine in examinandis notionibus non utuntur. Dudum hoc agnovere cum *Aristotelo* Scholastici, idcirco contententes, Deum non esse in prædicamentis, sed super prædicamenta, propterea quod perperam fingatur aliquod genus, sub quo Deus & entia finita tanquam species collocentur. Qui id fieri posse somniant, modorum, quibus ad notiones pervenitur, non sunt satis gnari, nec unde sit, quod vocabula quædam sine definitione assumpta, intelligibilia sint, intelligunt. Omittimus rationes alias, quæ afferri poterant, cum hæc sufficere arbitremur.

§. 142.

*Duplex
possibilia
confide-
randi mo-
dus.*

Possibilia absolute spectantur, quatenus unumquodque eorum spectatur in se, sine relatione ad alia. *Spectantur vero ut in systemata redacta*, quatenus repræsentantur ut inter se connexa, tum qua coëxistentiam, tum qua successionem.

E.gr. Quodlibet individuum, in hac rerum natura existens, in numero possibilium est (§. 170. *Ontol.*). Quodsi ergo ipsum consideres quoad ea, quæ necessario conveniunt, & quoad varias mutationes, quas subire potest; possibile hoc in se spectas. Et idem intelligitur de individuo quolibet alio ad mundum hunc adspectabilem spectante. Quodsi vero jam omnia ista individua simul considerentur, quatenus successive coëxistunt & sese invicem excipiunt, hoc est, prouti in hoc mundo adspectabili conspiciuntur (§. 48. *Cosmol.*); possibilia eadem tanquam in systema aliquod relata spectantur.

§. 143.

*Quenam
in possibili
in se spe-
ctato confi-
derentur.*

Si ens aliquod absolute spectatur, ejus cognoscuntur determinationes essentielles, attributa & modorum possibilitates, illorum & eorum cum essentialibus nexus, modorumque variae series. Et enim si quod possibile, consequenter ens aliquod (§. 135. *Ontol.*) absolute spectatur; in se consideratur, sine omni relatione ad aliud (§. 142.), atque adeo de eo non cognoscuntur, nisi quæ necessario insunt & per hæc ipsa in eodem possibilia concipiuntur, quatenus scilicet possibilia sunt. Jam ens quodlibet suas habet determinationes essentielles (§. 143. *Ontol.*), per quas possibile intelligitur (§. 153. *Ontol.*) & attributa (§. 146. *Ontol.*) atque modorum possibilitas determinantur (§. 160. *Ontol.*). Quoniam igitur quicquid enti inest, id vel inter essentialia, vel attributa, vel modos locum habet (§. 149. *Ontol.*), in statu vero nudæ possibilitatis nullus modus enti inexistere intelligitur (§. 160. 118. *Ontol.*); si ens in se consideratur, ejus

cogno-

cognoscuntur determinationes essentialia, attributa & modorum possibilitates. *Quod erat primum.*

Jam ratio sufficiens, cur attributa insint & modi inesse possint, in essentialibus continetur (§. 157. 160. *Ontol.*). Quamobrem si ens in se spectatur, cum attributa & modorum possibilitates enti inesse non intelligantur nisi per essentialia (§. 156. *Ontol.*), attributa vero & modorum possibilitates eo ipso cum essentialibus connectantur, quod rationem sui sufficientem in iisdem habeant (§. 10. *Cosmol.*), nexus quoque attributorum & possibilitatis modorum cum essentialibus perspicitur. *Quod erat secundum.*

Enimvero quoniam modi actu inesse non intelliguntur, sed modo inesse, modo non inesse posse concipiuntur (§. 151); hoc ipso patet, eos esse variabiles & quatenus sibi mutuo diversis modis succedere posse intelliguntur, diversas modorum series prodire agnoscitur. Quamobrem si ens in se spectatur, variz modorum cognoscuntur series. *Quod erat tertium.*

Cum in eo jam versemur, ut in differentiam intellectus divini ab humano curatius inquiramus; id omnino nobis agendum est, ut exponamus, qualis cognitio possibilis sit. Ita enim constabit clarius, quænam cognitio sit summa & quanto intervallo ab eadem distet humana. Et quia deinceps evincemus, mundi ideam efformatam esse ab intellectu divino & totum hoc, quod existit, universum possibilitatem suam ab intellectu divino derivare; cognitione omni possibili perspecta demonstrari poterit, quomodo idea mundi hujus adspectabilis ceterorumque non minus possibilium in intellectu divino enata fuerit: id quod cognovisse proderit ad detegendas vel ulterius perspiciendas veritates alias magni momenti.

§. 144.

*Si quod possibile spectatur ut in systema cum aliis red- Quænam
adum, causarum cognoscitur series, per quas existentia deter- cognoscan-
minatur, modorum series, qui successive toto durationis tempore in systema- tur, si ens
eidem inexistunt, dependentia a coexistentibus quoad modos re specta-
P 3 singu- tur.*

singulos, influxus in modificationem coëxistentium & in existentiam successivorum; nihil vero horum cognoscitur, quatenus quid absolute spectatur. Etenim si quid absolute spectatur, non cognoscuntur nisi determinationes essentielles, attributa & modorum variis modis variabilium possibilitates atque horum cum istis nexus (§. 143.). Per determinationes essentielles ens tantummodo possibile agnoscitur (§. 154. *Ontol.*), nondum vero intelligitur, quomodo existere possit (§. 171. *Ontol.*), cum non nisi ens a se ideo existat, quia possibile (§. 34.). Quamdiu igitur ens absolute spectatur, non cognoscitur, quomodo existentia ejus determinari possit.

Porro quoniam modorum tantummodo cognoscuntur possibilitates *per demonstrata*, nihil vero ideo existit, quod possibile (§. 171. *Ontol.*) præter ens a se (§. 34.); quamdiu ens aliquod absolute spectatur, modi, quos recipere valet, non cognoscuntur ut inesistentes. Et quamvis intelligatur, ens ad modos quoslibet utpote essentialibus determinationibus non repugnantes, per ea tamen non determinabiles (§. 148. *Ontol.*) recipiendum esse indifferens (§. 85. *Ontol.*), & ob eorum mutabilitatem (§. 314. *Ontol.*) semel inesistentes variari posse, consequenter series modorum sibi mutuo certo ordine succedentium esse possibles; cur tamen huic potius modorum seriei, quam alteri cuidam in se spectatz non minus possibili (§. 85. *Ontol.*) locus sit, nondum perspicitur. Quamobrem cum nec existentia entis cognoscatur, quamdiu ens in se spectatur *per demonstrata*, adeoque nullum durationis tempus intelligatur (§. 578. *Ontol.*); quamdiu ens absolute spectatur, modorum series, qui toto durationis tempore eidem successive inesistunt, non cognoscitur.

Quamdiu ens absolute spectatur, ad alia sive coëxistentia, sive successiva minime refertur (§. 142.). Per se adeo pater, hoc pacto constare nondum posse dependentiam a coëxistentibus
quoad

quoad modos singulos, nec influxum in modificationem coëxistentium & existentiam successivorum.

Verum enimvero si ens ut in systema cum aliis redactum spectatur, eo modo repræsentatur, quo cum aliis in eodem systemate connectitur tum qua coëxistentiam, tum qua successionem (§. 142.). Quamobrem cum entia, de quibus hic nobis sermo est, rationem existentiz sufficientem in essentia sua minime habeant per *hypothesin*, adeoque contingentia sint (§. 310. *Ontol.*), contingentium vero actus in mundo determinetur per seriem contingentium, quæ a se invicem dependent ut effectus a sua causa (§. 83. *Cosmol.*); dum ens ut in systema cum aliis redactum spectatur, series causarum cognoscitur, per quas existentia determinatur.

Similiter quia entia composita in mundo in modificationibus suis a contiguis dependent (§. 85. *Cosmol.*) eorumque modi per mundum integrum determinantur (§. 87. *Cosmol.*); dum ens tanquam cum aliis in systema redactum spectatur, dependentia a coëxistentibus quoad modos singulos & influxus in modificationem coëxistentium cognoscitur.

Denique cum actus contingentium in mundo determinetur per seriem contingentium, quorum unum determinatur per alterum quoad actualitatem suam (§. 89. *Cosmol.*); ab iis, quæ præsentia sunt, pendet actus futurorum. Quamobrem si ens ut cum aliis in systema redactum spectatur, ejus in existentiam futurorum (§. 584. *Ontol.*), consequenter successivorum (§. cit. & §. 569. *Ontol.*) influxus cognoscitur.

Elucet hinc differentia cognitionis modorum, quæ possibilis, prouti entia modificabilia spectantur vel absolute, vel ut cum aliis in certa systemata redacta. Cum modi essentialibus non repugnent, per ea tamen non determinantur (§. 148. *Ontol.*), consequenter affirmari non possit, quamdiu ens absolute spectatur, quinam de iis affirmari, quinam negari debeant (§. 112. *Ontol.*); quamdiu ens absolute spectatur, tan-

tummodo cognoscitur, varios ac prorsus diversos modos eidem successive inesse posse (§. 85. *Ontol.*) & per modorum, qui inexistere posse intelliguntur (§. 144. *Ontol.*), omnes possibiles combinationes perspicitur, quod & quales sint possibiles modorum, consequenter mutationum series (§. 290. 151. *Ontol.*), quæ salva rei essentia locum habere possunt; nondum vero patet, quænam earum ad actum perducì possint, & quomodo ad eandem perducantur, & ubi quælibet illarum serierum, quæ ad actum perducì possunt, terminetur. Quoniam vero entia composita in mundo, adeoque serie entium finitorum inter se connexorum (§. 48. *Cosmol.*), seu in systema aliquod redactorum (§. 142.), in modificationibus suis a contiguis dependent (§. 85. *Cosmol.*), & a coexistentibus dependent in actu suo (§. 84. *Cosmol.*); ubi entia ut in systemata redacta spectantur, tum demum perspicitur, quænam modorum series in unoquoque systemate ad actum perducatur & ubi eadem terminetur.

§. 145.

Quomodo- Si *possibilia tum absolute, tum in systemata redacta spe-*
*omnia co-*stantur; omnia cognoscuntur, quæ iisdem actu inesse possunt.
gnoscantur Etenim si *possibilia absolute spectantur*, eorum cognoscuntur
*quæ entia-*determinationes essentielles, attributa & modorum possibilita-
*licui inesse*tes, nec non nexus attributorum quoad inexistentiã, modo-
*possunt.*rum quoad possibilitatem cum essentialibus, & quosnam mo-
 dos diversos quorque modis diversis eosdem recipere possit ens
 (§. 143. & not. §. 144.). Quod si vero *possibilia spectentur ut*
in systemata relata, series causarum cognoscitur, per quas ex-
 istentiã determinatur, series modorum, quos toto durationis
 tempore recipit, dependentia a coexistentibus quoad modos
 singulos atque influxus in modificationem coexistentium
 & existentiã successorum (§. 144. & not. ejusd.). Jam
 ea, quæ entia insunt aut insunt constanter, aut constanter non
 insunt, seu modo insunt, modo non insunt. Et quæ constan-
 ter

ter insunt, aut per ea, quæ simul insunt, determinantur, ita ut his positis ponantur & ipsa (§. 115. *Ontol.*), aut per ea, quæ simul insunt, non determinantur (§. 53. *Ontol.*). Quæ vero constanter insunt, nec per alia, quæ simul insunt, determinantur, essentialia sunt, quæque constanter insunt, & per alia, quæ simul insunt, determinantur, attributa sunt (§. 152. *Ontol.*), & quæ enti modo insunt, modo non insunt, ea inter modos referri debent (§. 151. *Ontol.*). Enti igitur alia præter essentialia, attributa & modos inesse nequeunt, & hi quidem, cum mutabiles sint (§. 314. *Ontol.*), successive inexistentium quandam seriem constituunt. Quatenus vero ea, quæ enti alicui insunt, referuntur ad alia in eodem systemate locum habentia, consequenter inter se connexa (§. 142.), adeoque vel simultanea, vel successiva (§. 48. *Cosmol.*), seu coëxistentia & non coëxistentia (§. 569. *Ontol.*), atque hinc vel præsentia vel præterita, vel futura (§. 584. *Ontol.*); aut dependentiam existentiz a causarum quadam serie (§. 83. *Cosmol.*), & a coëxistentibus in actu suo (§. 84. *Cosmol.*), aut dependentiam modificationum ab aliis (§. 85. *Cosmol.*), aut dependentiam aliorum ab ipso quoad existentiam & modificationem loquuntur (§. cit. *Cosmol.*). Abunde igitur perspicitur, cognosci quæ entibus insunt & iisdem actu inesse possunt singula, si ea tum absolute, tum ut in systemata redacta cognoscuntur.

Vidimus hætenus, quomodo cognoscantur ea, quæ enti unicuique insunt, aut actu inesse possunt, una cum omni dependentia eorundem quoad ea ab aliis, tum aliorum ab ipso. Videndum porro, quomodo cognoscantur ea, quæ entibus intrinseca non sunt, sed tantummodo extrinsece eadem afficiunt.

§. 146

Si possibilia omnia, quæ in unum systema redigi possunt, Quomodo tanquam in systema redacta spectantur; spatium ac tempus cognoscantur omne distincte cognoscitur, una cum loco & situ uniuscujusque tur, quæ ens (Wolffii Theol. Naturalis) Q entis extrinsece afficiunt.

entis & eorundem mutationibus toto durationis tempore. Et enim siabilia spectantur tanquam in systemata redacta, & quidem omnia, quæ in unum redigi possunt, tanquam in unum redacta; ea repræsentantur tanquam inter se connexa, tum quoad coëxistentiam, tum quoad successionem (§. 142), adeoque distinctissime perspicitur, quomodo ratio unius coëxistentis contineatur in ceteris coëxistentibus (§. II. *Cosmol.*) & cur hoc potius modo sese invicem excipiant quam alio (§. 56. *Ontol.*), nec non quomodo ratio sequentis uniuscujusque contineatur in præcedentibus, & cur hoc potius modo sese invicem excipiant, quam alio (§. *cit.*), consequenter ordo tam coëxistentium, quam successivorum distinctissime cognoscitur (§. 472. *Ontol.*). Quamobrem cum ordo simultaneorum sit spatium reale, quatenus scilicet illa coëxistunt (§. 589. *Ontol.*), ordo vero successivorum in serie continua tempus, quatenus scilicet se invicem consequuntur (§. 572. *Ontol.*); qui possibilia in unum systema redigibilia tanquam in idem redacta spectat, omne spatium ac tempus reale quam distinctissime cognoscit.

Porro si possibilia tanquam in systemata redacta spectantur, eadem tanquam quoad coëxistentiam inter se connexa spectantur (§. 142.). Necesse igitur est ut uniuscujusque determinatus modus coëxistendi ceteris distinctissime cognoscatur. Quamobrem cum modus determinatus, quo quid simultaneis coëxistit, sit locus ejusdem (§. 602. *Ontol.*); si possibilia tanquam in systemata redacta repræsentantur, uniuscujusque locus cognoscitur.

Quoniam vero si possibilia tanquam in systemata redacta spectantur, tempus omne reale distinctissime cognoscitur *per demonstrata*, consequenter ordo omnis, qui in successivorum serie continua deprehenditur, penitus perspicitur (§. 572. *Ont.* & §. 38. *Psychol. empir.*); fieri non potest, quin distinctissime inel-

intelligatur, quibus successivis continuo quid coëxistat, consequenter tota uniuscujusque possibilis duratio cognoscitur (§. 578. *Ontol.*).

Quamobrem cum determinatus modus, quo quid simultaneous coëxistit, locus sit (§. 602. *Ontol.*); locus uniuscujusque toto durationis tempore cognoscitur, consequenter omnes loci mutationes, quotquot contingant, seu contingere possunt in ista serie, cognoscuntur, siabilia tanquam in systemata redacta spectantur.

*Et quia ordo simultaneousorum non continuorum quoad coëxistentiam situs est (§. 603. *Ontol.*); per demonstrata patet, siabilia tanquam in systemata redacta spectantur, uniuscujusque situs ad cetera omnia ejusdemque adeo omnes mutationes toto durationis tempore quam distinctissime cognosci.

Quod si quis ad demonstrationem propositionis presentis animum advertit; inexpectata ipsi lux affulgebit circa notionem spatii ac temporis, quam in philosophia prima explicavimus (§. 589. 590. & 572. 573. *Ontol.*), ut penitus dispellantur nebulae, quae ex notione temporis ac spatii imaginaria oriuntur (§. 581. 586. & §. 611. *Ontol.*). Intelligit enim, quod, si ordo simultaneousorum perspicitur, spatium; si successivorum, tempus cognoscatur, & analogia inter tempus ac spatium intercedens manifesta est.

§. 147.

Siabilia tum in se, tum tanquam in systemata redacta Genera & spectantur, omnes species ac genera omnia eorundemque subor. species cum dinationes cognoscuntur, una cum praedicatis tam absolutis, eorum quam hypotheticis speciei ac generi cuicunque convenientibus. praedica-
Etenim siabilia tanquam in systemata redacta spectantur, *tis quo-*
possibilia, quae inter se connecti possunt, repraesentantur tan in do co-
quam inter se connexa tum qua coëxistentiam, tum qua succ. gnoscan-

cessionem (§. 142.) & omnia si simul absolute spectentur, cognoscuntur, quæ iisdem actu inesse possunt (§. 145.) Perspicitur itaque, quænam tam in simultaneis, quam successivis eadem sint, siue consideres eorum essentialia, siue attributa, siue modos (§. 149. *Ontol.*). Quamobrem cum hoc pacto cognoscatur omnis rerum similitudo (§. 195. 243. *Ontol.*), quæ in eadem serie rerum locum habere potest; similitudo autem rerum singularium sit id, quod speciem appellamus (§. 233. *Ontol.*), similitudo specierum, quod genus vocamus (§. 234. *Ontol.*), similitudo denique generum, quod generis superioris nomine nuncupatur (§. *cit.*); si possibilia tanquam in systemata redacta spectantur, omnes rerum species & genera omnia cum inferiora, tum superiora cognoscuntur.

Immo cum hoc pacto constet, quasnam genera similitudines admittant *per demonstrata*, genera vero inferiora subordinentur superiori, quatenus quandam inter se similitudinem habent (§. 234. *Ontol.*); si possibilia tanquam in systemata redacta spectantur, omnes generum cognoscuntur subordinationes.

Si possibilia tum absolute, tum tanquam in systemata redacta spectantur, omnia cognoscuntur, quæ iisdem actu inesse possunt (§. 145.), consequenter quæ rei cuicunque tribui & ab eadem removeri debeant, quæ in quadam rei serie locum habet. Quamobrem cum id sit rei prædicatum, quod eidem tribui, vel ab eadem removeri debet (§. 200. *Log.*); omnia rei uniuscuiusque cognoscuntur prædicata. Enimvero si possibilia tanquam in systemata redacta spectantur; omnes cognoscuntur species, genera item omnia tam inferiora, quam superiora *per demonstrata*. Cognoscuntur itaque omnia specierum atque generum tam inferiorum, quam superiorum prædicata, quatenus scilicet perspicitur, qualia prædicata communia habent ea, quibus communes sunt determinationes essentialia

riales per demonstrata & §. 247. *Ontol.*). Et quoniam si ens aliquid absolute spectatur, nexus cum essentialibus cognoscitur, quem habent attributa modorumque possibilitates (§. 143.); si quod vero possibile spectatur ut in systema cum aliis redactum, causarum cognoscitur series, per quas existentia determinatur, modorum dependentia a coëxistentibus atque influxus in coëxistentium modificationem & successivorum existentiam (§. 144.); siabilia tam absolute, quam ut in systemata redacta considerantur, non minus cognoscitur, quænam speciei ac generi cuicunque tam inferiori, quam superiori tribuenda sint prædicata absolute, quam quænam tribuenda veniant sub determinata quadam conditione. Cognoscuntur adeo speciei cujuscunque atque generis prædicata omnia cum absoluta, tum hypothetica.

Probe notanda est hæc propositio ejusque demonstratio solerter expendenda, ut distincte cognoscatur, quomodo universalis rerum cognitio ex singularium cognitione resultet: id quod usui erit paulo inferius ad rationem intimius perspicendam & rationem inprimis, quæ in Deo datur, ejusque differentiam a ratione humana & alia quacunque finita agnoscendam.

§. 148.

Siabilia tum in se, tum ut in systemata redacta spectantur, omnes cognoscuntur numeri, qui in unaquaque rerum se numeri corie dari possunt. Quicquid existit, vel actu est, id omnimode gnoscan-
determinatum est (§. 226 Ontol.). Quamobrem cum possi-
tur.
 bilia in systemata redacta spectentur, quatenus inter se connecti possunt tum qua coëxistentiam, tum qua successionem (§. 142.), adeoque seriem rerum possibilem constituunt (§. 85. *Ontol.*), consequenter ita repræsentantur, quomodo existere possunt (§. 133. *Ontol.*); siabilia tanquam in systemata redacta spectantur, tanquam omnimode determinata exhibentur.

Repræsentantur adeo singula tanquam individua (§ 227. *Ontol.*). Quamobrem cum ens omne singulare unum sit (§. 329. *Ontol.*), unum tamen non sit idem cum altero (§. 183. *Ontol.*), quemadmodum ex singulorum differentia perspicitur in quavis rerum serie obvia (§. 247. *Cosmol.*); si possibilea tanquam in systemata redacta spectantur; tanquam multa repræsentantur (§. 331. *Ontol.*). Hæc multitudo quia cognoscitur, omnium singularium numerus cognoscitur, qui in aliqua rerum serie dari potest, si possibilea tanquam in systemata redacta spectantur (§. 340. *Ontol.*).

Porro si hæc ipsa possibilea tanquam in systemata redacta spectantur, omnes cognoscuntur species & genera omnia tam inferiora, quam superiora (§. 147.). Enimvero species rerum constituuntur singularium similitudine (§. 233. *Ontol.*) & genera inferiora similitudine specierum & superiora similitudine generum inferiorum (§. 234. *Ontol.*), entia vero universalia constituuntur ista similitudine partiali individuorum, vel minus universalium (§. 232. *Ontol.*). Quamobrem si possibilea tanquam in systemata redacta spectantur, omnia entia universalia cognoscuntur, quæ in unaquaque rerum serie locum habere possunt. Cum ens unumquodque universale unum sit (§. 329. *Ontol.*) ab altero autem differat (§. 255. *Ontol.*), ubi ad differentiam istam respicitur, universalia repræsentantur tanquam multa (§. 331. *Ontol.*). Hæc igitur multitudo dum cognoscitur, omnium rerum universalium numerus cognoscitur, qui in aliqua rerum serie dari potest, dum possibilea tanquam in systemata redacta spectantur (§. 340. *Ontol.*).

Similiter dum possibilea tanquam in systemata redacta spectantur, omnes specierum ac generum, immo individuorum sub speciebus cognoscitur subordinatio (§. 147.) Jam cum species constituantur similitudine individuorum (§. 233. *Ontol.*), genera infima similitudine specierum, superiora au-
tem

tem similitudine proxime inferiorum (§. 134. *Ontol.*), donec tandem perveniatur ad summum, quod cum sit numero unicum, sui simile habere nequit (§. 195 *Ontol.*); individua substantiis suis speciebus, species suis generibus, genera inferiora suis generibus superioribus, donec tandem perveniatur ad summum, quibus omnia substant. Dum itaque specierum ac generum subordinationes cognoscuntur, numerus graduum innotescit, per quos ab individuis & speciebus ad genera continuo superiora ascenditur, donec tandem perveniatur ad summum, seu gradum supremum, tanquam per scalam: quam specierum ac generum subordinationem *scalam predicamentalem* ideo dixit *Aristoteles*.

Si possibilia absolute spectantur, modorum variaz cognoscuntur series, per essentiam entis uniuscujusque possibiles (§. 143). Quoniam series unaquaque tanquam unum quid spectatur (§. 330 *Ontol.*), omnes tamen in eodem individuo ad actum perducere nequeunt, utpote sibi invicem contrariae (§. 28. *Ontol.*), sed diversae in individuis ejusdem speciei in eadem serie deprehenduntur (§. 247. *Cosmol.*), serierum istiusmodi cognoscitur multitudo (§. 331. *Ontol.*), adeoque numerus (§. 340. *Ontol.*). Cumque modorum series, qui successive toto durationis tempore enti unicuique inexistunt, cognoscatur, si possibilia tanquam in systemata redacta spectantur (§. 144); ubi hoc fit, numerus serierum modorum, qui per essentias specierum possibiles sunt, & in eadem rerum serie ad actum perducuntur, determinatus cognoscitur (§. 112. 339. *Ontol.*). Immo quatenus modi in eadem serie se invicem insequentes differunt, variationum multitudo determinata (§. 331. 112. *Ontol.*), consequenter numerus cognoscitur (§. 340. *Ontol.*).

Quod si possibilia tanquam in systemata redacta spectantur, causarum cognoscitur series, per quas existentia entis cujuscunque determinatur (§. 144). Quamobrem cum causae in
eodem

eadem serie se invicem excipientes diversæ sint (§. 247. *Cosmol.*); patet ut ante causarum in unaquaque serie cognosci numerum determinatum.

Quoniam entia composita ex partibus constant a se invicem distinctis (§. 531. *Ontol.*), partes vero istæ in genere spectatz considerantur tanquam multa in uno (§. 341. *Ontol.*); dum illa in se spectantur, partium cognoscitur numerus, quemadmodum ex antea demonstratis liquet. Quamobrem ubi possibilia in se spectantur, partium in ente quolibet composito cognoscitur numerus.

Atque hoc pacto abunde patet, si possibilia tum absolute, tum ut in systemata redacta spectantur, non modo nasci notionem tam numeri in genere, quam numerorum in specie; verum etiam omnes cognosci numeros determinatos, qui in unaquaque rerum serie locum habere possunt, ut non opus videatur plura in medium afferri.

Probe perpendi velim modum, quo notio numeri in cognoscente resultat ex ipsis rerum notionibus, ut intelligatur, quod nullus detur numerus, nisi dentur res diversæ, numerus tamen non sit idem cum rebus numeratis, & quomodo numerus realis differat ab imaginario seu infinito. Etenim cum hæc intellectu facilia sint, imaginatione per notiones confusas nihil difficultatis obijciente; plurimum lucis affundent notioni temporis ac spatii, quoniam modus perveniendi ad notionem temporis ac spatii idem propemodum est, quo ad notionem numeri pervenitur, & tempus atque spatium in eadem classe entium collocari debent, in qua sibi locum vindicat numerus.

§. 149

*Quomodo
omnes re-
lationes
cognoscan-
tur.*

Si possibilia omnia tum absolute, tum ut in systemata redacta spectantur; omnes cognoscuntur relationes, quas ens unumquodque in una qualibet rerum serie habere potest. Etenim si possibilia omnia tum absolute, tum in systemata redacta spec-
tan-

stantur, omnia cognoscuntur, quæ iisdem actu inesse possunt (§. 145.). Quamobrem si ea, quæ enti unicuique inesse possunt, inter se comparentur & observetur, num inter ea, quæ uni conveniunt absolute, quidpiam occurrat, per quod aliquod de ente quocunque alio in eadem serie intelligi possit, quod absque eo intelligi non poterat, consequenter quænam inter ens unumquodque & quodcunque aliud in eadem serie detur relatio (§. 855. 856. *Ontol.*); necesse est ut hac via obvix sint omnes entis uniuscunq[ue] relationes ad quodcunque aliud in eadem serie.

Nequid circa propositionem præsentem suboriatur dubium, probe perpendendum est, relationem nullam enti realitatem superaddere, quam in se spectatum non habet (§. 857. *Ont.*), fundamentum tamen relationis contineri iis, quæ entibus ad se invicem relatis insunt, dum absolute spectantur (§. 858. *Ontol.*). His nempe perpen[s]is nullum superesse potest dubium, quin relationes omnes possibiles entis cujuscunque A ad aliud quodcunque B innotescant per ea, quæ entibus istis toto durationis tempore actu insunt. Non repetimus exempla, quibus in philosophia prima principia, ad quæ provocamus, illustravimus, etsi huc apprime faciant, utpote ibidem legenda (*loc. cit.*).

§. 150.

Præter magnitudinem, quæ extenso inest, & quæ in gradibus ac tempore atque motu spectatur, alia non datur. Magnitudo ubinam detur.
 Quoniam ens omne vel simplex est, vel compositum (§. 685. *Ontol.*), simplex vero partibus caret (§. 673 *Ontol.*), compositum partibus constat (§. 531 *Ontol.*); magnitudo, quæ partium dicit multitudinem (§. 430 *Ont.*), proprie non datur nisi in ente composito, consequenter in extenso datur magnitudo (§. 619. *Ontol.*), quæ & molis quantitas in hoc casu dicitur (§. 747 *Ontol.*). Jam omnis determinatio intrinseca vel in qualitatum, vel in quantitatum numero est (§. 454. *Ontol.*).
 (Wolfii Theol. Naturalis) R Qua-

Quare in simplici ente non dantur nisi qualitates & quæ præter magnitudinem compositis insunt, in qualitarum numero sunt. Enimvero quantitates qualitarum sunt gradus (§. 747. *Ontol.*), qui ideo quantitas virtutis appellantur (§. cit.) Entibus igitur simplicibus & præter quantitatem molis, quæ magnitudo proprie dicitur, compositis nulla tribui potest magnitudo, nisi quæ in gradibus spectatur (§. 751. *Ontol.*). Quod si iam porro entia tanquam in systemata relata spectentur, eadem considerantur, quatenus inter se connectuntur tum qua coëxistentiam, tum qua successionem (§. 142.), & nexus quoad coëxistentiam spatii (§. 589. *Ontol.*), quoad successionem temporis notionem insinuat (§. 572. *Ontol.*). Quoniam entis compositi magnitudo eadem est cum magnitudine spatii, quod eadem figura superficiali terminatur (§. 625. *Ontol.*); in spatio non aliæ spectari possunt magnitudines, quam quæ in entibus compositis spectantur. Enimvero cum partes temporis actualis per existencias rerum actu designentur (§. 583. *Ontol.*), existencia vero compositorum non sit in numero partium; temporis quoque magnitudo a rerum in tempore existentium magnitudine diversa est. Denique composita, quatenus coëxistunt, vel eundem tinentur locum, vel locum mutant, adeoque vel quiescunt, vel moventur (§. 642. *Ontol.*). In quiete cum nullas ne fingere quidem liceat partes, nulla quoque ne fingi quidem potest magnitudo (§. 434. *Ontol.*). In motu autem cum occurrat spatium a mobili descriptum (§. 650. *Ontol.*) & celeritas, qua fertur (§. 649. 653. *Ontol.*); in motu magnitudines deprehenduntur, quatenus lineis (§. 434. *Ontol.*) & celeritati magnitudo tribuitur (§. 664. *Ontol.*). Quamvis denique in serie rerum simultanearum & successivarum eos unumquodque certum obtinet firmum (§. 603. *Ontol.*); cum tamen firmus coëxistentium æstimeretur per extensum interjectum (§. 605. *Ontol.*), successivorum per tempus intercedens; non aliæ hic occur-

occurrunt magnitudines, quam quæ in extenso & tempore spectantur. Paret adeo præter magnitudinem, quæ extenso inest, & quæ in gradibus & tempore atque motu spectantur, non dari aliam.

Si objicis, nos tribuere vi (§. 739. *Ontol.*) & actionibus magnitudinem (§. 737. *Ontol.*); regerimus vim esse in numero qualitatum & magnitudinem iis tributam spectari in gradu, & actionibus tribui magnitudinem, quatenus in tempore fiunt (§. *cit.*).

§. 151.

*Si possibilia tanquam in systemata relata spectantur, omnes Quomodo magnitudines, quæ dari possunt, earumque ad se invicem ra- omnes ma- tiones cognoscuntur. Etenim si possibilia tanquam in systema- gnitudines ta relata spectantur, omnia cognoscuntur, quæ iisdem actu in- & earum sunt (§. 145.), & omnes numeri, qui in una quaque rerum se- rationes co- riedantur (§. 148), consequenter etiam omnes entium composi- gnoscant- torum partes (§. 531. *Ontol.*) eorumque numerus. Quamob- tur, rem cum entia composita sint illa, quæ extensa sunt (§. 619. *Ontol.*); omnis hoc modo cognoscitur partium, quæ in extenso dantur, multitudo, consequenter omnis, quæ extenso inexistit, magnitudo (§. 430 *Ontol.*).*

Similiter cum possibilibus tanquam in systemata relatis spectatis omnia cognoscantur, quæ iisdem actu insunt (§. 145.); cognosci etiam debet id, quo qualitates eadem salva identitate differre possunt vel eodem tempore in diversis subjectis, vel tempore diverso in eodem subjecto. Omnes igitur cognoscuntur gradus, quibus in unaquaque rerum serie locus est (§. 746 *Ontol.*), consequenter quia possibilibus tanquam in systemata relatis spectatis omnes cognoscuntur relationes, quas ens unumquodque ad alterum habere potest, omnis quoque cognoscitur graduum magnitudo (§. 751. *Ontol.*).

Denique si possibilea tanquam in systemata relata spectantur, tempus omne distincte cognoscitur una cum mutationibus locorum, quas ens unumquodque toto durationis tempore subire valet (§. 146.), consequenter motibus omnibus (§. 642. *Ontol.*). Quoniam vero distincte nil cognoscitur, nisi ea, quæ eidem insunt, a se invicem distinguantur (§. 38. *Psych. empir.*); partes quoque temporis actuales (§. 583. *Ontol.*), atque gradus celeritatis in motu (§. 662. *Ontol.*) una cum spatio mobilis (§. 651. *Ontol.*) & tempore, quo motus fit, cognoscuntur (§. 649. *Ontol.*), consequenter hoc pacto cognoscitur omnis temporis omnisque, quæ motui inest, magnitudo per ea, quæ modo ostendimus.

Quoniam itaque præter magnitudinem, quæ extenso inest, & quæ in gradibus ac tempore, atque hinc in motu quoque spectatur, non datur alia (§. 150.); si possibilea tanquam in systemata relata spectantur, omnis etiam, quæ dari potest, cognoscitur magnitudo.

Jam si possibilea tanquam in systemata redacta spectantur, omnes cognoscuntur relationes, quas ens unumquodque in una qualibet rerum serie habere potest (§. 149.), adeoque cognosci etiam debent omnes relationes magnitudinum, quas in hac hypothese agnosci modo evicimus. Quoniam itaque ratio magnitudinum in numero relationum est, quas ad se invicem habent (§. 126. *Arithm.*): in casu propositionis præsentis omnes magnitudinum, quæ dari possunt, rationes cognosci manifestum est.

Agitur hic de cognitione magnitudinum in concreto; non vero in abstracto. Quomodo inde cognitio eorundem in abstracto resultet, patebit inferius, ubi modum sumus exposituri, quo ratio in ente infinito ex cognitione intuitiva resultat.

§. 152.

Omnes mundi possibiles continent possibilia omnia in sua Numerus systemata relata. Mundus enim, aut, si mavis, Universum rerum in cum sit series entium finitorum tam simultaneorum, quam omnibus successivorum inter se connexorum (§. 48. *Cosmol.*); in omni-mundis bus mundis possibilibus continentur omnia entia finita, quate-possibili- nus inter se tum qua coëxistentiam, tum qua successionem bus con- connecti possunt. Enimvero entia in systemata rediguntur, tentarium. quatenus inter se connectuntur tum qua coëxistentiam, tum qua successionem (§. 142.). Omnes adeo mundi possibiles omnia continent possibilia in sua systemata relata.

Nimirum mundi possibiles prodeunt, si entia finita ita in series ordinentur, ut ea, quæ uni contingenter insunt, determinentur per ea, quæ insunt aliis: ita enim ex iis, quæ insunt uni, intelligitur, quænam contingenter insint aliis, consequenter contingentis rerum finitarum existentiae & modorum in-existentiae ratio redditur ex alio (§. 56. *Ontol.*) atque adeo hoc pacto inter se connectuntur, (§. 10. *Cosmol.*), & per hunc nexum mundi possibiles resultant (§. 48. *Cosmol.*).

§. 153.

Omnes mundi possibiles quicquid præter Deum cognoscibile in se Objectum continent, Omnes enim mundi possibiles continent possibilia o-omnis co- mnia in sua systemata relata (§. 152.), consequenter quæcunque gnitionis præter Deum possibilia sunt, in mundis omnibus possibilibus possibilis omni possibili modo tum qua coëxistentiam, tum qua succes-præter De- sionem connectuntur (§. 142.). Nullum adeo possibile est ens um ubi re- finitum, quod non in aliquo aut aliquot mundis possibilibus periat. contineatur. Enimvero quicquid de re aliqua cognosci pot- est, id vel ad determinationes intrinsecas constantes atque mu- tabiles, vel ad relationes ejusdem ad alias pertinet. Quamob- rem cum determinationes constantes, hoc est, essentialia atque

attributa (§. 152. *Ontol.*), modorumque possibilitates, illorum cum his nexus & modorum variz series cognoscantur, si ens absolute spectetur (§. 143.); modus autem, quo existentia ipsius entis, & inexistencia modorum toto durationis tempore una cum dependentia entis a coëxistentibus quoad modos singulos & influxu in modificationem coëxistentium & in existentiam successivorum pateat (§. 144.), atque relationes omnes, quæ ad alia habere potest, innotescant, si tanquam in systema cum aliis relatum spectetur (§. 149.); omnes mundi possibles continent, quicquid, de omni ente præter Deum cognoscibile. Ubi res coëxistunt inter se connexæ, si coëxistentiam spectes, spatium (§. 589. *Ontol.*); si successionem, tempus (§. 572. *Ont.*); si multitudinem, numerus resultat (§. 340. *Ontol.*). Quare cum & spatium omne ac tempus omne una cum relatione utriusque ad ens unumquodque in singulari (§. 146.), nec non numerus omnis, qui dari potest, distincte cognosci possit, si tanquam in systemata relata spectentur (§. 148.) omnes mundi possibles utique continent, quicquid præter Deum cognoscibile.

Omnis rerum cognitio universalis inest singularibus, a quibus abstrahitur. Sed quomodo per cognitionem intuitivam distinctam omnium rerum pateant veritates universales, tum ex iis patet, quæ de cognitione entis universalis in systemate rerum singularium latente suprademonstravimus (§. 147.), tum ex iis, quæ inferius de ratione Dei docentur. Nemi- ni adeo dubium superesse potest, quod tantummodo hic agatur de cognitione omni possibili factorum, minime vero de omni cognitione possibili veritatis: hæc enim in ista continetur. Et sane nos ipsimet in factis pervidemus veritatem, sed limitato modo, qui essentia finitæ animarum humanarum convenit. Sed hæc omnia clarissima evadent inferius suo loco.

*Cognitio-
nis divinæ
extensio.*

§. 154.

Deus cognoscit omnia, quaecunque cognoscibilia sunt. Deus enim

enim cognoscit semetipsum atque mundos posibles omnes (§. 141.). Enimvero omnes mundi posibles in se continent, quidquid præter Deum cognoscibile (§. 153.). Quamobrem Deus omnia cognoscit, quæ cognoscibilia sunt.

Pater vel me tacente, cognoscibilitatem hic æstimari ex objecto, non ex subiecto, quatenus hoc cognitionis capax. Hoc autem modo si eandem æstimes, nihil datur in aliquo objecto, sive in se spectato, sive ad alia quomodocunque relato, quod non sit cognoscibile.

§. 155.

Deus cognoscit omnia possiblea tam absolute spectata, quam Quomodo in certa systemata redacta. Deus enim cognoscit omnes mundos posibles (§. 141.). Sed omnes mundi posibles contri-*Deus pos-* sibilea renent omnia possiblea in certa systemata redacta (§. 152.). Deus *præsen-* igitur cognoscit omnia possiblea in certa systemata relata. *Quod erat unum.*

Enimvero per se patet, qui omnia possiblea in certa systemata relata cognoscit, eum etiam cognoscere possiblea in se spectata, utpote cum intelligi nequeat eorundem in systemate nexus (§. 142.) nisi constet, quid absolute spectatis nisi (§. 10. *Cosmol.*). Deus igitur possiblea omnia in se spectata cognoscit. *Quod erat alterum.*

Ex iis, quæ mox demonstrabuntur, patebit, Deum non primo possiblea in se spectare ac deinde vi. determinationum ipsis intrinsecarum demum connectere, quemadmodum a nobis fieri solet ob intellectus finitudinem; sed vi intellectus ejus produci ideas possibleum in systemata redactorum actu unico & Deum sibi conscium esse eorum omnium, quæ rebus in se spectatis insunt & quæ ex earundem nexu resultant ob intellectus infinitudinem. Ex modo igitur cognitionis divinæ clarius constabit, cognitionem possibleum in systemata relatorum involvere cognitionem eorundem absolute spectatorum. Sufficit jam constare, quod absque cognitione pos-
sibi-

sibilia in se spectatorum nulla detur cognitio possibilium in certa systemata relatorum. Ubi cognitionem Dei naturalem demonstrativa ratione acquirere studemus, gradatim procedendum & quæ eandem notionem ingrediuntur sigillatim demonstranda. Cavendum vero ne his ad complendum notionem admisceantur, quæ nondum demonstrata sunt: quod qui facit, sua culpa in errorem incidit, aut certitudinem cognitionis labefactat. Si vero Autori imputat errores a se admixtos, injuriam eidem facit, eatenus condonandam, quatenus ignorantia methodi culpa vacat.

§. 156.

Ratio formalis cognitionis divinæ.

Deus omnia cognoscit distincte, quæ præter ipsum cognitaabilia sunt, nihil confuse. Etenim Deus omnes mundos possibiles sibi repræsentavit & hunc, qui existit, ex ceteris elegit (§. 121.) & quidem ob rationem objectivam (§. 119.), adeoque delinitam ab eo, quo hic, qui existit, mundus a ceteris differt (§. 120.). Quoniam adeo differentiam hujus, qui existit, mundi a ceteris omnibus æque possibilibus intime perspexit, cum alias hæsitasset, quinam ceteris sit præferendus; nihil concipi potest in unoquoque mundo, quod non cognoverit Deus, omnia a se invicem distinguibilia, adeoque sigillatim enunciabilia, decernens. Distincte igitur cognovit, quicquid unicuique mundo quocunque modo inest (§. 38. *Psych. empir.*). Quamobrem cum omnes mundi possibiles in se contineant, quicquid præter Deum cognitu possibile (§. 154.); Deus distincte cognoscit, quicquid præter ipsum cognitu possibile, consequenter nihil confuse (§. 38. 39 *Psych. empir.*).

Nondum demonstrari potest, Deum quoque semetipsum distincte cognoscere, seu nihil esse in Deo, cujus non sit sibi-metipsi conscius, cum in anterioribus principia sufficientia non occurrant. Absit autem, ut methodi ignarus hinc inferat, negari cognitionem sui ipsius distinctam de Deo, propterea quod distincta cognitio ad ea restringatur, quæ præter Deum

Deum cognitu possibile sunt! Etenim suo loco evincemus, distinctam Dei cognitionem etiam ad cognitionem sui ipsius esse extendendam. Neque enim eandem hic restringimus ad res a Deo diversas, alias restrictionem probari, consequenter demonstrari necesse erat, Deum semetipsum distincte non cognoscere. Dum unum ponitur, alterum non excluditur, etsi demonstratio per leges methodi differatur. Talia moneri, immo inculcari opus est, cum nostris moribus invaluerit, ut matælogi consequentarii, in quibus inscitia palam dubiam malitia reddit, iudicis auctoritatem sibi sumant & de iis, quæ non intelligunt, decretoriam sententiam ferant, quorum calumnia ac criminationes infusæ tanquam recentes factus ipsis blandiuntur, quod penes sui similes, adeoque non paucos, facilem inveniant fidem: tum etiam, ut methodi studiosorum attentionem excitemus; ne *αβλεψία* tyronibus familiari in errores incidant.

§. 157.

Deus sensu atque imaginatione caret. Ideæ enim sensuales, quæ vi sensationis in sentiente existunt (§. 95. *Psychol. empir.*), sunt explicabiles per mutationes, quæ in organo aliquo corporis cujusdam organici contingunt (§. 65. *Psychol. empir.*): sit ira, quod nullum istiusmodi corpus actu detur (§. 614. *Psychol. rat.*). Enimvero cum in corporibus mutatio nulla accidere possit nisi per motum, neque corpori inducatur mutatio nisi ab alio contiguo (§. 128. *Cosmol.*); impossibile est, ut omnia, ex quibus mundus hic adspectabilis componitur, corpora simul in eodem corporis organo mutationem producant, quaecunque tandem corpus istud, aut organon ipsius fingatur, immo impossibile multo magis est, ut a singulis, quantumlibet minimis corpusculis, qualia sunt ea, quæ primitiva dicimus (§. 229. *Cosmol.*), eidem organo inducatur mutatio citra confusionem cum alia, quoniam motus eidem mobili simul & juxta diversas directiones impressi adhuc distincti
(*Wolfii Theol. Naturalis*) S Si

Et quoad celeritatis gradum & directionem apparere deberent: id quod omnino implicat (§. 390. 391. *Cosmol.*). Nullæ igitur concipi possunt ideæ sensibiles, quibus sensibile, aliquod, nedum totus mundus adspectabilis, distincte repræsentari potest. Quamobrem cum Deus totum hunc mundum adspectabilem, distincte sibi repræsentet, nihil vero prorsus, quod in eodem datur, confuse (§. 156.); Deus quoque sensu caret. *Quod erat unum.*

Jam vero cum imaginatio non producat nisi perceptiones rerum sensibilibus absentium (§. 92. *Psychol. empir.*), ut adeo phantasmata, seu ideæ vi imaginationis productæ (§. 93. *Psychol. empir.*), ab ideis sensualibus, corpora mutationem organici sensorii nostri corporis inducentia (§. 65. *Psych. empir.*), adeoque eidem præsentia (§. 59. *Psych. empir.*) repræsentantibus (§. 65. 24. *Psych. empir.*) non differant, siquidem ea materialiter consideres seu ad objectum, quod referunt (§. 48. *Psych. empir.*), respicias; phantasmata vero, si formaliter eadem consideres, seu quoad repræsentandi modum, ideis sensualibus minus clara sint (§. 96. *Psychol. empir.*); quæ vi imaginationis repræsentantur, non magis distincte repræsentari possunt, quam quæ sensuum beneficio exhibentur. Quamobrem cum nullæ concipi possint ideæ sensuales, quibus sensibile aliquod, nedum totus mundus adspectabilis distincte repræsentari potest, quemadmodum modo ostendimus; multo minus concipi possunt phantasmata, quibus sensibile aliquod, nedum totus mundus adspectabilis distincte repræsentari potest. Quamobrem cum Deus totum hunc mundum adspectabilem distincte sibi repræsentet, nihil vero prorsus, quod in eodem datur, confuse (§. 156.); patet ut ante, Deum quoque imaginatione carere. *Quod erat alterum.*

Nemo sibi persuadeat, nos in probanda propositione præsentente per ambages incedere, cum ex immaterialitate Dei, seu quod

quod is corporeus non sit (§. 83.), consequenter corpus istiusmodi, quale humanum est, adeoque organis sensorii instructum, habere nequeat (§. 84.), sua veluti sponte fluat, Deum sensu atque imaginatione carere. Neque enim jam quæritur, an Deus sit corporeus, aut num tanquam ens simplex unitus sit cuidam corpori, in quo mechanice repræsentetur, quod inest ipsi qua simplici; sed num in Deo ideæ rerum materialium tales sint, quales in anima nostra sunt sensuales atque phantasmata. Ostendimus itaque, nihil dari in Deo, quod sensui atque imaginationi specificè sumtis, quales scilicet hæc facultates animæ nostræ insunt, si modum repræsentationis consideres, respondeat. Per naturam nimirum sensuum atque imaginationis ideæ rerum materialium confusæ sunt & ab omnimoda distinctione infinito intervallo absunt (§. 187. *Psychol. rat.*): at in Deo nulla locum habet idea confusa (§. 156.).

§. 158.

Nullum possibile est corpus, cui Deus tanquam anima uniri possit. Cur Deus niri possit. Ponamus enim, si fieri potest, possibile esse corpus, cui Deus tanquam anima uniri possit. Quoniam ad unionem animæ cum corpore sufficit harmonia naturalis animæ ac corporis coexistentium (§. 723. *Psych. rat.*), hæc autem harmonia inexplicabilitate perceptionum animæ per motus in corpore contingentes & motuum voluntariorum in corpore per volitiones ac nolitiones animæ, vel etiam appetitiones ac nolitiones sensitivas ejusdem consistit (§. 539. *Psychol. rat.*); corpus possibile erit, in quo mutationes contingunt, per quas explicari possunt repræsentationes rerum materialium, ex quibus mundus hic adspectabilis consistit. Deus igitur res illas sibi repræsentat convenienter mutationibus, quæ in isto corpore contingunt, consequenter gaudet sensu (§. 67. *Psych. empir.*): quod cum sit absurdum (§. 157.), corpus utique impossibile est, cum quo Deus tanquam anima uniri possit.

Demonstratio directa impossibilitatis istiusmodi corporis revera jam continetur in demonstratione propositionis præcedentis, aut saltem ex iis, quæ in eadem continentur, haud difficulter deducitur. Deus enim omnia, quæ in hoc mundo adspectabili dantur, sibi repræsentat distincte, nihil vero prorsus confuse (§. 156). Ibidem vero ostendimus, fieri non posse, ut omnia, quæ sunt in mundo materiali, distincte per motus in corpore repræsententur, quod tamen requiritur, siquidem ideæ materiales, quæ immaterialibus respondent, consentire debent. Ad impossibilitatem vero hujus corporis evincendam sufficit ostendisse impossibilitatem harmoniæ animæ ac corporis ex parte una, nec opus est, ut eadem evincatur quoad partem alteram.

§. 159.

*Cur Deus
anima
mundi esse
non possit.*

Deus non potest esse anima mundi. Ponamus enim, si fieri potest, Deum esse animam mundi. Quoniam anima hominis substantia est simplex, quæ sibi repræsentat hoc universum pro situ corporis organici in universo convenienter mutationibus, quæ in organis sensoriiis contingunt (§. 602 *Psychol. rat.*) & quidem per essentiam atque naturam suam (§. 66. & 67. *Psychol. rat.*) ; anima in genere erit substantia simplex, quæ sibi repræsentat hoc universum, seu mundum hunc adspectabilem convenienter mutationibus, quæ in organis corporis cujusdam organici sensoriiis contingunt (§. 710. *Log.*), specie nimirum corporis organici speciem animæ definiente. Quamobrem si Deus sit anima mundi, erit mundus illud corpus, cujus mutationibus convenienter Deus sibi mundum hunc adspectabilem repræsentat. Enimvero mundus adspectabilis est objectum repræsentationis, seu id, quod anima sibi repræsentat, adeoque ab illo corpore, cujus mutationibus convenienter fieri debet repræsentatio, diversum esse debet, mundo mutationes in organis sensoriiis producente, quibus convenienter fieri debet repræsen-

sentatio. Fieri adeo nequit, ut Deus sit anima mundi. Idem etiam sic ostenditur. Sumo *per demonstrata*, si Deus sit anima mundi, mundum hunc adspectabilem esse corpus, in quo contingunt mutationes, per quas explicabilis est representatio statuum hujus universi: patet nimirum ex iis, quas cognoscimus, animabus mutationes corporis, per quas explicabiles sunt representationes hujus ipsius corporis, cui anima unita est, esse diversas ab eo, quod de corpore sibi unito anima repræsentat, nec per notionem unionis animæ cum corpore res habere sese aliter potest (§. 962 963. *Psychol. empir.*). Possibile igitur est aliquod corpus, cui Deus tanquam anima uniri potest: quod cum sit absurdum (§. 158.), Deus anima mundi esse nequit.

Quam absurdum sit Deum dicere animam mundi, statim apparet, ubi animum ad dependentiam animæ in suis perceptionibus a corpore organico advertis: etenim vel in intuitu idearum confusarum acquiescens facile perspicit, objectum representationis diversum esse debere ab organo, in quo mutationem quandam producit, dum in anima repræsentatur, nec posse in mundo hoc adspectabili fingi organa sensoria materialia, per universum mundum ita dispersa, ut nullus in eodem ne minimus quidem contingat motus, quin simul quidam in organo sensorio producat a mobili. Quamobrem si ad dependentiam perceptionum animæ a corpore ipsi unito respexissent, qui Deum pro anima mundi habuere, nunquam in hunc errorem prolapsi fuissent. Quod vero sibi persuadere potuerint, Deum esse animam mundi; id quidem inde est, quod alteram unionis partem, nimirum dependentiam corporis ab anima quoad specificationem motuum voluntariorum & continuitatem temporis, quo cum volitionibus animæ contingunt (§. 962 *Psychol. empir.*), male intellectam ultra limites suos extenderint & per errorem ad Deum applicaverint. Etenim omnes corporis nostri motus animæ promiscue subjecerunt, quos a causa externa non pro-

ficisci constat, cum tamen certum sit, motus vitales a causis internis dependentes immediate, sit ita quod mediate ab externis quoque dependeant, imperio animæ non subesse. Quamobrem cum omnem in universo seu mundo adspectabili motum Deo tanquam causæ adscriberent; cum esse motorem mundi, quemadmodum anima corporis nostri, intulere, ac ob hanc motuum in mundo adspectabili a Deo dependentiam eundem animam mundi appellarunt. Enimvero si vel maxime verum esset, omnes in mundo adspectabili motus sine vi creata produci virtute ipsius Dei, quemadmodum *Cartesians* videtur; non tamen hoc sufficeret, ut Deus pro anima mundi haberi posset, cum alias motor externus machinæ anima ejusdem foret, veluti ventus molendini pneumatici, aqua aquatici: quin potius requiritur quoque dependentia perceptionum a moribus quibusdam in corpore & ut inde nascantur appetitus, a quibus pendet motus eidem subiecti in corpore (§. 964. 962. *Psychol. empir.*). Neque Deus dici poterit anima mundi, etiamsi tantummodo admittas dependentiam corporis nostri ab anima quoad actus voluntarios, supponentes decreta animæ a perceptionibus dependentia, & Deum occasione eorum, quæ fiunt in universo, præsertim ab hominibus, decernere supponas, quid in natura rerum fieri debeat, & concursu suo immediato hos solummodo motus producere statuas, ceteris naturæ relictis. Etenim ratio ante allata hac restrictione minime infirmatur, nec Deus in hac hypothese tuetur nisi personam directoris machinæ, qui movet quasdam machinæ partes, quando non moverentur intentioni suæ conformiter, veluti motum indicis in horologio retrahit aliquo intervallo, si præcipitato gradu promoveretur. Quodsi sumas spatium, quod a toto mundo materiali permeatur, esse organon sensorium Dei; nondum tamen sic patet dependentia perceptionum in Deo a mundo tanquam corpore suo, quemadmodum ad naturam animæ requiritur. Ut enim taceam supponi hic notionem spatii imaginariam, cui ens simile extra animam nostram minime respondet (§. 589. 599. *Ontol.*); juxta hanc ipsam notionem constat spatium non posse habere partes actuales & ut totum, sic quoque

quoque quoad singulas partes esse immobile, consequenter a rebus in eodem existentibus nullam mutationem eidem induci posse, immo cum sit uniforme, organon impressionum distinctarum haud quaquam haberi posse. Atat! non opus est, ut in hisce refellendis omnem evidentiam consequi studeamus, quæ eodem jure rejiciuntur, quo finguntur. Quod vero substantia simplex tanquam anima unita corpori concipi non possit, nisi admittas in ea repræsentationes causarum mutationes isti corpori inducentium, consequenter illius ab hoc in percipiendo dependentiam, agnovere philosophi acumine præditi, qui corporibus quibusdam animas tribuere, quibus vulgo nullæ tribuuntur. Exemplo sit *Keplerus*, qui corporibus mundi totalibus veluti Telluri nostræ animam esse defendit, & hinc in eadem agnoscit perceptiones ad spectuum planetarum, ex his vero perceptionibus porro deducit appetitum ad ciendas tempestates, ut adeo sit mutua corporis ac animæ a se invicem dependentia.

§. 160.

Deus omnia cognoscit simul. Ponamus enim, si fieri potest, *Ratio forte Deum non cognoscere omnia simul*: cognoscet igitur successive. Enimvero Deus omnes mundos possibiles sibi repræsentavit & hunc, qui existit, ex ceteris elegit (§. 121.) & quidem ob rationem objectivam (§. 119.), adeoque desumptam ab eo, quo hic mundus ad spectabilis a ceteris differt (§. 120). Quare cum omnia distincte cognoscat (§. 156.); omnem quoque differentiam mundi hujus ad spectabilis a ceteris omnibus distincte cognoscere debet. Necesse igitur est, ut sibi simul sit conscius eorum omnium, quibus hic mundus ad spectabilis a ceteris omnibus differre deprehensus, dum quoad singula, quæ eidem insunt, eum contulit cum singulis, quæ insunt mundis ceteris, consequenter admittendum est, Deum simul sibi esse conscium eorum omnium, quæ mundis singulis insunt, adeoque ea simul cognoscere. Continent autem mundi possibiles omnes, quicquid præter Deum cognoscibile (§. 153.). Deus igitur omnia simul cognoscit,

Idem

Idem etiam sic ostenditur. Singulæ ideæ sensuales & phantasmata rerum præteritarum integrum statum universi, ad quem referuntur (§. 182. *Psychol. rat.*), omnes quoque status mundi anteriores (§. 184. *Psychol. rat.*), immo & omnes status mundi respective futuros involvunt (§. 185. *Psych. rat.*), ita ut anima continuo producat ideam totius universi, non modo quoad statum præsentem, verum etiam quoad omnes præteritos atque futuros, sed pro diversa dependentia status præsentis a præteritis & futurorum a præsentem continuo diversam (§. 190. *Psychol. rat.*). Quamobrem cum Deus sibi repræsentet omnes mundos possibiles (§. 121.), adeoque inter essentiam Dei atque animam eatenus similitudo quædam intercedat (§. 66. *Psychol. rat.*) ; citra hæsitacionem admitti debet, ideas rerum ad mundum hunc adspectabilem, vel alium quemcunque spectantium, perinde ac nostras præter statum præsentem totius mundi, ad quem referuntur, omnes quoque respective præteritos atque futuros continere. Cognoscit vero Deus omnia distincte, nihil confuse (§. 156.). Ideæ igitur mundorum possibilibus in Deo distincte singula exhibere debent, fieri autem nequit, ut perinde ac in ideis nostris alia aliis involvantur diverso involutionis gradu (§. 187. *Psychol. rat.*). Quicquid igitur in omnibus mundis possibilibus continetur, simul cognoscit. Quamobrem cum omnes mundi possibiles in se contineant, quicquid præter Deum cognoscibile (§. 153.) ; Deus quoque omnia cognoscibilia simul cognoscit.

Distincta omnium rerum cognitio cum simultaneitate in cognoscendo adeo connexa est, ut ista admissa hæc negari minime possit. Poterat hæc ex illa aliis adhuc modis inferri, veluti ex eo, quod totum aliquod universum seu mundus quilibet sit ens unum, distincte non cognoscendum, nisi exhibeatur aliqua idea, in qua singula actu distinguuntur, ut cognoscens omnium eorum, quæ insunt, & nexus eorundem, quo ens unum constituuntur, simul fuerit sibi conscius: tum
etiam

etiam ex eo, quod nihil eorum, quæ insunt in aliqua rerum serie, possit tanquam in systemate cum ceteris distincte cognosci, nisi distinctissime perspiciatur nexus ejus cum ceteris omnibus. Sed de his ut dicamus apertius opus non est, cum veritas propositionis abunde pateat per eas, quibus usi sumus, probationes.

§. 161.

Deus in quolibet minimo, quod inest universo, cognoscit *Cognitio totum universum*. Cum enim in mundo quocunque, etiam *singulo-* *adspectabili* (§. 55 *Cosmol.*), quicquid eidem inest, tum cum *rum quo-* *simulaneis* sive coëxistentibus, tum cum successivis ceteris *o-modo cum* *mnibus* connectatur (§. 48 53. 54. *Cosmol.*); nihil in quacunque *cognitione* *que* rerum serie distincte cognoscitur, nisi nexus cum coëxi *omnium* *stentibus* singulis & successivis singulis in eadem serie distincte *connecta-* *perspiciatur*, tum ut intelligatur, cur inter coëxistentia hunc *sur,* *potius* teneat locum, quam quemvis alium, tum ut constet, cur inter successiva hæc potius sequatur & præcedat, quam *a-* *lia*, cum propter dissimilitudinem non modo omnium corpo- *rum,* *sive* eodem, sive diverso tempore existentium (§. 246. *Cosmol.*), sed ipsorummet etiam elementorum (§. 195. *Cosmol.*) fieri non possit, ut quicquam in modo coëxistendi & sibi invicem succedendi mutetur, salvo principio rationis sufficientis, juxta quodabilia inter se connexa (§. 10. *Cosmol.* & §. 70. *Ontol.*), adeoque in systemata relata fuere (§. 142.). Quamobrem cum Deus distincte cognoscat, quicquid in una- *quaque* rerum serie cogniti possibile (§. 156.); necesse est ut cognoscat, cur unumquodque in qualibet rerum serie inter coëxistentia hunc potius teneat locum, quam alium, seu hoc potius modo iisdem coëxistat, quam alio (§. 602. *Ontol.*), & cur inter cetera nil quicquam reperiatur, quod cum ipso vices permutare possit, item cur unumquodque inter successiva hæc, non alia sequatur. & hæc præcedat, non alia, nec quic-

(*Wolffii Theol. Naturalis*) T quam

quam in tota successivorum serie detur, quod cum ipso vices permutare queat. Enimvero a dissimilitudine eorum, quæ coëxistunt & sibi invicem succedunt in qualibet serie rerum, consequenter a diversitate eorum, quæ ipsis insunt (§ 211. *Ontol.*), petenda ratio est, cur impossibile sit salvo nexu, seu stante principio rationis sufficientis, ut vices eorundem sive quoad coëxistentiam, sive quoad successionem permutentur, *per demonstrata*. Deus igitur eandem perspicuens nihil eorum, quæ sunt in universo, cognoscit, quin simul cognoscat quæ sunt in toto universo, seu, quod perinde est, in quolibet minimo, quod inest universo, totum cognoscit universum.

Idem etiam hoc modo ostenditur. In anima nostra unaquæque idea sensualis & phantasma unumquodque integrum statum universi, ad quem refertur (§. 182 *Psybol. rat.*), omnes status mundi anteriores (§ 184 *Psybol. rat.*), omnes futuros (§. 185 *Psybol. rat.*) diverso licet modo involvit (§ 187. *Psybol. rat.*), ita ut æquipolleat ideæ totius universi quoad omnes ejusdem status, sed pro diversa dependentia status præsentis a præteritis & futurorum a præsentie continuo diversæ (§. 190. *Psybol. rat.*). Quamobrem cum Deus sensu careat & imaginatione (§. 157.) & omnia distincte cognoscat (§. 156.); quicquid in idea qualibet sensuali, quæ datur in anima nostra, vel etiam in phantasmate aliquo involvitur, in idea Dei distincte continetur. Involvitur autem in idea sensuali dependentia sensibilis a ceteris omnibus coëxistentibus, quæ constituunt statum mundi præsentem, & ab omnibus præteritis atque futuris, quæ ad status mundi præteritos ac futuros pertinent *per demonstrata*. In idea igitur rei cujuscunque, quæ datur in intellectu divino, distincte exhibetur totum universum, sed quoad dependentiam rei illius a ceteris, adeoque Deus in quolibet minimo, quod inest universo, totum cognoscit universum.

Lubens concedo, hanc propositionem hactenus non fuisse expensam, propterea quod nec universi hujus, nec animæ humanæ natura satis fuerit agnita: tanto autem minus de veritate ejus dubitari potest, quanto certius est, ideas rerum in intellectu divino prodire, siquidem ideæ earundem, quæ in anima nostra sunt, ab omni imperfectione liberentur, quæ a limitationibus facultatis cognoscitivæ originariis ipsis adheret, per ea, quæ in sequentibus demonstrabuntur. Quamobrem qui ea ad animum revocaverit, quæ de nexu rerum seu earundem mutua a se invicem dependentia in universo in Cosmologia & de idearum sensualium interiore ratione in Psychologia rationali docuimus; ei nihil prorsus difficultatis circa propositionem præsentem suboriri poterit.

§. 162.

Deus cognoscit omnes veritates universales. Cognoscit *Veritatum*
enim omnia possibilis tam absolute spectata, quam in systema- *universali-*
ta redacta (§. 155.), adeoque omnes species ac genera eorun- *um cogni-*
demque subordinaciones una cum prædicatis tam absolutis, *tio in Deo.*
quam hypotheticis speciei ac generi cuicunque convenientibus (§. 147). Quamobrem cum notiones generum ac specierum sint notiones universales (§. 54 Log.) & quæ ipsis tribuuntur prædicata vel absoluta sunt, vel hypothetica (§. 216. 218. Log.); Deus omnes veritates universales cognoscit. Et quia eodem modo patet, Deum quoque cognoscere numeros (§. 148) & magnitudines (§. 151.) una cum omnibus relationibus (§. 149.); facile apparet, quæ de generum atque specierum cognitione demonstrata sunt, etiam ad numeros, magnitudines & relationes quascunque pertinere, consequenter nullam concipi posse cognitionem universalem, quæ in Deum non cadat. Manet adeo universaliter verum, quod Deus omnes veritates universales cognoscat.

Modum, quo Deus universalis cognoscit, hic nondum definimus, etsi ex iis, quæ superius de universalium cognitione

connexa cum possibilium cognitione, quatenus tanquam in systemata relata spectantur, dicta sunt, quodammodo pateant. Quamobrem tantisper etiam seponimus dubium, quod suboriri poterat, num per ea, quibus usi sumus, principia evincatur omnium omnino veritatum universali cognitione. Etenim paulo post, quando de ratione Dei acturi sumus, idem penitus, quemadmodum confidimus, evanesceat.

§. 163.

*Qualis sit
intellectus
divinus.*

Intellectus divinus actus est, non facultas. Deus enim omnia cognoscit simul (§. 160), adeoque nulla ipsi possibilis est cognitio, quæ non actu in eodem detur. Quoniam itaque facultas est potentia activa (§. 716 *Ontol.*), atque adeo non nisi agendi possibilitatem denotat (§. cit.); in Deo nulla datur facultas cognoscendi, sed intellectus ejus purus actus est.

Dici etiam solet, intellectum in Deo concipi non per modum potentiae, sed per modum actus. Atque hoc probe notandum est, cum inde infinitudo intellectus divini pendeat, quemadmodum mox ostendemus.

§. 164

*Quid sit
intellectus
Dei.*

Intellectus divinus est distinctus & simultanea omnium possibilium repræsentatio.

Veritas definitionis patet per antea demonstrata. Intellectus divinus actus est, non facultas (§. 163), adeoque in actuali possibilium repræsentatione, non vero in facultate eadem repræsentandi consistit. Deus cognoscit omnia, quaecunque cognituabilia (§. 154. 14.). Intellectus adeo divinus omnia possibilis, seu cognoscibilia repræsentat. Deus cognoscit omnia distincte, nihil confuse (§. 156.). Intellectus adeo divinus distincta repræsentatio possibilium est. Denique Deus omni simul cognoscit (§. 160.). Intellectus igitur ejus possibilium simultanea repræsentatio est. Patet nihil in definitione contineri, quod in antecedentibus non fuerit probatum. Dubitandum ergo non est, talem Deo convenire intellectum, qualem definivimus. Quod vero no-

tio sit completa, tum ex eo intelligitur, quod præter obiectum & modum, quo cognoscitur, in definiendo intellectu spectari nihil possit; tum ex sequentibus de differentia inter intellectum divinum & humanum perspicitur.

§. 165.

Cum palam sit, nos non cognoscere nisi quædam possibilia, ut infinito intervallo a cognitione omnium possibilium distemus nihil cognoscere prorsus distincte, sed non minore intervallo a distincta prorsus unius possibilis, quam a possibile omnium cognitione distare; quicquid denique cognoscimus, successive cognoscere, ut ne pauca quidem simul cognoscere detur; ex adverso autem intellectus divinus sit distincta & simultanea omnium possibilium representatio (§. 164): *intellectus divinus ab humano prorsus differt, sive obiectum sive modum cognitionis spectes, atque caret limitationibus, quæ in facultate cognoscitiva animæ nostræ dantur.*

Differentia intellectus divini ab humano.

Facultas cognoscitiva limitatur in anima quoad obiectum, quod non extenditur ad omne possibile, quoad modum, quod non sit distincta prorsus, nec simultanea. Hæ igitur limitationes singulæ ab intellectu divino absunt, & quia intellectus divinus ab iisdem liber est, ideo facultas ejus cognoscitiva non distinguitur in partem inferiorem ac superiorem, seu sensum cum imaginatione & intellectum, quemadmodum in homine (§. 157.).

§. 166.

Intellectus divinus prorsus illimitatus est. intellectus enim limitari nequit, nisi quoad obiectum & modum representandi obiectum. Quamobrem cum intellectus obiectum sit, *illimitatus* quicquid possibile est; illimitatus quoad ipsum est, si ad omne possibile promiscue extenditur. Porro cum intellectus limitatus, qualis humanus est, possibile representet non prorsus distincte, nec multa simul; illimitatus omnia possibilia simul

arque distincte repræsentare debet. Quoniam itaque intellectus divinus in distincta & simultanea repræsentatione omnium possibilem consistit (§ 164.); prorsus illimitatus est.

Monuimus jam ante (not. §. 165) intellectum divinum esse liberum ab iis limitationibus, quæ in humanum cadunt: ast hic ostendimus, eum nulli prorsus limitationi obnoxium esse.

§. 167.

*Infinitudo
intellectus
divini.*

Intellectus divinus infinitus est. Etenim Deus possible omnia repræsentat simul (§. 160.), ut adeo nihil sit cognoscibile, quod non actu in intellectu divino repræsentetur. Quicquid igitur vi intellectus divini tanquam possibile concipi potest; id actu in Deo datur. Quamobrem cum ens sit infinitum, in quo sunt omnia simul, quæ eidem actu inesse possunt (§. 838. *Ontol.*); intellectus divinus infinitus est.

Infinitum distinguimus ab illimitato, etsi illimitatum necessario sit infinitum & contra. Non tamen ex eo, quod intellectus divinus est illimitatus, inferimus, eum esse infinitum, propterea quod infinitudo intellectus divini clarius pateat definitione entis infiniti ad eundem applicata.

§. 168.

*Summa
intellectus
divini perfectio.*

Intellectus divinus perfectissimus est. Intellectus perfectissimus est, qui omnia possible distincte repræsentat (§. 647. *Psychol. rat.*). Quoniam itaque ab intellectu divino possible omnia distincte repræsentantur (§. 164.); idem quoque perfectissimus est.

Facile patet, intellectum divinum esse perfectissimum absolute spectatum, non respectu ad aliorum entium intellectum habito. Neque enim perfectior concipi potest intellectus, quam qui possible omnia distincte repræsentat. Quodsi urgeas simultaneitatem in repræsentando; id quidem intellectui divino non obest, propterea quod in eodem omnia repræsentantur simul (§. 164.); ac præterea constat (§. 160.),

160.), simultaneitatem in repræsentando cum repræsentatione prorsus distincta adeo connexam esse, ut a se invicem separari minime possint. Unde etiam ex definitione abesse poterat, nisi consultius duxissemus majoris perspicuitatis gratia eandem inseri

§. 169.

Quoniam intellectus divinus perfectissimus est (§. 168.), *Magnitudo intellectus vero perfectissimus, maximus omnium seu absolute summus est (§. 648. Psychol. rat.) ; intellectus divinus omnium divini. maximus, seu absolute summus est.*

Major scilicet intellectus ne concipi quidem potest, quam qui Deo est: id quod etiam per ipsam ejus definitionem statim patet (§. 164.), tum etiam ex eo inferri poterat, quod sit prorsus illimitatus, cum repugnet illimitato concipi majus.

§. 170.

Incomprehensibile dicitur cognoscibile, si modum, quo est vel fieri potest, nobis minime repræsentare valeamus. *Incomprehensibilitatis definitio.*

Aliud est cognoscere, quod quid sit possibile; aliud vero cognoscere modum, quo quid possibile; adeoque eundem sibi repræsentare, seu ejus quandam sibi formare ideam. Ponamus enim hominem artis mechanicæ ignarum videre horologium. Quod fieri possit, ut horologium arte humana construatur, dubitare nequit. Cognoscit igitur constructionis possibilitatem. Enimvero non perspicit modum, quo construi potest horologium, nec artem intelligit, quæ in fabro horologii requiritur. Ac propterea affirmat, se comprehendere non posse, quomodo arte humana horologium construi possit. Est adeo horologii constructio, quam possibilem esse agnoscit, ipsi incomprehensibilis, quod nullam constructionis & artis, qua eadem perficitur, habet ideam. Atque hinc simul intelligitur, terminum incomprehensibilitatis sumi in significato usus loquendi conformi (§. 139. Log.).

§. 171.

§. 171.

Compre-
hensibilita-
tis defini-
tio.

Ex adverso *comprehensibile* dicitur cognoscibile, si mo-
dum, quo est vel fieri potest, nobis clare & distincte repræ-
sentare valemus.

Ita artis mechanicæ & imprimis horologiopœiæ gnarus af-
firmat, se comprehendere constructionem horologii, pro-
pterea quod sibi non modo omnes partes, quæ ad structuram
horologii requiruntur, earundem combinationem, verum et-
iam singulos actus artificis distincte repræsentare valet, qui-
bus horologium conficitur. Qui adeo horologii constru-
ctionem comprehendit, ideam structuræ atque artis, qua pa-
ratur, in se suscitare valet.

§. 172

Incompre-
hensibili-
tas intelle-
ctus divi-
ni.

Intellectus divinus omni intellectui finito incomprehensibi-
lis. Intellectus enim finitus successive cognoscit ea, quæ ipsi-
us vi actu cognosci possunt (§ 837. *Ontol.*). Quamobrem
ens intellectu finito præditum, quale est anima nostra, cum ha-
beat ideam intellectus sui, quatenus sibi sui ipsius conscius est
(§. 12. *Psychol. rat.*), non habet ideam claram nisi successivæ
repræsentationis possibilitium. Et quia successivam cognitio-
nem possibilitium prorsus distinctam esse minime posse constat
ex iis, quæ superius de simultaneâ Dei cognitione demonstra-
ta sunt (§. 160); in intellectu finito nec distincta prorsus pos-
sibilis alicujus repræsentatio locum habet. Pater igitur ut ante
intellectum finitum non habere ideam nisi repræsentationis non
prorsus distinctæ, aut, si mavis, inadæquatæ (§. 95. *Log.*).
Enimvero intellectus divinus est repræsentatio distincta & si-
multanea omnium possibilitium (§. 164.). Finitus adeo intel-
lectus non habet ideam istiusmodi possibilitium repræsentatio-
nis, qualis in Deo datur, consequenter modum, quo Deus sibi
possibilia repræsentat, sibi clare repræsentare nequit (§. 48.

Psych.

Psychol. empir.). Est igitur eidem intellectus divinus incomprehensibilis (§. 170.).

Idem etiam sic ostenditur. Quoniam ens intellectu præditum, quale est anima nostra, non habet intellectus ideam, nisi quatenus sui ipsius conscium est (§. 12. *Psychol. rat.*); non aliam nisi intellectus finiti ideam habet. Enimvero intellectus Dei infinitus est (§. 167.): ens igitur intellectu finito præditum non habet ideam intellectus, qualis in Deo est, consequenter eundem sibi clare repræsentare nequit (§. 48. *Psychol. empir.*). Intellectus igitur divinus finito incomprehensibilis (§. 170.).

Si quis ad demonstrationem animum advertit, facile perspiciet intellectum infinitum non ante comprehendi posse, quam intellectus eundem appercepturi abeat in infinitum. Quoniam itaque impossibile est, ut intellectus finitus in infinitum abeat, nec fieri ullo modo potest, ut ens intellectu finito præditum intellectum divinum comprehendat. Absit autem, ut quis ex eo, quod nullam intellectus divini ideam habeamus, inferat, eum esse non ens. Constat enim ipsi respondere aliquam ideam, etsi nos eandem non habeamus, nec habere possumus; sed tantummodo ideam habeamus ejus, quod non sit, & ideas particulares illarum determinationum, quæ ad intellectum divinum requiruntur, sufficientes ad hoc, ut intelligatur quid sit intellectus divinus, etsi non sufficiat ad id, ut eundem penitus comprehendamus.

§. 173.

Ens limitatum est etiam finitum & contra. Ens enim finitum *Cur ens li-*
in sensu mathematico, hoc est, limitatum (§. 798. *Ontol.*), suc- *mitatum*
cessive alios aliosque status habere potest, non vero omnes si- *fit idem fi*
mul (§. 834. *Ontol.*). Est igitur ens finitum reale (§. 897. *On-*
nitum.
sol.). Inversa porro patet eodem modo.

Equidem id revera jam demonstravimus in Ontologia
citatis hic paragraphis: hic tamen necesse fuit clarius id e-
(*Wolffii Theol. Naturalis*) U nun-

nunciari, ut eodem principio uti possimus, quoties ab illimitato ad finitum fieri debet argumentatio.

§. 174.

Cur intellectus divinus nobis incomprehensibilis.

Intellectus divinus homini incomprehensibilis est. Et enim intellectus humanus admodum limitatus (§. 654 *Psychol. rat.*), adeoque finitus est (§. 173.). Quamobrem cum intellectui finito divinus incomprehensibilis sit (§. 172.); etiam nobis incomprehensibilis esse debet.

Frustra igitur quis conatur comprehendere intellectum divinum, adeoque frustraneus est conatus formandi ideam intellectus divini, quemadmodum proprii intellectus idea in nobis existit. Contenti igitur esse debemus, quod demonstrare valeamus, qualis sit intellectus divinus, & quod determinationes ad eum requisitas intelligamus, quatenus tanquam ideae partiales in diversis ideis rerum aliarum continentur.

§. 175.

Heterogeneitas limitati & illimitati.

Quantitas limitata seu finita non potest fieri illimitata seu infinita, quotiescunque sumatur. Quantitates omnes per lineas rectas exponi possunt (§. 425. *Ontol.*). Ponamus itaque dari lineam rectam quamcunque, cujus limites, seu puncta extrema (§. II. *Geom.*), sint A & B. Ponamus porro hanc lineam sumi bis, hoc est, ipsi AB æqualem apponi aliam, cujus termini sint C & D. Cum termini C & B coalescant, ut linea CD alteri AB continua fiat (§. 554. *Ontol.*) terminis C & B evanescentibus, remanent adhuc termini A & D, adeoque linea, quæ prodit, limitata est. Quoniam idem fieri debere intelligitur, quotiescunque lineam ipsi AB æqualem compositis adjicias; patet quantitatem limitatam non posse fieri illimitatam, quotiescunque tandem sumatur.

Principium hoc ontologicum in universalitate sua admodum evidens, ut ipsa imaginationis vi ejusdem veritas percipitur.

cipiatur. In applicatione non hærebit, qui notiones quantitatis, magnitudinis & gradus in Ontologia evolutas probe perspectas habet: multo minus autem hærebit, qui noverit, quomodo Mathematici omnem quantitatem molis ac virtutis per rectas repræsentent, cujus quidem instituti rationes satis apertas exposuimus in Ontologia.

§. 176.

Intellectus divinus immensus est. Intellectus enim divinus *Immensi-* prorsus illimitatus est (§. 166), cumque idem sit omnium *tas intelle-* ximus, seu absolute summus (§. 169.); non concipi potest *ctus divi-* intellectus illimitatus, qui non sit idem cum ipso, consequenter *ni.* intellectus illimitatus, qui omni finito incomprehensibilis (§. 170.) non potest sumi pro mensura, ubi illimitatum metiri volueris, idem omnino facturum cum eo, qui distantiam Lunæ a Terra determinaturus, eandem distantiam pro mensura assumeret & quærenti, quanta sit, responderet, eam esse tantam, quanta est distantia isti æqualis quantitas nobis ignota. Jam omnis intellectus, qui præter divinum illimitatum (§. 166.) concipi potest, limitatus est (§. 53. *Ontol.*). Enimvero cum fieri nullo modo possit, ut intellectus limitatus, quotiescunque tandem sumatur, degeneret in illimitatum (§. 175.); intellectus limitatus quicumque illimitato heterogeneus est (§. 364. *Ontol.*), adeoque pro mensura illimitati assumi haud quamquam potest (§. 441. *Ontol.*). Intellectus divinus itaque mensuram omnem respuit, consequenter immensus est (§. 41.).

Qui non sufficiente acumine utuntur, immensitatem intellectus divini ex eo inferunt, quod eundem sibi incomprehensibilem experti non videant, quomodo eundem metiri liceat. Enimvero inferre tantummodo debebant, se intellectum divinum metiri minime posse, nec videre quomodo eundem metiri liceat. Inde vero nondum sequitur intellectum divinum in se talem deprehendi, ut metiri ipsum non detur: id quod tamen requiritur, si quidem immensus dici

debeat (§. 41.). Hæc ideo monemus, ne quis per præcipitan-
tiam sibi persuadeat, nos immensitatem intellectus divini
tantum non per se claram probando magis obscurare, quam
clariorem reddere. Accidit enim haud raro, ut, qui in ma-
xima luce caligant defectu notionum distinctarum, unde
pendet probationis claritas, vitium non in se, sed in probatio-
ne quærent, intelligentibus misere vapulantes, ubi mentis cæ-
citati malitiam in exprobrando jungunt.

§. 177.

Intellectus

*Si multitudinem rerum in universo, quibus spatium & tem-
divini ma- pus omne repletur, ad animum quantum datur revoces, spatii
gnitudo & mundani non modo vastitatem, verum etiam ejus perinde ac
incompre- temporis in partes admodum exiles divisibilitatem cogites; in-
bensibilitas tellectus divini magnitudinem eju que incomprehensibilitatem
quomodo quodammodo intelligibilem efficies. Etenim ubi vastitatem spa-
intelligibi- tii mundani, qualis per inventa Astronomorum deprehendi-
lis fiat. tur, expendas, & divisibilitatem ejusdem spatii in partes a-*

*ctuales, quales observationes microscopicz produnt (§. 612. Ontol.), tibi repræsentantes; quantus sit rerum spatium munda-
num dato momento replentium numerus, aliquo modo intel-
ligibilis efficitur, etsi tantus deprehendatur, quantum enunci-
andi nulla spes nobis superest. Quodsi ulterius cogitemus, di-
visibilitatem temporis in partes actuales, quales per mutationes
in rerum natura contingentes produnt observationes micro-
scopicz (§. 583. Ontol.), & quot istiusmodi partes in unica
hora deprehendantur, calculo definias; numerus succes-
sivorum in eadem spatii parte quodammodo intelligibilis efficie-
tur. Quodsi vero porro consideres, in singulis spatii mun-
dani particulis actualibus, quales paulo ante annotasti, intra ho-
ram unam totidem mutationes contingere; numerus succes-
sivorum stupendus, qui prodit, magis intelligibilis efficitur. Ubi
vero cogites elementa rerum, substantias simplices (§. 182.*

Cosmol.

Cosmol.), earumque dissimilitudinem (§. 195. *Cosmol.*) & continuam status interni mutationem (§. 197. *Cosmol.*) ; ineffabilitas numeri cognoscibilium in dato aliquo tempusculo reali per observationem intelligibilis evadit. Jam cum intellectus divinus simul distincte sibi repræsentet, quicquid in toto hoc universo omni tempusculo perceptibili existit (§. 156. 160.): quam vastus sit intellectus divinus tantam rerum vastitatem unico actu comprehendens, quodammodo intelligitur, & ubi præsertim ineffabilitatem numeri cognoscibilium una perpendis, illius incomprehensibilitas quodammodo intelligibilis una evadit.

Dedimus iam olim rei specimen in dissertatione academica de notione intellectus divini per opera naturæ illustrata, quam suis Meletematis subjunxit B. Thümmigius. Ex instituto autem telam hanc pertexturi sumus in Theologia, ad quam hæc tractatio pertinet (§. 85. *Disc. prælim.*). Sufficit hinc agnoscere, quam utile sit eam Theologiæ partem excoli, quæ Theologiæ naturalis experimentalis partem continet.

§. 178.

Intellectus Dei purus est. Etenim Deus omnia distincte cognoscit, nihil confuse (§. 156.), adeoque multo minus *Puritas intellectus* obscuri quidpiam ideis ac notionibus ejus admiscetur (§. 32. *divini. Psychol. empir.*). Quamobrem cum intellectus purus sit, si notioni rei, quam habet, nihil confusi admiscetur nihilque obscuri (§. 313. *Psychol. empir.*); intellectus Dei purus est.

Idem etiam sic ostenditur. Deus sensu caret atque imaginatione (§. 157), adeoque intellectus ejus a sensu & imaginatione prorsus liber est. Quare cum intellectus purus sit, si a sensu atque imaginatione liber est, & in tantum quidem purus sit, in quantum a sensu atque imaginatione liber (§. 314. *Psych. empir.*); intellectus Dei prorsus purus est.

Differt in eo intellectus divinus ab humano, quem nunquam prorsus purum esse posse constat (§. 315. *Psych. empir.*). Est nimirum puritas plenaria privilegium intellectus omnium perfectissimi, quem esse divinum ostendimus (§. 168.).

§. 179.

*Apertum
& tectum
quid dica-
tur perci-
pienti.*

Apertum dicitur percipienti, quod, quo minus percipiat, non obstat perceptibile aliud. Ex adverso *Tectum* dicitur percipienti, quod quo minus percipiat, obstat perceptibile aliud.

Ita Luna hoc sensu dicetur aperta intuentibus, quando nullo corpus opacum inter oculum & ipsam interjicitur, quod impedire poterat, quo minus radiis luminis lunaris ad oculum delatis eam videremus. At ex adverso tecta nobis erit eadem Luna, si turris inter oculum & Lunam interposita obstat, quo minus lumen lunare ad oculum propagetur. Similiter superficies externa corporum nobis aperta est, quatenus nihil impedit, quo minus eam videamus; at interiora corporum tecta sunt, quatenus exterior superficies impedit, quo minus interiora corporum videre, vel etiam tangere possimus.

§. 180.

*Cur Deo
aperta o-
mnia, nihil
tectum.*

Deo aperta sunt omnia, tectum nihil. Etenim Deus omnia cognoscit distincte, nihil prorsus confuse (§. 156.), atque adeo fieri nequit, ut unum, quod sibi repræsentat, impediat, quo minus sibi clare quoque ac distincte repræsentet alterum. Omnia igitur ipsi aperta sunt, tectum nihil est (§. 179.).

Quod si indirecte argumentari malueris, ita erit argumentandum. Ponamus Deo aliquid esse tectum, si fieri potest. Quoniam id tegitur percipienti, quod quo minus percipiat, obstat perceptibile aliud (§. 179.); eorum, quæ Deus sibi simul repræsentat, unum obstat, quo minus sibi clare repræsentare possit alterum, aut quo minus idem sibi repræsentet. In casu primo non omnia sibi distincte repræsentat (§. 38. *Psychol. empir.*).

empir.), nec in casu secundo omnia sibi repræsentabit simul: quod utrumque cum absurdum sit (§. 156. 160.), admittendum utique est, Deo omnia esse aperta, relictum nihil.

Propositionem hanc prætermittere non debebamus, propterea quod ejus utilitas elucet in praxi officiorum erga Deum, in quæ influit omniscientiæ divinæ cogitatio, quemadmodum suo loco in philosophia practica clucescet.

§. 181.

In Deo continuo existit idea non modo hujus, qui existit, *Idea mundi*, sed ceterorum quoque omnium possibilium. Etenim dorum o- Deus omnes cognoscit mundos posibles (§. 141.), cumque *mnium ex-* intellectus ipsius infinitus sit (§. 167.), cognitio illa semper *istentia in* et in Deo datur (§. 838. *Ontol.*). Quamobrem cum Deus *Deo.* mundos istos cognoscat, quæ e ius ideam illorum in se producit (§. 51. *Psychol. empir.*); idea non modo hujus, qui existit, mundi, sed ceterorum quoque omnium possibilium in ipso continuo existit.

Idea hæc mundorum possibilium a Deo adeo separari minime potest, referenda utique inter ea, quæ Deo constanter competunt.

§. 182.

Quoniam etiam in anima idea hujus universi seu mundi *Similitudo* adspectabilis continuo existit (§. 192. *Psychol. rat.*); anima quo- *anima in* ad *inexistentiam ideæ mundi hujus adspectabilis cum Deo simi-* Deo. *itudinem quandam habet* (§. 195. *Ontol.*).

Dico animam habere similitudinem quandam, ne quis existimet admitti perfectam, ac inde inferat non inferenda, similitudine ultra suum tertium extense. Quodnam vero sit similitudinis tertium, distincte satis expressimus, nimirum continua ideæ hujus mundi inexistencia. Datur vero in Deo quid amplius: etenim præter ideam hujus mundi, in eo etiam dantur ideæ ceterorum possibilium omnium (§. 181.), ac præterea ideæ hujus mundi in Deo plurimum differt ab
idea

idea ejusdem in anima nostra: quod ut intelligatur, sequentem addimus propositionem.

§. 183.

Diffimilitudo in ista similitudine.

Idea mundi in anima nostra mutabilis; in Deo prorsus immutabilis. Etenim cum Deus omnia distincte sibi representet atque simul (§. 164.); integrum quoque mundum quoad omnes ipsius status idea, quæ ipsi inexister, exhibet a se invicem discretos simul. Fieri adeo nequit, ut quicquam in idea ista mutetur. Enimvero idea universi eadem easdem in anima nostra subit mutationes, quas mundus adspectabilis subit (§. 192. *Psychol. rat.*). Continuo igitur mutabilis est.

Patet itaque differentiam inter ideam mundi in Deo & ideam ejusdem in nobis esse tantam, quantam requirit differentia inter ens infinitum reale ac finitum (§. 837. 838. *Ontol.*). Tanta igitur est similitudo inter animam atque Deum, quanta salva differentia inter ens finitum ac infinitum subsistere potest, nec amplius quid ad eam requiritur.

§. 184.

Eadem porro expenditur.

Intuitus ideæ universi in Deo illimitatus est, in anima humana valde limitatus. Etenim Deus omnia, quæ in idea universi continentur, distincte sibi representat (§. 156), adeoque multo magis clare (§. 38. 39 *Psychol. empir.*). Totam igitur ideam universi simul intuetur (§. 193. *Psychol. rat.*), consequenter intuitus iste nullos prorsus habet limites (§. 468. *Ontol.*), seu illimitatus est.

Enimvero anima integram ideam universi simul intueri nequit (§. 194. *Psychol. rat.*). Insunt adeo eidem, quæ clare non percipit (§. 193. *Psych. rat.*), consequenter intuitus limitatus est (§. 468. *Ontol.*).

Repetenda hic sunt, quæ ad propositionem præcedentem modo annotavimus. Non vero sine ratione expendimus similitudinem, quæ inter Deum atque animam intercedit: etenim

enim sic animæ atque Dei cognitio mutuam sibi lucem affundunt, ut natura animæ facilius intelligatur, intellectus divini notio a difficultate liberetur, qua ultra id, quod possibile, extendi videtur, ac differentia tandem inter ens finitum & infinitum intimius perspiciatur. Nullus sane dubito fore plurimos, qui cum lecturi sint, quæ de animæ natura tradidimus (§. 182. & seqq. *Psybol. rat.*), eadem nugis accensere non verebuntur. Ubi vero perpendent animam in eo similem esse Deo, quatenus admittit differentia entis finiti ac infiniti; in iis admittendis jam faciliores evadent. Ac ubi intelligent, Deum non posse concipi tanquam autorem universi, qui quod sit in dubium vocari minime potest, nisi admittatur distincta & simultanea omnium mundorum possibilium representatio, seu ideæ mundorum omnium continua inexistencia & illimitatus ejusdem intuitus, incomprehensibilitas utriusque tanto minus offendet, quanto nobis certius est, simile quid in ipsa anima obtinere, quantum quidem permittit differentia inter ens finitum ac infinitum. Dum vero hæc differentia expenditur, utique realitas notionis entis infiniti, quam in Ontologia dedimus, ex demonstrationibus pernotescitur, atque differentia ipsa ob speciales determinaciones, quæ hic occurrunt, intimius perspicitur. Suademus itaque singulis, quibus intimior sui atque Dei cognitio voluptati est, ut ad similitudinem Dei cum anima & dissimilitudinem in hac similitudine ob differentiam entis finiti ac infiniti rite ac sufficienter expendendam omnem afferant attentionem, qua uti ipsis datur.

§. 185.

Deus nunquam dormit, sed semper vigilat. Etenim Deus continuo non modo hunc mundum possibilem, sed & ceteros omnes sibi repræsentat (§. 181.) & quidem prorsus distincte, nihil confuse (§. 156), nedum adeo obscure (§. 32. 38 *Psych. empir.*) Est igitur continuo in statu perceptionum distinctarum (§. 45 *Psych. empir.*), nunquam vero in statu obscurarum (§. 47. *Psych. empir.*), & per ipsam notionem mundi intelligitur, quod perceptione fiat ordinatæ (§. 48 *Cosmol.* & §. 249 *Psych. rat.*). Deus igitur nunquam

*Cur Deus
nunquam
dormiat,
sed semper
vigilet.*

(*Wolfii Theol. Naturalis*)

X

dor-

dormit, sed semper vigilat (§. 14. 15. *Psychol. rational.*).

Propositio hæc suum habet usum in philosophia practica, ubi de officiis hominis erga Deum agitur, quatenus ea influunt in cetera erga seipsum atque alios. Erunt forsan, qui sibi persuadent, propositionem hanc clarius patere ex eo, quod Deus non habeat corpus, sibi persuadentes somnum a corpore pendere. Enimvero hi non advertunt, somnum non minus statum quendam animæ esse, quam corporis, & quatenus in anima consideratur, per se non repugnare naturæ entis vi repræsentativa universi præditi. Quod enim Deo repugnet, infinitudini ejus tribuendum. Equidem non nego ex eo, quod homo habeat corpus, rationem reddi posse, cur animæ quoque status quidam peculiaris convenire debeat, quem ejus respectu somnum dicimus, nec inficior ex eo, quod Deus corpus nullum habere possit, demonstrari posse, quod status istiusmodi, qualem in anima somnum dicimus, ei convenire nequeat; sed nego demonstrationem esse facilem, nego vim consecutionis in hac argumentatione, Deus non habet corpus: ergo non dormit, adeoque semper vigilat, esse adeo manifestam, ut citra ulteriorem evolutionem admitti possit. Patebit vero tentanti, ex eo quod Deus corpus non habeat, deducendum esse ante omnia, quod semper esse debeat in statu perceptionum distinctarum, & ex eo, quod homo habeat corpus, animam subinde incidere debere in statum perceptionum obscurarum, quam probari possit, Deum non dormire, sed semper vigilare. Per ambages adeo stabiliretur principium, quod ex antecedentibus sumi potest. Taceo scrupulosioribus subnaturam difficultatem, non adeo facile elidendam, num circulus in demonstrando evitari hæc ratione possit. Nos enim ex distincta rerum perceptione probavimus, Deo non competere corpus (§. 158.): hoc vero aliunde probandum erat, siquidem ex carentia corporis continuum statum perceptionum distinctarum deducere voluerimus. Talia subinde moneri, consultum est ad præcavendam præcipitantiam in judicando, & ne evidentia, quam mentiuntur confusæ notiones argumentationibus per saltum convenientes, nimium credamus.

§. 186.

Quoniam in homine somnus & vigilia alternant, ac di- *Differen-*
 versi animæ status pro iisdem conveniunt (§. 14. 15. *Psychol. rat.*); Anima in eo quoad ideam universi & ejus intuitum a *tia in eo ab*
 Deo differt, quod is semper vigilet, nunquam dormiat. *anima no-*
stra.

§. 187.

Deus sui semper conscius est atque eorum, quæ sibi repræ- *Apperce-*
 sentat. Pone enim Deum subinde sibi non esse conscius sui, *prio in Deo*
 nec eorum, quæ in ipso repræsentantur. Dormire igitur di- *citur conti-*
 cendus est (§. 119. *Psychol. empir.*). Enimvero Deus nun- *qua.*
 quam dormit (§. 185.). Ergo admittendum est, quod sui at-
 que eorum, quæ sibi repræsentat, semper sit conscius.

Idem etiam directe ostenditur. Deus semper vigilet (§.
 185.). Semper igitur est in statu perceptionum distinctarum
 (§. 14 *Psychol. rat.*), consequenter sui ipsius & eorum, quæ
 sibi repræsentat, conscius est (§. 13. *Psych. rat.*).

Apperceptionis continuitas in Deo ad differentiam ani-
 mæ humanæ atque Dei spectat, in hac enim non continua est,
 sed interrupta. Obiter observamus vigiliæ atque somnium
 quoad animam esse statum apperceptionis; at somnium,
 apoplexiam & deliquium animi statum apperceptionis defi-
 cientis.

§. 188.

Ideæ rerum Deo essentielles sunt. Etenim intellectus di- *Ideæ re-*
 vinus actus est, non nuda facultas (§. 163.), ut adeo sine a *rum Deo*
 ctuali repræsentatione possibilem concipi non possit (§. 164.) *essenciales.*
 Quamobrem cum istæ possibilem repræsentationes sint ideæ
 rerum (§. 48. *Psychol. empir.*); patet ideæ rerum Deo constan-
 ter inesse, nec aliud quid supponendum esse tanquam in Deo
 existens, cur insint, consequenter per alia, quæ simul insunt,
 minime determinari (§. 113. *Ontol.*). Igitur Deo essentielles sunt
 (§. 152 *Ontol.*).

Nimirum Deum non licet concipere sine intellectu, consequenter sine ideis rerum, quemadmodum triangulum concipi nequit sine numero ternario laterum, vel circulus sine æquali distantia singulorum punctorum in peripheria a centro. Tolle enim ideas rerum; evidens est ipsum tolli intellectum (§. 164.), consequenter ens a se, quod concipis, non amplius erit Deus.

§. 189.

*Idearum
necessitas.*

Ideæ rerum necessariae sunt. Exenim ideæ rerum Deo essentielles sunt (§. 188.), consequenter sine iis Deus esse non potest (§. 144. *Ontol.*). Et quia Deus omnia possibilis cognoscit (§. 155.), fieri non potest, ut alæ rerum ideæ in eo insint: quod si enim ponas inesse alias posse, quæ non insunt; Deus non cognosceret omnia, quod est contra demonstrata. Si quæ igitur ipsis oppositæ finguntur ideæ, impossibiles sunt. Quomobrem ideæ rerum, quæ Deo insunt, necessariae sunt (§. 279. *Ontol.*).

Probe notanda est hæc idearum in intellectu divino necessitas: ardua enim hinc pendent, quemadmodum ex sequentibus intelligitur. Tanto autem magis notanda est, quod non omnes eam agnoscant præjudicio quodam præpediti posthac suo loco notando.

§. 190.

*Immutabi-
litas idea-
rum.*

Ideæ rerum immutabiles sunt. Sunt enim necessariae (§. 189.). Quod vero necessarium est, idem immutabile est (§. 292. *Ontol.*). Ideæ adeo rerum immutabiles sunt.

Quæ de idearum divinarum necessitate modo annotavimus, ea quoque de immutabilitate tenenda. Patebit autem suo loco, etsi necessitas cum immutabilitate subinde ab iis confundatur, qui non sufficiente utuntur acumine, ad evitandas tamen & removendas difficultates, quæ contra Theologiam naturalem moventur, opus esse, ut hunc ad necessitatem, nunc ad immutabilitatem animum advertas.

§. 191.

§. 191.

Ideæ rerum non sunt arbitrarie, seu non sunt tales, quod Arbitrarie Deus eas voluit esse tales. Pone enim ideas rerum esse arbitrarie. Sane igitur tales, quia Deus eas esse voluit tales & *ideæ reje-* insunt intellectui divino, quia Deus eas inesse vult, consequenter non repugnat, cum voluntas Dei possibile quid efficere posse supponatur, ut aliz inessent intellectui divino *ideæ*, quam quæ insunt. Quoniam itaque in intellectu non insunt omnia simul, quæ per eum possible sunt; intellectus divinus non est infinitus (§. 838 *Ontol.*), adeoque nec illimitatus (§. 173.): quod cum sit absurdum, ideas rerum non esse arbitrarie satendum.

Idem etiam per modum corollarii ex propositione precedente inferitur. *Ideæ rerum immutabiles sunt (§. 190.).* Non igitur sunt tales, quia Deus eas esse voluit tales. Si enim ponas, eas tales esse, quia Deus eas tales esse voluit, admittendum est, non repugnare ut non sint tales. Erunt igitur mutabiles (§. 290. *Ontol.*): quod absurdum (§. 190.). Quoniam adeo *ideæ rerum non sunt tales*, quia Deus eas tales esse voluit, arbitrarie non sunt.

Idem etiam sic ostenditur. Nemo non concedit, ea, quorum *ideæ* in intellectu divino dantur, esse possible. Sed hæc a contradictione libera sunt (§. 85. *Ontol.*). Quod si ergo *ideæ rerum tales sunt*, quia Deus eas tales esse voluit; ea, quæ insunt *ideis rerum*, sibi mutuo non repugnant, vel quia Deus voluit, ne sibi mutuo repugnent, repugnatura utique, si voluisset Deus, vel quia Deus non potuit velle, quæ sibi mutuo repugnant. Si ponas posterius, admittendum est, quædam esse possible, antequam Deus ea velit, consequenter ut velle possit, eadem ipsi cognita esse. Admittendæ igitur sunt *ideæ possible in Deo*, antequam in eodem dantur, quod absurdum

dum, vel antequam vult, ut insint, consequenter non sunt tales, quia Deus esse vult tales, quod hypothese idearum arbitrariorum repugnat. Si sumas prius, nimirum a voluntate Dei esse, ut quædam sibi mutuo non repugnent, repugnatura sibi invicem, si quidem Deo aliter visum fuisset; in se spectata eadem & repugnare sibi invicem, & non repugnare possunt, consequenter possibile est, ut idem simul sit & non sit: quod esse absurdum, nemo non fateri cogitur, nisi insanire velit. Patet itaque ideas rerum esse debere in intellectu ipsius antequam supponi possit, Deum velle ut insint, atque adeo per naturam intellectus divini esse tales, nec demum tales fieri voluntate Numinis.

Prolixius adstruximus impossibilitatem idearum arbitrariorum, cum utique suffecisset ex illarum necessitate & immutabilitate per modum corollarii inferri, quod arbitrarie non sint. Etenim postquam *Cartesius* hypothese idearum arbitrariorum in philosophiam superiori seculo introduxit & *Petrus Poiret* in Cogitationibus rationalibus de Deo, homine & malo lib. 3. c. 10. acriter defendit, cum in Scholis Theologorum ac Philosophorum ideæ necessariae propugnarentur; haud paucos hodie illa nacta est sectatores. *Cartesius* in Responsionibus sextis adversus *Merjennum* §. 6. & 8. contendit, Deum indifferenter fuisse non tantum ad omnes res extra se, sed & ad omnium rerum ideas, adeo ut nullum bonum, nullum verum, nihil quod credendum, faciendum vel omittendum sit, fingi possit, cujus idea in intellectu divino prius fuerit, quam ejus voluntas se determinavit ad efficiendum, ut id tale esset. Ratio, quæ multis evidens & prægnans videtur, hæc est, quod durum sit statuere aliquid immutabile & æternum præter Deum: quasi vero ideæ rerum, quæ in intellectu ipsius sunt & ad eundem necessario pertinent, sint quidpiam præter Deum? Etsi enim repræsentent res, quæ præter Deum existere possunt; non tamen ideo quicquam Deo coæternum existit. Et quamvis ideæ rerum sint immutabiles, non tamen inde sequitur res illas respondentes esse immutabiles, cum in ideis

immu-

immutabilibus tanquam mutabiles exhibeantur. Unde Cl. *Pungelerus*, Theologiæ & Historiæ sacrae nuper Professor in Athenæo Herbornensi, in Dissertatione de rerum possibilium ideis in Deo, quam *Poiteto* opposuit, c. 3. p. 53. *Cartesio* non inepte respondet, quæ ipse in Responsionibus Quintis num. 1. *Gassendo* eandem rationem adversus ipsum urgenti regerit: *Quod vero ais, tibi durum videri, statuere aliquid immutabile & æternum præter Deum, merito sic videretur, si de eo existente quaestio esset, vel tantum, si quid ita immutabile statuerem, ut ejus immutabilitas a Deo non penderet.* Et quævis *Poitetus* affirmet ideas necessarias conjecisse Scholasticos in errores inextricabiles; contrarium tamen suo constabit loco.

§. 192.

Ideo quid possibile est, quod ejus idea detur in intellectu Possibili-divino. Etenim quæabilia deprehendimus, nullam in solis rerum vult contradictionem (§. 85. *Ontol.*). Quamobrem cum unde. ideæ eorundem Deo sint essentielles (§. 188.), adeoque ab intellectu divino, cui inhaerent (§. 164.), inseparabiles (§. 300. *Ontol.*); eam esse patet naturam intellectus divini, quemadmodum nostræ mentis (§. 27. *Ontol.*), ut non possit judicare, idem simul esse atque non esse, adeoque in producendis rerum ideis observet principium contradictionis (§. 29. *Ontol.*). Res igitur ideo possibiles sunt, quod impossibile ut intellectus divinus contradictoria sibi repræsentet, consequenter ideo quid possibile, quod ejus idea in intellectu divino datur.

Patet adeo, quomodo omnis rerum possibilitas sit a Deo, & quod intellectus ipsius sit fons possibilitatis. Unde porro liquet, nisi daretur Deus, nec quicquam aliud ne intrinsece quidem possibile fore.

§. 193.

Quoniam intellectus divinus in formandis rerum ideis principium contradictionis tenet per demonstrata (§. 192.); principium evincendi possibilitatem rerum

pium contradictionis est principium sufficiens adstruendæ possibilitatis rei cujuscunque intrinsecæ.

Confirmat veritatem corollarii experientia: neque enim ad probandam possibilitatem utimur nisi principio contradictionis, ad quod ubi analysis perducta, pleno assensu acquiescimus. Quodsi rerum possibilitas non ab intellectu divino, sed a voluntate penderet, cum lex voluntatis non sit principium contradictionis, sed appetitio boni & aversio mali (§. 904. *Psychol. empir.*), non demonstrari poterat nisi ex lege voluntatis: analysis enim, quæ satisfacit, non datur, nisi pervenias ad principia ultima. Sed in demonstranda possibilitate non esse confugiendum ad voluntatem divinam, nemo non experitur, qui demonstrationem aggreditur.

§. 194.

*Necessitas
essentia-
rum unde.*

Necessitas essentiarum a Deo est. Essentia enim rerum in intrinseca earundem possibilitate consistit (§. 154. *Ontol.*), atque adeo necessaria est, quatenus res istiusmodi possibilis. Enimvero ideo quid possibile est, quod ejus idea detur in intellectu divino (§. 192.). Quamobrem ideo quoque essentia ejus necessaria est, quod ejus idea detur in intellectu divino, quia scilicet intellectui divino necessario inest, nec ab eo separari potest. Essentiarum itaque necessitas a Deo est.

Frustra ergo sibi a necessitate essentiarum metuunt, qui arbitrarias defendunt, quasi illa Deo adversaretur, qui solus sit ens necessarium. Etenim quando Deus dicitur solus ens necessarium, id de existentia intelligitur, non de essentia (§. 309. *Ontol.*). Quando vero essentia dicitur necessaria, id tantummodo intelligitur de possibilitate (§. 153. *Ontol.*). Quod vero necessario possibile est, id non necessario existit.

§. 195.

*Æternitas
essentia-
rum.*

Essentiæ rerum sunt æternæ, earumque æternitas a Deo est. Rerum enim essentia in earundem possibilitate intrinseca con-

consistit (§. 154. *Ontol.*). Quamobrem cum possibilia etiam in se spectata (§. 155.) repræsententur in intellectu divino (§. 164.) & quidem continuo (§. 181. 152.); essentia rerum ab æterno fuisse in intellectu divino. Quoniam itaque Deus æternus est (§. 74.); essentia quoque rerum æternæ sunt. *Quod erat unum.*

Quia vero essentia rerum æternæ sunt propterea, quod ab æterno fuisse in intellectu divino *per demonstrata*; earum æternitas a Deo utique est. *Quod erat alterum.*

Prius etiam ex ipsa essentia notione deducitur hoc modo. Essentia rerum sunt necessariae & quidem absolute tales (§. 303. *Ont.*). Quoniam itaque nullum fingi potest tempus, quo quid possibile esse cœperit, aut quo tale esse definet (§. 309. *Ontol.*); essentia rerum æternæ sunt (§. 39.).

Pater adeo, sine mente dare sonos, qui sibi metuunt, ne quid Deo cœternum læsa divinitate statuatur. Neque enim quicquam statuitur Deo cœternum, quod non sit in Deo & a Deo. Qui essentias rerum sibi imaginantur tanquam entia extra Deum existentia, quæ Deus cognoscit, quemadmodum anima res materiales extra se existentes, & a quibus in creando pendet, ac inde adversus essentiarum æternitatem tela promunt; illi cum propriis larvis decertant, quemadmodum plerumque accidit & consequentariis præsertim proprium est.

§. 195.

Idea rerum sensibilibum in Deo diversæ prorsus sunt ab Idea re-ideis sensualibus nostris. Quoniam Deus omnia, quæ præter ipsum cognita possibilia sunt, distincte cognoscit, nihil confusibile in se (§. 156.); res etiam sensibiles, hoc est, eas, quæ sensu percipi possunt (§. 77. *Psychol. empir.*), distincte cognoscit, non confuse. Ideæ igitur rerum sensibilibum in Deo prorsus distinctæ sunt, nihil vero in iisdem confusi continetur. Enimvero sensibilibum rerum ideæ sensuales, quæ in nobis dantur, confusæ
(*Wolfii Theol. Naturalis*) Y fusæ

fulæ sunt (§. 93. *Psychol. rat.*), & multiplici confusionis gradu oriuntur (§. 99. 100. *Psychol. rat.*). Sunt vero sensationes confusæ diversæ a distinctis (§. 93. 94. *Psychol. rat.*) & ideæ sensuales confusæ, dum ulterius inter se confunduntur, diversas ab iis efficiunt ideas sensuales (§. 97. *Psychol. rat.*). Ideæ igitur rerum sensibilium in Deo diversæ prorsus sunt ab ideis sensualibus nostris.

Aliter. Dum sentimus, anima sibi repræsentat substantiarum simplicium mutationes intrinsecas, sed in unum confusas (§. 98. *Psychol. rat.*). In Ideis igitur rerum sensibilium divinis eadem mutationes substantiarum simplicium contineri debent. Enimvero cum Deus, quæ præter ipsum possibilia sunt, omnia distincte cognoscat, nihil vero confuse (§. 156.); mutationes substantiarum simplicium, quæ ideis sensibilium repræsentantur, non confunduntur in unum, sed singulæ, quales sunt, a Deo agnoscuntur ac a se invicem distinguuntur (§. 38. *Psych. empir.*). Ideæ igitur rerum sensibilium in Deo diversæ prorsus sunt ab ideis sensualibus nostris.

Tanta nimirum est differentia inter ideas divinas rerum sensibilium & ideas nostras sensuales, quanta inter prorsus distincte cognitum & multiplici confusione perceptum intercedit. Ut multiplicem hanc confusionem, etsi a nobis minime effabilem propterea quod non constat, quoduplex confusio accidat, antequam a mutationibus elementorum intrinsecis ad qualitatem sensibilem, qualis a nobis percipitur, perveniatur, quodammodo intelligamus; idearum confusio ad eum modum concipienda est, quo ortum corporum ex elementis per diversas corporum derivativorum, quæ primitivorum combinatione resultant, combinationes explicavimus alibi (§. 227. & seqq. *Cosmol.*).

§. 197.

*Diversitas
idearum
coloris, soni,*

Quoniam odores, sapes, soni, colores & qualitates tales in numero sensibilium sunt (§. 77. *Psychol. empir.*); ideæ coloris,

colorum, sonorum, odorum, saporum & qualitatum tactilium, quæ odoris, sunt in Deo, prorsus diversæ sunt ab ideis earundem rerum sensu peris & sualibus, quas nos habemus. qualita-

Ab ideis igitur sensualibus nostris ad rerum sensibilibum *tacti-* in Deo ideas non valet argumentatio. Quamobrem etsi con- *lium in* tingat, ideas quasdam sensuales nobis esse molestas, veluti per- *Deo.* ceptionem factoris vel clamoris horrendi; non tamen hinc colligi potest, eandem molestiam aut ipsi similem adherere ideæ ejusdem factoris, vel ejusdem clamoris in Deo. Immo simile quid jam in nobis observare licet. Quod enim confuse perceptum molestiam creat, id distincte beneficio intellectus cognitum voluptati est. Ita factoris pessimi explicatio a priori in Physica delectat. Probe hoc notandum est, ne nobis persuadeamus, quasi abjecte de Deo sentiant, qui rerum sensibilibum nobis molestarum ideas Deo tribuunt, atque adeo earum cognitionem Deo prorsus denegemus, vel in eodem libertatem fingamus eas in intellectum suum admittendi, quando visum fuerit: quod posterius visum est *Poireto*.

§. 198.

Deus omnes ideas confusas, quales sunt animabus, intue- Quomodo *tur in ideis animarum cum diversis confusionis gradibus.* Deus vi- Cum enim Deus omnia, quæ præter ipsum cognitu possibilea *deat ideas* sunt, distincte cognoscat (§. 156); singulas quoque animas *confusas,* tam hominum, quam brutorum distincte cognoscere debet. *quæ sunt* Enimvero unaquæque anima continet seriem perceptionum ac *animabus.* appetitionum & aversionum, quæ diversa est a serie alterius cujuscunque animæ (§. 524. *Psychol. rat.*). Deus igitur singulas istas series perceptionum, quæ insunt animabus singulis, distincte cognoscit, consequenter singulas in iis contentas perceptiones a se invicem distinguit (§. 38. *Psychol. empir.*). Sunt vero perceptiones partiales in animabus humanis atque brutorum confusæ (§. 98. 754. *Psychol. rat.*). Deus igitur cognoscit confusas ideas rerum materialium, quales sunt ani-

Y 2
mabus,

mabus, quatenus habet ideas animarum. *Quod erat n-
num.*

Jam vero dum res materiales percipimus seu sentimus, anima sibi repræsentat substantiarum simplicium mutationes intrinsecas, sed in unum confusas (§. 98. *Psychol. rat.*) Quemadmodum itaque corpuscula primitiva procedunt ex elementorum seu substantiarum simplicium nexu, derivativa vero ex primitivorum & deinde ex aliorum derivativorum combinatione (§. 229. *Cosmol.*); ita ideæ corpusculorum primitivorum confunduntur in unam, ut inde prodeat idea confusa corpusculi derivativi, quemadmodum ideæ elementorum, quorum nexu resultat corpusculum primitivum, inter se confusæ exhibent ideam corpusculi primitivi, ac deinde continuo corpuscula derivativa, immo tandem corpora confunduntur, ut una prodeat idea confusa. Patet adeo diversos dari confusionis gradus. Quoniam itaque Deus distincte cognoscit perceptiones confusas, quæ insunt hominum atque brutorum animabus *per demonstrata*, &, si plures sensationes confusæ diversæ confunduntur in unam, idea sensuality, quæ inde resultat, diversa apparet ab iis, quæ confunduntur (§. 97. *Psychol. rat.*); Deus quoque ideas confusas, quæ insunt animabus hominum atque brutorum, cognoscit quoad singulos confusionis gradus. *Quod erat aliterum.*

Patet adeo, Deo non inesse ideas confusas per se, quod repugnat naturæ ipsius, utpote ab omni sensu liberæ (§. 157); sed quatenus insunt rerum aliarum, veluti animarum, ideis, quæ per se intellectui divino insunt. Hinc idearum confusarum in ideis animarum intuitus non obest intellectus divini perfectioni, cum idea ejus, quod confuse repræsentatur in idea animæ, per se distincta sit in intellectu ipsius, cujus lumine illustrata confusa in animæ idea contenta rei cujusdam materialis idea, fugit obscuritas & gradus confusionis clari fiunt.

§. 199.

Quoniam Deus non modo intuetur ideas confusas, quas *Differen-*
 les sunt in animabus hominum atque brutorum; verum etiam *tia intui-*
 distincte cognoscit diversos confusionis gradus (§. 198); ho- *tus idea-*
 mo vero idearum suarum confusarum tantummodo libi con- *rum con-*
 sciens est, quatenus confusæ sunt, haud quaquam vero perspi- *fusarum*
 cit diversos confusionis gradus, ex quibus tandem oriuntur, *in Deo &*
 quemadmodum unusquisque in se experitur; *ideæ confuse, homine.*
que animabus hominum insunt, intimius a Deo perspiciuntur,
quam ab homine, Deoque competit adequata earum cognitio,
homini non item.

Equidem non nego, non prorsus impossibile esse, ut ideæ
 confusæ beneficio rationis reducantur ad distinctas, cum in
 omni philosophia, præsertim autem, quod res materiales at-
 tinet, in Physica id unice moliamur, neque semper sine omni
 successu: nemo tamen est qui nesciat, operosam analysin ar-
 etis admodum limitibus coerceri, nunquam vero fieri per-
 fectam, cum in Deo perfecta analysis solo intuitu absolva-
 tur.

§. 200.

Idea mundi, quæ est in intellectu divino, refert singulas *Idea univ-*
 substantias simplices, seu elementa rerum materialium singula, di in Deo-
 cum omni mutationum serie, quæ in unaquaque est, ita coordi- *qualis sit.*
 nata, quomodo mutationes unius pendent a mutationibus cete-
 rarum. Corpora enim, ex quibus mundus materialis constat
 (§. 119. Cosmol.), sunt substantiarum simplicium aggregata (§.
 176. Cosmol.), nec in iis quicquam datur substantiale præter
 entia simplicia (§. 177. Cosmol.), materia vero & vis motrix sunt
 phenomena substantiata (§. 300. Cosmol.), hoc est, confuse per-
 cepta (§. 225 Cosmol.), quæ instar substantiæ apparet (§. 299.
 Cosmol.). Quamobrem cum Deus distincte omnia cognoscat,

nihil prorsus vero confuse (§. 156.); idea mundi quæ in intellectu ipsius datur, referre debet singula substantias simplices, quibus aggregatis prodit mundus materialis. Jam vero unumquodque elementum continet seriem mutationum, quæ diversa est a serie alterius cujuscunque (§. 198. *Cosm.*) & ratio coëxistentiæ eorundem, tum quatenus simul existunt, tum quatenus hoc potius modo, quam alio coëxistunt, in ipsis elementis continetur (§. 202.) ac inde patet eorundem nexus (§. 10. *Cosm.*), unde pendet nexus rerum materialium (§. 205. *Cosmol.*). Quoniam itaque Deus distincte omnia cognoscit, nihil confuse (§. 156.); omnem quoque seriem mutationum in unoquoque elemento & rationem coëxistentiæ eorundem, tum quatenus simul existunt, tum quatenus hoc potius modo, quam alio coëxistunt per determinaciones intrinsecas elementorum, eorundemque adeo nexum perspicit, consequenter quatenus ita coordinata sunt, ut mutationes unius dependeant a mutationibus alterius (§. 853 *Ontol.*).

Atque ita demum intelligitur, qualis sit idea hujus, qui existit, mundi in intellectu divino. Simul vero intelligitur, qualis sit idea corporis uniuscujuscunque: sunt enim hæc perinde substantiarum simplicium aggregata, quam totum hoc universum. Quæ autem de idea hujus mundi dicta sunt, ea etiam intelligenda sunt de idea mundi cujuscunque alterius possibilis & de idea corporis cujuslibet ad eundem pertinentis.

§. 201.

*Quomodo
idea mundi
a Deo
produca-
tur.*

Idea integra mundi unico actu producitur; seu possibilia vi intellectus divini statim repræsentantur tanquam in systemata redacta. Intellectus enim divinus infinitus est (§. 167.), consequenter quicquid per eundem fieri potest, id simul fieri debet (§. 838. *Ontol.*). Quamobrem cum Deus omnia possibilia tam absolute spectata, quam in systemata redacta cognoscatur

scat (§. 155.), palam vero sit possibile quoque cognosci absolute spectata, ubi in ideis tanquam in systemata redacta exhibentur; necesse omnino est, ut idea mundi integra simul producat, seu possibile vi intellectus divini statim tanquam in systemata redacta represententur.

Quod si mavis, idem indirecte hoc modo ostendere poteris. Ponamus Deum sibi primum possibile singula representare, quatenus absolute spectantur, deinde singula componere singulis, ut appareat, quomodo mutationes in uno contingentes pendeant a mutationibus aliorum, atque ita tandem dependentiæ huic convenienter ideas partiales in ordinem redigere, ut prodeat idea totius alicujus mundi, quæ exhibet certum possibile numerum tanquam in systema quoddam redactorum. Facile patet, eodem modo formari ideas mundorum ceterorum possibile, nec formari posse unam, nisi post alteram. Non igitur omnia Deo insunt simul, quæ vi intellectus ipsius fieri posse concipiuntur. Quamobrem intellectus Dei infinitus non est (§. 838. *Ontol.*), quod utique, absurdum (§. 167.).

Esti autem ideas mundorum omnium possibile in Deo unico actu vi intellectus divini producantur; nil tamen obstat, quo minus fingamus, quasi Deus possibile singulorum ideas nullo ordine digestas primum produxisset, easque deinde omni possibili modo combinasset, ut facilius intelligatur, quomodo ideæ mundorum plurium possibile prodierint. Fisiones enim si fiant eo fine, ut imaginatio juvet intellectum imbecillum in re quadam concipienda, veritati nullum creant præiudicium, modo fictionem non amplectamur tanquam veritatem. Loquimur de Deo humano more; sed ea deinde naturæ ipsius convenienter interpretamur. Nimirum ideæ mundorum possibile, quæ dantur in intellectu divino, simul & constanter in ipso insunt; tales tamen deprehenduntur, quales prodirent, si possibile absolute spectata omni possibili modo inter se combinarentur. Omnes enim

enim mundi possibiles simul sumti continent omnia possibilia modo omni possibili inter se connexa.

§. 202.

*Mundi
sensibilis
& intelli-
gibilis de-
finitio.*

Mundum sensibilem appello hoc, quod existit, universum sub ea forma spectatum, qua in sensus incurrit, aut, si mavis, mundus sensibilis dicitur hic mundus, qualis nobis apparet. Ex adverso vero *Mundum intelligibilem* dico idem hoc universum sub ea forma spectatum, qua distincte vi intellectus representatum deprehenditur, aut, si mavis, mundus intelligibilis est hic mundus, qualis revera est.

Differentia utriusque est manifesta per principia cosmologica, modo animum ad ea advertere velis. Quoniam tamen magni momenti est in Theologia naturali nosse illam differentiam; ideo consultum judico ut hic exponatur.

§. 203.

*Differen-
tia.*

Mundus intelligibilis est aggregatum substantiarum simplicium certo ordine coëxistentium & certa lege mutuas ad se invicem relationes mutantium: Mundus vero sensibilis est complexus phaenomenorum ex simplicibus tanquam fonte promanantium & in duo substantiata resolvablem. Etenim mundus hic adspectabilis componitur ex corporibus tanquam partibus (§. 119. *Cosmol.*). Corpora vero sunt substantiarum simplicium aggregata (§. 176. *Cosmol.*), nec in ipsis quicquam datur substantiale præter entia simplicia (§. 177. *Cosmol.*). Totus igitur mundus adspectabilis substantiarum simplicium quoddam aggregatum est. Hæc rerum elementa inter se connexa sunt (§. 204. *Cosmol.*), ita ut mutationum omnium, quæ in uno elemento contingunt, ratio reddi possit ex mutationibus, quæ in altero contingunt (§. 209. *Cosmol.*). Modus adeo, quo determinatur coëxistentia uniuscujusque elementi, eandem admittit rationem (§. 56. *Ontol.*), consequenter in eodem li-
mili-

militudo quædam obvia est (§. 195. *Ontol.*). Quasmodum substantiæ simplices, quæ hunc mundum constituunt, certo ordine coëxistunt. Enimvero mutationes elementorum omnium inter se connexæ sunt (§. 210. *Cosmol.*) & status quilibet elementi relationem involvit ad cetera elementa coëxistentia (§. 206. *Cosmol.*). Mutantur igitur relationes mutuas ad se invicem certa lege (§. 10. *Cosmol.*). Jam mundus intelligibilis dicitur, quatenus spectatur, quali revera est (§. 202.). Paret itaque, mundum intelligibilem esse aggregatum substantiarum simplicium certo ordine coëxistentium & certa legemutuas ad se invicem relationes mutantium. *Quod erat unum.*

Dum sentimus, anima sibi repræsentat substantiarum simplicium mutationes intrinsecas, sed in unum confusas (§. 98. *Psychol. rat.*), immo cum sensu ne quidem armato corpuscula derivativa, nedum primitiva distinguamus (§. 99. 100. *Psych. rat.*), confuse percipienda denuo & quidem multiplici modo confundimus. Quoniam itaque phænomenon est, quicquid sensui obvium confuse percipitur (§. 225. *Cosmol.*); quicquid hujus universi percipitur a nobis in phænomenorum numero est. Continentur vero rationes ultimæ eorum, quæ in rebus materialibus deprehenduntur, in elementis seu substantiis simplicibus (§. 191. *Cosmol.*). Sunt igitur substantiæ simplices phænomenorum istorum fontes. Constat porro phænomenorum specialium rationem, quæ corpora observabilia exhibent, in qualitatibus corpusculorum derivativorum, adeoque talium, quæ ex aliis se minoribus componuntur (§. 229. *Cosmol.*), & modo, quo ea inter se junguntur, querendam esse (§. 235. *Cosmol.*), consequenter in eo terminari, quod confuse percipitur, ac ideo in phænomeno (§. 225. *Cosmol.*). Jam nemo non novit, notionem corporis, qualis sensu duce abstrahitur, in genere non comprehendere nisi materiam & vim motricem, consequenter phænomenorum rationes ad materiam & vim motri-

cem tandem redire Sunt vero materia & vis motrix phaenomena substantiata (§. 300. *Cosmol.*). Quicquid igitur huius mundi percipimus, in phaenomena substantiata resolvitur. Atque hoc modo patet, mundum, quatenus a nobis sensu percipitur, adeoque sensibilem (§. 202.), esse complexum phaenomenorum ex simplicibus tanquam fonte promanantium & in duo substantiata resolubilem. *Quod erat alterum.*

Mundi intelligibilis atque sensibilis differentiam qui capere nequit, cum omittat, Cum enim propositiones singulae a se invicem sint discretæ & ex citationibus appareant, quæ a se invicem pendeant; certitudo propositionum ceterarum hinc minime labefactatur, si vel maxime quis mundum intelligibilem pro figmento habeat & in sensibili unice acquiescat. Qui vero acumine utuntur, quo ad mundum intelligibilem a sensibili discernendum opus est; illis volupe erit ea intimius perspicere, quæ confuse percepta non satisfaciunt animo sciendi cupido. Necessè vero est, ut acumine isto potituri in Cosmologia & Ontologia suam non patiantur desiderari industriam & attentionem.

§. 204.

Mundi intelligibilis & sensibilis diverſitas. *Mundus intelligibilis diverſus eſt a mundo ſenſibili.* Mundus enim intelligibilis eſt aggregatum ex ſubſtantiis ſimplicibus certo ordine coëxiſtentibus & certa lege relationes mutuas ad ſe invicem mutantibus, eſt ſenſibilis complexus phaenomenorum ex ſimplicibus ſubſtantiis tanquam fonte promanantium & in duo phaenomena ſubſtantiata reſolubilem (§. 203.). Enimvero nemo non admittit, phaenomena non eſſe eadem cum eorundem rationibus, ſecus enim has ſcrutari non opus haberemus (§. 183. *Ontol.*): id quod tamen in Phyiſicis fieri ſolet. Mundus ergo intelligibilis diverſus eſt a mundo ſenſibili.

Unde errat, qui mundum ſenſibilem cum intelligibili confundit, quemadmodum ſcholasticis recte tribuitur error a

Cartesio, qui colores esse reales contendunt, sibi simile quid in objecto imaginantes, quale exhibet idea coloris confusa. Qui norunt differentiam, quæ inter qualitates sensibiles, quatenus tanquam phænomena spectantur, & earundem explanationem intelligibilem, qualem dare solent Physici moderni, intercedit; iidem facile capient differentiam inter mundum sensibilem & intelligibilem, neque enim alia re opus habent, quam ut perpendant, nos non minus confusas habere notiones materiæ ac vis motricis, quam qualitatum sensibilibum, & quam confusæ sistunt imaginem materiæ ac vis motricis aliud quid esse, quam quod per istas imagines apparet, quemadmodum, quæ confusa gignunt perceptionem qualitatum sensibilibum, diversum quid sunt ab eo, quod per imaginem istam apparet, nimirum figuræ, moles atque motus (§. 94. *Psychol. ration.*).

§. 205.

Idea mundi in Deo prorsus diversa est ab idea mundi in *Idea divi-*
animabus nostris. Etenim idea mundi, qualis est in intellectu *na mundi*
 divino, refert singulas substantias simplices cum omni muta- *a nostra di-*
 tionum serie, quæ in unaquaque datur, ita coordinatas, quo- *versitas.*
 modo mutationes unius pendent a mutationibus ceterarum (§. 200.). Existit igitur in Deo idea mundi intelligibilis (§. 202.). Enimvero elementa rerum materialium seu substantias simplices (§. 182. *Cosmol.*) anima nostra ne sensu quidem armato distinguit & hunc mundum nobis non representare valemus nisi convenienter quibusdam mutationibus, quæ in organis sensoriiis contingunt (§. 66. *Psych. empir.*), consequenter eum non nisi sensu percipimus (§. 67. *Psych. empir.*). Mundus adeo, qualem nos percipimus, phænomenorum ex simplicibus tanquam fonte resultantium (§. 98. *Psychol. rat.*), quidam complexus est (§. 225. *Cosmol.*), consequenter non existit in nobis idea nisi mundi sensibilis (§. 202.). Atat mundus intelligibilis diversus est a mundo sensibili (§. 204.). Quare idea divina mundi diversa est ab idea mundi, quam nos habemus.

§. 206.

*Quomodo Deus omnes ideas mundi sensibilis possibiles in animabus
Deus ideas hominum intuetur, easque intimius perspicit, quam homines,
mundi sen- ac adequatam earundem habet cognitionem. Etenim anima
sibilis co- hominis continuo producit ideam totius universi (§. 190.
gnoscat. Psychol. rat.), convenienter mutationibus, quæ in organo sen-
sorio contingunt (§. 62. Psychol. rat.) & quidem per essenti-
am suam (§. 66. Psychol. rat.), ut adeo aliam producere non
possit (§. 300 Ontol.). Quoniam vero sensu percipimus, quod
ita nobis representamus (§. 67. Psychol. empir.); idea mun-
di, quam producit, sensualis est (§. 95. Psychol. empir.). Enim-
vero Deus ideas confusas, quæ animabus hominum insunt, in-
tuetur in ideis animarum cum diversis confusionis gradibus (§.
198.), easdemque intimius perspicit, quam homines & adæqua-
tam earundem habet cognitionem (§. 199.). Quamobrem
cum hæ sint ideæ partiales, ex quibus idea mundi componitur
(§ 40. Psychol. empir.); Deus quoque omnes ideas mundi sen-
sibilis intuetur in animabus hominum, easdemque intimius
perspicit, quam homines, & adæquatam earundem habet co-
gnitionem.*

Poterat propositio præsens eodem prorsus modo demon-
strari, quo superius evicimus Deum cognoscere ideas rerum
sensibilium, quales nobis sunt, in animabus hominum, quate-
nus scilicet harum habet ideas (§. 198.), hasque intimius per-
spicere, quam homines (§. 199.). Si enim ita visum fuerit,
demonstrationes superiores nonnisi ad propositionem præ-
sentem applicandæ veniunt: quod ubi feceris, distincte intel-
liges, attenta differentia inter ideam mundi intelligibilis & id-
eam sensibilis (§. 202.), quomodo diversis confusionis gradi-
bus idea mundi intelligibilis in ideam sensibilis vertatur,
quemadmodum ex adverso diversis evolutionis gradibus seu
confusorum extricatione idea sensibilis mundi degenerare
concepitur in ideam mundi intelligibilis. Hæ vero medita-

tiones

riones non censendæ sunt inutiles, cum sic intimius perspi-
ciatur differentia inter intellectum infinitum atque finitum,
hoc est, divinum atque humanum, & quanto intervillo a per-
fecta naturæ cognitione simus remoti, clarissime innotescat.

§. 207.

Deus omnia intuitive cognoscit. Deus enim omnia co- *Cognitio*
gnoscit simul (§. 160.) atque prorsus distincte (§. 156.), co- *Dei qualis*
rundemque sibi adeo conscius est (§. 11. *Psychol. rat.*). *Quam- sit.*
obrem cum rem intuitive cognoscamus, quatenus idea ejus,
quam habemus, nobis conscius sumus (§. 286. *Psychol. empir.*);
patet Deum omnia intuitive cognoscere.

Hoc ipso cognitio divina differt a cognitione humana:
nos enim paucissima intuitive cognoscere nemo est qui ne-
sciat.

§. 208.

Deus juxta Scripturam sacram totum sibi representavit Distincta
mundum ab æterno & quidem omnia, quæ in eo sunt, distincte mundi re-
nihil vero confuse. Deo enim omnia opera sua nota fuisse per- *presenta-*
hibentur ab omni ævo. Act. XV. 18. seu, vertente *Castalione,* *rio i nin-*
ab omni æternitate. Sunt vero opera Dei cælum atque terra, *tellectu di-*
Psalm. CII. 26. hoc est, totus, quem contipicimus, mundus *vino S. S.*
adspectabilis vi eorum, quæ supra dicta sunt (§. 68.), quem *conveni-*
Deus creavit, cum nihil adhuc præter ipsum existeret *Gen. I. i. ens.*
Deus adeo totum hunc mundum adspectabilem seu univer-
sam rerum præter ipsum existentium seriem (§. 55. *Cosmol.*)
sibi representavit ab omni æternitate.

Enimvero nulla creatura dicitur invisibilis in conspectu
ejus, sed omnia nuda & aperta esse perhibentur oculis ejus
Hebr. IV. 13. Esi versio vulgata, quam hic & alibi citamus,
sensum textus Græci bene exprimat, verborum tamen Græco-
rum proprietas *ὅτι ἡ ὁρατὴ ἀφανὴς ἐν ὁπτιῶν αὐτοῦ*, h. e. non est

creatura obscura coram ipso, propositioni præsenti probandæ magis conducere videtur. Insinuat enim differentiam, quæ inter rerum perceptiones, quales nobis sunt, & rerum in intellectu divino representationes intercedit. Dum nos sentimus, adeoque objectum aliquod sensibile in hoc mundo adspectabili nobis repræsentalamus (§. 62. *Psychol. rat.* & §. 67. *Psychol. empir.*), substantiarum simplicium mutationes intrinsecas, sed in unum confusas nobis repræsentalamus (§. 98. *Psychol. rat.*). Enimvero cum ne sensu quidem armato corpuscula derivativa, quæ ex primitivis vel aliis simplicioribus oriuntur (§. 229. *Cosmol.*), distinguamus (§. 99. *Psychol. rat.*), nedum primitiva, quæ ex elementis seu substantiis simplicibus (§. 182. *Cosm.*) ortum trahunt (§. 229. *Cosmol.*), a se invicem discernamus (§. 100. *Psychol. rat.*), multo minus elementa ipsa a se invicem separemus (§. 101. *Psychol. rat.*); ideis nostris non modo plurima insunt confusa (§. 39. *Psychol. empir.*), verum etiam prorsus obscura (§. 32. *Psychol. empir.*), ut adeo rebus perceptis plura insint, quorum nobis non sumus conscii, seu quæ non appercipimus, quam quæ appercipimus (§. 25. *Psychol. empir.*). Quodsi vero objectum quodcunque consideres tanquam in conspectu Dei, seu coram ipso idem consideres, hoc est, ad Deum referas; nihil in eo deprehendes, cujus Deus non sit sibi conscius, atque adeo nullum prorsus objectum in hoc mundo adspectabili datur, quod ipsi obscurum dici possit. Patet adeo juxta Scripturam Deum singula, quæ rebus creatis insunt, clarissime sibi repræsentalare (§. 31. *Psychol. empir.*), atque adeo distincte (§. 41. *Psychol. empir.*). Quoniam itaque Deus totum hunc mundum adspectabilem creavit per demonstrata, ut nullum in eo existat ens, quod non sit in creaturarum numero; nihil omnino juxta Scripturam sacram datur in hoc mundo adspectabili, quod non distincte cognoscat Deus, nec

quicquam

quicquam nominari potest, quod confuse tantummodo sibi repræsentet.

Quo minus quid videamus, ad quod nostra sese potentia visiva seu facultas videndi extendit, impedimenta duo sunt. Primum in eo situm est, quod opacum quoddam inter oculum & visibile interponitur, impediens, ne radii a visibili in oculum illabi possint, adeoque idem oculo regens. Alterum impedimentum est a situ supino visibilis, in quo impossibile ut radii per lineam rectam propagati ad oculum deferantur, quod cum eodem in eadem recta non constituitur. Utrumque impedimentum a Deo removet Scriptura sacra. Quando enim omnia nuda dicantur oculis ejus *loc. cit.* primum a Deo removetur visionis seu objecta mundi hujus adspectabilis sibi repræsentandi impedimentum, quod scilicet nihil rectum sit ipsi, quemadmodum supra ex distincta rerum cognitione demonstravimus (§. 180.). Nudum enim dicitur, quod nullo velamine rectum. Quamobrem cum omnia, quæ sunt in hoc universo, nuda dicantur oculis Dei; hoc ipso indigitatur fieri non posse, ut objectum unum perceptibile obftet, quo minus percipiatur alterum. Alterum vero a Deo removetur videnti impedimentum, dum Apostolus affirmat omnia oculis Dei esse aperta *loc. cit.* Etenim in textu Græco dicuntur omnia *παραχρησμένα ταῖς ὀφθαλμοῖς αὐτοῦ*, quod *Castalio* verborum proprietati inhzrens ita vertit: omnia resupina sunt ejus oculis. Nimirum nobis tantummodo objectum unam sui obvertit partem, alteram ab eadem avertit, adeoque in conspectum nostrum non prodit, nisi resupinetur. Deus vero undiquaque conuertitur objectum visibile, ut pars nulla dici possit ab oculis ejus averfa. Quoniam igitur id valet de omni objecto, quod in mundo hoc adspectabiliprehenditur; hoc ipso ostenditur, nullum esse Deo obstaculum, quemadmodum nobis, quo minus quidpiam sibi repræsentare clare possit.

Quo

Quo sensu Deo tribuantur oculi, quibus tamen cum carere supra demonstratum est (§. 157.), jam indicavimus supra (not. §. 91.) & rationem dedimus generalem interpretationis (§. 103.), ut adeo ad dictum Apostoli intelligendum sufficiant, quæ ibi dicta sunt. Enimvero cum omnem sensus amplitudinem comprehendere non liceat, nisi adhuc alia de Deo fuerint demonstrata, consultius judico significatus illos generales, quibus Deo in Scriptura sacra tribuuntur membra corporis humani, quibus tamen caret, eo loco explicari, ubi per demonstrata prorsus intelliguntur. Ceterum abunde probatum esse existimo, distinctam istiusmodi mundi totius in intellectu divino ab omni æternitate representationem, qualem in anterioribus stabilivimus, Scripturæ sacræ conformem esse.

Nullius rei

§. 209.

cognitio

nem juxta

S. S. De-

um dede-

vere.

Juxta Scripturam sacram nihil iudicari debet adeo abjectum, ut ideo cognitioni Dei subducatur. Christus Matth. X. 30. affirmat, omnes capillos capitis nostri a Deo esse numeratos. Nemo non novit, vix allegari posse rei cujusdam notitiam, quæ nobis adeo abjecta & merito contemnenda videatur, quam quæ est numeri capillorum. Unde nec videas eos, qui subtilitates phycas scrutantur non sine aliorum censura, de numero tamen capillorum unquam fuisse sollicitos, propterea quod adeo sterilis judicetur, ut nullam inde utilitatem promittere nobis posse videamur. Cum igitur Deus dicitur numerare capillos, quibus oblecta sunt capita hominum, adeoque distincta numeri eorundem eidem tribuitur notitia; hoc ipso insinuari palam est, nihil a nobis iudicari debere adeo abjectum, ut ejus cognitionem Deum dedecere arbitremur.

Non nego, Christum potissimum docere velle, quanta sit providentia divina quoad homines, cum curam gerat etiam singulorum capillorum, quos ne homines quidem ipsi curant. Enimvero quoniam cura, quam Deus gerit, singulorum capillorum capitis nostri, supponit notitiam numeri eo-

rum,

rundem; verba Christi ad probandam propositionis præsentis veritatem recte adducuntur. Et ubi ad scopum ab ipso Christo intentum animum advertimus, ratio simul intelligitur, cur nihil censeri debeat adeo abjectum, ut idem propterea cognitioni ipsius subducamus. Nimirum nos notitiam numeri capillorum fastidimus, propterea quod nullius usus nobis esse videtur, & capillum unum pro re vili atque abjecta habemus, propterea quod parum referre arbitramur, utrum capillus aliquis capiti infideat, an ab eodem avellatur. Christus vero docet, quæ nobis inutilis est notitia, eam Deo non esse inutilem, & quod nobis adeo vile judicatur, ut ejus curam superfluam judicemus, id Deum cura sua non indignum reputare. Arcetur adeo præjudicium, quod homines tenet, sibi persuadentes quasi quædam res in hoc universo sint adeo viles, ut magnitudinem majestatis divinæ dedeceat earundem cognitio. Qui nexum rerum omnium in hoc universo probe perpendit, quem in Cosmologia stabilivimus, rationem a priori intelligit, cur nihil adeo vile æstimari debeat, ut a providentia divina eximatur. Sed de eo apertius dicemus suo loco.

§. 210.

Juxta Scripturam sacram intellectus divinus nobis incomprehensibilis est. Etenim *Psalms. CXLVII. 4.* Deus dicitur *benignus* numerare multitudinem stellarum. Et Christus affirmat *Matth. X. 30*, Deum numerare omnes capillos capitis nostri. Immo *Psaltes* addit, ipsum stellas singulas appellare nomina. *juxta S.S.* tim, seu propriis nominibus a se invicem distinguere. Nec in vita veritate dici poterat, Deum quoque singulos capillos capitis nostri nominatim appellare, seu propriis suis nominibus a se invicem distinguere. Quodsi duo hæc Scripturæ loca combinare volueris, per ea urique patebit, intellectum divinum juxta Scripturam sacram esse incomprehensibilem nobis eodem sensu, quo supra idem evicimus (§. 172.). Stellæ vasta cœli spacia replent, nec ignotum est omni tempore eam hominum animis insedisse opinionem, quod earum numerum

(*Wolffii Theol. Naturalis*) Aa iniri

iniri sit impossibile. Hinc ipse Deus confirmaturus promissionem, quam fecerat *Abrahamo*, quod multiplicaturus sit posteros ipsius sicut pulverem terræ *Gen. XIII. 16*, jubet eum respicere stellas & numerare easdem, si possit *Gen. XV. 5*. Sic, inquit *vers. 6*, erit semen tuum: id quod mox ita ipsemet interpretatur *Gen. XVI. 10*. multiplicans multiplicabo semen tuum & non numerabitur propter multitudinem. Et memini me legisse in *hodoporicis*, gentes, quæ numerando ultra millenarium ascendere non poterant nominibus destitutæ, quibus exprimerent numerum ineffabilem, eundem indigitaturas monstrasse digito stellas, ita ut numerus ineffabilis atque incomprehensibilis diceretur tantus, quantus stellarum numerus. Nullum adeo dubium est, quin *Abrahami* ævo stellarum numerus ineffabilis fuerit habitus, tantus scilicet, ut distincte percipi minime possit, quemadmodum numerus pulvisculorum, ex quibus constat pulvis terræ; ut multiplicare sicut pulverem terræ & multiplicare sicut numerum stellarum pro synonymis agnovit ipse Deus. Hodie vero, postquam telescopia inventa & ad usum observationum cœlestium translata, innumerabilis stellarum multitudo certo certius constat, cum continuo plures oculo conspicuæ evadant stellæ, quo exquisitiori telescopio cœlum respicimus. Quando itaque Deus dicitur numerare stellas, hominibus innumerabilia cognoscere perhibetur. Jam tenendus quoque est modus, quo innumerabilia ista cognoscit. Additur nimirum, Deum stellas singulas appellare nominatim. Qui nominibus res a se invicem distinguere valet, is differentiam earundem clare percipere tenetur. Unde patet, Deum stellarum numerum omnem distincte sibi repræsentare, ita ut in idea ejus singulas stellas actu a se invicem discernat. Atque hinc intelligitur, Deum ea, quæ hominum confessione unanimi innumerabilia sunt, distincte cognoscere & singula a se invicem tam bene discernere, quam citra fallaciam parens distan-

distinguit liberos suos. Quæ de stellarum numeratione dicta sunt, ea quoque ad capillorum numerationem, recte applicantur. Etenim si totum genus humanum spectes, quatenus & omnes ac singulos, qui vixerunt olim, & eos, qui nunc vivunt, & posthac nascituros complectitur; nemo non ultro fatebitur, numerum capillorum esse ineffabilem: immo nullus dubit fore, ut Astronomiz peritus eum multo magis ineffabilem judicet, quam numerum stellarum, propterea quod stellæ ingentibus admodum intervallis, a se invicem remotæ, capilli vero singulis capitibus insidentes nullis intervallis sensibilibus a se invicem discreti, ac præterea forsitan non deerunt, quibus considerantibus singulas stellas fixas esse totidem soles suis planetis stipatos (§. 1120. 1122. *Astron.*), probabilius videbitur numerum capillorum stellarum numerum multum excedere. Liquido igitur constat, dum Deus dicitur promiscue numerare omnium hominum capillos; hoc ipso affirmari, quod hominibus innumerabilia seu ineffabilia cognoscat. Christus eo fine docet, omnes capillos capitis hominis cujuscunque numeratos esse a Deo, ut providentiam Dei ad minima quæque extendat, haud obscure insinuans, quemadmodum ex contextu colligitur animum advertendo ad hoc, quod a passeribus ad capillos tanquam a majore ad minus fiat argumentatio, nullum sine voluntate Dei capillum decidere de capite hominis, atque adeo ipsum singulorum curam peculiarem gerere. Necesse igitur est, docente Christo, ut Deus singulos capillos tam bene a se invicem distinguat, ac parens liberos suos, quos singulos suis discernit nominibus. Atque hinc jam patet, Deum numerum capillorum omnem sibi distincte repræsentare, ita ut in idea ejus singulos a se invicem actu discernat. Unde denuo intelligitur Deum ea, quæ hominum confessione unanimi innumerabilia sunt, distincte cognoscere & singula a se invicem, tam bene discernere, quam citra fallaciam liberos suos

distinguit parens, qui singulos propriis suis nominibus appellare novit. Deus in promissione *Abrahamo* facta de numero posterorum genus suum ab ipso derivaturorum numero stellarum substituit numerum pulvisculorum in pulvere terræ. Pater itaque Scriptura sacra non invita, ubi de innumerabilitate sermo est, stellis substitui posse quævis corpora alia, quæ homini innumerabilia sunt veluti grana arenæ in mari & guttas pluviz. Sane ipse *Jacobus* promissionem *Abrahamo* & sibi de posteritate sua factam enunciaturus ait, Deum dilatare velle semen suum sicut arenam maris, quæ præ multitudine numerari non potest *Gen XXXII, 12*. Deus igitur quemadmodum numerare dicitur stellas & suis singulas appellare nominibus, eo fine, ut intellectus ipsius pateat magnitudo *Psal. CXLVII. 4* eadem non invita numerare quoque dicendus est pulvisculos in pulvere terræ & singulos propriis suis appellare nominibus atque itidem numerare dicendus est multitudinem arenæ maris & singula granula suis appellare nominibus. Sunt enim pulvis terræ & arena maris non minus opera ipsius ac stellæ per vastum cœlorum spatium disseminatæ, adeoque eodem modo ipsi cognita ab æterno, quo hæ ipsi perspectæ sunt *Act. XV. 18*. Quamobrem cum stellas numeret & suis a se invicem nominibus distinguat, hoc est, distincte cognoscat, quemadmodum probavimus; pulverem quoque terræ & arenam maris numerare suisque singula granula nominibus a se invicem discernere, hoc est, distincte cognoscere debet. Nihil adeo datur in cœlis atque in terra, quod pro innumerabili reputari possit, a Deo tamen juxta Scripturam sacram non adeo bene cognoscatur, ac parens liberos suos novit, quos & numerare, & nominibus propriis distinguere valet. Ostendimus jam superius (§. 68.), cœlum & terram in sacris literis denotare totum mundum, quemadmodum etiam inter nos cœli ac terræ nomine totus hic mundus adspectabilis indigitari solet.

Juxta

Juxta Scripturam sacram igitur affirmandum, nihil in toto mundo dari, quod pro innumerabili a nobis reputari possit, a Deo autem distincte non agnoscat. Constat stellas esse maxima, quæ dantur in mundo, corpora eaque totalia, ex quibus tanquam partibus componitur universus mundus; pulvisculos vero constituentes pulverem terræ & arenam maris esse corpora partialia, quæ sunt partes partium universi, & denique capillos capitis nostri corpora partialia incompleta, quæ ad unionem cum corporibus partialibus aliis destinantur. Hoc vero numero continetur omne corporum genus. Juxta Scripturam igitur sacram in toto hoc mundo adspectabili nullum datur corporum genus, quod innumerabilia continet, a Deo tamen hoc non obstante agnoscitur, idque maxime distincte. Cum nobis impossibile sit numerare stellas, capillos capitis omnium hominum, pulverem terræ & arenam maris, multo magis autem impossibile sit stellas singulas, capillos capitis singulos, pulvisculos qui componunt pulverem terræ singulos, arenæ maris granula singula a se invicem discernere, quomodo hoc vi intellectus divini fieri possit, utique ignoramus, nec ullo modo capimus. Quamobrem quia illud affirmat Scriptura, quemadmodum prolixè satis adstruximus; intellectus divinus juxta eandem nobis incomprehensibilis est, eodem prorsus sensu, quo supra (§. 172.) eundem nobis incomprehensibilem esse ostendimus (§. 170.)

Quod *Psaltes* eo fine affirmet, Deum numerare multitudinem stellarum & suis singulas nominibus appellare, ut doceat, qualis & quantus sit intellectus divinus, & quantum nos ab ipso distet, ex contextu claret. Etenim ubi illa de Deo enunciavit, mox alta voce exclamat: Magnus Dominus noster & Magna virtus ejus, & sapientiæ ejus non est numerus! Dubitari adeo nequit, hunc Scripturæ sacræ locum esse classicum, quando de magnitudine & incomprehensibilitate intellectus divini agitur, & ad utramque probandam scopo S. S.

convenienter eundem adduci. Ast quando Deus dicitur numerare capillos capitis nostri, Christus potissimum intendit, ut doceat, providentiam divinam sese ad minima quoque, quæ nostro iudicio vilia atque abjecta reputantur, extendere. Erunt igitur aliqui, qui dubitabunt, num locus iste ad probandam incomprehensibilitatem intellectus divini adducatur. Immo non deerunt, qui reprehensuri sunt Scripturæ dicta extra scopum ipsius aliorum detorqueri. Quamobrem nostrum esse iudico, ut doceamus, quandonam dicta Scripturæ extra scopum suum primum eadem non invita, ad probandas veritates alias transferantur. Nimirum veritas aliqua cum altera subinde adeo connexa est, ut posita una ponatur & altera, immo ut hæc altera poni minime possit, quin etiam ponatur illa. Ponamus itaque scopum S. S. esse docere veritatem alteram, propter necessarium tamen huius cum illa nexum illam simul docet. Atque hic casus est dicti Salvatoris nostri de numeratione capillorum capitis nostri. Per eam docere intendit providentiæ divinæ ad minima, quæ vilia & abjecta videntur, extensionem. Enimvero quoniam cum cura, quam Deus gerit singulorum capillorum, necessario connexa est distincta eorundem cognitio & capilli in numero eorum sunt, quæ innumerabilia recte reputantur; dictum Christi ad probandam distinctam eorum, quæ nobis innumerabilia sunt, cognitionem recte adhiberi, nemo dubitare potest. In hoc casu scopus Scripturæ secundarius dici potest, docere eam veritatem, quæ cum primario intenta necessario connexa est. Nec obstat, quin dictum Scripturæ extra scopum primum pro classico habeatur (*not. §. 95.*). Quemadmodum vero ad ea, quæ ex dicto aliquo Scripturæ sacræ per necessariam consequentiam inferuntur, ita ad veritatum quoque aliarum cum eadem necessarium nexum, de quo hic loquimur, respiciendum, ubi eidem omnem sensus plenitudinem tribuere volueris, quem habere potest. Et his uberius confirmantur, quæ de eodem dicto Christi jam paulo ante (*not. §. 209.*) annotata sunt.

§. 211.

Deus juxta Scripturam sacram non dormit, sed semper vigilat. Disertis verbis hoc dicitur *Psal. CXXI. 4* Quando *S. somnus* enim affirmatur, non dormire eum, qui custodit Israël, hoc *Deo repugnat*, Deum; in Hebræo textu occurrit verbum *שׁוּן*, quod ex *gnat*. communi loquendi usu idem significare, quod apud Latinos verbum dormire ex *I Sam. XXVI. 7* liquido constat: ubi cum narratur Davidem & Abisæum venisse ad populum noctu ac invenisse Saulem in territorio dormientem, idem omnino vocabulum occurrit. Equis vero non videt in hoc loco verbum istud denotare eum statum, quo somno oppressum jacet corpus, anima vero caret perceptionibus claris atque distinctis, nec sui rerumque perceptarum sibi conscia est? Ex contextu vero *Psal. CXXI. 4.* apparet, somnum negari de Deo tanquam id, quod nunquam eventurum est: quo ipso insinuat eum naturæ ipsius repugnare. Quod si ergo juxta *Scripturam sacram* somnus Deo repugnat, necesse est ut per *essentiam atque naturam suam semper vigilet.*

Propositio hæc in Scriptura sacra transfertur ad usum morale: cui eandem in philosophia quoque destinari supra (*not. §. 185.*) annotavimus.

§. 212.

Quoniam substantia simplex, qualis est anima, in somno *Juxta S.S.* est in statu perceptionum confusarum (§. 15. *Psychol. rat.*), *non datur* quando vero vigilamus, in statu perceptionum distinctarum *statuum* (§. 14. *Psychol. rat.*), consequenter in anima nostra status per- *in Deo al-* ceptionum confusarum & distinctarum continuo alternant; *ternatio.* Deus vero juxta *S.S.* nunquam dormit, sed semper vigilat, immo ut dormiat impossibile sit (§. 211.); *juxta S.S.* status perceptionum distinctarum & confusarum seu obscurarum *alternare nequit,* consequenter cum in statu perceptionum ob- *scura-*

Obscurarum fieri non possit, ut percipiens sibi vel sui, vel rei cujusdam alterius sit, conscius (§. 17. *Psych. rat.*), juxta scripturam sacram status istiusmodi impossibilis est, in quo Deus nec sui, nec rei cujusdam alterius sibi sit conscius.

Corollarium hoc etiam hoc modo ostendi poterat: Deus juxta Scripturam sacram nunquam dormit, sed semper vigilat (§. 211.), sumto scilicet vocabulo in eo significatu; quo de hominibus accipitur, quemadmodum *loc. cit.* evicimus. Enimvero quando nos dormimus, sensationes omnes clare cessant, nec ullius, quod præsens est, nobis conscii sumus (§. 119 *Psych. emp.*). Fieri adeo nequit, ut in Deo cessent representationes rerum cognoscibilium, quales sunt in ipso, hoc est, distinctæ (§. 156.), juxta ipsam quoque Scripturam sacram (§. 208.), & Deus sibi semper conscius manet eorum, quæ sibi repræsentat. Juxta Scripturam itaque sacram Deus semper manet in statu perceptionum distinctarum, sui rerumque extra se existentium sibi conscius, consequenter status perceptionum distinctarum & status obscurarum non perinde ac in homine alternant.

Patet hoc exemplo, quemadmodum & aliis supra jam propositis ac in sequentibus adhuc proponendis, beneficio principiorum philosophicorum ex verbis S. S. deduci posse, quæ cogitationem eorum subire nequeunt, qui philosophica ignorant principia. Atque hinc elucet philosophiæ in interpretanda S. S. utilitas, simulque perspicitur, quomodo philosophus sensum S. S. profundius scrutari possit, quam qui a philosophia alienum habet animum. Idem vero valere de ipsis veritatibus puris, nec tantummodo in mixtis locum habere, experiri poterunt, qui philosophiam, qualem nos profiteamur, cum distinctis Theologiæ revelatæ notionibus conjungunt. Tantum adeo abest, ut mos philosophandi noster autoritari S. S. ac inde deductæ Theologiæ revelatæ periculum minuetur, ut potius auctoritatem illius roborer, hanc clariorem ac evidentiolem reddat: id quod imprimis conducit ad empæctas huius seculi refellendos. Ceterum præ-

sente

sente propositione præcipua quædam proprietas intellectus divini continetur, qua a facultate cognoscendi humana differt, ut adeo Deum non dormire non sit propositio, quæ contemni mereatur, etiamsi eam nonnisi theoretice spectes, ubi somnum ad statum animæ transfers recedens a confusa notione, quæ corpus magis respicit, quam animam.

§. 213.

Juxta Scripturam sacram intellectus divinus immensus Immensus est. Psalm. CXLVII. 5. de Deo dicitur: לְתַבִּינֹתָיו אֵין מִסְפָּר, *tas intel-* hoc est, intelligentiæ ejus non est numerus, seu ea, quæ Deus *elus divini* vi intellectus sui sibi repræsentat, numerari nequeunt. Jam cum *juxta S. S.* intellectus magnitudo æstimeretur partim ex numero objectorum, quæ sibi repræsentare valet, partim ex numero eorum, quæ in unoquoque objecto distinguit (§. 276. 277. *Psychol. empir.*); intellectus magnitudo mensurari nequit, si eorum, quæ sibi repræsentare valet atque in ideis rerum discernit, a se invicem numerus iniri nequit. Atque adeo patet, juxta *Scripturam sacram* intellectum divinum esse immensum.

Immo constat hoc modo, immensitates intellectus divini juxta S. S. in eo consistere, quod eorum, quæ vi ejusdem repræsentantur, & quæ in ideis ab eodem productis continentur, nullus iniri possit numerus. Scriptura igitur intellectum divinum nobis repræsentat tanquam immensum in se: quæ sola vera immensitas est, qualis creaturæ, nulli convenire potest. Adduximus ipsa Hebraica verba propterea, quod ex versionibus non adeo clare pateat intellectus divini immensitas, quam probare intendimus. Vulgatus interpres reddit: Sapientiæ ejus non est numerus. *Castalio* vertit, quod Deus sit immensæ prudentiæ. Sapientia vero non est actus intellectus, qui vocabulo Hebraico תְּבוּנָה indicatur, multo minus de prudentia hic sermo est. Ad textum adeo authenticum provocamus, quando ad eum provocari opus est (§. 978. *Log.*). Tenendum itaque, quando ad eum non provocamus, versionem textui satis convenire, aut a nobis adduci verba, quæ mentem ejus loquuntur.

§. 214.

Puritas in-
tellectus
divini ju-
xta S. S.

Intellectus Dei juxta S. S. purus est eo sensu, quo eun-
dem purum esse supra demonstravimus. Etenim juxta S. S.
Deus omnia distincte cognoscit, nihil vero confuse (§. 208.).
Sed hinc supra deduximus, intellectum Dei esse purum (§.
178.). Intellectus adeo Dei juxta S. S. purus est eo sensu, quo
supra eundem purum esse evicimus.

Puritatem intellectus divini per consequentiam ex S. S. eruimus, propterea quod nobis non succurrit dictum S. S. ex quo eadem immediate inferri poterat. Equidem 1 *Job. I. §.* Deus lux esse dicitur, & tenebras in eo esse ullas negatur. Cum constet lucem prædicari de intellectu, quatenus ideis inest claritas, quo sensu etiam animæ nostræ tribuitur (§. 35. *Psy. bol. empir.*), & ex adverso obscuritas & defectus idearum, unde pendet ignorantia atque error, denotetur tenebrarum nomine, quo sensu etiam animæ tenebras inesse dicimus (§. 36. *Psy. bol. empir.*); hinc omnino inferri poterat, ideis rerum, quæ sunt in intellectu divino, nihil prorsus obscuri admisceari; consequenter purum esse (§. 34. *Psy. bol. empir.*). Sed cum difficultas ex textu orta, quod lumen & tenebræ ad actiones liberas referantur, quatenus eadem bonæ vel malæ sunt, nonnisi per ambages tollatur; præstat puritatem intellectus divini per consequentiam ex S. S. erui; ac inde stabiliri significatum luminis & tenebrarum, quo illud Deo tribuitur, hæc de eodem negantur, quam vice versa supposito significato luminis & tenebrarum quoad Deum ex eorundem notionibus inferre puritatem intellectus. Nimirum ubi intellectus purus est, ibi merum lumen, tenebræ sunt nullæ, at ubi purus non est, ibi sunt tenebræ. Quamobrem cum intellectus hominis purus non sit (§. 315. *Psy. bol. empir.*), nec is per naturam suam dici potest lumen, etsi luminis quidpiam ipsi affulgeat, ac insunt tenebræ spissæ. Me non monente apparet, cum juxta S. S. Deus distincte cognoscat omnia, nihil confuse, cetera omnia, quæ superius ex distincta cognitione rerum, qualis Deo competit demonstravimus, eodem modo

pro-

probari juxta S. S. Deo tribuenda, quo in propositione præ-
sente idem de puritate intellectus divini evicimus, ut adeo
supervacaneum foret hisce deductionibus prolixius immo-
rari.

§. 215.

*Juxta S. S. intellectus divinus illimitatus atque infinitus Limitum
est eo sensu, quo utrumque de eodem supra evicimus. Deo remotio ab
enim opera sua omnia nota sunt ab æterno, Act. XV. 18. intellectu
consequenter, cum quicquid præter Deum existit, ab eo crea- divino &
tum sit Gen. I. 8, antequam existerent. Quoniam itaque ad id, ejus infini-
ut Deus, quæ præter ipsum possibilia sunt, actu cognoscat, tude, juxta
eorundem non requiratur existentia; dubio caret, quod et S. S.
iam possibilia nunquam exitura, quæ tamen, si ita visum fu-
isset, ad existentiam perducere poterat, cognoscere debeat.
Atque adeo nil poni potest tanquam cognoscibile, quod non
sit notum Deo ab æterno. Unde liquet, intellectum divinum
non limitari quoad objectum (§. 468. Ontol.). Jam porro
Deo omnia nuda & resupina sunt Hebr. IV. 13, hoc est, firmi-
ter tenendum objectum unum, quod repræsentat sibi Deus,
non posse ob stare, quo minus percipiat alterum, adeoque nec
exteriora ejusdem objecti, quo minus percipiat interiora, nec
ullam in objecto quocunque perceptibili partem posse a Deo
dici aversam, ut eam percipere nequeat, quemadmodum su-
pra ostendimus (§. 208). Nihil adeo datur in objecto quo-
cunque, quod non ita sibi repræsentet Deus in intellectu suo
ut ejusdem sibi sit conscius. Unde porro liquet, intellectum
divinum non limitari quoad modum repræsentandi objectum,
seu ideæ rationem formalem (§. 468. Ontol.). Quoniam ita-
que intellectus limitari aliter haud quaquam potest, nisi quoad
numerum objectorum & quoad modum repræsentandi obje-
ctum; secundum S. S. intellectum divinum esse illimitatum patet.
*Quod erat unum.**

Cum ens finitum sit etiam limitatum (§. 173.), fieri haudquaquam potest, ut illimitatum sit finitum (§. 28. *Ontol.*). Ergo intellectus divinus, qui prorsus illimitatus est, finitus esse nequit. Eric igitur infinitus (§. 53. *Ontol.*). *Quod erat alterum.*

Constat ex anterioribus notionem limitati & infiniti nobis non esse eandem, etsi una ab altera pendeat.

§. 216.

Simultaneitas in actu unico cognoscendo S.S. conformis.

Deus juxta Scripturam sacram omnia cognoscit simul, seu actu unico. Etenim juxta S.S. intellectus divinus infinitus est (§. 215.). Quamobrem cum in ente infinito sint omnia simul, quæ eidem actu inesse possunt (§. 838. *Ontol.*); in intellectu Dei ideæ rerum possibilium omnium simul insunt. Quicquid igitur cognoscibile, a Deo simul cognoscitur, seu actu unico.

Patet eodem modo per principia rationis demonstrari posse illimitationem intellectus divini ac inde colligi, primum infinitudinem ejusdem, deinde ex hac porro simultaneitatem in cognoscendo, quamvis contraria ratione ex simultaneitate in cognoscendo supra collegerimus infinitudinem: id quod ideo monemus, quod nonnullis hoc modo facta demonstratio videbitur evidentior.

§. 217.

Carentia sensuum & imaginationis in Deo.

Deus juxta S.S. caret sensu atque imaginatione. Etenim intellectus Dei juxta S.S. purus est (§. 214.), eo scilicet sensu, quo eundem esse purum supra demonstravimus (§. 178.). Enimvero intellectus eo sensu purus a sensu atque imaginatione liber est (§. 314. *Psychol. empir.*). Ergo intellectus Dei a sensu atque imaginatione iuxta S.S. liber est, consequenter sensu atque imaginatione caret.

Videtur hæc propositio, etsi ex iis fluens, quæ de Deo ex S.S. principiis demonstrata sunt, ipsi Scripturæ literæ contra-

tra-

tradidere, in qua Deus videre & audire dicitur. Et quamvis supra (§. 103.), dixerimus Deo in S. S. tribui membra corporis humani, qualia sunt organa visus atque auditus, oculus & auris significatu quodam generali, qui attributo cuidam divino & vsui illius membri communis est; non tamen negandum prorsus videbatur, Deo juxta S. S. sensum atque imaginationem convenire, præsertim cum Scriptura emphatica locutione urgere videatur, ne Deo sensus prorsus denegemus. Ita enim Psaltes *Psalms. XCIV. 9. Qui plantavit aurem, non audiet? aut qui finxit oculum, non considerat?* seu, *Castatione vertere, non cernet?* Enimvero haud quaquam quæ hic demonstrantur verbis S. S. contradicunt. Negatur enim Deo sensus atque imaginationem competere eo sensu, quo vocabulum utrumque accipitur, quando de hominibus & animalibus brutis usurpatur, cum vi harum facultatum objecta sensibilia ita represententur, ut quædam nobis sint tecta, quædam supina, adeoque non videantur, etsi visibile sit sensui præsens. Deest nimirum formalis ratio, quæ sensum & imaginationem ab intellectu distinguit, quando sensus atque imaginationis ad Deum applicanda notio. Ecquis ergo definitum prædicabit de subiecto, cui definitio competere nequit (§. 349. Log.)? Non tamen ideo negatur, Deo competere sensum atque imaginationem per eminentiam: id enim paulo post ex principiis quoque rationis demonstraturi sumus, ac hinc pendet significatus ille generalis organorum sensuum aliorumque membrorum corporis, de quo supra diximus (§. 103.)

§. 218.

Juxta S. S. intellectus divinus est omnium possibilium perfectissimus. Deus de se ipso prædicat, quod non sit ens simile sui & quidem hoc probat etiam ab intellectu, quo præterita, præsentia & futura cognoscit. Ita enim *Jes. XLVI. 9 10. Ego, inquit, sum Deus, & non est ultra Deus, nec est similis mei, annuncians ab exordio novissima & ab initio, quæ necdum facta sunt.* Quoniam igitur præter Deum non datur, nec dari potest ens eidem simile quoad intellectum, cum intellectus divinus

ad omnia cognoscibilia sese extendat; pater juxta S. S. non majorem conceptu possibilem esse intellectum, quam qui Deo competit, & eundem non competere nisi Deo soli. Intellectus igitur divinus juxta S. S. est omnium perfectissimus, five eundem absolute consideres, five respectu enim intelligentium aliorum, quæ existunt.

Demonstratio summæ perfectionis intellectus divini, quam ex principiis rationis dedimus (§. 168.), dictum Scripturæ illustrat, ut robur illationis evidentius fiat. Habemus adeo exemplum, quam utile sit Scripturæ ac rationis in doctrina de Deo connubium: id quod etiam per cetera, quæ de consensu Scripturæ & rationis demonstrantur, abunde elucescit.

§. 219.

Idea rerum Deo essentialis juxta S. S. *Idea rerum juxta S. S. Deo essentialis sunt.* Deus enim *Jes. XLVI. 9. 10.* negat, præter ipsum esse adhuc Deum alium, propterea quod ipsi simile non existit: id quod inter alia inde probat, quod nullum detur ens, cui istiusmodi intellectus competat, qualis est divinus. Diserte enim: *Ego inquit, sum Deus & non est ultra Deus.* En duas propositiones, alteram affirmativam, *Ego sum Deus*, alteram negativam, *Nullum entium ceterorum, quæ existunt, Deus est.* Probatur utraque propositio, dum addit: *Non est mei similitudo.* Cum enim species sint similitudo individuorum (§. 233. *Ontol.*), adeoque notio speciei ea continet, quæ individuis seu entibus singulis pluribus communia sunt (§. 195. *Ontol.*), negat Deus dari notionem quandam communem, quæ simul ipsi & enti cuidam alteri præter ipsum conveniat, consequenter definitionem Dei competere tantummodo sibi, non vero adhuc alteri cuidam enti, quod existit (§. 152. *Log.*). Nititur adeo rationum Dei illa regula, quæ sub dicto de omni & nullo comprehenditur: cui competit definitio, eidem competit definitum

tum & cui definitio non competit, ei nec definitum competit (§. 349 Log.). Probat ulterius, sibi convenire definitionem Dei, non vero convenire præterea enti cuidam alteri, dum pergit: *Annuncians ab exordio novissimum & ab initio, quæ necdum facta sunt &c.* Seu ut *Castalis* vertit, *qui securura præsignifico & nondum facta ante denuncio.* Etenim sibi convenire affirmat, quod negotii alienius exitum, quam primum incipit, palam facere & quæ olim ventura sunt prædicere possit, consequenter intellectum, qui universam rerum seriem intue perspicit; negat autem enti cuidam alteri similem intellectum convenire. Hunc adeo intellectum in numerum notatum esse, quibus Deus ab entibus intelligendis ceteris quibuscunque distinguitur. Quoniam itaque definitiones specierum enumerant essentialia, per quæ determinantur (§. 172. Log.) nec definitiones aliarum, in quibus in locum essentialium surrogantur ab essentialibus diversis, quæ rebus insunt, admittuntur, nisi essentialibus ignorant (§. 180 & seqq. Log.), id quod de Deo dici repugnat; istiusmodi intellectus, quo tota rerum series distincte percipitur, inter determinaciones Dei essentialis referri utique debet. Enimvero cum intellectus Dei sit purus actus (§. 163); abque ideis rerum, quæ in ipso sunt, esse nequit, immo ne concipi quidem potest. Quamobrem cum intellectu divino Deo essentialis sunt.

Obiter observamus ex demonstratione propositionis præsentis patere, quod ad vim ratiociniorum in Scriptura sacra latentium percipiendum prosint principia Logice, quæ adeo inviolabilia sunt, ut Deus ipsemet ea sancte observet. Elucet quoque ex propositione præsentis principiorum ontologicorum necessitas, ut per consequentiam ex verbis S. S. eruantur, quæ in iisdem veluti abscondita latent, atque decidantur Scripturæ menti conformiter quæstiones, quæ ex ea decidi posse primo intuitu vix ac ne vix quidem apparet. Ceterum necesse erat idearum necessitatem S. S. conformem demon-

monstrari, propterea quod hodie multi *Cartesianos* secuti ideas arbitrarias cum defendant, illam utut a Theologis constanter admissam, quamdiu philosophandi libertas in Scholis erat restrictior, religioni adversam pronunciare non verentur, nos vero ad eam defendendam utemur, ubi difficultates idearum arbitrariarum patronis in superabiles videntur.

§. 220.

*Quod Deus
semetipsum
cognoscat.*

Deus semetipsum distincte juxta S. S. cognoscit. Novit enim quod sit Deus, nec præterea Deus sit alius, propterea quod nemo ipsi similis *Jes. XLVI. 9. 10.* Qui novit, quale ens sit, seu sibi competere definitum, ille etiam nosse debet notas definitionem ejusdem entis ingredientibus (§. 349. *Log.*). Et qui novit non esse ens aliud sui simile, ille differentiam illius entis a ceteris omnibus perspicere debet (§. 195. 211. *Ontol.*). Deus igitur cognoscit ea, quæ ipsi insunt, & quibus a rebus ceteris differt (§. 79. *Log.*). Immo cum *vers. 10. & seqq.* enumeret, quibus differat ab entibus aliis, & quænam sint illa, quæ ipsi soli propria, scilicet quod exitum negotiorum præsignificare, olim ventura prædicere, quicquid vult facere possit & quænam alia his gemina sunt; distincte semetipsum cognoscit (§. 38. *Psychol. empir.*)

Patet ex demonstratione propositionis præsentis, quam naturaliter ac minus coacte ex dicto illo apud *Jesaiam* probetur, Deum semet ipsum cognoscere, modo principiis logicis imbutum habeas animum, ubi idem per te observare volueris. Atque adeo porro liquet, principia philosophica, ipsa etiam logica, augere acumen, ne Scripturam legis attentionem effugiant ea, ad quæ vulgo animus non advertitur.

§. 221.

*Scientia
simplicis
intelligentiæ.*

Scientia simplicis intelligentiæ vocatur, qua deus res tantummodo cognoscit ut possibiles & ut existibiles. Dicimus

mus autem existibile, quod existere actu potest ; seu cujus actus determinatio possibilis. *quanam dicatur.*

Qui novit aliquid esse possibile, nondum tamen hinc perspicit, quod sit existibile. Et qui novit aliquid esse existibile, nondum tamen novit ipsum esse actu existitum. Immo qui novit certo aliquid actu existitum, nondum tamen ideo novit, quod jam existat. Pendet nimirum horum cognitio a diversis principiis. Quamobrem ne plura nobis probasse videamur, quam quæ revera probata sunt ; singula a se invicem probe sunt discernenda ac diversæ rerum notitiæ diversis quoque nominibus discernendæ, ne facile inter se confundantur. Quoniam itaque Scholastici terminos dudum excogitaverunt, quibus eadem exprimi possunt, in Theologiam tam naturalem, quam revelatam introductos ; ut eosdem retineamus æquum est, nec bonæ methodo adversum (§. 147. *Disc. pratim.*). Equidem Scholastici scientiam simplicis intelligentiæ tantummodo restringunt ad ea, quæ possible sunt, nunquam autem existitura. Enimvero cum ante decretum divinum omnia ut nude possible spectentur, atque adeo inter ea, quæ existitura sunt, & ea, quæ non existitura sunt, nulla adhuc detur differentia ; nil obstat, quo minus diversitatem cognitionis, quæ in Deo est, a priori demonstraturi & singulas species ad sua principia, a quibus pendent, reducere, significatum termini ampliemus, ipsis termini inventoribus non invitis, qui eundem ipsimet non restrinxissent, siquidem rem omnem penitus inspicere ipsis datum fuisset.

§. 222.

Potentia Dei dicitur possibilitas ad actualitatem perducendi, quæ in se seu absolute spectata possible sunt, aut, si minus, intrinsece possible. *Potentia divina definitio.*

Definitionem potentiae hoc loco afferimus, etsi de eadem nondum agamus, quod eadem in mox demonstrantis opus habemus.

§. 223.

*Existibili-
tatis prin-
cipium.*

Quicquid præter Deum existere potest, id existere nequit, nisi per potentiam Dei. Ponamus, si fieri potest, aliquid præter Deum existere posse, sed non per potentiam Dei. Aut igitur existit vi propria, aut vi entis alterius. Quod si vi propria existit, erit ens a se (§. 27.), adeoque necessario existit (§. 32.), consequenter non tantummodo existere potest: quod est contra hypothesin.

Quod si id, quod præter Deum existere potest, vi alterius entis existit; rationem existentiae suae sufficientem tanquam ens ab alio (§. 27.) in ente a se habet (§. 63.), consequenter in Deo (§. 67.). Possibile igitur est idem existere posse, quia Deus ipsum ad actum perducere potest, adeoque per potentiam Dei (§. 222.)

Cum nondum probaverimus Deo competere potentiam, multo minus omnipotentiam ejusdem evicerimus; necdum ostendi potest, quamnam possibilem per potentiam ipsius ad actum deduci possint, & num quædam eorum sint, quæ ad actum per eundem deduci queunt. Sufficit igitur hic tantummodo evicisse, quod nonnisi per potentiam Dei existere possit, si quid præter Deum existere potest. Quoniam enim methodum adhibemus mixtam, ut, quantum datur, ad idem argumentum spectantia in eodem loco tractentur, tantundem probatum esse sufficit, quantum hic requiritur ut scientiam simplicis intelligentiae Deo vindicemus. Eri enim ex parte hic loci tantummodo hypothetice evincatur; probata tamen hypothesi suo loco, plena quoque omni certitudine constabit.

§. 224.

*Idem ulte-
rius ex-
penatur.*

Quoniam possibile existibile est, et causa existit, per cujus vires ad actum deduci potest (§. 221.); possibile nullum existibile est nisi per potentiam Dei.

Non-

Non est quod exipias, possibilia ad actum perducere per causas naturales adeoque existere præter Deum, quæ non existunt per potentiam Dei: etenim nobis sermo est de prima causa, unde pendet actualitas rerum omnium, non de causis secundis, quas in operando a prima pendere inferius ostendimus. Ceterum hinc patet ratio, cur quidam possibilitatem, consequenter ideas rerum a potentia Dei derivent. Confundunt nimirum possibilitatem extrinsecam cum intrinseca, possibile concipientes tanquam illud, cui producendo seu ad actum perducendo causæ cujusdam vires sufficiunt. Aliud vero est, si quæramur, num quid sit absolute possibile; aliud si quæramur, num ad actum perducere possit, seu num possibile sit ut existat. Antequam enim quæri possit, num dari possit causa, cujus viribus ad actum deduci possit A, constare utique debet, num sit possibile, hoc est, quod non repugnet istiusmodi quid esse. Potentiæ nimirum objectum est possibile intrinsece tale, cui ad actum perducendo ista sufficit, adeoque per sufficientiam potentiæ intrinsece possibile sit existibile. Atque hoc pacto clarius intelligitur, cur nondum hic constare possit, quænam intrinsece possibilitum, quorum scilicet ideæ sunt in intellectu divino, sint existibilia seu extrinsece possibilia, antequam demonstretur, quousque sese extendat potentia Dei, ut sufficientia ejus in aprico ponatur.

§. 225.

Deus cognoscit res ut possibiles, quatenus sibi conscius est Quomodo idearum in intellectu suo existentium; easdem vero cognoscit ut possibile & existibiles, quatenus sibi conscius est potentie sue. Deus enim existibile a & sui ipsius & eorum conscius sibi est, quæ in ipso insunt, (§. Deo cognoscitur. 187.), consequenter non minus idearum, quæ necessario in intellectu ejus existunt (§. 188.), quam potentiæ suæ, qualem ipsi competere inferius independentem ab his ostendimus, hoc est, qualem in ipso dari probari potest. Enimvero ideo quid possibile est, quod ejus idea detur in intellectu divino (§. 192.), eo scilicet sensu, quo nos possibile definimus & quo intrinsece

tale intelligitur (§. 85. *Ontol.*). Deus igitur cognoscit, quod quid sit intrinsece possibile, quatenus sibi conscius est idearum, quæ in intellectu ejus insunt. *Quod erat unum.*

Porro possibile nullum existibile nisi per potentiam Dei (§. 224.). Quamobrem quidnam sit existibile cognoscit, quatenus sibi conscius est potentiz suæ. *Quod erat alterum.*

E. gr. idea mundi hujus adspectabilis in Deo fuit ab æterno, utpote intellectui ejus æterno (§. 74.) essentialis (§. 88.) Quatenus igitur Deus intellectum suum cognoscit, adeoque sibi conscius est hujus ideæ, ab omni æternitate novit, mundum hunc esse possibilem (§. 192.). Enimvero Deus ab æterno non minus sibi conscius est potentiz suæ, quam mundo huic producendo sufficere intellexit. Atque adeo mundum hunc existibilem cognovit (§. 221.), quatenus sibi conscius potentiz suæ. Abunde vero patet, positis ideis in intellectu Dei positaque potentia Dei nondum intelligi, cur hic mundus adspectabilis actu exiturus sit aliquando & cur nunc actu existat, consequenter quod & in Deo representetur tanquam aliquando certo exiturus seu futurus & tanquam actu existens, alias adhuc requiri rationes, in quas adeo nobis deinceps inquirendum, ne in re tanti momenti, qualis est cognitio Dei, nimis præcipitato gradu progrediamur.

§. 226.

*Scientia
simplicis
intelligentiæ
Dei
asserta.*

Datur in Deo scientia simplicis intelligentiæ. Deus enim cognoscit res ut possibles & existibiles (§. 225.), seu ut a se producibiles (§. 223.). Quamobrem cum scientia simplicis intelligentiæ sit, qua quid cognoscitur ut possibile atque existibile (§. 221.), aut, si mavis, ut possibile non minus extrinsece, quam intrinsece tale; in Deo dari scientiam simplicis intelligentiæ palam est.

Apparet adeo Scholasticos fuisse satis acutos in iis distinguendis, quæ ad omniscientiam Dei spectant, dum scien-

tiam simplicis intelligentiæ peculiarem scientiæ divinæ speciem aut quasi partem omniscientiæ fecere, utut in evolvenda notione suum passi fuerint desiderari acumen, suam diligentiam: id quod ævo, quo vixerunt, condonandum, nostro vero supplendum. Ut vero hoc magis conspicuum evadat, sequentem addere lubet propositionem.

§. 227.

Per scientiam simplicis intelligentiæ nondum intelligitur, quousque sit, vel existerit vel exiturum sit; sed tantummodo quod, ut aliā scientia quando existat, fieri possit. Scientia enim simplicis intelligentiæ simplicis tantummodo intelligitur aliquid esse possibile ac existere posse (§. 221.). Enimvero quod possibile est, id ideo non existit (§. 132. Ontol.). nec quia possibile est ut existat per potentiam Dei (§. 223.), ideo certum est, quod exiturum sit, cum necesse sit, Dum velle potentia sua possibile ad actum perducere. Quamobrem per scientiam simplicis intelligentiæ nondum intelligitur, quod aliquid sit futurum. Cumque ad hoc ut actu existat requiratur exercitium potentiae divinæ, seu ut Deus potentia sua, qua uti potest, actu utatur; multo minus per scientiam simplicis intelligentiæ intelligitur, quod aliquid actu existat, vel jam existerit. Quod erat unum,

Quoniam quod præter Deum existere potest, per potentiam Dei existere debet (§. 223.); ut actu existat, tantummodo requiritur, ut Deus idem ad actum perducere velit. Sed per scientiam simplicis intelligentiæ intelligitur, num quid existere possit (§. 221.), consequenter quod exiturum sit, siquidem Deus velit. Per scientiam itaque simplicis intelligentiæ tantummodo intelligitur, ut aliquando existat fieri posse. Quod erat alterum.

Nimirum quamdiu terminis possibilitatis objectum cognitionis coercetur, terminos scientiæ simplicis intelligentiæ

minime egreditur. Quicquid vero extra terminos istos constituitur, ad eam referri nequit. Ceterum in nostra quoque cognitione scientia simplicis intelligentiæ locum habet & cum reliqua minime confundenda, quemadmodum patet, ubi animum ad eam advertimus.

§. 228.

Præsens, Præteritum & Futurum quid dicatur.

Præsens dicitur, quicquid actu est sive existit; *Præteritum*, quod aliquando exitit, nunc vero amplius non existit; *Futurum* denique quod aliquando exititum est.

Termini hic explicantur, prouti accipiuntur in doctrina de cognitione Dei.

§. 229.

Quomodo res spectantur in scientia simplicis intelligentiæ.

Quoniam per scientiam simplicis intelligentiæ nondum intelligitur, quod aliquid sit exititum, multo minus quod quid actu sit, ve exitit (§ 227.), in scientia simplicis intelligentiæ res neque ut præsentis, neque ut præteritæ, neque ut futuræ spectantur.

Unde simplicis intelligentiæ scientia comprehenduntur mundi omnes possibiles, quorum ideas in intellectu divino existere supra evicimus (§. 141.).

§. 230.

Scientia visionis quid sit.

Scientia visionis est, qua Deus ab æterno cognoscit, quæ in tempore futura sunt, & ubi præter ipsum res aliæ existunt, & quæ præsentia sunt, & quæ futura, & quæ præterita.

Deo competere quoque scientiam visionis, in qua quædam possibilia ab omni æternitate spectata fuere tanquam futura, & nunc postquam hæc rerum series existit, quædam tanquam præsentis, quædam tanquam præteritæ, quædam tanquam adhuc futuræ, per ea, quæ hætenus demonstrata sunt, ostendi nequit. Quamobrem bona methodus postulat, ut singula suo demonstrantur loco (§. 124. *Disc. prælim.*).

§. 231.

§. 231.

Præscientia in specie dicitur cognitio futurorum, seu sci-
entia visionis, qua Deus novit, quæ futura sunt, ab æterno. *Præscien-*
Hinc *Præscibile* dicitur, quod præsciri potest, seu cujus præ-
scientia possibilis, aut si mavis tale est, ut præsciri posse non re-
pugnet.

Possibilitatem præscientiæ hic evincemus; quod vero in
Deo actu detur, inferius demum ostendemus.

§. 232.

Effectus rerum materialium sunt in se & Deo præscibiles. Eff-
Cum effectus rerum materialium existentia seu actualitas ra-
tionem sufficientem agnoscat actiones rerum aliarum materia-
lium existentium (§. 886. *Ontol.*), in mundo autem res suc-
cessivæ, quarum una post alteram existit (§. 569. *Ontol.*), in-
ter se connexæ sint (§. 48. *Cosmol.*), quemadmodum idem in-
mundo hoc adspectabili, qui existit (§. 49. *Cosmol.*), obtinet
(§. 54. *Cosmol.*), adeoque sequentes successionis suæ rationem
sufficientem in antecedentibus habeant (§. 10. *Cosmol.*); si o-
mnis nexus rerum materialium perspicitur, earum quoque ef-
fectus innotescunt (§. 118. *Ontol.*), adeoque constat hisce
positis rebus materialibus hos quoque continuo poni earum
effectus, consequenter si illæ existunt, hos quoque existere de-
bere. La se igitur tales sunt, ut eas aliquando existuras cogno-
sci possit, antequam existant, adeoque præscibiles sunt (§. 231.).
Quod erat unum.

Jam vero Deus cognoscit omnia possiblea tanquam in
systemata relata (§. 155.), eaque distincte (§. 156.), consequen-
ter eorundem quoad successionem nexum inter se distincte
perspicit (§. 142.). Quamobrem cum effectus rerum mate-
rialium in se præscibiles sint, quatenus earum nexus quoad suc-
cessionem perspicitur per demonstrata; effectus hi Deo præ-
scibiles sunt. *Quod erat alterum.*

Nul-

Nullus concipi potest mundus possibilis, in quo, quæ contingunt, ita comparata non sunt, ut præsciri ea minime repugnet. Ex demonstratione enim propositionis præsentis liquet, præscibilitatem pendere a nexu successivorum, quo sine nullus concipi potest mundus, sive notionem ex principiis ontologicis de ente derives (§. 142. & seqq. *Ontol.*), sive ad analogiam mundi hujus adspectabilis formes (§. 55. *Cosmol.*), quemadmodum ex specie data una derivatur notio speciei alterius (§. 714. *Log.*). Quamobrem cum in intellectu divino existant ideæ prorsus distinctæ omnium possibilem (§. 155. 156.) & Deus earundem sibi conscius sit quoad singula, quæ in iisdem continentur (§. 187.); nullus concipi potest in aliquo mundo effectus, qui non foret Deo præscibilis, siquidem mundus iste exiturus ponatur. Illa igitur præscibilitas per omnes mundos posibles sese diffundit, etsi præscientia ipsa hunc tantummodo mundum adspectabilem attingit, quemadmodum inferius constabit. Ceterum non aliud fundamentum est præscientiæ eclipsium, quæ convenit Astronomo, quam quod eclipses propter nexum in motu siderum obvium sint in se præscibiles, & quatenus hunc Astronomus introspicere valet, eidem quoque præscibiles fiant; id quod Astronomiæ peritis satis superque exploratum est. Immo si Physica satis foret exulta, alii quoque rerum materialium eventus deprehenderentur præscibiles & qui haberet animum eadem satis imbutum, ei quoque præscibiles evaderent. Tolle vero rerum nexum & admitte casus puros, quos ex mundo exulare debere ostendimus (§. 95. *Cosmol.*), eversum deprehendes totum præscibilitatis fundamentum, nec deinde absque præscibilitate concipi poterit præscientia. Neque enim sufficit acumen intellectus divini in infinitum extendi: ubi non est quod videri potest, ibi nec infinitum juvat acumen.

Libera anima decreta cur sint præcibilia.

§. 233.

*Libera animæ decreta sunt in se & Deo præcibilia. Si-
ne motivis nulla datur in anima volitio, nulla nolitio (§. 889.
Psychol. empir.) & iis convenienter anima sese determinat (§.*

932. *Psychol. empir.*), utut in volendo ac nolendo libera (§. 942. *Psychol. empir.*). Consistunt autem motiva in representatione boni & mali (§. 890 *Psychol. empir.*). Quamobrem ut anima sibi hoc repræsentet tanquam bonum, vel tanquam malum, cum judicio discursivo opus sit (§. 51. *Log.*), requiritur & perceptio objecti appetibilis vel avertabilis præsens, & notio boni vel mali, quæ ad objectum istud applicatur (§. 356. *Psychol. empir.*). Quoniam perceptiones rerum præsentium (§. 85. *Psychol. emp.*) ac præteritarum suas sequuntur leges (§. 117. *Psychol. empir.*), per quas intelligitur, cur insint animæ (§. 84. *Psychol. empir.* & § 866. *Ontol.*); eas in se tales esse ut præscibiles sint patet (§. 231.). Notiones universales ex istis perceptionibus nascuntur constante lege (§. 326 327. *Psychol. empir.*), & applicantur non minus constante lege ad judicia discursiva sive universalia, sive singularia eruenda (§. 374. *Psychol. empir.*), nec quicquam datur in anima quoad operationes intellectus, quod non rationem sui sufficientem in vi repræsentativa universi, animæ essentia atque natura (§. 66. 67. *Psychol. ration*), habeat (§. 413. *Psychol. rat.*), consequenter per eam intelligi possit, cur in anima contingat (§. 56. *Ontol.*). Notiones igitur boni & mali earumque ad perceptiones præsentis objectorum appetibilium & avertabilium applicatio in se tales sunt, ut eas præsciri minime repugnet (§. 231.). Quare cum præscibilia in se sint, quæ ad motiva determinanda requiruntur, *per demonstrata*; ipsa quoque motiva præscibilia, consequenter ipsæ volitiones ac nolitiones utpote iis convenienter factæ *per demonstrata* præscibiles sunt.

Jam cum Deus animas quoque distincte cognoscat (§. 156), ipsi & essentia atque natura earundem atque leges, quas in modificationibus suis sequuntur, omnes perspectæ esse debent. Unde cum Deus cognoscat ea, per quæ volitiones & nolitiones

in anima determinantur, *per demonstrata num. 1. seu eorundem rationem sufficientem* (§. 116. *Ontol.*); ipsæ etiam volitiones ac nolitiones, seu libera animæ decreta ipsi præscibilia esse debent (§. 118. *Ontol.* & §. 231. *Theol. nat.*).

Patet ex demonstratione præscibilitatem decretorum liberorum in animabus locum habere in omni mundo possibili, quemadmodum paulo ante idem annotavimus (*not. §. 232.*) de eventibus in mundo materiali, quatenus a causis materialibus pendent. Qui Psychologiam tam empiricam, quam rationalem probe perspectam habent, præscibilitatem decretorum liberorum animæ non difficulter admittent. Quodsi vero cum Socinianis & aliis, qui cum ipsis hac in parte sentiunt,ingas libertatem animæ consistere in facultate sese sine motivis, immo contra motiva determinandi, prout scilicet ea admittere lubet, vel non lubet, quam dudum profligavimus (§. 944. *Psychol. empir.*); hoc ipso corruet totum præscibilitatis fundamentum, nec poterit deinceps admitti præscientia divina. Neque enim sufficit provocare ad acumen Numinis infinitum: quæ enim in se talia sunt, ut videri nequeant, nec infinito acumini videnti patent, quemadmodum idem jam ante monuimus (*loc. cit.*). Et sane Sociniani cum fundamentum præscibilitatis tollunt, ipsam quoque præscientiam sublata præscibilitate non admittunt, ne contradictorii ingenii arguantur.

§. 234.

Cur singula in serie modificationum præscibilia.

Quæcumque in serie integra perceptionum ac appetitionum acque aversionum unicuique animæ continentur, in se & Deo præscibilia sunt. Quæ enim per facultates animæ possibili sunt, in eadem actuantur juxta certas leges (§. 76. *Psychol. rat.*) & ex hisce legibus reddi potest ratio specialis actualitatis perceptionum ac appetituum (§. 77. *Psychol. rat.*), consequenter intelligi potest, cur hæc jam animæ potius sint perceptiones ac appetitiones acque aversiones, quam alia (§. 56. *Ontol.*). Et status futurus animæ nascitur ex præsentemedian-

diante præterito five quid imaginemur (§. 422. *Psych. empir.*), five ratiocinemur, vel categorice ac hypothetice (§. 44. *Psychol. empir.*), vel disjunctive (§. 407. *Psychol. empir.*), vel per consequentiam immediatam (§. 421. *Psychol. empir.*). Tales igitur sunt, ut eas præsciri minime repugnet, consequenter in se præscibiles sunt omnes animæ mutationes. Cumque nec libera animæ decreta, seu volitiones ac nolationes animæ, adeoque appetitiones multo minus ac aversiones alix inde eximantur (§. 233.), consequenter nec circa sensationes, quatenus in eas libertas animæ influit (§. 527. *Psychol. rat.*) aut quascunque mutationes alias, quæ a liberis animæ decretis quomodocunque pendent, difficultatis quicquam superesse possit; in tota perceptionum ac appetitionum atque aversionum serie, quæ in unaquaque anima datur (§. 524. *Psychol. rat.*); nihil continetur, quod in se præscibile non sit (§. 231.). *Quod erat unum.*

Jam cum Deus omnia cognoscat distincte, quæ præter ipsum cognita possibilia sunt, nihil confuse (§. 156.); ea quoque cognoscere debet, unde præscibilitas eorum, quæ in serie perceptionum, appetitionum ac aversionum uniuscujusque animæ continentur, pender. Sunt igitur & singula, quæ in hac serie contineatur, ipsi præscibilia (§. 231.). *Quod erat alterum.*

Quemadmodum in mundo materiali est series successivorum inter se connexorum, ita ut in eodem continuæ sint mutationes statuum, tam in singulis individuis, quam in toto universo, seu eorundem complexu, & hæc ea lege fiant, ut status futurus nascatur ex præsentibus omnibus præteritis (§. 53. 54. 58. 89. *Cosm.*); ita quoque in anima datur series successivorum, nempe perceptionum & appetitionum ac aversionum continuo variantium (§. 524. *Psych. rat.*) inter se, non obstante libertate animæ (§. 944. *Psych. emp.*), cujus quippe libera decreta pendent a lege appetitus & aversionis (§. 889.

890. 904. 907. *Psychol. empir.*), connexorum , ita ut status futururus nascatur ex præsente mediantibus præteritis , quemadmodum ex demonstratione liquet. In mundo igitur , perinde ac in anima datur series mutationum continuarum , ita ut cur sequentes insint intelligatur per antecedentes, & sequentes adeo per antecedentes sint præscibiles. Atque adeo præscibilitatis idem fundamentum est in mundo materiali atque in anima. Sola tamen præscibilitas nondum ratio sufficiens est actualis præscientiæ in Deo, quemadmodum nuda possibilitas nondum ratio sufficiens est , cur mundus hic adspectabilis & animæ nostræ existant. Cave igitur ne demonstrata præscibilitate tum ex parte objecti, tum ex parte Dei existimes, præscientiam Dei jam esse sufficienter probatam, ut id probatum sit, quod in hoc argumentum difficillimum.

§. 235.

Cur cogitationes sint præscibiles.

Quoniam cogitationes sunt ea omnia, quæ nobis consciis in anima fiunt (§. 23. *Psychol. empir.*), consequenter non minus appetitiones & aversiones , quam perceptiones , quarum nobis sumus consciis ; quæcunque vero in integra serie perceptionum ac appetitionum & aversionum continentur , in se & Deo præscibilia sunt (§. 234.); patet omnino *cogitationes nostras esse in se atque Deo præscibiles.*

In anima nostra plura insunt quam cogitationes , dantur enim in eadem & perceptiones , & appetitiones ac aversiones, quarum sibi conscia non est , quemadmodum ex iis , quæ per omnem *Psychologiam* rationalem ostendimus , abunde intelligitur , sit ita quod *Cartesiani* contrarium videatur non sine manifesto damno , cum ideo rationem eorum , quæ in anima contingunt , reddere nequeant. Præscibilitas adeo cogitationum non omnem in anima præscibilium numerum exhaurit.

§. 236.

Præscibilitas eorum in se, & Deo præscibilis, & per statum quemlibet unius elementum

In omni elemento rerum materialium status quilibet est & Deo præscibilis, & per statum quemlibet unius elementi

menti status futurus ceterorum omnium per tempus omne subsequens in-
 turum totius mundi & in se, & Deo præscibilis. Etenim in omni sunt &
 elemento ex statu præsentem colligi potest, qualis sit futurus (§. statuum
 200. *Cosmol.*). Status igitur cujuslibet elementi futurus in se mundi per
 præscibilis est (§. 231.). *Quod erat primum.* ea.

Jam idea mundi, quæ est in intellectu divino, refert ele-
 menta rerum materialium singula, cum omni mutationum serie,
 quæ in unaquaque est (§. 200.). Quamobrem cum Deus sibi
 conscius sit omnium eorum, quæ in idea ista continentur (§.
 187.), ita ut omnia eidem sint aperta, tectum nihil (§. 180.);
 status vero cujuslibet elementi in se præscibilis sit per demon-
 strata num. 1. idem quoque Deo præscibilis esse debet. *Quod*
erat secundum.

Porro ex statu quolibet elementi cujuscunque intelligi por-
 est, qualis sit futurus ceterorum omnium elementorum totius-
 que mundi per omne ævum futurum (§. 214. *Cosmol.*); status
 igitur futurus elementorum omnium totiusque mundi per omne
 ævum subsequens in se præscibilis est per statum quemlibet
 elementi cujuscunque (§. 231.). *Quod erat tertium.*

Jam idea mundi in Deo repræsentat elementa singula re-
 rum materialium cum omni mutationum serie, quæ in ipsis est,
 ita coordinata, quomodo mutationes unius pendent a mutatio-
 nibus ceterorum (§. 200.). Unde porro ut paulo ante num. 2.
 infertur, per statum unius elementi præsentem Deo esse præsci-
 bilem statum futurum omnium ceterorum elementorum per
 omne ævum subsequens totiusque hujus mundi adspectabi-
 lis. *Quod erat quartum.*

Qui doctrinam de elementis rerum materialium, qualem
 in Cosmologia tradimus, vel non capiunt, vel non probant;
 ii propositionem præsentem ab antecedentibus minime pen-
 dentem prætermittere possunt salva veritatum concatenatio-
 ne. Nostrium tamen fuit hæc addere non modo in gratiam
 eorum, quibus elementa ista non sunt invisa, ne quid præ-
 termittatur, quod ab iis jure requiri poterat; sed & in gra-
 tiam

tiam ceterorum, ut videant principiorum nostrorum, etsi ipsis minime probatorum, cum Theologia naturali consensum sicque liberentur a suspitione nescio cuius periculi inde Theologiae naturali imminentis. In hypothese elementorum, quam in Cosmologia stabilivimus, praescibilitas futurorum in mundo adspectabili non est nisi praescibilitas statuum in singulis elementis quoad Deum, quod ut clarius appareat, sequentem adhuc addimus propositionem.

§. 237.

Præscibibilitas dependens a statu futurorum in omnibus elementis. Omnes status singulorum elementorum eorundemque a se invicem dependentia in omnibus & in se, & Deo præscibiles sunt. Quicquid enim in mundo materiali contingit, & in se, & Deo præscibile est (§. 232). Jam corpora, ex quibus tanquam partibus componitur mundus (§. 119. *Cosmol.*), sunt substantiarum simplicium aggregata (§. 176. *Cosmol.*), nec quicquam in iis datur substantiale præter entia simplicia (§. 177. *Cosmol.*) & hinc dum sentimus, substantiarum simplicium mutationes in rinfecas, sed in unum confusas, nobis repræsentamus (§. 98. *Psychol. rat.*). Quamobrem necesse est, ut etiam mutationes simplicium istarum substantiarum, quæ sunt rerum materialium elementa (§. 182. *Cosmol.*), in se præscibiles sint. *Quod erat primum.*

Quoniam itaque Deus, dum mundum sibi repræsentat, elementa rerum materialium singula sibi repræsentat una cum omni mutationum serie, quæ in unaquaque est, eaque ita coordinata, quomodo mutationes omnes a ceterorum mutationibus pendent (§. 200), Deus vero sibi conscius est eorum omnium, quæ sibi repræsentat (§. 187.), & quæ repræsentantur mutationes præscibiles in se sunt *per demonstrata* ac ideo a Deo sibi repræsentari ab æterno potuerit; nemo non videret, omnes mutationes, consequenter status elementorum singulorum (§. 706. *Ontol.*), eorundemque a se invicem dependentia ab omnibus a Deo præscibiles esse. *Quod erat alterum.*

Quod

Quod status elementorum singulorum eorundemque dependentia ab omnibus sint præscibiles in se, ex ipsa quoque elementorum natura demonstrari potest. Etenim elementorum status internus continuo mutatur ea lege, ut præsens rationem contineat sequentis (§. 197. *Cosmol.*), & ex quolibet statu, qui tanquam præsens sumitur, intelligitur, qualis sit futurus (§. 851. 56. *Ontol.*). Quamobrem qui elementorum istorum naturam atque essentiam, & hinc nexum istum perspicit, is novit; quales status successive actu esse possint in singulis elementis, antequam existant, adeoque in se præscibiles sunt (§. 231.).

Si quis differentiam inter mundum intelligibilem & sensibilem supra (§. 203.) expositam perpenderit; is facilius comprehendet, verum præscibilitatis fundamentum in elementis rerum materialium esse quærendum & per horum naturam omnia in hoc universo esse præscibilia: immo agnoscat, præscibilitatem hoc pacto demum explicari, qualis in Deo habet locum, cum ad mundum sensibilem animum advertens in concipienda præscibilitate tacite quid admittat, quod nonnisi humano more de Deo dici potest.

§. 238.

Recordatio de Deo dicta denotat cognitionem præteritorum, seu scientiam visionis, qua Deus novit, quæ præterita sunt. Hinc *recordabile* vocatur, cujus recordatio possibilis, seu quod tale est, ut tanquam præteritum agnosci possit. *Recordatio de Deo quo sensu dicatur.*

possibilitatem recordationis hic evincemus: id quod eodem modo fieri potest, quo præscibilitatem evicimus. Quod vero in Deo actu detur, suo demum loco ostendemus.

§. 239.

Quæcunque in mundo materiali contingunt, & in se, Quæ in Deo recordabilia sunt. Quæcunque in mundo materiali materiali

contin-
gunt. cur
sint recor-
dabilia.

riali contingunt, cum unum eorum non existat alio existente, ipso autem existere definente existere denuo incipiat aliud, in successivorum numero sunt (§. 569 *Ontol.*). Enimvero in mundo quocunque, quemadmodum in hoc adspectabili (§. 54. *Cosmol.*), successiva inter se continuo connectuntur (§. 48. *Cosmol.*), adeoque quodcunque ponitur, rationem habere debet in antecedente & hujus ratio denuo quaerenda est in eo, quod ipsum antecedit ac ita porro (§. 10. *Cosmol.*). Qui adeo nexum integrum rerum perspicit, is utique intelligit (§. 56. *Ontol.*), id quod in rerum serie ponitur non posse poni nisi antea positis successive omnibus, quæ existere, antequam ipsum existeret (§. 118. *Ontol.*), hoc est, positis omnibus præteritis (§. 228.). Quæcunque igitur in mundo materiali contingunt, in se recordabilia sunt (§. 238.). *Quod erat primum.*

Jam vero Deus cognoscit omnia possibilea tanquam in systemata relata (§. 155.) eaque distincte (§. 156.). Quamobrem cum in istiusmodi systemate successiva sint inter se connexa (§. 48. *Cosmol.*); Deus quoque nexum istum perspicit (§. 38. *Psychol. empir.*). Quamobrem cum ei quæ in mundo materialia cōtingunt, recordabilia sint, qui omnem successivorum nexum perspicit *per demonstrata*; eadem quoque Deo recordabilia esse debent. *Quod erat secundum.*

Nimirum non repugnat ex parte objecti, neque ex parte Dei tanquam subjecti, ut, si quidem in serie quacunque successivorum quædam sumuntur tanquam præsentia, alia in eadem serie spectentur tanquam præterita. Equidem scientia præteritorum vulgo nihil difficultatis habere creditur & haud ægre admittitur, propterea quod homines quoque recordentur præteritorum, quæ viventibus ipsis contingere. Enimvero si eam ex parte Dei consideres, eodem cum præscientia nititur fundamento, nec facilius concipitur, quomodo fieri possit ut Deus recordetur præteriti, quam ut præsciat futura. Atque ea ratio est, cur quoque ostendamus, quod eadem in serie rerum successivarum, quæ datur in mundo materiali,

rum

rum etiam ea, quæ datur in animabus & singulis rerum materialium elementis, sint recordabilia, quæ præscibilia. Et demonstrationum collatio patefacit recordabilitatis ac præscibilitatis fundamentum esse unum idemque. Recordatio in Deo eo modo concipi requirit, quo datur in nobis beneficio memoriæ a sensibus & imaginatione pendentis: neque enim Deo sensus & imaginatio competunt (§. 157.). Ipse ideam totius universi, quam unico actu producit (§. 201.), simul intuetur (§. 160.), atque ab omni æternitate (§. 184. 74.). Quamobrem quæritur, quomodo mundo, qui ideæ isti responderet, jam existente, fieri possit, ut Deus in eadem distinguat præsens a præterito atque futuro. In hanc rationem inquiremus deinceps: hic vero tantummodo ostendimus, in omni rerum serie successiva ita a se invicem dependere, ut per eam dependentiam præsens a præterito & futuro distingui possit, scilicet ut omnem seriem intime perspicuens affirmare possit respectu ipsius B considerari in hac serie A tanquam præteritum, C tanquam futurum. Hæc si attente consideres, clarum erit probata recordabilitate & præscibilitate successivorum in qualibet serie, tum ex parte objecti, tum ex parte subjecti, seu Dei cognoscentis, nondum probatam esse ipsam præscientiam ac recordationem a priori, quemadmodum a philosopho fieri debet. Ceterum quæ supra annotavimus, cum de præscibilitate effectuum in mundo materiali ageremus (§. 232.), hic quoque repetenda.

§. 240.

Per libera animæ decreta status anteriores ejus in se & Per libera Deo recordabiles sunt. Ex iis, quæ supra (§. 233.) demonstravimus, cum de præscibilitate eorundem decretorum ageremus, singula in statibus animæ rationem sufficientem habere, cur insint, adeoque non poni nisi statibus istis positis (§. 118. *recordabilis*, *Ontol.*). Quamobrem qui intelligit, quale decretum nunc ponatur, & eorum, quæ sunt, rationes sufficientes perspectas habet; is ex decreto libero perspicit, quales ante fuerint status animæ, cum decerneret, consequenter quales fuerint status
(*Wolffii Theol. Naturalis.*) *Ee* *præ-*

præteriti (§. 228.). Per libera igitur animæ decreta status ejus anteriores recordabiles sunt (§. 238.). *Quod erat unum.*

Similiter ex iis, quæ supra (§. 233.) demonstravimus, cum de præscibilitate liberorum decretorum animæ ageremus, patet, Deum perspicere liberorum istorum decretorum rationem sufficientem. Quare Deo recordabiles esse debent status animæ anteriores per decreta ejusdem libera, quæ tanquam nunc præsentia sumuntur. *Quod erat alterum.*

Qui præscibilitatem liberorum decretorum animæ intellexit, ei nihil difficultatis facessit statuum anteriorum animæ per libera decreta recordatio. Quamobrem illam ante meditetur, quam de hac cogitet, qui eam animo comprehendere decrevit. Ceterum quæ de præscibilitate & recordabilitate tum in genere, tum etiam liberorum decretorum in specie dicuntur, nobis quoque usui esse possunt, ubi quæstio incidit, quatenus & futurorum, & præteritorum tam in mundo materiali, quam in animabus cognitio auxilio rationis in potestate sit, utut hætenus scientiis nondum satis excultis futurorum & præteritorum cognitio quoad nos arctis admodum limitibus constringatur, propterea quod nonnisi ratiocinando ad utramque pervenire datur, præsertim si ea non immediato intervallo a præsentibus absint.

§. 241.

Cur libera animæ decreta recordabilia.

Libera animæ decreta sunt in se & Deo recordabilia. Libera enim animæ decreta concurrunt ad determinandas perceptiones seriei perceptionum ac appetitionum & aversionum inexistentes (§. 527. *Psychol. rat.*), quæ in unaquaque anima datur (§. 524. *Psychol. rat.*), adeoque ad rationem sufficientem pertinent (§. 116. *Ontol.*). Unde absque iis intelligi nequit, cur hæc in ista serie potius insint perceptiones claræ, quam aliæ (§. 56. *Ontol.*). Quamobrem cum ratio sufficiens colligi possit ex notione rei, cujus sufficiens est ratio, adeoque illa per hanc sit cognoscibilis, quemadmodum nobis in omni philo-

philosophia solenne est & utique accidit, (§. 886. *Ontol.*), dum effectus dari inquirimus causam (§. 727. *Log.*); ex iis, quæ animæ insunt, perceptionibus agnoscitur potest, talia insuisse decreta libera. Quoniam itaque decreta libera animæ agnoscuntur tanquam præterita (§. 228.); eadem in se recordabilia sunt (§. 238.). *Quod erat unum.*

Cum Deus omnia distincte cognoscat, quæ præter ipsum cognitu possibile sunt (§. 156.); distincte etiam cognoscere debet, quænam animæ perceptiones ab ejusdem libris decretis pendeant, cum hæc dependentia in cognoscibilium numero sit *per demonstrata*. Quoniam itaque novit, quod hæc insint in serie perceptionum & appetitionum atque aversionum perceptiones, has quoque ante eidem inesse debere appetitiones & aversiones, consequenter & decreta libera; libera animæ decreta Deo recordabilia sunt (§. 238.). *Quod erat alterum.*

Recordabilitas liberorum animæ decretorum exemplis quotidie obviis confirmatur, etsi ea in proximis acquiescant, seu plerumque in talibus, unde perceptiones immediate pendent. Pone nimirum sermonem incidere de ædificio alicubi magnifice exstructo & Titium istud a se visum tibi describere. Hinc utique colligis, eundem ibi locorum fuisse, ubi ædificium exstructum est, cum alias visu id percipere minime potuisset. Enimvero ut quis se conferat aliquem in locum, seu iter in urbem peregrinam faciat, absque libero decreto animæ non fit, consequenter hoc influit in inexistentiā ideæ istius ædificii in anima Titii. Quamobrem ex inexistentiā perceptionis in anima agnoscitur inexistisse liberum aliquod decretum. Ceterum hæc decretorum recordabilitas usui est in philosophia morali, quemadmodum præscibilitas, præsertim ubi de conjectandis hominum moribus quæstio incidit.

§. 219.

Quæcunque in serie integra perceptionum ac appetitionum atque aversionum uniuscujusque animæ continentur, ea in la in se ie
Et 2 *Se modifico*

tionum animæ recordabilia. se ¶ Deo recordabilia sunt. Quæ enim per facultates animæ possibilia sunt, in eadem actuantur per certas leges (§. 76. *Psychol. rat.*) & ex hisce legibus reddi potest ratio specialis actualitatis perceptionum ac appetituum (§. 77. *Psychol. ration.*). Tota igitur perceptionum ac appetitionum atque averfionum series ita comparata est, ut unum ideo insit, quia alia infuisse ponuntur. Quamobrem ex una perceptione intelligi potest, cur hæ præcedere debeant perceptiones & appetitiones ac averfiones, antequam huic in illa serie locus esse possit (§. 56. *Ontol.*). Quodsi ergo hæ perceptio vel appetitio & averfio ponatur jam actu inesse, adeoque tanquam præsens spectetur (§. 228.); quæ ante inesse debere intelliguntur, quam eidem in serie perceptionum ac appetitionum atque averfionum sit locus, spectantur ut præterita (§. cit.), consequenter non repugnat, ut per id, quod in anima præsens est, agnoscantur omnia præterita. Quæcunque igitur in serie modificationum animæ continentur, in se recordabilia sunt (§. 238.). *Quod erat unum.*

Jam vero Deus cum omnia cognoscat distincte, quæ præter ipsum cognitu possibilia erant (§. 156.): ea quoque cognoscere debet, unde recordabilitas eorum, quæ in serie integra modificationum animæ continentur, pender. Sunt igitur & ipsi singula in ista serie contenta recordabilia. *Quod erat alterum.*

Recolenda hic sunt, quæ de analogia animæ atque mundi materialis supra annotavimus (§. 234.), cum ea huic doctrinæ haud parum lucis affundat. Si enim integram seriem successivorum in mundo integramque modificationum seriem in aliqua anima tibi sistas tanquam præsentem, & nunc cogites inter singula intercedentem, vi cujus intelligitur, cur unum in una serie alia præcedat, alia sequatur; & præscibilitatis, & recordabilitatis fundamentum illico patefcer. Sit istiusmodi series A. B. C. D. E. F &c. In hac B non existere
pon

posse intelligitur, nisi ante extiterit A, adeoque ex iis, quæ A insunt, cognoscitur, cur sequi debeat B, ex iis vero, quæ ipsi B insunt, perspicitur, cur præcedere debeat A. Idem dicendum est, de ipso C respectu ipsius B, de ipso D respectu ipsius C, de ipso E respectu ipsius D & ita porro, consequenter de ipso C respectu ipsorum A & B simul, de ipso D respectu ipsorum C, B & A simul & vice versa quoad successionem de ipso D respectu ipsorum E & F simul & ita porro. Quod si jam D consideres tanquam præsens, evidens est respectu ipsius jam C, B & A spectanda esse tanquam præterita, ex adverso autem E, F &c. tanquam futura. Quamobrem qui integram rerum successivarum inter se connexarum seriem perspicit, is nihil in ea deprehendit, quod non sit in se recordabile ac præseibile, ac ideo idem quoque sibi recordabile atque præseibile agnoscit. Cum in singulis elementis dentur series mutationum (§. 198. *Cosmol.*) inter se connexarum (§. 197. *Cosmol.*); eadem demonstratio ad elementa quoque pertinet. Atque ita generaliter citra omnes ambages & præseibilitas, & recordabilitas tam ex parte objecti cujuscunque, quam ex parte Dei cognoscentis evinci poterat. Consultius tamen duximus in re ardua & intricata per ambages incedere, quæ claritatem pollicentur, quam in generali demonstratione acquiescere, quæ quoad plerosque cum obscuritate conjuncta est, nec satisfacit nisi paucis.

§. 243.

Omnes hominis cogitationes sunt & in se, & Deo recordabiles. Quoniam enim in cogitationum numero sunt, quæcunque nobis consciis in anima fiunt (§. 23. *Psychol. empir.*); omnes perceptiones, appetitiones & aversiones, quarum nobis sumus consci, in cogitationum numero sunt. Enimvero nihil datur in tota serie perceptionum, appetitionum & aversionum animæ, quod non sit in se & Deo recordabile (§. 242.). Omnes igitur hominis cogitationes, & in se, & Deo recordabiles sunt.

Quæ supra (§. 235.) ad præscibilitatem cogitationum annotavimus; ea quoque hic repetenda veniunt.

§. 244.

Recordabilitas eorum In omni elemento rerum materialium status quilibet est *in se, & Deo recordabilis, & per statum quemlibet unius elementis* status præteritus ceterorum omnium per omne tempus retrocedens totiusque mundi *in se, & Deo recordabilis.* Cum in omni elemento ex statu præsentis colligi possit, qualis sit præteritus (§. 200. *Cosmol.*), quilibet status in quovis elemento in se recordabilis (§. 238.). *Quod erat primum.*

Quoniam itaque idea mundi, quæ est in intellectu divino, singula refert elementa rerum materialium cum omni mutationum serie, quæ in unaquaque est (§. 200.), Deus vero omnium eorum, quæ in idea ista continentur, sibi conscius est (§. 187.), ita ut ipsi omnia sint aperta, rectum nihil (§. 180.); Deus quoque intuitive cognoscens omnia (§. 207.), in statu præsentis perspicit omnes præteritos. Quilibet adeo status in quovis elemento Deo recordabilis (§. 238.). *Quod erat secundum.*

Porro ex statu quolibet elementi cujuscunque intelligi potest, qualis fuerat præteritus ceterorum elementorum omnium totiusque mundi per omne retro tempus (§. 214. *Cosmol.*). Per statum igitur quemlibet unius elementi status quilibet præteritus ceterorum omnium ac totius mundi per omne retro tempus recordabilis (§. 238.). *Quod erat tertium.*

Cum Deus in quolibet minimo, quod inest universo, cognoscat totum universum (§. 161.); in quolibet minimo quoque statum mundi totius quoad maxima, minima, consequenter etiam quoad singula elementa, præter quæ nihil substantiale in universo datur (§. 177. *Cosmol.*), per omne retro tempus cognoscere debet. Sunt igitur Deo per statum quemlibet

libet unius elementi status ceterorum omnium totiusque mundi per omne retro tempus præteriti recordabiles (§. 238.). *Quod erat quartum.*

Quæ supra (§. 236.) annotavimus, cum de præscibilitate elementorum ageremus, eadem hic quoque notanda veniunt. Addimus tamen hic, quæ & ibi locum habent, cum elementa rerum materialium aliqua admittere debeant, qualiacunque tandem illa sint, mutatis mutandis ad ea applicari posse, quæ de nostris evicimus, quamvis non semper opus sit ea sigillatim probari, cum elementa materialia in numero rerum materialium contineantur, adeoque de iis valeant, quæ de rebus materialibus in genere evincuntur, ut adeo sub istis tanquam species sub genere suo sumi, adeoque per consequentiam immediatam iis applicari possint, quæ de præscibilitate & recordabilitate modificationum rerum materialium demonstrata sunt. Nemo autem nobis vitio vertet, si sapit, quod cum nobis vera rerum materialium elementa videantur esse substantiæ simplices, quales in Cosmologia delineavimus, eadem quoque cognitioni Deo competenti vindicemus, ne quis ex nostra hypothese contra omniscientiam Dei excipere cum aliqua veri specie possit, quasi sufficienter probata non sit. Me autem vel tacente intelligitur, scientiam visionis, quæ Deo unanimi Theologorum & ipsius S. S. consensu tribuenda, in nostra elementorum hypothese fieri multo illustriorem: quod cum augeat venerationem Numinis, quemadmodum suo loco in Moralibus palam fiet, & unusquisque ex se ipso discere poterit, ubi veritatem istiusmodi elementorum in dubium haud vocat, tanto minus reprehendendum, quod omnem nostram cognitionem ad finem ultimæque summum Dei nempe gloriam transferamus. Felices judicandi sunt errore suo, qui ejus hunc experiuntur effectum.

§. 245.

Omnes status elementorum singulorum eorundemque a se Recordabiles invicem dependentia ab omnibus anterioribus & in se, & Deo litas dependentia sunt. Etenim elementorum status internus cont-
nuo tuum præ-

teritorum in omnibus elementis. nuo mutatur ea lege, ut præsens contineat rationem sequentis (§. 197. *Cosmol.*) & status singuli in omni elemento a se invicem dependent quoad existentiam (§. 199. *Cosmol.*). Quamobrem qui elementorum istorum essentiam atque naturam perspicit: is novit, per quosnam status anteriores determinetur quilibet, qui tanquam præsens sumitur, & hujus adeo ab istis dependentiam (§. 116. 851. *Cosmol.*) perspicit, cum per essentiam status isti possibiles sint (§. 160. *Ontol.*) & per naturam ad actum perducantur (§. 145. *Cosmol.*). Sunt igitur status omnes elementorum singulorum, quatenus sumuntur tanquam præteriti, eorundemque a se invicem dependentia in se recordabiles (§. 238.).

Quod erat unum

Idem quoque eodem modo ex eo, quod quicquid in mundo materiali contingit in se recordabile sit (§. 239.) ostendi potest, quo supra (§. 237.) evicimus eorundem præcibilitatem in se.

Jam Deus mundum sibi repræsentans elementarum materialium singula sibi repræsentat, una cum mutationem serie, quæ in unaquaque est (§. 200.). Quamobrem cum Deus sit sibi conscius eorum omnium, quæ sibi repræsentat (§. 187.); videre utique debet, per quosnam status anteriores determinetur quilibet, qui tanquam præsens sumitur, huiusque adeo ab istis dependentiam (§. 116. 851. *Ontol.*). Sunt igitur status omnes elementorum singulorum eorundemque a se invicem dependentia ab omnibus anterioribus Deo recordabiles (§. 238.).

Quod erat alterum.

Recolenda hic sunt, quæ de facilitanda notitia præcibilitatis mutationum in elementis animum advertendo ad differentiam inter mundum intelligibilem & sensibilem monuimus (*not.* §. 237.). Etenim ad recordabilitatis facilitandam notitiam similiter faciunt.

§. 245.

Deus per scientiam simplicis intelligentiæ cognoscit in se Quomodo præscibilia & recordabilia qua talia simulque ut sibi præscibi Deus præscibilia & recordabilia. Per scientiam simplicis intelligentiæ Deus scibilitatem cognoscit, quod non repugnet, ut quid existat (§. 227.) & qui & recordabilem cum idæ rerum Deo essentielles sint (§. 188.), ab æterno scibilitatem (§. 74.). Novit igitur Deus per scientiam simplicis intelligentiæ, quod, si quæ rerum series, vel quod elementum rerum materialium in eadem, aut anima quædam una cum ista sumatur ut extitura, omnes mutationes ad istam seriem spectantes vel in isto elemento ac anima ista ad actum perducendas, utpote in se & ipsi præscibiles per ipsam Dei rerumque naturam (§. 232. & seqq.), esse & in se, & ipsi præscibiles. *Quod erat unum.*

Immo ex demonstratis novit porro per simplices intelligentiæ scientiam, si qua rerum series consideretur ut existens, vel etiam elementum aliquod ad eam pertinens, aut anima quædam spectetur ut existens, & sive in illa serie, sive in hoc elemento, aut hac anima sumatur quid ut præsens, mutationes anteriores, utpote in se & ipsi recordabiles per ipsam Dei rerumque naturam (§. 239 & seqq.), esse & sibi & in se recordabiles. *Quod erat alterum.*

Nimirum præscibilitas & recordabilitas ex parte objecti, & ex parte subjecti, seu Dei cognoscentis in numero possibile est, quatenus scilicet nec naturæ rerum, nec naturæ Dei repugnat, ut utraque detur. Quamobrem cum Deus per scientiam simplicis intelligentiæ; quæ possible sunt, ut possible cognoscat, sive de intrinseca, sive extrinseca possibilitate sermo fuerit (§. 221.); mirum non est, quod ea, quæ ad scientiam visionis pertinent (§. 230.), per scientiam simplicis intelligentiæ ut possible agnoscantur. Ceterum hinc patet, per ea, quæ de præscibilitate & recordabilitate rerum demonstrata sunt, possibilitatem scientiæ visionis

tionis a priori esse evictam, ut adeo nihil supersit, quam ut suo loco adhuc ostendamus, cur actu in Deo detur.

§. 247.

*Cur Deus
omnia sin-
gularia co-
gnoscat.*

Deus cognoscit omnia singularia. Cognoscit enim omnia possibilis tanquam in systemata redacta (§. 155.), consequenter eadem sibi repræsentat tanquam inter se connexa quoad coëxistentiam, & quoad successionem (§. 142.). Quamobrem cum ea coëxistant, quæ alio existente una existunt, & ea sibi invicem succedant, quæ alio existente nondum existunt, postea tamen exitura sunt (§. 569. *Ontol.*) & vi nexus unum possibile contineat rationem sufficientem coëxistentiæ, vel successionis alterius (§. 10. *Cosmol.*); Deus possibilis eo sibi repræsentat modo, quo alia simul existere, alia vero post se invicem existere posse intelliguntur. Quoniam vero quicquid existit vel actu est, id omnimode determinatum est (§. 226. *Ontol.*); Deus sibi possibilis tanquam omnimode determinata repræsentat. Enimvero ens omnimode determinatum est ens singulare (§. 227. *Ontol.*). Repræsentat igitur sibi Deus omnia entia singularia, consequenter cum sibi conscius sit eorum omnium, quæ sibi repræsentat (§. 187.); omnia entia singularia cognoscit.

Idem etiam sic ostenditur Deus cognoscit omnia possibilis tam absolute spectata, quam in systemata relata (§. 155.); cognoscit igitur eorum determinationes essentielles & attributa (§. 143.): cognoscit etiam causarum seriem, per quas existentia determinatur & modorum seriem, qui successive toto durationis tempore eidem inexistunt (§. 144.). Enimvero quicquid rei inest, id inter essentialia, vel attributa, vel modos locum habet (§. 149. *Ontol.*). Cognoscit adeo Deus omnia, quæ rei insunt, si ut existens spectatur, consequenter singula, quæ rebus intrinseca de iisdem affirmari possunt (§. 205. *Log.*), adcoque

eoque omnia sibi repræsentat tanquam omnimode determinata (§. 112. 225. *Ontol.*). Quamobrem cum ens singulare sit, quod omnimode determinatum est (§. 227. *Ontol.*); Deus omnia singularia cognoscit.

Equidem per se clarum plerisque videri poterat, quod Deus cognoscat omnia singularia, si supponatur, quod superius evictum (§. 141.), Deum cognoscere omnes mundos posibles. Videntes enim, quæ in mundo hoc adspectabili existunt, esse entia singularia, nec universalia entia alicubi tanquam existentia deprehendi; illico supponunt mundum esse complexum entium mere singularium. Et si vero in his nihil insit falsi, non tamen ea adest claritas, quæ satisfacit philosopho, cui evidentia demum nascitur ex notionum legitima evolutione, ut, quod affirmatur, nulli exceptioni, nulli dubitationi obnoxium sit, nec absque ratione, cum quæ confuse percepta nobis vel certissima videntur, distincte evoluta haud raro erroribus implicita deprehenduntur. Quamobrem non inutile nobis videtur demonstrare, quod mundus sit complexus entium mere singularium, per ipsam ejus essentiam, ut inde cognitio singularium Deo tribuenda inferri possit, præsertim cum eadem propositione ad alia intelligenda & demonstranda nos habeamus opus.

§. 248.

Mundus quicunque possibilis est congeries entium singularium. Est enim series entium finitorum tam simultaneorum, quam successivorum inter se connexorum (§. 48. *Cosmol.*). Jam si ens quoddam concipiendum, primo loco in eo quædam ponenda sunt, quæ sibi mutuo non repugnant, quæ tamen non per alia determinantur, nec quorum unum per alterum determinatur (§. 142. *Ontol.*): quæ cum essentialia sint (§. 143. *Ontol.*); essentielles determinationes eidem insint necesse est. Jam cum attributa per essentialia determinentur (§. 146. *Ontol.*), eadem una cum essentialibus insunt constanter

(§. 119. 150. *Ontol.*); nec sine attributis ens quoddam concipi potest. Porro cur modi actu insint, ratio vel in modis antecedentibus, vel in ente alio ab eo, cui insunt, diverso aut pluribus istiusmodi entibus, vel denique partim in modis antecedentibus, partim in ente alio ab eo, cui insunt, diverso, vel pluribus etiam entibus aliis quaerenda (§. 160. *Ontol.*). Quamobrem cum entia ideo inter se connectantur, quatenus unum continet rationem sufficientem coëxistentiae, vel successionis alterius (§. 10. *Cosmol.*); entia finita, utpote quibus non omnia simul insunt, quae iisdem actu inesse possunt (§. 837. *Ontol.*), ideo connecti possunt, quod quoad modificationes pendent ab aliis (§. 851. *Ontol.*). Quamobrem cum mundus per nexum entium finitorum resultet (§. 48. *Cosmol.*); in mundo entia aliter concipi nequeunt, nisi cum suis essentialibus & attributis ac successive inexistentibus modis. Enimvero praeter essentialia, attributa atque modos non datur aliud, quod eni inesse possit (§. 149. *Ontol.*); consequenter cum essentialibus rerum (§. 300. *Ontol.*) & attributis eorundem immutabilia (§. 313. *Ontol.*), modi vero mutabiles sint (§. 314. *Ontol.*), adeoque diversi ejusdem entis finiti status per modos determinantur (§. 705. *Ontol.*), in mundo entia finita quoad singulos eorum status locum non habent nisi cum iis omnibus, quae de iisdem affirmanda sunt (§. 205. *Log.*), atque adeo quatenus omnimode determinata sunt (§. 112. 225. *Ontol.*). Quoniam itaque ens omnimode determinatum singulare est (§. 227. *Ontol.*); in mundo quocunque possibili enti finito locus non est, nisi singulari, atque adeo mundus ipse non est nisi entium singularium congeries.

Per demonstrationem praesentem pater, quomodo notio mundi ex ipsa notione entis a priori deducatur: id quod haud exigui momenti. Ceterum luculento hoc specimine probatur utilitas Ontologiae, qualem dedimus, cujus etiam usus per totam Theologiam naturalem elucet & in omnibus philosophiae

phix partibus deprehenditur egregius ac prorsus indispensabilis.

§. 249.

Res facti dicuntur singularia, quatenus spectantur ut existentia, sit ita quod nec existant, nec exiterint, nec exitura sint. *Res facti quatenam dicantur.*
Vocantur etiam *Facta* simpliciter.

Ita e. gr. idea mundi cujuslibet comprehendit res facti seu facta, quatenus ea, quæ repræsentat, considerantur tanquam existentia, aut si mavis, existibilia, sit ita mundum istum nunquam ad actum perductum iri, sed in statu possibilitatis nude perpetuo deliturum.

§. 250.

Quoniam mundus adspectabilis non continet nisi entia *Cur in* singularia (§. 248.), quæ vel exiterint, vel adhuc existunt, vel *mundo non* aliquando exitura sunt (§. 110. *Cosmol.*); *mundus hic adspecta-* *sint nisi res* *bilis non continet nisi res facti* (§. 249.). Et quia in mundo alio *facti.* quocunque similiter non continentur nisi singularia (§. 248.), quæ etsi nunquam exitura (§. 117.), tanquam existentia considerari tamen possunt, quod ipsis existentia minime repugnet, seu eorum existentia intrinsece possibilis sit (§. 133. *Ontol.* & §. 111. *Cosmol.*); *omnis mundus possibilis non nisi res facti seu facta continet.*

§. 251.

Et quoniam omnes mundi possibles omnia possible continent (§. 152.); consequenter omnia singularia (§. 248.), ad *Omnia facta cur* eoque facta omnia (§. 249.); Deus vero mundos possibles *Deus co-* omnes cognoscit (§. 141.); *Deum facta omnia seu res facti omnes* *cognoscere palam est.*

Nemo miretur, nos omnia in mundo referre ad facta, quasi insolito prorsus vocabuli significatu. Etenim si idem sumas eo significatu, quem communis loquendi usus eidem tribuit; quæ in mundo sunt, aut primum a Deo facta sunt,

quemadmodum deinceps ostendemus ; aut deinde a natura rerum , aut ab hominibus fiunt. Mundi adeo cujuslibet cognitio factorum cognitio est , quatenus ea cognoscimus , quæ existunt , aut existerent in aliqua serie , si ipsa ad actum perduceretur.

§. 252.

Cognitio historica dicitur cognitio factorum.

*Historica
cognitio
quenam.*

Non differt hæc definitio ab ea quam alibi dedimus (§. 3. *Disc. pralim.*), etsi verbis instituto præsentī magis convenientibus eandem efferamus. Etenim quando diximus , cognitionem eorum , quæ sunt atque fiunt , sive in mundo materiali , sive in substantiis immaterialibus , historicam appellari ; ecquis non videt ad hoc cognitionis genus non referri nisi facta (§. 249.)?

§. 253.

*Cognitio
historica
Dei.*

Deus omnem cognitionem historicam habet. Deus enim facta omnia cognoscit (§. 251.). Quare cum factorum cognitio sit historica cognitio (§. 252.) ; Deus cognitionem historicam omnem habet.

Idem etiam sic ostendi poterat lucidius. Ideæ divinæ cum mundos omnes possibiles repræsentent (§. 181.) ; in iis continentur omnia facta , quotcunque possibilia sunt (§. 248 249.). Enimvero quia Deus sibi conscius est eorum omnium , quæ sibi repræsentat (§. 187.), seu quæ in idels ipsius continentur (§. 48. *Psychol. empir.*) ; omnium factorum , quotcunque possibilia sunt , sibi conscius est. Factorum cognitio historica est (§. 252.). Deus igitur omnem cognitionem historicam habet.

Demonstrationem posteriorem , utut a priori non dissidentem , si eam in sua principia evolvas , eo fine addimus , ut extensio cognitionis historicæ divinæ exemplo percipiatur , ne abjecte de eadem sentiant , qui non ex notionibus determinatis , sed vocum etymologia lucula quadam notionum confusarum earumque per inconstantiam loquendi vagarum per-
fusa

fusa de rebus iudicant, mox reprehensuri talia de Deo demonstrari, quæ ipsum parum deceant. Nobis in moralibus usui erit nosse distinctius, nullum concipi posse cognitionis genus, quod Deo non sit tribuendum.

§. 254.

Historicus dicitur, qui cognitione historica instructus, seu *Historicus* factorum cognitionem habet (§. 252.).

Communiter historia ad facta hominum restringitur & ^{quinam} *fit*. facta imprimis publica aut minimum personarum publicarum. Non tamen usui loquendi contrariatur, ut ad naturæ quoque facta & facta ipsius Dei extendatur. Diximus eam in rem alibi (§. 744. & seqq. *Log.*), quæ satisfaciunt, cum de libris historiis ageremus, eos in genera ac species divisuri. Legi igitur ibidem possunt.

§. 255.

Deus est historicus absolute summus. Etenim Deus o- *Deus quam-*
mnem habet cognitionem historicam (§. 253.). Quamobrem *lis fit Hi-*
cum historicus sit, cui cognitio historica est (§. 254.); nec ma- *storicus.*
jor concipi possit historicus, quam cui omnis cognitio historica est, seu qui omnia novit facta possibile (§. cit.); Deus Historicus absolute summus est.

Recordatus eorum, quæ ad propositionem, qua Deo historicam cognitionem vindicabamus, annotavimus, cave ne nomen Historici Deo indignum pronuncies, propterea quod homines Historici nomine insigniri solent. Qua enim, quæso, consequentia exsculpes, Historici nomen dedecere Deum, quod tribui soleat hominibus? Intellectus nomen tribuitur facultati nostræ cognoscitivæ, quatenus distincta est cognitio (§. 275. *Psychol. empir.*). Equis vero est, qui ideo indignum Deo iudicet, si ipsi tribuatur intellectus, sit ita intolletum divinum ab humano tantummodo differre, quantum differt cognitio Dei historica a cognitione historica hominum? Nonne Deus vocari solet Architectus summus, nobis vernaculo sermone der grösste Werkmeister, nemine irascente, etsi Archi-
recto-

tektorum nomen tribuatur hominibus, quorum architectonica scientia ab ea, quæ Deo est, tantundem differt, quantum cognitio historica hominum a cognitione historica divina? Deo omnem historicam cognitionem, quæ dari potest, tribuendam esse æquis negari auit (§. 253.)? Cum igitur ipsi competant ea, quæ definitionem historici ingrediuntur (§. 254.), eccur non debet convenire definitum, everso omni ratiocinandi fundamento (§. 349. *Log.*)? Si res, quæ nomine indigitatur, Deum non dedecet, nec potest dedecere nomen, quod esse rei illius signum constat (§. 36. *Log.* & §. 952. *Ontol.*). Unum idemque est, siue dicas Deum esse historicum absolute summum, siue affirmes, Deo omnem esse cognitionem historicam, quæ concipi potest, aut factorum omnium, quotquot concipi possunt, notitiam, cum voce Historici non aliud significetur. Ergo idem efferre verbis multis licet, quod paucis aut vocabulo unico indicare nefas videtur. Suo, quo superbiunt, acumine abundant, qui ita nugantur.

§. 256.

*Cognitio
Dei histo-
rica S. S.
conformis.*

Deo juxta S. S. competit historica cognitio omnis. Deo in S. S. cognitionem factorum, adeoque historicam (§. 252.) tribui, adeo notum est, ut id probare velle supervacaneum merito habeatur. Immo si quis eandem legit, is animadvertet, nullum occurrere facti genus, cujus notitia non tribuatur Deo. Ut vero appareat juxta S. S. nihil factorum cognitioni historicæ divinæ esse subducendum, idem omnino edifferendum paulo uberius. Docente Christo *Matth. X. 29. 30.* Deus novit, nullum passerum huini cadere ipso inscio: eidem perspectum est, quot sint capilli capiti nostro, consequenter novit, quod unus eorum evulsus sit, qui aderat ante. Loquitur Christus de passeribus tanquam re vili. Quærit enim, *nonne duo passeres asse veneunt?* & mox addit auditores suos allocutus; *multis passeribus meliores estis vos.* Immo ad capillos provocat tanquam rem magis abjectam, cui nullum statuitur

nuitur pretium, quale tamen passerum est, etsi vile. Quamobrem patet Deo hic vindicari cognitionem historicam factorum vilissimorum, cum providentia divina, quæ a Christo circa res viles, immo vilissimas occupata ibidem urgetur, absque historica cognitione concipi non possit, sed hanc unque necessario supponat. Quoniam itaque Christo Doctore nullum factum, qualecunque tandem illud sit, existimari debeat adeo vile atque abjectum, ut ejus cognitio Deum dedecere judicetur; juxta ejus mentem historica Dei cognitio, quæ est factorum (§. 252.), ad omnia promiscue facta extendenda venit.

Abunde igitur patet, quæ de cognitione historica Deo tribuenda dicta sunt, a Scriptura sacra minime abhorreere, ita ut, si quis vel ex Christo ipso quæsierisset, quinam sit Historicus absolute summus; is non aliter respondisset, quam Deum eundem esse: immo quemadmodum idem affirmabat *Matt. XIX. 17*, neminem esse bonum, nisi Deum, ita citra omne dubium ipsius stylo dicendum, neminem esse Historicum, nisi Deum, quatenus nomen hoc ex omni parte tueri nequit nisi Deus solus.

§. 257.

Entia universalia in systema aliquod redigi possunt. Et. Entium enim entia universalia constituuntur similitudine partiali individuorum vel minus universalium, seu eo, quo unum individuum in systema alteri individuo, vel ens unum minus universale alteri minus universali simile est (§. 232. Ontol.), adeoque vel species (§. 233. Ontol.), vel genera inferiora, vel superiora sunt (§. 234. Ontol.). Quamobrem cum notio speciei componatur ex notione generis, sub quo ea continetur & differentia specifica (§. 241. Ontol.) & notio generis inferioris ex notione generis superioris & determinationibus sibi propriis (§. 242. Ontol.); entia universalia ita sibi invicem subordinari possunt, ut, quæ superiori collocantur loco, contineantur in iis, quæ
(*Wolfii Theol. Naturalis*) Gg ipsis

ipsis substant, atque adeo seriem quandam successivorum constituent, in qua a genere summo descendendo, numerus inferiorum ab illo eodem gradu remotorum continuo augetur, donec perveniatur ad species infimas. Enimvero quæ sunt ejusdem speciei eadem habent attributa & eosdem modorum possibilitates proximas, itemque remotas conditionate enunciatae (§. 268. *Ontol.*) & quæ ejusdem generis sunt, ea eadem habent attributa communia easdemque modorum possibilitates, quæ attributorum communium instar sunt (§. 269. *Ontol.*). Quamobrem cum modi ut actu inesse intelligantur, non modo rationem in modis antecedentibus, verum etiam in ente alio ab eo, cui insunt, diverso aut pluribus istiusmodi entibus, immo subinde partim in modis antecedentibus, partim in ente alio ab eo, cui insunt, diverso, vel pluribus etiam entibus aliis habeant (§. 160. *Ontol.*); entia universalia ita sibi invicem coordinari possunt, ut in eo, quod uni jungitur, contineatur ratio modi alicujus coëxistentis: quod idem de pluribus intelligitur, siquidem pluribus ad hoc opus est. Enimvero quia modi plures eidem enti universali non repugnant, quorum ratio non in eodem ente alio, aut minimum non semper eodem modo modificato continetur; locus continuo entium universalium variari potest, ut omnes successive emergant modi, qui unicuique enti universali non repugnant. Et quoniam modi quidam supponunt modos alios, tanquam ante inexistentes (§. 160. *Ont.*), variatio ista coëxistentiæ universalium ita fieri potest, ut ex statu antecedente, utpote qui per modos tanquam mutabiles (§. 314. *Ont.*), constituitur (§. 705. *Ont.*), intelligatur, cur alius sequatur, consequenter sequens in antecedente rationem sufficientem habeat (§. 56. *Ontol.*). Patet adeo entia universalia inter se connecti posse, tum quatenus ut coëxistentia spectantur, tum quatenus modum coëxistentiæ quasi aliter modificata variant (§. 10. *Cosmol.*). Quamobrem cum entia in systema
redi-

redigantur, quando inter se connectuntur, tum qua coëxistentiam, tum qua successionem (§. 142.); entia universalia in systema aliquod referri possunt.

Pendet propositionis præsentis veritas tota a nexu entium universalium, quem esse possibilem in disciplinis loquuntur propositiones hypotheticæ determinatæ. Etenim in his prædicatum non potest tribui ob ea sola, quæ ipsi constanter insunt, sed determinationes præterea extrinsecæ requiruntur, ut penitus intelligatur, cur prædicatumtribuendum sit subjecto, cumque ex determinationibus, quæ notionem subjecti ingrediuntur, ratiocinando colligatur veritas, nexus entis universalis unius cum aliis sive mediatas, sive immediatus, nec non status unius subjecti cum alio statu innotescit. Atque hinc inprimis intelligitur, quod in propositionis præsentis demonstratione diximus de ente universali ut modificato spectando, quod antequam ut tale spectari possit, variæ admittendæ sunt variationes coordinationis entium universalium, vi cuius ens universale unum fit dependens ab aliis multis ob dependentiam immediatam ab hoc ente universali. Qui ad demonstrationes Geometriæ vel elementaris animum advertit, dependentiæ entium universalium a se invicem notionem quandam habet, ad quam recurrere potest, ut, quæ dicuntur, recte intelligantur. Atat quoniam in Mathesi pura nobis nonnisi res est cum figuris, ubi earum ad se invicem spectantur relationes; in philosophia autem cum entibus realibus nobis est negotium, quibus non modo determinationes necessariae eademque constantes insunt, verum etiam successive aliæ mutabiles inesse posse intelliguntur; nos vero propositiones hypotheticas determinatas in philosophia nostra exhibemus & ex notione subjecti prædicatum ratiocinando, perinde ac in Mathesi fieri solet, colligimus; qui ad nostras propositionum demonstrationes animum advertit, ei lucidior multo nascetur idea dependentiæ entium universalium a se invicem tam mediatæ, quam immediatæ, & circa nexum eorundem nihil difficultatis eidem supererit.

§. 258.

Mundi rationalis definitio.

Si entia universalia in systema aliquod rediguntur, systema quod hinc prædit dicitur a nobis *Mundus rationalis*, qui adeo definiri potest, quod sit entium universalium inter se connexorum series variabilis.

Et si entia universalia existere nequeant (§. 235. *Ontol.*), quemadmodum singularia, quorum quicumque mundus possibilis congeries est (§. 248.), quam in sensibilem & intelligibilem ex parte cognoscentis distinguimus (§. 202.); hoc tamen non obstante fingi possunt ut existentia, quatenus præsentia cognoscenti intelliguntur, dum eorundem habet notionem. Et hac fictione admissa seriei variabilitas facilius concipitur, imaginatione non reluctante. Maximi momenti est, quemadmodum mox constabit, mundi rationalis notionem distinctam habere: negandum tamen non est, quod ad eam hætenus animum parum adverterint philosophi. Atque hinc est, quod nostro more non fuerint philosophati, quodque multi, mira mundi sensibilis atque intelligibilis & ejus, quem rationalem dicimus, atque illius in se spectati atque ad nos relati confusione, negaverint contingentium in mundo non minus materiali, quam in animabus demonstrabilitatem non tantummodo quoad nos, verum quoad ipsa contingentia, & hinc ex disciplinis philosophicis proscripserint omnes demonstrationes, quibus nos aditum concessimus, mundi sensibilis non minus & intelligibilis, quam rationalis notionem intimius perspicere conati. Neminem puto offendet mundi rationalis appellatio: etsi enim homo dicatur rationalis, quatenus ipse rationis particeps est eaque uti potest; non tamen obstat, quo minus etiam quidpiam ideo rationale appellamus, quod beneficio rationis, qualem homini tribuimus (§. 483. *Psychol. empir.*), agnoscat, quemadmodum Apostolus doctrinam christianam hoc rationale appellat 1. *Petr.* II. 2. Si quis tamen vocabulum convenientius comminisci possit, per nos id faciat: de nomine nemini litem movebimus, neque cum ipso ferram contentionis recipiæbimus. Nobis appellatio ista non adeo incon-

veniens

veniens videtur. Quemadmodum enim substantiæ simplices mundum intelligibilem & phænomena ex ipsis tanquam fonte orta mundum sensibilem constituunt; ita entia universalia mundum rationalem absolvunt. Mundus intelligibilis ex nexu substantiarum simplicium, qui in Cosmologia transcendentali evincitur; mundus sensibilis ex nexu phænomenorum, quem Physicus exponit; mundus vero rationalis ex nexu entium universalium, qui fundamentum est omnis nexus & in mundo intelligibili & sensibili, aut, si mavis, a nexu mundi intelligibilis & sensibilis abstrahitur, resultat. Hanc similitudinem sufficere arbitramur, ut mundus intelligibilis, sensibilis atque rationalis tanquam eidem generi subistere intelligantur, atque adeo commune quoddam participant nomen.

§. 259.

Mundum rationalem dicimus immergi mundo intelligibili ac sensibili, quatenus nonnisi mundo intelligibili ac sensibili inexistit: ut adeo immersio hic sumatur pro inexistencia in re alia. *Mundi rationalis immersio in sensibilem & intelligibilem.*

Non attendimus in denominatione modum inexistentiæ: neque enim negari potest, mundum, quem dicimus rationalem, per sensibilem atque intelligibilem ita diffundi, ut sui diffusionem utrumque permeet.

§. 260.

Mundus rationalis intelligibili & sensibili totus immersus est. Quoniam enim entia universalia similitudine individuum, vel minus universalium constituuntur (§. 232. Ontol.), similitudo vero in identitate eorum consistit, per quæ entia a se invicem discerni debebant (§. 195. Ontol.); quæ in notione entium universalium continentur, ipsis individuis seu rebus singularibus insunt, cumque genera & species, quæ sunt entia universalia (§. 233. 234. Ontol.), per essentialia determinentur (§. 247. Ontol.), in numero essentialium deprehenduntur, quæ

Quod datur.

singularibus insunt. Jam quia modi rationem sufficientem habent in entibus aliis ab illis, quibus insunt, diversis (§. 160. *Ontol.*); ea, unde redditur ratio modorum, quæ euti cuidam universali sub certa conditione conveniunt, in singularibus itidem continentur, consequenter singularibus ea insunt, per quæ universalis inter se connectuntur. Quoniam itaque mundus, quatenus sensibilis & intelligibilis, est congeries entium singularium; ea, quæ ad mundum rationalem pertinent (§. 258.), sui quadam diffusionem mundo sensibili & intelligibili inexistunt, consequenter mundus rationalis intelligibili & sensibili immersus est (§. 259.).

Propositio hæc non inutilis est, ea enim opus habemus, ut intelligatur, quomodo Deus mundum rationalem cognoscat & cur cum intellectu perfectissimo, qui Deo competit (§. 168.), connectatur ratio absolute summa, ut taceam hinc multam lucem affundi iis, quæ ad nostram cognitionem universalem & rationem, quæ nobis est, spectant. Pater vero ex propositione præsentem cum mundo adspectabili, qui Deo intelligibilis, nobis vero sensibilis est (§. 205.), una existere rationalem & ideam mundi rationalis a sensibili & intelligibili, sed penitus cognitio, abstrahi posse. De hoc mundo rationali multa doceri poterant scitu non inutilia; sed nobis in præsentem ea sufficiant, quæ ad rationem divinam intelligendum sufficiunt, cum non alio fine de eodem hic agamus.

§. 261.

Idea mundi rationalis includit.

Idea mundi intelligibilis, quæ datur in Deo, ideam mundi rationalis includit. Etenim idea mundi, quæ in Deo datur, intelligibilis est (§. 204.). Quamobrem cum mundo intelligibili mundus rationalis totus immergatur (§. 260.), consequenter singula, quæ ad eundem spectant, eidem inexistant (§. 259.); idea mundi, quæ in Deo datur, ad mundum rationalem spectantia singula repræsentat. Idea igitur mundi rationalis in idea mundi, quæ in intellectu divino est, includitur (§. 48. *Psychol. empir.*).

Liquet

Liquet igitur, mundum intelligibilem & rationalem una eademque idea in intellectu divino exhiberi, etsi mundus rationalis non sit idem cum intelligibili. Id vero non tantummodo de mundo adspectabili intelligendum; verum etiam de mundo omni possibili reliquo. An vero mundus rationalis nonnisi unicus sit & diverso saltem modo mundis intelligibilibus diversis immergatur, jam non disquirimus, cum integram mundi rationalis theoriam tradere nobis jam propositum non sit, neque institutum præsens postulet, ut hanc discussionem nostram faciamus. Quoniam tamen, quæ ad ideam mundi rationalis spectant, ab idea mundi intelligibilis abstrahi actu quodam mentis non repugnat; salva rei veritate ideas mundi intelligibilis & rationalis tanquam duas diversas ideas considerare licet, quemadmodum & in aliis facimus.

§. 262.

Deus totum mundum rationalem & si qua quoad diversos Mundos mundos intelligibiles occurrit, diversitatem omnem cognoscit. rationalis
 Etenim idea totius mundi rationalis in idea mundi, quæ in *cur Deo* Deo datur, includitur (§. 261.), adeoque Deus mundum *ra* *cognitus.* rationalem sibi intra intelligibilem repræsentat (§. 48. *Psychol. emp.*). Quoniam igitur omnes mundos posibles cognoscit (§. 141.), aut, si mavis, in Deo continuo existit idea non modo hujus, qui existit mundi, sed ceterorum quoque omnium possibilem (§. 181.); si qua datur in mundo rationali diversitas sive quoad modum immersionis (§. 259.), sive quoad ipsa entia universalis, ex quibus constat (§. 258.), aut modos, qui in iisdem inexistere possunt, & unde eorundem inter se nexus pender, quemadmodum ex demonstratione possibilitatis entia universalis in systema redigendi patet (§. 257.), eandem omnem sibi repræsentat. Quamobrem cum Deus sibi sit conscius eorum, quæ sibi repræsentat (§. 187.); totum mundum rationalem & si qua in eodem quoad diversos mundos intelligibiles occurrit, diversitatem cognoscit omnem, qualiscunque tandem ea fuerit.

Equi-

Equidem jam in superioribus (§. 162.) evicimus, Deum omnes veritates universales cognoscere, adeoque cum mundo rationali insint veritates universales, utpote quæ sunt generum & specierum (§. 54. Log.), entium universalium (§. 232. & seqq. Ontol.), ex quibus mundus rationalis componitur (§. 258.), idem jam superius probatum videri poterat. Enimvero entia universalia superius spectantur absolute, hic vero tanquam in systema aliquod relata (§. 257. 258.). Quemadmodum igitur nondum probatum existimari potest, Deum omnia possibilea tanquam in systemata redacta sibi repræsentare, ubi constat eundem cognoscere possibilea omnia in se spectata, cum eorundem nexus possibilis omnis nondum in aprico ponatur (§. 142.); ita similiter ex eo, quod Deus cognoscat omnia entia universalia cum singulis, quæ unicuique tribui possunt, prædicatis absolutis, vel hypotheticis, nondum patet entium universalium inter se nexus, consequenter nec inde constat, utrum Deus entia universalia sibi repræsentet tanquam in systemata relata (§. 257.), aut mundum totum rationalem cognoscat (§. 258.), nec ne. Talia monemus non modo ad avertendas præcoces sciolorum censuras, quas suo jure contemnere poteramus, verum etiam ad excitandum & juvandum illorum acumen, quos solida rerum cognitio juvat. Neque enim adeo facile est in philosophicis cum acquirere acuminis gradum, quo omnis in judicando præcipitania, infelix illa errorum genitrix (§. 660. Log.), evitatur, quemadmodum suo exemplo probant vel Mathematici, ubi ad Mathesin mixtam, seu cognitionem naturæ mathematicam pedem promovent: id quod perspectum est illis, qui disciplinarum ad eam pertinentium, Opticæ præsertim ac Astronomiæ, ortum & progressum exacta mentis lance ponderant.

§. 263.

*Mundi rationalis
amplitudo.*

Mundus rationalis omnes veritates universales continet.
Mundus enim rationalis est entium universalium omnium inter se connexorum series (§. 258.). Quamobrem cum entia universalia sint genera & species, sub quibus singularia continentur

tur (§. 232. & seqq. *Ontol.*); mundus rationalis omnia repræsentat genera omnesque species, sub quibus omnia singularia in omnibus mundis possibilibus continentur. Et quoniam quod enti inest, vel inter essentialia, vel attributa, vel modos locum habet (§. 149. *Ontol.*), sine essentia vero ens esse non possit (§. 144. *Ontol.*) & attributa constanter inest, modi inesse & non inesse possint (§. 150. *Ontol.*); in mundo rationali exhibentur omnia genera omnesque species cum suis essentialibus, attributis ac modorum possibilitatibus. Porro quia entia universalia connectuntur, quatenus ratio ejus, quod uni inest, continetur in alio (§. 10. *Cosmol.*), ens autem universale non habet rationem in alio, nisi quatenus ipsi inesse ponitur hic modus (§. 160. *Ontol.*), adeoque quatenus ens unum quoad modos, quos recipere valet, dependet ab aliis (§. 851. *Ontol.*); in mundo rationali entia universalia repræsentantur quoad omnem dependentiam a se invicem. Et quoniam denique mundus rationalis spectari debet tanquam immersus omni mundo intelligibili & sensibili (§. 260.); omnes quoque entium universalium relationes continere debet. Jam cum essentialia dent definitionem generum & specierum (§. 172. *Log.*); in mundo rationali omnes continentur definitiones eademque essentialia (§. 192. *Log.*). Quoniam porro attributa (§. 220. 221. *Log.*) modorumque possibilitates, quæ per modum attributorum insunt, de subiecto prædicantur sub conditione essentialium (§. 222. *Log.*), adeoque sub conditione definitionis *per demonstrata*; quæ vero de subiecto sub conditione definitionis prædicantur, ea prædicantur absolute (§. 225. *Log.*); mundus rationalis omnes continet propositiones categoricas (§. 216. *Log.*) easque determinatas (§. 320. *Log.*). Quia denique modi atque relationes & quod in re quadam non concipitur possibile, nisi præsupposito ejus modo, de subiecto nonnisi sub conditione enunciantur (§. 217. *Log.*), conditio vero ista statum subiecti

exprimit, in quo pradicatum ei tribui potest (§. 228. *Log.*); mundus rationalis omnes propositiones hypotheticas (§. 218. *Log.*) easdemque determinatas continet (§. 320. *Log.*). Quoniam itaque præter definitiones, ac propositiones categoricas & hypotheticas nulla datur veritas universalis, quemadmodum non modo ex demonstratis in propositione præfente patet, verum etiam ex omni theoria Logicæ & systematis Mathematicorum videre est; mundum rationalem continere veritates omnes universales palam est.

Hanc propositionem probe notari velim, ut penitus intelligantur, quæ de ratione divina mox sumus dicturi, inprimis vero differentia inter rationem divinam & humanam rite percipiatur.

§. 264.

*Veritatum
universalium
cognitio
in Deo.*

Quoniam Deus totum mundum rationalem & diversitatem omnem, si qua quoad diversos mundus intelligibiles occurrit, cognoscit (§. 262.), mundus vero rationalis omnes veritates universales continet (§. 263.); denuo patet, quod supra (§. 162.) jam alio modo demonstratum fuit, *Deum omnes veritates universales cognoscere.*

Atque per hanc demonstrationem evanescit dubium, quod circa superiorem, quemadmodum monuimus (*not.* §. 162.), superesse poterat, num Deo omnis omnino veritatum universalium cognitio tribuenda sit. Eodem nimirum modo jam patet, Deum cognoscere omnes veritates universales, quas in oppositione ad facta etiam *veritates* simpliciter appellamus, quo constat eundem omnia facta cognoscere (§. 251.).

§. 265.

*Identitas
cognitionis
mundi ra-
tionalis
cum philo-
sophica.*

Cognitio mundi rationalis est cognitio philosophica. Cum enim mundus rationalis sit series entium universalium inter se connexorum (§. 258.), entia vero inter se connectantur, quatenus ratio eorum, quæ uni insunt, continetur in altero & ea, quæ

quæ enti uni insunt, inter se connectantur, quatenus ratio unus, quod inest, continetur in altero, quod una inest (§. 10. *Cosmol.*); qui mundum rationalem cognoscit, is perspicit rationem eorum, quæ sunt vel fiunt, aut, ubi cum universalibus nobis est negotium, cur quid esse, vel fieri possit. Quamobrem cum cognitio rationis eorum, quæ sunt, vel fiunt, aut, quod perinde est, cur quid esse vel fieri possit, philosophica sit (§. 6. *Discurs. pralim.*); cognitionem mundi rationalis esse eandem quam philosophicam dicimus patet (§. 349. *Log.*).

Constat adeo objectum cognitionis philosophicæ esse mundum rationalem, quemadmodum historicæ, mundum intelligibilem quoad Deum, mundum sensibilem quoad homines. Hæc versatur circa facta, illa circa veritatem, quæ factis inest.

§. 266.

Deus omnem cognitionem philosophicam habet. Deus enim totum mundum rationalem cognoscit (§. 262.) omnibus mundis intelligibilibus immersum (§. 260.). Quamobrem cum cognitio mundi rationalis sit philosophica (§. 265.); Deus utique omnem cognitionem philosophicam, quæcunque dari vel concipi potest, habet. *Cognitio philosophica Dei.*

Per notionem mundi rationalis liquet, quando Deo omnem tribuimus cognitionem philosophicam, non aliud affirmari, quam quod Deo perspecta sint omnia entia universalis quoad omnes determinaciones intrinsecas & extrinsecas cum mutua eorundem a se invicem atque a se ipsis dependentia, consequenter nil tribui eidem, quod summam intellectus divini perfectionem dedecet.

§. 267.

Philosophus dicitur, qui cognitione philosophica instructus, consequenter cum cognitio philosophica sit cognitio rationis eorum, quæ sunt, vel fiunt, seu cur quid esse aut fieri *Philosophi definitio.*

possit (§. 6. *Disc. praelim.*), qui rationem reddere potest eorum, quæ sunt, vel fiunt, seu cur quid esse, aut fieri possit.

Definivimus alias (§. 46. *Disc. praelim.*) philosophum per eum, qui rationem reddere potest eorum, quæ sunt, vel fiunt, & hac definitione hic quoque poteramus esse contenti. Quoniam tamen superius historicum definivimus per eum, qui cognitione historica instructus (§. 254.), & in doctrina de omniscientia Dei cognitionem philosophicam opponimus cognitioni historicæ, consultius nobis videtur philosophum definire per eum, qui cognitione philosophica instructus, ostensa tamen definitionum æquipollentia, ne significatum vocabuli contra legem philosophici styli (§. 143. *Disc. praelim.*) immutasse videamur, dum eidem conformiter eundem retinemus (§. 141. *Log.*).

§. 268.

Deus qualis sit philosophus.

Deus est philosophus absolute summus. Etenim Deus omnem cognitionem philosophicam habet (§. 266.). Quamobrem cum philosophus sit, cui philosophica est cognitio (§. 267.), nec major concipi possit philosophus, quam cui omnis cognitio philosophica est; Deus philosophus absolute summus est.

Recordatus eorum, quæ ad propositionem, qua Deo cognitionem philosophicam omnem vindicamus, annotavimus (§. 266.), cave ne nomen Philosophi Deo indignum pronuncies, propterea quod abjecte de philosophia sentias, philosophiam æstimans vel ex cognitione eorum, qui dicuntur philosophi, vel ex monito Apostoli Col. II. 8. male intellecto & applicato. Ecquis enim est qui nesciat dici philosophos, qui non sunt, & sæpe quæ recte dicta sunt ab iis, qui merito suo philosophi appellantur, absurda videri hominibus a cognitione philosophica remotis? Non unus itaque committi potest error, si quis ex cognitione eorum, qui dicuntur philosophi, philosophiæ pretium statuere velit. Quod monitum Apostoli attinet, nostrum jam non est inquirere, an ipsi sermo

mo sit, quemadmodum *Hammondo*, celebri Paraphrastæ novi testamenti, videtur, de Gnosticorum erroribus, qui doctrinam christianam principiis philosophiæ *Pythagorica* admixtis corrumpebant non sine omni specie. Sit enim, quod tamen probatum non est, Apostolo esse sermonem de philosophia, quæ nihil vitii habet; ex verbis tamen ejus satis superque apparet, ipsum locutum de principiorum philosophicorum applicatione adeoque eo in casu, quo vera intelligitur malefacta. *Videte enim, inquit, ne quis vos decipiat per philosophiam & inanem fallaciam.* Perversa autem philosophiæ applicatio ad corrumpenda vel evertenda religionis christianæ principia philosophicorum principiorum falsitatem & noxitudinem minime arguit, sed eorum potius abusum redarguit. Ponamus enim Antitrinitarium impugnare Trinitatis mysterium idque rejicere tanquam impossibile, propterea quod implicat unitatem esse numerum ternarium (§. 340. *Ontol.*). Equis inde inferet, falsum esse principium, quod unitas ternarius non sit, nec ternarius unitas esse possit? Abutitur hoc principio in se vero, qui vi ejusdem in notione Trinitatis contradictionem latentem eruere conatur, Trinitatem confundens cum Tritheismo, qui essentia divina ter posita resultat, quemadmodum ternarius ex unitate ter repetita. Error igitur non in principio est, sed in notione Trinitatis, quam pervertit, ut in Tritheismum degeneret. Sit itaque Apostoli temporibus non defuisse homines, qui principiis philosophicis abusi doctrinam christianam corrumperunt, & ipsum monere suos ut sibi caveant ab istis hominibus; non tamen hinc sequetur cognitionem philosophicam esse falsam & noxiam, fugiendam illis, qui Christo nomen dederunt, ne purioris evangelii doctrinæ jacturam faciant. Si quis monet auditores suos, ne se decipi patiantur ab hæretico, qui dictis S.S. abutitur ad incrustandos errores suos; nihil inde concluditur adversus ipsam Scripturam sacram. Si quis vero fuerit Grammaticus, qui cum scholæ natus sit, rebus philosophicis tanquam alienis importune se immisceat, & ex etymologia argumentatus, quod philosophus vi vocis denotet amatorem sapientiæ, nomen philosophi Deum dedecere

infert, is & in propria principia peccat, & suum quoque in Grammatica desiderari patitur acumen. Etenim cum amator sapientiae sit, qui ex eadem voluptatem percipit (§. 654. *Symbol. empir.*); negari autem non possit, quin Deus ex eadem voluptatem percipiat, seu eadem delectetur, nec Deum dedecere dici possit, quod eadem delectetur; ecquis, quæso, serio dixerit, dedecere Deum, si summus sapientiae amator dicatur? Quodsi excipias, modestia singulari veterum contigisse, quod philosophi, quam σοφοί seu sapientes appellari maluerint, imperfectæ cognitionis memores, qua animi hominum imbuuntur, Deo autem, cui perfectissimus tribuendus intellectus (§. 168.), haud quaquam convenire nomen, quod affectarunt veteres, ne arrogantes existimarentur; ex etymologia vocabuli non amplius argumentaris, sed ex ratione eadem extrinseca, manifesto indicio, quod significatum vocabuli, quem vi originis obtinet, confundas cum ratione, cur veteribus ob significatum etymologicum placuerit vocabulum: quæ confusio, quod acumini Grammatici e diametro repugnet nemo negabit, nisi cui ipsi acies ingenii obtusa fuerit. Nos vero, qui in foro non Grammaticorum, sed philosophorum versantes ex notionibus rerum deducimus prædicata, quæ ipsis tribuimus, leges ratiocinandi fundamentales sanctissime observamus, cum Deum philosophum absolute summum esse demonstramus (§. 349. *Leg.*). Ceterum utilitate sua non caret, quod noverimus Deum esse philosophum absolute summum: etenim hinc intelligimus, nos colere philosophiam veri nominis, utpote quæ ipsi Deo tribui possit, ac ideo vanum esse omnem metum, quasi philosophia homini Deum sincera mente colenti noxia sit, ut usus alios non minus præclaros taceamus, suo tempore veluti sponte sua sese manifestaturos.

§. 269.

*Intuitiva
mundi ra-
tionalis co-
gnitio in
Deo.*

Deus mundum rationalem intuitive cognoscit. Idea mundi, quæ datur in Deo, ideam mundi rationalem includit (§. 261.), adeoque Deus mundum rationalem intra intelligibilem,

bilem, cujus quippe in eadem idea existit vi demonstrationis superioris de diversitate ideæ mundi divinæ ac nostræ (§. 205.), sibi repræsentat (§. 48. *Psychol. empir.*). Quoniam itaque sibi semper conscius est eorum, quæ sibi repræsentat (§. 187.) omnium quoque eorum, quæ ad mundum rationalem spectant, sibi conscius est. Enimvero res intuitive cognoscitur, quatenus cognoscens sibi conscius est ideæ ejus, quam habet (§. 286. *Psychol. empir.*). Deus igitur omnia ad mundum rationalem spectantia, seu, quod idem est, mundum rationalem intuitive cognoscit.

Cognitionis hujus intuitivæ umbra quædam etiam in nobis deprehenditur tanta nimirum ea est, quantam admittit differentia, quæ inter facultatem cognoscendi limitatam & prorsus illimitatam intercedit. Sane nomina appellativa entia universalia denotant, veluti homo non Paulum, Jacobum, Johannem, Margaretham, Hedwigem, Christianam, sed hominem in genere, hoc est, subjectum determinationum communium masculis ac feminis singulis significat. Jam cum Paulum vel Margaretham videmus eidemque nomen hominis tribuimus, ejus ideam ad individua aliorum hominum, quos vel nunc una videmus, vel antea vidimus, referentes determinationes communes, quarum subjectum vocabulo hominis indigitatur, seu homo a nobis dicitur, in ideis individuum simul percipimus, ceteris ab iisdem diversis, atque sic ens universale, quanquam confuse, intuitive tamen cognoscimus in singularibus, quibus totum immergitur (§. 259.). Quod si jam quæ de individuis quibusdam generis humani & homine in genere a nobis confuse percepto dicuntur, ad omne ens singulare in quocunque mundo possibili extendantur, & confuse perceptioni substituantur prorsus distincta; prodibit idea mundi totius rationalis, qualem in Deo dari ostendimus (§. 262.) & intuitiva universalium in eodem cognitio a nobis percipitur, quatenus facultas cognoscendi limitata repræsentare valet, quod omnem limitationem respuit. **Clariora hæc evadent iis, qui probe perpenderit de rationis**

cuius

ciniis confusis a nobis demonstrata (§. 354. 355. *Psych. empir.*). Ne tamen quicquam prætermittamus, quod ad intuitivam mundi rationalis cognitionem Deo in propositione præsentē vindicatam intelligibilem quodammodo reddendam facere potest, modum cognitionis intuitivæ universalium mox paulo distinctius exponere libet, utut ex iis, quæ modo diximus, jam videatur manifestus.

§. 270.

*Veritatum
universalium
cognitio in
Deo.*

Deus omnes veritates universales intuitive cognoscit. Ex enim Deus mundum rationalem intuitive cognoscit (§. 269.). S d mundus rationalis omnes continet veritates universales (§. 263.). Ergo Deus utpote distincte cognoscens omnia, nihil confuse (§. 156.), adeoque omnia distinguens, quæ in idea mundi diversa intunt (§. 38. *Psychol. empir.*), omnes veritates universales intuitive cognoscit.

Differt in eo cognitio divina ab humana. Nos enim per paucas veritates universales intuitive cognoscimus, propterea quod pauca tantummodo individua ad idem genus vel eandem speciem spectantia simul intuemur & quæ in iis percipimus plerumque nonnisi confuse, nihil vero adæquate percipimus. Præterea quæ intuitive cognoscimus, eorum veritas tantum non semper vi demonstrationis, minimum cujusdam generalis, ex principiis ontologicis contextæ, qualibus in Arte inveniendi locus esse debet, rigidatur.

§. 271.

*Quid sit
nexus ve-
ritatum u-
niversalium.*

Nexus veritatum universalium consistit in eo, quod ex veritate propositionis unius universalis vel plurium universalium cognoscatur veritas propositionis universalis alterius. Propositiones universales sunt, in quibus speciebus atque generibus tribuitur prædicatum, quod singulis speciei individuis, vel singulis generis speciebus harumque individuis sive absolute, sive sub data determinatione convenit (§. 242. *Log.*). Enim-

vero

vero speciebus insunt determinationes, quæ notionem generis ingrediuntur (§. 241. *Ontol.*) & generi inferiori insunt, determinationes, quæ notionem generis superioris ingrediuntur (§. 242. *Ontol.*). Quamobrem ex iis, quæ insunt speciei, intelligitur, cur ea ad hoc genus sit referenda, & ex iis, quæ insunt generi inferiori, cur sub genere aliquo superiori constituantur. Jam cum porro speciei ideo convenient prædicata absoluta vel conditionata, quod sub hoc genere contineatur & eidem quoad alterum casum superaccedat conditio, sub qua generi prædicatum conditionatum competit, ac idem quoque dicendum sit de genere inferiori respectu superioris (§. 348. *Log.*); ex eo, quod constet, generi convenire aliquod prædicatum, intelligitur, idem etiam speciei vel generi inferiori convenire debere, consequenter propositio universalis, quæ de genere inferiori aut specie quadam quid enunciat, intelligitur vera, quod vera agnoscatur propositio universalis, qua idem prædicatum eodem modo tribuitur generi superiori vel proximo, & quod verum esse constet, subjectum propositionis illius universalis esse genus inferius vel speciem sub genere hoc superiori vel proximo substantem. Veritas adeo propositionis universalis unius rationem sufficientem agnoscit in aliis (§. 56. *Ontol.*), consequenter propositiones universales, quatenus veræ sunt, aut, si mavis, veritates universales inter se connectuntur (§. 10 *Cosmol.*), patetque per demonstrata nexum eorundem in eo consistere, quod ex veritate propositionis unius universalis vel plurium universalium cognoscatur veritas propositionis universalis alterius.

Veritates universales inter se connecti, alias jam evicimus (§. 482. *Psychol. empir.*), adeoque superfluum videri poterat, hic denuo probari, quod eorundem detur nexus. Enimvero ibidem nexum veritatum universalium stabilivimus a posteriori; hic vero, ubi docemus, in quonam consistat, eundem a priori deducimus. Probandum igitur omnino erat, non

(*Wolffi Theol. Naturalis.*)

Ii

alium

aliud esse possibilem per notiones rerum nexum, quam qualem hic evincimus, nec fingi quendam, qui non sit. Quodsi præsupponere visum fuisset veritates inter se esse connexas; propositionis præsentis veritas brevius ita evinci poterat. Veritates universales connectuntur *per hypoth.* adeoque una in altera vel in pluribus aliis rationem sufficientem habere debet (§. 10. *Cosmol.*), consequenter ex unius vel plurium propositionum universalium veritate intelligitur, cur alia quædam propositio universalis vera sit (§. 56. *Ontol.*), atque adeo nonnisi in eo consistere potest nexus veritatum universalium, quod ex veritate propositionis universalis unius vel plurium cognosci possit veritas propositionis universalis alterius.

§. 272.

*Cognitio
nexus ve-
ritatum
universalium
qualis
Deo tribu-
enda.*

Deus nexum veritatum omnium universalium intuitive cognoscit. Etenim Deus omnes veritates universales intuitive cognoscit (§. 270.), adeoque (§. 286. *Psychol. empir.*) quatenus in mundo rationali continentur (§. 263.). Veritates vero universales inter se connexæ sunt, ut ex veritate unius vel plurium intelligatur, cur alia vera (§. 271.); Deus igitur veritates illas ad se invicem referens cognoscere debet, quomodo unius veritas a veritate aliarum pendeat. Quamobrem nexum veritatum universalium intuitive cognoscit.

Atque in eo differt cognitio divina ab humana. Etenim nos vi dicti de omni & nullo, quod nititur nexu veritatum universalium, quemadmodum ex demonstratione anteriore (§. 271.) constat, ratiocinando (§. 353. *Log.*) nexum illarum veritatum detegimus; intuitive autem cognoscere non possumus. Ratio diversitatis hæc est, quod Deus totum mundum rationalem, veritates omnes universales continentem (§. 263.), cognoscat intuitive; nos autem intuitivam istius mundi cognitionem distinctam minime habeamus.

§. 273.

*Simul-
anea omni-*

*Deus omnes veritates universales simul cognoscit. Idea
inc-*

integra mundi unico actu producitur a Deo (§. 201.) Quam-um verita-
obrem cum idea mundi, quæ datur in Deo, ideam mundi ra- tam univer-
tionalis includat (§. 261.); idea mundi rationalis cum intelli- salium
bilis mundi idea, quæ in Deo datur (§. 200. 203.), una statim cognitio.
producitur, adeoque eodem isto unico actu. Quoniam itaque
Deus sibi semper conscius est eorum, quæ in idea mundi ra-
tionalis continentur (§. 187.), in eadem vero continentur ve-
ritates universales omnes (§. 263.). Deum veritates univer-
sales omnes simul cognoscere patet.

Equidem negari non potest, dum in superioribus proba-
vimus Deum omnia simul cognoscere, probatum quoque jam
fuisse, quod veritates universales omnes simul cognoscat: quo-
niam tamen probationes speciales eorum, quæ sub generalibus
propositionibus subsumi poterant, plus lucis affundunt intel-
lectui; ideo consultum est, ne in disciplinis philosophicis, ubi
proximas quærimus omnium rationes, speciales demonstratio-
nes negligantur: quod sicuti in aliis, ita in cognitione veritatum
universalium simultanea a nobis observatur.

§. 274.

*Deus non demum unum ex altero colligit, novit tamen, Cur Deus
quomodo quæcunque veritas universalis ex aliis colligi possit. ratiocinan-*
Etenim Deus omnes veritates universales (§. 270) earun- do verita-
demque nexum intuitive (§. 272.) atque simul cognoscit (§. tem non
273.). Quoniam itaque intuitive quid cognoscitur, quatenus co cognoscat,
gnoscens ideæ ejus, quod cognoscit, sibi conscius est (§. 286. bujus ra-
Psychol. empir.) ; Deus omnium veritatum universalium ea men cogno-
rundemque nexus simul sibi conscius est vi idearum, quæ in scendi modi
intellectu ipsius insunt. Non igitur opus habet, ut, quemad- ideam ba-
modum a nobis fieri solet (§. 363. 364. *Psychol. empir.*), ex beat.
duabus propositionibus cognitis terminum communem haben-
tibus formet ex terminis duobus diversis tertiam sibi adhuc
incognitam, consequenter propositionem unam non de-

num ex aliis colligit (§. 365. *Psychol. empir.*). *Quod erat unum.*

Porro cum Deus omnem quoque nexum veritatum universalium intuitive cognoscat (§. 272.), nexus vero veritatum universalium consistat in eo, quod ex veritate propositionis unius universalis vel plurium universalium cognoscatur veritas propositionis universalis alterius (§. 271.); Deus utique novit, quomodo veritas propositionis cujuslibet universalis cognoscatur ex veritate propositionum universalium aliarum. Enimvero veritas propositionis unius universalis cognoscitur ex propositionum aliarum veritate vi dicti de omni & nullo (§. 347. 348. 349. *Log.*), tanquam ratiocinandi lege (§. 373. *Psychol. emp.*), quemadmodum paulo ante latius deduximus, cum cognitionem intuitivam nexus veritatum omnium universalium Deo vindicaremus (§. 272.). Quamobrem cum dicto de omni & nullo nitantur omnes syllogismi (§. 353. *Log.*), quibus propositio una nondum cognita ex cognitis aliis insertur (§. 333. 334. *Log.*), seu colligitur (§. 365. *Psychol. empir.*); Deus novit utique, quomodo quæcunque veritas universalis ex aliis colligi possit. *Quod erat alterum.*

Equidem Deus distincte cognoscens omnem seriem perceptionum ac appetitionum, quæ insunt singulis animabus, cum in illarum numero quoque sint ratiocinia, quibus veritas una colligitur ex aliis, quæ tanquam ante cognita præsupponuntur, omnia quoque ratiocinia perspicere aut, si mavis, intuitive cognoscere debet, quæ ab ullo unquam homine facta sunt, aut nunc fiunt, aut fient in posterum, immo quæ fieri possent, si in aliis rerum seriebus ad actum nunquam perducendis contenti homines existere deberent. Supposita vero hac factorum cognitione ostendi porro poterat, quomodo Deus quoque perspiciat universalia, quæ ipsis insunt. Atat nec opus est, ut per ambages quæretur, quod in propinquo est, nec ut ratio cognitionis alicujus, quæ cedit in Deum, mediate ex cognitione humana petatur, cum id immediate ex
ipsa

ipsa notione cognitionis divinæ desumi possit. Cognitio possibilitatis cognoscendi veritatem propositionis unius ex veritate aliarum nullam involvit imperfectionem, etsi cognitio actualis veritatis propositionis unius ex veritate aliarum ab imperfectione libera non sit, quemadmodum confuse veritatum sensibilibum ideæ, quæ nonnisi mediantibus ideis animarum intellectui divino inesse possunt (§. 198.).

§. 275.

Deus omnia universalia eorundemque nexum cognoscit, Quomodo dum singularia intuens, quæ ipsis insunt, determinationes ad se Deus univocem refert. Etenim omnes cognoscit mundos possibles universalia (§. 141.), & quidem intuitive (§. 207) atque prorsus distincte cognoscit (§. 156.). Quamobrem cum mundus quicunque possibilis sit entium singularium congeries (§. 248) & qui ens singulare distincte cognoscit, singula singulatim enunciabilia in eodem distinguit (§. 38 Psychol. empir.); Deus quoque omnes determinationes intrinsecas, quæ unicuique singularium insunt, a se invicem discernit. Et quia simul cognoscit omnia (§. 160.); dum ea, quæ singulis insunt, ad se invicem refert, non potest non perspicere, quænam in pluribus eadem sint, consequenter omnem singularium similitudinem partialem cognoscit (§. 195. Ontol.). Similitudine partiali individuorum seu entium singularium constituuntur omnia universalia (§. 232 Ontol.). Deus igitur universalia omnia cognoscit, dum determinationes, quæ singularibus insunt, hæc intuens inter se confert. Quod erat
num.

Porro Deus singularia ista cognoscit tam absolute spectata, quam in systemata redacta (§. 155.). Jam si singularia in se spectantur, attributorum cum essentialibus & modorum singulorum quoad possibilitatem inexistenti intrinsecam cum essentialibus iisdem (§. 143.), quoad possibilitatem vero inexistenti extrinsecam cum determinationibus, quæ aliis

singularibus insunt, nexus cognoscitur (§. 144. *Theol. nat.* & §. III. *Cosm.*). Deus itaque distincte omnia cognoscens, nihil vero confuse (§. 156.); omnem quoque hunc nexum perspicere debet (§. 38. *Psychol. empir.*). Quamobrem cum simul cognoscat omnia (§. 160.); dum singularia intuens (§. 207.) eas, quæ ipsis insunt, determinationes ad se invicem refert, quæ quoad hunc nexum attributorum cum essentialibus & modorum cum determinationibus intrinsicis ejusdem entis atque entium aliorum in singularibus eadem sunt, cognoscit. Enimvero cum entia universalia similitudine (§. 232. *Ontol.*), adeoque determinationibus communibus singularium constituantur (§. 195. *Ontol.*); quatenus idem nexus attributorum cum essentialibus & modorum cum determinationibus tum ejusdem entis, cui modi isti inesse posse intelliguntur, tum aliorum entium, unde eorundem extrinseca pendet possibilitas, in pluribus singularibus deprehenditur, universalium omnino est. Deus igitur determinationes intrinsecas individuorum seu singularium, quæ intuetur, inter se conferens, omnem universalium nexum cognoscit. *Quod erat alterum.*

Atque hoc pacto manifestum esse existimo intuitivam omnium universalium atque nexus eorundem cognitionem, qualem Deo convenire in anterioribus evicimus, ut adeo ejusdem possibilitas a priori evicta (§. 722. *Log.*) nihil amplius difficultatis facessat. Non tamen inconsultum nobis videtur pro intellectus nostri modulo admirandum istum modum universalium in singularibus intuendi exemplo quodam illustrare, ut eum quodammodo intelligamus. Serviunt huic instituto formulæ quædam algebraicæ, veluti hæc, quæ servantur pro numeris polygonis (§. 210. 212. *Analys. finit.*), quibus jam usi sumus in notione universalium & singularium illustranda (*not* §. 72. 73. & 74. *Log.*). Etenim si formulam generalem pro omnibus numeris polygonis determinate explices per numeros omnes possibiles, prodibunt omnes numeri polygoni singulares in infinitum, quibus singulis inest, quod ad notionem

nem generis pertinet, eorum vero diversis seriebus inest, quod ad speciem, sub qua singuli cujuslibet speciei numeri continentur, pertinet. Attentione vero in omnes simul conversa & singulas determinationes intrinsecas a se invicem discretas inter se conferendo innotescit, quomodo intueri detur genus cum suis speciebus in singularibus. Si n sit latus numeri polygoni & a numerus angulorum, formula generalis pro omni numero polygono est $\frac{n^2(a-2)-n(a-4)}{2}$. Con-

stat n determinari posse per quemlibet numerum in serie naturali ab unitate incipiente; a vero per quemlibet numerum in eadem serie, sed incipiente a ternario (§. 208. *Analys. in fin.*). Quamobrem si n explices successive per 1. 2. 3. 4. 5. &c. in infinitum & a per 3. 4. 5. 6. 7. &c. in infinitum, ita ut samantur continuo termini correspondentes in utraque serie, veluti pro numero primo 1 & 3, pro secundo 2 & 4, pro tertio 3 & 5 &c. prodibit series omnium numerorum triangularium. Et eodem modo determinantur singuli quadrati, singuli pentagoni &c. in infinitum. Nobis sufficit exhibere partem seriei triangularium, partem similem seriei quadratorum similemque seriei pentagonorum.

Numeri triangulares.

$$\frac{1^2(3-2)-1(3-4)}{2}$$

$$\frac{2^2(3-2)-2(3-4)}{2}$$

$$\frac{3^2(3-2)-3(3-4)}{2}$$

$$\frac{4^2(3-2)-4(3-4)}{2}$$

$$\frac{5^2(3-2)-5(3-4)}{2}$$

&c. in infin.

Numeri quadrati.

$$\frac{1^2(4-2)-1(4-4)}{2}$$

$$\frac{2^2(4-2)-2(4-4)}{2}$$

$$\frac{3^2(4-2)-3(4-4)}{2}$$

$$\frac{4^2(4-2)-4(4-4)}{2}$$

$$\frac{5^2(4-2)-5(4-4)}{2}$$

&c. in infin.

Numeri

Numeri pentagoni.

$$\frac{1^2(5-2)-1(5-4)}{2}$$

$$\frac{2^2(5-2)-2(5-4)}{2}$$

$$\frac{3^2(5-2)-3(5-4)}{2}$$

$$\frac{4^2(5-2)-4(5-4)}{2}$$

$$\frac{5^2(5-2)-5(5-4)}{2}$$

&c. in infinit.

Quodsi oculum convertas in seriem triangularium, statim vides factores parenthesibus inclusos in numeris singulis esse eosdem & divisorem pariter eundem. Si numeros parenthesibus inclusos ad se invicem refers, positivum in utroque factore eundem esse, negativum vero in priore binarium, in posteriore quaternarium cernis. Si vero factores extra vinculum ad se invicem refers, in facto positivo factorem extra vinculum esse quadratum, in privativo aut, si mavis, subtractivo radicem ejusdem quadrati oculis patet. Nec minus hisce obvium est, ubi singulos seriei terminos inter se conferre volueris, radices progredi in serie numerorum naturalium ab unitate incipiente & quadratos esse numeros quadratos eorundem numerorum. Quod igitur inest universali notioni omnium numerorum triangularium, solo cognoscitur intuitu, quia singulares determinaciones, quæ insunt numeris singulis seu entibus singularibus, a se invicem distinguuntur, adeoque singularia distincte percipiuntur, & determinaciones a se invicem discretæ, tum quatenus eidem insunt singulari, tum quatenus insunt omnibus, inter se conferuntur. Quodsi jam singularia ad diversas series aut, si mavis, diversas species spectantia inter se conferas eodem modo, solo intuitu cognoscis, intra vinculum numeros privativos ubivis esse eosdem, eundem quoque esse divisorem, & qui extra vinculum sunt, eodem

eodem modo variari, quo in serie triangularium variantur. Unde denuo patet, quod inest universali notioni omnium numerorum polygonorum, seu notioni generis, solo intuitu cognosci, quia singularia distincte percipis & determinationes a se invicem discretas inter se confers, tum quatenus eidem singulari, tum quatenus omnibus singularibus ejusdem speciei, tum denique quatenus omnibus singularibus diversarum specierum insunt. Atque hoc pacto clarissime patere arbitror, quomodo universalia intuitive cognoscantur in singularibus, ita ut in ipso modo cognoscendi nil admittatur, nisi quod Deo convenire in superioribus evictum est. Etenim substitue numeris polygonis omnia entia singularia, quæ omnes ingrediuntur mundos possibiles (§. 248.) ; pone eadem ita representari, ut omnes determinationes intrinsecæ a cognoscente discernantur ; adde cognoscentem uno intuitu simul complecti omnia singularia in series suas relata, eo ordine, quem in singulis mundis tenent ; cognitio intuitiva universalium in singularibus, quam de numeris polygonis possibilem declaravimus, degenerabit in immensam illam, quæ Deo intellectu immenso prædito (§. 176.) competit. Ceterum hinc elucet novus quidam Matheseos usus in eruendis ideis eorum, quæ ad modum cognoscendi Deo tributum spectant. Etenim non difficile foret, cetera quoque, quæ de eodem demonstrata sunt, exceptis iis, quæ ab infinitudine pendent, ad speciem quandam intuitivæ cognitionis reducere, ut nobis insint idæ, quales differentia facultatis cognoscendi finitæ ac infinitæ admittit. Si Methaphysicæ imperitis usus hic exigui momenti videatur, & Mathematicum ignaris eodem clara obscuritati involvi existimentur ; nos tamen, quibus & mathematica & metaphysica perspecta sunt & qui ab idololatriæ Dianæ cultu alieni nullo cæco in eundem amore ferimur, & usum istum maximi facimus, & eundem iis, quæ tenebris involuta sunt, in aprium producendis, ut ea plenissima luce fulgeant, oppido inservire cognoscimus. Mirum vero videri non debet, formulas algebraicas habere posse hunc usum, ad quem eas transferimus. Reducunt enim ad cognitionem intuitivam, quæ abstracta sunt & alias eidem subducerentur, eamque di-

distinctam, si per numeros determinatos explicentur notiones universales & reducantur ad singulares, ut præter determinationes, quæ universalibus insunt, insint simul singulares: quamobrem si eadem formula per plures numeros explicetur, earundem collatione universale a singulari dignoscitur. Hoc observasse usui quoque est in inveniendis: pendet enim hinc artificium heuristico, quo non infeliciter usus sum in Mathesi, præsertim Arithmetica, ut, quæ alias captu difficillima sunt tyronibus, facillime comprehenderentur. Exemplum habes in extractionibus radicum (§. 262. 277. *Aritbm.*). Et si vulgo qui Mathesi se consecrant a metaphysicis procul absint & per Mathesin ab iis removeri existimentur; hoc tamen non obstante Matheseos insignis ac prorsus egregius usus est ad notiones metaphysicas distinctas, determinatas & fecundas venandas, rectificandas & confirmandas: id quod experientia & ratione convictus affirmo. Sit ita, quod hic usus non pateat cuivis. Non latet mihi ratio, cur non pateat; sed ea non est hujus loci.

§. 276:

*Cognitio
universalium in
Deo cur
non sit
symbolica.*

Cognitio universalis Dei non est symbolica. Etenim Deus omnes veritates universales intuitive cognoscit (§. 270.), ipsum etiam veritatum universalium nexum (§. 272.), adeoque ipso idearum intuitu absolvitur (§. 286. *Psycho. empir.*). Quoniam itaque distincte cognoscit omnia, nihil confuse (§. 156.) eo ipso actu, quo sibi conscius est illarum determinationum, quæ ad notionem universalem spectant, a ceteris easdem separat. Non igitur demum opus habet vocabulis vel aliis signis, quibus tanquam sejuncta a singularibus vel minus universalibus sibi repræsentet, quæ singularibus insunt, consequenter non opus habet ad universalia singularibus immersa (§. 260.) distincte sibi repræsentanda, symbolis aut vocabulis, quemadmodum nobis accidit (§. 284. *Psycho. empir.*). Et quoniam Deus non demum unum ex altero colligit (§. 274.), consequenter in cognitione universalium ratiociniis nullis opus habet (§. 366.

Psycho.

Psychol. empir..) : nec necesse est , ut vocabulorum vel aliorum signorum usu ratiocinia distincta efficiat , quemadmodum de-
nuo nobis accidit (§. 369. *Psychol. empir.*.) , atque hinc ea , quæ
Deo competit , cognitio universalis symbolica non est (§. 289.
Psychol. empir.).

Cessant penes Deum rationes cognitionis symbolicae : quid
ergo mirum , quod ipsa etiam cognitio universalium , qua
gaudet , symbolica non sit ? Quodsi nos omnia simul & distin-
cte intueremur , quemadmodum Deus (§. 160. 156.) neque uni-
versalia remotioris gradus in iis , quæ percipiuntur , quasi sepulta
essent , ut singulari quodam acumine , quod acumen pervidendi
abstracta in concretis appellare soleo (*not.* §. 450. *Ontol.*) non-
nisi singulari studio acquirendum , ad ea pervidenda opus sit.
nec ad ea , quæ in perceptionibus nostris confunduntur , evol-
venda longa sæpius ratiociniorum concatenatione opus esset ,
ut distincte percipiantur ; universalium cognitio nobis quoque
esset tota intuitiva , neque symbolis haberemus opus , nisi ad
eam cum aliis communicandam (§. 36. *Log.*). Limitationibus
adeo intellectus nostri tribuendum , quod cognitio universali-
um symbolica esse debeat , ast intuitiva intra arctos admodum
limites coërceatur & valde imperfecta sit.

§. 277.

Deo perspecta est omnis cognitio symbolica possibilis. Et-
enim Deus cognoscit omnia possible (§. 155.). Quamobrem *Cognitio*
cum symbolica cognitio , qua nos utimur , possible numero *symbolica*
comprehendatur (§. 170 *Ontol.*) ; omnis quoque cognitio sym *cur Deo*
bolica eidem perspecta esse debet. *perspecta.*

Idem etiam sic ostenditur. In cognitione symbolica ver-
bis enunciantur , quæ in ideis continentur , vel aliis signis re-
presentantur (§. 289. *Psychol. empir.*) & voces sive vocabula ,
quibus notiones significantur (§. 36. *Log.*) , in signorum numero
sunt (§. 958. *Ontol.*). Quamobrem cum Deus cognoscat
omnia , quæcunque cognoscibilia sunt (§. 154.) ; cognoscere et-

iam debet, quibusnam signis ea, quæ in ideis rei continentur, denotari queant. Omnem adeo cognitionem symbolicam perspectam habet.

Equidem cum in superioribus ostenderimus, Deum confusas rerum ideas perspectas habere, quatenus eas intuetur in ideis animarum (§. 198.); eodem modo probari posse videtur, quod omnem quoque habeat cognitionem symbolicam. Enimvero cum cognitio symbolica in se nulla laboret imperfectione, aut, si mavis, citra imperfectionem intellectus cognosci possit, quomodo symbolice represententur omnia, quæ cognitu possibile sunt; non opus est ut huc recurramus. Et si quis huc recurrere vellet, is aut minus probaret, quam probari debebat, cum nondum evictum sit, omnem possibilem cognitionem symbolicam in ideis animarum contineri, aut admittere deberet, quod unum ex altero colligat, quatenus scilicet ex ea, quæ in animabus hominum continetur, infert reliquam cognitionem symbolicam non minus possibilem in ipsis desideratam.

§. 278.

Cur perspecta sit ea quæ hominibus singulis datur. Deo omnis cognitio symbolica perspecta est, quæ in hominibus datur singulis. Cognitio symbolica, quæ datur in singulis hominibus, res facti est (§. 249). Quare cum Deus res facti omnes cognoscat (§. 251.); omnis quoque cognitio symbolica, quæ in singulis datur hominibus, ei perspecta esse debet.

Pertinet cognitio, quæ hic Deo tribuitur, ad cognitionem historicam (§. 252.), cuius nihil Deo denegari potest (§. 253.).

§. 279.

Ratio Dei quanta sit. Deo ratio absolute summa seu maxima competit. Deus enim omnes veritates universales earundemque nexum intuitive & simul cognoscit (§. 270. 272. 273). Quoniam itaque ratio major ei est, qui plarium veritatum universalium nexum perspicit, quam illi, qui pauciorum nexum perspicit (§. 488.

Psych.

Psychol. empir.), nec minus ei ratio major est, qui nexum veritatum universalium inter se in serie longiori continuare valet, quam qui eundem in serie breviori producere potest (§. 489. *Psychol. empir.*); major ratio enti cuidam comperere nequit, quam si ipsum omnium veritatum universalium nexum simul seu actu unico perspicit. Ratio igitur Deo absolute summa seu maxima competit.

Probavimus jam supra (§. 140.), Deum esse ratione præditum, ex natura ipsius spirituali. Jam vero idem probari potest ex ipsa rationis definitione: quæ probatio cum sua utilitate non destituatur, eam hic subnectere lubet. Nimirum Deus nexum veritatum universalium intuitu ve cognoscit (§. 272.). Quamobrem cum facultas nexum veritatum universalium intuendi seu perspiciendi ratio sit (§. 483. *Psychol. empir.*); qui veritatum universalium nexum intuetur, ratione præditus sit necesse est. Deus itaque ratione præditus est. Atque hoc modo clarissime patet, Deo tribui rationem eodem sensu, quo homini tribuitur. Cum absonum sit, ne quid gravius dicam, reprehendere quidpiam, quod Deo convenit; rationem humanam reprehendi minime posse, nec recte tanquam noxiam traduci, liquido constat.

§. 280.

Ratio divina illimitata est. Quoniam ratio est facultas *Ratio divina illimitata.* intuendi seu perspiciendi nexum veritatum universalium (§. 483. *Psychol. empir.*); ratio limitari nequit, nisi quatenus non extenditur ad veritates universales omnes, & quatenus earum a se invicem nexum non uno obtutu comprehendit. Quamobrem cum Deus & nexum veritatum universalium omnium intuitu ve cognoscat (§. 272) & quidem simul (§. 273.) ; ratio, quæ ipsi est (§. 140.), nullos prorsus recipit limites seu prorsus illimitata est.

Atque in eo differt ratio humana a divina, quod illa valde limitata sit, hæc vero limites omnes prorsus respuat.

§. 281.

— *Infini-
tudo
rationis
divinae.*

Ratio divina infinita est. Deus enim omnium veritatum universalium nexum simul intuetur (§. 272. 273.), ut adeo nihil concipi possit, quod ad rationem pertinens (§. 483. *Psycho. empir.*) non continuo sit in Deo. Quoniam itaque Deus actu cognoscit omnia, quæ vi rationis cognoscere potest; infinitum vero sitens, cui insunt omnia simul, quæ eidem actu inesse possunt (§. 838. *Ontol.*); ratio divina infinita est.

Repetenda hic sunt, quæ supra annotavimus (§. 167.), cum infinitudinem intellectus divini evinceremus, ne duæ propositiones de exclusionem limitum ex ratione divina & infinitudine ejusdem præter necessitatem distingui existimantur.

§. 282.

*Incompre-
hensibilitas
rationis
divinae.*

Ratio divina omni enti rationali finito incomprehensibilis Ens enim rationale finitum non omnium veritatum universalium nexum, quem actu perspicere valet (§. 483. *Psycho. empir.*), simul perspicit (§. 837. *Ontol.*). Quamobrem cum non habeat ideam rationis, nisi quatenus sibi conscium est sui ipsius (§. 12. *Psycho. rat.*); ideam non habet claram nisi actus successivi perspicendi nexum veritatum universalium. Enimvero Deus omnes veritates universales simul cognoscit (§. 273.), adeoque unico actu, & nexum earundem intuetur (§. 272.). Ens adeo rationale finitum non habet ideam istiusmodi actus, quo ratio Deo tribuenda absolvitur (§. 483. *Psycho. empir.*), consequenter rationem divinam sibi repræsentare nequit clare, nedum distincte (§. 38. *Psycho. empir.*). Ratio igitur divina omni enti rationali finito incomprehensibilis (§. 170.).

Idem etiam sic ostenditur. Quoniam ens rationale finitum non habet ideam rationis, nisi quatenus sui conscium est

(§. 12.

(§. 12. *Psychol. rat.*) ; non aliam nisi rationis finitæ ideam habet. Jam vero ratio divina infinita est (§. 281.). Ens adeo rationale finitum non habet ideam rationis, qualis in Deo datur, consequenter eandem sibi repræsentare minime valet (§. 48. *Psychol. empir.*). Quoniam itaque enti intelligenti incomprehensibile est cognoscibile, si modum, quo esse potest, sibi minime repræsentare valet (§. 170.); ratio divina omni enti rationali finito incomprehensibilis.

Quæ supra de incomprehensibilitate intellectus divini annotavimus (not. §. 172.), ea etiam ad rationis divinæ incomprehensibilitatem applicari possunt ac debent, ne quis ex incomprehensibilitate rationis divinæ perperam inferat, quasi ens rationale finitum nullam prorsus habeat rationis divinæ ideam. Eam enim habet, quæ sufficit ut intelligat rationem divinam non esse terminum inanem, nec Deo tribui, quod impossibile, dum ratio infinita & illimitata ipsi vindicatur.

§. 283.

Ratio divina homini incomprehensibilis. Nemo non novit, impossibile esse, ut veritatum omnium universalium nexum perspiciat, multo minus autem fieri posse, ut eandem universalem inno obtutu comprehendat. Quamobrem cum ratio sit facultas veritatum universalium nexum perspiciendi (§. 483. *Psychol. empir.*); & Deo veritatum universalium nexum omnem simul intuenti (§. 272. 273.), ratio multo major sit; ratio humana admodum limitata est (§. 825. *Ontol.*), adeoque finita (§. 173.). Enimvero ratio divina omni enti rationali finito incomprehensibilis (§. 282.). Ratio igitur divina homini incomprehensibilis.

Quæ de incomprehensibilitate intellectus divini supra annotavimus (not. §. 174.); ea quoque ad incomprehensibilitatem rationis divinæ applicanda veniunt. Ceterum ex hac ipsa incomprehensibilitate rationis divinæ sequitur, ex eo, quod quid rationi conforme a nobis demonstrari nequit, inferri minime posse

posse, id supra rationem esse. Sit enim quod nostram rationis sphaeram transcendat ; non tamen ideo rationem omnem superat.

§. 284.

*Qualis sit
ratio di-
vina.*

Ratio divina actus est, non facultas. Etenim Deus veritates omnes universales simul cognoscit (§. 273.) earundemque nexum intuetur (§. 272.). Quamobrem cum ratio entis intelligentis in eo consistat, quod nexum veritatum universalium perspiciat seu intueatur (§. 483 *Psychol. empir.*), nihil vi rationis in Deo possibile est, quod non actu in eodem constanter detur. Quamobrem cum facultas sit potentia activa (§. 716. *Ontol.*), adeoque de ratione sumpta nonnisi nexum veritatum universalium perspiciendi possibilitatem denotet (§. cit.); ratio divina non est facultas, sed actus purus.

Dici etiam solet, rationem in Deo concipi non per modum potentiae, sed per modum actus. Id vero ab infinitudine rationis divinae paulo ante (§. 281.) evicta pendet (§. 838. *Ontol.*), quemadmodum ex adverso finitudini rationis humanae tribuendum, quod animae insit per modum potentiae (§. 837. *Ontol.*), adeoque inter facultates referatur (§. 29. *Psychol. empir.*). Ea igitur differentia inter rationem divinam atque humanam intercedit, quam discrimen inter ens finitum & infinitum postulat.

§. 285.

*Immensitas
rationis
divinae.*

Ratio divina immensa est. Ratio enim divina illimitata est (§. 280.) eademque absolute maxima (§. 279.). Quamobrem cum non possit concipi ratio illimitata, quae non sit eadem cum divina, consequenter omni enti rationali finito incomprehensibilis (§. 282.), ratio illimitata pro mensura illimitatae, hoc est, sui ipsius assumi nequit, ubi eam metiri volueris (§. 438. *Ontol.*), nihil omnino acturus. Quoniam vero praeter rationem illimitatam non datur alia nisi limitata (§. 53. *Ontol.*);
pro

pro mensura accipienda foret ratio limitata. Enimvero impossibile est, ut ratio limitata, quoriescunque sumatur, tandem degeneret in illimitatam (§. 175.), seu divinam (§. 280.), vel eandem superet (§. 279.). Ratio igitur limitata illimitatae prorsus heterogenea est (§. 364. *Ontol.*). Quamobrem nec ratio limitata pro mensura illimitatae assumi potest (§. 441. *Ontol.*). Ratio igitur divina mensuram omnem respuit, consequenter immensa est (§. 41.).

Quodsi magnitudinem rationis divinae ejusque incomprehensibilitatem, non obstante immensitate, tibi quodammodo intelligibilem efficere volueris; eodem modo id fieri poterit, quo supra (§. 177.) docuimus magnitudinem intellectus divini ejusdemque incomprehensibilitatem quodammodo intelligibilem efficere. Etenim cum objectum rationis sit mundus rationalis, utpote omnes veritates universales (§. 263.) easdemque inter se connexas continens (§. 271.), quarum nexum ens rationale qua tale perspicit (§. 483. *Psychol. empir.*); quae ibidem de mundo adspectabili dicta sunt, ad rationalem tantummodo transferenda veniunt: cujus ab eo differentiam (§. 257.) & modum, quo eidem immergitur (§. 260.), cum satis exposuerimus, propriae uaiuscujusque meditationi totum hoc, quod est, relinquimus.

§. 286.

Si nexus veritatum universalium omnium per ea, quae *Quando-*
entibus insunt, distincte cognita perspicitur, ratio pura est. *Si* *nam ratio*
 enim nexus veritatum universalium omnium per ea, quae *est pura.*
 entibus insunt, distincte cognita perspicitur, nulla species suo
 subordinatur generi, nec ullum genus inferius suo superiori,
 nisi quia speciei insunt determinationes, quae notionem generis
 ingrediuntur (§. 241. *Ontol.*), & notioni generis inferioris insunt
 determinationes, quae ingrediuntur notionem generis superio-
 ris (§. 242. *Ontol.*). Et similiter in eadem hypothese non tri-
 buitur speciei vel generi inferiori aliquod praedicatum, sive ab-
 (Wolfii Theol. Naturalis) Li solu-

solutum, sive conditionatum, nisi quia generi superiori vel inferiori istiusmodi prædicatum convenit, absolutum quidem per ea, quæ generi superiori vel inferiori simul insunt (§. 157. *Ont.*); conditionatum vero per ea, quæ & generi superiori vel inferiori, sub quo genus inferius vel species substant, & enti cuidam alii universali vel pluribus insunt (§. 160. *Ontol.*). Quamobrem nexus veritatum universalium explicabilis est per dictum de omni & nullo (§. 346. & seqq. *Log.*), seu per ratiocinia (§. 48. 49 *Log.*), neque in hisce ratiociniis admittuntur nisi definitiones generum & specierum & propositiones, & hæc quidem a priori cognitæ (§. 434. *Psychol. empir.*). Quamobrem cum ratio pura sit, si in ratiocinando non admittendæ nisi definitiones ac propositiones a priori cognitæ (§. 495. *Psychol. empir.*), ubi nexus veritatum universalium omnium per ea, quæ entibus insunt, distincte cognita perspicitur, ratio omnino pura est.

Probe notandum est, ut ratio data prorsus pura sit requiri, ut nexus veritatum omnium perspiciatur: alias enim ratiociniorum analysis, per quæ nexus explicatur, terminatur in propositionibus a priori non cognitis, quod rationi puræ adversatur.

§. 287.

*Quænam
ratio sit
pura.*

Ratio limitata prorsus pura esse nequit, sola illimitata pura est. Etenim cum ratio consistat in eo, quod ens intelligens nexum veritatum universalium perspicere possit (§. 483. *Psychol. empir.*); ratio limitata non ad omnes veritates universales exporrigitur, illimitata vero ad omnes extendenda (§. 825. *Ontol.*). Jam vero ratio pura esse nequit, nisi veritatum universalium omnium nexus perspiciatur (§. 286.). Ratio igitur limitata prorsus pura esse nequit, sola illimitata pura est.

§. 288.

Ratio Dei prorsus pura est; humana prorsus pura esse Puritas nequit. Ratio enim divina prorsus illimitata est (§. 280.), *est rationis humanam valde limitatam esse nemo non novit, qui seipsum divina & novit.* Est vero ratio illimitata sola pura, limitata pura esse *cur humana nequit (§. 287.).* Quare ratio divina prorsus pura est, humana *ne repugnet.* prorsus pura esse nequit.

Differentia hæc probe notanda est, ut quantum ratio divina humana præstet intelligatur: tanto enim ratio excellentior, quanto purior.

§. 289.

Deus ex qualibet veritate universali cognoscit veritates ce- *Cognitio*
teras omnes in universum, seu totum mundum rationalem, universali.
Cum enim in mundo rationali entia omnia universalia inter se *lium o-*
connectantur (§. 257. 258.); nihil in eo prorsus distincte *ommium in*
cognoscitur, nisi ejus nexus cum ceteris perspiciatur. Quamob- *uno.*
rem cum Deus omnia universalia eorundemque nexum co-
gnoscat, dum singularia intuens, quæ ipsis insunt, determina-
tiones ad se invicem refert (§. 275.); quin totum mundum
rationalem distincte cognoscat dubitari nequit (§. 38. *Psychol.*
empir.). Necessè igitur est, ut Deus unius universalis nexum
cum ceteris omnibus perspiciat, atque adeo mundum totum
rationalem in qualibet veritate universali cognoscat. *Quod*
erat unum.

Jam veritates universales non sunt nisi propositio-
rum determinatarum, quibus ea enunciantur, quæ universalibus
tribui possunt, prædicata. Necessè igitur est, ut Deus distincte co-
gnoscat omnia (§. 156.), nexum veritatis cuiusvis universalis cum
ceteris omnibus distincte cognoscat. Consistit vero nexus ve-
ritatum universalium in eo, quod ex veritate propositionis
unius universalis vel plurimum universalium cognoscatur pro-

positionis universalis alterius veritas (§. 271.). Deus itaque ex veritate universali una cognoscit ceteras omnes. *Quod erat alterum.*

Quæ hic de mundo rationali quoad Deum demonstrantur, analogæ sunt iis, quæ de mundo intelligibili, quem Deus sibi repræsentat (§. 200. 203.), supra demonstravimus (§. 161.). Et sane quia in mundo intelligibili Deus in quolibet minimo intuetur totum; ideo quoque in rationali in quolibet universali totum intuetur rationalem, propterea quod idea mundi intelligibilis ideam rationalem includit (§. 261.) & Deus universalis eorundemque nexum, quibus rationalis constituitur (§. 258.), in singularibus, quæ mundus intelligibilis completitur (§. 248.), intuetur (§. 275.). Nihil in propositione præsentis difficultatis occurrit, modo nexum veritatum universalium omnium cum omnibus rite percipias, ut intelligas possibilitatem ex qualibet inferendi ceteras omnes, etsi per infinitas sæpissime ambages, nobis minime superabiles. Conducunt huc, quæ in demonstratione nexus veritatum universalium (§. 271.), in demonstratione realitatis mundi rationalis (§. 257.) & tandem in demonstratione inexistentiæ veritatum omnium universalium in mundo rationali (§. 263.) de subordinatione entium universalium & dependentia eorundem quoad prædicata constantia a seipsis, quoad mutabilia a ceteris dicta & ad nauseam usque inculcata sunt. Ceterum cum absurdum non sit de Deo affirmari, quod ex veritate universali una cognoscat ceteras omnes, propterea quod ex una ceteræ colligi possint, Deus vero norit, quomodo hoc fieri queat (§. 274.); ideo nec absurdum videri potest, quod Deo quoad singularia seu facta eadem tribuatur cognitio, quæ ipsi quoad universalis seu veritates universales denegari non potest, nisi in summam rationis divinæ perfectionem injurius esse velis. Et sane quemadmodum in ceteris omnibus, quæ de Deo dicuntur, similitudo quadam inter animam nostram & Deum elucet, qualis salva differentia inter ens finitum & infinitum dari potest; ita in his quoque animæ & Dei similitudo subsistit.

§. 290.

Veritas omnis a Deo est. Mundus enim rationalis veritates universales omnes continet (§. 263.). Enimvero cum idea mundi intelligibilis, quæ datur in deo, ideam rationalis includat (§. 261.), adeoque ipse eandem una cum ista una producat vi intellectus sui (§. 164.); Deus omnino autor est omnium veritatum universalium, seu, quod perinde est, veritas omnis a Deo est. *Veritatis omnis qui-
nam Au-
tor.*

Probe hæc notanda propositio est, ne veritatem, quam rationis lumine assequimur, vili pendamus, vel prorsus criminemur. Etsi enim negari non possit, veritates, quæ in S. S. revelatæ rationis humanæ sphaeram transcendunt, esse magis momentosas, quam quæ rationi patent; non tamen magis sunt divinæ originis, quam naturales, quas recto facultatum usu assequimur. Quoniam philosophia circa mundum rationalem versatur (§. 265.) &, nisi nubem pro Junone amplectaris, veritates universales, quas is continet (§. 263.), patefacit; philosophia veri nominis non minus a Deo est, quam Scriptura sacra. Unde jam *Gassendus* in Oratione inaugurali, cum professionem Mathematicum auspicaretur, bene observat, veritates naturales a Deo nobis revelari via demonstrationis, perinde ac eas nobis revelavit per Prophetas seu viros divino s. spiritu afflatos, quæ in Scriptura sacra continentur. Atque hinc est, quod Theologi graves principia philosophicis in Theologia revelata uti eademque cum principis S. S. combinare ad eliciendas conclusiones nulli dubitaverint a connubio rationis ac fidei minime abhorrentes, quemadmodum in philosophia experientiae ac rationis connubium minime fastidimus.

§. 291.

Omnes veritates universales ab æterno fuere in Deo. Et. Quando enim integra idea mundi unico actu a Deo producitur (§. 201.), consequenter cum Deus sit æternus (§. 74.), ab æterno fuerint. *caperint
& ubinam
no- fuerint.*

no in eodem fuit. Enimvero idea mundi, quæ datur in Deo atque mundi intelligibilis est (§. 200. 203.) ideam mundi rationalis continet (§. 261.). Quamobrem idea quoque mundi rationalis ab æterno fuit in Deo. Continet autem idea mundi rationalis omnes veritates universales (§. 263.). In Deo igitur veritates omnes universales fuere ab æterno.

Non est quod excipias, esse quædam adeo vilia & levia, ut eorum cognitio Deum dedecet: immo occurrere vel in Mathesi pura veritates quasdam universales, quibus id nominis denegari non potest, quæ tamen pro tricis habentur a viris cordatis. Etenim superius iam demonstravimus, nihil videri debere adeo abjectum, ut non invita scriptura sacra cognitioni Dei subducatur (§. 209.). Nos veritatibus pretium statuimus ex usu, quem habent, & steriles appellamus, quarum usum ignoramus, tricis prorsus annumeramus, quas nulli nobis usui esse posse existimamus. Nullum vero hinc argumentum peti potest adversus divinam veritatum omnium originem. Agnovit hoc *Plato*, qui Deo semper cum Geometria negotium esse pronuntiavit.

§. 292.

Inventoribus circa veritatem quid tribuendum.

Inventores veritatem non efficiunt, sed tantummodo in cognitionem eius penetrant & aliis rectam revelant. Etenim Deus solus est autor omnis veritatis (§. 290.), quæ in eo existit ab æterno (§. 291.). Quoniam itaque veritas non tunc demum incipit esse talis, quando inventor in eam incidit (§. 39.); fieri haud quaquam potest, ut ipse veritatem aliquam efficiat. *Quod erat primum.*

Quoniam veritas, quam sibi antea incognitam ex definitionibus ac propositionibus cognitis ratiocinando colligit inventor (§. 461. *Psych. emp.*), non tunc demum ab eo efficitur per demonstrata, sed Deum potius autorem habet (§. 290.); inventor tantummodo in cognitionem ejus, quod sibi rectum erat, penetrat. *Quod erat secundum.*

Deni-

Denique si veritatem a se detectam, quæ perinde aliis ac ipsi latebat, cum aliis communicat, ut eandem cognoscant; quod ipsis erat relictum, revelat. *Quod erat tertium.*

Inventores comparari possunt cum Prophetis, quemadmodum *Gassendus* hoc nomine cum iisdem confert Mathematicos, quos ipsius adhuc ævo solos via demonstrationis in cognitionem veritatis latentis penetrasse constat. Nimirum veritas, quam Prophetæ notam reddidere hominibus, ab ipsis minime conficta, sed ab æterno in Deo fuit eundemque solum autorem habet: Deus vero inspiratione notam fecit ipsis, & deinde per eosdem revelavit aliis. Similiter inventores veritatum fabri non sunt, sed eadem ab æterno fuere in Deo & Deum autorem habent unicum. Inventoribus igitur in eas incidere licet via demonstrationis & sic Deus per eos hominibus revelat veritates naturales. Absit igitur, ut quis sibi veritatis inventionem tribuat tanquam auctori! Quemadmodum vero præter Prophetas veros fuere etiam falsi, & inter hos, qui sibi visi sunt tales, alios bona fide deceperunt; ita pseudoprophetis annumerandi sunt errorum fabri, qui sibi inventores videntur, cum non sint, procul adhuc remoti a veritate, quam sibi deprehendisse videntur. Absit itaque, ut comparisonem *Gassendianam* non ineptam inventorum cum Prophetis, sua utilitate non carentem, ubi inventoribus tribuere volueris quod ipsorum est, Deo autem, quod Dei est, hoc nomine suggilles, quod inventores veritatum naturalium loco veritatis protrudant haud raro errores! Cum in hac comparisonem salva maneat differentia inter veritates naturales & revelatas, tam objectiva, quam subjectiva, hoc est, sive consideres objectum, quod concernunt, sive usum, quem hominibus præstant, metuendum non est, ut hac comparisonem auctoritati Prophetarum quid decedat, vel etiam fastus inspiciatur inventoribus. Non male faciunt homines, quod veritatibus pretium statuunt ex utilitate, in propria enim commoda & generis humani felicitatem peccant, qui, veritatibus cognitu sibi & aliis utilibus neglectis, nonnisi talibus inhiant, quarum nulla perspicitur utilitas. Enimvero pretium hoc

nop

non valet nisi ad veritates alias aliis præferendas, quando omnium cognitioni minime sufficis; nequaquam vero veritates contemnendæ, quod earum nullus adhuc perspicitur usus, vel nullus prorsus datur. Habent enim veritates in se, quod delectent, præsertim ubi ad earundem inter se nexum, & ad similitudines in universalibus obvias animum advertis, quemadmodum alias monui, cum de voluptate ex cognitione veritatis percipienda agerem in Horis subsecivis A. 1729. Trim. Æstiv. num. I.

§. 293.

*Quo sensu
Deus sit
inventor.*

Si inventor denotet autorem veritatis seu ejus fabrum; solus Deus est inventor. Etenim veritas omnis a Deo est (§. 290.) & ab æterno in eodem fuit (§. 291.), cum præter ipsum non existeret ens aliud (§. 92.). Non igitur præter ipsum datur, qui possit dici autor veritatis seu ejus quasi faber, cujus scilicet veritas spectari potest tanquam proprium opus. Deus adeo solus inventor est, si inventor denotet autorem veritatis.

Equidem jam superius (not. §. 290.) removimus dubium, quasi Deum dedeceat, quod veritatum levium ac sterilium dicatur autor; ne tamen idem hic majore specie recurat, ubi Deus omnium veritatum inventor proprio sibi significato dicitur, quo enti alii nomen hoc convenire nequit, propterea quod inventoris notio quoad nos involvat actus arbitrarios, aliqua adhuc moneri non inconsultum duximus. Repetendum enim omnes veritates universales, qualescunque tandem fuerint, contineri in idea mundi rationalis (§. 263.), quæ cum inclusa sit ideæ mundi intelligibilis (§. 261.), ab intellectu divino per essentiam Numinis non removendæ (§. 188.); omnes veritates, qualescunque tandem fuerint, simul insunt, nec perinde ac in hominibus una ab altera abesse potest. Cumque Deus rerum nullarum extra se indigeat, quoad ipsum veritas una dici nequit utilior altera. Et quoniam omnes veritates universales in una perspicit (§. 289.), ipsa

ipsa quoque veritatis cuiuslibet universalis cognitio alio prorsus modo sese habet quoad Deum, quam quoad nos. Cavendum itaque ne obliiti eorum, quæ de Deo demonstrata sunt, Deum ex nobis iudicemus.

§. 294.

Deus ab omni errore prorsus immunis est. Etenim veritates omnes universales cognoscit (§ 264) & quidem intuitivè (§. 272), non vero deum unam colligit ex altera (§. 274.) *Cur Deus errare ne-* earundemque sibi simul conscius est (§. 273.). Nullo igitur modo fieri potest, ut pro vero habeat quod non est. Quamobrem cum errer, qui propositionem falsam pro vera habet (§. 623. Log.), consequenter qui pro vera habet propositionem, quæ non est (§. 505. Log.); fieri haudquaquamullo modo potest, ut Deus errer, adeoque ab omni prorsus errore immunis est.

Quodsi inquiras in rationem, cur nobis errare contingat, eam in Deo non habere locum, semper ostendi poterit. Etenim Deus non errare potest in cognitione intuitiva, diversa habens pro iisdem: id enim nobis accidit, quatenus confuse res percipimus (§. 631. Log.), Deus vero omnia cognoscit distincte, nihil confuse (§. 156.). Neque lapsu memoriæ errare potest, quemadmodum homines solent (§. 634. Log.), cum omnia cognoscat simul (§. 273.). Neque etiam male ratiocinando ut errer fieri potest, quemadmodum a nobis non uno modo erratur (§. 638. & seq. Log.), quia veritates universales intuitive cognoscit (§. 272.), non vero, quemadmodum nobis moris est, unam ex aliis colligit (§. 274.). Hæc probe perpendenda sunt, ut evidentius constet, cur Deus ab omni prorsus errore immunis sit, & cur privilegium solius Dei sit hæc ab errore immunitas.

§. 295.

Juxta Scripturam sacram Deo tribuenda est cognitio eorum, quorum cognoscendorum facultas in homine datur. *Qualis cognitio*
(Wolffii Theol. Naturalis.) *Mm* *eo Deo tri-*

*videnda ju-
xta S. S.*

eo enim, quod Deus homini aures & oculos dedit, infert Da-
vides *Psaln. CXIV. 91.* Deum sibi conscium esse eorum, quæ
auditu & visu percipiuntur. *Qui plantavit, inquit, aurem,
non audiet? aut qui finxit oculum, non considerat?* Seu *Casti-
lione* vertente: *Aurium sator non audiet? aut oculorum for-
mator non cernet?* Deus nimirum juxta S. S. corporeus esse ne-
quit (§. 102.); nec organa corporea, qualia sunt oculi & au-
res, tribui ipsi possunt. Jam cum porro experientia edoceamur,
non modo nos videre non posse sine oculis, nec audire
sine auribus, verum etiam animantia non videre absque oculis,
nec audire absque auribus; facile hinc naturæ divinæ non
satis gnarus inferre poterat, Deum non posse videre, nec au-
dire. Immo cum absurditatis redarguat Davides tam turpiter
errantes, & hunc ipsis errorem interrogando exprobet; du-
bitandum vix videtur, fuisse ipsius tempore forsan haud pau-
cos, qui sibi persuasere, Deum non conscium sibi esse eorum,
quæ homines loquuntur vel agunt. Ostendit itaque, quod
hæc argumentatio in Deo fallat, quæ in hominum & omni
animantium genere rite procedit. Nimirum concedendum est,
Deum qui creavit hominem *Gen. II. 7.* esse factorem oculo-
rum & aurium, consequenter homini dedisse facultatem vi-
dendi objecta, quæ oculos feriunt, & facultatem audiendi so-
nos, qui in aurem illabuntur. Quoniam itaque Deus conde-
re potuit homines sibi præsentia cognoscentes beneficio visus
& sonos percipientes auxilio auditus; quin ipsemet quoque
visibilem & audibilem sibi conscius esse debeat, dubitandum
non esse videtur Davidi. Etenim si Deo perspectum fuit,
quomodo efficere possit, ut alii videant visibilia & audiant so-
nos quoscunque; modus quoque non impossibilis censeretur
debet, quo ipsemet ea cognoscit, quæ visu atque auditu ab ho-
mine percipiuntur. Ab eo igitur, quod homini videndi facul-
tatem concessit Deus, juxta S. S. inferitur, Deo competere cog-
niti-

cognitionem visibilium, & ab eo, quod homini dedit facultatem audiendi, juxta eandem recte colligitur, Deum cognoscere ea, quæ auditu percipiuntur. Quamobrem quia nulla homini est cognoscendi facultas, quam docente Scriptura I. Cor. IV 7. non habeat a Deo; in genere dicendum est: Tribuendam esse Deo juxta S. S. eorum cognitionem, quorum cognoscendi facultas in homine datur.

Hanc propositionem instar lemmatis præmittimus, ut demonstrare valeamus, juxta S. S. Deo tribuendam esse rationem, qualem huc usque eidem vindicavimus. Nullibi in S. S. legitur, Deo competere rationem vel eundem esse ratione præditum, ut nobis tantummodo evincendum esset, rationis vocabulum in S. S. eodem sumi sensu, quo idem de Deo accepimus in anterioribus. Nec ullibi disertis verbis docetur, Deum veritates universales cognoscere omnes eorundemque nexum intime perspicere, ut hinc inferre liceret, juxta S. S. Deo esse tribuendam rationem, qualem ipsi tribuimus in anterioribus (§. 349. Log.). Per consequentiam igitur ex Scripturæ principiis restabat ut demonstraretur, rationem Deo competere.

§. 296.

Deo juxta S. S. competit ratio in eo significato, quo ipsi Ratio Deo eandem vindicavimus. Anima per essentiam & naturam suam juxta S. S. rationalis est (§. 454. Psychol. rat.), adeoque ad nexum tribuendam veritatum universalium perspicendum apta (§. 451. Psychol. rat.). Immo a posteriori constat, hominem nexum veritatum universalium perspicere posse: id quod vel sola probat Mathesis, probat philosophia nostra, ubi veritates universales inter se concatenantur. Jam vero Deo juxta S. S. tribuenda est cognitio eorum, quorum cognoscendorum facultas homini competit (§. 295.). De Deo igitur juxta S. S. affirmandum, quod veritates universales cognoscat earundemque nexum perspiciat. Quamobrem cum facultas perspiciendi nexum veri-

tatum universalium sit ratio (§. 483. *Psychol. empir.*) & nos non alio sensu Deo rationem vindicaverimus in anterioribus ; evidens est juxta S. S. Deo tribuendam esse rationem eo sensu, quo nos eandem ipsi vindicavimus.

Poterat idem hoc quoque modo ostendi. Deus juxta S. S. totum sibi repræsentavit mundum ab æterno & quidem omnia, quæ in eo sunt, distincte, nihil confuse (§. 208). Quamobrem cum mundus rationalis intelligibili & sensibili totus sit immersus (§. 260.) ; Deus quoque S. S. non invita ab æterno sibi repræsentasse dicendus est omnem mundum rationalem & omnia, quæ in eo sunt, distincte, nihil confuse. Jam vero mundus rationalis omnes veritates universales continet (§. 263) & hæ inter se connexæ sunt (§. 271.). Deus itaque juxta S. S. ab æterno cognovit omnes veritates universales earundemque nexum intime perspicit, consequenter quoniam facultas perspicendi nexum veritatum universalium ratio est (§. 483. *Psychol. empir.*), & nos vocabulum hic in eodem significato sumimus, quando Deo rationem tribuimus, juxta S. S. Deo tribuenda est ratio eodem prorsus sensu, quo eandem ipsi vindicavimus.

Demonstrationem propositionis præsentis tentavimus variis modis aliis ; sed nobis potior visa est, quam priori loco collocavimus, propterea quod modus argumentandi ex ipsa S. S. defuit. Quemadmodum enim in S. S. dicitur, qui plantavit aurem, non audiet ? aut qui finxit oculum, non cernet ? ita quoque eidem convenienter dicendum : qui rationis autor est, nonne veritatum universalium nexum perspiciet ? Omnes istæ & si quæ his geminæ sunt collectiones continentur sub lemmate generali, quod præmisimus (§. 295.). Ipsum vero lemma & ejus ad rationem Deo vindicandam applicatio singulare exemplum interpretationis extensiva est. Quod si vero quis fuerit scrupulosior, quam ut interpretationem extensivam verborum Davidis admittere velit ; in ejus gratiam addidimus demonstrationem alteram. qua communi
argu-

argumentandi more, ex principiis antea demonstratis infertur conclusio.

§. 297.

Juxta S. S. Deo competit ratio absolute summa. Etenim *Magnitudo rationis divinæ juxta S. S.* juxta S. S. Deus totum sibi repræsentat mundum ab æterno & quidem omnia, quæ in eo sunt, distincte, nihil vero confuse (§. 208). Quamobrem cum mundus rationalis mundo intelligibili, quem Deus sibi repræsentat (§. 205.), totus sit immersus (§. 260.), adeoque eidem inexistat (§. 259.); Scripturæ sacræ conforme est, quod Deus totum mundum rationalem ab æterno cognoscat prorsusque distincte, eo quidem sensu, quo vocabulum mundi rationalis accipimus (§. 258.), Deoque ejus cognitionem vindicavimus (§. 262). Enimvero mundus rationalis omnes veritates universales continet (§. 263.) & hæc inter se connexæ sunt (§. 271.). Deus itaque omnium veritatum universalium nexum perspicit juxta S. S. Quoniam itaque ratio major concipi nequit, quam cujus vi omnium veritatum universalium nexus perspicitur, si objectum spectes (§. 488. *Psychol. empir.*); objective quoque juxta S. S. ratio major concipi nequit, quam quæ Deo est. Porro juxta S. S. Deus omnia cognoscit simul (§. 216.), quæ scilicet ipsi cognitu possible sunt. Quamobrem juxta eandem veritatem quoque omnium universalium nexum uno obtutu comprehendere debet (§. 275.). Quoniam vero ratio major concipi nequit, quam cujus vi veritatum omnium universalium nexus simul seu actu unico perspicitur, si eam formaliter consideres, seu quoad cognoscendi modum (§. 489. *Psychol. empir.*); formaliter quoque major juxta S. S. concipi nequit ratio, quam quæ Deo est. Ratio spectari nequit nisi quoad objectum & modum considerandi objectum, seu objective atque formaliter. Quamobrem cum S. S. convenienter Deo tribuenda sit ratio absolute maxima, sive eam objective, sive formaliter spectes, per demon-

strata; quin eidem juxta eandem tribuenda sit simpliciter ratio absolute maxima dubitari nequit.

Nemo miretur, nos in probanda conformitate magnitudinis rationis divinæ cum S. S. ad nullum S. S. locum provocare. Diximus enim paulo ante, in S. S. nullibi rationem expressis verbis Deo tribui. Quamobrem per consequentiam ex aliis, quæ in S. S. leguntur, probanda veniunt, quæ ad rationem divinam spectant. Sufficit itaque, ut in demonstrationibus rationem divinam attingentibus assumatur aliquod principium, quod autoritate divina nititur, quemadmodum a nobis in propositionis præsentis demonstratione factum. Reddetur autem deinceps suo loco ratio, cur Deus non revelaverit, quæ ex iis, quæ revelata sunt, per consequentiam deduci possunt.

§. 298.

Limitum remotio a ratione divina & ejus infinitudo.

Ratio divina juxta S. S. illimitata & infinita est. Etenim juxta S. S. ratio divina est absolute maxima, seu maxima, quæ concipi potest (§. 297.). Jam cum ratio illimitata omnes respiciat limites, sive quoad objectum, sive quoad modum considerandi objectum; & ratione infinita omnium veritatum nexus perspiciantur simul (§. 838. *Ontol.*); nemo negaverit, rationem prorsus illimitatam & infinitam esse eam, qua major dari nequit. Quoniam itaque ratio illimitata & infinita, quam ex natura Dei fluere demonstravimus possibilis est (§. 280. 281.); major utique ratio illimitata & infinita concipi nequit. Deo igitur juxta S. S. ratio illimitata & infinita tribuenda venit.

Idem etiam sic ostenditur. Juxta S. S. intellectus divinus illimitatus est & infinitus (§. 215.). Enimvero intellectus infinitus & illimitatus omniaabilia distincte & simul repræsentat, utpote omnes respuens limites tum quoad objectum, tum quoad modum repræsentandi objectum (§. 796. 838. *Ontol.*), universalialia vero eorum-

eorundemque nexus cognoscuntur, dum singularibus inexistentes determinaciones ad se invicem referuntur (§. 275.); intellectus divinus sufficit ad universalium omnium eorundemque nexum perspicendum unico actu. Quoniam itaque ratio nec quoad objectum, nec quoad modum cognoscendi limitatur, ac unico actu absolvitur; utique & illimitata (§. 756. *Ontol.*), & infinita est (§. 838. *Ontol.*).

Immo poterat propositio præsens etiam hoc modo probari, quod ex demonstratione, qua Deo juxta S. S. vindicavimus rationem absolute maximam (§. 297.), pateat, rationem absolute maximam omnem respicere limitem & unico absolvi actu, consequenter esse illimitatam (§. 796. *Ontol.*), & infinitam (§. 838. *Ontol.*).

Notandum in genere est, quando quid ex S. S. per consequentiam deducendum, idem non uno modo fieri posse, quando varia prostant de eo, quod inde colligendum, principia, quemadmodum in præsentē casu obtinet. Ceterum cum Deo S. S. convenienter tribui queat ratio prorsus illimitata & infinita eo sensu, quo erat ipsi evicta; cetera quoque quæ de eadem demonstrata, juxta S. S. eidem convenire debent.

§. 299.

De juxta S. S. perspecta est cognitio rerum symbolica. *Cognitio symbolica Deo juxta S. S. perspecta.*
Etenim in S. S. multoties legitur, Deum locutum esse ad Patriarchas & Prophetas, veluti ad Abrahamum *Gen. XII. 1. & seqq.* Isaacum, *Gen. XXVI. 2 & seqq.* & Jacobum *Gen. XXX. 1. & seqq.* ad Moysen, *Exod. III. 4 & seqq.* Samuelem, *1 Sam. VIII. 22.* Nathanem, *2 Sam. VII. 4.* aliosque. Locutus est Deus de seipso, & quidem de essentia sua, *Exod. III. 14. Jesh. XLVI. 9.* de attributis suis, *Gen. XVII. 1. Jesh. XLVI. 10.* de operibus suis. *Jesh. XLV. 12.* Locutus est de rebus naturalibus, veluti de stellis, corporibus mundi totalibus, *Gen. XV. 5.* de pulvere terræ, *Gen. XIII. 16* de arena maris *Gen. XXII. 17.* Locutus est de rebus moralibus, veluti de malitia

lia hominum, *Gen.* VI. 5. & de virtutibus, *Gen.* VII. 1. Locutus est de rebus artificialibus, *Gen.* VI. 14 & seqq. *Exod.* XXV. 10 & seqq. Constat itaque, fide S. S. nihil posse concipi rerum, quod non nomine aliquo indigitare possit, eumque quæ cogitat verbis exprimere valere aliis. Jam vero symbolica dicitur cognitio, si terminatur actu, quo verbis tantum enunciamus, quæ in ideis continentur, vel aliis signis eadem repræsentantur, ideas vero ipsas verbis aut signis aliis indigtatas non intuemur (§. 289. *Psychol. empir.*). Deo igitur perspecta sunt, quæ ad cognitionem symbolicam pertinent. Enimvero cum juxta S. S. ideæ rerum Deo essentielles sint (§. 219.), adeoque ab eodem nunquam abesse possint (§. 144. *Ontol.*), cumque nihil juxta eandem cognoscat confuse, sed omnia distincte (§. 208.), illorumque sibi semper conscius esse debeat (§. 11. *Psychol. rat.*); fieri non potest, ut cognitio ejus symbolica sit, quemadmodum nobis est ob finitudinem facultatis cognoscendi. Quamobrem Deo cognitio symbolica juxta S. S. tantummodo perspecta est.

Cognitio symbolica arguit in cognoscente imperfectiorem intellectus, quatenus ea habet opus ad universalia distincte percipienda (§. 328. *Psychol. empir.*), judicia magis distincta efficienda (§. 351. *Psychol. empir.*) & ratiocinia magis manifesta reddenda (§. 369. *Psychol. empir.*). Deus igitur, cui etiam juxta S. S. intellectus omnium possibilium perfectissimus competit (§. 218.), cognitione symbolica non indiget, immo ne tribui quidem potest eo sensu, quo nobis competit (§. 289. *Psychol. empir.*). Enimvero cum in se nihil imperfectionis in cognoscente arguat symbolica idearum repræsentatio, sed potius ad intellectus perfectionem referri debeat; Deo quoque indignum non est, quod omnis cognitionis symbolicæ ambitum perspiciat, & quidem non demum in ideis animarum nostrarum, sed per se. Quod si nos intellectus sufficiente perfectione instrueremur, cognitione symbolica non haberemus opus, nisi ad intuitivam cum aliis communi-

candam, qualem usum loquitur S. S. de ipso Deo in iis locis, ubi ad homines locutus Deus dicitur & verba, quæ effatus est, in medium proferuntur. Enimvero cum intuitus ideæ universi, quæ in nobis est, admodum limitatus sit (§. 184.); cognitione symbolica carere minime possumus, ubi in cognitione universali proficere studemus. Hæc quidem ideo probe notanda sunt, ut intelligatur, cur in propositione non dicatur Deum habere cognitionem symbolicam, sed tantummodo affirmetur, omnem ipsi perspectam esse cognitionem symbolicam.

§. 300.

Deo est per eminentiam scientia omnium universalium & Objectum singulare. Etenim Deus universalia eorundemque nexum scientiæ (§. 275.), atque omnia singularia cognoscit (§. 251.) & tam ex divina. qualibet veritate universali cognoscit veritates ceteras omnes in universum, seu totum mundum rationalem (§. 289.), quam in quolibet minimo, quod est in universo, totum cognoscit universum (§. 161.). Videt adeo, quomodo veritas unius, quod cognoscit, sive in universalium, sive in singulare numero sit, determinetur per veritatem alterius: quod cum æquipolleat demonstrationi (§. 551. Log.), analysi perfecta ad sua principia veritatem quamlibet reducenti (§. 562. Log.); idcirco in eo eminenti quodam modo inest is intellectus actus, quo veritas cujusvis, quod affirmatur, vel negatur, demonstratur (§. 845. Ontol.). Quamobrem cum scientia dicatur in nobis habitus demonstrandi, quod affirmamus, vel negamus (§. 594. Log.); patet in Deo per eminentiam inesse scientiam omnium universalium & singulare.

Quando nos aliquid scimus, ex notione subiecti, hoc est, iis, quæ de eodem assumuntur, beneficio aliarum propositionum antea cognitarum, ratiocinando colligimus, ipsi convenire prædicatum (§. 551. & seqq. Log.), nititurque evidentia assensus evidentia principiorum demonstrationis, cujus antea

(Wolff's Theol. Naturalis) Na com.

compotes facti sumus , adeoque is per demonstrationes , quæ omnes veritates , a quibus data propositionis veritas pender, successive generatur (§. 992. *Log.*). Quodsi jam ponas ea, quæ non modo ad demonstrationem pertinent, verum etiam ad omnem assensum successive in nobis gignendum requiruntur, uno obtutu a nobis comprehendere, seu quod perinde est, si unico actu intellectus producerentur, quæ actibus successivis debentur, & eorum omnium simul eadem claritate nobis esse- mus consciï, quæ nobis consciï jam sumus successivæ judicio- rum in demonstratione aliqua concatenationis; demonstratio in nobis foret eminenti quodam modo, quatenus intuitive co- gnosceremus veritatem propositionis datæ per nexum cum aliis, absque actu ratiocinandi, sed qui in ratiocinia resolvitur, ubi ens finitum eundem distincte percipere valet. Et hoc modo intelligitur, quo sensu Deo tribuenda sit scientia, ut non rece- datur a significato vocabuli, nisi quatenus inexistencia per emi- nentiam differentiam aliquam infert. Etsi autem in nobis non detur singulare scientia, sed tantummodo universale; id non inde esse intelligitur, quasi singulare veritas in se sit indemonstrabilis, seu talis, ut per demonstrationem ejus veri- tas agnosci minime possit; sed quia nos nexum singulare in universo, vi cujus veritas unius a veritate alterius pender, non sufficienter perspicimus, ut adeo nonnisi conjectando, ob insuf- ficientem nexus inspectionem, subinde veritatem cujusdam facti consequamur. Quamobrem in Deo cum removeatur hoc impedimentum, quod demonstrativæ cognitioni singulare obstat; ipsi quoque perinde singulare, ac universale est scientia perfectissima, sed eminenter talis, quemadmodum exigit differentia intellectus infiniti ac finiti.

§. 301.

*Omniscien-
tia defini-
tio.*

Omniscius dicitur, qui scit omnia, quæcunque cognitu- possibilia sunt, sive singulæ fuerint, sive universalæ. Unde *Omniscientia* est scientia omnium cognitu possibilium, tam singulare, quam universale, seu, quæ in se talia sunt, ut cognosci possint.

Quæ

Quoniam nos non scimus omnia, quæ cognoscimus, ideo ejus memores facile arbitramur, omniscientiæ significatum in definitione restringi, cum tamen ex communi loquendi usu in Scholis Theologorum & Philosophorum recepto omnem actum intellectus divini designet, quo quicquid possibile cognoscit, sive aliquando existat, sive non. Enimvero cum actus sciendi, quatenus eminenter inest in intellectu divino per ea, quæ ad propositionem præcedentem annotavimus, involvat inspectionem omnium in uno, sive de singularibus, sive de universalibus sermo fuerit, hæc vero supponat simultaneam possibilitium omnium inter se connexorum, tum quatenus in se, tum quatenus tanquam connexa spectantur, eandemque prorsus distinctam cognitionem; eorum recordatus, quæ de amplitudine cognitionis divinæ tam quoad objectum materiale, quam quoad formale demonstrata sunt, facile perspicies omniscientiam divinam, prouti a nobis definitur, omnem intellectus divini actum designare, quo rei cognitio absolvitur, consequenter vocabulum omniscientiæ in eo sumi significatu, quem ipsi hætenus tribuere Theologi & philosophi, etsi significatus iste clarius fiat, propterea quod a nobis distinctius explicetur, ob terminos, qui definitionem ingrediuntur, antea & alibi distincte expositos, aut, si mavis accurate definitos, quemadmodum nostræ philosophiæ proprium.

§. 302.

Deus est omniscius. Etenim Deus scit omnia universalia & singularia, quæ cognitu possibile sunt (§. 300.), cognoscit etiam seipsum (§. 141.). Quamobrem cum nihil sit, quod cognosci possit, quam Deus & quæ præter ipsum possibile sunt, sive singularia, sive universalia; evidens omnino est. Deum esse omniscium (§. 301.).

Equidem ex ipsa omniscientiæ notione deduci poterant ea omnia, quæ ad actum intellectus divini, quo quicquid possibile, cognoscit, spectant: quoniam tamen in antecedentibus jam sufficienter fuere demonstrata, quæ huc pertinent,

& ex iis, quæ modo ad definitionem, omniscientiæ annotavimus, patet, quod ea omnem cognitionis divinæ actum complectatur; non opus est, ut absque necessitate simus prolixiores, præsertim cum quæ hic a sciendi cupidis desiderari poterant, in parte altera tradituri simus, ostensuri quomodo ex notionibus assumtis, evicta earundem realitate, a priori deducantur Dei existentia & attributa. Obiter observo, ex iis, quæ hic dicuntur, intelligi, demonstrationem existentiae divinæ a priori, quam in parte altera tradituri sumus, non esse nudam jam cognitorum repetitionem, sed isto demonstrandi modo quidam intelligi, quæ per ea, quæ demonstrata sunt, nondum satis clare perspiciuntur, etsi ex iis deduci possint.

§. 303.

Omniscientia S. S. conformis.

Deus juxta S. S. omniscius est, seu omniscientia eidem tribuenda. Cum ea sciamus, quæ demonstrare valeamus (§ 598. Log.), nobis vero perspecta sit demonstrationis forma genuina (§. 551. & seqq. Log.); vñ hujus facile convincimur, si vel ad Mathesin solam animum advertamus, cadere in hominem scientiam: sit ita, eam esse admodum limitatam & nonnisi ad pauca extendi, eidemque misceri, quæ ab experientia pendent (§. 562. Log.). Quoniam itaque juxta S. S. Deo tribuenda cognitio eorum, quorum cognoscendorum facultas in homine datur (§. 295); quin Deo etiam eadem non invira tribuenda sit scientia, dubitari nequit. Scientia cum nitatur demonstratione (§. 594. Log.), adeoque nos successiva ratiociniorum concatenatione ad eandem perveniamus (§. 551. & seqq. Log.), Deus vero juxta S. S. omnia cognoscat simul, seu actu unico (§. 216.), neque is demum opus habeat, ut unum ex altero colligat (§. 274.); scientia eminenter eidem inest (§. 845. Ontol.). Et quia non minus intellectus ipse juxta S. S. (§. 215), quam ratio quoque, qua universalium veritatum nexum perspicit (§. 483. Psychol. empir.), illimitata est (§. 298); scientia ejus ad

ad omnia extenditur, ut adeo ipsi, S. S. non invita, tribuenda sit scientia omnium universalium & singularium per eminentiam (§. 300). Quamobrem cum omniscientia non sit nisi scientia omnium cognitu possibilium, tam singularium, quam universalium (§. 301); Deum esse etiam juxta S. S. omniscium eodem prorsus sensu, quo ipsi paulo ante omniscientiam vindicavimus (§. 302.), palam est.

Terminus omniscientiae ἀπαφθ is est, hoc est, in S. S. nulli legitur, neque enim alicubi Deus dicitur omniscius, vel eidem tribuitur omniscientia, tanquam attributum. Quamobrem arbitrarium est, quemnam vocabulo huic significatum tribuamus, modo ostendamus hoc significatu per ea, quæ de Deo affirmantur in S. S. omniscientiam eidem tribui posse: id quod in demonstratione præsentis propositionis factum est. Quoniam tamen terminus omniscientiae in Scholis Theologorum & Philosophorum dudum receptus, neque adeo temere ab eodem recedendum (§. 142. *Disc. pralim.*); ideo jam ante monuimus, significatum a nobis non mutari. Per propositionem adeo præsentem patet, nos omniscientiam Deo in eadem autoritate S. S. in significato recepto vindicasse. Absit autem, ut quis existimet, eandem citra istiusmodi ambages probari potuisse exinde, quod Deus 1. *Job.* III. 20. dicatur nosse omnia! Etsi enim admittatur, per omnia sine ulla restrictione ibidem intelligi, quæcunque cognitu possible sunt, siue singularia fuerint, siue universalia; non tamen absque ulteriori probatione patet, num vocabulo γινώσκειν, quo utitur Apostolus, ea cognitionis forma indigiteretur, quæ ad scientiam requiritur in eo significato, quo scientiæ vocabulum a nobis sumitur (§. 594. *Log.*), & in quo ingreditur significatum omniscientiae (§. 301.), quod scilicet Deo, etsi non unum demum ex altero colligat, quemadmodum a nobis fieri solet (§. 551. & seqq. *Log.*), perspectum tamen sit, quomodo unum ex altero colligatur (§. 274). Non existimandum est probationes evidentes tam facili negotio confici.

§. 304.

Quod Deus *Novit Deus, quid posito uno ponatur, seu quid certis cir-*
novit quid cumstantiis positis aut sub data conditione futurum esset. Deo
sub data enim est scientia omnium universalium & singularium (§. 300.).
conditione Scitur vero, quod demonstrari potest (§. 598 *Log.*). *Quam-*
fieri de- obrem cum in demonstratione ex notione subjecti colligatur,
beat. prædicatum eidem convenire (§. 549. *Log.*), consequenter po-
 sita determinatione subjecti poni hoc prædicatum; Deus vero
 etsi non demum unum ex altero colligat, quomodo tamen ex
 altero colligatur novit (§. 274.), habitu demonstrandi per emi-
 nentiam inexistente (§. 845. *Ontol.*): Deus novit, quid positis
 hisce determinationibus subjecti ponatur, seu quid sub data
 conditione aut sub certis quibusdam circumstantiis futurum
 esset.

Idem etiam sic ostenditur. Deus cognoscit omnia pos-
 sibilia tam absolute spectata, quam in certa systemata redacta
 (§. 155.). Enimvero si quod possibile spectatur ut in systema
 cum aliis relatum, causarum cognoscitur series, per quas exi-
 stentia determinatur, modorum series, qui successive toto dura-
 tionis tempore eidem inexistunt, dependentia a coëxistentibus
 quoad modos singulos, influxusque in modificationem coëxi-
 stentium & inexisteniam successivorum (§. 144.), consequen-
 ter quicquid positum sub quibuscunque circumstantiis possibili-
 bus futurum esset. Immo si possibilia tum in se, tum tanquam
 in systemata redacta spectantur, omnes species ac genera omnia
 eorundemque subordinaciones cognoscuntur una cum prædi-
 catis tam absolutis, quam hypotheticis speciei ac generi cuicun-
 que convenientibus (§. 147.), consequenter quicquid sub datis
 circumstantiis in genere fieri possit. Patet adeo, nosse Deum
 tam in singulari, quam universali, quid sub datis quibusdam
 circumstantiis futurum esset, seu posito uno vel posita hac con-
 ditione ponatur.

Pote-

Poterat idem multis adhuc aliis modis ostendi. Probe autem notandum est, conditionem sub qua Deum quid cognoscere supponitur, hic spectari tanquam nude possibilem, nondum vero tanquam extitutam, vel non extitutam.

§. 305.

Juxta S. S. Deus novit, quæ sub datis quibusdam circumstantiis futura sunt, aut quid posito uno ponatur. Narratur S. S. *evin-*
1. Sam. XXIII. 10 & seqq. Davidem Ceilæ commorantem quæ-
sivisse ex Deo, num incolæ istius urbis eum sint Saulo dedituri, si quidem usque ad hujus adventum in eadem manserit. Deumque respondisse, quod sint dedituri, ac ideo Davidem fuga sibi consuluisse. Noverat itaque Deus, quod incolæ Ceilæ Davidem sint Saulo dedituri, si in urbe maneret, consequenter quid sub aliqua conditione futurum esset. Quoniam vero libera hominum decreta sunt in se & Deo præcibilia (§. 233.), hoc est talia, ut spectari possint tanquam futura (§. 231.) atque recordabilia (§. 241.), ut spectari possint tanquam præterita (§. 238.), antequam quiquam spectetur tanquam extitutum; patet omnino juxta S. S. Deum nosse, quid sub datis quibusdam circumstantiis futurum esset, aut quid posito uno ponatur.

Notandum est Theologos communiter hoc S. S. loco probare, quod Deus novit etiam ea, quæ sub conditione non adimplenda futura sint; nos vero hic conditionem, sub qua quid futurum Deus cognovisse refertur, nondum spectare ut non extitutam, sed tantummodo ut talem, quam existere non repugnat. Suo enim demum loco dispiciemus, quid dicendum sit, si conditio aliqua spectetur ut non extitura. Et si autem dictum S. S. prober, ad quod probandum nos eodem utimur. Quamvis enim conditio spectetur ut non extitura, spectatur tamen ut ea, quæ existere possit. Et inferius parebit nostro concipiendi modo conditionem aliquam ante spectari debere tanquam possibilem, quam spectetur tanquam extitura, vel non extitura.

§. 360.

*Conditio-
nate quæ
esse possunt
qua sciæn-
tia a Deo
cognoscan-
tur.*

*Si conditio aliqua, sub qua quid futurum esse posse intel-
ligitur, tantummodo ut possibilis spectetur, non vero ut exitura
esse possunt ra, vel non exitura; quid sub ea futurum esset Deus cognoscit
per scientiam simplicis intelligentiæ. Etenim si conditio ali-
qua, sub qua quid futurum esse posse intelligitur, tantum-
modo ut possibilis spectetur, non vero ut exitura, vel non ex-
titura, nondum intelligitur, num, quod sub ea exiturum esse
debere intelligitur, exiturum sit, nec ne, consequenter tantum-
modo patet, si conditio ista existat, hoc etiam existere debe-
re; si illa non existat, nec hoc existere posse, seu, quod per-
inde est, sub conditione ista possibilis esse, ut quid sit. Enim-
vero per scientiam simplicis intelligentiæ Deus intelligit, quod
quid possibile sit & existere possit (§. 221.). Quamobrem per
scientiam simplicis intelligentiæ agnoscit, quid sub ea condi-
tione futurum esse debeat, quod tanquam possibile agnoscitur.*

Patebit inferius principium hoc habere usum in definien-
dis controversiis circa Dei omniscientiam inter Theologos &
Philosophos agitata. Nostrum igitur est, scrutari omnem
cognitionis, quæ Deo attribuenda venit, differentiam, ne con-
fundantur a se invicem separanda, quo pateat, quinam istiusmodi
confusione in errorem inciderint.

§. 307.

*Cognitio
impossibili-
um quæ
Deo tribu-
enda.*

*Deus etiam novit omnia impossibilia sive absolute, sive
sub certa conditione talia. Ideo quid possibile est, quod ejus
idea in intellectu divino detur (§. 192.). Quamobrem cum
Deus sibi eorum sit conscius, quæ in ideis istis continentur (§.
187.); eum fugere nequit impossibilia prodire, si determina-
tiones, quæ continentur in ideis suis, alio modo combinentur,
quam in iisdem conjunguntur. Et quia quoque novit, quid*

uno

uno posito ponatur (§. 304.); nec ipsum fugere potest, quod eodem posito, aliud ab hoc diversum poni possit. Quoniam itaque in priori casu impossibilia prodeunt, quæ absolute spectantur, in posteriore, quæ sub certa conditione taliaprehenduntur; Deus utique novit impossibilia omnia, sive absolute, sive sub certa conditione talia.

Impossibilium cognitio non arguit imperfectionem in Deo, sed ad summam potius perfectionem ejusdem pertinet. Id demum imperfectioni intellectus tribuendum, quod impossibile pro possibili amplectamur & vicissim subinde possibile in numerum impossibilium referamus. Quamobrem ut clarius appareat, quanta intellectus perfectio ad omnem impossibilitatem pervidendam requiratur; non tædet addere propositionem sequentem de modo cognoscendi impossibilia, qui convenit Deo.

§. 308.

Deus omnia impossibilia cognoscit, dum possibilia in certa Modus, quo systemata relata intuens, determinationes entibus intrinsecas & Deus inentium in serie rerum loca variat. Etenim dum intuetur possibilia omnia possibilia in sua systemata relata, & quæ entibus singulis insunt determinationes ad se invicem refert; quod hæc alio modo combinatz contradictionem involvant, consequenter quod est impossibile sic prodeat (§. 79 Ontol.), non potest non agnoscere. Similiter dum totam rerum seriem, quæ eadem inter se connexæ sistuntur intellectui præsentem, intuens, eas alio ordine poni sumit, seu loca eorum variat; quod sic denuo prædeant, quæ quoad modificationes suas & dependentiam ab aliis contradictionem involvant, agnoscere itidem debet. Quamobrem cum in priori casu agnoscat impossibilia absolute talia, in posteriore quæ nonnisi sub data conditione talia sunt; patet Deum omnia impossibilia cognoscere, dum possibilia in certa systemata relata intuens determinationes entibus intrinsecas & entium in serie rerum loca variat.

Et si a nobis ea, quæ de modo impossibilia cognoscendi docentur, fieri non possint nisi successive; in Deo tamen eodem actu absolvuntur, quo cetera cognoscuntur, quæabilia sunt. Neque enim hic major, quam in reliqua cognitione, difficultas occurrit. Habet modus cognoscendi impossibilia beneficio possibilium aliquid affinitatis cum modo cognoscendi universalium beneficio singularium, de quo diximus supra (§. 275.). Quamobrem eodem, quo ille, modo illustrari potest. Hinc vero patet tantam requiri intellectus perfectionem ad omnia impossibilia cognoscenda, quanta requiritur ad omnia universalium perspicienda: immo cum universalium cognitio non præsupponat nisi intuitum simultaneum omnium singularium distincte representatorum (§. cit.); impossibilium cognitio præterea præsupponit intuitum simultaneum omnium universalium inter se connexorum. Nimirum impossibilia non cognoscuntur nisi ope possibilium, quatenus intelligitur, si determinationes rebus intrinsicæ, quibus entia tam universalium, quam singularia constituuntur, aliis quocunque modis combinentur & entia in rerum seriebus contenta aliis quocunque modis ordinentur, non prodire nisi contradictoria. Intimius in notionem cognitionis impossibilium, a priori penetrabit, qui ex arte combinatoria perspecta habet, quæ de permutatione seu variatione ordinis (§. 129. Anal.) & variatione combinationis docentur (§. 222. Anal.): unde agnoscat cognitionem impossibilium respondere separationi combinationum ab inutilibus, constabitque ratio a priori, cur, cum veritas non nisi una sit, error variari possit in infinitum.

§. 309.

Possibilia Novit Deus, quenam impossibilia ens unumquodque finitum intelligens pro possibilibus amplectatur. Etenim Deus, cum omnia præter ipsum cognitaabilia distincte cognoscit abscat (§. 156.), seriem quoque perceptionum & appetitionum intelligente ac aversionum, quæ animæ unicuique inest (§. 524. Psych. rat.), finito quæ aut enti intelligenti finito alteri cuicunque possibili inesse debet.

bet (§. 657. *Psychol. rat.*), distincte cognoscere tenetur. Jam modo in ista serie etiam continentur omnia judicia, quibus fin Deo cognoscitur. *Deo cognoscitur.* singulis suæ respondent perceptiones (§. 520. 521. *Log.*) & in judicio ditionum numero sunt ea, quibus impossibilia pro possibili-
bus amplectitur judicans (§. 505. *Log.*). Deo igitur omnino perfectum esse debet, quænam impossibilia ens unumquodque intelligens finitum pro possibilibus habeat.

Idem etiam sic ostenditur. Deus facta omnia seu res facti cognoscit (§. 251.). Quoniam facta dicuntur omnia singularia, quatenus spectantur ut existens, sic ita quod ad actum nunquam perducantur (§. 249.); in eorum numerum referri quoque debent omnia judicia falsa entis intelligentis finiti cuiuscunque. Enimvero singulis huiusmodi judiciis pro possibili habetur, quod impossibile (§. 526. *Log.*). Deus igitur novit, quænam impossibilia ens unumquodque intelligens finitum pro possibilibus amplectatur.

Ex propositione præsentæ ac præcedente intelligitur, erroris tam intrinsecæ, quam extrinsecæ possibilitas. Etenim intrinsecæ erroris possibilitas, quæ ex parte objecti est, consistit in eo, quod determinationes rebus intrinsecæ & combinationes ipsarum rerum in aliqua serie ita variari possint, ut inde oriantur contradictiones. At extrinsecæ possibilitas ab imperfectione intellectus entium intelligentium finitorum manat, vi cujus contradictiones istas in determinationem intrinsecarum & ipsorum entium combinatione non advertunt: quod quomodo accidat, ex iis perspicitur, quæ supra annotavimus (§. 294.), cum Deum ab omni errore immunem esse demonstrarem.

§. 310.

Deus cognoscit omnes errores, qui admitti possunt, ab intellectu finito, & a quonam ente intelligente unusquisque admitti possit. Etenim Deus novit, quænam impossibilia ens unumquodque finitum intelligens pro possibili amplectatur. *Errores quomodo a Deo cognoscantur.*

tur (§. 309.). Enimvero quando possibile pro possibili & impossibile pro impossibili habemus, iudicium verum est, scilicet in casu priori affirmativum (§. 520. *Log.*), in posteriori negativum (§. 521. *Log.*). Falsum igitur esse nequit, nisi in eo casu, quo impossibile pro possibili habetur vel contra. Quamobrem Deus novit omnia iudicia falsa, quæ vi intellectus finiti admitti possunt & a quonam ente intelligente quodlibet admitti possit. Enimvero si falsum iudicium pro vero habetur, error committitur (§. 623. *Log.*). Patet igitur, Deum cognoscere omnes errores, qui admitti possunt ab intellectu finito, & a quonam ente intelligente unusquisque admitti debeat.

Errare imperfecti intellectus est; errores aliorum cognoscere perfecti: sit ita, quod inter homines subinde accidat, ut error ab eo admissus, qui intellectu multo perfectiore gaudet, agnoscatur ab eo, qui multo imperfectiore instructus. Hoc enim ex accidente est. Intellectus adeo perfectissimi est cognoscere errores omnes, qui admitti possunt, & ad omniscientiam spectat, ut cognoscatur, a quonam ente unusquisque error committi possit (§. 301.), quatenus scilicet ea comprehendit omnium factorum seu singularium scientiam. Abunde itaque perspicitur nihil hic tribui Deo, quod ipsum dedecet.

§. 311.

*Necessitas
cognitionis
in Deo.*

Deus omnia cognoscit necessario. Idez rerum Deo essentielles sunt (§. 188.), consequenter cum in eodem continuo existat idea non modo hujas, qui existit, mundi, sed ceterorum quoque omnium possibilium (§. 181.); idez omnium mundorum possibilium Deo essentielles sunt. Enimvero quicquid ad essentiam rei pertinet, illud absolute necessarium est (§. 303. *Ontol.*). Quamobrem absolute necessarium est, ut Deo insint idez mundorum omnium possibilium, seu ut Deus sibi repræsentet omnes mundos posibles (§. 48. *Psychol. empir.*). Omnes mundi posibles omnia singularia continent (§. 248.).

Quam-

Quamobrem cum Deus omnium eorum, quæ sibi repræsentat, sit sibi conscius (§. 187.); Deus omnia singularia necessario cognoscit. Enimvero dum singularia intueretur, omnia simul universalia eorundemque nexum cognoscit (§. 275.) & dum singularia & universalia intueretur, simul omnia cognoscit impossibilia (§. 308.). Necessario igitur etiam cognoscit omnia universalia & impossibilia. Præter singularia & universalia, possibilia atque impossibilia nihil datur, quod cognitu possibile sit. Deus itaque necessario cognoscit, quicquid cognoscit.

Quod in hominibus libertas influat in cognitionem, inde est, quod non omnia simul cognoscere valeamus, & res confuse percipiatur, antequam distincte cognoscantur, quæ ipsi insunt, aut quasnam ad res alias habere possit relationes, vel etiam nomen ab aliis eidem tributum innotescat, ubi ejus adhuc nihil nobis innotuit, atque præterea rerum externarum egentes aliisque rationibus adducti, cognitionem hujus potius rei eligamus, quam alterius. Imperfectioni adeo intellectus, quatenus scilicet is limitatus est, tribuendum, quod ad actum cognitionis libere nos determinare valeamus. Quamobrem cum intellectus divinus prorsus illimitatus sit (§. 166.); nec libera ad aliquem cognitionis actum in eodem determinatio locum habere potest. Agnovere hoc Theologi, qui Deum necessario intelligere, sed libere statuere ac velle pronunciant. *Poiretus* liberam in Deo facit creaturarum cognitionem, & nonnisi necessariam sui cognitionem, ita ut nec illa semper detur in Deo, sed eam pro arbitrio admittere possit, quando visum fuerit. Enimvero cum sententiam probatam sufficienter probaverimus, nos parum movet viri autoritas, qui præjudiciis nonnullis partim in juventute ex philosophia *Cartesianorum* haustis, partim in ætate virili abusu pietatis contractis adductus defendit, quæ his conformia sunt.

CAPUT. III

De Potentia & Voluntate
Dei.

§. 312.

*Cur Deus
non velit
sine moti-
vis.*

Deus ut quid velit, vel nolit, motivum aliquod adesse debet. Etenim cum nihil sit sine ratione sufficiente, cur potius sit, quam non sit (§. 70. *Ontol.*); si quid Deus vult aut non vult, ratio quoque sufficiens adesse debet, cur idem potius velit, quam nolit, vel ex adverso cur idem potius nolit, quam velit. Jam vero ratio sufficiens actuum volitionis ac nolitionis motivum est (§. 887. *Psychol. empir.*). Deus igitur ut quid velit vel nolit, motivum aliquod adesse debet.

Idem etiam sic ostenditur. Deus mundum hunc ex ceteris possibilibus elegit, ut existeret (§. 121.), & quidem ob rationem objectivam (§. 119.). Quamobrem patet dari rationem sufficientem, cur Deus voluerit ut hic potius mundus existat, quam alius. Jam cum mundus complectatur ea omnia, quæ præter Deum existunt (§. 48. *Cosmol.*); nihil eorum, quæ ad res creatas pertinent, Deum voluisse constat absque ratione ab ipso objecto desumpta. Quamobrem cum ratio sufficiens volitionis & nolitionis sit motivum (§. 887. *Psychol. empir.*); Dei voluntatem in eo convenire cum humana intelligitur, quod detur actus volitionis ac nolitionis aliquod motivum (§. 889. *Psychol. empir.*). Enimvero quoniam in anima absque motivis nulla concipi potest volitio vel nolitio (§. cit.), atque adeo naturæ voluntatis qua tali convenire colligatur, quod absque motivis non eliciatur actus; Deum quoque non velle vel nolle

nolle quidpiam intelligitur, nisi detur aliquod motivum, cur id potius velit, quam nolit, aut cur id potius nolit, quam velit.

Demonstratio prior magis convincit eos, qui sensum evidentiae habent, quam posterior, propterea quod in posteriori non satis aperta videtur propositionis universalitas, quemadmodum in priori. Non autem est quod in priori duplicet principium rationis sufficientis ad Deum applicari. Etenim duo illa principia summa, principium scilicet contradictionis & principium rationis sufficientis, quibus nititur omnis veritas, non minus ad ea pertinent, quae in Deo sunt, quam ad ea, quae a Deo sunt. Nimirum quae in Deo necessaria sunt, quoad cognoscendi modum a principio contradictionis; quae vero libera sunt, a principio rationis sufficientis pendent, quemadmodum in rebus finitis principium contradictionis dicitur fons veritatum necessariorum, principium rationis sufficientis contingentium. Deinde in demonstratione altera supponimus tantummodo rationem objectivam volitionis & nolitionis, nondum autem evidenter patet, num ea sola sit sufficiens: cum enim homini quae sunt motiva in representatione boni atque mali consistant (§. 890. *Psychol. empir.*), adeoque relationem ad ipsum volentem involvant (§. 554. 565. *Psychol. empir.*); rationi objectivae accedit subjectiva, ut sufficiens fiat. Dubitari igitur poterat, an ex ratione objectiva recte colligatur motivum, quod vi definitionis ratio volitionis ac nolitionis sufficiens esse debet (§. 837. *Psychol. empir.*). Atque ideo provocavimus ad convenientiam voluntatis divinae cum humana, quatenus utraque non determinatur absque aliqua ratione. Enimvero robur omne nanciscetur posterior quoque demonstratio ex sequentibus, quam etsi imperfectam addere visum est in eorum gratiam, qui cum eo acumine destituantur, quod ad evidentiam penitus pervidendam requiritur, facilius ad assensum permoventur ratione speciali quam generali, sit ita quod nondum plena luce gaudeat. Neque hoc bonae methodi legibus adversatur, ut probatione insufficiente eliciatur assensus, donec

nec ea, quæ tacite præsupponuntur, probentur, ubi sufficiens acumen fuerit acquisitum. Sane in gratiam tyronum Geometriæ sumimus quædam, quæ demonstrari ulterius debebant, ne nimia scrupulositate offendantur, antequam acuminis ad omnem evidentiam penitus pervidendam necessarii compotes facti fuerint. Sufficit non assumi, nisi vera, nec tacite supponi, nisi quod independentem ab eo, quod probatur, demonstrari potest. Ceterum dubitari non potest, quin probatione posteriori probabiliter evincatur, Deum non velle, nec nolle absque motivis (§. 578. *Log.*). Quamobrem qui demonstrationem priorem difficulter admittit universalitatem principii rationis sufficientis nondum quantum satis percipiens; is probabiliter admittat vi probationis posterioris veritatem propositionis præsentis, donec de eadem per sequentia reddatur certus.

§. 313.

*Cur Deus
non velit
impossibi-
lia.*

Quæ impossibilia sunt, Deus velle nequit. Satis superquo constat, nec nos velle, quæ impossibilia sunt, nisi quatenus nobis possibilia videntur, quæ non sunt. Jam vero Deus novit omnia impossibilia (§. 307.) consequenter fieri nequit ut possibilia videantur, quæ non sunt. Quamobrem nec fieri potest, ut velit, quod impossibile.

Imperfectioni intellectus humani tribuendum, quod subinde velimus, quæ impossibilia sunt, propterea quod pro possibili habentes, quod non est, erramus (§. 613. *Log.*). Quamobrem cum intellectus divinus sit omnium perfectissimus, ita ut majorem perfectionem intellectus ea, quæ divini est, concipi repugnet (§. 168.), Deusque ideo ab omni prorsus errore immunis sit (§. 294.); mirum profecto non est, quod Deus velle nequeat, quod impossibile. Ceterum hæc propositio sterilis videri haud quaquam debet, neque enim solummodo inferius patebit, pendere ab ea solutionem difficultatum, quæ tantum non insuperabiles visæ plurimis; verum etiam suo tempore in philosophia morali insignis ejus elucescet usus in praxi officiorum erga Deum.

§. 314.

Quoniam possibile, quod impossibile non est (§. 85. Ontol.), *Objectum*
Deus vero velle nequit, quod impossibile (§. 313.); *quicquid Deus generale*
vult, possibile est. *voluntatis divinae.*

Hujus quoque principii usus est non minus in theoria, quam in praxi. Quoniam tamen nondum ex eo, quod quid possibile, intelligitur, cur Deus id potius velit, quam non velit, in eo ratio sufficiens nondum continetur, cur Deus id velit, quod sit possibile (§. 56. Ontol.). Possibile est, quod nullam contradictionem involvit (§. 85. Ontol.). Ecquis vero non videt, si ponat, quædam non involvere contradictionem, se nondum intelligere, cur Deus id velle debeat?

§. 315.

Sola possibilitas non sufficit, ut Deus quid velit, seu Deus Cur sola
non ideo quid vult, quia possibile. Plures mundi possibles sunt *possibilitas*
(§. 101. Cosmol.): existit tamen non nisi unus (§. 117.), *non suffi-*
pterea quod Deus hunc ex ceteris elegit (§. 121.), *at, ut Deus*
consequenter voluit, ut hic potius mundus existat, quam alius et si *quid velit.*
possibilis, consequenter qui perinde ac hic existere poterat
(§. 133. Ontol.). Sola igitur possibilitas non sufficit, ut Deus
quid velit.

Idem etiam sic ostenditur. Deus hunc mundum ex ceteris elegit (§. 121.), daturque electionis ratio objectiva (§. 119.). Enimvero ratio objectiva desumpta est ab eo, quo hic mundus, qui existit, a ceteris possibilibus differt (§. 120.). Quamobrem cum mundi omnes possibles sint, sola possibilitas non est ratio ista electionis, adeoque Deus ideo nondum quid vult, quia possibile.

Demonstrationem posteriorem addimus in primis eo fine, ut in eadem acquiescant, quibus dubium circa priorem oriri poterat, quasi sumamus, quod nondum probatum est, (Wolffii Theol. Naturalis). P p sci-

scilicet quod Deus ceteros mundos possibiles perinde producere potuisset, quemadmodum hunc produxit, siquidem voluisset. Etsi enim dubium hoc haud difficulter tollatur, non inconsultum tamen fuit addere probationem alteram, quæ eodem caret. Quomodo tollatur dubium, paucis accipe. Sermo hic nobis potissimum est de possibilitate intrinseca, non extrinseca, consequenter nobis sufficit nosse, quod mundis ceteris existentia non repugnet, utut eosdem nondum referamus ad potentiam Dei, quo constet, num ea ipsis ad actum perducendis sufficiat. Quodsi vero quis possibilitatem, de qua loquimur, etiam ad extrinsecam trahere velit; hoc tamen non obstante, veritatem propositionis in hac etiam hypothesis tueri licet provocando ad ea, quæ inferius independentem ab eadem demonstrabuntur: id quod bonæ methodo non repugnat, præsertim ubi ordinem mixtum elegeris (§. 830 Log.).

§. 316

Intelligentia eorum, quæ Deus vult.

Deus quicquid vult penitus intelligit, ut scilicet nihil quoad ejus cognitionem desiderari possit. Etenim quicquid Deus vult, possibile est (§. 314.). Jam vero Deus cognoscit omnia possibilia (§. 155.), tam quæ sunt res facti (§. 251.), sive singularia (§. 249.), quam universalia (§. 275.). Quicquid ergo vult, illud cognoscit. Enimvero cognoscit omnia distincte, quæ præter ipsum cognitu possibilia sunt, (§. 156.) & tam in quolibet minimo, quod est in universo, cognoscit totum universum (§. 161.), quam ex qualibet veritate universali veritates ceteras omnes in universum (§. 289) : ac præterea seipsum quoque cognoscit (§. 141.). Quamobrem fieri haudquaquam potest, ut quicquam ejus cognitioni subducatur, quod rei cuiunque vel in se spectata, vel ad alias quascunque omni possibili modo relata, convenire potest. Cum adeo nihil quoad cognitionem ejus, quod vult, desiderari possit; patet Deum penitus intelligere, quicquid vult.

Pluri-

Plurimum interest, ut norimus, Deo penitus perspecta esse, quæ vult. Hinc enim plurima consequuntur; quæ voluntatem divinam ab humana distinguunt; immo hæc volitionis intelligentia fons est omnis differentię, quæ inter voluntatem divinam & voluntatem nostram intercedit, quemadmodum ex iis, quæ sequuntur, clarius elucescet.

§. 317.

Quoniam Deus penitus intelligit, quicquid vult (§. 316.); *Voluntas divina cur voluntas ejus nullo modo fertur in incognitum.*

Hoc commune quidem est voluntati divinæ cum voluntate nostrā, quam similiter non ferri nisi in cognitum constat (§. 588. *Psychol. empir.*), sed cum tanta tamen differentia, quæ inter ens illimitatum & limitatum intercedit. Etenim cum Deus penitus intelligat, quicquid vult (§. 316.), nihil quoque objecto appetibili inest, quod volitioni obstitisset, ubi perspectum fuisset: ast quoniam nos non intelligimus penitus, quod volumus, haud raro accidit, ut imperfecte cognitum appetamus, quod averfati fuisset, siquidem fuisset penitus perspectum, propterea quod eidem vel insint vel ab eodem dependeant plura averfabilia, quam appetibilia, ut adeo aversio fortior adversus appetitionem minus fortem prævaluisset. Unde patet voluntatem nostram, dum in cognitum fertur, simul ferri in incognitum, etsi nunquam fieri possit, ut in incognitum feratur per se, sed tantummodo dependenter a cognito, quatenus cognitum appeti nequit, nisi simul appetantur, quæ inde pendent, sed a nobis minime prævidentur. Nimirum quatenus novimus, quod alia ab eo, quod appetimus, dependeant, ea tamen non cognoscimus, atque hoc non obstante idem appetimus; voluntas una fertur in id, quod nobis incognitum est, sed non per se.

§. 318.

Quamprimum appetibile vel averfabile qua tale cognoscitur, illud quoque cognoscens appetit vel averfatur. Etenim *Quando- nam actus volitionis & nolitio- cogno- nis priatur.*

cognoscens intelligit ipsum esse tale, ut idem potius appetat, quem aversetur, vel in casu altero potius aversetur, quam appetat. Adest igitur ratio sufficiens appétitionis in casu uno, aversionis in altero (§. 56. *Ontol.*). Quamobrem cum posita ratione sufficiente, cur quid potius sit, quam non sit, ponatur etiam id; quod per eam potius est, quam non est (§. 118. *Ontol.*); quamprimum appetibile vel averfabile cognoscitur qua tale seu tanquam appetibile vel averfabile, in casu priori cognoscens idem appetere, in posteriori averfari debet.

Propositio hæc generalis reipsa non differt ab illa speciali, quam quoad nos evicimus alias (§. 589. 590. *Psychol. empir.*), scilicet quod rem appetamus, quamprimum eam repræsentamus tanquam bonam, aut aversemur, quamprimum eam nobis repræsentamus tanquam malam. Ubi tamen cum voluntate divina nobis est negotium, præstat idem generaliter enunciari, quemadmodum ex sequentibus patebit.

§. 319.

*Æternitas
cognitionis
& volun-
tatis divi-
næ.*

Deus omnia cognoscit & vult ac non vult ab æterno. Et enim Deus cognoscit omnia simul (§. 160.) & necessario (§. 311.), ut adeo nihil sit ipsi cognoscibile, quod non semper actu cognoscat. Enimvero Deus est æternus (§. 74.). Quamobrem ab æterno cognoscit, quod ipsi cognoscibile, consequenter cum omnia tam possibile (§. 155.), quam impossibile (§. 307.), sive singularia (§. 247.), sive universalia (§. 275.) cognoscat; ab æterno omnia cognoscit. *Quod erat unum.*

Quoniam Deus omnia cognoscit distincte, nihil prorsus confuse (§. 156.), cognoscit etiam semetipsum (§. 141.), ab æterno vero cognoscit, quicquid cognoscit *per demonstrata*; quod tanquam sibi appetibile vel averfabile cognoscit, ab æterno tanquam tale cognoscere debet. Enimvero quamprimum quod tanquam appetibile vel averfabile cognoscitur, illud quoque cognoscens appetit, vel averfatur (§. 318.). Necesse igitur est

est ut, quod Deus vult, ab æterno velit; quod non vult, ab æterno nolit. *Quod erat alterum.*

Non obstat contingentia nonnullorum, nec libertas voluntatis humanæ, quo minus Deus ab æterno cognoscat, consequenter & velit omnia. Etenim nihil concipi potest neque in mundo materiali (§. 232.), neque in serie perceptionum ac appetitionum & aversionum, quæ in unaquaque anima datur (§. 234.), quod ipsi præscibile non sit, nec in se tale sit, ut tanquam præscibile agnoscat, quamprimum cognoscitur, non obstante libertate hominum in decernendo (§. 233.).

§. 320.

Impossibile est, ut Deus quid demum in tempore velit, hoc est, Impossibile est, ut velit, quod ante nondum volebat, & ut in posterum ipsum velle contingat, quod nondum vult. Etenim Deus, quicquid vult, ab æterno vult, (§. 319.). Quamobrem cum quid æternum non sit, si quod assignari potest tempus, quo actu esse cœpit & actu esse iterum desinet (§. 39.); impossibile est, ut ullum assignetur tempus, quo Deus quid velle cœpit & quo idem velle iterum desinet. Impossibile igitur est, ut Deus quid nunc velit, quod ante nondum volebat, vel ut in posterum ipsum quid velle contingat, quod nondum vult, consequenter ut quid demum in tempore velit.

Cur hoc demum inculcemus, cum propositio præcedens sufficere videbatur, ut Deum nil in tempore velle agnoscat, inferius patebit, ubi decreta temporaria evertenda erunt.

§. 321.

Deus in volendo liber est ab omni coactione externa, seu nulla vi externa adigi potuit, ut quid vellet. Etenim Deus, quicquid vult, ab æterno vult (§. 319.). Quamobrem cum ipse æternus sit (§. 74.), seu, quod perinde est, ab æterno existat, *Libertas voluntatis divinæ ab omni coactione externa.*

istat (§. 39.); quicquid vult, id vult, dum existit. Est vero ens omnium primum & independentem præexistit omnibus entibus ceteris (§. 92.). Quamobrem fieri non potuit, ut vi quadam externa adigeretur, ut quid vellet, consequenter in volendo ab omni coactione externa liber est.

Equidem & voluntas nostra cogi nequit (§. 927. *Psychol. empir.*), adeoque vi externa ad volendum adigi nequit (§. 926. *Psychol. empir.*); fieri tamen potest, ut nolens vel volens vi motivi ipsi suppeditati nolitionem vel volitionem mutet in gratiam vi utentis (§. 928. *Psychol. empir.*). Atat! in Deo ne quidem posterius locum habet, atque adeo libertas ab omni coactione externa latius patet, quam in homine. /

§. 322.

*Quomodo
Deus ad
volendum
determine-
tur.*

Deus semetipsum determinat ad volendum & nolendum,
Etenim impossibile, ut Deus vi quacunque externa adigatur ad quid volendum, vel nolendum (§. 321.). Necessè igitur est, ut semetipsum ad volendum vel nolendum determinet.

Nimirum aut determinat semetipsum ad volendum, aut determinatur ab alio. Ab alio determinari nequit (§. 321.). Ergo semetipsum determinat. Non est quodingas determinationem voluntatis minus violentam, & propositionem præcedentem de violenta esse objicias. Quæ enim ad demonstrandum eandem adduximus, etiam valent ad evertendum determinationem, quam fingis, minus violentam, sed cui Deus sese non invitus subjiat.

§. 223.

*Spontanei-
tas volun-
tatis divi-
na.*

Deus sponte vult, quicquid vult, & sponte non vult,
quicquid non vult. Etenim Deus semetipsum determinat ad volendum & nolendum (§. 322.). Quamobrem cum sponte sese determinet agens, si sine principio determinandi extrinsecò sese determinat (§. 933. *Psych. empir.*); quicquid Deus vult vel non vult, id sponte vult, vel non vult.

Est

Est vero hæc spontaneitas vera, non tantummodo appa-
rens, qualis gravi cadenti in descensu tribui solet, quemad-
modum apparet, si cogites demonstrationem resolvi in liber-
tatem a coactione externa, qualis datur in casu spontaneitatis
apparentis, veluti in spontaneo descensu gravis, ubi idem a
causa gravifica continuo ad motum sollicitatur.

§. 324.

Mundus unus ab altero non differt nisi gradu perfectionis. Differen-
tiis. Omnes enim mundi, qui præter hunc ad spectabilem possibi- *tiam mun-*
les sunt (§. 101. *Cosmol.*), perinde ac hic ad spectabilis (§. 55. *Cosm.*), *dorum.*
sunt series entium finitorum successivorum ac simultaneorum in-
ter se connexorum (§. 48. *Cosmol.*), adeoque differre neque-
unt nisi entium multitudine ac varietate & modo connexionis
seu ipso nexu. Enimvero res in mundo connectuntur, qua-
tenus una continet rationem sufficientem coexistentiæ vel succes-
sionis alterius (§. 10. *Cosm.*). Quamobrem in modo connectendi
non potest concipi differentia, nisi rationem particularium in u-
niversales resolutione. Qualiscunque tandem sit hæc differen-
tia, cum perfectio mundi consistat in eo, quod rationes parti-
culares simultaneorum & successivorum tandem in aliquam
generalem resolvantur (§. 540. *Cosmol.*), mundus unus ab al-
tero non differt quoad nexum nisi gradu perfectionis. Cum-
que mundus itidem perfectior sit, si major in eo est rerum con-
sistentium varietas (§. 552. *Cosmol.*); nec quoad entia, quæ
mundum ingrediuntur, alia obtinet differentia, quam quæ in
gradu perfectionis consistit. Patet itaque mundum unum ab
altero non differre nisi perfectionis gradu.

Non licet in mundo concipere multitudinem absque va-
rietate: etenim multitudo absque varietate supponit existen-
tiam similium in eadem serie (§. 195.), quam rationi adversam
esse evicimus (§. 195. 246. *Cosmol.*).

§. 325.

§. 325.

*Ratio ob-
jectiva ele-
ctionis
mundi.*

*Deus hunc mundum ex ceteris elegit ob majorem perfe-
ctionem, quæ ipsi quam ceteris inest,* Etenim datur ratio ob-
jectiva, cur Deus hunc potius mundum elegerit, quam ali-
um (§. 121. 119.). Quoniam vero hæc in eo consistit, quo mun-
dus, quem elegit, a ceteris differt (§. 120.), a ceteris autem is
non differt nisi gradu perfectionis (§. 324.); ratio obiectiva e-
lectionis consistere debet in gradu perfectionis mundo, quem
Deus elegit, proprio. Jam cum intuitus perfectionis sit volu-
pras (§. 511. *Psychol. empir.*), ob quam quid enti intelligenti,
qualis est anima nostra, placet (§. 542. *Psychol. empir.*); quin
Deo magis placeat mundus perfectior imperfectiore, dubitari
haud quasquam potest. Competit vero Deo voluntas libera
(§. 123.). Quamobrem cum libera voluntate ex pluribus possibili-
bus eligatur, quod placet (§. 941. *Psychol. empir.*), Deus utique
hunc mundum elegit ob majorem, quæ ipsi præ ceteris inest,
perfectionem.

Patet itaque rationem obiectivam electionis adeo parum
contrariari libertati, ut potius sine ea libertas concipi non pos-
sit.

§. 326.

*Qualis sit
mundi bu-
jus perfe-
ctio.*

Mundus, quæ existit, est omnium possibilium perfectissimus.
Etenim Deus mundum ex omnibus possibilibus elegit, ob ma-
jorem perfectionem, quæ ipsi præ ceteris inest (§. 325.). Quo-
niam adeo in mundis ceteris judicio intellectus omnium perfe-
ctissimi (§. 168.) & absolute summi (§. 169.), errare prorsus
nescii (§. 294.), minor perfectio deprehenditur, quam in eo,
qui existit; quin omnium possibilem sit perfectissimus dubitari
nequit.

Nemo a nobis requisiverit, ut ex ipsa notione mundi de-
monstremus majorem ejus præ ceteris perfectionem. Du-
dum enim ostendimus neminem mortalium perfectionem to-
tius

tius universi comprehendere atque distincte explicare valere (§. 541. *Cosmol.*). Multo minus igitur perfectionem omnium mundorum possibilium comprehendere atque distincte explicare quisquam mortalium valet, ut perfectionem mundi huius cum perfectione ceterorum conferre ac inde colligere possit, quod ceterorum perfectione illa maior sit. Deficit hic philosophia, cuius homines fieri possunt compotes: divinæ philosophiæ proprium est ex ipsa notione mundorum possibilium de huius summa perfectione statuere. Ceterum quando hic mundus dicitur perfectissimus, per se patet, nobis non esse sermonem nisi de perfectione, quæ cadit in mundum. Quamobrem etsi hic, qui existit, mundus dicatur *mundus omnium perfectissimus*, non tamen inde concluditur legitima illatione, mundum hunc, qui existit, esse *ens omnium perfectissimum*, quod enim in suo genere perfectissimum est, ita ut perfectio a differentia specifica manet, id non absolute tale est, seu in omni entium genere. Talia moneri oportet, ut cavillationes consequentiariorum elidamus.

§. 327.

Adversus perfectionem mundi maximam ab iis, quæ in mundo observamus, nulla fieri potest obiectio. Cum enim ne- *Quanam*
mo mortalium perfectionem totius universi comprehendere *objectiones*
ac eam distincte explicare valeat (§. 541. *Cosmol.*), si qua ab *sectionem*
iis, quæ in mundo observamus, aliqua petitur obiectio, de per- *mundi nul.*
fectione totius mundi statuitur ex imperfectione partis in se *le sunt.*
spectatæ. Enimvero si quid in re in se spectatæ imperfectionem arguit, id ideo in ea non arguit imperfectionem, quatenus ad aliam refertur (§. 542. *Cosmol.*), sed apparens tantummodo esse potest (§. 543. *Cosmol.*). Quamobrem cum imperfectiones apparentes in parte non tollant perfectionem in toto, sed cum maiore perfectione totius cohzrent (§. 547. *Cosmol.*), ac ideo admittendæ, ut major in toto obtineatur perfectio (§. 548. *Cosmol.*); adversus perfectionem mundi maximam
(*Wolfii Theol. Naturalis*) Qq mam

nam ex iis, quæ in mundo observamus, nulla peti potest ob-
jectio.

Corruunt adeo uno ictu objectiones omnes, quæ contra
perfectionem hujus universi fieri solent ab hominibus, qui
hebetudini ingenii sui nimium tribuentes ex parte iudicium
ferunt de toto & id, quod apparet, confundunt cum eo,
quod est.

§. 328.

*Electio
mundi o-
mnium
perfectissi-
mi quale sit
signum.*

*Electio mundi in suo genere perfectissimi est signum natu-
rale intellectus omnium absolute perfectissimi.* Si enim Deus
mundum hunc ex ceteris non minus possibilibus elegit ob ma-
jorem perfectionem, quæ ipsi quam ceteris inest; necesse est ut
cognoverit, mundo huic majorem inesse perfectionem, quam
mundis ceteris æque possibilibus, cum per se pateat nihil pos-
se eligi ob id, quod ab eligente non cognoscitur, Jam perfe-
ctio mundi consistit in eo, quod rationes particulares rerum
simultanearum (cur scilicet ipsæ potius coëxistant, quam aliæ,
& hoc potius, quam alio modo) & successivarum (cur scili-
cet hæc potius sibi invicem succedant, quam aliæ) tandem in a-
liquam generalem resolvantur (§. 540. *Cosmol.*). Necesse igitur
est, ut Deus, dum elegit mundum in suo genere perfe-
ctissimum, omnia coëxistentia & successiva in mundo quolibet
distincte cognoscat (§. 152.) non modo perspiciciens, quæ
ipsis insunt, sed & intelligens, quomodo vi eorum omni pos-
sibili modo combinari possint, adeoque coëxistentia &
successiva non modo in se spectans, verum etiam in systema-
ta referens (§. 142.), consequenter ob majorem perfectionem
mundum hunc ex ceteris eligere nequit, nisi distincte cogno-
scat omnia, quæ ad omnes mundos posibles spectant (§. 38.
Psychol. empir.). Quamobrem cum omnes mundi posibles,
quicquid cognitu possibile in se contineant (§. 153.); dum Deus
eligit mundum unum ex ceteris possibilibus, quicquid cognitu

(continuum) §. 328. Pos-

possibile actu cognoscere debet, consequenter cum intellectus perfectissimus sit, qui omnia possibilia sibi distincte repræsentat (§. 647. *Psychol. rat.*), adeoque cognoscit quicquid cognitum possibile, impossibilibus quippe nonnisi per possibilia cognoscendis (§. 308.); ut Deus eligat mundum in suo genere perfectissimum, necesse est ut intellectus ipsius sit omnium absolute perfectissimus. Evidens igitur est, ex eo, quod sumatur, Deum elegisse mundum hunc, qui existit, ex ceteris possibilibus ob majorem, quæ eidem inest, perfectionem, necessario colligi, esse Deo intellectum absolute perfectissimum. Quoniam itaque id signum est rei alterius, ex quo colligitur alterum adesse (§. 952. *Ontol.*); electio mundi in suo genere perfectissimi est signum intellectus absolute perfectissimi. Jam vero ex ipsa notione electionis & intellectus absolute perfectissimi liquet, cur illa hunc significet, quemadmodum ex demonstratione præsentē apparet. Quamobrem cum naturale sit signum, ubi ratio significatus in ipsis rerum notionibus continetur (§. 956. *Ontol.*); electio mundi in suo genere perfectissimi est signum naturale intellectus absolute perfectissimi.

Atque adeo jam apparet, quam arctissimus sit nexus inter electionem mundi in suo genere perfectissimi & intellectum absolute perfectissimum, ita ut illam sine hoc concipi impossibile sit.

§. 329.

Electio mundi in suo genere minime perfectissimi non est signum intellectus absolute perfectissimi. Pone nimirum electum esse mundum A, qui minus perfectionis possidet, quam mundus B. Cum mundus A eligi potuerit, vel propter rationes ipsi extrinsecas, vel propter ignorantiam, quod scilicet mundus B aut prorsus ignoretur, aut ejus saltem perfectio non agnoscat; ex eo sane, quod mundus A electus esse supponatur mundo B imperfectior, colligi nequit eligen-

Electio mundi minime perfectissimi cur idem significare nequeat.

tem omnia possibile distincte sibi repræsentasse (§. 38. *Psychol. empir.*), consequenter eidem intellectum absolute perfectissimum competere (§. 647. *Psychol. rat.*). Quoniam itaque ex electione mundi in suo genere minime perfectissimi non colligitur in eligente intellectus absolute perfectissimus, ex signo autem colligitur præsentia ejus, quod significat (§. 952. *Ontol.*); electio mundi in suo genere minime perfectissimi non est signum intellectus absolute perfectissimi.

Non est, quod excipias, agi hic de electione a Deo facta, cui intellectum esse absolute perfectissimum constet (§. 168.). Neque enim hic queritur, quinam eligat mundum A potius, quam alterum B isto perfectiorem, & quænam de eligente aliunde nobis jam innotuerint; sed de eo disquiritur, quidnam ex electione supposita animum non advertendo nisi ad ea, quæ de eadem sumuntur, necessario colligatur. Et in propositione præsentate negatur ex electione mundi minime perfectissimi in suo genere necessaria consequentia inferri posse intellectum eligentis absolute perfectissimum. Quid ex electione minus perfecti inferri non possit, ex iis patet, quæ inter homines accidunt. Etenim pone plures nummos aureos non differentes nisi pondere, ita ut eorum nonnisi unus justo pondere gaudeat, & Titium ex iis eligendi potestatem dum habet, quemcunque voluerit, eligere eum, qui a vero pondere omnium maxime deficit. Quis, quæso, sibi persuadebit, hinc necessaria consequentia inferri posse, quod Titius pondera omnium nummorum aureorum habuerit perspecta & quantum unusquisque eorum a vero pondere absit, quod nonnisi uni est, intellexerit? Quodsi aliunde noveris, quæ Titio fuerint rationes extrinsecæ, ab objecto minime petita, cur eum potius elegerit, qui a vero pondere maxime abest, quam qui vero pondere gaudet, etsi omnium pondera habuerit perspecta, seu, cur studio, non ignorantia illum minime ponderis elegerit; eidem pondera omnia perspecta fuisse non ex electione intelligis. Similiter hic non queritur, quid de Deo eligente aliunde nobis constet, sed quid ex
ejus

ejus electione in se spectata necessario consequatur. Ex inferioribus autem constabit, hanc disquisitionem non esse inutilem, sed maximi utique momenti.

§. 330.

Quicquid est perfectissimum in suo genere, id Deo in eo genere maxime placet. Deus mundum hunc elegit ex ceteris æque possibilibus ob maiorem perfectionem, quæ ipsi inest (§. 325.). Quamobrem cum penitus intelligat, quicquid vult (§. 316.); omnem rerum perfectionum intelligere & gradum perfectionis entis cujuslibet in quolibet genere determinate cognoscere debet. Cognoscit autem omnia intuitive (§. 207. 272.), adeoque etiam rerum perfectionem cognoscit intuitive. Enimvero in cognitione intuitiva perfectionis voluptas consistit (§. 511. *Psychol. empir.*), tantoque major ea est, quo major fuerit perfectio (§. 516. *Psychol. empir.*). Deus igitur ex perfectione rerum voluptatem percipit, eamque tanto maiorem, quanto illa major est, consequenter ex eo, quod perfectissimum est in suo genere, maximam, quæ in eo genere percipi potest. Placet vero enti intelligenti id, ex quo voluptatem percipit (§. 542. *Psychol. empir.*), adeoque tanto magis, quanto major fuerit voluptas inde percepta. Quare Deo, quicquid in suo genere perfectissimum est, maxime placet.

Non Deo indignum existimari debet, quod ipsi placeant res finitæ, etsi infinito intervallo a summa ipsius perfectione distent. Etenim ideæ rerum sunt actus intellectus ipsius: quidni ergo ipsi placeat, quod suum est. Cave vero hinc inferas: Deo placere malum morale, quod in hominibus observamus. Paulo enim post ostendemus, id non esse a Deo, sed ab ipsis hominibus, evicturi quod ipsum displiceat eidem maxime. Placent enim entia, quatenus perfectionis sunt capacia, quæ a Deo est. Ad hanc vero perfectionem maxime spectat malum morale. Deinde probe notandum est in propositione præsentē non affirmari absolute, quod Deo

placeat maxime, quod in suo genere perfectissimum; sed tantummodo, quod idem maxime placeat inter ea, quæ ad istud rerum genus spectant.

§. 331.

*Quinam
mundus
Deo maxi-
me placeat.*

Mundus, qui existit, inter omnes possibiles Deo maxime placet. Etenim mundus, qui existit, est omnium possibilium perfectissimus (§. 326.). Enimvero quicquid perfectissimum est in suo genere, id Deo maxime placet (§. 330.). Ergo hic mundus, qui existit, inter omnes possibiles Deo maxime placet.

Mundum sumimus pro serie entium finitorum, tam simultaneorum, quam successivorum, inter se connexorum (§. 48. *Cosmol.*), qualem etiam esse mundum hunc adspectabilem, qui existit (§. 49. *Cosmol.*), constat (§. 55. *Cosmol.*). De tota igitur hac rerum serie prædicatur, quod Deo magis placeat, quam ceteræ istiusmodi rerum series. Cavendum itaque, ne, quæ de toto dicuntur, ad partem applicentur, vel etiam ad id, quod in aliqua ejus eaque valde exigua parte deprehenditur, v. gr. ad homines, quatenus eorum actiones male sunt. Nulla sane argumentatio est: in mundo hoc datur malum morale. Ergo si is Deo maxime placet, maxime eidem placet, quod malum est. Ecquis enim est adeo hospes in omni Logica, ut vitiosam argumentandi formam me non monente videat?

§. 332.

*Ens liberum
quid
deceat.*

Ens liberum decere dicitur, si in iis, quæ ipsi insunt, continetur aliqua ratio, cur hoc potius velle debeat, quam aliud. Quamobrem cum Deus præditus sit voluntate libera (§. 123.); Deum decet, cujus aliqua in iis, quæ ipsi insunt, seu in essentia vel attributis ipsius continetur ratio, cur id potius velle debeat, quam aliud.

Definitionem ejus, quod decet agens, generalem dare libuit, propterea quod eadem etiam alio loco habemus opus, ubi doceri debet, quid hominem agere deceat. Ecquis enim est

est, qui nesciat, neminem non affirmare, dedecere hominem dignitate conspicuum, si quid agat, quod per dignitatem, qua fulget, ipsi potius non agendum esse intelligitur.

§. 333.

Electio mundi omnium possibilium perfectissimi Deum de- Decet. Etenim Deus omniscius est (§. 302.), adeoque scit omnia, quæ cognituabilia sunt, sive singularia, sive universalia (§. 301.). Novit igitur etiam, quinam mundus sit omnium perfectissimus. Enimvero quod minus perfectum est, ab eo etiam eligi potest, qui, quid eligibilium perfectius sit, non intelligit, & perfectissimum, qui summam eligibilis perfectionem non agnoscit, non nisi cæco quodam casu eligit, ex scientia eligere nequit. Quamobrem cum hinc pateat, solius Dei omniscii esse, ut eligat mundum omnium possibilium perfectissimum; per ipsius omniscientiam utique intelligitur, quod mundum potius perfectissimum eligere debeat intellectus sui perfectissimi specimen editurus (§. 329.), quam imperfectiorem. Quoniam itaque in omniscientia Dei aut, quod perinde est, in summa intellectus divini perfectione continetur aliquo ratio electionis mundi omnium possibilium perfectissimi (§. 56. *Ontol.*); quin hæc ipsum debeat electio dubitari nequit.

Quod decet, non absolute necessarium est agenti, qui idem libere vult. Quamobrem nemo desideret, ut in illatione eius, quod decet, ex iis, per quæ decere intelligitur, ea necessitas sit, quæ in veritatibus necessariisprehenditur.

§. 334.

Deus elegit mundum, quia ipsum decet. Etenim elegit Deus mundum omnium possibilium perfectissimum, quia talis (§. 326.). Enimvero electio mundi omnium possibilium perfectissimi Deum decet (§. 333.). Deus igitur mundum elegit, quia ipsum decet.

Propositio hæc probe notanda est, ne somniemus Deum non agere, quod ipsum decet, male de perfectione hujus universi judicantes (§. 327.). Quamobrem consultum judicamus sequentem addere propositionem.

§. 335.

*Quid Deus
velit respec-
tu sui.*

Deus vult, quod ipsum decet, Etenim Deus elegit mundum, quia mundi electio ipsum decet (§. 334.). Enimvero electio est actus voluntatis liberæ (§. 941. *Psychol. empir.*), adeoque per electionem mundi patet, Deum velle, quod se deceat.

Nemo existimet, quod a singulari ad universale arguemur, dum ex electione mundi perfectissimi, quæ Deum, decet, inferimus Deum velle quod ipsum deceat. Etenim cum mundus nostra phrasi complectatur totam rerum finitarum a Deo creaturarum seriem; actus ille voluntatis divinæ quo mundum hunc ex ceteris possibilibus elegit, complectitur ea omnia, quæ Deus de rebus extra se existentibus voluit. Quicquid ergo Deus vult extra se, illud ipsum decet. Deinde constat in omni singulari inesse, quod ad universale spectat. Quamobrem cum ex lege appetitus, a qua recedere anima nostra nequit, appareat, objecta appetibilia ad se volentem referre (§. 904. 555. *Psychol. empir.*), & Deus ea, quæ extra ipsum sunt, dum vult, idem faciat; quin hoc ipsum quoque sit conveniens voluntati divinæ in genere dubitari nequit. Enimvero dum Deus ad semetipsum refert quod vult; id vult quod ipsum decet. Quamobrem patet generaliter dicendum esse, Deum non velle nisi ea, quæ ipsum decent.

§. 336.

*Ratio sub-
jectiva
quenam
dicatur.*

Ratio subjectiva dicitur quæ desumitur a subiecto, seu agente.

Ita ratio subjectiva electionis mundi est, quæ desumitur a Deo eligente.

§. 337.

*An detur
ratio subje-*

*Datur ratio subjectiva, cur hunc potius mundum elegerit
Deus*

Deus quam alium. Etenim Deus elegit hunc mundum, quod *divina ele-*
 eum maxime decet hunc potius mundum eligere, quam ali- *tionis*
 um (§. 333. & seq.). Quoniam itaque per ea, quæ in Deo *mundi,*
 sunt, intelligitur, cur hunc potius mundum eligere malue-
 rit, quam alium; ratio aliqua electionis mundi desumitur ab
 ipso Deo eligente (§. 56. *Ontol.*). Quamobrem cum ratio
 subjectiva appelletur, quæ a subjecto agente desumitur (§.
 336.); dari rationem subjectivam, cur Deus hunc potius elegerit
 mundum, quam alium, patet.

§. 338.

Quoniam in genere constat, Deum velle, quod ipsum de- *An in ge-*
 cet; eodem, quo ante modo in genere evincitur, dari volun- *nere detur*
 tatis divine rationem aliquam subjectivam, consequenter cum *ratio sub-*
 Deus non agat, nisi quod vult, rationem dari subjectivam, *jectiva vo-*
 cur quid agat. *luntatis di-*

Ratio subjectiva & objectiva in determinatione actus vo- *vinæ.*
 litionis probe a se invicem discernendæ, & ad utramque ani-
 mum advertere tenemur, siquidem illum sufficienter intel-
 ligere velimus.

§. 339.

Ratio objectiva & subjectiva simul sumta constituunt ra- *Ratio suffi-*
tionem sufficientem, cur Deus quid velit. Deus enim elegit *ciens vo-*
 hunc mundum ex ceteris possibilibus, quia omnium possibilium *luntatis*
 perfectissimus (§. 325.), adeoque electionis datur ratio objectiva *divinæ*
 (§. 118.). Enimvero elegit quoque eundem mundum, quod *qualis sit.*
 eum deceat maxime ipsum eligere (§. 334.), adeoque electio-
 nis datur ratio subjectiva (§. 336.). Quamobrem patet, dari
 voluntatis divinæ & rationem objectivam & subjectivam. Enim-
 vero rationes cur Deus quid potius velit, quam nolit, aliunde
 quam ab ipso & objecto desumi nequeunt, quemadmodum per
 se patet, adeoque non datur alia ratio, quam objectiva & sub-

(Wolffii Theol. Naturalis)

Rr

jecti-

jectiva volitionis (§. 118. 336). Quamobrem cum voluntatis divinæ ratio sufficiens detur (§. 70. *Ontol.*); ratio objectiva & subjectiva simul constituunt rationem sufficientem voluntatis divinæ.

Quoniam non ante intelligitur, cur quid potius sit, quam non sit, quam rationem sufficientem penitus perspexeris (§. 56. *Ontol.*); ideo patet, vi propositionis præsentis non minus rationem objectivam, quam subjectivam voluntatis divinæ expendendam esse, ut constet, cur hoc potius Deus voluerit, quam aliud.

§. 340.

Motiva

voluntatis
divinæ un-
de desu-
mantur.

Motiva voluntatis divinæ partim ab objecto, partim ab ipso Deo volente desumuntur. Etenim motiva voluntatis divinæ sunt ratio sufficiens actuum volitionis & nolitionis (§. 887. *Psychol. empir.*). Enimvero ratio sufficiens voluntatis divinæ constat ratione objectiva & subjectiva (§. 339.), adeoque motiva voluntatis divinæ ratione objectiva & subjectiva constant. Quamobrem cum ratio objectiva ab objecto (§. 118.), subjectiva a subjecto desumatur (§. 336.); motiva voluntatis divinæ partim ab objecto, partim ab ipso Deo desumuntur.

Absit autem ut existimes, voluntatem divinam, consequenter Deum ipsum, hoc pacto effici dependentem a rebus aliis, creatorem a creaturis. Etenim Deus vult omnia ab æterno, antequam quicquam extra ipsum existat (§. 319.), adeoque nulla creatura influit in actum voluntatis divinæ. Ratio objectiva desumitur ab ideis rerum, quæ sunt in intellectu divino, immo quæ ipsum intellectus divini actum constituent. Quodsi ergo inde petitur ratio objectiva voluntatis, divina tantummodo voluntas dependet ab intellectu ejus (§. 851. *Ontol.*), consequenter a Deo ipso. Absurdum vero non est, Deum dependere a se ipso, cum sit libertati ejus summaque, qua gaudet, perfectioni minime inimicum. Quodsi Deus demum quid in tempore veller, quod ideo velle non potuisset, quia objectum, circa quod versatur nondum ex-

istebar,

istebat, atque adeo actus volitionis in Deo dari non potuisset, nisi existeret creatura; tum demum aliqua veritatis specie dici poterat, ratione objectiva Deum fieri dependentem a creatura: est ubi ab æterno quid velle ponitur, quatenus intuetur ideas in intellectu suo, aut, verius loquendo, quatenus sibi conscius est actus intellectus sui, nulla specie fingitur Dei a re quadam alia ab ipso diversa dependentia.

§. 341.

Deus lubentissime vult, quicquid vult. Etenim Deus, quod *Lubentia* vult, ideo vult, quia ipsi placet, quemadmodum patet ex iis, *voluntatis* quæ supra demonstravimus, cum evinceremus, mundum, qui *divine* existit, inter omnes posibles Deo maxime placere. Quod si id supponere nolis, hoc modo argumentandum. Deus elegit hunc mundum ex ceteris possibiliibus ob majorem, quæ ipsi inest, perfectionem (§. 325.), adeoque cum id ipsi maxime placeat, quod in suo genere perfectissimum est (§. 330.), ideo quia ipsi maxime placet. Quamobrem cum electio sit actus liberæ voluntatis (§. 941. *Psychol. empir.*); ideo vult, quod vult, quia ipsi placet. Enimvero quia volens vult lubenter, quando vult, quod ipsi placet (§. 938. *Psychol. empir.*); Deus utique lubentissime vult, quicquid vult.

§. 342.

Deus potest mundos ceteros posibles non minus ad actum An Deus perducere, quam hunc produxit. Etenim mundus hic, quem Deus omnes ad actualitatem perduxit, est omnium possibiliū perfectissimus (§. 326.). Quamobrem cum potentia Dei perfectissimè *possibiles* actuando sufficiat, & præterea constet, quod eundem actum *producere* quia ipsi maxime placet (§. 331.); quin mundis ceteris possi- *potuerit* bilibus actuandis, cum ad hoc non major potentia requiratur, quod per se patet, sufficiat, dubitari nequit.

Idem etiam sic ostenditur. Ceteri, qui non existunt

mundi (§. 117.), non minus possibiles sunt, quam hic adspectabilis (§. 101. *Cosmol.*). Enimvero nihil datur in quolibet mundo, quod rationem sufficientem existentiae suae habeat in ipso mundo, sed omnium ratio sufficiens continetur in ente a mundo diverso eoque necessario (§. 90. *Cosmol.*), consequenter in Deo (§. 67.). In nullo adeo mundo quicquam inest, quod ad actualitatem ejusdem conferre quicquam poterat. Quamobrem si mundos omnes ad potentiam Dei referas, nullum quoad eam discrimen deprehenditur, cum ubivis ad actualitatem perducendum sit, quod per se nihil ad eandem conferre valet; quin potentia Dei omnibus mundis possibilibus ad actualitatem perducendis sufficiat, dubitandum non est.

Quod si quaesiveris, num potentia Dei omnibus simul actuandis sufficiat, an vero ad unum actuandum tantummodo restricta sit, ita tamen ut salva libertas eligendi eidem fuerit, quem actuare mallet: hoc equidem, quicquid est dubii, tolli poterat per rationem, quam supra reddidimus (§. 117.), existentiae unius tantummodo mundi; ex sequentibus tamen clarius adhuc constabit, ubi sapientia Dei fuerit explicata.

§. 343.

*Potentia
divinae
objectum.*

Deus omnia possibilia ad actualitatem perducere potest. Etenim Deus omnes mundos possibiles ad actum perducere potest (§. 342.). Sed mundi omnes possibiles omnia possibilia continent (§. 152.). Ergo Deus omnia possibilia ad actualitatem perducere potest.

Atque hoc pacto patet, quodnam sit potentiae divinae objectum, unde ejus aestimanda magnitudo.

§. 344.

*Quoniam
ab eodem
removen-
da,*

Deus non potest facere seu ad actum perducere impossibilia. Quae enim impossibilia sunt, illa existere minime possunt (§. 132. *Ontol.*). Quamobrem cum ad actualitatem perducere minime

nime possit, quod in se tale est, ut existere nequeat (§. 28. *Ontol.*); Deus impossibilia ad actum perducere non potest, seu facere nequit.

Agnovere hoc dudum Theologi potentiam Dei non esse extendendam ad impossibilia. Unde patet possibilitatem non esse derivandam a potentia Dei, cum ante ut possibile spectetur, quam ad potentiam Dei referatur; sed ab ipsius intellectu, quemadmodum supra eandem derivavimus (§. 192.). Atque adeo patet, quam sint vera, quæ D. Thomas opposuit possibile definitibus per id, cui producendo causa aliqua suppetit, rei & actus seu existentiae ejusdem possibilitatem, seu possibilitatem intrinsecam & extrinsecam (§. 111. *Cosmol.*) pro eo, quod ipsi erat, acumine distinguens (*not.* §. 99. *Ontol.*).

§. 345.

Deus nec velle, nec facere potest contradictoria. Etenim Deus nec velle (§. 313.), nec facere potest impossibilia (§. 344.), sed quicquid vult & facere potest, possibile est (§. 314. 343.). Quamobrem cum impossibilia contradictionem involvant (§. 79. *Ontol.*), possibilia ab eadem libera sunt (§. 85. *Ontol.*); Deus contradictoria nec velle, nec facere potest.

Propositionis hujus & in theoria, & in praxi multus est usus, qui suis locis elucescet.

§. 346.

Impossibilitas faciendi impossibilia non arguit defectum potentiae. Etenim impossibilia in se talia sunt, ut existere nequeant (§. 132. *Ontol.*). Quamobrem quæ fingitur potentia eadem producendi, contradictionem involvit (§. 28. *Ontol.*), adeoque impossibilis (§. 79. *Ontol.*), consequenter non ens est (§. 138. *Ontol.*). Cum adeo potentiam ad impossibilia extendi implicet; impossibilitas faciendi impossibilia non arguit defectum potentiae.

Cavendum nobis est a notionibus deceptricibus, ne quæ appareant, quæ non sunt.

§. 347.

*Omnipo-
sentia de-
finitio.*

Omnipotens dicitur, qui potest facere omnia possibilia. Unde *Omnipotentia* ea est, quæ extenditur ad omnia possibilia.

Qui omnipotentem dicunt, qui omnia facere potest, aut tacite supponunt, aut supponere debent vi demonstrationis propositionis præcedentis, non intelligi per omnia nisi ea, quæ possibilia sunt & quibus adeo in se spectatis non repugnat ut existant (§. 133. *Ontol.*). Præstat tamen id in definitione exprimi, ne quis eadem abutatur, cum sic appareat, nihil posse tribui omnipotentia, antequam id possibile esse fuerit evictum: quod cum subinde fiat, præter necessitatem finguntur difficultates habenturque pro nodis insolubilibus, quæ tamen revera nullæ sunt. Exempla occurrent in sequentibus.

§. 348.

*Omnipo-
sentia ma-
gnitudo.*

Omnipotentia est potentia absolute maxima. Etenim omnipotentia extenditur ad omnia possibilia (§. 347.). Quamobrem cum impossibilitas faciendi impossibilia minime arguat defectum potentia (§. 346.) ; major potentia concipi haud quaquam potest, quam quæ ad omnia omnino possibilia extenditur. Est igitur omnipotentia maxima, quæ concipi potest, adeoque absolute citra ullam relationem ad potentiam aliam maxima.

Si cui major videtur potentia, quæ ad omnia etiam impossibilia extendatur ; is dat sine mente sonos, contradictorii ingenii homo.

§. 349.

*Omnipo-
sentia Dei
evicta.*

Deus est omnipotens. Etenim Deus omnia possibilia ad actum perducere valet (§. 343.). Enimvero qui omnia possibilia ad actum perducere valet, omnipotens est (§. 347.). Deus igitur omnipotens est.

§. 350.

§. 350

Quoniam omnipotentia est potentia absolute maxima (§. Magnitudo 348.), Deus vero omnipotens est (§. 349.); *potentia Dei est absolute maxima, consequenter Deus, cui hæc est potentia, omnium absolute potentissimus.*

Probe notandum est, quod jam in casu simili inculcavimus, Deum non dici ens omnium, quotquot existunt, potentissimum; sed omnium absolute potentissimum. Et si enim prius sit verum, cum posito posteriore idem simul ponatur; minus tamen dicit, quam debebat, quoniam ex eo, quod ens quodpiam omnium existentium potentissimum, nondum sequitur, quod sit tanta potentia præditum, quanta major concipi nequit, nisi ante constiterit, potentiam absolute maximam esse possibilem & ens eadem instructum existere.

§. 351.

Deus in electione hujus, qui existit, mundi liber est ab omni coactione interna. Etenim Deus non minus mundos ceteros quoscunque, quos perinde ac hunc cognoscit (§. 141.), ad actum perducere valet, quam hunc adspectabilem produxit (§. 342.), nec minus seipsum (§. 141.), adeoque omnipotentiam suam cognoscit (§. 349.). Quamobrem cum ad hoc, ut fieri possit mundum aliquem a Deo produci, sufficiat, ut mundum penitus cognoscat & producere possit, ac potentia suæ sibi sit conscius, quod per se patet; nulla ex parte Dei fuit necessitas absoluta, cur hunc potius elegerit mundum, quam alium (§. 279. 301. Ontol.). Patet igitur Deum fuisse liberum in electione mundi ab omni coactione interna.

Nondum evincimus in genere, Deum liberum esse ab omni coactione interna in electione mundi; sed tantummodo, cum fuisse liberum in electione hujus mundi, posito quod aliquem producere voluerit. Neque enim hæc duo a se invicem pendent. Per se utique necesse non est, ut, si
nulla

nulla necessitate interna adducatur Deus ad mundi hujus electionem, nulla necessitate adducatur ad aliquem eligendum cum in se non repugnet, ut Deus necessitate interna impulsus ad mundum aliquem producendum, nulla necessitate interna hunc potius eligat, quam alium. Quamobrem quod nulla Deo fuerit necessitas mundum aliquem producendi, deinceps demum demonstraturi sumus. Probe hæc notanda veniunt, ne hebetiores plus probatum sumant, quam revera probavimus; acutiores vero minus probatum existiment, quam probari debebat. Non piget in re tam ardua, qualis est cognitio divina, juvare & excitare acumen lectoris, ne ejus certitudo culpa nostra labefactetur.

§. 352.

*Potentia
Dei ad vo-
luntatem
relata.*

Deus potest facere, quicquid vult. Quicquid enim Deus vult, id possibile est (§. 314.). Enimvero quicquid possibile est, Deus facere potest (§. 343.). Facere igitur potest, quicquid vult.

In eo differt potentia Dei a potentia humana: etenim nos facere non possumus, quicquid volumus. Sæpe nimirum volumus, quod impossibile, adeoque nec a Deo quidem (§. 344.), nedum a nobis fieri potest. Sæpe volumus, quod equidem impossibile non est, cui tamen ad actum producendo vires nostræ minime sufficiunt. Defectu igitur scientiæ vel potentiæ nostræ accidit, ut facere non possumus, quod volumus. Quamobrem cum Deus & omniscius sit (§. 302.), & omnipotens (§. 349.), fieri nullo potest modo, ut vel velit, quod facere non potest, vel facere non possit, quod vult. Notanda est non modo differentia, quæ inter voluntatem nostram & divinam ad potentiam relata intercedit; sed animum quoque advertere debemus ad rationes, cur ea differentia intercedat, ne quid affirmetur quod dedeceat philosophum (§. 46. *Disc. pralim.* & §. 332. *Theol. nat.*).

§. 353.

Idem ulterius expenditur.

Deus plura facere potest, quam vult. Deus enim omnes mun-

mundos posibles producir potest (§. 342.); cum tamen non-nisi unum elegerit (§. 121.), quem produceret, adeoque cum electio liberæ voluntatis actio sit (§. 941. *Psychol. rat.*), non-nisi unum existere velit; patet utique cum plura facere posse, quam vult.

Idem etiam sic ostenditur. Cum Deus mundum elegerit ob majorem, quæ ipsi est, perfectionem (§. 325.), quicquid vero est in suo genere perfectissimum, id Deo in eo genere maxime placeat (§. 330.); Deum eligere, consequenter velle patet (§. 941. *Psychol. empir.*), quod ipsi maxime placet, adeoque non omnia possible, sed tantummodo aliqua. Enimvero possible omnia facere potest (§. 343.). Ergo plura potest facere, quam vult.

Convenit libertati quædam non velle, quæ agens facere potest. Unde & nos quædam non volumus, quæ facere possumus. Quod vero Deus plura facere ideo possit, quam vult, idem omnipotentis tribuendum. In ente libero finitæ potentis fieri potest, & plerumque fit, ut plura velit, saltem velle possit, quam facere potest. Pendet veritas propositionis præsentis a libertate & potentia simul.

§. 354.

Potentia Dei prorsus illimitata est. Etenim Deus facere *Potentia* potest omnia possible (§. 343.). Jam cum impossibile in se *divina li-* tale sit, ut existere nequeat (§. 132. *Ontol.*), potentia, quæ in eo *bertas ab* consistit, ut possible ad actum perducantur (§. 222.), limitari *omni limi-* aliter nequit, quam si quædam possible eidem subducantur *tatione.* (§. 468. *Ontol.*). Patet itaque potentiam divinam prorsus illi-
mitatam esse.

Idem etiam sic ostendi poterat. Deus est omnipotens (§. 349.), adeoque potentia ejus est omnium absolute maxima (§. 348.), consequenter aliam eadem majorem concipi repugnat. Enimvero eo, quod limitatum est, majus vel minus (*Wolfii Theol. Naturalis.*)

Ss

con.

concupi potest (§. 826. *Ontol.*). Potentia igitur Dei limitata esse nequit.

Potentiam hominum esse valde limitatam nemo non novit. Atque in eo manifesta consistit differentia, quæ inter potentiam Dei atque potentiam nostram intercedit, quod illa illimitata sit, hæc vero limitata. Præter hanc vero differentiam datur alia, quæ non eodem modo manifesta est, suo loco, quando de creatione agemus, annotanda.

§. 355.

Ratio formalis voluntatis divinæ.

Deus omnia vult simul, seu unico voluntatis actu. Etenim Deus cognoscit omnia simul (§. 160.). Quamobrem cum cognoscens aliquid appetat, quamprimum appetibile vel averfabile ut tale cognoscit (§. 318.); Deus quicquid vult, unico voluntatis actu, seu omnia simul velle debet.

Hoc prorsus proprium est voluntatis divinæ. Nos enim successive volumus, omnia simul velle non possumus. Ratio manifesta est. Non omnia cognoscimus simul, quæ nobis per omnem vitam appetibilia vel averfabilia occurrent: immo omni tempore de appetibili vel averfabili eodem non judicamus modo. Fieri adeo nequit, ut unico voluntatis actu statuamus de iis, quæ per omnem vitam vel appetenda, vel averfanda. Atque hinc uberius liquet, unitatem actus voluntatis pendere ab unitate actus intellectus.

§. 356.

Voluntas Dei qualis sit.

Voluntas Dei est actus, non facultas. Deus enim vult omnia simul (§. 355.), adeoque nulla ipsi possibilis est volitio, quæ non actu in eodem detur. Quoniam itaque facultas est potentia activa (§. 716. *Ontol.*), atque adeo nonnisi agendi possibilitatem denotat (§. cit.); in Deo nulla datur facultas volendi, sed voluntas ejus purus actus est.

Dici etiam solet voluntatem in Deo concipi non per modum potentiae, sed per modum actus, in quo voluntas divina ab humana formaliter differt.

§. 357.

§. 357.

Voluntas divina infinita est. Etenim Deus vult omnia simul seu unico voluntatis actu (§. 355.), ut adeo fieri non possit, quin Deus aliquid velit, vel nolit, quod non actu velit, vel nolit. Quicquid adeo per voluntatem Dei possibile concipi potest, id actu in Deo datur. Quoniam itaque ens infinitum est, in quo sunt omnia simul, quæ eidem inesse possunt (§. 838. *Ontol.*); voluntas divina infinita est.

Infinitudo voluntatis divine.

Equidem non memini infinitudinem ab autore aliquo de voluntate divina prædicari, immo vereor, ne sint qui id fieri posse negent: enimvero cum vulgo infinitum reale ab imaginario, quod in magnitudinum & numerorum, seu quantitatum genere considerant Mathematici, non distinguatur; infinitudo voluntati divinæ non tribuitur, quod illa imaginarii infiniti notio eidem minime conveniat. Enimvero cum definitio infiniti realis eodem modo quadret in voluntatem divinam, ac in intellectum Numinis (§. *præf.* & §. 167.); eodem jure infinitudo de voluntate prædicatur, quo de intellectu (§. 349. *Log.*). Ceterum qui admittit Deum non velle successive, sed omnia simul unico voluntatis actu, concipiens voluntatem divinam tanquam purum actum, non vero per modum facultatis, is rem admittit. Quodsi ergo nomen rejiciat, per nos id faciat, qui de vocabulis nemini litem movemus.

§. 358.

Voluntas divina omni enti intelligenti finito incomprehensibilis. Ens enim intelligens finitum successive intelligit & vult, quæ vi sua actu cognoscere & velle potest (§. 837. *Ontol.*). Quamobrem cum ens intelligens finitum, quale est anima nostra, non habeat ideam voluntatis, nisi quatenus sibi sui conscius est (§. 12. *Psychol. rat.*); non aliam nisi successivæ volitionis ac nolitionis ideam habere potest. Non igitur habet ideam nisi voluntatis, quæ per modum potentiz inest. Enim-

Incomprehensibilis voluntatis divine.

vero Dei voluntas est actus purus (§. 356.), quo simul vult, quicquid ut velit fieri potest (§. 355.). Ens igitur intelligens finitum non habet ideam voluntatis, qualis est in Deo, consequenter eandem sibi clare repræsentare nequit (§. 48. *Psychol. empir.*), atque adeo voluntas divina ipsi incomprehensibilis est (§. 170.).

Quando de incomprehensibilitate voluntatis divinæ hic loquimur, eandem non consideramus nisi ut actum essentiae divinæ, animum minime advertentes ad objectum voluntatis: id quod probe notandum est, ne incomprehensibilitatem cum imperscrutabilitate confundamus, de qua deinceps dicendum.

§. 359.

Cur voluntas Dei nobis incomprehensibilis.

Quoniam homo est ens intellectus admodum limitati (§. 654. *Psychol. rar.*), adeoque finiti (§. 173.); voluntas Dei omni homini incomprehensibilis.

Repetenda hic sunt, quæ de intellectu divino nobis incomprehensibili dicta sunt superius (not. §. 174.).

§. 360.

Immensitas potentia Dei.

Potentia Dei immensa est. Potentia Dei prorsus illimitata est (§. 354.), eademque absolute maxima (§. 350.). Quamobrem cum quid metiamur, si magnitudinem aliquam pro unitate assumamus & alterius ad eam rationem determinemus (§. 438. *Ontol.*), mensura autem mensurato homogenea esse debeat (§. 441. *Ontol.*); potentiam metiri non licet, quam si entis cujusdam potentia pro unitate assumatur, & ratio potentia entis alterius ad eandem determinetur. Enimvero cum potentia illimitata & absolute maxima quæcunque ad omnia sese extendat possibilia, cum divina eadem est *per demonstrata*, adeoque pro mensura potentia divinæ assumi nequit. Jam cum porro quantitas limitata quotiescunque sumatur, degenerare nequeat in illimitatam (§. 175.), nec fieri potest, ut po-

tentia limitata degeneret in illimitatam, quotiescunque sumatur, consequenter nec potentia limitata pro mensura illimitatae seu divinae assumi potest, neque per eandem potentiam divinam metiri licet. Quoniam itaque potentia divina mensuram omnem respuit, *per demonstrata*; immensa utique esse debet (§. 41).

Consideramus hic potentiam divinam tanquam immensam in se; non vero tantummodo negatur fieri posse, ut ens quoddam præter Deum ipsam metiatur. Unde & Deus ipse potentiam suam cognoscit tanquam immensam, hoc est, eam, quæ mensuram omnem respuit. Quoniam tamen distincte novit omnia, ad quamnam sese potentia sua extendit, eorumque sibi simul conscius est; adæquatam potentiae suae cognitionem habet. Cumque ipsum minime lateat, quid facere possit ens quodecunque aliud; distinctissime quoque perspicit, quam longo intervallo potentia ipsius post se relinquat creaturæ cujuslibet seu entis finiti cujuscunque potentiam, nec opus habet, ut metiendo potentiam suam per potentiam creaturarum ad distinctam utriusque cognitionem perveniat, quemadmodum in magnitudinibus finitis accidit (§. 440. *Ontol.*).

§. 361.

Quoniam potentia Dei in se immensa est (§. 360.), ut ad- *Potentiam*
eo nec Deus, qui semetipsum cognoscit (§. 141.), eandem ali- *Dei homo*
ter quam immensam cognoscat; fieri non potest, ut homo po- *metiri ne-*
tentiam divinam metiatur. *quit.*

Sunt qui exinde inferunt immensitatem potentiae divinae, quod se eandem metiri non posse deprehendant. Sed quam parum hoc pacto probetur, quod erat probandum, supra jam monuimus (not. §. 176.).

§. 362.

Deus plura facere potest, quam quæ homo intelligere va- *Cur poten-*
let. Etenim Deus facere potest quicquid possibile (§. 343.). *tia divina*
Enim- *captum ho-*

*minis
transcen-
dat.*

Enimvero per se patet, neminem hominum intelligere valere omnia, quæ possibilis sunt, quin multa potius possibilis esse, quæ ab ipso ignorantur. Quamobrem liquet Deum plura facere posse, quam quæ homo intelligere valet.

Ex eo igitur, quod non videamus, quomodo quid a Deo fieri possit, inferri nequit, eum id facere non posse. Quoniam enim Deus tantummodo facere non potest, quæ impossibilis sunt; a Deo quid fieri non posse non ante pronuntiandum, quam ubi demonstraveris, esse idem impossibile. Evidens itaque potentiam divinam captum non modo hominis, sed omnem etiam intellectum finitum transcendere. Usus habet hæc propositio in praxi morali, quemadmodum suo loco constabit.

§. 363.

*Miraculo-
rum possi-
bilitas ex-
trinseca.*

Deus potest facere miracula, quotiescunque vult. Et enim miraculum in eo corpore, in quo contingit, possibile (§. 517. *Cosmol.*). Enimvero Deus ad actum perducere valet quicquid possibile (§. 343.) & facere potest, quicquid vult (§. 352.). Miracula igitur facere potest, quotiescunque vult.

In Cosmologia evicimus miraculorum possibilitatem intrinsecam: hic vero extrinsecam probavimus, quatenus evincitur, dari aliquam causam, cujus potentia miraculo producendo sufficit. Quoniam vero causa hæc Deus est, ens a mundo diversum nec ad eum spectans per modum partis (§. 62. 64.), hoc ipso patet, possibilitatem extrinsecam miraculorum non a mundo pendere (§. III. *Cosmol.*). Atque adeo patet, quod in Cosmologia nos in Theologia naturali demonstratos esse promisimus (*not.* §. 524.), dari ens a mundo diversum, quod miracula patrare possit. Ceterum probe notandum est, quod additur in propositione, Deum posse facere miracula, quotiescunque voluerit, consequenter nondum probatum esse, quod miracula in mundo vel hodiernum fiant, vel olim facta fuerint. Antequam igitur probaveris, velle Deum patrare miracula, eorum existentia ex
prin-

principiis rationis demonstrari nequit. Ad defendendam vero religionem revelatam sufficit demonstrasse, quod Deus ea facere possit, si velit.

§. 364.

Deus facere potest, quæ vim naturæ universæ excedunt. Potentia Deus enim miracula facere potest, quotiescunque vult (§. 363.). Dei natura Enimvero miraculum omne vim naturæ universæ excedit (§. omni super. 522. Cosmol.). Deus igitur facere potest, quæ vim naturæ universæ excedunt.

Atque hoc modo patet, quo sensu Deus natura superior dicatur, & natura ejus imperio subjecta pronuncietur. Idem uberius per sequentes propositiones confirmatur.

§. 365.

Deus producere potest motus legibus motus contrarios. Et Motus quæ enim Deus miracula facere potest, quando voluerit (§. 363.). les a Deo Sunt vero motus legibus motus contrarii miracula (§. 526 Cosmol.), iidemque non impossibiles (§. 528. Cosmol.). Deus igitur producere valet motus legibus motus contrarios.

Patet adeo, ad miraculorum possibilitatem extrinsecam evincendam opus esse, ut constet leges motus non esse absolute necessarias & naturam rerum ab absoluta necessitate esse liberam: ut adeo utilitas principiorum cosmologicorum in Theologia naturali elucescat, in cujus gratiam omnem Cosmologiam condidimus (§. 6. Cosmol.).

§. 366.

Deus ordinem naturæ turbare potest, quando & quotiescunque vult. Etenim Deus producere potest motus legibus motus contrarios (§. 365.). Quamobrem cum regulis motus Deo turbare ordo naturæ contineatur (§. 559. Cosmol.); Deus producere potest motus ordini naturæ contrarios, adeoque facere, quæ sunt

sunt contra naturæ ordinem. Quoniam itaque naturæ ordo turbatur, si quid fit, quod est contra eundem; patet Deum naturæ ordinem turbare posse, quando & quotiescunque voluerit.

Apparet hinc, quanta sit Deo in naturam potentia. An vero velit ordinem naturæ turbare & quibus de causis id velit, altioris est disquisitionis.

§. 367.

*Quomodo
Deus mun-
dum immu-
tare possit.*

Deus sequentem mundi partem immutare valet, ut non sit eadem, quæ ad ipsum in idea ejusdem spectat. Etenim Deus facere potest miracula quotiescunque vult (§. 363.). Enimvero si miraculum in mundo contingit, nec aliqua ulterius mutatio accidit; sequens mundi pars non amplius eadem est, quæ alias futura erat (§. 531. *Cosmol.*), cum ea in coëxistentibus mutatio accadat & ea in futuram rerum seriem diversitas introducatur, quæ posita ista mutatione miraculosa, in ceteris per naturam & essentiam corporum consequi debet (§. 532. *Cosmol.*). Deus igitur sequentem mundi partem immutare valet, ut non sit eadem, quæ in idea mundi, qualis in intellectu ipsius continetur, ad eundem spectabat.

Ne quæ de Dei in naturam potentia hic demonstrantur quidpiam obscuritatis habeant, probe perpendenda sunt ea, quæ *locis citatis in Cosmologia* de miraculis tradidimus: neque enim ea alio fine adduximus, quam ut hæc divinæ omnipotentiae pars clarissime nobis elucesceret.

§. 368.

*Immutabi-
litas volun-
tatis di-
vinæ.*

Voluntas Dei immutabilis est. Ponamus si fieri potest, voluntatem Dei esse mutabilem. Cum quid actu mutetur, dum non amplius idem manet (§. 290. *Ontol.*); quod Deus ante voluit, nunc non volet, sed aliud ab eo diversum, & quod nunc vult, non volet in posterum, sed aliud potius ab hoc

hoc diversum. Quamobrem quia porro æternum non est, quod est cum antea non esset, vel futurum est, cum nunc non sit (§. 39.); Deus non vult omnia ab æterno: quod cum sit absurdum (§. 319.), impossibile est voluntatem divinam mutari.

Idem etiam directe ostenditur hoc modo. Deus vult omnia simul, unico voluntatis actu (§. 355.). Fieri adeo non potest, ut pro aliqua volitione particulari, quæ a nobis spectatur tanquam pars illius (§. 341. *Ontol.*), substituaturs alia, ceteris volitionibus particularibus manentibus iisdem, quæ actui isti unico insunt, vel ut quædam eidem accedat, quæ non inerat, aut etiam esse desinat, quæ inerat, non succedente alia in ejus locum. Quamobrem cum immutabile sit, & id, cui nihil aliud substitui potest, & ea res, in qua manentibus ceteris iisdem nihil uni vel alteri substitui, nec iisdem non repugnantibus aliquid accedere potest (§. 291. *Ontol.*); voluntas divina prorsus immutabilis est.

Ostenditur idem etiam hoc modo. Deus cognoscit omnia ab æterno (§. 319.) atque necessario (§. 311.). Quamobrem cum immutabile sit, quod necessarium est (§. 292. *Ontol.*); Dei de appetibilibus & averfabilibus judicium immutabile est, adeoque idem ab omni æternitate, seu ab æterno in æternum. Enimvero cum cognoscens appetibile appetat, averfabile averfetur, quando appetibile vel averfabile tale cognoscitur (§. 318.); quod Deus ab æterno vult, vel non vult, in æternum velle & non velle debet. Quamobrem impossibile est, ut in unico isto voluntatis actu, quo vult omnia (§. 355.) ab æterno (§. 319.), pro volitione quadam particulari substituaturs alia, vel quædam etiam superaccedat, quæ ante non inerat, aut deficiat, quæ ante inerat. Voluntas igitur divina prorsus immutabilis est (§. 291. *Ontol.*).

Immo idem hoc etiam modo evincitur. Deus ut quid
(Wolfii Theol. Naturalis) T t velit

velit, vel nolit, motivum aliquod adesse debet (§. 312.). Enimvero motiva voluntatis divinæ partim ab objecto, partim a subiecto desumuntur (§. 340.). Quamobrem cum Deus, & semetipsum, & omnes mundos possibiles (§. 141.), consequenter quicquid præter ipsum cognitu possibile (§. 153.), ab æterno (§. 319.) & necessario cognoscat (§. 311.); siue objectum, siue subiectum spectes, motiva voluntatis divinæ immutabilia sunt (§. 292. *Ontol.*). Quamobrem cum motiva sint ratio sufficiens, cur Deus quid velit, vel nolit (§. 887. *Ppsychol. empir.*), eadem semper voluntatis ponitur sufficiens ratio, consequenter cum posita ratione sufficiente ponatur etiam id, quod propter eam potius est, quam non est (§. 118 *Ontol.*), idem semper ponendus est actus voluntatis, adeoque cum voluntas Dei sit purus actus (§. 356.); eadem semper est voluntas Dei. Voluntas igitur divina prorsus immutabilis (§. 291. *Ontol.*).

Maximi momenti est non modo in theoria Theologiæ naturalis, verum etiam in praxi morali divinæ voluntatis immutabilitas. Quare non piget pluribus modis veritatem propositionis præsentis stabilivisse. Immo nec piget ea addere, quæ ad eandem uberius confirmandam & immutabilitatem voluntatis divinæ clariorem reddendam requiruntur. Perpendendæ itaque nobis sunt rationes, ob quas voluntas nostra mutabilis. Eodem manente motivo voluntas nostra non mutatur, quemadmodum unusquisque in seipso experitur. Quod si vero contingat, ut nunc habeatur malum, quod antea videbatur bonum, appetitus mutatur in aversionem; si quod antea malum videbatur, nunc bonum habeatur, aversio mutatur in appetitum (§. 601. *Ppsychol. empir.*). Similiter si quid nobis nec tanquam bonum, nec tanquam malum videtur, quod antea vel bonum, vel malum videbatur; quod antea volueramus, vel nolueramus, non amplius volumus, vel nolumus (§. 587. *Ppsychol. empir.*). Quamobrem apparet, ignorantiam nostram in causa esse, cur voluntas mutetur, scilicet quod nobis ignota sit vel principiorum veritas, quibus tanquam norma utimur in bono & malo dijudicando, siue quod

quod objectum, quod ad appetendum vel averſandum proponitur, non ſatis fuerit perſpectum, ſive quod non præviderimus quasdam circumſtantias, quæ mentem noſtram mutari cogunt. Equis vero non videt in Deo omniſcio, qui veritates omnes univerſales (§. 162.) & omnia ſingularia perſpecta habet (§. 247.), iſtiusmodi ignorantiam locum habere minime poſſe. Quamobrem cum ceſſet ratio, cur voluntas ipſius mutetur; fieri quoque nullo modo poſteſt, ut mutetur.

§. 369.

Deum nunquam pœnitere poſteſt ejus, quod fecit. Etenim *Cur Deum voluntas Dei nunquam mutatur* (§. 368.), conſequenter quod *non pœnitere ſemel voluit, ut poſtea non velit*, fieri haud quaquam poſteſt. *at facti.* Enimvero quem facti pœnitet, is ipſum infectum reddere mallet (§. 761 *Psychol. empir.*), conſequenter quod antea volebat, nunc non vult. Deum igitur ejus nunquam pœnitere poſteſt, quod fecit.

Idem etiam indirecſte oſtendi poterat hoc modo. Ponamus Deum pœnitere ejus, quod fecit. Quoniam, is quem pœnitet, factum infectum reddere nollet (§. 761. *Psychol. empir.*); ubi quid fecit non vult, quod antea voluerat. Voluntas igitur ipſius mutabilis eſt (§. 290. *Ontol.*): quod cum de Deo ſit abſurdum (§. 368.), impoſſibile eſt, ut Deum unquam pœniteat ejus, quod fecit.

Quodſi animum ad noſmetipſos advertamus obſervaturi rationes, cur facti pœniteat, eaſdem eſſe deprehendemus, ob quas voluntatem mutari ante annotavimus (*not. §. 368.*). Nimirum pœnitemus, ſi, quæ a nobis facta ſunt, male vel minus recte facta judicamus (§. 759. *Psychol. empir.*), antequam vero feceramus, ea nobis repræſentaveramus tanquam bona. Reſolvitur adeo in ignorantiam pœnitentia: ab ignorantia autem omni immunis cum ſit Deus omniſcius (§. 301. 302.), ab omni quoque pœnitentia immunis eſſe debet.

§. 370.

*Bonum
quid di-
catur.*

Bonum in se quid dicitur, quatenus suam habet perfectionem tam essentialem, quam accidentalem. *Bonum vero in relatione ad aliud* vocatur, quod ad perfectionem alterius quid confert, seu in eandem quomodocunque influit, vel ejusdem signum est.

In Psychologia bonum tantummodo definivimus quoad nos, dum diximus (§. 554. *Psychol. empir.*), bonum esse, quod nos statumque nostrum perficit seu perfectiorem reddit, propterea quod nobis ibidem cum illa specie boni tantummodo negotium fuit, quatenus actiones liberae sub eadem comprehenduntur. Ast hic, quemadmodum mox patebit, notio boni nobis perspecta esse debet in omni sua latitudine. Bonum autem quid dici vel in se, vel in relatione ad alia, ex communi loquendi usu manifestum est. Etenim dicimus horologium bene factum ab artifice, & ipsummet bonum, eine gute Uhr, si quam accuratissime indicet minutissimas particulas temporis, veluti scrupula secunda, ita ut intra plures revolutiones fixae alicujus diurnas ne unico quidem scrupulo secundo aberraret. In eo vero casu horologium esse perfectum patet per ea, quae olim diximus, cum notionem perfectionis generalem illustraremus (*not. 503. Ontol.*). Nec minus liquet, idem dici donum, quatenus spectatur in se. Quodsi horologio ad observationes astronomicas opus habuerimus, idem bonus dicimus, quatenus nobis in dimetiendo & accurate determinando tempore exoptatissimum affert usum, adeoque statum observatoris Astronomi reddit perfectiorem: id quod patet ex ratione, quam reddimus quaerenti, cur idem bonum dicamus. Tunc vero bonum vocatur in relatione ad aliud.

§. 371.

*Malum
quid di-
catur.*

Ex vero jam *Malum* (quippe quod ita dicitur in oppositione ad bonum) appellari debet aliquid *in se*, quatenus quæ-

quædam imperfectio ipsi inhæret. *Ast Malum erit in relatione ad aliud, quod ad imperfectiorem alterius quid confert, vel ejusdem signum est.*

Quæ de boni notione modo annotavimus, eadem quoque de notione mali tenenda sunt. Nimirum malum (§. 565. *Psychol. empir.*) tantummodo definivimus quoad nos, quando malum diximus, quod nos statumque nostrum sive internum, sive externum imperfectiores reddit, propterea quod nobis cum illa specie mali tantummodo negotium fuit, quatenus actiones liberæ sub eadem comprehenduntur. Hic vero, quemadmodum mox plenissime constabit, notio mali perfecta nobis esse debet in omnia sua latitudine. Patet autem similiter malum quid dici vel in se, vel in relatione ad aliud ex communi loquendi usu. Ita horologium male ab artifice factum ipsummetque malum *eine böse Uhr* dicimus, quatenus intra 24 horas pluribus scrupulis primis a vero aberrare tempore deprehenditur. Tum vero horologium est imperfectum, quemadmodum alias explicavimus, cum notionem generalem imperfectiōis illustraremus (*not. §. 504.*). Enimvero observator Astronomus horologium malum vocat, quatenus ejus definitio tempus accurate satis determinare nequit: id quod denuo ex ratione innotescit, quam reddit quærenti, cum appellet. Tunc vero utique malum dicitur in relatione ad aliud.

§. 372.

Malum Metaphysicum dicitur quod per essentiam & naturam suam rem imperfectiorem reddere censetur, quam foret si abesset, adeoque in limitatione determinationum essentialium consistit.

Malum metaphysicum quid dicatur.

Ita finitudo & limitatio originaria intellectus nostri habetur pro malo metaphysico, quia intellectus noster longe foret perfectior, si ea finitudine & limitatione careret, quemadmodum superius vidimus intellectum divinum esse perfectissimum, propterea quod infinitus & illimitatus (§. 166. & seqq.).

§. 373.

*Malum
physicum
quod di-
citur.*

Malum physicum vocatur, quod status mundi quoad effectus naturales imperfectiorem reddere censeretur, quam foret, si alii essent. Unde *Bonum physicum* dicitur, quod status mundi quoad effectus naturalis perfectiorem reddit, quam foret, si alii essent.

Ita tempestas, qua damnum infertur frugibus & ædibus, dicitur malum physicum, propterea quod status mundi hoc ipso censeretur imperfectior quoad effectus naturales, quam foret, si nullum unquam frugibus aut ædibus damnum a tempestate esset metuendum. Similiter inundationes sunt malum physicum, quatenus per eas pereunt pecudes atque homines & agri destruuntur, propterea quod status mundi censeretur perfectior, si istiusmodi inundationes inter effectus naturales locum non haberent.

§. 374.

*Malum
morale
quid sit.*

Malum denique *morale* nuncupatur, quod inhæret actionibus liberis hominum, seu ob quod eadem dicuntur vitiosæ. *Bonum* ibidem *morale* vocatur, quod inhæret actionibus liberis hominum.

Ita e. gr. nimius vini haustus, quo quis inebriatur, dicitur malum morale, quia actio illa in numero vitiosorum est. Notio mali moralis distincte explicatur in Moralibus seu philosophia practica universali. Quoniam distinctio mali in metaphysicum, physicum & morale dudum recepta in Scholis Philosophorum & triplex hoc malum considerari debet in relatione ad Deum in Theologia naturali; nostrum quoque fuit eandem distinctionem retinere (§. 147. *Disc. pralim.*).

§. 375.

*Mali meta-
physici ne-
cessitas.*

Malum metaphysicum est absolute necessarium. Etenim malum metaphysicum originarie rem per essentiam & naturam suam imperfectiorem reddit, quam absque eodem foret (§. 372.), adeoque in limitationibus originariis determinationum essentialium &, quatenus natura rei in vi activa consistit (§. 145. *Cosmol.*), in limitationibus vis activæ ac inde penden-

tis

tis potentiz seu possibilitatis agendi in genere consistit (§. 728. 170 *Ontol.*). Enimvero cum & vis illa agendi determinati gradus in numerum determinationum essentialium corporis in genere (§. 176. 180. *Cosmol.*) & animarum nostrarum referatur (§. 68. *Psychol. rat.*), determinationes autem essentielles sint absolute necessariae (§. 303. *Ontol.*) ; quin malum metaphysicum absolute necessarium sit dubitari haud quaquam potest.

Si quis malum metaphysicum ab entibus finitis, seu limitatis abesse velit, is idem ens finitum seu limitatum & infinitum seu illimitatum simul esse vult: quod quam sit absurdum, nemo non videt (§. 28. *Ontol.*). Nimirum malum metaphysicum sunt limitationes originariae essentiae ac naturae rerum, quas a rebus limitatis arcere velle idem est ac limitatum in illimitatum convertere.

§. 376.

Mundus nullus, etiamsi sit omnium perfectissimus, absque malo metaphysico esse potest. Etenim omnis mundus, etiam omnium perfectissimus, est series entium finitorum tam simultaneousorum, quam successivorum (§. 48. *Cosmol.*). Quamobrem, cum ens finitum sit etiam limitatum (§. 173.); omnis mundus etiam omnium perfectissimus ex entibus limitatis constare debet. Quoniam itaque fieri nequit, ut determinationes essentielles & vires entium limitatorum sint illimitatae, quippe ideo entia limitata sunt, quia determinationes essentielles certo modo limitantur (§. 142. 143. & seqq. *Ontol.*); patet in omni mundo essentiae ac naturae rerum limitationes originarie adhaerere ab ea non separabiles. Jam cum malum metaphysicum, quod per essentiam & naturam rerum mundum imperfectiorem reddere censetur, quam absque eodem foret, in limitationibus determinationum essentialium consistit (§. 372.); mundus nullus, etiam si sit omnium perfectissimus, absque malo metaphysico esse potest.

Cur malum metaphysicum ingreditur omnem mundum.

Idem

Idem etiam sic ostenditur. Malum metaphysicum, ob quod scilicet mundus imperfectior censetur, quam absque eodem foret (§. 372.), est absolute necessarium (§. 375.) Absolute necessarii in se spectati oppositum impossibile est (§. 302. *Ontol.*). Impossibile igitur est concipi mundum absque malo metaphysico, adeoque mundus nullus, etiam si sit omnium perfectissimus, absque malo metaphysico esse potest.

Etsi vix attentione dignum videatur, quod de absoluta mali metaphysici in omni mundo possibili necessitate demonstratur; patebit tamen in sequentibus, maxime attentione hanc esse perpendendam, ne circa mali physici ac moralis originem hæsites ac hallucineris, quemadmodum plerisque accidere experientia loquitur.

§. 377.

An Deus mundum metaphysicum. facere possit Deus mundum facere nequit, in quo nullum sit malum metaphysicum. Etenim mundus nullus, etiamsi sit omnium perfectissimus, absque malo metaphysico esse potest (§. 376.), absque malo consequenter mundus nullus absque malo metaphysico possibilis (§. 85. *Ontol.*). Enimvero Deus tantummodo facere potest, quod possibile (§. 343.), impossibile non item (§. 346.). Quamobrem Deus mundum facere nequit, in quo nullum sit malum metaphysicum.

Qui notione distincta omnipotentiae divinæ destituti possibilitatem rerum ab eadem derivant in verbis, quæ non intelligunt, fiduciam omnem collocantes, perfectiones rerum fingunt, quas non intelligunt: ex quibus fictionibus difficultates insuperabiles emanant, quæ sua veluti sponte in auram abeunt, ubi ex notionibus determinatis ratiocineris.

§. 378.

An existentia mali non minuit omnipotentiam. Impossibilitas faciendi mundum absque malo metaphysico. Etenim absolute impossibile est, ut mundus, etiam si sit omnium possibilium perfectissimus, mali derogat

malo metaphyfico careat (§. 375. 376.) , consequenter mundus absque malo metaphyfico in numero impossibilium est. *omnipotentia Dei.* Omnipotentia nec extenditur ultra sphzram possibilium (§. 347.), & hoc non obstante , quod Deo conveniat omnipotentia (§. 349.), potentia ejus est absolute maxima (§. 350.). Impossibilitas adeo faciendi mundum absque malo metaphyfico non minuit omnipotentiam.

Idem etiam sic ostenditur. Mundus nullus absque malo metaphyfico esse potest (§. 376.) , consequenter dum Deus mundum absque malo metaphyfico facere nequit (§. 377.), impossibilia facere nequit. Sed impossibilitas faciendi impossibilia, non arguit defectum potentiz (§. 346.). Quamobrem impossibilitas faciendi mundum absque malo metaphyfico non arguit defectum potentiz divinæ, consequenter cum Deo competat omnipotentia (§. 349.), omnipotentiam nullo modo minuit.

Veritas propositionis luce notionum clarissima radiat, ut ea facile percellatur animus, modo a notionibus, quæ terminis abstractis, quamdiu eos familiares minime experiris, adhæret, obscuritatem arceas, id quod aliter fieri nequit, quam ubi meditatione satis diuturna & sæpius repetita singulas expendas, donec lucem, quam diximus, in temetipso percipias: id quod in omni casu reliquo tenendum, ubi obscuritatem obstare sentis, quo minus rationum evidentia vincaris.

§. 379.

Deus ens finitum seu limitatum nullum absque limitationibus essentia ac nature ipsius in ideis divinis inherensibus producere potest. Etenim cum ideæ rerum sint immutabiles (§. 190.), quæ essentia ac nature rerum in ipsis inhærent limitationes, ab ipsis inseparabiles sunt (§. 291. Ontol.). Quamobrem cum ideo quid sit possibile, quod ejus idea detur in intellectu divino (§. 192.), nec aliter ens finitum seu limitatum

(Wolffii Theol. Naturalis)

U u

quod-

Limitationes essentia & nature rerum inherentes num a Deo enti cui-dam auferri possint.

quodcunque possibile est, quam idea ista exhibetur. Enimvero Deus possibilia omnia (§. 343.), non vero etiam impossibilia ad actum perducere potest (§. 344.), consequenter ens quodcunque finitum aliter producere nequit, nisi quemadmodum vi intellectus ipsius repræsentatur. Quamobrem fieri non potest, ut ens aliquod finitum seu limitatum producat absque iis limitationibus, quæ essentia ac natura ipsius in ideis ipsius inhaerent.

Equidem hæc propositio jam manifesta videtur per ea, quæ de integro mundo demonstravimus (§. 376. 377.), cum de integro mundo non intelligatur impossibilitas inexistentiæ mali metaphysici, quam quod ea prædicanda sit de singulis entibus finitis, ex quibus constat mundus universus (§. 48. *Cosmol.*). Consultum tamen duximus idem seorsim demonstrari, propterea quod propositione præsentē in sequentibus habebimus opus, & imprimis circa impossibilitatem inexistentiæ mali metaphysici in mundo in casibus specialibus hæreant, qui difficultates contra religionem naturalem ab existentia mali metaphysici movere solent, ut taceam scrupulos inde ortos, quibus subinde anguntur acumine sufficiente destituti.

§. 380.

Impossibilitas producendi creaturam absque malo metaphysico.

Deus creaturam nullam absque malo metaphysico producere valet. Demonstratur eodem prorsus modo, quo ante demonstravimus (§. 377.), Deum non posse producere mundum, qui careat malo metaphysico.

Poteramus quoque hanc propositionem inferre per modum corollarii ex præcedente, cum constet creaturam omnem esse ens finitum, adeoque partem universi mundi (§. 48. *Cosmol.*), & malum metaphysicum consistere in limitationibus, quæ jam in ideis rerum, quatenus sunt in intellectu divino, essentia ac natura eandem adherent (§. 372).

§. 381.

§. 381.

Malum metaphysicum ne per miraculum quidem a mundo aut ente quocunque singulari auferri potest. Ponamus enim, si fieri potest, Deum malum metaphysicum a mundo aut ente quocunque singulari auferre posse. Quoniam miraculum tale, quale contingit, in eo corpore, in quo contingit, possibile (§. 517. *Cosmol.*); fieri potest ut a mundo vel toto, vel ab ente quodam finito in singulari malum metaphysicum auferatur, consequenter ut absque malo metaphysico existat, atque adeo malum metaphysicum non erit absolute necessarium: quod cum sit absurdum (§. 375.), malum metaphysicum ne per miraculum quidem a mundo universo vel ente quodam singulari in eodem auferri potest.

An malum metaphysicum per miraculum tolli possit.

Idem etiam sic ostenditur. Simpliciter impossibile est, ut Deus mundum (§. 377.) vel ens quodcunque finitum absque malo metaphysico producat (§. 380.). Quamobrem cum perinde sit, siue Deus mundum aut ens aliquod in eo absque malo metaphysico producat, siue a producto idem auferat, ut eodem posthac careat, nec per miraculum fieri possit, quod simpliciter fieri repugnat; Deus ne per miraculum quidem a mundo aut ente quodam in eo malum metaphysicum auferre potest.

Qui per miraculum fieri posse somniat, quod in se impossibile; is utique omnipotentiam Dei ad impossibilia extendit, quæ tamen per ea, quæ de potentia Dei demonstrata sunt, sphaeram possibilitum non excedit (§. 343-344.). Qui per miraculum ab aliquo ente finito, quod idem limitatum esse constat (§. 173.), malum metaphysicum auferri posse affirmat, is ens limitatum a limitationibus essentialibus liberari, consequenter ex limitato illimitatum, adeoque ex finito infinitum fieri posse contendit: quod quam sit absurdum, nemo non videt, tum imprimis per essentialium immutabilitatem.

tem (§. 300. *Ontol.*) & attributorum incommunicabilitatem intelligitur (§. 45. *Psych. rat.*).

§. 382.

*Mundus
adspectabi-
lis cur sit
optimus.*

Mundus adspectabilis est in se omnium possibilium optimus. Mundus enim, qui existit, est omnium possibilium perfectissimus (§. 326.). Enimvero cum bonum in se quid dicatur, quatenus suam habet perfectionem (§. 370.), in suo genere omnium optimum est, quod in eodem genere omnium perfectissimum, Mundus igitur adspectabilis, seu is, qui existit, est in se omnium possibilium optimus.

An etiam sit omnium possibilium optimus in relatione ad Deum, posthac demum discutere licebit. Mundum hunc esse omnium possibilium optimum agnovit *Augustinus*, & quantum in eo momentum positum, ut agnoscat, non ignoravit. Quod sit rationi consentaneum, evicimus hactenus: quod sit Scripturae sacrae conforme, ostendemus deinceps. Quae contra propositionem praesentem ab existentia mali moralis petuntur objectiones, illis satisfaciet in sequentibus.

§. 383.

*Voluntas
Dei quo
tendat.*

Voluntas Dei tendit ad id, quod in se optimum. Etenim Deus hunc mundum ex ceteris elegit ob majorem, quam ipsi, quam ceteris, inest, perfectionem (§. 325.). Enimvero cum quid sit bonum in se, quatenus sua ipsi est perfectio (§. 370.); mundus ideo in se optimus est, quia perfectissimus, in suo scilicet genere. Deus igitur hunc mundum ex ceteris aequae possibilibus elegit, quia omnium possibilium optimus, consequenter pater, voluntatem Dei tendere ad id, quod in se optimum, seu, quod perinde est, Deum velle, quod in se est optimum.

Quodsi neges mundum hunc, qui existit, esse omnium possibilium optimum; quod voluntas Dei tendat ad optimum, ostendi minime potest, cum tamen id spiritui perfectis-

Altissimo conveniat (§. 651. *Psych. rat.*). Videant igitur, annon in summam Dei perfectionem injuriū sint, qui hoc negare audent.

§. 384.

Decet Deum eligere, quod in se optimum est. Etenim *Electio optimi cur Deum deceat.* Deum decet eligere mundum omnium possibilium perfectissimum (§. 333.), seu ideo, quia perfectissimus (§. 325.), consequenter cum sit optimus, quatenus perfectissimus (§. 370.), quia omnium possibilium optimus. Patet igitur decere Deum, eligere quod est optimum.

Quoniam Deus omnia vult unico voluntatis actu (§. 355.), cavendum est, ne motivum voluntatis divinae judicetur ex particularibus, quæ mundo insunt. Recolenda sunt animo, quæ supra demonstravimus (§. 327.), adversus perfectionem mundi maximam, consequenter & adversus id, quod sit optimus omnium mundorum possibilium, non posse peti objectionem ab iis, quæ in mundo observamus. Quicquid enim in hoc mundo existit, Deus absolute voluisse dici nequit, cum ens nullum in hac rerum serie existere voluerit, nisi quatenus in eadem continetur. Quanta vero differentia sit in eo, utrum ens aliquod ut existat Deus absolute velit, an quatenus in hac, hoc est, optima rerum serie continetur, mox distinctius exposituri sumus.

§. 385.

Deus etiam vult, quod optimum est, in relatione ad se. Quid Deus velit in relatione ad se. Deus enim quid vult, quia ipsum decet hoc potius velle quam aliud (§. 335.). Enimvero decet Deum velle hoc potius quam aliud, quia in ipsius essentia & attributis continetur ratio, cur id potius velle debeat quam aliud (§. 332.). Necesse igitur est, ut id quod vult ad se referat. Jam mundi perfectissimi electio est signum naturalis intellectus omnium absolute perfectissimi (§. 328.), & electio mundi in suo genere minime perfectissimi non est signum intellectus absolute perfectissimi (§. 329.), consequenter quia intellectus divinus est absolute

perfectissimus (§. 168.), nonnisi electio mundi in suo genere perfectissimi, est signum intellectus divini. Quoniam adeo bonum in relatione ad Deum est, quod perfectionis divinæ signum est (§. 370.), idque adeo in relatione ad ipsum optimum est, quod solum ejusdem signum naturale est; mundus in suo generale perfectissimus optimus dici debet in relatione ad Deum. Quare cum Deus elegerit mundum in suo genere perfectissimum ob ipsam hanc perfectionem, qua ceteros mundos possibiles omnes vincit (§. 325.), electio autem sit actus liberæ voluntatis (§. 941. *Psychol. empir.*); ex mundi electione patet, Deum etiam velle, quod in relatione ad se optimum est.

Quando posthac finem creationis mundi exposituri sumus, clarius adhuc patebit, mundum hunc quoque esse optimum in relatione ad Deum. In præsentem autem sufficit veritatem propositionis nobis esse certam, ut, quæ de voluntate divina porro dicenda veniunt, demonstrari queant.

§. 386.

*Summa
voluntatis
divinæ
perfectio.*

Voluntas Dei est omnium perfectissima. Deus vult, quod optimum est, tum in se (§. 383.), tum in relatione ad ipsum (§. 385.), consequenter cum bonum quid esse nequeat, nisi in se & in relatione ad aliud (§. 370.), voluntas Dei fertur in id, quod quomodocunque spectatum est omnium optimum. Enimvero voluntas omnium perfectissima est, quæ non appetit nisi optimum (§. 650. *Psychol. rat.*). Dei itaque voluntas est omnium perfectissima.

Cum Deum velle quod est optimum quomodocunque spectatum ex contemplatione mundi probari minime possit, nisi supponatur, mundum hunc esse omnium possibilium perfectissimum, adeoque optimum; quam arctus sit nexus inter voluntatem Dei perfectissimam & electionem mundi optimi satis superque apparet. Vidimus vero jam superius (§.

328. 329.), non minus arctum esse nexum inter eandem electionem & intellectus divini summam perfectionem.

§. 387.

Deus est spiritus perfectissimus. Gaudet enim intellectus absolute perfectissimo (§. 168.) & voluntate omnium perfectissima in eadem absolute tali (§. 368.). Enimvero spiritus perfectissimus est, qui intellectu perfectissimo & voluntate perfectissima gaudet (§. 646. *Psychol. rat.*). Deus igitur est Spiritus perfectissimus. *Qualis spiritus sit Deus.*

§. 388.

Voluntas divina illimitata est. Est enim Deus Spiritus perfectissimus (§. 387.). Sed Spiritus perfectissimi voluntas Dei cur illimitata est (§. 653. *Psychol. rat.*). Ergo voluntas divina illimitata est. *Voluntas Dei cur illimitata.*

Intellectus duplici limitatur modo, materialiter quoad objectum; formaliter quoad modum representandi objectum; at materialiter limitari nequit voluntas, cum naturæ ipsius repugnet appetere omnia possibilia, utpote generaliter determinata ad bonum. Restat igitur ut limitetur tantum formaliter, quatenus in electione bonum apparens præferre potest vero & bonum minus majori, atque hinc illimitata est voluntas, quæ generaliter determinata ad optimum & hinc accedente iudicio intellectus perfectissimi non fertur nisi in optimum. Monuimus hoc jam alias (§. 653. *Psychol. rat.*): nunc vero inculcandum fuit denuo, ut propositio præsens rite intelligatur.

§. 389.

Motivum voluntatis divine est representatio optimi. Motivum Voluntas Dei tendit ad optimum tum in se (§. 383.), tum in relatione ad se ipsum (§. 384.), adeoque Deus quid appetit, quia in suo genere optimum. Quamobrem cum ex eo intelligatur, cur Deus quid velit, quia optimum tum in se, tum in relatione ad se ipsum.

relatione ad ipsum; repræsentatio optimi est ratio, cur Deus quid potius velit, quam non velit (§. 56. *Ontol.*), eaque tam objectiva (§. 118.), quam subjectiva (§. 336.), consequenter cum ratio objectiva & subjectiva simul sumta constituent rationem sufficientem, cur Deus quid velit; optimi repræsentatio est ratio sufficiens voluntatis divinæ. Enimvero ratio sufficiens actuum volitionis motivum est (§. 887. *Psychol. empir.*). Repræsentatio igitur optimi motivum est voluntatis divinæ.

Motivum voluntatis nostræ est repræsentatio boni distincta (§. 890. *Psychol. empir.*). Quamobrem cum motivum voluntatis divinæ sit repræsentatio optimi; patet inter voluntatem divinam atque humanam eam esse differentiam, quæ inter voluntatem limitatam & illimitatam intercedit.

§. 390.

*Lex voluntatis
divinæ.*

Quoniam motivum voluntatis divinæ est optimi repræsentatio (§. 389.), optimum vero tum in se (§. 383.), tum in relatione ad Deum spectatur (§. 384.); lex voluntatis divinæ est: *Quicquid Deus sibi repræsentat tanquam optimum tum in se, tum in relatione ad semetipsum, illud vult* (§. 903. *Psychol. empir.*).

Neminem offendet vocabulum legis: sumimus enim idem in eo significatu, quod ipsi tribuimus in Psychologia & Cosmologia & dudum receperunt & Mathematici, & Philosophi. Absit itaque, ut quis inde inferat dependentiam Dei a quodam superiore, propterea quod lex positiva, qualis est civilis, superiorem supponit, a cuius voluntate manat obligatio. Lex appetitus humani est: Quicquid nobis repræsentamus tanquam bonum quoad nos, id appetimus (§. 904. *Psychol. empir.*). Quamobrem si neges velle Deum, quod sibi tanquam optimum repræsentat; eadem erit lex voluntatis divinæ & appetitus humani, non obstante intellectus divini atque humani differentia: quod quam sit absolum facile perspicient, quotquot accuratè mentis lance omnia ponderant.

§. 391.

Deus perfectionem rerum aestimat in relatione ad totum universum. Etenim Deus in quolibet minimo, quod est in universo, cognoscit totum universum (§. 161.) & ex qualibet veritate universali veritates ceteras omnes in universum seu totum mundum rationalem cognoscit (§. 289.). Quamobrem ens singulare nullum sibi repræsentat nisi cum relatione ad totum universum &, quod in eo est universale (§. 57. Log.), in relatione ad totum mundum rationalem. Quoniam itaque perfectio consistit in consensu in varietate (§. 503. Ontol.): Deus perfectionem rerum aestimat in relatione ad totum universum.

*Quomodo
Deus aesti-
met perfe-
ctionem
rerum.*

Probe notanda venit præsens propositio, ne in iis, quæ Deus vult, rationem cum experientia perperam committamus. Ceterum perfectionis aestimatio, quæ in ea Deo tribuitur, notionibus rerum conformis est. Etenim singularia sunt partes universi & ad illam rerum seriem, in qua ab intellectu divino repræsentantur (§. 201.), referuntur tanquam pars ad totum, quemadmodum oculus in corpore nostro tanquam ejusdem pars spectatur. Perfectio vero partis aestimari nequit, nisi in relatione ad totum: id quod jam alibi (not. §. 507. Ontol.) exemplis illustravimus.

§. 392.

Deo perfectissimum censetur in suo genere, quod facit ad majorem perfectionem totius universi. Ponamus duo esse entia A & B, quorum illud ad majorem perfectionem totius universi facit, seu quo in serie rerum collocato major enascitur in eadem perfectio, quam si in ejus locum succedat B; dico A esse iudicio Dei perfectius in genere entium, cujus species sunt A & B; & ubi plures hisce duabus non dantur species, esse idem A omnium perfectissimum in suo genere. Etenim

*Quid Deo
perfectissi-
mum in
suo genere.*

(Wolfsi Theol. Naturalis)

X x

enim

enim Deus æstimat rerum perfectionem in relatione ad totum universum (§. 391.), consequenter ex eo, quod eodem conferant ad perfectionem totius. Quamobrem utique perfectius censi debet A in eo entium genere, ad quod spectat, quam B ad idem referendum, ubi A in serie entium collocato major in eadem nascitur perfectio, quam si in ejus locum substitueretur B, & ubi præter A non datur aliud, quod in totam rerum seriem majorem perfectionem invehere posset, omnino A censi debet in suo genere perfectissimum. Patet adeo Deum perfectissimum in suo genere judicare debere, quod facit ad majorem perfectionem totius universi, seu, quod perinde est, quo in serie rerum collocato, major in eadem nascitur perfectio, quam si ens aliud in ejus locum substitueretur.

Deus hoc pacto æstimans perfectionem rerum eandem æstimat, quemadmodum fieri debet, ubi partis æstimanda perfectio. Pars enim omnis relationem ad totum habet (§. 341. 855. *Ontol.*). Quamobrem nec perfecta censetur, nisi quatenus per eam efficitur perfectio totius.

§. 393.

*Quomodo
Deus di-
judicat,
quid sit op-
timum.*

Deus judicans quid sit optimum in se idem refert ad totum universum. Cum enim bonum in se quid dicatur, quatenus suam habet perfectionem tam essentialem, quam accidentalem (§. 370.); Deus optimum in se judicat, quod in suo genere perfectissimum agnoscit. Enimvero Deus perfectionem rerum æstimat in relatione ad totum universum (§. 391.). Judicans itaque quid sit optimum in se, idem refert ad totum universum.

Non licet excipere rem in se aut absolute spectari, si nihil in ea supponimus nisi essentiam ejus (§. 301. *Ontol.*), consequenter quamdiu in se spectatur, non posse referri ad alia. Cum enim mundus sit series entium finitorum inter se con-

DEO-

nexorum (§. 48. *Cosmol.*); ens unumquodque, quod in hoc mundo existit, est pars quædam hujus universi seu mundi totius (§. 341. *Ontol.*). Quamobrem cum pars cognosci non possit, nisi quatenus refertur ad totum (§. 855. *Ontol.*); relatio ad totum ad ipsam partis essentiam pertinet (§. 158. *Ontol.*). Quodsi ergo partem in se consideres, necesse est, ut eam spectes in relatione ad totum: secus enim ens quoddam non consideras tanquam alterius partem, sed tanquam ens absolutum. Ita oculum non consideras tanquam partem corporis animalis, nisi quatenus eundem ad corpus animale refers. Hac vero relatione seposita oculum consideras tanquam instrumentum opticum ad representanda objecta factum, quale est camera obscura. Quantum vero intersit in æstimanda perfectione partis, ut tanquam pars spectetur, non vero tanquam res absoluta, alibi jam satis inculcavimus (not. §. 507. *Ontol.*).

§. 394.

In relatione ad Deum nil quicquam dici potest bonum, nisi quatenus summæ Dei perfectionis signum est. Etenim Deus est num dicatur spiritus perfectissimus (§. 387.), idemque independens (§. 125.). *tur in re.* Quamobrem cum independens sit, cui nihil tribui potest, cujus relatione ad ratio extra ipsum in alio continetur (§. 851. *Ontol.*); nihil in Deum. Summa Dei perfectione concipi potest, cujus ratio in ente alio ab ipso diverso continetur, adeoque ens nullum ab ipso diversum quicquam ad perfectionem ipsius quid conferre potest (§. 883. *Ontol.*). Quoniam itaque bonum quid dicitur in relatione ad aliud, quatenus quid ad hujus perfectionem confert, vel ejusdem signum est (§. 370.), ut vero quid sit signum perfectionis divinæ, quod ab ipso diversum est, fieri omnino possit (§. 328.); in relatione ad Deum nil quicquam dici potest bonum, nisi quatenus summæ Dei perfectionis signum est.

Atque in eo differt Deus a rebus finitis, quales homines sumus. Etenim ad nostram perfectionem conferri quid a rebus alijs potest, consequenter in relatione ad nos bonum dici

potest, quod nos perfectiores reddit; at in relatione ad Deum bonum eodem respectu dici minime potest.

§. 395.

*Quomodo
Deus judi-
cet quid sit
optimum in
relatione
ad se ipsum.*

Deus judicans quid sit optimum in relatione ad se ipsum idem refert ad omnia sua attributa. Etenim cum bonum in relatione ad aliud dicatur, quod ad perfectionem alterius quid confert, vel ejusdem signum est (§. 370.); Deus judicat aliquid esse optimum in relatione ad seipsum, vel quatenus id ad perfectionem quandam sui quid confert, vel quatenus id ipsius perfectionem significat. Jam vero Dei respectu nihil dici potest bonum, nisi quatenus perfectionis eius signum est (§. 394.). Ergo Deus non judicat optimum, nisi quod summam, quæ ipsi est, perfectionem indicat. Quamobrem judicans quid sit optimum, idem ad omnia sua attributa referre debet.

Nimirum summa Dei perfectio non intelligitur nisi per omnem Divinitatis plenitudinem, quæ in complexu omnium attributorum consistit. Neque enim sufficit esse quid signum perfectionis unius, quæ Deo competit respectu alicujus attributi, si contrarietur attributo alteri. Exemplum evidentissimum occurret paulo inferius, ubi de justitia Dei sumus acturi. Probe autem notandum est, quomodo Deus æstimet optimum in relatione ad se; ne nos nobis judicium de eo sumentes, a veritate aberremus & veritates evidentissimas difficultatibus insolubilibus intricemus. Id enim vulgo fieri ex sequentibus satis superque patebit. Voluntatis divinæ notionem ea, qua fieri debet, diligentia hætenus non scrutati sunt philosophi. Quid ergo mirum, si in multis, quæ ab eadem pendent, cæcutiant?

§. 396.

*Cur homo
divino mo-
re perfe-
ctionem*

Homo rerum perfectionem & quid sit tam in se, quam in relatione ad Deum ipsum optimum eodem, quo Deus, modo dijudicare carenequit. Etenim Deus perfectionem rerum & quid in se optimum

primum sit æstimat in relatione ad totum universum (§. 392.), *rerum & optimum*
 quid vero sit optimum in relatione ad se ipsum, idem referen- *optimum*
 do ad omnia sua attributa (§. 395.), seu ad omnem Divinitatis *æstimare*
 plenitudinem. Enimvero nemo mortalium ideam integram *nequeat.*
 universi simul intueri potest (§. 194. *Psychol. rat.*), adeoque rei
 perfectionem & quid in suo genere optimum sit in relatione
 ad totum universum æstimare nequit. Similiter quæ Deo in-
 sunt, homini incomprehensibilia deprehenduntur, quo distin-
 ctius eadem cognoscere nititur, quemadmodum exemplo in-
 tellectus divini (§. 174.), rationis (§. 283.) & voluntatis divinæ
 constat (§. 358.), consequenter eorum, quæ notionem spiritus
 perfectissimi, qui est Deus (§. 387.), ingrediuntur (§. 646.
Psychol. rat.) tanquam determinationes essentielles (§. 142. 143.
Ontol.), unde cetera quæ eidem insunt consequuntur (§. 168.
Ontol.). Ex quis præterea est mortalium, qui sibi persuadere
 aufit, nihil esse in Deo, quod non aliquo modo sibi sit perspe-
 ctum, ita ut nullum cognitionem ipsius effugiat attributum di-
 vinum? Patet itaque nec homini datum esse, ut quid sit optimum
 in suo genere, quid perfectissimum in relatione ad omnia at-
 tributa divina, æstimet. Nequaquam igitur homo eodem, quo
 Deus, modo perfectionem rerum & quid in unoquoque rerum
 genere optimum sit sive in se, sive in relatione ad Deum æsti-
 mare potest.

47 Ex propositione præsentē liquet, quam sit imperfectum
 nostrum de perfectione rerum & de eo quid sit in suo genere o-
 ptimum iudicium. Huic adeo non fidendum, quotiescunque quid
 nobis apparet imperfectum & melius fieri potuisse videtur: in eo
 casu autem, quo quid perfectissimum & optimum in suo genere
 agnoscere nobis videmur, idem pro probabili tenendum, propterea
 quod in genere demonstratum sit, mundum hunc esse omnium
 possibilium perfectissimum (§. 326.), eundemque optimum
 (§. 382.).

§. 397.

Imperscrutabilitas; voluntatis in quo consistat.

Voluntas dicitur *imperscrutabilis*, si motiva ejusdem nobis non fuerint penitus perspecta, nec eadem certo prorsus cognoscere valeamus.

Non dubitamus imperscrutabilitatem voluntatis per definitionem nominalem explicari in significato communi. Neque enim quid velit alter aut cur voluerit, aliter scrutari possumus, nisi inquirendo in rationem, cur voluerit, tum quatenus animum advertimus ad objectum, ut pateat ratio objectiva (§. 118.), tum quatenus objectum referimus ad ea, quæ insunt volenti, ut ratio subjectiva eluceat (§. 336.), sicque actus volitionis ratio sufficiens perspiciatur (§. 339.). Jam vero nemo non novit, rationem sufficientem actus volitionis esse motivum ejusdem (§. 887. *Psychol. empir.*). Scrutamur itaque voluntatem alterius inquirendo in motiva ejusdem. Quamobrem si contingat, nos hæc certo cognoscere non posse, aut non penitus perspicere: finem scrutationis minime consequimur, adeoque voluntas imperscrutabilis ipsa vi vocis dicitur.

- §. 398.

Imperscrutabilitas voluntatis divina.

Voluntas divina omni homini imperscrutabilis. Etenim nemo hominum quid sit in suo genere optimum, sive in se, sive in relatione ad Deum spectetur, eodem, quo Deus, modo judicare valet (§. 396.). Quamobrem cum motivum voluntatis divinæ sit quod optimum est (§. 389.); nemo hominum motivum voluntatis divinæ penitus perspicere ac certo cognoscere valet. Enimvero voluntas nobis imperscrutabilis est, si motiva ejusdem nobis non fuerint penitus perspecta, nec eadem certo prorsus cognoscere valeamus (§. 397.). Patet igitur voluntatem divinam homini omni imperscrutabilem esse.

Imperscrutabilitatem voluntatis divinæ non obstare debere, quo minus eandem scrutemur, quantum datur, ex iis intelligitur, quæ ad definitionem ejusdem modo annotavimus

mus (§. 397.). Etenim quo magis eandem scrutamur, eo evidenti-
us, quam sit imperscrutabilis, cognoscimus. Neque
verendum, ut iudicio nostro plus tribuamus, quam fieri de-
bebat, ubi observamus cautiones, de quibus ibidem diximus.
præterea non alio, quam hoc modo constabit luculentius,
Scripturam sacram sufficienter defendi adversus Antiscriptu-
rarios, si aliquas saltem probabiles rationes voluntatis divinæ
in medium asserre valeamus in iis, quæ eidem tribuuntur in
Scriptura sacra. Ipsa autem imperscrutabilitas voluntatis di-
vinæ argumentum præbet ad stabiliendam revelationis neces-
sitatem & in divinitatis S. S. probationem influit: immo sub-
inde ad defendendam S. S. veritatem in iis, quæ Deus volu-
isse vel velle dicitur, conducit: de quibus singulis appertius
dicere huius loci non est. Sufficit excitari attentionem eo-
rum, quorum est hæc facere.

§. 399.

*Deus velle potest, quæ cur velit, homo intelligere ne-
quit.* Voluntas enim Dei homini imperscrutabilis est (§. 398.). *Cur Deus
velle possit
cujus ratio
homini
ignota.*
Quamobrem cum ea sit imperscrutabilis, quatenus motivum
ejusdem certo cognoscere ac penitus perspicere non valemus
(§. 397.), motivum vero sit actus voluntatis seu volitionis ra-
tio sufficiens (§. 887. *Psychol. empir.*); fieri omnino potest, ut
rationem sufficientem ejus, quod Deus vult, non cognosca-
mus. Quoniam itaque ex ratione sufficiente intelligi debet,
cur quid Deus potius velit, quam non velit, (§. 56. *Ontol.*);
fieri posse patet, ut non intelligamus, cur quid Deus velit,
consequenter Deus velle potest, quæ cur velit, homo intelli-
gere nequit.

Equidem superflua videri poterat hæc propositio, pro-
pterea quod in ipsa imperscrutabilitate voluntatis divinæ
modo asserta (§. 398.) jam contineatur: distinctius tamen e-
andem enunciari consultum visum, quia eadem in probandis
aliis habebimus opus. Ac instituti nostri ratio postulat, ut,
quæ in notionibus rerum involvuntur, & nobis evolvantur.

§. 400.

§. 400.

*Electio
mundi opti-
mi in se
quale sit
signum.*

Electio mundi in se optimi est signum naturale voluntatis absolute perfectissimæ. Etenim si Deus elegit mundum in se optimum, patet voluntatem ejus tendere ad optimum, quemadmodum quoque idem inde intu' aus (§. 383.). Enimvero voluntas non tendens nisi ad optimum est absolute perfectissima (§. 650. *Psychol. rat.*). Quamobrem ex eo, quod Deus elegit mundum in se optimum, colligitur Deo esse voluntatem perfectissimam. Est vero id signum alterius, ex quo colligitur adesse alterum (§. 952. *Ontol.*). Electio itaque mundi in se optimi est signum voluntatis perfectissimæ. Quamobrem cum naturale sit signum, ubi ratio significatus in ipsis rerum notionibus continetur (§. 956. *Ontol.*); electio mundi optimi est signum naturale voluntatis absolute perfectissimæ per demonstrata.

Atque adeo apparet, quam arctus sit nexus inter electionem mundi optimi & voluntatem absolute perfectissimam.

§. 401.

*Electio
mundi mi-
nime per-
fectissimi
cur tale
signum esse
nequeat.*

Electio mundi in se non optimi non est signum naturale voluntatis absolute perfectissimæ. Si enim ponamus Deum elegisse mundum, qui in se optimus non sit; ex eo non patet, voluntatem ejus tendere ad optimum. Quamobrem cum voluntas absolute perfectissima non sit nisi ea, quæ ad optimum tendit (§. 650. *Psychol. rat.*); ex eo, quod Deus elegit mundum, qui in se optimus non est, non colligitur voluntatem ipsi esse absolute perfectissimam. Quoniam itaque quid non est signum alterius, ex quo hoc alterum adesse colligi nequit (§. 952. *Ontol.*); nec electio mundi, qui in se optimus non est, signum voluntatis absolute perfectissimæ esse potest, consequenter nec naturale.

Quodsi

Quodsi excipias! agi de electione a Deo facta, cujus voluntatem perfectissimam esse constet; eadem repono, quæ supra ad geminam exceptionem reposui (§. 329.), scilicet hic non quaestionem esse de eo, qualis sit voluntas Dei mundum hunc præ ceteris eligentis; sed qualis ea ex electione mundi ab ipso facta colligatur: nec quaeri quid de voluntate Dei eligentis nobis aliunde constet; sed quid ex electione ab ipso facta, quatenus in se spectatur, necessario consequatur. Talia moneri superfluum foret, nisi istiusmodi exceptiones cominiscens sibi reperisse viderentur non quod pueri in faba.

§. 402.

Electio mundi in se optimi est signum naturale spiritus perfectissimi, nec electio mundi in se non optimi tale esse potest. Electio mundi optimi in se est signum naturale tam intellectus absolute perfectissimi (§. 328.), quam voluntatis absolute in se perfectissimæ (§. 400.), nec electio mundi non optimi tale intellectus spiritus sit (§. 329.) ac voluntatis signum esse potest (§. 401.). Est vero spiritus perfectissimus, qui intellectu perfectissimo ac voluntate perfectissima gaudet (§. 646. Psychol. rat.). Quare electio mundi in se optimi est signum naturale spiritus perfectissimi, nec electio mundi in se non optimi tale esse potest.

Ex eo igitur, quod mundus hic supponitur in se omnium possibilium optimus, necessaria consequentia infertur, autorem ejus esse spiritum omnium perfectissimum, qui est Deus (§. 387.); ex contraria autem hypothese idem inferri nequit: id quod probe notandum est ob ea, quæ sequuntur.

§. 403.

Productio mundi omnium perfectissimi est signum naturale omnipotentiae. Etenim si Deus produxit mundum omnium perfectissimum, cum in mundo perfectione sit major re rum consentientium varietas (§. 552. Cosmol.); non ideo hunc mundum produxisse intelligitur, quod potentia ipsius alii

(Wolfii Theol. Naturalis)

Y y

actu-

actuando non suffecerit, consequenter nulla ratio est, cur non colligatur, eandem potentiam, quæ perfectissimo in suo genere ad actum perducendo sufficit, quod minus in eodem perfectum est non minus facere posse. Unde cum omnes mundi possibiles omnia possibilia contineant (§. 152.) ac omnipotens sit, qui possibilia omnia facere potest (§. 347.); ex productione mundi omnium perfectissimi colligitur omnipotentia divina, quemadmodum quoque factum a nobis in superioribus (§. 342. 343. 349.). Jam vero id signum est rei alterius, ex quo colligitur alterum adesse (§. 952. *Ontol.*); productio itaque mundi omnium perfectissimi est signum omnipotentiz. Quamobrem cum naturale sit signum, ubi ratio significatus in ipsis rerum notionibus continetur (§. 956. *Ontol.*); productio mundi omnium perfectissimi est signum naturale omnipotentiz.

Magni momenti est nosse, quorumnam attributorum divinorum signum mundus in suo genere perfectissimus ac ideo optimus esse possit, non modo ut tanto certius constet, Deum non aliam quam optimam rerum seriem elegisse & ad actum perduxisse; verum ut & finem creationis intimius perspicere liceat, ac inprimis plenissima luce radiet illius propositionis veritas, quod Deus agat, quod ipsum maxime decet. Quantum vero intersit singularum harum veritatum convictum habere animum, non minus ex sequentibus, quam suo tempore ex philosophia morali abunde constabit.

§. 404.

*Productio
mundi mi-
nime per-
fectissimi
quale sit
signum.*

*Productio mundi minime perfectissimi omnium non est
signum naturale omnipotentiz.* In notionum communium numero est, ex eo, quod quid fecit imperfectius, non posse colligi quod facere etiam possit perfectius, adeoque multo minus quod facere possit in isto genere perfectissimum. Ex horologio male constructo nemo colligit, fabrum idem potuisse con-

construere eo modo, ut nihil in ejus structura a peritissimo artifice desiderari possit. Quamobrem si ponamus Deum produxisse mundum imperfectiorem, cum essent alii perfectiores, quibus non minus, quam isti existentia repugnabat, inde colligere non licet, Deum quoque producere potuisse omnium perfectissimum, adeoque quemcunque alium, consequenter possibilia facere posse omnia (§. 343.). Unde liquet ex eo, quod Deus ponatur produxisse mundum minime perfectissimum, necessaria consequentia inferri minime posse, quod Deo competat omnipotentia (§. 347.). Quoniam itaque id signum rei alterius esse nequit, ex quo alterum adesse non colligitur ulla consequentia (§. 952. *Ontol.*); adeoque multo minus naturale signum esse potest (§. 956. *Ontol.*); productio mundi minime perfectissimi signum naturale omnipotentiae esse nequit.

Canonem hunc, *qui potest majus, potest etiam minus, sed qui minus potest, non ideo potest majus*, esse inter notiones communes, quibus utimur homines communiter judicaturi de rebus obviis, nemo ignorare potest, modo didicerit generalibus terminis efferre, quae in casu singulari enunciare valet. Sane in casu particulari rideretur, qui ex eo, quod quis posset facere minus, inferret eundem quoque posse facere majus, veluti videns elevantem pondus viginti librarum affirmaret, eum pondus ducentarum librarum elevare posse, propterea quod elevare possit pondus librarum viginti.

§. 405.

Quod est optimum in se, id etiam optimum est in relatione ad Deum. Deus enim elegit hunc mundum, qui existit, ex ceteris possibilibus ob majorem, quae ipsi inest, perfectionem (§. 325.), consequenter cum ideo in se optimus sit, quia perfectissimus (§. 370.), propterea quod omnium possibilium optimus in se est. Mundus in relatione ad Deum non est optimus, nisi quatenus signum est perfectionis summæ, quale

Cur optimum in se sit etiam optimum in relatione ad Deum.

mundus quicumque alius esse nequit (§. 394.). Quamobrem cum electio mundi in se optimi sit signum spiritus perfectissimi (§. 402.) atque potentissimi (§. 403.), quale esse nequit electio & productio minus perfecti (§. 402. 404.); Deus vero sit Spiritus perfectissimus (§. 387.) idemque omnium potentissimus (§. 349.); electio & productio mundi in se optimi est signum naturale Dei veri, ejusdem auctoris. Enimvero in relatione ad Deum optimum dici nequit, nisi quod est signum perfectionis summæ, quæ eidem convenit (§. 394.). Quod igitur est optimum in se, id etiam optimum est in relatione ad Deum.

Unde patet ex eo, quod quid sit optimum in se, inferri posse idem etiam esse optimum in relatione ad Deum, & vicissim si demonstrari possit, esse quid optimum in relatione ad Deum, inde recte colligi, quod idem sit optimum in se.

§. 406.

*Electio
mundi o-
ptimi S.S.
conformis.*

Juxta S. S Deus elegit & produxit mundum omnium optimum. Absoluta creatione, referente Mose Gen. I. 31. vidit Deus cuncta, quæ fecerat, & erant valde bona. Vulgatus interpres, cujus verba recitamus, juxta literam vertit verba Moſis, qui affirmat fuisse omnia טוב מְאֹד bona valde. Constat ex genio linguæ Hebrææ, in qua comparatio non diversis graduum terminationibus, sed periphrasi fieri solet, particulam מְאֹד sive valde esse signum superlativi, atque adeo valde bonum idem denotat, quod Latino idiomate optimum dicitur, quemadmodum etiam vulgo a Grammaticis hoc ipsum vocabulum exempli loco adducitur, ubi de adjectivorum gradibus agunt. Vid. Wasmuthus in Grammaticæ Hebrææ cap. 3. reg. 19. membr. 5. Hebraismi restituti pag. 67. Narrat igitur Moses, Deum intuentem ea omnia, quæ fecerat, ea deprehendisse optima. Fecerat autem cælum atque terram Gen. I. 1. hoc est, totum mundum seu integrum universum, vi eorum, quæ supra

pra jam monuimus (§. 68.). Deus adeo mundum, quem fecerat, contemplatus, judicavit esse optimum. Dum vero mundum, quem fecerat, contemplabatur, cuncta intuebatur, ita ut nihil esset in eo, cujus sibi non erat conscius. Quoniam vero singula fuere optima, hoc ipso Moses innuit, iudicio Dei nihil repertum fuisse in toto hoc universo, quod non fuerit optimum. In textu Hebræo lectoris attentio excitatur particula *הנה*, ecce, quæ ipsa simul certitudinis nota esse solet. Ita nimirum habent verba Moïsis, si in versione genium linguæ Latinæ observans a litera tamen textus authentici minime recedas: Ex intuitus est Deus omne, quod fecerat, & ecce! optimum erat. Non sine ratione excitatur attentio audituri, quale fuerit Dei de mundo, quem fecerat, iudicium, propterea quod viro divino spiritu afflato perspectum erat, quam facile sit, ut homo de re, de qua ipsi iudicare non datum (§. 54 I. *Corm.*), iudicium suum præcipitet. Unde etiam monet, Deum omne, quod fecerat, intuitum esse, antequam iudicium tulerit, qualia a se facta fuerint, ne ipsum hoc iudicium præcipitatum videri possit & ut hoc pacto avertat præcipitantiam iudicii nostri. Iudicium præcipitur, quod ex parte iudicemus de toto, nec de parte in relatione ad totum. Moïses igitur discrete monet, Deum intuitum esse omne, quod fecerat, consequenter de perfectione mundi non iudicasse ex parte, nec de parte una sigillatim spectata tulisse iudicium, sed in relatione ad cetera omnia, quæ simul fecerat: secus enim non fuisset opus, ut omne, quod fecerat, simul intueretur. Iudicio itaque Dei unumquodque, quod fecerat, erat optimum, quatenus simul factum fuerat cum ceteris, nec quicquam reperiri poterat, ob quod affirmare liceat, potuisse mundum meliori fieri modo. Porro cum Moïses narret Deum finita creatione contemplatum fuisse opus suum, quod fecerat, ut quale a se factum sit, iudicaret; hoc ipso innuit, mundum quoque fieri potuisse alio,

Y y 3

quam

quam Deus eundem fecit, modo, consequenter hunc, qui existit, mundum non esse unicum possibilem, sed præter eum adhuc posibles esse alios. Scripturæ igitur sacræ conveniens est, Deum elegisse mundum optimum ex pluribus possibilibus adeoque libere. Ecquis jam dubitet, juxta S.S. affirmandum esse, quod Deus elegerit libere mundum optimum ex pluribus possibilibus & singula in eo sint optima in relatione ad totum universum spectata? Ut vero verba Moïsis penitus intelligamus, ad singula animum probe advertere tenemur, ne quid attentionem nostram effugiat, quod ad probandam propositionem præsentem conducit. Probe igitur notandum, quod Moïses dicat, Deum intuitum esse omne, *quod fecerat*, cum dicere potuisset, intuitum ipsum esse cælos atque terram & omnem ornatum eorum, quemadmodum mox addit hæc verba cap. II, 1: Igitur perfecti sunt cæli & terra, & omnis ornatus eorum. Etenim hoc ipso monemur, Deum de perfectione mundi atque omnium, quæ in eo sunt, judicaturum mundum & quæ in eo sunt considerasse tanquam opus suum consequenter in relatione ad se ipsum. Unde intelligitur juxta S.S. mundum hunc esse optimum etiam in relatione ad Deum opificem, ut, si quæsieris, quemnam omnium mundorum possiblem maxime deceat a Deo fieri, respondere tenearis, non esse alium præter eum, quem fecerat, qui magis conveniat summæ ipsius perfectioni. In anterioribus probavimus mundum hunc adspectabilem esse in se omnium possiblem optimum (§. 382.) & decere Deum, ut eundem eligat, quia optimus (§. 384.), immo esse etiam in relatione ad ipsum optimum (§. 405.). Probavimus præterea, Deum judicantem, quid sit optimum in se, idem referre ad totum universum (§. 393.), & ut constet, quid optimum sit in relatione ad se ipsum, idem referre ad omnia sua attributa (§. 395.). Quod si jam attenta mente pervolveras omnia, quæ modo dicta sunt, nihil horum reperies, quod non per verba Moïsis æque pro-

probari possit, ut adeo, quam nos animo concepimus mundi optimi & liberæ electionis a Deo factæ ideam ac in anterioribus stabilivimus, non sit diversa ab ea, quæ menti Mosis obversata fuit narraturi, quale fuerit Dei de mundi perfectione iudicium.

In interpretatione verborum Mosis nihil est coacti. In hæremus proprietati verborum juxta genium linguæ authenticæ & vocabulis singulis proprium tribuimus significatum. Expendimus autem verba singula & in rationem inquirimus, cur hisce potius verbis usus fuerit autor divinus quam aliis, quibus idem dixisse primo intuitu videri poterat, ut ex comparatione intelligatur, ipsum plus dixisse suo modo, quam quocunque alio. Verba denique sigillatim intellecta ad se invicem referimus, ut eorum, quæ iisdem significantur, vi notionum ipsis respondentium elucescat nexus. Hisce vero regulis, quas nemo reprehendere potest, qui admittit divinam S. S. auctoritatem, concessis, non aliud prodit Dei de mundi & eorum, quæ in ipso sunt, perfectione iudicium, quam quod operose in anterioribus adstruximus. Mundum, qui existit, esse omnium possibilium optimum agnovere dudum & Theologi, & Philosophi, etsi communiter animum ad perfectionem hujus universi non advertant, qui, quomodo rite æstimanda sit, non perpendunt. Nominavimus superius *Augustinum*, & nunc nominasse sufficiat *Sebastianum Isquierdum* Tom. 2. de Deo Disp. 32. q. 3. prop. 6. num. III. & prop. 9. n. 125. *Antonium Perez* de voluntate Dei Disp. 6. cap. 6. n. 52. & seqq. atque *Maurum* Tom. I. qu. 51. n. 22. Immo a notione mundi optimi, qualem in superioribus stabilivimus, & hic S. S. conformem evicimus, non prorsus dissentanea sunt, quæ docet *D. Thomas* in Summa Theologiæ primæ partis quæst. 25. art. 6. ubi disputat, utrum Deus possit meliora facere ea, quæ fecit, nec ne. Etsi enim certo respectu concedat mundum a Deo fieri potuisse meliorem; non concedit tamen, Deum non posse facere aliquam rem meliorem substantialiter, aut, si major, essentialiter, quam ipsa sit, nec si modum spectes ex parte facientis, posse facere melius quam facit, & universum sup-

positus

positis istis rebus non posse esse melius , propter decentissimum ordinem his rebus a Deo attributum , in quo perfectio universi consistat.

§. 407.

*Motivum
voluntatis
divinae
juxta S. S.*

Quoniam juxta S. S. mundum optimum elegit Deus (§. 406.) ; juxta eandem ratio sufficiens, cur Deus quid velit, est, quia in suo genere optimum (§. 56. *Ontol.*). Quamobrem cum ratio sufficiens volitionis sit motivum (§. 887. *Psychol. empir.*) ; juxta S. S. *motivum voluntatis divinae est id, quod optimum est.*

Poteramus hinc deducere alia tanquam S. S. conformia quæ ex eo fluunt , quod Deus optimum mundum elegisse ponatur , & quod voluntas ipsius tendat ad optimum. Enimvero cum ex anterioribus satis superque constet, quænam cum hac hypothese necessario connectantur, superfluum foret ea de novo repetere.

§. 408.

*Motiva
voluntatis
divinae unde desu-
mantur
juxta S. S.*

Motiva voluntatis divinae juxta S. S. partim ab objecto, partim ab ipso volente Deo desumuntur. Patet hoc ex iis, quæ diximus probantes Deum juxta S. S. elegisse mundum optimum. Etenim ostendimus, Deum judicaturum de perfectione mundi, quem creaverat , non modo inspexisse res ipsas, quas fecerat, sed eas quoque considerasse tanquam a se factas, adeoque ad se ipsum retulisse : id quod vero Moses a Deo factum recenset, creatione jam absoluta, quin factum fuerit ab æterno, cum mundi creationem decerneret, dubitandum non est.

Quando motiva explicanda sunt per ea , quæ ab objecto desumuntur, probe tenendum est , non minus respiciendum esse ad perfectionem accidentalem , quæ per se eidem non inest , sed essentiali superaccedere potest , quam ad essentialem , quæ cum essentiali inhæreat , ab eadem inseparabilis est, ipsa etiam Scriptura magistra. Ita enim Deus *Job. III. 16.* filium suum unigenitum dicitur dedisse mundo ; quia eum dilexit. Quod fecit in tempore , id ab æterno voluit : unde & dici-

dicatur nos elegisse ante mundi constitutionem *Eph. I. 4.* adeoque cum præter Deum nihil adhuc esset, propterea quod mundus creatus est in principio *Gen. I. 1.* quando scilicet primum quid extra Deum existere cæpit. Deus itaque ab æterno voluit mundo dare filium suum, quia eum dilexit. Voluit autem dare eum in finem, ut homines non pereant, sed habeant vitam æternam *Job. III. 16.* adeoque homines sibi repræsentavit peccato obnoxios & pænæ æternæ reos. Hic igitur Deus judicans quid sit pro hoc rerum statu optimum, non tantummodo respexit ad perfectionem hominis essentialem, unde cognoscitur possibilitas accidentalis; sed inprimis ad accidentalem, cujus per fidem in Christum particeps fieri poterat homo a miseria liberandus. Nostrium non est hæc latius deducere: sufficit excitasse attentionem eorum, qui principiis de voluntate divina traditis in explicandis S. S. locis de eadem agentibus uti voluerint.

§. 409.

Deus juxta S. S. voluit omnia ab æterno. Etenim elegisse nos dicitur *Eph. I. 4.* πρὸ καταβολῆς κόσμου ante jacta fundamenta mundi & *2. Tim. I. 9.* πρὸ χρόνων αἰωνίων ante tempora secularia seu æterna. Nimirum antequam mundus a Deo produceretur, nihil extra ipsum existeret, aut, si mavis, præter ipsum, adeoque creatura nulla finita, consequenter nulla erat rerum successio (§. 834. *Ontol.*). Quamobrem cum tempus non detur nisi existentibus successivis in continua serie (§. 574. *Ontol.*); antequam mundi fundamenta jacerentur, hoc est, quicquam præter Deum existere inciperet, nullum erat tempus. Deus igitur nos elegit in Christo, antequam tempus erat. Immo finge tempora quantæcunque durationis, dicendum tamen semper erit, Deum nos elegisse ante hoc tempus. Enimvero æternum est, cujus nullum assignari potest initium, quemadmodum existentiz hujus universi datur, & quod quanto tempore duraverit dici nequit, quantacunque etiam tempora ponas. Patet igitur Deum nos elegisse in Christo ab æterno (*Wolffii Theol. Naturalis*) Z z juxta

juxta S. S. Electio hæc est actus liberrimæ voluntatis divinæ (§. 941. *Psychol. empir.*). Quamobrem liquet, juxta S. S. Deum velle ab æterno, quod vult.

Deus nos eligens in Christo consideravit tanquam in peccatum prolapsos & pœnæ æternæ obnoxios *Jeh. III. 16.* Homo demum lapsus est post creationem, integer a Deo creatus *Gen. III. 1. & seqq.* Quamobrem cum ratio objectiva electionis involvat lapsum hominis (§. 118.) ; videri poterat, Deum demum elegisse nos in Christo, quando lapsus fuerat Adamus, consequenter Deum demum humano more in tempore velle invitantibus objectis. Hunc ergo errorem ut præcaveret Apostolus, Deum nos elegisse asserit ante jacta mundi fundamenta, hoc est, cum nihil adhuc rerum finitarum existeret, quod Deo ansam volendi suppeditare potuisset. Unde apparet Scripturam æternitatem actus volitionis divinæ ita urgere, ut præcludantur omnes volitiones temporariæ. Quodsi vero Deus ea ab æterno voluit, quæ facta in tempore supponunt; nullum profecto dubium superesse potest, quin multo magis cetera ab æterno voluerit, quæ nihil in tempore factum supponunt, consequenter palam est, juxta S. S. Deum omnia voluisse ab æterno.

Hinc etiam patet juxta S. S. pronunciandum esse, Deum omnia velle actu unico sive simul: id enim ex eo sequitur, quod voluerit omnia ab æterno (§. 319. 355.). Et in genere patet, Scripturæ sacræ convenienter Deo tribui, quæcunque exinde sive mediate, sive immediate deducantur, quod is ab æterno voluerit omnia.

§. 410.

*Libertas
voluntatis
divinæ a
conditione
externa
juxta S. S.*

Deus juxta S. S. liber est in volendo ab omni coactione externa, & voluntas ejus ab omni ente alio extra ipsum independens. *Dan. c. IV. 32.* omnes, inquit Nabuchodonosor, habitatores terræ apud Deum in nihilum reputati sunt: juxta voluntatem

tem enim suam facit, tam in virtutibus coeli, quam in habitatoribus terræ, & non est, qui resistat manui ejus & dicat ei: quare fecisti? Refert Daniel Nabuchodonosorem a Deo graviter punitum ex hominum consortio depulsum fuisse, herbas more boum comedisse ejusque corpus cœlesti rore tinctum fuisse; exacto autem temporis spatio in mentem rediisse & Dei in omnes creaturas dominium atque imperium agnovisse: quo facto in ea erupit verba, quæ modo recensuimus. Patet adeo Daniele narrantem, quomodo a cultu idololatriæ ad cultum veri ac supremi Numinis fuerit conversus, probare tanquam vera, quæ dixit Nabuchodonosor Deum verum laudaturus, consequenter Scripturæ sacræ dogmatis eadem conformia esse, quæ menti Nabuchodonosoris conformia probari possunt. Agnoscit Nabuchodonosor Deum facere secundum voluntatem suam in universo mundo, nec in toto mundo reperiri quenquam, qui ei resistere possit. Qui potest facere quæ vult & cui nemo resistere valet, quo minus id faciat; is nulla vi externa adigi potest, ut quid velit, quod ea seposita minime voluisset. Quamobrem patet juxta S. S. Deum nulla vi externa adigi posse, ut quid velit, quod hac seposita, minime voluisset, consequenter eum liberum esse ab omni coactione externa eo prorsus sensu, quo supra eundem liberum esse evicimus (§. 321.). *Quod erat primum.*

Porro affirmat Nabuchodonosor Deum facere secundum voluntatem suam, nec in toto universo esse quenquam, qui ei dicat: quare fecisti? Nemo dicere potest ad alterum, qui suo arbitratu agit, quid agis? nisi qui jus habet exigendi ab eo, ut ad nutum suum componat actiones suas. Quamobrem fatetur Nabuchodonosor neminem esse, qui rationem facti a Deo exigere possit, quando suo arbitratu agit, quemadmodum vertit *Castalia*. Enimvero si Deus non tenetur rationem reddere ejus, quod suo arbitratu facit, alteri; nec ideo quid

velle tenetur, quia ut hoc velit vult alter, consequenter voluntatis ipsius ratio nulla est in voluntate alterius (§. 56. *Ontol.*). Quamobrem cum ens omne independens sit ab alio, quatenus ejus, quod ipsi tribuitur, ratio extra ipsum in alio non continetur (§. 851. *Ontol.*); patet ex mente Nabuchodonosoris voluntatem Dei esse independentem ab omni ente alio extra ipsum, consequenter cum evicerimus, quod menti Nabuchodonosoris conforme est idem conforme esse Scripturæ sacre; juxta S. S. voluntas Dei independens est ab omni ente alio extra ipsum.

Nimirum de ea dependentia hic sermo est, quæ officit libertati, quemadmodum coactio externa eidem inimica.

§. 411.

*Quenam
Deus velit
juxta S. S.*

Deus juxta S. S. vult, quod ipsi placet. Disertis verbis non uno in loco hoc assertitur in Scriptura sacra. Affirmat hoc Christus *Matth. XL 26.* Etenim cum doceret, Deum mysterium salutis abscondisse sapientibus & prudentibus ac revelasse parvulis, mox addit: Ita, pater: quoniam sic fuit placitum ante te, seu ut *Castalio* verit, quoniam sic tibi placitum est. Vocabulum *εὐδοκία*, quod in textu Græco extat, exprimere solet illum animi actum, quo quid nobis representamus tanquam delectabile, seu tale, unde voluptatem percipimus. Patet hoc ex *Matth. III. 17.* ubi refertur vox Dei coelitus demissa, cum Christus baptizaretur in Jordane, quæ erat hujusmodi: Hic est filius meus dilectus, *ἐν ᾧ εὐδόκησα*, in quo mihi complacui, seu, in quo delector, ex quo voluptatem percipio. Nimirum quem amamus, in eo quid nobis representamus quod nobis placet, ita ut hæc representatio sit amoris causa (§. 649. *Psych. emp.*). Unde liquet *εὐδοκίαν* designare illum animi actum, quo quid nobis placet. Quamobrem si quid facit Deus, ὅτι ὅτως ἐγένετο *εὐδοκία* ἔμπροσθεν αὐτοῦ; Deus id ideo facit, quia id ipsum ipsi placet. Jam vero quod Deus facit, id etiam facere

cere vult, de quo nemo dubitat. Quare ex eo, quod Deus facit, quod ipsi placet, & quis quid ipsi placet, recte omnino colligitur, eum quoque velle quod ipsi placet & quis ipsi placet. Christo igitur Doctore Deum facere, quod ipsi placet, manifestum est.

Idem vero, quod a Christo acceperunt, tradiderunt etiam Apostoli. Hinc de his verba facientes, quæ ad œconomiam salutis sive gratiæ pertinent, omnia referunt ad *εὐδοκίαν τῆ θελήματι* τῆ θεῷ seu ad beneplacitum voluntatis divinæ. Ita *Eph. I. 5* Deus nos dicitur prædestinasse in adoptionem filiorum Dei per Christum κατὰ τὴν εὐδοκίαν τῆ θελήματι αὐτῆς, secundum beneplacitum voluntatis suæ, consequenter per ea, quæ modo uberius dicta, quia sic Deo placuit ac ideo ipse idem voluit. Similiter idem Apostolus *1 Corinth. I. 21.* monet, placuisse Deo per stultitiam prædicationis salvos facere credentes. Nemo dubitare potest, Deum hoc loco dici fecisse, quod ipsi placuit, adeoque etiam voluisse, quod ipsi placuit, consequenter hinc manifestum esse, juxta S. S. dicendum omnino esse, velle Deum, quod ipsi placet. Enimvero in textu Græco legitur: *εὐδόκησεν ὁ θεός*, ut adeo appareat, *εὐδοκία*, esse sumendam de eo actu, quo quid nobis placet & quando de voluntate accipitur, hoc ipso vocabulo significari, placuisse quid volenti & ideo ipsum hoc voluisse, quia placuit.

Equidem non ignoro *εὐδοκίαν* vi originis idem denotare ac aliquid pro bono reputare, seu quid censere bonum, ut adeo si Deus quid velit κατὰ τὴν εὐδοκίαν id vi originis vocabuli ideo velle dicendus sit, quia ipsi videtur bonum: non tamen hoc me anxium tenet, multo minus efficit, ut a facta in probatione propositionis præsentis interpretatione discedam. Etenim primo abunde notum est, significatum vocabulorum non esse determinandum ex etymologia, sed ex usu loquendi. Puto autem usum loquendi Scripturæ probatum sufficienter nobis fuisse. Nec secundo ultra Lexica in lin-

qua Græca sapere debet, quin ipsi sit perspectum *εὐδοκῆν* significare aliquo delectari, quem sane significatum contextus clarissime insinuat *Matth. III. 17.* in voce Dei cœlitus delapsa. Etsi autem ex accidente sit, favet tamen quoque tertio interpretationi origo vocabuli. Si quid enim existimatur bonum, ex eo voluptatem percipimus (§. 558. *Psychol. empir.*). Ex quo voluptatem percipimus, id nobis placet (§. 542. *Psych. empir.*). Placet igitur, quod censetur bonum. Quamobrem si quis vult aliquid, quia censet bonum, ut hoc potius velit, quam non velit, aut velit hoc potius, quam aliud; is ideo quid vult, quod ipsi placet hoc potius velle, quam non velle, vel hoc potius velle, quam aliud.

§. 412.

Deus quod decenter *S. S.* *Juxta S. S. Deus vult, quod ipsum decet eodem prorsus sensu, quo idem supra evicimus.* Etenim Deus volens ostendere iram & notum facere potentiam suam sustinuit in multa patientia vasa iræ aptata in interitum: ut ostenderet divitias gloriæ suæ in vasa misericordiæ, quæ præparavit in gloriam, *Rom. IX. 22. 23.* Non jam sollicito tenemur animo circa objectum voluntatis divinæ in hoc loco Scripturæ, nec disquirimus, quid Deus de eodem voluerit ex mente Apostoli. Ea enim nihil prorsus faciunt ad scopum præsentem. Sufficit itaque observasse, Deum quædam voluisse ex mente Apostoli, ut hoc ipso doceret, quamnam ipsi sint attributa. Etenim vasa iræ ad exitium composita multa cum patientia tulit, ut ostenderet iram suam & potentiam declararet. Irascimur alteri ob malefacta (§. 862. *Psychol. empir.*), quæ cum nobis displiceant (§. 569. 542. *Psychol. empir.*), odio digna habemus (§. 674. *Psychol. empir.*). Deus itaque iram suam ostensurus perinde odium mali declarare intendit, quemadmodum potentiam suam ostendere voluisse dicitur. Cum Christus miraculum primum patrasset in nuptiis aqua in vinum mutata, discipulis gloriam suam manifestasse dicitur *Joh, III. 11.* Ex hoc
autem

autem factio non poterat colligi nisi omniscientia & potentia divina ac potestas in naturam. Cum enim miraculum sit possibile in eo corpore per essentiam ipsius, in quo contingit (§. 517. *Cosmol.*); Christo essentias rerum quæque inde pendent intime esse perspecta patebat. Nimirum quia nunquam essentia aquæ ac vini investigandæ operam impenderat Christus, sed hæc ipsi scientia natura inesse debebat; quod rei cujuscunque alterius essentiam atque naturam eodem modo perspicere deberet, quo ipsi aquæ & vini essentia atque natura perspecta fuit, palam erat. Quoniam vero deficiebant causæ naturales, quibus ad actum deduci poterat, quod in aqua fieri posse, per essentiam ipsius erat manifestum (§. 518. *Cosmol.*); Christus aquam in vinum mutans declaravit, se posse facere quod vult. Cum denique miraculum fieri nequeat, nisi motu legibus motus contrario (§. 526. *Cosmol.*) consequenter qui fit contra naturæ ordinem (§. 559. *Cosmol.*), ac præterea miraculum vim naturæ omnem superet (§. 523. *Cosmol.*); Christus miraculum patrans ostendit, sibi esse aliquod jus in naturam rerum & facere posse, quæ vim universam ipsius excedunt. Manifestavit itaque gloriam suam, dum declaravit, sibi competere attributa divina. Hinc jam liquet Deum ostendisse divitias gloriæ suæ in vasa misericordiæ, quatenus declaravit hoc ipso, quænam ipsi insint attributa. Unde jam porro patet, Deum aliquid potius velle, quam non velle, & velle hoc potius, quam aliud, quatenus ad ea, quæ ipsi sunt, seu essentiam & attributa sua respiciens, hæc sibi inesse deprehendit, non alia attributa. Quoniam itaque ex iis, quæ Deo insunt, seu essentia & ex attributis divinis intelligitur, cur quid potius velit, quam non velit, & cur hoc potius velit, quam aliud; in iis, quæ Deo insunt, seu in essentia & attributis ejusdem continetur ratio, cur quid potius velit, quam non velit, & cur hoc potius velit, quam aliud (§. 56. *Ontol.*). Quare cum Deum de-

ceat,

ceat, cujus aliqua in essentia vel attributis ipsius continetur ratio, cur id potius velle debeat, quam aliud, aut si mavis, cur conveniat ipsum potius quid velle quam non velle, vel potius hoc velle, quam aliud (§. 332.) ; juxta S. S. Deus vult, quod ipsum decet, eo sane sensu, quo supra (§. 335.) Deum velle, quod ipsum decet, ostendimus.

Cum Deus velit, quod se decet, quatenus rationem cur quid velit a seipso petit, consequenter quatenus motivum voluntatis ipsius ingreditur ratio subjectiva (§. 336.), paulo ante vero ostendimus (§. 408.), motiva voluntatis divinæ in S. S. etiam desumi ab iis, quæ Deo insunt ac inprimis interpretantes judicium Dei, quod ab ipso de perfectione mundi latum refert Moses, ostendimus, Deum non tulisse de eodem judicium nisi habito ejusdem ad semetipsum respectu (§. 406.) ; ex his jam constare poterat velle Deum, quod ipsum decet. Non tamen probatio, quam dedimus, superflua censi debet, propterea quod per consequentiam ex aliis, quæ Scripturæ S. conformia esse demonstravimus, inferri minime debent, quæ ex ejus dictis majore veritatis luce deduci possunt.

§. 413.

Quidnam Deus potest facere, quicquid vult juxta S. S. Disertis *Deus juxta* verbis hoc affirmat Psaltes. Etenim *Psalms. CXV. 3.* leguntur *S. S. facere* hæc verba : Deus noster in cælis : omnia, quæcunque voluit, *possit.* fecit. Verbum nimirum *פָּעַל*, quod in textu Hebræo exstat, proprie significat velle. Nec obstat, quod *Castalio* verrat ; quicquid ei liber faciens & *Martinus*, eximius Philologus, teste ipsius Lexico philologico, in Epitome Theologiæ methodice dispositæ (quæ novissimæ editioni Marburgensi Institutionum theologicarum *Gürtleri* subjuncta est) lib. I. cap. 4. pag. 22. citans hæc verba, eadem sic reddat : quicquid placet, facit. Etenim modo ostendimus (§. 411.), Deum velle, quicquid ipsi placet, ipsa scriptura sacra magistra, adeoque si Deus facit, quic-

quicquid placet; facit urique, quicquid vult. Et nemo ignorat, facere quod quis velit & facere quod libeat, esse unum idemque. Nullum adeo dubium superesse potest, quin juxta S. S. Deus facere possit, quicquid vult.

Ceterum ex contextu apparet, Deum dici facere posse, quæcunque vult, ut evincatur illimitata ejusdem potentia & hoc pacto magnitudo potentia divinae animis nostris insinuetur. Etenim dicitur facere posse, quæ vult, in oppositione ad idola gentilium, quæ omni prorsus potentia activa destituta sunt. Conveniens adeo erat exaggerare potentiam divinam: quod quoad homines rectius fieri haud quaquam poterat, quam si potentia voluntati coextenderetur, cum nemo non potentissimum concipiat eum, qui quicquid vult, facere potest.

§. 414

Deum juxta S. S. pœnitere ejus nequit, quod facit ac vult. Extat hæc propositio quoad verba in S. S. Ita enim legitur Num. XXIII. 19. 20. Non est Deus, quasi homo, ut mentiatur: nec ut filius hominis, ut mutetur. Dixit ergo & non faciet. Locutus est, & non implebit? ubi in textu Hebræo extat verbum נִחַם, quod idem significare ac pœnitere, pervulgatum est & a vulgato interprete ipso per Latinum pœnitere redditur: Sam. I. 35, ubi Deum pœnituisse legitur, quod constitisset regem Saul super Israel. Unde & Castalis vertit in loco præsentis: Deus non est homo, ut mentiatur; non homine natus, ut eum pœniteat. Ex contextu autem liquet, verbum pœnitere hic sumi in significato communi, quem ex usu loquendi habet, & in quò superius ostendimus (§. 369.), Deum nunquam pœnitere posse ejus quod fecit, consequenter quod vult. Etenim Balaamus jussu Dei certum reddere debebat Balaacum, quod fieri haud quaquam possit, ut Deus non stet promissis. Remover igitur rationes, quæ impediunt, cur ho-

An Deum
juxta S.S.
pœnitere
possit ejus
quod vult.

(Wolffii Theol. Naturalis) Aaa mines

mines iisdem stare minime soleant. Id ipsum vero duplici de causa accidere solet, vel quod non habeant animum faciendi, quæ promittunt, dum quid alteri promittunt, adeoque mentiuntur; vel quod postea mutant animum, quod eos promissi poeniteat. Dum vero in posteriori casu animum mutant, tristitiam vel saltem tædium percipiunt ex eo, quod promiserint, male hoc a se factum arbitrantur. Quamobrem cum poenitentia dicat tristitiam ex eo ortam, quod a nobis male vel minus recte factum existimamus, vel saltem tædium inde perceptum (§. 755. *Psychol. empir.*); verbum poenitere hic sumi in significato recepto, satis superque patet. Mutatio adeo animi est effectus poenitentiae, qui in presenti casu menti loquentis convenienter eidem substitui potest, quemadmodum ab interprete vulgato factum. Evidens adeo est juxta S. S. Deum non posse poenitere ejus, quod vult, quemadmodum hominibus accidere solet, propterea quod natura & essentia Dei prorsus diversa ab humana, cui adeo repugnat, quod huic convenit.

Vidimus S. S. eodem vocabulo uti, quando negat Deum poenitere posse ejus, quod voluit vel promisit, & quando narrat, Deum poenituisse ejus quod fecerat, adeoque alia de Deo docere, alia de eodem narrare videtur, factis, quæ de Deo recenset, dogmatis, quæ de eodem inculcat, contrariis. Et sane plura occurrunt in sacris loca, ubi Deum poenituisse dicitur ejus, quod fecerat, veluti Gen. VI. 6. quod fecisset hominem, ubi in textu authentico idem verbum **תָּנַח** exat. Constat ex superioribus (§. 103.), Scripturam sacram de Deo sæpius loqui humano more, veluti ipsi tribuendo membra corporis humani. Quoniam vero ea, si proprie acciperentur, contradicerent aliis, quæ aperte de ejus essentia & natura docet; quin ita interpretanda sint, ut cum his consentiant, nemo non videt. Quando itaque dicitur Deum poenitere facti, hoc ita accipiendum est, quod ea, quæ præter ipsius intentionem inde fuere consecuta, ab ipso improben-

tur , & quod ob ea non fecisset , quod fecerat , nisi alia fuissent rationes in doctrina de permissione mali paulo post distinctius exponende. Enimvero quia deinceps paulo distinctius exposituri sumus , quo sensu Deo tribui possint affectus in genere , tum etiam poenitentia in specie ; ea hic anticipare non lubet.

§. 415.

Deus juxta S. S. est omnipotens eodem sensu , quo supra omnipotentiam ejusdem evincimus. Deus semetipsum vocat omnipotentem Gen. XVII. 1. promittens Abrahamo centenario ex Sara nonagenaria filium : cui ut fidem haberet Abrahamus , convictus esse debebat de omnipotentia divina. Extat in textu Hebræo vocabulum *אֵלֹהִים* , quod soli Deo , nulli unquam creaturæ , neque idolis in S. S. tribui constat , manifesto indicio , denotari eodem aliquod attributum , quod non convenit , nisi Deo vero , ac creaturæ nulli communicari potest. Quamobrem cum Deus , quemadmodum modo vidimus , se dicat omnipotentem , ubi ea promittit , quibus fides haberi non poterat sine cogitatione omnipotentia ; dubio profecto caret , quod ipso illo nomine omnipotentia Dei indigetur , quicquid de ejus etymologia sentiant Grammatici. Nimirum si ad ea respicias , quæ ordinarie fieri solent , contra naturæ consuetudinem esse videtur , ut mas centenarius generet & femina nonagenaria pariat , adeoque id fieri posse improbabile est. Quæ improbabilia sunt , non tamen ideo sunt impossibilia. Quamobrem Abrahamus non poterat promittenti Deo credere , nisi perpendens possibilia esse posse , quæ an fieri possint ipsi perspectum non erat , Deum vero posse facere , quæ impossibilia absolute talia non sunt , consequenter quicquid possibile est (§. 85. *Ontol.*) , seu tale , ut existentia eidem minime repugnet (§. 133. *Ontol.*) , atque adeo cogitans omnipotentiam Dei eodem prorsus sensu , quo nos eandem accipi-

mus (§. 347.) Deoque vindicavimus (§. 349.). Ceterum vocabuli Hebræi non alium fuisse significatum, quam quem eidem tribuunt S. S. interpretes & quem eidem modo vindicavimus, ex Græca quoque versione LXX. interpretum liquet. Etenim ipsis Deus dicitur *παντοκράτωρ*, quando in textu Hebræo vocatur *יהוה*: vocabulum vero Græcum & vi originis, & ex usu loquendi significat omnipotentem, perinde ac vocabulum Latinum & Germanorum *allmächtig*. In novo fœdere Deus quoque *παντοκράτωρ* appellatur, veluti 2 Cor. VI. 18, ubi Apostolus recenset promissiones fidelibus a Deo factas, adeoque eodem prorsus in casu, quo Deus sibi metipsi tribuerat omnipotentis nomen.

Vocabulum Hebræum non perinde ac Græcum, Latinum atque Germanicum originem habet adeo evidentem, ut vi ejusdem insinuet potentiam Dei ad omnia possibilia extensam. Nec negari potest, contortam esse etymologiam, qua *יהוה* derivatur a *יהוה*, quod vastare significat, quasi Deus ea potentia, qua ex nihilo eduxit omnia, eadem denuo in nihilum redigere possit: ratio enim denominandi e longinquo petita. Rectius utique vocabulum derivatur a nomine *יה*, quod idem ac sufficiens significat, cum præfixo *וה*. Ita enim vi originis omnipotens is dicitur, qui omnibus faciendis sufficit, quæcunque scilicet possibilia sunt. Unde apparet, non opus esse, ut vi etymologiæ Deus dicendus sit sibi ipsi sufficiens ac nullius indigus. Etenim hæc ratio etymologica nec cum contextu, nec cum usu loquendi, quem versio LXX. interpretum comprobatur, conspirat, quemadmodum nostra.

§. 416.

Magnitudo potentia divina juxta S. S. *Juxta S. S. potentia Dei absolute maxima est & Deus est absolute omnium potentissimus. Tribuit Deo potentiam absolute maximam, Jeremias c. XXXII. 17. ubi preces ad Deum fundens ita eundem alloquitur: Ecce tu fecisti cælum & terram in fortitudine tua magna & in brachio tuo extenso: non erit tibi*

tibi difficile omne verbum. Etenim in textu authentico extat בכתך. Vocabulum vero כח significare potentiam activam ex aliis S. S. locis satis constat. Ita Jacobus asseverans se servisse Labano totis viribus suis *Gen. XXXI. 6.* eodem utitur vocabulo significaturus, quod servitia præstans fecerit, quicquid a se fieri poterat. Unde liquet כח significare potentiam activam. Hæc vero potentia activa Dei dicitur הגדול illa magna. Notum vero est ה demonstrativum seu emphaticum positivum convertere in superlativum, ubi contextus, quemadmodum hic, idem insinuat. Sensus adeo verborum Jeremix est, quod Deus fecerit cælum & terram maxima, quæ ipsi est, potentia, consequenter eidem disertis verbis maxima ab eodem tribuitur potentia. Addit vero, non esse ipsi difficile omne verbum, seu, quemadmodum *Castalio* vertit, non esse ipsi arduam rem ullam. Hebræum enim כח significat stylo Hebræorum omne id, quod nominari potest, adeoque stylo philosophorum, quicquid possibile. Juxta literam textus nihil horum, quod nominari potest, a Deo separari potest, hoc est, non potest nominari quicquam, quod potentiam Dei maximam excedat, consequenter ex mente Jeremix hæc sese extendit ad omnia possible. Nemo non novit majorem potentiam ea minime concipi posse, quæ ad omnia possible extenditur. Vates igitur divinus Deo tribuit potentiam absolute maximam.

Similiter angelus Mariam convicturus, quod absque viro concipere possit in utero, affirmat *Luc. 1. 37.* non esse impossibile apud Deum omne verbum. Hebraismos in textu Græco novi fœderis occurrere pervulgatum est. Quemadmodum itaque stylo Hebræorum כח significat, quicquid nominari potest; ita quoque ibidem *וְכָל שֵׁנָה*, omne verbum, idem prorsus denotat, ut adeo sensus verborum angeli hic sit: nihil eorum, quæ nominari possunt, Deo esse impossibile. Unde

manifestum est , ex mente ejusdem Deum facere posse , quicquid possibile , consequenter Deo ab eodem tribui potentiam absolute maximam *per antea demonstrata*.

Sponte sua hinc fluit , Deum , juxta S. S. omnium absolute potentissimum esse , quemadmodum quoque supra idem inde intulimus (§ 350.). Ipse vero etiam Propheta *loc. cit. v. 18.* Deum vocat מְבֹרָר potentem illum seu illum potentia excellentem , hoc est , potentissimum , quemadmodum ex anterioribus constat,

Quoniam omnipotens est , qui facere potest quicquid possibile (§. 347.), per ea S. S. loca , quibus evicimus , Deo competere juxta eandem potentiam absolute maximam , etiam probatur eundem esse omnipotentem : id quod paulo ante per alia evicimus (§. 415.). Et quoniam verba angeli , non esse impossibile apud Deum omne verbum , verbis Prophetæ , non esse Deo difficile omne verbum , æquipollent ; quin Hebraismus in illis lateat tanto minus dubitari potest. Immo forsan nec a vero aberraveris , si angelum verba Prophetæ , quæ Mariæ virginis piæ non ignota supponere licet , citasse statuas : id quod tamen ad præsens negotium nullum momentum affert,

§. 417.

Juxta S. S. Deus juxta S. S. plura facere potest , quam quæ homo intel- ligere valet. Disertis verbis hoc affirmat Apostolus *Ephes. III. Dei poten- tia captum* 20. Deus , inquit , potest omnia facere superabundanter *boninis* quam petimus aut intelligimus. In textu Græco legitur *transcen-* ὑπὲρ πάντα , super omnia. Unde *Hammondus* in paraphrasi : *dit.* Deus , inquit , multo plura & majora facere potest , quam animo assequi possumus : quæ ipsa est propositio nostra.

Atque adeo patet , juxta S. S. potentiam divinam captum humanum transcendere , nec posse nos eam modulo rationis nostræ metiri.

§. 418.

§. 418.

Juxta S. S. Deus potest facere miracula. Etenim in sa- *Potentia*
cris legitur, Deum patrasse miracula per Prophetas in veteri, *Dei mira-*
per Apostolos in novo testamento. Exemplo est *Moses mira-* *culosa ju-*
cula patrans in Ægypto Pharaonem permoturus, ut populum *xta S. S.*
Judaicum, quem educturus erat, dimitteret *Exod. IV. & seqq.*
Et Christus ipse recenset miracula ab Apostolis patrandi
Marc. XVI. 17. 18, & Marcus. diserte monet vers. 20. Deum
patrasse eadem, ad nutum scilicet Apostolorum. Quoniam
itaque Deus miracula patravit, quin ea patrare possit, dubi-
tandum non est (§. 170. *Ontol.*). Enimvero miracula in Sacris
relata esse veri nominis miracula extra controuersiam est. E. gr.
jubente *Josua cap. X. 12. 13.* Sol & Luna stetero, hoc est, situm
suum erga Tellurem intervallo plurium horarum non muta-
runt, quemadmodum idem explicavimus alibi (§. 626. *Astron.*)
Defecere igitur causæ naturales, quibus effectus hic tribui po-
terat: cum enim ex eo, quod Josua stare jusserit Solem & Lu-
nam, creaturas sensu destitutas, nec ipsius imperio subjectas,
non intelligatur, cur situm erga tellurem minime mutaverint;
nec id ratio sufficiens hujus effectus esse poterat (§. 56. *Ontol.*),
consequenter nec Josua causa ejusdem efficiens (§. 886. *Ontol.*).
Enimvero cum ex eo potissimum agnoscatur miraculum, quod
deficiant causæ naturales sufficientes, quando existit (§. 520. *Cosm.*);
statio Lunæ & solis tempore Josuæ facta veri utique nominis
miraculum est, eo scilicet sensu, quo miraculum a nobis accipi-
tur (§. 510. *Cosmol.*) & quo superius Deo potentiam faciendi
miracula vindicavimus (§. 363.). Eodem modo probatur mi-
racula, quæ in sacris narrantur, reliqua esse veri nominis mi-
racula, hoc est, eo sensu, quo a nobis accipitur vocabulum.
Unde jam colligitur juxta S. S. Deum posse facere miracula
eodem

eodem sensu, quo potentiam eadem patrandi ipsi supra vindicavimus.

Hinc porro consequuntur, Scripturæ sacræ conformia esse, quæ superius (§. 364. & seqq.) ex potentia Dei miraculosa deduximus, veluti quod facere possit, quæ vim naturæ universæ excedunt & quod naturæ ordinem turbare possit, ut adeo non opus sit, ea demum sigillatim per ea, quæ in sacris de miraculis leguntur, probari, quamvis id fieri poterat. Sane dum situs Solis & Lunæ erga Terram plurimum horarum intervallo non mutabatur; ordinem naturæ turbatum fuisse abunde intelligitur ex iis, quæ de miraculi huius effectibus diximus (not. §. 331. *Cosmol.*), atque adeo dictis plenissimam faciunt fidem.

§. 419.

Voluntas Dei juxta S. S. imperscrutabilis est. Etenim Paulus Rom. XI. 33. iudicia Dei vocat ἀνεξερεύνητα imperscrutabilia. Qualia sint hæc iudicia, de quibus loquitur Apostolus, ex contextu apparet. Differuerat nimirum de refectione Iudzorum, qui ante fuerant populus Dei electus, & vocatione gentilium, quos antea deseruerat, ad salutem, nec non de spe Judæis relicta ad communionem cum Deo redeundi: de quibus omnibus rationes non sunt satis apertæ, cur Deus hoc potius procedere voluerit quam alio modo. Ac propterea exclamat: quam imperscrutabilia sunt iudicia Dei! Ipso igitur Doctore ea, quæ Deus statuit, imperscrutabilia sunt, quia rationes, cur Deus hoc potius velit quam aliud, non satis perspicere valemus. Quoniam rationes sufficientes, cur hoc Deus potius velit, quam aliud, sunt motiva voluntatis divinæ (§. 887. *Psych. empir.*); si Paulo fidem habemus, motiva voluntatis divinæ penitus perspicere minime valemus. Quamobrem cum voluntas dicatur imperscrutabilis, quatenus motiva ejusdem nobis penitus perspecta non sunt, nec eadem certo cognoscere valemus (§. 397.); voluntas Dei juxta S. S. imperscrutabilis est, eodem

dem prorsus sensu, quo supra eandem imperscrutabilem esse demonstravimus (§. 398).

Equidem vulgatus interpretes judicia Dei incomprehensibilia vocat, quem etiam sequitur *Lutherus* in vernacula, wie gar unbegreiflich sind seine Gerichte: enimvero pervulgatum est proprio vocabulum ἀνεξερεύμητος significatu imperscrutabile denotare. Unde & *Hammondus* in Periphrasi: Quam imperscrutabilia, inquit, sunt Dei decreta & quam mirandis rationibus ea exequitur! Ceterum cum ex contextu colligenda sit notio, quæ verbis Pauli respondet, quemadmodum fecimus; eadem prodit, si vel maxime versionem vulgatam respicias, quæ in mente Apostoli nihil prorsus mutat, consequenter ex versione quoque ista colligitur voluntatem Dei esse imperscrutabilem eo sensu, quo supra eandem talem evicimus.

§. 420.

Juxta S. S. electio mundi optimi est signum naturale veri Dei. Affirmat enim Apostolus Rom. I. 20. invisibilia Dei, veluti sempiternam ejus virtutem & divinitatem, quem Deus fecit mundum considerando conspici. Quoniam itaque ex iis, quæ de mundo cognoscuntur, colligitur, qualis sit verus Deus, ejusdem opifex, idem vero alterius signum sit, ex quo alterum adesse colligitur (§. 952. *Ontol.*), idque naturale, si significatus in ipsis rerum notionibus continetur (§. 956. *Ontol.*); mundi hujus, qui existit, a Deo facta electio utique veri Dei signum naturale esse debet. Enimvero constat ex superioribus ipsa autoritate S. S. Deum elegisse mundum omnium optimum (§. 406.). Quamobrem eadem autoritate asserendum, electionem mundi omnium optimi esse signum naturale veri Dei.

Mundus optimus quale sit signum juxta S. S.

Cum verus Deus sit Spiritus perfectissimus (§. 387.); dum evicimus electionem mundi optimi esse signum naturale veri Dei hoc ipso probavimus juxta S. S. eandem esse signum spiritus
(*Wolfii Theol. Naturalis*) B b b tus

rus perfectissimi. Ne tamen quid ea in re desiderari possit, ostendere adhuc libet, Deum esse juxta Scripturam quoque sacram Spiritum perfectissimum.

§. 421.

*Summa
perfectio
voluntatis
divinae S.S.
conveniens.*

Voluntas Dei juxta S. S. perfectissima est eodem prorsus sensu, quo supra eandem talem probavimus. Auctoritate S. S. motivum voluntatis divinae est id, quod optimum (§. 407.), adeoque voluntas Dei non tendit nisi ad optimum (§. 887. *Psychol. empir.*). Est vero voluntas omnium perfectissima, quæ non fertur nisi in optimum (§. 650. *Psychol. rat.*). Voluntas igitur Dei juxta S. S. perfectissima est eo sensu, quo supra eam perfectissimam esse probavimus (§. 386.).

§. 422.

Qualis Deus sit Spiritus juxta S. S.

Deus juxta S. S. est Spiritus perfectissimus. Est enim juxta eandem Spiritus eodem sensu, quo a nobis vocabulum Spiritus accipitur (§. 132.): competit eidem intellectus omnium possibilium perfectissimus (§. 218.) & voluntas perfectissima eodem sensu, quo nos eidem non minus hanc, quam illum vindicamus (§. 421.). Quamobrem, cum Spiritus perfectissimus sit, qui intellectu perfectissimo & voluntate perfectissima gaudet (§. 646. *Psychol. rat.*); Deus juxta S. S. spiritus perfectissimus est eodem prorsus sensu, quo nos eundem Spiritum perfectissimum esse probavimus (§. 387.).

Divinitas adeo Dei juxta S. S. in eo consistit, quod sit Spiritus perfectissimus. Quamobrem cum electio mundi, qui existit, hoc est optimi, ipsius auctoritate Scripturæ (§. 420.), sit divinitatis naturale signum *Rom. I. 20.*; sufficienter jam probatum est, quod eadem auctoritate idem sit naturale signum perfectissimi Spiritus. Multa influunt in demonstrationem hanc principia, quemadmodum patere potest, si analysi rite instituere volueris, hoc est eo, quem alibi (§. 992. *Log.*) explicavimus & illustravimus, modo. Quamobrem judicium

um laturus, cave ne idem præcipites, antequam principia singula fuerint expensa, quantum ad assensum generandum sufficit. Non adeo facile est, quemadmodum plurimis videtur, dogmatum philosophicorum cum S. S. æstimare consensum vel dissensum. Puto tamen ea, quæ hanc in rem tradimus, acutioribus & cordatioribus profutura, ut in arduo hoc negotio circumspectos se præbeant: id quod multiplices pollicetur fructus generi humano. Vigebit connubium rationis & Scripturæ sacræ seu revelationis, nec præter necessitatem committentur cum Theologis philosophi: quod quanti sit, nostrum jam non est exponere uberius.

§. 423.

Productio mundi optimi etiam juxta S. S. est signum naturale omnipotentiae. Diserte affirmat Paulus Rom. I. 20. Deum quinam producendo hunc mundum adspectabilem patefecisse eam, quæ significet ipsi semper competit, potentiam αἰδίων δυνάμειν. Ea vero, quæ omnipotentia Deo competit potentia, judice Scriptura, est omnipotentia (§. tiam Dei 415.). Demonstravit ergo creando hunc mundum omnipotentiam suam, ut scilicet ex hoc ipso actu considerando ea, quæ facta sunt, quemadmodum docet Apostolus, colligi possit, Deo convenire omnipotentiam, consequenter cum Deus etiam S. S. magistra sit Spiritus (§. 132.), eundem esse Spiritum potentissimum. Quamobrem cum id sit alterius signum, unde alterum adesse colligitur (§. 952. Ontol.), idque naturale si idem ex ipsis rerum notionibus colligitur (§. 956. Ontol.); patet omnino productionem mundi optimi esse juxta S. S. signum naturale omnipotentiae.

Apostolus docturus mundum hunc esse signum naturale veri Dei, quatenus ab eodem electus & factus supponitur, in specie mentionem facit Divinitatis & potentiae sempiternæ. Vidimus si Divinitatem interpretemur ex ipsa S. S. eadem denotari perfectissimam spiritualitatem, per ea quæ in evincenda veritate propositionis præcedentis in medium adduximus. Jam vero cetera, quæ de Deo cognosci possunt, ex notione

spiritualitatis, hoc est, intellectus atque voluntatis, & potentia deducuntur. Suffecerat adeo Paulo nominasse Divinitatem & potentiam, ut constaret, contemplantem ea, quæ in mundo existunt, cognoscere posse, qualis sit Deus & quamam ipsi conveniant attributa.

§. 424.

Cur Deus re nulla alia extra se indiget ad sui conservationem aut perfectionem. Deus enim est ens a se (§. 67.). Quamobrem cum ens a se non indigeat vi entis alterius ad existendum (§. 27.), nec Deus re ulla alia extra se indiget ut existat, vel existere pergat, consequenter ut conservetur. *Quod erat unum.*

Et perfectionem. Porro idem est Spiritus absolute perfectissimus (§. 387.), adeoque nullo modo fieri potest, ut summæ ejus perfectioni quicquam ulterius accedat. Est præterea omnium absolute potentissimus (§. 350.), adeoque potentia ipsius nihil ulterius accedere potest. Quamobrem patet Deum ad augendam perfectionem atque potentiam suam re nulla alia extra se indigere. *Quod erat alterum.*

Corpus nostrum multis indiget ad sui conservationem; anima vero indiget Deo, quemadmodum deinceps evincemus. Solius Dei proprium est, ut, quemadmodum actualitatem seu existentiam non recipit aliunde, ita nec re alia extra se opus habeat ad eandem continuandam.

§. 425.

Cur Deus non indiget, nec alterius indiget auxilio vel opera, ut faciat vel fiat quod at aliena fieri vult. Etenim Deus omniscius est (§. 302.), adeoque scit omnia, quæcunque cognita possibile sunt, sive singularia fuerint, sive universalia (§. 301.). Quamobrem nemine opus habet, qui ipsum doceat, quod nosse expedit. *Quod erat unum.*

Porro

Porro idem est omnipotens (§. 349.), adeoque facere potest quicquid possibile (§. 347.), seu quod fieri non repugnat (§. 85.; *Ontol.*). Quamobrem nec auxilio alieno indiget, ut quid faciat, nec opera aliena opus habet, ut quod vult, fiat. *Quod erat alterum.*

Equidem hæc adeo evidentia sunt ei, cui omnipotentia divina perspecta est atque omniscientia, ut superfluum videri possit talia demum inculcari: quoniam tamen hisce principiis ad alia probanda habemus opus, ea prætermittenda minime fuere. Sane ne hæsitemus circa ea, quæ inde deducuntur, consultum omnino est, ut eorum evidentia ante cognoscatur.

§. 426.

Deus nulla re extra se indiget voluptatis percipiendæ gratia. Deus enim omnia possibilis tam absolute spectata, quam in certa systemata redacta cognoscit (§. 155.), & quidem ab æterno (§. 319.) atque necessario (§. 311.). Cognoscit præterea semetipsum (§. 141.), adeoque novit quod ea omnia ad actualitatem perducere possit (§. 343.), si velit (§. 352.). Quamobrem si quam intuendo perfectionem rerum a se diversarum vel ex eo, quod quid facere possit, voluptatem percipere potest (§. 511. *Psychol. empir.*); eam utique percipit, siue res ipsæ extra eum existant, siue non existant. Potest igitur ipsum re nulla extra se indigere voluptatis percipiendæ gratia.

Cur Deus voluptatis percipiendæ gratia re nulla indigeat.

Aliter sese res habet in hominibus, qui demum quid a se fieri possit edocentur, ubi id faciunt, quantæ sibi sint vires experimento demum edocti, propterea quod haud raro quid a nobis fieri posse existimamus, cum tamen vires nostræ operi, quod meditamur, minime sufficiant. Unde tum demum voluptate perfundimur, ubi opus absolutum. At in Deo longe diversa est ratio.

§. 427.

*Sibi ipsi
quinam
sufficiat.*

Sibi ipsi sufficientissimus dicitur, qui nulla prorsus re extra se quomodocunque indiget.

Ita non indiget alterius consilio, qui ipsemet dijudicare novit, quid in dato casu fieri conveniat, adeoque sibi ipse ea in re sufficit. Qui tantum roboris habet, ut pondus elevare possit, ad idem elevandum non indiget alieno auxilio, atque adeo sibi ipse ad hoc præstandum sufficit. Pone igitur jam casum omnem, quo quis re quadam alia extra se indigere potest; pone autem in nullo ens aliquod eadem indigere; habebis ens istud, quod sibi ipsummet sufficientissimum.

§. 428.

*Omnisuf-
ficientia
Dei.*

Deus sibi ipse est sufficientissimus. Etenim Deus re nulla alia extra se indiget neque ad existendum (§. 27.), neque ad sui conservationem aut perfectionem (§. 424.), neque alterius consilio, neque auxilio vel opera opus habet (§. 425.), nec re ulla eget extra se voluptatis percipiendæ gratia (§. 426.). Patet igitur nullum fingi posse casum, in quo re quadam extra se indigeat Deus. Quamobrem cum sibi ipsi sufficientissimus sit, qui nulla prorsus re extra se quomodocunque indiget (§. 427.); Deus est sibi ipse sufficientissimus.

Dico non fingi posse casum alium, quo quis re alia extra se opus habeat, præter eos, quos recensuimus. Etenim consideremus nosmetipsos & perpendamus, quinam sint illi casus, ubi aliis rebus indigemus, & liquido constabit nos omnes enumerasse. Opus habemus parentibus, ut existamus: opus habemus cibo ac potu, ut conservemur: opus habemus præceptoribus & magistris, ut intellectus perficiatur atque voluntas & artes manuales discamus: opus habemus alieno consilio & auxilio, ut quid faciamus: opus habemus aliena opera, ut per alios fiat, quod ipsimet facere non possumus, fieri tamen volumus: opus habemus denique rebus aliis, ut

carum

earum usu ac ope delectemur. Indigemus adeo rebus aliis extra nos ad existendum & ad nostri conservationem atque perfectionem, ad faciendum & agendum, quæ a nobis fieri & peragi debent, atque ad animum voluptate demulcendum. Plures non posse fingi casus, ex ipsa generali notione entis & quidem intelligentis atque ætivi demonstrari poterat, si quidem tantis ambagibus foret opus, nec in iis acquiescere liceret, quæ experientia magistra docemur. Quamobrem puto sufficienter demonstratum esse, Deum sibi metipsi esse sufficientissimum: id quod nulli creaturæ convenit, quæ tanto plus indiget aliena opera & auxilio & externarum rerum usu, quo est præstantior. Sane homo pluribus indiget, quam animantia bruta, quibus tamen plurimum præstat.

§. 429.

Deus etiam in S. S. perhibetur esse sibi metipsi sufficientissimus. Eadem S. S. conveniens. Paulus *Actor.* XVII. 25. affirmat, Deum re nulla indigere, & hanc reddit rationem, quod ipsemet omnibus vitam, statum & omnia conferat, utpote universi autor & conservator. Jam cum sibi metipsi sufficientissimus sit, qui re nulla alia extra se quomodocunque indiget (§. 427.); Deus juxta S. S. est sibi metipsi sufficientissimus.

Non difficile foret in singulis casibus, quos ante enumeravimus, sigillatim ostendere juxta S. S. Deum re nulla alia indigere, si quidem prolixiores esse velimus: enimvero cum probatio generalis, quam in medium attulimus, abunde sufficiat, & ipsa illa *εὐταξίας* seu omnisufficientiæ principia, quæ ad eam evincendam stabilivimus, pendeant ab attributis divinis, quæ Deo etiam autoritate S. S. vindicavimus, ambagibus istis minime videtur opus.

§. 430.

Deus mundum aliquem existere voluit citra omnem coactionem internam. Etenim Deus sibi sufficientissimus est (§. 428.), atque adeo nulla prorsus re extra se quomodocunque
Voluntas divina libera a coactione interna.

indiget (§. 427.), ne quidem voluptatis ullius inde percipiendæ causa (§. 426.). Quamobrem quoad ipsum indifferens est, siue mundus aliquis existat, siue non existat. Nulla igitur necessitate inductus fuit Deus, ut mundum aliquem existere vellet. Quoniam tamen aliquod esse debet motivum, cur Deus potius mundum aliquem producere voluerit, quam nullum (§. 312.), hocque sit ratio partim a seipso, partim ab objecto seu mundi perfectione desumpta (§. 340.), qua non sibi *per demonstrata*, adeoque tantummodo aliis prodesse poterat; non sane relinquitur aliud, quam quod attributis suis convenientius iudicaverit mundum aliquem potius producere, quam nullum. Voluit itaque mundum aliquem existere, quia hoc sese decere arbitrat (§. 332.). Adest adeo tantummodo ratio quædam convenientiæ, quæ cum saltem efficiat, ut, cur Deus voluerit mundum aliquem producere, intelligibili modo explicari possit, minime autem ipsi actui volitionis necessitatem inferat (§. 321. *Ontol.*); evidens omnino est, quod Deus voluerit mundum aliquem existere citra omnem coactionem intrinsecam.

Probe notandum est principium ontologicum, ad quod in demonstratione propositionis præsentis provocavimus: etenim per ipsum omnium evidentissime patet, cur motiva, volitionis ratio sufficiens (§. 887. *Psychol. empir.*), minime necessitent, etsi volens determinans actum voluntatis ad eadem respiciat.

§. 431.

*Libertas
voluntatis
divinæ.*

Voluntas Dei liberrima est. Etenim Deus, quicquid vult penitus intelligit, ut quoad ejus cognitionem nihil desiderari possit (§. 316.), quodque ipsi maxime placet (§. 330. 331.) sponte (§. 323.) ac libentissime eligit (§. 341.), citra omnem coactionem externam (§. 321.) atque internam (§. 351. 430.). Quamobrem cum libertas animæ consistat in facultate ex pluribus possibilibus sponte eligendi, quod ipsi placet, cum ad nullam
eorum

eorum per essentiam determinata sit (§. 941. *Psychol. empir.*), adeoque citra coactionem internam; major utique libertas voluntatis concipi nequit, quam ubi volens penitus intelligit, quod vult, & citra omnem coactionem internam atque externam sponte eligit, quod ipsi maxime placet. Voluntas igitur Dei liberrima est.

Equidem jam superius (§. 123.) evicimus, Deo competere voluntatem liberam: non tamen inconsultum duximus nunc uberius ostendere, adesse omnia libertatis requisita, postquam singula in anterioribus demonstravimus, ut demonstrationem libertatis voluntatis divinæ conformem efficeremus illi, qua nostræ voluntatis libertatem stabilivimus (§. 942. *Psychol. empir.*). Ita nimirum circa libertatem divinæ voluntatis nullum superesse potest dubium, quam quidam perperam in dubium vocant, aliis negare malentibus, Deum facere quod optimum est, ne videantur libertati ejus quicquam detrahere.

§. 432.

Actus voluntatis divinæ non est casus purus. Etenim ut *Actus voluntatis divinæ* Deus quid velit, motivum aliquod datur (§. 312.), consequenter cum motiva sint ratio sufficiens actus volitionis (§. 887. *Psychol. empir.*); actus voluntatis divinæ ratio sufficiens utique *non sit casus purus*. Enimvero casus purus est actualitas ratione sufficiente destituta (§. 94. *Cosmol.*). Apparet itaque actum voluntatis divinæ non esse casum purum.

Hinc vero liquet, quam abjecte de voluntate divina sentiant, qui eidem motiva demunt, quasi eadem necessitatem volendi absolutam inducant. Ita vero volens tum demum erit vere liberum, quando quid vult temere & temerariæ volitionis erunt liberrimæ.

§. 433.

Actualitas rerum pendet a voluntate Dei. Cum enim Deus Principius ceteros mundos posibles non minus ad actum perducere *um actuali-* potuerit, quam hunc, quem produxit (§. 342.), hunc vero *ex tatis re-* (*Wolfii Theol. Naturalis*) C c c ceteris *rum.*

ceteris elegerit (§. 325.), ut adeo hic potius existat, quam alius, quia ipsum potius, quam alium existere voluit; evidens est per naturam voluntatis divinæ intelligi, cur hic potius mundus & quæ in eo sunt ad actualitatem perducta fuerint, quam alia, aut hodiernum ad eandem perducantur. Quamobrem cum quid ab altero dependeat, quatenus ejus, quod ipsi inexistit ratio in hoc altero continetur (§. 851. *Ontol.*); actualitatem rerum a voluntate Dei pendere liquet.

Probe notanda est hæc propositio: etenim hinc intelligitur, actualitatis rerum, quæ sunt in hoc universo, non posse dari rationem sufficientem, nisi tandem pervenias ad voluntatem divinam. Per hujus enim naturam tandem penitus intelligitur, cur quid existat potius, quam non existat, analysi rationum actualitatis semper in eadem terminanda.

§. 434.

Cur possibilitas non pendeat a voluntate Dei.

Possibilitas rerum non pendet a voluntate Dei. Etenim ideo quid possibile est, quod ejus idea detur in intellectu divino (§. 192.). Quamobrem cum ideæ rerum necessariæ sint (§. 189.); non ideo quid possibile est, quia Deus id possibile esse voluit, consequenter per naturam voluntatis ipsius non demum intelligitur, cur quid sit possibile, adeoque ratio nulla possibilitatis in voluntate Dei continetur (§. 56. *Ontol.*). Quamobrem cum id demum ab altero pendeat, cujus aliqua ratio in altero continetur, cur sit (§. 851. *Ontol.*); possibilitatem rerum non pendere a voluntate Dei, manifestum est.

Veritas hujus propositionis jam patet per ea, quæ de ideis rerum supra evicimus, cum ostenderemus eas non esse tales, quod Deus eas voluerit esse tales; non tamen inconsultum fuit eandem hic eodem modo demonstrare, quo dependentiam actualitatis a voluntate divina stabilivimus (§. 433.). Etenim propositio præsens hoc modo, quo eandem efferimus, enunciata, non minus notanda est, quam præcedens, cum per eam

eam intelligatur, posse absque voluntate divina intelligi, ~~quod~~
quid possibile sit.

§. 435.

In philosophia nihil assumendum tanquam possibile, cujus Hypotheses non alia dari potest ratio, quam voluntas Dei. Pone enim philosophi in philosophia sumi quid tanquam possibile, cujus non alia dari ~~ca~~ quando potest ratio, quam voluntas Dei; per hujus naturam intelligi non addebet, cur id potius sit possibile, quam impossibile (§. 56. Ont.), mittenda: adeoque possibilitas pendebit a voluntate Dei (§. 85 I. Ontol.); quod cum sit absurdum (§. 434.), in philosophia tanquam possibile assumi nequit, cujus non alia dari potest ratio, quam voluntas Dei.

Sic uno quasi ictu ex philosophia profligantur omnia monstra & omnes hypotheses precariae, quae scientiarum progressum remorantur: id quod ut clarius appareat, sequentem adhuc addere lubet propositionem.

§. 436.

Qualitates occultae sunt, quarum nulla reddi potest ratio Qualitates *præter voluntatem divinam.* Etenim ideo quid possibile, quia *occultae* ejus idea datur in intellectu divino (§. 192.) consequenter quænam *quænam* tenus in eodem repræsentatur, tum absolute spectatum, tum *sint.* cum aliis in systema redactum (§. 155. Theol. natur. & §. 48. Psychol. empir.). Jam quatenus absolute spectatur, possibilitas intrinseca adstruenda per principium contradictionis (§. 193.) & inde porro explicandum, quænam enti convenient attributa, quinam in eodem modi sint possibles (§. 143.): quatenus vero spectatur ut in systema cum aliis relatum, ex iis, quæ absolute spectato insunt, explicari debet, per quænam causas determinantur modi, & quomodo quoad modificationem res a se invicem dependeant (§. 144.). Patet igitur aliunde, quam per voluntatem Dei intelligi, cur quid sive in-

trinsece, five extrinsece possibile sit (§. III. *Cosmol.*), quæ quid possibile esse supponit (§. 313.). Voluntas igitur divina non est ratio sufficiens actualitatis rerum (§. 56. *Ontol.*). Quamobrem ea, quorum nulla reddi potest ratio, præterquam quod Deus ea voluisse dicatur, ratione sufficiente distituuntur. Enimvero qualitates occultæ sunt, quæ sufficiente ratione distituuntur, cur subjecto insint, vel saltem inesse possint (§. 189. *Cosmol.*). Occultæ igitur sunt qualitates, quarum nulla reddi potest ratio præter voluntatem divinam.

Ita qualitatibus occultis annumerandæ veniunt vires primitivæ scholasticorum, qualis est vis attractiva magnetis, quæ cum per ea, quæ rebus insunt, ex ipsorum mente sint inexplicabiles, præter voluntatem Dei rationem aliam non agnoscunt, hoc est, ideo inesse sumuntur, quod Deus eas inesse voluerit. Talis est vis gravitatis, si sumatur tanquam vis primitiva a Deo in prima rerum creatione impressa atque ideo mechanicè inexplicabilis. Similiter qualitas occulta est transcreatus ex subjecto uno in aliud motus *Cartesianorum*, quippe cujus non alia redditur ratio, quam quod Deus velit motum in uno subjecto desinere seu annihilari & in altero incipere seu ex nihilo oriri. Et alibi (§. 582. *Psychol. rat.*) jam ostendimus, influxum physicum animæ in corpus & corporis in animam tanquam rationem commercii inter mentem atque corpus allegatum esse qualitatem occultam. Immo cum ostenderimus (§. 606. *Psychol. ration.*), systema causarum occasionalium contrariari principio rationis sufficientis, & constet ejus non aliam allegari rationem præter voluntatem Dei (§. 589. *Psychol. empir.*); ipsum quoque in numerum qualitatum occultarum referendum esse patet. Hæc ideo monemus, ut nostram potius ignorantiam agnoscamus, quam ut nobis jam invenisse videamur, quæ tamen a cognitione nostra procul adhuc remota sunt.

§. 437.

Ratio proxima, ultima, remota

Si rationum dantur rationes, cur quid sit potius, quam non sit, ea dicitur *proxima*, quæ in ordine prima est; *ultima* vero

vero, in qua analysis terminatur, seu ultra quam alia non datur. *Inter proximam & ultimam intermediae sunt remotae.* *quoniam dicatur.*

E.gr. Actus generandi patris est ratio proxima, cur filius in utero matris fuerit conceptus; actus generandi avi, qui genuit patrem, est ratio remota conceptionis ejusdem.

§. 438.

Voluntas Dei est ratio ultima actus contingentium in hoc universo. Actus enim contingentium in mundo determinatur per seriem contingentium, quae a se invicem dependent ut effectus a sua causa (§. 83. *Cosmol.*), adeoque ratio hujus actus proxima continetur in sua causa (§. 886. *Ontol.*), consequenter in ente aliquo finito, quod in hac serie rerum sive hoc universo existit (§. 55. *Cosmol.*). Atque ratio ista minime sufficiens est, sed ea demum reperitur in ente alio extra seriem istam constituto eoque necessario (§. 90. *Cosmol.*). Quamobrem cum ens istud sit Deus (§. 67.) & actualitas rerum pendeat a voluntate Dei (§. 433.); haec demum erit illa sufficiens actus contingentium ratio. Quoniam per rationem sufficientem tandem penitus intelligitur, cur contingens aliquod actum fuerit consecutum (§. 56. *Ontol.*); ultra voluntatem Dei actualitatis ratio nulla amplius datur. Est igitur ea actus contingentium in hoc universo ratio ultima (§. 437.).

§. 439.

Si de possibilitate quaestio fuerit, voluntas Dei nunquam allegari potest tanquam ratio, nec si quaestio fuerit de ratione actualitatis proxima vel remota; sed tantummodo, si ea fuerit Dei allegata ultima. Etenim ideo quid possibile est, quia eius idea datur in intellectu divino (§. 192.), quae cum non sit talis, quia Deus eam talem esse voluit (§. 191.); per voluntatem Dei intelligi nequit, cur quid sit possibile, adeoque si de possibilitate *Quando voluntas Dei allegatur tanquam ratio, quoniam non potest.*

quæstio fuerit, voluntas Dei nunquam allegari potest tanquam ratio (§. 56. *Ontol.*). *Quod erat primum.*

Porro voluntas Dei non est nisi ratio ultima actus contingentium in hoc universo (§. 438.), adeoque non proxima, neque remota (§. 437.). Quamobrem si quæstio fuerit de causa actualitatis proxima vel aliqua remota, voluntas Dei tanquam ratio allegari nequit; si vero fuerit quæstio de ultima, allegari poterit. *Quod erat alterum.*

Atque ita satis clare docuimus, quandonam ad voluntatem Dei provocare minime liceat rationes eorum, quæ sunt, reddituris, ne damnum sentiat scientia, & quandonam id integrum sit, ne detrimentum patiatur pietas. Hæc ubi notaveris, nunquam philosophiam cum Scriptura sacra temere committes.

§. 440.

*Quando
S. S. id fa-
ciat.*

In Scriptura sacra voluntas Dei allegatur tanquam ratio ultima actus contingentium in hoc universo. Patet id exemplis. Ita *Psal.* C^{IV}. 12. laudatur Deus, quod gramina pecudibus germinare faciat & herbas ad usum hominum. Deo igitur tribuitur tanquam causæ graminum & herbarum actualitas. Quamobrem cum is faciat, quod vult (§. 413.) & in causa continueatur effectus ratio (§. 886. *Ontol.*); ratio actus contingentium in S. S. allegatur voluntas Dei. Allegatur autem eo in casu, quo bonitas Dei laudibus extollitur, consequenter ubi rationes desumendæ a causis naturalibus non habere poterant locum. Allegatur itaque tanquam ratio ultima, non vero tanquam proxima (§. 437.).

Idem eodem modo patet in exemplis aliis, ut superfluum foret plura in medium adduci. Neque difficulter patet ratio. Cum enim S. S. non doceat rerum naturalium scientiam, sed ab earum notitiis officiorum erga Deum motiva tantummodo desumat; seopo ipsius convenit ad causam rerum pri-

Primam, recurrere, adeoque a voluntate Dei actualitatem eorum etiam, quæ nunc sunt, deducere.

Sane nec a philosophia alienum est ad Deum causam rerum primam provocare, ubi motiva officiorum erga ipsum a rebus naturalibus desumenda, quemadmodum suo loco constabit. Ast si quis in Physica facere velit, quod nonnisi in Ethica permissum, is eandem reprehensionem incurrit, cui obnoxii sunt, quotquot ex notionibus philosophiæ primæ rationes phænomenorum specialium reddere volunt, ob *βαττολογία* dudum atro carbone notati. Quodsi enim quæsieris, cur avis volat, piscis natat? nihil sane dicit, qui respondet quia Deus avem creavit ad volandum, piscem ad natandum, seu, quod perinde est, quia Deus voluit hunc natare, illam volare: explicandum enim, quomodo avis facta fuerit, ut volare possit; quomodo factus piscis, ut natare possit. Non ab hac *βαττολογία* diversa est illorum, qui quæsi, cur gravia descendant, respondent: Deum omnem materiam ita fecisse, ut adversus aliquod centrum nitatur, seu ut particulae materiales se mutuo attrahant. Explicandum enim quomodo Deus effecerit, ut materia centrum aliquod petat. Nimirum remotis causis & rationibus, multo minus ultimæ, locus est, ubi proximas scrutamur.

§. 441.

Deus eorum, quæ in mundo fiunt, nihil in particulari vult Quomodo absolute, hoc est, sine relatione ad totum. Etenim Deus omnia *Deus quid* vult simul, unico voluntatis actu (§. 355.) & mundum hunc ex *velit in* ceteris elegit ob majorem perfectionem, quæ ipsi quam ceteris *particu-* inest (§. 325.). Nihil igitur voluit in particulari, nisi quatenus *lari.* spectatur tanquam in systema cum aliis relatum (§. 155.), seu, quod perinde est, quatenus in hac rerum serie tanquam cum ceteris, quæ eidem insunt, connexum consideratur (§. 142.). patet igitur Deum nihil eorum, quæ in mundo fiunt, in particulari velle absolute, seu quatenus in se spectatur, citra relationem ad totum universum.

Pro-

Propositio hæc probe notanda est , ne circa originem & permissionem mali oriantur difficultates insuperabiles : quæcunque enim moveri solent , non aliunde proveniunt , quam quod res quædam in particulari referantur ad voluntatem divinam. Augentur difficultates , si essentiæ rerum tanquam arbitrarie spectantur. Unde hunc errorem notavimus in superioribus (§. 191.).

§. 442.

Imperscrutabilitas voluntatis divinæ.

Hinc denuo consequitur , quod jam probavimus supra (§. 398.) , *voluntatem Dei nobis esse imperscrutabilem*. Etenim Deus nihil eorum , quæ in mundo fiunt , in particulari vult absolute , hoc est , sine relatione ad totum (§. 441.) , consequenter ratio , cur quid velit , non perspicitur , nisi idem referatur ad totum universum. Fieri adeo nequit ut motiva voluntatis divinæ circa particularia nobis sint penitus perspecta (§. 887. *Psychol. empir.*). Quamobrem eum voluntas alterius nobis sit imperscrutabilis , ubi motiva ejusdem nobis penitus perspecta esse nequeunt (§. 397.) ; voluntas Dei nobis imperscrutabilis esse debet.

§. 443.

Modus cognoscendi perfectionem voluntatem divinam a priori.

Quicquid perfectioni totius universi & summæ rerum perfectioni , quam habere possunt , convenit ; id Deus vult : quod repugnat , non vult. Etenim Deus hunc mundum , omnium possibilium perfectissimum (§. 326.) , elegit ob majorem , quæ ipsi , quam ceteris inest , perfectionem (§. 325.) & quod in suo genere perfectissimum est , id ipsi in eodem maxime placet (§. 330.). Quamobrem fieri non potest , ut velit , quod vel perfectioni totius universi , vel summæ rerum perfectioni repugnet. Quoniam tamen in particulari nil vult absolute , sed tantummodo in relatione ad totum (§. 441.) , quod perfectioni rerum in particulari repugnat salva perfectione totius universi

universi summa, consequenter ei, quam in hac serie rerum habere possunt, ut velit fieri nequit. *Quod erat unum.*

Quoniam vero quodlibet vel est, vel non est (§. 53. *Ontol.*), & Deus, velle nequit, quicquid perfectioni totius universi & summæ rerum perfectioni, quam habere possunt, repugnat *per demonstrata*; illud utique velle debet, quod perfectioni totius universi & summæ rerum perfectioni, quam habere possunt, convenit. *Quod erat alterum.*

Patet adeo, quomodo a priori perveniendum sit ad cognitionem voluntatis divinæ.

§. 444.

*Ex convenientia cum perfectione totius universi & sum- Cur hæc
ma rerum, quam in eodem habere possunt, perfectione volun- via boni-
tas Dei vix unquam a nobis certo, sæpius tamen probabiliter nitas valde
cognosci potest. Nemo enim mortalium perfectionem totius inaccessa.
universi comprehendere ac distincte explicare valet (§. 541.
Cosmol.) & imperfectio in parte admittitur, ut major prodeat
perfectio in toto (§. 548. Cosm.). Ergo utrum quid perfectioni
totius universi conveniat, an repugnet, vix ac ne vix quidem
a nobis certo definiri potest. Ex convenientia igitur cum per-
fectione totius universi vix ac ne vix quidem a nobis certo co-
gnosci potest, quid Deus velit.*

Quodsi tamen nulla nobis appareat ratio, cur quid perfectioni hujus universi convenire minime debeat, quod eidem convenire videtur; id tamdiu eidem convenire sumi potest, donec contrarium probetur, adeoque pro probabili recte habetur (§. 578. *Log.*). Ex convenientia igitur cum perfectione universi probabiliter a nobis cognosci subinde potest, quid Deus velit.

Porro si quid in re in se spectata imperfectionem arguit, ideo in ea non arguit imperfectionem, quatenus ad aliam quan-

(*Wolfii Theol. Naturalis*)

Ddd

dam

dam refertur (§. 542. *Cosmol.*) ; nec rerum perfectionem eodem, quo Deus, modo dijudicare valemus (§. 396.). Quamobrem fieri potest, ut quid nobis videatur repugnare perfectioni rerum, quod, si eodem modo spectentur, quo a Deo perfectionem earum æstimante solent spectari, eidem minime repugnat, & vicissim ut eidem convenire videatur, quod iudicio Dei non convenit. Ex convenientia itaque cum summa rerum, quæ in eas cedit, perfectione iudicaturi de voluntate Dei facile a veritate aberrare valemus (§. 507. *Zog.*). Inde adeo derivatum iudicium pro certo semper haberi nequit.

Quodsi tamen nulla nobis appareat ratio, cur quid perfectioni rerum convenire minime debeat, quod eidem convenire videtur; patet ut ante, hinc voluntatem Dei a nobis probabiliter cognosci posse.

Si ea esset intellectus nostri perfectio, ut de totius universi & rerum singularum perfectione eodem, quo Deus, modo iudicare possemus, non alia iudicari poterat tutior via cognoscendi voluntatem Numinis, quam convenientia cum perfectione mundi & rerum in ea contentarum: sed cum intellectus noster admodum limitatus sit, ut nostra de perfectione mundi & rerum in eo contentarum iudicia non sint eadem, quæ divina, maxima circumspectione opus est, ne hac via incedentes in devia incidamus. Minus tamen fidentium iudiciis negativis, quam affirmativis, propterea quod imperfectionem in re ad aliam relata non arguit, quod, si ea in se spectatur, eidem tribuendum (§. 542. *Cosmol.*); ad totam vero seriem rem quandam referre in potestate nostra positum non est. Etsi autem difficile sit voluntatem Numinis a priori ex convenientia eius, quod vult, cum perfectione mundi & rerum in eodem contentarum cognoscere; non tamen semper pro impossibili habendum: cum enim perfectio universi consistat in eo, quod rationes particulares simultaneorum & successivorum tandem in aliquam generalem resolvantur (§. 540. *Cosmol.*), quin dentur perfectionis mundi principia generalia dubitandum non est. Quodsi ergo contingat aliqua istius-

modi

modi principia nobis innotescere (id quod inter ea, quæ fieri haud quaquam possunt, minime referendum), & quædam hisce adversari demonstrare detur; quin certo cognoscatur hæc ut Deus velit fieri minime posse, dubitandum non est. Absit ut nostro modulo metiamur posteros, qui nostris usi inventis longius progredi poterunt, quam nobis datur. Cognoscendi difficultatem inculcari sapientius utile; at impossibilitatem cognoscendi temere crepare damnosum.

§. 445.

Quod perfectionibus divinis convenit, id Deus vult: quod Alter vero iisdem repugnat, id ut velit, fieri nequit. Etenim Deus *volunt*, quod iudicat optimum in relatione ad seipsum (§ 390.), *tatem Dei* consequenter idem referendo ad omnia sua attributa (§. 395.), *a priori co-* Fieri adeo nequit, ut quid velit, quod attributis seu perfectionibus ipsius repugnat. Quamobrem si demonstrari possit, aliquid attributis divinis repugnare, certum est fieri haud quaquam posse, ut Deus idem velit.

Quoniam tamen vult, quod in relatione ad sua attributa optimum (§. 395.); ex eo, quod quid attributis ipsius conveniat, utrique intelligitur, Deum id velle, seu quod perinde est, Deus vult quod attributis ipsius convenit.

Quid convenire dicatur attributis divinis, satis patere arbitror ex antecedentibus. Etenim in relatione ad Deum nil quicquam dici potest bonum, nisi quatenus summæ Dei perfectionis, hoc est, attributorum divinorum, signum est (§. 394.). Quamobrem id convenire dicendum est attributis divinis, quod est signum eorundem, adeoque si ex eo, quod Deus ponatur hoc velle, sequatur ipsum habere hæc attributa. Unde attributis divinis e contrario repugnat, si ex eo, quod Deum velle ponimus, sequitur, eum ista attributa habere minime posse, quæ eidem tamen convenire constat. Terminus convenientiæ ex ipsa Logica jam satis notus, ubi prædicatum dicitur convenire subiecto, perinde ac terminus

repugnantiae, ubi prædicatum dicitur repugnare suo subjecto. Non adeo opus fuit, ut hic demum definiretur.

§. 446.

*Cur sit
difficilis.*

Ex convenientia cum attributis divinis difficulter a nobis cognoscitur, quid Deus velit, vel ex repugnantia, quid non velit; sæpius tamen probabiliter cognosci potest. Etenim quomodo Deus judicat, quid sit optimum in relatione ad se ipsum, homo judicare nequit (§. 396). Deus vero judicat quid sit optimum in relatione ad se ipsum, quatenus idem refert ad sua attributa (§. 395.), consequenter quatenus idem attributis suis convenire judicat. Homo igitur difficulter judicare valet, num quid attributis conveniat, consequenter etiam difficulter ex convenientia eum attributis divinis cognoscere valet, quid velit Deus.

Eodem modo intelligitur, quod difficulter quoque cognoscamus, quid Deus nolit, ex repugnantia cum attributis ipsius.

Quodsi nobis quid attributis divinis, quatenus ea cognoscimus, convenire videtur, nec ulla apparet ratio, cur repugnare debeat; probabile est idem perfectioni Dei convenire (§. 578. Log.). Atque adeo probabile est, Deum hoc velle (§. 445.). Probabiliter itaque voluntas Dei ex convenientia cum attributis ipsius cognosci potest.

Quamvis convenientia cum perfectione rerum & attributis divinis non multum habere videtur usum in cognoscenda voluntate divina, præsertim ubi certam desideraveris cognitionem; usus tamen ejusdem non contemnendus in iis præcipue casibus elucet, ubi aliunde constat, Deum quid velle, ac ratio sufficiens cur hoc velit, consequenter & objectiva, & subjectiva (§. 339.) reddenda. Quemadmodum enim in physicis ratio admittitur tanquam genuina, ubi constat veritas phaenomeni, & tantummodo indagatur ratio, non vero ex assumpta ratione colligendum quid fieri debeat; ita quoque hic agnoscimus

ratio-

rationem voluntatis divinæ esse genuinam, ubi jam aliunde novimus, quod Deus hoc velit. Et hoc imprimis usui est in voluntate Dei explicanda, quam ex revelatione cognoscimus in Scriptura sacra nobis facta, tum ut eandem clarius cognoscamus, tum ut contra objectiones Antiscripturariorum & scrupulos, qui attente veritates revelatas meditantibus suboriuntur, sufficienter defendamus. Præterea ipsa hæc convenientia usui quoque est in discernendis iis, quæ probabilius Deum voluisse constat. Exemplo res erit manifesta. In vulgus notum est, duo celebrari in Astronomia systemata mundi, alterum Tychonicum seu terræ quiescentis, alterum Copernicanum seu terræ motæ. Quodsi ex natura voluntatis divinæ definire volueris, utrum horum sit probabilius; convenientia cum perfectione rerum & attributis divinis utri esse potest. Etenim cum Copernicanum simplicitate sua præcommendans non minus perfectioni mundi, quam attributis divinis faveat, quoniam naturam via brevissimam agere & ambages vitare constat, & Deum sapientissimum eligere media via brevissima ad scopum ducentia certum est; hinc Copernicanum Tychonico probabilius esse colligitur. Similiter ubi de incolis planetarum quæstio incidit, & ex natura voluntatis divinæ decidendum, utrum probabilius sit planetas habitari, nec ne; vi principiorum præsentium probabilitas affirmativæ haud difficulter adstruitur. Ceterum circa applicationem principiorum præsentium quædam adhuc annotanda sunt. Demonstravimus in superioribus (§. 405.), quod est optimum in se, id etiam esse optimum in relatione ad Deum, consequenter cum Deus judicet, quid sit optimum in se, quatenus statuit de ejus perfectione (§. 370.) in relatione ad totum mundum (§. 393.), quid vero sit optimum in relatione ad seipsum, quatenus idem refert ad omnia sua attributa (§. 395.); quod convenit cum perfectione universi, idem & cum attributis divinis convenire. Quamobrem si quis per principia præsentia definire velit, quid velit Deus, non opus est, ut convenientiam & cum attributis divinis, & cum perfectione universi demonstret, sed sufficit ut alterutram probet, probata enim una, altera simul probata censeri debet.

In probabilibus tamen pondus accedit, ubi argumenta ex utroque fonte petuntur. Quoniam philosophi est rationem, reddere eorum, quæ sunt (§. 46. *Discurs. prælím.*) ; ipsius quoque est rationes inquirere eorum, quæ Deus vult, quando ea ipsum velle constat ; unde hæc principia sese eidem commendant. Et quemadmodum nemo reprehendit, si in probabilibus acquiescat, præsertim ubi ex genuinis principiis derivantur ; ita quoque suffecerit, probabiles rationes voluntatis divinæ perspicere, ubi eas principiis generalibus, seu naturæ voluntatis divinæ congruas deprehendimus. Immo hæc proderunt in moralibus, ubi imperscrutabilitatis voluntatis divinæ memores (§. 442.) , probabilibus rationibus idem obtinemus, quod certissimis obtineri poterat.

§. 447.

Modus cognoscendi voluntatem divinam a posteriori.

Quæcunque in mundo entia ad actum perducere observamus, & quæ vi nexus rerum quomodocunque in eodem consequuntur ; ea voluntati divinæ conformiter fieri in ea, quam ad se invicem habent, relatione certum est. Quoniam actualitas rerum in hoc universo a voluntate Dei pendet (§. 433.) & voluntas quidem divina ratio ultima actus contingentium in hoc universo est (§. 438.) ; quicquid in mundo ad actum perducere observamus, id voluntate Dei existere omnino dicendum, exemplo ipsius Scripturæ voluntatem Dei tanquam rationem ultimam actus contingentium allegantis (§. 440). Enimvero eorum, quæ in mundo fiunt, in particulari Deus nihil vult absolute, hoc est, sine relatione ad totum (§. 441.). Quamobrem cum in mundo omnia sint inter se connexa (§. 48. *Cosmol.*) & vi huius nexus successiva a se invicem dependeant ut effectus a sua causa (§. 83. *Cosmol.*) & quælibet existentia corpora in suis modificationibus ab aliis (§. 84. *Cosmol.*) ; quæ vi huius nexus consequuntur, quatenus vi ejusdem consequuntur, adeoque in ea, quam ad se invicem habent, relatione voluntati divinæ conformiter fieri, dubitandum non est.

Habe-

Habemus hic modum cognoscendi voluntatem Dei a posteriori. E. gr. observamus fieri inundationem, qua multantur damna hominibus & pecoribus. Eam fieri Deo volente constat. Quodsi ponamus, damnum dari hominibus, qui ne moniti quidem a peccatis desistere voluere, esseque in vicina alios, qui non minus sint in male agendo pertinaces; quin Deus velit damnum inferri istis ob pertinaciam, qua in peccando perseverant, & hos illorum exemplo sapere, dubitandum non est. Pertinent huc, quæ de legibus providentiæ divinæ ex historia derivandis alibi (§. 943. Log.) præcepimus. Quodsi dubium moveat malum morale, vel etiam circa ipsam mali physici distributionem difficultates quadam obijciantur, quicquid horum dubiorum & difficultatum est penitus evanescet per ea, quæ de utroque malo, quatenus a voluntate divina pendet, mox disertius exposituri sumus. Præsens enim propositio propositionibus quoque universalibus de eo, quod Deus vult, inveniendis inservit, præsertim ubi vi principiorum anteriorum investigaveris rationes ex natura rerum atque voluntatis divinæ: quatenus enim a posteriori erutæ hisce principiis consentiunt, quin pro veritatibus universalibus amplecti tuto easdem liceat, minime dubitandum. Et hoc pacto Scripturam quoque sacram in iis, quæ voluntati divinæ tribuuntur, adversus Antiscripturarios defendere licet. Ceterum hæc a posteriori voluntatem divinam cognoscendi methodus in iis quoque locum habet, quæ ad æconomiam salutis spectant.

§. 448.

Si Deus quid velit homini revelat, Deum hoc velle certissimum est. Etenim Deus, qui semetipsum cognoscit (§. cognoscendi 141.), voluntatem quoque suam cognoscit, consequenter cum voluntas sit actus, non mera facultas (§. 356.), idemque æternus (§. tem Dei 319.), Deus novit quid ab æterno velit. Quamobrem cum per revelationem quid velit homini revelat, ipsum eo, quo revelat, tempore id velle ecquis dubitet? Enimvero voluntas Dei prorsus immutabilis est (§. 368.), nec eam unquam quod fecit, vel voluit, poenitere

nitere potest (§. 369.). Dubium adeo non est, quin Deus hoc semper velit, quod se velle revelavit. Atque adeo certissimum est, Deum hoc velle, quod se velle hominibus revelavit.

Non licet excipere, fieri posse ut Deus homini persuadeat se velle, quod tamen minime vult, simulando voluntatem, quam non habet: etenim hæc exceptio non ferit hypothesein, quippe hic supponimus Deum voluntatem suam revelare, non vero cum simulare voluntatis revelationem, in dubio relinquentes, vtrum hypothesis vera sit, nec ne. An vero Deus simulare possit revelationem, inferius disquiremus. Num qua detur revelatio, a priori demonstrari haud quaquam potest, sed a posteriori constare debet, inquirendo scilicet, num qua alicubi prodest. Enimvero cum fieri possit, ut pro revelatione divina venditent homines vel impostores, vel imbecillitate iudicii sibimetipsis illudentes; nostrum est inquirere in differentiam revelationis vere divinæ & spurie, quæ cum non sit, pro tali venditatur.

§. 449.

*Possibilitas
absoluta
revelatio-
nis.*

Ut Deus homini revelet, quid velit, impossibile non est.
Deo perspecta est omnis cognitio symbolica (§. 277.). Quamobrem cum in cognitione symbolica verbis enuncientur, vel aliis signis repræsententur, quæ in ideis rerum continentur (§. 289. *Psychol. empir.*); Deo quoque perspectum est, quibus verbis ea, quæ vult, enunciari debeant. Et quia ipsi perspecta est omnis cognitio symbolica, quæ in hominibus datur singulis (§. 278.); notum quoque ipsi est, quibus verbis ea, quæ vult, enunciare, vel quibus signis aliis eadem repræsentare debeat, ut is, cui voluntatem suam revelat, intelligat, quid velit. Præterea Deus quoque facere potest, quæ vult (§. 352.), immo miracula patrare, quotcumque vult (§. 363.), adeoque ea facere, cuius ratio sufficiens in essentia & natura corporum (§. 510 *Cosmol.*) atque animarum non continetur (§. 70. *Psychol. rat.*)

rat.). Quamobrem fieri potest, ut vel producat sonos in aere, quales producuntur vi organorum vocis loquentis, ut Deum loquentem sibi audire videatur, cui voluntatem suam revelet, vel ut motus in organo auditus producat, quales voce loquentis producuntur, vel ut perceptiones in anima producantur, quales inexistunt cum loquentem audimus. Atque adeo patet, non impossibile esse, ut Deus homini revelet, quid velit.

Necessarium duximus possibilitatem absolutam revelationis divinæ adstruere, ne in explicandis criteriis ejusdem inanem operam sumamus. Etenim si absolute repugnaret, Deum homini quidpiam revelare, ut adeo revelatio in eorum numerum referri deberet, quæ impossibilia sunt; nullis quoque opus esset criteriis revelationis divinæ, quippe quæ nulla esset. Enimvero cum constet revelationes divinas non esse quid impossibile; si quæ circumferuntur, attentionem utique merentur, ad eas examinandum & veram a spuris separandum requisitam.

§. 450.

Revelatio a Deo immediate homini fieri nequit absque miraculo. Demonstratio propositionis præsentis actu continetur in demonstratione præcedentis. Etenim aut necesse est, ut Deus immediate in anima producat ideas earum rerum, quæ revelantur, aut vocabulorum, quibus enunciantur; aut ut in aëre producat sonos, quales vocibus istis respondent, quibus revelatio continetur, aut ut istiusmodi motus in organo auditus producat, quales vi istorum sonorum imprimi solent. In casu primo oriuntur ideæ animæ, quarum ratio sufficiens in vi repræsentativa universi, in qua essentia & natura animæ consistit (§. 66. 67. *Psychol. empir.*) non continetur: in casu secundo autem & tertio producuntur motus, quorum ratio sufficiens in natura & essentia corporum non continetur, cum alias actione immediata Dei non esset opus (§. 118. *Ontol.*).
(Wolffii Theol. Naturalis) Eec Quam-

Revelatio divina immediata cur actus miraculosus.

Quamobrem cum miraculum in anima sit, cujus ratio sufficiens in vi repræsentativa universi, qualis in anima est, non continetur (§. 70. *Psychol. rat.*); miraculum vero in mundo materiali, cujus ratio sufficiens in essentia & natura corporum minime habetur (§. 510. *Cosmol.*); evidens omnino est, concipi non posse, quomodo Deus absque miraculo homini quid immediate revelet.

Idem etiam sic ostenditur. Si Deus quid homini immediate revelat, quomodocunque tandem id fiat, indubium omnino est, deficere idearum in anima excitatarum causam naturalem sufficientem sive immediatam, sive mediatam: secus enim ideæ in anima nascerentur naturaliter, nec opus esset immediata revelatione divina. Enimvero omnis effectus, etiamsi alias sit naturalis, miraculum est, si deficiente causa naturali sufficiente existit, non minus in mundo materiali (§. 519. *Cosmol.*), quam in anima humana (§. 74. *Psychol. rat.*). Quamobrem necesse est ideas rerum a Deo homini immediate revelandarum per miraculum excitari debere, consequenter revelatio a Deo immediate homini fieri nequit absque miraculo.

Propositionem hanc probe perpendi velim, propterea quod magni momenti est in revelationibus divinis veri nominis a spuris discernendis, quemadmodum deinceps patebit, & fanaticorum somnia & deliramenta prima statim fronte suspecta reddit, præsertim ubi ad animum revocaverimus, quæ de effectu miraculorum demonstrata sunt (§. 531. *Cosmol.*). Quodsi ad hæc defendenda negare velis revelationem divinam immediatam esse actum miraculosum; non ex notionibus determinatis, sed vagis iisdemque confusis ratiocinaris: admittere tamen debes actum supernaturalem eumque non ordinarium, quem quomodo a miraculo distinguas ipse omnino ignoras.

§. 451.

**Primum
criterium**

*Revelatio divina continere debet homini scitu necessaria,
alio*

alio modo cognitu impossibilia. Etenim revelatio divina absque *revelatio-* miraculo fieri nequit (§. 450.). Quamobrem cum miraculum *nis ab ob-* magnam inducat tam in mundo materiali mutationem (§. 531. *jecto de-* & seq. ac §. 573. & seqq. *Cosmol.*), quam etiam in serie perceptio- *sumum.* num, quæ certis legibus aliz ex aliis nascuntur (§. 219. *Psych.* *rat.*); hinc nemo non intelligit, arduas Deo esse debere rationes, cur quid homini immediate revelet. Quamobrem si qua homini scitu necessaria non sunt, vel si eorum cognitionem alio modo acquirere valet, ut Deus ea immediate ipsi revelet nulla ratio suadet. Pro certo igitur habendum, revelationem divinam continere debere homini scitu necessaria, alio modo cognitu impossibilia.

Idem etiam sic ostendi potest. Inferius independentem ab his evincemus, Deum nihil facere frustra, nec facere superflua. Suppone igitur revelationem divinam, quæ jactatur, talia non contineri, quæ homini scitu necessaria sunt, aut, si talia sint, eadem aliunde cognosci posse, veluti beneficio rationis. In priori casu frustra est revelatio, cum homo eadem tuto carere possit; in altero autem supervacanea, cum absque ea homo ad eorum notitiam pervenire possit, quæ revelata supponuntur. Quoniam adeo utrumque Deum minime decet (§. 332.), Deus autem vult quod ipsum decet (§. 335.); nulla omnino ratio suadet Deum ea revelare, quæ vel homini scitu necessaria non sunt, vel quæ absque revelatione alio modo cognoscere poterat. Affirmandum itaque revelationem divinam continere debere, quæ homini scitu necessaria, alio autem modo cognitu impossibilia sunt.

Probe notandum est nobis hic esse sermonem de tota revelatione, non de singulis eius partibus: etenim fieri potest, ut revelationi quædam insint, quæ vel ratione, vel experientia cognosci poterant, quatenus ea cum ceteris cohærent, quæ eodem modo cognosci minime poterant. Quamobrem & diximus in revelatione divina contineri, quæ homini scitu necessaria aliunde cognosci nequeunt; non vero defendimus,

in ea præterea nihil contineri, quæ aliunde cognosci possunt. Notandum præterea posse quædam in se spectata natura homini esse nota, ut demum ea revelari non sit opus; ast nota non sunt eo respectu, quo in revelatione continentur. E. gr. natura notum est Deum fecisse cælum & terram, esse omniscium ac omnipotentem, ut ea demum revelari non sit opus. Quodsi vero in revelatione divina contineantur promissiones de quarum veritate citra eandem constare minime poterat, & in ea affirmetur, Deum promittentem esse omniscium ac omnipotentem & fecisse cælum & terram; dici sane non potest, Deum hæc sua attributa & opus suum revelare nobis voluisse, cum ea non nisi adducantur tanquam nobis satis explorata, ut fidem habeamus promissioni, de qua sola, revelatione nobis constat, præsertim cum ex circumstantiis appareat ad ea tanquam nota vel aliunde cognoscenda provocari, quod eorundem jam meminisse debeamus, ea vero non demum doceri explicatis notionibus, sine quibus verba intelligi nequeunt (§. 903. Log.). Poteramus equidem hic criteria applicare ad Scripturam sacram, quam Christiani revelationem divinam confitemur; sed cum id paucis fieri non possit, nec præsentis sit instituti veritatem religionis Christianæ tueri, ab ea abstinere malumus, quam ea tradere, quæ vel exceptionibus obnoxia esse poterant, vel a nostro foro aliena sunt. Sufficit tradere principia, quæ defensoribus religionis Christianæ a philosophia expectanda sunt, ne qua in re industriam nostram desiderari patiamur.

§. 452.

Criterion secundum re minimè possunt. Deus enim vult, quod ipsum decet (§. 335), consequenter in attributis ipsius contineri debet ratio, cur id potius velle debeat, quam aliud (§. 332.). Quamobrem fieri nequit, ut velit, quæ attributis ipsius repugnant, hoc est, quæ stantibus istis non velle posse intelligitur (§. 28. Ont), Quodsi ergo divinitus quædam revelata sunt, fieri omnino nequit, ut attributis divinis repugnent.

Pona-

Ponamus e. gr. pro divinitus revelato venditari, quod impotentiam in Deo arguit. Cum Deus sit omnipotens (§. 349.); fieri non potest, ut quid velit, quod eidem adversatur, adeoque pro divinitus revelato agnosci nequit.

§. 453.

Quoniam Deus omniscius est (§. 302.), adeoque omnia *Cur in re-* scit, quæ cognitu possibile sunt sive singularia, sive universal-*velatione* lia, (§. 301.); contradictoriorum affirmatio omniscientiae ejus *divina non* repugnat. Quamobrem *in revelatione divina contradictiones lo* sit locus *contradi-* cum habere minime possunt.

Nemo non novit contradictiones arguere ignorantiam, quæ *etoriis.* in Deum omniscium minime cadit. Cavendum vero ne contradictiones apparentes confundantur cum veris: quo faciunt, quæ de contradictione prolixè satis inculcavimus (§. 29. & seqq. *Ontol.*).

§. 454.

Supra rationem esse dicitur, quod ex principiis rationis *Quid sit* indemonstrabile: *ast contra rationem esse* dicitur, quod principiis *supra, quid* rationis repugnat, seu contradicit. *contra ra-*

Quæ sunt supra rationem non confundenda sunt cum iis, *tionem.* quæ contra eandem sunt: id quod vulgo faciunt, qui religionis mysteria in dubium vocant, vel prorsus rejiciunt. Quid si contra rationem, jam monuimus alibi (§. 485. *Psychol. empir.*): hic vero repetitur, ut clarius intelligatur, quid sit supra eandem.

§. 455.

Quod supra rationem est, in mundo rationali non continetur. Quæ sunt Etenim quod supra rationem est, ex principiis rationis inde-*supra ra-* monstrabile (§. 454), consequenter vi principiorum rationis *tionem cur* non colligitur ex notione subjecti, ipsi convenire prædicatum *in mundo* (§. 549 *Log.*), adeoque per ea intelligi nequit, propositionem *rationali* esse veram (§. 568 564. *Log.*). Quoniam itaque in principiis rati- *non conti-* onis *neantur.*

onis non continetur ratio, cur propositio ista vera sit (§. 56. *Ontol.*); ea quoque cum principiis rationis minime connectitur (§. 10. *Cosmol.*). Quamobrem cum mundus rationalis sit series entium universalium inter se connexorum (§. 258.), atque omnes veritates universales quomodo inter se connectuntur (§. 482. *Psych. empir.* & §. 271. *Theol. nat.*) exhibeat (§. 263.); quod supra rationem est, in mundo rationali non continetur.

Quod supra rationem est, id veluti miraculum in mundo rationali est, ut adeo ea, quæ de miraculis demonstravimus in Cosmologia, mirifice notionem ejus, quod supra rationem est, illustrent. Constat miraculum non posse explicari per ea, quæ insunt causis naturalibus tunc quidem temporis, quando contingit, existentibus (§. 518. *Cosmol.*); eodem modo, quod supra rationem est, non potest sufficienter explicari per ea, quæ notionibus universalibus, generum ac specierum insunt. Patratur adeo quasi miraculum in mundo rationali, quando quid quod supra rationem est, in mundum rationalem invehitur; & quemadmodum patrato miraculo in mundo sensibili seu quod perinde est, in intelligibili in eodem postea consequuntur naturaliter, quæ absque isto miraculo consecuta minime fuissent (§. 531. 532. 574. *Cosmol.*), ita in mundum rationalem illato quod supra rationem est vi notionum entium universalium ad eundem pertinentium consequuntur aliæ veritates universales & cum naturalibus connectuntur, ut sequens mundi rationalis pars alia evadat, quam quæ alias futura fuisset. Merentur hæc, quæ dixi, ut ea profundius rimemur, cum non alio modo notionem ejus, quod supra rationem est, clariorem efficere liceat, ut lucis suæ radiis mentis aciem perstringat. Cui nullum negotium facessunt miracula in mundo sensibili vel intelligibili; eidem nec negotium facessere poterunt, quæ sunt supra rationem in mundo rationali. Et qui hæc probe meditatur, is quoque intimius perspiciet, quid sibi velit ratio illuminata, quippe quod ea, quæ sunt supra rationem, cum iis, quæ eidem conformia sunt, connectit, ac
inde

inde veritates deducit soli rationi impervias, aut, si mavis, eam mundi rationalis partem intuetur, quæ per hoc, quod rationem superat, variatur: tum etiam quid sit rationis ac fidei connubium, quod connubio rationis ac experientiæ, de quo alias diximus (§. 497. *Psychol. empir.*), illustrari potest. Hinc etiam plenius intelliguntur, quæ de usu principiorum rationis in Theologia inculcantur a Theologis. Inprimis jam intelligitur, quid sibi velit ista locutio sphaeram rationis transcendere. Nimirum rationis sphaera est mundus rationalis, intra cujus ambitum ratio continetur. Quamobrem cum ea, quæ sunt supra rationem, in mundo rationali non contineantur, extra hanc sphaeram posita intelliguntur, atque adeo eandem transcendunt.

§. 436.

Quæ sunt supra rationem, ea non sunt impossibilia. Sint *An quæ* enim, si fieri potest, impossibilia, hoc supposito, quod dentur. *sunt supra* Cum impossibile contradictionem involvat (§. 79. *Ontol.*), quæ rationem supra rationem sunt, contradictionem involvent. Quamob- *sint impos-* rem cum vi demonstrationis apogogicæ detegatur, num, quod *sibilia.* sumitur, contradictionem involvat (§. 46 *Ontol.*); vi ejusdem ostendi poterit, ea quæ sunt supra rationem contradictionem involvere. Enimvero vi demonstrationis apogogicæ ex assumpto colligitur, quod vel eidem, adeoque principio contradictionis (§. 28. *Ontol.*), vel propositioni alicui veræ contradicit (§. 553. *Log.*). Quæ igitur sunt supra rationem, ea principiis rationis, in quorum quoque numero contradictionis principium est, contradicere debent. Erunt adeo quæ sunt supra rationem contra eandem (§. 454.). Enimvero quæ sunt supra rationem, non debent esse contra eandem (§. *cit.*): impossibilia igitur esse nequeunt.

An dentur veritates, quæ sunt supra rationem, philosophia in dubio relinquit, etsi explicet, quales esse debeant, si sumantur, ne quæ sunt supra rationem, si quæ dentur, confundantur cum iis, quæ contra eandem sunt. Atque adeo, quæ hic traduntur, principia ad religionem Christianam defer-

fendendam sufficiunt , quæ jure suo pro eo , quod supra rationem est , etiam contra Antiscripturarium tamdiu amplectitur , donec is demonstret quod sint contra rationem , consequenter donec contradictionem , quam involvere debet , evidentissime probet seu demonstret.

§. 457.

*Cur quæ
supra ra-
tionem pos-
sibilia esse
debeant.*

Quoniam quæ sunt supra rationem impossibilia esse nequeunt (§. 456.) , quæ vero impossibilia non sunt , possibilia esse debent (§. 85. *Ontol.*) ; *quæ supra rationem sunt , ea possibilia esse debent.*

Unde si quis talia in medium afferat , quæ impossibilia esse demonstrari potest , eaque pro talibus venditat , quæ sunt supra rationem ; erroris sui hinc redarguitur. Atque adeo lapidem habemus Lydium , quo mysteria genuina a spuriis separantur , neque opus est , ut quis vereatur , ne , si quæ sunt supra rationem admittat , nescio quas aniles fabulas sub mysteriorum titulo sibi obtrudere cogatur. Etenim ubi demonstrare poteris , quod pro mysterio habetur contradictionem involvere , id in illorum numerum , quæ sunt supra rationem , minus recte referri patet. Cavendum vero ne contradictionem apparentem cum vera & probationem qualemcumque cum demonstratione confundas : quem in finem probe tenenda sunt ea , quæ de contradictione in philosophia prima (§. 30. & seqq. *Ontol.*) & de demonstratione in philosophia rationali (§. 551. & seqq. *Log.*) docuimus. Peccant ex utroque capite , qui veritatem religionis Christianæ impugnant : etenim pro contradictoriis habent , quæ non sunt , & probatiunculas quascunque demonstrationum loco habent , indolem veræ demonstrationis ignorantes , ac multo minus demonstrationem veri nominis contexere valentes. Quamvis philosophia non doceat , quæ sunt supra rationem , quemadmodum mox ostendemus , docere tamen debet , quomodo ea , si opus est , defendantur.

§. 458.

solet. Quod supra rationem est uno nomine *Mysterium* dici *Mysterium* quid sit.

Mysteria adeo in mundo rationali idem sunt, quod miracula in mundo sensibili seu intelligibili. Unde non mirum, quod, qui miracula negant, mysteria quoque negare audent.

§. 459.

Mysteria ex principiis rationis demonstrari nequeunt. Sunt *Mysteria* enim supra rationem (§. 458.). Quamobrem cum ex principiis rationis demonstrari non possit, quod supra rationem est *monstrabilis* (§. 454.); *mysteria ex principiis rationis demonstrari nequeunt.*

Absonum igitur est, si quis mysteria non alia de causa rejicit, quam quod ea ex principiis rationis demonstrari nequeant. Unde merito reprehenduntur, qui eadem rationis decempeda metiri volunt.

§. 460.

Mysteria non sunt impossibilia, sed possibilia: quod vero impossibile, mysterium esse nequit. Ex enim mysteria supra rationem sunt (§. 458.). Enimvero quicquid supra rationem est, id *possibilia* ideo non impossibile (§. 456.), sed impossibilium numero continetur (§. 457.). Quamobrem nec mysteria impossibilia sunt, sed potius possibilia.

Porro quod impossibile est, contradictionem involvit (§. 79. *Ontol.*). Quoniam quod contradictionem involvit, principiis rationis repugnat, quemadmodum paulo ante (§. 456.) uberius exposuimus; patet quod impossibile est, illud esse contra rationem, adeoque non tantummodo supra rationem (§. 454.). Quamobrem cum mysterium non sit, quod non est supra rationem (§. *cit.*); quod impossibile est, mysterium esse nequit.

Hinc mysteria spuria detegere & a genuinis separare licet, demonstrata illorum impossibilitate, hoc est, ostensa contradictione, quam involvunt (§. 79. *Ontol.*). Requiritur autem veri nominis demonstratio, qualem in Logica (§. 351. & seqq.) representavimus. Præcipitant adeo iudicium, qui allegando ratiunculas quascunque mysteriis contrarias, eorundem impossibilitatem sibi demonstrasse videntur.

§. 461.

Cur quod supra rationem est, id non est contra eandem.

Quod supra rationem est, id non est contra eandem. Quod est supra rationem, illud ex principiis rationis demonstrari nequit (§. 454.): Enimvero etsi ex principiis rationis demonstrari non possit, non tamen hinc sequitur, quod principiis rationis repugnet, seu iisdem contradicat: alias enim demonstrari posset, quod contradictionem involvat (§. 553. *Log.*), consequenter quod impossibile sit (§. 79. *Ontol.*): quod fieri omnino nequit (§. 456.). Patet igitur quod supra rationem est, id non esse contra eandem.

Confundunt hæc duo, esse supra rationem & esse contra eandem, qui mysteria rejiciunt, propterea quod sibi persuadeant, rationis principiis contrariari, quod ex iisdem demonstrari non posse intelligunt.

§. 462.

Num mysteria contradicant rationi.

Mysteria non contradicunt principiis rationis. Etenim sunt supra rationem (§. 458.), adeoque non contra eandem (§. 461.). Quamobrem eum principiis rationis repugnet sive contradicat, quod contra eandem est (§. 454.), adeoque non contradicat, quod contra eandem non est; mysteria quoque principiis rationis non contradicunt.

Idem etiam sic ostenditur. Mysteria non sunt impossibilia, sed possibilia (§. 460.), adeoque cum possibile contradictionem non involvat (§. 85. *Ontol.*), nec ipsa contradictionem involvunt. Quamobrem cum contradictionem invol-

vat,

vat, quod principiis rationis contradicit (§. 46. *Onsol.*); mysteria principiis rationis contradicere nequeunt.

§. 463.

In revelatione divina mysteriis locus est. Etenim revelatio divina continere debet, quæ alio modo, quam via revelationis cognosci minime possunt (§. 451.), consequenter nec via demonstrationis. Jam vero dogmata, quæ via demonstrationis cognosci nequeunt, ex principiis rationis indemonstrabilia sunt; quod per se patet. Revelatio itaque divina continere debet, quæ ex principiis rationis indemonstrabilia sunt, consequenter cum supra rationem sit, quod ex principiis rationis indemonstrabile (§. 454.), quæ supra rationem sunt. Quamobrem cum mysterium sit quod supra rationem est (§. 458.); revelatio divina mysteria continere debet, adeoque in eadem ipsis locus est.

Probe notandum est, hic nobis esse sermonem de revelatione dogmatum seu veritatum universalium, non tantummodo de revelatione factorum, veluti futurorum prædictione: quæ quod Deo non impossibilis, demonstrabitur paulo inferius. Non minus probe notandum est, quod inter characteres revelationis divinæ contineantur mysteria, ut adeo absolum sit, ob eadem illam in dubium vocare vel prorsus impugnare velle, quemadmodum faciunt Antiscripturarii, religionis Christianæ ac revelatæ omnis hostes. Obiter vero notandum est, nec a veritate abhorreere nullamque vim vocabulo inferri, siquidem futura, quæ prædicuntur, in numerum mysteriorum referri velis, quamdiu non adimpletur prædictio: etenim indemonstrabilis significatus tantisper extendendus, ut non modo ea, quæ in se ex principiis rationis indemonstrabilia sunt, verum etiam quæ a nullo hominum, quantocunque acuminis gradu polleat, demonstrari, aut via demonstrationis erui possunt, sub se comprehendat. Præstat tamen retinere significatum restrictiorem, ut non nisi

in se indemonstrabile pro mysterio habeatur , atque adeo quod rationi in se spectatae impervestigabile.

§. 464.

Criterion *Revelatio divina continere nequit, quæ rationi, vel experi-*
terium *entia contradicunt, seu, quod perinde est, in eadem contineri ne-*
definitum *queunt, quæ contradicunt propositionibus ex principiis rationis de-*
a veritati- *monstratis aut factis, quæ certa experientia fide constant. Quæ*
bus præter- *enim ex principiis rationis demonstrantur, ea certa sunt (§.*
revelatio- *568. Log.), ut de eorum veritate dubitari minime possit (§.*
nem cogno- *564. Log.). Similiter quæ facta esse certa experientia fide con-*
scibilibus. *stat, de eorum veritate dubitari minime posse, ex ipsa experi-*
 entia notione manifestum est (§. 664. Log.). Jam vero Deus
 omniscius est (§. 302.), adeoque omnia tam singularia, quam
 universalia cognoscit (§. 301.), nec fieri potest, ut ullo modo
 in errorem aliquem incidat (§. 294.). Quamobrem fieri ne-
 quit, ut, quæ in revelatione continentur, contradicant iis, quæ
 ex principiis rationis demonstrantur, vel etiam factis, quæ certa
 experientia fide constant.

Cavendum in applicatione theorematism præsentis, ne vel facta, quorum fides a dubia autoritate pender, pro certis, vel ea, quæ sufficienter probata non sunt, pro demonstratis habeantur. Cavendum præterea, ne pro contradictoriis habeamus, quæ non sunt. Ceterum ne videamur denuo inculcare, quæ jam ante docuimus (§. 453.), probe notandum est, superius nos ostendisse, quod ea, quæ in revelatione divina continentur, sibi mutuo contradicere nequeant, consequenter si vel maxime talia sint, quæ rationis sphaeram transcendunt in numero mysteriorum locum habent (§. 463.); hic vero contendimus, rationem & experientiam atque revelationem sibi mutuo contradicere non posse, adeoque ea, quæ in revelatione continentur, opponimus aliunde cognitis. Equis vero non videtur, aliam esse contradictionem, quæ in ipsa revelatio-

latione deprehenditur, aliam, quæ inter ipsam & philosophiam atque historiam, seu scripta alia ab ipsa diversa?

465.

Veritates necessariae sunt, quarum oppositum simpliciter impossibile. Veritates vero contingentes sunt, quarum oppositum in se non impossibile, sed tantummodo sub certa conditione.

Ita simpliciter impossibile est, ut tres in triangulo rectilineo anguli sint duobus rectis majores vel minores (§. 240. *Geom.*), consequenter veritas necessaria est, tres in triangulo angulos simul esse duobus rectis æquales. Et hujus generis sunt, quæcunque de figuris & numeris in Mathesi demonstrantur. Talia quoque sunt, quæ de attributis rerum demonstrantur, utpote absolute necessariis (§. 304. *Ontol.*) & prorsus immutabilibus (§. 313. *Ontol.*), adeoque ab essentia rerum inseparabilibus. Enimvero simpliciter impossibile non est, ut Sol per aliquod temporis spatium eundem erga tellurem retineat situm, etsi posito hoc rerum ordine id fieri minime possit, deficiente nempe causa, quæ mutationem situs continuam impedire possit. Et hujus generis sunt, quæ de factis naturæ demonstrantur in Physica, utpote ad corporum existentiam eorumque modificationes spectantia, quas esse in se contingentes, minime autem absolute necessarias constat (§. 81. *Cosmol.* & §. 314. *Ontol.*). In presente negotio duplex hoc veritatum genus probe discernendum, ne a veritatis tramite aberremus, & ut revelationem divinam tueri valeamus.

§. 466.

Revelatio divina contradicere nequit veritatibus necessariis; potest tamen contradicere apparenter veritatibus contingentibus absolute spectatis. Etenim veritatum necessariarum reus quod oppositum simpliciter impossibile (§. 465.), adeoque contradictionem involvit (§. 79. *Ontol.*), consequenter falsum esse certo constat (§. 526. *Log.*). Quamobrem cum erret, qui cum habere

Fff 3

pro-possit.

propositionem falsam pro vera habet (§. 623. *Log.*), Deus vero ab omni errore prorsus fit immunis (§. 294.); evidens est Deum revelare non posse, quæ veritatibus necessariis contradicunt.

Veritatum contingentium oppositum in se non impossibile, sed tantummodo sub certa conditione (§. 465.). Quamobrem in se spectatum & affirmari potest, & negari; affirmari scilicet sub hac conditione, negari sub alia. Quamobrem fieri potest, ut revelatio divina neget, quod ratio vel experientia affirmat, & contra, ubi veritates contingentes in se spectantur. Quoniam tamen illa spectantur sub alia conditione, hac itidem sub alia; idem affirmari & negari dicendum non est. Quamobrem cum contradictio non consistat nisi in duabus propositionibus, quarum una idem esse negatur, quod altera affirmatur (§. 31. *Ontol.*); contradictio tantummodo apparens est, quæ in veritatibus contingentibus absolute spectatis deprehenditur. Nil igitur obstat, quo minus revelatio divina veritatibus contingentibus apparenter contradicat.

Veritates geometricæ necessariae sunt, in revelatione adeo divina contineri nequeunt, quæ iisdem contradicunt. E. gr. in Geometria demonstratur rationem diametri ad peripheriam circuli non posse esse minorem quam 100 ad 314: in revelatione adeo divina eadem minor assignari nequit. Veritates contingentes sunt, quæ mutationes rerum naturalium concernunt: in revelatione adeo divina contineri possunt, quæ iisdem contrariantur, ita tamen ut re accuratius perpensa contradictio nonnisi apparens sit. E. gr. In Physica docemus, fœminam non posse concipere sine mare, consequenter virginem non posse parere, quæ virum nondum experta est. Sed id quidem ita sese habet, quamdiu naturaliter fieri concipitur conceptio. Enimvero absolute impossibile non est, ut per miraculum, hoc est, virtute Dei virgo concipiat absque mare. Quamobrem ubi hoc factum affirmatur in revelatione divina; quod contrarium est veritati con-

contingenti docetur, sed contradictio tamen nonnisi apparens est. Etenim Physicus negat id fieri posse naturaliter, absque miraculo, revelatio divina id factum esse perhibet supernaturaliter, per miraculum. Probe igitur observandum est discrimen inter veritates necessarias & contingentes, ut constet, in quibus contraria rationi & experientiae inculcare potest revelatio divina, sed absque contradictione vera. Etenim absolute necessaria, utpote in se immutabilia (§. 292. *Ontol.*), ne quidem per omnipotentiam divinam mutari possunt (§. 344.), atque adeo miraculis in iis nullus est locus: alii veritates contingentes, quæ nonnisi hypothetice necessariae sunt, tales nempe vi ordinis naturæ, in se mutabiles non sunt, adeoque per miraculum a Deo contrarium fieri potest, quando Deus vult (§. 363. 364.). Quodsi ergo propositiones determinatæ in disciplinis philosophicis non minus, quam in Theologia revelata formentur; nullam adesse contradictionem veri nominis extemplo apparebit.

§. 467.

Revelatio divina præcipere nequit, quæ legi naturæ & Criterium animæ essentia ac naturæ repugnant. Supponimus, quod a-quartum libi independenter ab hac propositione demonstrabimus, quic-ab agendis quid juri naturæ conforme est, id esse rationi conforme. *desumptum.* Quamobrem quod juri naturæ repugnat, id rationi contradicit. Ostendimus vero paulo ante, fieri haud quaquam posse, ut revelatio divina contradicat rationi (§. 464.). Quamobrem nec præcipere potest, quæ legi naturæ repugnant. *Quod erat unum.*

Porro natura animæ eadem cum essentia ipsius (§. 66 67. *Psychol. rat.*), sit ita, quod in se idem est, alio respectu essentia, alio natura dicatur (§. 68. *Psychol. rat.*). Quamobrem cum essentia rerum sint immutabiles (§. 300. *Ontol.*); non minus essentia, quam natura animæ immutabilis est. Quodsi ergo præcipiatur, quod eidem repugnat; id ipsi impos-

possibile est (§. 79. *Ontol.*). Enimvero Deus impossibilia velle nequit (§. 313.), consequenter nec fieri potest ut ea homini præcipiat, adeoque in revelatione divina præcipi nequeunt, quæ naturæ animæ repugnant. *Quod erat alterum.*

Apparet hinc, quam utile sit jus naturæ ad certitudinem evehi, ne ad idem referatur, quod ab eo alienum, & quam non minus utile sit Psychologiam tam empiricam, quam rationalem excoli, ut quid essentiae ac naturæ animæ conveniat, quid eidem repugnet; judicari possit. Quamvis enim præsens criterium, quod ab agendis desumitur, sit evidentissimum; in applicatione tamen maximopere cavendum, ne juri naturæ vel naturæ animæ perperam quid repugnare judicemus. E. gr. ponamus urgeri tanquam divinitus revelatum, ne homo voluptatem percipiat ex sapore cibi vel potus; id naturæ animæ repugnare evidens est. Etenim in potestate nostra positum non est efficere, ut sapor aliquis nobis sit gratus vel ingratus. Quamobrem impossibile est, ut Deus prohibeat, ne ex sapore cibi ac potus voluptatem percipiat homo: quod multo significantius in vernaculo nobis sermone dicimus, daß er sich Speise und Trank, die einen angenehmen Geschmack hat, nicht wohl schmecken lasse. Enimvero in potestate nostra positum est cibum solius percipiendæ voluptatis gratia non appetere. Quamobrem cum iure naturali cibum ac potest appetendus sit sanitatis ac vitæ conservandæ gratia: eidem repugnat, ut solius voluptatis percipiendæ gratia appetatur. Revelatio adeo divina quin urgeat, ne homo solius voluptatis percipiendæ gratia cibum ac potum appetat & utriusque usu voluptatis cupiditatem expleat, nil sane obstat.

§. 468.

**Criterium
quintum
desumptum
a modo per-
veniendi
ad cogniti-**

Si demonstrari possit, quomodo is, qui sibi divinitus quid revelatum affirmat, naturali facultatum animæ usu ad istius cognitionem pervenire potuerit, quod pro divinitus sibi revelato a modo per- vendit; idem pro divinitus revelato haberi nequit. Etenim si demonstrari possit, quomodo is, qui sibi divinitus revela-

tum

tum aliquid affirmat, naturali facultatum animæ usu ad istius cognitionem pervenire potuerit; certum est, per usum facultatum animæ naturalem intelligi posse, quomodo ad ejus cognitionem pervenire potuerit, quod pro divinitus revelato venditatur (§. 568 Log.), consequenter in facultatibus animæ contineri rationem sufficientem istius cognitionis (§. 56. Ontol.). Quamobrem cum posita ratione sufficiente, cur quid potius sit, quam non sit, ponatur etiam id, quod per eam potius est quam non est (§. 118. Ontol.); quin solo facultatum animæ naturali usu ad cognitionem ejus pervenerit, quod pro divinitus sibi revelato venditatur, dubitandum non est. Quoniam itaque absolum est, idem eodem tempore ab eodem homine simul naturaliter & per revelationem divinam cognosci; quod in præsentē casu pro divinitus revelato venditatur, pro tali haberi nequit.

Non adeo multi elapsi sunt anni, ex quo in Ecclesia Protestantium surrexere passim homines, qui se divinitus inspirari & in conventibus spiritu divino afflatos præsentibus voluntatem Dei revelare profitebantur. Enimvero quicquid homines isti in medium proferebant, non erant nisi talia, quæ ex lectionibus codicis sacri, præsertim Prophetarum, & subinde librorum mysticorum perspecta erant, eo ordine prolata, quem imaginatio, sequendo legem suam (§. 117. Psychol. empir.), ipsis suggererat. Legi non modo, quæ de effatis inspiratorum (hoc enim nomine appellabantur illi, quibus Deus immediate voluntatem suam revelare dicebatur) in Batavia sub titulo: *Discernement des tenebres avec la lumiere* prodire, sed ipsemet quoque eorum conventibus interfui, ut quid subesset testis oculatus experirer: nihil vero deprehendi, quod vi criterii præsentis pro divinitus revelato haberi potuisset. Unicum referre lubet exemplum. Cum filia famuli in Pædagogio Glauchensi juxta Halam Magdeburgicam, quæ vulgo Saxonum dicitur, in numero inspiratorum esset; effata ejus auditurus in conventum accessi,

(Wolffii Theol. Naturalis) Ggg mul-

multis præsentibus, quos sola curiositas invitaverat. Canuntur hymni ex libro Hymnorum sacrorum Glauchensi, quem edidit *Freylinghausenius*. Inter cantandum pseudoprophetissa primum languore, deinde sopore quodam corripitur, ut instar trunci immota appareret. Cantione indefinenter continuata horrendis adspectu agitationibus totum concutitur corpus, ut artus fracturæ proximi viderentur. Velamina capitis aufugiunt & capilli disperguntur, oculis clausis. Cum qui cantabant nescio unde colligerent, inspiratam verba prolaturam; subito a cantando desistunt. Et ecce tibi pseudoprophetissam inter agitationes continuas, sudore totam faciem irrigante, voce rauca & inhumana syllabas quasdam protrudentem, quas Medicinæ quidam Doctor calamo excipit & præsentibus in verba coactas prælegit. Nihil autem omni effato continebatur, quam præceptum de legendo textu quodam prophetico, quo nihil singulare continebatur. Textu igitur prælecto, cum jam cessarent agitationes & pseudoprophetissa ad animum rediret, cantionem iterant, sed irritò prorsus successu: cujus hanc reddebant rationem asseclæ, quod adessent plurimi, qui Spiritum impedirent. Atque sic tandem conventus finiebatur. Ecquis, quæso, sibi persuaserit, immediata revelatione divina opus esse, ut hominibus commendetur lectio textus cujusdam ex sacro codice, qui nihil tamen habet singulare, cur illo inprimis tempore ipse potius legi debeat, quam alius quicumque? Et quis non perspicit, sceminam lectionem ejus commendasse, quod casu fortuito is potius memoriam ejus subierit, quam alius, alterius dubio procul lectionem præceptura suis, siquidem in mentem venisset alius? Ceterum hic denuo patet, quam utile sit Psychologiam excoli, ut, quid facultatum animæ naturali usu cognosci possit, demonstrare valeamus, ne vel temeritati, vel imposturæ aliorum obnoxiam habeamus fidem.

§. 469.

Revelatio divina per somnium *Quod per somnium naturale alicui innotescit, id pro di-*
vinis revelato haberi nequit. Quod vero per somnium su-
pernaturale innotescit, id divinitus revelatur. Etenim somni-
facta quo-

um

um naturale initium capit per legem sensationis & continua- modo di-
 tur per legem imaginationis (§. 327. *Psychol. rat.*), consequen- gnoscatur.
 ter naturali facultatum animæ usu totum absolvitur; sunt enim
 sensus & imaginatio facultates animæ (§. 67. 92. *Psych. empir.*)
 & quæ per earum leges explicari possunt, ea naturaliter in ea-
 dem accidunt (§. 69. 76. *Psychol. rat.*). Quamobrem si cui quid
 innotuit per somnium naturale, is naturali facultatum animæ
 usu ad istius cognitionem pervenit. Quoniam itaque pro di-
 vinitus revelato haberi nequit, quod pro tali venditatur, si de-
 monstrari possit, quomodo is, qui sibi divinitus quid revela-
 tum affirmat, naturali facultatum animæ usu ad istius cogniti-
 onem pervenerit (§. 468.); quod per somnium naturale alicui
 innotescit, id pro divinitus revelato haberi nequit.

Quod si per somnium beneficio operationum mentis in
 cognitionem rei alicujus penetraveris, quemadmodum meditan-
 do vigilantes in eam incidimus, cum anima etiam in somnio ope-
 rationes intellectus edere possit (§. 419. *Psychol. rat.*); nec hoc in
 casu quicquam accidit, quod a naturali facultatum animæ usu
 abhorreat. Quamobrem patet ante pro divinitus revelato
 haberi non posse, quod ratiocinando per somnium eruimus.

Quoniam itaque per somnium naturale nobis innotescere
 nil quicquam potest, nisi opera imaginationis & intellectus,
 cum sensu cessante alia in nobis non dentur facultates cogno-
 scendi, quemadmodum ex Psychologia abunde constat & in vul-
 gus etiam notum est; patet in omni casu pro divinitus revela-
 to haberi minime posse, quod per somnium naturale innotescit.

Somnium supernaturale vel initium non capit a sensatio-
 ne, etsi per legem imaginationis continuetur (§. 328. *Psychol.*
rat.), vel per legem imaginationis continuatur, si vel maxime

a sensatione quadam incipiat (§. 329. *Psychol. rat.*). Quicquid horum accidat, five etiam utrumque fiat; somnium naturali facultatum animæ usu totum non absolvitur, vel totum citra naturalem earundem usum perficitur. Quamobrem cum istiusmodi somnium miraculum sit (§. 70. 71. *Psychol. rat.*); per miraculum innotescit, quod per somnium supernaturale doceri sumitur. Enimvero constat absque miraculo divinitus quid revelari minime posse (§. 450.) & solum Deum miracula posse patrare (§. 470.). Quod itaque per somnium supernaturale innotescit, pro divinitus revelato recte habetur.

Nostrum non est definire, num somnia supernaturalia unquam fuerint facta & num Deus aliquando per somnium istiusmodi alicui quid revelaverit. Hæc enim facti sunt, neque adeo ad forum philosophi spectant. Sufficit tradere principia, quibus opus est ad facta dijudicanda, si nobis innotescunt.

§. 470.

Cur Deus *Deus solus miracula patrare potest.* Etenim si miraculum *solus mira-* aliquod produci debet, ab ente quodam a mundo diverso pro-
cula patra- ducendum (§. 524. *Cosmol.*) & similiter si actus supernaturalis
re possit. seu miraculum (§. 71. *Psychol. ration.*) in anima produci de-
bet, id ab ente quodam ab anima & a mundo materiali di-
verso fieri debet (§. 75. *Psychol. ration.*). Quamobrem si
quod ens præter Deum miracula patrare debet, necesse est, ut
præter eum adhuc sit ens quoddam aliud ab animabus & mun-
do diversum, cui potentia miraculosa convenit. Miraculum
equidem tale, quale contingit, in eo corpore, in quo contin-
git, possibile est (§. 517. *Cosmol.*) & similiter miraculum seu
mutatio supernaturalis, qualis contingit, in ea anima, in qua
contingit, possibile est (§. 72. *Psych. rat.*), deficiunt tamen u-
trobique causæ naturales actum ejus, quod possibile est, de-
terminantes (§. 518. *Cosmol.* & §. 73. *Psychol. rat.*). Quamob-
rem

rem nihil relinquitur, quam ut ens istud a mundo diversum possit ad actum perducere, quicquid in se non impossibile, quemadmodum etiam superius ex eo probavimus, Deum miracula patrare posse (§. 363.), consequenter necesse est, ut ipsi omnipotentia competat (§. 347.). Enimvero si demonstrationem, qua Deo omnipotentiam vindicavimus (§. 349.), eo modo resolvas, quem in Logica præscripsimus & exemplo illustravimus (§. 992 Log.), evidenter admodum patebit rationem sufficientem omnipotentia Deo attribui in ejus definitione, consequenter in essentia ipsius contineri (§. 180. & seqq. Log.). Quamobrem cum attributum entis sit, cujus sufficiens ratio in essentia ejusdem continetur (§. 157. Ontol.); omnipotentia est attributum Dei, consequenter quia attributa entis unius non possunt communicari enti alteri (§. 45. Psych. rat.), soli Deo convenit. Non datur igitur ens aliud a mundo diversum præter Deum, quod miracula patrare possit, atque adeo Deus solus est, qui ea patrare valet.

Quod siingas potentiam limitatam patrandi miracula, quæ tantummodo ad aliqua sese extendit, & hac fictione elidere velis omnipotentiam ad miracula patrandum requisitam; tuum est probare limitatam istiusmodi potentiam miracula patrandi esse possibilem. Nos in superioribus abunde satis evicimus dari Deum & eum miracula facere posse, quoties vult, indeque intulimus, quod ipsi competat omnipotentia. Qui igitur affirmat dari etiam potentiam limitatam quibusdam miraculis patrandis sufficientem; is & limites istos distincte explicare & existentiam entis, cui ea convenit, demonstrare tenetur. Quæ enim precario assumuntur, eodem jure rejiciuntur, quo assumuntur.

§. 471.

Potentia patrandi miracula nulli enti a Deo communicari potest, ut scilicet id propria sibi virtute, etsi aliunde accepta, culosa a

Deo enti alicui communicari possit. *pta, miracula edat.* Etenim cum Deus solus miracula patrare possit (§. 470.); haud difficulter patet, rationem potentiae miraculosae in essentia ipsius contineri, consequenter esse attributum ipsius (§. 157. *Ontol.*). Sunt vero attributa incommunicabilia (§. 45. *Psychol. rat.*). Quamobrem nec fieri potest, ut potentia miraculosa a Deo enti cuidam alteri, cui per naturam suam convenire nequit, communicetur.

Non repugnant hæc iis, quæ de miraculis a Mose, Josua & Apostolis patratis dicta sunt superius (§. 418.). Etenim ea edidere non propria virtute, sed divina, ut adeo Deo autori eadem tribuerimus: quod quomodo intelligendum sit nostrum est docere.

§. 472.

Collatio domini miraculosi in quo consistat. *Deus facultatem patrandi miracula non aliter homini vel enti cuidam alteri conferre potest, quam si velit ad eorum nutum ipsum miracula patrare.* Etenim Deus miraculum patrare potest, quotiescunque vult (§. 363.). Quamobrem si velit aliqua edere ad aliorum nutum, quin id fieri possit, dubitandum non est. Quando igitur is miraculum fieri vult, cujus nutum tanquam conditionem spectare visum est Deo, sub qua miracula facere velit; omnipotentia divina actus miraculosus determinatur: unde spectantibus ab eo, qui idem fieri vult, fieri videtur, eidemque adeo tanquam causæ efficienti tribuitur (§. 886. *Ontol.*). Et quia Deus, cujus immutabilis est voluntas (§. 368.), miraculum ad istius nutum facit, perinde est, ac si hic potentiam miraculosam propriam haberet, consequenter hoc modo Deus facultatem patrandi miracula homini vel enti cuidam alteri conferre potest. Enimvero quoniam Deus solus miracula facere potest (§. 470.) & potentia miraculosa alteri cuidam enti ab ipso communicari nequit (§. 471.); facultas miracula patrandi modo alio conferri haud quaquam potest,

potest, quam ut Deus ad nutum entis alicuius ipsemet eadem edere velit.

Explicamus hic modum patrandi miracula, qui in creatura aliqua intelligitur, eodem modo, quo *Cartesius* commercium inter animam & corpus explicavit, motusque communicationem in corporibus (§. 589. *Psychol. rat.*). Quamobrem quæ de systemate causarum occasionalium integro capite demonstrata sunt, ea facultatem patrandi miracula, quæ creaturæ alicui competit, egregie illustrant. Etsi autem systema istud minime probaverimus, sed idem principio rationis sufficientis adversum (§. 606. *Psych. rat.*), ordini naturæ contrarium (§. 607. *Psych. rat.*) & minus probabile ostenderimus (§. 608. *Psych. rat.*); id tamen de eodem in genere intelligendum non est, sed tantummodo quatenus ad explicandum communicationem motuum & commercium animæ ac corporis transfertur. Etenim ibi quæstio est de eo, quod per essentias & naturas corporum & animarum explicari debet, tanquam effectus naturalis; hic vero quæritur, quomodo ad nutum hominis vel entis cujusdam alterius consequi possit, quod a Deo solo, ab ipso minime fieri potest. Atque in hoc posteriori casu dici nequit, quod systema causarum occasionalium generaliter acceptum principio rationis sufficientis adversetur: etenim cum per ipsum plenissime intelligatur, quomodo ens quoddam a Deo diversum facultatem patrandi miracula habere possit, rationem ejus sufficientem continet (§. 56. *Ontol.*), atque adeo principio rationis sufficientis adversum non est (§. 70. *Ontol.*). Quod vero idem ordini naturæ contrarium sit, hic quidem nihil vitii habet, propterea quod constet, miracula contra naturæ ordinem esse, quæ vero naturaliter sunt secundum naturæ ordinem fieri (§. 566. *Cosm.*). Quamobrem cum systema causarum occasionalium, quando ad explicandum commercium inter mentem ac corpus transfertur, probabilitatem suam amittit, quia ordini naturæ adversum (§. 608. *Psychol. rat.*); id minime obstat, quo minus in præsentem casum plenaria certitudine gaudeat, ubi de eo agitur, quod contra naturæ ordinem sit. Systema adeo causa-

rum

rum occasionalium egregium, jam habet in philosophia usum, quatenus inservit religioni Christianæ adversus Antiscripturarios defendendæ; in theologia autem revelata ex iis, quæ tradit Scriptura sacra, uberius explicandum convenienter iis, quæ de eodem docuimus in Psychologia.

§. 473.

Qualis causa sintens fert, id non nisi eorundem causa occasio- nalis est. Etenim si Deus enti cuidam facultatem patrândi miracula confert, ad ejus nutum ipsemet miracula patrat (§. 472.), adeoque ens istud destituitur vi omni activa eadem faciendi Deoque tantummodo occasionem ea patrândi præbet. Quamobrem cum causa occasionalis sit, quæ vi agendi propria destituitur, Deo tamen agendi occasionem præbet (§. 590 Psychol. ration.); patet ens istud, in quod Deus facultatem patrândi miracula confert, non esse nisi eorundem causam occasionalem.

Consentit hoc cum eo, quod dicunt Theologi, viros divinos non patrâsse miracula virtute propria, sed virtute divina, potentiam miraculosam soli Deo tribuentes, quemadmodum & nos eandem ipsi soli vindicavimus (§. 470.).

§. 474.

Collatio facultatis patrândi miracula qualis S. S. conveniat. Juxta S. S. facultas patrândi miracula viris divinis non aliter collata, quam quod Deus ad eorum nutum miracula patravit. Etenim cum Josua Solem stare jussisset & ejus jussu steterisset; id factum esse dicitur Deo voce homines obedi- ente, Jos. X. 14. Obedit alteri, qui voluntatem suam alterius volun- tati subjicit, facturus ea quæ alter fieri vult. Deus igitur teste Scriptura sacra fecit solem stare ad nutum Josuæ, consequen- ter facultas patrândi miracula non aliter compete- bat Josuæ, quam quatenus Deus ad ejus nutum miraculum facere vole- bat, ipse vero jussu suo solem in eo, quem habebat, situ reti- nere

nero

nere minime poterat. Similiter cum Christus in caelum ascensurus facultatem patrando miracula conferret in Apostolos, ut daemones ejicere, linguis, quas minime didicerant, loqui, serpentes citra periculum ullum tollere, venenum absque nocumento bibere, manuum impositione aegrotos sanare valerent, *Marc. XVI. 17. & seqq.* quinam fuerit eventus, commemoraturus historicus sacer subjicit *vers. 20* Deum sermonem Apostolorum Evangelium jussu Magistri sui ubi vis terrarum praedicantium confirmasse signis seu, quod perinde est, miraculis sequentibus. Deo igitur tribuuntur auctori miracula, quae ab Apostolis fiebant, ita ut juxta S. S. dicendum sit, Deum ejecisse daemones & sanasse aegrotos, quoties id ab Apostolis factum legitur. Quod si ergo Deus fecit, quod de Apostolis refertur, id aliter intelligi nequit, quam quod stylo S. S. quemadmodum paulo ante commemoravimus, obediverit voci Apostolorum faciens ea omnipotentia sua, quae ipsi fieri volebant. Atque adeo patet, Scriptura sacra magistra facultatem patrando miracula non aliter fuisse concessam, quam quatenus Deus ad eorum nutum eadem fecit, voluntatem suam quasi subjiciens illorum voluntati. Cum adeo Apostoli non propria virtute eadem patrarent, sed tantummodo nutu suo Deo eadem patrando occasionem dederint; juxta S. S. non fuere nisi causae miraculorum occasionales (§. 590. *Psychol. rat.*).

Quoniam miracula ad nutum eorum secuta, ad quorum nutum Deus eadem fecit; actus vero volitionis sive verbis, sive alio actu externo, veluti imponendo manum aegrotis, significatus fuit; ideo adstantibus ipsimet miracula patrasse visi sunt, ut ea de causa potentiam miraculosam ab Apostolis vendi posse existimaverit Simon Magus *Act. VIII. 18. & seqq.* Patet tamen ex modo collationis, quem adstruximus (§. 472.) & in propositione praesente S. S. conformem probavimus, neminem pro suo arbitratu facultatem patrando miracula divinitus sibi concessam in alium transferre potuisse.

§. 475.

Ecstasis
quid dica-
tur.

Ecstasis dicitur is hominis status, in quo sensus ac motus voluntarii prorsus cessant, solis vitalibus superstitionibus, & homo insolita sibi audire ac videre sæpe videtur.

Ita certe *Sennertus* Medicinæ practicæ lib. I. part. 1. cap. 3 Operum Tom. III. f. 153. a. Ufus, inquit, vulgo obtinuit, ut ii, qui omnibus animæ sentientis, moventis ac intelligentis functionibus priuati & quasi mortui jacent, & sæpe, postquam evigilant, mira, quæ audiverint & viderint, narrant, ecstatici nominentur. Latinis hic corporis status dici solet *Excessus*. Convenit cum ecstasi affectus, quem Medici *Catalepsi*, vel Latino vocabulo *Congelationem* vocant. Qui enim eodem corripuntur, quemadmodum notat *Sennertus* loc. cit. rigidi in eo statu, in quo prehensi fuerunt, apertis ac immotis oculis, statuæ alicujus instar manent, & nec sentiunt, nec vident, nec audiunt, respiratione saltem & pulsu salvo manente. Refert istiusmodi exemplum ex *Henrici ab Heer* observatione idem *Sennertus*. Scilicet Frater Christianus Insulensis, Capucinus, Leodii catalepticus factus, uno genu terræ innitebatur, alterum ceu flexurus incurvabat. Brachium sinistrum pendebat ad genu, dexterum in aërem elevatum habebat, diductis digitis, ut viam prætereuntibus sicut olim statuæ Mercurii ostentare videretur: utrumque omni marmore rigidius erat. Patebant oculi, sed ita retorti, ut, licet sudario perstringerentur, non conniverent. Os hiabat cum respiratione satis libera. Pulsus in utroque brachio & temporibus sat magni. Postquam post 20. horas ad se rediit, surrexit, & ambulavit, omnium præteritorum ignarissimus. Hic monachus sæpe paroxysmis catalepticis, etiam in secundum & tertium diem durantibus correptus. Alia exempla refert *Forssus* Observationum Lib. X. observ. 42. f. 367. & seqq. quorum unum adhuc adjicere lubet. Catalepticus, cum eum inviseret *Fernelius*, mortui ritu jacens neque cernebat, neque audiebat, neque compunctus sentiebat quicquam: facilis tamen iacerat spiratio &, quicquid in os inferebatur, promte voraba-

bat. Electulo sublatuſ ſolus conſiſtebat impuſſuſque incedebat, & quocunq; vel manuſ, vel brachium vel cruſ inſeſtaretur, illic quaſi fixum vel ſtabile permanebat.

§. 476.

Viſio dicitur repræſentatio vivida rerum, qualis a ſenſu fieri ſolet, vi imaginationis facta ſive in ecſtaſi, ſive vigilantibus. Vocatur etiam *Viſus*, item *Viſum*. *Viſio quid ſit.*

Exempla viſionum in ecſtaſi referuntur in ſacris, veluti de Petro *Actor. XI. 5.* quæ ſane ratio eſt, cur ecſtaſeos & viſionum hic mentionem injiciamus, quod inter modos revelationum etiam commemorentur viſiones. In ecſtaſi ceſſant ſenſus, atq; adeo patet non poſſe aliter res in anima repræſentari quam vi imaginationis. Quando vero etiam vigilantibus repræſentantur quæ præſentia non ſunt, ut ea veluti præſentia intueantur, non minus patet, repræſentationem aliter fieri minime poſſe, quam vi imaginationis (§. 92. *Pſychol. empir.*). Notandum vero hoc ipſo viſionem differre ab aliis repræſentationibus vi imaginationis communiter fieri ſolitis, quod tanta claritate animum percellant, ut objecta, quæ repræſentantur, coram intueri ſibi videatur iſ, cui viſum obtingit. Unde & nomen non modo Latinorum, verum etiam vernaculum ein Geſichte fluxit.

§. 477.

Quoniam idea materialis phantaſmati reſpondens eandem celeritatem habet, quam haberet, ubi ab objecto ſenſibili in organum ſenſorium agente produceretur, ſi quis ſibi ſenſu percipere videtur, quæ tantummodo imaginatur (§. 210. *Pſychol. rat.*); in viſionibus vero repræſentationes rerum in imaginatione factæ ſint vividæ, ut nobis videre videamur, quæ tantummodo imaginamur (§. 476.); evidens eſt, quod in viſionibus idæ materiales, quæ phantaſmatis reſpondent, eandem celeritatem habeant, quam haberent, ubi ab objecto ſenſibili in organum ſenſorium agente producerentur. *Idearum materialium conditio in cerebro.*

Notandus est status cerebri in visionibus, ut rectius intelligatur, quid ad visiones supernaturales requiratur & unde naturales dependeant.

§. 478.

Status cerebri in visionibus.

Quoniam communiter ideæ materiales in motu minus celeri consistunt, si phantasmati quam si ideæ sensuali respondent (§. 208. *Psychol. rat.*), in visionibus autem contrarium accidit (§. 477.); in visionibus status cerebri, in quo sunt ideæ materiales (§. 206. *Psychol. rat.*), talis esse nequit, qualis communiter obtinet.

Hinc apparet, cur in ecstasi communiter visiones contingant: tum enim ex statu præternaturali totius systematis nervosi, quem quoad nervos sensorios sentiendi, quoad motores movendi impotentia loquitur (§. 475.), statum præternaturalem cerebri, unde nervi omnes propagantur, facile colligere licet. Hoc principio habemus opus, ut intelligatur visionem vim corporis non statim excedere, si vi imaginationis represententur talia, qualia tibi visa nunquam recordaris, sit ita quod communiter imaginatio non nisi ante percepta reproducat (§. 95. *Psychol. empir.*) & dividat atque componat (§. 140. 143. *Psych. empir.*).

§. 479.

Cur visiones in ecstasi vel quasi contingant.

Quoniam denique actus imaginationis clariores sunt, si sint soli, quam si sensationibus coëxistant (§. 101. *Psych. empir.*), in ecstasi vero sensationibus nullus prorsus sit locus (§. 475.); ideo patet ratio cur in ecstasi visiones communiter contingant & cur, si vigilantibus accidere debent, animus a sensationibus sit abducendus, consequenter quæ vigilantibus obtingunt, quasi in ecstasi fiant.

Nimirum in ecstasi a causis præternaturalibus, quas vocant Medici, animus a sensu abducitur, ut adeo veluti ex corpore abreptus videatur, commercio cum eodem omni ad sensum sublato: at quando vigilantibus obtingit visio, visio-

narius

narius animum sua sponte a sensu abducere debet, quem habitum obstetricante natura usu sibi comparare debet, sicuti in aliis accidit, atque adeo quasi in ecstasi est, cum fieri non possit, ut ab omni sensatione abducatur animum, neque ut motu voluntario sese privet. Nostrum jam non est theoriam de visionibus proseguere ulterius, quam tantummodo delibamus, quantum instituto presenti sufficit, ne visiones pro divinis amplectamur, quæ naturales sunt, & ut divinas non esse impossibiles appareat.

§. 480.

Visio naturalis est, quæ per naturam imaginationis explicari potest. *Visio supernaturalis* est, quæ per naturam imaginationis explicari nequit.

Visiones pendent ab imaginatione, in cuius nempe ideis consistunt (§. 476.). Unde differentia naturalium & supernaturalium patet per differentiam generalem naturalis & supernaturalis (§. 510. Cosmol.).

§. 481.

Visio est species somnii, sed in qua representationes sunt multo clariores, quam in somniis ordinariis esse solent. Etenim in visionibus res vi imaginationis admodum clare representantur (§. 476.) & si in ecstasi fiunt, nullius rei presentis visio narius sibi conscius est (§. 475.). Quamobrem cum in somnio itidem non nisi res absentes clare percipiamus seu earum nobis conscius sumus (§. 121. Psychol. empir.); visio in ecstasi pro somnio quodam recte habetur.

Quod si visio vigilantibus obtingit, vi imaginationis res absens adeo clare representatur, ut cum presentibus, quarum nobis conscius sumus, simul sensu percipi videatur (§. 476.), atque adeo perinde est ac si ceteræ quoque, quæ presentes sunt, eadem vi imaginationis representarentur, nobisque non nisi rerum absentium conscius essemus. Patet igitur, ut ante

in hoc quoque casu visionem pro somnio quodam haberi posse.

Enimvero in visione quæ repræsentantur, tanta claritate fulgent, ut pro sensu perceptis reputentur, atque adeo in casu altero, quo inter ea, quæ sensu percipiuntur, apparent, quoad claritatem ab iisdem minime distinguantur, & hinc cum ceteris una præsentia existimentur (§. 476.). Atque communiter phantasmata, hoc est ideæ (§. 93. *Psych. empir.*) seu repræsentationes vi imaginationis factæ (§. 48. *Psychol. empir.*) ideis sensualibus minus claræ sunt (§. 96. *Psychol. empir.*). Quamobrem cum in somnio ordinario phantasmata nihil fingulare habeant (§. 122. *Psychol. empir.*); in visionibus utique repræsentationes multo clariores sunt, quam in somniis ordinariis esse solent.

Dum visionem somnium quoddam esse probamus, dicto de omni ad definitiones extenso, quo ei scilicet definitum competat, cui conveniunt notæ omnes in definitione enumeratæ simul, tota nititur vis argumentandi (§. 349. *Log.*). Quamobrem dubitari nequit, quin visiones pro somnii quadam specie haberi possint. Et in casu altero, quo res absens tanquam præsens una cum præsentibus percipitur; status mentis somnium quoddam mixtum est, quod non minus pro aliqua specie haberi potest. Etenim quando alias vi imaginationis absentia una cum sensu perceptis repræsentantur, illa ab his distinguimus. Dari autem visiones, quæ vigilantibus obtingunt, luculento exemplo docere possem, nisi rationes quædam prohiberent, quo minus ad idem provocarem. Nec desunt in sacris istiusmodi exempla, utut visionum supernaturalium. Vide Exod. III. 1. & seqq. collat. cum Actor. VII. 30. Ceterum propositionem præsentem non alio fine in medium afferimus, quam ut citra ambages inde deducere liceat, quæ sequuntur.

§. 482.

Quoniam somnium supernaturale miraculum (§. 331. *Psych.*)

Visio superna-

Psychol. rat.), visio vero somnii quædam species est (§. 481.); *turalis visio etiam supernaturalis quin miraculum sit, dubitari nequit. qualis.*

Quodsi propositionem præsentem instar corollarii ex præcedente inferre nolis, eodem modo eandem probare poteris, quo somnium supernaturale miraculum esse evicimus, præmissis præmittendis, adeoque non sine ambagibus, quas vitare consultum visum.

§. 483.

Similiter si naturale somnium est, initium capere debet per *Visio quæ-* sensationis legem & per legem imaginationis continuari (§. 327. *nam natu-* *Psychol. rat.*). Quamobrem cum visio naturalis somnii quædam *ralis.* sit species (§. 481.); *visio quoque naturalis initium capere debet per legem sensationis & continuari per legem imaginationis.*

Non est quod excipias in ecstasi cessare sensus omnes, adeoque visionem in ea non posse initium capere a sensatione. Etenim fieri potest, ut ecstaticus in ecstasi & visionem incidat simul, adeoque visio ab ultima sensatione clara, ad quam animum advertit, derivetur: neque repugnat, ut perinde ac in somno, subito sensatio quædam subobscura vel tantillum claritatis habens suboritur, quæ tamen non sufficit ut ecstaticus evigilet, & unde visionis initium oritur. Quoniam vero imaginationis vi phantasmata quoque combinantur & dividuntur, ut repræsententur objecta ficta (§. 146. *Psych. empir.*); ita quoque in visionibus quo minus idem fiat, nil obstat. Unde & ecstatici sæpe narrant sibi visa prorsus admiranda & entia ficta, qualia fuerint, nonnunquam describunt.

§. 484.

Quoniam in somnio supernaturali initium non est a *Visio su-* sensatione, utut per legem imaginationis continuetur (§. 328. *per natura-* *Psychol. rat.*), aut integrum per legem imaginationis minime *lis qualis* continuatur (§. 329. *Psych. rat.*); *visio etiam supernaturalis ini-* *fit.* *tium*

tium capere non debet per legem sensationis, etsi postea per legem imaginationis continuetur, aut per legem imaginationis continuari debet (§. 481.).

Patet igitur eodem modo visiones naturales & supernaturales a se invicem distingui, quo somnia naturalia a supernaturalibus distinguuntur. Ad utrumque vero præstandum quantum auxilii ferat Psychologiæ tam empiricæ, quam rationalis studium, non minus constat.

§. 485.

Status cerebri in visionibus.

Quoniam non modo naturaliter seu ordinarie, adeoque & in somnio naturali singulis phantasmatis ideæ materiales in cerebro respondent (§. 206. *Psychol. rat.*), verum etiam in somnio supernaturali singulis phantasmatis animæ ideæ materiales supernaturales & ipsæ coëxistunt (§. 330. *Psychol. rat.*); in visione quoque quacunque tam naturali, quam supernaturali singulis phantasmatis ideæ materiales in cerebro respondent, in supernaturali quidem supernaturales & ipsæ (§. 481.).

Atque adeo jam intelligitur, cur sit conveniens corpus in ecstasi incidere, quando visio aliqua supernaturalis in homine excitanda virtute divina, cum sic status ejus is sit, in quo istiusmodi ideæ materiales in cerebro facilius locum habere possunt, quam in cerebro vigilantis. Convenientiæ ratio plenius perspicietur per notionem sapientiæ divinæ deinceps explicandam.

§. 486.

An intellectus in visione operari possit.

Anima etiam in visione, quæ fit per ecstasi, operationes intellectus edere potest, veluti judicare & ratiocinari. Et enim visio, quæ fit per ecstasi, propriissime citra ullam fictionem, somnii quædam species est (§. 481.). Enimvero in somnio anima operationes intellectus edere valet, veluti judicare & ratiocinari (§. 419. *Psychol. rat.*). Quamobrem in visione quoque,

que, quæ sit per ecstasim, operationes intellectus edere, veluti
indicare & ratiocinari potest.

Dubium, quod suboriri poterat, quasi præsens propo-
siti contrarietur præcedentibus, quæ de visione per legem ima-
ginationis continuanda diximus (§. 483.), jam sustulimus, cum
operationibus intellectus locum in somniis vindicaremus (not.
§. 419. *Psybol. rat.*). Ibi adeo dicta hic repetenda sunt. Ce-
terum de singulis, quæ jam de visionibus tam naturalibus,
quam supernaturalibus docuimus, tenenda sunt, quæ supra
(not. §. 482.) annotavimus. Nimirum si quis in hisce lucem
majorem desideret, is integras demonstrationes, quas de so-
mniis dedimus in Psychologia rationali, ad visiones transfe-
rat, neque enim re alia opus esse deprehendet, quam ut voca-
bulo somnii substituat alterum visionis. Atque tum apparebit,
quam commodum fuerit visiones ad somnia revocari.

§. 487.

*Quod per visionem naturalem alicui innotescit, id pro Revelatio-
divinitus revelato haberi nequit: quod vero per visionem su-
pernaturalem innotescit, id divinitus revelatur. Etenim vi-
sio omnis pro somnii quadam specie recte habetur (§. 481.), quomodo
adeoque visio naturalis pro specie quadam somnii naturalis, dignosca-
visio vero supernaturalis pro specie quadam somnii superna-
turalis (§. 480. 482.). Enimvero quicquid per somnium na-
turale alicui innotescit, id pro divinitus revelato haberi nequit:
quod vero innotescit per supernaturale, id divinitus revelatur
(§. 469.). Quamobrem etiam pro divinitus revelato haberi
nequit, quod per visionem naturalem innotescit; at pro tali
recte agnoscitur, quod innotescit per supernaturalem.*

Posterius etiam hoc modo probatur. Visio supers-
turalis cum miraculum sit (§. 482.), quod per eam ipsi inno-
tescit, id per miraculum innotescit. Quamobrem cum Deus
solus miracula patrare possit (§. 470.); dubitari profecto ne-

(*Wolfs Theol. Naturalis*)

l i i

quit,

quit, quin divinitus alicui reveletur, quod per visionem supernaturalem ipsi innotescit.

Quodsi quis majorem lucem desideret in probatione utriusque partis propositionis presentis, is eandem demonstrationem ad visiones applicet, quam de somniis supra dedimus (§. 469.). Ceterum non alio fine omnem hanc de visionibus & revelatione divina per eas possibili doctrinam proposuimus, quam quod in sacris commemorentur exempla revelationum divinarum per visiones factarum tum in ecclasi, tum extra eandem.

§. 488.

*Visio
quando
apparitio
videatur.*

Si visio vigilanti obtingit, apparitio esse videtur. Et enim si visio vigilanti obtingit, quod per eandem repræsentatur eadem claritate gaudet, qua objecta cetera, quæ sensu percipiuntur (§. 476.). Quamobrem cum phantasmata ab ideis sensualibus coëxistentibus non distinguantur, quam quod gradu claritatis differant (§. 97. *Psych. emp.*), impossibile omnino est ut, quod vi imaginationis repræsentatur, in præsentē casu ab eo, quod sensu percipitur, distinguatur, sed perinde ac cetera sensu percipi videtur. Quamobrem objectum, quod in visione nobis veluti præsens sistitur, perinde ac cetera sensibilia præsens esse videtur, sicque visio vigilanti facta videtur apparitio.

Per se patet propositionem præsentem intelligendam esse de visione non minus supernaturali, quam naturali.

§. 489.

*Quod Deus
non patres
miracula
superflua.*

Quod naturaliter fieri potest, id Deus non demum per miraculum efficit. Etenim quod fit naturaliter, id fit secundum naturæ ordinem (§. 566. *Cosmol.*). Quamobrem cum Deus hunc mundum elegerit ob majorem perfectionem, quæ ipsi quam ceteris inest (§. 325.) & voluntas ejus immutabilis sit (§. 368.); fieri non potest ut quicquam contra naturæ ordinem fieri

fieri velit, quam ubi, quod intendit, secundum naturæ ordinem consequi non possit. Quoniam itaque miracula sunt contra naturæ ordinem (§. 566. *Cosmol.*); Deus non demum per miraculum efficit, quod naturaliter fieri potest.

Patet ergo Deum non facere miracula nisi necessitate urgente, consequenter minime superflua. Quando vero urgeat necessitas, ex ipsa propositione satis intelligitur, in qua casus necessitatis rite determinatus, quemadmodum fieri debet, ne perperam pro tali habeatur, qui non est.

§. 490.

*Si necesse non est, ut totus actus revelationis sit miraculosus, Revelatio-
modus revelationis ex miraculosis & naturalibus simul componi non debet.* Etenim si necesse non est, ut totus actus revelatio quando a-
nis sit miraculosus, quædam ad eundem spectantia absque actu mix-
miraculo, adeoque naturaliter fieri possunt (§. 510. 509. *ius.*
Cosmol.). Enimvero Deus per miraculum non efficit, quod
naturaliter fieri potest (§. 498.). Quamobrem si necesse
non est, ut totius actus revelationis sit miraculosus, modum
revelationis actus naturales ingredi debent, adeoque ex natu-
ralibus & miraculosis simul componitur.

Ponamus e. gr. revelationem fieri per somnium. Cum
somnia naturale sit, quod a sensatione initium capit (§. 326.
Psychol. rat.), supernaturale vero reddatur, ubi per legem
imaginationis minime continuatur (§. 329. *Psychol. rat.*); ubi
revelatio homini per somnium contigit, nihil obstat, quo mi-
nus a sensatione initium capiat, sed per legem imaginationis
minime continuatur, hoc est, ut in somnio naturaliter orto
divinitus quid homini reveletur. Idem omnino eodem mo-
do obtinet, ubi revelatio per visionem fit vigilianti. Etenim
si non obstant rerum præsentium perceptiones, quo minus
iisdem supernaturaliter jungatur rei cujusdam absentis tan-
quam præsentis representatio, id quod revelandum continens;
non demum opus est ut animus hominis a sensu abducatur.

quemadmodum in ecstasi fieri solet, consequenter necessitas nulla urget, ut Deus per miraculum in ecstasi perducatur, cui quid revelandum, & in hoc statu ei repræsentet, quæ ipsi revelanda sunt. Quamobrem modus præfertur, in quo actus miraculosus jungitur naturalibus: supponimus enim perceptiones naturales cum supernaturalibus simul constituere perceptionem totalem, qua revelatio continetur. Principium præsens non alienum a foro Theologorum: etenim sub eo continetur, quod affirmant; Deum quoad stylum secutum genium loquentis. Miracula nimirum suppleant defectum naturæ, consequenter non adhibenda, nisi ubi natura fini a Deo intento minime satisfacit: id quod deinceps clarius constabit, quando de sapientia divina sumus acturi.

§. 491.

*Craterium
septimum
desumptum
a stylo re-
velationis
divinæ.*

In revelatione divina singula iis verbis enunciari vel iis signis repræsentari debent, ex quibus mentem Dei loquentis vel revelantis ex assè intelligit is, cui fit revelatio. Etenim si Deus homini quid revelat, mentem suam de eo, quod revelat, patefacere vult: quod utique per se patens in dubium revocari nequit. Atat Deo perspecta est omnis cognitio symbolica possibilis (§. 277.). Quamobrem cum cognitio symbolica in eo consistat, ut, quæ in ideis rerum continentur, verbis enuncientur, vel aliis signis repræsententur (§. 289. *Psychol. empir.*); Deus quoque novit, quomodo verbis enunciare vel aliis signis repræsentare debeant, quæ in idea objecti revelandi continentur, ut is, cui fit revelatio, mentem ipsius ex assè intelligere possit. Quoniam itaque nemo non fateri cogitur, si Deus noverit, quomodo quid fieri debeat, & id facere velit, cum facere possit quæ vult (§. 352.), eum quoque idem facturum; quin Deus homini quid revelans iis verbis singula enunciet, vel ei signis aliis objectum revelandum repræsentet, ut is ex assè mentem Dei loquentis vel revelantis intelligat dubio caret,

Hec

Hoc principium generale est de stylo in revelatione divina occurrente; sed idem quoque valet de representationibus hieroglyphicis in visione factis. Hinc vero multa deducere licet specialia: quod ut intelligatur, exempli loco quædam eorum in medium adducere libet.

§. 492.

In revelatione divina non plura occurrunt verba, nec pauciora, quam quæ ad mentem Dei revelantis intelligendam sufficiunt, & ea seliguntur verba, quorum beneficio eandem assequi certo datur ei, cui fit revelatio. Etenim Deus homini quid revelans iis verbis singula enunciat, ex quibus mentem ejus ex asse intelligit (§. 491.). Quamobrem cum verba sive vocabula sint nostrarum perceptionum vel rerum per eas representatarum signa (§. 271. *Psychol. empir.*); non pluribus utendum est verbis, quam quibus ea significantur, quæ homini revelare constituit Deus, neque etiam paucioribus: quoniam in casu posteriori non omnia revelarentur, quæ revelare voluerat Deus, in casu priori plura diceret Deus quam dicere vellet, ac ad mentem ejus percipiendam dici opus erat. Et eodem prorsus modo patet, si plures sint loquendi formulæ, quibus mentem suam exprimere potest loquens, sed non omnes æque aptæ ad mentem ipsius ex asse assequendam, Deum eam seligere debere, quæ ad eandem certo assequendam conducit.

Hominibus solenne est, ut plus dicant, vel minus, quam voluerant, unde interpretatio extensiva & restrictiva ortum suum ducit. Ast in rationem inquirentibus patet, tribuendum id esse partim imperfectæ ipsorum cognitioni, partim imperitiæ linguæ: quorum neutrum in Deum omniscium cadit. Exemplum luculentum, quo præsens propositio illustrari potest, continetur in verbis Christi *Matth. V. 39.* quibus exprimitur animus ab omni vindictæ cupi-

dine alienus, quemadmodum ostendi in Horis subsecivis A. 1729. Trim. Vern. n. V. §. 2.

§. 493.

*Num den-
sur in re-
velatione
voces ina-
nes,*

Quoniam adeo Deus homini quid revelans nec pluribus utitur vocabulis, nec paucioribus, quam quot ad mentem suam eidem significandum sufficiunt (§. 492.); *in revelatione divina verbis singulis suæ respondere debent notiones, ex intentione Dei iisdem jungendæ.*

Nulli adeo in revelatione divina extare possunt termini inanes. Ubi in applicatione regulæ tenendum, terminum pro inani non ante habendum, quam ubi id demonstratum fuerit. Legi hic merentur, quæ de quibusdam S. S. vocabulis eo fine inculcavimus, cum de interpretanda eadem ageremus (not. §. 973. Log.). Ceterum præsens propositio in interpretanda revelatione divina nos jubet esse maxime attentos & circumspectos, ne quicquam prætermittamus, quod ad mentem Dei revelantis perspicendum facit, sed singulas particulas, nedum vocabula & phrasæ, sufficienter ponderemus, ut ea in animo nostro nascatur idea, quæ verbis istis in eodem excitari debet ex intentione divina.

§. 494.

*Quanam
notiones in
revelatione
supponan-
tur.*

Si quid Deus homini revelat, non alias præsupponere poterit notiones vocabulis jungendas, quam quæ animo ejus jam in revelatione hærent, aut quas in se habet, dum ipso opere ea in se experitur, quæ ipsi revelat. Demonstravimus idem jam alibi, cum de interpretanda S. S. ageremus (§. 971. Log.), cum eam divinitus revelatam & inspiratam autoribus ejusdem Christiani firma fide teneamus. Etenim omnis demonstratio procedit ex hac hypothesi, quod in S. S. quæ extant verba, accipi debeant tanquam Dei loquentis: quæ ipsissima propositionis præsentis hypothesi est.

Quoniam supponimus Deum loquentem homini velle intelligi, quæ in propositione præsentē inculcantur observanda

Veni-

ntunt omnibus, qui loquuntur ut intelligantur. Unde vix erit quisquam qui sine probatione concedere dubitet, loquentem ut intelligatur, non alias in eo supponere posse notiones, cui loquitur, quam quæ jam animo ejus inhærent, aut quas habet, dum, quæ dicit ipsi loquens, in semetipso experitur, modo perpendat, non aliter intelligi verba loquentis, quam jungendo ipsis notiones easdem, quas ipsemet iisdem jungit (§. 117. Log.). Et in genere tenendum, nihil de stylo revelationi divinæ conveniente præcipi, nisi quod convenit huic hypothese, quod alteri loquens velit intelligi.

§. 495.

Hinc & consequitur, quod non aliæ in revelatione divina supponi possint notiones, quam quæ a rebus præsentibus ad notiones abstrahuntur, atque adeo diversum a mente Dei revelantis in re is fingat sensum, qui ab illis diversas verbis ejusdem jungit. *Quomodo*

Hoc quoque corollarium jam inculcavimus cum de S. S. divina sup-
interpretatione ageremus, quantum a regulis Logicæ pendet *positas per-*
(§. 972. Log.), ex eadem nimirum ratione, quam modo alle- *veniat.*
gavimus (not. §. præced.). Pedimus ibidem exempla, quibus
in præsentem quoque usum idem illustrari potest, ut adeo novis
minime sit opus.

§. 496.

In revelatione divina stylus non minus regulis Gramma- *Quinam*
ticæ universalis, quam Rhetoricæ rationalis convenire debet. *stylus re-*
Suppono in Grammatica universali ea demonstrari, quæ in *velationi*
omni lingua sunt observanda, si quidem voce mentem tuam *divina*
exprimere velis. Quamobrem cum Deo omnis rerum cogni- *conveniat.*
tio symbolica perspecta sit (§. 277.); ignorare haud quaquam
potest, quæ ad mentem suam voce rite exprimendam requi-
rantur, consequenter cum eam hominibus innotescere velit,
alias enim revelationi supersederet, stylus utique regulis Gram-
maticæ universalis convenire debet. *Quod erat unum.*

Sup:

Suppono secundo in Rhetorica rationali demonstrari, qua utendum sit dictione, tum ut ideæ rerum non satis manifestarum reddantur clariores, tum ut animus loquentis quoad eas intimius perspiciatur, tum ut excitentur in eo, ad quem verba fiunt, affectus convenientes. Quamobrem cum Deus, cui perspectum esse debet quicquid cognitu possibile (§. 156.), ea ignorare minime possit; quin ea utatur dictione, qua ad singula obtinenda opus est, dubitari nequit. Stylus igitur in revelatione divina etiam regulis Rhetoricæ rationalis convenire debet. *Quod erat alterum.*

Patet adeo, quantæ foret utilitatis, si & Grammatica universalis, & Rhetorica rationalis ad formam demonstrativam reducerentur, ut utriusque regulæ extra omnem dubitationis aleam ponerentur. Etenim hinc interpretes Scripturæ sacræ, quam a Deo revelatam Christiani confitemur, non contemnenda petere poterunt subsidia ad emphasin verborum summa cum circumspectione selectorum explicandam profutura. Neque in applicatione hujus criterii, quod jam commendamus, exiguam vim deprehendes ad scripta divinitus inspirata a ceteris discernenda. Etenim hic talia sese offerunt, de quibus autores alii ne cogitare quidem solent, ut ut haud diffiteri teneantur ea observanda esse, siquidem dictio omnibus numeris absoluta esse, nec quicquam vitii vel infirmitatis in loquente arguere debeat. Dictis fidem facere poteramus, siquidem jam nobis propositum esset criteria revelationis divinæ ad Scripturam sacram applicare: sed non deerit forsan alias occasio unum alterumque exemplum in medium proferendi. Utinam stylus S. S. penitus inspicere conarentur, qui ejus se interpretes profitentur, ut, quoties ipsis scribendum vel loquendum, vestigia Scriptorum sacrorum exprimerent! Quid enim sentiendum est de hominibus, qui cum in interpretanda S. S. sibi eminere videantur & aliis eandem magno conatu interpretari studeant, dictione suam animum produnt ab eo, qui fuit autoribus sacris, longe diversum.

sum, parum curantes illud Apostoli 1 Cor. IV. 16. Imitatores mei estote, & quod alibi dicitur *Eph. V. 1.* Estote imitatores Dei. Quod si in interpretanda S. S. & in genere in interpretandis autorum quorumcunque dictis regula Rhetoricæ rationalis, hoc est, qualis ea esse debet, siquidem ad rationes solidas revocetur, adhiberentur; quantum abscondita animi prodat dictio, clarissime constaret & linguam hypocryseos proditorem agnoscerent, a qua sibi metuere minime solent, quotquot pietatis externæ specie aliis imponunt.

§. 497.

Decretum est determinatio voluntatis ad aliquid agendum, vel non agendum. *Decretum quid sit.*

Ita dicimus decrevisse auxilium alteri ferendum, si voluntatem eo determinavimus, quod alteri auxilium ferre velimus. Neque minus ex adverso dicimur decrevisse auxilium alteri non ferendum, si voluntatem eo determinavimus, quod eidem auxilium ferre nolumus.

§. 498.

Consultatio est actus intellectus, quo disquiritur, quid sit agendum, quid non agendum. *Consultatio vel Consilium quid sit.* Dicitur etiam *Consilium*.
Ita consulere vel consultare dicimur, ubi disquirimus, num alteri sit auxilium ferendum, an non ferendum.

§. 499.

Quoniam consultando disquirimus, quid sit agendum, Cur consul- quid non agendum (§. 498.); decernendo vero statuimus, ratio decre- quod hoc agere vel non agere velimus (§. 497.); consultatio tum præ- decretum præcedit, decretum consultationem sequitur. *cedat.*

Hæc nimirum ita sese habere debent, & ita quoque sese habent, si secundum rationem agas. Ast cum homines sæpe primo impetu in decreta ruant, moniti demum ab aliis vel casu quodam excitati consulunt, non quid decernendum sit, sed num decretum exequi debeant, dum enim disquirunt num

decretum exequi debeant, disquirere utique tenentur, num quid sit agendum, vel non agendum, quod per præcipitanti-um agere vel non agere decreverant.

§. 500.

*Ubinam
consulta-
tioni locus
sit.*

Consultationi locus non est nisi in re dubia. Etenim si res fuerit dubia, nobis minime liquet, utrum quid sit bonum an malum, vel quidnam eorum, quæ æque fieri possunt, sit melius. Quamobrem cum sine motivis nulla detur volitio vel nolitio (§. 889. *Psychol. empir.*), motiva vero in repræsentatione boni ac mali distincta consistant (§. 890. *Psych. empir.*), & præterea id præfertur, quod judicatur melius, ubi ex pluribus bonis unum alteri præferendum (§. 898. *Psych. empir.*): voluntas determinari nequit ad agendum, vel non agendum, quamdiu ignoratur, utrum bonum sit, an malum, ut hoc agamus, vel non agamus, & quidnam horum melius sit, quæ nos agere posse agnoscimus & quorum unum eligere volumus. Quodsi ergo voluntas determinari debet, necesse est ut ante disquiratur, utrum quid sit bonum, an malum, & quidnam eorum, ex quibus unum eligere debemus, sit melius, consequenter quid sit agendum, quid non agendum. Quoniam adeo consultamus, quando disquirimus, quid sit agendum, quid non agendum (§. 498.); consultationi in re dubia locus est.

Enimvero ubi res est manifesta, nobis satis constat, utrum quid sit bonum, an malum, vel quidnam eorum, ex quibus aliquid eligendum, sit melius. Quamobrem, cum cognoscens aliquid statim appetat, vel aversetur, quamprimum id tanquam appetibile vel averfabile cognoscit (§. 318.); voluntas quoque statim determinatur, nec ulla demum præcedit disquisitio de eo, quid sit agendum vel non agendum. Quoniam itaque in re manifesta consultatione nulla opus est (§. 498.); in re autem dubia eidem locus concedendus per de-

monstrata ; consultationi utique locus non est nisi in re dubia.

Hinc qui multa rerum experientia sunt instructi, ut easum similitum facile meminerint (§. 503. *Psychol. empir.*) ; sine consultatione exemplo statuunt, quid sit agendum, vel non agendum, atque ideo consilium ex arena capere dicuntur

§. 501.

Deus consultatione opus non habet; tribui tamen eidem Num Deo potest per eminentiam. Etenim Deus omniscius (§. 302.) scit *conveniat* omnia, quæcunque cognitu possibile sunt, siue singularia *consultatio.* fuerint, siue universalia (§. 301.), & quidem omnia cognoscit simul (§. 160.). Quamobrem fieri nequit, ut ulla res ipsi sit dubia, sed omnia potius manifesta sunt. Enimvero consultationi locus non est nisi in re dubia (§. 500.). Deus igitur consultatione non opus habet.

Jam Deus cum omniscius sit (§. 302.), adeoque omnia cognitu possibile tam singularia, quam universalia, unico intellectus actu (§. 160.) cognoscat (§. 301.); quid in uno quoque rerum genere optimum sit, statim perspicit & quænam eidem cedant intelligit primo statim intuitu. Quamobrem cum Deus plura sibi possibile simul repræsentat & quidnam eorum optimum sit perspicit; hoc ipso eidem adest, quod ens finitum demum consultatione consequitur (§. 498.), nempe quid agendum sit, quid non agendum intelligit. Constat vero per eminentiam quid enti alicui tribui, quod cum proprie eidem tribui repugnet, ejus vicem supplet quoddam aliud, quod eidem convenit (§. 845. *Ontol.*). Deo igitur consultatio per eminentiam tribui potest.

Nil igitur obstat, quo minus Deo tribuatur consilium, ut significetur, eum non cæco quodam impetu decrevisse, quæ decrevit, sed omnibus optime pensatis, modo idem deinceps

ceps per omniscientiam divinam rite explicetur, quem in finem consultum ducimus Consilii divini subijcere definitionem.

§. 502.

*Consultatio
Dei quid
sit.*

Consultatio seu Consilium Dei est actus intellectus divini, quo quid agendorum optimum sit, certo iudicio definit, aut, si mavis, summa certitudine intueretur.

Etenim hic actus intellectus divini æquipollet consultationi, qua nos opus habemus ut certum fiat de eo, quod agendum vel omittendum est, iudicium, consequenter consultatio vel consilium, quemadmodum cum Scriptura loquuntur Theologi, per eminentiam est: utriusque sane effectus idem est, nimirum certitudo iudicii de agendis & omittendis. Neque enim alio fine consultamus, quam ut certum nobis sit de agendis & omittendis iudicium: unde a consultatione non desistimus, quamdiu hæremus, utrum iudicium nostrum certum sit, nec ne. Dubium enim, quo ad eandem adducimur (§. 500.), tollendum, antequam finiatur. At Deo esse certitudinem iudicii de agendis & omittendis maximam, quis omniscientiæ ejusdem gnarus dubitet (§. 564. Log.)?

§. 503.

Propositum.

Propositum est actus voluntatis, quo determinatur executio decreti.

Nimirum decreto determinatur voluntas ad aliquid agendum, vel non agendum: proposito eadem voluntas efficitur constans, ut adeo veluti in quadam decreti repetitione & approbatione consistat. Perpendentibus, quod decretum est, placet & ideo ad ejus executionem fertur animus.

§. 504.

*Æternitas
decreti di-
vini.*

Deus omnia decrevit ab æterno. Tum enim Deus facere quid decrevit, quando idem voluit, seu voluntatem suam ad idem determinavit (§. 497.). Enimvero Deus vult omnia ab æterno (§. 319.). Ergo etiam omnia decrevit ab æterno.

Ratio

Ratio nimirum æternitatis decreti divini eadem est, quam de æternitate volitionis dedimus, scilicet quod ab æterno cognoscat omnia unico intellectus actu, consequenter ratio cesset, cur successive hominum instar decernere debeat, quid agere vel facere velit.

§. 505.

Nulla dantur decreta Dei temporaria, seu in tempore de- *Cur decre-*
mum facta. Etenim impossibile est, ut Deus quid demum in *ta divina*
tempore velit, quod ante nondum volebat, & ut in poste- *temporaria*
rum ipsum velle contingat, quod nondum vult (§. 320.). *nulla.*
Quamobrem cum decretum sit actus voluntatis divinæ, quo
quid agendum a se sit, quid omittendum determinat (§. 497.);
impossibile est, ut Deus demum quid in tempore decernat,
consequenter nulla dantur decreta Dei temporaria.

Errant adeo, qui decreta Dei temporaria fingunt in omni-
scientiam Dei & quidem in præscientiam ipsius injurii, per-
versæ notionis de libertate humana abusu. Repetenda igitur
hic sunt, quæ de præscibilitate rerum omnium superius de-
monstrata sunt (§. 232. & seqq.).

§. 506.

Decretum Dei liberrimum est. Est enim decretum actus *Decretum*
voluntatis divinæ (§. 497.). Quamobrem cum voluntas Dei *Dei cur*
liberrima sit (§. 431.); decretum quoque Dei liberrimum est, *liberri-*
seu Deus liberrime decernit omnia. *imum.*

Ut propositioni major lux affulgeat, ad eam applicanda
sunt, quæ ad evincendam summam libertatem voluntatis
divinæ in medium attulimus (not. §. 431.). Nimirum in genere
notandum, quæ de decreto Dei prædicantur clariora fore,
siquidem ad ea denuo applices rationes, quæ de voluntate in
genere superius adductæ sunt.

§. 507.

*Quod non
sit casus
purus.*

Decretum Dei non est casus purus. Est enim actus voluntatis divinæ (§. 497.). Quamobrem cum actus voluntatis divinæ non sit casus purus (§. 432.); nec decreta Dei casus purus sunt.

§. 508.

*Cur decreta
Dei in
se intelli-
gibilia.*

Quoniam casus purus est, qui ratione sufficiente destituitur actus (§. 94. *Cosmol.*); *decretum Dei*, quod casus purus non est, *rationem sufficientem habet*, consequenter *per ea, quæ Deo & rei decreta insunt, intelligi potest, cur Deus eam potius decreverit, quam non decreverit* (§. 56. *Ontol.*).

Evincitur hic decreta Dei esse in se intelligibilia, ita ut intelligibili modo explicari possint, sit ita quod nos eadem intelligibili modo explicare nequeamus. Patebit tamen ex sequentibus, nec omnem, quem nos adhibemus, conatum esse frustraneum. Ceterum decretum divinum in casum purum convertunt, quotquot rationem sufficientem ab eodem removeant temerario metu, ne libertati divinæ derogetur, quasi libertati inimicum sit, ut ens summa ratione præditum agat cum ratione summa.

§. 509.

*Immutabi-
litas decre-
ti divini.*

Decretum Dei est immutabile. Est enim actus voluntatis divinæ (§. 497.). Enimvero voluntas Dei prorsus immutabilis est (§. 368.). Ergo & decretum ipsius prorsus immutabile est.

Quod igitur Deus ab æterno decrevit, id in tempore non mutat. Quamobrem cum omnia decreverit ab æterno (§. 504.); ideo nihil eorum in tempore mutat. Hæc decretorum divinorum immutabilitas multis modis in praxin vitæ influit, quemadmodum suo tempore docebimus in philosophia morali pietatem philosophicam explicaturi.

§. 510.

Deum nunquam pœnitere potest ejus, quod decrevit. An Deum
 Pone enim Deum pœnitere ejus, quod decrevit. Quoniam *pœnitere*
 decretum est actus voluntatis suæ (§. 497.), eum pœnitet, quod *possit de-*
 hoc vel istud voluerit. Quamobrem cum Deus jam non vel- *creti.*
 le debeat, quod voluit ante (§. 761. *Psych. empir.*), subsistente
 licet decreto immutabili (§. 509.); voluntas ipsius foret mu-
 tabilis: quod cum sit absurdum (§. 368.), Deum pœnitere
 nunquam potest ejus quod decrevit.

Inmutabilitas decreti per se non arcet pœnitentiam: fieri
 enim potest, ut, etsi nos pœniteat, quod hoc vel istud decre-
 verimus, adsint tamen rationes sufficientes, cur decretum po-
 tius exequi, quam rescindere velimus: ast cum immutabili-
 tate voluntatis in genere pœnitentia consistere minime potest,
 quemadmodum ex propositionis præsentis demonstratione
 claret.

§. 511.

Deus decreta sua penitus intelligit. Etenim Deus intelli-
 git penitus quicquid vult, ut scilicet nihil quoad ejus cognitio- *Intelligen-*
 nem desiderari possit (§. 316.). Quamobrem cum decreta *tia eorum*
 sint actus voluntatis divinæ (§. 497.); Deus quoque ea, quæ *quæ Deus*
 decernit, seu, quod perinde est, decreta sua penitus intelligit. *decernit.*

Atque hinc apparet, quod nulla adsit ratio, cur decreti sui
 eum unquam pœniteat, quemadmodum hominibus accidere so-
 let. Etenim Deus cum penitus intelligat decreta sua, vereri
 minime debet, ne forsan rationes quasdam non videat, cur a
 decreto abstinere consultius sit: sed quas novit decernendi ra-
 tiones, eadem semper subsistunt, consequenter si sint ad de-
 cernendum sufficientes, semper tales deprehenduntur. Quam-
 primum nimirum appetibile vel averfabile qua tale cogno-
 scitur, illud quoque cognoscens appetit vel averfatur (§. 318.).
 Quamobrem qui appetibile penitus cognoscit, ita ut ni-
 hil quoad ejus cognitionem desiderari possit, id appetibile
 sibi

sibi semper tanquam tale repræsentat, atque adeo nulli mutationi locus esse potest.

§. 512.

Incompre- *Decreta Dei omni homini, immo omni enti intelligenti*
benfibilitas finito incomprehensibilia. Etenim voluntas Dei omni homini
decretorum (§. 359.), immo omni enti intelligenti finito incomprehen-
divinorum. bilis (§. 358.). Est vero decretum Dei actus voluntatis divinæ
(§. 479.). Ergo decreta Dei omni homini, immo omni enti
intelligenti finito incomprehensibilia.

Quo sensu decreta divina dicantur incomprehensibilia, patet per definitionem incomprehensibilitatis, quam dedimus in superioribus (§. 170.), & quo voluntatem ipsius incomprehensibilem esse demonstravimus (§. 358.).

§. 513.

Imperscrut- *Decreta Dei omni homini imperscrutabilia.* Est enim vo-
tabilitas *luntas Dei omni homini imperscrutabilis* (§. 398.). Quoni-
decretorum *am itaque decreta divina sunt actus voluntatis divinæ* (§. 479.);
divinorum. *decreta Dei omni homini imperscrutabilia esse debent.*

Quo sensu dicantur decreta divina nobis imperscrutabilia, patet ex definitione imperscrutabilitatis supra allatæ (§. 397.), nimirum quatenus nobis eorum rationes penitus perspectæ non sunt, quæ Deum ad decernendum permoverunt. Quemadmodum vero superius (not. §. 398.) jam monuimus, imperscrutabilitatem divinæ voluntatis non obstare, quo minus eandem scrutemur, quantum detur; ita etiam eadem minime obstat, quo minus in rationes decretorum divinorum inquiramus, quantum eas nobis assequi datur. Et ubi rationes possibiles reperimus, in iis acquiescendum: ubi nullas perspicere possumus, de iis temere judicandum non est.

§. 514.

Cur Deus *Deus decernere potest, quæ cur decreverit, homo intelligere*
decernere *nequit.* *Velle enim potest, quæ cur velit, homini intelligere*
possit, cu- *non*

nondatur (§. 399). Quamobrem cum decreta divina sint a
 ctus voluntatis divinae (§. 497.); Deus decernere potest, quæ
 cur decreverit, homo intelligere nequit.

*ius ratio-
nem homo
intelligere
nequit.*

Hæc propositio multum influit in praxin, quemadmodum
 suo loco constabit, adeoque probe notanda.

§. 515.

Deus decernit, quod est optimum tam in se, quam in re-
 latione ad seipsum. Etenim Deus vult quod est optimum tum
 in se, tum in relatione ad seipsum (§. 390.). Sunt vero de-
 creta Dei actus voluntatis ipsius (§. 497.). Quare quod Deus
 decernit, optimum esse debet tam in se, quam in relatione ad
 ipsummet Deum.

*Qualia
sint. quæ
Deus de-
cernit.*

Probe perpendenda sunt, quæ de voluntate Dei ad opti-
 mum tendente (§. 383. & seqq.) & inprimis de modo, quo Deus
 optimum æstimat, dicta sunt (§. 391. & seqq.). Propositio hæc,
 quemadmodum tota de decretis divinis theoria, in praxin ma-
 xime influit suo loco ostendendam.

§. 516.

Decreta divina Deum decent. Vult Deus quod ipsum
 decet (§. 335). Sed quod decernit, id vult (§. 497.). Quam-
 obrem decreta divina Deum decent.

*Quomodo
Deum de-
ceant.*

§. 517.

Quoniam Deum decet, cujus aliqua in iis, quæ ipsi in-
 sunt, seu in essentia vel attributis ipsius continetur ratio, cur
 id potius velle debeat, quam aliud (§. 332.). decreta vero sua
 ipsum decent (§. 516.); in essentia & attributis divinis, & hi-
 sce quidem omnibus simul sumtis (§. 395.), continetur ratio, cur
 hoc potius decernere maluerit, quam aliud; consequenter cum
 per rationem intelligatur, cur quid sit (§. 56. Ontol.), per essen-
 tiam & attributa divina, sed ea simul sumta, intelligitur, cur De-
 us hoc potius decreverit, quam aliud.

*Quomodo
decreta
ipso digna.*

(Wolffii Theol. Naturalis)

LII

Cur

Cur vero rationes istæ nobis sint ut plurimum absconditæ, si ad particularia descendis, ex superioribus patet (§. 396. 446.).

§. 518.

*Quænam
Deus de-
cernere non
possit.*

Deus non potest decernere, quod attributis ipsius repugnat. Velle enim nequit, quod iisdem repugnat (§. 445.). Ergo nec decernere (§. 497.).

Nimirum si id faceret, non decerneret, quod ipsum deceret (§. 332.): id quod de Deo dici repugnat (§. 516.). Cautè tamen procedendum est, ne temere de decretis divinis judicemus (§. 446.).

§. 519.

*Quomodo
Deus quid
in particu-
lari decer-
na.*

Deus eorum, quæ in mundo fiunt, nihil in particulari decernit absolute spectatum, sed in relatione ad totum. Exenim Deus nihil eorum in particulari, quæ in mundo fiunt, vult absolute, sed in relatione ad totum spectatum (§. 441.). Cum itaque quod decernit, id velit (§. 497.); nihil quoque eorum, quæ in mundo fiunt, in particulari decernit, quatenus absolute, sed quatenus in relatione ad totum spectatur.

Omnes difficultates, quæ circa decreta divina cooriuntur, ex hoc fonte manant, quod particularia in se spectata consideremus tanquam objectum decreti divini & idem referamus ad unum aliquod Dei attributum, non spectatis ceteris simul.

§. 520.

*Cur Dei
decretum
sit unicum.*

Decretum Dei est numero unicum. Mundus enim ens unum est (§. 60 Cosmol.) & singula in eodem vel simul, vel successive existentia sunt ejusdem partes (§. 61. Cosmol.). Quoniam itaque Deus, qui omnia ab æterno (§. 319.) & simul seu unico intellectus actu cognoscit (§. 160.), eundem sibi mundum tanquam ens unum & singula coexistentia & suc-

ces.

cessiva tanquam unius totius partes representavit ab æterno; actualitatem quodque totius mundi & omnium eorum, quæ in ipso sunt, simul unico voluntatis actu decrevit. Et quamvis Deus miracula facere possit, quotiescunque vult (§. 363), & hinc sequentem mundi partem immutare valeat, ut non sit eadem, quæ ad ipsum in idea ejusdem spectat (§. 367.); quoniam tamen non minus semetipsum (§. 141), quam cetera omnia quæcunque cognitu possibile sunt, cognoscit (§. 154.), ab æterno quoque novit, quomodo per miracula partem mundi sequentem immutare, seu hanc rerum naturalium seriem interpolare possit. Quod si ergo interpolatio seriei rerum naturalium per miracula ad majorem facit mundi perfectionem & eum reddat Deo magis dignum, idem ab æterno cognovit, nec concipi potest in Deo idea seriei naturalis, nisi una cum interpolatione per miracula possibili. Quamobrem ubi Deo volenti, quod perfectioni totius universi & summæ rerum perfectioni, quam habere possunt, convenit (§. 443) & cum perfectionibus ipsius consensit (§. 445.), visum fuerit seriem rerum naturalem per miracula interpolare; nec aliter existentiam ejus decrevit quam eo, quo ipsi visum est, modo per miracula interpolandam. Atque adeo patet, decretum Dei non esse nisi numero unicum.

In eo differt decretum divinum a decreto humano; quod non modo omnia unico voluntatis actu, quemadmodum vult (§. 355.), ita & decernat omnia (§. 497.), sed & de toto decernat, tanquam de toto: id quod omniscientiæ divinæ tribuendum. Nos deliberamus de partibus vitæ & de iisdem decernimus, propterea quod omnem rerum ad vitam integram pertinentium seriem non obrutu uno comprehendimus, sed successive partes cognoscimus, de quibus statuendum. Cavendum itaque ne de Deo ex nobis judicemus. Cur vero decretum Dei a nobis, si objectum seu res decretas spectes, tanquam multiplex considerari possit & debeat, unicum il-

lum divinæ voluntatis actum, quo decernit omnia, nostro concipiendi modo veluti in plures se invicem consequentes resolvendo; ejus ratio in rebus decretis unice quaerenda; quod sequente propositione paulo clarius docere lubet.

§. 521.

*Quomodo
decretum
Dei spectetur
tanquam
multiplex.*

Si in serie rerum a Deo decreta insunt, quæ non necessario nexu inter se coherent, sed quarum aliæ ad actum perducipotuerant absque aliis; decretum Dei unicum a nobis considerari potest, & debet tanquam multiplex. Ponamus e. gr. seriem hanc rerum, quæ existit, quemadmodum Christiani ex sacri codicis autoritate tuemur, miraculis esse interpolatam, quæ inter etiam locum habet nativitas miraculosa Dei hominis, nempe Christi, inter hominem peccatorem atque Deum Mediatoris. Cum constet, seriem rerum ad actum perducipotuisse nulla interpolatione per miracula facta, quam tamen interpolatam esse autoritate codicis sacri ponimus; nec minus certum sit, Deum liberrime decernere omnia (§. 506.); in se non implicat, ut series rerum præsens ad actum perducenda absque ulla interpolatione per miracula facta decerneretur. Nostro igitur concipiendi modo Deus libere decrevit actualitatem præsentis rerum seriei, quatenus spectatur in se, nulla interpolatione per miracula facta, nec minus libere decrevit interpolationem ejusdem seriei per miracula, & libere quoque utrumque decrevit simul. Nostro igitur concipiendi modo duæ sunt voluntatis divinæ determinationes, quorum una absque altera esse poterat, consequenter unicus ille voluntatis divinæ actus, quo decretum ipsius continetur (§. 520.), tanquam duo decreta spectari possunt (§. 497.). *Quod erat unum.*

Quoniam decreta Dei sunt actus voluntatis divinæ (§. 497.), voluntatis vero divinæ datur aliqua ratio objectiva (§. 339.); cur Deus quædam simul decreverit, cum unum absque altero decernere potuisset, objectiva quædam ratio dari debet.

bet. Quamobrem cum ratio objectiva ab objecto desumatur (§. 118.) & per eam intelligatur, cur quid sit potius quam non sit (§. 56. *Ontol.*); quædam rei uni decretæ inesse debent, per quæ intelligitur, cur non decreta sit altera. Quoniam adeo res decretæ a se invicem dependent (§. 851. *Ontol.*); si distincte hanc dependentiam cognoscere velimus, decretum Dei tanquam multiplex a nobis spectari debet. *Quod erat alterum.*

Poterat demonstratio partis alterius propositionis præsentis non minus applicari ad exemplum, quod in demonstratione partis primæ supposuimus. Quod ubi facere lubet, clarissima patebit dependentia rei decretæ unius ab altera. Etenim in serie rerum miraculis non interpolata continetur lapsus Adami, teste Scriptura sacra, & hujus causa Deus eandem miraculis interpolavit, quatenus redemptioni non erat locus sine miraculosa nativitate Christi, & executio decreti redemptionis alia miracula poscebat. Enimvero si rem quoad Deum consideres, cum idæ rerum sint necessariæ (§. 189.), in intellectu ipsius simul continetur & idæ mundi absque miraculis interpolati & idæ quoque ejusdem per miracula interpolati, Deus vero liberrime decernens (§. 506.) seriem miraculis interpolatam prætulit alteri ab iisdem vacuæ tanquam eam, quæ se magis deceat (§. 335.), alteraque meliorem (§. 515.). Nimirum Deo, qui omnia unico actu intelligit (§. 160.), res decernendæ aliter objiciuntur, quam nobis qui, quæ ad eandem seriem rerum pertinent, particulariter considerare tenemur. Neque est quod in præsentē negotio id nobis videatur peregrinum atque alienum: etenim in ipsa quoque serie rerum naturali diversa a se invicem distinguimus & sigillatim expendimus. Ita constat, descensum gravium fieri in medio resistente, & servare in descensu per idem medium certam legem. Quoniam in se non implicat, ut gravis descensus concipiatur in vacuo seu medio non resistente, & lex descensus in medio resistente utique a duplici dependeat causa, nimirum a vi gravitatis, qua motus acceleratur, & a vi, qua medium resistit; igitur nos distincte conce-

cepturi legem descensus in medio resistente, sigillatim perpendimus, quomodo motus acceleretur vi gravitatis & qualis foret descensus, si sola gravitas in descensum influeret; sigillatim quoque consideramus resistantiam medi, ut constet, quantum per eam motui descendenti detrahatur. Legem igitur descensus in medio resistente unicam resolvimus in duas, nimirum in legem descensus liberi in vacuo seu accelerationis vi gravitatis factæ & in legem resistantiæ, quæ sit descendenti per medium resistens. Mathematicum gnari minime ignorant, si legem descensus gravium in medio resistente distincte cognoscere velimus, & legem accelerationis in vacuo, & legem resistantiæ in medio, per quod descendit grave, sigillatim perpendendam esse, idemque non solum in descensu gravium distincte concipiendo, sed in aliis casibus quam plurimis motuum in rerum natura certa lege fieri solitorum similiter observari. Nihil adeo singulare est in Theologia, si seriem rerum præsentem sigillatim consideramus, qualis foret, si nullis miraculis interpolaretur, & qualis sit, ubi miraculis interpolatur, consequenter interpolationem per miracula factam, tanquam quid a serie ista diversum & ad eam per se minime pertinens spectamus, atque hoc p. æto unus voluntatis divinæ actus, quo decrevit omnia, tanquam in duos actus a se invicem distinctos resolvitur, sicque decretum unicum quoad res decretas, minime autem quoad Deum decernentem, spectatur tanquam multiplex. Quemadmodum vero ex ipsa re decreta, quatenus refertur ad intellectum divinum, intelligitur, cur Deus unico voluntatis actu eandem decernere potuerit; ita non minus ex eadem, quatenus ad intellectum humanum refertur, perspicitur, cur unicum Dei decretum a nobis spectari possit tanquam multiplex, & cur hoc modo spectari debeat, si quidem distincte idem nobis representare velimus.

§. 522.

*Futuritio
rerum
unde.*

Per decretum Dei res decreta facta est futura. Etenim si ea spectetur ante decretum, quatenus ejus idea est in intellectu divino, nonnisi possibilis intelligitur, (§. 152.), nimirum

intrinsece talis, & ubi ad potentiam Dei refertur, existere posse (§. 343.), adeoque extrinsece possibilis agnoscitur (§. III. Cosmol.). Quodsi jam decretum Dei accedit, Deus voluntatem suam determinat ad actualitatem ipsi aliquando conferendam (§. 497.). Quamobrem cum decretum Dei sit immutabile (§. 509.); quod decrevit, id quoque aliquando exiturum. Per decretum adeo res decreta habet, ut spectetur tanquam a potentia ad actum traducenda, adeoque tanquam futura (§. 584. Ontol.), seu, quod perinde est, per decretum Dei facta est futura.

Patebit inferius probe perpendendum esse, quomodo ens quodcunque pendeat a Deo. Nimirum ab intellectu divino est possibilitas ejus intrinseca & a potentia ante decretum fuit possibilitas extrinseca: decretum vero superaddit futuritionem, seu ex statu nude possibilitatis rem decretam deducit in statum futuritionis. Quamobrem ubi spectatur post decretum, non amplius apparet tantummodo ut intrinsece atque extrinsece possibilis, verum etiam ut a potentia ad actum certo perducenda seu tanquam futura. Facile autem nemo non videt, ante decretum rem nullam spectari posse tanquam futuram, nec post idem demum tanquam possibilem. Non tædet hæc inculcare, propterea quod hæc vulgo a se invicem non satis distinguuntur: unde deinde in aliis, quæ hinc pendunt, lites nascuntur inanes & difficultates vix subinde extricabiles.

§. 523.

Quoniam per decretum Dei res futura facta est, qui no- Unde pendeat præ-
vit, quod quid sit a Deo decretum, is quoque novit certo futu-
rum. scientia

Atque adeo perspicimus præscientiam futurorum pendere futurorum.
a decreto, cum res ante decretum tantummodo spectari possint ut præscibiles, quemadmodum supra abunde ostendimus (§. 232. & seqq.).

§. 524.

§. 524.

*Præscien-
tia divina
demon-
strata.*

Deus præscivit omnes effectus rerum materialium & omnes nostras cogitationes, seu quicquid in hac rerum serie in tempore existit, ab æterno. Cum enim Deus existentiam hujus seriei rerum decrevit (§. 519.), eam quoque semetipsum (§. 141.), consequenter decretum suum cognoscens, aliquando exituram novit, quam primum ejus existentiam decrevit (§. 523.). Enimvero decrevit eandem ab æterno (§. 504.). Ab æterno igitur novit, hanc rerum seriem aliquando exituram. Enimvero omnes effectus rerum materialium Deo præscibiles sunt (§. 232.), una cum omnibus cogitationibus nostris (§. 235.), ipsis etiam liberis hominis decretis (§. 233.). Quamobrem pater Deum ab æterno præscivisse, quicquid in tempore futurum, nempe omnes rerum materialium effectus & omnes animarum omnium cogitationes.

Nimirum quod ante decretum ut præscibile, idem post decretum tanquam præscitum consideratur, ut adeo pateat, quomodo decretum divinum in præscientiam influat.

§. 525.

*Relatio re-
rum decre-
tarum ad
potentiam
ipsius.*

Quicquid Deus decrevit, id etiam facere potest & in tempore facit, quemadmodum decrevit. Deus enim facere potest, quodcumque vult (§. 352.). Quod vero decernit, illud facere vult (§. 497.). Ergo quicquid decrevit, id etiam facere potest. Quod erat unum.

Enimvero decretum Dei est immutabile (§. 509.), consequenter quod semel facere voluit, ut in posterum facere nolit, & qualem quid semel facere voluit, ut in posterum tale facere nolit fieri minime potest (§. 291. Ontol.). Quamobrem quod Deus ab æterno decrevit, id in tempore facit, quemadmodum decrevit. Quod erat alterum.

Hæc propositio plurimum influit in praxin, quemadmodum in philosophia morali docebitur.

§. 526.

Decretum Dei nihil in re decreta mutat. Etenim cum *Effectus* decretum Dei non sit nisi actus, quo Deus voluntatem suam *decreti in* determinat ad quid agendum, vel non agendum (§. 497.); si *re decreta*. Deus rem quandam decernit, eam ad actualitatem perducere vult. Enimvero cum possibilitas rerum non pendeat a voluntate Dei (§. 434.); ante decretum jam intelligitur possibilis, & quidem intrinsece, quatenus idea ejus in intellectu divino continetur (§. 192.), extrinsece vero quatenus Deus eam facere potest (§. 352. *Theol. nat.* & §. III. *Cosm.*). Talem igitur decernit, qualem possibilem intrinsece & extrinsece novit, hoc est, qualem a se fieri posse intelligit, antequam eam ad actum perducere velit. Quoniam itaque decretum rei intrinsece atque extrinsece possibili nihil superaddit nisi certitudinem existendi; nihil in re eadem mutari palam est.

Nimirum decreto Dei tribuendum, quod quæ in tempore existunt, non in statu puræ possibilitatis fuerint relictæ: minime autem res tales sunt, quod Deus tales esse debere decreverit. Quatenus tamen decrevit Deus, ut res, quæ tales sunt, potius existant, quam aliæ, & quid decreverit penitus intelligit (§. 511.) & facere potest, quæ decrevit (§. 525.); eatenus recte dicitur res tales existere, quales eas Deus existere debere decrevit.

§. 527.

Decretum Dei nec contingentiam, nec libertatem tollit. Quomodo Etenim cum decretum Dei nihil in re decreta immutet (§. 526.), decretum adeoque eandem relinquat, qualis spectatur ante ipsum (§. *Dei nec* 291. *Ontol.*); evidens est, quod ante decretum divinum spectatur ut contingens, idem etiam non aliter spectari posse quam *contingentiam, nec* *libertatem* tollat.

(*Wolffii Theol. Naturalis*)

M m m

con-
libertatem
tollat.

contingens post decretum, & quod ante decretum intelligitur esse liberum, id etiam liberum intelligi post decretum. Decretum itaque Dei nec contingentiam, nec libertatem tollit.

Receptus Theologis & philosophis canon est: decretum Dei non tollere contingentiam, nec officere libertati humanæ. Puto autem ex iis, quæ a nobis hætenus de intellectu, potentia & decreto divino dicta sunt, liquido constare veritatem ejusdem. Nimirum quicquid contingenter existit, id ideo potius existit, quam alia contingentia, quia Deus voluit, ut, quod contingenter existere poterat, contingenter existeret, & quod homo libere vult, id ideo libere vult, quod Deus decrevit eum libertati suæ relinquere.

§. 528.

Quomodo se res habe- scitæ post decretum. Etenim Deus per scientiam simplicis intelligentiæ cognoscit in se præscibilia quæ talia & ut sibi præscibilia post decre- (§. 246). Enimvero per eandem nihil cognoscitur tantum quoad quam futurum (§. 227.), consequenter nihil actu præscitur intellectum (§. 231.). Quoniam itaque res demum per decretum evadunt divinum. futuræ (§. 522.); ideo patet, quod actu non præsciantur ante decretum, etsi præscibiles fuerint ante idem per demonstrata; consequenter ante decretum res decretas tantummodo fuisse præscibiles. *Quod erat primum.*

Enimvero per decretum Dei res decretæ factæ sunt futuræ (§. 522.), adeoque quæ præscibilia erant ante ipsum per demonstrata post idem spectata sunt tanquam futura (§. 231.), consequenter post decretum actu præscita (§. cit.). *Quod erat alterum.*

Ante decretum Deus spectavit res, quas decernere poterat, siquidem ipsi ita videretur (§. 506.), tanquam præscibiles, hoc est, cognovit, si hanc vel istam rerum seriem ad actum perducendam decerneret, hæc vel ista certo fore futura, ut
adeo

adeo præscibilitatis cognitio sit conditionata quædam præscientia, quæ tota hac propositione continetur: Si hic mundus ad actum perducitur, hæc quoque certo futura sunt. Jam per decretum divinum ponitur antecedens, nimirum hunc mundum per omnipotentiam Dei ad actum perducendum esse, adeoque Deus decreti sui non ignarus (§. 511.) novit, quod eandem ad actum perducere velit, omnipotentia suæ certus (§. 349.) perspexit, eundem a se ad actum deduci posse, & immutabilitatis decreti sibi conscius (§. 509.), nullo modo de ejus executione dubitare potuit. Quamobrem post decretum poni quoque debet consequens, atque adeo Deus cognoscit, hæc esse certo futura. Quicquid igitur hic dicendum, hoc syllogismo hypothetico comprehenditur:

Si hic mundus ad actum perducitur, hæc quoque certo futura sunt.

Atqui hic mundus ad actum perducetur.

Ergo hæc quoque certo futura sunt.

Major sistit per scientiam simplicis intelligentiæ res decretas tanquam præscibiles ante decretum. Minor ponit decretum & conclusio respondet præscientiæ, ut adeo pateat, quomodo posito decreto, ponatur præscientia & cur illo posito hæc etiam poni possit. Nimirum nisi res essent præscibiles ante decretum, non præscirentur post decretum, nisi quibus idem existendi necessitatem imponeret, consequenter aut decretum Dei omnem tolleretur libertatem, aut actiones liberæ præsciri minime poterant. Atque hinc plenius intelligitur, quam sit necesse rerum præscibilitatem ante decretum expendi, ne circa præscientiam suboriantur dubia. Quamobrem non piget præscibilitatem rerum, quæ decerni poterant, uberrime inculcasse (§. 232. & seqq.), & velim ea probe perpendant, quibus præscientia divina negotium facessit, nullo non tempore conceptu difficilis visa, ad quam tamen nos viam planam commonstrasse existimamus.

§. 529.

Præscientia Dei in re præscita nihil mutat.

Mmm 2

Etenim res *Rerum in*
decreto *mutabili-*

*tas per
præscien-
tiam.*

decreta præscibiles fuere ante decretum (§. 528.), adeoque Deus novit, si hæc rerum series producat, has res esse certo futuras (§. 231.): eadem vero actu præscita fuere post decretum (§. 528.), adeoque Deus novit, quod hæc certo evenitura sint, quod hunc mundum producere decrevit (§. 231.). Enimvero decretum Dei nihil in re decreta immutat (§. 526.), adeoque talis res præscitur, qualis ante ipsum præscibilis erat, hoc est, talis futura intelligitur vi præscientiæ, qualis futura fieri posse intelligitur vi simplicis intelligentiæ. Præscientia igitur Dei in re præscita nihil immutat.

Immutabilitas rerum per præscientiam pendet ab immutabilitate per decretum: qui hanc intelligit, ei nec illa obscura esse potest. Obtinent eadem in humanis, ut adeo nihil adsit difficultatis, modo omnia intrinando temetipsum perplexum reddere nolis. Sane novit homo, se verno tempore in horto visurum florentes arbores, si se in eundem conferat. Respondet hæc cognitio actui simplicis intelligentiæ, quo quid tanquam præscibile cognoscitur, & apparet, quomodo præscibilitas sit conditionata quædam præscientia. Ponamus jam nos decernere, quod statim in hortum excurrere velimus, nec quicquam nos ab hoc proposito dimovere debeat: patet per hoc decretum nos certos reddi, quod arbores florentes visuri simus. Quod igitur ante hoc decretum tantummodo spectabatur tanquam tale, quod futurum fieri poterat, post idem jam spectatur tanquam certo futurum, quanta nimirum certitudo in negotiis humanis esse potest, fortuitis, ac minime prævisis eventibus facile labefactanda. Hinc vero simul liquet, nec decretum, nec præscientiam quicquam in re immutare. Possibile nimirum est, ut in hortum veniens videas arbores florentes, antequam decernas te illuc venturum, consequenter antequam certus es, te eas visurum. Ubi vero te illuc venturum decernis, in eo, quod fieri poterat, nihil mutatur, licet jam futurum sit, quod ante decretum tantum fieri posse intelligebatur. Et quoniam nosti te arbores florentes visurum, propterea quod tibi conscius es te in hor-

hortum exeursurum, ubi arbores florent, nihil in actu visionis arborum florentium immutatur, sed manet is, qualis erat possibilis ante decretum. Necesse igitur est, ut ad nosmeripsum animum advertamus, lucidas præscientiæ & ejus a decreto dependentiæ notiones nacturi: quo facto, ego sane non video, quomodo quicquam in hoc argumento difficultatis superare possit. Immo si tertius noverit, quid a te sit decretum, futuram is cognoscit liberam actionem alienam, hac ipsa tamen sua præscientia nihil prorsus in eadem immutat. Palam vero non minus est, quantum conducat ad rerum per decretum & præscientiam immutabilitatem cognoscendam, ut probe perpendatur earum præscibilitas: quam ideo clarissime probatam dedimus in superioribus (§. 232 & seqq.).

§. 530.

Cur contingentiam
& libertatem non
tollat.

Præscientia Dei nec contingentiam, nec libertatem tollit. Etenim præscientia in re decreta nihil immutat (§. 529.), consequenter eam talem relinquit, qualis in se est. Quamobrem quæ contingentia sunt manent contingentia, dum præsciuntur; quæ libera sunt, libera manent. Præscientia igitur Dei nec contingentiam, nec libertatem tollit.

Idem quoque lucidius hoc modo ostenditur. Successiva in mundo contingentia sunt (§. 80. *Cosmol.*), nec minus in se contingentes sunt volitiones ac nolitiones animæ, ipsi etiam motus corporis a voluntate pendentes (§. 935. *Psych. emp.*), eademque volitiones ac nolitiones liberæ sunt (§. 942. *Psych. emp.*). Enimvero ostendimus superius effectus rerum naturalium, quæ successivorum seriem constituunt, esse in se, adeoque quæ contingentes (§. 232.), & libera hominis decreta similiter in se, adeoque quatenus libera sunt, præscibilia (§. 233.). Quamobrem cum præscibilia ante decretum actu præsciantur post decretum (§. 528.), decretum vero contingentiam & libertatem non tollat (§. 527.); dum res præsciuntur, quæ contingentia sunt, ut contingentia; quæ libera sunt, ut libera præsciuntur, adeo-

M m m 3

que

quo præscientia nec contingentiam, nec libertatem tollit.

Quæ de difficultate, quam objicit perversa libertatis notio, moneri poterant, de iis jam diximus, cum de præscibilitate liberorum decretorum animæ ageremus (not. §. 233.). Nimirum præscibilitatem non modo expendi convenit ex parte Dei, quemadmodum vulgo fieri solet; verum etiam ex parte ipsius objecti, quod vulgo negligitur. Tum enim veritas propositionis præsentis liquido demum constabit, simulque apparebit, quam sit necesse notioni libertatis non admisceri, quæ a veritate aliena sunt, sicuti faciunt qui præscientiam liberorum decretorum animæ negant.

§. 531.

Præscientia statuum elementorum.

Deus præscit ab æterno status quoslibet in omni elemento rerum materialium & eorundem dependentiam a se invicem in omnibus. Etenim in omni elemento rerum materialium status quilibet (§. 236.) & omnium dependentia a se invicem & in se, & Deo præscibilis est (§. 237.). Enimvero quod ut præscibile spectatur ante decretum, id actu præscitum post decretum (§. 528.). Quamobrem Deus quoque post decretum præscivit status quoslibet in omni elemento rerum materialium eorundemque dependentiam a se invicem in omnibus. Decrevit autem Deus omnia ab æterno (§. 504.). Ergo etiam ab æterno Deus præscivit status quoslibet rerum materialium in omni elemento & eorundem dependentiam a se invicem in omnibus.

Equidem hæc propositio superflua videri poterat, propterea quod mutationes statuum elementorum & quæ inde nascitur earundem ad se invicem relatio ad ea spectat, quæ in mundo hoc adspectabili contingunt, a Deo autem præsciri jam evictum fuit (§. 524.); quoniam tamen constat ideam mundi, qualis in Deo est, referre elementa rerum materialium cum omni mutationum serie, quæ in unaquaque est, ita coordinata, quomodo mutationes unius pendent a mutationibus ceterorum (§. 200.), res ipsa postulare videbatur, ut præ-

præscientiam divinam ad mundum intelligibilem extendere-
mus (§. 203.), quem per principia cosmologica & ontologi-
ca extra omnem dubitationem positum arbitramur. Quodsi
vero quis circa mundum intelligibilem, qualem nos delinea-
vimus, hæreat, is propositionem præsentem omittat, & in an-
tea demonstratis, quæ ad mundum sensibilem spectant (§.
202.), acquiescat.

§. 532.

Præscientia divina infallibilis est. Etenim Deus cum
fit ab omni prorsus errore immunis (§. 294.), cumque ipsi præ-
scibiles sint & omnes in mundo materiali eventus (§. 232.), &
omnes status elementorum (§. 237.), & omnes nostræ cogita-
tiones (§. 235.); quæ futura sint, liquidem hæc rerum series
ad actum perducatur, ab æterno certo perspicit (§. 231.).
Jam per decretum Dei res, quæ ante idem futura fieri posse
intelligebatur, futura facta est (§. 522.), cumque decretum
ipsum sit immutabile (§. 509.); fieri quoque non potest, ut
voluntate Dei, cujus quippe actus est decretum ipsum (§. 497.),
ex nudo possibilitatis statu in statum futuritionis translata ex
hoc in illum quasi recadat, consequenter quod ab æterno jus
quoddam aliquando existendi nactum est, idem id ipsum rur-
sus amittere nequit. Quoniam itaque Deus decretum suum
penitus intelligit (§. 511.); quænam sint certo futura novit
(§. 523.), citra omne errandi periculum (§. 529.). Præsci-
entia adeo Dei infallibilis est.

*Infallibili-
tas præsci-
entiae di-
vinæ.*

Nimirum cognoscens non fallitur, quatenus ab errore
immunis est. Hinc & Deus in præsciendo non fallitur,
quatenus in præsciendo errare nequit, seu præscientia ejus
nulla erroris macula afficitur. Si præscientia Dei fallere pos-
set, aut Deus ignorare deberet, quid in serie aliqua rerum
actum consequi possit, ubi eam decreverit; vel ignorare de-
beret, quamnam rerum seriem decreverit; vel decretum su-
am mutare deberet in tempore. Enimvero Deo præscibi-
lia

lia sunt omnia (§. 232. 235. 2.7.), adeoque novit quid in aliqua rerum serie actum consequi possit (§. 231.); novit Deus, quamnam rerum seriem decreverit (§. 511.); decretum denique ipsius immutabile est (§. 509.). Fieri adeo nullo modo potest, ut præscientia divina fallat.

§. 533.

*Confecta-
rium in-
fallibili-
tatis præ-
scientiæ.*

Quod Deus ab æterno præscivit, id in tempore, quemadmodum præscivit, certo futurum. Pone enim si fieri potest, aliquid, quod Deus præscivit, in tempore non fieri, aut non fieri eo, quem Deus præscivit, modo. Necessè igitur est, ut Deus judicet, aliquid esse futurum, quod futurum non est, vel esse futurum hoc modo, cum hoc modo futurum non sit, consequenter falsum pro vero habet (§. 507. Log.), adeoque errat (§. 623. Log.). Quoniam itaque præscientia Dei infallibilis non est, nisi quatenus nulla erroris macula contaminata (not. §. 532.); erit præscientia Dei fallibilis: quod cum sit absurdum (§. 532.), quod Deus ab æterno præscivit, id in tempore, quemadmodum præscivit, certo futurum.

§. 534.

*Æternitas
præscien-
tiæ divini.*

Deus omnia præscivit ab æterno. Etenim Deus omnia præscivit, quam primum existentiam hujus seriei rerum decrevit (§. 528.). Enimvero decrevit eam ab æterno (§. 504.). Ergo etiam omnia ab æterno præscivit.

Quoniam Deus ab æterno præscivit, quicquid præscivit, ideo præscientia ipsius æterna dicitur. Ceterum hanc propositionem addimus ex superfluo, ut constet, totum actum præscientiæ esse æternum.

§. 535.

*Quenam
ad hanc re-
rum seri-
em perti-
neant.*

Quicquid Deus præscivit, illud vel jam fuit, vel præsens est, vel olim erit. Quod enim Deus præscivit ab æterno, id in tempore quomodo præscivit certo futurum (§. 533.). Necessè

cesse igitur est, ut aliquo tempore actu existat, seu præsens sit. Quamobrem vel nunc existit, vel antea existit, vel olim erit.

Idem etiam per indirectum ostenditur. Pone aliquid, quod Deus præscivit, nec præsens esse, nec antea existisse, nec olim existurum esse. Quoniam Deus præscit, quatenus iudicat, hoc vel istud esse futurum (§. 231.) consequenter aliquando existurum (§. 228.); æternum Dei de actualitate rei istius iudicium falsum fuit (§. 507. *Leg.*). Præscientia igitur Dei fallibilis: quod absurdum (§. 532.).

§. 536.

Hinc consequitur: *si quid Deus præscivit; id veritatem Quod a determinatam habuisse ab æterno.* Etenim de eodem ab æter. Deo præno affirmari potuit, quod sit existurum; negandum vero fuit, *scita habere* quod non sit existurum, hoc est, vera fuit ab æterno hæc pro- *ant veri-*positio: Die 18. Augusti anni præsentis, quo hæc scribo, erit *tatem de-*novilunium; falsa vero fuit opposita: die isto non erit *termina-*vilunium. Enimvero veritatem determinatam habet id, *de tam.* quo alteram contradictionis partem affirmari, alteram negari oportet (§. 106 *Cosmol.*). Quamobrem quicquid Deus præscivit, id veritatem determinatam habuit ab æterno.

Cur veritas eorum, quæ in mundo contingunt, determinata sit, antequam contingunt, demonstravimus jam in Cosmologia (§. 107.) & ex iis abunde liquet, quæ de præscibilitate omnium, quæ possibilia sunt, & de eorum actuali præscientia accedente decreto divino demonstrata fuere. Etenim quatenus res in se præscibiles sunt, eatenus intelligitur, quod non repugnet, ut veritatem determinatam habeant, siquidem Deus velit, ut existant. Quamobrem ubi accedit decretum divinum, æterna Dei de actualitate rerum voluntas (§. 497.), veritas eorum determinatur. Cum hic de actualitate rerum sermo sit, nemo non videt, hic agi de veritate determinata singularium, non vero de veritatibus uni-
(*Wolffii Theol. Naturalis*) Nnn ver-

versallibus: id quod probe notandum est, ne videamur hic loci asserere, quod superius rejecimus. Nimirum veritates universales necessariae sunt, nec pendent a decreto Dei, sed ab ideis intellectus divini necessariis: ast veritates singulares arbitrariae sunt, & pendent a decreto divino, eo quidem modo, quo in eodem a Deo spectantur. Diverso enim modo a Deo spectata fuisse, quae decrevit, deinceps ostendemus. Ne vero quid obscuritatis in re tam ardua relinquantur, quae multos perplexos reddit: nostrum est addere, quae ad eam in aprium producendam facere possunt.

§. 537.

*Quanam
ab aeterno
babeant
veritatem
determina-
tam.*

Omnes effectus rerum materialium, & omnes nostrae cogitationes, omnesque status in omni elemento rerum materialium & eorundem dependentia a se invicem in omnibus, veritatem determinatam habuere ab aeterno. Etenim omnes effectus rerum materialium & omnes nostras cogitationes (§. 524.), omnesque status in omni elemento rerum materialium & eorundem dependentiam a se invicem in omnibus Deus praescivit ab aeterno (§. 531.). Quicquid vero Deus praescivit, id veritatem determinatam habuit ab aeterno (§. 536.). Ergo omnes effectus rerum materialium & omnes nostrae cogitationes, omnesque status in quolibet elemento rerum materialium atque eorundem a se invicem in omnibus dependentia, veritatem determinatam habuere ab aeterno.

Ut propositio praesens rite intelligatur, animo recolendum est, quod alibi (§. 106. *Cosmol*) explicavimus, quanam scilicet veritatem determinatam habere dicantur. Repetenda quoque sunt exempla, & olim (§. *cit.*), & modo in medium allata (§. *praced.*). Neque difficile est alia quocumque iisdem addere: Hodie Marburgi caelum non est prorsus serenum, sed hinc inde nubes interruptae comparent. Ab aeterno igitur verum fuit: d. 4. Aug. 1735. Marburgi Cattorum caelum erit non prorsus serenum, sed nubes hinc inde interruptae comparebunt. Ex adverso autem falsum fuit: d. 4. Aug.

Anno

Anno 1735. Marburgi Cætorum cælum erit prorsus seren-
num, nec ulla alicubi conspicietur nubecula. Similiter hoc
ipso momento hæc scribo: quamobrem ab æterno verum
fuit, me hoc ipso momento hæc esse scripturum; aut falsum
e contrario, me hoc ipso momento hæc non esse scriptu-
rum.

§. 538.

*Si ea, quæ contingunt, spectentur ante decretum; veri- Differen-
tas eorum determinabilis: si vero spectentur post decretum, ve- tia rerum
ritas eorundem determinata est.* Etenim ea, quæ contingunt, *ante & post*
ante decretum præscibilia fuere (§. 528.). Quamobrem cum *decretum*
præscibile sit, quod in se tale est, ut præsciri, adeoque tan- *spectata-*
quam futurum cognosci posse non repugnet (§. 231.). ea quæ *rum.*
contingunt ante decretum talia deprehenduntur, ut futura fo-
re agnoscantur, siquidem hujus seriei rerum, ad quam spe-
ctant, existentia decernatur. Quoniam itaque quid deter-
minabile est, si quid de eodem affirmari possit, etsi nondum
affirmari debeat (§. 105. Ont.); rerum, quæ contingunt, ante de-
cretum spectatarum, veritas determinabilis est. *Quod erat*
primum.

Jam vero post decretum ea, quæ contingunt, actu præ-
sciuntur (§. 528.), consequenter ut futura cognoscuntur (§.
231.). Quoniam itaque post decretum certum est, ea esse
exitura, & veritas eorum determinata est, de quibus alteram
contradictionis partem affirmari, alteram negari oportet (§.
106. Cosmol.); veritas eorum, quæ contingunt, post decretum
determinata est. *Quod erat secundum.*

Pater hinc, quomodo decretum influat in determinatio-
nem veritatis contingentium ab æterno. Nimirum ante de-
cretum certum est, si hæc series rerum existat, hoc contin-
genter in eodem exiturum. Atque adeo patet, ipsum esse
determinabile quoad futuritionem in affirmativam contradi-
ctionis partem. Per decretum ponitur existentia hujus se-

rieci rerum tanquam certo futura. Quamobrem post ipsum liquet, hoc in eadem aliquando certo extitutum, consequenter futuritio, quam ante decretum de eodem affirmari non repugnabat, seu quæ possibilis erat, nunc de eodem affirmari debet. Atque adeo veritas ipsius per decretum determinata. Quomodo veritas determinata contingentium ab æterno clarius exponi possit, ego sane non video. Si cui adhuc obscura videatur, is sibi tribuat, quod notiones anteriores, in quas notio veritatis determinatæ contingentium ab æterno resolvitur, nondum experiatur familiares. Ceterum probe notandum est, quomodo decretum in veritatem determinatum contingentium ab æterno influat, ne in doctrina de malo morali, quod seriei rerum præsentis implicitum est, difficultates nascentur.

§. 539.

*Relatio a-
ctus con-
tingentium
ad præsci-
entiam.*

Veritatem determinatam ea, quæ contingunt, ab æterno habuere, non quia Deus ea præscivit; sed Deus ea præscivit, quia veritatem determinatam ab æterno habuere, seu, quod perinde est. Nihil in tempore contingit, quia Deus præscivit; sed Deus ea præscivit, quia contingunt. Ea enim, quæ contingunt, non possunt spectari tanquam præscita ante decretum, sed demum post decretum (§. 528.). Quamobrem cum ante decretum illorum veritas tantummodo determinabilis sit, post decretum vero determinata (§. 538.); ea quæ contingunt non possunt spectari tanquam præscita, quamdiu eorundem veritas determinata non est, intelliguntur autem præscita esse, quamprimum veritas ipsorum determinata, consequenter ratio sufficiens præscientiæ est eorundem determinata veritas (§. 56. Ontol.). Quoniam igitur posita ratione sufficiente ponitur id, quod propter eam potius est quam non est (§. 118. Ontol.); ea, quæ contingunt, præsciuntur, quia veritatem determinatam habent, adeoque veritatem determinatam non ideo habent, quia præsciuntur.

Nimirum si ea, quæ contingunt, consideremus ante decretum Dei, Deo perspectum esse novimus, si hæc rerum series ad actum perducatur, fore ut hæc ipsi contingenter insint. Quodsi jam porro concipimus, Deum decrevisse hanc rerum seriem ad actum perducendam; tum intelligimus, veritatem eorum, quæ nunc contingunt, fuisse determinatam, seu a decreto divino certum fuisse, ea, quæ nunc contingunt, exitura esse, atque ideo Deo vi omniscientiæ idem quoque perspectum fuisse colligimus. Evidens hinc est, præscientiam a nobis concipi per determinatam contingentium veritatem, minime vero determinatam contingentium veritatem per præscientiam.

§. 540.

Fortuna est concursus causarum minime prævisus ad effectum homini vel bonum, vel malum. Dicitur Fortuna secunda, quid dicatur quando effectus inde pendens nobis judicatur bonus; est Fortuna adversa audit, quando effectus inde pendens nobis censetur malus.

Ita e. gr. inventio thesauri tribuitur fortunæ secundæ, quod opes censentur bonæ: est erurifragium, quod quis patitur ex scala delapsus, refertur ad fortunam adversam, quod erurifragium nemo non existimat malum. Fortuna igitur in genere dicitur vocabulum mediæ significationis, quod nunc in bono, nunc in malo sensu accipitur, quale etiam est valetudo. Est in vernacula unamquamque fortunam proprio indigitamus nomine, secundam nimirum appellantes Glück; adversam vero Unglück.

§. 541.

Definitio fortunæ, quam dedimus, est recepto usui loquendi conformis. Patet hoc eunti per exempla. Ponamus Cajum ficatus vohiberno tempore eodemque vespertino in foro frigoris severi- cabuli fortate ad emungendos nares coactum una cum muccinio horo- tuna sima- logium portatile extrahere, quod cum ipso inscio fiat. in nive tur in si- sepultum relinquit. Jactura horologii, quam patitur Cajus, ad gnificatu

fortunam adversam refertur. Enimvero ponamus porro Titium summo mane, antequam dies illucescit, in templum festinantem, quod paulo tardius evigilaverit, impingere in nivem, ubi horologium situm, & animadvertentem quiddam in nive jacere, idem querere ac tandem quæsitum reperire. Inventio horologii, quæ Titio obtingit, tribuitur fortunæ secundæ. Inventio horologii in casu altero; ejusdem jactura in primo tribuitur fortunæ, tanquam causæ ad effectum concurrenti. Unde si adversa fuerit, eam reprehendimus & eandem accusamus, quasi non fecerit, quod facere debebat: si vero prospera fuerit, eam laudamus & ei gratias agimus, quasi fecerit, quod optaveramus. Et quia fortunam in numero causarum efficientium collocamus, ideo per fictionem veluti ens intelligens repræsentatur, quod uni favet, alterum odit. Enimvero si ad exemplum modo in medium allatum animum advertamus, haud difficulter perspicitur, quænam sint ea, ob quæ fortuna tanquam causa horologii amissi in casu uno, inventi in altero allegari possit. Nimirum patet in casu primo, si Caius vespertino tempore non foras egressus fuisset, illum horologium minime amissurum. Quæcunque igitur causa fuit, cur egrederetur; illa etiam in jacturam horologii influit. Patet porro ipsum horologium non amissurum fuisse, siquidem frigus minime saviisset. In jacturam adeo horologii influit quoque frigus. Patet denique horologii jacturam non fuisse facturum Cajum, nisi nix terram obtexisset. Quamobrem in eandem etiam influit nix. Habes adeo hic plures causas influentes in jacturam horologii, sed quarum concursus ab eo, qui hanc jacturam facit, minime prævideri potuit. Et sane cum hoc concursu posito ponatur jactura horologii, adeoque eidem hæc tribui debeat; nemo non videt eundem esse id, quod tanquam fortunam adversam accusat Cajus. Quoniam itaque fortuna a nobis sumitur pro concursu causarum

sarum

farum minime prævifo (§. 540.); vocabulum utique sumitur in significato recepto. Idem similiter patet in casu altero, quo horologii inventio accepta refertur fortunæ prosperæ. Patet enim nisi Titius summo mane in templum se contulisset, ipsum horologium non fuisse inventurum. Frequentatio igitur templi in inventionem horologii influit. Patet porro Titium non fuisse horologium reperturum, nisi festinasset, nec festinaturum, nisi tardius evigilasset. Influit adeo tam festinatio euntis, quam evigilatio tardius dormientis in inventionem horologii, consequenter quicquid in causa fuit, cur tardius evigilaverit. Quamobrem perinde ac ante plures concurrunt causæ, quibus inventio horologii tribuenda, & quarum concursus minime prævicit inventor. Et quoniam posito hoc concursu ponitur inventio horologii; per fortunam, quam sibi faventem laudat Titius, intelligi nequit nisi hic ipse causarum concursus. Atque adeo per hunc quoque casum palam fit, vocabulum fortunæ a nobis sumi in significato recepto.

Exempla plura non addo: etenim unusquisque eodem modo in aliis exemplis ostendere poterit, quod fortunæ nomine nil quicquam aliud nisi concursus causarum indigitetur, ab eo minime prævidendus, qui eandem sive adversam, sive prosperam aut faventem experitur. Ex ipsa autem notione fortunæ patet, quomodo ea in casu quocunque dato detegatur. Nimirum inquirendum est in causis proximas, quæ in effectum fortunæ tributum iufluxere: quodsi enim has detegere nobis detur, fortunam a facie noverimus. Causas remotas hic insuper habemus, propterea quod earum investigatio plerumque in potestate non sit, quemadmodum in Physicis in causis proximis acquiescere solemus, phænomeni alicujus rationem reddituri. Non tamen negamus, fortunam plenius cognosci, siquidem causæ quoque remote innotuerint.

§. 542.

*Cur ex
parte Dei
fortuna
locus non
sit, sed ta-
men ex
parte ho-
minum.*

Ex parte Dei fortuna nulla est; sed tantummodo ex parte hominum eidem locus est. Etenim Deus præscivit ab æterno omnes effectus rerum materialium omnesque nostras cogitationes, seu quicquid in hac rerum serie in tempore existit (§. 524.), adeoque fieri haud quaquam potest, ut causarum quarundam concursus minime prævideat. Quamobrem cum fortuna sit causarum concursus minime prævisus (§. 540.); ex parte Dei fortuna nulla datur.

Enimvero cum unusquisque mortalium satis superque norit, nexum rerum in universo sibi minime esse perspectum, ac ideo causas plures concurrere posse ad effectum aliquem producendum, ipso prorsus inscio ac de eo parum cogitante; ex parte hominum fortunæ locum esse debere, perspicuum est.

Patet adeo Deo nihil evenire posse præter cogitationem atque intentionem, quemadmodum nobis sæpissime accidit. Ratio nimirum manifesta est, quod Deus omniscius prævideat omnia; nos vero ab omniscientia infinito prorsus intervallo remoti, nulla in re magis cæcutiamus, quam in prævisione futurorum. Nostris adeo negotiis immiscetur fortuna, quam nunc faventem, nunc adversam experimur, ita ut audaces sæpissime juvet, & ex adverso vel sapientissimos repellat.

§. 543.

*Præscien-
tia fortu-
næ.*

Deus fortunam omnem præscivit ab æterno. Quicquid enim in hac rerum serie existit in tempore, Deus ab æterno præscivit (§. 524.). Quamobrem cum fortuna quidam sit concursus plurium causarum ad effectum quendam producendum (§. 540.); quin ad eas referri debeat, quæ in tempore existunt in hac rerum serie, dubitari nequit. Deus igitur fortunam omnem ab æterno præscivit.

Hæc

Hæc propositio influit non uno modo in praxin, quemadmodum suo tempore in philosophia practica ostendetur: quæ sane ratio est, cur ejus hic disertam mentionem faciamus.

§. 544.

Fortuna quoque omnis Deo præscibilis fuit ante decretum & facta futura per decretum. Etenim Deo præscibiles se habeat sunt omnes effectus rerum materialium (§. 232.) & omnia fortuna a libera animæ decreta (§. 233.), consequenter omnia, quæ in decretum, hac rerum serie actum consequuntur. Quoniam itaque in horum numero quoque est fortuna, causarum plurium ad effectum quendam concursus (§. 540.); fortuna quoque Deo præscibilis fuit. Est vero Deo quid præscibile, quatenus ab æterno novit illud extitutum, siquidem hæc rerum series existat (§. 231.). Quamobrem Deus novit fortunam extitutam, siquidem hæc rerum series existat. Quoniam itaque actualitas rerum a voluntate Dei dependet (§. 433.), consequenter a decreto ipsius (§. 497.); hæc rerum series concipi nequit ut extitura ante decretum. Patet itaque fortunam omnem Deo fuisse præscibilem ante decretum. *Quod erat unum.*

Novit Deus, si hæc rerum series existat, in ea quoque extitutam hanc fortunam sive secundam, sive adversam *per demonstrata*. Quamobrem cum per decretum divinum hæc rerum series facta sit futura (§. 522.); fortuna quoque omnis sive prospera, sive adversa per decretum futura facta est.

Quomodo fortuna subter decreto divino, ex sequentibus uberius constabit, ubi ostenderimus, quomodo se habeat decretum divinum quoad malum & quomodo Deus ad actiones creaturarum concurrat.

§. 545.

Deus fortunam non decrevit absolute spectatam, sed in relatione ad totum. Fortuna cum sit concursus plurium causarum *Quomodo Deus fortunam decernat.*
(Wolffii Theol. Naturalis) O O O sarum

farum ad effectum aliquem homini bonum vel malum, quæ is minime prævidet (§. 540.); particulare quid in hac rerum serie est. Jam vero Deus eorum, quæ in mundo fiunt, nihil in particulari decernit absolute spectatum, sed in relatione ad totum (§. 519.). Ergo Deus fortunam non decrevit absolute spectatam, sed in relatione ad totum.

Quæ in genere, jam evicta sunt in anterioribus, non sine ratione ad fortunam in specie applicantur: monuimus enim (not. §. 543.), quod ad praxin moralem non exiguum momentum afferat certa cognitio, quatenus a Deo pendeat fortuna.

§. 546.

Malum metaphysicum num a decreto dependeat.

Malum metaphysicum per se ante decretum rebus decretis inheret, nec ab iis per idem separari potest. Cum essentialium rerum sint immutabiles (§. 300. Ontol.); nec per decretum immutari possunt. Limitationes itaque essentialium non demum per decretum rebus decretis superadduntur (§. 291. Ontol.), adeoque iisdem insunt ante decretum. Quamobrem cum malum metaphysicum in limitationibus essentialium consistat (§. 372.); malum metaphysicum per se rebus decretis inest ante decretum.

Cumque ab ipsis auferri nullo modo possit (§. 379.), ne per miraculum quidem, ubi producuntur (§. 381.); nec per decretum ab iisdem separari potest.

Prius etiam ostenditur hoc modo. Quoniam decretum in re decreta nihil mutat (§. 526.); nec limitationes determinationibus essentialibus superaddit, quæ in ideis earum, quatenus in intellectu divino spectantur ante decretum, iisdem nondum inhaerent (§. 291. Ontol.). Necesse igitur est, ut istæ limitationes jam insint ideis rerum, antequam concipiantur decreta. Quamobrem cum in his ipsis limita-

mitationibus malum metaphysicum consistat (§. 372.); malum hoc rebus decretis per se inesse ante decretum, hoc est, antequam concipiantur decreta, omnino liquet.

Qui ideas rerum arbitrarias supra explosas (§. 191.) fingunt, limitationes determinationum essentialium per decretum ideis rerum inferunt, & sic in doctrina mali difficultatibus inextricabilibus implicantur. Qui vero essentias rerum æternas & necessarias, philosophis & Theologis ad *Cartesii* usque tempora unanimi consensu probatas, agnoscunt; limitationes determinationum essentialium ante decretum in ideis rerum, quatenus vi principii contradictionis, adeoque per naturam intellectus (§. 27. *Ontol.*), insunt in intellectu divino, considerant, & hoc pacto circa originem ac permissionem mali & concursum Dei ad malum nihil difficultatis sentiunt, quod non superari posset. Et eo fine propositionem præsentem tanquam probe notandam inculcamus. Nimirum malum metaphysicum rebus minime inest, quia decrevit Deus, ut insit, sed quia decrevit res, a quibus abesse nequit. Homo habet facultatem cognoscendi admodum limitatam, quod nemo non novit, cum idem ex semetipso experiatur. Minime autem facultas ejus cognoscendi hoc pacto limitatur potius, quam alio, quia Deus decrevit hæc essentia ejus indere limitationes, quam alias; sed quia Deus hominem producere decrevit, cui in idea ejus hæc facultatis cognoscitivæ limitationes inhærebant, aut, quod perinde est, qui absque hac limitatione produci non poterat, hoc est, si stylo *D. Thomæ* ab offensione infirmorum magis remoto uti voveris, quia homo hic absque hac limitatione facultatis cognoscitivæ non erat factibilis. Vidit enim pro acumine suo, cum infirmis in omnipotentiam divinam injurius videatur, qui quædam a Deo fieri non posse tueretur, hoc ipsum scandalum, etsi acceptum, evitari, ubi quædam non factibilia, aut, si vocabulum displiceat, talia pronuncies, ut ea fieri repugnet: in quorum numero utique sunt creaturæ a malo metaphysico liberatæ, hoc est, in Deos conversæ,

§. 547.

*Ob malum
metaphysi-
cum an res
a Deo de-
creta.*

Deus rem nullam decrevit ob malum metaphysicum, quo laborat. Etenim Deus eorum, quæ in mundo fiunt, nihil in particulari decrevit absolute spectatum, sed in relatione ad totum (§. 519.), consequenter quatenus continetur in hac rerum serie, quam decretum ejus in se unicum (§. 520.), etsi a nobis tanquam multiplex spectandum, complectitur (§. 521.). Mundus hic adspectabilis est omnium possibilium optimus (§. 382.). Deus igitur in particulari nihil decrevit, nisi quatenus in idea mundi optimi simul continetur. Quoniam itaque mundum hunc adspectabilem ad actum perducendum decrevit, quia idem optimus tam in se, quam in relatione ad seipsum (§. 515.), non vero ob malum metaphysicum, quo carere nequit (§. 376.); ideo nec rem ullam aliam decrevisse dicendus est ob malum metaphysicum, quo laborat.

Idem etiam sic ostendi potest. Deus decernit, quod est optimum in se & in relatione ad seipsum (§. 515.), consequenter cum voluntas ipsius tendat ad id, quod in se optimum est (§. 383.), seu motivum ejusdem sit representatio optimi (§. 389.), decretum vero sit actus voluntatis (§. 497.), ideo quid decernit, quia in se, consequenter etiam in relatione ad seipsum optimum (§. 405.). Enimvero ens unumquodque in se bonum est, quatenus suam habet perfectionem tam essentialem, quam accidentalem (§. 370.); non quatenus determinationes ejus essentielles limitationes habent, sine quibus perfectius foret, consequenter quatenus malo metaphysico laborat (§. 372.). Deus igitur rem nullam ideo decrevit, quod huic malo metaphysico obnoxia sit, seu, quod perinde est, ob malum metaphysicum, quo laborat.

Toto cælo differunt, decernere id, a quo malum metaphysicum removeri nequit, & decernere idem ob malum metaphysicum, cui obnoxium est, seu quia eidem obnoxium est,

est, v.gr. decernere, ut existat homo, cujus facultas cognoscitiva admodum limitata est, & decernere, ut homo existat, quia facultas ejus cognoscendi admodum limitata est, seu ob limitationes facultati cognoscitivæ necessario inhærentes, nec ab eadem separabiles. Etenim illud fit, non attento malo metaphysico, seu imperfectiōe, cui ens finitum qua tale obnoxium est; hoc vero fieri non poterat, nisi malo metaphysico, seu imperfectiōe ista, motivi vicem subeunte, quod naturæ voluntatis repugnat (§. 904. *Psychol. empir.*). Discrimen igitur hoc probe perpendi velim. Ne vero hinc difficultates adversus omnipotentiam Dei neccas luce destitutus, qua perfundendæ sunt notiones abstractæ, ut reddantur claræ; animo recolendum est, quod supra evicimus (§. 378.), impossibilitatem faciendi mundum aliquem absque malo metaphysico non minuire omnipotentiam. Neque enim a malo metaphysico libera a Deo fieri posse negantur ob defectum potentix divinæ, sed ut cum *D. Thoma* loquar, quia in se factibilia non sunt. Impossibilitas adeo, quæ ab objecto manat, nullum defectum potentix arguit.

§. 548.

Malum metaphysicum est absentia perfectionis alienæ, non Qualem propriæ. Etenim malum metaphysicum consistit in limitationibus essentialium determinationum (§. 372.). Quamobrem *nem ab ens* limitatum habere nequeat nisi determinaciones essentialiales limitatas, & per easdem in esse hujus entis constituatur *malum* (§. 144. *Ontol.*); majoris quoque perfectionis capax non est, *metaphysicum.* nec fieri potest, quam quæ vi illarum limitationum locum habet (§. 168. *Ontol.*). Quamobrem eo major, quæ concipitur, perfectio limitibus ampliatis, est alterius entis, cui limites sic ampliati conveniunt, adeoque aliena. Jam cum quid in se malum sit, quatenus quædam imperfectio ipsi inhæret (§. 371), adeoque perfectio quædam de eodem negatur; limitationes essentialiales tantummodo remonent perfectionem alienam, non

propriam, consequenter malum metaphysicum non est absentia perfectionis propriæ, sed alienæ.

Hinc malum metaphysicum potius malum apparet, quam est, & minus quoddam bonum est, si relative ad majora spectetur. Neque vero utilitate caret hæc observasse: usum enim insignem præstat propositio præsens in philosophia morali, quemadmodum suo loco constabit. Proderit quoque eandem notasse, ne difficultates circa bonitatem Dei nectamus, quod malum metaphysicum male concipiamus.

§. 549.

*Malum
physicum
& morale
an repu-
gnet
mundo
optimo.*

Mala physica & moralia in mundo omnium possibilium perfectissimo & optimo locum habent. Etenim experientia nemini unquam in dubium vocata, nec vocanda constat, mala physica & moralia in hoc mundo adspectabili locum habere. Enimvero mundus hic adspectabilis, qui existit, est omnium possibilium perfectissimus (§. 326.), idemque in se omnium possibilium optimus (§. 382.). Mala igitur physica & moralia in mundo omnium possibilium perfectissimo & optimo locum habent.

Propositionis præsentis veritas manifesta est, modo rite perceperis, quæ de summa mundi hujus perfectione, quæ ceteros vincit, superius evicimus & quo sensu cum optimum esse supra demonstravimus. Cave autem ne sensum ejus pervertas cum consequentariis, quasi affirmetur, mundum hunc ideo esse omnium perfectissimum, quod in eo detur malum physicum & morale, & per hæc ipsa mala ceteris, qui iisdem carent, fieri meliorem. Etenim dum ostendimus, mala physica & moralia etiam in mundo omnium possibilium perfectissimo & optimo habere locum; inde tantummodo sequitur, mala physica & moralia non obstare, quo minus idem sit omnium perfectissimus & optimus, non vero quod ex malo physico & morali oriatur ista perfectio & prærogativa. Nullum mundum carere posse malo metaphysico, facile demonstravimus (§. 376.): an vero mundus sit

possibilis, ex quo omne malum & physicum, & morale exulet, an utrumque in quolibet mundo locum habeat, ego non definivero, nec qui sumunt, ut habeant, quod adversus perfectionem hujus mundi opponant, demonstrare audent. Quæ vero precario sumuntur, opponi minime possunt iis, quæ ratione firmantur. Quodsi quis demonstrare possit, mundum aliquem esse possibilem, ex quo omne malum physicum ac morale exulet, & quod malum utrumque obstat, quo minus mundus, in quo eidem locus est, sit perfectior & melior altero, ex quo utrumque exulat, is demum argumentari poterit: Dantur in hoc mundo mala physica & moralia. Ergo mundus hic non est omnium possibilium perfectissimus, neque optimus. Quamdiu vero utrumque precario sumit; emendicatam conclusionem frustraneo conatu opponit. Enimvero ne quid prætermittatur, quod argumento intricato lucem quandam affundere possit; quæ e re esse videntur, a nobis superraddenda sunt.

§. 550.

Malum physicum & morale non obstat, quo minus in mundo, qui existit, major sit perfectio, quam in ceteris possibilibus. Cum enim malum physicum sit, quod statum mundi quoad effectus naturales imperfectiorem reddere censetur, quam foret, si alii essent (§. 373.), morale vero, quod actionibus hominum liberis inhæret (§. 374.); nemo non videt malum physicum & morale tantummodo arguere imperfectiorem in subjecto, si in se spectetur, consequenter in parte hujus universi. Enimvero si quid in re in se spectata imperfectiorem arguit, id ideo in ea non arguit imperfectiorem, quatenus ad aliam refertur (§. 542. *Cosmol.*), consequenter imperfectio partis in relatione ad totum apparens esse potest (§. 543. *Cosm.*), adeoque in toto perfectionem minime tollit (§. 547. *Cosmol.*). Quamobrem malum physicum & morale non obstat, quo minus in mundo, qui existit, major sit perfectio, quam in ceteris possibilibus.

*An malum
physicum
& morale
repugnet
majori
perfecti-
oni
mundi.*

Monuimus jam alibi, *D. Thomam* dudum hoc defendisse, imperfectionem partis posse facere ad perfectionem totius (*not. §. 548. Cosmol.*), adeoque nec a mente ejus alienum est asserere, malum physicum & morale non obstare, quo minus in toto mundo major sit perfectio, quam in alio quocunque possibili. Ceterum per propositionem liquet, falso assumi, quasi malum physicum & morale repugnet majori perfectioni mundi. Etsi autem præsens propositio per modum corollarii fluat ex anteriore, adeoque eadem admissa utique affirmandum sit, utrumque malum minime obstare, quo minus hic mundus sit omni possibili reliquo & perfectior, & melior; consultum tamen visum fuit, eandem aliunde probare, ne, quibus contrarium videtur ex parte perperam judicantibus de toto (§. 550. *Cosmol.*), id ex hypothese ab ipsis in dubium vocata intulisse videamur, quemadmodum idem fecimus superius, cum, adstructa idearum necessitate (§. 189.), arbitrarias everteremus (§. 191.). Ceterum hanc propositionem probe perpendi velim ab omnibus, qui veritatem maximi momenti de perfectione hujus mundi intimius perspicere gestiunt: quem in finem ponderanda sunt & quæ de notione perfectionis in genere (§. 503. & seqq. *Ontol.*), & de perfectione mundi in specie (§. 535. & seqq. *Cosmol.*) docuimus. Quodsi vero quis vires sibi tantas non esse experitur, ut rei tam arduæ distincte concipiendæ sufficiant; is sibi a præcipientia in judicando temperet, ne ea asserat, quæ in Majestatem divinam injuria sunt, virgula censoria notans opus divinum, quod ipsa Scriptura sacra magistra artificii suo maximo sese probavit, cum infinito rationes lumine idem perlustraret (§. 406.). Recolendum hic est, quod supra inculcavimus (§. 327.), adversus perfectionem mundi maximam ab iis, quæ in mundo observamus, nullam peti posse objectionem: quod ut magis adhuc in aprico collocetur, sequentem addere lubet propositionem.

§. 551.

*Quomodo
Deus de-
cernat.*

Deus non decrevit quod est melius in parte, sed decrevit quod est melius in toto. Etenim Deus quid optimum sit in se judi-

judicans, idem refert ad totum universum (§. 393.). Quamobrem cum decernat, quod in se optimum (§. 515.), id decernit, quod tale deprehenditur in relatione ad totum universum, consequenter quod in toto melius est, non quod in parte.

Propositio hæc est *D. Thoma*, qui *prima part. quest. 48. art. 2. concl. 4.* apud *Carbonem* in Compendio totius Summæ Doctoris angelici pag. 98. b. diserte: Deus, inquit, & natura faciunt, quod est melius in toto, non autem in parte. In toto autem melius est aliqua posse deficere. Quæ vero Deus in tempore facit, ea ab æterno decrevit, & in tempore facit, quemadmodum ab æterno decrevit (§. 525.). Quamobrem ex mente *D. Thoma* dicendum omnino est, Deum decrevisse, quod est melius in toto, non quod in parte, quemadmodum habet propositio nostra.

§. 552.

Malum physicum & morale seriei huic ita implicatur, ut Cur mala eadem salva separari ab ea minime possit. Etenim res successivæ & sive in mundo adspectabili inter se connectuntur (§. 54. *Cosm.*). *moralia e* Quoniam itaque in eorum numero sunt etiam mala physica, *mundo tolli* utpote rerum naturalium effectus (§. 373.), & actiones hominum liberæ, quibus mala moralia inhaerent (§. 374.); tam mala physica, quam moralia cum ceteris rebus in mundo hoc adspectabili connectuntur, consequenter seriei huic implicantur. Ponamus jam mala physica & moralia a serie hac rerum esse separanda; quæ in eadem relinquuntur, non amplius connectuntur. Quamobrem cum mundus adspectabilis non amplius subsistat, nexu successorum sublato (§. 55. *Cosmol.*); malum physicum & morale seriei huic ita implicatur, ut eadem salva separari minime possit. Quodsi supponas in eorum locum intrudi aliud, seu eadem mutari in contrarium; sequens mundi pars non amplius erit eadem, quæ alias futura erat (§. 116. *Cosmol.*). Atque adeo ne sic quidem malum physicum &

(*Wolffi Theol. Naturalis*) P p p mo-

morale ab hac serie rerum eadem salva separari poterit. Quamobrem cum tertium concipi non possit, quam ut mala physica & moralia vel ita removeantur, ut in eorum locum nihil surrogetur, vel ut mutantur in contrarium; nullo modo fieri potest, ut eadem ab hac serie rerum, cui implicita sunt, eadem salva ab ea separentur.

Diversa ratio est, qua malum metaphysicum huic serie rerum inhæret, & qua mala physica & moralia eidem implicentur. Etenim malum metaphysicum absolute necessarium est (§. 375.), ita ut ne per miraculum quidem auferri possit (§. 381.), neque ab integro mundo (§. 376.), neque ab ulla creatura (§. 380.): ast malum physicum pendet a nexu rerum & morale a libertate humana, consequenter tam illud (§. 80. *Cosmol.*), quam hoc contingenter existit (§. 935. *Psych. empir.*), nec per miraculum auferri repugnat (§. 553.), atque nonnisi hypotheticam habet necessitatem (§. 554.). Sed hæc ipsa hypothetica necessitas probe notanda venit, ne circa decretum Dei suboriantur difficultates insuperabiles visæ, quibus tanquam arietibus utuntur religionis tam naturalis, quam revelatæ hostes, ad religionem omnem subvertendum. Quamobrem nec piger huc spectantia uberius adhuc declarare, ne quid desiderari possit, quod argumento difficili lucem affundere queat.

§. 553.

*Quomodo
tollī possit
malum
physicum
& morale.*

Malum physicum & morale tolli potest per miracula in casu quolibet singulari patranda. Malum physicum constituitur per effectus naturales, quibus mundi status imperfectior reddi existimatur (§. 373.). Effectus hi cum actum consequantur, quia eorum causæ in hac serie rerum continentur (§. 97. *Cosmol.*), adeoque posita earum actione ponantur (§. 898. *Ontol.*); si contingere non deberent, actio causæ impedienda foret. Enimvero cum in ea serie, in qua ponitur, talis causa deficiat; per miraculum foret impedienda (§. 519. *Cosm.*).

Quam

Quamobrem cum Deus miracula facere possit (§. 363.); mala physica ex hac rerum serie per miracula tolli possunt.

Similiter idem ostenditur de malo morali. Etenim malum morale actionibus liberis inhæret (§. 374.), adeoque a voluntate hominis pendet (§. 942. *Psychol. empir.*). Quamobrem si malum morale removeri deberet; impediendæ forent volitiones ac nolitiones animarum ab ipsis elicitæ. Enimvero non animæ repugnat velle, quod non vult, & nolle, quod vult (§. 941. *Psychol. empir.*); sed tantummodo deficit in ea ratio sufficiens, cur velit, quod jam non vult, vel nolit, quod jam vult (§. 118. *Ontol.*). Volitiones itaque ac nolitiones animæ in eadem impediri nequeunt nisi per miraculum (§. 70 *Psych. rat.*). Quamobrem cum Deus miracula facere possit (§. 363.); patet mala moralia per miracula ex hac rerum serie arceri posse.

Enimvero siue mala physica, siue moralia spectes, ex demonstratis patet, in utroque casu per miraculum non tolli nisi effectum unum malum, nec nisi actionem unam malam. Quamobrem si omne malum physicum & omne malum morale ex hac rerum serie arceri deberet; tot opus esset miraculis, quot in ea dantur mala physica, quot mala moralia. Per miracula adeo nonnisi in casu quolibet singulari parranda tolli potest utrumque malum.

Probe notandum est, malum physicum & morale non tolli posse ex hac rerum serie nisi per miracula particularia, adeoque toties iteranda, quoties aliquod malum physicum, vel morale contingere debet; non vero sufficere miraculum unicum, quale mundo huic ad actum perducendo sufficere inferius ostendemus. Etenim propositioni huic & præcedenti magna vis inest ad extricandos nodos, qui circa permissionem mali nectuntur.

§. 554.

Malum physicum & morale nonnisi hypothetice necessa- Mali physi-
rium ei & mora-
 Ppp 2

*lis necessi-
tas qualis
sit.*

rium. Etenim mala physica constituntur per effectus naturales (§. 373.). Enimvero quæ in mundo adspectabili contingunt, nonnisi hypothetice necessaria sunt (§. 102. *Cosmol.*), actu eorum ab omni necessitate absoluta libero (§. 104. 105. *Cosmol.*). Malum igitur physicum nonnisi hypothetice necessarium est.

Malum morale actionibus liberis hominum inhæret (§. 374.), consequenter a volitionibus ac nolitionibus pendet (§. 936. *Psychol. empir.*). Enimvero volitiones ac nolitiones animæ in se contingentes sunt, ipsique etiam motus corporis a voluntate pendentes sunt contingentes (§. 935. *Psychol. empir.*); consequenter a necessitate absoluta liberae sunt (§. 317. *Ontol.*). Quoniam tamen anima se determinat ad volendum & nolendum motivis suis convenienter (§. 932. *Psychol. empir.*); eadem rationem sufficientem habent (§. 887. *Psychol. empir.*), sed cum per essentiam animæ determinatae non sint (§. 940. *Psychol. empir.*), in alio ab essentia diverso eandem agnoscunt. Quamobrem cum id nonnisi hypothetice necessarium sit, quod rationem in alio ab essentia diverso agnoscit (§. 320. *Ontol.*); ipsæ quoque volitiones ac nolitiones animæ, consequenter & malum morale ab ipsis pendens, nonnisi hypotheticæ est necessitatis.

Facile attendenti manifestum est, malum physicum & morale esse in hac rerum serie hypothetice necessarium, quatenus rerum nexus subsistere debet, qui per miraculum dissolvi poterat. Pendet nexus rerum a principio rationis sufficientis (§. 10. *Cosmol.* & §. 70. *Ontol.*), atque hinc hypothetica necessitas a principio rationis sufficientis manat (§. 320. *Ont.*), quod in seriem rerum nullam necessitatem absolutam invehit (§. 104. *Cosmol.*). Equidem difficultates circa existentiam mali physici atque moralis in hac rerum serie ex hoc potissimum capite moventur, quod utriusque necessitas non sit absolute necessaria, sed tantummodo hypothetica, adeoque inutile videri poterat eam demum hic demonstrari: immo for-

san

san non deerunt, qui id reprehensuri sunt, sibi persuadentes, hoc pacto arma suppeditari hostibus. Enimvero non dissimulandum, quod veritatis est, ubi eam agnoscere curæ cordique habemus, nec hostem adeo metuere fortis est, ut in veritate adversus eum præsidium sese reperire posse desperet. Ostendemus deinceps non obstante mali physici & morali necessitate hypothetica, non minus dedecere Deum ut producat mundum, cui malum physicum & morale implicatur, quam a quo malum metaphysicum ne per miraculum quidem arceri potest (§. 381.).

§. 555.

Deus tollere potest malum physicum & morale in dato a- Sublatio
liquo casu, etsi idem non tollat ex integra serie rerum: eo au- particula-
tem sublato sequens seriei pars non amplius eadem manet. Et- ris mali
 enim mala physica & moralia implicantur toti rerum seriei ut *physici*
 eadem salva ab eadem minime separari possint (§. 552.), con- *vel mora-*
 sequenter cum in serie rerum omnia sint inter se connexa (§. *lis.*
 48. *Cosmol.*), cum bonis connectuntur mala, minime vero ma-
 la tantummodo connectuntur inter se, ut separatam quan-
 dam seriem constituent, cum bonis autem seriem alteram con-
 stituentibus non connectantur. Quamobrem si supponas, tol-
 li malum physicum vel morale aliquod in uno quodam casu,
 non ideo tolluntur mala physica & moralia omnia in omni ca-
 su, adeoque in integra rerum serie. Non igitur repugnat, tol-
 li malum physicum vel morale in casu aliquo dato, etsi
 non tollatur ex integra serie rerum. Jam constat malum tam
 physicum, quam morale tolli posse per miraculum (§. 553.),
 & Deum miracula facere posse (§. 363.). Patet adeo Deum
 tollere posse malum physicum & morale in dato aliquo casu,
 etsi idem non tollat ex integra serie rerum. *Quod erat*
unum.

Malum physicum & morale si tollitur in dato aliquo casu,
 necesse est ut Deus miraculum patret (§. 553.). Enimvero si

miraculum in mundo contingit, nec aliqua alterius mutatio accidit, hoc est, nisi per aliud miraculum restituantur effectus, qui naturaliter in iis rebus consecuti fuissent, quæ vi miraculi sunt immutatz (§. 533. *Cosmol.*); sequens mundi pars non amplius erit eadem (§. 531. *Cosmol.*). Quamobrem cum nullum miraculum restitutionis hic fieri supponatur; sublato malo physico vel morali in casu aliquo dato, sequens seriei pars non amplius erit eadem. *Quod erat alterum.*

Qualis vero futura sit mutatio, ex eo intelligitur, quod de eadem alibi evicimus (§. 532. *Cosm.*). Nimirum non alia diversitas in futuram adhuc seriem rerum introducitur, quam quæ sublato malo physico vel morali in casu dato in ceteras deinceps per naturam & essentiam corporum vi status miraculosi consequi possunt. Qui nexum rerum in universo probe perspectum cognitumque habet, is & agnoscit bona malis & mala bonis in eodem connexa unam constituere seriem, & perinde esse, si per miraculum malum aliquod ex serie rerum tollatur, si per bonum aliquod, consequenter quemadmodum non omne bonum tollitur, quando per miraculum tollitur quidpiam boni in casu quodam dato, ita nec omne malum tolli, si per miraculum in casu uno tolli ponatur quidpiam mali. Sane quemadmodum sublato bono quopiam tolluntur quoque mala cum eodem in serie rerum connexa; ita quoque cum malo tolli possunt bona cum eodem in hac rerum serie connexa. Hæc autem probe notanda veniunt, ut constet, prægnantes omnino Deo esse debere rationes, si in dato quodam casu malum quoddam morale, vel physicum tollere debeat per miraculum: id quod etiam utile est ad praxin officiorum erga Deum suo loco & tempore inculandam.

§. 556.

Sublato malo physico & morali ex tota hac rerum serie, ipsa hæc rerum series permanere nequit omnium possibilium perfectissima. Etenim sublato malo physico & morali præsens rerum

rerum series eadem manere nequit (§. 552. 555). Quamob- *duſ fiat*
 rem cum hæc ipsa rerum series, seu, quod perinde est, hic *melior.*
 mundus sit omnium possibilium perfectissimus (§. 549.), ad-
 eoque si mutetur, non possit mutari in melius, sed mutetur ne-
 cessario in deterius; sublato malo physico & morali ex tota hac
 rerum serie, ea permanere nequit omnium possibilium perfe-
 ctissima.

Probe perpendendum est, quomodo hæc propositio de-
 ducatur ex anterioribus, ne perversa interpretatione in er-
 rorem trahatur. Malum physicum & morale ita implicatur
 huic rerum seriei, quemadmodum zizaniorum radices impli-
 cantur radicibus tritici, Christo docente, ut avelli non pos-
 sit, nisi simul evellatur bonum, quod cum eo connectitur.
 Sublato igitur malo physico & morali, series hæc non fit de-
 terior, propterea quod ipsum aufertur, sed quo simul au-
 feratur bonum, cui, malo absente, non amplius locus est na-
 turaliter in hac rerum serie. Quemadmodum itaque ante o-
 stendimus, huic rerum seriei majorem esse perfectionem,
 quam ceteris, non propter malum physicum & morale, quod
 in eadem datur, sed quia hoc ipsum non obstat, quo minus
 tota rerum series sit ceteris possibilibus perfectior; ita quo-
 que hic dicendum, rerum præsentem seriem non ideo fieri
 imperfectiorem, quod malo physico & morali careat, sed
 quod eo sublato, carere debeat bono, quod eidem inexistit.
 Qui religionis christianæ veritatem profiteamur, exemplo au-
 gusto fidem facere possumus dubitanti. Etenim hanc rerum
 seriem nihil magis nobilitat, quam Christus & tota œcono-
 mia salutis. Sublato malo morali ex hac rerum serie, tollitur
 quoque ex eadem Christus, tollitur tota œconomia salutis,
 id quod nemo negare aufit. Equis vero non intelligit, si
 ad Deum rem omnem referat (§. 395.), eam rerum seriem
 decenter ab eo fuisse electam, in qua regnum gratiæ cum
 regno naturæ copulatur? Immo quis non intelligit, si eam
 in se consideret, copulato regno gratiæ cum regno naturæ,
 majorem in hac serie resultare perfectionem (§. 552. *Cosm.*)?

Ris-
 Risis-

Risisse hanc instantiam Theologum quendam in Ecclesia Lutherana, qui sibi sui que similibus magnus videbatur, memini; sed neque tunc miratus sum, neque nunc miror: erat enim contradictorii ingenii homo, qui cum non caperet, quæ ex aliis compilarer, in eodem scripto damnabat, quod paulo ante defenderat, dudum hoc nomine vapulans acutioribus, quique notionum distinctarum vacuum possidens animum, sibi persuadere poterat, mundum præsentem esse a Diabolo. Ceterum veritas propositionis præsentis subsistit, etiamsi quis non admittit præsentem rerum seriem esse in se spectatam omnium possibilium perfectissimam; sed cum *D. Thoma* defendere mavult, hanc rerum seriem a Deo non potuisse condi meliorem. Etenim si hæc rerum series a Deo non potuerat effici melior, suppositis nempe hisce rebus; nec malo physico & morali sublato melior fieri potuit. Et sane agnovit *D. Thomas* bonum in hoc mundo ita connecti cum malo, ut malum per accidens influat in ipsum bonum, quatenus nimirum eum eodem connectitur; docuit enim, *Sum. Theol. part. 1. quest. 19. art. 9. concl. 5.* malum per accidens pertinere ad decorem universi. Ut intelligatur, quomodo hoc fieri possit; nostrum erit idem ostendere a priori ex ipsis rerum notionibus.

§. 557.

*Quatenus
Deus res
aliter fa-
cere non
possit.*

Deus rem nullam potuit facere aliter quam fecit, quoad determinationes essentielles & attributa. Essentiales enim determinationes (§. 303. *Ontol.*) & attributa rerum sunt absolute necessaria (§. 304. *Ontol.*), adeoque cum oppositum ejus, quod necessarium est, sit impossibile (§. 279. *Ontol.*), impossibile quoque est, ut ens aliquod, quod in hac rerum serie existit, alias habeat determinationes essentielles, aut alia attributa, quam quæ habet. Quoniam itaque Deus impossibilia facere nequit (§. 344.), aut, si mavis, ea in se spectata factibilia non sunt; Deus quoque rem nullam quæ in hac rerum serie existit, aliter facere potuit, quam fecit, quoad determinationes essentielles & attributa.

Non

Non aliud sibi volunt Scholastici, quando tuentur, Deum non potuisse rem ullam aliter facere, quam fecit, substantia-liter. Et qui necessitatem essentiarum intelligunt, ideis rerum arbitrariis rejectis, propositionem præsentem sua sponte inde inferunt. Cum consequentariis autem male sanis fatalem omnium rerum necessitatem & Dei dependentiam a rebus aliis extra se ex essentiarum necessitate perperam inferentibus, nobis jam nihil est negotii.

§. 558.

Mala physica per easdem regulas motus consequuntur, per quas consequuntur cetera in hac rerum serie, quæ mala non sunt. Quomodo
Sunt enim mala physica in numero effectuum naturalium (§. 373.), perinde ac cetera, quæ in hac serie rerum consequuntur ac mala non sunt. Enimvero mutationes corporum seu effectus naturales per modum, quo partes corporum inter se junguntur, earumque qualitates atque regulas motus explicari possunt (§. 511. Cosmol.), adeoque per regulas motus easdem consequuntur omnes. Quamobrem mala physica per easdem regulas motus consequuntur, per quas consequuntur cetera in hac rerum serie, quæ mala non sunt.

Ut intelligatur, cur malis physicis in hac rerum serie sit locus, probe notandum est, quomodo consequantur. Quamobrem propositionem præsentem afferri necesse est, ut appareat, omnes effectus naturales eodem modo in eadem actum consequi, nec peculiarem quandam requiri causam ad mala physica actuandum, quæ in ceteris locum non habet. Nimirum positis hisce rebus, positisque his regulis motus, in mundo materiali hæc consequuntur mutationes, non aliæ: in earum vero numero reperiuntur mala physica.

§. 559.

Mala physica non fiunt contra naturæ ordinem, sed iuxta eundem. Consequuntur enim per regulas motus, per quas
(Wolffii Theol. Naturalis) Q99 *An mala physica ad versentur naturæ ordini.*

quas cetera in hac rerum serie, quæ mala non sunt, consequuntur (§. 558.). Quamobrem cum regulis motus ordo naturæ contineatur (§. 559. *Cosmol.*) ; stante eodem fiunt. Enimvero secundum naturæ ordinem fit, quod eodem stante fieri debet, & contra eundem fit, quod eodem salvo fieri nequit (§. 565. *Cosmol.*). Mala igitur physica non fiunt contra naturæ ordinem, sed juxta eundem.

Exemplis res manifesta. Si terræ motu subvertuntur ædificia, effectus hic naturæ malum physicum appellatur, quatenus scilicet nocet hominibus, quorum sunt ista ædificia & qui eadem inhabitant. Enimvero quatenus effectus naturæ est, per essentiam & naturam causarum naturalium atque regulas motus, quibus naturæ impositus est ordo, eodem modo explicantur, quo phænomena naturæ reliqua, seu effectus quicumque alius naturalis, ut adeo, si physice consideremus subversionem ædificiorum terræ motu factam & inde secutam cladem hominum eadem inhabitantium, nihil hic occurrat, quod non in quovis naturæ effectū alio eodem modo sese habeat & vi essentiae ac naturæ rerum consequatur. Similiter si ventus impetuosus arbores prostrernit & tecta ædium dejicit, atque grandine dānnum segeti infertur; effectus hi naturales mala physica appellantur, quatenus inde dānnum in homines redundat, vel etiam corpora inanimata destruuntur, quæ alias salva adhuc persistere poterant. Enimvero si tanquam effectus naturæ spectantur, eodem modo in naturæ rerum consequuntur, quo pluvia terram grato ac fecundo madore perfundens & ros matutino tempore gramina & plantas irrigans.

§. 560.

Sublatio
mali physici
contra
naturæ or-
dinem.

Si Deus per miraculum malum physicum tolleret; effectus malo physico contrarius foret contra naturæ ordinem, seu, quod perinde est, Deus salvo naturæ ordine malum physicum tollere nequit. Etenim quod per miraculum fit, contra naturæ ordinem fit (§. 566. *Cosmol.*). Quamobrem si Deus malum physicum

ficum per miraculum tolleretur, effectus eidem contrarius in hac serie existens foret miraculum (§. 519. *Cosmol.*), adeoque contra naturæ ordinem. Unde cum mala physica & moralia non tollantur in dato casu ex serie rerum nisi per miraculum a Deo factum (§. 553.); Deus salvo naturæ ordine malum physicum tollere nequit.

In exemplis res manifesta est. Si ventus impetuosus damnum infert ædificiis, grando segeti, & mala hæc physica in hac rerum serie contingere minime deberent; Deus per miraculum impetum venti cohibere ut leniter spirans ædificiis parceret, & grandinem in pluviam amœnam resolvere deberet, ut segetes recrearentur. Ventus tunc temporis leniter spirans & pluvia amœna forent miracula, quibus contra naturæ ordinem in hoc universo esset locus, utpote non determinatis per regulas motus, per quas effectibus naturalibus locus in hac rerum serie cedit.

§. 561.

Naturæ ordo non turbatur per mala physica; turbatur vero, si quod ex hac rerum serie aufertur. Etenim mala physica non fiunt contra naturæ ordinem, sed juxta eundem (§. 559.), consequenter quamdiu malis physicis in hac rerum serie locus suus relinquitur, naturæ ordo ne minimum quidem mutatur (§. 290. *Ontol.*). Quamobrem cum per se pateat naturæ ordinem non turbari, quamdiu in eodem ne minimum quidem immutetur; per mala physica ordinem naturæ minime turbari liquet. *Quod erat unum.*

Enimvero si malum physicum aliquod ex hac rerum serie tollendum, tolli debet per miraculum singulare in illo casu patrandum (§. 553.). Quamobrem cum Deus, cujus solius est patrare miracula (§. 470.), salvo naturæ ordine malum aliquod physicum tollere nequeat (§. 560.); si quod ex hac rerum serie aufertur, ordo naturæ immutatus non persistit, adeoque turbatur. *Quod erat alterum.*

Probe hęc perpendendum est, sublationem mali physici salvo ordine naturę, adeoque, eodem non turbando factum, esse in eorum numero, quę stylo *D. Thoma* non factibilia dicuntur, & ideo contradictoria sunt, consequenter absolute spectata seu in se impossibilia (§. 301. 79. *Ontol.*). Quamobrem cum impossibilitas faciendi impossibilia non sit ex defectu potentię (§. 346.), sed ex eo, quod quid factibile non sit; nec sublatio mali physici, quę non turbando ordine naturę fieri debet, ullum in Deo potentię defectum arguit, quando de eodem negatur. Veritas propositionis ex singularibus exemplis adeo clare elucet, ut in dubium a nemine revocari possit, qui ad ea animum advertit. Pone enim impetu venti dejici tecta ædium. Ventus impetuosus cum habeat causas suas naturales & eadem agant secundum regulas motus essentię suę ac naturę convenienter; secundum naturę ordinem in hac rerum serie existit eo, quo contingit, tempore (§. 566. *Cosmol.*), consequenter cum impossibile sit, idem simul esse & non esse (§. 28. *Ontol.*), fieri omnino nequit, ut aut ventus tunc temporis non flet, aut ut spiret leniter, consequenter ut tecta ædium non dejiciantur secundum naturę ordinem. Sublatio igitur venti impetuoosi salvo naturę ordine, quia in se contradictionem involvit, factibile quid non est, adeoque cum potentia faciendi ea, quę fieri posse minime repugnat, consequenter quę factibilia sunt, minime pugnat, & ideo omnipotentię divinę nil quicquam detrahit (§. 347.). Ceterum ipsa quoque propositio probe perpendenda est, ne difficultates suboriantur, ubi cogitamus Deum per miracula posse mala physica tollere; & hoc tamen non obstante iisdem in hoc universo relinquere locum. Ubi enim de sapientia Dei acturi sumus, clarissime hinc constabit, decere Deum non uno modo, ut malis physicis in hac rerum serie locum relinquat, quemadmodum per eandem innotescet, cur non obstante malo physico hunc naturę ordinem potius elegerit, quam alium, cum is absolute necessarius non sit (§. 561. *Cosmol.*)

§. 562.

Malum physicum Deus præscivit ab eterno. Sunt enim mala

Præscientia malo-

mala physica effectus naturales (§. 373.), qui singuli tolli ex hac rerum serie nequeunt, nisi per totidem miracula (§. 553.). Enimvero Deus ab æterno præscivit omnes rerum materialium effectus (§. 524.), cumque decreta sua penitus intel-
ligat (§. 511.), ab æterno novit quid facere velit (§. 497.),
num malum aliquod physicum per miraculum tollere (§. 555.),
an idem in hac rerum serie relinquere velit. Vidit igitur ab
æterno mala physica in hac rerum serie futura, adeoque ea-
dem præscivit ab æterno (§. 231.).

Quoniam mala physica cum rebus ceteris in hac rerum serie connectuntur, ut eadem salva ex eadem tolli nequeant (§. 552.), perinde ac effectus ceteri rerum materialium, non aliter quam præscibilia spectari possunt ante decretum (§. 232.). Atque adeo patet, Deo ab æterno fuisse perspectum, si hac rerum series ad actum perducatur, hæc in eadem mala physica extitura. Jam cum Deus noverit ab æterno, quod mala physica tollere possit per miracula in dato casu quolibet, non tamen eadem manente seriei subsequenter parte (§. 555.), nec naturæ ordine salvo (§. 560.); ipsius arbitrio relictum fuit, utrum aliqua tollere, an omnia in eadem relinquere voluerit, prouti hoc vel istud sese decere optime omnium intellexit (§. 516. 514.). Ecquis ergo dubitet malum ullum physicum accidere in hac rerum serie, quod non præseiverit Deus ab æterno & cujus non habuerit rationem in decreto suo? Non piget demonstrationem propositionis præsentis uberiore luce collustrare, propterea quod ejus insignis usus est in praxi morali, ubi de officiis erga Deum, nec non de patientia in adversis agitur.

§. 563.

Mala physica in relatione ad mundum integrum non sunt mala. Exenim mala physica in se spectata sunt effectus naturales (§. 373.), qui perinde ac ceteri fiunt secundum naturæ ordinem (§. 559.), eumque minime turbant (§. 561.),

Qqq 3

neque

neque obstant, quo minus in mundo, qui existit, major sit perfectio, quam in ceteris possibilibus (§. 550.), quin potius salva summa ejusdem perfectione auferri minime possunt (§. 556). Quamobrem mundum non efficiunt imperfectiorem, quam foret, siquidem abessent. Quoniam itaque in relatione ad mundum integrum malum dici nequit quidpiam ad ipsum spectans, nisi quatenus eundem reddit imperfectiorem, quam foret, siquidem ipsum abesset (§. 371.); malum physicum in relatione ad mundum integrum non est malum.

Hæc propositio probe notanda, ut intelligatur, sub quo schemate mala physica ingrediantur hanc rerum seriem: scilicet enim difficultates evitare non licebit, quæ adversus Dei bonitatem ab iisdem derivantur. Immo hoc etiam perspicillo opus est, ne absurdum videatur, mala physica non modo consistere cum summa mundi perfectione, sed hanc absque illis subsistere ne quidem posse. Remove nomen odiosum, ubi hos effectus naturales tanquam in serie successivorum contentos consideras, non vero particularia, quæ seriei huic insunt, ad se invicem refers, & omnis disperebit absurditatis nebula. Enimvero ne quicquam prætermittamus, quod ad eam penitus dispellendam prodest, speciali quodam exemplo propositionem præsentem illustrare lubet. Ventus impetuosus prosternit arbores & tecta dejicit ædium, adeoque tendit ad vastationem sylvarum & destructionem ædium, consequenter damnum infertur hominibus, qui ex sylvis fructus percipiunt, & qui ædes incolunt, quatenus dejectis tectis incommoda percipiunt & in iis reparandis sumtus profundere tenentur. Quod tendit ad destructionem rei id utique malum in relatione ad ipsam dicendum est: unde ventus impetuosus malus est in relatione ad sylvas, vel etiam arbores, quæ prosternuntur, & in relatione ad ædificia, quorum tecta dejiciuntur, ac per consequens in relatione ad homines, quibus sylvarum vastatio & ædium ruina nocet. Enimvero prostratis arboribus & dejectis ædium tectis ventus ruinam non minatur universo, cum in rerum successivarum serie

serie, in qua eadem materia juxta perennes leges rerum præsentium structuræ & texturæ convenienter instar alicujus Vertumni mutatur continuo in alias aliasque formas, cum sufficiente ratione ac pulcherrimo ordine, quo melior concipi nequit, unius generatio necessario sit alterius corruptio, adeoque interitus singularium totam rerum seriem reddere nequit imperfectiorem. Quo igitur nomine ventus malus dicitur sylvis, ædibus earundemque possessoribus, eo malus non est in relatione ad totum universum, tum demum eidem infestus futurus, ubi ad ipsius destructionem tenderet. Eodem modo idem patet in exemplis aliis, ut adeo veritas propositionis præsentis in iisdem facile perspiciatur vi notionis mali (§. 571.). Unde & in definitione mali physici diximus, quod malum censeatur mundum reddere imperfectiorem quoad effectus naturales, non vero quod revera eundem imperfectiorem reddat. Nondum respicimus directionem mali ad bonum, quæ tum demum considerari debet, ubi ad Deum refertur, consequenter quando de sapientia Dei agitur.

§. 564.

Quoniam mala physica non sunt mala in relatione ad totum universum (§. 563.), nec naturæ ordinem turbant (§. 561.), quem esse perfectum, nec adeo ulla in re deficere constet (§. 562. Cosmol.); ideo jam patet clarius, quam supra (§. 550.) quod *malum physicum minime obstat, quo minus tota rerum series sit omnium possibilium perfectissima.*

Cur malum physicum non repugnet perfectioni mundi.

Nimirum nunc clarius perspicitur, quod ad evincendam propositionis hujus veritatem inprimis requirebatur, imperfectionem in parte apparentem esse malum physicum, quatenus scilicet in se spectatur, non quatenus tanquam pars consideratur.

§. 565.

Mala physica non censentur talia nisi respectu & in relatione partium, immo particularum universi ad se invicem.

Mala physica quatenus talia censentur.

enim experientia obvia constat, in hac rerum serie dari effectus naturales, qui tendunt ad destructionem, vel deteriorationem, seu in genere loquendo, ad imperfectionem rei alterius. Quamobrem cum malum in se sit, cui quædam imperfectio inhzret; malum vero in relatione ad alterum, quod ad imperfectionem alterius quid confert (§. 371.); effectus quidam naturales quin dici possint mali respectu rerum particularium, quæ sunt in hac rerum serie, & relatione ad eas dubitari nequit. Enimvero iidem effectus non possunt dici mali respectu totius universi seu in relatione ad idem (§. 563.). Ergo mala physica cum sint isti effectus, ob quos status mundi censetur imperfectior (§. 373.), non censentur talia, nisi in relatione partium universi & se invicem: immo quia plerumque ea, quorum unum ad destructionem vel imperfectionem alterius tendit, non sunt nisi admodum exiguae particulae universi, mala physica non censentur talia nisi in relatione particularum universi ad se invicem.

Vidimus modo (not. §. 563.), ventum impetuosum non posse dici malum, nisi quatenus prosternit arbores, adeoque tendit ad vastationem sylvarum, vel quatenus ædium tecta dejicit, adeoque easdem reddit deteriores. Malus itaque dicitur nonnisi in relatione ad particulas quasdam universi; cum, si ad totum universum referatur, idem deterius minime reddat, utpote secundum eum ordinem ortus, qui perfectus est (§. 562. *Cormol.*). Consultum vero est, ut in pluribus exemplis veritatem propositionis præsentis intueatur, qui absque hæsitacione cognoscere voluerit, quid mala physica sibi velint in hoc universo, cum tamen negari non possit, Deum velle, quod optimum est (§. 383.)

§. 566.

An Deus mala physica quædam decreverit. *Deus non decrevit mala physica, quatenus talia sunt.* Et enim mala physica non sunt talia, nisi respectu partium quarundam universi & in relatione earundem ad se invicem (§. 565.),

565.) , minime autem in relatione ad integrum mundum talia sunt (§. 563.). Enimvero Deus eorum, quæ in mundo fiunt, nihil decrevit in particulari absolute spectatum, sed in relatione ad totum (§. 519.), adeoque nec in relatione ad partem. Quare Deus non decrevit mala physica, quatenus talia sunt.

Probe notandum est, quo respectu Deus mala physica decreverit, ne decretum bonitati ipsius opponatur, quemadmodum ab hostibus religionis tam naturalis, quam revelatæ fieri solet, & ne ex decreto contra bonitatem ejus nascantur dubia. Absit autem, ut quis ideo sibi persuadeat, Deum in decreto suo non habuisse quoque rationem malorum physicorum qua talium: etenim licet ea non decreverit, propterea quod talia sunt, non tamen inde sequitur, ipsum ideo malorum physicorum qua talium nullam in decreto suo habuisse rationem. Contrarium enim ostendetur deinceps, cum de sapientia Dei acturi sumus. Nimirum pertinet huc directio ad bonos fines & hoc ipso mala physica faciunt ad decorem universi. Sed de his apertius in sequentibus.

§. 567.

Actiones humane interne dicuntur volitiones ac noli- *Actio in-*
tiones animæ, seu actus ex facultate appetendi & averfandi e- *terna &*
liciti. *Actio in-* *Actio in-* *Actio in-* *Actio in-* *Actio in-* *Actio in-* *Actio in-* *Actio in-* *Actio in-* *Actio in-*
Aſt *actiones externe* appellantur motus volitionibus ac *externa*
nolitionibus animæ respondentes, seu quibus ea exequimur, *quænam*
quæ anima vult & non vult, *ſit.*

In præſente doctrina actio interna & externa a ſe invicem probe ſunt diſtinguendæ, propterea quod anima in volendo alias ſequitur leges, quam corpus in exequendo decreta animæ, quodcunque tandem ſyſtema ad explicandum commercium inter animam & corpus ſeligas. Quamobrem cum in argumento ſpinolo inprimis requiratur, ne confundantur, quæ a ſe invicem diſtinguenda ſunt; actionum quoque humanarum in externas & internas diviſionem negligere minime-debuimus. Ponamus e. gr. Titium committere furtum
(*Wolfii Theol. Naturalis.*) Rrr aufe-

auferendo clam merces [Mævii. Actus externus consistit in extensione brachii ad merces alienas ceterisque motibus organorum corporis ad eas auferendas requisitis. Enimvero non extendit Titius brachium nisi volens, nec alii sequuntur motus in corpore, nisi ipso volente. Volitiones igitur, quibus motus isti respondent & sine quibus non darentur in corpore, sunt actiones internæ. Volitiones & motus simul constituunt integram actionem humanam, quæ furti nomine venit.

§. 568.

*Physicum
& morale
in actione
humana.*

Actiones tam internæ, quam externæ vel spectantur physice, vel moraliter. *Actiones internæ physice spectatæ* sunt volitiones ac nolitiones, quatenus sunt mutationes in anima contingentes, seu animæ modificationes. Similiter *actiones externæ physice spectatæ* sunt motus volitionibus ac nolitionibus animæ respondentes, quatenus sunt mutationes in corpore accidentales, seu corporis modificationes a nutu animæ pendentes. Ex adverso *actiones internæ moraliter spectatæ* sunt eadem volitiones ac nolitiones animæ, quatenus vel bonæ, vel malæ sunt. Ac similiter *Actiones externæ moraliter spectatæ* sunt iidem motus corporis volitionibus ac nolitionibus animæ respondentes, quatenus vel boni, vel mali sunt.

Exemplo furti, quod modo dedimus, differentia hæc evadit manifesta. Extensio brachii, quatenus spectatur ut motus organi cujusdam corporis, nonnisi physice spectatur, & eodem modo motus organorum corporis reliqui, qui ad furtum requiruntur, nonnisi physice spectantur, quatenus non considerantur, nisi ut motus in corpore humano existentes. Enimvero si jam porro perpendis, extensionem brachii fieri ad rem alienam & ceteris motibus organorum corporis auferri rem alienam; actio externa furti moraliter spectatur. Similiter volitio, a qua pendet extensio brachii, singulæque volitiones, quibus debentur motus ceteri organorum corporis in furto, spectantur physice, si non considerentur, nisi

ut actus voluntatis animæ, quibus quid appetitur. Atat eadem volitiones moraliter spectantur, quatenus consideramus eas dirigi in ablationem rei alienæ, & violationem juris, quod alter in eadem habet. Neque enim volitio dicitur mala, nisi quatenus brachium extendere ad rem alienam eamque auferre alteri volumus: extensio autem brachii in se spectata mala non est, nec ceteri motus in se quicquam habent vitii, quibus alteri res sua aufertur.

§. 569.

Si actio mala interna physice spectetur, per leges easdem Actiones appetitus ac aversionis nascitur, quibus bona. Etenim actio-^{interne} nes malæ internæ perinde ac bonæ sunt volitiones ac nolitiones^{mala quomodo actu-} animæ (§. 567.), &, si physice spectentur, non confide-^{entur.} rantur, nisi ut modificationes animæ, seu mutationes, quæ in eadem actuantur (§. 568). Enimvero si malum appetimus, id appetimus sub ratione boni, seu quod illud nobis repræsentemus tanquam bonum quoad nos (§. 896. *Psychol. empir.*). Quamobrem cum lex appetitus sit hæc propositio: Quicquid nobis repræsentamus tanquam bonum quoad nos, id appetimus (§. 904. *Psychol. empir.*); volitiones quoque malæ, quatenus spectantur ut actus voluntatis animæ, per eandem legem appetitus nascuntur, juxta quam in eadem consequuntur volitiones ceteræ omnes quæcunque, consequenter per eandem, qua nascuntur volitiones bonæ. Similiter si bonum aversamur, id aversamur sub ratione mali, seu quia istud nobis repræsentamus tanquam malum quoad nos (§. 896. *Psychol. empir.*). Quamobrem cum lex aversionis sit hæc propositio: Quicquid nobis repræsentamus tanquam malum quoad nos, id aversamur (§. 907. *Psychol. empir.*); nolitiones quoque malæ, quatenus spectantur ut actus animæ, per eandem legem aversionis nascuntur, juxta quam in eadem consequuntur ceteræ omnes, qualescunque tandem fuerint, consequenter & bonæ. Quoniam itaque actio interna mala esse nequit, nisi volitio quæ-

dam vel nolitio mala, quod scilicet anima appetat malum, vel aversetur bonum (§. 568.), jam vero tam nolitio, quam volitio mala nascitur per eandem legem, per quam in anima consequitur nolitio, vel volitio bona *per demonstrata*; evidens omnino est, actiones internas malas, quatenus physice spectantur, consequi per eandem legem appetitus & aversionis, qua nascuntur bonæ.

Propositio hæc multum lucis affundet concursui Dei ad malum: ibi enim, quod physicum est, probe distinguendum a morali, ne Deo tribuas quod creaturæ est.

§. 570.

*Actionum interna-
rum ordo
naturalis
seu physi-
cus.*

Actiones interne animæ tam bonæ, quam malæ, quatenus physice spectantur, ordine quodam naturali seu physico consequuntur. Etenim actiones malæ internæ, quatenus physice spectantur, per easdem leges appetitus ac aversionis nascuntur, per quas nascuntur bonæ (§. 569.), consequenter unicuique actioni internæ animæ, sive bona fuerit, sive mala, in serie perceptionum ac appetitionum & aversionum, unicuique animæ propria (§. 524. *Psychol. rat.*), per easdem leges, consequenter & regulas (§. 903. 905. *Psychol. empir.*), suus determinatur locus. Quamobrem cum ordine sibi invicem res succedant, siquidem per easdem regulas unicuique successivorum locus suus determinatur (§. 478. *Ontol.*), actiones internæ omnes animæ tam bonæ, quam malæ, quatenus physice spectantur, ordine quodam consequuntur. Enimvero lex appetitus & aversionis, qua nititur ordo iste, animæ naturalis est (§. 522. *Psych. rat.*), consequenter & ipse animæ naturalis. Patet igitur actiones internas animæ tam bonas, quam malas, si physice spectentur, ordine quodam naturali seu physico se invicem consequi.

Hæc propositio probe tenenda, ut, quando concursus Dei
ad

ad malum explicaturi sumus, intelligatur actiones malas, quatenus a Deo dependent, nihil habere vitiosi, quod reprehensionem incurrat. Videmus enim in eo, quod maxime irregulare est Deoque opus suum deformat in particulari, inesse aliquid regulare quatenus a Deo pendet. Et sane vi hujus regularitatis fieri potest, ut conservetur in toto perfectio, non obstante imperfectione partium. Nondum autem hinc apparet, quod ipsa partis imperfectio faciat ad majorem perfectionem totius: id enim intelligitur ex directione mali ad bonum, deinceps adstruenda, quæ ex nexu rerum a Deo sapienter stabilito elucet. Passim demonstranda sunt, quæ de malo, quatenus substat decreto divino & quatenus Deus ad idem concurrat, tenenda sunt, cum a diversis principiis pendeant, ubi enim deinceps in unam notionem colliguntur, quæ certa esse cognovimus, plenissima lux in argumento hoc intricatissimo tandem affulget. Ne igitur inanem operam sumant consequentarii, caveant, ne de toto judicium ferant ex parte, antequam scilicet notionem dependentiæ mali a Deo integram acquisiverint & singula, quæ eam ingrediuntur & quæ in eadem involvantur, probe intellexerint. Alias enim & seipsos, & alios ipsis non perspicaciores, aut eorum auctoritati obnoxiam fidem habentes, perplexos reddent & in invidiam adducentes doctrinam solidam arma ex manibus extorquebunt religionis naturalis & revelatæ defensoribus, quibus eam tuentur adversus ejusdem hostes.

§. 571.

Per actiones malas internas ordo naturalis in serie per-ceptionum atque appetitionum & aversionum minime turbatur. An actiones malas
Etenim actiones malæ internæ, quatenus phylice spectantur, *turbent ordinem natura-*
etiam si malæ fuerint, eodem tamen ordine naturali conse-
quuntur, quo bonæ (§. 570.), consequenter non sunt contra *turalem*
ordinem naturalem animæ, aut, si mavis, contra ordinem *modifica-*
naturæ animarum, quemadmodum contra naturæ ordinem in *tionum a-*
mundo materiali non fit, quod eidem minime contrariatur, *nimæ.*

seu eodem salvo fit (§. 565. *Cosmol.*). Quamobrem cum ordo hinc turbetur, aut, si mavis, interrumpatur, si quid contra eundem fit (§. 565. *Cosm.*); evidens est, per actiones malas internas ordinem naturalem in serie perceptionum, atque appetitionum & aversionum animæ minime turbari.

Quemadmodum naturæ ordo dicitur, quem in agendo natura observat; ita etiam ordo naturæ in anima recte appellatur, quem anima qua agens physicum, hoc est, quatenus per naturam suam apta est agere, in agendo observat. Quemadmodum enim ille in modificationibus virium motricium deprehenditur (§. 558. *Cosm.*), ita hic in modificationibus viæ animæ insitæ, in qua natura ejus consistit (§. 67. *Psychol. rat.*), observatur. Et quemadmodum ille continetur regulis motus (§. 559. *Cosmol.*) ita hic absolvitur regulis, quas anima in agendo observare conatur (§. 76. *Psychol. rat.*). Quemadmodum denique secundum naturæ ordinem fit in mundo materiali, quod secundum regulas motus fit, & contra eundem, quod hisce repugnat; ita & secundum ordinem naturæ in anima fit, quod secundum leges, quas anima observat in agendo, contingit, & contra eundem, quod iisdem repugnat. Unde porro sequitur, ordinem naturæ in anima tum demum turbari, quando quid contra eum in anima accidit, sicuti in mundo materiali turbatur ordo naturæ, quando quid contra eundem contingit. Quod si quem offendat nomen turbatio ordinis naturæ; is, si placuerit, interruptionem ordinis naturæ substituat, quam nos turbationem dicimus, nec nos experietur infestus; notet vero velim, nos uti termino dudum Theologis probato, quos affirmare constat, Deum ordinem naturæ turbasse per miracula tempore Josuæ & Hiskie in Sole facta, eodem prorsus sensu & eadem sequela, qua nos idem affirmamus de miraculis in genere.

§. 572.

*Actiones
externæ
malæ quæ
physicæ*

Actiones malæ externæ, quatenus physice spectantur, eodem modo consequuntur, quo bonæ. Etenim actiones malæ externæ sunt motus organorum corporis, qui volitionibus ac noli-
tionibus

tionibus animæ seu liberis ejusdem decretis respondent (§. 568.), *quomodo* consequenter vi commercii mentis cum corpore consequuntur *consequantur.* (§. 962. *Psychol. empir.*). Enimvero quacunque hypothesi in explicando commercio inter animam & corpus utaris, motus voluntarii, hoc est, a voluntate animæ pendent (§. 936. *Psychol. empir.*), eodem modo consequuntur omnes, ac si anima in corpus influeret, seu vi sua motus voluntarios in corpore produceret, nullo prorsus discrimine inter bonas atque malas (§. 537. *Psychol. rat.*). Patet igitur actiones malas externas, si physice spectentur, eodem modo consequi, quo bonæ consequuntur.

Propositionem hanc distinctius demonstrare licet, si systema aliquod explicandi commercium inter animam atque corpus eligas. Ita in systemate causarum occasionalium in dependentia motuum voluntariorum ab anima constante hæc lex observatur, quod Deus spiritus animales dirigere velit ad influendum per nervos motorios in musculos organorum motores, quorum motum anima voluerit (§. 601. *Psychol. ration.*). Unde clarissime perspicitur, non alio modo consequi motus voluntarios bonos in corpore quam malos, quia omnes consequuntur vi ejusdem legis. In systemate harmoniæ præstabilite vi mechanismi corporis ex ideis materialibus sensibilibus nascuntur motus voluntarii citra ullam determinationem extrinsecam immediatam (§. 615. *Psychol. rat.*), adeoque non alio modo, quam quo motus ceteri in corpore animali consequuntur, adeoque juxta regulas, quibus ordo naturæ in mundo hoc adspectabili continetur (§. 559. *Cosmol.*). In hoc igitur systemate non modo actiones externæ malæ, quatenus physice spectantur, eodem modo in corpore consequuntur, quo bonæ; verum eodem prorsus modo, quo omnes motus in hoc universo, qualescunque tandem fuerint. Quoniam tamen hypothesi de commercio inter mentem atque corpus dubitationis ac disceptationis adhuc aleam continent; veritatem propositionis præsentis ab iis suspendere nolumus, ne præter necessitatem eandem labefactemus.

Quomodo
actiones
externæ
qua phyfi-
ca se habe-
ant in quo-
vis syste-
mate.

In systemate harmoniæ præstabilite actiones malæ externæ, quatenus physice spectantur, fiunt secundum consuetum naturæ ordinem: at in systemate influxus physici & causarum occasionalium eadem fiunt secundum peculiarem ordinem, quo consuetus continuatur seu interruptitur. Etenim in systemate harmoniæ præstabilite vi mechanismi corporis ex ideis materialibus sensibilibus nascuntur motus volitionibus & appetitionibus animæ respondentes citra ullam determinationem extrinsecam immediatam (§. 615. *Psychol. rat.*), consequenter secundum easdem regulas motus, juxta quas ceteri motus in rerum natura fiunt (§. 65. 511. *Cosmol.*). Enimvero cum consuetus naturæ ordo, qui in mundo adspectabili datur (§. 560. *Cosmol.*), regulis motus contineatur (§. 559. *Cosmol.*); in systemate harmoniæ præstabilite motus voluntarii salvo naturæ ordine fiunt, seu eidem conveniunt, consequenter secundum naturæ ordinem consuetum fiunt (§. 565. *Cosmol.*). Quamobrem quia actiones externæ malæ, quatenus physice spectantur, sunt motus volitionibus & appetitionibus animæ respondentes (§. 568.); easdem in systemate harmoniæ præstabilite, quatenus physice spectantur, fieri secundum consuetum naturæ ordinem, palam est.

Idem etiam hoc modo ostenditur. In systemate harmoniæ præstabilite omnia fiunt naturaliter (§. 622. *Psychol. rat.*), consequenter etiam naturaliter fiunt motus voluntarii, seu a volitionibus ac appetitionibus animæ pendentes, utpote per systema istud a priori explicandi (§. 612. *Psych. rat.* & §. 962. *Psych. empir.*). Sed quæ naturaliter fiunt, secundum naturæ ordinem fiunt (§. 566. *Cosmol.*). In systemate igitur harmoniæ præstabilite motus voluntarii secundum naturæ ordinem fiunt. Enimvero actiones malæ externæ sunt e numero horum motuum, quatenus physice spectantur (§. 568.). In systemate itaque

taque harmoniz præstabilitæ actiones malæ externæ physice spectantur secundum naturæ ordinem.

Influxus physicus ordini naturæ adversus est (§. 579. *Psychol. rat.*), consequenter & motus voluntarii (§. 560. *Psychol. rat.*), atque ideo etiam actiones malæ physice spectantur eidem adversantur (§. 568.), consequenter contra eundem fiunt. Enimvero si anima in corpus physice influit, fluidum nerveum dirigitur ab ea ad influendum per nervos sensorios in musculos, quibus motus in corpore perficitur (§. 571. *Psychol. rat.*), quæ directio cum juxta rationem quandam constantem determinari debeat (§. 193. *Ontol.*), motus liberi in corpore eodem modo determinantur, consequenter in modo, quo in seriem rerum naturalium intruduntur, similitudo quædam obvia est (§. 195. *Ontol.*), ac hoc nomine ordine quodam consequuntur (§. 472. *Ontol.*), quem diversum esse a consueto naturæ ordine per se patet. Jam motus isti fiunt contra naturæ ordinem *per demonstrata*, adeoque eundem turbant (§. 565. *Cosmol.*). Ordo igitur, quo in systemate influxus physici motus voluntarii in seriem rerum naturalium intruduntur, ordinem naturæ consuetum continuo turbat. Constat vero actiones malas externas, quatenus physice spectantur, non spectari nisi tanquam motus volitionibus & appetitionibus animæ respondentes (§. 568.), hoc est, ideo existentes in corpore, quia anima eosdem in eodem existere vult. Quamobrem patet in systemate influxus physici actiones malas physice spectatas fieri secundum peculiarem ordinem, sed quibus consuetus naturæ ordo continuo turbatur, aut, si mavis, interruptitur.

In systemate causarum occasionalium Deus hanc sibi met-
 ipsi imposuit legem, quod spiritus animales dirigere velit ad
 influendum per nervos motores in musculos organorum mo-
 tores, quorum motum anima voluerit (§. 601. *Psychol. ration.*),
 quemadmodum in systemate influxus ipsa anima eadem lege
 (*Wolffi Theol. Naturalis*) S s s diri-

dirigit spiritus animales (§. 571. *Psychol. rat.*). Motus igitur voluntarii eodem prorsus modo in seriem rerum naturalium intruduntur, consequenter certo quodam ordine (§. 473. *Ontol.*). Est vero systema causarum occasionalium ordini naturæ adversum (§. 607. *Psychol. rat.*), consequenter iste etiam ordo, quo motus voluntarii, seu a volitionibus & appetitionibus animæ pendentes, in seriem rerum naturalium intruduntur, ordini naturæ adversus est. Quod vero ordini naturæ adversum est seu contrariatur, illud naturæ ordinem turbat (§. 565. *Cosmol.*). Ordo itaque, quo motus voluntarii in seriem rerum naturalium intruduntur, ordinem naturæ consuetum turbat, aut, si mavis, continuo interrumpit. Quoniam itaque motus isti voluntarii sunt actiones externæ physice spectatæ, siue malæ fuerint, siue bonæ (§. 568); in systemate causarum occasionalium actiones externæ, etiam malæ, peculiari quodam ordine in seriem rerum naturalium intruduntur, quo ordo naturæ consuetus continuo interrumpitur.

Pater adeo quomodo actiones malæ externæ, si physice spectentur, sese habeant in receptis hypothesebus explicandi commercium inter animam & corpus intercedens: quod notasse utile est. Etenim ubi malas hominum actiones ad Deum referre volueris, ut pateat, quomodo circa eas versetur, quomodo sese habeant ad mundum integrum considerandum, cum Deus de iis non iudicet, nisi in relatione ad totum mundum (§. 393.), nec ea deinceps ad se referat, nisi quatenus spectantur ad totum mundum relata (§. 395. 405.). Hoc pacto liquet, quanam hypothesis explicandi commercium inter animam & corpus magis satisfaciatur in concursu Dei ad malas hominum actiones & in explicando modo, quo malum decreto divino substat. In systemate harmoniæ præstabilitæ duplex datur ordo naturæ, quorum alter est naturæ animarum, alter naturæ mundi materialis. Neuter alterum ullo modo turbat & actiones malæ, si physice spectentur, fiunt secundum ordinem priorem, quatenus inter præ sunt, se-

eundem ordinem posteriorem, quatenus externæ sunt, ut adeo in eo, quod moraliter spectatum maxime irregulare est, nihil tamen irregularitatis observetur, quatenus physicum est. In systemate causarum occasionalium & influxus physici triplex naturæ ordo est: primus respicit naturam animæ in se spectatam, secundus naturam mundi materialis, & tertius dependentiam naturæ animæ & naturæ rerum universæ in mundo adspectabili a se invicem. Ordo naturæ animæ per ordinem, qui respicit mutuam naturæ animæ ac mundi materialis dependentiam a se invicem, & quem intermedium brevitatæ gratia vocare libet, continuo turbatur seu interrumpitur, & ordo similiter naturæ universæ eundem ordinem intermedium sibi continuo experitur adversum. In omni autem systemate, actiones malæ & bonæ eodem modo referuntur ad ordinem naturæ universæ & ordinem naturæ animarum, nec in systematis influxus physici & causarum occasionalium, in quibus ordo naturæ tum quoad animas, tum quoad mundum materiale per ordinem quendam intermedium continuo interrumpitur, alia ordinis naturæ turbatio locum habet quoad actiones malas, quam quoad actiones bonas.

§. 574.

Actiones malæ internæ, quatenus moraliter spectantur, Quales animam & ejus statum reddunt imperfectiorem. Actiones *sint actio-* malæ internæ sunt volitiones ac nolitiones animæ (§. 567.) & *nes malæ* moraliter spectantur, quatenus malæ sunt (§. 568.). Enim- *quoad ani-* vero malum nos statumque nostrum imperfectiorem reddit (§. *nam.* 565. *Psychol. empir.*), seu ad imperfectiorem nostram quid confert (§. 371.). Actiones igitur malæ internæ, quatenus moraliter spectantur, animam & ejus statum imperfectiorem reddunt.

Ponamus e. gr. Titium velle læsionem alterius, qua eum sibi reddit inimicum. Cum inimicus alteri nocendi occasionem querat & obviam ambabus amplectatur manibus, ex læsione procreantur Titio plurima tædia, quibus carere poterat, & futu-

rorum metus anxium reddere valet animum ejus, quatenus damna sibi inferenda & tædia inde percipienda prævidet, etsi non certo, attamen probabiliter. Accedit quoque pœnitentia, quæ excruciat Titii animum. Nemo autem dissidebitur, quod suo loco evidenter demonstrabitur, statum animæ Titii tunc fuisse factum imperfectiorem, quam futurus erat, siquidem a lædendo altero abstinuisset. Quoniam actiones lædendi sæpius repetitæ inducunt animæ habitum lædendi, & singulæ actiones ad eum quid conferunt; patet illam læsionem tendere ad imperfectionem animæ & quatenus eandem inclinant ad istum habitum, eam reddere imperfectiorem. Atque hoc pacto anima & ejus status volitione mala redditur imperfectior. In philosophia practica, quæ dixi, multo clariora evadent, propterea quod ibidem latius deducenda venient singula, quæ hic concisius proponuntur, defectu principiorum nondum stabilitorum. Suffecerit itaque propositionem præsentem utcunque illustrasse, pleniore luce suo tempore suoque loco perfundendam.

§. 575.

*Quales sint
actiones
malæ quæ
ad corpus
& statum
externum.*

Actiones malæ externæ, quatenus moraliter spectantur, corpus & statum nostrum externum reddunt imperfectioni obnoxium. Etenim actiones externæ sunt motus organorum corporis ac corporis totius a volitionibus animæ pendentibus (§. 567.) & dum moraliter spectantur, malæ sunt (§. 568.). Jam vero malum nos statumque nostrum imperfectiorem reddit (§. 565. *Psychol. empir.*), seu quod perinde est, ad nostram imperfectionem quid confert (§. 371.). Quamobrem actiones externæ moraliter spectatæ corpus statumque nostrum externum imperfectioni obnoxium reddunt.

Ponamus enim, quemadmodum antea, nos læsisse Titium & ejus contraxisse inimicitiam. Nemo non videt, hac actione statum nostrum externum reddi imperfectiorem: videbit autem clarius perspicillis philosophiæ practicæ usus. Quodsi inimicus damnum infert famæ & opibus, vel etiam corpori,
status

status noster externus & in casu altero ipsius corporis status internus imperfectioni magis adhuc obnoxius evadit. Immo periculum horum damnorum ex inimicitia imminens statum jam nostrum imperfectiorem reddit.

§. 576.

Malum morale verum malum est. Etenim malum morale inhzret actionibus hominum liberis (§. 374.), ac inde *morale an* actiones tam internæ, quam externæ dicuntur malæ, adeoque *fit malum* quoad ipsum moraliter spectantur (§. 568.). Enimvero *verum.* actiones malæ, quatenus moraliter spectantur, nos & statum nostrum tum quoad animam (§. 574.), tum quoad corpus imperfectiores reddunt (§. 575.). Quamobrem cum verum malum sit, quod nos statumque nostrum revera imperfectiores reddit (§. 568. *Psychol. empir.*); malum morale verum malum est.

Malum morale nunc consideramus in se, nondum vero referimus ad Deum legislatorem, seu malas actiones prohibentem. Etenim nisi hoc fiat, ostendi nequit, cur Deus malum nolit ac prohibeat, immo puniat, & hoc tamen non obstante eidem locum reliquerit in hac rerum serie, vel hanc seriem rerum produxerit, cui malum morale adeo implicatur, ut eadem salva ab ea separari minime possit (§. 552.).

§. 577.

Malum morale consistit in imperfectione accidentali. Et. *Qualis im-* enim malum morale verum malum est (§. 576.), adeoque cum *perfectio sit* malum verum revera nos statumque nostrum imperfectiorem *malum* reddat (§. 568. *Psychol. empir.*), nos quoque statumque nostrum revera imperfectiorem reddere debet. Jam perfectio omnis aut essentialis est, aut accidentalis, & illa quidem consensu determinationum essentialium, hæc vero consensu determinationum accidentalium continetur (§. 528. *Ontol.*). Enimvero essentielles determinationes sunt immutabiles (§. 300.

Ontol.); Quamobrem & perfectio essentialis tam animæ, quam corporis immutabilis est, consequenter anima & corpus imperfectiora fieri nequeunt nisi quoad perfectionem accidentalem. Et cum status rei mutabilibus intrinsecis atque extrinsecis constitutatur (§. 706. *Ontol.*); perfectio status essentialis esse nequit *per demonstrata*, consequenter nec in eum cadit nisi accidentalis imperfectio. Atque adeo liquet, malum morale non consistere in imperfectione essentiali, sed in accidentali.

Perfectionem essentialem ab accidentali distingui maxime necessarium est, quemadmodum jam alias monuimus (not. §. 528. *Ontol.*). Et probe tenendum est, ad quam imperfectionis speciem malum morale spectet. Etenim si malum morale esset essentialis quædam imperfectio, aut saltem ob eandem inevitabile; in Deum tanquam causam recideret malum; quod vero ita non est, ubi nonnisi accidentalis est.

§. 578.

Mali moralis cum perfectione essentiali pugna.

Malum morale contrariatur perfectioni essentiali. Cum enim perfectio accidentalis consistat in consensu determinationum accidentalium cum essentialibus (§. 528. *Ontol.*); imperfectio accidentalis consistere debet in dissensu determinationum accidentalium & essentialium (§. 504. *Ontol.*). Quoniam vero dissensus consistit in contrarietate tendentiarum ad commune aliquod obtinendum (§. *cit.*); determinationes essentielles & accidentales ad contraria tendere debent. Quamobrem cum perfectio essentialis ex illa tendentia determinationum essentialium ad unum quid oriatur (§. 528. *Ontol.*); imperfectio accidentalis contrariatur perfectioni essentiali. Sed imperfectio ista accidentalis ipsum malum morale qua tale est (§. 577.). Malum igitur morale perfectioni essentiali contrariatur.

Cum demonstratio terminis generalibus concepta obscurior esse possit, præsertim ubi integram mali moralis notionem

nem penitus evolvere nondum licet; exemplo aliquo eam illustrari opus est. Corpus humanum eam habet structuram, ut functiones omnium organorum vitalium tendant ad ejus conservationem & organa cetera ita comparata sunt, ut eorum motus conservationi corporis & ejus destructioni convenienter determinari possit. Unde motus isti in se indifferentes fiunt vel boni, vel mali, prouti vel ita determinantur, ut ad conservationem corporis quid conferant, vel alio modo, ut ad ejus destructionem tendant. Corpus humanum essentialiter aut, ut Scholastici loqui solent, substantialiter perfectum est, quatenus functiones organorum vitalium in conservationem corporis adeo pulchre conspirant & organorum ceterorum functiones eidem fini convenienter determinari possunt: at idem accidentaliter perfectum evadit, ubi horum functiones similiter eo determinantur modo, ut conservationem corporis promoveant, minime autem eidem contrariantur. Quodsi vero contingat, eas determinari ita, ut conservationi corporis contrariantur, veluti si manus porrigatur ad cibum grati saporis, sed sanitati infestum, hicque in os ingestus deglutatur; imperfectio hinc oritur accidentalis, quam adeo contrariari perfectioni essentiali liquet. Etenim essentialis perfectio respicit sanitatem tanquam finem; accidentalis imperfectio eandem tanquam finem minime respicit, respicit enim tanquam finem ex grato sapore percipiendam voluptatem, quæ per accidens sanitati contrariatur. Et hoc pacto intelligitur, quomodo malum morale contrarietur perfectioni essentiali. Quodsi terminos abstractos, qui in demonstratione occurrunt, per ea, quæ ipsi in exemplo respondent, explicare volueris; nihil amplius obscuritatis superesse poterit, etiamsi adhuc deficiat lumen istud, quo abstracta conspicua redduntur acutioribus, cum jam abstracta intueri liceat in concretis non adeo difficili attentione animadvertenda.

§. 579.

*Malum morale per aliam rationem determinatur; quam Ratio de-
perfectio hominis essentialis. Malum enim morale aut per e-* *terminans
andem rationem determinatur, quo perfectio hominis essentialis mali mo-
lis ralis.*

lis determinatur, aut per diversam (§. 53 *Ontol.*). Ponamus si fieri potest, malum morale per eandem rationem determinari, per quam determinatur perfectio essentialis. Quoniam perfectio accidentalis eandem rationem determinantem habet, quam habet essentialis (§. 529 *Ontol.*); malum morale consistere debet in perfectione hominis accidentali: quod cum sit absurdum (§. 577.), patet, quod malum morale per aliam rationem determinari debeat, quam perfectio hominis essentialis.

Idem etiam directe ostenditur hoc modo. Malum morale in imperfectione accidentali consistit (§. 577.). Quamobrem cum imperfectionem contrariam esse perfectioni, collatione definitionum perfectionis & imperfectionis pateat (§. 503. 504. *Ontol.*), & si determinans ratio eadem fuerit, determinatum quoque idem esse debeat (§. 192. *Ontol.*); ratio determinans, quam habet perfectio (§. 505. 506. *Ontol.*), imperfectioni convenire nequit. Habet vero perfectio accidentalis eandem rationem determinantem, quam habet essentialis (§. 529. *Ontol.*). Quamobrem fieri non potest, ut imperfectio accidentalis eandem rationem determinantem agnoscat, quam habet essentialis, consequenter necesse est, ut per aliam rationem determinetur, quam perfectio essentialis. Atque adeo patet, malum morale per aliam rationem determinari, quam perfectio hominis essentialis determinatur.

Patet idem in exemplo modo proposito. Perfectio corporis nostri essentialis, quatenus vivum est, determinatur per conservationem corporis, atque per eam tanquam rationem quandam generalem explicari potest, consequenter conservatio corporis est perfectionis corporis nostri, quatenus tanquam vivum spectatur, essentialis ratio determinans (§. 506. *Ontol.*). Enimvero imperfectio accidentalis determinatur in dato casu per voluptatem ex cibi ac potus sapore grato percipiendam, qui sanitati nocet, non quia saporem gratum habet,

bet, sed alia de causa. Determinatur adeo per rationem aliam, quam perfectio corporis humani qua vivi essentialis. Atque hoc pacto liquet, quod, quando cibum appetimus vel potum sanitati infestum ac ideo vitæ ipsi insidiantem, malum morale seu id, quod volitionis actum vitiosum reddit (§. 374.), per aliam rationem determinari, quam per quam determinatur perfectio corporis nostri essentialis. Quod vero ratio hæc contrarietur rationi determinanti perfectionis essentialis, hoc est, quod voluptas ex cibi ac potus grato sapore percipienda adversetur sanitati ac conservationi corporis, id ex accidente est, quatenus nempe hic sapor inest cibo sanitati noxio, consequenter conservationi corporis inimico.

§. 580.

Malum morale abusu libertatis irrepit in actiones liberas. Quomodo
 Actiones liberæ internæ sunt volitiones ac nolitiones animæ (§. malum 567.), adeoque per essentiam animæ non determinatæ (§. 940. morale ir-Psychol. empir.). Quoniam itaque anima se ipsam determinat repat in ad volendum & nolendum (§. 932. Psychol. empir.), ita ut volitiones ac nolitiones in se contingentes sint (§. 935. Psychol. liberas, empir.), adeoque oppositæ æque possibiles (§. 294. Ontol.); evidens est eas quoque ab anima contraria ratione determinari posse, quam qua determinantur. Jam malum morale, aut, quod perinde est, actio libera, cui idem inhaeret (§. 374.), per aliam rationem determinatur, quam perfectio hominis essentialis (§. 579.). Determinari igitur quoque poterat per rationem eandem, qua perfectio essentialis determinatur, & hoc pacto ad perfectionem hominis accidentalem faceret (§. 529. Ontol.), consequenter mala minime foret (§. 577.). Quoniam adeo anima in volendo ac nolendo libera (§. 942. Psychol. empir.), vi libertatis suæ se in hanc potius, quam alteram contradictionis partem determinat (§. 941. Psychol. empir.), libertate autem sua omnino abutitur, si eas per aliam rationem determinat, quam per quam determinatur perfectio essentialis; malum
 (Wolffii Theol. Naturalis) T t t mo-

morale abusu libertatis in actiones liberas irrepere patet.

Quomodo actio libera reddatur vitiosa & sic malum morale in eam irrepit, clarissime patet in exemplo, quod paulo ante proposuimus. Si quis voluptatis percipiendæ gratia cibum ac potum sanitati inimicum capit; actio libera mala est, siue eam interne, siue externe spectes, hoc est, siue volitionem animæ, siue motus corporis eidem respondentes consideres. Organa vitalia corporis eas habent functiones, quæ ad conservationem vitæ ac sanitatis corporis tendunt, adeoque ratio determinans perfectionis corporis humani, quatenus vivum, est conservatio corporis, aut, si distinctius rem omnem enunciare volueris, conservatio vitæ, sanitatis ac vigoris corporis. Qui solius voluptatis percipiendæ gratia cibum ac potum capit sanitati infestum; is per aliam rationem hanc actionem determinat, quam per eam, qua determinatur perfectio corporis essentialis. Fieri autem poterat, ut in appetendo cibo ac potu vitæ, sanitatis ac vigoris corporis sui rationem haberet, eligens cibum, quem sanitati conducere novit, sed abstinens ab eo, quem eidem infestum experitur. Abusu igitur libertatis suæ accidit, quod malit voluptatis ex cibo ac potu percipiendæ potiore habere rationem, quam sanitatis. Atque hoc pacto actio, quæ physice spectata nihil vitii habebat, cum cibum ac potum sapere per se malum non sit, abusu libertatis efficitur mala & malum morale irrepit in actionem physicam, quæ perinde bona effici poterat usu libertatis, quam malo morali inficitur illius abusu.

§. 581.

*An Deus
malum
morale velit.*

Deus malum morale velle nequit, aut fieri non potest, ut Deus velit malum morale. Etenim Deus vult, quod in se optimum est (§. 383). Quamobrem cum quid in se sit bonum, quatenus suam habet perfectionem tam essentialem, quam accidentalem (§. 370.); fieri non potest, ut Deus velit imperfectionem hominis accidentalem. Consistit vero malum morale

morale in imperfectione accidentali (§. 577.). Fieri itaque non potest, ut Deus velit malum morale.

Idem etiam sic ostenditur. Deus vult, quicquid sibi repræsentat tanquam optimum tum in se, tum in relatione ad se ipsum (§. 390.), consequenter cum quid in se bonum sit, quatenus suam habet perfectionem tam essentialem, quam accidentalem (§. 370.); summam vult rerum perfectionem essentialem & accidentalem, quam habere possunt. Fieri adeo nequit, ut quod imperfectioni essentiali repugnat velit (§. 28. *Ontol.*). Quamobrem cum malum morale perfectioni essentiali repugnet (§. 578.); ut Deus malum morale velit fieri nequit.

Dum Deus vult existere hominem, qui ea habet corporis organa, quorum functiones tendunt ad conservationem ejusdem; evidens omnino est velle Deum corporis humani conservationem, consequenter fieri non posse, ut eandem nolit (§. 28. *Ontol.*). Unde porro liquet impossibile esse, ut Deus velit hominem capere cibum ac potum sanitati corporis infestum. Quod si in hoc casu speciali substituas notiones generales per abstractionem facile separandas; ipsa prodibit theorematibus præsentis demonstratio. Ceterum hinc liquet quam sit necessarium intrinsecam bonitatem ac malitiam actionum humanarum agnosci, secus enim fieri haud quamquam poterit ut demonstretur, Deum non velle malum morale, cum quid demum moraliter malum agnoscat, ubi Deum istud nolle supponitur. Et porro intelligitur, indifferentiam actionum ante legem perinde ac essentias arbitrarias sese tantummodo probare illis, qui res profundius scrutari minime solent.

§. 582.

Deus mundum hunc non elegit ob malum morale, quod in eo existit. Ponamus enim Deum elegisse hunc mundum ob mundum malum morale, quod in eo datur. Cum electio sit actus vo-

Tit 2

*el-g-erit ob
lun- malum
morale.*

luntatis, quatenus libera est (§. 941. *Psychol. empir.*); necesse est Deum velle malum morale: quod cum sit absurdum (§. 581.), Deus mundum hunc non elegit ob malum morale, quod in eo datur.

Idem etiam sic ostenditur. Deus hunc mundum ex ceteris elegit ob maiorem perfectionem, quæ ipsi quam ceteris inest (§. 325.). Quoniam itaque malum morale, quod ex tota hac rerum serie eadem salva tolli nequit (§. 556.), in imperfectione accidentali consistit (§. 577.) & perfectioni essentiali repugnat (§. 578.); fieri non potest ut mundum hunc elegerit ob malum morale, quod in eo locum habet.

Elegit nimirum Deus mundum intuitu perfectionis, non vero intuitu mali moralis, etsi hoc non obstiterit, quo minus eundem eligeret, propterea quod seriei huic ita implicatur, ut, salva perfectione ejusdem, tolli minime possit (§. 552. 556.): quod cum probe notandum sit, e re esse judico ut sequens propositio subjiciatur.

§. 583.

Cur Deus non obstante malo morali hanc rerum seriem decreverit.

Malum morale obstare minime potuit, quo minus Deus existentiam hujus universi decerneret. Deus decernit quod optimum in se est (§. 515.), consequenter eam rerum seriem, quæ plus perfectionis habet reliqua quacunque (§. 370.). Quamobrem etsi Deus hanc rerum seriem decernere non potuerit ob malum morale, quod eidem implicatur (§. 582.): quoniam tamen eidem ita implicatur, ut salva ejus perfectione ab eadem removeri minime possit (§. 552. 556.), nec obstat, quo minus in ea plus sit perfectionis, quam in ceteris quibusvis (§. 550.); nec obstare potuit, quo minus hanc rerum seriem, seu, quod perinde est, existentiam hujus universi decerneret.

Nimirum motivum voluntatis divinæ est summa hujus mundi perfectio, qua ceteros possibiles omnes vincit, cum Deus hunc mundum elegerit ob maiorem perfectionem, qua ceteris

ceteris præstat (§. 325.), consequenter quatenus eundem sibi tanquam optimum repræsentavit (§. 370.). In ipsa autem hac repræsentatione motivum voluntatis Dei decernentis consistit (§. 389.), ex parte scilicet objecti (§. 340.). Motivum istud est ratio sufficiens decreti (§. 887. *Psychol. empir.*), consequenter quamdiu nihil in eo mutatur, nec ulla ratio est, cur Deus hanc rerum seriem decernere noluerit. Enimvero etsi Deus nostro loquendi modo a perfectione hujus universi animum adverterit ad malum morale, quod seriei huic ita implicatur, ut salva perfectione, qua ceteris in universum omnibus præstat, ab eadem separari minime possit (§. 552. 556.); non tamen ideo hanc seriem rerum ceteris imperfectiorem esse agnovit, sed potius vidit, ipsam summæ ejusdem perfectioni minime obstare (§. 550.). Motivum adeo divinum idem fuisse intelligitur, quod erat ante, cum Deus tantum respicere supponebatur perfectionem hujus universi, non attento malo morali. Quamobrem nec malum morale in causa esse potuit, ut Deus eam seriem rerum non decerneret; quam decernere voluit intuitu perfectionis. Fingimus Deum humano more deliberantem, ut facilius intelligantur, quæ alias difficilius comprehenduntur, exemplo ipsius S. S. quæ de Deo eadem de causa loquitur humano more. Pone te ipsum eligere aliquod objectum ex pluribus, quorum eligere poteras, quod maxime placuerit. Pone electionem a te fieri cum ratione summa, ita ut nihil in eadem jure reprehendi possit, adeoque ob perfectionem, qua ceteris eligibilibus præstat. Pone facta electione te deprehendere in objecto electo aliquem nævum, qui displicet & quem, si fieri posset, abesse mallets. Pone denique te re accuratius expensa reperire, nævum istum minime obstare, quo minus objectum electum perfectione cetera eligibilia vincat. Cum motivum electionis nævi istius agnitio minime mutet, nonne nævo hoc non obstante in electione ista firmiter persistis, utut eandem non probes, nec ob ipsum hoc potius objectum eligas, quam aliud. Quod vero supra (*not.* §. 566.) de malo physico annotavimus, idem quoque de morali firmiter tenendum. Scilicet quamvis Deus non elegerit mundum ob

malum morale, seu intuitu ejusdem; non tamen ideo affirmandum ipsum in decreto suo mali moralis nullam habuisse rationem. Etenim & hic contrarium ostendemus deinceps, quando de sapientia Dei acturi sumus. Dirigit quoque Deus malum morale ad bonos fines & hoc ipso, quemadmodum *D. Thomas* loquitur, idem pertinet per accidens ad decorem universi & ad majorem ejus perfectionem facit. Sed de his paulo post apertius.

§. 584.

*Permissio
quid sit.*

Permittere dicimur, quod cum ab alio neque fieri, neque non fieri velimus, quo minus idem fiat, impedire nolumus. Unde *permissio* est volitio non impediendi aut, si mavis, nolitio impediendi, quod ab alio nec fieri, nec non fieri volumus. Quodsi ideo impedire nolumus, quia non possumus, *permissio* dicitur *involuntaria*, subinde etiam coacta: quo in casu in vernacula dicimus, *ich muß es geschehen lassen*. Si vero impedire nolumus, quod possumus, *permissio voluntaria* appellatur: quo in casu vernacula dicere solemus, *ich will es geschehen lassen*.

Actus permissionis non consistit in nuda omissione volitionis ac nolitionis, ut quoad nos indifferens sit quid fiat, sed ulterius quid requiritur. Quamobrem ut rectius intelligatur, qualis sit ille actus, status permittentis & ad volendum ac nolendum indifferens inter se conferri debent. Si quis ad volendum & nolendum indifferens est, nullæ suppetunt rationes, cur quid velit, vel nolit, tuncque quid fiat, minime curamus, nec proprie a nobis permitti dicitur ut idem fiat, sit ita quod per inconstantiam loquendi subinde permitti dicitur. Ita si Turcæ eligunt Imperatorem, nullæ nobis sunt rationes, cur hunc potius eligi velimus, quam alium, vel cur eundem ab ipsis eligi nolimus. Unde nec volumus, ut is ab ipsis eligatur, nec nolumus, ut eligatur; sed nobis prorsus indifferens est, utrum eligatur, an non eligatur. Ecquis vero dicet serio se permittere Turcis, ut eligant Imperatorem, quem velint? Dicimus potius nos non curare, quem sibi Impe-

Imperatorem eligant. Enimvero longe aliter sese res habet, ubi quid permittimus. Prostant nimirum rationes, ob quas quid ab altero fieri nolumus: prostant etiam rationes, cur idem ab ipso non fieri velle non possimus; ut adeo quæsitus, num id fieri velis, nec respondere possis, velle te ut fiat, nec respondere valeas, velle te ut non fiat. Cum singulæ rationes sint sufficientes, volitiones duæ contrariæ simul poni debebant: quod cum fieri non possit (§. 28. *Ontol.*), inter duas volitiones contrarias resultat actus quidam intermedius, volitio non impediendi, vel quod a te impediri non posse agnoscas, adeoque inanem operam sumere nolis; vel quod rationes sint sufficientes, cur non impedire, quam impedire malis. In permissione adeo involuntaria sive coacta impedire velles, quo minus fieret, si posses, adeoque adest volitio impediendi conditionata, sed inefficax, quia a conditione impossibili suspenditur: unde dicere solemus, nos velle libenter impedire, quo minus fiat, sed cum non possimus, permittendum esse, ut fiat, non tamen id fieri bona nostra voluntate. Ast in permissione voluntaria impedire velles, quo minus fieret, nisi proflarent rationes in contrarium, quæ tibi persuadent, consultius esse ut non impedias, quam ut impedias. Maximi momenti est non modo in Theologia morali, verum etiam in omni philosophia practica, ut actum permissionis intinuius perspicias. Quamobrem nec piget exemplo aliquo speciali eundem illustrare. Ponamus itaque filium tuum ducere velle uxorem, quæ tibi non probatur, te tamen permittere, ut eam ducat. Quoniam fœmina, quam sibi matrimonii vinculo jungere vult, tibi non probatur; non vis, ut eandem ducat. Sunt igitur tibi rationes sufficientes, cur hoc fieri nolis. Enimvero ubi ad animum revocas, quam ancipitis aleæ sit hoc negotium & quantum augeatur malum, si voto non respondeat eventus, & culpa in alium conjici possit, cum quis ab illo se liberum fuisse futurum existimet, ubi voluntate sua stetisset; ut filius non ducat uxorem, quam vult, velle non potes. Sunt igitur tibi rationes sufficientes, cur hoc non fieri velle nequeas. Ergo nec vis hoc fieri, nec vis idem non fieri, seu, quod perinde est, non vis filium ducere

ducere uxorem, quam vult, si rationes priores respicias; & non vis filium non ducere uxorem, quam vult, si rationes posteriores respicias, adeoque absolute loquendo neque filium ducere, quam vult, uxorem, neque eam non ducere vis. Impossibile vero est, ut simul nolis, filium ducere uxorem, quam vult, & ipsum eandem non ducere. Quamobrem cum rationes ad actum utrumque sint sufficientes, te illud non impediturum tandem statuis, etsi jure tuo usus, idem impedire posses, vel etiam satis noveris, filium voluntati tuæ minime repugnaturum. Vides adeo actum permissionis consistere in volitione non impediendi, quæ succedit in locum duarum volitionum contrariarum, quibus simul locus esse non potest. Notionem permissionis probe perpendi velim: quamvis enim confusa communis sit satis determinata, ut in ea applicanda non facile quis aberraret, hic tamen & in philosophia practica distincte evoluta opus est, ne in judiciis de permissione facta a veritate aberrremus, vel difficultatibus implicemur, ex quibus nos extricare haud facile valeamus.

§. 585.

*Decretum
Dei de per-
missione
mali.*

Deus malum morale permittere decrevit. Deus malum morale velle nequit (§. 581.). Ergo nec dici potest, quod voluerit ut malum morale existeret, seu ut homines facerent malum. Malum morale minime ob stare potuit, quo minus existentiam hujus universi decerneret (§. 583.). Ergo nec dici potest, quod voluerit, ut malum morale non existeret, seu ut homines non facerent malum. Et quia malum morale in hac rerum serie datur, patet ipsum minime obstinisse, quo minus eandem decreverit, adeoque nec impedire voluisse, ut ut simpliciter impossibile non sit ipsum tolli (§. 553.). Deus igitur impedire noluit, quo minus homines facerent malum, quod nec voluit, ut ab ipsis fieret, nec ut non fieret. Quamobrem cum id permittatur, quod impedire nolumus, etsi ab
alio

alio neque fieri, neque non fieri idem velimus (§. 584.); Deus malum morale permittere decrevit.

Quod permissio mali moralis non contrarietur attributis divinis, evidentius demonstrabitur inferius. Quoniam tamen ex principiis anterioribus jam deduci potest, eandem Deum minime dedecere: ideo sequentem adjicere lubet propositionem, ne quid prætermittatur, quod argumento difficili quomodocunque lucis quidpiam affundere possit. Cave autem ne de permissione mali in relatione ad Deum judices, nisi eadem penitus perspecta. Unde nec te moveant, quando dicitur, Deum nec voluisse, ut malum ab hominibus fieret, nec voluisse, ut non fieret. Etenim si voluisset, ut non fieret, aut idem per miraculum tolleretur (§. 553.), aut mundum hunc, in quo existunt homines malum patrant, non creasset. Si vero malum fieri vellent, sibi metipsi contrariarentur, cum vellent, quod perfectioni essentiali contrariatur, quam tamen ipsum velle negari haud quaquam potest. Unde D. Thomas, quem in Theologia naturali acumen suum omnibus probasse constat, affirmat: Deum neque velle fieri malum, neque non fieri; sed permittere. Cur vero permittat, inferius clarissime ostendetur.

§. 586.

Non dedecet Deum permissio mali moralis. Etenim De- An per-
um decet eligere mundum omnium possibilium perfectissimum *missio mali*
(§. 333.). Enimvero sublato malo morali ex tota hac rerum Deum de-
serie mundus permanere nequit omnium possibilium perfectis- *deceat.*
simus (§. 556.). Quamobrem cum malum permittere debeat,
si idem tollere nolit (§. 584.); non dedecet Deum malum mo-
rale permittere.

Hic nobis sufficit ostendisse, quod permissio mali moralis Deum non dedecat: inferius autem ostendetur, quod eum deceat, ubi redduntur permissionis rationes Deo dignæ. Et quando concursus Dei ad malas hominis actiones explicaturi sumus, clarissime constabit, malum morale non posse
(Wolffii Theol. Naturalis) U u u tolli

tolli, nisi tollatur quod bonum in se est & ideo ad maiorem mundi perfectionem facit.

§. 587.

*Præscien-
tia malo-
rum mora-
lium.*

Deus mala moralia præscivit ab æterno. Etenim Deus mala moralia permittere decrevit (§. 585.). Quamobrem cum idem ab æterno decreverit (§. 504.) & decreta sua penitus intelligat (§. 511.); ab æterno quoque vidit actiones omnes malas iisdemque inhærens malum morale (§. 231.).

Idem etiam hoc modo ostenditur. Malum morale inhæret actionibus liberis tam internis, quam externis, quatenus illæ animam & ejusdem statum imperfectiorem reddunt (§. 574.), hæ vero corpus atque statum ejusdem imperfectioni obnoxium efficiunt (§. 575.), & illæ quidem physice spectatæ non sunt nisi volitiones ac nolitiones animæ (§. 568.), per naturales leges appetitus & aversionis enatæ (§. 569.); hæc vero physice consideratæ sunt motus corporis volitionibus istis ac nolitionibus animæ respondentes (§. 568.), eodem modo, quo ceteri motus voluntarii in corpore consequuntur, secutæ (§. 572.). Enimvero præscivit Deus omnes effectus rerum materialium & omnes hominum cogitationes, quas inter etiam sunt decreta hominum libera, seu ejus volitiones ac nolitiones quidpiam agendi (§. 524.), & cum decreta sua penitus intelligat (§. 511.), novit etiam ab æterno quod malum morale permittere decreverit (§. 585.). Ergo etiam præscivit omnes hominis cujuscunque actiones malas, tam internas, quam externas, & inde quoad animam ac corpus secuturas mutationes, consequenter mala moralia.

Idem adhuc multis aliis modis ostendi poterat; sed non opus esse prolixioribus, propterea quod præscientiam divinam jam universaliter stabilivimus in superioribus. Cum tamen in philosophia, ubi inquirimus in rationem eorum, quæ sunt (§. 31. *Disc. prelim.*), demonstrationes speciales magis satis-

satisfaciant animo sciendi cupido, quam generales; ideo consultum est hasce minime prætermitti.

§. 588.

Malum morale Deo placere nequit. Etenim Deus libere vult, quicquid vult (§. 431.). Quamobrem cum vi libertatis eligatur, quod volenti placet (§. 941. *Psychol. empir.*), adeoque fieri non possit, ut quid placeat, quod quis velle nequit; nec Deo placere potest, quod velle nequit. Jam vero Deus malum morale velle nequit (§. 581.). Ergo nec malum morale Deo placere potest.

Idem etiam sic ostenditur. Malum morale in imperfectione accidentali consistit (§. 577.), quæ, cum abusu libertatis irrepat (§. 580.), abesse poterat (§. 941. *Psychol. empir.*). Placeat vero Deo quod in suo genere perfectum est (§. 330.), consequenter quod imperfectum est placere nequit. Ergo malum morale Deo placere nequit.

Poterat idem ex ipsa notione mali moralis, quatenus in imperfectione consistit, vi notionis ejus, quod placet ac displicet (§. 542. *Psychol. empir.*), immediate deduci eo prorsus modo, quo supra (§. 330.) demonstravimus, Deo maxime placere, quod in suo genere perfectissimum est. Ita nimirum clarius elucescit ratio, cur malum morale placere nequeat.

§. 589.

Mundus hic Deo non magis placet ceteris ob malum morale, quod in eo datur: hoc tamen non obstat, quo minus ceteris magis placeat. Etenim malum morale Deo placere nequit (§. 588.) ob malum morale. Ergo nec ideo placere ipsi potest mundus ob hoc malum.

Posterius sic ostenditur. Mundus hic adspectabilis Deo maxime placet inter omnes possibiles, quod sit omnium possibilem perfectissimus, quemadmodum supra ostendimus (§. 331.). Enimvero malum morale non obstat, quo minus in eo-

dem major sit perfectio, quam in ceteris possibilibus (§. 550.), immo ex eodem auferri nequit, siquidem omnium possibilium perfectissimus esse debeat (§. 556.). Malum igitur morale non obstat, quo minus mundus hic inter omnes possibiles Deo maxime placeat.

Qui acumine destituuntur, quo in rebus metaphysicis opus est, ex eo, quod mundus, in quo datur malum morale, sit omnium possibilium perfectissimus & optimus, quodque Deo maxime placeat, inferunt: Deo placere malum & esse auctorem mali; sed nulla consequentia. Quamobrem nostrum fuit ostendere, quod malum morale equidem non obstat, quo minus hic mundus Deo omnium maxime placeat, idcirco tamen non placeat ob malum, quod in eo datur, quemadmodum nec malum in se spectatum placere possit, ut nimirum appareat, quam bene odium mali in Deo cum indivulso nexu mali moralis ab eo, qui ipsi maxime probatur, mundo (§. 556.), consistat. Quod si vero quis perpendat, quibus notionibus refertus esse debeat animus, antequam percipere possis, quæ de mali moralis in hac rerum serie inexistencia demonstrata sunt; is non mirabitur ἀδελφίαν hominum illotis, quod dicitur, manibus ad res arduas tractandas accedentium, qui principia, unde veritas, quam defendere volunt, pendet, tanquam eidem contraria impugnant. Exemplo autem ipsorum docemur, quam sit necesse, veritates inter se connexas in systemate exhiberi, cum alias incertitudinis & disceptationum inutilium ac absurdarum nullus futurus sit finis.

Quo sensu

S. S.

Deo tri-

buat consi-

litum eo

consilio,

de-

cretum &

ejus, qui

operatur

omnia

secundum

consilium

§. 590.

Deo juxta S. S. tribui debet consilium, decretum & pro-

positum eo sensu, quo hæc ipsi tribuimus in antecedentibus. Et-

enim Ephes. I. II. prædestinati dicimur secundum propositum

ejus, qui operatur omnia secundum consilium voluntatis suæ,

κατὰ τὴν βουλὴν τῆς θελήματι αὐτοῦ. Vocabulum βουλή denota-

re actum consultationis, quo disquiritur, quid sit agendum &

non

non agendum, quemadmodum eandem supra definivimus (§. 498.), satis constat. Patet igitur secundum S. S. Deum non indeliberato facere, quod facit, sed potius facere, quod summa deliberatione facta fieri debet. Deus juxta S. S. omniscius est (§. 303.), adeoque scit omnia, quæ cognitiuè possibilis sunt, tam singularia, quam universalis (§. 301.). Cognoscit etiam juxta eandem omnia simul, seu actu unico (§. 216.), ut adeo nihil ipsi dubium videri possit, quemadmodum nobis. Quamobrem etsi consultatione non sit opus nisi in re dubia (§. 500.), consequenter Deus consultatione minime habeat opus (§. 501.); quid tamen fieri in quolibet casu debeat, cum vi omniscientis suæ perspiciat, perinde est ac si deliberasset, quid fieri optimum sit. Quamobrem quando in S. S. Deo consilium seu consultatio tribuitur, id non aliter accipi potest, quam quod Deus summa certitudine intuetur, quid agendum optimum sit, ita ut ab eo nil quicquam fiat, quod ab hominibus fieri solet, quando absque deliberatione seu nullo consilio quid faciunt. Atque adeo patet, juxta S. S. Deo tribuendam esse consultationem eodem sensu, quo supra eandem definivimus (§. 502.), Deoque vindicavimus (§. 501.),

Jam vero docente Apostolo Deus facit omnia juxta consilium voluntatis suæ. Consilium in se spectatum actus intellectus est, non voluntatis (§. 502.), seu tribuitur enti intelligenti, quatenus quid agendum sit perpendit, antequam id agere velit. Quamobrem quando Deus dicitur operari omnia juxta consilium voluntatis suæ; id alio sensu accipi non potest, quam quod Deus non faciat, nisi quod faciendi seria ipsi jam fuit voluntas, antequam faceret; non autem velle, nisi quod velle quis potest certo consilio, seu prævia omni deliberatione ad certo quid statuendum necessaria. Juxta S. S. adeo Deus determinavit voluntatem suam ad faciendum, quod facit, eodem modo, quo ens intelligens eandem determinare poterat, præ-

via consultatione. Enimvero ista voluntatis ad aliquid agendum determinatio est id, quod decretum appellare solemus (§. 497.). Atque adeo liquet, Apostolum Deo tribuere decretum, quando affirmat, ipsum omnia operari secundum consilium voluntatis suæ, & quidem eodem prorsus sensu, quo nos ipsi decretum tribuimus in superioribus, & quo decretum vulgo dicimus omnes. Etenim quando quid decrevisse dicimur, utique affirmamus, nos consultatione facta tandem statuisse, hoc fieri debere, atque adeo hoc facere velle.

Rationem reddit Apostolus, cur simus prædestinati secundum propositum Dei, quia Deus omnia operatur secundum consilium voluntatis suæ, hoc est, quia non sine consilio decernit, quod facturus est, quemadmodum modo ostendimus. Quamobrem per propositum intelligi nequit nisi volitio exequendi decretum. Etenim si indeliberato quid agere vellet, hoc est, si sine consilio decerneret non satis pervidens, quid agendorum optimum sit; fieri poterat, ut meliora edoctus decretum suum mutaret, sicque propositum ipsius non foret constans. Sed quia non decernit, nisi quod summa certitudine intuetur tanquam agendorum optimum; voluntas suam exequendi decretum constans est, ac ideo, quod decernit, exequi etiam vult & quemadmodum vult suo tempore exequitur. Enimvero actus voluntatis, quo determinatur executio decreti, a nobis dicitur propositum. Atque adeo patet juxta S. S. Deo tribuendum esse propositum eo sensu, quo supra idem definivimus (§. 503.).

¶ Dictum Scripturæ sacræ, quo usi sumus ad probandum, Deo juxta eandem tribuendum esse consilium, decretum atque propositum, eo quidem sensu, quo eadem definivimus, vulgo a Theologis allegari solet, ut probent Deo in sacris tribui consultationem & decretum, quemadmodum nos consulere & decernere solemus. salva tamen quoad consilium ea
diffe-

differentia, quam omniscientia exigit. Ex iis tamen, quæ diximus, intelligitur, non adeo in propatulo esse nervum probationis, sane non patentem, nisi notionum evolutione contextui convenienter facta. Quemadmodum itaque in philosophia notionum evolutione evidentiam venamur veritatibus universalibus, ut tales agnoscantur; ita operæ pretium faceret, qui in probandis dogmatis per loca Scripturæ sacræ notionum evolutione contextui convenienter facta lucem fœneraret probationibus, ut probari per ea certum sit, quod probare debent, etiamsi in examinandis probationibus scrupulofior fueris evidentiæ demonstrationum adfuetus. Nec dubito, quin attentione ad ea, quæ consensum demonstrationum nostrarum cum Scriptura sacra evicturi in medium afferimus, ideam exemplarem consequi detur, ad tam arduum ac nostro ævo tam utile opus profuturam.

§. 591.

Decreta Dei juxta S. S. sunt æterna, seu Deus ab æternitate juxta eandem decrevit, quicquid decrevit. Decreta Dei decreto juxta S. S. sunt actus voluntatis divinæ (§. 590. 497.). Enimvero quicquid Deus vult, secundum S. S. ab æterno voluit (§. S. S. 409.). Ergo quicquid Deus decrevit, juxta S. S. ab æterno decrevit.

Idem etiam ex loco aliquo S. S. probatur immediate hoc modo. Apostolus *Eph. III. 11.* de iis, quæ Deus facit in dispensatione gratiæ in tempore, affirmat ea fieri secundum præfinitionem seculorum, quemadmodum habet versio vulgata. In textu Græco legitur κατὰ πρόθεσιν τῶν αἰώνων, secundum propositum seculorum. Constat phrasi Græcæ propositum seculorum idem esse ac propositum æternum. Apostolus itaque pronunciat propositum Dei esse æternum. In humanis decretum præcedit, propositum sequitur: cum enim hoc determinetur executio decreti (§. 503.), ex decreti approbatione resultat, ubi idem secundis quasi curis perpendimus: quod etsi in Deo non sit verum

rum ratione temporis, in eo tamen intelligi debet ratione ordinis, quatenus humano more nobis repræsentamus ea, quæ in Deo sunt. Quoniam itaque propositum Dei æternum est juxta S. S. quin juxta eandem decretum quoque divinum æternum esse debeat, dubitandum non est.

Plures concurrunt ad decretum actus & alii ab eodem pendent. Quamobrem quando S. S. de decretis vel divinis, vel humanis loquitur, prout circumstantiæ rei decretæ vel hunc potius, vel alium actum respici jubent, nunc hoc, nunc alio utitur vocabulo. Sed nostrum non est de his disquirere: ea igitur criticis & Scripturæ sacræ interpretibus discutienda relinquimus. Ceterum si huc respicere velis, plura occurrent S. S. loca, ex quibus decretorum divinorum æternitas probari potest. Et sane si omnis decreti divini æternitatem stabilire volueris, ne qui decreta temporaria defendunt excipiant, ab æternitate eorum decretorum: quæ Scriptura sacra talia dicit, non esse argumentandum ad omnia cetera, quæ Deus decernit; pluribus dictis S. S. ea evincenda venit. Quamobrem ne hisce ambagibus haberemus opus, maluimus eandem ex principiis S. S. firmiter deducere, antequam locum aliquem adduceremus, in quo decretum aliquod divinum æternum pronunciatur. Quod si veritates revelatæ in systema aliquod coordinarentur, quemadmodum naturales a nobis coordinantur; facilius foret ad res decretas omnes extendere, quæ de quibusdam narrat S. S.

§. 592.

Imper-
scrutabili-
tas decre-
torum di-
vinorum
juxta S. S. *Decreta Dei juxta S. S. imperscrutabilia sunt.* Quæ supra (§. 419.) in medium adduximus ad probandum voluntatis divinæ imperscrutabilitatem a Paulo dicta Rom. XI. 33. ad probandam propositionem præsentem huc transcribi possunt. Etenim judicia illa Dei, de quibus loquitur Apostolus, sunt imperscrutabilia, quia rationes decretorum divinorum assequi minime valeamus.

§. 593.

§. 593.

Decretum Dei juxta S. S. liberrimum est. In S. S. ratio, cur quid Deus faciat, redditur, quia vult facere. Ita Rom. Dei cur IX. 18. dicitur misereri, cui vult, & indurare, quem vult. Et juxta S. S. Jac. I. 18. voluntarie nos genuisse legitur verbo veritatis. Jam *fit liberum.* Deus docente S. S. non facit, nisi quod facere decrevit (§. 590). Quamobrem dicendum est, S. S. hanc reddere decretorum divinarum rationem, quod voluerit hoc potius decernere, quam aliud. Quoniam libere decernit (§. 941. *Psychol. empir.*), qui quid ideo decernit, non alia de causa, quam quod id potius velit, quam aliud, consequenter quod hoc ipsi placeat potius, quam aliud (§. 937. *Psychol. empir.*); decretum quoque Dei juxta S. S. liberrimum esse debere constat.

Idem etiam sic ostendi potest. Decretum est actus voluntatis divinæ (§. 497.). Enimvero voluntas Dei juxta S. S. libera est ab omni coactione externa & ab omni ente alio extra ipsum independens (§. 410.), immo Deus vult quod ipsi placet (§. 411.), quemadmodum libertas voluntatis exigit (§. 941. *Psychol. empir.*). Decretum igitur Dei juxta S. S. liberrimum dicendum est.

Quando dicimus in S. S. tanquam rationem decreti allegari, quod Deus id voluerit, ut loco rationis voluntas stare videatur; id non ita accipiendum est, quasi nullæ sint decreti divini rationes. Etenim ipsa S. S. magistra decreta divina nobis imperscrutabilia sunt (§. 592.). Quamobrem cum imperscrutabilia sint, quia motiva voluntatis divinæ (§. 397.), hoc est, rationes cur Deus quid voluerit, certo assequi minime valemus; non ideo negandum ullas dari rationes decreti divini, etsi ideo decrevisse quid ipsum dicatur, quia voluit. Cur enim voluerit, dantur rationes: ergo & quod decrevit.

§. 594.

Decretum Dei juxta S. S. immutabile est. Disertis verbis consilium divinum immutabile dicitur Hebr. VI. 17, ubi Apoc. (Wolfii Theol. Naturalis)

Immutabilitas decreti juxta S. S.
Xxx
No.

stolus: Deus, inquit, volens ostendere pollicitationis hæredibus immobilitatem consilii sui, interposuit jusjurandum. Nimirum vocabulum Græcum τὸ ἀμετάθετον vi quidem originis immobilitatem significat, quemadmodum vertit interpres vulgatus: cum vero usurpetur de rebus, quæ moveri proprie loquendo non possunt, facile intelligitur, quod immutabilitatem indigitare debeat. Quod enim immutabile est, immotum dicitur sensu metaphorico. Unde & communiter Lexicographi τὸ ἀμετάθετον per immutabilitatem reddunt. Dubium igitur nullum superest, quin Apostolus consilium Dei immutabile statuat. Consilium Deo in S. S. tribuitur eodem significatu, quo nos idem definivimus (§. 590.). Quamobrem cum ipsum sit actus intellectus divini, quo quid agendorum optimum sit, certo judicio definit (§. 502.); Apostolo docente Deus judicium suum de eo, quod factu optimum judicat, nunquam mutat, adeoque quod ab æterno fieri debere judicavit, id fieri debere semper judicat. Enimvero consilium in humanis sequitur decretum (§. 499.), & Deus quod factu optimum judicat, facere vult (§. 390.). Quamobrem decretum Dei cum consilio ipsius adeo arcto vinculo connectuntur, ut illud absque hoc esse non possit, ut adeo S. S. decretum a consilio non distinguat, sed sub eodem simul comprehendat, præsertim cum in Deo cum consilio simul ponatur decretum. Decretum adeo Dei juxta S. S. quoque immutabile dicendum est.

Idem ex vetere Testamento probari potest eodem modo. E. gr. *Psal.* XXXIII. II. consilium Domini in æternum manere dicitur. Vocabulum Hebraicum נַסִּי Hebræis usurpatur in eo casu, quo alteri consilium impertire dicimur, veluti cum Achitophel 2. *Sam.* XVII. consilium impium daret Absolomo de Davide patre opprimendo, Chusæus Davidi benevolens contrario consilio ipsum irritum redderet. Quando alteri consilium damus, ipsi judicium nostrum de eo, quod fieri debet, expo-

exponimus. Atque adeo patet, Deo tribui consilium, quatenus ipsemet iudicat, qui fieri debeat: qui sane significatus idem, quem huic vocabulo tribuimus (§. 502.) & in quo Deo juxta S. S. consilium vindicavimus. De hoc Dei consilio inculcat S. S. quod maneat in æternum. Quod in æternum manet, minime mutatur: id quod nemo non concedit. Dei adeo consilium prorsus immutabile. Unde porro, quemadmodum modo fecimus, deducitur, immutabile esse decretum Dei.

Quærit *Jesaias* cap. XIV. 27. consilium seu decretum Dei quis irritum faciat? Constat ex principiis artis oratoriz interrogationem æquipollere forti affirmationi. Vates itaque divinus sancte affirmat, non reperiri ullum, qui Dei consilium vel decretum irritum facere possit. Juxta S. S. adeo decretum Dei non modo immutabile est ex parte Dei, quem nunquam poenitere potest, quod decrevit *Num.* XXIII. 19; verum etiam extra Deum non datur aliqua causa, quæ ipsum consilium suum atque decretum mutare cogat.

Quoniam immutabilitas decreti divini plurimum influic in praxin; haud parum refert, ne quis de ea dubitet. Quamobrem Apostolus *Hebr.* VI. 17. Deum juramento obstrinxisse fidem suam hominibus, ut eos de immutabilitate consilii ac decreti sui certos redderet. Præterea ex iis, quæ ad præsentem propositionem dicta sunt, haud obscure intelligitur, non a vero aberrare, qui de decreto divino accipiunt, quæ de consilio Dei dicuntur in Scripturis. Etsi enim consilium a decreto differat, siquidem accurate distinguere velis, quæ diversa sunt, cum decretum ex consilii approbatione oriatur, quemadmodum hoc ex consultatione resultat: attamen sicuti consilium de actu consultationis accipi solet in Theologia, quia ejusdem finis est (§. 498.); ita quoque consilium pro decreto accipitur, quia hoc ex illo resultat. Id autem maxime succedit quoad Deum. Etenim cum Deus consultatione opus non habeat, quemadmodum homines (§. 501.), consultatio quoque & consilium quoad ipsum non differunt, nisi

quatenus hoc resultare concipis ex collatione plurium possibilem, quæ unico intellectus actu simul repræsentantur (§. 160.), & decretum consilio statim adheret, citra ullam hæsitacionem præsentem atque futuram. Qui intimius perspicit, quæ de natura intellectus ac voluntatis divinæ dicta sunt, satis intelliget, quo sensu Deo tribuenda sint, quæ de consultatione, consilio & decreto, itemque proposito quoad homines dicuntur, ut de Deo dicta humano more, quemadmodum ipsum deceant, explicentur.

§. 595.

Futuricio rerum a decreto pendens juxta S. S. *Quicquid Deus decrevit, illud certo evenit suo tempore juxta S. S.* Etenim decretum Dei juxta S. S. immutabile est (§. 594.) & *Jesaias* cap. XIV. 27. adeo evidens esse pronunciat, ut a nemine in dubium vocari possit, quod decretum Dei nemo irritum facere & ejus executionem nemo impedire valeat. Dominus enim, inquit, exercituum decrevit: & quis poterit infirmare (seu irritum facere?) & manus ejus extenta: & quis avertet eam? Nemo non videt per extensionem manus hic significari decreti executionem, consequenter manum avertere non posse idem esse, ac decreti executionem minime impedire posse. Jam si neque fieri potest, ut Deus ipse decretum suum mutet, neque ut quis idem irritum faciat, neque ut executionem quisquam impediatur; quin illud certo evenire debeat, quod Deus decrevit, evidentissimum est.

Idem affirmat ipse Deus *Jes.* XLVI. 10. consilium, inquit, meum stabit & voluntas mea fiet, ubi fidem facere vult prædictionibus suis futurorum, seu, ut verba Hebraica proprie sonant, omnem delectationem meam *אני עושה* facturus sum. Hanc adeo Deus reddit rationem, cur quid certo eventurum sit, quod prædicat, quia illud ipsum decrevit, consilium vero suum neque a se mutatur, neque ab alio irritum fieri potest, nec quisquam ejus executionem impedire valet. Deus itaque pro-

propositionis præsentis veritatem eodem modo demonstrat, quo ex Scripturæ principiis eandem evicimus.

Patet adeo futuritionem rerum Scriptura sacra magistra pendere a decreto divino, quatenus ipsum immutabile, nec a quoquam irritum fieri potest, ejus vero executio irresistibilis. Immutabilitas fuit ex omniscientia Deo juxta S. S. tribuenda (§. 303.), impossibilitas decretum irritum faciendi ex independentia voluntatis a rebus extra se in S. S. asserta (§. 410.), & irresistibilitas a magnitudine potentiæ independentis juxta S. S. Deo competentis (§. 416. 413.): quemadmodum facile assequitur anteriorum gnarus.

§. 596.

Decreta divina juxta S. S. Deum decent. Cum supra *Quod Deus* ostenderemus, Deum, docente Scriptura sacra, velle quod *decernat*, ipsum decet (§. 412.), illud probavimus ex eo, quod Deus *quæ ipsum* vasa iræ in interitum aptaverit, vasa vero misericordiæ in gloriam præparaverit *deceant* Rom. IX. 22. 23. Quoniam determinatio *juxta S. S.* voluntatis divinæ ad aliquid agendum est decretum Dei (§. 497.) etiam in sensu S. S. (§. 590.); dubium non est, quod Apostolus ibidem loquatur de eo, quod Deus decrevit. Quamobrem quæ ibidem diximus ad adstruendam veritatem propositionis, quod Deus velit juxta S. S. quæ ipsum decent; ea quoque veritatem propositionis præsentis confirmant, ut adeo eadem huc denuo transferri non sit opus. Potest vero præsens propositio etiam probari hoc modo. Quæ Deus vult, ea ipsum decent juxta S. S. (§. 412.). Sed quæ decernit, ea vult (§. 590.). Ergo etiam quæ decrevit, ea ipsum decent juxta S. S.

Quando de sapientia Dei deinceps acturi sumus, clarissime constabit, quomodo Deum deceant quæ decrevit: constituit enim finem se dignum & ex eo elucet, quod non fecerit, nisi quod ipsum deceat. Sane quæ ex Rom. IX. 22. 23. ad probandam propositionem præsentem allegantur, a fine,

quem Deus sapienter intendit, desumuntur. Maximum momentum ad praxin affert præsens propositio: quamobrem haud parum interest, ne ulla careat luce, qua perfundi potest.

§. 597.

*Certitudo
executionis
decreto-
rum divi-
norum.*

Deus juxta S. S. decreta sua certo exequitur. Docet hoc Baalamus jussu ipsius Dei *Nam. XXIII. 19.* Ita enim ad Baalam: Dixit ergo, inquit, & non faciet? Locutus est, & non implebit? Reddit quoque rationem, quod Deus non sit quasi homo, ut mentiatur; nec ut filius hominis, ut mutetur. Quæ Deus dicit se facturum, illa utique facere decrevit. Et enim ex eo, quod dicit, se quid facturum, intelligitur, eum facere velle quod decrevit. Quodsi vero facere vult, quod decrevit, certo etiam facturum est & verbis suis stabit. Nimirum quando homines non faciunt, quod se facturos dicunt, aut non serio loquuntur, aliter nimirum loquentes, aliter sentientes; aut mentem suam mutant. Deus vero aliter non loquitur, aliter sentit, consequenter dubitari nequit, quin sibi proposuerit ea facere, quæ se facturum dicit, adeoque eadem decreverit (§. 503.). Præterea eundem Deum nunquam poenitere potest decreti ac propositi sui, adeoque nulla subest ratio, cur quæ decrevit, exequi non debeat.

§. 598.

*Præscien-
tia juxta
S. S. Deo
tribuenda.*

Deus præscivit omnia juxta S. S. ipsas etiam cogitationes ac libera hominum decreta. Ipsemet Deus *Jes. XLIV. 7.* scientiam futurorum seu præscientiam tanquam characterem veri Dei allegat, quo a falsis Diis distinguitur. Quærit enim: Quis similis mei? quam ipsam interrogationem esse fortiolem negationem, nemo non novit. Reddit autem hanc rationem, quod nemo sui similis sit, atque adeo vi *vers. 6.* ipsemet sit solus Deus, nec præter eum detur Deus alius, quia ventura, & quæ

quæ futura sunt, annunciare nemo valet, quemadmodum ipse fecit per Prophetas. Juxta S. S. itaque præscientia futurorum Deo tribuenda tanquam ipsi propria. Similiter præscientiam futurorum sibi tanquam propriam, nec ulli enti communicabilem tribuit Deus *Jes. XLII. 8.* ubi: Ego, inquit, Dominus, hoc est nomen meum: gloriam meam alteri non dabo & laudem meam sculpsibilibus. Quæ primo fuerunt, ecce venerunt: nova quoque annuncio: antequam sciantur, audita vobis faciam. Sane hic denuo Judæis probat Deus, se esse verum Deum, quod futura prædicere possit, & se hoc facere posse probat inde, quod fecerit. Et ne dubitent, quod omnia promiscue præsciat, nec ulla ex parte limitata sit ejus præscientia, monet, se in posterum quoque hoc facturum. Etenim qui potuit futura prædicere, quæ evenerunt, qui in præsentē prædicit adhuc futura, & qui sibi proponere potest etiam olim prædicere adhuc ventura, is omnium futurorum scientiam habere debet. Neque enim hic suspicioni locus, quasi prædictioni vel casu responderit eventus, aut quod ob causas quasdam particulares quædam prævidere potuerit. Eadem discretis admodum verbis inculcat Deus *Jes. XLVIII. 3. 4. 5.* quæ legi merentur. Abunde igitur patere arbitror, juxta S. S. Deum præscire promiscue omnia.

Inter futura, quæ Deus se prædixisse & prædicere posse apud Jesaiam affirmat, continentur facta hominum, quæ a libero ejus decreto pendere constar. Atque adeo ex iisdem locis probari potest, Deum quoque præscire libera hominum decreta, antequam homines quicquam decreverint, seu quidpiam aliquando decreturi sint. Enimvero cum alia extent Scripturæ loca, in quibus Deo tribuitur præscientia cogitationum nostrarum atque consiliorum & decretorum; non e re esse videtur, ut probationem ex iis petamus. Præscientia cogitationum & decretorum imprimis liberorum animarum omnium clarissi-

rissime docetur *Psal.* CXXXIX. 3. ubi David ad Deum preces fundens: intellexisti, inquit, cogitationes meas de longe, seu e longinquo. Cogitationes e longinquo cognoscere idem omnino est, ac eas cognoscere, cum adhuc procul absunt, adeoque cum nondum sunt præsentes, consequenter quando adhuc futuræ. Patet igitur, Deum, si Davidem audimus, cogitationes hominum cognoscere, antequam sunt præsentes, adeoque futuras, consequenter easdem præscire. Cogitatio etiam complectitur volitiones ac nolitiones animæ, quemadmodum & vocabulum Hebraicum *לרע* tam per cogitationem, quam per voluntatem vertitur abnterprecibus. Nullum adeo dubium est, quin David hic Deo non modo tribuat præscientiam perceptionum animæ, verum etiam volitionum & nolitionum, aut in genere appetitionum ac aversionum ejusdem, consequenter & decretorum liberorum (§. 497.). Quod si vero quis decreta hominum libera sub cogitationibus comprehendere non admittit, aut saltem hæret, num admittere possit; longa disceptatione opus non est: addit enim mox *vers.* 4, Deum prævidisse omnes vias suas. Quocunque modo vias hominis interpretetur, siue proprie, siue improprie, quemadmodum constat phrasi Scripturæ vias quoque designare media, quibus ad finem consequendum utimur; semper liquet, prævisionem viarum continere prævisionem liberorum decretorum animæ, consequenter Davidem Deo tribuere præscientiam liberorum decretorum animæ. Illud autem notatu dignum est, quod David dicat Deum intelligere cogitationes suas a longinquo. Etenim hæc dictio modum prævisionis clarissime exprimit, siquidem recorderis eorum, quæ de præscibilitate rerum omnium, præsertim cogitationum nostrarum ac liberorum decretorum animæ demonstrata sunt in superioribus (§. 232. 233.). Deo nimirum ea, quæ in mundo materiali contingunt, præscibilia sunt per nexum eorundem, quemadmodum ex demon-

stra-

siratione præscibilitatis effectuum rerum materialium liquet (§. 232.), & quæcunque in serie integra perceptionum ac appetitionum atque aversionum continentur, per nexum modificationum animæ, qui per leges facultatum resultat, ac imprimis libera decreta per motiva præscibilia sunt, quemadmodum denuo ex demonstrationibus superioribus abunde patet (§. 233. 234.). Enimvero cum Deus omnia, etiam juxta Scripturam sacram, cognoscat simul, seu actu unico (§. 216.) & hinc intuitive (§. 207.); tota rerum series ipsi præsens exhibetur, antequam quicquam in eadem actu datur, & si quid in ea sumitur tanquam actu existens, quæ deinde sequuntur, tanquam aliquo intervallo ab eodem remota spectantur, quatenus unum sequentium ad actum perungere nequit, nisi aliis intermediis ante suo ordine ad actum successive perductis. Quamobrem si quis ideam quandam hujus prævisionis sibi formare voluerit, non sub alia imagine eadem exhiberi potest, quam per visionem rei e longinquo spectatæ. Etenim ubi oculus consistit, objecta vicina nobis præsentia sunt & ea repræsentant id, quod in serie perceptionum & appetitionum ac aversionum animæ sumitur tanquam actuale. Objectum e longinquo positum dato intervallo a nobis separatur per objecta intermedia ab oculo nostro usque ad ipsum continua serie posita, & hoc ipsum cogitationem aliquam, quæ post eam, quæ actu datur, sequitur, objecta autem intermedia cogitationes intermedias repræsentant, quibus demum præteritis isti locus est. Quemadmodum itaque objectum e longinquo spectatum tibi præsens fieri nequit, nisi omnia intermedia præsentia fuerint; ita quoque cogitationem venturam præsentem fieri non posse intelligitur, nisi omnibus intermediis ante præsentibus. Et hoc modo intelligitur, quomodo omnia Deo sint præsentia ab æterno, hoc tamen non obstante, ventura spectari possint tanquam e longinquo.

(*Wolfii Theol. Naturalis.*)

Yyy

Qui-

Quicumque in principiis ontologicis, cosmologicis & psychologicis probe sunt versati, eis nihil erit obscurum in his, quæ de cogitationibus nostris e longinquo spectatis dicta sunt, quin potius profunditatem sensus verborum Davidis venerabunda in Deum mente suspicient. Cum tamen non levi opera notiones comparentur, sine quibus idea cogitationum e longinquo spectatarum luce sufficiente collustrari nequit; a precipitantia in judicando sibi temperent, qui tanta notiorum ubertate refertum nondum possident animum, aut saltem quæ intelligentibus dicta sunt, sibi dicta non esse putent. Ceterum modus iste ventura e longinquo spectandi, quatenus Deo tribuitur, patet per ea, quæ superius in medium adduximus, cum demonstraremus, Deum in quolibet minimo, quod inest universo, cognoscere totum universum (§. 161.). Quamobrem qui demonstrationem istam probe comprehendit; is & prævisionem cogitationum e longinquo optime concipiet. Acutiores intelligent, quantum principia nostra prosint ad profunditatem sensus Scripturæ eruendam, & quanta insit dictionibus S. S. vis ad ideam eorum animo nostro ingenerandam, quæ ab omni sensu procul remota sunt, ut etiam a rudibus intelligi possint; quantum denique juvent principia nostra ad ideam istam advertendam & demonstrativa ratione stabiliendam, ne pro fictitia habeatur acutioribus. Neque hoc silentio prætereundum, ex modo cognoscendi cogitationes e longinquo patere, quod, quæ de præscibilitate rerum a nobis demonstrata sunt, Scripturæ sacræ conformia sint. Etenim cum Deus dicatur cogitationes intelligere e longinquo, modus aliquis possibilis esse debet, quo eadem tanquam e longinquo cognosci possunt, & qui ex natura intellectus divini & natura rerum fluit. Simile, quod desumitur ab objecto e longinquo viso, & quod ideam in animo suscitatur, vi cujus modus intelligendi cogitationes e longinquo fit intelligibilis, insinuat principia, qualia ad eum concipiendum sunt necessaria. Quamobrem ubi principia ista ea deprehendis, quæ & intellectui divino, & naturæ rerum conveniunt, quatenus ex ipsa Scriptura sacra deduci potest, quin ea auctoritate ejusdem pellantur, dubitari

hæd

hand quamquam potest. Cum vero principia ista eadem deprehenduntur, quæ a nobis vi rationis stabilita & ad declarandam præscibilitatem translata; hoc ipso consensus eorum, quæ præscibilitatis possibilitatem declarant, cum Scriptura sacra abunde patet. Habent hic Theologi, in quo ingenii sui vires exercent, veluti per transennam iam conspecturi Theologiae revelatæ habitum, quem induet, ubi veritates ex Scriptura sacra eruende, in systema aliquod veti nominis redigentur, quod eam eodem modo inter se connexas exhibet, quo veritates naturales in nostro philosophiæ systemate conneximus.

§. 599.

Malum morale juxta S. S. Deo placere nequit. Disertis *Malum morale Deo displices juxta S. S.* verbis hoc affirmat David *Psal. V. 5.* ex versione vulgata in-quiens: Non Deus volens iniquitatem tu es. Qui quid vult, eidem placet quod vult, quemadmodum ex natura voluntatis liberæ constat (§. 938. 939. *Psychol. empir.*) & de ipso Deo certum est (§. 341.), etiam juxta S. S. (§. 411.). Deo igitur iniquitas placere nequit. Unde & *Castalio* vertit: Non is Deus es, cui placeat iniquitas. Vocabulum *עוון* denotare malum morale, quod actionibus liberis hominum inhaeret, noto notius est: unde & iniquus dicitur, qui actiones moraliter malas perpetrat. Quamobrem patet, Davide autore, Deo malum morale placere minime posse.

Idem porro ostenditur ex eo, quod Deus in S. S. malum maximopere detestetur, hominibus severe interdicit, ne actiones malas committant & poenas ipsis infligendas statuat, ubi commiserint. De his tota Scriptura sacra toties loquitur, ut necesse non sit aliqua ipsius verba in medium adduci, cum nemo sit, qui de eo dubitare possit. Immo leguntur quoque passim exempla, quibus Deus hominibus mala physica inflixit ob mala culpæ, hoc est, moralis, atque adeo poenis affecit ob malum morale perpetratum. Et Christo doctore Deus olim,

quando mortui resurgent, poenis æternis afficiet homines ob malum morale in hac vita perpetratum *Matth. XXV. 31. & seqq.* Qui malum detestatur, qui, ne fiat, severe interdicit & poenis gravissimis ejusdem reos afficit, cum tamen nemo sit, cujus judicio & voluntati subjectus sit; is utique malum approbare nequit, multo minus autem ipsum eidem placere potest: quia potius hinc recte inferitur, quod summopere displiceat. Quamobrem ex dictis recte omnino inferitur, Deo malum morale minime placere.

Equidem videas inter homines prohiberi malum a superioribus & severe puniri in inferioribus, cum tamen ipsimet idem faciant lubenter, neque etiam displiceat malum in aliis, modo ipsis non sit damnosum, immo quod sæpe placeat in aliis, ut male faciendo gratiam eorum aucupentur. Enimvero rationes, quæ hominibus persuadent vetare & punire malum, quod nec in aliis displicet, in se placet; penes Deum cessant. Leges non tulit superior, cui malum probatur, sed tulere antecessores; ipsi vero perspectum est, cur tutum non sit abrogari leges, quarum æquitatem agnoscunt omnes gentes. Si istiusmodi quid animo agitet, dissuadent consiliarii, quorum consiliis acquiescit, sicuti in ceteris, ita in hisce, contentus sibi licere, quod placet. Equis vero dixerit, eodem modo sese rem habere quoad Deum? Contrarium per anteriora, quæ de Deo demonstrata sunt, adeo liquet, ut plura in re manifesta dicere superfluum existimemus.

§. 6co.

Præscientia & decretum permiffum mali moralis juxta S.S.

Malum morale Deus præscribit ab æterno & permittere decrevit. Docet Petrus *Actor. II. 23.* Judæos Jesum Nazarenum, definito consilio & præscientia Dei traditum, per manus iniquorum cruci affixisse & interemisse. Factum ipsum minime probari a Deo satis innuit, quod ipsis refricet *vers. 22.* memoriam potentie, qua excelluit, & miraculorum, quæ patravit, eosdemque moneat, hac ipsa miraculosa potentia significasse, Deum

Deum, quod, quæ docuisset & fecerit, sibi probentur. Unde eosdem redarguit, quod non ex ignorantia invincibili, quam superare minime poterant, sed ex malitia ipsum e medio sustulerint. Fecere adeo, quod iudicio Dei erat omittendum, consequenter dici nequit, quod Deus hoc ipsorum factum voluerit, quatenus malum est, hoc est, quatenus innocentem tanquam criminis admissi reum ultimo supplicio affecerint, non ex ignorantia, sed ex malitia. Recte igitur hinc colligitur, Deum malum morale minime velle, utpote quod ipsi placere minime posse, modo ostendimus. Hoc tamen non obstante affirmat Petrus, illud factum esse definito Dei consilio, quemadmodum bene vertit interpret vulgatus, ut idem quoque retinuerit *Castalio* probatæ Latinitatis studiosissimus. Consilium denotat actum intellectus divini, quo quid agendorum optimum sit perspicit (§. 502.), ipsa etiam S. S. autoritate (§. 590.), adeoque Petrus docens Judæos Christum e medio sustulisse e consilio Dei, autor est deliberasse Deum, si humano more de ipso loquendum, num Judæis concedere debeat, ut Christum e medio tollant, an vero potius idem sit impediendum, & consultius judicasse, ut idem fiat, quam ut ne fiat impediatur. Et quamvis alias in Scriptura sacra per consilium simul indigetetur decretum, quatenus decretum cum consilio indivulso nexu coheret; Apostolus tamen addit, id factum esse consilio Dei definito, hoc est, quod consilio accesserit decretum atque propositum. Deus igitur voluisse dici nequit, ut Judæi Christum e medio non tollerent: pone enim ipsum hoc voluisse, consilio ejus definito factum non est. Enimvero ostendimus quoque, ex Petri sententia Deum non voluisse, ut Judæi Christum e medio tollerent. Necessè igitur est, quod id permittere decreverit (§. 584.). Hinc liquet juxta S. S. Deum malum morale permittere decrevisse.

Enimvero observat quoque Apostolus Judæos Christum e medio sustulisse præscientia Dei, quemadmodum denuo optime vertit interpretes vulgatus, cum *πρόγνωσις* præscientiam denotet apud profanos etiam autores, seu ex usu loquendi Græcorum. Monet igitur, Deum non demum consilium ex arena cepisse, dum Christum in manus scelestas impiorum tradi videret, consequenter negat decretum ipsius demum temporarium fuisse. Quin potius inculcat, Deum præscivisse, quid facturi sint Iudæi, antequam idem ex factis quibusdam eorum colligi poterat, & ex hac præscientia consilium iniisse, & quid facere velit decrevisse. Innuit adeo præscientiam Dei in hoc casu fuisse æternam, quemadmodum eandem æternam esse in genere jam evicimus (§. 534.).

Equidem cum jam (§. 598.) evicerimus, Deum juxta S. S. præscire omnia hominum libera decreta, superfluum videbatur, præscientiam mali moralis, quod actionibus liberis inhæret (§. 374), demum sigillatim probari. Enimvero quæ immediate ex S. S. probari possunt, ea non demum ex aliis eisdem conformibus per consequentiam eruenda sunt. Et id ipsum tanto quidem magis e re esse videtur, quod, cum S. S. loca plerumque de rebus tantummodo in particulari loquantur, difficilius sit propositionum universalitatem evincere: quæ etiam ratio est, cur, qui adversam tuentur sententiam, facile non sine omni specie quadam excipiant. Sustinetur autem universalitas per rationem, ut adeo in articulis mixtis multum auxilii præstet Theologia naturalis ac in specie in veritatibus moralibus philosophia practica cum psychologia. Quod si nobis non tantummodo propositum esset convenientiam eorum, quæ a nobis demonstrata sunt, cum S. S. evincere, probationes, quibus utimur, ad veritatem propositionum evincendum, non semper sufficerent, cum singulare adhuc studium collocandum esset in universalitate evincenda. Quamobrem qui veritates revelatas juxta principia S. S. in Systemate connexas inter sese exhibere voluerit; is imprimis de eo cogi-

cogitare tenetur, ne in universalitatem propositionum injuriosius sit, obstetricante in mixtis ratione naturali, in puris ratione illuminata, & plurimis locis in subsidium vocatis, ubi unus, quem classicum dicere licet, non sufficit. Sed de hisce forsan alibi mentem nostram exposituri sumus clarius, ut eorum conatus juvemur, qui alieno auxilio indigent.

§. 601.

Malum morale juxta S. S. huic rerum seriei ita implicatur, ut, nisi bonum simul tollere velis, inde auferri nequeat, ac ideo a Deo permittitur. Admodum perspicue hoc docet Christus in parabola de zizaniis inter triticum enatis *Matth. XIII. 24. & seqq.* Ipso enim interprete ager in ista parabola mundum denotat, bonum semen filios regni, hoc est, homines a Deo electos; zizania vero significant filios nequam, seu homines improbos. Atque adeo apparet Christum in ista parabola docere, unde sit malum, & cur eidem locus relinquatur in hoc mundo. Nobis in presenti tantummodo cum posteriori negotium est. Christus ergo rationem redditurus, cur malum morale a Deo ex hac rerum serie non tollatur, & perinde hominibus malis ac bonis locus relinquatur in hoc mundo, hac in parabola narrat, patrem familias noluisse a servis colligi zizania, ne simul cum eis triticum eradicetur. Vi significatus adeo parabolæ Deus malum morale ex hac rerum serie non tollit, sed eidem locum in eadem relinquit, ne cum malo simul tollatur bonum. Ex Christi adeo sententia fieri non potest, ut malum morale ex hoc mundo tollatur, quin simul auferatur bonum. Ratio ex simili patet. Zizania eradicari non possunt, quin simul triticum eradicetur, si tritici & zizaniorum radices sibi invicem implicantur. Quamobrem & in mundo seu hac rerum serie mala bonis ita implicari debent, ut, si illa auferantur, nec his amplius locus esse possit: quemadmodum ex ipsa rerum natura demonstravimus in superioribus

Ratio permissionis mali juxta S. S.

ribus (§. 550. 556.). Paterfamilias semen bonum commisit terræ, non vero semen zizaniorum, quod inimicum fecisse dicitur. Quamobrem dici nequit, quod voluerit zizania crescere in agris. Prohibuit tamen, ne servi eadem eradicarent. Quare nec dici potest, quod voluerit, zizania non crescere in agris. Cumque servis præceperit, ut zizania juxta triticum crescere sinant; impedire noluit, ne crescerent. Enimvero quoniam ea permittuntur, quæ, cum neque fieri, neque non fieri velimus, impedire nolumus (§. 584.); paterfamilias zizania crescere permisit. Paterfamilias interprete ipso Christo, quemadmodum modo diximus, Deum, triticum homines probos, zizania improbos repræsentant. Deus adeo, Christo doctore, malum in hac serie rerum existere permittit, consequenter idem permittere decrevit. Permittere autem decrevit ideo, quia seriei huic ita implicatur, ut tolli nequeat, nisi simul auferatur bonum quemadmodum ex dictis liquet.

Parabola de zizaniis inter triticum est locus classicus, quo doctrina de modo, quo malum morale huic rerum seriei inexistit, & de permissione mali continetur, & eam omnem mirifice illustrat. Christo enim solenne fuit ardua dogmata, quæ captum non modo vulgi, sed plurimorum quoque eruditum transcendent, ad imagines revocare, quarum ope intelligi ab iis possunt.

§. 602.

An permissio mali Deum non dedecet juxta S. S. Patet hoc ex eadem parabola de zizaniis inter triticum. Sane paterfamilias minime reprehendi potest, quod zizania una cum tritico crescere sinat, quæ eradicari minime possunt, nisi simul eradicato tritico; sed prudentiæ & economiæ tribuendum, quod sollicitè ac circumspicte caveat, ne spe messis sibi proficua excidat & lucro majori inhians omne perdat. Servi autem, qui

ziza-

zizania evellere volunt, imperitiæ redarguuntur, quod damnum inde secuturum minime respiciant. Quoniam zizania inter triticum in agro enatum mala in hoc mundo bonis implicita repræsentant, paterfamilias vero Deum, quemadmodum ad propositionem præcedentem jam monuimus; nec Deus reprehendi potest, quod malum morale permittere decreverit, & qui idem ex hoc mundo abesse volunt, imperitiæ redarguuntur, utpote nescientes modum, quo malum seriei huic inexistit, nec prospicientes damnum inde secuturum, si abesse iubeatur. Quemadmodum ergo patremfamilias non dedecet, quod prudentia æconomica fieri postulat; ita nec Deum dedecet permissio mali moralis.

Plura de consensu S. S. quoad inexistentiæ mali moralis in hac rerum serie addi non est opus: sufficit enim consensum demonstrasse in principiis, unde cetera pendent. Ceterum cum Christus Deum in eo prudenti patrifamilias componat, quod malum morale permittere decreverit; caveant per transennam res a vulgari cognitione remotas respicientes, ne temere judicent, magis convenire Deo, ut malum ex mundo prorsus arceat!

C A P U T. IV.

De Sapientia & Bonitate Dei.

§. 603.

Datur finis aliquis, ob quem Deus hoc universum produxit, seu Deus produxit hoc universum propter finem finis cur aliquem. Etenim Deus mundum hunc elegit ex ceteris Deus mundum ob majorem perfectionem, quæ ipsi quam ceteris inest (§. dum pro- 325.), adeoque quia perfectissimus omnium possibilium (§ 326.). duxerit. Quoniam nihil est sine ratione sufficiente, cur potius sit, quam
(Wolffii Theol. Naturalis) Z z z non

non sit (§. 70. *Ontol.*); ratio etiam sufficiens detur necesse est, eum potius mundum perfectissimum, quam alium minus perfectum existere volueris. Enimvero id, cujus gratia causa efficiens agit, finis est, quem agens intendit (§. 932. *Ontol.*). Quamobrem patet dari debere finem aliquem, propter quem Deus mundum hunc producere decrevit & decreto convenienter produxit.

Sapientiam Deo vindicaturis demonstrandum est, Deum agere propter finem optimum, eligere media, quæ certo & via brevissima ad eundem ducunt & quibus finem, quem intendit, ex asse consequitur, finesque omnes particulares ita sibi invicem subordinare, ut propiores sint media remotiorum & omnes tandem simul medium finis ultimi (§. 689. *Psychol. ration.*). Enimvero horum demonstratio non adeo prona est, ut Deum esse sapientissimum unica demonstratione evinci possit. Gradatim igitur incedendum: quod facturi ostendimus primo omnium loco, Deum agere propter finem, nondum solliciti, qualis sit iste finis. Præmoneo autem, quamnam ante stabiliri debeant, quam sapientia Deo tribui & qualis ea sit intelligi possit, ut attentio lectoris exciteretur, ne eam in his, quæ principiorum locum tenent, desiderari patiatur. Sapientia divina mirifice influit in praxin omnem moralem atque adeo plurimum refert, ut eam animo rite comprehendamus, nec quicquam circa eam dubitationis reliquum fiat. Velim igitur, ut ad singula animum probe advertant, quotquot pulchritudinem Entis supremi venerabunda ac læta mente intueri gestiunt & felicitatis suæ curam habent. Advertant etiam animum, quotquot nebulas circa inexistenciam mali in hac rerum serie adhuc residuas dispellere cupiunt, neque enim alia ratione, quam sapientiæ divinæ consideratione fugari possunt.

§. 604.

An detur finis decreti de mundo propter finem aliquem decrevit. Quoniam Deus mundum aliquem

quem existere voluit citra omnem coactionem internam (§. do produ- 430), nec minus ab omni coactione interna immunis voluit, *cendo*, ut hic potius mundus existeret, quam alius (§. 351.); evidens est, quod ad mundum aliquem & in specie ad hunc mundum producendum voluntatem libere determinaverit, consequenter & existentiam alicujus mundi & in specie hujus mundi decreverit, (§. 497.). Quamobrem cum Deus faciat quod decrevit, quemadmodum decrevit (§. 525.); mundum vero hunc fini cuidam convenienter produxerit (§. 603.); necesse est ut eidem fini convenienter eundem decreverit. Datur itaque finis aliquis, cur Deus decreverit, mundum aliquem existere debere, & cur decreverit, ut hic potius existat mundus, quam alius.

Propositionem hanc non alio fine addimus, quam ut lucidius constet, Deum finis per creationem rerum intenti jam rationem habuisse in decreto suo: quod notasse juvat in aliis, & huc inter alia facit, ut demonstrari possit, Deum omnia sapienter decrevisse.

§. 605.

Deus malum morale permittere decrevit ob eundem finem, An detur ob quem existentiam hujus mundi decrevit. Quoniam Deus nihil eorum, quæ in mundo fiunt, decrevit in particulari ab-^{finis per-} solute spectatum, sed in relatione ad totum mundum (§. 519.); ^{missionis} malum quoque morale, quod permittere decrevit (§. 585.), ^{mali.} non decrevit permittere, nisi in relatione ad totum mundum. Quamobrem quia existentiam hujus mundi propter aliquem finem decrevit (§. 604.); quin respectu ejusdem finis malum quoque morale permittere decreverit, dubitandum non est.

Finis, cujus respectu Deus malum morale permittere decrevit, plurimum facit ad tollendas difficultates, quæ contra eam moveri solent. Quamobrem ut eundem certo detegere liceat, propositionem præsentem in medium afferre debui-

mus. Illud vero me vel tacente patet, propositionem loqui de fine ultimo, non de intermediis, & de fine universalis, non autem de particularibus. Sed hæc evidentiora evadent inferius.

§. 606.

An particularia in mundo re-ferantur ad finem totius. Deus nihil eorum, quæ ad hanc rerum seriem spectant decrevit nisi respectu finis, ob quem decrevit existentiam totius universi. Probatur propositio præsens eodem prorsus modo, quo præcedentem probavimus.

Non igitur opus est, ut probationem denuo huc transcribamus. Facile autem intelligitur, cur eidem probationi sit locus. Etenim præcedens est casus particularis præsentis. Quamobrem præcedentem per modum corollarii ex præsentis deducere poteramus, nuda subsumptione casus particularis sub universalis. Est nimirum permissio mali quidpiam e numero rerum particularium in hoc mundo decretarum.

§. 607.

Medium quo obtinetur finis mundi. Perfectio mundi est medium, quo finis, quem Deus per existentiam mundi intendit, obtinetur. Etenim modo (§. 603.) ostendimus, ideo dari finem, cur hunc mundum produxerit Deus, quod eum ex ceteris elegit ob perfectionem, qua eos antecellit. Ex eo igitur, quod hic, qui existit mundus, sit ceteris perfectior, cum intelligatur cur is potius ad existentiam perductus fuerit, quam alius; in perfectione mundi continetur ratio, cur finis a Deo intentus actum consequi potuerit (§. 56. Ont.). Enimvero cum quicquid rationem continet, cur finis actum consequatur, seu, quod perinde est, ab agente obtimeatur, medium sit (§. 937. Ontol.); perfectio mundi medium est, quo Deus finem per existentiam mundi intantum obtinere.

Nimirum Deus voluit existere mundum omnium possibile perfectissimum, ut fine, quem intendit, potiatur, qualiscunque tandem iste sit finis. Unde ex perfectione mundi dedu-

deducere licet, quinam ille sit, ex medio eruendo finem: quem admodum ex sequente propositione constabit. •

§. 608.

Finis, cur Deus hunc mundum produxerit, est patefactio Finis sui ipsius, seu perfectionis suae absolute summæ. Electio enim *universi* mundi in se optimi, adeoque omnium possibilium perfectissimam sit, mi (§. 370.), est signum naturale spiritus perfectissimi, nec electio mundi in se non optimi tale esse potest (§. 402.). Enimvero Deus est spiritus perfectissimus (§. 387.). Mundi igitur in se optimi electio est signum naturale veri Dei, nec mundi cujuscunque alterius signum istiusmodi veri Dei esse potest. Quoniam ex signo cognoscitur presentia rei signatæ (§. 952. *Ontol.*); ex summa mundi perfectione cognoscitur, quod verus Deus existat & summa gaudeat perfectione (§. 387.). Si vero mundus non sit omnium possibilium perfectissimus, nec summa Deum gaudere perfectione inde inferri potest. Quoniam adeo perfectio mundi est medium, quo Deus finem per productionem mundi a se intentum consequitur (§. 607.); finem alium intendere non potuit, quam quod per mundum seipsum, adeoque summam sui ipsius perfectionem patefacere voluerit. Atque adeo patet, finem, cur Deus hunc mundum produxerit, esse patefactionem sui ipsius, seu perfectionis suae absolute summæ.

Idem etiam sic ostenditur. Quoniam perfectio universi est medium, quo Deus finem per existentiam hujus mundi intentum consequitur (§. 607.), finis hic non in mundo, sed extra ipsum querendus. Enimvero extra mundum non datur ens aliud nisi Deus (§. 67 62.), nempe præter hanc rerum seriem non datur ens, quod ad eam non pertineat, nisi Deus. Quamobrem finis, quem Deus per hunc mundum intendit, in ipso querendus est. Est vero Deus sibi metipso sufficientissimus (§. 428.), adeoque nulla prorsus re extra se quomodo-

cunque indiget (§. 427.). Nihil ergo relinquitur, quod Deus per universi hujus existentiam intendere possit, quam ut per mundi perfectionem summam sui ipsius perfectionem patefaciat. Quod igitur patefactio sui ipsius, adeoque summæ sui ipsius perfectionis sit finis, quem Deus producendo hunc mundum intendit, dubitandum non est.

Patet adeo finem, quem sibi Deus in producendo mundo proposuit & propter quem eundem producere decrevit, ex ipsa ejus tanquam agentis & mundi tanquam medii natura fluere. Etenim in superioribus ex ipsa Dei mundique natura demonstravimus, mundum hunc, qui existit (§. 326.), esse signum intellectus omnium absolute summi (§. 328. 169.) voluntatis omnium optimæ (§. 400. 381.), & potentiae omnium maximæ (§. 403. 348.), adeoque spiritus omnium perfectissimi (§. 402.), veri Dei (§. 387.).

§. 609.

Finis creationis seu electionis mundi secundum S. S.

Finis cur Deus mundum hunc produxerit, Et ab aeterno producere decreverit, etiam juxta S. S. est patefactio sui ipsius. Juxta Apostolum Rom. I. 20. Deus se manifestavit hominibus per creationem hujus universi, quatenus per ea, quæ facta sunt, invisibilia Dei, veluti sempiterna ejus virtus & divinitas, intelliguntur ab effectu scilicet ad causam argumentando, tanquam a signo ad signatum (§. 961. Ontol.). Monet autem Apostolus vers. 20. 21. id factum esse ideo, ut homines Deum tanquam verum Deum colant, & ut sint inexcusabiles, ubi hoc non fecerint. Unde intelligitur, voluisse Deum ab æterno, ut homines per ea, quæ fecit, attributa ipsius cognoscant, quod sensu duce, quemadmodum res materiales, quæ sunt in mundo, cognosci minime possint. Est adeo juxta S. S. patefactio sui ipsius id, propter quod mundum hunc produxit & hinc ab æterno producere decrevit (§. 525.). Quamobrem cum id, propter quod causa efficiens agit, sit finis, quem intendit (§.

932.);

932.); finis, quem Deus per creationem hujus universi & decretum creationis intendit, etiam juxta S. S. est patefactio sui ipsius.

Nimirum etiam juxta S. S. dicendum, Deum ab æterno decrevisse mundi hujus existentiam, ut a creaturis rationalibus, quales sunt homines, agnoscatur & tanquam verus Deus colatur: id quod probe notandum est. Etenim si quis hanc cognitionem Dei insuper habet, nec eum tanquam verum Deum in omnibus actionibus suis liberis colit, fini, quem intendit, contrariatur. Atque adeo patet ratio, cur Deus in S. S. gloriæ suæ sit tenacissimus: neque enim sapiens ferre potest, ut quis fini a se intento contrarietur. Qui hic suboriri poterant scrupuli, per sequentia eximentur.

§. 610.

Complexus attributorum divinorum, quatenus a creatura rationali agnoscitur, dicitur *Gloria Dei*. Unde *gloriam suam manifestare* dicitur Deus, quatenus perfectionem suam absolute summam, aut si mavis, attributa sua hominibus revelat. Et homo dicitur *promovere gloriam divinam*, quatenus verbis & factis testatur, se agnoscere perfectionem Dei absolute summam & quod eadem gaudeat pro certo habere.

*Gloria Dei
quid sit.*

Cum affectus explicarem docuimus, gloriam designare gaudium, quod percipitur ex aliorum de nobis nostrisque benigno judicio (§. 765. *Psychol. empir.*). Vocabulum itaque ad Deum translatum retinet receptum significatum, quantum permittit differentia, quæ inter Deum atque homines intercedit. In affectu gloriæ propriam perfectionem referimus ad aliorum judicium: in gloria Dei perfectio Deo propria refertur ad judicium creaturæ intelligentis, veluti hominum. Homo de eo gaudet, quod perfectio sui agnoscatur ab aliis, seu quod sibi persuadeat, eam ab iis agnitum iri: quod etsi de Deo dici non possit proprie loquendo, cum beatitudo ipsius non pendeat a creatura; per eminentiam tamen hoc ipsi gaudium tribui potest, quemadmodum suo loco ostenderimus.

Atque

Atque hinc est, quod gloria divina dicatur ipsa summa Dei perfectio ad iudicium creaturæ rationalis relata.

§. 611.

Manifestatio gloriæ divinæ per mundum.

Deus decrevit existentiam huius mundi ad manifestandum gloriam suam. Etenim finis, ob quem Deus mundum hunc producere decrevit, est perfectionis, qua gaudet, absolutæ summæ patefactio (§. 608). Quoniam itaque Deus gloriam suam manifestat, quatenus perfectionem summam, qua gaudet, creaturæ rationali patefacit (§. 610.); finis, quem Deus intendit, dum mundum hunc producere decrevit, est manifestatio gloriæ ipsius. Agit vero agens propter finem, quem intendit (§. 932. *Ontol.*). Quamobrem Deus ad manifestandum gloriam suam mundum hunc producere decrevit.

Desumpta est phrasis ex S. S. Etenim *Joh. II. 11.* Christus dicitur manifestasse gloriam suam, cum per miraculum aquam in vinum verteret. Etenim hoc ipso probavit, esse sibi potentiam miraculosam, quam esse omnipotentem Dei creaturæ nulli communicabilem, superius demonstravimus (§. 471.).

§. 612.

Eadem S. S. conveniens.

Deus quoque juxta S. S. per mundi creationem manifestavit gloriam suam. Etenim juxta S. S. Deus mundum producere decrevit ad perfectionem summam, qua gaudet, seu divinitatem suam patefaciendam (§. 609.). Enimvero phrasi quoque S. S. gloriam suam manifestat Deus, quando divinitatem suam patefacit (*not.* §. 611.). Deus igitur juxta S. S. quoque per mundi creationem gloriam suam manifestavit.

§. 613.

Cui fini Deus malum morale permittit.

Deus malum morale mundi ad manifestandam gloriam suam. Etenim Deus decrevit existentiam huius mundi ad manifestandam gloriam suam (§. 611.). Sed malum

lum morale permittere decrevit ob eundem finem , propter quem mundi existentiam decrevit (§. 605.). Malum igitur morale permittere decrevit ad manifestandum gloriam suam.

Quomodo gloriam suam mali permissione demonstrare poterit Deus , deinceps disquiremus.

§. 614.

Deus etiam juxta S. S. permittere decrevit malum morale ad Idem S. S. manifestandum gloriam suam. Patet id ex parabola de zizaniis conforme inter triticum, qua doctrina de permissione mali moralis a Christo illustratur. Etenim nemo non largitur, prudentiæ æconomiæ patrisfamilias deberi, quod noluerit zizania eradicari, quæ nonnisi cum tritico eradicari poterant. Quemadmodum itaque paterfamilias prudentiam suam manifestavit sinendo crescere zizania, ita quoque Deus sapientiam suam probat, quod malum morale permittat, non tollendum salva perfectione mundi (§. 556.), quæ medium est finem per creationem ejusdem intentum obtinendi (§. 607.).

Scriptura sacra expresius docet , quomodo permissione mali moralis illustretur gloria Dei : pertinet enim huc decretum redemptionis, quo universa salutis æconomia continetur. Scriptura igitur cum hic tradat , quæ rationi impervia sunt, etsi huic conveniens sit modum aliquem illustrandi gloriam divinam ipsa mali permissione adesse debere , defectum rationis supplet : id quod revelationi divinæ conveniens (§. 451.).

§. 615.

Mundus hic , qui existit , est fini a Deo intento conveni- Quomodo entissimus , & Deus eundem ideo ex ceteris possibilibus elegit, hic mundus quod fini a se intento omnium maxime conveniat. Etenim mun- se habeat dus hic , qui existit, est omnium possibilium perfectissimus (§. ad finem & 326.), adeoque in se optimus (§. 370.). Quamobrem cum ele- cur Deus (Wolffii Theol. Naturalis) Aa aa etio eum elegerit.

ctio mundi in se optimi sit signum naturale spiritus perfectissimi (§. 402.), nimirum intellectus (§. 328.), voluntatis (§. 400.) ac potentiz divinæ (§. 403.), præter eum vero non fit alius, qui eadem extensione istiusmodi signum esse possit (§. 329. 401. 404.); per hunc ipsum mundum gloria divina magis illustrari potest, quam per quemcunque alium (§. 610.). Jam finis, cur Deus hunc mundum potius producere decreverit, quam alium, est patefactio perfectionis suæ summæ (§. 608.), adeoque manifestatio gloriæ suæ (§. 610.). Patet igitur hunc mundum esse fini a Deo intento omnium possibilem convenientissimum. *Quod erat unum.*

Deus hunc mundum ex ceteris elegit ob maiorem perfectionem, quæ ipsi quam ceteris inest (§. 325.). Enimvero hic ipse mundus fini a Deo intento omnium possibilem maxime convenit, quia omnium possibilem perfectissimus *per demonstrata.* Deus igitur hunc mundum ex ceteris elegit, quia fini, quem intendit, omnium maxime convenit. *Quod erat alterum.*

Atque ita tandem evicimus, quod superius, cum de mundo optimo ageremus, evinci nondum poterat. Lubet tamen majoris claritatis gratia sequentem addere propositionem.

§. 616.

Quomodo sese habeat mundus optimus ad Deum. *Mundus optimus fini a Deo intento omnium maxime convenit.* Etenim mundus hic adspectabilis est omnium possibilem in se optimus (§. 382.) & simul optimus in relatione ad Deum (§. 405.). Jam vero hic ipse, qui existit, mundus, fini a Deo intento omnium maxime convenit (§. 615.). Ergo mundus optimus fini a Deo intento omnium maxime convenit.

Quod si ad demonstrationes principiorum, quibus ad evincendam veritatem præsentis utimur respicias, animadvertes ideo mundum fini a Deo intento convenire, quia

quia tam in se, quam in relatione ad Deum optimus, nec alium nisi optimum eodem modo eidem convenire. Unde nil quicquam obstat, quo minus mundus optimus definiatur per eum, qui fini a Deo intento maxime convenit. Atque hinc porro patet, affirmare quod Deus non fecerit mundum optimum, idem esse ac contendere, quod fecerit mundum, qui fini a se intento ex alio non satisfacit. Notandum hoc est adversus hostes mundi optimi, eos scilicet, qui mundum hunc fieri potuisse meliorem somniant, sublati malis physicis & moralibus. Absit itaque ut in eorum numerum referas eos, qui cum *D. Thoma* statuunt, mundum alium, qui sit hoc adspectabili melior, a Deo fieri potuisse, ne videantur in libertatem divinam injurii: quod tamen metuedum non esse supra jam evicimus & ex iis, quæ porro de sapientia Dei demonstrabuntur, clarissime constabit. Etenim *D. Thomas* agnoscens contingentiam ordinis naturæ (§. 561. *Cosmol.*), iisdem rebus alium ordinem imponi posse intulit, atque hinc porro collegit, mundum hunc non potuisse fieri meliorem, non obstante morali malo, quod in eodem datur. Nimirum quatenus Deus has res producere decrevit, cum producere posset alias; libertatem suam independentem manifestavit: Quatenus vero iisdem optimum imposuit ordinem, & voluntatem suam optimam & sapientiam patefecit. Neque ipso docente obstitit malum morale, quo minus Deus hanc rerum seriem fecerit optimo modo, non facturus eandem modo optimo, siquidem malum morale ex ea arceret voluisset. Procul adeo absunt, qui cum eodem sentiunt, ab opinione hostium mundi optimi, qui eidem malum morale repugnare statuunt. Quodsi enim idem obstat, quo minus mundus optimus absolute esse possit, obstare utique etiam debet, quo minus in suo genere optimus sit, seu optimo modo factus sit. Hostes adeo mundi optimi non minus *D. Thoma*, quam nobis adversantur, qui in omni hac doctrina de perfectione mundi & inexistētia mali morali Doctoris hujus luminibus sumus usi.

§. 617.

*Malum
morale &
physicum
quomodo
se habeat
ad finem
mundi.*

Malum physicum & morale non obstat, quo minus hic mundus fini a Deo intento omnium maxime conveniat, sed potius huc facit, ut eidem omnium maxime conveniat. Malum enim physicum & morale non obstat, quo minus in mundo, qui existit, major sit perfectio, quam in ceteris possibilibus (§. 550.). Enimvero perfectio mundi est medium, quo finis a Deo intentus obtinetur (§. 607.), & hinc non magis obtineri potest, quam si mundus fuerit omnium possibilium perfectissimus. Utrumque adeo malum non obstat, quo minus Deus finem, quem intendit, per productionem hujus mundi consequatur optimo modo, consequenter quo minus fini a Deo intento omnium maxime conveniat.

Idem etiam hoc modo ostenditur. Malum physicum & morale non obstat, quo minus hic mundus sit omnium possibilium perfectissimus (§. 550.), adeoque ejus electio tale signum perfectionum divinarum (§. 328. 400. 403.), quale prae-ter ipsum alius esse nequit (§. 329. 401. 404.), consequenter non obstat, quo minus per hunc mundum gloria Dei omnium maxime manifestetur (§. 610.). Enimvero finis, cur Deus hunc mundum produxit, est manifestatio gloriae ipsius (§. 608. 610.). Malum igitur physicum & morale minime obstant, quo minus hic mundus fini a Deo intento, omnium maxime conveniat.

Cum sublato malo physico & morali ex tota hac rerum serie, ipsa hac rerum series permanere nequeat omnium possibilium perfectissima (§. 556.); utrumque malum huc facit, ut maxima huic rerum seriei sive mundo (§. 48. *Cosmol.*) insit perfectio, quae eidem inesse potest. Jam vero perfectio mundi est medium, quo Deus finem, quem per existentiam hujus universi intendit, consequitur (§. 607.), atque adeo mundus
fini

fini a Deo intento maxime convenit, quatenus is est omnium possibilium perfectissimus. Malum itaque physicum & morale huc facit, ut mundus fini a Deo intento omnium maxime conveniat.

Idem in specie de malo morali ostenditur hoc modo. Deus malum morale permittit ad manifestandam gloriam suam (§. 613.), consequenter huc facit, ut Deus eandem manifestare possit. Sed patefactio perfectionis suæ absolute summæ, adeoque manifestatio gloriæ divinæ (§. 610.), est finis, quem Deus per existentiam hujus mundi intendit (§. 608.), consequenter quod ad manifestationem gloriæ divinæ facit, huc facit, ut mundus omnium maxime fini a Deo intento conveniat. Malum igitur morale huc facit, ut mundus hic fini a Deo intento omnium maxime conveniat.

De malo physico partem posteriorem propositionis in specie ostendere licebit, ubi ostenderimus, cur Deus eidem locum admiserit in hac rerum serie, aut, si accuratius loqui malueris, cur eum produxerit mundum, in quo malo physico locus est. Et ubi directio mali utriusque ad bonos fines postea fuerit demonstrata, eandem partem propositionis utriusque alio adhuc modo, eodemque clariori, probare dabitur. Immo si quid circa propositionem præsentem totam adhuc relinquitur dubii, id penitus evanescet, ubi docuerimus, quomodo tam malum physicum, quam morale, quatenus huic rerum seriei inexistit, faciat ad manifestationem gloriæ divinæ. Probe autem notari velim, malum nec physicum, nec morale per se facere ad manifestationem gloriæ divinæ, sed quatenus huic rerum seriei inexistit, seu eidem implicatur, ut eadem salva, auferri minime possit (§. 552.).

§. 618.

Finis, quem Deus per productionem universi intendit, est Qualis sit omnium optimus, qui per productionem alicujus mundi intendi finis a Deo potest. Mundus enim hic, qui existit, est fini a Deo intento intentus.

omnium convenientissimus, & Deus eundem ideo ex ceteris possibilibus elegit, quod fini a se intento omnium maxime conveniat (§. 615.), consequenter non datur mundus alius, per quem Deus gloriam suam magis manifestare potuisset, quam per eum, quem fecit (§. 608.). Quoniam itaque in relatione ad Deum nil quicquam dici potest bonum, nisi quatenus summa Dei perfectionis signum est (§. 394.), adeoque eandem patefacit (§. 952. *Ontol.*); nec melior concipi potest finis a Deo per existentiam mundi intentus, quam qui in maxima manifestatione gloriæ divinæ consistit, aut qui absolvitur eo modo manifestandi gloriam divinam, quo alius præstantior concipi haud quaquam potest. Quamobrem patet finem, quem Deus per productionem hujus mundi intendit, esse omnium optimum, qui ab eo intendi poterat.

Quodsi mundus aliquis esset possibilis, qui majorem haberet perfectionem, quam hic mundus adspectabilis; modus quoque non deerat, quo Deus perfectionem suam excellentius demonstrari poterat. Quamobrem dici non poterat, Deum sibi in decreto producendi aliquem mundum proposuisse finem omnium optimum: id quod tamen supponendum est, ubi demonstrare volueris, sapientiam Dei esse omnium perfectissimam. Unde denuo apparet, quam sit necesse ut agnoscamus, mundum hunc esse omnium possibilem optimum.

§. 619.

*Idem in
genere e-
vincitur.*

Finis, quem Deus sibi constituit, est omnium possibilem optimum. Dum Deus sibi finem aliquem constituit, quin eundem velit nemo dubitat. Enimvero Deus vult tum quod in se (§. 383.), tum quod in relatione ad se optimum est (§. 385.). Quamobrem finem quoque sibi constituit omnium possibilem optimum.

Patet

Patet adeo in genere, Deum sibi finem optimum constituere. Et sane nulla adest ratio, cur contrarium fieri debeat. Quando enim homines sibi constituunt finem, qui optimus non est, aut quoniam optimus sit ignorant, aut alia ipsis obijciuntur impedimenta, cur constitui optimum non sit consultum: quorum neutrum de Deo dici potest, cum omniscientia, qua præditus est (§. 302.), ignorantia non faciat locum (§. 301.); independentia vero a rebus omnibus aliis extra se (§. 70.) & omnipotentia, qua gaudet (§. 349.), non admittit impedimenta insuperabilia (§. 347.). Juvat hic animo recolere, quæ de voluntate Dei ab omni coactione tam interna (§. 351.), quam externa libera demonstrata sunt (§. 321.). Quemadmodum vero ex præsentate propositione præcedens per modum corollarii subsumi poterat; ita nec difficile erat ex præcedente deducere præsentem. Etenim cum Deus mundum hunc existere voluerit ad manifestandam gloriam suam (§. 611.), hanc vero manifestet, si perfectionem suam absolute summam patefacit (§. 610.); per finem, quem in decreto de mundo producendo sibi proposuit, creaturæ intelligenti etiam patefacere voluit, qualem sibi finem constituat. Quamobrem cum in hoc ipso decreto sibi constituerit finem omnium possibilium optimum (§. 618.); patet Deum sibi non constituere finem alium, nisi qui omnium possibilium optimus est. Cum demonstrationes speciales plus lucis habeant generalibus, hoc ipso major quoque lux redundat in generalem, ubi ex speciali deducitur.

§. 620.

Deus finem sibi constituit liberrime. Etenim dum Deus *Libertas* sibi finem aliquem mundi alicujus producendi, & producendi *Dei in conspectu* in specie, vel in genere quemcunque alium sibi constituit, *stipulando* quia finem eundem velit, dubitandum non est. Enimvero *fine*, quicquid Deus vult, liberrime vult (§. 431.). Quamobrem finem quoque sibi liberrime constituit.

Qui plus lucis desiderant, ad constitutionem finis applicent, tanquam ad volitionem particularem, quæ de toto volitione

litionis actu (§. 355.) in medium adducta sunt , ut summam voluntatis divinæ libertatem evinceremus (§. 431.) ; scilicet quod Deus finem , quem sibi constituit , penitus intelligat , quod idem ipsi maxime placeat , quod eundem sponte ac lubentissime eligat , quod nullus prorsus in eodem constituendo locus relinquatur ulli coactioni internæ ac externæ : quæ singula de finis constitutione eodem modo demonstrari possunt , quo eadem de voluntate divina suo unumquodque loco demonstravimus : id quod utilitate sua non destituitur tum in veritate propositionis præsentis percipienda , tum in eadem aliis persuadenda , etsi in Systemate hisce ambagibus non sit opus.

§. 621.

*Quomodo
Deus finem
consequatur.*

Deus finem, quem per existentiam hujus mundi intendit, ex asse consequitur. Deus enim per hunc mundum patefacere vult perfectionem suam absolute summam (§. 608.) & eo fine eum elegit mundum ex ceteris possibilibus (§. 615.) , qui omnium perfectissimus (§. 325.) & in se optimus (§. 382.). Quoniam itaque electio mundi optimi est signum naturale spiritus perfectissimi (§. 402.) , qui est Deus (§. 387.); Deus quoque summam, qua gaudet, perfectionem eo ipso patefacit, quod hunc elegerit mundum: unde cum ipsa mundi perfectio sit medium , quo Deus finem per existentiam ejus mundi consequitur (§. 607.), vi ejusdem obtinet , quicquid ad finem a se intentum spectat. Ex asse vero agens finem consequitur, si vi mediorum ad actum perducantur omnia , quibus is constituitur (§. 684. *Psych. ration.*). Patet itaque Deum ex asse consequi finem, quem per existentiam hujus mundi intendit.

Quod si supponas Deum potuisse hunc ipsum , qui existit, mundum facere meliorem , quam nunc est , veluti sublato ex eodem malo physico & morali , quemadmodum sumunt hostes mundi optimi ; propositio præsens non subsistit: id quod pro acumine suo optime vidit *D. Thomas* , qui propterea defendit

scēdit Deum hīcōs rebū non potuisse imponere meliorem ordinem, sicque hunc, qui existit, mundum non potuisse facere meliori mōdo, et si largiatur potuisse Deum producere res alias & sic facere mundum eo, qui existit, meliorem. Etenim in hac hypothēsi veritas propositionis præsēntis in salvo est. Hostes vero optimi mundi in sapientiam divinam injuriū sunt, ad quam omnino requiritur, ut Deus finem, quem intendit, ex alio consequatur.

§. 622.

Per mundum omnium possibilium perfectissimum seu optimum Quinam Deus gloriam suam omnium maxime manifestat, ita ut nec infinitus mundus intellectus in eo quicquam desiderare possit. Etenim electio mundi optimi seu omnium possibilium perfectissimi est signum naturae maxime intellectus omnium absolute perfectissimae (§. 328.), voluntatis absolute perfectissimae (§. 400.) & omnipotentiae (§. maxime 403.), nec mundus quicunque alius signum intellectus absolute perfectissimae (§. 329.), voluntatis absolute perfectissimae (§. 401.) & omnipotentiae esse potest (§. 404.). Fieri adeo non potest, ut Deus per mundum alium, quam per omnium possibilium perfectissimum sive optimum, perfectionem intellectus & voluntatis suae patefaciat tanquam absolute summam atque potentiam suam tanquam absolute maximam (§. 952. Ontol.). Quoniam itaque Deus mundum omnium perfectissimum sive optimum elegit, quem produceret (§. 325. 382.); per eum quoque summam, quae gaudet, perfectionem tanquam absolute summam patefacit, adeoque gloriam suam maxime illustrat (§. 610.). *Quod erat primum.*

Qui infinito intellectu praeditus est, omnia sibi repraesentat simul (§. 838. Ontol.), adeoque plenissime perspicit, quomodo Dei perfectio summa, tanquam ea, quae major concipi nequit, per hunc mundum, patefiat, consequenter gloria divina per eundem maxime illustretur. Quamobrem nec intellectus infinitus in modo manifestandi gloriam divinam per mundum

(Wolffii Theol. Naturalis.) B b b b dum

dum adspectabilem quicquam desiderare valet. *Quod erat secundum.*

Propositio hæc probe notanda est, & ut rite animo comprehendatur, recolenda sunt principia in superioribus proposita. Etenim plurimum facit ad removendum dubium, quasi electio mundi optimi inferat necessitatem quandam libertati adversam. Quod enim agens facit ob finem ex assse obtinendum; id summa cum ratione facit, nec libertati contrariatur. Ecquis enim requisiverit, ut ne artifex opus suum faciat optimo, quo ab eo fieri potest, modo, quando sibi proposuit facere opus, quod artem suam loquatur, ne ex necessitate naturæ idem fecisse dicatur, omnis libertatis in exercenda arte expers? Vi omnipotentiae suæ poterat Deus facere mundum quemcunque alium, qui eo, quem existentem intuemur, sit minus perfectus; & eo ipso, quod hunc fecit, hoc demonstravit (§. 611.). Sed noluit producere alium, quod alius gloriæ suæ manifestandæ non æque inserviat. Quis ergo inferet, agendo convenienter fini tolli libertatem? Si velis agere optimo modo, ubi agere volueris propter finem, nec possis agere alio, quam hoc modo; non ideo tollitur libertas in agendo, quod optimo modo agas. Deus sibi proposuit per mundi creationem manifestare gloriam suam, qui ipse finis postulat, ut utatur mediis ad eum ex assse consequendum necessariis. Voluit igitur fini huic convenienter producere mundum, per quem gloria ipsius omnium maxime manifestatur. Non datur alius, quam quem fecit, mundus, quo gloria ejus magis manifestetur, nec datur alius, per quem æque manifestetur. Finit adeo suo convenienter decrevit hunc potius producere mundum, quam alium. Quis ergo dixerit, Deum non fuisse liberum in decernendo?

§. 623.

Dei de modo manifestationis gloriæ suæ iudicium.

Deus decrevit producere mundum, qui suo iudicio omnium maxime manifestat gloriam suam. Etenim per hunc mundum gloriam suam omnium maxime manifestat, ita ut nec intellectus infinitus in modo manifestationis quicquam desiderare

pos-

possit (§. 622.). Quamobrem cum Deus intellectu infinito gaudeat (§. 167.); nec Deus quicquam in modo manifestandi gloriam suam desiderare potest. Ipse igitur iudicio hic mundus omnium maxime gloriam ejus manifestat, consequenter eum decrevit producere mundum, qui suo iudicio omnium maxime gloriam suam manifestat.

Non licet excipere, Deum manifestare gloriam suam per creationem mundi non sibi, sed creaturis intelligentibus, veluti hominibus. Omni creaturæ intellectus admodum finitus est; adeoque comprehendere nequit modum manifestationis gloriæ divinæ, qualis per integrum hoc universum prodit. Satisfacit igitur abunde mundus non optimus. Etenim nulla his inest concludendi vis: id quod vel hominum exemplo doceri potest. Artifex peritus, etsi norit non dari præter se alium, qui de operis perfectione iudicium ferre possit, non ideo male facit opus, quod is, cuius gratia fit, nævum detegere non possit. In proprio iudicio acquiescit, faciens opus, quod sibi artifici satisfacit. Si quis aliter facit, vel mala fide imperitis imponit, vel horum inopia adductus volentibus facit opus, quale desiderant. Prætereaverum omnino non est, quoad hominem perinde esse, siue Deus fecerit mundum optimum, siue non optimum. Pater enim ex demonstrationibus superioribus, ad quas sæpissime jam provocavimus; hominem agnoscere non per alium, quam optimum mundum, Deum perfectionem suam manifestare posse tanquam absolute summam; sit ita, quod ipsam mundi hujus perfectionem, qua ceteris præstat, comprehendere minime possit. Neque si praxin spectes, in quam theoria influit, perinde est, siue sumas Deum fecisse mundum optimum, siue ponas, eum fecisse mundum non optimum: quemadmodum suo tempore suoque loco abunde demonstraturi sumus. Sumatur hypothesis fecisse Deum mundum non optimum & redigantur ea, quæ de Deo cognoscuntur, in systema veri nominis, quo omnes propositiones inter se connexæ exhibentur, & veritas unius per veritatem aliarum evincitur; satis superque experieris, modo acumine non destituaris, inanem operam sumi.

§. 624.

*Medium
quale a Deo
electum.*

*Deus elegit medium , quo finem , quem per mundi hujus
existentiam intendit , certo consequitur.* Etenim finis , quem
Deus per existentiam hujus mundi intendit , est patefactio per-
fectionis suæ absolute summæ (§. 608.) & medium , quo ad eum
consequendum utitur , est mundi ipsius perfectio (§. 607.).
Elegit autem hunc mundum ex ceteris possibilibus , quem ad
actum perduceret , ob summam , quæ inter ceteros eminet , per-
fectionem (§. 325.) , & hæc ipsa perfectio , quatenus ob eam
mundus electus est , signum naturale est intellectus omnium
perfectissimi (§. 328.) & voluntatis omnium perfectissimæ (§.
400) atque omnipotentæ (§. 403.). Quamobrem cum Dei
intellectus sit absolute perfectissimus (§. 168.) & voluntas ipsius
omnium perfectissima itidem talis (§. 386.) , ipsique omnipo-
tentis competat (§. 349.) , signum vero naturale rationem
significatus in ipsis rerum notionibus habeat (§. 956. *Ontol.*) ;
Deus ad consequendum finem suum per existentiam hujus
mundi intentum utitur medio , quo finem suum certo conse-
quitur.

Intendit Deus manifestare gloriam suam creaturæ ratio-
nali , atque hæc manifestatio finis est , quem sibi proposuit.
Eum fecit mundum , per quem gloria ipsius manifestatur , ut-
pote , summam & intellectus , & voluntatis perfectionem at-
que potentæ magnitudinem apertissime loquentem. Fi-
nem adeo , quem sibi proposuit , certo consequitur. Me-
dium itaque , quod elegit , ad eum consequendum aptissi-
mum est.

§. 625.

*Idem in ge-
nere eoin-
citur.*

*Deus in genere eligit media , quibus fines intentos certo
consequitur.* Etenim Deus elegit medium , quo finem , quem
per existentiam hujus mundi intendit , certo consequitur (§.
624.).

624). Quamobrem cum Deus idem produxerit hunc mundum, ut gloriam suam manifestaret (§. 611.), adeoque seipsum, qualis sit, patefaceret (§. 610.); per electionem quoque hujus potius mundi, quam alterius, cuicunque creaturæ rationali patefacere voluit, qualibus utatur mediis ad finem sibi propositum consequendum. Patet igitur eum eligere media, quibus fines intentos certo consequitur.

Idem etiam sic ostenditur. Deus vi omniscientiæ suæ novit omnia media, quibus finem intentum consequi datur (§. 302.301.). Fieri adeo haud quaquam potest, ut in eligendis mediis a vero aberraret. Quamobrem ea eligit media, quibus finem a se intentum certo consequitur.

Repugnat voluntati velle finem & nolle media, quibus eum certo & ex asse assequeris, nisi impedimentum quoddam obijciatur, quod invitum a mediis melioribus recedere cogit eligentem. Eligere enim medium, quod ad finem consequendum ex asse non ducit, supponit finem expeti ex parte, non vero totum: eligere autem medium, quod ad finem consequendum non certo facit, sed quod ab eo aberrare potest, supponit finem parum curari, sed esse ad utrumque paratum, sive eundem consequaris, sive eodem excidas. Neutrum adeo horum fieri potest, nisi ex errore, aut aliis de causis negotio extrinsecis, & hinc in Deum minime cadit, utpote omniscium ac independentem ab omnibus entibus aliis. Hæc, quæ dixi, militant pro electione mundi optimi, & metum omnem procul arcent, ne ex naturæ necessitate fieri debeat electio in præjudicium libertatis. Sane si nos in puolibet casu intelligeremus, quodnam sit illud medium, quod nos ad finem propositum certo perducatur & ejusdem ex asse compotes reddat; hoc ipsum semper eligeremus, nisi inviti, quatenus a rebus aliis dependimus, ab eodem recedere cogermur, neque unquam animum nostrum sollicitum teneret hæc cura, ne libertatis jacturam faciamus, media deteriora præferentes melioribus, ut nos libere agere dubitari non posset.

§. 626.

*Quomodo
Deus fi-
nes parti-
culares
constituat.*

Deus non constituit fines particulares nisi in relatione ad finem totius mundi. Etenim Deus nihil eorum, quæ insunt huic rerum seriei, decrevit absolute spectatum, sed in relatione ad totum (§. 519.). Quoniam decernens voluntatem determinat ad aliquid agendum (§. 497.); si propter finem particularem agere vult, propter eum agere non decernit nisi in relatione ad finem totius mundi. Quamobrem cum finem aliquem constituat, quatenus propter eundem agere decernit, quod per se patet; nullos quoque fines particulares constituit, nisi in relatione ad finem totius mundi.

Sane nisi Deus fines particulares, quos intendit, referret ad finem totius mundi, fieri haud quaquam posset ut sibi met-ipsi subinde non contrariaretur. Etenim finis particularis contrarius esse posset vel fini totius mundi, vel fini cuidam particulari alteri, quemadmodum in humanis quotidie observatur. Neque enim alia datur ratio, quod fines particulares, quos homines sibi præstituunt, sæpissime sibi invicem contrariantur, quam quod ad finem aliquem ultimum eosdem minime referunt, vel quod de ultimo quodam fine prorsus solliciti non sunt, vel quod parum curant, utrum finis particularis eisdem conveniat, an vero adversetur. Cessat penes Deum ratio contrarietatis finium particularium tum inter se, tum cum fine ultimo. Etenim Deus unico actu decernit omnia (§. 520.), cum omnia simul cognoscat (§. 160.): nos de partibus vitæ deliberamus & decernimus, quod futura prævidere non valemus.

§. 627.

*Quales ii-
dem sunt.*

Quoniam Deus fines particulares non constituit nisi in relatione ad finem totius mundi (§. 626.), finis autem, cur hunc mundum produxerit, est patefactio perfectionis suæ absolute summæ (§. 608.), seu manifestatio gloriæ ipsius (§. 610.); fines quo-

quoque particulares, quos Deus in hoc universo constituit, ad patefactionem perfectionis suæ absolute summæ, seu manifestationem gloriæ suæ referri debent.

Demonstravimus hoc jam in specie, de fine permissionis mali moralis (§. 613.), ac idem in S. S. quoque doceri ostendimus (§. 614.).

§. 628.

Finis, quem Deus per existentiam totius mundi intendit, Finis ultimus est finis ultimus. Fines enim particulares Deus non constituit nisi in relatione ad finem, quem per existentiam totius universi intendit (§. 626.). Quoniam itaque per finem totius mundi intelligitur, cur Deus hunc finem particularem constituerit (§. 855. *Ontol.*); ratio finis particularis in fine totius mundi ultimo continetur (§. 56. *Ont.*), adeoque posito fine totius mundi ponuntur etiam fines particulares (§. 118. *Ontol.*). Sunt igitur fines particulares ob finem istum, qui per totius mundi existentiam intenditur. Quamobrem cum is sit finis ultimus, ob quem constituuntur ceteri (§. 943. *Ontol.*); finis ultimus est, quem Deus per existentiam totius mundi intendit.

Inde est, quod Deus ultra hunc finem non intendat alium: neque enim datur alius finis, ob quem Deus finem per existentiam totius universi intentum constituit. Necesse autem est ut constet, dari aliquem finem ultimum, quem Deus in decreto mundi producendi intendit, ut finium particularium subordinatio fiat manifesta, sine qua probari nequit, Deum esse sapientem (§. 678. *Psych. rat.*).

§. 629.

Patefactio summæ Dei perfectionis seu manifestatio gloriæ Qualis sit divine est finis ultimus, quem Deus per existentiam hujus universi intendit. Etenim finis, quem Deus per existentiam hujus universi intendit, finis ultimus est (§. 628.). Enimvero finis,

finis, quem Deus per existentiam hujus universi intendit, est patefactio perfectionis absolute summæ, quæ gaudet (§. 608.), adeoque manifestatio gloriæ ipsius (§. 610.). Patefactio adeo summæ Dei perfectionis, seu manifestatio gloriæ divinæ est finis ultimus, quem Deus per existentiam hujus universi intendit.

Et sane nunc clarius patet, quod ultra finem, quem Deus per creationem mundi intendit, non detur finis alius, ob quem eundem intenderit. Etenim si Deum respicias, nil quicquam aliud ab eodem per creationem mundi intendi potest, quam ut perfectionem suam absolute summam, quæ nihil incrementi capere potest, creaturæ intelligenti patefaciat, Præter Deum vero non datur ens quoddam aliud, cujus gratia creaturæ rationali gloriæ suam manifestare voluerit. Unde liquido constat ne fingi quidem posse aliquem finem, ob quem Deus creaturæ rationali gloriæ suam manifestare voluerit, consequenter qui ultra hunc finem detur.

§. 630.

*Finium
subordi-
natio quid
sit.*

Finis unus dicitur subordinari alteri, si constituitur ob alterum, seu, si ideo constituitur, quia constituitur alter, aut quia alter ante fuit constitutus.

Si quis munus publicum olim obeundum intendit, & eo fine in Academiam studiorum gratia proficisci sibi proponit, atque propterea in Schola literis humanioribus sedulam operam navat; studia academica sunt finis, quem per studia scholastica intendit, ast promotio ad munus publicum, est finis per studia academica obtinendus. Finis adeo prior constituitur propter posteriorem, neque enim studia academica curares, nisi tibi in animo esset olim promoveri ad publicum aliquod munus, consequenter ille huic subordinatur.

§. 631.

§. 631.

Deus fines particulares subordinat ultimo. Etenim Deus Subordinat non constituit fines particulares nisi in relatione ad finem totius *rio finium* mundi (§. 626), consequenter nisi in relatione ad ultimum (§. *Deo vindi-* 628.). Quoniam adeo per finem ultimum intelligitur, cur *cata.* fines particulares constituerit (§. 855 *Ontol.*), adeoque ratio, cur eos constituerit, in fine ultimo continetur (§. 56. *Ontol.*); fines particulares non constituisset, nisi intendisset ultimum (§. 118. *Ontol.*). Quamobrem cum finis unus alteri subordinetur, si ideo constituitur, quia alter constituitur (§. 630.) ; Deus fines particulares subordinat fini ultimo.

Quomodo hæc finium subordinatio fieri possit per ipsam rerum naturam & quomodo a Deo fiat; patebit clarius paulo post, quando in fines particulares, quinam sint, inquisituri sumus.

§. 632.

Quoniam finis ultimus, quem Deus per existentiam hujus *Quonam* mundi intendit, est patefactio summæ, quæ ipsi est, perfectionis, *omnes fines* seu manifestatio gloriæ divinæ (§. 629.), fines autem particula- *in hoc uni-* res ultimo subordinat (§. 631.); *fines omnes particulares subor-* versio ten- *dinat patefactioni summæ, qua gaudet, perfectionis, seu manifesta-* dant. *tioni gloriæ divinæ,* consequenter cum finis unus subordinetur alteri, quatenus unus propterea constituitur, quod constitutus sit alter (§. 630.); Deus finem quemcunque particularem ideo intendit, quia gloriam suam per existentiam hujus universi manifestare, seu perfectionem suam summam patefacere vult.

Non parum juvat in praxi morali nosse, quod Deus finem quemcunque particularem subordinet manifestationi gloriæ suæ: immo non minus juvat idem nosse in theoria morali, quando principia juris naturalis & officia erga Deum demonstranda.

§. 633.

*Subordina-
tio finium
particula-
rium inter
se Deo vin-
dicata.*

Deus omnes fines particulares sibi invicem subordinat. Et-
enim Deus fines omnes particulares subordinat ultimo (§. 631.),
adeoque eisdem ideo constituit, quia constituit ultimum (§.
630.). Quod si jam constituto fine ultimo constituendus sit
finis A, hic vero obtineri non possit, nisi constituatur finis B;
finis alter particularis constituendus est & quidem, si ultimus
obtineri debet, ideo quia finis A constituendus. Finis igitur B
subordinandus est fini A. Et eodem modo patet, finem C
subordinandum esse ipsi B, finem vero D ipsi C ac ita porro.
Quamobrem cum fieri non possit, ut plures fines particulares
subordinentur fini ultimo, quin sibi invicem subordinentur;
patet Deum omnes fines particulares sibi invicem subordinare.

Subordinatio finium particularium inter se cum subordina-
tione sub fine ultimo in serie finium adeo connexa est, ut ab
hac ista separari minime possit: id quod in exemplis admodum
manifestum est. Qui adeo animum advertit ad exemplum paulo
ante ad illustrandum finium subordinationem propositum, idem
clarissime percipiet (not. §. 630.).

§. 634

*Quomodo
finium sub-
ordinatio
fiat.*

*Si quis finis alteri subordinatur, ad hunc alterum se habet
ut medium ad finem.* Etenim si quis finis alteri subordinatur, is
ideo constituitur, quia hic aliter constituitur (§. 630.). Ne-
cesse igitur est, ut finis alter obtineri minime possit, vel saltem
non possit obtineri eo, quo intenditur, modo, nisi finis alter
constituatur. Cum adeo finis subordinatus huc faciat, ut alter,
cui subordinatur, actum consequatur; ad eundem utique sese
habet per modum medii ad finem (§. 937. Ontol.). Atque
adeo patet in subordinatione finium is, qui subordinatur alteri,
ad hunc, cui subordinatur, se habere ut medium ad finem.

Et

Et hinc patet ratio, cur fines particulares sibi invicem subordinari debeant, ubi subordinandi sunt fini ultimo omnes simul. Neque enim omnes immediate subordinantur fini ultimo, subordinandi igitur sunt aliis, isti vel immediate, vel propius subordinatis. Ponamus enim finem B subordinari ipsi A, quia finem A absque ipso B consequi minime datur. Quod si jam porro finem B vel prorsus consequi non datur, vel non eo, quo ob ultimum obtineri debet, modo; eidem alius adhuc C subordinandus venit & ita porro. E. gr. finis oculi est representatio visibilis in retina clara atque distincta. Cum ad visionis claritatem & distinctionem faciat, ut impediat, ne lumen reflexum confundatur cum refracto; reflexio luminis peregrini impedienda aut, si mavis, sublatio ejusdem intenditur tanquam finis particularis & per modum medii subordinatur ultimo. Ipsa etiam refractionis luminis, antequam ad retinam pertingit, intenditur tanquam finis particularis ob ultimum, ut scilicet imago in exigua distantia delineetur & parva licet clara tamen sit atque distincta. Quatenus vero reflexio peregrini impedita huc facit, ne effectus refractionis imminuatur, finis iste particularis huic particulari subordinatur per modum medii hunc meliori modo consequendi. Similiter ut lumen refractum sit intensum, ne deficiat claritas imaginis; sufficiens luminis quantitas in oculum immittenda. Hujus adeo immissio est finis quidam particularis, qui subordinatur ultimo, quatenus facit ad claritatem imaginis, subordinatur autem fini alteri particulari intermedio, quatenus in causa est, ut penicilli radiorum per refractionem prodeant fortes. Cui structura oculi satis explorata est & singularum partium rationes apertæ sunt, quatenus referuntur ad imaginem in fundo oculi delineandam; is facile sibi formabit ideam de finium subordinatione exemplarem, in qua veritas propositionum huc facientium perspicitur. Inprimis etiam intelliget, cur fines particulares ad eundem ultimum directi, sibi invicem subordinandi sint.

§. 635.

Deus fines omnes ita sibi invicem subordinat, ut remotiorum finium

quomodo a tiorum media sint propiores & omnes tandem simul medium Deo fiat. finis ultimi. Etenim Deus fines particulares subordinat sibi invicem (§. 633.), simulque omnes ultimo (§. 631.). Enimvero si quis finis alteri subordinatur, is ad hunc alterum se habet ut medium ad finem (§. 634.). Deus itaque fines omnes ita sibi invicem subordinat, ut subordinatus sit medium ad eum, cui subordinatur, consequenter ut propior sit medium remotioris, omnes vero simul sint medium ultimi consequendi (§. 943. *Ontol.*).

Hanc finium subordinationem in particulari scrutatur Teleologia (§. 85. *Discurs. pralim.*). Principia tamen generalia, quæ scrutationem moderantur, trademus deinceps, propterea quod iisdem etiam in aliis habemus opus.

§. 636.

Media a Deus eligit media, quæ via brevissima ad finem ducunt. *Deo qualia* Etenim Deus omniscius (§. 302.) scit omnia, quæcunque cognitu possibile sunt, sive singularia fuerint, sive universalia (§. 301.), adeoque etiam novit omnia media, quibus finis quicunque sive solitarie, sive una cum aliis spectatus, obtineri potest, consequenter quibus solis positus ex arte ponitur finis. Jam cum agens intelligens non velit media, nisi finis consequendi gratia (§. 941. *Ontol.*), nec Deus quicquam velit sine motivo (§. 312.), consequenter sine ratione sufficiente (§. 887 *Psychoth. empir.*); fieri haud quaquam potest, ut finis consequendi gratia quædam velit, sine quibus finis poni poterat. Eligit itaque media, quæ via brevissima ad finem ducunt, quatenus scilicet permittunt fines alii simul obtinendi (§. 687 *Psychoth. ration.*).

Non alia datur ratio, cur nos per ambages incedamus, non vero via brevissima ad finem contendamus, quam quod media illa ignoramus, quæ nos brevissima via ad eundem ducunt. Cessat igitur penes Deum omniscium ratio, cur per am-

ambages incedamus, consequenter nec fieri potest, ut is per ambages incedat (§. 118. *Ontol.*).

§. 637.

Homo viam brevissimam, qua Deus incedit in prosequendo Difficultas fine, difficulter cognoscere potest in casu particulari. Etenim agnoscendi plurimi sunt fines, quos Deus simul intendit: id quod propter viam brevissimam multitudinem & insignem earum varietatem in hoc universo in dubium vocari minime potest. Enimvero si quis in casu plurium finium consequendorum gratia facit, quod unius consequendi gratia fieri necesse non erat, is per ambages non incedit (§. 687. *Psychol. rat.*), etsi ad unum tantummodo finem animum advertenti per ambages incedere videatur (§. 685. *Psychol. rat.*). Quoniam itaque homo fines omnes particulares, quos simul consequendos sibi proposuit in hoc universo, minime perspectos habet; respectu quorundam per ambages incedere videri potest Deus, quando via brevissima incedit, consequenter viam brevissimam in dato casu particulari difficulter agnoscit.

Cavendum itaque est, ne temere adversus propositionem generalem, ex natura intellectus ac voluntatis divinæ fluentem, instantias urgeamus, præsertim cum non modo fines a Deo simul intentos ignorare, verum etiam pro fine vendicare possimus, quod in numero finium locum non habet.

§. 638.

Deus constituit fines, qui ipsum decent. Quoniam Deus Quales fines sibi liberrime constituit (§. 620.); quin propter illos fines nes Deus agere velit, dubitandum non est (§. 932. *Ontol.* & §. 941. *Psychol. quoad se empir.*). Vult vero, quod ipsum decet (§. 335.). Quam-constituat obrem & fines constituit, qui ipsum decent.

Idem etiam sic ostenditur. Deus omnes fines particulares subordinat paterfactioni perfectionis suæ absolute summæ (§.

632.), atque adeo in attributis divinis continetur ratio, cur hunc potius finem voluerit, quam alium. Quamobrem cum id Deum deceat, cujus aliqua in ipsius attributis continetur ratio, cur ipsum potius velit, quam aliud (§. 332.); Deus constituit fines, qui ipsum decent.

§. 693.

Conveni-
entia fini-
um cum
natura di-
vina.

Quoniam Deus constituit fines, qui ipsum decent (§. 638.), adeoque ob rationem a natura sua, attributis nempe suis, desumtam (§. 332.); *fines naturæ suæ convenientes constituit.*

Nimirum finis aliquis decet Deum, quatenus naturæ ipsius convenit, hoc est, attributis divinis non repugnat talem constitui finem.

§. 640.

Sapientia
Dei.

Deus est sapiens & sapientia ejusdem summa atque perfectissima est. Etenim Deus constituit fines naturæ suæ convenientes (§. 639.), eligit media ad finem ducentia (§. 625) & fines particulares subordinat sibi invicem (§. 633.), ut propiores fiant media remotiorum (§. 635.). Quamobrem cum sapiens sit, qui actionibus liberis fines naturæ suæ convenientes præscribit, & media ad eos ducentia eligit, finesque particulares ita sibi invicem subordinat, ut propiores fiant media remotiorum (§. 678. *Psychol. rat.*); Deus sapiens est.

Est vero finis, quem sibi constituit, omnium possibilium optimus (§. 619.), eligit media, quæ certo (§. 625) & via brevissima ad eundem ducunt (§. 636.), & quibus finem ex asse consequitur (§. 621.), finesque omnes particulares ita sibi invicem subordinat, ut remotiorum media sint propiores, ac omnes tandem simul medium finis ultimi (§. 635.). Jam sapientia summa atque perfectissima est scientia constituendi fines optimos, eligendi media, quæ certo & via brevissima ad eundem ducunt, & quibus finem ex asse consequi datur, finesque

omnes

omnes particulares ita sibi invicem subordinandi , ut remotiorum media sint propiores & omnes tandem simul medium finis ultimi (§. 689. *Psychol. ration.*). Quamobrem patet Dei sapientiam esse summam atque omnium perfectissimam.

Liquet ex demonstratione propositionis præsentis , quam multa ante probanda sint , quam constare possit , sapientiam Deo convenire summam atque omnium perfectissimam , etsi jam in Psychologia rationali ostenderimus , quænam sapientia sit summa atque omnium perfectissima. Sane si quis convinci debeat , convenire Deo hoc attributum, quod pulchritudine sua maxime delectat, animo recolenda est non modo demonstratio in Psychologia rationali data, sed perpendenda quoque sunt principia eandem ingredientia. Velim hæc perpendant, qui sibi persuadent aliisque persuadere conantur , ardua levi opera perfici posse. Utile autem est, immo longe utilissimum sapientiæ divinæ prorsus convictum possidere animum , propterea quod hoc attributum mirifice influit in praxin & in Teleologia omne fert punctum. Quare nec piget uberius exponere, quæ ad eam penitus inspiciendam conducunt.

§. 641.

*Deus existentiam hujus universi sapienter decrevit. Et Sapientia enim Deus existentiam hujus universi decrevit propter aliquem in decreto finem (§. 604.), sibi convenientem (§. 639.) & medium elegit, condendi quo eundem certo consequitur (§. 624.), nec fines particulares mundi. constituit, nisi in relatione ad totius mundi finem (§. 626.), ac sibi invicem subordinavit, ut remotiorum media sint propiores, ac omnes tandem simul medium ultimi (§. 635.). Quamobrem cum sapientia non requirat , nisi ut propter finem nobis convenientem, agamus & media eidem convenientia eligamus, finesque particulares sibi invicem subordinemus per modum medii ad finem (§. 678. *Psychol. rat.*); Deum existentiam hujus universi sapienter decrevisse constat.*

Idem

Idem etiam sic ostenditur. Deus mundum aliquem producere decrevit, ut perfectionem suam absolute summam patefaceret (§. 608.) ac ideo eum producere decrevit mundum (§. 615), qui ipsius iudicio gloriam ejus omnium maxime manifestat (§. 623), & huic manifestationi gloriæ suæ omnes fines particulares subordinat (§. 632). Quoniam itaque sapienter decernitur, quod propter finem decernenti convenientem decernitur, decretis simul mediis ad eum obtinendum necessariis una cum legitima finium subordinatione (§. 678. *Psychol. rat.*); quin Deus sapienter existentiam hujus universi decreverit, dubitandum non est.

Hæc propositio vi demonstrationis primæ subsistit, etiam si non supponas mundum a Deo productum esse omnium possibile optimum; in hypothese autem mundi optimi non modo patet, quod sapienter ejus existentiam decreverit, verum etiam quod sapientissime decreverit, quemadmodum ex propositione subsequente elucet, cujus demonstratio in hypothese mundi optimi resolvitur.

§. 642.

*Quanta
sapientia
Deus in
decernenda
existentia
mundi
usus.*

Deus existentiam hujus mundi sapientissime decrevit, ita ut majore sapientia uti non potuerit. Finis enim, quem per productionem universi intendit, est omnium optimus, qui per productionem alicujus mundi intendi potest (§. 618.). Media elegit, per quæ eundem certo (§. 624.) & ex asse (§. 621.) atque via brevissima consequitur (§. 636.); finesque omnes ita sibi invicem subordinavit, ut remotiorum media sint propiores & omnes tandem simul medium finis ultimi (§. 635.). Enimvero major sapientia concipi nequit, quam qua fines optimi constituuntur, media certo & via brevissima ad eundem ex asse consequendum ducentia eliguntur, finesque particulares ita sibi invicem subordinantur, ut remotiorum media sint propiores, & omnes tandem simul medium finis ultimi (§. 639.

Psychol.

Psychol. rat.). Deus adeo existentiam hujus mundi sapientissime decrevit, ita ut majore sapientia in decernendo uti minime potuerit.

Ex superioribus patet, non posse probari finem a Deo constitutum esse omnium possibilium optimum, nisi supponatur Deum elegisse mundum omnium possibilium optimum (§. 618.). Atque ita demonstratio præsens resolvitur in hypothesin mundi optimi, nec nisi stante hac hypothese subsistit. Elucet adeo denuo hypotheseos hujus prerogativa.

§. 643.

Deus omnia in hoc universo sapienter, immo sapientissime decrevit. Deus enim omnia decrevit ab æterno (§. 504.), actu extendatur unico (§. 520.), nec quicquam eorum, quæ in mundo fiunt, in sapientia particulari decrevit absolute spectatum, sed in relatione ad totum in decreto (§. 519.). Decrevit autem existentiam totius mundi sapienter (§. 641.), immo sapientissime (§. 642.). Decrevit ergo omnia in hoc universo sapienter, immo sapientissime.

Idem etiam sic ostenditur. Deus decrevit producere mundum, qui suo judicio omnium maxime manifestat gloriam suam (§. 623.), consequenter attributa sua hominibus revelat (§. 610.). Quamobrem cum in horum numero quoque sit sapientia ejusdem summa atque perfectissima (§. 640.); mundum utique producere decrevit, qui suo judicio omnium maxime patefacit summam hanc atque perfectissimam sapientiam. Patet vero per se, summam Dei sapientiam per decretum mundi producendi non posse aliter innotescere, nisi quatenus ex rebus decretis intelligitur, eas hoc modo decerni non potuisse nisi ab eo, cui summa est atque perfectissima sapientia & qui eadem in decernendo utitur. Deus itaque utens mediis, quibus finem suum certo (§. 624.) & ex asse consequitur (§. 621.), omnia in hoc universo sapientissime decrevit.

Me tacente apparet; demonstrationem posteriorem simul satisfacere propositioni anteriori. Mirifice autem præsens propositio in praxin influit, ut adeo in futuros usus probe sit notanda.

§. 644.

An etiam
ad permis-
sionem ma-
li moralis.

Quoniam *Deus* malum morale permittere decrevit (§. 585.), omnia vero in hoc universo sapientissime decrevit (§. 643.); mali quoque *moralis permissionem sapientissime decrevit.*

Quomodo permissio mali moralis sapientiam Dei, eamque summam atque perfectissimam loquatur, ex postea dicendis clarius elucescet: neque enim infima sapientiæ pars est, dirigere malum ad bonum finem. Ceterum propositio præsens usu erit, ubi evincendum mali moralis permissionem non repugnare bonitati Dei.

§. 645.

Quænam
in nume-
rum finium
a Deo
referenda.

Quæ ex natura & essentia rerum materialium consequuntur, fines sunt a Deo intenti: essentiæ vero & natura rerum sunt media, quibus fines istos consequitur. Etenim Deo ab æterno effectus omnes rerum materialium præscibiles fuere intentorum (§. 232.), adeoque novit, quænam ex essentiis & natura rerum sint consecutura, si quidem hæ res hoc ordine producerentur (§. 231.). Quamobrem cum has res hoc ordine producere decreverit (§. 522. 519.); quæ ex essentiis & natura rerum consequuntur, ad actum perducit & ideo has rerum essentias atque naturam esse voluit (§. 497.). Patet itaque, quæ ex natura & essentia rerum materialium consequuntur, esse fines a Deo intentos; ipsas vero essentias atque naturam rerum esse media, quibus fines istos consequitur (§. 932. 937. *Ontol.*).

Idem etiam specialiter hoc modo ostendi potest. Summus rem quamcunque in mundo materiali existentem, veluti oculum humanum, aut animalium. Constat eam esse oculi
stru-

structuram, ut visibilibus imagines vi ejusdem in fundo ipsius delineari possint. Quoniam Deus omnia universalis & singularis, quæ cognitu possibilis sunt, scit (§. 300.) ab æterno (§. 319.); structura quoque oculi ipsi ab æterno perspecta fuit, nec ignotum esse potuit, vi ejusdem visibilibus imagines in oculo delineari posse. Quamobrem cum rerum actualitas pendeat a voluntate (§. 433.), consequenter a decreto Dei (§. 497); quin Deus oculum homini & animalibus esse voluerit, aut hominem & animalia bruta, quibus est oculus, ad actualitatem perducere decreverit, ut visibilia in fundo oculi delinearentur, dubitari nequit. Jam cum id, cujus gratia Deus actualitatem oculi, aut, si mavis hominum & animantium brutorum, quibus oculus est, decrevit, sit finis ab ipso intentus (§. 932. *Ontol.*); delineatio visibilibus in fundo oculi est utique finis a Deo intentus. Et quia porro in structura oculi, utpote corporis organici (§. 274. *Cosmol.*), ratio continetur, cur imago visibilibus in ejus fundo delineari possit (§. 277. *Cosmol.*), medium vero est, quod rationem continet, cur finis actum consequatur (§. 937. *Ontol.*); quin ipsa oculi structura, consequenter essentia ejusdem (§. 276. *Cosmol.*), sit medium, quibus finem istum consequitur Deus, dubitandum non est. Quoniam eadem demonstratio subsistit, si loco oculi corpus quodcunque aliud assumas; in genere patet, quæ ex essentiis & natura rerum materialium consequuntur, esse fines a Deo intentos, essentias vero & naturam rerum media, quibus istos fines consequitur.

Nulla est exceptio, quæ ex essentiis & natura rerum consequuntur, ea necessario consequi, adeoque in numero finium esse haud quaquam posse. Etenim non in finium numero sunt, quatenus ex essentiis & natura rerum consequuntur, sed quatenus libere a Deo intenduntur. Nemo sane negat per structuram oculi fieri haud quaquam aliter posse, quam ut imago visibilis in oculo delineetur. Hoc tamen minime

obstat, quo minus imago in oculo delineanda spectetur tanquam finis a Deo intentus in ipsius decreto mundi condendi. Neque enim Deus delineationem imaginis in oculo intendit, quia ex structura ejusdem sequitur; sed quod fini ultimo, quem per creationem mundi consequi voluit, convenit existere hominem, in cuius oculo istiusmodi delineatio fiat. Quemadmodum itaque finem ultimum liberrime constituit, ita non minus libere finem hunc particularem isti subordinatum constituisse intelligitur. Nullus profecto datur finis, qui non necessario consequatur ex medio, alias enim posito medio non poneretur finis actu, consequenter medium eidem obtinendo minime inserviret. Hoc tamen nexu necessario inter finem atque medium, quatenus is per hoc ad actum deducendus (§. 937. *Ontol.*), non obstante, finis libere constituitur & media ad eundem certo ducentia, libere eliguntur. Finis, quem intendimus, dum horologium acuratum nobis construi curamus, est temporis minime fallax indicium. Hunc finem libere eligimus, etsi horologium per structuram suam necessario indicet tempus. Abunde igitur intelligitur, quam vanus sit illorum metus, ne in finium numerum referantur, quæ ex eodem exulare debent, quod videant, quæ ex essentiis rerum per naturam earundem consequuntur, necessario hinc consequi. Nee porro metuendum est, quod effectus sic confundantur cum fine, media cum causis efficientibus. Etenim ex notionibus finis atque medii (§. 932. 937. *Ontol.*) demonstrari potest, finem esse effectum respectu medii, medium vero respectu illius causam efficientem. Neque enim implicat, unam eandemque rem diverso respectu esse finem & effectum & similiter unam eandemque rem diverso respectu esse medium & causam efficientem. Sane effectus horologii est situs indicis in orbe, cui numeri horarii inscripti sunt, horam præsentem & ejus partes indigitans: quatenus tamen ab horologiopoeta construitur horologium, ut ex situ indicis momentum temporis præsens innotescat, in finium numerum abit.

§. 646.

Ufus rei dicitur dependentiâ actualitatis rei cujusdam al- *Ufus rei*
terius, quæ mala non est, ab eadem. Quodsi hæc mala fuerit, *quid sit.*
Abusus appellatur.

Ne definitio ab usu loquendi abhorreere videatur, uno alteroque exemplo eandem illustrari convenit. Circino utimur in describendis figuris, atque ideo in earum descriptione usum habere dicitur. Ponamus circino describi peripheriam circuli, vel arcum ejusdem. Nemo non novit, ipsam peripheriæ aut arcus descriptionem non esse circini usum: nemo tamen diffitetur, circini hunc esse usum, ut ejus ope peripheriam & arcum circuli describere valeamus. Possibilitas descriptionis peripheriæ vel arcus usus circini etiam dici nequit, cum peripheriæ vel arcus descriptio possibilis concipiatur per circuli definitionem genericam, quæ circino inveniendō ansam dedit, consequenter possibilis concipiatur, antequam de circino cogites. In quonam igitur consistit usus circini, quem in describenda peripheria vel arcu circuli describendo habet? Sane circino uteris, dum peripheriam vel arcum circuli actu describis, adeoque usus circini actui descriptionis inesse debet. Per structuram circini intelligis, cur peripheriam vel arcum circuli jam describas (§. 131. *Geom.*). In circino adeo continetur aliqua ratio, cur jam peripheriam vel arcum circuli describas (§. 56. *Onsol.*). Actualitas igitur descriptionis pendet a circino (§. 851. *Onto!*). Unde patet nihil in actu descriptionis adesse, quod usu circini indigari possit, nisi dependentiam actus descriptionis a circino. Actum hunc esse quidpiam diversum a circino, nemo non videt. Quamobrem liquet, usum rei in genere non esse nisi dependentiam actualitatis rei cujusdam alterius ab ipsa. Quoniam vero re abuti dicimur, quando eadem male utimur, ut usus distinguatur ab abusu, res ista, cujus actualitas ab altera dependet, mala esse non debet. Prodit itaque definitio usus rei, quam dedimus, in genere, quod sit dependentia actualitatis

rei cujusdam alterius, quæ mala non est, ab eadem. Vides igitur, vocabulum usus a nobis definiri usui loquendi convenienter. Nec dubitandum est, quin eadem definitio sit fecunda, cum ex eadem usus rei cujuscunque, quam habere potest, demonstrari possit, & notionis directricis vice fungatur hæc ipsa definitio, quoties in usum rei, quem habere potest, inquiris. Sed agendum, demus adhuc exemplum aliud, ut tanto clarius elucescat veritas dictorum. Theorematis de æqualitate angulorum inter lineas parallelas usum esse dicimus in demonstranda ratione angulorum in triangulo ad rectum, propterea quod eodem utimur tanquam principio in demonstratione theorematis, quod anguli in triangulo quocunque rectilineo sint æquales duobus rectis. Demonstrationem conficimus, dum theoremata prius adhibemus tanquam præmissam in ratiociniis, ex quibus contextitur demonstratio. Atque adeo actus demonstrandi dependet ab isto principio. Unde denuo patet, usum theorematis, quem habet in demonstrando, non consistere nisi in dependentia demonstrationis ab isto principio. Ut adeo denuo usus rei in genere vi hujus exempli dici non possit nisi actualitas rei cujusdam alterius ab ipsa: ut vero ab abusu distinguatur, addendum omnino est, rem hanc alteram non esse debere malam. Ut hoc rectius appareat, addendum est exemplum, in quo cum usu concurrit abusus. Gladio vulnus lethale infligere licet alteri, adeoque inflictionis vulneris actualitas a gladio dependet. Quod si hoc fiat sui defendendi causa, ut vim vi repellamus, id licitum esse, in Jure naturali demonstratur. Habet ergo gladius usum in sui defensione. Enimvero si ex vindicta alteri vulnus infligitur ob injuriam, qua quis se affectum arbitratur; id licitum non est. Abutitur adeo gladio, qui eodem vulnus infligit alteri injuriam sibi illatam vindicaturus. Et hoc modo intelligitur, quomodo unus idemque actus possit & ad usum, & ad abusum referri, prout per datas circumstantias vel bonus fuerit, vel malus. Accidit vero, ut abusus & usus in diversis quoque actibus consistent. Sed nostrum jam non est ea prosequi.

§. 647.

Si usus gratia quid producitur, usus in finem abit. Et- ^{Quando}
 enim ponamus corpus aliquod artificiale ob certum quendam, ^{usus in fi-}
 quem habere potest, usum parari. Quoniam id, ob quod ^{nem dege-}
 causa efficiens agit, finis est (§. 932. *Ontol.*); usus, ob quem o-
 pus istud producitur, in finem abit.

Hæc propositio probe notanda est: sunt enim qui sibi persuadent usum in finium numero esse non posse, propterea quod vident esse rerum usus, qui in finium numero non sunt, & præter finem dari quoque rerum usus. Aviculæ nificiant in cavitatibus arborum putridarum & eo sese recipiunt, ut ab injuriis tempestatum sint liberæ. Habent adeo cavitates arborum aliquem usum, quem cum non intendant causæ putredinis, in finium numero non esse colligitur. Extruitur cella cerevisiaria ante portas in colle una cum atrio quodam, ut labore fessi in eo confidere & recreari possint, antequam domum repetant. Viator imbris injurias evitaturus in atrium sese recipiens experitur ejus aliquem usum, quem cum non intenderit dominus, in finium numerum referre nequis. Patet igitur esse rerum usus a finibus diversos & res habere usus, quarum nullus apparet finis. Enimvero si supponas, dominum cellæ extrui jubere atrium non modo suorum causa, ut membra lassæ reficiant, sed & prono in aliorum commoda animo prospicere viatoribus; qui antea tantummodo erat usus, nunc etiam finis erit, etsi non primarius, attamen secundarius (§. 942. *Ontol.*). In rebus humanis multi deprehenduntur usus, qui e numero finium exulant, tum quod omnes rerum, quos habere possunt, usus minime prævidemus, tum quod prævisos intendere nolumus, de aliorum commodis parum solliciti, modo nostris prospiciamus. Nemo non quovis tempore hoc & in se ipso, & in aliis experiri valet, modo rerum usus sibi obvios expendat, ut adeo opus non sit rationibus evinci, quod per se patet. Juvat tamen multiplici experientia convictum habere animum.

§. 648.

Cur usus rerum naturalium sunt fines a Deo intenti. Cum enim Deus omnia possibile in systemata redacta cognoscat (§. 155.), omnis vero dependentia rerum a se invicem patet, ubi illa tanquam in systemata redacta spectantur (§. 144); quin omnem rei unius ab altera dependentiam cognoscat, dubitandum non est, consequenter quia usus rei consistit in dependentia actualitatis rei cujusdam alterius ab ipsa (§. 646.), quod omnem rerum usum ab aeterno cognoverit palam est (§. 319.). Decrevit vero ea, quæ in mundo sunt, in relatione ad totum (§. 519.), adeoque horum quoque rerum existentiam decrevit propter usum, quem habent. Quoniam itaque usus in finem abit, quando ejus gratia quid producitur (§. 647.); usus utique rerum naturalium fines sunt a Deo intenti.

Idem etiam sic ostenditur. Usus rei consistit in dependentia actualitatis rei cujusdam ab eadem (§. 646.), consequenter in ea re, quæ usum quendam habet, quoad alteram datur aliqua ratio, cur altera ad actum perducatur (§. 851. *Ontol.*). Quamobrem cum omnis ratio eorum, quæ enti convenire possunt, ab essentia ejus deriveretur (§. 167. *Ontol.*); res hæc habere possunt usum, quia hanc habent essentiam: sit ita quod usus non semper immediate pendeat ab essentia, sed subinde mediate, quatenus supponit modos, qui vi essentia inesse possunt (§. 160. *Ontol.*). Quoniam adeo usus ex essentiis & natura rerum tandem consequuntur, seu, quod perinde est, positis essentiis ponuntur quoad possibilitatem; quæ vero ex essentiis rerum consequuntur, sunt fines a Deo intenti (§. 645.); usus quoque rerum naturalium fines sunt a Deo intenti.

Radiis solaribus exsiccantur humida: unde usum præbent iisdem hominibus in exsiccandis linteaminibus & vestimentis. Nemo in dubium vocabit, Deum ab æterno hunc radiorum solarium usum, quem præbent hominibus, cognovisse, cumque commodis eorundem abunde prospexerit, hunc ipsam quoque in decernenda existentia solis intendisse. Nihil igitur absurdi dixeris, ubi affirmaveris, usum illum esse finem a Deo intentum. Recolenda sunt animo, quæ supra demonstravimus (§. 209.), nihil juxta ipsam S. S. judicari debere adeo abjectum, ut ideo cognitioni Dei subducatur. Et quando de providentia Dei acturi sumus, clarissime patebit, ad summam ejus perfectionem pertinere, ut Deus prospiciat creaturis quoad minima. Evanescent tum penitus præjudicia, quæ tenent animos hominum sibi persuadentium, quasi indignum Deo sit abjecta & vilia curare. Ceterum suo loco constabit, quantum profit in praxi usus quoscunque rerum naturalium referre inter fines a Deo intentos

§. 649.

Usus rerum omnium artificialium sunt fines a Deo intenti. Cur in eun-
Etenim cum Deus sit omniscius (§. 302.), adeoque omnia sciat, de censum
quæ cognitu possibile sunt, siue singularia fuerint, siue univer-
salia (§. 301.); quin omnes rerum artificialium usus ab æterno usus rerum
cognoverit (§. 319.), in dubium revocari nequit. Hinc vero artificiali-
jam porro eodem, quo in articulo præcedente, modo deducitur, um,
usus rerum artificialium esse fines a Deo intentos.

Idem etiam sic ostenditur. Res naturales & artificiales quoad Deum minime differunt: siue enim nidus ab avibus, siue domus ab hominibus extruatur, nulla quoad Deum differentia est. Quoniam itaque usus rerum naturalium sunt fines a Deo intenti (§. 648.); in eorum numerum referri quoque debent usus rerum artificialium.

Nullam quoad Deum intercedere differentiam inter opus naturæ, veluti nidum ab avibus extructum, & opus artis, veluti domum opera hominum excitatum, haud difficulter intelligitur. Etenim per essentiam & naturam avium fieri

(*Wolfii Theol. Naturalis*)

E e e e

por-

potest, ut nidus extruatur; per essentiam vero & naturam hominum, ut excitetur domus. Homines non minus, quam aves sunt creaturæ Dei, & domus ab illis condita non minus opus creaturæ, quam nidus ab hisce factus. Neque adeo alia de causa domus continetur in serie rerum, quam qua de causa nido in eadem locus est. Non est quod excipias, homines agere cum ratione, aves vero sine ratione: naturæ enim humanæ convenit cum ratione agere, quemadmodum naturæ brutorum, agere sine ratione. In systemate harmoniæ præstabilitæ (§. 617. *Psychol. ration.*) & systemate causarum occasionalium ratio humana in opera hominum non influit (§. 601. *Psychol. ration.*), sed tantummodo influere videtur (§. 602. 621. *Psychol. ration.*). Unde in hisce systematis differentia inter opera hominum atque brutorum ne quidem apparet est. Qui nonnisi ex notionibus distinctis iudicium ferunt, nihil difficultatis sentiunt, evanescentibus nebulis, quas notiones confuse excitant. Quodsi opera artis cum operibus naturæ in eundem censum referantur, quæ de hisce demonstrantur, ad illa quoque applicanda veniunt. Et hæc sane ratio est, cur eodem modo de operibus artis demonstretur, esse eorum usus fines a Deo intentos, quo idem de naturæ operibus evincitur.

§. 650.

Cognitio operum artis Deo tribuenda. Deus opera artis plenius intelligit & per ea plura in hoc universo intendit ipsis inventoribus. Etenim Deus cum sit omniscius (§. 302.), adeoque omnia cognitu possibilia, tam singularia, quam universalia sciat (§. 301.); omnes quoque rerum artificialium usus, quos habere possunt, perspectos habet, ita ut ne minimus quidem cognitioni ejus sese subducere queat. Enimvero nemo inventorum omnes prospicit usus, quos opus suum habere potest; sed data demum occasione alii in eosdem incidunt: immo sæpissime impossibile ipsi est vel maxime obvios meditando assequi usus, ubi opus jam invenit. Patet itaque Deum opera artis plenius intelligere ipsis inventoribus. *Quod erat unum.*

Porro

Porro omnes usus operum artis, quos in hoc universo unquam habituræ sunt, quoad Deum sunt fines ab ipso intenti (§. 649.), arque adeo Deus hanc rerum seriem ideo produxit & ab æterno producere decrevit, quod in ea exitura noverit opera artis hosce usus habitura (§. 932. *Ontol.*). Quamobrem cum inventor non intendat omnes illos operis usus, quos habere potest, vel olim habiturum est, quemadmodum nemo non multiplici experientia convictus concedere tenetur; Deus utique per opera artis plura intendit ipsi inventoribus. *Quod erat alterum.*

Exempli loco esto horologium, quod in communem usum constructum, quatenus temporis ratio habenda in negotiis humanis. Deinde vero præclaros admodum in astronomicis observationibus usus nactum est, ad locupletandam & perficiendam scientiam. Horologii inventor hosce usus omnes minime prævidit, immo forsitan nec intelligeret omnes, postquam fuere inventi, si adhuc in vivis fuisset, ubi ad eosdem translatus. Enimvero extra omne dubium positum est, & Deum prævidisse hosce usus, & eosdem intendisse, cum maxime inserviant fini ultimo (§. 629.). Repetenda hic sunt, quæ superius inculcavimus de solo Deo inventore & hominibus in veritatis a Deo inventæ cognitionem tantummodo penetrantibus (§. 293.). Unde patebit, opera quoque artis a Deo esse excogitata perinde ac opera naturæ. Immo ex inferius dicendis constabit, Deum eodem modo concurrere ad opera artis, quo ad opera naturæ, & ab ipsius decreto pendere, quosnam voluerit opera artis habere usus.

§. 651.

Omnis fortune adversæ pariter & secundæ effectus sunt in Fortuna numero finium a Deo intentorum. Etenim ex parte Dei fortuna nulla est, sed tantummodo ex parte hominum eidem loco in numero finium.

cus est (§. 542.); Deus vero eandem ab æterno præscivit (§. 543.) & per decretum ipsius facta est futura (§. 544.). Quamobrem cum fortuna sit concursus causarum nobis minime prævisus (§. 540.); Deus hæc causas ob hunc eorum concursum existere voluit ob id, quod ex eodem resultat. Quoniam itaque id, propter quod causa efficiens agit, finis est (§. 932. *Ontol.*); fortunæ omnis adversæ pariter & secundæ effectus esse fines a Deo intentos, palam est.

Idem etiam ostenditur hoc modo. Quoniam fortuna est causarum plurium concursus ad effectum quendam nobis vel gratum, vel molestum producendum, prouti vel secunda, vel adversa fuerit (§. 540.); causæ autem materiales, veluti corpora, per essentiam agere possunt, ut vero actu agant, a vi activa, seu natura eorundem (§. 145. *Cosmol.*) habent (§. 142. *Cosmol.*), immo etiam anima, quatenus in isto concursu etiam continentur actiones hominum liberæ, vi illa agit (§. 60. *Psycho. ration.*), in qua ejus essentia atque natura, diverso scilicet respectu (§. 68 *Psycho. ration.*), consistit (§. 66. 67. *Psycho. ration.*); nemo dubitabit, effectus fortunæ tam secundæ, quam adversæ ex essentiis & natura rerum consequi, seu ideo in hac rerum serie poni, quia ponuntur hæc essentia atque hæc natura rerum. Enimvero quæ ex essentia rerum ac natura earundem consequuntur, fines sunt a Deo intenti (§. 645.). Fortunæ igitur tam secundæ, quam adversæ effectus omnis est finis a Deo intentus.

Per inconstantiam loquendi effectus etiam a fortuna tanquam causa pendens fortuna appellari solet: communiter tamen fortuna pro causa habetur, quem adeo significatum superius stabilivimus (§. 540.). Si fortunam etiam pro effectu sumere velis, dici potest, ipsam fortunam tam prosperam, quam adversam, esse finem a Deo intentum. Sed præstat fixum retineri significatum, præsertim cum sic evitetur omnis difficultas, quatenus actiones hominum malæ ad fortunam quoque

quoque concurrunt, quæ ex confusione causæ cum effectu facile suboritur. Ceterum præsens propositio plurimum in praxin influit & ad patientiam magnum affert adjumentum in adversis.

§. 652.

Deus omnes fortune effectus subordinat fini ultimo. Ex Effectus enim effectus fortunæ tam secundæ, quam adversæ, omnes fortune sunt fines a Deo intenti (§. 651.). Subordinat vero Deus finis particulares ultimo (§. 631.). Effectus igitur fortunæ omnes, sive ea secunda fuerit, sive adversa, fini ultimo subordinat.

Propositiones quasdam speciales, etiamsi sua veluti sponte fluant ex anterioribus, atque adeo vel me tacente per easdem intelligantur, in medium adducimus propter usum, quem habent tum in sapientia divina intimius perspicienda, tum in multiplici morum praxi.

§. 653.

Quoniam finis ultimus, quem Deus per mundum procurandum intendit, est patefactio perfectionis suæ summæ, seu Dei per eos manifestatio gloriæ suæ (§. 629.), & Deus omnes fortune effectus fini ultimo subordinat (§. 652.), finis vero alteri subordinatur, quatenus est medium ad hunc alterum consequendum (§. 634.); fortunæ effectus omnes, sive ea secunda fuerit, sive adversa, sunt medium patefaciendi perfectionem suam summam, seu manifestandi gloriam suam.

Nostrum igitur est inquirere in dato quolibet casu, quomodo per effectus fortunæ gloria Dei manifestetur. Atque ita a posteriori confirmabitur, quod hic demonstratur.

§. 654.

Deus effectus fortune aliis finibus particularibus subordinat, ita ut sint media aliorum consequendorum. Etenim effectus fortune a-

*subordi-
nati.*

ctus fortunæ omnes, siue ea secunda fuerit, siue aduersa, sunt fines a Deo intenti (§. 651.), iidemque particulares, quod per se patet. Enimvero Deus omnes fines particulares sibi invicem subordinat (§. 633.). Effectus igitur fortunæ tam aduersæ, quam prosperæ subordinat ceteris finibus particularibus. Quodsi finis quidam alteri subordinatur, ad hunc alterum sese habet ut medium ad finem (§. 634.). Quamobrem Deus effectus fortunæ aliis finibus particularibus ita subordinat, ut sint media aliorum consequendorum,

Quoniam itaque fortunæ effectus non immediate subordinatur fini ultimo, manifestationi gloriæ divinæ (§. 629.); ubi in dato quodam casu scrutari volueris, quomodo per eos gloria divina manifestetur, curandum est ne per præcipitantiam iudices. Etenim inquirendum est, quinam sint fines alii propiores ab iisdem dependentes, donec tandem appareat, quomodo per hosce fines perfectio divina pateat. Qui ad hæc animum non advertunt, vel fortuna gloriam Dei manifestari negant, vel modum manifestationis fingunt, qui cum veritate minime consistit, eadem facilitate rejiciendus, quo fingitur. Proderit etiam horum meminisse in praxi, ut reverenter expectemus eventus futuros nobis revelaturos, quod rationis lumine usi perspicere non valemus. Sunt multa hominis erga Deum officia, ad quæ non satis animum advertere solemus, propterea quod veritatibus Theologiæ naturalis non sufficienter imbuimus animum, & hoc ipso felicitati nostræ plurimum obsumus. Sed hæc omnia suo loco evadent clarissima.

§. 655.

*Usus ultimi
fini
subordi-
nati.*

Omnes usus rerum naturalium & artificialium a Deo fini ultimo subordinantur. Sunt enim non minus rerum artificialium, quam naturalium usus fines a Deo intenti (§. 648 649.). Enimvero Deus fines omnes particulares in hoc universo subordinat ultimo (§. 631.). Ergo etiam omnes usus rerum
tam

tam naturalium, quam artificialium fini ultimo subordinat.

Inde est, quod usus differat ab abusu. Si enim fini ultimo non subordinarentur, nulla foret differentia in modo dependentie actusitatis rei cuiuspiam ab altera, consequenter nec differentia inter usum atque abusum (§. 646.). Sed quoniam sit hæc differentia, tum intelligitur, quando ad animum nobis revocamus, quoniam sit finis ultimus. Habent autem usus in se quid, ut ad finem ultimum referri possint, & ex adverso abusui quid inest per se, ut ad finem ultimum eundem referri repugnet. Sed hæc clarius intelligentur, ubi de moralitate actionum liberarum acturi sumus. Eum enim in finem principia hæc, evincuntur, ut iisdem in re tam ardua uti possimus.

§. 656.

Usus rerum naturalium & artificialium Deus ideo intendit, ut sint medium patefaciendi perfectionem suam summam, seu manifestandi gloriam suam. Quomodo Cum enim usus rerum subordinatam naturalium, quam artificialium sint fines a Deo intenti nentur. (§. 648. 649.), fines autem particulares ab eodem subordinantur patefactioni perfectionis suæ absolute summæ, seu manifestationi gloriæ suæ (§. 632.); omnes quoque rerum tam naturalium, quam artificialium usus eidem subordinantur. Enimvero si quis finis alteri subordinatur, is ad hunc sese habet ut medium ad finem (§. 634.). Deus igitur usus rerum naturalium atque artificialium ideo intendit, ut sint medium patefaciendi perfectionem suam absolute summam, seu manifestandi gloriam suam.

Habemus adeo principium, quod usui ab abusu distinguendo sufficit. Hujus maximus erit usus in moralibus, quando de rerum usu sumus acturi: immo non minoris idem erit usus, ubi officia hominis erga Deum sumus explicaturi. Sufficit hic excitari attentionem lectoris, ut sibi istud familiare reddat, ne demonstrationibus moralibus suo tempore denegat assensum.

§. 657.

§. 657.

Ufus aliis finibus particularibus aliis subordinat. Deus usus rerum artificialium & naturalium finibus particularibus subordinat. Etenim usus rerum artificialium & naturalium sunt fines a Deo intenti (§. 648. 649.). Quamobrem cum Deus fines omnes particulares sibi invicem subordinet (§. 633.); usus quoque rerum artificialium & naturalium finibus particularibus subordinat.

Principium hoc usui est, ubi usum ab abusu distinguere volumus: neque enim usus fini ultimo immediate subordinatur. Et, si vel maxime ex ipso usu pateat, quomodo per eundem gloria divina manifestetur; mediantibus tamen finibus particularibus idem multo clarius elucescit. Non addimus exempla, quæ suo loco reservantur.

§. 658.

Subordinatio eorum sibi invicem, & fini ultimo subordinat, ita ut sese invicem habeant quæ ex essentia & natura rerum consequuntur, sunt finis a Deo intenti (§. 645.). Deus ea, quæ ex essentiis & natura rerum consequuntur, & fini ultimo subordinat, ita ut sese invicem habeant quæ ex essentia & natura rerum consequuntur, sunt finis a Deo intenti (§. 645.). Ast Deus fines omnes particulares & sibi invicem (§. 633.) & ultimo subordinat (§. 631.). Quæ adeo ex rerum essentiis atque natura consequuntur, ea & sibi invicem, & fini ultimo subordinat. Subordinat vero fines omnes ita sibi invicem, ut remotiorum media sint propiores & omnes tandem simul medium finis ultimi (§. 635.). Quæ igitur ex essentia & natura rerum consequuntur, ea ita sibi invicem subordinat, ut sese invicem habeant per modum medii ad finem.

Hæc probe notanda sunt, ut suo tempore appareat, quomodo sapientia divina ex rerum nexu eluceat. Utemur adeo hoc principio tanquam notione directrice in Teleologia.

§. 659.

§. 659.

Quæ ex essentiis & natura rerum consequuntur, a Deo Gloria Dei ita sibi invicem subordinantur, ut per ea patefiat summa ipsius per. per rerumfectio, seu gloria ejus manifestetur. Quæ enim ex essentiis & naturam, natura rerum consequuntur, fini ultimo subordinantur per manifestum modum medii ad finem (§. 658.). Quamobrem cum finis ultata,rimus sit patefactio perfectionis summæ, seu manifestatio gloriæ divinæ (§. 629.) ; quæ ex essentiis & natura rerum consequuntur, ita subordinantur fini ultimo, ut per ea summa Dei perfectio patefiat, seu gloria ipsius manifestetur (§. 937. Ontol.).

Quomodo hoc fieri possit, patebit clarissime, ubi omnimodam creaturæ a Deo dependentiam exposituri sumus. In præsentī enim tantummodo docetur, quid fiat ; modum vero, quo idem fiat, explicare nobis nondum hic propositum.

§. 660.

Totum universum est plenum finibus a Deo intentis. Ex Multitudo enim quicquid ex essentia & natura rerum consequitur, est finis finium in a Deo intentus (§. 645.); omnes rerum naturalium usus, quos universo. sibi invicem præstant, sunt fines a Deo intenti (§. 648.); omnes rerum artificialium usus sunt fines a Deo intenti (§. 649.); omnes denique fortunæ, secundæ pariter atque adversæ, effectus sunt fines a Deo intenti (§. 651.). Quocunque igitur te in hoc universo vertas, ubivis fines a Deo intentos deprehendis. Atque adeo patet totum hoc universum esse plenum finibus a Deo intentis.

Cartesius fines rerum naturalium inter arcana Dei retulit, adeoque ex philosophia naturali proscripsit, non sine manifesto in philosophia morali damno. Non agnovit scilicet rerum usus, quem sibi invicem præstant, & quæ in serie causarum

(Wolffii Theol. Naturalis)

F f f f

farum

farum a se invicem dependent, in finium| numerum referri. Quodsi hoc prorsus negaveris, facile est ex rerum natura pro- scribere omnes fines, quemadmodum fecit *Spinoza*.

§. 661.

*Quomodo
natura &
corpora
agunt pro-
pter fines.*

Corpora & tota rerum natura agunt propter fines a Deo intentos, ac si ipsamet eos intenderent. Etenim quæ ex essentia & natura rerum consequuntur sunt fines a Deo intenti & essen- tia ac natura rerum sunt media, quibus fines istos consequitur (§. 645.), eaque sibi invicem per modum medii ad finem sub- ordinantur (§. 658.). Quamobrem cum in essentiis rerum con- tineatur ratio sufficiens eorum, quæ inde consequuntur quoad possibilitatem (§. 168. *Ontol.*), in rerum vero natura quoad actualitatem (§. 505. *Cosmol.*), consequenter positis hisce re- rum essentiis & posita hac rerum natura hæc & non alia con- sequantur (§. 118. *Ontol.*) ; perinde est ac si corpora & tota rerum natura fines, secundum quos agunt, ipsamet intenderent & propter eos agerent. Agunt itaque corpora & natura rerum propter fines a Deo intentos ita, ac si ipsamet fines istos inten- derent.

Inde est, quod animantia bruta videantur agere cum ra- tione & ratione melius uti ipsis hominibus, quemadmodum multiplici documento adstruere conatus est *Hieronymus Ro- rarius* in Tractatu, cui hunc titulum fecit: Quod animalia bru- ta sæpe ratione utantur melius homine. Quæ enim ipsis tri- buitur ratio, non ipsorum, sed Dei ratio est. Inde porro est, quod rerum natura fingatur ens intelligens sapientia maxima instructum. Quæ enim naturæ rerum tribuitur sapientia, ipsa Dei sapientia est, quam per naturam rerum nobis pate- facere constituit. Sane ipsæ machinæ hominum opera con- structæ rectius exequuntur id, cujus gatia constructa sunt, quam vulgo ab hominibus fieri assolet. Agunt enim cum ratione artificis propter fines ab eodem intentos & structura earundem, quæ essentia ipsorum est (§. 533. *Ontol.*), ad finem

consequendum aptata. Quamobrem nisi constaret, opera hæc artis ratione atque sapientia carere, facile eo adduceremur, ut ipsis rationem atque sapientiam tribueremus atque eadem ratione melius homine uti contenderemus. Exempli loco esse potest virunculus tempestatis index apud *Osttonem de Guericke* in Experimentis novis Magdeburgicis de vacuo spatio lib 3. cap. 20. f. 100. qui artificii ignaros ideo in stuporem conjicit, quod cum ratione agere videatur. Agit virunculus iste propter finem, sed quem ipsemet non intelligit, neque intendit, sed artifex & inventor eidem præscripsit: finem vero istum assequitur, quantum fert mechanismus. Quodsi a fine aberret, id non ipsius, sed inventoris imperitiæ tribuendum, qui per errorem mechanismum aliter fecit, quam fieri debebat. Pone in locum inventoris & artificis Deum decernentem & creantem, in locum virunculi quamlibet creaturam in mundo materiali, vel totum etiam hunc mundum adspēctabilem, quantam lucem affundat imago veritati propositionis intelliges: id quod a nobis ut fusius exponatur opus non est, cum nemo non suo Marte hoc assequi possit.

§. 662.

Frustra quid facere dicimur, quod vel nullo fine facimus, vel quod fini, quem intendimus, consequendo minime sufficit. *Frustra quid facere dicamur.*

Ita spartam, quam quis ornare poterat, frustra ambit, qui nullo eorum utitur patrono, penes quos est eam conferendi potestas, cum non desint alii in eorum gratia positi. Facile apparet, non alias esse causas, cur quid frustra agamus, vel quod media eligamus parum convenientia, vel quod obstacula, quæ obijciuntur, minime removeare valeamus, vel quod temporis fallendi gratia quædam agamus.

§. 663.

Deus nihil facit frustra. Etenim Deus sapiens est & *Cur Deus sapientia ejus tanta, qua major concipi nequit (§. 640.). nil frustra* Quamobrem cum sapiens agat propter finem & media eligit *faciat.*

F f f f 2

ad.

ad finem consequendum apta (§. 678. *Psychol. ration.*) & sapientiz summæ sit eligere media ad finem certo & ex asse consequendum ducentia (§. 689. *Psychol. ration.*), ac præterea Deus facere possit, quicquid vult (§. 352.); Deus nil quicquam facit sine fine, nec aliis utitur mediis, quam quibus finem intentum certo & ex asse actu consequitur. Quoniam itaque is demum frustra quid facit, qui vel nullo fine quid facit, vel quod finem, quem intendit, consequendo minime sufficit (§. 662.); Deum nihil frustra facere liquet.

Cessant nimirum rationes penes Deum, ob quas homines frustra quid faciunt, antea (*not.* §. 662.) enumeratæ. Non igitur mirum, quod nec frustra quid facere possit (§. 118. *Ontol.*). Quodsi nobis esset tanta sapientia, quanta in dato quolibet casu requiritur, ne quid frustra fiat; si tanta esset potentia, quanta consiliis exequendis par est; nec nos unquam frustra quid faceremus. Aderent enim rationes sufficientes cur quid frustra fieri minime possit.

§. 664.

*Mos agendi
natura.*

Natura nihil facit frustra & via agit brevissima. Natura enim rerum agit secundum fines a Deo intentos, ac si ipsamet eosdem intenderet (§. 661.), consequenter Dei ac naturæ iidem sunt fines. Jam media, quibus Deus fines suos consequitur, sunt essentiz rerum (§. 645.), consequenter eum natura ad actum non perducatur nisi per essentias rerum possibiliæ (§. 142. 145. *Cosmol.*); nec aliis natura utitur mediis, quam a Deo ad fines consequendos destinatis. Quoniam itaque Deus nihil frustra facit (§. 663.), nec nisi via brevissima agit (§. 636.); natura quoque nihil facit frustra & brevissima agit via.

Patet adeo veritas pervulgati illius: Deum & naturam nil facere frustra & via brevissima agere. Sunt equidem qui reprehendunt, naturam Deo quasi causam sociam jungi: enim-
vero

vero qui veram naturæ notionem habent, nec vim creaturæ cum omnipotentia Dei confundunt, illi naturam causam Deo tanquam causæ primæ subordinatam agnoscere tenentur, cui Deus & fines, & agendi modum præscripsit.

§. 665.

*In hoc universo seu mundo adspectabili coëxistentium ne. Nexus re-
xus consistit in dependentia finis a medio; nexus vero successi-
vorum in dependentia causati a causa & finis a medio & actio universo
nis causæ efficientis a fine simul. Constat nimirum experientia in quonam
magistra actualitatem modificationum in uno coëxistentium consistat.
habere rationem sufficientem in altero coëxistentium, quem-
admodum modificationum proprium est (§. 160. Ontol.).
Quamobrem cum ea, quæ in tempore fiunt, facta fuerint fu-
tura per decretum Dei (§. 522.), antea per ideas Dei in intel-
lectu ipsius existentes tantummodo possibile (§. 192) & per
potentiam Dei tantummodo existibilia (§. 224), nondum ve-
ro certo exitura; quin Deus ea coëxistere voluerit in hoc u-
niverso seu mundo adspectabili, ut mutationes, quæ in uno
eorum possibile sunt, actu fiant, dubitandum non est (§. 497.).
Enimvero si duo entia, quorum unum continet rationem suf-
ficientem mutationum in altero contingentium, ab agente in-
telligente ideo simul producantur, ut mutationes, quæ in uno
eorum fieri possunt, actu fiant, nexus eorum consistit in de-
pendentia finis a medio (§. 39. Cosmol.). Nexus itaque rerum
coëxistentium in hoc universo consistit in dependentia finis a
medio.*

Idem etiam sic ostenditur. Quoniam modificatio unius
coëxistentium rationem sufficientem in altero habet, quemad-
modum abunde quotidie experimur & naturæ entis convenit
(§. 160. Ontol.); res una coëxistentium quoad modificationes
ab altera pendet, seu, quod perinde est, actualitas modorum in
uno pendet ab altero coëxistente (§. 851. Ontol.), consequen-

ter unum coëxistentium esse usui alteri coëxistentium (§. 646.). Sunt vero usus rerum naturalium fines a Deo intenti (§. 648.). Quamobrem cum coëxistentia inter se connectantur, quatenus unum eorum usui est alteri (§. 646. *Theol. nat.* & §. 10. *Cosmol.*); coëxistentia in hoc universo connectuntur per finales rationes, consequenter eorum nexus consistit in dependentia finis a medio (§. 645.).

Quoniam veritas ejus, quod demonstratum est, clarius elucet in exemplo particulari, conservata tamen demonstrationis universalitate, idem adhuc hoc modo evincere lubet. Nemo non novit, generationes & corruptiones in Tellure fieri, quia Sol calore suo eandem fovet, quo remoto cessarent penitus, nec terra amplius foret habitaculum animalium atque hominum, nec ulli amplius locus esset vegetationi. Ulro igitur fatemur, Solem Telluri insignem prorsus præbere usum (§. 646.). Quoniam itaque usum hunc tanquam finem intendit Deus (§. 648.); quin ideo Solem atque Tellurem coëxistere voluerit, ut terra evaderet habitaculum animalium atque hominum, nemo in dubium revocare potest. Enimvero si entia duo, quorum unum continet rationem sufficientem mutationum in altero contingentium ab agente intelligente ideo simul producuntur, ut mutationes, quæ in uno eorum fieri possunt, actu fiant, nexus eorum consistit in dependentia finis a medio (§. 39. *Cosmol.*). Nexus igitur inter Solem & Tellurem, quatenus tanquam corpora mundi totalia in hoc universo coëxistentia spectantur, consistit in dependentia finis a medio. Quod si in locum Solis atque Telluris surrogentur alia quæcunque entia coëxistentia, demonstratio eodem modo procedit, atque adeo generaliter dicendum est, coëxistentium nexum in hoc mundo adspectabili consistere in dependentia mediæ a fine. *Quod erat unum.*

Quoniam actus contingentium, adeoque successivorum
(§. 80.

(§. 80. *Cosmol.*), in hoc universo determinatur per seriem contrigentium, quæ a se invicem dependent ut effectus a sua causa (§. 83. *Cosmol.*); in serie successivorum præcedens est causa sequentis. Quoniam porro ea, quæ in mundo existunt, facta sunt futura per decretum Dei (§. 522.), adeoque ideo ad actum perducuntur, quia Deus eadem ad actum perducere voluit (§. 497.); quia Deus ideo existere voluerit causam, ut existeret causatum dubitari nequit. Enimvero si agens intelligens causam ideo producit, ut existere possit causatum; nexus rerum successivarum consistit in dependentia causati a causa & dependentia finis a medio, & actionis causæ efficientis a fine simul (§. 34. *Cosm.*). Nexus adeo rerum successivarum in hoc universo consistit in dependentia causati a causa & dependentia finis a medio, & actionis causæ efficientis a fine simul.

Idem quoque perinde ut ante evinci potest, demonstratione ad exemplum aliquod speciale applicata. Repetamus exemplum, quod olim (*nat.* §. 35. *Cosmol.*) in medium adduximus ad nexum rerum successivarum illustrandum. Sol ex mari vapores attrahit, quos ventus occidentalis ad nos advexit. Vapores isti in aëre rariore in nubes coeunt & nubes congestæ in guttas colliguntur: quod dum contingit, pluit. Pluvia terram humectat & semen in terra latens vegetat. Habemus adeo seriem quandam successivorum in hoc mundo ad spectabili obviam. Jam cum constet ad præsentiam Solis ex mari elevari vapores, ex eo autem, quod enti cuidam mutatio aliqua accadat, quam primum alteri jungitur, intelligatur hoc alterum causam illius mutationis esse (§. 697. *Log.*); evaporationis causam esse Solem apparet, consequenter eandem tanquam naturalem ex essentia & natura rerum consequi (§. 509. *Cosmol.*). Quoniam fines sunt a Deo intenti, quæ ex essentia & natura rerum consequuntur, essentia vero & natura rerum media sunt, per quæ fines istos consequitur (§. 645.); evaporationem

nem aquarum marinarum sese habere ad Solem per modum medii ad finem manifestum est. Non absimili modo probatur, advectionem vaporum esse effectum venti occidentalis & simul finem ejusdem. Quando vapores in nubes coeunt & nubes in guttas resolvuntur ; vapores sunt materia, unde confluunt nubes ; nubes autem materia, ex qua formantur guttae (§. 948. *Ontol.*). Unde nubes a vaporibus, guttae a nubibus pendent, quemadmodum causatum a causa. Et quia Deus per vapores genesis nubium , per nubes formationem guttarum pluvialium intendit (§. 645.) ; nubes ad vapores , guttae pluviales ad nubes sese habent per modum finis ad medium. Non absimili modo ostenditur pluviam esse causam humectationis, humorem terrae causam vegetationis ; simul autem pluviam ad humectationem , & humorem terrae ad vegetationem sese habere per modum medii ad finem. Patet itaque res successivas ita inter se connecti , ut praecedentes non modo sint causae sequentium, verum etiam ad sequentes sese habeant per modum medii ad finem. *Quod erat alterum.*

Atque idem tandem ostendere licuit , quid sit nexus rerum successivarum & simultanearum in hoc universo. Quod si quis demonstrationem eo, quem alias (§. 992. *Log.*) exposuimus, modo in sua principia resolvere voluerit ; quam multa praerequirantur nobis cognita atque perspecta, antequam veritatem hujus nexus perspicere detur palam erit. Myopiae igitur judicii tribuendum, si qui parum philosophi de rebus vix per transennam conspectis dictatoria autoritate judicium sibi sumentes, eundem cum fatali necessitate misere confundunt. Eant igitur myopes, quorum non est de rebus a cognitione nostra procul remotis judicare, & abortum imaginationis suae consequentiariorum armis impugnent: videbunt enim acutiores, eos omni molimine suo non aliud agere, quam ut in pugna Sciamachorum victoriam reportent, caeci inter luscios reges futuri. Non invidemus ipsis hanc voluptatem, quam

ex vana percipiunt gloria, toti vana ambitione turgidi, modo sibi temperent a malitia, ne philosophis invideant voluptatem, quam venerabunda in Autorem universi sapientissimum mente ex veritate percipiunt, tanto sane humiliores, quanto clarius sapientiæ divinæ ex rerum nexu elucescentia incomprehensibilitatem introspiciunt. Ceterum cum ex ipsa resolutione demonstrationum propositionis præsentis, quam iis commendamus, intelligant, modo non sint talpa cæciores, non adeo facile esse myopiæ ipsorum contumaci medelam afferre; non amplius mirentur, quod iudicium ipsorum, quia deproperatur, tanquam temerarium contemnatur. *Spinoza*, fatalis necessitatis propugnator acerrimus, nexum rerum fatalem statuit, non quod absoluta earundem necessitas ex causarum concatenatione, quam vocat, sequatur (contrarium enim a nobis abunde demonstratum); sed quod sicuti enti omni intelligenti, ita etiam ipsi Deo omnem in agendo libertatem ademit, quam ipsi in decernendo summam vindicavimus (§. 506.). Unde nullum in serie rerum finibus fecit locum, ita ut rerum nexus tantummodo ipsi sit dependentia causati a sua causa, non vero simul dependentia finium a mediis, quemadmodum nos adstruximus, & tota causarum concatenatarum series absoluta necessitate dependeat a Deo, quam nos ab hac dependentia procul arcemus. Clarius vero jam intelligitur, quod alibi jam docuimus (§. 105. *Cosmol.*), ex nexu rerum in mundo nullam in rerum existentiam manare necessitatem absolutam. Non tamen inutile est, quæ ibidem & demonstrata, & annotata sunt, animo recolere & accurata mentis trutina expendere. Res in hoc universo esse inter se connexas levi attentione cognoscitur; sed qualis sit iste nexus, in quo consistat, & quomodo a Deo causa prima dependeat, altioris indaginis est, sed indaginis nunquam pœnitendæ, ob insignem prorsus in actiones humanas influxum suo tempore suoque loco explicandum.

§. 666.

Nexus rerum in hoc universo sapientia divina constitutus. Etenim nexus rerum in hoc universo est vel coëxistentium, (Wolfii Theol. Naturalis.) G g g g tium,

tium, vel successivorum (§. 53. 54. *Cosmol.*). Enimvero nexus coëxistentium consistit in dependentia finis a medio, nexus vero successivorum non modo in dependentia finis a medio, verum etiam in dependentia actionis causæ efficientis a medio (§. 665.). Quamobrem cum sapientiz sit fines constituere & media ad eos ducentia eligere (§. 678. *Psychol. ration.*), Deum vero omnia in hoc universo sapienter decrevisse constet (§. 645.); nexum rerum in hoc universo sapientia divina constitutum esse palam est.

Quoniam omnia referenda sunt ad attributa divina, tanquam prima possibilia, & fontem ceterorum, quæ intrinsece & extrinsece possibilia sunt; nostrum quoque fuit constitutionem nexus rerum in hoc universo reducere ad sapientiam divinam tanquam ad suum fontem. Nexus constituitur, dum ejus actualitas decernitur. Non igitur implicat, eum ad sapientiam divinam referri, quod ante decretum jam possibilis repræsentetur in intellectu divino (§. 192.) & quod ex essentiis & natura rerum in systema redactarum resulter, quemadmodum ex anterioribus patet, consequenter quamdiu natura rerum sibi relinquitur, nec per miracula eidem vis infertur (§. 531. *Cosmol.*), ab hac serie rerum auferri nequeat. Omnia enim quatenus possibilia necessaria sunt, nec a sapientia eorum possibilitas ullo modo pendet: Sed ubi ex finium & mediorum possibilium numero quædam eligenda, tum demum agens intelligens finium constitutione & mediorum determinatione sapientem se probat. Sane antequam nos finem aliquem constituimus, finis iste in se spectatus possibilis est: antequam determinentur media, quibus eum consequi velis, possibilia sunt ista media in se spectata, nec minus possibile est, per hæc media ad finem tanquam ad metam duci. Hoc tamen minime obstat, quin in finis constitutione & mediorum determinatione sapientem te probes.

§. 667.

Nexus rerum in hoc universo ab absoluta necessitate liber

*Immani-
tas nexus*

ber est. Quoniam essentia mundi consistit in modo, quo res finitæ datur, non aliter, inter se connectuntur (§. 59. *Cosmol.*), adeoque ob essentiarum immutabilitatem (§. 300. *Cosmol.*) hic rerum nexus mundo huic proprius est; eundem dari patet, quia hæc rerum series actum consecuta. Quamobrem cum ante decretum res tantummodo spectentur tanquam possibiles (§. 192.), per decretum vero efficiantur futuræ (§. 522.); hic rerum nexus datur, quia Deus hanc rerum seriem producere decrevit. Est vero decretum Dei liberrimum (§. 506.). Quamobrem hic rerum nexus datur, quia Deus liberrime hanc rerum seriem producere decrevit, consequenter hic rerum nexus non absolute necessarius est (§. 302. *Ontol.*). *ab absoluta necessitate.*

Nimirum si Deo ita visum fuisset, alia existere potuisset rerum inter se connexarum series, atque adeo alius quoque daretur rerum nexus. Præsens propositio non est confundenda cum illa cosmologica, qua ex nexu rerum in mundo in earum existentiam necessitatem absolutam manare negavimus (§. 105. *Cosmol.*). Neque enim hic quæstio est, num eventus in hoc universo sint necessitati obnoxii, quia datur rerum nexus, sed num hic rerum nexus sit absolute necessarius, ita ut alium dari per se repugnet, cuius utique contrarium hic demonstravimus. Quemadmodum nimirum liberum Dei decretum, quatenus liberum est, ab hoc universo arcet absolutam necessitatem; ita nexum quoque rerum in eodem ab eadem eximit. *Spinoza* vero cum eidem subiecit, quia Deo omnem in decernendo libertatem adimit, quemadmodum hominibus nonnisi apparentem relinquit.

§. 668.

Malum morale non est in numero finium a Deo intentorum, seu, Deus malum morale non intendit tanquam finem. *An malum morale sit finis a Deo intentus.*
Fieri enim non potest, ut Deus velit malum morale (§. 581.). Cum vero qui finem intendit, ideo agere decernat, vel actu agat, ut, quod intendit, sit vel fiat (§. 932. *Ontol.*), adeoque fi-

nem quin velit dubitari nequeat (§. 880. *Psychol. empir.*); Deum velle finem, quem intendit, nemo dubitare potest. Quamobrem fieri non potest, ut malum morale tanquam finem intendar.

Idem etiam sic ostenditur. Deus malum morale tantummodo permittere decrevit (§. 585.), consequenter cum permittatur, quod impedire nolumus, quo minus fiat, etsi idem fieri nec velimus, nec nolumus (§. 584.), mali moralis existentiam tantummodo impedire non vult, etiamsi idem nec velle, nec nolle dici possit. Quamobrem cum ideo mundum integrum, vel quidpiam in eo decrevisse dici minime possit, ut malum morale existat, id vero demum finis sit in hoc universo a Deo intentus, propter quod vel integri mundi, vel cujuspiam in eo existentiam decrevit (§. 932. *Ontol.*); malum morale finis a Deo intentus non est, neque adeo in finium numero est, quos in hoc universo intendit.

Idem quoque hoc modo evincitur. Deus mundum hunc non elegit ob malum morale, quod in eo existit (§. 582.). Enimvero cum finis sit id, propter quod causa efficiens agit (§. 932. *Ontol.*); id in numero finium esse nequit, propter quod non agit. Evidens itaque malum morale non esse in numero finium a Deo intentorum.

Nimirum Deus creaturis intelligentibus manifestare voluit (§. 629.) gloriam suam ac ideo mundum aliquem producere decrevit (§. 611.). Mundum hunc cum apprehendit, qui ipsius summo iudicio fini a se intento convenit (§. 615.), gloriam ejus omnium maxime manifestans (§. 622.), ac ideo eundem producere decrevit (§. 623.). Jam in hoc ipso mundo prævidebat malum morale & idem ab ipso inseparabile agnoscebat, salva ejusdem perfectione (§. 556.); non tamen obstare agnoscebat, quo minus per ipsum gloria sua omnium maxime manifestetur (§. 617.). Malum adeo morale permittere decrevit (§. 585.), ne excideret fine a se intento. Equis ergo

ergo non videt, dici haud quaquam posse, quod Deus malum morale, consequenter actiones hominum malas, intendat tanquam finem, ac ideo hominem condere decreverit, ut malas committeret actiones? Præsens adeo propositio probe tenenda est, ut in sequentibus omnis mali culpa a Deo procul removeri possit.

§. 669.

Deus mala metaphysica non intendit tanquam fines: seu mala Cur malis metaphysica in numero finium non sunt. Etenim Deus rem nullam decrevit ob malum metaphysicum, quo laborat (§. 547.). *cis non fit* Quamobrem cum id finis esse nequeat, propter quod agens rationale non agit (§. 932. *Ontol.*); nec mala metaphysica possunt locus. *esse fines a Deo intenti,*

Idem etiam sic ostenditur. Malum metaphysicum consistit in imperfectione, quæ rebus per essentiam & naturam suam inhæret (§. 372.). Quamobrem cum ex eo, quod quid sit imperfectum, non cognoscatur divina perfectio; per malum metaphysicum gloria Dei manifestari nequit (§. 610.). Est vero manifestatio gloriæ divinæ finis ultimus (§. 629.) & huic ipsi omnes Deus fines particulares subordinat (§. 632.) tanquam medium manifestandi gloriam suam (§. 634.), consequenter in numero finium particularium esse nequit, quod ad manifestandam gloriam divinam nil quicquam facit. Mala igitur metaphysica in numero finium a Deo intentorum esse nequeunt.

Probatur etiam hoc modo. Mundus nullus, etiam si sit omnium perfectissimus, absque malo metaphysico esse potest (§. 376.), immo absque eo ne creaturam quidem ullam producere valet Deus (§. 380.), nec idem per miraculum a mundo aut ente quocunque singulari auferri potest (§. 381.). Quamobrem si Deus mundum aliquem quacunque de causa producere intendit; malum metaphysicum per se adest, neque adeo de-

mum opus est, ut propter ipsum quidpiam velit vel faciat Deus. Quoniam itaque in numero finium esse nequit, propter quod causa efficiens nil quicquam agit, sed quod alii intento per se citra intentionem agentis inhæret (§. 932. *Ontol.*); mala metaphysica in numero finium esse nequeunt.

Qui principiis anterioribus animum probe imbutum possidet, ei nihil quicquam obscuritatis in demonstrationibus propositionis præsentis superesse potest, quam multiplicem afferre placuit, ut major lux affundatur intellectui quoad difficultates, quæ in argumento hoc necit imaginatio notionibus obscuris, sed admodum familiaribus nebulas excitans. Etsi enim demonstratio unica sufficiat ad veritatem propositionis evincendam, multiplicem tamen afferri subinde opus est in iis argumentis, ubi præjudicia nebulas offundunt, ne verum perspicui possit. Sed in propositione præsentē difficultates magis facessit appellatio, quam res ipsa, propterea quod malum morale vulgo malum simpliciter apellatur, sicque ad mali moralis notionem spectantia tacite sese insinuant notioni mali metaphysici, in confusa, quam plerique habent, non discernenda. Deus mundum hunc produxit gloriæ suæ manifestandæ causa, seu ut per eum patefieret summa, quæ ipsi est, perfectio (§. 608.). Elegit hunc mundum præ ceteris, propterea quod summo suo judicio ad manifestandam gloriam suam omnium maxime facit (§. 623.). Malum metaphysicum huic mundo inhæsit inseparabiliter (§. 381.), antequam ejus existentia nostro concipiendi modo decerneretur (§. 546.). Quamobrem cum non obstaret, quominus hic mundus fini a Deo intento conveniret (§. 617.); nulla erat ratio, cur a fine proposito desisteret. Atque adeo malo metaphysico in hoc universo locus est, etiamsi a Deo existentiam hujus universi decernente non fuerit intentum tanquam finis. Poterat idem aliis adhuc modis evinci, veluti ex eo, quod malum metaphysicum in limitationibus essentialium determinationum, quæ rei finitæ insunt, consistat: sed non opus esse videtur, ut nimium multiplicatis de-

mon-

monstrationibus turbam in eam suspicionem adducamus, quasi ipsimet demonstrationibus nostris parum fidamus, quippe cui in more positum est multitudine argumentorum infirmorum pugnare, quasi vis unita fortior fiat: quod etsi in probabilibus aliquid veri habeat, suo tempore a nobis explicandum, perperam tamen ad demonstrationes transfertur.

§. 670.

Deus mala physica non intendit tanquam finem, quatenus Quatenus mala sunt; seu mala physica, qua talia, non sunt in numero finium a Deo intentorum. Etenim Deus non decrevit mala physica non fisica, quatenus talia sunt (§. 566.) consequenter non dici potest sunt in numero finium, ut mala physica existerent, quatenus talia sunt (§. mero finium. 497.). Quamobrem cum finem, propter quem quis agit (§. um. 932. Ontol.), velle debeat (§. 880. Psych. empir.); ut in numero finium sit, quod ut existat non vult, dici haud quaquam potest. Deus itaque mala physica, qua talia, non intendit tanquam fines, adeoque nec ea in numero finium esse possunt.

Ut propositionis veritas clarius elucescat, eandem adhuc alio modo demonstratione ad casum particularem applicata evincere lubet. Ponamus itaque ventum impetuosum dejicere recta ædium & damnum inferre hominibus: dico dici non posse ruinam ædium & damna, quæ patiuntur homines, per se intendi, ita ut Deus ruinam ædium & damna hominum in se spectata velit, ac propterea ventum impetuosum excitet. Ponamus Deum per se intendere, si fieri possit, ædium ruinam & damna, quæ inde patiuntur homines, ac ideo excitare ventum impetuosum, cujus vi recta dejiciuntur. Quoniam Deus lubentissime vult, quicquid vult (§. 341.); necesse est ut ipsi ædium ruina & damna hominibus data per se placeant, citra relationem ad aliud quidpiam (§. 938. Psychol. empir.). Quoniam placent, ex quibus voluptas percipitur (§. 542. Phychol. empir.); Deus ex
ruina

ruina ædium & damnis hominum voluptatem percipit, consequenter ruinam ædium & damna, quæ homines patiuntur, sibi repræsentat tanquam ad perfectionem illarum, & perfectionem status horum spectantia (§. 511. *Psychol. empir.*): quod cum sit a veritate alienum, quemadmodum in casu particulari nemo non sine probatione admittit, in casu generali ipsa notio mali physici insinuat (§. 373.), adeoque de Deo, qui errare nescit (§. 294.), nullo modo cogitari potest; ut Deus mala physica qua talia seu per se tanquam fines intendat, fieri haud quamquam potest.

Nimirum si res ipsa pateretur, Deus mala physica ex hoc universo omnia abesse juberet. Vidimus vero id summa hujus mundi perfectione salva fieri minime posse (§. 556.). Non igitur insunt huic seriei, quia Deo per se placent; sed in ea tolerantur, quia insunt seriei rerum, quæ alia de causa Deo maxime placet. Si qua in hisce difficultas est, ea non aliunde venit, quam quod res particulares ad voluntatem Dei referamus, non spectatis ceteris una cum ipsis ad eandem seriem relatis, de Deo humano more cogitantes.

§. 671.

Perfectio mundi un-finium particularium & ultimi. Cum enim finis sit id, prode enascatur. pter quod causa efficiens agit (§. 932. *Ontol.*) & ultimus sit is, propter quem ceteri omnes sunt (§. 943. *Ontol.*); detur autem mundi a Deo conditi finis ultimus (§. 628.); per finem hunc ultimum intelligitur, cur Deus aliquem potius mundum condiderit, quam nullum, & cur hic, quem produxit, talis præcise sit, non alius, consequenter finis ultimus est ratio, cur hæc series rerum fuerit producta & ab æterno a Deo decreta, generalis (§. 56. *Ontol.*). Per definitionem finis patet similiter, per fines particulares, quorum plena est natura rerum (§. 660.), intelligi, cur hæc potius res, quam alias existere voluerit

rit Deus, consequenter eos esse rationes, cur res tales successivæ ac simultaneæ insint huic seriei rerum, ac ideo rationes simultaneorum & successivorum particulares sunt (§. 56. *Ontol.*). Quoniam vero fines particulares fini ultimo subordinantur per modum medii ad finem ducentis (§. 635.), adeoque in particularibus continetur ratio, cur ultimus actum consequatur (§. 937. *Ontol.*); rationes rerum simultanearum ac successivarum particulares in hac serie tandem in aliquam generalem resolvuntur. Enimvero perfectio mundi consistit in eo, quod rationes particulares simultaneorum & successivorum tandem in aliquam generalem resolvantur (§. 540. *Cosmol.*). Pater itaque mundi perfectionem ex eo enasci, quod detur aliquis finis ultimus & quod totus plenus sit particularibus, fines vero particulares sibi invicem ac tandem omnes ultimo subordinari possint.

Nimirum mundus si spectetur qualis sit, est referibilis, ut ita loqui mihi liceat, ad quidpiam extra ipsum obtinendum, & in eo consistit possibilitas finis ultimi, per quem tota rerum series explicabilis est, cur talis potius sit, quam alio quocunque modo sese habeat. Si singula, quæ insunt huic seriei, sigillatim spectentur, talia deprehenduntur, ut per ea, quædam actuari possint, & in eo consistit possibilitas finium particularium, per quos explicabiles sunt essentielles eorundem determinationes, cur tales potius sint, quam aliæ. Quodsi eadem ad se invicem referantur, alia ab aliis in aliis quoad actum dependent, & in hoc consistit possibilitas finium particularium, per quos explicabilis est rerum tam quoad coexistentiam, quam quoad successionem nexus. Quodsi tandem fines particulares referas ad ultimum, tales deprehenduntur, ut per ultimum sint explicabiles, cur tales potius esse debeant, quam alii. Quoniam ea conspicietur mundi facies perfectio ipsi tribuitur. Quodsi jam accedat ens intelligens, quod fines istos posibles particulares & ultimum intendit eosque sibi invicem subordinavit, perfectio mundi explicari

(*Wolffii Theol. Naturalis*)

H h h h

debet

debet per istorum finium subordinationem. Pater itaque perfectionem mundi esse quidpiam eidem intrinsecum, sed quod non competit nisi in relatione ad aliud. Inde sane est, ut, qui fines rerum negant, & finem ultimum tollunt, nullam quoque mundo rebusque in eodem contentis tribuant perfectionem.

§. 672.

*Perfectio
mundi in
quo consi-
stat.*

Quoniam perfectio enascitur ex possibilitate subordinationis finium particularium & ultimi (§. 671.), per fines autem particulares intelligitur, cur tales potius sint res successivæ ac simultaneæ, quam aliæ, & per ultimum, cur talis potius sit tota hæc rerum series, quam alia (§. 932. *Ontol.*); *perfectio mundi consistit in explicabilitate ejus per finem particularium & ultimi subordinationem.*

Probe notandum est, quod perfectio mundo tribuatur, quatenus per finem subordinationem explicabilis, ut intelligatur, quomodo concipi possit agnita a Deo antecedenter ad decretum & finis ultimi determinationem, quæ decretum nostro concipiendi modo præcedit, & quomodo perfectio sit medium, quo finis, quem Deus per existentiam hujus universi intendit, obtinetur (§. 607.). Nimirum Deus omnia possibilis in systemata redacta sibi ab æterno (§. 319.) representans (§. 155.) vidit, ea referri posse ad finem aliquem ultimum & huic subordinari posse fines particulares, qui per res singulas quoad coexistentiam, & successionem intendi possunt. Finem illum ultimum, quod eum judicaret bonum, intendit & fines particulares non minus probavit, quatenus eos ultimo subordinari posse perspexit. Quoniam igitur finem istum ultimum obtineri certus fuit, si mundus ad ætatum perduceretur, ejus existentiam decrevit, & sic perfectio mundi factum est medium obtinendi finis ultimi a se intenti. Quatenus vero hic mundus fini ultimo magis convenit, quam alius; eundem ob majorem perfectionem ceteris prætulit in suo decreto. Vides itaque quomodo omnia inter se optime cohæreant, conspirent autem simul cum hypothese mundi

mundi optimi , tanquam fini ultimo maxime convenientis.

§. 673.

Perfectio mundi consistit in aptitudine patefaciendi perfectionem Dei summam seu manifestandi gloriam ipsius. Consistit enim in explicabilitate ejusdem per subordinationem finium particularium & ultimi (§. 672.), consequenter in eo, quod per ipsum finis ultimus intendi possit. Enimvero finis ultimus, quem Deus per existentiam hujus universi intendit, est patefactio summæ, qua gaudet, perfectionis, seu manifestatio gloriæ divinæ (§. 629.), & fines omnes particulares eidem subordinantur, seu ideo intenduntur a Deo, quia gloriam suam per existentiam hujus universi manifestare vult (§. 632.). Consistit adeo perfectio hujus mundi in eo, quod per manifestationem gloriæ divinæ explicari possit, cur hæc potius rerum series existat, quam alia, consequenter in aptitudine manifestandi gloriam Dei.

Idem specialius explicatur.

Ne præsens propositio obscuritatem quandam alere videatur, simili quodam alio eandem illustrare lubet. Ponamus horologium construi in usum astronomicum ad tempus in minutis secundis exactissime dimetiendum: erit hæc ipsa temporis dimensio finis horologii, quem intendit qui ipsum construit. Dico igitur perfectionem horologii consistere in aptitudine ad tempus in scrupulis secundis exactissime dimetiendum. Nemo non novit, etiamsi secundum notionem perfectionis nonnisi confusam judicet distincta prorsus destitutus, horologii perfectionem æstimari ex eo, quod in tempore dimetiendo intra plures horas, veluti 24 vel 48, ne quidem unico scrupulo secundo a vero aberraret, tantoque censeri perfectius, quanto longius est illud temporis spatium, quo aberratio unius scrupuli secundi sensibilis evadit. Per structuram horologii illa accurata temporis dimensio possibilis, & hinc per essentiam suam aptum est ad tempus tam exacte dimetiendum. Atque adeo vides juxta

communem quoque notionem horologii perfectionem designare aptitudinem ad temporis dimensionem accuratam, consequenter ad finem horologii obtinendum. Constructio horologii possibilis, antequam de eodem construendo cogitet artifex; vel ejus ideam animo concipit inventor. Accurata temporis dimensio ejus ope possibilis, antequam eam velit astronomus observator, adeoque tanquam finem intendat. Ubi vero eam tanquam finem intendit; ex fine aestimari potest perfectio horologii, tanquam medium istius obtinendi, argumentando veluti ab effectu ad causam, cum finis sese habeat ad medium per modum effectus ad causam. Unde vides perfectionem inherere horologio per essentiam ipsius & cognosci posse, etiam si nullus statuatur finis: ubi tamen usum vi perfectionis horologii obtinendum tanquam finem sibi proponit observator, perfectionem fieri medium ejus obtinendi & recte dici posse, quod perfectio ejus consistat in aptitudine ad finem obtinendum. Equidem astronomus observator in finis cognitionem incidit, nondum cogitans de horologio, veluti quando de modo investigandi ascensionem rectam stellæ sollicitus est (§. 228. *Astron.*), & ex hoc fine deducit vel ipse, si idem fuerit Mechanicus, vel opera alterius eam horologii structuram, quæ huic fini convenit, & perfectum judicat; ubi experimento comprobat, quod fini satisfaciat. Sed hæc ita accidunt, quod ob limitatas intellectus vires nonnisi discursive in rerum cognitionem penetremus. Pone autem astronomum habere ideam omnium horologiorum, quæ arte humana construi possunt, & intuitive cognoscere, quanta sit in dimetiendo tempore uniuscujusque aptitudo. Pone porro eundem perspicere, quod horologium sibi usui esse possit in observationibus maximi momenti & hunc usum sibi proponere ac ideo horologii constructionem decernere. Manebit ut ante finis horologii accurata temporis dimensio & perfectio ejus consistet in aptitudine ad tempus accurate dimetiendum, etsi hic cognitio procedat a priori, a causa nempe ad effectum, utpote a conditione medii ad finem. Substitue horologio mundum, astronomo Deum: & eodem modo perspicies perfectionem mundi, in quo

con-

consistat, & quomodo ac cur concipitur tanquam dependens a fine, etiam si rei inhaereat ante considerationem finis. Nimirum Deus omnes sibi repræsentavit mundos, seu possible omnia in systemata redacta (§. 155.) simul (§. 160.). Pervidit eorundem aptitudinem ad manifestandam gloriam suam & eatenus perspexit perfectionem ipsis inhaerentem. Placuit ipsi gloriæ suæ manifestatio ac ideo eam intendit tanquam finem: unde mundum aliquem hujus finis gratia decrevisse concipitur. Vidit hunc, qui existit, mundum maxime convenire fini a se intento, quatenus ipsum decet, ac ideo placuit præ ceteris: unde hunc mundum producere decrevit. Atque ita perfectio mundi concipitur explicabilis per finem a Deo intentum, etsi mundo inhaereat, antequam de fine incidat cogitatio nostro concipiendi modo. Quod si hi cognitionis actus concipiantur simul, ita tamen ut salvus maneat ordo, quo a se invicem dependent; habebis actum intellectus divini eo modo explicabilem, quem insinuant nostræ demonstrationes. Quoniam in nobis plerumque cognitio a posteriori procedit argumentando a fine ad medium; inde est quod communiter in Deo quoque ponamus finis cognitionem ante mediæ cognitionem: unde fuit hypothesis essentialium arbitrariarum superius reprobata (§. 191.). Velim quæ hic prolixè dicuntur probe perpendantur: confido enim fore, ut omnes difficultates protinus evanescant, quæ obstant, quo minus citra omnem repugnantiam internæ sensum veritati quoad dependentiam mundi a Deo, unde pender omnis, quam hic tradimus, Dei cognitio, assensus firmus prabeatur.

§. 674.

Mala physica & moralia finibus in hac rerum serie a Deo Quomodo intentis ita implicantur, ut eorundem & finis ultimi subordi- malaphysio
natio eo, quo nunc, modo iisdem ablatis non amplius fieri pos- ca & mo-
sit. Etenim sublato malo physico & morali ex tota hac re- ralia fini-
rum serie ipsa permanere nequit omnium possibilium perfe- bus rerum
ctissima (§. 556.). Quamobrem cum perfectio mundi ena- implicen-
Hh hh 3 sca- tur.

scatur ex possibilitate subordinationis finium particularium & ultimi (§. 671.), consequenter summa, quæ huic mundo inest (§. 326.), perfectio tum demum subsistere minime possit, si fines particulares & ultimus non amplius sibi invicem subordinentur eo, quo nunc fit, modo; mala physica & moralia finibus a Deo in hac rerum serie intentis ita implicari debent, ut iisdem ablati eorundem ac finis ultimi subordinatio non amplius eo, quo nunc, modo fieri possit.

Propositio præsens nihil difficultatis faceffit iis, qui rerum in hoc universo nexum introspiciunt, & experientia confirmatur, siquidem ad eundem animum advertas, expendendo mala & quæ inde secuta fuere bona, non secutura, nisi malis fuisset locus. Dabimus posthac exempla ex historia sacra, nec ququam fore arbitror, cui non suppetant domestica, siquidem fata sua attento animo perlustrare eorundemque a se invicem dependentiam scrutari voluerit. Neque inutilis est hic labor: etenim propositionis præsentis veritas plurimum influit in praxin & multa præjudicia areet, unde haud leves difficultates circa bonitatem divinam nascuntur. Quo fine alia adhuc inde deducere non piget.

§. 675.

*Quomodo
mala bonis
implicen-
tur.*

Mala physica & moralia in hac serie ita implicantur bonis, ut, si mala inde auferre velis, bona una cum ipsis auferas. Etenim in hac rerum serie mala physica & moralia finibus a Deo intentis ita implicantur, ut eorundem & finis ultimi subordinatio eo, quo nunc, modo fieri non possit, iisdem ablati (§. 674.). Enimvero perfectio mundi nascitur ex possibilitate subordinationis finium particularium & ultimi (§. 671.), adeoque fines ipsi, hoc est ea, quæ in hoc universo finium loco sunt (§. 645. 648. & seqq.), in perfectionem mundi influunt. Quamobrem cum bonum dicatur, quod in alterius perfectionem influit (§. 370.); fines ipsi boni sunt. Atque ad-

eo patet, mala physica & moralia in hac rerum serie ita implicata esse bonis, ut auferri nequeant, nisi simul cum ipsis bona auferre velis.

Hinc jam clarius patet arctus malorum cum bonis in hoc universo nexus, ut, qui bonum obtinere velit, malum auferre non debeat. Unde porro patet, quam apte Christus inexistenciam mali, praesertim moralis, in hoc universo representaverit per zizania inter triticum enata, quorum radices radicibus horum ita implicantur, ut, si zizania evellere velis, triticum una evellatur (§. 601.). Plenior autem adhuc lux affulgebit acutioribus, ubi in ipsam mali originem inquiremus ex instituto: de qua cum hic nondum sit agendi locus, tantisper seponendae sunt difficultates, quae adhuc residuae esse possunt, quamdiu sollicitè nondum caveri potest, ne idex eorum, quae Deo tribuis, adhuc quidpiam involvant, quod ex humanis in eas irrepit. Neque enim adeo facile est, ideas, quas de nobis ipsis habemus, ita purgare, ne quicquam humani in iisdem supersit, antequam ad Deum transferantur. Inde sane est, quod veritates Theologiae naturalis complures, etsi in se clarissimae, videantur tamen obscurae, immo erroneae, cum omnes errores de Deo ex hoc fonte propullulent, quod Deum instar hominis nobis representemus, etiam dum divino more de Deo cogitare in animo habemus.

§. 676.

Deus salva sapientia summa atque perfectissima sua mala Quomodo physica & moralia tollere nequit ex hac rerum serie. Etenim malorum, in mala physica & moralia finibus in hac rerum serie a Deo intentis ita implicantur, ut eorundem & finis ultimi subordinatione eo, quo nunc, modo non amplius fieri possit (§. 674.). Enimvero cum subordinatio finium particularium & ultimi a sapientia sit (§. 678. Psychol. ration.); hoc modo potius, quam divina alio facta ad summam atque perfectissimam, qua Deus effulget pendeat.

(§. 640.),

(§. 640.), sapientiam pertinet. Quamobrem mala physica & moralia finibus a Deo in hac serie rerum intentis ita implicantur, ut salva sapientia ejus summa atque perfectissima, tolli nequeant.

Qui adeo volunt, mala physica & moralia ex hoc universo tolli, in sapientiam divinam injurii sunt: volunt enim fieri a Deo, quod salva summa atque perfectissima, quæ ipsi est, sapientia fieri nequit.

§. 677.

Cur eadem ipsi non repugnet. Quoniam malis physicis atque moralibus vi sapientiæ suæ summæ ac perfectissimæ in hac rerum serie locum reliquit Deus (§. 676.); hæc ipsa mala, tam physica, quam moralia, minime obstant, quo minus hujus mundi existentiam & omnia, quæ in eodem sunt, sapientissime decreverit, quemadmodum supra probatum est (§. 642. 643.).

Patet adeo, quantum a vero aberrant, qui mundi a Deo dependentiam negant, vel Deum prorsus ejus autorem esse in dubium vocant, propterea quod mala physica & moralia cum sapientia ejusdem pugnare arbitrantur. Nimium enim de rebus non sufficienter discussis judicium deproperant. Quamvis vero hætenus evicta admodum clara sint, uberior tamen lux iisdem per inferius tradenda affundetur, ubi de providentia divina acturi sumus.

§. 678.

Cur ea nexum rerum non subducat sapientiæ divine. Eodem modo patet, mala physica & moralia etiamsi insint nexui rerum, non tamen obstare, quo minus is sapientia divina fit constitutus, quemadmodum supra probavimus (§. 666.).

Qui repugnantiam quandam ad assentiendum huic corollario in se experiuntur, tacite sumunt, Deum cum bonis conjunxisse mala pro suo arbitratu, ex serie rerum eadem facilitate

esse omittenda, quæ in eundem introducta: unde Deus ipsis videtur facere mala, ut inde eveniant bona. Quamobrem cum certissimum sit, non esse facienda mala, ut inde eveniant bona; non vident, quomodo Deum deceat producere rerum seriem, cui mala physica & moralia inexistunt. Nemo non videt totum, quicquid est, difficultatis enasci ex hypothesi de essentiis rerum arbitrariis, quam supra reprobavimus (§. 191.). Unde novo specimine probatur, quam probe excusserint, rem omnem olim philosophi & quam prudenter eos secuti sint Theologi, qui essentialium necessitatem defenderunt, ubi præiudiciis de arbitrariis, quibus locus esse non potest, nisi quamdiu accurata mentis trutina non expenduntur omnia. Nimis abjecte de philosophia scholastica & ejus autoribus sentiunt, qui hoc solo nomine quid damnant, quod idem defenderint scholastici, recentiores vero nonnulli impugnaverint. Nobis placent antiqua, placent nova, quando cum veritate consentire deprehenduntur discussione facta. Displacent non minus nova, quam antiqua, ubi a veritate recedunt, neque enim veritatem consentientium autoritate & multitudine metimur. Deus rerum in hoc universo nexum constituit, dum vi intellectus infiniti possibilia in systemata redigit, & ex conditione systematum horum finis ultimi possibilitatem pervidens eundem sibi proponit, ac tandem illud systema ob rerum inter se nexum eligit, quod fini ultimo convenientissimum judicat. Etsi enim hæc omnia unico absolvantur actu, in eo tamen datur hic ordo, ob quem nos ipsum distincte concepturi eundem in actus plures resolvimus a se invicem dependentes, cum intellectus finita vi distincta eorum, quæ in Deo sunt, representatio aliter fieri non possit: id quod probe notandum per universam Theologiam naturalem, ne, quando humano more de Deo cogitamus, cum id aliter fieri non possit, consequentias nequam temerarias.

§. 679.

Malum dicitur dirigi in bonum finem, si, quando mutari Directio
(Wolffii Theol. Naturalis) II II non mali in

bonum finem. non potest, eodem utamur tanquam medio consequendi finem bonum.

E. gr. ponamus Titium luxui deditum fecisse jacturam ter mille aureorum, quam esse malum physicum nemo negat. Quod si eandem perpendens sibi proponit a luxu desistere; hanc vitæ mutationem esse finem bonum, quem intendit, nemo itidem negat. Quoniam adeo ratio mutandi luxus in jactura aureorum continetur, atque adeo ratio, cur mutatus fuerit animus, in jactura ista continetur, eadem utitur tanquam medio mutandi animum (§. 937. *Ontol.*), cumque per hanc animi mutationem luxum in posterum evitare intendat, ipsa jactura aureorum utitur tanquam medio. Etsi enim motivum sit jactura bonorum, quo flectitur voluntas; non tamen hoc obstat, quo minus & medium dici possit: sunt enim motiva media, quibus flectitur voluntas. Atque adeo patet, quomodo Titius malo physico utatur tanquam medio consequendi finem bonum: quod dum facit, malum dirigit in bonum finem. Non vero, tum ita dirigit, dici potest, eum facere malum, ut inde eveniant bona: neque enim jacturam bonorum ideo ipse promovit, ut haberet motivum flectendi animum; sed cum ipso non volente evenisset, nec factum infectum fieri possit, ipso malo bene utitur. Idem eodem modo obtinet, si loco mali physici sumas malum morale vel proprium, quod ubi perpetratum fuerit, factum infectum fieri nequit, vel alienum, quod a te impediri non potest, veluti cum calumniis & obtreptionibus adversariorum utaris tanquam motivo ad præclara præstanda, ut easdem ipso facto confutes. Equidem non ignoro displicuisse nonnullis, quod dixerim, malo utendum esse tanquam medio consequendi bonum finem, hunc usum diversum judicantes a directione in bonum finem: Sed nec me fugit, ex quo fonte propullulaverit difficultas, quæ animos ipsorum in transversum egit. Nimirum sibi persuadent semper de fine prius cogitari, quam de medio, consequenter si malo utaris tanquam medio consequendi finem, malum ideo a te fieri ut finem consequaris. Sed oppido hoc fallit non

non modo in Deo, verum etiam in homine, haud raro, veluti in dato casu, ubi iacturam bonorum, quæ facta mutari nequit, perpendens disquirat, cui fini eadem per modum medii subordinari possit.

§. 680.

Deus in hoc universo mala physica & moralia dirigit in Directionem bonum finem. Quoniam enim mala physica & moralia finibus divinis in hac serie rerum a Deo intentis ita implicantur, ut eorum in eadem & finis ultimi subordinatio eo, quo nunc modo, non bonum finis amplius fieri possit (§. 674.); evidens omnino est, nisi in eadem utrique malo relinquatur locus, Deum fines a se intentos particulares simpliciter, nec ultimum eo, quo nunc, modo consequi posse. Quamobrem cum per ipsa mala physica atque moralia intelligatur, cur fines isti ad actum perducantur in hac rerum serie; quin ratio actualitatis ipsorum in illis contineatur dubitari haud quaquam potest (§. 56. *Ontol.*). Enimvero cum in numero mediorum sit, quicquid rationem continet, cur finis actum consequatur (§. 937. *Ontol.*); Deus malis physicis atque moralibus, quæ salva sapientia sua tollere nequit ex hac rerum serie (§. 676.), utitur tanquam medio consequendi fines, qui ipsum decent (§. 638.), consequenter bonos (§. 370.). Quamobrem cum malum in bonum finem dirigatur, si, quando mutari non potest, eodem utimur tanquam medio consequendi finem bonum (§. 679.); Deus quoque in hoc universo mala physica & moralia dirigit in bonos fines.

Directio malorum in bonos fines omni tempore agnita fuit & a philosophis, & a theologis. Admisere autem eandem experientia, non ratione convicti. Quamobrem qui notione medii distincta destituebantur, vel saltem ad eandem animum non advertabant; non perspexere modum directionis, in quo consistat. Unde præiudicio, quod ante notavimus (not. §. 679.) delusi quasi in Deum injurium existimarent,

marunt, asserere, quod malis utatur tanquam mediis consequendi fines intentos, cum tamen directio mali in bonum finem aliter concipi minime possit. Etenim malum non potest dirigi in finem aliquem, nisi quatenus hujus actualitas efficitur ab eodem dependens, consequenter quatenus ad finem sese habet per modum medii (§. 937. 851. *Ontol.*). Dubium ex præjudicio enatum, quasi sic fierent mala, ut inde eveniant bona, jam ante sustulimus (*not.* §. 679.). Agedum vero, convertamus mentis aciem in exemplum aliquod, ut propositionis demonstratio facta ejus ad ipsum applicatione clarior evadat. Qui erant inimico in me animo, ut mihi nocere possent, horrendo ausu ob studium perficiendi philosophiam vexas sine exemplo mihi creare conati sunt, omne calumniarum & convitiolorum genus in eam, quam molior, philosophiæ emendationem congerentes, quale cum hætenus vix subauditum esset in orbe christiano, omnium oculos in me convertit & plurimos ad legenda scripta mea adduxit, qui alias ad eorum lectionem nunquam animum appulissent. Atque ita contigit, ut brevi temporis intervallo philosophia mea longe lateque fuerit diffusa & non obstantibus obtreccionibus, cavillationibus & criminationibus inimicorum ubivis fere locorum in eadem propaganda multum studii collocetur. Nefandum illum ausum adversariorum & inimicorum meorum esse in numero malorum moralium, quæ insunt huic rerum seriei nemo negabit, nisi qui mendacia, calumnias, convitia, criminationes, odium plusquam Vatinianum, vindictæ cupidinem inexsatiabilem & his multo graviora, quibus commemorandis jam supersedeo, virtutibus accenset, aut fucum sibi facere patitur. Nemo quoque asseveraverit, Deo probari ea, quæ Scriptura sacra magistra diabolum parentem agnoscunt, Deum vero inimicum experiuntur. Fateri autem tenentur omnes, Deum ab æterno prævidisse malignas istas malevolorum artes, quibus meo philosophandi studio odium sint conflaturi. Agnoscant autem non minus eundem quoque præscivisse, admissis vexis istis prorsus detestandis, meam philosophandi rationem, toti generi humano adeo utilem, breviori temporis intervallo longe lateque

teque propagatum iri, quam iisdem impeditis. Ecquis ergo non videt, cum Deus propagationem veritatis generi humano utilem utique intenderit tanquam finem, ejus obtinendi gratia quoque permisisse mala moralia; & hoc modo usum fuisse iisdem tanquam medio ad consequendum finem, etsi eadem minime approbaverit. Viderunt hæc viri eruditi apud exteros, qui probantibus aliis judicarunt, fecisse & facere me quod meum est philosophiam conscribendo, matæologos vero calumniatores & convitatores fecisse, quod adhuc desiderabatur, ut cito longe lateque propagaretur. Qui norunt, quales sint inimici mei, agnovere fines adhuc alios bonos, in quos Deus horrenda ista mala direxit. Quodsi disertius de hisce dicere jam liceret, multo evidentius pateret malorum, quæ Deus maxime improbat, in bonos fines directio: sed cum nemo facile fuerit, qui non in seipso eandem sit expertus, domestica unicuique exempla commendamus. Multum nobis cum hac malorum directione negotium erit in philosophia practica, cum in ea plurimum sit præsidii ad animi tranquillitatem & letitiam in adversis conservandam, nec minus auxilii ad vitiorum fugam & virtutis culturam. Quamobrem unicuique commendamus, ut veritatem arduam ac momentosam ex seipso addiscere malit adjutus luminibus rationis, quæ ex philosophia nostra haurire potest; quam ut alienæ experientiæ non satis fidens assensum imbecilliolem vacillare patiatur. Ceterum huic directioni divinæ tribuendum, quod veritas quidem prematur, sed non opprimatur, & quod bona tandem causa triumphet, nec quid sit tam tectum, quin detegatur: quæ & alia his gemina longe plurima experientia comprobata dudum auctoritate sua roboravit antiquitas.

§. 681.

Deus mala physica & moralia tandem dirigit ad manifestationem gloriæ suæ. Dirigit enim mala non minus moralia, malorum quam physica ad bonum finem (§. 680.). Quamobrem cum ad gloriam fines omnes particulares subordinet manifestationi gloriæ suæ (§. Dei.

632.), per modum medii ad eum consequendum (§. 634.); Deus quoque malis physicis & moralibus utitur per modum medii gloriam suam manifestandi. Quamobrem cum mala, quæ mutari non possunt, dirigantur in bonum finem, quatenus dirigens iisdem utitur tanquam medio eundem consequendi (§. 679.); Deus utique mala physica & moralia tandem dirigit ad manifestationem gloriæ suæ.

Qui sumunt Deum decrevisse malorum existentiam, ut essent medium illustrandi gloriam suam ac inde inferunt, Deum facere mala, ut inde eveniant bona; a vero toto cælo aberrant; quemadmodum jam supra notatum est (not. §. 668.). Neque enim Deus vult existere mala, ut sibi sint medium illustrandi gloriam suam; sed quia in hac rerum serie insunt, nec salva ejusdem perfectione (§. 556.) ob quam eandem ceteris prætulit (§. 325.), salvaque sapientia sua (§. 676.), qua in decernendo uti omnino debet (§. 643.), tolli possunt, iis utitur ad manifestandam gloriam suam, hanc certe rerum seriem minime decreturus, nisi hunc habere usum potuissent, utpote nihil decernens nisi respiciendo ad finem ultimum (§. 626.), gloriæ suæ manifestationem (§. 629.). Quodsi quidam affirmaverint, decrevisse Deum malorum existentiam, ut eorum faceret usum in manifestanda gloria sua; durius loqui videntur, quam sentiunt. Cum enim negent Deum esse mali autorem causamque peccati; mentem eorum aliter explicare non licet, quam quod Deus decreverit existentiam hujus seriei rerum, cui mala physica atque moralia insunt, propterea quod eorum usum facere potuit in manifestanda gloria sua, quam tanquam finem ultimum intendit, nisi in interpretando iniquum te præbere aliis volueris (§. 921. *Log.*). Ceterum nostrum est in casibus, quos experimur, particularibus scrutari, quomodo per mala physica atque moralia, quæ contingunt, gloria Dei manifestetur: id quod multiplici modo in praxin redundat.

§. 682.

Possibilitas directionis malorum physicorum & moralium Quomodo ad bonos fines, seu, quod mala physica & moralia ita insint possibilitas huic seriei rerum, ut ad bonos fines & mediantibus hisce tandem ad gloriam Dei dirigi possint, pertinent ad perfectionem malorum huius universi. Etenim quatenus fieri potest, ut mala physica & moralia dirigantur ad bonos fines; iisdem uti licet tantumquam mediis obtinendi fines bonos, quibus alias in hac serie non poterat esse locus, naturaliter scilicet (§. 679.). Et quatenus eadem tandem diriguntur ad gloriam Dei (§. 681.), neminem ultimum, quem ipse intendit (§. 629.); fines boni, ad quos diriguntur, ultimo subordinantur per modum mediorum ad eundem ducentium (§. 679. 635). Quamobrem cum perfectio mundi enascatur ex possibilitate subordinationis finium particularium & ultimi (§. 671.); possibilitatem directionis malorum ad bonos fines & mediantibus hisce tandem ad gloriam divinam manifestationem pertinere ad perfectionem huius universi extra omnem dubitationis aleam positum est.

Singularis adeo perfectionis species est, quæ directione malorum ad bonos fines & mediantibus hisce ad ultimum oritur. Ea sane careret hoc universum, si mala physica & moralia ex eo exularent. Etsi itaque illa directio non sit ratio sufficiens, cur Deus mala moralia præsertim in hoc mundo existere voluerit; fuit tamen sufficiens ratio, cur illis in eodem reliquerit locum, hoc est, cur ob illa huius existentiam decernere non intermiserit. Quibus difficilis est assensus, illi sumunt, quod a veritate alienum probari nequit, Deum decrevisse malorum existentiam, quæ ex mundo hoc exulare poterant, ut ea ad bonos fines tandemque ad manifestationem gloriæ suæ dirigere posset, fiducia hypotheseos de essentiis arbitrariis: quæ cum a nobis jam supra (§. 191.) profligata fuerit, non opus est ut de difficultate removenda hic simus solliciti. Sufficit admoneri eos, quibus ista hypothesis probatur,

tur, ut perpendant, quam infelicitate in philosophiam fuerit introducta, & quam parum consulant Theologiæ naturali, qui essentias necessarias rejicere audent, quas libertati divinæ in decernendo nullibi obstare ex nostris demonstrationibus abunde patet.

§. 683.

*Quomodo
faciant, ut
major sit
in mundo
perfectio.*

Quoniam possibilitas directionis malorum physicorum & moralium ad bonos fines & mediantibus hisce ad gloriæ divinæ manifestationem pertinet ad perfectionem hujus universi (§. 682.), atque adeo perfectionis universi partem quandam singularem absolvit, qua ea careret, si nullis malis in eodem esset locus; ideo jam patet, quod mala physica & moralia faciant, ut major sit in hoc universo perfectio, etsi ob eorum in-existentiam mundus non possit dici perfectior.

Agnovit hoc pro acumine suo D. Thomas, quod mala faciant, ut major sit in hoc universo perfectio. Qui hebetiores sunt, quam ut veritates minime obvias capere possint; sumunt mundum dici perfectiorem ob mala moralia & hinc colligunt, mala moralia per se seu qua talia perfectionem mundi augere: unde porro consequentias molestas defensoribus propositionis præsentis deducunt. Sed facilis est responsio. Mala non faciunt mundum perfectiorem, quam foret, si quidem iisdem careret; verum directio eorum ad bonos fines & mediantibus hisce ad finem ultimum eundem perfectiorem reddit, quam absque hac directione foret, & sic demum efficiunt, ut major sit in hoc universo perfectio. Præterea errant, dum mundum malo vacuum, quoad cetera prorsus cum præsentem eundem, conferunt cum mundo præsentem, cui mala inexistunt. Etenim demonstravimus, mala pariter physica atque moralia huic seriei rerum ita implicari, ut istis ablatis mundus idem quoad cetera manere minime possit. Insaniret utique qui affirmare auderet, mala per se, quatenus talia sunt, reddere mundum perfectiorem: sed nemo tam insanus erit, qui hoc affirmare audeat. Ut vero clari-

rius

ritus appareat, quomodo directio mali ad bonos fines & mediantibus hisce ad finem ultimum, gloriæ divinæ manifestationem, eundem perfectiorem reddat, sequentes adhuc addere lubet propositiones.

§. 684.

Directio malorum physicorum & moralium proficiscitur a Directio sapientia divina. Dum enim Deus mala physica & moralia malorum dirigit in bonos fines (§. 680.) & mediantibus hisce ad gloriæ unde sit. suæ manifestationem (§. 681.); fines sibi constituit per mala tanquam media obtinendos (§. 679.), cumque manifestatio gloriæ suæ sit finis ultimus (§. 629.), fines particulares ultimo subordinat. Enimvero sapientiæ est fines constituere & media ad eos ducentia eligere finesque sibi invicem subordinare (§. 678. *Psychol. ration.*). Quamobrem sapientiæ divinæ est malorum physicorum atque moralium directio.

Consistit in hac malorum directione sapientiæ effectus, cui locus nullus futurus erat in universo, siquidem malis in eodem nullus esset locus. Hæc sapientia nos quoque sapissime opus habemus. Etenim contingit nobis evenire mala physica, quæ nulla prudentia evitare licet, vel nos committere mala moralia, quæ evitari quidem debebant ac poterant, sed facta tamen infecta fieri nequeunt. Atque adeo tum opus est, ut mala dirigamus in bonum finem. Contingit præterea mala physica evenire aliis & moralia committi ab aliis, quæ a nobis impediri minime possunt. Tum vero denuo nostrum est eadem dirigere in bonos fines. De hoc officio, sapientiæ humanæ parte non infima ac prudentia sæpe non postrema, agemus in philosophia practica: ubi ostenderur, quo modo fieri possit & quo pacto fieri queat ista malorum directio salvis ceteris officiis. Plurimum vero juvat exemplum ipsius Dei. Sed hæc omnia suo patebunt loco.

§. 685.

Mala physica & moralia faciunt ad manifestationem sapientie. Quomodo
(*Wolfii Theol. Naturalis*) Kk kk *prien-mala faci-*

Ad gloriam Dei. *pientie divine.* Etenim Deus mala physica & moralia dirigit in bonos fines (§. 680.) & tandem ad gloriæ suæ manifestationem (§. 681.). Quamobrem cum directio eorundem sit sapientie divinæ (§. 684.); Deus quoque per eandem sapientiam suam hominibus manifestat, consequenter mala physica & moralia faciunt ad manifestationem sapientie suæ.

Quoniam directio malorum singularis sapientie effectus est (not. §. 684.); Deus quoque sapientiam suam singulari quadam ratione per eandem manifestat. Atque hoc pacto patet, mala physica & moralia facere ad manifestationem gloriæ divinæ singulari quodam modo. Ubi ad specialia descenditur, non modo manifestatio sapientie divinæ, verum etiam aliorum attributorum divinarum per eorum directionem illucescit.

§. 686.

Sapientia Deo juxta S. S. vindicata.

Deus in Scriptura sacra dicitur sapiens eodem sensu, quo nos eundem sapientem esse probavimus, & juxta eandem solus est, qui sapiens dici meretur. 1. Tim. I. 17. & Jud. vers. 25. Deus dicitur *μὴν σοφός*, solus sapiens, atque adeo sapientia Deo tribuitur tanquam prædicatum proprium, ut adeo vulgatus interpret *μὴν σοφὸν θεὸν* in utroque loco tantummodo vertat soli Deo, non vero soli sapienti Deo, quemadmodum reddit *Castalio* literam secutus, propterea quod is, qui solus sapiens dici meretur, solus quoque Deus est. Vocabulum *σοφία* Græcis idem sonare, quod Latinis sapientia, pervulgatum est, & in Hebræo sermone eidem respondet vocabulum *חכמה*, quod septuaginta interpretes per *σοφία* vertunt, veluti 1. Reg. IV. 30. 34. & cap. V. 12. Narratur autem cap. III. 16 & seqq. judicium Salomonis de duabus meretricibus, quo sapientia ejus probatur & unde eam collegerunt Israelitæ vers. 28. Litigabant coram eo duæ meretrices in eadem domo habitantes & in eodem cubiculo dormientes de infante vivo, quem utraque suum

factum esse ajebat, altero a dormiente oppresso & in locum vivi supposito. Rex inquisiturus, cujusnam esset, testibus deficientibus, infantem vivum dividi & dimidium utrique tradi jubet: meretrice autem altera ad divisionem provocante, altera infantem integrum alteri cedere, quam eundem dividi malens, tandem definit, eam esse infantis vivi matrem, quæ ipsum dividi nolit, adeoque huic tradendum esse pronunciat. In quonam igitur consistebat Salomonis sapientia, quam hoc facto probatum dedit subdilis? Detegere volebat matrem infantis vivi, de quo litigabatur, atque adeo hunc sibi proponebat finem in suo judicio (§. 932. *Ontol.*), ut jus reddere posset. Simulatio de infante dividendo erat medium, quo vera mater detegebatur (§. 937. *Ontol.*), consequenter quo finem consequi intendebat. Quoniam itaque ideo sapientem sese probavit, quia matrem veram, quæ latebat, simulatione sua adeo feliciter detexit; omnino liquet, eum dici sapientem, quod eligere noverit media ad finem consequendum apta. Et quoniam prompte admodum hæc media eligere potuit; ipsi fuit habitus eligendi media ad finem ducentia (§. 428. *Psychol. empir.*). Enimvero nobis sapientia non est nisi finium sibi convenientium (qualis erat ille, quem sibi proposuit Salomo tanquam Rex subditis jus controversum vindicaturus) constitutio & mediorum ad eundem ducentium electio (§. 678. *Psychol. ration.*), neque alio sensu supra Deum esse sapientem probavimus (§. 640.). Patet itaque in S. S. sapientia vocabulum eodem sumi sensu, quo a nobis accipitur. Quamobrem cum Deus sapiens dicatur in S. S. eodem sensu ejus autoritate sapiens dicendus, quo nos eundem sapientem esse probavimus. Nimirum ipsius S. S. quoque autoritate dicendum erit, Deum sibi metipso præscribere fines decentes & media eligere ad eos certo & ex arte ducentia. Dum vero juxta S. S. solus est, qui sapiens dici meretur; facile hinc intelligitur, eum esse sapien-

rem in omnibus, cum ex adverso constet neminem hominum in omnibus sapientem esse (§. 652. *Psychol. ration.*). Nec minus inde perspicitur juxta S. S. tantam esse sapientiam Dei, ut omnis creaturæ sapientia ejus respectu pro nulla reputari debeat: quod utique idem est ac Deo tribuere sapientiam infinitam, seu omnium, quæ concipi potest, maximam. Quoniam itaque in S. S. Deo sapientia tribuitur in eodem sensu, in quo nos eundem sapientem esse evicimus, *per demonstrata*, hoc sensu vero sapientia summa atque perfectissima est scientia constituendi fines optimos, eligendi media, quæ certo & via brevissima ad eundem ducunt, & quibus finem ex arte consequi datur, finesque omnes particulares ita sibi invicem subordinandi, ut remotiorum media sint propiores, & omnes tandem simul medium finis ultimi (§. 689. *Psychol. ration.*) qualem sane scientiam Deo quoque vindicavimus (§. 640.); quin juxta S. S. ad sapientiam quoque pertineat finium particularium & ultimi subordinatio, consequenter Deus dicendus sit fines omnes particulares sibi invicem, ac omnes tandem ultimo per modum mediorum ad finem ducentium subordinare dubitandum non est.

Quod si nobis prolixioribus esse liceret, singula sapientiæ divinæ requisita ex S. S. sigillatim demonstrare poteramus, ostensuri Deo competere juxta eandem sapientiam, qualem ipsi vindicavimus in anterioribus, & deinde subjungere propositionem præsentem, qua probatur, cum quoque eodem sensu sapientem dici, quo nos sapientem appellamus. Enimvero cum consensus in verbis in præsentem simul inferat consensum in re; ambagibus istis minime videretur opus, quæ pro talibus habendæ non sunt, ubi ex instituto attributa divina ex S. S. explicare ac demonstrare volueris.

§. 687.

Consensus Deus etiam juxta S. S. constituit finem ultimum hujus
S. S. quoad universi manifestationem gloriæ suæ & ad eundem finem dirigere
 mala

mala moralia atque physica. Docetur hoc *Prov. XVI. 4*, ubi *finem ultimi* Deus dicitur universa fecisse propter seipsum, impium quoque *ad di-* ad diem malum, seu, quemadmodum *Castalis* vertit, ad poena- *rectionem* rum diem. Est vero Deus etiam juxta S. S. sibi metipsum suffi- *malorum* entissimus (§. 429.), adeoque nulla prorsus re extra se quomo- *adeundem.* docunque indiget. Quamobrem nullus concipi potest modus, quo propter seipsum quicquam facere possit, quam ut gloriam suam manifestet per hoc, quod facit. Et sane quod ideo produxerit hunc mundum, ut per eum manifestaret gloriam suam, disertis verbis docet Apostolus *Rom. I. 20*, quemadmodum jam supra explicavimus (§. 420. 423.). Jam id, propter quod causa efficiens agit, est finis, quem intendit (§. 932. *Ontol.*). Manifestatio adeo gloriæ divinæ finis est, quem Deus per existentiam mundi intendit, cumque omnia, quæ fecit, ad hunc finem referat vi verborum Salomonis, adeoque fines particulares non constituat nisi propter manifestationem gloriæ suæ, hoc est, ideo, quod ad eandem faciunt, esse illam finem ultimum patet (§. 943. *Ontol.*).

Jam porro Deus dicitur etiam impios fecisse ad diem malum propter seipsum. Nemo non largitur, impios hic dici illos, quorum actionibus inhæret malum morale, & per diem malum intelligi tempus, quo mala physica iisdem infliguntur. Quamobrem cum Deus propter seipsum quid faciat, quatenus per id gloriam suam manifestat; hominem fecisse dicitur, quem noverat mala perpetraturum, & mala physica eidem immittere decrevit, ut hoc ipso manifestaret gloriam suam. Patet itaque Deum juxta S. S. dirigere mala physica & moralia ad manifestationem gloriæ suæ.

Directionem malorum ad gloriæ divinæ manifestationem probari poteramus ex loco Pauli *Rom. IX. 22. 23*. Enimvero cum is sit interpretationis controversæ, nostrum vero jam non sit in hanc controversiam inquirere; sufficit ad ea provocasse, quæ de

eodem diximus (§. 412.), cum inde ostenderemus, velle Deum, quod ipsum deceat. Sane mali directio ad manifestationem gloriæ suæ decet Deum, cum ea sit singularis quædam sapientiæ divinæ pars (not. §. 684.).

§. 688.

*Consensus
S. S. circa
directio-
nem malo-
rum ad
bona.*

Deus juxta S. S. mala dirigit ad bona. Illustre exemplum hujus directionis S. S. exhibet in Josepho *Gen. XXXVII. & seqq.* Etenim cum is a patre præ fratribus suis amaretur, ac ideo tantum eorum odium incurreret, ut eum amice appellare non possent; nefando prorsus ausu mercatoribus Ismaëlitis vendebatur, qui eum in Ægyptum abducebant & servituti addicebant. Factum fratrum fuisse malum, utpote in parentem atque fratrem maxime injurium nemo inficiabitur. Ecce igitur tibi malum aliquod morale, quod Deus fieri permisit. Quin servitus, in quam deducebatur Josephus, fuerit malum physicum, nemo in dubium vocabit, nisi qui ignorat, quantum inter libertatem & servitutem olim receptam, inter nos vero abrogatam, intersit: Servus nimirum cum libertate amittebat omnia jura, nec quicquam habere suum poterat totusque a voluntate alterius pendebat. Jam cum Josepho, quod Deo secundo uteretur, quæcunque tractaret, ea prospere caderent; herus tantam in eum benevolentiam concepit, ut eum domui suæ præficeret ac omnia sua in manus ejus traderet. *Gen. XXXIX. 2. & seqq.* Hic heri in servum favor prorsus singularis erat utique eidem bonus. Atque adeo patet, malum morale, quod perpetraverant fratres Josephi, & malum physicum, quod ipsemet perpeffus fuerat, a Deo fuisse directum ad bonum. Porro cum idem Josephus uxori domini sui eum ad concubitum sollicitanti annuere nollet; is ab eadem falso accusatus in carcerem includi jussit *Gen. loc. cit. vers. 7. & seqq.* Invitamentum ad adulterium, in quod consentire volebat Josephus, juvenis castus ac pius, erat malum morale, a Deo per-
mis-

missum. Calumniz, quibus innocentem aggravabat mulier pessima, in eundem omnino censum sunt referendæ. Detentio autem Josephi in carcere malum erat physicum, quod ei eveniebat, propterea quod castitati, pietati in Deum, fidelitati in dominum ac prudentiæ studuerat, consequenter ex benefacto suo accedente alterius malo facto enascebatur. Accidit vero deinde fato singulari Gen. XL, XLI. ut Rex Ægypti Pharaon ex carcere eductum ad maximum dignitatis fastigium eveheret, potestate ei in omnem Ægyptum permissa. Hanc dignitatem in numerum bonorum esse referendam, quibus mactatus fuit Josephus, citra ullam hæsitacionem unusquisque concedet. Ex malo igitur morali, quod Deus non impedivit, & malo physico, quod inde secutum, tandem enatum est bonum. Unde denuo patet, ut ante, Deum malum morale & physicum direxisse in bonum. Ceterum ex hac ipsa quoque historia liquet, quomodo mala & bona a se invicem dependeant, ut unum absque altero naturaliter existere minime possit. Sane nisi Jacobus parens amasset Josephum filium natu minimum præ ceteris filiis suis; nec fratres cum odio persecuti fuissent. Amor Jacobi, quo Josephum, adolescentem pulcherrimæ formæ ac bonæ indolis complectebatur, non erat malus, sed omnino bonus: ast odium fratrum, quo adversus illum flagrabant, malum erat morale. Dependebat itaque malum morale a bono, sed non impediendum, nisi sublato bono, cessante nimirum amore patris in filium probum. Ex odio fratrum enascebantur consilia de ipso occidendo, quibus de novo inter mala moralia locus est, & tandem cum mercatores in Ægyptum iter facturi in eos inciderent, decretum de vendendo. Quoniam in venditionem consentiebant omnes, quod Judas fratrum unus necem ejus dissuaderet, Judæ autem consilium eatenus erat bonum, quatenus vitæ fratris consulebatur; venditio, qua frater servituti addicebatur, actus utique in se
malus,

malus, denuo dependebat ab actu bono, non impediendus, nisi bonum consilium cessasset. Ceterum venditio illa in se mala quoad vendentes, bona erat physice considerata respectu venditi, atque adeo uni eidemque actui inhærebat & bonum, & malum. Quodsi Josephus non fuisset venditus a fratribus, in Ægyptum nunquam pervenisset, consequenter nec ibidem gratiam Potipharis meruisset. Unde denuo patet bonum, quod Josepho eveniebat, dependisse a malo, quod perpetrabant fratres. Recte omnino faciebat Josephus, quod ad committendum adulterium cum uxore domini sui se adduci minime patiebatur: sed male faciebat mulier improba, quod calumniata audacter innocentem in carcerem adduceret. Unde malum morale dependebat a bono & a morali denuo malum quoddam physicum. Quodsi Josephus in carcerem non fuisset detrusus, nec somniorum interpretatione ansam dare poterat prægustatori Pharaonis, ut eodem fine commendaretur Pharaoni & felici interpretatione somnii non modo gratiam ejus sibi conciliaret, verum etiam ad dignitatem regis proximam eveheretur. Unde liquet, quomodo a malo physico dependeat bonum. Qui attenta mente modo dicta recolere voluerit, is abunde perspiciet, ob rerum in hoc universo nexum, mala moralia, physica & bona ita a se invicem dependere, ut nisi malis admissis locus esse in eodem bonis minime possit. Deus itaque pervidens ab æterno omnem rerum nexum cum intendat bonum tanquam finem, locum quoque relinquere debet malis tanquam mediis ad eundem ducentibus. Agnovit hæc satis superque Josephus, quemadmodum insinuant ea, quæ cum fratribus locutus est *Gen. XLV. 4 & seqq.* Cum in Scriptura probentur, quæ locutus est; directio mali ad bonum eo utique concipienda modo juxta S. S. quo eandem explicavimus.

Modus, quo expendimus directionem malorum ad bona, exemplo esse potest in aliis casibus, ubi in eandem directionem inquirendum. Patet nimirum animum advertendum esse ad eventus, qui se invicem excipiunt, & perpendendum quibus positis ponantur alii, non ponendi nisi positis istis. Ita enim eorundem mutua a se invicem dependentia innotescit atque adeo intelligitur, quomodo in hac rerum serie mala physica pendeant a moralibus, moralia subinde a physicis & bona ab utrisque. Quodsi jam bona sumantur tanquam fines a Deo intenti, tum patebit, malis huic rerum seriei per naturam rerum inexistentibus a Deo relinqui locum, quod ad illorum actualitatem quid conferant, consequenter quod præbeant sui usum ad consequenda bona per modum medii. Usus hic cum sit bonus, & voluntas omnia per naturam suam feratur in bonum (§. 904. *Psych. emp.*), non repugnat dici, quod Deus usum istum intenderit tanquam finem (§. 648.). Nimirum mala, quatenus hunc habeant usum, mali non sunt, quemadmodum ex ipsa notione mali respectiva intelligitur (§. 371.); nec proprie loquendo usum bonum habeant, quatenus sunt mala, sed quatenus mala moralia sunt actiones physice; mala physica eventus naturales: quod nosse cum plurimum referat; nostrum esse videtur, ut malorum in bonum influxum exponamus distinctius. Hoc sane pacto fore confidimus, ut omnes tandem dispellantur nebulae, quæ iis offunduntur, quotquot capere non possunt, quomodo mala possint subire locum mediorum consequendi bona, præsertim ubi in concursu Dei ad mala ostendetur adhuc, quantum mala pendeant a Deo, quoad ipsum minime mala, quemadmodum jam vidit *Campanella* perspicillis thomisticis usus.

§. 689.

Bona in mundo non dependent a malis quatenus mala sunt, sed quatenus mala moralia sunt actiones physice, physica bona a malis autem cause naturales. Nimirum bona in mundo dependent a malis, quatenus ratio actualitatis suæ in iis, quæ mala sunt in hoc
(Wolfii Theol. Naturalis) LIII *sunt, universo.*

sunt, continetur (§. 851. *Ont.*), non adeo ponenda nisi hisce positis, in quibus ratio ista continetur (§. 118. *Ontol.*). Jam cum mala physica per easdem regulas motus consequantur, per quas consequuntur cetera in hac rerum serie, quæ mala non sunt (§. 558.), nec in relatione ad mundum integrum (§. 563.); sed tantummodo in relatione partium, immo particularum universi ad se invicem talia censeantur (§. 565.); ipsa in hac rerum serie continentur, non quatenus mala sunt, sed quatenus sunt effectus rerum aliarum in hac serie rerum contentarum. Jam actus contingentium in mundo determinatur per seriem contingentium, quæ a se invicem dependent ut effectus a sua causa (§. 83. *Cosmol.*). Quamobrem malum physicum, quod in serie rerum collocatur, tanquam effectus naturalis, sit causa boni tanquam effectus ab eodem dependentis, atque secundum regulas motus inde consequitur tanquam effectus naturalis (§. 511. *Cosmol.*). Atque adeo patet bonum dependere in hac serie rerum a malo physico, non quatenus malum est; sed quatenus in serie causarum naturalium continetur.

Similiter actiones malæ externæ, quatenus physice spectantur, eodem modo consequuntur, quo bonæ (§. 572.). Quamobrem cum physice spectentur, quatenus sunt mutationes in corpore accidentes (§. 568.); in serie rerum perinde ac mala physica una cum actionibus bonis collocantur tanquam effectus naturales. Unde patet ut ante alia inde consequi per modum effectus a sua causa, consequenter bona in hac rerum serie pendere a malo morali, non quatenus actiones hominum moraliter spectantur, sed quatenus spectantur physice.

Idem multo clarius patet demonstratione ad casum particularem applicata. Sumamus itaque exemplum Josephi, quo directionem mali ad bona divinam ex S. S. illustravimus. Est enim hic ex principiis rationis demonstranda sit propositionis veritas; nil tamen obstat, quo minus exemplum petatur ex sacris

sacris , cum hic tantummodo consideretur tanquam factum , quod fidem humanam meretur , immo sufficiat idem sumi tanquam casum possibilem. Vendebatur Josephus a fratribus mercatoribus Ismaëlitis & ab his in servitutem deducebatur in Ægyptum. In Ægypto calumniis mulieris malæ in carcerem conjiciebatur , & ibi somniorum interpretandi occasionem nactus ob artem , qua in iis interpretandis excelluit , Pharaoni commendari merebatur ; cui cum eandem probaret , ad summam dignitatem evehebatur. Nemo non videt Josephum ad tantam in Ægypto dignitatem nunquam fuisse ascensurum , nisi a fratribus fuisset venditus in servitutem & a Potiphare in carcerem conjectus. Quoniam venditio ista erat moraliter mala , nec minus calumniæ uxoris Potipharis , ob quas in carcerem conjiciebatur , malis moralibus accenseri debent ; evectio Josephi ad summam in Ægypto dignitatem dependebat a malo morali. Venditio ista mala erat , quod proficiscebatur ex odio fratrum in fratrem , nec ullum venditoribus esset jus vendendi. Enimvero non ideo deducebatur in Ægyptum , quod ex odio esset venditus & quod esset venditus ab iis , quibus nullum vendendi jus erat ; sed ideo tantum , quod esset venditus mercatoribus in Ægyptum iter facientibus. Quamobrem evidens est , dignitatis summæ collationem , quatenus dependet a venditione in servitutem , dependere a mala actione , non quatenus moraliter , sed quatenus physice spectatur , hoc est , quatenus fuere motus in corpore actiones ad venditionem requisitæ , non quatenus hi motus responderunt volitionibus malitiosis atque injustis (§. 568.) , consequenter a malo morali , non quatenus malum est , sed quatenus in numero rerum naturalium locum habet. Similiter Josephus non ideo ad dignitatem summam evectus , quod per malitiam mulieris lascivæ & per injustitiam Potipharis mariti ejus in carcerem conjectus & per ingratitudinem Præzeptatoris in eodem detentus

fuiſſet; ſed ideo tantum evenit, quod in carcerem conjeſtus & in eodem detentus fuiſſet. Unde patet uti ante collationem dignitatis ſummæ, quatenus dependet ab injuſta Joſephi in carcerem detrufione & ejus in eodem detentione dependere a mala aſtione, non moraliter, ſed phyſice ſpectata (§. 568.), conſequenter non a malo morali qua tali, verum quatenus aſtiones, quibus malum inhzret, ſunt in numero rerum naturalium. Ceterum cum malum morale inhzreat volitionibus, non quatenus ſunt modificationes animæ & hiſce ſui in corpore motus reſpondent (§. 569. 572.); verum quatenus abuſu libertatis diriguntur in finem malum (§. 580. 574. 575.): haud difficulter patet, quæ de caſu Joſephi dicta ſunt, eadem ad omnem alium eodem modo applicari debere. Atque adeo liquet, bonum in genere a malo non dependere, quatenus malum eſt, ſed quatenus aſtiones, quibus vicioſitas inhzret, phyſice ſpectantur.

Poteramus uti exemplo domeſtico, ad quod ſupra provocavimus (not. §. 680.): ſed applicatio eorum, quæ dicta ſunt, ad exempla alia adeo manifeſta eſt, ut eam ulterius explicare ſit aſtum agere. Quodſi vero fuerint nonnulli hebetiores, qui veritatem ſatis apertam videre nondum poſſunt; hi perpendant velim, ſi Joſephi eveſtio ad dignitatem ſummam dependeret a malo morali qua tali, cum malum morale proveniat ab intentione agentium, neceſſe fuiſſe, ut & fratres improbi, & mulier calumniatrix, & Potiphar ex credulitate injuſtus, & Præguſtator ingratus improbitate, calumniis, injuſtitia & ingratitude illam intendiſſent: quod quam ſit a vero alienum, nemo non videt. Malum igitur qua malum in bonum minime inſluit. Unde etiam eſt, quod malum tribuatur hominibus libertate ſua abutentibus; directio vero ad bonum ad Deum autorem referatur, a quo eſt rerum in univerſo nexus. Sed hæc apertiora ſient, quando inferius de concuſſu Dei ad malum aſturi ſumus. Maxima in propoſitione præſente ratio habenda mali moraliſ;

lis; de physico enim jam ostendimus, quod fiat, quatenus in se spectatur, juxta naturæ ordinem (§. 559.), nec in relatione ad mundum totum malum sit (§. 563.), sed tantummodo malum censeatur in relatione partium, immo particularum universi (§. 565.). Non attendimus in demonstratione illum casum, quo nos malis perpetratis utimur tanquam motivo emendationis, propterea quod hæc directio mali ad bonum in Deo locum non habet, & de eadem suo loco in philosophia practica acturi sumus. Ceterum vi propositionis præsentis clarius intelligitur, cur mala minime obstent perfectioni hujus universi (§. 683.). Cum enim perfectio mundi nascatur ex possibilitate subordinationis finium particularium & ultimi (§. 671.); bona vero a malis non dependeant, quatenus mala sunt, sed quatenus, tanquam quæ secundum naturæ ordinem contingunt (§. 559. 572.), in serie rerum naturalium continentur (§. 689.); malum qua malum non ingreditur perfectionem universi, etsi ea, quibus malum inhaeret, suum ad eandem conferant. Unde jam patet quæ de malo morali physice ac moraliter considerato nec non de malo physico in se spectato & ad alia relato in anterioribus inculcantur, non esse inanes distinctiones ad palliandas difficultates excogitatas ab iis, qui malam causam defendere volunt; sed ipsis rerum notionibus primis in Ontologia & Cosmologia expositis apprime consentire. Nec minus hinc jam perspicitur, quod plena luce in doctrina de concursu Dei perfundetur, quo sensu verum sit, quod dixit *Campanella*, quoad Deum non dari malum in hoc universo. Etenim quoad Deum mundus consideratur tanquam ens unum, cujus perfectio in mutua rerum a se invicem dependentia consistit, quatenus per eam ad manifestationem gloriæ divinæ mundus efficitur aptus (§. 673.). Quamobrem cum res in hoc universo ex mutua a se invicem dependentia ad constituendam perfectionem universi excludant malum quatale, quoad Deum, qui ob perfectionem rerum seriem præsentem elegit (§. 325.), nullum datur malum, cum non detur quod tendat ad imperfectionem totius mundi (§. 371.).

§. 690.

*Imperscrutabilis
sapiencia
in quo consistat.*

Sapientia dicitur imperscrutabilis, si fines ab agente intentos, vel media, quæ ad eosdem consequendos eligit, vel finium quoque subordinatio penitus nobis non fuerint perspecta, nec a nobis certo cognosci possunt.

Quod imperscrutabilitas sapientiæ hic definiatur sensu communi, non dubitabit qui repetere lubet, quæ de voluntatis imperscrutabilitate a nobis annotata sunt (§. 397.), mutatis mutandis vi notionis sapientiæ summæ Deo competentis (§. 640.) ad sapientiæ facile transferenda (§. 689. *Psychol. rat.*).

§. 691.

*Imperscrutabilis
sapiencia
divina.*

*Sapientia divina omni homini, immo intelligenti finito imperscrutabilis. Totum universum est plenum finibus a Deo intentis (§. 660.), nexus rerum coëxistentium consistit in dependentia finis a medio & nexus successivorum in dependentia non modo finis a medio, verum etiam actionis causæ efficientis a fine (§. 665.), & in numero finium sunt, quæcunque ex essentia & natura rerum consequuntur (§. 645.), omnes rerum naturalium (§. 648.) & artificialium usus (§. 649.), omnes iidem fortunæ secundæ pariter atque adversæ effectus (§. 651.). Nemo igitur hominum fines omnes a Deo intentos perspicere ac certo cognoscere valet. Quoniam per media finis ad actum deducitur (§. 937. *Ontol.*); qui fines omnes perspicere nequit, nec media omnia perspicere valet, per quæ fines ad actum deducuntur. Unde porro liquet, neminem hominum intelligere media omnia, quibus Deus in hoc universo fines suos consequitur. Jam cum fines sibi invicem subordinentur, ut remotiorum media sint propiores & omnes tandem simul medium finis ultimi (§. 635.), consequenter finium subordinatio omnis non intelligatur, nisi finibus singulis earumque me-*

mediis perspectis ; ultro consequitur , neminem mortalium omnem finium subordinationem perspicere ac certo cognoscere posse. Quoniam itaque sapientia imperscrutabilis est , si fines ab agente intentos , vel media , quæ ad eosdem consequendos eligit , vel finium quoque subordinationem penitus perspicere ac certo cognoscere non valeamus (§. 690.) ; sapientia utique divina nobis imperscrutabilis est.

Idem etiam hoc modo probari potest. Nemo mortalium perfectionem totius universi comprehendere atque distincte explicare valet (§. 541. *Coimol.*). Quamobrem cum mundi perfectio enascatur ex possibilitate subordinationis finium particularium & ultimi (§. 671.) , & fines sibi invicem subordinentur per modum mediorum ad finem (§. 634.) ; distinctam vero rei notionem non habeat , nisi qui singula , quæ eidem insunt , a se invicem distinguere valet (§. 88. *Log.*) ; nemo mortalium fines omnes , quibus abundat hic mundus adspectabilis , figillatim perspicere ac quibus mediis obtineantur intelligere finiumque subordinationem cognoscere certo valet. Enimvero sapientiam divinam perscrutari nequit , qui fines ab eodem intentos & media ad eosdem ducentia illorumque ac ultimi subordinationem penitus perspicere ac certo cognoscere nequit (§. 690.). Sapientia igitur divina omni homini imperscrutabilis est.

Porro qui intellectu finito præditus est , ejus intellectus limitatus est (§. 173.). Quamobrem cum limes arguat defectum ulterioris realitatis (§. 468. *Ontol.*) ; intellectus vero in facultate res distincte sibi representandi consistat (§. 275. *Psych. empir.*) ; aliter is limitari nequit , quam quod non extendatur ad omnia possible nec eadem prorsus distincte sibi representare valeat , ita ut nihil admittatur quod confuse tantummodo percipitur. Unde intellectus limitatus ea omnia , quæ in hoc universo insunt , distincte perspicere ac certo cognoscere nequit.

quit. Fieri adeo non potest, cum in numero finium sit, quicquid ex essentia & natura rerum consequitur (§. 645.) & omnis rerum coëxistentium & successivarum nexus in dependentia finis a medio consistat (§. 665.), ut intellectus finita vi fines omnes, qui insunt huic seriei rerum, a se invicem distinguantur & media ad eosdem ducentia detegantur, consequenter nec intellectus finitus finium omnium subordinationem penitus perspicere ac certo cognoscere valet. Quoniam itaque sapientia divina ei imperscrutabilis est, qui fines omnes ac media ad eosdem ducentia finiumque subordinationem penitus perspicere ac certo cognoscere minime valet (§. 690.) ; sapientia divina omni intelligenti finito imperscrutabilis.

Ob imperscrutabilitatem sapientię divinę *Cartesius* fines inter arcana Dei retulit, eosque ex philosophia proscripsit tanquam cognitu impossibiles nullum Teleologię inter partes Philosophię locum relinquens. Enimvero quemadmodum supra (§. 398.) annotavimus, imperscrutabilitatem voluntatis divinę minime obstare, quo minus eam scrutemur ; ita hic quoque inculcandum venit, non impedire imperscrutabilitatem sapientię divinę, quo minus in eam inquiramus, consequenter fines ac media, quibus Deus in rerum natura utitur ad eos consequendos, finiumque subordinationem ac mali ad bonum directionem investigemus. Sane cum Deus per creationem hujus mundi adspectabilis sapientiam suam nobis manifestare decreverit (§. 608.), fieri autem non possit, ut sine suo excidat (§. 621.) ; absurdum omnino existimari debet, eam ex contemplatione hujus universi erui minime posse. Quamobrem cum sapientia non agnoscatur, nisi quatenus nobis fines a Deo intenti, media ad eosdem ducentia & finium subordinationes innotescant (§. 640.) ; quin etiam in finium cognitione pro modulo intellectus limitati proficere detur dubitandum non est. Et qui expendit quanam ea sint, quę in numerum finium referri debere evicimus (§. 645. 648. 649. 651. 665.), is tentando oculatam experietur fidem. Imperscrutabilitas autem sapientię divinę nos cautos reddere debet,

debet, ne temerarie de finibus rerum eorumque subordinatione judicemus. Quamobrem si quando contingat, nos precipitati iudicii falsitatem deprehendere; ea non sufficiens ratio est ad finium cognitionem proscribendam, nisi in Teleologia cum Scepticis facere volueris, nihil prorsus scire, quam periculo errandi sese exponere malentibus (§. 41. *Psychol. rat.*). Equis enim, nisi Scepticus fuerit, causarum investigationem proscribit, propterea quod precipitato iudicio in errorem saepe incidimus? Aliud sane est finium cognoscendorum impossibilitas, aliud eorundem cognoscendorum difficultas. Aliud est finium cognoscendorum impossibilitas simpliciter talis, qua ab omni finis cognitione arcemur; aliud vero finium plurimorum cognoscendorum impossibilitas, quae maximam partem eorum, qui a nobis cognosci possunt, facit minimam illorum, qui cognosci nequeunt. Imperferutabilitas sapientiae divinae arguit finium cognoscendorum impossibilitatem simpliciter talem & eorum, qui a cognitione nostra non prorsus remonentur, cognoscendorum subinde difficultatem; non vero tollit omnem finium cognoscendorum possibilitatem, etsi subinde nobis iidem videantur inaccessi. Non video, quod contra finium investigationem proferri possint, quae non eodem modo contra causarum cognitionem urgeri possunt. Utrobique autem in principium Scepticismi fundamentale relaberis, ubi idem facere volueris. Haec ideo prolixius inculcare libuit; ne praedudicio animum occurrentes Teleologiae culturam deseramus, quam ego pulcherrimam philosophiae naturalis partem existimo, multiplici modo in felicitatem hominis influentem; id quod suo loco ac tempore expressius docebimus.

§. 692.

Sapientia divina etiam juxta S. S. imperferutabilis. Apo- Consensus
 stolus de occultis Dei iudicii locutus Rom. XI. 33. exclamat: O altitudo S. S. quoad
 ritudo sapientiae! hanc reddens prorsus admirabundus rationem. imperferu-
 Quam impervestigabiles sunt viæ ejus! Vocabulum *βάρβαρος*, tabilitatem
 quod per altitudinem reddit vulgatus interpres, proprie pro- sapientia
 (Wolfii Theol. Naturalis) M m m m fun- divina.

funditatem significat. Latinis enim quod profundum est idem & altum dici solet ; quemadmodum saepe apud *Cesarem* profunditas fluminis altitudinis nomine venit , quemadmodum ex adverso apud Græcos βάθος quoque altitudinem subinde significat. Quicquid vero sit , five sapientiae divinae altitudinem, five profunditatem tribuas , in casu admirationis , quem exclamatio indigitat , significatur , tantam esse sapientiam divinam , ut eam assequi minime valeamus. Assequimur sapientiam , siquidem nobis perspicere licet fines ab agente intentos & media ad eosdem ducentia (§. 678. *Psychol. ration.*) , consequenter & finium subordinationem , quippe quæ fit per modum mediorum ad finem (§. 634.). Quare si eam assequi non valemus , aut fines pervestigare non possumus , aut media detegere nequimus , aut in finium subordinatione eruenda frustra desudamus. Ex mente adeo Apostoli tanta est sapientia Dei , ut fines omnes , quos Deus intendit , penitus perspicere & media ad eundem ducentia certo cognoscere , finiumque subordinationem capere minime valeamus. Quoniam itaque sapientia imperscrutabilis est , si fines ab agente intentos vel media , quæ ad eosdem consequendos eligit , vel finium quoque subordinationem penitus perspicere ac certo cognosci nequeant (§. 690.) ; sapientia divina ex mente Apostoli imperscrutabilis dicenda eo sensu , quo eandem imperscrutabilem esse modo evicimus (§. 691.). Hanc vero fuisse Apostolo mentem , tanto minus dubitare licet , ubi animum ad rationem advertimus , quam altitudinis aut , si mavis , profunditatis sapientiae divinae reddit. Et enim non sine admiratione exclamat : quam impervestigabiles sunt viæ ejus ! Constat phrasi S. S. vias Dei appellari media , quibus utitur ad fines , quos intendit , consequendos , quatenus sunt apta ad eos consequendos , commodissima metaphora. Quemadmodum enim via nos ducit ad metam , ad quam contendimus ; ita media ducunt ad finem , quem intendimus , ubi fuerint apta.

apta. Et sane hac ipsa appellatione denotatur, Deum semper uti mediis, quæ certo & via brevissima ad finem ducunt: quem admodum supra demonstratum est (§. 625. 636.). Ex mente itaque Apostoli sapientiam Dei assequi minime valemus, propterea quod comprehendere non possumus, cur hoc vel isto modo agat Deus, ignorantes aptitudinem mediorum ad finem consequendum, quia nec fines satis explorare, nec media, si vel maxime illi perspecti nobis essent, ad eos consequendos maxime apta divinare licet. Nimirum ipso autore tanto majorem in admirationem rapimur, quanto sollicitius inquirimus in fines, quos Deus intendit, & in media, quibus utitur in iis prosequendis, & in aptitudinem illorum mediorum, ubi vis abyssum cognitionis deprehendentes, quam rationis humanæ vi explorare non valemus. Ratio igitur ab Apostolo prolata, cur profunda sit sapientia Dei, ejus imperscrutabilitatem eodem sensu palam loquitur, quo eandem evicimus (§. 691.).

Apostolus in admirationem totus abripitur, ubi sapientiæ divinæ imperscrutabilitatem expendit: id quod exinde apparet, quod non solum in probanda sua de eadem sententia, sed & in reddenda ratione exclamatione utatur, ac mox interrogatione, ubi rationem rationis redditurus, quanta sit sibi certitudo, indigitare intendit. Hoc suo exemplo duo nos docet, nimirum quod in fines a Deo intentos & media, quibus ad eosdem consequendos utitur, omni studio inquirere debeamus, etiam ubi inanem operam a nobis sumi pro explorato habemus, ut imperscrutabilitatis sapientiæ divinæ reddamur prorsus certi; deinde quod agnita imperscrutabilitate divina Deum admirabunda mente venerari teneamur, ne sterilis sit nostra imperscrutabilitatis sapientiæ divinæ cognitio. Quamobrem nec nocent errores de finibus a Deo intentis & eorum mediis, modo non fingantur, quæ Deum dedeceant, ubi iisdem animadversis ad imperscrutabilitatem sapientiæ divinæ convertimus animum & de ea certiores redditi ad Dei venerationem rapimur.

§. 693.

Immensitas sapientiae divinae.

Sapientia divina immensa est. Etenim sapientia divina summa atque perfectissima est (§. 640.), adeoque eadem majorem concipi repugnat, consequenter limitata esse nequit (§. 825. *Ontol.*). Est igitur illimitata (§. 53. *Ontol.*). Quamobrem cum quantitas limitata non possit fieri illimitata, quotiescunque sumatur (§. 175.); fieri nullo modo potest, ut sapientia limitata quaecunque tandem degeneret in divinam, quotiescunque sumatur, consequenter limitata quaecunque, hoc est, quae inest intellectui finito, divinae prorsus heterogenea est (§. 364. *Ontol.*), adeoque pro mensura divinae assumi haud quamquam potest (§. 441. *Ontol.*). Quamobrem cum praeter sapientiam divinam illimitatam & sapientiam limitatam concipi nulla possit (§. 53. *Ontol.*); nulla prorsus reperiri potest mensura sapientiae divinae. Quoniam itaque immensum est, quod omnem mensuram respuit (§. 41.); sapientia Dei immensa est.

Quodsi quis sibi persuadeat, immensitatem sapientiae divinae facilius patere per imperscrutabilitatem paulo ante evictam (§. 691.); eum animo recolere jubemus, quae supra de immensitate intellectus divini, unde sapientiae pendet immensitas, cum sapientiae immensae non sit locus nisi in intellectu immenso, annotavimus (not. §. 176.). Nimirum vulgo immensitatem nobis representamus per multitudinem eorum, quae in immenso continentur, quatenus refertur ad ea perpauca, quae sub intellectum finitum cadunt; non vero eam concipimus per heterogeneitatem immensi & mensurabilis, quemadmodum fieri debet, ubi non confundenda a se invicem separamus. Sapientia divina est quid prorsus incomparabile sapientiae non modo humanae, sed intelligentis cujuscunque finiti, ut sapientia finita dici debeat infinite parva respectu divinae phrasi Mathematicorum modernorum, adeoque hujus intuitu pro nihilo habenda, quatenus partem quandam sapientiae divinae constituere nequit assignabilem.

§. 694.

Sapientia divina etiam immensa est juxta S. S. eodem sensu, quo nos immensitatem ejus modo adstruximus. Deus a Paulo I. Tim. I. 17. & a Juda vers. 25. dicitur solus sapiens, etsi hominibus quoque tribuitur sapientia in S. S. veluti Salomoni I Reg. IV. 30. 34. Nisi admittere velis contradictionem contra æquitatem in interpretando etiam in humanis (§. 921. Log); fatendum omnino est, ex mente Apostolorum sapientiam divinam esse quid omni sapientiæ entis intelligentis finiti cujuscunque prorsus incomparabile, quemadmodum in genere magnitudinum linea incomparabilis est superficiæ, superficies autem solido, consequenter sapientiam divinam esse omni sapientiæ entis intelligentis finiti cujuscunque heterogeneam, sicuti linea est superficiæ, superficies solido heterogenea (§. 364 Ontol.). Quamobrem cum mensura mensurato homogenea esse debeat (§. 441. Ont.); nulla concipi potest juxta S. S. sapientia, quæ sit divinæ mensura, consequenter divina omnem prorsus mensuram respuit. Quamobrem cum nobis immensum sit, quod omnem mensuram respuit (§. 41.); juxta S. S. sapientia divina immensa est eodem prorsus sensu, quo nos immensitatem ejus modo adstruximus (§. 693.).

Ut imperferutabilitatem sapientiæ divinæ intelligibilem reddat Apostolus iis, qui ultra sensus non sapiunt, adeoque plurimis, eam cum abyssu confert, ejus tanta est profunditas, ut explorari minime possit Rom. XI. 33. Neque enim imago alia immensitatem sapientiæ divinæ magis repræsentat, quam abyssus immensæ profunditatis, in stuporem conjiciens eos, qui eam explorare conantur.

Probatio propositionis præsentis luculento exemplo docet, verba S. S. sensum habere profundum, quem non assequuntur, quotquot in superficie hæreere solent, simulque con-

firmat usum philosophiæ in interpretanda S. S. in qua plus videt philosophus, quam qui a philosophia vacuum habet animum.

§. 695.

*Bonitas
quid sit.*

Per *Bonitatem* intelligimus pronitatem ad aliorum perfectionem promovendam, aut si mavis, promptitudinem promovendi perfectionem alterius. Unde *Bonus erga alios* dicitur, qui pronus est ad aliorum perfectionem promovendam, seu qui se facilem præbet ad eam promovendam.

Notio bonitatis derivatur ex notione boni respectiva. Cum enim bonum in relatione ad aliud dicatur, quod ad perfectionem alterius quid confert, seu in eandem quomodo-
cunque influit (§. 370.); bonus utique erga alios dicendus erat, qui aliorum perfectionem promoveret. Quoniam vero non sufficit actus externus, qui rationes extrinsecas habere potest, etsi animus ab aliorum perfectione promovenda sit alienus; si quidem bonitas animo inesse debet, seu quid spiritui intrinsecum, necesse est denotet pronitatem ad aliorum perfectionem promovendam, ut adeo actus externi ex hoc fonte fluant. Unde qui bonus est erga alios, is se facilem præbet aliis; quoties ejus opem implorant, immo quoties ipsemet animadvertit, se alteri prodesse posse.

§. 696.

*Quenam
facias, qui
erga alios
bonus est.*

Qui bonus est in alios, is aliis bona conferre studet pro virili. Etenim qui bonus est in alios, ad aliorum perfectionem promovendam pronus est, in eaque facilem se præbet aliis (§. 695.), consequenter ad eandem promovendam confert, quicquid potest. Quicquid ad perfectionem alterius quomodo-
cunque facit, bonum est in relatione ad ipsum (§. 370.). Quamobrem cum bona in alios conferat, qui ad perfectionem aliorum promovendam confert quod potest, bonus in alios aliis utique bona conferre studet, quantum potest, seu pro virili.

E gr.

E. gr. ponamus Mævium studioso egeno largiri nummos ad emendos libros, quibus opus habet. Cum in Moralibus ostendatur, opes pertinere ad perfectionem status externi, & scientiam ac eruditionem spectare ad perfectionem intellectus, quin nummorum largitione studiosi perfectionem promoveat Mævius, dubitari haud quaquam potest. Nummi adeo cum inserviant comparandis libris, ex quibus scientiam atque eruditionem haurit studiosus; in ejusdem perfectionem hoc ipso, quem eidem præbent, usu influunt, adeoque boni sunt in relatione ad eundem (§. 370.). Mævius itaque dum se studioso egeno bonum præbet, bonum quoddam in eundem confert, seu eidem benefacit. Inde est, quod vulgo bonus erga alios dicatur, qui aliis benefacit, aut bona in alios confert, cum vulgo notiones non satis explicentur, sed in confusis acquiescantur.

§. 697.

Qui aliis bona pro virili conferre studet, in alios bonus est. *Character boni in alios.*
Qui aliis bona pro virili conferre studet, is ea facit, quantum potest, quæ perfectionem aliorum promovent (§. 370.) adeoque facilem sese præbet aliis in eorum perfectione promovenda. Enimvero qui facilem sese præbet aliis in eorum perfectione promovenda, is in alios bonus est (§. 695.). Quisobrem erga alios bonus est, qui his bona conferre studet.

Patet adeo notionem bonitatis communem tolerari posse, modo supponatur, quid sit bonum in relatione ad alios, ut quid sibi velit boni collatio sufficienter intelligatur, & in casu particulari demonstrari possit, bonum aliquod in alterum fuisse collatum. Exemplum, quod modo dedimus (not. 696.), propositionem præsentem illustrat. Nimirum ex eo colligitur, Mævium esse bonum erga alios, quod studioso egeno nummos ad emendos libros, quibus opus habet, largiatur, quia eidem benefacere censetur. Ast ubi probandum, bonum aliquod a Mævio conferri in eundem, ad notionem boni omnino recurrendum.

§. 698:

§ 698.

*Quantum
boni Deus
conferat in
creaturas.*

Deus enti cuicumque tantundem confert boni, quantum salva sapientia ipsius fieri potest. Cum enim ideo quid sit possibile, quod ejus idea in intellectu divino detur (§. 192.), intrinseca vero possibilitate essentia entis absolvatur (§. 153. *Ontol.*); quod essentia rerum a Deo sint, extra omnem dubitationem positum est. Enimvero in consensu determinationum essentialium continetur perfectio essentialis (§. 528. *Ontol.*). Quamobrem liquet omnem perfectionem essentialem a Deo esse. Et quia Deus rem nullam aliter facere potest, quoad determinationes essentielles, quam facit (§. 557.); tantundem perfectionis essentialis eidem tribuit, quantum recipere valet. Porro modi rerum, qui cum in accidentium numero sint (§. 779. *Ontol.*) ad determinationes accidentales spectant, rationem sui sufficientem in aliis entibus agnoscunt (§. 160. *Ontol.*) & in eorum cum determinationibus essentialibus consensu perfectio accidentalis consistit (§. 528. *Ontol.*). Quamobrem cum Deus ens unumquodque in perfectissima rerum serie collocaverit (§. 326.) & mala, quæ permittit (§. 585.), vi sapientia suæ (§. 677.) in bonum finem dirigat (§. 680.), eaque salva sapientia sua summa atque perfectissima tollere nequeat (§. 676.); tantundem quoque perfectionis accidentalis consequenter boni (§. 370.), tribuit enti cuicumque, quantum salva ipsius, quæ summa est (§. 640.), sapientia fieri potest.

Ut veritatem propositionis præsentis animo comprehendant bonitatis divinæ convincendi singula demonstrationis principia probe perpendant. Nimirum 1. expendant differentiam, quæ inter perfectionem essentialem & accidentalem intercedit, expositam in philosophia prima (§. 528. *Ontol.*). Deinde 2. ad animum revocent essentialium, ac independentem perfectionis essentialis necessitatem & immutabilitatem, ne essentialium arbitrariarum hypothese delusi fingant perfectionem

nem, quæ in entia non cadit finita dati generis dateque speciei. 3. Considerent dependentiam perfectionis accidentalis a nexu rerum in hoc universo, salva totius universi perfectione non immutando. 4. Ad animum quoque revocent mala moralia abusu libertatis in seriem rerum irrepere & 5. a Deo tolerari, quæ salva perfectione totius mundi inde tolli minime possunt; 6. dirigi autem ad bonum finem, ut major insit toti seriei rerum perfectio. Si quis vero vel hebetior fuerit, quam ut tot tamque abstrusa capere possit, vel ignavior, quam ut tantæ rerum discussioni vacare velit; is non miretur, si circa bonitatem divinam tantis difficultatibus implicetur, ut instar nodi alicujus Gordii insolubiles videantur. Ceterum si quis vel obiter hæc omnia ad animum revocet, unde veritas propositionis præsentis pendet; is facile perspiciet, cur in tota Theologia naturali non detur aliquod caput, quod tot tantisque difficultatibus implicitum sit, quam quod de bonitate divina agit. Quoniam vero hinc potissimum tela petunt, quotquot religionem tam naturalem, quam revelatam impugnare solent; sole meridiano clarius est, mereri singula, de quibus diximus, attentionem summam. Liqueat etiam cur non adeo facile sit religionem utramque defendere, præsertim cum ii, qui eandem impugnant, principia non modo ignorare soleant, verum etiam plerumque aut iis intelligendis non sufficiant, aut studium sufficiens impendere renuant. Caveant vero sibi, qui religionem defendere volunt, ne ipsimet impugnent principia, quibus tanquam telis adversus hostes utendum, & ut sumant principia tanquam vera, unde difficultates nascuntur, quas nectunt religionis hostes, nunquam vincendi armis, quibus ipsimet ad prosternendam religionem utuntur. Non intempestive hæc a nobis monentur: ipsimet enim experti sumus, quam multi sint in hoc argumento arduo incauti.

§. 699.

Deus summe bonus est, ita ut bonitatem majorem concipi repugnet. Etenim Deus enti cuicunque tantundem con- Bonitas
(Wolfii Theol. Naturalis) N n n fert ma.

fert boni, quantum salva sapientia ipsius fieri potest (§. 698.). Enimvero qui aliis bona pro virili conferre studet, in alios bonus est (§. 697.), consequenter summe bonus, qui tantundem confert boni, quantum fieri potest. Deus igitur summe bonus est, nec bonitas major divina concipi potest.

Nemo sanus bonitatem ad impossibilia vel physice, vel moraliter talia extendit, sed bonitati minime adversum iudicat, si non fiat, quod physice impossibile est, vel si quis facere nolit, quod moraliter impossibile. E. gr. Physice impossibile est, ut quis egestatem alterius sublevet, qui ipsemet eget aliena ope. Unde bonitati contrarium non reputatur, si egenus non habens, unde opem ferat alteri egenti, eidem non succurrat. Quod si fur indigeat auxilio alterius ad effringendas fores; in bonitatem non peccat qui eundem destituit, cum moraliter impossibile sit, quod iustitiæ repugnat, seu ut iustus faciat, quod virum iustum dedecet.

§. 700.

*Signum
bonitatis*

Qui bonus est in alterum, eundem amat. Qui enim bonus est in alios, is aliis bona conferre pro virili studet (§. 696.). Quamobrem cum lubenter velimus, quicquid volumus (§. 939. *Psychol. empir.*), adeoque ea, quæ volumus, nobis placeant (§. 938. *Psych. empir.*), consequenter ex iis voluptatem percipiamus (§. 542. *Psych. empir.*); qui bonus est in alios, is ex eo, quod aliis bonum est, consequenter ex voluptate aliorum voluptatem percipit (§. 558. *Psych. empir.*). Quamobrem cum alterum amet, qui ex voluptate ejus voluptatem percipit (§. 641. *Psych. empir.*); qui bonus est in alios, is alios amat.

Idem etiam sic ostenditur. Qui in alterum bonus est, is in eundem bona conferre studet (§. 696.). Quamobrem cum ex bono cognitio voluptas percipiatur (§. 558. *Psychol. empir.*); voluptatem ejus appetit. Quoniam itaque alterum amat, qui

qui ejus voluptatem appetit (§. 650. *Psychol. empir.*) ; qui in alterum bonus est, eundem amat.

Inter bonitatem atque amorem adeo arctus nexus est , ut illa sine hoc esse nequeat. Unde si contingit ob rationes particulares nos alterius commoda pro virili promovere , quem non amamus; id bonitati minime tribuendum, quemadmodum jam ante monuimus (not. §. 695.). Nimirum ex amore tanquam fonte suo profluit bonitas : quod ut intelligatur , sequentem addere lubet propositionem.

§. 701.

Qui alterum amat, is erga eum bonus est. Etenim qui *Fons boni* alterum amat , ejus animus dispositus est ad voluptatem eidem *satis* creandam (§. 652. *Psychol. empir.*). Quamobrem cum voluptas in intuitu perfectionis consistat (§. 511. *Psychol. empir.*); dispositum habet animum ad alterius perfectionem promovendam. Quoniam itaque erga alium bonus est, cujus animus est dispositus ad ipsius perfectionem promovendam (§. 695.); qui alterum amat, is erga eum bonus est.

Vides itaque non posse poni amorem, nisi simul ponatur pronitas ad alterius perfectionem promovendam, consequenter bonitas erga eundem. Unde universalis amor omnium promiscue hominum parit quoque bonitatem erga omnes. Hoc ipsum adeo verum est , ut ad ipsas res inanimatas extendatur bonitas , quemadmodum ex propositione sequente intelligitur.

§. 702.

Qui res inanimatas, vel animantia bruta amat; is erga Bonitas ea bonus est. Etenim qui res inanimatas vel animantia bruta *erga bruta* amat, is tam ad illarum, quam horum perfectionem promovendam pronus est (§. 655. 656. *Psychol. empir.*). Quare cum *animatas* bonitas in pronitate ad alterius perfectionem promovendam

consistat (§. 695.); non minus erga res inanimatas, quam animantia bruta bonus est.

Ne circa bonitatem erga res inanimatas & animantia bruta scrupuli suboriantur, relegenda sunt, quæ de pronitate ad promovendam perfectionem rerum inanimatarum & brutorum animantium in medium alias attulimus (§. 655. 656. *Pfychol. empir.*).

§. 703.

Signum *Qui bonus est erga animantia bruta vel res inanimatas, is amoris re-* non minus has, quam illa amat. Cum bonitas in pronitate ad *rum inani-* perfectionem alienam promovendam consistat (§. 695.), qui *matorum* bonus est erga animantia bruta vel res inanimatas, is pronus *Et bruto-* est tam ad illorum, quam harum perfectionem promovendam. *rum.* Quamobrem cum ex intuitu perfectionis voluptas enascatur (§. 511. *Pfychol. empir.*); animum dispositum habet ad voluptatem ex ipsis percipiendam, & brutis voluptatem, quæ in ea cadit, creandam. Enimvero amor rerum inanimatarum est dispositio animæ ad voluptatem ex ipsis percipiendam. Quodsi animantia bruta iisdem æquiparamus, quatenus ea consideramus non tanquam voluptatis capacia, sed tanquam ea, unde voluptas percipi potest; amor eorum idem est, qui rerum inanimatarum, consequenter in dispositione animæ ad voluptatem ex ipsis percipiendam consistit. Quodsi vero eadem hominibus æquiparamus, amor eorum idem est, qui hominum (§. 657. *Pfychol. empir.*), consequenter in dispositione animæ ad voluptatem iisdem creandam consistit (§. 652. *Pfychol. empir.*). Pater itaque eum, qui erga animantia bruta & res inanimatas bonus est, non minus hæc, quam illa amare.

Quemadmodum amor rerum inanimatarum, ita etiam bonitas erga easdem aliquid fictitii admittit, quatenus scilicet eas fingimus veluti voluptatis capaces. Fictio autem hæc ad

adeo naturalis est, ut, qui boni deprehenduntur erga alios, etiam quasi tales se præbeant rebus inanimatis. Sed ea de re plura trademus in philosophia morali. Hic sufficit notasse, quod ex bonitate recte colligatur amor, quemadmodum vicissim ex amore bonitas.

§. 704.

Deus amat entia omnia, quæ ut existerent decrevit, seu Amoris quæ fecit. Etenim Deus summe bonus est, ita ut major boni-divini ob-
tas concipi non possit (§. 699.), cumque enti cuicunque tan-jedum.
tundem boni conferat, quantum salva sapientia ipsius fieri potest (§. 698.), erga omnia entia bonus est, quæ fecit, seu, quod perinde est, quæ ut existerent decrevit, siue fuerint animata, siue inanimata, siue rationis capacia, siue expertia. Enimvero non modo qui bonus est in alios, eosdem amat (§. 700.); verum etiam qui erga res inanimatas & animantia bruta bonus est tam illas, quam hæc amat (§. 703.). Deus igitur entia omnia, quæ fecit, seu, quæ ut existerent decrevit, siue animata fuerint, siue inanimata, siue rationis capacia, siue expertia, amat.

Patet adeo universalitas amoris divini ad omnes ipsius creaturas extensi. Cum vero differentia intercedat inter amorem entium ratione præditorum & rationis expertium & inter amorem rerum animatarum & inanimatarum (§. 657. *Psychol. empir.*); nemo non videt, Deum entia omnia non eodem complecti amore, & maxime quidem ac proprie amare entia rationis capacia veluti homines. Difficultates, quas objicit malum morale, cui homines obnoxii fiunt, dispallescent per sequentia.

§. 705.

Quoniam, qui alterum amat, ex ejus felicitate voluptatem *Animus* percipit (§. 633. *Psychol. empir.*); Deus vero amat entia ratio *Dei erga*
nis capacia, adeoque homines propriissimo sensu (*not. §. 704.*) *homines.*

Deus quoque ex hominum ac in genere entium rationis capacium felicitate voluptatem percipit.

§. 706.

Felicitas *Deus hominum & in genere creaturæ rationalis cujuscun-*
entis ratio. que felicitatem vult. Etenim voluptatem percipit ex felicitate
nalis obje- hominum & eorum, quæ rationis capacia sunt (§. 705.). Quam-
um volun- obrem cum ea placeant, ex quibus voluptas percipitur (§. 542.
tatis di- *Psychol. empir.*); felicitas hominum & in genere creaturæ cujusli-
vine. bet rationalis Deo placet. Jam voluntate libera eligitur quod
 placet (§. 941. *Psychol. empir.*). Quoniam itaque voluntas Dei
 liberrima est (§. 431.); quin Deus velit, homines & creaturas
 rationales esse felices dubitari nequit.

Hæc propositio probe notanda est, erit enim nobis usui in
 demonstranda obligatione divina ad actus juri naturali con-
 formes.

§. 707.

Cur infeli- *Deus infelicitatem hominum & in genere entis rationalis*
citatem vel- *cujuscunque velle nequit.* Etenim vult felicitatem hominum &
le nequeat entis rationalis cujuscunque (§. 706.). Quoniam vero impos-
Deum. sibile est ut idem simul velit & non velit (§. 28. *Ontol.*); nec fieri
 potest ut eorum felicitatem non velit. Patet autem per se eum,
 qui vult infelicitatem alicujus, non velle felicitatem ejusdem.
 Quamobrem Deus infelicitatem hominum & in genere entis ra-
 tionalis cujuscunque velle nequit.

Patet adeo seriam esse voluntatem Dei, qua vult entia fe-
 licitatis capacia esse felicia; non vero simulatam. Manifesto
 enim ostendimus, Deum velle felicitatem hominum & in ge-
 nere entis cujuslibet rationalis, & nolle eorundem infelicitate-
 tem, minime vero, quod tantum videri velit, quasi illorum
 felicitatem desideret, etsi eorundem infelicitatem intendat. Cur
 tamen hoc non obstante homines fiant infelices, ex iis, quæ
 mox sequuntur, intelligitur.

§. 708.

§. 708.

Homines fiunt infelices abusu libertatis. Homi- *Infelicitas*
 nes infelices fiunt ob malum morale, quippe quod inhæret *hominum*
 actionibus liberis (§. 374.) ad imperfectionem agentis statusque *unde fit.*
 ejus tendentibus (§. 371. *Theol. natur. & §. 568. Ppsych empir.*),
 unde tædiis ac molestiis afficitur animus (§. 518. *Ppsych. empir.*),
 consequenter infelix fit homo (§. 637. *Ppsychol. empir.*). Quam-
 obrem cum malum morale abusu libertatis irrepit in actiones
 liberas (§. 580.); homines quoque abusu libertatis infelices
 fiunt.

Idem etiam sic ostenditur. Malum morale irrepit abusu
 libertatis in actiones liberas (§. 580.). Quamobrem cum
 ex malo tædium percipiamus, quam primum illud co-
 gnoscimus (§. 569. *Ppsych. empir.*), idemque constans (§. 571.
Ppsychol. empir.), & quicquid homini tædium creat, ad in-
 felicitem ejus quiddam conferat (§. 639. *Ppsych. empir.*), con-
 sequenter malum morale homines infelices reddat; homines
 abusu libertatis infelices fieri patet.

Atque hinc patet non Deo, sed sibi tribuere debere ho-
 mines, si sint infelices. Vult enim Deus ut sint felices; dum
 vero libertate sua abusi actiones suas aliter quam juxta volun-
 tatem Dei determinant, semetipsos reddunt infelices. Velim
 hæc probe perpendant, qui in bonitatem Dei injuriâ infelici-
 tatis culpam in Deum conjiciunt.

§. 709.

Quoniam homines fiunt infelices abusu libertatis suæ (§. *Bonitas*
 708.), Deus vero ipsorum infelicitatem non vult (§. 707.); *ex Dei de-*
eo, quod homines sint infelices, colligi nequit, quasi Deus erga fensa.
ees non sit summe bonus.

Noto notius est, ex infelicitate hominum argumentum peti
 adver-

adversus bonitatem Dei ab iis, qui vel existentiam Dei, vel religionem impugnant; sed quam minus recte ex demonstratis liquet. Ne tamen quicquam difficultatis relinquatur, quæ ad dilucidandum hoc argumentum facere possunt, ulterius explorare lubet. Ceterum in humanis patet, quod infelicitas alicujus non obstat bonitati alterius erga ipsum. Ponamus enim Mævium impense amare Titium, atque adeo ex felicitate ejus voluptatem percipere (§. 633. *Psychol. empir.*). Quin felicitas Titii Mævio placeat (§. 542. *Psychol. empir.*), atque is velit ipsum esse felicem, minime autem infelicem, dubitandum non est (§. 937. *Psychol. empir.*). Quodsi Titius dictis Mævii aurem benignam præbere renuit & ex actionibus malis perpetratis semetipsum infelicem reddit; hoc sane non obstat, quo minus Mævius bonus erga Titium dici possit, etiam si maxime improbet, quæ fecit Titius, & ipsum pœnam dare promeritam factis suis pronunciat. Ponamus jam porro Mævium esse patrem, Titium filium. Utatur Mævius jure paterno & sub pœnæ comminatione interdicat Titio actione, quæ ipsum reddit infelicem, propterea quod infelicitatem ab eo avertere studet, immo ubi inobedientem se præstat, exequatur pœnam, quam comminatus est. Ecquis non inde colligit summam Mævii erga Titium bonitatem? Quodsi vero Titius filius refractarius & in parentem injurius a Mævio exhæredatur, ut non habeat, quæ prodigere possit; ex eo contra bonitatem Titii erga liberos suos argumentum peti nequit. Titius enim infelix est culpa sua, non culpa parentis: nec ideo bonitatis patris erga Titium quicquam decedit, quod promeritum jure filii privet, non plus tribuens amoris, quam quod cum ratione fieri potest.

§. 710.

*Potentia
libertate
abutendi
quale sit
malum.*

Potentia libertate abutendi est malum metaphysicum.
Cum enim potentia libertate abutendi dicat eadem abutendi possibilitatem (§. 716. *Ontol.*), ratio vero sufficiens eorum, quæ vel actu insunt, vel inesse possunt, in essentia rei contineatur (§. 168. *Ontol.*); quin per essentiam hominis fieri possit, ut libertate

bertate sua abutatur pater, Quoniam vero abusu libertatis homo malis moralibus obnoxius fit (§. 580.), quæ perfectioni essentiali contrariantur (§. 578.), & in imperfectione accidentali consistunt (§. 577.); homo per essentiam & naturam suam imperfectior censetur, quam foret, si libertate abuti minime posset, seu si potentia libertate abutendi in eum non caderet. Quamobrem cum malum metaphysicum sit, quod per essentiam & naturam suam rem imperfectiorem reddere censetur, quam foret si abesset (§. 372.); potentia libertate abutendi est malum metaphysicum.

Quodsi originem mali jam explicassemus, potentiam libertate abutendi ex limitationibus determinationum essentialium deducere licuisset, in quibus malum metaphysicum consistere constat (§. 372.). Ceterum probe notandum est, quale malum sit potentia illa abutendi libertate, fons omnis moralis ac per hoc omnis miseriæ, ne Deo tribuamus, quod est hominum, & ne bonitati divinæ contrariari judicemus, quæ cum eadem minime pugnant. Fingere ideas rerum pro arbitrio & ex iis iudicium ferre de bonitate Dei aliisque ejus attributis a vera philosophandi methodo alienum est, & ab ipsa ratione abhorret.

§. 711.

Potentia abutendi libertate ne per miraculum quidem ab homine auferri potest. Est enim malum metaphysicum (§. 710.). *An tolli possit.*
Sed malum hocce ne per miraculum quidem ab ente ullo auferri potest (§. 381.). Quamobrem potentia abutendi libertate ne per miraculum quidem ab homine auferri potest.

Idea igitur hominis, in quam libertate abutendi potentia minime cadit, est fictitia. Unde revera homo propter istam potentiam non potest dici imperfectus, nisi in relatione ad ideam hominis fictitiam. Neque enim fieri potest, ut homini, hoc est, huic enti, cui hominis nomen imposuimus, istius-

(Wolffii Theol. Naturalis)

O o o o

modi

modi conveniat perfectio essentialis, quæ potentiam abutendi libertate excludit.

§. 712.

Quomodo
spectetur
in decreto
divino.

Potentia abutendi libertate inhæsit ideæ hominis ante decretum, nec per hoc ab eadem separari potuit: ob eam tamen Deus existentiam hominis minime decrevit. Potentia libertate abutendi est malum metaphysicum (§. 710.). Enimvero malum metaphysicum per se ante decretum rebus decretis inhæsit, nec ab iis per idem separari potuit (§. 546.); Deus tamen ob ipsum rem nullam decrevit (§. 547.). Quare potentia libertate abutendi inhæsit ideæ hominis ante decretum, nec per hoc ab eadem separari potuit, ob eam tamen Deus existentiam hominis non decrevit.

Propter potentiam abutendi libertate Theologi hominem dicunt labilem: unde patet, hominem non factum esse labilem per decretum divinum, sed Deum eundem spectasse ut labilem, antequam ejus existentiam decerneret, seu antecedenter ad decretum suum, neque ejus existentiam decrevisse, propterea quod labilis erat. Aliæ igitur fuere ipsi rationes, cur decerneret existere debere hominem, & cur decretum non mutaret, etsi penderet eum posse labi.

§. 713.

Abusus li-
bertatis
præscibili-
tas & præ-
scientia.

Deo abusus libertatis præscibilis fuit ab æterno, eundemque ab æterno præscivit. Ex enim abusu libertatis mala moralia irrepunt in hanc rerum seriem (§. 580.). Quamobrem cum Deus mala moralia præsciverit ab æterno (§. 587.) & vi omniscientiz suæ (§. 302.) non minus ab æterno (§. 319.) noverit, mala moralia abusu libertatis in hanc rerum seriem inductum iri (§. 301.); Deus ab æterno præscivit hominem libertate sua abuturum. *Quod erat unum.*

Enim-

Enimvero quod actu præscitum post decretum, id præscibile fuit ante decretum (§. 528.). Quamobrem cum abusus libertatis fuerit actu præscitus *per demonstrata*, quatenus scilicet per decretum divinum factus est futurus (§. 522.); ante decretum spectari utique debet tanquam præscibilis. *Quod erat alterum.*

Nimiram antequam concipiamus a Deo fuisse decretam existentiam hujus seriei rerum, Deus prævidit hominem abuturum esse libertate sua, siquidem hanc ipsam rerum seriem ad actum perduceret. Postquam vero decrevit, hanc rerum seriem omnipotentia sua ad actum deducendam esse; actu quoque ipsi perspectum fuit; hominem libertate sua abuturum. Unde patet, in quantum præscientia abusus libertatis seu lapsus, quem Theologi appellant, pendeat a decreto.

§. 714.

Deus abusum libertatis permittere sapientissime decrevit. Permissio
Etenim Deus malum morale permittere decrevit (§. 585.). *abusus libertatis.*
Quamobrem cum idem abusu libertatis irrepat in actiones libertatis (§. 580.); abusum libertatis permittere utique decrevit. *Quod erat unum.*

Porro constat Deum mali moralis permissionem sapientissime decrevisse (§. 644.). Quoniam itaque abusum libertatis ideo permittere decrevit, quod malum morale permittere voluit *per demonstrata*; abusum quoque libertatis sapientissime permittere decrevit. *Quod erat alterum.*

Recolenda hic animo, sunt, quæ de malis moralibus finibus in hac rerum serie a Deo intentis ita implicitis, ut eorundem & finis ultimi subordinatio eo, quo nunc, modo iisdem ablati non amplius fieri possit, demonstrata sunt (§. 674.), una cum iis, quæ de directione malorum physicorum & moralium in bonum finem prolixè discutiuntur (§. 680 & seqq.). Hoc pacto enim plenissime convinceris, permissionem ab-

usus libertatis esse sapientiæ divinæ maxime conformem. Patet vero per propositionem præsentem, Deum sapientissime decrevisse permissionem lapsum Adami, etsi cum per miraculum impedire potuisset (§. 716.).

§. 715.

Abusus libertatis ad um perfectissimus, nec salva perfectione mundi ac sapientia Dei impediri potest. Sublato enim malo morali ex tota hac rerum serie, ipsa hæc rerum series permanere nequit omnium perfectissima (§. 556.). Enimvero cum abusu libertatis malum morale irrepit in actiones liberas (§. 580.), abusu libertatis sublato malum quoque morale tollitur. Abusu igitur libertatis sublato hæc ipsa rerum series permanere nequit omnium perfectissima, consequenter abusus libertatis impediri nequit salva summa ejusdem perfectione.

Porro Deus salva sapientia sua summa atque perfectissima mala moralia ex hac rerum serie tollere nequit (§. 676.). Unde consequitur ut ante Deum salva sapientia, quæ ipsi est, summa atque perfectissima abusum libertatis impedire minime posse.

Denique malum morale non obstat, quo minus in mundo, qui existit, major sit perfectio, quam in ceteris possibili- bus (§. 550.). Quoniam itaque abusu libertatis in actiones liberas irrepit (§. 580.); nec abusus libertatis ob stare potest, quo minus in mundo toto major sit perfectio, quam si is impediretur.

Patent hinc rationes, cur Deus abusum libertatis permittere decreverit, etsi non velit hominem libertate sua abuti. Quod si cui non satisfaciant, defectus evidentia in causa non est, sed potius defectus familiaritatis illorum principiorum, quæ passim de malo morali inculcavimus. Quamobrem si quis capere velit, quomodo abusus libertatis cum summa mundi perfectione consistere possit, & cur sapientiæ Dei conveniat

veniat eundem potius permitti, quam impediri; eidem suademus ut anteriora probe meditetur, aut suum de re sibi nimis ardua & inaccessa iudicium suspendat, ne inscius causam hostium religionis adversus Deum agat: id quod accidere solere pro comperto habeo.

§. 716.

Abusus libertatis a Deo impediri nequit nisi per miraculum, quando scilicet homo aliquis libertate sua actu abutitur. Quomodo
 Ponamus enim Davidem adulterium committere cum Bethsaba. Nemo non novit, quod is adulterium sibi in hoc casu
 repræsentet tanquam bonum jucundum (§. 561. *Psych. empir.*), *abusus libertatis a Deo impe-*
 ac ideo ipsum appetat (§. 904. *Psychol. empir.*), *diri possit.*
 tate sua, quatenus per eam bonum jucundum honesto præfert (§. 941. *Psychol. empir.*). Quodsi jam Deus hunc libertatis abusum impedire debuisset, actum appetitionis in actum aversionis sua omnipotentia, qua facere potest quicquid intrinsece possibile (§. 343.), determinare debebat. Quoniam itaque per se patet aversionis rationem sufficientem in natura animæ Davidis non contineri, consequenter nec in vi repræsentativa universi, in qua natura animæ consistit (§. 67. *Psychol. ration.*), supernaturale vero in anima est, cujus ratio sufficiens in vi repræsentativa universi non continetur (§. 70. *Psych. rat.*); erit aversio adulterii in eo casu supernaturalis. Est vero miraculum in anima, quod in eadem supernaturale est (§. 71. *Psychol. ration.*). Quamobrem & aversio adulterii in hoc casu miraculum in anima est. Atque adeo patet, abusum libertatis a Deo impediri non posse nisi per miraculum. Quodsi supponas, stante appetitione adulterii, a Deo imediri motus in corpore, qui ad explendum animæ desiderium requiruntur, seu, quod perinde est, quibus adulterium consummatur, quocunque tandem modo commercium inter animam & cor-

pus explices, in corpore accidit quidpiam, cujus ratio sufficiens in essentia & natura ejus non continetur. Quamobrem cum status iste corporis supernaturalis miraculum sit (§. 510. *Cosmol.*); consummatio quoque adulterii, manente appetitione impediri nequit nisi per miraculum, consequenter nec abusus libertatis a Deo impeditur nisi per miraculum. Quoniam itaque abusus libertatis aliter impediri nequit, nisi vel in anima a Deo appetitio mutetur in aversionem, aut aversio in appetitionem, vel in corpore status, qui respondet appetitioni, mutetur in eum, qui aversioni convenit & contra; utrumque vero fieri nequit, nisi per miraculum; abusum libertatis a Deo impediri non posse nisi per miraculum patet.

Si cui dubium oritur, num actus supernaturalis in anima, veluti appetitio vel aversio supernaturalis, miraculum dici possit; eundem animo recolere jubemus, quæ ad idem tollendum alibi jam notavimus (*not. §. 71. Psych. rat.*). Ceterum modus, quo abusus libertatis in casu quocunque particulari impediri potest, probe notandus, ne facile prætendamus, ut Deus eundem impediatur, cum miraculum multas post se trahat mutationes (§. 531. *Cosm.*). Quodsi quæsieris, ubi in dato quodam casu particulari per miraculum abusus libertatis a Deo tolli supponitur; num Deus in anima potius, quam in corpore miraculum patret, an in utroque; mihi quidem probabilius est, quia in unaquaque anima datur quædam series perceptionum & aversionum (§. 524. *Psychol. ration.*), cui series quædam motuum in corpore respondet (§. 539. 540. *Psychol. ration.*), miraculum in anima patrari, in systemate autem harmoniæ præstabilitæ in anima & corpore simul (§. 642. *Psychol. ration.*).

§. 717.

An impedire abusum libertatis per

Non decet Deum abusum libertatis per miraculum impedire. Etenim abusus libertatis sapientia Dei salva impediri nequit (§. 715.): immo cum idem impediri non possit salva perfectione.

fectione mundi (§. cit.), ipsa vero hæc perfectio, vi cuius hic *miraculum* mundus, utpote omnium possibilium perfectissimus (§. 326.), *Deum de-* optimus est (§. 370.), in causa sit, cur ejus electio sit signum *ceat.* spiritus perfectissimi (§. 402.) & potentissimi (§. 403.), adeoque Dei (§. 387. 349), & Deus summam sui ipsius perfectionem per existentiam hujus universi patefacere intenderit (§. 629.), salva divinitate Dei impediri non potest. Quamobrem cum Deum deceat, cuius aliqua ratio in essentia & attributis ipsius continetur, cur id potius velle debeat quam aliud (§. 332.), consequenter non deceat, cuius in iisdem aliqua continetur ratio, cur id potius nolle, quam velle debeat; patet Deum non decere, ut per miraculum abusum libertatis impediat.

Loquimur hic de impeditioe universali abusus libertatis, non vero de particulari. Cum enim simpliciter non repugnet, ut Deus per miraculum seriem rerum immutando mutet in meliorem (quod num & quando fieri possit, ipsius omniscientiæ ac sapientiæ summæ relinquendum); ita nec dici simpliciter potest, quod non detur in hac serie rerum casus quidam particularis, ubi impeditio abusus libertatis miraculosa facit ad maiorem hujus universi perfectionem. Sed quoniam nobis a priori judicare non datur, num istiusmodi casus obtingere possit; quotiescunque abusum libertatis a Deo non impediri observamus, id salva ipsius divinitate fieri non posse dicendum est. Absit autem, ut quis inde inferat necessitatem mali moralis absolutam. Neque enim absolute necessarium est, ut ens ratione præditum agat, quod se deceat, sed ex ipsa libertatis notionem fluit. Sane nemo nostrum actiones proprias absolute necessarias pronunciat, quod easdem malit, quam oppositis, quia illas se se decere, has vero dedecere cognoscit. Qui ad antecedentia, quæ passim demonstrata sunt & per modum principiorum proximorum ac remotorum in demonstrationem propositionis præsentis influunt, animum advertit; ei ducunt minime videbitur, quod Deus salva divinitate sua abusum libertatis impedire non possit, universaliter scilicet, seu omni eo in casu, ubi eundem

non

non impediri experimur. Sane Deus mundum facere decrevit, ut summam sui ipsius perfectionem patefaceret (§. 629.). Hunc finem consecuturus mundum facere debebat huic fini convenientem, siquidem se sapientissimum probare vellet (§. 689. *Psychol. ration.*). In hac serie rerum collocatur homo, qui libertate sua abuti poterat & quem libertate sua abusurum praevidebat Deus, siquidem hic mundus produceretur (§. 713.). Aut igitur a proposito suo prorsus desistere, aut abusum libertatis permittere debebat. Quamobrem cum Deum non deceat velle finem, & nolle media, ac media fini convenientissima rejicere, nec perfectionem suam patefacere tanquam summam, sine qua divinitas concipi nequit (§. 387.); omnino dicendum est abusum libertatis salva divinitate, hoc est, summa Dei perfectione non potuisse impediri.

§. 718.

An Deus
hominem
illabilem
potuerit
facere.

Deus non potuit hominem facere absque potentia abutendi libertate sua. Etenim Deus creaturam nullam absque malo metaphysico producere valet (§. 380.). Quamobrem cum potentia abutendi libertate sua sit malum metaphysicum (§. 710.); nec sine potentia libertate abutendi hominem facere potest.

Idem etiam sic ostenditur. Ponamus Deum hominem absque potentia abutendi libertate facere posse. Per se patet, quod potentia abutendi libertate, quam eidem inesse constat (§. 170. *Ontol.*), auferri possit: quod cum sit absurdum, quia ne per miraculum quidem ab homine auferri potest (§. 711.), dicendum omnino est Deum non posse hominem facere absque potentia abutendi libertate sua.

Notandum est nobis hic esse sermonem de homine, qui terram incolit: de eo utique affirmandum, quod Deus, quemadmodum Theologi loquuntur, eum illabilem facere minime potuerit. An vero per ideas in intellectu divino existentes possibile sit aliquod hominum genus, quod sit illabile,

bile, jam non definitio. Qui fingunt hominem hunc ipsum, qui terram inhabitat, potuisse a Deo fieri illabilem; sumunt, quod probare nesciunt, potentiam abutendi libertate sua per decretum in ideam hominis invehiri, cum ex eadem exulare potuisset. Enimvero cum hic error ex hypothesei essentiarum arbitrariarum tanquam ex fonte suo profluat, quam in superioribus jam profligavimus, ut contra eundem dispute-
mus opus non est. Indicandus tamen est fons erroris, ut intelligatur, cur principia genuina videantur suspecta, & probentur ea, upde nascuntur difficultates in doctrina de bonitate Dei. Sane qui sumunt Deum potuisse facere hominem illabilem, fecisse tamen labilem, docere nequeunt, quomodo hoc cum bonitate Dei consistat. Non vero est quod metuas impossibilitatem faciendi hominem absque potentia abutendi libertate arguere in Deo defectum potentiae: metum enim hunc jam excussimus, ubi demonstravimus impossibilitatem faciendi mundum absque malo metaphysico non minuire omnipotentiam divinam (§. 378.). Homo, de quo nobis sermo est, absque potentia libertate sua abutendi, aut, si mavis, illabilis, est in numero eorum, quae infactibilia dicit D. Thomas & quae adeo in se talia sunt, ut fieri non possint. Potentia vero supponit possibile esse, quod fieri debet (§. 343.), ad impossibilia non extendenda (§. 344.).

§. 719.

Quoniam quod possibile est, id ideo non existit (§. 171. *An abusus Ontol.*); ideo homo non abutitur libertate, quod eadem abusi libertatis potest, consequenter cum posita ratione sufficiente ponatur id, ratio sufficiens sit quod propter eam potius est, quam non est (§. 118. *Ontol.*), posita autem potentia abutendi libertate nondum ponatur abusus ejusdem per demonstrata; potentia abutendi libertate non abutendi, est ratio sufficiens ipsius abusus.

Non desunt, qui ubi audiunt Deum non potuisse ab homine auferre potentiam abutendi libertate, nec absque eadem eundem facere, hinc inferunt, quod homo necessario libertate sua abusus fuerit, vel etiamnum abutatur: enimvero non animadvertunt, se a potentia ad actum nulla consequentia argumen-
(*Wolfii Theol. Naturalis*) P p p p tati,

rari, consequenter consequentiam, qua thesin impugnant, fingere, quæ non datur.

§. 720.

*Num neces-
sitas insit
abusui li-
bertatis.*

Potentia abutendi libertate absolute necessaria est; ipse autem abusus absolute necessarius non est. Etenim potentia abutendi libertate malum metaphysicum est (§. 710.). Sed malum metaphysicum est absolute necessarium (§. 375.). Ergo & potentia abutendi libertate absolute necessaria est.

Ponamus jam necessitatem absolutam inesse quoque ipsi actui abusus libertatis. Quoniam necessitas absoluta est, quæ ex essentia oritur (§. 315. *Ontol.*), & absolute necessarium est id, cujus in se spectari oppositum impossibile (§. 302. *Ontol.*); per essentiam & naturam hominis, aut, si mavis, animæ humanæ impossibile est, ut libertate sua non abutatur, consequenter ad abusum per essentiam & naturam suam determinata est (§. 112. *Ontol.*). Inhzret autem malum morale, quod abusu libertatis irrepit in actiones hominis (§. 580.), actionibus liberis ejusdem (§. 374.). Quamobrem homo quoad actiones liberas per essentiam animæ ad alterutrum oppositorum determinatus est: quod cum notioni libertatis animæ in volendo ac nolendo competentis (§. 942. *Psychol. empir.*) repugnet (§. 941. *Psychol. empir.*), abusus libertatis absolute necessarius esse nequit.

Idem etiam sic ostenditur. Cum abusu libertatis malum morale irrepit in actiones hominis (§. 580.), actiones autem ejus malæ sint, quæ ipsum statumque suum imperfectiorem reddunt (§. 565. *Psychol. empir.*); homo libertate sua abutens ea appetit, quæ ipsum statumque suum imperfectiorem reddunt, vel averfatur, quæ ipsum statumque suum reddunt perfectiorem, consequenter appetit quod verum malum est (§. 568. *Psychol. empir.*), averfatur quod verum est bonum (§. 557. *Psychol. empir.*). Enimvero quoties quid appetimus, id nobis repræsentamus tanquam bonum; quoties quid averfemur,

mur, tanquam malum (§. 892. 893. *Psychol. empir.*). Quamobrem cum libertate abutimur, quod verum malum est, nobis repræsentamus tanquam bonum; quod verum bonum est, nobis repræsentamus tanquam malum; saltem quod ut malum cognoscimus, idem certo respectu bonum existimamus quoad nos, & quod ut bonum cognoscimus, idem certo respectu malum reputamus quoad nos, consequenter libertate abutimur, quod bonum verum & apparens (§. 557. *Psych. empir.*), nec non malum verum atque apparens a se invicem non distinguamus (§. 568. *Psychol. empir.*). Non minus ex universa Logica, quam ex iis, quæ de facultatis cognoscendi parte superiori tam in Psychologia empirica, quam rationali docentur & in philosophia practica demonstrabuntur, constat non absolute impossibile esse, ut bonum verum ab apparente & malum apparens a vero discernamus, aut saltem cognoscamus, nos in dato casu id facere minime posse; consequenter libertate non abutamur. Quamobrem cum id absolute necessarium non sit, cujus oppositum impossibile non est (§. 279. *Onsol.*); nec abusus libertatis absolute necessarius est.

Probe hinc notandum, nobis nunc non esse sermonem de eo, num abusus libertatis facile evitari possit in omni casu; sed num prorsus impossibile sit & quidem absolute, ut evitetur eo in casu, quo eadem abutimur; plurimum enim differt abusum libertatis prorsus evitare non posse & eundem subinde difficulter evitare posse. Impossibilitas absoluta evitandi abusum libertatis in omni casu, quo eadem abutimur, tollit libertatem; at difficultas eundem subinde evitandi cum eadem consistit. Neque hic sermo est de eo; num in quibusdam casibus vel pro certo hominum nonnullorum statu abusus libertatis pro necessario reputari possit, cum hæc necessitas tantummodo hypothetica sit, minime vero absoluta. Sufficit itaque essentiam atque naturam hominis in se spectare.

tam eam reperiri, ut abusus libertatis eidem necessario minime conveniat. Nimirum hæc sufficiunt ad veritates revelatas de hoc libertatis abusu defendendas & factorum in S. S. revelatorum probabilitatem intrinsecam agnoscendam. Nostrum non est, ea hic docere apertius, ne alienæ segeti falcem immittere velle videamur. Quodsi quis, quæ a nobis dicuntur, ad ea applicare voluerit, quæ de statu integritatis, lapsuque Adami & peccato originis docentur, is satis intelliget immunitatem abusus libertatis ab absoluta necessitate, qualem evicimus, abunde sufficere ad eorum rationem reddendam, modo distinctas factorum in S. S. enarratorum notiones habuerit, ad quas perveniri datur ope nostrorum principiorum ontologicorum & psychologicorum usus experti in notionibus S. S. evolvendis.

§. 721.

*An Deus
hunc mun-
dum abs-
que homi-
nibus face-
re potuerit.*

Deus non potuit facere hunc mundum absque hominibus, qui in eodem existunt. Etenim cum constet, homines, qui nunc existunt, per continuas generationes descendisse ab illis, qui ante extiterunt; nemo non videt, si præsentæ ævo nulli existere deberent homines, nec anterioribus in eodem locum fuisse concedendum, anterioribus autem non existentibus nec eos, qui nunc vivunt, exituros fuisse. Ponamus duos tantummodo fuisse homines, quemadmodum refert S. S. a quibus totum descendit genus hominum, quod hunc globum terraqueum inhabitat. Si primo isti hominum pari non fuisset locus in Tellure, nec generi humano ullo tempore esset in eadem locus. Quodsi ergo Deus hunc mundum facere voluisset absque hominibus, qui globum nostrum terraqueum incolunt; primos illos humani generis parentes producere non debebat. Quodsi ergo cogitemus eos non fuisse a Deo creatos, materia, ex qua facta sunt ipsorum corpora, cum pertineat ad hunc mundum, alii corpori formando inservire, aut alterius corporis formam induere debebat, aut si eos factos sumas ex materia
ad

ad mundum præsentem minime pertinente, in hanc rerum seriem aliquid intrusum, quod ad eam minime spectabat. Enimvero si contingens unum, quod in mundo contingere debet, mutari ponatur in contrarium, vel in seriem rerum aliquid introduci supponatur, cujus actus per præcedentia non determinatur; sequens mundi pars non amplius erit eadem, quæ alias futura erat (§. 116. *Cosmol.*). Quamobrem si hominibus non concedatur in mundo locus; nec amplius mundus, quatenus est series rerum successivarum (§. 55. *Cosmol.*), idem qui nunc erit. Quod si itaque ponas Deum hunc producere voluisse mundum; evidens est quod absque hisce hominibus eundem producere minime potuerit, qui in eodem existunt.

Idem etiam sic ostenditur. Mundus ens unum est (§. 60. *Cosmol.*) ac totum aliquod, cujus partes sunt entia singula in eodem vel simul, vel successive existentia (§. 61. *Cosmol.*), consequenter etiam homines, qui terram inhabitant, & quidem hi ipsi, qui eandem inhabitant. Enimvero essentia mundi consistit in modo, quo res finitæ datæ, non aliæ inter se connectuntur (§. 59. *Cosmol.*). Quamobrem per essentiam mundi hi, qui in globo terraqueo existunt, homines ad eundem pertinent. Essentia vero rerum sunt immutabiles (§. 300 *Ontol.*), adeoque essentia entis compositi (§. 533. *Ontol.*), consequenter etiam mundi (§. 62. *Cosmol.*), non aliæ, quam hæ partes esse possunt, & hinc nec in hoc mundo aliis terricolis locus est, quam qui in eodem existunt, neque locus in eodem, quem tenent, iisdem negari potest. Quamobrem si supponas Deum facere voluisse hunc mundum, non alium; hos quoque homines facere debuit, consequenter fieri non potuit, ut faceret hunc mundum absque hominibus, qui in eodem existunt, veluti juxta S. S. absque Adamo & Eva, unde descendit totum genus humanum.

Potest etiam ostendi hoc modo. Corpora, ex quibus

stat hic mundus adspectabilis, sunt substantiarum simplicium (§. 176. *Cosmol.*), adeoque elementorum aggregata (§. 182. *Cosmol.*), nihilque in mundo materiali datur substantiale præter entia simplicia (§. 177. *Cosmol.*) seu elementa (§. 182. *Cosmol.*). Corpora igitur in hoc mundo adspectabili oriuntur, quatenus elementa certo quodam modo coëxistunt. Quare cum eadem elementa alio modo coëxistere nequeant (§. 571. *Cosmol.*), & si alius existere deberet mundus, elementa alia existere deberent (§. 570. *Cosmol.*); in hoc mundo adspectabili ea præcise dentur necesse est corpora, non alia, nec aliqua eorum ex eodem abesse possunt. Quoniam itaque experientia seu a posteriori constat, in hoc mundo adspectabili existere homines hosce, non alios; evidens omnino est hosce præcise homines, non alios, ad hunc mundum pertinere, nec sine iis eundem esse posse. Dum igitur Deus hunc mundum producere decrevit, neque fieri potuit, ut absque hominibus hisce eundem faceret.

Poterat eadem propositio aliis adhuc modis ostendi, & populari satis modo ejus patet veritas. Ponamus enim nullos esse in hoc mundo homines. Cessabunt igitur omnia, quæ ab actionibus hominum pendent, atque experientia magistra numero non pauca sunt, sed magnam partem in serie successivorum quoad globum hunc nostrum terraqueum absolvunt. Materia illa, quæ successive corpora humana constituit, alias formas indueret, atque adeo in seriem rerum successivarum multa intruderentur, quæ nunc ex eadem exulant. Nemo igitur non videt, mundum, quatenus est series rerum successivarum, non amplius fore eundem cum hoc adspectabili. Quamobrem si Deus hunc producere voluit mundum, non alium; neque cum sine hominibus, neque cum aliis hominibus, quam quorum genus nunc in eodem propagatur, producere potuit.

Propositio præfens maximæ utilitatis est in dispellendis nebulis, quæ circa existentiam mali in hoc universo cooriuntur. Veritas ejus equidem perceptu facilis, modo animum ad notionem mundi & præsertim ad nexum rerum, qui in eodem datur, advertas, ita ut vel sola attentione opus sit ad eam comprehendendam, ubi notionem mundi in Cosmologia evolutam familiarem experiris: hoc tamen non obstante uberius eandem confirmari opus erat, propterea quod vulgo ideam mundi fingunt, quæ a veritate abhorret, & propositionem præsentem falsitatis suspectam reddit incautis. Et enim plerique sibi imaginantur spatium vastum inane, in quo Deus producere potuit, quicquid voluit, potentiam metientes ex voluntate, possibilitatem rerum ex potentia. Corpora mundi totalia sibi repræsentant per modum ædium, quas Deus pro arbitrio extruxit, ubicunque ipsi commodum visum fuerit. Quemadmodum itaque domus una in urbe extrui potest, ut ideo non necesse sit simul extrui alteram, aut una excitari potest urbs, ut aliam una condi non sit opus, ita quoque Deum corpus mundi totale unum fecisse sumunt, ut propterea non fuerit aliud eidem coëxistens una producendum. Porro sicuti domum, quam extruximus, vel quibusdam habitandam concedere, vel vacuam ab habitatoribus relinquere possumus; ita quoque Deum corpora mundi totalia & hæc inter tellurem quoque nostram vel vacua relinquere potuisse, vel creaturis quibusvis habitanda concedere. Et quemadmodum domino domus integrum est, cuinam domus suæ usum concedere velit; ita quoque Deum terram inhabitandam dare potuisse non tantum hisce, qui in eadem degunt, hominibus; sed etiam aliis melioribus. Quoniam itaque experientia docemur, homines, qui terram incolunt, libertate sua abuti posse, & ab hoc abusu promanare omne malum; absque ulla hæsitacione inferunt, potuisse Deum hominibus non labilibus terram habitandam concedere, ac malum morale ex terra profligare, consequenter mundum producere absque hisce hominibus, qui terram incolunt. Quamvis vero hæc cum libertate Dei summa & omnipotentia ipsius convenire videantur; quam tamen sicut a genuinis principis

piis philosophiæ primæ & natura Dei remota ex anterioribus abunde patet, ut ea refutari non sit opus, utpote per anteriora jam destructa. Constat vero ex anterioribus Deum quidem potuisse condere mundum alium & in eo homines alios; sed non potuisse facere hunc mundum sine hisce hominibus; hunc autem mundum fecisse, sed libere, etsi sibi ipse fecerit hanc legem, ut eum conderet sapientissime, hoc est, ut eligeret illud possibile systema, quod fini per creationem mundi intento esset omnium convenientissimum.

§. 722.

Num abusus libertatis non repugnat bonitati divinæ, seu Deus salva bonitate summa, quisque ipse est, facere potuit hominem, qui libertate sua abuti bonitati posset, & quem eadem abusurum prævidebat. Etenim Deus repugnet. non potuit hominem facere absque potentia abutendi libertate sua (§. 718.). Quamobrem cum Deus cuicunque creaturæ, adeoque etiam homini, tantundem conferat boni, quantum salva sapientia ipsius fieri potest (§. 698.), adeoque bonitati divinæ non repugnet, quod non conferat perfectionem, quæ in eum minime cadit (§. 695.); bonitati ejus haud quaquam repugnat, quod non fecerit hominem absque potentia abutendi libertate, seu qui libertate sua abuti minime posset, consequenter potentia libertate abutendi, quæ in homine deprehenditur, bonitati, quæ Deo summa est (§. 699.), minime repugnat. *Quod erat unum.*

Porro Deus abusum libertatis, quem ab æterno prævidit (§. 713.), permittere sapientissime decrevit (§. 714.), nec salva sapientia sua impedire eundem potest (§. 715.), immo ut impediat ipsum non decet (§. 717.). Quoniam itaque Deus homini tantundem boni confert, quantum salva sapientia ipsius fieri potest (§. 698.); bonitati, quæ ipsi summa est (§. 699.), minime repugnat, quod in promovenda perfectione hominum

num (§. 695.), consequenter in bonis in eosdem conferendis (§. 370.), non agat, quod sapientiz suæ contrarietur, ipsumque dedecet. Non igitur repugnat bonitati ipsius permissio abusus libertatis, seu quod fecerit hominem, quem libertate sua abuturum noverat. *Quoderat alterum.*

Idem etiam sic ostenditur. Deus non potuit hominem facere absque potentia libertate sua abutendi (§. 718.), nec facere hunc mundum, cujus existentiam sapientissime decreverat, ita ut majore sapientia uti non potuerit (§. 642.), absque hominibus (§. 721.), quos præviderat libertate sua abuturos (§. 713.) & quem abusum salva hujus mundi perfectione, ob quam cum præ cæteris elegerat (§. 325.), quemadmodum ipsum decet (§. 334.), atque sapientia sua impediri non posse intelligebat (§. 715.). Quamobrem si potentiam abutendi libertate spectes, physice; si ipsum abusum respicias, moraliter impossibile est, ut homini plus tribuatur perfectionis, quam eidem largitur Deus. Quamobrem cum in hominem summe bonus dicendus sit, qui tantundem perfectionem ejus promovere studet, quantum fieri potest, physice scilicet ac moraliter (§. 695.); Deus quoque non obstante potentia libertate utendi, quæ hominibus inhæret ac permissione abusus libertatis, summe bonus erga homines dicendus est, atque adeo nec potentia abutendi libertate, nec permissio abusus ejusdem bonitati divinæ repugnat.

Nemo bonitati hominum adversari judicat, si in gratiam alterius non facit, quod vel physice, vel moraliter impossibile, etsi alteri id ipsum commodum accideret, immo maxime salutare foret. Si cum hominibus nobis est negotium, id facile admittunt omnes; sed quod quoad Deum aliter videatur, vana, quæ multorum animos tenet, persuasio in causa est, quasi quoad Deum nihil sit physice, nihil moraliter impossibile, cum possibilitatem potentia, facultatem agendi li-

(*Wolfii Theol. Naturalis*)

Q q q q

ber-

bertate unice metiantur. Unde cum potentia Dei illimitata sit, quoad ipsum nihil esse impossibile colligunt, & quia nullum superiorem agnoscit, qui libertatem ipsius restringere valeret, cum quidvis licite facere posse inferunt. Atque hoc pacto nec physice, nec moraliter impossibilia dantur ex parte Dei. Enimvero præjudicia hæc concidunt per superiora. Etenim non ideo quid possibile, quia Deus id facere potest, sed ideo quid facere potest, quia possibile (§. 343.), cum ideo possibile sit, quod ejus idea detur in intellectu divino (§. 192.). Atque adeo dantur quoque physice, hoc est, in se spectata impossibilia, quæ Deus cognoscit (§. 307.), sed tanquam infactibilia non sunt objectum potentiae ipsius (§. 344.), salva ejus omnipotentia (§. 346.). Similiter Deus non vult, nisi quæ ipsum decent (§. 335.), etsi nullum superiorem agnoscat, qui cum ad hoc potius, quam aliud volendum obligare possit. Atque adeo dantur quoque moraliter impossibilia, quæ quidem potentiam ejus non excedunt, sed quæ ideo non facit, quia non vult, salva ejus libertate summa (§. 431.). In priorem censum venit potentia libertate abutendi (§. 711.); in posteriorem vero abusus libertatis impeditio miraculosa (§. 717.), qua naturæ ordo turbatur (§. 566. *Cosmol.*), & perfectio hujus universi tollitur (§. 715.).

§. 723.

*Malorum
moralium
& physico-
rum ne-
xus.*

Ex malis moralibus mala physica necessario consequuntur. Etenim malum morale est, quod inhæret actionibus hominum liberis (§. 374.). Quamobrem cum actiones liberae sint in se malæ, quatenus tendunt ad imperfectionem agentis vel aliorum ejusdemque signum sunt (§. 371. *Theol. natur.* §. 565. & seqq. *Psychol. empir.*); ex malo morali consequitur imperfectio aliqua accidentalis vel interni, vel externi status agentis aliorumque. Enimvero malum physicum est, quod statum mundi quoad effectus naturales imperfectiorem reddere censetur, quam foret, si alii essent (§. 373.), adeoque quoad homines in particulari, quod statum sive animæ, sive corporis, vel

vel etiam eorundem statum externum imperfectiorem reddit, quam is foret, si idem abesset. Quamobrem ex malo morali consequitur malum physicum. Et quoniam malo morali posito ponitur quoque physicum, neque etiam per essentiam atque naturam rerum, seu naturaliter (§. 509. *Cosmol.*) fieri potest, ut non ponatur; id ipsum vero necessarium est, cujus oppositum impossibile (§. 279. *Ontol.*); ex malo morali malum physicum necessario sequitur.

Idem multo clarius patet, si demonstratio ad casum aliquem particularem applicetur. Ponamus itaque, Cesium comedere cibum sanitati noxium, propterea quod bene sapit. Sumo, quod in philosophia practica demonstrandum absque demonstratione facile conceditur, appetitionem ac comestionem huius cibi esse malum morale. Sumo porro, quod in philosophia practica eisdem demonstrandum absque demonstratione eisdem haud difficulter conceditur, morbum esse imperfectionem corporis, seu statum ejus reddere imperfectiorem quam foret, si quidem is abesset, consequenter cum respectu corporis nostri malum physicum sit, quod statum ejus, vel ipsummet corpus imperfectioni cuidam obnoxium reddit, quemadmodum respectu totius mundi malum physicum est, ob quod ejus status imperfectior reddi censetur, quam foret, si idem abesset (§. 373.), patet morbum in numero malorum physicorum esse, praesertim cum ipsemet hic mundus censeatur hoc nomine imperfectior, quod per naturam causarum naturalium corpora humana fiant morbis obnoxia. Quoniam igitur ex comestione cibi corpus incidit in morbum, a quo liberum foret, si ab eodem abstineremus; ex malo morali sequitur malum physicum, cui non foret in hac rerum serie locus, nisi in eadem locus esset malo morali. Et quia naturaliter fieri non potest, ut corpus in morbum non incidat, si eum capiamus cibum, a quo morbus tanquam effectus proficiscitur

(§. 898. *Ontol.*); evidens est ex malo morali necessario consequi malum physicum.

Necessitas utique in casu propositionis præsentis nonnisi hypothetica est, quatenus nimirum supponitur, effectum naturalem quemcunque per miraculum a Deo impediri posse. Enimvero nec de alia necessitate, quam quæ naturæ est (§. 102. *Cosmol.*), hypothetica propositio præsens intelligenda. Ceterum nexus necessarius inter malum morale atque physicum probe perpendendus, cum ad intrinsicam actionum malitiam agnoscendam plurimum faciat. Quamobrem opus est, ut ad exemplum propositum de comestione cibi sanitati obnoxii animum advertentes in aliis quibuscunque casibus similiter inquiramus in mala physica, quæ ponuntur, positis malis moralibus. Mala autem hæc physica consideranda sunt non modo in relatione ad corpus, verum etiam in relatione ad animam & statum nostrum externum. Ita si cibum cupimus, propterea quod bene sapit, etsi moneamur eundem sanitati nocere; ubi in morbum incidimus & ejus molestias sentimus, angitur animus, pœnitet nos facti & indignamur nobismet ipsis. Illæ autem molestiæ, quibus perturbatur tranquillitas animi, in numero malorum physicorum sunt. Ponamus nos inimicitiam incurrere eorum, quorum monitis aurem benignum præbere recusamus. Hæc ipsa inimicitia in numerum utique malorum physicorum respectu status nostri externi referenda. Etenim quæ per essentiam ac naturam animæ consequuntur, non minus naturalia sunt (§. 69. 66. 67. *Psych. ration.*), quam quæ per naturam ac essentiam corporum consequi solent (§. 509. *Cosmol.*). Sane quemadmodum vulnus corpori inflictum naturale quid est; ita quoque dolor, qui percipitur in anima, naturalis est.

§. 724.

*In mala
quomodo
ruat ho-
mo.*

Homo ruere dicitur in mala, quando ea agit, unde mala necessario consequuntur, sive ea physica fuerint, sive moralia. Unde si physica fuerint, in physica; si moralia in mala moralia ruere dicitur.

Ita

Ita in morbos ruit, qui ex intemperantia morbis fit obnoxius: ruit in paupertatem, qui luxuria opes suas dilapidat: ruit in vitia, qui male agendo habitum male agendi acquirit, seu vitio fit obnoxius.

§. 725.

Non repugnat bonitati divinae, quod hominem in mala Num idem ruere sinat. Etenim bonitati divinae non repugnat, ut hominem libertate sua abuti permittat (§. 722.). Quamobrem bonitate eum abusu libertatis malum irrepat in actiones liberas (§. 580.), Dei. ex malo autem morali necessario sequatur malum physicum (§. 723.), consequenter homo, dum libertate abutitur, in mala ruat (§. 724.); bonitati divinae utique non repugnat, quod hominem in mala ruere sinat.

Ersi propositio potissimum de malis physicis loquatur vi demonstrationis; per hanc ipsam tamen patet, quod etiam de moralibus intelligenda sit, ubi homo ea agit, unde mala moralia consequuntur, veluti dum habitum mala perpetrandi sibi acquirit, adeoque in vitia incidit, immo tum ex vitio uno incidit in alia plura, & habitus male agendi sive vitia indices majora capiunt incrementa. Ea enim fieri posse, non modo experientia proh dolor! obvia manifestum est, verum etiam suo tempore in philosophia morali demonstrabitur, cur fieri debeant. Nemini circa propositionem praesentem, sive de malis physicis, sive de moralibus accipiat, vel minimum dubii supererit, modo cogitet non posse impediri, ut homo ruat in mala, nisi impediatur ne libertate sua abutatur (§. 724.). Quamobrem cum bonitati divinae minime repugnet, quod hominem libertate sua abuti permittat Deus (§. 722.); nec eidem repugnare potest, quod eum in mala tam physica, quam moralia ruere sinat.

§. 726.

Deus salva sapientia sua impedire nequit, ne homo in mala, sive physica, sive moralia ruat. Num salva sapientia- phy- Etenim homo in mala tam

physica, quam moralia ruit, quando ea agit, unde mala consequuntur (§. 724.), consequenter cum anima in volendo & nolendo libera sit (§. 942. *Psychol. empir.*), quando libertate sua abutitur. Quamobrem si Deus impedire deberet, ne homo in mala sive physica, sive moralia rueret, abusum libertatis impedire tenetur. Enimvero abusum libertatis salva sapientia sua impedire nequit (§. 715.). Ergo nec salva sapientia sua impedire potest, ne homines in mala physica & moralia iruant.

Qui satis perspexit permissionem mali moralis, quam sit ea sapientiae divinae conformis; ei praesens propositio minime videbitur paradoxa. Ceterum experientia patet, hominem ruere in mala non minus moralia, quam physica, nec idem a Deo impediri. Qui ergo sibi persuadent, injuriam Deo fieri, si contendamus id salva sapientia divina a Deo impediri non posse, nec repugnare bonitati ipsius, quod non impediatur, concedere tenentur, sapientiae divinae consentaneum esse, ut id impediatur, & bonitate ipsius contrariari, quod hominem in mala ruere sinat. videant igitur, an non ipsimet in Deum sint injurii, dum veritas, quam luce notionum distinctarum destituti non capiunt, ipsis suspecta videtur,

§. 727.

Bonitas

Dei quomodo judicanda.

De bonitate Dei judicari nequit nisi in relatione ad totum universum & omnia ipsius attributa. Deus perfectionem rerum aestimat in relatione ad totum universum (§. 391.), ita ut optimum censeatur in suo genere, quod facit ad majorem perfectionem totius universi (§. 392.), atque omnia sua attributa (§. 395.). Quamobrem si judicari debet, quantum perfectioris Deus unicuique enti in hoc universo tribuere possit, salva mundi & sui ipsius perfectione; ea referenda est ad totum universum & omnia ipsius attributa. Quamobrem cum bonitas in pronitate ad aliorum perfectionem promovendam consistat

sistat (§. 695.); nec de bonitate judicari posse constat nisi in relatione ad totum universum & omnia ipsius attributa.

In eo plerumque peccant, quotquot bonitatem divinam suspectam habent, quod homines tantummodo in se considerent, & ad perfectiones, quæ defunt, animum advertunt, nec mentis aciem convertentes nisi in potentiam Dei absolutam, qua potest facere, quicquid intrinsece possibile (§. 343.), modo velit (§. 352.), cur non faciat causam in voluntatem ipsius conjiciunt. Unde ipsorum de bonitate Dei judicium erga hunc vel istum hominem in singulari, vel aliquot homines in particulari prorsus diversum est a judicio Dei. Sane si hominem in mala ruentem intuemur, plurimum fallit conclusio, quod dum Deus hoc permittit, in ipsa permissione nulla deprehendantur vestigia bonitatis divinæ. Concipe enim eundem poni in aliis circumstantiis, adeoque in alia rerum serie, & perpende, annon in majora adhuc mala sit ruiturus & sibi nociturus, & aliis. Quoniam constat, Deum cognoscere etiam ea, quæ sub conditione nunquam implenda futura essent (§. 304.); utique bonitati divinæ acceptum referri debet, quod majora mala & ab ipso, & ab aliis avertat. Sed de his & aliis geminis dicemus plura posthac ex instituto. Interest enim plurimum, ut bonitatem divinam intimius perspiciamus, & scrupulos omnes, qui animum inquietum reddere ac perturbare valent, eximamus, cum hujus attributi magna sit vis in appetitum hominis, quemadmodum in philosophia morali docebimus. Ceterum, si quis circa propositionem præsentem experimentum capere velit, is idem capiat in seipso inquirens sedulo, quid ipse sit factururus, si cum aliis in mala ruentibus in iisdem circumstantiis poneretur. Velim vero ut simul accurata mentis trutina examinetur, quantæ sint orituræ confusiones in ordine hujus universi atque naturæ, si Deus singulorum entium, veluti hominum, in se spectatorum rationem habere debeat, ut tantundem perfectionis accidentalis in ea conferatur, quantum in ea cadere posse videtur; & quam sit idem prorsus impossibile, ubi naturaliter fieri debet. Sed hæc considera-

randa

randa relinquimus nonnisi acutioribus, qui modum, quo determinatur actus rerum in hoc mundo adspectabili (§. 87. *Cosmol.*), satis intelligunt, ac ordinis universi ac naturæ notionem distinctam satis familiarem experiuntur (§. 566. *Cosmol.*). Non igitur miramur, si hebetiores, quibus perspicilla cosmologica nondum usui sunt, in iis cæcutiant, ubi acutiores iisdem perspicillis adjuti plenissima luce fruuntur. Quemadmodum vero in eo hallucinantur de bonitate Dei judicium laturi, quod homines non referant ad totum universum; ita non minus præcipitantiæ rei sistuntur, quod de bonitate Dei judicaturi animum tantummodo advertant ad notionem bonitatis, non vero simul ad cetera attributa divina. Unde accidit, ut bonitati in se spectatæ vel ad solam potentiam relatæ contrariari videatur, quod eidem ad alia attributa relatæ minime repugnat. Recolenda hic animo sunt, quæ modo demonstravimus, Deum salva sapientia sua, consequenter & omnibus illis attributis, quæ notionem sapientiæ ingrediuntur, satis impedire non posse, ne homo in mala sua sponte ruat (§. 726.).

§. 728.

*Cautio in-
djudican-
da bonitate
Dei.*

Quoniam de bonitate divina judicari nequit sine relatione ad totum universum (§. 727.); multo minus de eadem judicare licet, quoad hominem unum in singulari citra relationem ad totum genus humanum.

Unde patet absurdum esse, si quis a Deo prætendat, ut in sui gratiam faciat, quod in detrimentum totius generis humani cedit, aut si velit Deum bonum hominis in singulari præferre bono totius humani generis.

§. 729.

*Cur homo
non eodem
quo Deus
modo de
bonitate
ipsius judi-
cet.*

Homo de bonitate divina eodem, quo Deus modo judicare nequit. Etenim cum bonitas in pronitate ad promovendam alterius perfectionem consistat (§. 695.), adeoque major concipi non possit, quam ubi aliorum perfectio tantundem pro-

promovetur, quantum fieri potest; de bonitate Dei, quam summam esse constat (§ 699.), judicaturus inquirere debet, utrum Deus tantum enti cuique tribuat perfectionis, quantum ipsi tribui potest, ut adeo tantundem perfectionis recipiat, quantum salva mundi perfectione salvisque attributis divinis recipere valet (§. 727.). Enimvero de rerum perfectione eodem, quo Deus, modo nemo hominum judicare valet (§. 396.) Quamobrem nec fieri potest, ut homo de bonitate divina eodem, quo Deus, modo judicet.

Ex propositione præsentē intelligitur, quam lubricum sit nostrum de bonitate divina iudicium, & quantopere cavere nobis debeamus, ne temerariis iudiciis in bonitatem divinam simus injurii. Hac cautione opus est, quotiescunque bonitati divinæ quid repugnare nobis videtur.

§. 730.

Bonitas Dei homini incomprehensibilis est. Etenim homo *Incompre-* de bonitate Dei eodem, quo ipse, modo judicare nequit (§ 729.). *benfibilitas* Est vero id, quod cognoscimus, nobis incomprehensibile, *bonitatis* si modum, quo est vel esse potest, nobis minime repræsen- *divine.* tare valemus (§. 170.). Bonitas igitur Dei homini incomprehensibilis est.

Loquimur hic de incomprehensibilitate bonitatis divinæ in se spectatæ, non vero consideratæ quoad ejus extensionem ad singulas creaturas, quatenus scilicet diffusa est per totum universum. Non tamen ob stare debet hæc bonitatis divinæ incomprehensibilitas, quo minus in eandem inquiramus. Cum enim bonitatis divinæ agnitio multum influat in omnem praxin moralem, seu legitimam actionum humanarum directionem ad felicitatem agentis, aliorumque; non parum refert, nosci quoque illius incomprehensibilitatem. Quamobrem cum hanc inspicere non detur, nisi omni sollicitudine in bonitatem divinam inquiretur; tanto quidem majore cura in eandem inquirendum,

quanto magis apparet, eam esse incomprehensibilem. Nimirum cum ex eo tandem intelligatur bonum nobis esse, quod visum fuerat malum, ubi intelligimus a posteriori, quznam ab eo pendeant in posterum quoad nos, quod malum visum fuerat; nostrum est presentia conferre cum prateritis vel futura cum presentibus, ut incomprehensibilitatem bonitatis divinae quadantenus inspicere nobis, idetur. Sed de hisce plura nobis dicenda erunt in moralibus, ubi iisdem commode in rem nostram utemur. Qui in bonitatem divinam prorsus non inquit, propterea quod incomprehensibilis, ne inanem operam sumat; ut certam incomprehensibilitatis habeat cognitionem vix ac ne vix quidem fieri potest. Immo facta in eandem inquisitione idea incomprehensibilitatis demum efficitur lucida, ne instar deceptricis fiat suspecta.

§. 731.

Imperscrutabilitas bonitatis quid sit.

Bonitas dicitur imperscrutabilis, si modum, quo quis promovet perfectionem alterius non penitus perspicimus, nec certo cognoscere valemus.

Definimus hic imperscrutabilitatem bonitatis divinae eodem sensu, quo supra imperscrutabilitatem voluntatis (§. 397.) atque sapientiae (§. 690.) definivimus. Quamobrem quae ibidem de recepto vocabuli significato annotavimus, ea hic quoque loci tenenda sunt.

§. 732.

Imperscrutabilitas bonitatis divinae.

Bonitas Dei nobis imperscrutabilis est. Etenim nos de bonitate Dei eo, quo Deus ipse, modo judicare minime valemus (§. 729.). Quamobrem fieri potest, ut quid ad perfectionem nostri statusque nostri promovendam faciat, quod quomodo ad eandem tendat, perspicere ac certo cognoscere minime valemus. Quoniam itaque bonitas imperscrutabilis est, quatenus modus, quo perfectio nostri statusque nostri promoveretur, non penitus perspicitur, nec certo cognoscitur

(§. 731.)

(6. 731.); quia bonitas divina sit imperfectibilis dubitari ne-
quit.

Et si incomprehensibilitas & imperscrutabilitas bonitatis
divinæ ex eodem principio demonstrantur; ex diversa tamen
ejus applicatione patet, utramque non esse eandem; sit ita,
quod ob incomprehensibilitatem etiam imperscrutabilis sit.
Ex sane res ipsa aperte satis loquitur differentiam. Bonitas
nimirum Dei nobis incomprehensibilis est, quatenus idea e-
jus, quæ in Deo datur, animæ nostræ inesse haud quaquam
potest (§. 729.): at imperscrutabilis est, quatenus non sem-
per nobis certo cognoscere datur, quod & quomodo Deus
in dato casu perfectionem nostram promoveat. Quemadmo-
dum vero paullo ante monuimus, non ob stare incomprehensi-
bilitatem bonitatis divinæ, quo minus, in eandem inquiramus;
ita mutatis mutandis inculcandum, non impedire imperscruta-
bilitatem bonitatis ejusdem, quo minus bona a Deo in nos col-
lata scrutemur.

S. 733.

Directio malorum ad bonum finem est bonitatis divinae. Bonitatis divinae effectus singularis. Enim cum Deus mala tam physica, quam moralia, quae salva perfectione hujus universi (§. 556.) & sapientia sua summa atque perfectissima tollere nequit (§. 676.), ad bonum finem dirigit (§. 680.); iisdem tanquam mediis consequendi finem utitur (§. 679.). Quamobrem cum homini bonum esse constet, quicquid ad ipsius vel status ejus perfectionem facit (§. 554. *Psychol. empir.*); si Deus mala physica & moralia dirigit in bonum finem, id intendit, ut mala, quae permittit, tendant ad perfectionem hominis atque status ejusdem, consequenter malorum directione perfectionem hominis statusque ejusdem promoveat. Quoniam itaque bonitatis est alterius perfectionem promovere (§. 695.); directio malorum ad bonum finem est utique bonitatis divinae.

Singularis omnino bonitatis divinæ, qua in homines utitur,
Rrrr 2 effe.

effectus est, malorum tam physicorum, quam moralium, cum propriorum, tum alienorum directio ad bonum finem: qua bonitatis specie fini hujus universi apprimè conveniente (§. 629.) careret hoc universum, nisi malis in iisdem esset locus. Sane non evidentius Deus bonitatem suam summam nobis patefacere poterat, quam hac ipsa malorum ad bonum finem directione, quæ eandem scrutantibus singularia prorsus ac occulta Dei beneficia offert. Exemplum Josephi, quod superius expendimus (§. 688.), dicta illustrat; sed ea multo clarius confirmat propria experientia. Quamobrem ut bonitatis divinæ convincamur & eandem veluti gustu percipiamus; in directione malorum ad bonum finem scrutanda nostrum desiderari haud quaquam pati debemus industriam.

§. 734.

*Beneficium
Dei speciale.*

Quamobrem cum malum dirigatur ad bonum finem, si homo malis physicis utitur ad evitanda moralia (§. 679.); bonitatis divinæ est, si Deus mala physica homini immittit, ut adversus malum morale præmuniatur, vel ab eodem desistat (§. 733.).

Fieri potest, ut homo multiplicem fructum percipiat ex malis physicis quoad moralia, prouti vel vitiis, vel virtuti deditus est, vel in limine virtutis adhuc constitutus a vitiis quidem adhuc alienus, in ea tamen pronus. Nostrum vero jam non est ea particulatim prosequi, quæ vel ad providentiam divinam referenda, vel in philosophia morali inculcanda. Sufficit hic spargi semina suo tempore in segetem lætam abitura. Tenendum tamen utile esse, ut tempestive animum ad facta hominum atque naturæ advertamus, ut eorundem collatione pateat eorum veritas, quæ sicuti ad omem, ita ad hanc quoque malorum in bonum finem directionem spectant. Absit vero, ut sibi quis persuadeat perperam bonitati divinæ tribui, quod homini acceptum ferendum. Etenim mala physica diriguntur in bonum finem, in præsentem casu, non quia Deus eadem homini immittit, sed quia hic iisdem utitur tanquam motivis voluntatis determinandæ

mandat: non igitur a Deo, sed ab homine fit ista directio. Enimvero nonne Deus præscivit omnia ab æterno (§. 534.) & ea, quæ naturaliter in hoc universo consequuntur, sibi invicem subordinavit per modum mediorum ad fines? Quamobrem dici omnino debet, Deum decrevisse, ut hæc mala physica obtingant huic homini, quia noverat, quomodo iisdem erat usus, ut iisdem hoc modo utatur. Usus igitur, quem facit homo malorum physicorum ad moralia vel præcavenda, vel derelinquenda, referri utique debet ad directionem divinam malorum in finem bonum. Unde qui hunc usum facit, agnoscit bonitatem divinam & beneficio divinitus sibi concesso fruitur: qui vero eundem usum non facit, beneficium Dei contemnit.

§. 735.

Quoniam similiter malum dirigitur in bonum finem, si *Aliud.* malo minore avertitur majus (§. 679.); *bonitatis divinæ est* non modo si Deus homini malum physicum minus immittit, ut eodem avertatur majus, verum etiam si permittit, ut malum morale minus committat, quo a majore avertatur (§. 733.).

Pleraque, quæ ad propositionem præcedentem annotavimus, ad præsentem quoque trahenda. Quodsi quis quoad moralia objecerit, non esse facienda mala, ut inde eveniant bona; supra jam satisfecimus objectioni. Aliud enim est permittere mala, quæ impediri non possunt, nisi tollere velis bona, quæ fieri debent; aliud facere mala. In mali autem permissione tum demum malum, quod permittit, aliqua ex parte imputari poterat, si impediret minus, quo impedito secuturum præviderat majus. Quodsi quis quoad hanc quoque bonitatis divinæ partem experientiam consulere velit, ea addiscet, quorum eximium in omni philosophia practica experietur usum.

§. 736.

Bonitati divinæ acceptum ferendum, si homo in iis po- Adbuc a-
Rrrr 3 *nitur liud.*

nitur circumstantiis, quibus & mala physica, & moralia, quibus sub aliis obnoxius fieri poterat, avertuntur. Cum enim omnium confessione bonum sit evitare malum; si homo in iis ponitur circumstantiis, quibus mala evitat, quæ sub aliis incurreret, bonum utique in ipsum confertur. Quamobrem quia alii mundi possibiles sunt, quibus ad actum deducerentur possibilia, quæ in præsentem actum non consequuntur (§. 101. *Cosmol.*), & quos Deus perinde ac præsentem facere poterat (§. 342.); bonum utique in hominem conferre dicendus est, quatenus eum produxit mundum, in quo iis collocatur in circumstantiis, quibus mala evitat, in quæ incurreret, si in aliis poneretur. Quoniam itaque in alios bonus est, qui bona aliis pro virili conferre studet (§. 697.); bonitati omnino divinæ acceptum ferendum, quod homo se sentiat collocatum in iis circumstantiis, quibus mala evitat, sive physica, sive moralia, quibus sub aliis obnoxius fieri poterat.

Propositio præsens dirigit aciem mentis singulari quodam modo in bonitatem divinam, ut multa beneficia Numinis agnoscantur, quæ alias ignorantur. Quod si hic denuo experientiam magistram appellare volueris; quotidie sese offeret amplissimus bonitatis divinæ campus, quem attentius perlustandum in philosophia morali ingrediemur. Plurimum autem juvabit, præparasse animum, ut memoria præteritorum influat in appetitum & foveat attentionem. Sane non alio fine hic aperimus fontes bonitatis divinæ, quam ut eam degustandam excitetur. Quod enim plurimis bonitas divina suspecta videatur, vel non tanta existimetur, quanta profecto est; non alia de causa accidit, quam quod non quantum satis est perspicitur, quidnam boni in nos conferat Deus. Quoniam Deus per mundum præsentem perfectionem suam summam (§. 629.), consequenter etiam bonitatem, quæ ipsi summa est (§. 699.), patefacere voluerit, nihil superest dubii, quin ea omnia intenderit, quæ quomocunque bonitatem ipsius loquuntur.

737.

*Bonitati divine acceptum ferendum, si homo ponitur in Adbuc
 iis circumstantiis, sub quibus bonorum tam physicorum, quam aliud.
 moralium fit compos.* Quoniam nexus rerum in hoc universo
 sapientia divina constitutus est (§. 666.), vi sapientiz autem res
 connectuntur per modum mediorum ad fines (§. 689. *Psychol.
 ration.*), & Deus unicuique enti tantundem boni conferre stu-
 det, quantum vi sapientiz ipsius fieri potest (§. 698.); dubitari
 sane haud quaquam potest, quin Deus bona, quorum homo
 compos sit sub datis circumstantiis, intenderit tanquam finem,
 eumque in his ipsis circumstantiis constituerit, ut eorun-
 dem compos fieret. Quoniam itaque bonus est in alterum,
 qui eidem bona pro virili conferre studet (§. 697.); Deus etiam
 bonus est in homines, quatenus eos constituit in hisce circum-
 stantiis, sub quibus bonorum physicorum, & moralium com-
 pones fiunt.

Propositio præsens probe tenenda, ne homo sibi tribuat,
 quæ bonitati divinæ acceptum referre debet. Amplissimus
 hic denuo patet campus bonitatis divinæ, in quem excurrere
 debent, quotquot eandem veluti gustu percipere desiderant.
 Sane si quis in bonitatem Dei juxta propositiones modo pro-
 positas inquirat; nemo erit mortalium, qui, ubi sese existimat
 omnium miserrimum, non uberrimos bonitatis divinæ the-
 sauros penes se deprehendat. Tantam nimirum experimur
 bonitatem divinam, ut eam effari minime valeamus, modo
 non ignoremus, quæ ad eandem referri debeant. Patet au-
 tem ex his ipsis, quæ de bonitate Dei demonstrata sunt, quo
 quis est in pervestigandis abditis acutior, eo quoque majore
 ab eodem deprehendi bonitatem divinam: videt enim
 bona, quæ Deus in ipsum confert atque alios; videt mala,
 quæ is ab ipso aliisque avertit; quæ aliis hebetioribus vel ne-
 gligentioribus non innotescunt. Maximum ad artem semper
 gaudendi præsidium in bonitate divina latet; maximo divina
 boni-

bonitas adjumento est, ut animus reddatur sorte sua contentus. Hortamur igitur omnes, qui hæc nostra legent, ut juxta demonstrata bonitatem divinam expendant. Inquirentibus sese offerent multa singularia, quæ voluptate animum perfundent, ubi bonitatem Dei sapere intelligentur. Egre- gie de humano genere mereretur, qui ex instituto ad cap- tum vulgi beneficia Dei vulgo non agnita explicaret, quo- rum profecto major numerus est quam eorum, quæ agno- scuntur.

§. 738.

*Extensio
bonitatis
divine.*

Totum universum est plenum bonitatis divine. Etenim Deus enti cuicunque tantundem confert boni, quantum salva sapientia ipsius fieri potest (§. 698.). Quocunque igitur te vertas in hoc universo, ubivis videre licet bona, quæ Deus enti- bus ibidem existentibus confert, præsertim si inquiras juxta de- monstrata (§. 733. & seqq.). Quoniam itaque Deus se bonum probat erga alios seu erga omnia, quæ fecit, entia, quatenus bona iisdem confert (§. 697.); quocunque te in universo ver- tas, bonitatis divinæ thesauros deprehendis, consequenter to- tum universum plenum est bonitatis divinæ.

Quodsi quis vastum mundi spatium cogitet, & ad ani- mum revocet multitudinem entium, quibus id repletur; is bonitatis divinæ magnitudinem aliquo modo percipiet, cujus alias nullam prorsus habet ideam. Etenim nemo est qui ne- sciat, bonitatis magnitudinem æstimari non modo ex magni- tudine & multitudine bonorum in alios collatorum; verum etiam ex multitudine subjectorum, in quæ bona conferuntur. Enimvero ne quicquam prætermittatur, quod in scrutanda ex- tensione bonitatis divinæ usui esse possit; sequentem addere lubet propositionem.

§. 739.

Bonitas divina per viat usibus alterius. Bonitatis divina est, quod in hoc universo unum inser- viat usibus alterius. Omnes usus rerum & naturalium (§. 648.

648.), & artificialium sunt fines a Deo intenti (§. 649.). Quam-*rerum usus*
obrem cum causa efficiens propter finem agat (§. 932. *Onsol.*); *exercita.*
Deus has res simul fecit, ut unum usibus alterius inserviret.
Enimvero res una inservit usibus rei alterius, quatenus quoad
ea, quæ mala non sunt, consequenter quæ bona ipsi sunt (§.
370. 371.), ab eadem dependet (§. 646.). Deus itaque enti
uni confert bonum per alterum, quatenus unum usibus alte-
rius inservit. Quoniam adeo Deus erga ens istud bonus est,
cui bona confert (§. 697.); divinæ utique bonitatis est, quod
in hoc universo unum inserviat usibus alterius.

Ita bonitati divinæ acceptum referri debet, quod Deus
fecerit Solem, qui nobis in Tellure multiplicem sui præbet
usum in Teleologia distinctius exponendum & domestica
experientia confirmandum. Similiter bonitati divinæ tribu-
endum, quod Deus cum fecerit globum terraqueum, ut sta-
to tempore pluvia gignatur terram nostram irrigatura & a-
gros ac campos fecundatura. Nec minus Deus se bonum
probat creaturis viventibus, quod terra proferat & pabulum
commodum singulis animantibus brutis, & alimentum ho-
minibus præbeat. Quodsi dicas, hæc necessario fieri in re-
rum natura; exceptio nulla est. Etenim cum tota rerum
natura non existat, nec agat, nisi volente Deo (§. 433.); res
una inservit usibus alterius, non quod inservire potest, sed
quod Deus eam alteri inservire voluit. Quemadmodum
itaque in te bonus est, qui jubet alterum, ut commodis tuis
pro virili inserviat, quem novit imperata facturum; ita
quoque Deus bonus est in creaturas, ac imprimis in homi-
nes, ubi jubet creaturam unam inservire usibus alterius, quæ
voluntati ipsius resistere nequit. Qui bonitatem divinam in
mutuis rerum, quos experiuntur, usibus non agnoscunt; vel
naturæ quoad actualitatem dependentiam a liberrimâ Dei vo-
luntate non perpendunt, quam in superioribus evictam dedi-
mus (§. 433. 431.), vel mundum perperam pro ente a
se, adeoque necessario habent, vel Deum ex necessitate
naturæ suæ mundum fecisse, nec aliter facere potuisse cum

Spinoza somniant, omnem ex hoc mundo quemadmodum sapientiam, ita bonitatem divinam proferibentes.

**Dependen-
tia nexus
rerum a
bonitate
Dei.**

§. 740.

Nexus rerum in hoc universo bonitate divina constitutus est. Etenim nexus rerum in hoc universo est vel coëxistentium, vel successivorum (§. 53. 54. *Cosmol.*). Consistit vero nexus coëxistentium in dependentia finis a medio, nexusque successivorum tam in dependentia finis a medio, quam in dependentia actionis causæ efficientis a fine (§. 665.). Quoniam itaque in finium numero sunt quoque omnes rerum tam naturalium (§. 648.), quam artificialium usus (§. 649.); bonitati vero divinæ acceptum referri debet, quod in hoc universo unum inserviat usibus alterius (§. 739.): quin bonitatis divinæ sit, quod hunc potius fecerit rerum nexum quam alium, dubitandum non est. Apparet adeo, præsentem rerum nexum bonitate divina esse constitutum.

Bonitate divina constituitur nexus, quatenus ea influit in decretum ad actualitatem eundem perducendi; ita ut Deus voluerit hanc potius existere rerum seriem, in qua res hoc modo connectuntur, quam aliam quameunque, in qua connectuntur alio modo. Neque enim ideo fieri potest, ut res hoc modo connectantur, quia Deus summe bonus, cum rerum nexus pendeat ab actu intellectus necessario & concipiat in Deo ante decretum (§. 311. 434.); sed ideo existunt res hoc modo inter se connectæ, adeoque hic rerum nexus actu datur, quia Deus summe bonus est.

§. 741.

**Dependen-
tia nexus
rerum a sa-
pientia &
bonitate
simul.**

Quoniam nexus rerum in hoc universo bonitate divina constitutus est (§. 740.), & eundem sapientia divina esse constitutum supra evicimus (§. 666.); ideo patet, *nexum rerum in hoc universo sapientia ac bonitate divina simul constitutum esse.*

Non

Non repugnat, nexum rerum esse constitutum sapientia Dei & bonitate ejusdem simul, & tamen unum absque altero demonstrari posse, ita ut vi propositionis præcedentis intelligatur, hunc esse rerum nexum, quia Deus est summe bonus, non attenda sapientia ejus, & vi superioris (§. 666.) pateat, hunc dari rerum nexum, quia Deus sapientissimus, non attenda bonitate ipsius. Etenim vi bonitatis voluntas divina determinata est ad eum rerum nexum eligendum, quo earundem perfectionem maxime promovere posset & abundantiam bonitatis suæ, quæ per multiplices actus se exferere potest, manifestare valeret: ast vi sapientiæ finem hunc particularem subordinavit ultimo, gloriæ scilicet suæ manifestationi, & hunc rerum nexum judicavit fini, quem intendit, convenientissimum. Atque adeo patet non minus sapientiam, quam bonitatem divinam influere in actum nexus præsentis rerum, etsi neutra influat in possibilitatem ejusdem; influere autem in actualitatem diverso modo.

§. 742.

Bonitati divinæ acceptum ferendum, si qui homines nobis quomodocunque inserviant, seu quid boni conferant. Et Deus sit enim bonitatis divinæ est, quod in hoc universo unum inserviat bonis erga ut usibus alterius (§. 739.). Quamobrem etiam si homo unus & alius alteri quomodocunque inservire studet, consequenter boni quid ipsi confert, id bonitati divinæ acceptum referri debet.

Nimirum ad præsentem rerum nexum spectant quoque actiones hominum: quod igitur bonitati divinæ tribuendum circa actiones creaturarum ceterarum, id eidem quoque adscribendum quoad actiones hominum. Deus bonitatem suam non exercet immediate, sed per creaturas, quas eum in finem fecit. Quid ergo mirum, quod hominum quoque opera utatur, quos non minus fecit, quam res ceteras? Ceterum modi, quibus Deus se bonum nobis præbet, probe considerari merentur, tum ut bonitatem divinam penitus inspiciamus,

mus, tum ne in eundem injurii hominibus tribuamus, quod Deo acceptum referendum, nostroque erga Deum officio desimus. Non igitur piget veritates obvias, sed arduas, nec ob oscitantiam communem satis agnitas stabilire: neque enim ad pompam, sed ad utilitatem generis humani philosophamur.

§. 743.

*Incompre-
hensibilitas
magnitu-
dinis boni-
tatis di-
vine.*

Nemo hominum bonitatis divinae magnitudinem comprehendere valet, seu magnitudo bonitatis divinae est omni homini incomprehensibilis. Cum bonitas consistat in pronitate ad aliorum perfectionem promovendam (§. 695.), consequenter ad bona aliis conferenda (§. 370.); magnitudo bonitatis aestimanda venit, tum ex magnitudine bonorum, quae conferuntur in alios, tum ex multitudine eorum, in quae bona conferuntur. Enimvero totum universum, quocunque te vertas, est plenum bonitatis divinae (§. 738.). Quamobrem bonitatis divinae magnitudinem nemo animo concipere valet, nisi qui totum universum penitus cognoscit, ut entia singula, quae per omne tempus in eodem existunt, distincta notione sibi repraesentare valeat & quidnam in singula boni Deus conferat perspiciat. Patet autem per se, quam sit exigua pars eorum, quae in hac serie rerum contenta nostram cognitionem subeunt, & quantum confusionis insit ideis illarum rerum, quae cognoscimus. Quare manifestum est, neminem mortalium magnitudinem bonitatis divinae sibi distincte repraesentare posse. Quoniam itaque id homini incomprehensibile, quod quomodo sit, vel esse possit, sibi minime repraesentare valet (§. 170.); magnitudo bonitatis divinae eidem incomprehensibilis est, seu, quod perinde est, nemo hominum magnitudinem bonitatis divinae comprehendere valet.

Ante evicimus (§. 730.), bonitatem divinam ipsam esse incomprehensibilem, quod adeo verum est, ut vi demon-
stra-

strationis subsistat propositio, etiamsi de individuo quodam seu ente singulari intelligatur. Cum illa autem incomprehensibilitate minime confundenda est incomprehensibilitas magnitudinis bonitatis divinæ, quatenus ea per totum hoc universum diffunditur, de qua loquitur præsens propositio. Usui hæc est ad præcavenda præcipitata de magnitudine bonitatis divinæ judicia, illis familiaria, qui bonitatem divinam intra genus humanum, quod terram hanc incolit, coarctant & ex eorum fati ex suo ingenio dijudicatis de magnitudine bonitatis divinæ statuunt. Quodsi omnem bonitatem divinam per totum hoc universum diffusam emetiri nobis daretur, nullum nobis superest dubium vi eorum, quæ de summa hujus mundi perfectione (§. 326.) & de bonitate divina summa demonstrata sunt (§. 699.), quin quam distinctissime agnoscere simus, bona prædominari malis, nec ex prædominio mali contra bonitatem divinam argumentum peti posse. Quoniam vero vastitatem hujus universi & multitudinem rerum, quæ bonitatem divinam experiuntur, animo concipere non valet, nisi qui recentiora Astronomorum de hoc mundo adspicibili inventa & Physicorum de subtilitate rerum in natura existentium detecta perspecta atque cognita habet; opportune hic indicamus usum Physicæ in magnitudine bonitatis divinæ repræsentanda, quantum sufficit, ut toti in ejus admirationem rapiamur.

§. 744.

Deus in S. S. dicitur bonus eodem sensu, quo nos eundem Bonitas summe bonum esse demonstravimus. Ita Deus dicitur ברוך bo- Deo tribu- nus Psalm. CVI. I. CVII. I. CXVIII. I. Et bonitas Dei ibi- tain S. S. dem proponitur tanquam motivum ipsum celebrandi. Ut vero ostendatur, quod sit bonus, recensentur bona, quibus Israëlitas affecit in deserto, cum Moses eos eduxisset ex Egypto, & auxilium describitur, quod Deus fert confidentibus in ipso, Deus adeo bonus dicitur, quod bona confert hominibus. Quemadmodum vero locis citatis Deus celebratur, quod bonis afficiat homines; ita non minus laudatur, quod bona quo-

que conferat in creaturas alias, veluti quod terram pluvia irriget, ut herbas ac plantas proferre possit, & quod bestis det pabulum pullisque corvorum escam *Psal.* CXLVI. 8. 9. Juxta S. S. itaque ad bonitatem divinam quoque referri debet, quod Deus bona conferat entibus aliis, seu eorundem perfectionem, etiam accidentalem, promoveat. Ad perfectionem enim terræ accidentalem facit, quod apta reddatur ad plantas proferendas; quemadmodum ad perfectionem animalium spectat vita atque sanitas, quæ pabuli beneficio conservatur. Ex his igitur intelligitur Deum in S. S. dici bonum erga alios, quatenus pronus est ad aliorum entium perfectionem siue essentialem, siue accidentalem promovendam. Et sane *Genes.* I. 31. quemadmodum supra abunde exposuimus (§. 406.), Deus dicitur omnia fecisse optima, quatenus entibus singulis dedit perfectionem essentialem, quæ ipsis convenit, & eum fecit rerum nexum ac naturæ ordinem, ut earum quoque perfectio accidentalis promoveatur, quantum fieri potest, salvo scilicet naturæ ordine. Enimvero nobis bonus dicitur erga alios, qui pronus est ad aliorum perfectionem promovendam (§. 695.), & ex eo, quod Deus enti cuicunque tantundem confert boni, quantum salva sapientia ipsius fieri potest (§. 698.), deduximus, ipsum esse summe bonum eodem sensu, ita ut majorem bonitatem concipi repugnet (§. 699.). Quare patet, juxta S. S. Deum dicendum esse bonum eodem prorsus sensu, quo nos eundem summe bonum esse probavimus.

Quoniam juxta S. S. bonitatem Dei nobis representare debemus per bona, quibus afficit creaturas, ac præsertim homines & in his præcipue eos, qui spem ac fiduciam suam in ipso collocant eumque timent; in eadem vero passim recensentur bona, quæ Deus in creaturas conferre solet; hæc ipsa sedulo expendere tenemur, ut notionem bonitatis divinæ consequamur & clariorem, & uberiores: quod ubi facere libuerit, deprehendemus diversa illa bonorum genera, quæ ad bonitatem

nitatem divinam tanquam ad fontem suum paulo ante reduxi-
mus (§. 733. & seqq.), etiam S. S. probari & in eadem a boni-
tate divina derivari. Nostrum non est ea particulatim per-
sequi: sufficit in genere annotasse, quæ veritati consentanea
reperiet monitis nostris aurem benignam præbiturus. Nos
conformitatem notionum nostrarum cum S. S. evincimus. Sed
non singula dogmata, quæ ex eadem cum iis, quæ ex prin-
cipiis rationis a nobis demonstrantur, consentientia deduci
possunt, ex scripturæ dictis probare intendimus. Id enim
iis relinquimus, qui Theologiam revelatam tradunt, quam
cum naturali combinari ab instituto nostro alienum est. Et
eadem ratio est, cur non multa S. S. loca cumulemus, etiamsi
cumulatio usui esse poterat, quippe non semper reprehenden-
denda.

§. 745.

Bonitas Dei juxta S. S. summa atque immensa est. Cum Bonitatis
quidam ad Christum accedens ipsum appellaret magistrum bo-
num; respondit is neminem esse bonum nisi unum, nempe *magnitudo*
Deum, *Matth. XIX. 16. 17.* Quoniam qui Christum magi-
strum bonum appellabat, ab eo doceri desiderabat, quid fieri *juxta S. S.*
a se debeat, ut vitæ æternæ compos reddatur; ipsum uti-
que bonum dicebat in relatione ad alios. Quamobrem cum
ex interrogatione responsionis interpretatio fieri debeat, quia
interrogans non aliter accipit mentem respondentis, quam
quatenus interrogationi suæ convenit; dicendum omnino est,
Christum quoque Deum appellare bonum in relatione ad en-
tia alia. Quoniam tamen Christo solenne semper fuit, ut
omnem instruendi alios de Deo ac voluntate ejus occasionem
ambabus, quod dicitur, manibus arriperet; nil obstat, quo-
minus concedamus, Deum quoque in se spectatum a Christo
vocari bonum, præsertim cum bonitas Dei absoluta eluceat ex
doctrina, quam proponit. Docet enim adolescentem *vers. 21.*
qui ad perfectionem adspirare videbatur, quid facere debeat,
ut

ut certum ac minime fallax in se experiatur signum perfectionis acquisitæ. Constat vero Christum inculcasse, quod perfecti esse debeamus, quemadmodum Deus perfectus est *Matth. V. 48.*, adeoque bonitatem, quæ Deo competit in se spectato, in exemplum nobis proponere (§. 370.). Quicquid hujus sit, sufficit nobis in præsentem, Deum a Christo appellari bonum in relatione ad entia alia, quæ præter eum existunt. Hanc igitur bonitatem relativam, quæ in pronitate ad promovendam aliorum perfectionem (§. 695.), aut, si mavis in facilitate bonis alios afficiendi consistit (§. 370.), & quam juxta S. S. Deo competere & sub hoc nomine tribui modo evicimus (§. 744.), non nisi uni Deo propriam esse Christus pronunciat. Affirmat enim, unum tantummodo esse ens, quod bonum erga alios dici mereatur, & hoc ipsum esse Deum. Negat adeo hominem ullum bonum erga alios dici posse, si bonitatem ejus referas ad divinam. Constat Christum ipsum homines quosdam vocare bonos, eosque opponere malis, qui inimico sunt in alios animo *Matth. V. 45. & seqq.* Quamobrem nisi contra omnem æquitatem in interpretando etiam in humanis (§. 921. *Log.*) contradictionem admittere volueris, ad Deum solum bonum applicanda sunt, quæ de Deo juxta S. S. solo sapiente (§. 694.) adstruximus. Quemadmodum itaque ibidem ostendimus, Deum solum dici sapientem, quatenus ejus sapientia est omni sapientiæ entis cujuscunque finiti heterogena, atque hinc deduximus immensitatem ejus; ita quoque affirmandum, eam esse bonitatem divinam, ut bonitas entis cujuscunque finiti sive absolute, sive in relatione ad entia alia spectata pro nihilo reputanda sit, atque adeo bonitatem divinam esse omnium maximam, quæ concipi potest, prorsusque immensam. Hæc vero interpretatio tanto evidentior, quod contextui congrua deprehendatur. Etenim arrogans iste adolescens sibi jam videbatur fecisse omnia, quæ lege divina præcipiuntur, neque
adeo

adeo quidpiam deesse, quod ad sui perfectionem desiderari possit. Præcipiebat igitur Christus, ut omnia, quæ possidebat bona, venderet & erogatis in pauperes pecuniis se sequeretur, ipsum convicturus, quod bonitatem in alios nondum summam possideret, nec bona æterna caducis præferret. Unde liquet, ipsi de bonitate Dei loquenti non modo sermonem esse de bonitate Dei essentiali, vi cuius & perfectissimus est, & se ipsum talem probat in omnibus actionibus suis, sed & de bonitate sua erga alios, vi cuius tantundem boni confert in creaturas, quantum moraliter possibile, hoc est, summa sui ipsius perfectione salva conferre potest. Nullum igitur dubium restat, quin Christo doctore Deus sit non modo summe bonus in seipso, sed etiam erga alios.

Ceterum quæ de profundo S. S. sensu annotavimus, cum solum Deum juxta eandem sapientem ostenderemus (§. 694.); ea quoque hic inculcanda sunt, ubi solum Deum bonum esse docemus. Nimirum luculento hoc exemplo palam fit, quantum lucis veritatibus mixtis affundat ratio, ubi intelligere voluerimus, quæ de iis docet S. S. ut adeo valde opportunum sit rationis ac revelationis, Philosophiæ ac Theologiæ connubium, nunquam satis deprædicandum, nunquam satis commendandum Scripturæ sacræ interpretibus.

§. 746.

Deus juxta S. S. amat res omnes tam animatas, quam inanimatas, imprimis vero homines. Deus dicitur Psalm. universalis CXLV. 9. כבֹּרֵךְ bonus erga omnia & misereri omnium operum erga omnes suorum. Qui bonus est in alterum, ipsum amat (§. 700.). creaturas Juxta S. S. igitur Deus amat omnia, scilicet omnia opera sua, juxta S. S. quemadmodum ex contextu apparet, hoc est, ea omnia, quæ fecit. Fecit autem Deus omnia, quæ sunt in mundo Gen. I. & II. res non minus animatas, quam inanimatas, & in illis quoque hominem. Deus itaque amat res omnes tam animatas; (Wolffii Theol. Naturalis) T t t t quam

quam inanimatas, ac in his quoque hominem. Porro vocabulum Hebraicum מֵתָא, quod per miserationem vertit vulgatus, illum animi affectum denotat, quem commiserationem diximus (§. 687. *Psychol. empir.*). Quodsi quis alterius commiseratur, is eum amat (§. 692. *Psychol. empir.*), & animalium quoque commiseramur (§. 701. *Psychol. empir.*), immo etiam rerum inanimatarum quasi commiseramus, si easdem amamus (§. 702. *Psychol. empir.*). Deus igitur juxta S. S. amare dicendus est res omnes, quas fecit, tam animatas, quam inanimatas, & in istis quoque homines. Quod vero homines imprimis amet, docet Christus *Joh. III. 16.* Et Johannes I. Epist. III. 1. Dei erga nos amorem prädicat & cap. IV. 19. nos hortatus, ut Deum amemus, hoc utitur motivo, quod primus nos dilexerit.

Obiter monemus apparere quoque ex notione commiserationis rerum inanimatarum, & animantium brutorum, quam sit philosophia nostra utilis ad disinctam S. S. interpretationem, sive ipsam verborum intelligentiam, sive veritatum a se invicem dependentiam spectes.

747.

Voluntatis Deus non vult hominum infelicitatem, sed vult eos esse felices juxta S. S. Ipsemet Deus *Ezech. XXXIII. 11.* omni assentientia severatione affirmat se nolle mortem impii, sed velle, ut convertatur impius a via sua & vivat. Sumo, quod nemo Interpretum S. S. in dubium vocat, mortem, cui obnoxius fit homo peccando, designare omnem infelicitatem, in quam sese precipitem dat; sicuti e contrario vita denotat felicitatem, quae bene ac recte agentem comitatur. Quamobrem patet, Deum disertis verbis declarare, quod non velit hominem esse infelicem, sed quod velit eum esse felicem.

Si cui dubium ex eo oriatur, quod Deus in S. S. dicatur punire impium, adeoque mortem in poenam decernens

neces-

necessario infelicitatem hominis velle debeat hic equidem nondum est locus objectionem removendi, facilis tamen ad eandem responsio. Nulla scilicet consequentia infertur: Deus punit hominem impium, & pœnam subiens redditur is infelix. Ergo Deus vult hominem esse infelicem. Possunt enim subesse rationes aliæ, cur Deus hominem puniat, etsi eum velit esse felicem, adeoque mallet eum a pœna liberum, siquidem alia id paterentur. Obtinet sane idem in civitate, ubi Princeps vult salutem subditorum, ac ideo pœnam decernit in legum transgressores, pœnamque exequitur amorem omnium seu totius civitatis præferendo amoris unius, qui sua culpa se reddit pœnæ obnoxium, a qua eum liberum esse mallet Princeps. Hæc probe notari velim, tum ut a pervertendo sensu verborum abstineamus, si qua extra systema non satis clare enunciata videntur; tum ut nobis caveamus, ne ad fingendas contradictiones nimis faciles simus.

§. 748.

Homo se reddit juxta S. S. infelicem abusu libertatis. *Aper-* Infelicitas
te hoc docetur in S. S. Ita Moses *Deut.* XXXI. 19. testes ap- *hominum*
pellat cœlum atque terram, quod Israëlitis proposuerit vitam *unde iuxta*
& mortem, benedictionem & maledictionem, atque vitam eos *S. S.*
eligere jubet. Constat per modo dicta ad propositionem præcedentem per vitam intelligi felicitatem, per mortem infelicitatem omnem. Quod si ergo ex mente Moïsi in hominis potestate positum est, ut vitam eligat; abusu omnino libertatis infelicem sese reddit. Docet autem idem Moses *Deut.* XI. 26. quomodo benedictionis, quomodo maledictionis fiant participes; nimirum illius eos fore compotes, si mandatis Dei obdixerint; huic evasuros obnoxios, si non obdixerint. Quemadmodum itaque homo libertate sua abutitur, dum potius ea facit, quæ Deus prohibet, quam quæ præcipit, ac ea potius omittit, quæ præcipit, quam quæ prohibet; ita abusu quoque libertatis infelix evadit.

Poterat propositionis præsentis veritas clarissime ostendi ex iis, quæ de lapsu hominis eumque secuta miseria narrat S. S. ac doceri istis S. S. locis, quibus culpa sua infelices fieri dicuntur homines. Sed hæc iis relinquimus, qui veritates revelatas ex instituto demonstrant.

§. 749.

*Directio
mali ad bo-
num finem
juxta S. S.
bonitatis
divine.*

Directio mali ad bonum finem juxta S. S. tribuenda bonitati divine. Probatur hoc ex historia Josephi a fratribus in servitutem venditi, qua supra directionem mali ad bonum finem illustravimus (§. 688.). Cum enim Josephus se agnoscendum præberet fratribus suis *Genes. XLV. 5.* Nolite, inquit, pavere: neque durum esse videatur, quod vendidistis me in his regionibus: pro salute enim vestra misit me Deus ante vos in Ægyptum. Mox addit *vers. 4.* Non vestro consilio, sed Dei voluntate huc missus sum, scilicet ut tempore famis haberent pater ipsius cum fratribus, unde viverent. Patet adeo bona, quæ ex malo consequiebantur, tribui Deo auctori, mala, quæ permittit, in bonum finem dirigenti. Bonorum vero collatio ad bonitatem divinam cum referenda sit (§. 697.) ; bonitati utique divinæ ex mente Josephi tribuenda est directio malorum physicorum atque moralium in bonum finem. Quamvis vero in S. S. tantummodo recensatur, quænam de directione malorum in bonum finem senserit Josephus & quemnam experientiæ domesticæ fecerit usum; cum tamen constet, ea ad nos erudiendos litteris consignata esse *Rom. XV. 4.* quin quæ sensit Josephus, sit ipsa mens S. S. dubitandum non est. Recte itaque ex verbis Josephi probatur directionem mali ad bonum finem juxta S. S. tribuendam esse bonitati divinæ.

Quodsi dicas, recenseri quoque alia aliorum dicta, quæ pro mente S. S. ideo venditari non possunt, quod in eadem narrentur, cum subinde ea a veritate aliena esse appareat; tenendum est, distinguendum esse inter ea, quæ vera sunt, & quæ

& quæ falsa; quæ sunt bona, & quæ mala. Quodsi recenseantur, quæ veritati consentanea demonstrari possunt, quin approbentur ab autore S. S. dubitari nequit. Quodsi vero enarrentur aliorum dicta, quæ a veritate & honestate aliena agnoscuntur ex principiis rationis, quod ab autore S. S. improbentur, non minus extra omnem dubitationis aleam positum est. Utrumque probatur ex verbis Apostoli, ad quæ provocavimus in evincenda veritate propositionis præsentis. Unde patet usus philosophiæ in demonstrativa S. S. interpretatione. Si excipias, hoc pacto sensum S. S. fore ambiguum iis, qui philosophia minime imbutum habent animum; exceptio ista parum me movet. Multa enim sunt, quæ regerere possumus. Etenim S. S. interpretatio, præsertim quoad loca difficilia, qualia ipse agnoscit Apostolus *2 Petr. III. 16.* non est cujusvis. Deinde nonnullarum veritatum mixtarum evidentia adeo obvia est, ut eæ citra demonstrationem agnoscantur interno veluti quodam sensu, ex confusis notionibus communibus enato, quibus conformes percipiuntur. Ac præterea ex ipsius narrationis circumstantiis elucet plerumque, num approbandi, vel improbandi animo narrentur ab autore sacro. Sane in præsentē casui secundo & tertio locus est. Etenim cum nemo non agnoscat, directionem malorum ad bonum finem Deo esse tribuendam, qui providentiæ divinæ aliquam notionem habet, cumque ejusdem ad bonitatem divinam relatio loquatur usum manifestum in supprimendis odio ac vindictæ cupidine, maximopere in S. S. omnibus injuncta *Matth. V. 44.* quam sint veritati consentanea, quæ a Josepho dicuntur, in dubium non vocabit nisi providentiæ divinæ contemtor & vindictæ cupidinis propugnator. Qui igitur admittit, quæ in S. S. de providentia divina & animo a vindictæ cupidine alieno inculcantur, nec verba Josephi nisi vera ex templo agnoscit. Deinde non alio fine ab autore sacro narrantur, quæ dixit Josephus, quam ut exemplo Josephi doceamur, quomodo injurias ab aliis nobis factas repræsentare nobis debeamus, animum a vindictæ cupidine liberaturi. Quamobrem ex intentione narrantis, quam ex verbis Apostoli *Rom. XV. 4.* colligimus, cuivis statim pater, approbari ea, quæ

dixit Iosephus. Velim ad hæc animum advertant, quotquot S. S. aliis interpretari debent. Nostrum enim jam non est nisi attentionem eorum excitare, ut fiant oculatiores; non vero exemplo interpretationis præire, quas quippe ambages præsens non fert institutum.

§. 750.

*Ufus rerum
naturalium
iuxta
S. S. ad bo-
nitatem di-
vinam refe-
rendus.*

Bonitati divinæ tribuendum juxta S. S. quod in hoc universo unum inserviat usibus alterius. Docet hoc Christus cum *Matth. V. 44. & seqq.* nos ad amorem inimicorum adhortaturus exemplum proponit ipsius Dei, ut idem imitemur. Jubet enim nos benefacere his, qui oderunt nos, & orare pro iis, qui persequuntur & calumniantur nos. Addit vero hanc rationem, quod Deus Solem suum oriri faciat super bonos & malos, & pluat super justos & injustos. Et mox præcipit, nos perfectos esse debere, sicuti Deus, pater noster cælestis, perfectus est. Usus adeo Solis, quem experimur in his terris, usumque pluviz in numerum beneficiorum refert divinorum. Quamobrem cum beneficia, quæ Deus hominibus præstat, a bonitate divina proficiantur (§. 695.); ideo liquet Christum bonitati divinæ tribuere omnem rerum naturalium, quem sibi invicem præstant, usum.

Apparet adeo theorema superius (§. 739.), quod paradoxum videri poterat nonnullis, qui dependentiam rerum a Deo non satis perspectam habent, esse doctrinæ Christi conformem. Enimvero quoniam Christo probatur conclusio, ejus menti quoque conformia esse debent principia omnia, a quibus conclusionis veritas pender, definienda eo modo, quo demonstrationem in sua principia resolvere docuimus: id quod & in aliis casibus notandum. Ceterum hinc simul patet ipsum quoque Christum nexum rerum naturalium a bonitate divina derivare, quemadmodum supra fecimus (§. 740.).

§. 751.

§. 751.

Bonitati divinae acceptum ferendum est juxta S. S. si quid boni in nos confertur ab hominibus. Quoniam S. S. Deo auctori tribuit instar beneficii rerum naturalium usum, quem nobis præstant (§. 250.); eidem quoque accepta ferenda sunt beneficia ejus autoritate, quæ ab hominibus in nos conferuntur. Etenim non alia de causa usus rerum naturalium pro beneficiis a Deo præstitis haberi possunt, quam quod Deus, cui ab æterno cognitum perspectumque fuit, quemnam usum res naturales sint habituræ (§. 232.), res hæc existere voluit, ut eundem usum præstarent (§. 648.). Enimvero novit Deus non minus ab æterno, quænam beneficia homo unus in alterum sit collaturus (§. 233.). Quamobrem non minus dicendum est, quod homines existere voluerit, ut aliis beneficia ista exhibeant.

*Beneficia
hominum
Deo auctori
tribuenda
juxta S. S.*

Idem etiam ostenditur hoc modo. Josephus tempore famis patri fratribusque suis alimenta præbebat, ne fame perirent vel ob annonæ caritatem ad incitas redigerentur. Beneficium hoc erga parentem ac fratres Deo auctori acceptum fert. Etenim *Gen. XLV. 5.* Pro salute, inquit, vestra misit me Deus ante vos in Ægyptum. Addit *vers. 7.* Præmisit me Deus, ut reservemini super terram & escas ad vivendum habere possitis: & *vers. 8.* Dei voluntate huc missus sum. Reddit Josephus ipsemet rationem, cur hoc beneficium sit Deo auctori seu tanquam causæ primæ tribuendum, ita ut Deus censei debeat illis per ipsum benefacere. Ait nimirum: Deus fecit me quasi patrem Pharaonis, & dominum universæ domus ejus, ac principem in omni terra Ægypti. His autem verbis indigitat, se ideo benefacere posse patri atque fratribus, quod Deus ipsi largitus fuerit benefaciendi facultatem. Et ex eo, quod Deus ipsi dederit hanc facultatem, sine qua benefa-

ere

cere non poterat, infert, Deum ipsis per se benefacere, propterea quod Deus nemini dat facultatem benefaciendi nisi eo fine, ut aliis benefaciat, quibus hoc modo prospici vult.

Probatio posterior recidit in priorem, quemadmodum perspicaciores facile vident. Si enim homo beneficium exhibet homini, id Deo acceptum referri debet ex mente Josephi, quia Deus dedit facultatem benefaciendi eo fine, ut beneficium exhibere posset. Exinde autem colligitur, usus rerum naturalium esse in numero beneficiorum divinorum, quod Deus res illas, quæ hunc usum habere possunt, eo fine produxit, ut eundem aliis præstarent, & quidem iis, quibus inserviunt. Veritas hæc & rationis, & Scripturæ auctoritate nixa amplissimi est usus in philosophia morali, ubi doceri debet, quomodo & benefactores benefaciendo, & beneficiarii gratiam illis pro beneficiis acceptis rependendo gloriam divinam illustrare debeant. In genere equidem hætenus agnitum est, hominem in omnibus suis actionibus gloriam Dei illustrare debere; ast quomodo idem fieri debeat in quovis actionum genere, hætenus ne quidem a Theologiae moralis conditoribus, nedum a philosophiæ moralis autoribus clare ac distincte expositum fuit. Amplissimum adeo docendi campum suo tempore in philosophia practica ingrediemur, ubi officia hominis erga Deum ex instituto sumus explicaturi. Ibidem nobis usui erunt singula, quæ in Theologia naturali de Deo demonstrantur, ob amplissimum istum prorsusque eximium usum probe perpendenda & animo infigenda.

§. 752.

Bona omnia juxta S. S. ad Deum autorem referenda.

Juxta S. S. bonitati divinæ acceptum ferendum, si homo ponitur in iis circumstantiis, sub quibus bonorum tam physicorum, quam moralium fit compos. Docet idem exemplo suo Josephus Gen. XLV. 5. & seqq. Etenim in Ægypto ad maximam dignitatem & potestatem evectus erat, & non modo grato in parentem, qui ipsum præ ceteris fratribus suis impense
con-

constanter amaverat, animo, verum etiam amore inter fratres, qui ipsum summa injuria affecerant, singulari, & patrem, & fratres beneficiis omnibus mactabat, quæ erant in potestate ipsius posita. Dignitas & potestas, qua fruebatur, erant bona physica (§. 370. 373.); gratus in parentem animus, amor fratrum, animus ab omni vindictæ cupidine alienus, studium benefaciendi non minus inimicis, quam amicis bona erant moralia (§. 370. 374.). In iis adeo circumstantiis positus erat, quibus & bonorum physicorum, & moralium compos reddebatur. Id vero Deo acceptum ferebat. Aiebat enim, se non fratrum consilio, qui ipsum mercatoribus in Ægyptum abeuntibus vendiderant, sed Dei voluntate missum in Ægyptum, & Deum ipsum fecisse quasi patrem Pharaonis & dominum universæ domus ejus, ac principem in omni terra. Similiter affirmabat, pro salute patris & fratrum suorum se missum in Ægyptum, & ad tantam dignitatem potestatemque evectum esse, ut & gratum in parentem, & beneficium erga fratres suos sese præbere, ac bonum pro malo ipsis rependere posset.

Quod exemplo suo docet Josephus, idem verbis inculcat Paulus 1. Cor. IV. 7. Quid habes, inquit, quod non accepisti? Si autem accepisti, quod gloriaris, quasi non acceperis? Propositum enim est Apostolo convincere Corinthios, quod omne bonum, quo fruebantur, Deo auctori acceptum referre debeant, qualecunque tandem illud fuerit. Non acquiescendum igitur in causis secundis, sed exemplo Josephi progrediendum est ad causam primam, Deum, quippe cujus sapientia (§. 666.) & bonitate nexus rerum constitutus (§. 740.). Quod si igitur omnia bona, qualiscunque fuerint, sive animi, sive corporis, sive fortunæ, ad Deum autorem referre debemus, nihil autem nostræ industriæ vel aliorum favori tribuere tenemur; sequitur omnino, Dei bonitati tribuendum esse, quod in iis
(Wolfii Theol. Naturalis.) Uu uu cir-

circumstantiis sumus collocati, sub quibus bonorum physicorum & moralium compotes evasimus.

Idem quoque hoc modo probari poterat. *Jacobus c. I. 17.* omne donum bonum & omne munus perfectum superne a Deo descendere, affirmat. Quicquid boni homini obtingit, in eo dependet a causis secundis, in quarum numero ipse quoque est, quatenus operam ac industriam suam in iis acquirendis collocat. Hæc adeo manifesta sunt, ut ignota nemini esse possint, nisi qui animum ad ea advertere recusat, quæ contingunt quotidie, etsi nec difficile foret idem a priori demonstrare. Quod si ergo insuper habitis causis secundis ad Deum tanquam datorem omnis boni recurrere debemus, alio sane pacto is dator boni agnosci nequit, quam quatenus vi sapientiæ ac bonitatis suæ hunc rerum nexum constituit, ac nos in præsentium rerum serie in iis circumstantiis posuit, sub quibus bona physica & moralia nobis obtingunt. Juxta *Jacobum* igitur Dei bonitati tribuendum, quod in iis collocemur circumstantiis, sub quibus bonorum participes reddimur.

Quæ ad propositionem præcedentem de usu ejus in praxi morali & theoria officiorum erga Deum dicta sunt, ad præsentem quoque trahenda. Ceterum propositio præsens principium adeo fecundum est in dijudicandis iis, quæ ad bonitatem divinam referenda sunt, ut non occurrat eidem tribuendum, quod per ipsum non cognoscatur. Quamobrem non laboramus amplius de evincendo consensu S. S. cum ratione quoad cetera bonitatis divinæ dijudicandæ principia superius stabilita. Obiter vero observamus, nonnisi per nexum rerum in hoc universo, quatenus eum tanquam a Deo dependentem juxta superiora agnoscimus, intelligi posse, quomodo Deo tribuenda sint omnia corporis, animi ac fortunæ bona, nihil verò nobis, nihil hominibus aliis, nihil casui. Quibus adeo rerum nexus sudes in oculo est, illi satis superque & mentis suæ hebetudinem, & superficialium veritatum in sacro codice contentarum intellectum produunt.

§. 753.

Juxta S. S. totum universum est plenum bonitatis divine, Diffusio
 Nimirum *Psaltn. CXIX. 64. ex versione vulgati interpretis bonitatis*
 terra dicitur plena misericordia Domini, aut ex versione *Castali, divine.*
onis benignitate Dei plenus est orbis terrarum. In textu Hebræo
 extat vocabulum *טוֹר*, quod bonitatem denotare eo sensu ac-
 ceptam, quo nos vocabulum sumimus (§. 695.), ex *Gen. XXIV.*
12. 14. 49. abunde patet. Cum enim ibidem narretur, quo-
 modo servus Abrahami jussu ejus in uxorem duxerit Isaac fi-
 lio Rebeccam; hic nam directionem divinam hujus negotii,
 tum consensum agnatorum Rebecce refert ad id, quod *טוֹר*
 appellatur Hebræis. Quoniam servus sibi firmiter persuade-
 bat, ducta Rebecca ab Isaac in uxorem, eundem fore feli-
 cem; tam directionem negotii divinam, quam consensum a-
 gnatorum Rebecce in numerum bonorum referebat, quæ in-
 herum suum conferri poterant. Unde cum facilitas aliis bona
 conferendi sit id, quod bonitatis nomine compellamus (§. 695.
 370.); patet vocabulum *טוֹר* ab Hebræis usurpari ad denotan-
 dam bonitatem eo sensu acceptam, quo nos idem sumimus.
 Quamobrem in sacris terra dicitur plena bonitate Dei eo sen-
 su, quo nos idem evicimus (§. 738.). Equidem in textu He-
 bræo He demonstrativum digitorum quasi intendit ad tellurem,
 ut de ea sola intelligendum videatur ex mente S. S. quod plena
 sit bonitate divina. Enimvero cum terra ex mente S. S. non
 possit dici plena bonitate divina, nisi quatenus in numerum
 beneficiorum divinorum referuntur usus rerum naturalium (§.
 750.), beneficia ab hominibus nobis præstita (§. 751.) & omnes
 circumstantiæ, a quibus bona omnino corporis ac fortunæ pen-
 dent (§. 752.); quin bonitas Dei S. S. non invita diffundatur
 quoque eodem modo per ceteros mundi globos, consequen-
 ter per totum universum, minime dubitabit, qui ex Astrono-

mia didicit, quznam inter corpora mundi totalia similitudo intercedat.

Scriptura sacra non excitat nisi attentionem ad ea, quae nobis observari possunt. Quamobrem cum observationes communes ultra superficiem Telluris sese non extendant, si corpora partialia spectes; de diffusione bonitatis divinae verba faciens non nisi Telluris mentionem injicit. Quod vero quae de Tellure dicuntur, ad corpora mundi totalia cetera quoque applicentur, patet ex *Psal.* LVII. II. ubi legitur misericordiam Dei magnificatam esse usque ad coelos, seu quemadmodum *Castalio* vertit, clementiam Dei usque ad coelos porrigi. In textu Hebræo extat vocabulum *תֵּן*, quod reperitur in loco antea citato, quo terra dicitur plena bonitate divina. Et de hac dicitur, quod magna facta sit usque ad coelos. Unde patet bonitatem Dei, quae plena est terra, magnam quoque esse in ipsis coelis. Ostendimus supra (§. 406.), coelum & terram phrasi S. S. denotare totum hoc universum, aut, si mavis, mundum integrum. Quamobrem cum bonitas divina, quae plena est terra, ita ut, quocunque te vertas, bonitatis divinae vestigia deprehendas, non minus magna sit in coelis, quam in Tellure; auctoritate S. S. dicendum omnino est, coelos tam plenos esse bonitate divina, quam plena eadem est terra, consequenter totum universum esse plenum bonitate divina, ita ut, si ad quaecunque universi spatia accedere posses, ibidem perinde ac in Tellure ubivis bonitatis divinae vestigia sis deprehensurus.

Nimirum juxta S. S. bonitatis diffusionem & magnitudinem cogniturus inquirere debes, qualis ea deprehendatur in his terris, ac deinde concludere teneris, si inaccessa mundi corpora accedere & universum mundi spatium obtutu tuo comprehendere valeres, te quoad bonitatem divinam inter Tellurem ac cetera mundi corpora totalia nihil prorsus discriminis reperturum. Multa in *Psalms* continentur, quibus

bus doctrina de bonitate divina illustrior effici poterat; sed theorematum ista iis extrahenda relinquimus, qui Theologiam revelatam tractant.

CAPUT V. De Creatione & Providentia divina.

§. 754.

Si mundus aliquis materialis ad actum perducendus, elementa rerum materialium ad actum perducenda sunt. Quanam in producendo mundo ad actum perducenda
Mundus materialis constat ex corporibus certo ordine dispositis (§. 119. *Cosmol.*). Quamobrem cum in corporibus nihil detur substantiale præter entia simplicia (§. 177. *Cosmol.*), quæ sunt corporum seu rerum materialium elementa (§. 182. *Cosmol.*); in toto mundo materiali nihil datur substantiale præter elementa rerum materialium. Ex quia mundus ens compositum est (§. 62. *Cosmol.*), ens compositum vero est aggregatum substantiarum simplicium (§. 793. *Ontol.*); totus mundus adspectabilis est substantiarum simplicium, adeoque elementorum rerum materialium aggregatum. Quoniam itaque accidentia sine substantiis existere nequeunt (§. 791. *Ontol.*), & substantiæ sunt subjecta, quibus insunt essentialia & attributa eadem, cum modi in iisdem successive variantur (§. 770. *Ontol.*), præter quæ nihil in ente aliquo existere potest (§. 149. *Ontol.*); si mundus aliquis materialis producendus, elementa rerum materialium ad actum perducenda sunt.

Idem etiam indirecte ostenditur hoc modo. Pone mundum materialem ad actum perducere, nullis elementis materialium rerum ad actum perductis. Quoniam mundus constat ex corporibus (§. 119. *Cosmol.*); corpora existere possunt, etiam si

nulla dentur rerum materialium elementa, consequenter cum elementa rerum materialium sint substantiæ simplices (§. 182. *Cosmol.*), etiam si nullæ existant substantiæ simplices. Sunt vero corpora entia composita (§. 119. *Cosmol.*). Quamobrem existere possunt etia composita, etiam si nulla actu dentur simplicia: quod cum sit absurdum (§. 686. *Ontol.*), mundus materialis aliquis produci nequit, nisi elementa rerum materialium ad actum perducantur.

Ostenditur etiam idem hoc modo. Ponamus ut ante, mundum aliquem produci, elementis rerum materialium nullis ad actum perductis. Quoniam mundus est ens compositum (§. 62. *Cosmol.*); compositum existere potest, etiam si nulla dentur entia simplicia, utpote rerum materialium elementa (§. 182. *Cosmol.*): quod cum sit absurdum (§. 686. *Ontol.*), mundus aliquis materialis ad actum perducere nequit, nisi ad actum perducantur rerum materialium elementa.

Paret idem directe per eadem principia hoc modo. Cum mundus sit ens compositum (§. 62. *Cosmol.*), ens vero compositum sine entibus simplicibus existere minime possit (§. 686. *Ontol.*); nec mundus aliquis materialis produci potest, nisi entibus simplicibus ad actum perductis. Quare cum hæc ipsa sint rerum materialium elementa (§. 182. *Cosmol.*); nec mundus aliquis materialis ad actum perducere potest, nisi ad actum perducantur rerum materialium elementa.

Supponitur utique elementa rerum materialium non esse entia a se: id quod de iisdem evicimus (§. 52.), quatenus ea sunt substantiæ simplices istiusmodi, quales ea esse stabilivimus in Cosmologia (§. 182 & seqq.). Cum demonstrari possit, atomos materiales non posse esse entia a se (§. 53.), demonstratio propositionis præsentis subsistit in hypothese atomorum materialium. Nec minus patet, eandem quoque subsistere in hypothese elementorum quorumcunque materialium, qualia scholasticis sunt ignis, ær, terra & aqua;

ubi

ubi eviceris hæc elementa non posse esse a se. Immo subsistet adhuc in hypothesi, qua in locum elementorum surrogatur materia quædam homogenea indivisa, qualis ea est, quam in cosmogonia sua supponit *Cartesius*, cum itidem ante evicerimus materiam istam non posse esse ens e se (§. 54). Perpendentibus autem demonstrationes superiores apparebit, non esse facile demonstratu, cur elementa alia substantiis simplicibus vel etiam materia in omnes formas transmutabilis non sint entia a se, nisi ante notionem entis in genere, quam in Ontologia evolvimus, & notionem entis a se, quam in superioribus satis distincte explicatam dedimus, habueris perspectam: id quod hic inculcandum duximus, ut, qui productionem mundi ex nihilo, consequenter creationem animo comprehendere voluerit, non ignoret, quomodo omnes nebulae in ardua hac doctrina intellectum obscurantes dispelli debeant.

§. 755.

Quoniam si hic mundus existere, si hic naturæ ordo dari debet, hæc quoque necessario elementa existere tenentur, non alia (§. 569. 570. *Cosmol.*); si hic mundus ad actum perducitur, hæc quoque elementa rerum materialium ad actum perducenda sunt (§. 754).

*Quenam
elementa
produci de-
buerint.*

In hypothesi atomorum, vel elementorum materialium, vel materiae uniformis ac indivisae, pro arbitrato dividendae non implicat, ut ex iisdem atomis, ex iisdem elementis materialibus, vel ex eadem materia diversa formentur corpora & diverso modo inter se jungantur, ut diversi prodeant mundi: desunt enim rationes intrinsecæ structuræ corporum ac totius mundi materialis, ordinis mundi ac naturæ, cum ex adverso in hypothesi elementorum substantiarum simplicium, quales nos explicavimus in Cosmologia, nihil omnino sit in tota hac rerum serie, quocunque te vertas, quod non rationem sufficientem in ipsis elementis rerum agnoscat, magno illo principio rationis sufficientis convenienter. Patebit vero ex tractatione capitis præsentis, quantum intersit elementa rerum

rerum materialium agnosci substantias simplices, ut adeo illa non minorem in Theologia naturali, quam in Philosophia naturali præstent utilitatem. Si qui vero fuerint, quibus doctrina de elementis cosmologica nimis subtilis visa fuerit, illi ea prætermittant, quæ ab eadem in præsentē doctrina pendent, nec sibi, sed aliis dicta putent, quorum acumen subtilitas ista non superat.

§. 756.

*Elementa
num fue-
runt produ-
cta ab alio.*

Elementa rerum materialium producta sunt; seu facta ab alio. Etenim contingentia in mundo non habent rationem sufficientem actualitatis suæ in serie successivorum, sed in ente alio extra seriem istam constituto, eoque necessario (§. 90. *Cosmol.*). Quoniam vero unumquodque elementum continet seriem mutationum, quæ diversa est a serie alterius cujuscunque (§. 198. *Cosmol.*) & rationes ultimæ eorum, quæ in rebus materialibus deprehenduntur, in elementis continentur (§. 191. *Cosmol.*); cur series successivorum in hoc universo hæc sit, non alia, ex eo est, quod hisce elementis insint hæ, non aliæ mutationum series. Et quia anima sensu nil percipit, nisi quatenus sibi repræsentat substantiarum simplicium mutationes intrinsecas, sed in unum confusas (§. 98. *Psychol. rat.*); series successivorum in mundo, quam contingentium esse constat (§. 80. *Cosmol.*), & multiplicem esse novimus (§. 82. *Cosmol.*), sunt ipsæ series mutationum in substantiis simplicibus continuo factarum, & confuse a nobis perceptæ. Quamobrem nec in elementis dari potest ratio sufficiens actualitatis contingentium in universo, sed ea querenda est extra hæc elementa in ente quodam alio ab hisce elementis diverso, eoque necessario. Enimvero positis hisce elementis ponuntur hæ series mutationum ipsis necessario inexistentes (§. 197. *Cosmol.*), consequenter hæ quoque in mundo sensibili ponitur series contingentium. Quamobrem necesse est, ut rationem suffi-

cien-

cientem existentiz suæ non in se habeant elementa, sed in ente alio necessario ab ipsis diverso, quemadmodum ex demonstratione liquet. Quoniam adeo per ea, quæ elementis insunt, nondum ponitur eorundem actualitas (§. 118. *Ontol.*); necesse est ut actualitatem ipsis impertitum fuerit eas aliud, consequenter cum quid producat, dum actualitatem eidem ens aliud impertitur (§. 690. *Ontol.*), elementa rerum materialium producta, seu facta sunt ab ente alio.

Demonstratio hæc clarior quodammodo & captu facilior evadit, ubi ad casum aliquem particularem applicatur. In numero simplicium serierum contingentium est continua dependentia actus gallinæ ab ovo & vicissim ovi a gallina, qua usos esse veteres ad removendam rationem sufficientem actualitatis intrinsecam a serie contingentium alias monuimus (not. §. 90. *Cosmol.*). Quoniam corpora sunt elementorum aggregata (§. 176. 181. *Cosmol.*), quæ anima sibi repræsentat, quatenus mutationes elementorum in unum confusas sibi repræsentat (§. 98. *Psychol. ration.*); non minus gallinæ, quam ovo respondere debent certa quædam elementa mutationes datas intrinsecas subeuntia, ita ut tamdiu existat gallina, vel ovum, quamdiu ista mutationum series in elementis istis durat. Jam cum elementa alio modo coexistere nequeant, quam quo in hoc universo coexistunt (§. 571. *Cosmol.*), neque hæc elementa, per quæ aggregantur corpora (§. 176. *Cosmol.*), ex quibus mundus hic adspectabilis constat (§. 119. *Cosmol.*), aliter combinari possunt, quam ut gallinarum & ovorum actus determinetur per continuam dependentiam mutuam ovi a gallina & gallinæ ab ovo, consequenter ratio sufficiens actus ovi atque gallinæ in ipsis elementis minime continetur (§. 851. *Ontol.*), utpote deficiente ratione sufficiente, cur vel gallina prior extiterit ovo, vel ovum prius gallina, quoniam per combinationem elementorum æque possibile, ut existat ovum,

(*Wolffii Theol. Naturalis*)

X x x x

quam

quam ut gallina existat. Necessse igitur est, ut ratio sufficiens, cur vel gallina prior extiterit ovo, vel ovum prius gallina in hac rerum serie, quæzatur in ente alio ab istis elementis diverso. Quoniam vero entis compositi contingentis in mundo existentia ejusdemque modi determinantur per mundum integrum (§. 87. *Cosmol.*); nec in ceteris elementis ab hisce, quibus aggregatis prodit gallina, vel ovum, diversis ratio sufficiens dari potest, cur ovum prius gallina, vel gallina prior ovo extiterit. Quamobrem cum idem eodem modo sese habeat in serie quacunque simplici contingentium, quæ ingreditur seriem successivorum (§. 82. *Cosmol.*); patet omnino nullum concipi posse in hac serie rerum contingens, cujus actualitas determinetur sufficienter per ea, quæ elementis rerum materialium insunt. Admittendum igitur aliquod ens necessarium ab omnibus istis elementis rerum materialium prorsus diversum, unde deducenda ratio ultima actualitatis contingentium, adeoque ipsa actualitas elementorum, quibus positæ, ponuntur hæc corpora (§. 193. 194. *Cosmol.*) & hic naturæ ordo (§. 569. *Cosmol.*). Elementis itaque actualitatem impertitum est ens aliud, ab ipsis prorsus diversum, consequenter ipsa producta seu facta sunt ab alio (§. 690. *Ontol.*).

In gratiam eorum, quibus multa rerum perpendendarum series nebulas adhuc affundit intellectui, demonstrationem proximè præcedentem hoc modo proponere visum est. Experimentia magistra sumo naturaliter, consequenter juxta præsentem naturæ ordinem, ovum existere non posse, nisi præexistat gallina, nec gallinam existere posse, nisi præexistat ovum (§. 566. *Cosmol.*); consequenter in præsentem naturæ ordine non dari rationem sufficientem, cur gallinæ & ova in hac rerum serie ad actum perducantur (§. 56. *Ontol.*). Quoniam itaque hisce existentibus elementis alius naturæ ordo esse nequit (§. 569. *Cosmol.*); nec in elementis rerum materialium ratio sufficiens

con-

continetur, cur in hoc mundo adspectabili ad actum perducantur ova atque gallinæ. Necesse igitur est, ut ea quærat in ente alio ab istis elementis diverso, qua posita ponuntur elementa hæc in eo statu, per quem intelligi potest, utrum gallina ovo, vel ovum gallinæ præxtiterit. Habent adeo elementa hæc actualitatem suam ab ente alio, consequenter ab alio producta vel facta sunt (§. 690. *Ontol.*).

Propositio præsens hoc modo etiam ostendi poterat. Ordo naturæ contingens est (§. 561. *Cosmol.*), consequenter non necessarius (§. 294. *Ontol.*), adeoque non implicat alium dari naturæ ordinem (§. 279. *Ontol.*). Enimvero si alius esse debet naturæ ordo, elementa alia existere debent (§. 569. *Cosmol.*). Elementa igitur rerum materialium non necessario existunt, adeoque contingenter existunt (§. 294. *Ontol.*), consequenter rationem sufficientem existentiz suæ in ente alio a se diverso habent (§. 310. *Ontol.*). Quoniam itaque actualitatem suam a se non habent (§. 311.); ab alio ente a se diverso producta vel facta sunt (§. 690. *Ontol.*).

Equidem in superioribus jam evicimus, elementa rerum materialium non esse entia a se (§. 52.), unde facile porro inferri poterat, ea esse facta sive producta ab alio, cum quod a se non est, nec vi propria existat, sed aliena indigeat, ut existere possit (§. 27.), consequenter actualitatem ab alio habere: placuit tamen propositionem præsentem independentem ab iis, quæ supra demonstrata sunt, & diversis quidem modis demonstrare, propterea quod non eadem demonstratio æque satisfacit omnibus, quoniam principia demonstrationem ingredientia non æque familiaria experiuntur, & subinde nonnullis insunt præjudicia, ne ipsis quidem animadversa, quibus nebulae offunduntur evidentia, ut eadem animus convincendus percelli nequeat, quantum ad assensum immotum sufficit. Quamobrem in re ardua non intentatum relinquendum esse duximus, quod ad eam firmandam ullo modo facere possit. Demonstratio ultima ab ordinis na-

turæ contingentia petita facillima omnium videtur & minus intricata anterioribus: quod si tamen demonstrationem contingentia ordinis naturæ, quem suo loco dedimus (§. 561. *Cosmol.*), in sua principia resolvere libuerit, quemadmodum exemplo aliquo alias docuimus (§. 992. *Log.*), satis superque constabit, quam multa præsupponantur, antequam de contingentia ordinis naturæ convictum habere possis animum, quodque facilius sit demonstrationes ceteras penitus assequi, quam principia demonstrationis contingentia, quæ inest ordini naturæ, pleno assensu complecti. Extra systema subinde facilia videntur, quæ in systemate difficillima deprehenduntur, propterea quod ad notiones confusas respicientes tanquam certa admittimus, quæ distincte explicanda non nisi longa notionum evolutione ad certitudinem perducuntur. Sane non dubito fore nonnullos, quibus probatio sequens propositionis præsentis clarius ceteris videbitur: Ordo naturæ contingens est, seu a necessitate absoluta libera (§. 561. *Cosmol.*), consequenter cum alia existere debeant elementa, si alius esse debet naturæ ordo (§. 569. *Cosmol.*), elementa non existunt necessario, adeoque facta sunt; etsi non omnia sufficienter evolvantur, quæ ad evidentiam faciunt. Sed nos jam non id agimus, ut captui lectorum, sed ut veritati accomodemus demonstrationes: captus enim lectorum variat, veritas eadem semper est.

§. 757.

*Mundum
esse factum
ab alio.*

Mundus hic adspectabilis factus est ab alio. Præter mundum hunc adspectabilem alii plures possibiles sunt, in quibus ad actum deducerentur possibilia, quæ in præsentem actum minime consequuntur (§. 101. *Cosmol.*). Mundus igitur hic non est necessario talis (§. 279. *Ontol.*), adeoque contingenter existit (§. 294. *Ont.*), consequenter rationem existentia suæ in ente alio a se diverso habet (§. 310. *Ontol.*). Quoniam igitur existentiam seu actualitatem ab ente alio accepit; eum ab alio factum esse patet (§. 690. *Ontol.*),

Con-

Consulto probamus propositionem præsentem independentem a principio superiori, quod mundus non sit ens a se, propterea quod eadem non minus, quam præcedente commodè utemur suo tempore in istiusmodi casibus, ubi ad principia anteriora recurrere non commodum videtur. Repetenda præterea sunt, quæ ad propositionem præcedentem annotavimus. Ceterum cum hic independentem ab existentia Dei avicerimus, & mundum hunc adspectabilem factum esse ab alio, & elementa rerum materialium nostro sensu accepta ab alio esse producta; ideo jam patet, quomodo existentia Dei demonstrari possit, hac argumentatione: Mundus factus est ab alio. Ergo datur Deus, dum scilicet eidem evidentia fœneratur, qua destituitur perinde ac altera; Datur ordo mundi contingens. Ergo datur ordinis autor Deus. Nimirum cum per propositionem præsentem ac præcedentem certum sit, mundum atque ipsa elementa rerum materialium, quibus aggregatis oritur mundus, facta esse ab alio; inde recte infertur: dari aliquod ens, quod est causa & autor huius universi, & vi principii rationis sufficientis talia eidem tribuenda sunt prædicata, qualia sufficiunt, ut intelligatur, cur hic potius mundus fuerit ab eo factus, quam alius, & cur hic potius constitutus fuerit naturæ ordo, quam alius. Atque ita recidimus in demonstrationes anteriores de intellectu & voluntate divina.

§. 758.

Deus fecit mundum & ipsa elementa rerum materialium. Mundi & elementorum productio cui tribuenda.
 Etenim in Deo, qui existit vi propria, independentem ab omni alio ente, ac sibi metipso sufficit ad existentiam (§. 70.), continetur ratio sufficiens existentiz mundi huius adspectabilis (§. 67.), atque elementorum rerum materialium (§. 64.). Quamobrem cum per rationem sufficientem intelligatur, cur mundus hic adspectabilis & hæc elementa rerum materialium existant (§. 56. Ontol.); per ea, quæ de Deo demonstrantur, intelligitur, quomodo hic mundus & elementa rerum materialium actum fuerint.

sint consecuta. Quoniam itaque quid possibile est, quod ejus idea detur in intellectu divino (§. 192.) ; mundus quoque & elementa rerum materialium ideo possible sunt, quod eorum idea in intellectu divino detur (§. 181.). Et quia per decretum divinum quod possibile est efficitur futurum (§. 522.); mundus quoque adspectabilis & elementorum materialium per decretum divinum facta sunt futura, Quoniam denique Deus facere non modo potest, quod decrevit, verum etiam facit (§. 525.); ideo quoque mundum fecit ac rerum materialium elementa non existibilia nisi per potentiam ejus (§. 223.).

Probari etiam potest hoc modo. Mundus non est ens a se (§. 50.), nec elementa rerum materialium sunt entia a se (§. 52.), consequenter vi entis alterius indigent, ut existant (§. 27.). Quamobrem cum existere nequeat nisi per potentiam Dei, quod præter Deum existit (§. 223.); nec mundus hic cum elementis rerum materialium actum consequi potuit nisi per potentiam Dei, consequenter cum potentia Dei sit possibilitas ad actum perducendi, quæ in se spectata possible sunt (§. 222.). Deus mundum hunc adspectabilem & elementa rerum materialium ad actum perduxit. Enimvero cum is quid faciat, seu producat, qui id ad actum perducit, seu actualitatem eidem impertitur (§. 690. *Ontol.*) ; Deus mundum hunc adspectabilem atque ipsa elementa rerum materialium fecit, sive produxit.

Ostenditur etiam hoc modo. Mundus hic adspectabilis factus est ab alio (§. 757.) & elementa rerum materialium ab alio facta sunt (§. 756.). Quoniam nihil existibile, nisi per potentiam Dei (§. 224.) & in Deo continetur ratio, cur hic mundus adspectabilis existat (§. 67.), qui sine hisce elementis existere nequit (§. 755.); ens illud aliud, a quo mundus & elementa rerum materialium facta sunt, esse nequit nisi Deus,

con-

consequenter Deus mundum hunc adspectabilem & elementa rerum materialium fecit.

Demonstratio prima ortum mundi a Deo distincte declarat, & clarissime is percipitur, ubi principia anteriora satis familiaria experiris. Triplex mundi distingui potest status nostro saltem concipiendi modo, nimirum status nudæ possibilitatis, status futuritionis & status actualitatis. Status nudæ possibilitatis absolute necessarius est, competit enim mundo, quatenus ejus idea in intellectu divino (§. 181.), necessario ac immutabiliter datur (§. 189. 190.). Atque adeo sumitur, non demum quæritur, quomodo is ad hunc statum fuerit perductus, quemadmodum fieri debet in hypothese idearum arbitrariarum (§. 191.). Status futuritionis consideratur post decretum, quippe cum per hoc in illum mundus ex statu puræ possibilitatis fuerit perductus, ceteris in eodem relictis. Status denique actualitatis præsens est, & ex statu futuritionis in eundem perductus est mundus omnipotentia Dei. Triplicem hunc statum probe discernere tenemur, ne in judicanda dependentia mundi & rerum in eo contentarum a Deo aberremus. Hanc ob rationem demonstrationem primam ceteris præmittere visum fuit, utut ceteræ videri poterant planiores.

§. 759.

Deus hunc mundum produxit ex nihilo. Etenim Deus *Productio mundi ex nihilo.* non modo hunc mundum fecit, sed ipsa etiam rerum materialium elementa (§. 758.). Enimvero præter elementa rerum materialium, quibus aggregatis orta sunt corpora (§. 176. *Cosmol.*), nihil datur substantiale in corporibus (§. 177. *Cosmol.*). Quoniam itaque nihil hujus mundi adspectabilis extitit, antequam elementa ista producerentur; ex nihilo Deus hunc mundum adspectabilem produxit (§. 540. 690. *Ontol.*).

Ostendetur etiam hoc modo. Deus dum mundum producere voluit (§. 758.), elementa quoque rerum materialium pro-

produxit (§. 754.). Enimvero elementa rerum materialium substantiæ simplices sunt (§. 182. *Cosmol.*), adeoque ex nihilo producta (§. 691. *Ontol.*). Deus adeo mundum hunc adspicibilem ex nihilo produxit,

Apparet adeo, quam plana sit per principia nostra productionis mundi ex nihilo. Quoniam paulo ante (*not.* §. 754.) monuimus, quod eum superius evicerimus atomos quoque materiales & elementa quæcunque materialia, immo materiam indivisam ac uniformem, ex qua *Cartesius* mundum factam esse fingit, esse entia ab alio (§. 53. 54.) eadem a Deo facta esse eodem modo probari possit, quo elementa rerum materialium nostro sensu accepta a Deo facta esse ex eorum aëritate destructa deduximus; patet demonstrationem priorem etiam accommodari posse hypothese atomorum materialium, vel elementorum quorumcunque ipsorum materialium, ac materiæ uniformis ac indivisæ; quod ideo monemus, ut, si qui hypothesebus etiam si a veritate alienis adducti fuerint, productioni mundi ex nihilo assensum non denegent. Patet vero, quo sensu dicatur Deus ex nihilo produxisse hunc mundum, ex notione productionis hujus in philosophia prima explicata. Etenim ex nihilo produci diximus, si ei, quod ex nihilo oriri debebat, existentia confertur (§. 690. *Ontol.*) & ex nihilo oriri diximus, quod existere incipit, cum nihil ejus antea actu esset (§. 540. *Ontol.*). Quamobrem mundum ex nihilo produxit Deus, quatenus eidem existentiam seu actualitatem impertitus est, cum nihil prorsus ejus antea actu esset. Nimirum ex iis, quæ de triplici statu mundi paulo ante (*not.* §. *præc.*) annotavimus, constat, antequam mundus a Deo produceretur, totum nonnisi idealiter extitisse in intellectu divino, & per voluntatem Dei certum fuisse, quod actualitas eidem sit conferenda, consequenter nihil prorsus ad eum quomodocunque pertinens actu fuisse. Deus igitur, quod in se spectatum nonnisi possibile erat, ad actum perduxit, cum nihil ejus actu extaret.

§. 760.

Deus creavit mundum hunc adspectabilem. Produxit enim *Creatio* hunc mundum adspectabilem ex nihilo (§. 759.). Quamob- *mundi.* rem cum productio ex nihilo dicatur creatio (§. 697. *Psychol. ration.*); Deus mundum hunc adspectabilem creavit.

Patet itaque, qualis creatio in systemate nostro locum habeat: etenim ex ipsa elementorum, quæ in Cosmologia adstruximus, natura creationem deduximus. Vanæ igitur sunt consequentiariorum maledicæ vociferationes, quod in systemate nostro creationi veri nominis non sit locus. Sane in nostro systemate contingentia hujus mundi derivatur ex ipsa contingentia elementorum (§. 570. *Cosmol.*), adeoque ex ipsa ejusdem substantialitate (§. 177. *Cosmol.*). Productio autem mundi ex nihilo, seu non præexistente, a contingentia ejus, quod substantiale est, in universo unice pender. Et quamvis in superioribus aseitatem quoque removerimus ab atomis materialibus (§. 53.), ac ideo ab elementis quibuscunque corporeis & materia uniformi ac indivisa, ex qua factus esse mundus a nonnullis dicitur (§. 54.), ut veram nominis creationem etiam in istis hypothesebus salvaremus, ne iisdem dediti facile in atheismum prolabantur, quemadmodum id fieri posse ex *Lucretio* constat; id tamen vi nostrorum principiorum factum esse constat, per quæ intimius inspecta ipsa met corruunt, ut adeo per transennam videntes ipsis tribuant, quod elementis veri nominis a nobis assertis tribuendum fuerat. Atque ea ratio est, cur in hypothesi atomorum ac elementorum materialium & materiae uniformis ac indivise difficulter probari posse asseruerimus productionem mundi ex nihilo, propterea quod juxta hypotheses istas, prouti communiter sumuntur ab eorum autoribus & defensoribus, contingentia mundi adspectabilis non derivatur a substantialitatis contingentia, sed ab indifferentia ad quaslibet formas recipiendas, quæ utique subsistit, etiamsi entia ista sumantur neces-

laria, consequenter creatio tantummodo explicetur per transmutationem in varias formas mutabilis in hanc præcise formam. Insignis prærogativa systematis nostri cosmologici, ac imprimis theoriæ elementorum, cum in Theologia eluceat naturali; principia ejus in eandem haud ægre admisimus, utpote non tantum probaturi quod ea, quæ veritati consentanea, sint, verum etiam rationem reddituri, cur sint. Quamobrem nec piger actum creationis ac conservationis, immo omnem providentiam per eadem principia uberius explicare, ne in iis industriam nostram desiderasse videamur, quæ sunt philosophi (§. 46. *Disc. prælim.*). Nec alio pacto impietatis suspicio, in quam systema nostrum adducere conantur invidi ac malevoli, rectius ab eodem removetur, quam ubi per ipsum demonstrantur, quæ Scripturæ sacræ consentientia ab omnibus agnoscuntur.

§. 761.

Ordo naturæ quomodo constitutus.

Deus constituit hunc naturæ ordinem, dum hæc, non alia rerum materialium elementa produxit. Etenim cum naturæ ordo alius esse nequeat, nisi elementa alia existant (§. 569. *Cosmol.*); præsens naturæ ordo ex hisce elementis necessario resultat, ut adeo iisdem positis ponatur & ipse. Constituitur adeo aliquis naturæ ordo, dum certa elementa producantur, consequenter hic naturæ ordo a Deo constitutus est, dum hæc præcise, non alia rerum materialium elementa ab eodem producta sunt.

Idem majore claritate in gratiam præsertim eorum, qui theoriæ cosmologicæ de elementis rerum materialium nondum satis familiaria experiuntur, hoc modo ostendi potest. Cum elementa rerum materialium singula vi quadam activa prædita sint (§. 196. *Cosmol.*), unde status eorum internus continuo ea lege mutatur, ut præsens rationem contineat sequentis (§. 197. *Cosmol.*), & hinc unum quodque elementum contineat seriem mutationum, quæ diversa est a serie alterius
cujus-

cujuscunque (§. 198. *Cosmol.*); elementa ab his, quæ existunt, diversa non aliter differre ab iisdem possunt, quam quomodo a se invicem differunt, seriebus nempe mutationum, quæ ipsis per essentiam & naturam suam insunt, consequenter ipsis viribus activis, unde series istæ consequuntur. Quia vis motrix oritur ex substantiis simplicibus (§. 180. *Cosmol.*), nec corporibus inest, nisi quatenus vires, quæ insunt elementis, confuse nobis representamus (§. 110. *Psychol. ration.*); vis motrix in corporibus non aliam admittit differentiam, quam in modo, quo modificatur. Quamobrem his elementis existentibus, hoc & non alio modo vis motrix modificari potest. Quoniam itaque naturæ ordo in modificationibus virium motricium deprehenditur (§. 558 *Cosmol.*); dum Deus hæc & non alia elementa produxit, hunc quoque naturæ ordinem constituit.

Patet adeo, quomodo ordo naturæ contingens sit, seu ab absoluta necessitate liber (§. 561. *Cosmol.*), etsi natura, ipsa, quæ in agendo hunc ordinem observat (§. 557. *Cosmol.*), necessario agat, nec ab eo ne latum quidem unguem recedere possit. Patet etiam, quomodo Deus præscribere poterit naturæ aliquem ordinem & hæc ipsi obedire teneatur. Nimirum substantias simplices, quæ activæ sunt, produxit, quibus insunt vires hoc & non alio modo modificabiles, & quæ adeo non alio, quam hoc modo agere possunt, cum aliæ substantiæ istiusmodi simplices produci possent, quæ alio modo modificabiles alio etiam, quam hoc modo agere poterant. Intelligitur hinc porro modus contingentiam naturæ ordinis ex ipsa elementorum natura a priori demonstrandi, etsi nondum plene percipiatur, cum phaenomenorum in mundo materiali ex substantiis simplicibus tanquam ex suo fonte ortum paulo penitius inspicere debeamus, antequam demonstratio concinnari possit. Sed talia attentius in Physica generali rimari licebit: principia enim cosmologica non modo in usum Theologiæ naturalis, verum etiam in usum Physicæ generalis a nobis condita sunt. Obiter observamus,

quo intimius systema nostrum inspicitur, eo clarius quoque naturæ ac rerum omnium a Deo dependentia innotescit & intelligibili modo explicabilis redditur. Videant vero qui elementa nostro sensu accepta non admittunt, an distincte ex aliis hypothesebus explicare possint, quomodo naturæ ordo sit contingens & natura tamen agat necessario; quomodo Deus libere constituerit naturæ ordinem & eundem naturæ præscribere, hancque ad obedientiam exactam obligare potuerit, ut non agat, nisi ad nutum suum.

§. 762.

Creator mundi & creavit, seu ex nihilo aut non præexistente produxit. Autor autor ordi- ordinis naturæ vocatur, qui naturæ ordinem constituit. nis naturæ quinam dicatur.

Definitiones hæ intelliguntur resolvendo eas in notiones distinctas, quæ easdem ingrediuntur & alibi a nobis explicatæ fuere. Etenim quid sibi velit productio ex nihilo, ex ontologicis (§. 690. 540. *Ontol.*); quid ordo naturæ, ex cosmologicis (§. 557. & seqq. *Cosmol.*); quid denique constitutio ordinis naturæ, ex demonstratione propositionis præcedentis intelligitur.

§. 763.

Quinam sit.

Deus est creator mundi & autor ordinis naturæ. Etenim Deus mundum hunc adspectabilem creavit (§. 760.) & hunc naturæ ordinem constituit, dum hæc, non alia elementa rerum materialium ad actum perduxit (§. 761.). Quoniam itaque mundi creator est, qui hunc mundum adspectabilem creavit, & naturæ autor, qui eundem constituit (§. 762.); Deus creator mundi & autor ordinis naturæ est.

Quæ naturaliter fiunt, secundum naturæ ordinem fiunt (§. 566. *Cosmol.*). Quamobrem cum Deus sit autor ordinis naturæ; ad ipsum tanquam autorem referri debent, quæ naturaliter fiunt. Unde jam uberius intelligitur, cur etiam
usus

usus rerum in numerum beneficiorum divinorum sint referendi, & cur in eundem censum veniant alia, quæ supra bonitati divinæ tribuimus (§. 733. & seqq.).

764.

Deus hunc mundum adspectabilem & hæc in eodem, non alia corpora produxit, dum hæc, non alia elementa rerum materialium ad actum perduxit. Etenim cum hæc elementa alio modo coëxistere nequeant, quam quo coëxistunt (§. 571. *Cosmol.*); dum Deus ea ad actum perduxit, hoc quoque modo aggregari debuerunt, quo eadem aggregavit. Quamobrem cum corpora non sint nisi substantiarum simplicium, adeoque elementorum (§. 182. *Cosmol.*), aggregata (§. 176. *Cosmol.*); corpora hæc & non alia extitere, dum Deus hæc & non alia elementa ad actum perduxit, consequenter cum mundus adspectabilis ex his corporibus constet (§. 119. *Cosmol.*), hic quoque mundus adspectabilis extitit, dum hæc elementa ad actum fuere perducta. Patet igitur, quod Deus mundum hunc adspectabilem & hæc, non alia in eodem corpora produxerit, dum hæc, non alia elementa ad actum perduxit.

Patet itaque, quod Deus libere produxerit hunc mundum, quatenus alia rerum materialium elementa alio modo aggreganda producere poterat, nec tamen in hoc mundo alia producere potuerit corpora, quam quæ fecit, libertate ejus summa & omnipotentia salva, ita ut nullibi quidpiam deprehendatur, quod non summa nitatur ratione, nec quicquam tamen dici possit nisi liberrime a Deo constitutum.

§. 765.

Deus mundum hunc adspectabilem produxit & ordinem Actus creationis constituit uno eodemque actu. Produxit enim mundum adspectabilem, dum elementa rerum materialium ad actum perduxit (§. 764.), & similiter ordinem naturæ constituit, unicus.

dum hæc, non alia elementa ad actum perduxit (§. 761.). Produxit igitur mundum naturæque ordinem constituit uno eodemque actu.

Vulgo sumunt, quemadmodum & *Cartesius* fecit, Deum creasse rudem quandam & indigestam molem, quam *Chaos* dixere veteres. Ex hac deinde materia variis modis divisa & in modum concitata fecisse corpora & ordine suo disposuisse. Hisce tandem conveniente modo ordinatis præscripsisse certum ordinem, quem natura observaret. Enimvero qui ita sentiunt, secundum notiones imaginarias philosophantur, ad imitationem earum confictas, quas de productione operum artificialium consecuti. In quantas vero difficultates conjiciatur intelligibili modo explicaturus, quomodo corporibus hisce hic impositus fuerit ordo, seu hic naturæ ordo constitutus, & quomodo natura intellectu & voluntate libera destituta agere possit juxta leges liberrime ipsi latas; id demum experietur, qui explicationem aggreditur. Ast secundum nostra principia omnia plana sunt & aperta, nec in omnibus ad arbitrium Dei recurrendum, id quod minime licere in istiusmodi quæstionibus, quæ modum, quo quid fieri possit, concernunt, supra abunde demonstratum est (§. 434.).

§. 766.

Actus creationis in quo consistat.

*Actus creationis consistit in perducendis ad actum talibus substantiis, nullo alio præexistente in eadem influente. Et enim totus creationis actus, quo mundus hic ad spectabilis productus & naturæ ordo constitutus (§. 765.), consistit in eo, quod Deus hæc rerum materialium elementa ad actum perduxerit (§. 761. 764.), & quidem ex nihilo (§. 759.), adeoque nullo alio præexistente in actualitatem illorum influente (§. 540. 690. *Ontol.*). Enimvero elementa rerum materialium sunt substantiæ simplices (§. 182. *Cosmol.*), nec præter ea quidpiam substantiale in corporibus datur (§. 177. *Cosmol.*). Quamobrem actus creationis in eo consistit, quod Deus substantias nullo*

nullo alio præexistente in earundem actualitatem influente ad actualitatem perduxerit.

Artifices & in universum homines opus aliquod producentes nihil substantiale ad actum perducunt, quod antea non erat. Unde ex nihilo nihil facere possunt. Quicquid faciunt, ex materia quadam præexistente faciunt, ut adeo ipsorum actus cum actu creationis nihil prorsus commune habeat. Crearet artifex horologium, si actualitatem conferre posset ideæ ejus, quam animo comprehensam intuetur, nulla materia ad idem usus, sed jubens, ut ideatum extra animam suam existat. Ita enim ipsum substantiale produceret, nec tantummodo materię varias figuras induceret, quemadmodum nunc fieri solet.

§. 767.

Naturæ rerum nulla comperit potentia creatrix; sed ea soli Deo propria est. Etenim naturæ vi non producuntur nisi corpora, quemadmodum perenni experientia constat, consequenter cum corpora sint entia composita (§. 119. *Cosmol.*), nonnisi composita. Enimvero composita oriuntur citra rei cujusdam ex nihilo ortum (§. 542. *Ontol.*), consequenter citra ullam creationem (§. 697. *Psychol. ration.*). Ergo naturæ vi nihil creatur, consequenter nulla ipsi potentia creatrix competit. *Quod erat unum.*

Quoniam tamen Deus hunc mundum adspectabilem creavit (§. 760.), potentia creatrix ipsi comperit, eidemque propria est. *Quod erat alterum.*

Idem etiam sic ostenditur. Natura non est nisi aggregatum omnium virium motricium, quæ corporibus in mundo coëxistentibus simul sumtis insunt (§. 507. *Cosmol.*), adeoque cum vis motrix motui locali adhaereat (§. 137. *Cosmol.*), natura non agit nisi motu locali. Consistit autem motus localis in continualoci mutatione (§. 642. *Ontol.*). Quamobrem cum ex eo, quod

quod quid locum continuo mutat, nihil substantiale ad actum perducatur, quod antea non existebat, creatione autem ad actum producantur substantiæ, nullo præexistente in actualitatem earundem influente (§. 766.) ; naturam nihil creare posse, consequenter potentiam creatricem ei non competere, sed soli Deo, cui eandem convenire demonstratum est, propriam relinquendam esse patet.

Idem etiam per indirectum ostenditur hoc modo. Ponamus, si fieri potest, naturæ competere potentiam creatricem. Quoniam natura est vis motrix (§. 506. *Cosmol.*), vis motrix autem non sunt nisi vires, quæ insunt elementis, confuse perceptæ (§. 110. *Psychol. ration.*); natura distincte percepta est aggregatum omnium virium activarum, quæ insunt elementis. Sunt vero elementa substantiæ simplices (§. 182. *Cosmol.*), consequenter cum ens simplex ex alio simplici existente oriri nequeat (§. 688. *Ontol.*), nec vi elementorum aliarum substantiarum simplices produci possunt, ex nihilo utique producendæ (§. 691. *Ontol.*). Naturæ igitur potentia creatrix tribui nequit (§. 697. *Psychol. ration.*). Quoniam vero Deo, quatenus scilicet ens est a se (§. 67.), adeoque mundus adspectabilis, elementa rerum materialium & animæ humanæ rationem sufficientem existentiae suæ in eodem habent (§. 64.), potentia creatrix competit (§. 760.); eadem quoque ipsi propria est.

Probe notandum est, Deo potentiam creatricem non tribui propter simplicitatem, sed propter aseitatem, ne hæreamus, ubi ab entibus simplicibus, quæ sunt rerum materialium elementa, potentia creatrix removetur, & Deo tamen enti simplici tribuitur. Neque enim ens simplex necessarium & ens simplex contingens, seu quod perinde est, ens simplex a se, quod propria vi existit, & ens simplex ab alio, quod vi aliena indiget ad existendum, unum idemque sunt, adeoque non mirum, si simplici necessario conveniat potentia, quæ simplici contingenti convenire nequit. Hac non per-

perpenderunt, qui cum adverterent, potentiam creatricem nec enti composito, quale est corpus, nec enti simplici, quale est anima nostra, convenire, ac præter compositum & simplex ens aliud dari non posse intelligerent; potentiam creatricem in numerum impossibilium retulere ac ideo mundum pro ente necessario habuere.

§. 768.

Creatio mundi miraculum est. Etenim cum potentia *Creatio* creatrix naturæ rerum non competat (§. 767.); creatio vires mundi mi- naturæ universæ excedit. Quamobrem cum miraculum sit, *raculum* quod vim naturæ universæ excedit (§. 523. *Cosmol.*); creatio est. mundi miraculum est.

Miraculum hoc ipso rationis lumine agnoscitur. Etenim hoc lumine liquet, mundum creatum esse a Deo (§. 760.), nec eo minus innotescit *vi prop. præf.* creationem mundi esse miraculum. Agnoscitur adeo hoc miraculum ipso lumine rationis. Atque hoc modo patet, Deum, quem miracula patrare posse evicimus (§. 363.), miraculum quoque magnum patrasse: neque enim creatione majus miraculum concipi potest, quippe quod pertinet non ad partem quandam, vel particulam, sed ad ipsum totum universum. Elucet hinc porro potentiam creatricem esse potentiam miraculosam. Quamobrem cum superius evicerimus potenti- am miraculosam nulli enti communicari posse (§. 471.); mirum profecto non est, quod nec potentia creatrix enti cui- dam præter Deum convenire possit.

§. 769.

Quoniam mundus per creationem cœpit (§. 760.), crea- *Primus* tio autem miraculum est (§. 768.); mundus per miraculum cœpit, mundi sta- consequenter *primus mundi status miraculosus est.* *tus qualis*

Propositio hæc probe notanda est. Qui enim ad eam ani- *fuert.* mum non advertunt, confunduntur nec nisi tenebras offen- *dunt.*
(*Wolfii Theol. Naturalis*) Zzz

dunt, ubi in primum mundi statum mentis aciem convertunt.

§. 770.

*Ordinis
naturæ
constitutio
qualis.*

Ordo naturæ per miraculum constitutus. Etenim ordo naturæ eodem actu creationis constitutus, quo mundus hic adspectabilis productus fuit (§. 765). Quamobrem cum creatio sit miraculum (§. 768.); ordo naturæ per miraculum constitutus.

Agit adeo natura vi miraculi, etsi ad agendum hoc potius, quam alio modo apta deprehendatur. Nimirum per naturam elementorum possibile est, ut hic detur naturæ ordo: quod vero actu detur, non alius, a creatione elementorum pendet, adeoque a miraculo.

§. 771.

Cur primus mundi status intelligibili modo explicari nequeat.

Primus status mundi per essentiam & naturam rerum intelligibili modo explicari nequit. Etenim primus mundi status miraculosus est (§. 769). Enimvero quod miraculosum est in mundo materiali, ejus ratio sufficiens in essentia & natura corporum non continetur (§. 510. *Cosmol.*). Primus itaque status mundi rationem sufficientem in essentia & natura corporum minime habet. Quamobrem cum per rationem sufficientem intelligatur, cur quid sit potius, quam non sit (§. 56 *Ontol.*); primus mundi status per essentiam & naturam rerum intelligibili modo explicari nequit.

Atque nunc clarius intelligitur, cur contingentia in mundo adspectabili non habeant rationem sufficientem actualitatis suæ in ipso mundo: pendet enim eorundem veritas a primo mundi statu, veluti dependentia actualitatis ovi a gallina & gallinæ ab ovo ab existentia ejus, quod in hac serie altero fuit prius; sed primus status miraculosus est, nec per essentiam & naturam corporum explicabilis intelligibili modo, verum ab ente quodam extra hanc seriem constituto & a mundo di-

do diverso proficiscitur (§. 524. *Cosmol.*). Res facti est, an prior ovo extiterit gallina, an ovum gallina prius sit, & factum hoc pendet a voluntate Numinis, quæ summa ratione ac sapientia regitur, nulli necessitati subjacet. Quid ergo mirum, si ex essentia & natura rerum ratio reddi nequit, ubi quaestio recidit in id, quod ad statum mundi primævum pertinet? Quid vero suadeat ratio, quid sapientia divina, plerumque ne conjectando quidem assequi datur, propterea quod ob nexum omnium inter se in statu primævo coexistentium difficillimum, immo impossibile iudicium ferri ab eo, quod huic nexui convenit, qui eundem penitus perspectum minime habet.

§. 772.

Miraculum primigenium dicitur, unde quid originem *Miraculorum* derivat in universo, a quo deinceps alia naturaliter *lum primigenium* pendent.

Ponamus per miraculum semen fuisse inditum terræ, ex quo procreverit naturaliter planta semina sua ferens, per quæ deinceps naturaliter plantæ hujus species conservata. Productio feminis istius miraculum primigenium est: etenim ab eo plantæ alicujus species originem derivat, quæ in hoc universo naturaliter conservatur.

§. 773.

Creatio mundi & ordinis naturæ constitutio miraculum primigenium est. Creatio mundi (§. 768.) & constitutio ordinis naturæ miraculum est (§. 770.). Atque adeo non minus *mundus*, quam ordo naturæ originem suam a miraculo derivat. Quæ vero deinceps fiunt, rationem sufficientem in essentia & natura corporum continent, quemadmodum expeririuntur, qui in rationes rerum naturalium inquirunt, & nemo non ultro largitur, adeoque naturaliter fiunt (§. 509. *Cosmol.*). Quoniam itaque miraculum primigenium est, unde quid originem suam derivat in universo, a quo deinceps cetera naturaliter

raliter pendent (§. 772.); creatio mundi & ordinis naturæ constitutio miraculum primigenium est.

Non sine ratione hanc propositionem adicere libuit, propterea quod miraculi primigeni vis vulgo non agnoscitur, nec a miraculis ceteris eorumque effectibus dignoscitur. Utile tamen est miraculum primigenium ab aliis distingui, atque imprimis notari, quænam ad ipsum pertineant, ut constet, quandonam in explicandis rebus naturalibus miraculum recte admittatur & tanquam principium sumatur, quando vero idem perperam fiat cum detrimento scientiæ. Sane nos evicimus constitutionem ordinis naturæ esse miraculum, sed primigenium: quamobrem quæ deinceps secundum hunc ordinem fiunt, intelligibili modo explicari debent. *Cartesius* vero dum miraculum primigenium in perpetuum transmutat a vero utique aberrat, nec tantum originem ordinis naturæ a miraculo derivat, sed omnes naturæ effectus miraculosos facit. Plurimum autem differt, utrum quid sit effectus miraculi primigeni, an vero effectus miraculosus. Nimirum effectus miraculi primigeni per essentias & naturam rerum explicabilis, etsi actualitas ejus supponat quidpiam miraculosi: at effectus miraculosus per naturam & essentias rerum explicabilis non est, sed ipsemet in numerum eorum referendus, quæ immediate a Dei potentia proficiuntur. Sumamus e. gr. S.S. convenienter, Deum condidisse primum gallum primamque gallinam, per quæ animantia deinceps propagata fuit species ad nostra usque tempora. Quomodo ortus fuerit gallus iste primus, quomodo eidem sociata fuerit gallina prima; per essentiam & naturam galli atque gallinæ explicari nequit, sed ad voluntatem Numinis sapientem ac potentem recurrendum, consequenter origo gallorum & gallinarum per miraculum explicanda. Enimvero per essentiam & naturam galli atque gallinæ explicabile, quomodo generentur & excludantur ova fecunda & ex iis excludantur pulli. Origo adeo a miraculo derivata non reddit effectum naturæ ipsum miraculosum. Quodsi vero in explicanda generatione ovi ac exclusionem pullorum ex ovis incubatis

batis recurrendum continuo esset ad miraculum novum, quod tunc demum fieret; effectus ipse foret miraculosus.

§. 774.

Quaecunque naturaliter fiunt in mundo adspectabili, vi miraculi primigeniei consequuntur. Quæ enim in mundo adspectabili naturaliter fiunt, secundum naturæ ordinem fiunt (§. 566. Cosmol.). Enimvero constitutio ordinis naturæ est miraculum primigenium (§. 773.), consequenter quæ secundum eum fiunt, vi miraculi primigeniei consequuntur. Quæ itaque in mundo adspectabili naturaliter fiunt, vi miraculi primigeniei consequuntur.

Effectus naturales quomodo a miraculo pendeant.

Apparet adeo, non repugnare, ut quid sit naturale & tamen vi miraculi primigeniei consequatur. Unde falluntur, qui sibi persuadent, ideo quid non esse naturale, quod vi miraculi primigeniei consequatur, sed quæcunque vi miraculi primigeniei consequuntur esse perpetua miracula. Hinc vero potest fluere, quod in systemate harmoniæ præstabilitæ ideo non fiunt perpetua miracula, quia ipsa ejus constitutio, perinde ac constitutio ordinis naturæ, miraculum aliquod primigenium est. Quamobrem qui in systemate harmoniæ præstabilitæ perpetua miracula fingunt, quod eam sine miraculo constitui non posse intelligunt, per præcipitantiæ judicant, primævam constitutionem ad actus singulares perperam extendentes.

§. 775.

Potentia creatrix nulli enti a Deo communicari potest. Cum Incommuni enim creatio mundi sit miraculum (§. 768.), potentia creatrix *incommunicabilitas* soli Deo propria (§. 767.) est potentia miracula patrando. Quam *potentia creatricis.* obrem cum potentia patrando miracula nulli enti a Deo communicari possit (§. 471.); nec potentia creatrix enti ulli a Deo communicari potest.

Quodsi excipias, potentiam patrando miracula communi-

eari posse hominibus, teste Scriptura sacra, quæ miracula ab iis patrata refert, consequenter nullam videri rationem, cur potentia creatrix iisdem, vel enti cuidam alteri communicari non æque possit; facilis est responsio ex superioribus. Deus nimirum potentiam patrandi miracula enti finito confert, quatenus ad ejus nutum miracula patrare decernit (§. 472.). Quamobrem si ad nutum entis cujusdam finiti, veluti ad nutum hominis quidpiam creare vel annihilare decernit; quin hoc pacto facta communicatio subsistere queat, ecquis dubitet? Sed de hac communicatione, quæ apparens est, non vera, propositio præsens minime loquitur. Negatur enim, potentiam creatricem homini, vel enti cuidam finito alteri ita communicari posse, ut eidem insit tanquam subjecto, quemadmodum vis activa inest elementis rerum materialium & animabus nostris.

§. 776.

*Differentia
potentia di-
vina a po-
tentia crea-
turarum.*

Potentia divina non modo magnitudine differt a potentia naturæ & animarum nostrarum; verum ipsa specie, seu potentia alterius prorsus generis est. Etenim Deus potentia creatrice gaudet, qua substantiæ ad actum traducuntur, nullo alio præexistente in eundem influente (§. 766.). Hæc vero potentia enti nulli communicari potest (§. 775.) & quæ elementis inest vis (§. 196. Cosmol.), ipsaque inde resultans vis motrix, in qua natura corporum consistit (§. 507. Cosmol.), nec non vis animarum nostrarum non tendit nisi ad continuam status mutationem (§. 56. Psychol. ration.), consequenter cum status rei consistat in coexistentia mutabilium cum iisdem fixis (§. 705. Ontol.), non nisi modos variat (§. 703. Ontol.), adeoque accidentia in substantia existente (§. 791. Ontol.) ad actum perducit (§. 779. Ontol.). Patet itaque potentia Dei ad actum perducere substantias; potentia naturæ atque animarum nostrarum non nisi accidentia. Præterea potentia divina possibile ad actum perducere ex nihilo, seu nullo alio præexistente, quod quomodo-
cunque

cunque in ejus actualitatem influere possit; potentia autem naturæ atque animarum nostrarum nihil ad actum perducitur nisi in subjecto præexistente. Quamobrem omnipotentia Dei non modo in eo differt a potentia naturæ & animarum nostrarum, quod illa sese ad omnia possibilia, hæc vero ad aliqua tantummodo sese extendat (§. 343.), seu, cum potentia naturæ & animarum sit limitata, divina prorsus illimitata sit (§. 354.), verum etiam ipsa specie hæc ab ista differt, seu alterius prorsus generis est.

Hinc liquet a potentia naturæ & animarum nostrarum, seu, quod perinde est, a potentia entium finitorum, non dari consequentiam ad divinam, seu entis infiniti potentiam: id quod minime perpendunt, qui ex eo, quod de anima negatur actio in corpus, aut de substantia simplici actio in aliam simplicem finitam scilicet, inde inferunt, de Deo quoque negari debere actionem in animam nostram, vel in corpora: quo admissio deinceps porro multæ fluunt prono quasi alveo consequentiæ molestæ. Equis enim ideo negat Deum posse quid creare, seu ex nihilo producere, quod neque naturæ rerum, neque animabus nostris potentiam creatricem competere defendit? Sane enti infinito alterius prorsus generis intellectus competit quam animabus nostris, aut entibus finitis, cum intellectus divinus prorsus purus sit (§. 178.), qualis enti finito competere nequit, & omnem respuat idearum successionem (§. 160.), quæ enti finito propria, ut adeo nobis prorsus incomprehensibilis sit (§. 172.). Quid ergo mirum, si potentia quoque divina ipsa specie differt a potentia quacunque entis cujuscunque finiti? Cavendum itaque, ne per præcipitantiam cum consequentiariis inferamus, quæ inferri non possunt. Potentia Deo equidem competit tanquam enti simplici; sed vis illius differentia a viribus ceterorum quorumcunque entium simplicium oritur ex aseitæ & infinitudine, unde cum aseitæ & infinitudo Deo propria sit, entia vero cetera in universum omnia sint entia ab alio atque finita, non est quod miremur, potentiam Dei specie differre a potentia entium finitorum quorumcunque.

§. 777.

**Creaturae
definitio.** *Creatura dicitur ens a Deo creatum, seu, quod perinde est, ex nihilo productum.*

Equidem vocabulum videtur sumi in sensu strictiori, cum creaturæ etiam appellentur, quæ hodiernum in mundo generantur, & S. S. narrante ex materia quadam inhabili fuisse producta, veluti homo ex gleba terræ. Enimvero constat omnia, quæ in mundo existunt, quoad actualitatem suam dependere a creatione, adeoque vi ejusdem actum consequi, consequenter omnia in mundo a Deo creata sunt, quatenus id, quod substantiale est, a Deo creatum, seu ex nihilo productum. Sane nisi Deus elementa rerum materialium ex nihilo produxisset, nec natura rerum existeret, cujus vi fierent generationes ac corruptiones, consequenter nec ullum ad actum perveniret ens compositum, quod hodie demum in rerum natura oritur.

§. 778.

**Creaturae
quenam
sint.** *Totus mundus adspectabilis & omnia elementa rerum materialium sunt creature Dei. Etenim mundus totus adspectabilis a Deo creatus est (§. 760.), & ipsa rerum materialium elementa a Deo creata sunt (§. 758. Theol. natur. & §. 691. Ontol. atque §. 182. Cosmol.). Jam vero creatura dicitur ens omne, quod a Deo creatum est (§. 777.). Ergo totus mundus adspectabilis, & omnia elementa rerum materialium sunt creature.*

§. 779

**Idem ulterius
ostenditur.** *Quoniam corpora non sunt nisi elementorum aggregata (§. 176. Cosmol.) Corpora non modo in prima origine rerum producta; verum etiam hodiernum genita, quatenus non sunt nisi aggregata elementorum, creature Dei sunt.*

Unde

Unde non necesse est, ut significatum laxiorem vocabuli *creaturæ* admittamus; sed sufficit, corpus nullum dici creaturam, nisi quatenus ex elementis aggregatur, quæ ex nihilo a Deo producta sunt, nec per naturam suam aliter aggregari possunt, quam aggregantur sive a primo rerum statu, sive hodiernum per generationem. Patet adeo, quod corpora in universum omnia, etiam in singulari spectata, propriissime *creaturæ* dicantur, præsertim in nostra elementorum theoria, ubi per intrinsecas determinaciones substantiarum simplicium non modo mechanismus omnis, verum etiam corpora omnia in individuo determinantur.

§. 780.

Anima humana a Deo creata in prima rerum creatione.

Anima enim humana non est ens a se (§. 59.), & rationem existentiam sufficientem in Deo habet (§. 67.). Quoniam adeo oritur (§. 541. *Ontol.*), oriri autem nequit nisi per creationem (§. 698. *Psychol. ration.*); animas humanas a Deo creatas patet. Præexistunt autem in corpusculis organicis præexistentibus, ex quibus foetus in utero formatur (§. 704. *Psychol. ration.*), & cum iis in uterum matris deferuntur (§. 705. *Psychol. ration.*), consequenter non demum creantur, quando foetus in utero formatur. Quamobrem nulla subest ratio, cur non admittamus, eas perinde ac elementa rerum materialium in prima statim creatione a Deo fuisse creatas.

Creatio animarum.

Nobis hic perinde est, si quis statuat animas humanas in prima statim rerum creatione cum eo, quod substantiale est in omnibus corporibus, fuisse creatas, ita ut hodie nihil creetur amplius; si defendat, eas tum demum creari, quando in utero vivere incipit foetus, modo agnoscatur, eas a Deo creari, etsi veritati consentaneum sit prius, non tamen intelligendum nisi iis, qui principia moderna de generatione plantarum & animalium hominumque physica & de præexistentia animarum psychologica habuerint perspecta.

§. 781.

*Cur anime
sint crea-
turae.*

Quoniam animæ a Deo creatæ sunt omnes (§. 780), quicquid vero ab eo creatur, creatura est (§. 777.); *anime humane sunt creature.*

Patet animas humanas eodem prorsus sensu dici creaturas, quo elementis rerum materialium id nominis tribuitur (§. 778.). Etenim non minus a Deo ex nihilo ad statum actualitatis perductæ sunt, quam elementa ad eundem fuere perducta.

§. 782.

*Cur totus
homo sit
creatura.*

Et quia homo anima & corpore constat (§. 51. *Psychol. ration.*), anima autem non minus (§. 781.), quam corpus creatura Dei est (§. 779.); *totus homo, qua animam scilicet atque corpus, est creatura Dei.*

Unde recte dicitur, Deum & corpus, & animam nostram, adeoque nos, qui corpus & anima sumus, creasse, ac unusquisque hominum eundem autorem & creatorem suum agnoscere tenetur.

§. 783.

*Creatio a-
nimarum
brutorum.*

Animæ brutorum a Deo creatæ sunt. Cum animæ brutorum observent legem sensationum (§. 754. *Psychol. ration.*), quam scilicet observant humanæ; eodem prorsus, quo supra, modo patet, eas non esse entia a se (§. 59.), consequenter nec necessario existere (§. 32.), adeoque ortas esse (§. 541. *Ontol.*). Quoniam itaque oriri nequeunt nisi per creationem (§. 768. *Psychol. ration.*), potentia autem creatrix soli Deo propria (§. 767.), nec ulli enti alteri communicari potest (§. 775.), ideo pater, eas a Deo creatas esse.

Probari etiam poterat per analogiam. Animæ humanæ a Deo

a Deo creatæ sunt in prima statim rerum creatione (§. 780.). Quamobrem cum animæ brutorum uniantur corporibus brutorum, quemadmodum humanæ corporibus humanis, & corpora brutorum generentur eodem modo, quo humana, quin ipsa quoque in prima statim rerum creatione a Deo creatæ sint, nullum videtur dubium.

Præter corpora eorumque elementa, per quæ aggregantur, & animas hominum atque brutorum rationis lumine, nulla nobis entia innotescunt. Quamobrem cum ostenderimus mundum integrum & singula elementa (§. 778.), corpora singula tam primæva, quam ex iis postea genita (§. 779.), animas humanas (§. 781.) & brutorum esse creaturas (§. 783.); patet omnino entia omnia, quæ præter Deum existere novimus, esse creaturas. Ubi demonstratum fuerit, Deum non esse nisi unum; facile ostendetur, quodcumque præter Deum existit ens, id omne esse creaturam. Et si autem ex principiis rationis demonstrari minime possit, præter corpora & animas hominum atque brutorum alia quædam entia esse creata; nec tamen etiam demonstrari potest, nulla alia creata esse,

§. 784

Ens unum dicitur *speculum rei alterius*, si per determinationes illi intrinsecas seu per ea, quæ ipsi insunt, colligi possit, quid hæc sit, quatenus scilicet per illius cognitionem pervenitur ad cognitionem huius. *Speculum rei quid dicitur.*

Ratio denominandi patet a speculo, unde mutuatur denominatio. Etenim cum ea, quæ directe videri a nobis minime possunt, per reflexionem videantur in speculo, ut adeo visum non effugiant, quæ alias eidem subducerentur; ita similiter per ens istud, quod rei alterius speculum appellatur, res hæc altera nobis innotescit, quæ alias cognitioni nostræ subduceretur. Non tamen obstante hac similitudine, quæ inter speculum communi sermone sic dictum & alterum, de

quo hic loquimur, intercedit, significatus vocabuli, quem eidem hic tribuimus, proprius est (§. 148. Log.)

§. 785.

*Creaturae
quid sint.*

Creaturae omnes sunt specula perfectionum divinarum. Etenim creaturae a Deo creatae sunt (§. 777.). Sed finis ultimus, quem Deus per existentiam hujus universi, adeoque rerum omnium praeter ipsum existentium intendit, est patefactio summæ, qua gaudet, perfectionis (§. 629.). Quamobrem cum finem quemcunque particularem ideo intendat, quia per hoc universum perfectionem suam patefacere vult (§. 632.); creaturas quoque singulas ideo fecit, ut per eas perfectiones suas patefaceret. Enimvero per se patet, Deum alio modo perfectiones suas per creaturas patefacere non posse, quam si tales facit, ut ex iis, quae ipsis insunt, colligi possit, quænam sint perfectiones divinae. Quamobrem cum Deus utatur mediis, quibus finem, quem intendit, ex æsse consequitur (§. 625.); dubio quoque caret, quin talia creaverit omnia entia, ut ex iis, quae ipsis insunt, colligi queat, quænam sint perfectiones divinae. Quoniam itaque ens unum est speculum rei alterius, si per determinaciones illi intrinsecas seu per ea, quae ipsi insunt, colligi possit, quod hæc sit (§. 784.); creaturae omnino omnes sunt specula perfectionum divinarum.

Essentia adeo creaturae qua creaturae est repræsentativa perfectionum divinarum: id quod clarius constabit, si dependentiam creaturarum a perfectionibus seu attributis divinis perfestigemus.

§. 786.

*Quenam
perfectionum divi-
narum specula den-
tur.*

Quoniam & corpora (§. 779.), & animæ tam hominum (§. 781.), quam brutorum creaturae sunt (§. 783.), immo totus mundus adspectabilis seu totum universum creatum est (§. 778.); corpora quoque omnia & animæ omnes, immo totum universum, sunt specula perfectionum divinarum (§. 785.).

A. re-

A veritate igitur non abhorret, quod vulgo dicitur, ne minimum quidem in natura rerum dari graminulum, quod creatorem suum non loquatur. Neque exigui momenti est probe perpendere, quod, quicquid in hoc universo existit, perfectionis divinæ speculum sit. Hoc enim principio nititur tota Theologia naturalis experimentalis, de qua mentem nostram uberius alibi exposituri sumus.

§. 787.

Deus etiam juxta S. S. mundum creavit ex nihilo. Scri- *Creatio*
ptur sacre initium fit hisce verbis Gen. I. 1. In principio *mundi ex*
creavit Deus cælum & terram. Ostendimus jam (§. 68.), cœ- *nihilo S.S*
lum & terram stylo Hebræorum significare mundum, & ideo *conformi*
juxta S. S. Deus dicendus est creasse mundum. Quando vero
dicitur Deus mundum creasse in principio, id ita intelligen-
dum esse jam ibidem monuimus, quod mundum creaverit,
quando nondum erat ens ab alio, adeoque nihil extra Deum
ac præter Deum existeret. Antequam igitur mundus create-
tur, nihil extitit præter Deum, consequenter mundus non est
factus ex aliquo præexistente, quod quomodocunque in actuali-
tatem ipsius influere poterat. Atque ideo juxta S. S. Deus fecit
mundum, cum nihil ejus antea actu esset. Jam vero ex nihilo
oriri dicitur, quod existere incipit, cum antea ejus nihil actu
existeret (§. 540. *Ontol.*) & ex nihilo produci, si ad actum perdu-
citur, quod ex nihilo oriri debebat (§. 690 *Ontol.*). Patet er-
go juxta S. S. Deum mundum fecisse ex nihilo, consequenter
creasse eodem sensu, quo nos creationem ipsi asseruimus (§.
760.).

Porro *Hebr.* XI. 4. visibilia facta dicuntur verbo Dei ex
invisibilibus: quæ verba vulgo adducuntur, ubi probandum
autoritate S. S. mundum ex nihilo factum esse in textu Græco
τὰ βλεπόμενα vocantur, quæ visibilia vertit vulgatus interpres,
ut adeo sermo sit Apostolo de iis, quæ in sensum incurrunt,

consequenter de mundo adspectabili. Loquitur enim de visibilibus, quatenus in se spectata talia sunt, non quatenus a nobis actu videntur, ut adeo *Castalio* sensum verborum Apostoli coarctet præter necessitatem, dum τὰ πλεπόμενα vertit per ea, quæ cernuntur, cum potius vertere deberet, quæ cerni possunt. De his igitur, quæ visibilia sunt, affirmat Apostolus, quod facta sint ex invisibilibus. In textu Græco facta leguntur μὴ ἐκ Φαινόμενων, non ex apparentibus, aut, ex non apparentibus. Quæritur itaque, quænam sint ea, quæ non apparebant? Negat Apostolus, ea, quæ in sensus incurrunt, facta esse ex apparentibus, consequenter negat, cum mundus fieret, aliquid extitisse, quod in sensus incurrere poterat. Negat igitur præextitisse materiam quandam, ex qua mundus seu corpora fieri poterant. Opponit nimirum creationem productionibus naturæ & artis, quibus visibile fit ex eo, quod apparet, hoc est, opus aliquod producit ex materia aliqua præexistente, ut notionem illarum removeat a creatione, ne male eam concipiamus. Quamobrem alia Apostolo mens esse nequit, quam quod mundus factus sit, re nulla præter Deum adhuc existente. Unde porro eodem, qui ante modo patet, mundum a Deo factum esse ex nihilo eo sensu, quo nos ante ejus ex nihilo productionem evicimus.

Deus in S. S. dicitur etiam creasse hominem *Gen. I. 27.* ubi in textu Hebræo eadem vox ברא occurrit, quæ legitur *vers. 1.* Hoc tamen non obstante *cap. II. 7.* ipsum formasse fertur de limo terræ, atque adeo ex materia quidem inhabili, non tamen ex nihilo, seu non præexistente, aut ut Apostolus loquitur, non ex apparante, seu non ex eo, quod in visum incurrit: etenim limus terræ in visum utique incurrit, atque adeo in numero apparentium est. Enimvero cum Deus, quemadmodum abunde satis evicimus, cælum atque terram ex nihilo, seu nullo alio præexistente, aut, ut cum Apostolo loquamur,

non

non ex eo, quod apparet seu cernitur, produxerit; glebam quoque terræ, ex qua formavit hominem, ex nihilo ante fecerat, quam ex ea formaret hominem, consequenter & hominem ipsum tandem ex nihilo fecit. Sane si quis artifex posset creare materiam, unde faceret horologium; nemo non affirmaret, ipsum horologium ex nihilo fecisse. Quamobrem Deus quoque hominem ex nihilo produxisse dicendus est, quem formavit ex limo terræ a se ante ex nihilo producto. Quod Deus hominem creationis vero actu, quem eidem ob contingentiam mundi hujus adspectabilis tribuimus, ad actum perduxerit, cum antea non esset nisi possibilis, quatenus ejus idea in intellectu divino continebatur, per quam omniaabilia sunt (§. 192.), rationis lumine innotescit, quemadmodum & ante evicimus (§. 764). Utrum vero sicuti mundus integer adspectabilis, quatenus ex corporibus mundi totalibus in ordinem digestis constat, immediate ex nihilo productus, hoc est, ex statu possibilitatis puræ ad statum actualitatis perductus, an vero ex aliquo demum præexistente factus fuerit, quod ex nihilo produxit eo fine, ut inde formaret hominem, cum sit res facti, ex principiis rationis demonstrari nequit, quemadmodum nec ex iisdem demonstrare valemus, quæ hominibus olim facere visum fuit. Nullus adeo rationis & S. S. dissensus, sed consensus tantus, quantus per rerum naturam dari potest.

Solenne philosophis, subinde & Theologis, quemadmodum in aliis materiis, ita quoque in doctrina de creatione, interpretationem S. S. aptare hypothefibus, quas amplectuntur. Unde videas eos, quibus hypothefis chaotica placet, cum defendant, Deum primum produxisse chaos, & deinde idem in ordinem redigendo formasse mundum, verba Mosis, quod Deus in principio creavit cælum atque terram, interpretari de productione rudis illius atque indigestæ molis, quod chaos dicere veteres. Enimvero mos iste mihi sese nunquam pro

probare potuit, cum sic fieri possit, ut Autoribus sacris tribuantur, quæ non modo ab ipsorum mente, verum etiam a veritate aliena sunt: unde deinceps multa sequuntur incommoda non facile evitanda, quibus recensendis in præsentem minime commoramur. Sane verba Apostoli ex principiis superioribus duplici modo explicare poteramus. Etenim primo constat, ab æternæ ea, quæ in creatione a Deo ad actum perducta sunt, fuisse possibile per ideas in intellectu divino existentes (§. 192.), adeoque idealiter extitisse in intellectu divino, consequenter quatenus idealem tantummodo habuere existentiam, in numero eorum fuisse, quæ non apparebant, seu in sensum incurrere non poterant. Enimvero Deus eadem in creatione ad actum perduxit, atque hoc modo, quæ ante non apparebant, jam visibilia effecta fuere. Quamobrem Deus visibilia fecit ex non apparentibus, aut si mavis fecit non ex apparentibus. Similiter novimus corpora esse elementorum aggregata (§. 176. *Cosmol.*), adeoque facta a Deo sunt eorundem aggregatione. Enimvero elementa rerum materialium ne oculo quidem armato apparere possunt (§. 101. *Psychol. ration.*), consequenter non apparentia sunt. Quamobrem Deus ea, quæ in sensum incurrunt, non fecit ex apparentibus, consequenter ex non apparentibus. Utraque explicatio nihil habet, quod sit a veritate alienum: ast ipsa tamen ideo dici nequit vera, aberrat enim a mente Apostoli. Hujus nimirum temporibus materia illa rudis & indigesta, quæ chaos dicebatur, statuebatur æterna, nec qui creationem admittebant, mundum ex nihilo factum largiebantur, sed ex rudi illa & indigesta materia productam affirmabant. Negabat igitur Apostolus, quod vulgo tunc temporis opinabantur; Creationis mundi ex nihilo persuasus. Unde non aliter interpretati convenit ejus verba, quam quomodo ea interpretati sumus, nisi ejusdem sensum affingere velimus a mente loquentis alienum. Cum sapissime hac in re peccetur ab interpretibus, non inconsultum duximus ea hic moneri.

§. 788.

*Deus creator juxta
S. S.*

Deus etiam creator dicitur in S. S. eodem sensu, quo supra

pra eundem creatorem esse evicimus, & juxta eandem potentia creatrix ipsi propria. Etenim Rom. I. 25. Deus dicitur creator simpliciter, ubi Apostolus reprehendit Gentiles, quod creaturæ potius servierint, quam creatori, ita ut creator & Deus verus ipsi sint synonyma. Similiter 1. Petr. IV. 19. qui patiuntur secundum voluntatem Dei, fidei creatori animas suas in benefactis commendare dicuntur: ubi denuo patet, per creatorem intelligi Deum. Nemo non largitur, Deum vocari creatorem ab actu creationis, quo scilicet creavit mundum & omnia, quæ in eo sunt. Creavit autem mundum ex nihilo juxta S. S. (§. 787.). Quamobrem creator dicitur, quia mundum ex nihilo produxit. Hoc vero sensu (§. 762.) etiam evicimus Deum esse creatorem (§. 763.). Dicitur itaque Deus creator eodem sensu, quo supra eundem creatorem esse evicimus. Enimvero tam Paulus, quam Petrus Deum vocant creatorem simpliciter, ita ut ipsis unum idemque sit appellare Deum & appellare creatorem. Quoniam hæc vocabula pro synonymis haberi minime possent, nisi solus Deus esset creator (§. 330. Log.); potentia utique creatrix juxta S. S. soli Deo propria esset debet.

§. 789.

Quicquid præter Deum existit, in S. S. creatura appellatur eodem sensu quo supra creaturas esse omnia evicimus. Et quæ dicantur enim Rom. I. 25. creator & creatura sibi invicem opponuntur, tur in S. S. & creatoris nomine verus Deus, & qui ibidem solus Deus esse perhibetur, indigitatur. Unde apparet, creaturæ nomine designari, quicquid præter Deum existit. Equidem Apostolus refert Gentiles mutavisse gloriam Dei incorruptibilis in similitudinem imaginis corruptibilis hominis & volucrum, & quadrupedum & serpentium seu reptilium, & hinc exprobrat iisdem, quod servierint creaturæ potius, quam creatori. Quem-
(Wolfii Theol. Naturalis.) Bbb bb admo-

admodum itaque nomine creatoris Deum incorruptibilem indigitat; ita nomine creaturæ appellat viventia in tellure, quæ tanquam Deos coluere gentiles, consequenter vocabulum creaturæ quod denotet omnia, quæ præter Deum existunt, ex præfente loco probari posse non videtur. Enimvero cum ex iis, quæ modo dicta sunt, intelligatur, creaturæ vocabulum non posse non generaliter accipi pro omni, quod præter Deum existit, siquidem creator significare debet solum Deum verum; ex eo, quod nomen generis tribuatur speciebus quibusdam, ne prolixa earundem enarratione repetita opus sit, adversus significatum generale nihil concludi potest. Firmum itaque manet in S. S. creaturam appellari, quicquid præter Deum existit.

Deus juxta S. S. creator dicitur, eodem sensu, quo nos eum creatorem esse evicimus (§. 788.). Quamobrem cum nobis creator sit, qui mundum hunc adspectabilem creavit (§. 762.); juxta S. S. quoque Deus creator dicendus, quod mundum hunc adspectabilem creaverit. Quemadmodum itaque Deus creator dicitur, quia res alias extra se creavit: ita eadem res in oppositione ad creatorem non possunt dici creaturæ, nisi quatenus ab ipso creatæ sunt. Atque adeo liquet, quicquid præter Deum existit, in S. S. appellari creaturas eodem prorsus sensu, quo nos creaturas esse evicimus (§. 777.).

Multa occurrunt S. S. loca, in quibus creaturarum mentio injicitur, & ex quibus probari poterat, creaturarum nomine indigitari, quicquid præter Deum existit, quia omnia, quæ præter Deum existunt, vi creationis actum consequuntur: enimvero in re vel per se satis manifesta ambagibus non est opus. Neque tamen reprehendi potest, quod ubi evidentiam sectamur, quæ a notionum evolutione tota pendet, etiam in rebus, quæ per se manifestæ videntur, notionibus distinctis ad evidentiam contendamus. Quantum hoc ipsum

usui sit ad præcavendam præcipitantiam in rebus arduis & ad augendum acumen, quo extra Mathesin opus est, ubi imaginibus non juvamus; abunde experientur, qui ad res obvias explicandas eandem diligentiam & assiduitatem afferunt, quæ in intricatis ac arduis uruntur. Cum non pompæ serviamus, sed utilitati generis humani, metu judiciorum præcocium nos minime abstertere patimur ab iis, quæ maximi esse usus ipsimet experti sumus.

§. 790.

Creaturæ nomine in S. S. non modo vocantur ea, quæ in primæva creatione a Deo producta sunt; verum etiam omnia, quæ de-sumatur incepti vi naturæ ad actum perducuntur. 1. Tim. IV. 4. omnis creatura bona dicitur, ubi Apostolus refutat errorem illorum, qui creaturæ prohibent abstinere a cibis, quos creavit Deus ad percipiendum. in S. S. Patet itaque cibos, quibus nunc utimur, dici creaturas, & Deum dici eos creasse, ut adeo appareat, eos ab actu creationis creaturas appellari. Vescimur iis, quæ hodie vi naturæ in regno vegetabili & animali producantur. Quamobrem liquet, in S. S. creaturas appellari, & a Deo creata dici, quæ vi naturæ ad actum perducuntur, non tantummodo Gen. I. quæ in primæva creatione a Deo producta sunt.

Idem etiam ostenditur ex Eccles. XI. 1. ubi Salomo hortatur homines in universum, ut meminerint creatoris sui in diebus juventutis suæ. Appellatur adeo hic Deus creator hominum, qui juxta naturæ ordinem per generationem descendunt. In textu Hebræo occurrit vocabulum ברא, quod substantivum a radice ברא descendit, quo utitur Historicus sacer coelos atque terram a Deo creata esse narrans Genes. I. 1. Unde patet ab actu creationis, quo Deus hunc mundum adspectabilem ad actum perduxit, eundem quoque dici hominum creatorem. Quæcunque demum ratio sit, cur Deus creare dicatur hominem, qui vi naturæ ad actum perducitur; eandem

quoque locum habere debere in aliis quibuscunque corporibus naturæ vi productis, vel ex eo colligitur, quod per modo demonstrata Deus non minus dicatur ciborum, quibus vescuntur homines, adeoque eorum, quæ in regno vegetabili & animali juxta naturæ ordinem generantur, creator, quam hominum. Quoniam itaque in oppositione ad creatorem, quod creatum est, creatura dicitur Rom. I. 25. ideo patet juxta Salomonem creaturarum nomine compellenda esse omnia, quæcunque vi naturæ ad actum perducuntur, etsi in primæva rerum creatione actum nondum fuerint consecuta.

Rationem, cur Deo tribuenda sit creatio etiam eorum, quæ vi naturæ hodiernum producantur, reddidimus supra, cum hanc veritatem, quam S. S. consentaneam probavimus, a priori demonstraremus (§. 779.).

§. 791.

Creaturæ *Creaturæ etiam juxta S. S. sunt specula perfectionum di-*
quid sint *vinarum eo sensu, quo supra idem demonstravimus. Etenim*
juxta S. S. Rom. I. 20. ἀπὸ κτίσεως κόσμου a creatione mundi, hoc est, ex
quo mundus creatus, vel creatura aliqua extitit, invisibilia Dei,
veluti sempiterna ejus virtus & divinitas, intellectu conspiciuntur
per ea, quæ facta sunt. Ex iis adeo, quæ facta sunt, de Deo
cognoscuntur, quæ in sensus minime incurrunt. Quæ a Deo
facta sunt, sunt creaturæ (§. 777.), etiam juxta S. S. (§. 789.).
Ex creaturis adeo cognoscuntur, quæ Deo insunt, nec in sensus
nostros incurrere possunt. Ea, quæ insunt Deo, non insunt
creaturis, adeoque intuitive cognosci nequeunt. Necessè igitur
est, ut ex iis, quæ creaturis insunt, ratiocinando colligantur,
quæ sunt in Deo, consequenter creaturæ hoc modo factæ sunt,
ut per ea, quæ ipsis insunt, colligi possit, quod hæc sint
perfectiones Deo competentes. Quamobrem cum nobis speculum
rei alterius dicatur ens istud, cui insunt, per quæ col-

colligi potest, quod hæc insunt alteri (§. 784.); juxta S. S. creaturæ sunt specula perfectionum divinarum eo sensu, quo nos idem probavimus in superioribus (§. 785.).

Quoniam principia, ex quibus propositionem præsentem demonstravimus, S. S. conformia esse in anterioribus probavimus; citra probationem novam jam constare poterat, eam esse S. S. conformem. Consultius tamen visum fuit, eandem ex ipsis S. S. verbis immediate deducere.

§. 792.

Ante creationem mundi nec tempus, nec spatium erat; utrumque vero cum ipso mundo cæpit. Etenim Deus, qui *Tempus & spatium* mundum hunc adspectabilem creavit (§. 760.), non modo cor- *quando* pora, ex quibus is constat (§. 119. *Cosmol.*); sed ipsa etiam ele- *cæperit.* menta rerum materialium fecit (§. 758.). Quamobrem antequam crearetur, nec corpora, nec elementa existebant; quibus aggregatis illa oriuntur (§. 176. *Cosmol.*), consequenter nec extra Deum quædam coëxistebant. Quamobrem cum spatium non sit nisi ordo simultaneorum, quatenus scilicet coëxistunt (§. 589. *Ontol.*), nec idea spatii in anima nisi confuse repræsentet nexum rerum a statu elementorum interno pendentis (§. 104. *Psychol. ration.*), quatenus scilicet per eum coëxistendi quidam ordo resultat (§. 105. *Psychol. ration.*); ante creationem spatium nullum extitit.

Similiter cum Deus omnia simul cognoscat (§. 160.) & velit (§. 355.); nulla in eodem successio locum habet. Quoniam vero ipse mundum hunc adspectabilem creavit (§. 760.), in quo dantur res successivæ (§. 52. *Cosmol.*), quæ inter se connectuntur (§. 54. *Cosmol.*), certoque ordine se invicem consequuntur (§. 76. *Cosmol.*) atque animas nostras (§. 780.), quæ singulæ propriam sibi perceptionum ac appetitionum & aversionum, adeoque successivorum inter connexorum seriem

continent (§. 524. *Psychol. rat.*); ante creationem mundi huius nulla successiva existebant. Quamobrem cum tempus non detur nisi existentibus successivis in continua serie (§. 574. *Ontol.*), & animæ non sunt creatæ nisi cum ipso mundo hoc adspectabili (§. 780.); ante huius creationem tempus nullum fuit.

Enimvero dum Deus hunc mundum adspectabilem creavit (§. 760.) & una cum ipso animas nostras (§. 780.), & series continuæ successivorum in mundo adspectabili (§. 52. 54. *Cosmol.*), & in animabus nostris cœpit (§. 524. *Psychol. ration.*). Quamobrem cum tempus detur, quam primum res successivæ in continua serie existunt (§. 574. *Ontol.*); cum ipso mundo adspectabili tempus quoque cœpit.

Et quia similiter in mundo dantur res simultaneæ inter se connexæ (§. 51. 53. *Cosmol.*) & in his quidam ordo (§. 76. *Cosmol.*); quamprimum mundus hic adspectabilis a Deo creatus fuit, exittere simultaneæ certo quodam ordine. Quoniam itaque spatium non est, nisi ordo simultaneorum, quatenus scilicet coexistunt (§. 589. *Ontol.*); cum ipso etiam mundo adspectabili spatium cœpit.

Qui notione spatii imaginaria confisi ipsum ens absolutum esse fingunt, in quo Deus mundum tanquam in receptaculo quodam collocavit, concedere tenentur spatium extitisse, antequam mundus crearetur, immo eundem a Deo creari non potuisse, antequam spatium extaret, in quo eundem collocaret. Unde aut spatium ante mundum a Deo creatum, aut ipsum æternum ac increatum esse admittere tenentur. Sed quicquid horum statuas, inextricabilibus difficultatibus intricaris, manifesto indicio in notione spatii sumi, quæ a veritate abhorrent. Ex demonstratione autem propositionis præsentis liquet, difficultates superesse nullas, ubi veram spatii notionem amplexus ex eadem ratiocinaris. Idem prope modum dicendum est de tempore, siquidem habeas pro-

eate

ente absoluto, quod juxta durationem rerum fuit, atque adeo extitisse fingitur, antequam crearetur mundus, ita ut æternitas concipiatur per modum temporis infiniti, quemadmodum spatium per modum extensionis infinitæ.

§. 793.

Quoniam ante creationem mundi tempus nullum fuit, *An mundus citius creari non potuit, quam creatus est.* *sed cum ipso mundo demum cœpit (§. 792.); mundus citius creari non potuit, quam creatus est.*

Nimirum quæstio hæc, utrum mundus citius creari poterit, nec ne, nullum habet sensum, si ad notionem realem temporis non imaginariam animum advertas: quemadmodum levi attentione agnoscitur, modo non ignores, quæ de tempore dicta sunt in philosophia prima, & non hæreas amplius circa ea, quæ ab imaginibus separata sunt.

§. 794.

Similiter quia ante creationem mundi spatium fuit nullum, *An mundus major & minor condi potuerit.* *sed cum ipso demum mundo cœpit (§. 792.), mundus vero ens unum (§. 60. Cosmol.) atque machina est (§. 73. Cosmol.), cui adeo nec addi, nec demi quidpiam potest, ut maneat idem, essentiis rerum instar numerorum existentibus (§. 345. Ontol.); mundus majus spatium occupare non potuit, quam occupat, nec major, nec minor condi potuit.*

Hæc denuo satis manifesta sunt, ubi ad notionem spatii realem animum advertere volueris, in philosophia prima satis explicatam & in Psychologia rationali ab imagine, quam idea confusa animo objicit, separatam. Intelliges enim quæstionem nullum habere sensum, utrum Deus mundum hunc adspectabilem majorem, vel minorem condere potuerit, nec ne. Nimirum cum corpora, ex quibus hic mundus adspectabilis constat (§. 119. Cosmol.), sint substantiarum simplicium, elementorum rerum materialium (§. 182. Cosmol.), aggregata (§. 176. Cosmol.); nec hæc elementa alio, quam hoc modo coëxi-

coëxistere possint (§. 571. *Cosm.*), rationes vero ultimæ eorum, quæ in rebus materialibus deprehenduntur, in elementis continentur (§. 191. *Cosmol.*); alius coëxistendi ordo in hoc mundo adspectabili possibilis non est, quam qui datur. Quamobrem cum spatium non sit, nisi ordo coëxistendi (§. 589. *Ont.*); nec mundus spatium majus, nec minus occupare potuit, quam actu datur. Non negamus, Deum potuisse condere res alias alio ordine existentes, & sic proditurum fuisse spatium magnitudine ab hoc, quod datur, diversum, cum plures sint mundi possibiles (§. 101. *Cosmol.*), qui potentia divina non minus ad actum deduci poterant, quam præsens (§. 342.), siquidem Deus voluisset (§. 433.). Sed negamus hunc mundum fieri potuisse majorem, vel minorem. Multum adeo fallerentur consequentarii, si propositionem præsentem omnipotentia divina adversam judicarent eam, ut cum *D. Thoma* loquamur, ad infaçibilia extendentes.

§. 795.

An extra mundum detur spatium.

Nullum datur extra mundum spatium: spatia tamen diversa ab eo, quod mundus hic occupat, possibilia sunt. Etenim mundus tantummodo unus existit (§. 117.). Quamobrem cum spatium sit ordo simultaneorum, quatenus coëxistunt (§. 589. *Ontol.*), & series simultaneorum inter se connexorum integra ad hunc mundum adspectabilem spectet (§. 55. 60. *Cosmol.*); extra mundum etiam spatium nullum datur. Enimvero cum præter hunc mundum adspectabilem sint plures alii possibiles (§. 101. *Cosmol.*), qui non minus ad actualitatem perducì possunt (§. 342.), siquidem Deus vellet (§. 433.); omnibus vero istis mundis insint series simultaneorum inter se connexorum (§. 48. *Cosmol.*) perinde ac huic adspectabili (§. 55. *Cosm.*); plures possibiles sunt ac fieri poterant ordines simultaneorum, quatenus coëxistunt. Quoniam itaque ordo simultaneorum, quatenus coëxistunt, spatium est (§. 589. *Ont.*); quin

quin plura spatia sint possible præter hoc , quod mundus hic adspectabilis occupat, dubitandum sane non est.

Qui notionem spatii imaginariam amplectuntur , cum non videant, ubi idem terminari debeat, ipsum in infinitum extensum concipiunt. Cumque spatium prærequiri opinentur, ut in eo corpora locari possint; hoc pacto omnipotentia divinæ prospectum esse opinantur, ne restringi videatur ad ea tantum, quæ Deus fecit. Enimvero etsi juxta spatii notionem realem extramundana spatia admitti minime possint quoad actum, sed quod actu datur omne a corporibus existentibus occupetur; admitti tamen possunt spatia extramundana quoad potentiam, quatenus Deus plures adhuc mundos producere potest, & sic plura existerent spatia a spatio mundano diversa. Cum potentia Dei non pendeat in creatione corporum a spatio; non ideo restringitur ad ea, quæ extant, corpora, etsi extra mundum non dentur spatia ulla. Quoniam vero spatia extramundana tantummodo possible sunt; apte admodum a scholasticis spatia imaginaria appellantur, quippe quæ imaginamur, quatenus potentiam Dei ultra hunc mundum ad plura, immo infinita alia, extensam cogitamus. Et si quis spatia extramundana admittit, quatenus produci a Deo possunt corpora alia, ad hunc mundum minime spectantia; is non defendit, quæ a veritate aliena sunt, modo sibi caveat, ne imaginatio erronei quid admisceat. Ceterum hanc propositionem addi consultum visum est, ne potentiam Dei creatricem restringi velle videamur, dum spatium nonnisi cum mundo cœpisse adstruximus, illudque adeo eidem cœxtendere videmur.

§. 796.

Deus fecit spatium, dum produxit elementa rerum materialium inter se connexa. Etenim dum elementa rerum materialium produxit, quæ inter se connectuntur, cœxistere simultanea certo quodam ordine, cum ea hoc & non alio modo cœxistere possint (§. 571. *Cosmol.*). Quamobrem cum ordo
(*Wolfii Theol. Naturalis*) C c c c c simul-

Quomodo spatium a Deo factum

simultaneorum in coëxistendo sit spatium (§. 589. *Ontol.*); hoc ipso aderat spatium, quod elementa rerum materialium existerent. Atque adeo patet, fecisse Deum spatium, dum elementa rerum materialium produxit, quæ inter se connectuntur.

Dici non potest, Deum creasse spatium, cum nihil creetur nisi substantia, spatium vero, utpote nonnisi coëxistendi ordo (§. 589. *Ontol.*), substantia non sit, sed ex modo coëxistendi substantiarum simplicium resultat. Creavit igitur Deus substantias simplices (§. 182. *Cosmol.*), vi determinationum intrinsecarum hoc, non alio modo coëxistere valentes (§. 571. *Cosmol.*). Et sic una adfuit spatium, ad quod nullo peculiari actu fuit opus. Qui spatium ens absolutum imaginantur, quod absque corporibus existere potest, nec idem incrementum ponere volunt; ipsum pro substantia a Deo ex nihilo creata, adeoque peculiari creationis actu producta venditare tenentur: sit ita, quod simul cum eo, quod substantiale est in corporibus, idem creaverit. Unicus enim creationis actus nostro concipiendi modo erit multiplex, propterea quod spatium in ista hypothese creatu possibile, etiamsi nulla creentur corpora, quæ in eodem locantur.

S. 797.

Quomodo Deus tempus fecerit. Deus fecit tempus, dum elementa rerum materialium continuis mutationibus obnoxia produxit. Etenim dum Deus elementa rerum materialium fecit continuis mutationibus obnoxia (§. 197. *Cosmol.*); successiva extiterunt in continua serie (§. 569. *Ontol.*). Enimvero quamprimum res successivæ in continua serie existunt, tempus datur (§. 574. *Ontol.*). Dabatur itaque tempus, quamprimum elementa rerum materialium continuis mutationibus obnoxia existerent, consequenter Deus tempus fecit, dum elementa rerum materialium continuis mutationibus obnoxia produxit.

Quodsi

Quod si sumamus, Deum produxisse chaos, antequam faceret hunc mundum adspectabilem, immo si ponamus, chaos existisse increatum ab æterno, cum in eodem nullæ conciperentur mutationes, sed omnia, quæ in rude illa & indigesta mole concipiuntur, sint in quiete; nullum quoque dabitur tempus (§. 574. *Onsol.*): sed id demum incipiet, ubi continuum in eodem oriri motum ponas, ut mutationes continuæ constituentur successivorum quandam seriem (§. *etc.*). Qui sibi imaginantur temporis aliquod intervallum, per quod chaos extiterit, aut saltem existere potuerit, retro eidem coextendunt successivorum quandam continuam seriem, ut habeant tempus, quo metiantur illius durationem. Nulla est obiectio, existentiam istiusmodi chaos saltem esse possibilem, quæ præcedat ortum mundi, & eam adeo longo, vel exiguo intervallo mundi creationem præcedere debere: etenim fingis, quæ a rei veritate abhorrent, siquidem ad notiones distinctas revoces omnia, nec in confusis notionibus acquiescas. Quamobrem ne fictionibus perplexi reddamur, notiones primæ rerum probe excutiendæ sunt, quas ideo in Ontologia evolvimus, & in Cosmologia ac Psychologia ad ea, quæ existere novimus, entia applicavimus. Ceterum quæ de spatio annotavimus, de tempore quoque jam clarent, scilicet quod nullo peculiari actu creationis fuerit opus, ut daretur tempus, etsi idem referri debeat ad Deum autorem. Quæ vero hic de spatio & tempore inculcantur, non majorem habent difficultatem, quam si de numero creaturarum affirmas, quod is nullo peculiari creationis actu fuerit productus, sed factus a Deo, dum elementa rerum materialium, phænomenis hujus mundi adspectabilis exhibendis sufficientia produxit, quorum aggregatione prodiit numerus corporum primævorum, continuis autem mutationibus intrinsicis derivantur corpora, quæ successive oriuntur suo numero.

§. 798.

Creaturae sunt specula perfectionum divinarum, quatenus Quomodo ab attributis divinis dependent. Etenim cum quid ab altero creatura dependeat, quatenus ei quidpiam inexistit, cujus ratio in eodem sint specu-

onum di-
vinarum.

continetur (§. 851. *Ont.*); creaturæ ab attributis divinis dependent, quatenus ex iis reddi potest ratio, cur hoc vel illud ipsis insit, consequenter quatenus per attributa divina intelligitur, cur hoc vel illud iisdem insit (§. 56. *Ont.*) Quatenus igitur creaturæ ab attributis divinis dependent, ex iis, quæ iisdem insunt, colligere datur, quænam sint attributa divina. Est vero creatura speculum attributorum divinorum, quatenus per ea, quæ ipsi insunt, colligere possumus, quænam sint attributa divina (§. 784.). Quamobrem creaturæ sunt specula attributorum seu perfectionum divinarum, quatenus ab attributis istis dependent.

Creaturæ aptæ sunt ad divinitatem Dei invisibilis representandam, ut per visibilia cognoscatur quod invisibile. Illa igitur aptitudo representandi Deum, quæ in creatura datur, non est nisi dependentia eorum, quæ ipsi insunt, a divinis attributis. Per hanc igitur efficiuntur specula divinitatis.

§. 799.

Mundus
quomodo
sit specu-
lum exi-
stentiæ ne-
cessariæ
Dei.

Mundus integer & quicquid in eodem existit est existentia Dei necessariæ speculum quoad contingentiam. Quatenus enim mundus & quicquid in eodem existit, ens contingens est, rationem sufficientem existentia suæ in se non habet, sed in alio a se diverso (§. 310. *Ontol.*), nempe in Deo (§. 67.), cujus existentia absolute necessaria (§. 71.). Quoniam adeo ens contingens existere nequit, nisi detur ens necessario existens (§. 118. *Ontol.*); ex contingentia mundi huius integri colligitur existentia Dei necessaria. Quamobrem mundus & quicquid in eo existit quoad contingentiam est speculum existentia divinæ necessariæ (§. 784.).

Hinc non mirum, quod existentiam Dei ex iis, quæ de creaturis nobis innotescunt, firmiter concludi non possit, nisi a contingentia earundem. Unde & *D. Thomas* pro eo, quo pollebat, acumine a contingentia mundi existentiam Dei pro-

probavit, rejectis argumentis aliis, quæ tantummodo moralem, quam vocant, certitudinem inducunt, seu ultra aliquem probabilitatis gradum non ascendunt. Atque hæc eadem ratio est, cur & nos a posteriori existentiam Dei firmiter demonstraturi a contingentia creaturarum tanquam per scalam ad existentiam Dei necessariam ascenderimus. Ceterum cum nihil sit in hoc universo, quod contingenter existere non intelligatur, per principia, quæ in cosmologia stabilivimus; nihil profecto datur, quod existentiam Dei necessariam non loquatur, modo naturam loquentem intelligamus: quod in omni casu non facile. Exemplo sunt, quæ de existentia Dei ex ordine naturæ demonstranda ostendimus in Horis subsecivis A. 1730. Trim. aut. num. 3.

§. 800.

Quoniam mundus integer & quicquid in eodem existit, *Dependens* Speculum existentia Dei necessaria est, quatenus contingens *tia mundi* (§. 799.), creaturæ autem specula perfectionum divinarum sunt, a Deo quatenus ab attributis divinis pendent (§. 798.); *mundus in-* ad contin-
teger & quicquid in eodem existit, quatenus contingens est, *gentiam.* seu quoad contingentiam ab existentia Dei necessaria dependet.

Poterit hæc propositio etiam hoc modo ostendi. Quia mundus ens contingens est (§. 55.), una cum elementis rerum materialium (§. 56.) & animabus nostris (§. 61.), & seriem contingentium, quatenus successiva in eodem dantur, continet (§. 81. *Cosmol.*), ens vero contingens rationem sufficientem existentia suæ extra se in ente alio a se diverso habet (§. 310. *Ontol.*); mundus & quicquid in eo datur rationem sufficientem existentia suæ in alio ente a se diverso habere debet, quatenus contingens est. Habet vero mundus hic adspectabilis cum elementis rerum materialium, consequenter omnibus, quæ in eodem dantur corporibus (§. 176. *Cosmol.*), & animabus nostris rationem sufficientem existentia suæ in ente a se (§.

64.), quod Deus est (§. 67.) cujus existentia absolute necessaria (§. 71.). Unde intelligitur, existere posse mundum, & quicquid in eo datur, contingenter, quia Deus necessario existit, consequenter existentia Dei necessaria ratio est, cur mundus & quicquid in eo est existat, etiamsi contingens sit (§. 56. *Ontol.*). Mundus igitur & quicquid in eodem existit, quatenus contingens est, ab existentia Dei necessaria dependet. (§. 85 I. *Ontol.*).

Vidimus in antecedentibus, ut mundus existat, non sufficere, quod existat Deus; neque enim mundus ex Deo necessario emanavit, quemadmodum lumen ex sole, sed liberrime ab eodem productus est. Quamobrem verum quidem est, nisi existeret Deus, ens necessarium, nec exiturum mundum, ens contingens; non tamen ideo quod Deus necessario existit, necessario quoque existit mundus hic adspectabilis: poterat enim Deus & nullum creare mundum (§. 430.), & creare alium ab hoc diversum (§. 342.). Quamobrem mundus quoad existentiam suam non unice dependet ab existentia Dei necessaria. Enimvero notandum est, nos hic non loqui de integra existentia, sed tantummodo de contingentia, quæ eidem inest. Quatenus enim quid contingens est, eatenus supponit ens necessarium, cum contingenter existere nihil posset, nisi quid necessario existeret. Atque eatenus necessitas existendi in ente uno est ratio, cur quid contingens existere possit, sicque quod contingenter existit, non quoad existentiam, sed quoad contingentiam, quæ eidem inest, ab eo dependet. Contingentiam vero ab ipsa existentia separandam esse, haud difficulter patet: etenim eidem jam locus est in statu idealitatis, antequam essentiae existentia superaccedat. Per essentiam entis contingentis intelligitur, quod existere nequeat, nisi virtute alterius, & ad existendum & non existendum indifferens sit, quodque existere non possit nisi dependenter ab ente necessario, antequam actu existat. Ex hac sanatio est, cur ex contingentia mundi & animarum tantummodo concludatur in superioribus, dari ens a se, seu necessarium, quod contineat rationem sufficientem existentiae hujus mundi, cetera vero de Deo collegerimus ex eo, quod ens a se seu

nece-

necessarium tale sit concipiendum, ut inde intelligi possit, cur hic potius mundus adspectabilis existat, quam alius. Quod si mundus quoad contingentiam in existendo dependeret a ceteris attributis divinis, non tantummodo ab existentia necessaria & illis, quæ per superiora eidem connexa sunt, sola quoque contingentia sufficeret omnibus, quæ de Deo cognosci possunt, demonstrandis: ast contrarium patet abunde ex anterioribus. Dependencia creaturarum a Deo accurate cognoscenda, ut in demonstrandis existentia & attributis divinis argumentis genuinis utamur. Omnes sane disceptationes de robore & valore argumentorum ad existentiam Dei evincendam in medium aliorum protinus cessarent, si controvertentes animum ad dependentiam rerum a Deo distincte explicatam & methodi demonstrativæ leges adverterent. Sed accidit plerumque, ut, qui de illo litigant, cæci de coloribus judicent, & methodi ignari, & de modo, quo quæ existunt in hoc universo a Deo pendent, parum solliciti.

§. 801.

Mundus hic adspectabilis & quicquid in eodem existit Dependens quoad essentiam suam dependet ab intellectu divino. Cum etiam mundi nim ideo quid possibile sit, quod ejus idea detur in intellectu quoad divino (§. 192.), in intellectu autem ipsius continuo existat *essentiam* idea mundi hujus adspectabilis (§. 181.); mundus quoque hic *a Deo.* adspectabilis & quicquid in eodem existit, ideo possibilis (§. 61. *Cosm.*), quia datur ejus idea in intellectu divino, consequenter cum sine intellectu divino nihil possibile intelligatur, ratio possibilitatis intrinsecæ mundi hujus adspectabilis & omnium, quæ in eo sunt, ratio in intellectu divino continetur (§. 56. *Ontol.*). Quoniam itaque unum dependet ab altero, quatenus quid eidem inexistit, quod rationem sui in altero agnoscit (§. 851. *Ontol.*); mundus hic adspectabilis & quicquid in eodem existit quoad possibilitatem suam intrinsecam ab intellectu divino *de-*pendet. Enimvero possibilitate entis intrinseca *essentia* ejusdem

dem continetur (§. 154. *Ontol.*). Mundus adeo hic adspectabilis & quicquid in eodem existit quoad essentiam suam ab intellectu divino dependet.

Si nullus esset intellectus divinus, nec mundus hic foret possibilis, nec possibile foret quicquam eorum, quæ in mundo hoc existunt (§. 192.), consequenter nec possibiles forent animæ, quæ hunc sibi mundum limitato quodam modo repræsentant (§. 62. *Psychol. ration.*) per essentiam atque naturam suam (§. 66. 67. *Psychol. ration.*). Quod vero mundus hic necessario sit possibilis, cum omnibus, quæ in eo sunt, atque animabus nostris, quæ eundem sibi suo modo repræsentant; id quidem a Deo est (§. 194.), ad cujus essentiam pertinet intellectus idearum conditor (§. 188.) & cujus existentia absolute necessaria (§. 71.). Deus per essentiam suam existit (§. 72.) & rerum omnium ideas producit (§. 188.). Res igitur tam necessario possibiles sunt, quam necessaria est existentia Dei & quam necessarius actus intellectus ipsius. Essentiarum adeo ab intellectu divino dependentia satis manifesta.

§. 802.

Mundus quomodo intellectum divinum repræsentet. Quoniam creature sunt speculum perfectionum divinarum, quatenus ab attributis ejusdem pendent (§. 798.), mundus autem hic adspectabilis & quicquid in eodem existit quoad essentiam ab intellectu divino dependet (§. 801.); *mundus hic adspectabilis & quicquid in eodem datur, est speculum intellectus divini præsentis. per essentiam suam.*

Intellectus adeo divinus a nobis cognoscitur per essentiam mundi hujus adspectabilis, quemadmodum ex superioribus patet. Nec alio fine in Cosmologia exposuimus, quæ ad essentiam mundi atque corporum pertinent, quam ne nobis deessent principia ad intellectum divinum penitus cognoscendum requisita.

§. 803.

§. 803.

Mundus & quicquid in eo est quoad actualitatem de- *Dependen-*
pendet a potentia Dei, quoad actualitatis contingentiam a li- *tia mundi*
berrima eius voluntate. Etenim Deus mundum hunc adspe- *apotentia*
ctabilem & quicquid in eo est (§. 61. Cosmol.) produxit ex ni- *& liberr-*
hilo (§. 759.), consequenter existentiam eidem impetratus est, ma Dei
cum nihil eius actu esset (§. 690. 540. Ontol.). Quamobrem voluntate.
cum productio ex nihilo sit creatio (§. 697. Psychol. ration.);
actualitas mundi concipi nequit sine potentia Dei creatrice,
adeoque per hanc intelligitur, qui fieri potuerit, ut mundus
actualitatem consequeretur. Ratio adeo sufficiens actualitatis
mundi, quatenus scilicet in se spectatur, a potentia creatrice
soli Deo propria (§. 767.) petenda. Nempe quia Deus poten-
tia creatrice pollet, ideo fieri potuit, ut mundum hunc adspe-
ctabilem & quicquid in eodem existit ad actum perduceret,
nunquam ad actualitatem perventurum, si Deus potentia crea-
trice destitueretur. Quoniam itaque unum dependet ab alte-
ro, quatenus aliquam sui rationem in altero habet (§. 851. On-
tol.); mundus hic adspectabilis & quicquid in eo existit depen-
det a potentia Dei quoad actualitatem suam. Quod erat unum.

Porro Deus hunc mundum elegit ex ceteris æque pos-
 sibilibus (§. 101. Cosmol.) ob maiorem perfectionem, quæ ipsi
 quam ceteris inest (§. 325.), quod ipsi omnium maxime pla-
 ceret (§. 331.), & ejus electio eum maxime deceret (§. 334.),
 citra omnem coactionem externam (§. 321.) & internam (§.
 351.). Quamobrem per voluntatem Dei liberrimam intelli-
 gitur, cur mundus ad actum fuerit perductus, & cur hic potius
 ad eundem perductus fuerit, quam alius (§. 941. Psychol. empir.).
 Quoniam itaque in voluntate Dei liberrima continetur ratio,
 cur hic mundus ad actum fuerit perductus, & cur hic potius
 (Wolfii Theol. Naturalis) Ddd dd quam

quam alius actualitatem consecutus (§. 56. *Ontol.*); ens vero unum ab altero dependet, quatenus ipsi inest, cujus in altero ratio continetur (§. 851. *Ontol.*); mundus hic adspectabilis & quicquid in eo existit, dependet a liberrima Dei voluntate, quatenus præter ipsum plures alii possibiles (§. 101. *Cosmol.*), qui per omnipotentiam Dei ad actualitatem perducì poterant (§. 342.), siquidem ipsi visum fuisset (§. 433.). Quamobrem cum actualitas mundi contingens sit, quatenus non repugnat, ut alii quoque mundi, quam qui existit, ad actum perducantur (§. 294. *Ont.*), & per eos alia ab iis, quæ nunc existunt, diversa (§. 101. *Cosmol.*); mundus & quicquid in eodem existit dependet a voluntate Dei liberrima quoad contingentiam actualitatis. *Quod erat alterum.*

Contingentiam actualitatis ab actualitate distinguimus, & figillatim dependentiam actualitatis in se spectatæ, seposita contingentia, a Deo consideramus, etsi mundo non conveniat alia actualitas, quam quæ contingens est. Notio enim contingentiae notioni actualitatis superaccedit, cum existentia etiam necessaria detur, quæ Deo convenit. Quamobrem si mundus, quemadmodum defendit *Spinoza* fatalis necessitatis assertor, ex Deo necessario emanaret, ita ut sine mundo actuali concipi minime posset, quemadmodum denuo statuit *Spinoza*; hoc tamen non obstante actualitas ejus dependeret a Dei potentia. Quamobrem mundus a potentia Dei creatrice dependet, quatenus ejus actualitas in se spectatur, seposita inquisitione, utrum ea sit contingens, nec ne. Enimvero ubi jam consideras actualitatem mundi tanquam contingentem, tum ea amplius intelligi nequit, nisi animum simul ad liberrimam Dei voluntatem advertas. Breviter. Existentia seu actualitas mundi dependet a voluntate Dei liberrima & omnipotentia simul, sed ab ea, quatenus spectatur, ut contingens; ab hac, quatenus spectatur simpliciter: quæ igitur in se distinctæ sunt, in propositione quoque a se invicem discerni debuerunt.

§. 804.

Quoniam mundus & quicquid in eodem existit, est spe- *Quomodo*
 culum attributorum divinorum, quatenus ab iisdem dependet *mundus*
 (§. 798.); a potentia vero Dei dependet quoad actualitatem sim- *Dei potens*
 pliciter spectatam, a liberrima vero ejus voluntate quoad actua- *riam & li-*
 litatis contingentiam (§. 803.); *Mundus hic adspectabilis & quic-* *berrimam*
quid in eodem existit est speculum potentiae divinae quoad actuali- *eius volun-*
tatem suam; speculum liberrimae voluntatis ejusdem quoad actuali- *tatem re-*
tatis contingentiam. *praesenset.*

Nimirum potentia repraesentativa potentiae divinae, quae inest mundo, est dependentia a potentia Dei creatrice, & potentia repraesentativa voluntatis liberrimae Dei, quae in eodemprehenditur, est dependentia ab ejus liberrima voluntate. Actualitas adeo, quatenus possibilitati intrinsecz superaccedit, quae ad existendum nondum sufficit, mundum aptum efficit ad potentiam divinam repraesentandam, & quatenus actualitas illa contingens est, mundus aptus evadit ad liberrimam Dei voluntatem repraesentandam. Atque hoc modo patet, quomodo mundus fiat speculum omnipotentiae ac liberrimae voluntatis divinae. Haec utique distinctius a nobis explicanda sunt, ut naturae creaturae penitus intelligatur: id quod multiplici usui erit in Moralibus, ubi de officiis hominis erga Deum acturi sumus.

§. 805.

Mundus hic adspectabilis, & quicquid in eodem existit a Dependen-
sapientia divina dependet quoad nexum universalem omnium ia mundi
cum omnibus. Etenim in hoc universo seu mundo adspecta- *a sapientia*
bili coexistentium nexus consistit in dependentia finis a medio; Dei.
nexus vero successivorum in dependentia finis a medio & a-
ctionis causae efficientis a fine (§. 665.). Enimvero Deus in
 hoc universo sapienter omnia decrevit (§. 643.) & sapientiae est
 Ddd dd 2 con-

constituere fines ac media ad eos ducentia eligere (§. 678. *Psych. ration.*). Quamobrem per sapientiam divinam intelligitur, cur Deus ita potius constituerit nexum rerum, quam aliter, consequenter in ea consistit ratio nexus universalis rerum omnium cum omnibus (§. 56. *Ontol.*). Quoniam itaque unum ab altero dependet, quatenus quid, quod in eodem datur, rationem in altero habet (§. 851. *Ontol.*), mundus hic adspectabilis & quicquid in eodem existit quoad nexum universalem omnium cum omnibus a sapientia divina dependet.

Idem etiam hoc modo ostenditur. Nexus rerum in hoc universo sapientia constitutus est (§. 666.), adeoque per eam intelligitur, cur talis potius sit quam alius. Unde porro deducitur ut ante, mundum hunc adspectabilem quoad nexum rerum universalem omnium cum omnibus a sapientia Dei dependere.

Qui adeo nexum rerum tollunt, in sapientiam divinam injurii sunt: sublato enim rerum nexu tolluntur fines, nec omnia in hoc universo ad omnia sese habent per modum finis ad medium. Si enim fines in rerum natura admittis, admittere etiam teneris media, quibus isti obtinentur, consequenter cum media & fines inter se connectantur (§. 18. *Cosmol.*), nexum rerum in universo admittere teneris. Quodsi admittatur nexus rerum in hoc universo, qui in dependentia medii ad fines consistit; per principia superiora facile demonstratur, nexum istum esse debere universalem. Sane nexum rerum ad sapientiam divinam referre teneris, sive ejus universalitatem animo concipias, sive cum nonnisi particularem statuas (§. 666.). Quodsi vero Deo sapientiam summam atque perfectissimam tribuere velis (§. 640.), universalitatem nexus agnoscere teneris (§. 689. *Psychol. ration.*). Ex nexu rerum simpliciter admissio independentem a sapientia divina colligitur per superiora ejus universalitas: sed nostrum jam non est demonstrationem contexere, quæ suum sibi lo-

cum

cum in Teleologia vindicare videtur, præsertim cum obiter saltem redarguere visum fuerit eorum oscitantiam, qui universalitatem nexus in dubium vocant a fatali sibi necessitate metuentes, quem metum inanem jam supra expulimus (not. §. 667.).

§. 806.

Quoniam mundus & quicquid in eodem existit est speculum attributorum divinarum, quatenus ab iisdem dependet (*Quomodo mundus* §. 798); a sapientia vero Dei dependet mundus hic adspectabilis, & quicquid in eodem existit, quoad nexum universalem Dei repræsentat omnium cum omnibus (*sapientiam Dei repræsentet.* §. 805.); *mundus hic adspectabilis & quicquid in eodem existit est speculum sapientie divine quoad nexum universalem omnium cum omnibus.*

Pater itaque, Deum effecisse mundum hunc adspectabilem & quicquid in eodem existit, speculum sapientie suæ, quatenus res in eodem ipsi connectere visum, & quidem effecisse speculum sapientie omnium perfectissimæ atque summæ, quam ipsi competere evicimus (§. 640.), quatenus nexum hunc fecit universalem, atque adeo ipsa nexus universalis constitutione indidisse mundo & omnibus, quæ in eodem dantur, potentiam repræsentativam sapientie suæ omnium perfectissimæ atque summæ: qua utique careret, si is a mundo abesset. Quoniam nexus iste consistit in dependentia mediorum a fine, per eundem in universam hanc rerum seriem, qua mundus adspectabilis constituitur (§. 55. *Cosmol.*), fines introducti sunt. Et ideo fines rerum sunt scala, per quam ad sapientiam divinam ascenditur. Dari fines in hoc universo & nexum rerum consistere in dependentia finis a medio non ante constare potest, nisi ubi probatum fuerit, causam efficientem dari hujus universi, quæ sit agens intelligens, & eam ideo produxisse causas, ut existere possint in hac rerum serie causata (§. 31. *Cosmol.*). Unde a finibus rerum existentia Dei demonstrativa ratione probari nequit, quemadmodum alias monuimus: sit ita quod probabiliter adstrui-

possit , quatenus probabiliter sumitur dari fines in universo. Nimirum non repugnat dari nexum in causarum serie , siquidem ea ponatur necessaria quoad actum , sive mundus fingatur ens a se , sive ex necessitate naturæ divinæ productus, quemadmodum defendit *Spinoza*. Ast ubi per contingentiam mundi existentiam Dei demonstraveris, & dari fines in rerum natura ex natura Dei eviceris, quemadmodum a nobis factum; finium consideratio facit ad sapientiam divinam demonstrandam. Utile adeo est dependentiam mundi a Deo accurate cognoscere , ut constet , quomodo in probanda divinitate ex operibus creationis rite procedatur.

§. 807.

*Dependen-
tia mundi
a bonitate
Dei.*

*Mundus hic adspectabilis & quicquid in eodem existit a bonitate divina dependet per rerum nexum , quatenus vi ejusdem unum inservit usibus alterius. Etenim bonitatis divinæ est, quod in hoc universo unum inserviat usibus alterius (§. 739.), adeoque per eam intelligitur, cur hæc ita sese habeant potius, quam aliter , consequenter ratio in bonitate divina continetur , cur Deus talem constituerit nexum rerum , ut unum alterius usibus inservire teneatur (§. 56. *Ontol.*). Quamobrem cum quid ab altero dependeat , quatenus quidpiam eidem inexistens in eo rationem sui agnoscit (§. 851. *Ontol.*); mundus utique & quicquid in eodem existit a bonitate divina per nexum rerum dependet, quatenus unum vi ejusdem usibus alterius inservit.*

Pertinent huc omnia, quæ de bonitate divina in superioribus demonstrata ideo in hac rerum serie locum habent, quia omnia inter se connectuntur, Ita huc referri debet directio malorum ad bonum finem , quam esse bonitati divinæ acceptam ferendam ostendimus (§. 733.). Diriguntur enim mala ad bonum finem, quatenus Deus iisdem utitur tanquam mediis consequendi bonum finem , quando sapientia salva ex hac rerum serie tolli nequeunt, quemadmodum su-

pra

pra explicavimus (§. 680.). Quamobrem cum medium & finis inter se connectantur (§. 18. *Cosmol.*); malorum ad bonum finem directio ad nexum rerum in hoc universo spectat, utpote in dependentia finis a medio consistentem. Non igitur opus est, ut in dependentia mundi a bonitate divina demonstranda directionis malorum ad bonum finem in specie mentionem injiciamus. Etenim ubi ad usus quoscunque animum advertimus, directio quoque malorum ad bonos fines nobis sese præsentem sistet. Et idem tenendum est de aliis, quæ inter usus rerum commemoranda ad nexum rerum eodem modo referuntur.

§. 808.

Mundus & quicquid in eodem datur a bonitate Dei dependet quoad perfectionem suam. Ostendimus in superioribus Deum enti cuicunque tantundem boni conferre, quantum salva sapientia ipsius fieri potest, quatenus ab ipso proficiscitur omnis cujuslibet entis perfectio essentialis & per nexum rerum prospicitur perfectioni ejusdem accidentali (§. 698.). Quamobrem cum bona in alios conferendo quis bonum se probet (§. 697.); per bonitatem Dei intelligitur, cur hæc toti mundo adspectabili insit perfectio, & cur hæc insit singulis rebus perfectio essentialis atque accidentalis: consequenter ratio omnis perfectionis, quæ datur in toto mundo adspectabili, quocunque te vertas, in bonitate divina continetur (§. 56. *Ontol.*). Quamobrem necesse est mundum hunc adspectabilem & quicquid in eodem existit, a bonitate divina dependere quoad perfectionem suam (§. 851. *Ontol.*).

Inprimis quoque notandum est, mundum a bonitate Dei summa, quatenus summa est, dependere quoad summam, qua ceteros mundos possibiles vincit, perfectionem, gradu perfectionis hujus universi gradui bonitatis divinæ respondente. Quamobrem apparet, quam utile sit agnoscere, quod Deus mundum fecerit omnium possibilium optimum, ut bonitatis

nitatis divinæ summæ convincaris. Ita ubi vis hypothesis mundi optimi cum attributis divinis consentit, & cum in iis agnoscendis præbet usum, quem opposita habere nequit. Sane qui Theologiam naturalem methodo demonstrativa tradere vult, veritatibus omnibus inter se connexis, ut eorundem elucescat consensus; quomodo fieri possit ut statuat, mundum hunc a Deo creatum non esse omnium possibile optimum, ego non video.

§. 809.

*Quomodo
mundus
bonitatem
divinam
repræsen-
tet.*

Mundus hic adspectabilis & quicquid in eodem existit est speculum bonitatis divinæ quoad perfectionem suam & nexus rerum utilitatem Enim mundus hic adspectabilis & quicquid in eo est, a bonitate divina dependet non modo quoad perfectionem suam (§. 808.); verum etiam per rerum nexum, quatenus vi ejusdem unum inservit usibus alterius (§. 807.), adeoque alteri utile est, consequenter quoad utilitatem hujus nexus. Enimvero mundus & quicquid in eo datur, est speculum perfectionum divinarum, quatenus ab attributis Dei dependet (§. 798.). Est igitur speculum bonitatis divinæ quoad rerum perfectionem & eorundem nexum, quatenus vi ejusdem unum alterius usibus inservit, seu unum alteri utile.

Vides adeo perfectionem rerum essentialem & accidentalem a nexu rerum dependentem, nec non nexum rerum, vi cujus unum alteri utile efficitur, esse scalam, per quam ad bonitatem divinam ascenditur. Et sane per nexum rerum, in quo continetur directio malorum ad bonum finem, salvatur bonitas divina, quæ in dubitationem adducitur, quamprimum animum ab eodem avertis. Sane qui ea, quæ fiunt in mundo, bonitati divinæ adversa judicant, hunc rerum nexum esse omnium possibile optimum non agnoscunt, immo nexum rerum universalem non cogitant, vel prorsus rejiciunt. Fecit adeo Deus mundum hunc bonitatis divinæ speculum, quatenus enī unicuique largitus est perfectionem

suam

suam essentialem, & res ita inter se connectere voluit, ut unum inserviat usibus alterius, & ex ipso malo nascuntur bona atque unumquodque perfectionem nanciscitur accidentalem, quæ ipsi tanquam parti respectu totius convenire potest. Quamobrem qui nexum rerum rejiciunt, qui eum optimum esse agnoscere nolunt, quomodo bonitatem divinam tueri & animum a scrupulis liberare velint, quæ circa eam hominibus suboriri quotidie solent, animumque sæpius haud parum angunt, ego quidem non video.

§. 810.

Mundus hic adspectabilis & quicquid in eo datur dependet ab omniscientia Dei per nexum rerum, quatenus universalis est & optimus. Etenim in Deo per eminentiam datur veritatum ab omnium universalium & singularium scientia, quia omnia in scientia hoc universo inter se connectuntur, adeoque nexus rerum universalis est, quemadmodum supra ostendimus (§. 300.). Et ideo eligere potuit nexum rerum optimum, quatenus ceteri quicunque possibiles ipsi simul perspecti fuere, quod per se patet. Etenim si non æque ipsi perspecti fuerint ceteri, quam qui in hoc mundo adspectabili seu hac rerum serie (§. 55. *Cosmol.*) existit, quod hic sit omnium optimus eidem constare minime poterat. Optimum adeo nexum rerum efficere potuit, quod omnes possibiles penitus perspexit. Quamobrem cum omniscientia, quæ Deo competit (§. 302.), sit scientia omnium cognitu possibilium tam singularium, quam universalium (§. 301.); per eam utique intelligitur, quomodo res omnes in hoc universo optimo modo inter se connecti poterint. Itaque in omniscientia divina continetur ratio, cur res omnes inter se in hoc mundo adspectabili optimo modo connectantur (§. 56. *Ontol.*), consequenter cur rerum nexus, qui datur in hac serie rerum, sit universalis atque optimus. Patet igitur mundum hunc adspectabilem & quicquid
(Wolffii Theol. Naturalis.). Eee ee in

in eo est a Dei dependere omniscientia per rerum nexum quatenus is universalis est atque omnium optimus (§. 851. *Ontol.*).

Nimirum quia Deus omniscius est, ipsi quoque perspectum, quot modis omnia possibilia inter se connecti possint, & qualis ex nexu coëxistentium elementorum rerum materialium nascatur nexus successivorum vi essentiae ac naturae eorundem, nec cum fugere potuit, in quonam mundo nexus rerum optimus locum habeat. Fieri adeo potuit, ut omnia cum omnibus optimo modo connecterentur, quia omniscius est. Quod si omniscientia destitueretur, non nisi casu in nexum rerum optimum incidere potuisset: sit ita, quod universalitas sua veluti sponte ex essentia & natura rerum resultasset, siquidem quid possibile fingatur absque distincta ejus in intellectu divino idea contra id, quod demonstratum est in superioribus (§. 192.).

§. 811.

*Quomodo
mundus o.
mniscien-
tiam Dei
repræsen-
tet.*

Quoniam *mundus* ab omniscientia Dei dependet, per nexum rerum, quatenus is universalis est & optimus (§. 810.), speculum vero perfectionum divinarum existit, quatenus ab attributis divinis dependet (§. 798.); *speculum utique omniscientiae divinae est per nexum rerum, quatenus is universalis atque optimus est.*

Ecce igitur tibi scalam, per quam ex contemplatione creaturarum ad omniscientiam divinam ascendere datur! Et si enim nemo mortalium nexum rerum universalem penitus perspicere possit, multo minus autem ex collatione ejus, qui in praesente serie rerum datur, cum ceteris in reliquis seriebus rerum deprehendendis summam ejus bonitatem, qua eosdem vincit, agnoscere valeat; hoc tamen non obstante principiorum philosophicorum, immo communium, ex obviis experienciis derivandorum, gnarus nexum objecti cujuscunque cum ceteris omnibus deprehendere ac inde ejusdem universalitatem certo assequi potest. Et quamvis sepo-

note

notescunt, difficile videatur, demonstrativa ratione cognoscere, quod præsens rerum nexus sit omnium possibilium optimus, constat tamen idem summa probabilitate a posteriori agnosci. Sed de hisce alibi dicemus apertius, dictis fidem experimentis manifestis facturi.

§. 812.

Mundus hic adspectabilis & quicquid in eodem datur de-
pendet a ratione Dei summa per nexum rerum universalem, quate-
nus eidem insunt veritates universales inter se connexæ. Quoniam
idea mundi intelligibilis, qualis vi intellectus divini formatur
(§. 200. 203.), ideam mundi rationalis includit (§. 261.), hic
vero omnes veritates universales inter se connexas continet (§.
263. 271.); patet mundo huic adspectabili & omnibus singu-
laribus in eodem inesse veritates universales, quatenus Deus
singularia eo modo in systema aliquod redegit, seu inter se con-
nectit, ut aliquod veritatum universalium systema in singulari-
bus contineatur. Quamobrem cum Deus singularia ita inter
se connectere potuerit, ut ipsis insint veritates universales inter
se connexæ, quatenus summa ipsi competit ratio (§. 279.), qua
simul omnem veritatum universalium nexum possibilem per-
spicit (§. 483. Psychol. empir.) ; per rationem divinam intelli-
gitur, cur mundo huic adspectabili insint veritates universales
inter se connexæ, seu cur systemati singularium insit aliquod
systema universalium, consequenter in ratione divina datur ra-
tio, cur nexui rerum universali in hoc universo insint veritates
universales inter se connexæ (§. 56. Ontol.). Dependet igitur
mundus hic adspectabilis & quicquid in eodem datur a ratione
Dei summa per nexum rerum universalium, quatenus eidem
insunt veritates universales inter se connexæ (§. 851. Ontol.).

Dependen-
tia mundi
ratione
Dei.

Ad rerum nexum non modo pertinet dependentia mutua
rerum a se invicem quoad modificationes suas; verum etiam

Ecc ec 2

depen

dependentia attributorum & eorum, quæ per modum attributorum potentia insunt, dependentia ab essentialibus. Universalitas vero istius dependentiæ est a rerum similitudine, quæ genera, species ac casus nituntur. Etenim ex hoc fonte manant judicia universalia tam categorica, quam hypothetica, quæ inter se connexa systema veritatum universalium constituunt. Quemadmodum vero rationis in nobis est eas cognoscere, ita utique rationi acceptum ferendum est, quod eadem insint systemati singularium, hoc est, huic universo. Quodsi doctrinam ontologicam de ente singulari & universali, cosmologicam de nexu rerum in hoc universo & dependentia actus contingentium a se invicem & superiorem de mundo rationali (§. 758. & seqq.) probe perpendere volueris, de dependentia mundi a ratione divina nihil supererit obscuri. Ceterum quia mundus a ratione divina dependet, nihil quoque datur in hoc universo, quod non habeat rationem sufficientem, cur sit potius, quam non sit.

§. 813.

*Quomodo
mundus
rationem
divinam
repræsen-
tet.*

Quoniam mundus hic adspectabilis & quicquid in eodem datur per nexum rerum universalem a ratione divina dependet, quatenus eidem insunt veritates universales inter se connexæ (§. 812.), creaturæ vero speculum sunt perfectionum divinarum, quatenus ab attributis divinis dependent (§. 798.); Mundus hic adspectabilis & quicquid in eodem datur est speculum rationis divinæ summæ per nexum rerum, quatenus eidem insunt veritates universales inter se connexæ.

Nexus igitur rerum est quoque scala, per quam mens nostra in rationem divinam ascendit. Pone enim res in hoc universo inter se non connecti, sed omnia a se invicem independentem existere, quemadmodum in mundo fabuloso, cuius mentionem iniecimus alias, cum principium rationis sufficientis stabiliremus (§. 77. Ontol.): nemo non videt, fieri

haud

haud quaquam amplius posse , ut nil quicquam fiat nisi cum ratione sufficiente , cum ex eo nexus rerum resultet , quod enti uni insint determinationes constantes , quarum rationes sufficientes continentur in aliis , nec insint modi, quorum non detur in aliis ratio sufficiens , cur hi potius jam insint, quam alii. Quodsi in nonnullis nexum quendam admitteres, in aliis negares , ejusdem universalitate in dubium vocata, ratio divina non repræsentaretur tanquam summa per hoc universum : universalitas enim nexus tantum probat , quod major concipi minime possit ratio divina , quæ ex operibus creationis elucet. Aptus adeo mundus hic adspectabilis est ad rationem divinam summam repræsentandam per mundum rationalem eidem immersum, cui cognoscendo destinantur scientiæ philosophicæ, rationem ejusque usum in nobis amplificantes.

§. 814.

Mundus hic adspectabilis & quicquid in eodem existit de- Dependet ab æternitate Dei per essentialium æternitatem & veritatem rerum transcendentalem. Etenim essentialium æternitas a ab æternitate Dei est (§. 195.), ut adeo non intelligatur, cur sint æternæ, nisi quatenus ideo quid possibile , quia ejus idea datur necessario (§. 189.) in intellectu Dei (§. 192.) æterni (§. 74.). Quamobrem essentialium æternitas rationem sufficientem agnoscit in æternitate Dei (§. 56. *Ontol.*). Quoniam itaque ens unum ab altero dependet , quatenus quid ipsi inexistentem rationem sui agnoscit in eodem (§. 851. *Ontol.*); mundus hic adspectabilis & quicquid in eodem existit ab æternitate Dei per essentialium æternitatem dependet. *Quod erat unum.*

Porro quoniam in omni ente , adeoque etiam in toto mundo, qui ens unum est (§. 60. *Cosmol.*) veritas transcendentalis determinatur per principia contradictionis & rationis sufficientis (§. 498. *Ontol.*) , adeoque per hoc intelligitur , quod nihil sit intrinsece possibile, nisi quatenus determinationes quæ-

dam simul in eodem subjecto inesse possunt (§. 28. *Ontol.*), nec quicquam sit extrinsece possibile, nisi quatenus rationem sufficientem actus sui habere potest (§. 70. *Ontol.* & §. III. *Cosmol.*); nullum poni potest tempus, quo veritas eorum, quæ in mundo contingunt, determinata fuit, adeoque nec tempus quoddam fingi potest, quo hoc vel istud cœperit esse verum: immo eodem modo patet, nec tempus aliquod poni posse, quo verum esse desinet, consequenter veritatem omnem, quæ rebus inest, determinatam esse ab æterno liquet (§. 39). Constat vero ex iis, quæ de præscibilibus rerum omnium (§. 232. & seqq.) & recordabilitate earundem (§. 239. & seqq.) demonstrata sunt, veritatem, quæ rebus inest, determinatam spectari in ideis rerum, quæ ab æterno in Deo existunt (§. 181. 74). Per æternitatem adeo intelligitur, cur veritas, quæ rebus inest, ab æterno jam fuerit determinata, consequenter in æternitate Dei continetur ratio æternitatis veritatis transcendentalis determinatæ, quæ rebus omnibus in hoc universo inest. Quamobrem cum quid ab altero dependeat, quatenus rationem aliquam cujusdam sibi competentis in altero habet (§. 851. *Ontol.*); mundus hic adspectabilis ac quicquid in eodem datur ab æternitate Dei dependet, quatenus veritas transcendentalis, quæ ipsi inest, ab æterno determinata jam fuit. *Quod erat alterum.*

Nimirum quia Deus æternus, intellectus quoque ejus ab æterno actuosus fuit, quippe in actu puro non in nuda aliqua potentia, quemadmodum humanus, consistens (§. 163). Vix igitur idearum, quæ in intellectu divino extiterunt, possibilia ab æterno fuere hæc entia, quæ mundum hunc adspectabilem componunt quoad essentiam & attributa. Nec minus ab æterno possibile fuit ea hoc modo inter se connecti, quo in hac serie rerum connectuntur, & vi hujus nexus hæc subire mutationes, quas nunc subeunt. Atque adeo quicquid in hoc mundo existit & quocunque modo contingit, quod

existere possit & hoc modo contingere, siquidem mundus hic creatus, ab æterno verum fuit, nec ullum fingi potest tempus, quo verum esse cæperit. Quodsi ergo Deus non esset æternus, nec veritas rerum ab æterno determinata concipi posset &, ubi ex principiis a posteriori stabilitis intelligitur, quod ab æterno determinata concipi debeat, non pateret ratio ulla æternæ hujus determinationis. Quamprimum vero Deum æternum agnoscis, tanquam rerum omnium fontem; a priori patet determinatio veritatis ab æterno & ejus intelligitur ratio.

§. 815.

Quoniam creatura est speculum attributorum divinarum, *Quomodo* quatenus ab iisdem dependet (§. 798.), mundus autem ab æter- *mundus æ-* nitate Dei dependet per essentialium æternitatem & veritatem *ternitatem* transcendentalem, quæ rebus inest (§. 814.); *mundus & quic-* Dei repræ- *sentet.* quid in eodem existit est speculum æternitatis divinæ per essentialium æternitatem & veritatem transcendentalem, quæ rebus omni- *bus inest.*

Paret adeo æternitatem essentialium & veritatem determinatam rerum ab æterno aptum reddere mundum & quicquid in eodem est ad æternitatem Dei representandam. Nimirum quia essentialia in se spectata æternæ sunt & actus in potentia æternus est, ex eo æternitatem auctoris rerum cognoscere licet, postquam ante demonstratum est, autorem rerum dari, nec mundum hunc adspectabilem aut verius loquendo elementa rerum materialium, simplices substantias (§. 182. *Cosmol.*), esse entia a se, adeoque nec æterna. Ita enim quod in se contingens est, atque nonnisi contingenter existit, & ab æterno possibile fuit, atque necessarium, & omnes ejus modificationes veritatem determinatam habuere ab æterno, quod scilicet hisce elementis ad actum perductis sint extitura. Quodsi neges æternitatem essentialium & veritatem determinatam contingentium ab æterno, nil amplius relinquitur in serie rerum contingente, quod æternitatem Dei aper- & loquatur, ita ut non demum eam ex aliis colligi sit opus.

§. 816.

§. 816.

Idem ulterius expenditur.

Quoniam veritas logica non datur propositionum universalium, nisi quia datur in rebus veritas transcendentalis (§. 499 *Ontol.*), mundus vero speculum est æternitatis divinæ per veritatem transcendentalem, quatenus scilicet æterna intelligitur (§. 815.); ideo patet, mundum quoque & quicquid in eodem datur esse speculum æternitatis divinæ, quatenus ipsis insunt veritates logicæ, sine ullo temporis respectu, aut ab æterno tales.

Nimirum veritas logica cum consistat in determinabilitate prædicati per notionem subjecti (§. 513. *Log.*); ex notionibus rerum demonstrari potest, adeoque propositio universalis logica vera cognoscitur absque ullo tempore, ita ut nec quæri possit, quando ea cœperit esse vera, quando desitura sit esse vera. Atque ita æterna intelligitur veritas logica cujusvis propositionis universalis (§. 39.). Notiones rerum, unde pendet hæc veritas, insunt ideis rerum singularium, quæ in hoc mundo adspæctabili existunt. Et hoc pacto veritas logica recidit in necessitatem idearum divinarum (§. 189.), consequenter essentialium æternitatem (§. 195.). Quamobrem cum mundus æternitatem Dei repræsentet per essentialium æternitatem; quid mirum, si eam etiam repræsentet per veritatem logicam propositionum universalium? Sunt qui negant veritatem transcendentalem æternam & logice tamen verum fuisse admittunt ab æterno, quod hoc futurum sit in tempore: sed eos hic non moramur, cum & veritatem rerum transcendentalem & dependentiam logicæ a transcendentali satis stabiliverimus in philosophia prima (§. 495. 499. & seqq. *Ontol.*) & per ea, quæ de ideis rerum in intellectu divino & veritatibus universalibus dicta sunt in superioribus.

Dependentia entis omnis a Deo.

§. 817.

Ens omne a Deo dependet quoad possibilitatem intrinsecam ab intellectu ejus, quoad extrinsecam a voluntate, quoad exi-

existentiam a potentia & quoad certitudinem futuritionis ab immutabili Dei decreto: Etenim cum ideo quid possibile sit, quia ejus datur idea in intellectu divino (§. 192.), ratio possibilitatis entis cujuscunque continetur in intellectu divino (§. 56. *Ontol.*). Ens igitur omne (diversum nempe a Deo) quoad possibilitatem intrinsecam (§. III. *Cosmol.*) ab intellectu divino dependet (§. 851. *Ontol.*). *Quod erat primum.*

Extrinsece ens possibile est, quod determinatam causam in mundo adspectabili habet (§. III. *Cosmol.*). Quamobrem cum actualitas rerum a voluntate Dei pendeat (§. 433.); nihil intrinsece possibile est, nisi quatenus Deus causam ejus existere voluit. Quoniam itaque ratio sufficiens possibilitatis extrinsecz a voluntate divina arcessenda (§. 56. *Ontol.*); ens quoque omne, quod in hoc universo datur, quoad possibilitatem extrinsecam a voluntate divina dependet (§. 851. *Ontol.*). *Quod erat secundum.*

Enimvero quicquid præter Deum existere potest, id existere nequit nisi per potentiam ejus (§. 223.). Quamobrem in ea continetur ratio ultima, cur ens unumquodque existat (§. 56. *Ontol.*). Atque hoc modo ens omne quoad actum suum seu existentiam dependet ab omnipotentia Dei (§. 851. *Ontol.*). *Quod erat tertium.*

Per decretum Dei res quælibet facta est futura (§. 522.) & quidem, cum Deus omnia ab æterno decreverit (§. 504.), ab æterno. Quoniam vero decretum Dei immutabile est (§. 509.); ideo ab omni æternitate certum fuit, ens hoc in hoc universo extitutum (§. 293. *Ontol.*). Certitudo igitur futuritionis entis cujuscunque rationem habet in immutabilitate decreti divini (§. 56. *Ontol.*), consequenter ens unumquodque in hoc universo quoad certitudinem actus consequendi dependet ab immutabili Dei decreto (§. 851. *Ontol.*). *Quod erat quartum.*

Contingentia in mundo non habent rationem sufficientem actualitatis suæ in serie successivorum , sed in ente alio extra seriem istam constituto, eoque necessario (§. 90. *Cosmol.*), nimirum in Deo (§. 67.), tanquam ente a se (§. 63.). Ens igitur unumquodque, quod in hoc mundo existit , quatenus contingenter existit, seu quoad contingentiam actus, a Dei aseitante dependet (§. 851. *Ontol.*), consequenter ab existentia ejus necessaria (§. 32.). *Quod erat quintum.*

Constat itaque , quomodo dependentia entis cujuscunque a Deo pateat per notionem entis in genere. Maximi vero usus est hæc propositio in Teleologia, ubi inter principia heuristicæ locum suum tueri potest , quando ascensus mentis in Deum, ut stylo *Bellarmini* utar , per rerum naturalium contemplationem explicandus. Atque sic demonstrativa ratione intelligitur, quomodo ens unumquodque , qualecunque tandem fuerit, hoc ipso quod in numero entium sit, creatorem suum loquatur. Usui nobis erit hæc propositio, ubi in parte secunda de Theologia naturali experimentalis dicturi sumus.

§. 818.

*Quomodo
ens omne
Deum re-
presenter.*

Quoniam ens omne , quatenus ens est, a Deo dependet quoad possibilitatem intrinsecam ab intellectu, quoad extrinsecam a voluntate, quoad actum seu existentiam a potentia, quoad hujus certitudinem ab immutabili decreto & quoad contingentiam denique ab aseitante & existentia Dei necessaria (§. 817.); ens vero unumquodque a Deo dependens speculum est attributorum divinorum , quatenus ab iis dependet (§. 798.); ens omne in hoc universo , quatenus ens est , est speculum aseitantis & existentie necessariae , intellectus, voluntatis, potentie ac immutabilis voluntatis divinae, consequenter Deum repræsentat tanquam ens a se & necessarium, quod intellectu, voluntate & potentia præditum, & vi immutabilis ejus decreti autorem sui agnoscit.

Nimi-

Nimirum hoc modo Deum repræsentat, quatenus in se spectatur, citra relationem ad alia. Ubi vero tanquam in systema cum aliis relatum consideratur, accedunt porro, quæ de dependentia totius universi & eorum omnium, quæ in eodem existunt, a perfectionibus divinis demonstrata sunt.

§. 819.

Eus omne, quatenus spectatur cum ceteris in systema relatum, Deum repræsentat tanquam sapientem & bonum, eundemque omniscium ac summa ratione præditum. Etenim ens tanquam cum ceteris in systema relatum spectatur, quatenus cum iisdem connectitur tum quoad coëxistentiam, tum quoad successionem (§. 142.), consequenter in systemate spectatur tanquam cum ceteris omnibus connexum. Enimvero quicquid in hoc universo existit quoad nexum cum ceteris omnibus est speculum sapientiz (§. 806.), bonitatis (§. 809.), omniscientiz (§. 811.) & rationis summæ divinæ (§. 813.). Quamobrem cum ex speculo perfectionum divinarum attributa divina colligere liceat (§. 784.); ens omne, quatenus cum ceteris in systema relatum spectatur, Deum repræsentat sapientem, bonum, omniscium ac summa ratione præditum.

Quomodo ens omne Deum in systemate repræsentet.

Videmus adeo, quam necessarium sit ea, quæ in hoc universo existunt, spectari inter se connexa, siquidem divinitatem ex operibus creationis cognoscere volueris. Etenim si singula tantummodo in se spectentur, fieri non potest, ut Dei sapientiam, bonitatem, omniscientiam & rationem summam loquantur (§. 818.). Nexu rerum universali Deus utitur tanquam medio certissimo per opera creationis nobis manifestandi sapientiam, bonitatem & rationem summam una cum omniscientia. Medium vero hæc Dei attributa sane pulcherrima & ea, quorum cognitio multiplici modo in praxin influit, patefaciendi cum fatali necessitate unum idemque non est, quemadmodum nugantur, qui ignarorum credulitate in rem suam abutuntur.

§. 820.

*Quomodo
totus mun-
dus Deum
repræsen-
tet.*

Mundus totus adspectabilis Deum repræsentat tanquam ens æternum, quod necessario existit, intellectu & voluntate liberrima atque omnipotentia præditum, sapientia ac bonitate summa, omniscientia & ratione maxima instructum. Etenim mundus hic adspectabilis est speculum æternitatis (§. 815.) ac necessarie existentia Dei (§. 799), intellectus non minus (§. 802.) atque liberrimæ voluntatis (§. 804.), quam omnipotentia ejusdem (§. cit.), nec non sapientia (§. 806.), bonitatis (§. 809.), omniscientia (§. 811.) & rationis summæ, quibus effulget (§. 813.). Quoniam itaque ens aliquod est speculum rei alterius, quatenus per ea, quæ ipsi insunt, pervenitur ad cognitionem eorum, quæ insunt alteri (§. 784.), & eatenus rem alteram repræsentat; mundus totus adspectabilis Deum repræsentat tanquam ens æternum, quod necessario existit, intellectu & voluntate liberrima atque omnipotentia præditum, sapientia & bonitate summa, omniscientia & ratione maxima instructum.

Hæc quidem de repræsentatione Divinitatis in mundo hoc adspectabili tanquam in speculo consequuntur ex superioribus: neque enim plura in anterioribus demonstrata sunt. Non tamen ideo negatur, non plus Divinitatis in mundo repræsentari: sed methodi leges jubent, ut cetera tradantur suo loco, ubi demonstrari possunt. Si quis enim ea propositioni præsentī jungit, ubi vi demonstrationis assensu firmo eadem amplectitur; repræsentationem Divinitatis in mundo tanquam in speculo efficiet pleniorē.

§. 821.

*Autor na-
turæ qui-
nam dica-
tur.*

Autor naturæ dicitur, qui naturam fecit.

Nimirum quemadmodum autor ordinis naturæ denotat eum, qui naturæ

naturæ ordinem constituit (§. 762.) ; ita quoque naturæ autor dicendus, qui fecit, ut natura detur.

§. 822.

Autor naturæ Deus est. Natura enim universa est aggregatum omnium virium motricium, quæ corporibus in mundo coëxistentibus simul sumtis insunt (§. 507. *Cosmol.*). Enimvero vis activa sive motrix corporum ex substantiis simplicibus resultat (§. 180. *Cosmol.*), adeoque ex elementis corporum (§. 182.) *Cosmol.*), quatenus scilicet anima eas sibi confuse repræsentat (§. 110. *Psychol. ration.*), consequenter positis elementis corporum & ipsa ponitur. Quamobrem naturam fecit, qui elementa corporum produxit. Enimvero elementa rerum materialium Deus produxit (§. 758.). Ipse igitur etiam naturam rerum fecit. Quamobrem cum autor naturæ dicatur, qui naturam fecit (§. 821.); Deus naturæ autor est.

*Quinam
sit autor
naturæ.*

Cum creatio sit productio ex nihilo (§. 697. *Psychol. ration.*); proprie loquendo Deus naturam non creavit; sed creavit substantias, quibus natura inest, atque hoc modo Autor naturæ factus. Hinc & communiter non dicitur creator naturæ; sed naturæ autor. Et hinc Scholastici Naturam rerum, quæ datur in hoc universo, dicunt *naturam naturatam* in oppositione ad Deum, quem *naturam naturantem* appellant. Malim tamen Deum appellari autorem naturæ, quam naturam naturantem. Etsi enim terminus commode explicari possit, ne errori locum dare queat; qui tamen res & terminos a se invicem distinguere non didicere, dictione facile offenduntur: quod offendiculum cum evitari possit, evitandum utique videtur. Ceterum ut appareat, quo sensu Deus dici possit natura naturans & natura rerum in hoc universo natura naturata; nostrum esse videtur, ut explicetur distinctius. Nimirum cum Deus ex nihilo produxerit mundum hunc adspectabilem (§. 759.); quin vi activa polleat dubitandum non est. Quoniam itaque principium internum actionum dici suevit natura (§. 145. *Cosmol.*); quin Deo quoque

ob vim activam, qua pollet, tribuenda sit natura dubitandum non est. Enimvero natura rerum ponitur positis elementis rerum materialium, substantiis simplicibus, quemadmodum modo vidimus. Quamobrem cum Deus produxerit ista elementa, quibus vis activa inest, vi sua activa (§. 758.); natura divina naturam indidit elementis & per ea huic mundo, atque hoc pacto mundum termino Scholasticorum naturavit: ut adeo natura divina sit naturans, natura vero mundi naturata. Hoc modo sibi concepere Scholastici dependentiam naturæ rerum a natura divina, absque ullo sane errore, modo nihil imaginarii admisceas, quod per notiones distinctas subsistere non potest. Etsi autem substantia non sit natura; cum tamen substantia appareat (§. 508. *Cosmol.*), quatenus apparet, a Deo creata dicitur ab iis, qui apparentia a realibus non distinguunt. Atque adeo patet, quo sensu Deus appelletur creator naturæ & natura vicissim creatura.

§. 823.

*Quomodo
natura in
creatione
facta.*

Deus mundum hunc adspectabilem creavit & naturam rerum fecit uno eodemque actu. Etenim mundum hunc adspectabilem creavit, dum hæc non alia elementa rerum materialium ad actum perduxit (§. 764.). Enimvero fecit quoque naturam universam, dum hæc elementa ad actum perduxit, quemadmodum ex demonstratione propositionis præcedentis liquet. Patet igitur Deum hunc mundum adspectabilem creasse, atque naturam rerum fecisse uno eodemque actu.

§. 824.

*Natura &
Dei diver-
sitas.*

Natura in hoc universo diversa est ab omnipotentia Dei. Natura enim rerum consistit in vi motrice, quæ omnibus corporibus per totum hunc mundum adspectabilem dispositis inest (§. 507. *Cosmol.*), consequenter cum vis motrix ex substantiis simplicibus resultet (§. 180. *Cosmol.*), tandem tota ad eam vim redit, quæ elementis rerum materialium inexistit (§.

196. *Cosmol.*). Enimvero hæc vis, quæ inest elementis, non est eadem cum omnipotentia Dei, quæ ipsi competit (§. 349.). Est igitur ab eadem diversa.

Patet itaque, qui vim activam elementis rerum adimunt, & in iisdem nihil agnoscunt præter extensionem quandam uniformem, Deo autem tanquam auctori tribuunt omnem motum, a potentia ipsius in casu quolibet immediate arcessendum, naturam rerum tanquam idolum proseribentes, quod naturarum differat a Deo ostendere minime posse; sed differentiam potius sumere, quam probare. Enimvero per nostram elementorum theoriam naturæ a Deo diversitas liquida est, & Deus tamen ejus autor agnoscitur per actum creationis, utut proprie dici non possit creata, nisi vim ad ipsam substantialitatem referre volueris in composito, quemadmodum utique referri debet in simplici (§. 196. 182. *Cosmol.*), vi ipsius definitionis substantiæ, utpote perdurabilis & modificabilis (§. 768. *Onsol.*). Nulla adeo stante ista theoria metuenda est Dei atque Naturæ confusio, nec verendum, ne natura a Deo fiat independens & Numen aliquod vicarium aut socium evadat.

§. 825.

Deus naturæ leges præscripsit ab essentia corporum minime pendentes, quatenus produxit elementa, quibus insunt Deus naturæ vires hoc, non alio modo modificabiles. Cum enim ex demonstratione propositionis præcedentis pateat, naturam rerum tantum redire ad vim activam elementorum; natura in agendo alias leges observare nequit, quam quæ ex modo, quo vires activæ in elementis modificantur, resultant. Quamobrem Deus effecit, ut natura rerum has in agendo observaret leges, quatenus produxit elementa, in quibus vis activa hoc modo, non alio modificatur. Jam vero corpora sunt elementorum aggregata (§. 176. *Cosmol.*) & aggregata fiunt extensa, quatenus extra se invicem existunt & uniuntur (§. 221. *Cosmol.*).
Quam-

Quamobrem cum in genere de elementis rerum materialium, non spectata eorum, quæ actu dantur, differentia specifica, evicerimus, ea extra se invicem existere (§. 217. *Cosmol.*) ac unita esse (§. 220. *Cosm.*), quin alia quæcunque elementa extra se invicem existere debeant, si a Deo producerentur, & inter se uniri possint, dubitari nequit, consequenter extensio non modo oritur ex aggregatione horum elementorum, verum etiam oriri poterat ex aggregatione elementorum aliorum. Quoniam itaque extensio non dependet a modo, quo vires elementorum modificantur consequenter a differentia specifica eorundem, ab eadem vero dependent leges, quas natura in agendo observat; leges quoque istæ in extensione rationem sufficientem minime habent (§. 851. *Ontol.*). Jam vero corporis essentia consistit in modo, quo partes tales, non aliæ junguntur (§. 140. *Cosmol.*); consequenter ad modificationes extensi tota redit. Leges adeo, juxta quas operatur natura, rationem nullam agnoscunt in essentia corporum *per demonstrata*. Deus igitur naturæ præscripsit leges ab essentia corporum minime pendentes, quatenus produxit rerum materialium elementa, quibus insunt vires hoc modo modificabiles, non alio.

Ex propositione præsentē intelligitur, quomodo natura agat secundum leges ipsi a Deo præscriptas. Etenim cum alii mundi possibiles sint præter hunc adspectabilem (§. 101. *Cosmol.*), quos Deus omnipotentia sua ad actum producere poterat (§. 342.), si vero alius existere deberet mundus, elementa alia existere deberent (§. 570. *Cosmol.*), quin Deus alia elementa reare potuisset dubitandum non est. Quod si vero produxisset elementa alia, in quibus aliæ inextitissent vires alio modo modificabiles; natura quoque alias in agendo observaret leges. Atque hoc pacto patet, quomodo hæ leges naturæ, quas jam observat, non sint necessariae; utut his elementis existentibus natura secundum alias leges agere nequeat. Et hoc pacto simul liquet, quomodo Deus corporibus aliura imponere potuerit ordinem juxta doctrinam D.

Thomas

Thoma. Cum enim ex elementorum quorumcunque unionem prodeant extensa; elementis quibuscunque productis oritur materia, quæ extensa est & cujus diversa modificatione per figuras atque situs producuntur corpora. Quoniam vero vires elementorum quoad modificationum leges a se invicem differre debent; natura ejusque leges variari debent pro varietate elementorum. Quamobrem cum ordo naturæ legibus motus contineatur (§. 559. *Cosmol.*), quas ex modo, quo modificantur vires elementorum, resultare debere e demonstratione præsentis propositionis patet; ideo rebus creatis alius impositus fuisset ordo, siquidem Deo alia elementa producere visum fuisset. Per nostram adeo elementorum theoriam a priori patent, quæ quomodo intelligibili modo (quod est philosophi) per alia principia explicari possint, non liquet. Inest rebus creatis agendi necessitas, agunt tamen ex liberrima Dei voluntate sic & non aliter. Et hoc modo contingentia rerum a libertate voluntatis divinæ derivatur, quæ in rebus creatis deprehenditur.

§. 826.

Deus naturæ leges præscripsit in prima rerum creatione. Quomodo ne. Etenim Deus naturæ leges præscripsit, dum elementa re-^{leges natura a Deo}rum materialium produxit, quibus insunt vires hoc & non alio modo modificabiles (§. 825.), consequenter tum eas præ-^{præscriptæ.}scripsit, cum elementa ista produceret. Enimvero Deus hunc mundum adspectabilem & hæc in eodem corpora produxit, dum hæc, non alia rerum materialium elementa ad actum perduxit (§. 764.), consequenter cum mundum adspectabilem creaverit (§. 760.), ipso creationis actu elementa rerum materialium ad actum perduxit. Præscripsit igitur naturæ leges, quas in agendo observare tenetur in prima rerum creatione.

Unde patet a primo creationis momento naturam rerum egisse juxta eas, quas in agendo observare tenetur, leges, quo scilicet naturæ ordo capis (§. 761.).

§. 827.

*Cur natura
leges a
Deo præ-
scriptas vi-
olare ne-
queat.*

*Natura rerum leges a Deo ipsi præscriptas observare te-
netur in agendo.* Etenim Deus naturæ præscripsit leges, qua-
renus produxit elementa, quibus insunt vires hoc & non alio
modo modificabiles (§. 825.). Quoniam igitur leges naturæ
præscriptæ in elementis rationem sufficientem habent (§. 56.
Ontol.), atque adeo his positæ ponuntur (§. 118. *Ontol.*); na-
tura quoque agere nequit nisi juxta leges a Deo ipsi præscri-
ptas, seu, quod perinde est, eas in agendo observare tenetur.

Ab hisce legibus naturæ, quas Deus in prima statim re-
rum creatione eidem præscripsit, & quas ipsa violare
nescit, pendet immutabilitas scientiæ naturalis. Etenim quem-
admodum natura rerum egit in prima rerum creatione; ita
quoque hodiernum agit. Quamobrem cum per naturam
ad actum perducantur, quæ per essentias rerum possibile
sunt, inviolabili quodam ordine, quod initio creationis verum
erat, idem etiam verum hodiernum est; verum erit, quamdiu
mundus hic subsistet, quoad facta scilicet, seu singularia in
mundo contingentia. Alias enim constat, veritatem omnem
in se spectatam esse æternam & manere æternam. Ita ab æ-
terno verum fuit frigore in glaciem concreſcere aquas & in
æternum verum manebit. Quamdiu autem mundus hic ad-
spectabilis subsistet, verum est, quod aquæ actu frigore suo
constanter tempore in glaciem sint concreturæ & quod eadem
causa idem producat effectus. Non alia igitur Physica
opus habemus nostro tempore, quam quæ fuit in prima sta-
tim rerum creatione, ad effectus naturæ explicandos, & quæ
hodie sufficit, eadem sufficiet per omne tempus futurum.

§. 828.

*Constantia
ordinis &
ordo conserva-
tur.*

*Quamdiu hic mundus adspectabilis durat, idem natura
ordinis & ordo conservatur & cursus naturæ idem est.* Cum enim or-
cursus na- do naturæ contineatur regulis motus (§. 559. *Cosmol.*), adeo-
que

que legibus naturæ nitatur (§. 303. *Cosmol.*); Deus vero hæc leges naturæ præscripsit, quatenus produxit elementa, quibus insunt vires hoc modo, non alio modificabiles (§. 825.): naturæ ordo tamdiu conservari debet idem, quamdiu hæc elementa subsistunt. Produxit vero Deus hunc mundum adspectabilem & hæc in eodem, non alia corpora, dum hæc, non alia elementa ad actum perduxit (§. 764.), adeoque hic mundus adspectabilis tamdiu subsistit, quamdiu hæc elementa rerum materialium subsistunt. Patet itaque eundem naturæ ordinem conservari, quamdiu mundus hic adspectabilis durat.

Idem etiam hoc modo ostenditur. Deus constituit naturæ ordinem, dum hæc, non alia rerum materialium elementa produxit (§. 761.). Tamdiu igitur conservatur, quamdiu hæc elementa subsistunt. Unde patet, ut ante ordinem naturæ tamdiu subsistere debere, quamdiu hic mundus adspectabilis durat.

Poterat etiam probari hoc modo. Si alius esse debet ordo naturæ, alia existere debent elementa (§. 569. *Cosmol.*), nec minus alia requiruntur elementa, si alius existere debet mundus (§. 570. *Cosmol.*). Quamobrem hisce existentibus elementis, & hic mundus adspectabilis existit, & hic datur ordo naturæ. Quamdiu itaque mundus adspectabilis durat, tamdiu quoque idem naturæ ordo conservatur. *Quod erat primum.*

Quamdiu mundus hic adspectabilis durat, hæc quoque corpora, non alia existunt (§. 119. *Cosmol.*), nec existere possunt (§. 97. & seqq. *Cosmol.*), & idem conservatur naturæ ordo *per primam hujus*. Quoniam itaque quod naturaliter fit in hoc mundo adspectabili rationem sufficientem in essentia & natura corporum agnoscit (§. 509. *Cosmol.*); quamdiu hic mundus adspectabilis durat, omnia in eodem consequuntur iisdem essentiis & eidem naturæ ordini convenienter. Quamob-

rem cum cursus naturæ sit eventuum essentiis corporum atque naturæ eorundem conformis consecutio (§. 567. *Cosmol.*), adeoque idem maneat, corporibus iisdem & naturæ ordine eodem manentibus; quamdiu hic mundus adspectabilis durat, cursus naturæ idem est. *Quod erat secundum.*

Inde est, quod cursui naturæ conforme sumatur, quod constanter fieri observamus, etiamsi idem a priori demonstrare minime valeamus, & hinc porro concludamus, idem posthac constanter ad finem usque mundi futurum. Ita constat, homines & animalia propagari per generationem, nec ullum allegari potest exemplum in contrarium. Hic adeo modus propagandorum hominum & animalium cursui naturæ conformis dicitur, etiamsi a nobis demonstrari non possit impossibilitas ortus hominis vel animalis absque generatione. Unde citra ullam hæsitacionem affirmamus, homines & animantia bruta semper per generationem fuisse propagata & in posterum propagatum iri ad finem usque mundi. Similiter quia experientia constat, homines pariter atque animantia utriusque sexus semper fuisse genita eo numero, ut nec hominum genus, nec ulla animantium species defectu sexus alterutrius interierit; naturæ cursui conforme sumitur generatio hominum & animantium utriusque sexus eo numero, qui & humano generi, & animantium cuilibet speciei conservandæ sufficit. Atque ita affirmamus non esse verendum, ne defectu alterutrius sexus vel genus humanum, aut animantium aliqua species intereat, vel saltem numerus individuorum veluti ad interitum vergente specie notabiliter decreseat. Continuum esse noctium atque dierum, hiemis atque æstatis vicissitudinem, nemo non observat &, quantum per monumenta historica patet, semper fuisse constat. Unde hanc vicissitudinem cursui naturæ conformem judicamus & fiducia hujus judicii porro pronunciamus, fore eam in posterum quoque perennem.

§. 829.

*Interitum
mundi.*

Mundus hic adspectabilis interire nequit, nisi per annihilationem.

lationem. Constat enim mundus ex corporibus (§. 119. *Cosmol.*): quæ cum sint substantiarum simplicium aggregata (§. 176. *Cosmol.*), mundus interire nequit nisi substantiis simplicibus istis intereuntibus. Enimvero substantia simplex interire nequit nisi per annihilationem (§. 698. *Ontol.*). Quamobrem nec mundus hic adspectabilis interire potest nisi per annihilationem.

Corpora intereunt & oriuntur citra cujuspiam annihilationem, vel ex nihilo productionem (§. 125. *Cosmol.*), sive creationem (§. 697. *Psychol. ration.*). Unde uno corpore intereunte substantiæ simplices, quibus aggregatis ortum fuerat, superstites remanent, & sic nova aggregatione oritur corpus aliud. Hinc cursui naturæ conforme pronunciarunt veteres (*not.* §. 828.), quod unius corruptio sit alterius generatio. Quamvis ergo sumas, quod tamen probare non potes per ea, quæ hodie nobis cognita sunt, faciem mundi hujus adspectabilis mutari in aliam, quam nunc habet, ita ut prodeat mundus externa specie ab eo, qui nunc existit, prorsus diversus; cum tamen ista transformatio rationem sufficientem habere debeat in elementis rerum, mundus vero contineat omnem successivorum seriem per modificationes elementorum explicabilem, mundus aliam a præsentē faciem referens non erit ab hoc, qui existit, diversus, ista mutatione & eo, quod per eam sequitur, ad præsentem pertinente. Si excipias omnipotentia Dei alium effici mundum adspectabilem, cum præsentia elementa alio modo existere nequeant (§. 571. *Cosmol.*), necesse est ut a Deo annihilentur & ejus loco producantur elementa alia ab hisce diversa. Desinit igitur mundus per annihilationem & alius ex nihilo producitur, adeoque novus a Deo creatur (§. 697. *Psychol. ration.*). Nulla igitur est obiectio, cum veritatem propositionis præsentis confirmet, nullo autem pacto infirmet.

§. 830.

Si corpus interit, nullum elementum rei materialis interit. Elemento-

G g g g g 3

Et-rum con-

*stans con-
servatio.*

Etenim corpus interit citra cujuspiam annihilationem (§. 125. *Cosmol.*). Enimvero elementa rerum materialium sunt substantiæ simplices (§. 182. *Cosmol.*), adeoque interire nequeunt, nisi per annihilationem (§. 698. *Ontol.*). Quando igitur corpus interit, elementum nullum rei materialis interit. Immo cum mundus sit series rerum simultanearum & successivarum inter se connexarum (§. 55. *Cosmol.*), nexus vero rerum materialium a nexu elementorum pendeat (§. 205. *Cosmol.*), hic autem in ipsis elementis rationem sufficientem agnoscat, tum quatenus simul existunt, tum quatenus hoc potius modo quam alio coëxistunt; salva hac rerum serie, consequenter salvo mundo adspectabili, nullum elementum annihilari posse intelligitur. Quamobrem nec fingi potest, quod Deus in interitu corporum elementa quædam annihilaret. Atque adeo tanto clarius patet, in corporum interitu elementum nullum annihilari.

Concessum est a Philosophis in corporum corruptione nihil annihilari, sed mixta tantummodo resolvi, cum nec experientia aliud insinuet, nec ratio ulla suadeat. An vero aliunde, quam ex nostra elementorum & nexus universalis theoria idem eadem evidentia demonstrari possit, aliis dijudicandum relinquo. Nimirum vulgo materia habetur pro ipso substantiali rerum corporearum, ac ideo statuitur, nihil materiæ interire in corporum interitu. Sed præstat ex nostris notionibus singula evolvi distinctius, ut plenissima iisdem lux affundatur.

§. 831.

*Conserva-
tio substan-
tialis in cor-
porum in-
teritu.* Quoniam in corporibus nihil datur substantiale præter entia simplicia (§. 177. *Cosmol.*), rerum materialium elementa (§. 182. *Cosmol.*), in corporum vero interitu nullum elementum rei materialis interit (§. 830.) ; in corporis interitu nihil substantiale perit.

Instar axiomatis hoc dudum receptum est a Philosophis, quod

quod experientiae consonum judicarent. Firmior tamen est assensus, ubi demonstratio a priori accedit.

§. 832.

In ortu corporum nullum elementum rei materialis ori- *Elemento-*
tur. Etenim corpus oritur citra cujuspiam ex nihilo produ- *rum novo-*
ctionem (§. 125. *Cosmol.*). Enimvero elementa rerum mate- *rum ortus*
rialium cum sint substantiae simplices (§. 182. *Cosmol.*); oriri *destructus.*
nequeunt, nisi ex nihilo producantur (§. 691. *Ontol.*). Quan-
do igitur corpus aliquod oritur, nullum rei materialis elemen-
tum oritur. Patet vero ut ante (§. 830.), nec fingi posse,
quod Deus in ortu corporum elementa nova ex nihilo produ-
cat. Quamobrem extra omnem dubitationem positum est, in
ortu corporum nullum elementum rei materialis oriri.

Concessum est a Philosophis in ortu corporum nihil a Deo
creari, seu ex nihilo produci, quia observarunt, naturam tan-
tum miscere materias diversas & corpuscula mixtorum unire,
ut prodeant corpora.

§. 833.

Quoniam in corporibus nihil datur substantiale præter *Conserva-*
entia simplicia (§. 177. *Cosmol.*), rerum materialium elementa *tio substan-*
(§. 182. *Cosmol.*), in ortu corporum vero nullum elementorum *tialis in or-*
rei materialis oritur (§. 832.); in corporis ortu nihil substantiale *tu corpo-*
producitur. *rum.*

Instar axiomatis dudum hoc sumere philosophi freti ex-
perientia, de qua modo diximus (*not. §. præ.*). Notandum
vero hic est, quod de substantiali in corporis interitu non
pereunte annotavimus (*not. §. 831.*).

§. 834.

Deus hodie nihil amplius creat, nec creabit quicquam, Cur Deus
quamdiu hic mundus adspectabilis existet. Series enim succes- *hodie nil*
sivorum creet.

sivorum, quæ ingreditur hunc mundum adspectabilem (§. 55. *Cosmol.*), non continet nisi corpora, quorum unum interit, alterum oritur, & modificationes ejusdem corporis per aliquod temporis intervallum durantis: id quod experientia constat. Enimvero in ortu corporum nullum elementum oritur (§. 832.), consequenter substantia nulla simplex (§. 182. *Cosmol.*), adeoque nihil ex nihilo producitur (§. 691. *Ontol.*). Quamobrem patet, in corporum ortu nihil creari (§. 697. *Pfychol. ration.*). Quod in interitu corporum nihil creetur novi, per se patet. Modificationes vero corporum existentium & per aliquod temporis intervallum durantium non sunt nisi variationes limitationum (§. 830. *Ontol.*), neque ideo quicquam in iisdem ex nihilo producitur (§. 833. *Ontol.*), consequenter nihil in iisdem creatur (§. 697. *Pfychol. ration.*). Quamobrem hodie nihil amplius creatur. Competit vero potentia creatrix soli Deo (§. 767.). Quamobrem patet, Deum hodie nihil amplius creare.

Enimvero quæ hodie datur ratio, cur Deus nihil amplius creet, eadem subsistit, quamdiu mundus hic adspectabilis subsistet; & quod futurum est tempus, erit aliquando perinde ac hoc præsens. Quamobrem cum posita ratione sufficiente, cur quid sit potius, quam non sit, ponatur etiam id, quod propter eam potius est quam non est (§. 118. *Ontol.*); quamdiu mundus hic adspectabilis existet, ponetur non creatio rerum, aut si mavis, cessatio creationis. Deus itaque nihil creabit, quamdiu hic mundus adspectabilis existit.

Idem etiam probari potest hoc modo. Totus mundus hic adspectabilis ens unum est (§. 60. *Cosmol.*), cui adeo nihil demi potest, salva ejus essentia: id quod etiam ex immutabilitate essentiae claret (§. 300. *Ontol.*). Jam essentia mundi & natura sunt medium, quibus finem per ejus creationem intentum consequitur Deus (§. 645.). Quamobrem cum per mundi
hujus

hujus adspectabilis existentiam finem a se intentum ex se consequatur (§. 621.); non opus habet, ut nova creatione in hanc seriem rerum quicquam intrudat, & alia in eadem existentia annihilat, consequenter mundi partem secururam diversam efficiat ab ea, quæ respondet mundo a se creato. Quamobrem cum Deus sit sapientissimus (§. 640.), sapiens vero contra finem, quem intendit, nil agit (§. 678. *Psychol. ration.*); ideo patet, Deum hodie nil amplius creare, nec quicquam in posterum creaturum, quamdiu hic mundus adspectabilis existit.

Consentiunt non modo Philosophi, qui sumunt experientiz fiducia nihil hodie amplius creari, postquam mundus ad actum perductus omnipotentia divina; verum etiam Theologi, qui S. S. autoritate idem defendunt *Gen.* II. 2, cum qua principia nostra mirifice consentiunt.

§. 835.

Quamdiu mundus hic adspectabilis durat, eadem semper Quamdiu elementa rerum materialium subsistunt. Cum enim mundus eadem elementa hic adspectabilis ens unum sit (§. 60. *Cosmol.*), & constet ex *menta* subcorporibus (§. 119. *Cosmol.*), quæ non sunt nisi elementorum *fistant*. alio modo coexistere minime valentium (§. 571. *Cosmol.*) aggregata (§. 176. *Cosmol.*); hæc elementa ita ad constitutionem hujus mundi pertinent, ut nulla abesse, nec alia adesse possint, salva mundi hujus adspectabilis essentia (§. 345. *Ontol.*). Quamobrem eadem elementa rerum materialium subsistere debent, quamdiu mundus hic adspectabilis durat.

Nimirum mundus quilibet ex elementis aggregatur, quemadmodum numerus ex unitatibus, sed salva differentia in modo aggregandi, qui utique longe alius in unitatibus numerum componentibus, quam in elementis rerum materialium, vi differentiz unitatis numerice & unitatis physice, seu elementi rerum materialium, quam integro capite exposuimus in *Cosmologia* (§. 196. & seqq.). Quemadmodum ita-

(*Wolfs Theol. Naturalis*)

H h h h h

que

que salvo numero nulla unitas demi, nec ulla addi potest; ita & fieri nequit, ut aggregato elementorum, ex quorum mutationibus intrinsecis resultat mundus sensibilis, ullum elementum accedat, vel ab eodem dematur. Et quemadmodum in numero concreto unitates sunt entia dati generis vel datæ speciei, nec quædam unitates demi & aliæ, quæ sunt entia alterius generis vel speciei, in eorum locum succedere possunt; ita nec in mundo adspectabili, elementorum dati generis datæque speciei aggregato, ullum elementum, quod adest, abesse; nec aliud, quod abest, adesse potest. Non igitur mirum, quod eadem semper subsistere debeant elementa, quamdiu idem mundus adspectabilis durat. Qui vel atomos materiales pro elementis corporum, vel certam quandam materię quantitatem pro elementari venditant; propositionem præsentem ideo concedere tenentur, quod hæc materię quantitas, vel hæc atomorum materialium congeries sufficiat generationibus & corruptionibus corporum & constitutioni corporum perennium, seu, ut verbo dicam, omnibus mundi phænomenis exhibentis. Enimvero non tanta evidentia, quæ in nostra elementorum theoria, patet, quod alia elementa hisce, quæ existunt, super accedere nequeant, cum esset omnis ratio objectiva: id quod & in aliis propositionibus liquet, ubi ex natura elementorum procedit demonstratio.

§. 836.

Cur in mundo nihil annihilatur.

Nibil annihilatur, quamdiu mundus hic adspectabilis existit. Quamdiu enim mundus hic adspectabilis durat, eadem semper elementa rerum materialium subsistunt (§. 835.), adeoque nullum eorum interit (§. 541. *Ontol.*). Quamobrem cum elementa rerum materialium sint substantiæ simplices (§. 182. *Cosmol.*), quæ adeo interire nequeunt, nisi annihilentur (§. 698. *Ontol.*); corporum interitu nihil annihilatur, quamdiu mundus hic adspectabilis existit. Intereunt vero corpora citra cujuspiam annihilationem (§. 125. *Cosmol.*), nec in modificationibus quidpiam annihilatur (§. 833. *Ontol.*). Quamob-

rem

rem cum nullus interitus possibilis intelligatur in mundo ad-
spectabili nisi vel elementorum¹, vel corporum inde aggrega-
torum vel limitum, qui in modificationibus variantur (§. 830.
Ontol.); ideo liquet, quamdiu hic mundus adspectabilis du-
rat, nihil prorsus in eodem annihilari.

Propositio hæc dudum probata & a Philosophis & Theo-
logis, qui ut novam rerum creationem, ita & ullius existentis
annihilationem improbarunt, sed fiducia experientiae, quod in
corporum interitu composita dividi & mixtum resolvi obser-
varent, quemadmodum ex adverso omnia generari & augmen-
tari experiebantur ex materia præexistente.

§. 837.

*Natura rerum non mutatur, sed eadem semper manet, Immutabi-
quamdiu hic mundus adspectabilis durat.* Cum enim natura *litas natu-*
rerum sit aggregatum omnium virium motricium, quæ cor-*re,*
poribus in mundo existentibus simul sumtis insunt (§. 507.
Cosmol.), vis motrix vero ex substantiis simplicibus, corporum
elementis (§. 182. *Cosmol.*), resultet (§. 180. *Cosmol.*); natura
rerum tamdiu eadem manere debet, quamdiu elementa rerum
materialium subsistunt. Enimvero elementa eadem subsistunt,
quamdiu hic mundus adspectabilis durat (§. 835.). Quamob-
rem & natura rerum eadem semper manet, nec mutatur adeo
(§. 290. *Ontol.*), quamdiu hic mundus adspectabilis durat.

Quæ igitur a prima creatione seu primo rerum principio
fuit natura, eadem adhuc est & erit in posterum. Cumque
ideo constanter idem sit naturæ ordo (§. 828.), ordo vero natu-
ræ regulis motus contineatur (§. 559. *Cosmol.*); natura quo-
que semper agit eodem modo. Et quia Deus naturæ le-
ges præscripsit in prima statim creatione rerum (§. 826.), nec
ea has violare in agendo potest (§. 827.); verendum minime
est, ne minima quoad eam accadat mutatio. Neque enim De-

us præscripsit eidem leges, nisi quas ab æterno ab eadem observari decrevit (§. 525.) ; ut adeo nulla sit suspicio, num forsitan Deus naturam rerum immutet, quem potius ejus, quod decrevit & decreto convenienter fecit, pœnitere nequit (§. 510.).

§. 838.

*An natura
senio lan-
guescat.*

Quoniam natura rerum non mutatur, sed eadem semper manet, quamdiu hic mundus adspectabilis existit (§. 837.), tamdiu quoque ordo naturæ conservatur (§. 828.), consequenter eadem semper subsistunt regulæ motus (§. 559. *Cosmol.*), adeoque & leges (§. 303. *Cosmol.*) ab eadem in agendo violari nesciunt (§. 827.) ; *naturæ vires nunquam deficere, nec ipsa quasi senio languescere potest.*

Qui observarunt, naturam corporis humani senio languescere, viribus continuo magis magisque deficientibus, cum naturam universam non cognoscerent, sed nonnisi confusam aliquam, si non prorsus obscuram ejus ideam haberent, in eam suspicionem delapsi sunt, quasi natura quoque mundi senescentis languescat, viribus ejus paulatim deficientibus. Enimvero quam sit rationi contraria hæc opinio, ex anterioribus abunde constat. Nullo autem experimento, nulla observatione eandem firmari posse non minus certum est, cum a natura corporis humani ad naturam universam nulla sit argumentatio, in corporis interitu nullo elemento percurrente (§. 831.) : quod utique fieri deberet, siquidem naturæ universæ aliqua accideret mutatio, quemadmodum ex iis intelligitur, quæ in demonstratione propositionis præcedentis continentur.

§. 839.

*An Deus
vires natu-
ræ reficere
teneatur.*

Quoniam *naturæ vires nunquam deficiunt, a Deo quoque per miraculum reficiantur opus non est.*

Qui statuunt Deum subinde vires naturæ reficere teneri, eas quoque sensim sensimque deficere affirmant, adducti ra-
tio-

tionibus, quæ veræ naturæ notioni repugnant. Cum vero nullum virium deficientium indicium observent a posteriori, ad earundem defectionem tanquam ad sacram quandam anchoram confugere tenentur. Sed abjecte nimis sentiunt de sapientia & omnipotentia Dei, qui naturam subinde manu emendatrice opus habere statuunt, ne in confusionem ruant omnia, quemadmodum index horologii eget nonnunquam directione, ut bene indicet tempus. Quodsi vires naturæ subinde refici foret opus, id aliter fieri non posse, quam miraculi beneficio, & definitio miraculi loquitur (§. 510. *Cosmol.*), & simile ab horologio desumptum declarat (§. 534. *Cosmol.*).

§. 840.

Creatura existentiam propria virtute continuare nequit. An creatura Ponamus enim, si fieri potest, creaturam existentiam, quam *re propria* in creatione a Deo accepit (§. 777. 766.), propria virtute *virtute* continuare posse. Necesse igitur est, ut a creatione ipsi insint ea, *existenti-* per quæ intelligi potest, cur potius existat, quam non existat. *am conti-* Quamobrem cum id, per quod intelligitur, cur quid potius sit, *nuare pos-* quam non sit, ejus ratio sufficiens sit (§. 56. *Ontol.*); creaturæ *sint.* a creatione rationem sufficientem existentia suæ in se habent. Enimvero cum ratio eorum, quæ enti conveniunt, in alio contineri nequeat, quam in essentia rei, siquidem intrinseca fuerit ratio (§. 168. *Ontol.*); ratio existentia a creatione in essentia creaturæ continetur. Quamobrem cum enti a se proprium sit, ut rationem existentia suæ in essentia sua habeat (§. 31.); creatura per creationem convertitur in ens a se. Quod cum sit absurdum, quia ens a se & ab alio constanter quoad modum existendi differre debent (§. 27.); creaturæ existentiam, quam in creatione a Deo accepere, propria virtute continuare nequeunt.

Idem etiam hoc modo ostenditur. Propria virtute *exi-* nere est attributum entis necessarii (§. 26.). Quamobrem

Hhh h h 3

cum

cum attributa sint incommunicabilia (§. 45. *Psychol. ration.*), fieri omnino nequit, ut enti contingenti, consequenter huic mundo adspectabili (§. 55), detur, ut propria sibi virtute existat, Quamobrem existentiam propria virtute continuare nequit. Immo creatura omnis, propterea quod a Deo creata (§. 777.), adeoque ad actum perducta est, cum antea non existeret (§. 766.), ens contingens est (§. 310. *Ontol.*). Creatura igitur nulla existentiam in creatione acceptam propria virtute continuare potest.

Equidem non desunt, qui sibi persuadent, si quod ens a Deo fuerit creatum, id propria virtute deinceps existere posse, seu, quod perinde est, existentiam independentem a Deo pereunare, quamdiu scilicet is voluerit; desitutam, ubi eandem Deus enti iterum adimere, seu ens, quod actu est, in nihilum redigere maluerit: attamen hoc pacto existentia entis a se & entis ab alio, aut, quod perinde est, existentia necessaria & contingens intrinsece non amplius differunt. Quemadmodum existentia entis a se est independens, ita etiam existentia entis contingentis erit independens a Deo. Creatura sese habebit ad Deum, sicuti horologium ad fabrum, quod non amplius ejusdem indiget auxilio, ut existentiam continuat, ubi ab ipso fuerit perfectum. Quod si excipias, hoc pacto creaturas, opera Dei, summi artificis fore deterioris conditionis, quam opera hominum arte constructa; haud difficilis est responsio. Neque enim homo artifex existentiam largitur horologio propria virtute continuandam, cum idem non subsistat nisi beneficio materiae, quæ in mixtione sua per naturam conservatur. Unde horologium interit, si materia corrumpitur. Quamdiu hæc salva est, tamdiu quoque ipsum durat, cum adesse non posset, nisi materia existeret, ex qua fabrefactum. Ceterum propositio hæc coincidit cum illa *D. Thomæ*, quod Deus non possit creaturæ communicare, ut conservetur in esse, sua actione cessante, sicut non potest ei communicare, quod non sit causa illius. Nimirum virtute propria existere seu in esse suo conservari, nec ad hoc indi-

indigere vi alterius & virtute propria non existere aut in esse suo conservari non posse, sed ad hoc indigere vi alterius sunt duo contraria attributa. Unum eorum convenit enti a se, ex cuius notione fluit; alterum enti ab alio, ex cuius notione deduci nequit prius (§. 27.). Attributum adeo entis a se communicare enti ab alio idem est ac ens ab alio convertere in ens a se: quod propter essentialium incommunicabilitatem utique absurdum (§. 345. *Ontol.*). Refertur adeo a D. *Thoma*, quemadmodum a nobis, dare alteri ut virtute propria existat, inter impossibilia, quod adeo ne a Deo quidem fieri potest (§. 344.).

§. 841.

Quoniam *creatura existentiam* propria virtute continua- *Virtute*
re nequeunt (§. 840.) eam vero, utpote a Deo creatam (§. 777.), Dei quo-
a Deo accipere in principio rerum (§. 766.); *neceſſe eſt ut vir-* modo crea-
tute Dei eandem continuent, conſequenter Deus, quam in princi- tur.e exi-
pio dedit creaturis existentiam, eandem quoque dare pergit, quam- ſtant.
diu durant.

Hoc pacto intelligitur, quam necessaria sit Dei actio ad durationem mundi huius adſpectabilis, & omnium eorum, quæ in eodem existunt, conſequenter quomodo entis uniuscujusque actualitas ad Deum conſtanter ſit referenda, ita ut nullum fingi poſſit momentum, quo creatura carere poſſit creatore ſuo. Erit hoc uſui in Morum praxi: quamobrem neceſſe eſt, ut hic probe expendatur & lucida quadam idea memoriae inſigatur.

§. 842.

Conſervatio eſt actio, qua rebus creatis datur, ut in eſſe ſuo *Conſerva-*
perſeверent, ſeu ut exiſtere pergant. *tionis de-*

Nimirum quemadmodum creatio eſt actio, qua quid ad actum perducitur, quod nonniſi poſſibile erat, adeoque pos-

ſinitio.

possibili datur, ut existat; ita conservatio dici debet actio, qua datur possibili, ut in actu, ad quam perductum fuit, perseveret, seu existere pergat.

§. 843.

*Creatura
conserva-
tio.*

*Creatura nulla seipsam conservare potest; sed a Deo con-
servetur necesse est.* Etenim creatura nulla propria virtute
existentiam continuare valet (§. 840.). Quamobrem nec in
ipsa concipi potest actio, qua eidem datur, ut existere pergat.
Quoniam itaque hæc actio, qua creaturæ datur, ut existere
pergat, est conservatio (§. 842.); quod creatura nulla seipsam
conservare possit patet. *Quod erat primum.*

Jam vero Deus existentiam creaturæ dare pergit, quam
in principio dedit (§. 841.), consequenter ipsius est actio, qua
datur, ut existere pergat. Quamobrem cum hæc ipsa actio
sit conservatio (§. 842.); creaturæ a Deo conservantur, cum-
que seipsas conservare nequeant *vi num. I.* necesse est ut a Deo
conserventur. *Quod erat secundum.*

Equidem hæc propositio plana & perspicua est, & admis-
sis ac perspectis anterioribus de ejus veritate nullum superest
dubium: ne tamen in applicatione ad res particulares, quæ
in hoc universo existunt, dubia suboriantur; actus conser-
vatorius paulo uberius explicandus venit. Etenim id utile
quoque erit in concursu Dei ad actiones hominum, ut pateat,
quomodo salva libertate Deus concurrat, & citra ullam culpam
ad actiones quoque malas non minus concurrat, quam ad bonas.

§. 844.

*Qualis a-
ctio sit con-
servatio.*

Actio conservationis & creationis in Deo non differunt.
Etenim actio creationis in eo consistit, quod Deus ad actum
perducat substantias, nullo alio præexistente in eadem actua-
litate influente (§. 766.). Actio vero conservationis itidem
in eo consistit, quod Deus substantiæ, quam ad actum perdu-
xit,

xir, det ut existere pergat (§. 843. 842.) seu quod perinde est, dare pergat existentiam (§. 841.), cum nec propria virtute eandem continuare possit (§. 840.), nec sic præter Deum, qui ad ejus continuationem quidpiam conferre valeat, quod per se patet. Actio igitur conservationis & creationis in Deo non differunt.

Hodie quidem adhuc oriuntur corpora, quæ ante non aderant, intereuntibus aliis, quæ aderant. Quemadmodum vero in interitu corporis nihil substantiale perit (§. 831.); ita nec in ortu corporum quicquam substantiale producit (§. 833.). Corpora autem in universo spectata non indigent conservatione, nisi quatenus substantiale conservatur. Quamobrem Deus pergit dare actualitatem substantiali, quemadmodum dare cœpit in prima rerum origine. Unde quoad Deum creatio & conservatio non differunt; sed una potius eademque actio sunt.

§. 845.

Quoniam actio conservationis & creationis quoad Deum *Conservatio cur sit continua-
ta creatio.* minime differunt (§. 844.); *conservatio continuata creatio est.*

Propositio hæc dudum probata Theologis, qui cum D. *Thoma* defendunt conservationem rerum a Deo non fieri per aliquam novam actionem, sed per continuationem actionis, qua dat esse, hoc est, creationis. Et nunc clarius adhuc patet, cur Deus etiam dicendus sit creator corporum, quæ hodiernum gignuntur: id quod jam supra evicimus (§. 779.). Ratio nimirum in superioribus data hic singulari quadam ratione confirmatur.

§. 846.

*Potentia conservatrix, qualis Deo competit, ipsi soli propria, non-
tura rerum non competit.* Quoniam enim actio creationis & con-
servationis in Deo una eademque est (§. 844.), ita ut hæc non sit nisi *tria cur
continuatio prioris (§. 845.), potentia quoque conservatrix cum Deo pro-
(Wolfii Theol. Naturalis) I ii ii crea-pria.*

creatrice una eademque est. Quamobrem cum potentia creatrix soli Deo propria sit, naturæ vero rerum competere nequeat (§. 767.); potentia quoque conservatrix soli Deo propria est, nec naturæ rerum competit.

Loquimur hic de conservatione substantiarum, seu ejus quod substantiale est in corporibus; non autem conservatione corporum, qua corporum talium, quæ quemadmodum oriri ac interire possunt sine substantiæ ejusdem ortu (§. 833.) atque interitu (§. 831.), ita nec eo indigent actu conservatorio, ut aliquamdiu perdurent, quo opus habet quod in iisdem substantiale est. Hæc probe tenenda sunt, ne actum conservationis divinum trahamus ad ea, quæ naturæ sunt, nec scrupulis inanibus locum concedamus, ubi ab iisdem prorsus liber esse potest animus. Quamobrem consultum ducimus hæc declarare dilucidius.

§. 847.

Quomodo mundus & ordo naturæ a Deo conservetur. Deus mundum adspectabilem & hæc in eodem corpora atque hunc naturæ ordinem conservat, quatenus actum indefinenter largitur hisce rerum materialium elementis. Etenim Deus hunc mundum adspectabilem & hæc in eodem corpora creavit (§. 764.), atque hunc naturæ ordinem constituit, dum hæc elementa rerum materialium ad actum perduxit (§. 761.), seu, quod perinde est, actualitatem iisdem largitus est. Enimvero conservatio nonnisi continuata creatio est (§. 845.). Quamobrem Deus hunc mundum adspectabilem & hæc in eodem corpora atque hunc naturæ ordinem conservat, quatenus actum indefinenter largitur hisce rerum materialium elementis.

Quibus ex principiis cosmologicis ac iis, quæ in superioribus de mundo intelligibili & sensibili dicta sunt, perspectum est, quomodo elementorum, quoad statum internum continuo mutabilium, coëxistentia constituatur mundus intelligibilis, ac inde oriatur sensibilis quoad nos; ii conservationem hujus universi multo clarius percipient, quam qui hi-

see notionibus vacuum possident animum. Etenim elementa rerum materialium, substantiæ simplices (§. 182. *Cosmol.*), sunt entia ab alio (§. 756.), non vero entia a se (§. 52.), adeoque existere nequeunt, nisi virtute Dei mundum adspectabilem conservantis (§. 27. 843.). Enimvero dum Deus omnipotentia sua iisdem continuo impertitur actum, quem per essentiam habere nequeunt; mundus intelligibilis existit, & existere pergit, qui quoad nos sensibilem exhibet. Actus adeo conservatorius Dei non consistit nisi in eo, quod actualitatem indefinenter conferat elementis, quam in creatione conferre cepit.

§. 848.

Quoniam in corporibus nihil datur substantiale præter entia simplicia (§. 177. *Cosmol.*); Deus vero hunc mundum ad-servatorius spectabilem conservat, & hæc in eodem corpora, huncque naturæ versatur ordinem, quatenus actum indefinenter largitur hisce rerum circa sub-materialium elementis (§. 847.); *Mundus hic adspectabilis & stantiale quicquid in eodem est una cum ordine naturæ conservatur*, quatenus Deus indefinenter efficit, ut substantiale existat, consequenter dum, quod substantiale est in corporibus, conservat.

Propositio hæc probe notanda est ne deinceps in doctrina de concursu Dei ad malum nascantur difficultates invincibiles.

§. 849.

Deus mundum hunc adspectabilem & quæcunque in eodem Quod o-sunt corpora, atque naturam rerum ejusque ordinem conservat omnia con-uno eodemque actu. Etenim Deus hunc mundum ad-serventur spectabilem & quicquid in eodem existit creavit & naturam uno actu. rerum fecit, atque hujus ordinem constituit uno eodemque actu (§. 765. 823), adeoque nulla peculiaris requiritur actio ad faciendam naturam rerum & constituendum ejus ordinem, quæ sit diversa a creatione. Enimvero creatio & conserva-

tio sunt in Deo una eademque actio (§. 844.), quæ enti datur ut existat (§. 842.), quod scilicet per essentiam suam existere nondum potest. Quamobrem Deus mundum hunc adspectabilem & quæcunque in eodem sunt corpora, atque naturam rerum ejusque ordinem conservat uno eodemque actu.

Agnoscent Theologi in Deo tanquam ente infinito ac simplici non admittentes, quæ a se diversa sunt & sibi invicem succedunt, actum creationis & conservationis esse unum eundemque atque simplicem, in plures non resolubilem, quemadmodum habet propositio præsens. Enimvero quomodo uno eodemque actu, quæ prorsus diversa apparent (§. 301. *Cosmol.*), si in phaenomenis acquiescamus (§. 225. *Cosmol.*), & primum fieri, & semel facta conservari queant, hætenus explicatum non est intelligibili modo. Per nostra vero principia cosmologica omnia in aprico posita sunt: quæ adeo ratio est, ut in demonstrandis thesibus receptis ad ea recurrendum nobis fuerit.

§. 850.

*Quomodo
mundus
sensibilis
conserve-
tur.*

Mundus sensibilis conservatur, si materia & vis motrix, seu natura rerum conservetur. Etenim quæ in mundo adspectabili, quem sensibilem esse constat, quatenus spectatur sub ea forma, qua in sensus incurrit (§. 202.), naturaliter fiunt; eorum sufficiens ratio in essentia & natura corporum continetur (§. 509. *Cosmol.*). Quamobrem cum essentia corporum in modo, quo partes tales, non aliz inter se junguntur (§. 140. *Cosmol.*), natura autem in vi activa sive motrice consistat (§. 145. *Cosmol.*); posita materia & vi motrice ponitur mundus sensibilis (§. 118. *Ontol.*). Quoniam itaque per conservationem enti datur, ut existere pergat, ubi existere cœpit (§. 842.); mundus sensibilis conservatur, si materia & vis motrix, sive natura rerum conservetur.

Poterat etiam ostendi hoc modo. Mundus hic adspectabilis conservatur, dum quod substantiale est in corporibus conservatur (§. 848.). Enimvero si mundus spectatur sub ea

for-

forma, quæ in sensus incurrit, consequenter ut sensibilis (§. 202.), vis activa sive motrix & materia instar substantiæ concipi debent (§. 168 169 300. *Cosmol.*). Mundus adeo sensibilis conservatur, si materia & vis motrix, seu natura conservetur.

Hanc propositionem addimus in eorum gratiam, qui elementa rerum materialium non agnoscunt, adeoque mundum intelligibilem prorsus ignorantes ultra sensibilem mentis aciem minime intendunt. Hi enim substantiale nihil agnoscunt nisi materiam & eodem jure, quo hanc pro substantia habent, vim quoque motricem in substantiarum numerum referre tenentur, nisi naturam ex mundo prorsus proscribere & potentiam Dei cum potentia naturæ confundere velint. Habet nimirum etiam usum suum in sequentibus, si intelligatur quousque extendenda sit actio conservatrix in conservatione mundi, si ultra phænomena non progrediaris, nec fontem ipsum rerum materialium attingas. Quæcunque in mundo adspectabili contingunt, sola materiæ modificatione peraguntur, & modificatio beneficio motus absolvitur. Quamobrem si a Deo materia conservetur atque vis motrix corporibus indita; natura generationes & corruptiones perficit.

§. 851.

Limites rerum nulla indigent conservatione divina, quemadmodum nec creatione. Etenim cum limes sit id, ultra quod nihil amplius in re concipere licet ad eandem pertinens (§. 468. *Ont.*); defectus est ulterioris realitatis in re limitata; adeoque in substantia limitata defectus ulterioris substantialitatis, veluti in materia, quæ instar substantiæ concipi debet (§. 168. *Cosmol.*), defectus ulterioris extensionis (§. 141. *Cosmol.*). Enimvero facile patet, si substantiæ limitatæ existentia conferratur, adeoque si eadem vel creetur (§. 766.), vel conservetur (§. 842.), per se adesse limites, veluti si materia seu extensum

limitatum (§. 141. *Cosmol.*), creetur vel conservetur, per se adesse figuram (§. 621. *Ontol.*). Limites adeo rerum nulla indigent conservatione divina, nulla creatione.

Poterat idem ostendi hoc modo. Res conservantur a Deo, dum quod substantiale est in corporibus conservatur (§. 848.). Enimvero eodem prorsus modo, quo evicimus, figuram esse accidens (§. 782. *Ontol.*), pater, limitem omnem non nisi accidens esse: id quod etiam sine probatione conceditur, quia limes inherere concipitur substantiæ limitatæ. Quamobrem cum accidentia substantiæ non sint (§. 768. *Ontol.*); nec peculiari indigent conservatione (§. 848.): consequenter cum conservatio non sit nisi continuata creatio (§. 845.); nec creatione opus habent.

In exemplis veritas propositionis præsentis adeo clare elucet, ut, qui vel ad unum animum advertit, eam percipiat sine ulla probatione. Limes ligni est figura ovalis mensæ. Quamdiu lignum conservatur, figura quoque subsistit, nec ulla conservatione indiget. Similiter figura rotarum subsistit in horologio, quamdiu integrum conservatur ferrum, ex quo constructæ sunt, nec opus est aliqua causa conservante figuram. Limites insunt per se substantiis rerum & positis iisdem ponuntur & ipsi, consequenter quamdiu substantia subsistit, subsistunt quoque limites ab ea in idea ejus inseparabiles. Cavendum vero ne quæ in composito apparent confundas cum iis, quæ revera insunt substantiis elementaribus, & ab illis adhæc promiscue argumenteris. Præcavebitur præcipitantia, ubi memor fueris theoriæ elementorum & ortus corporum ex iisdem, quæ in Cosmologia integris capitibus exposuimus.

§. 852.

Nature a- *Limites creaturarum mutabiles a natura mutantur.* *Ele-*
Etio quo sese *menta singula vi quadam prædita sunt (§. 196. Cosmol.), qua co-*
extendat. *rum status internus continuo mutatur (§. 197. Cosmol.).* *Quam-*
obrem cum mutatio omnis rei durantis in variatione modo-
rum

rum consistat (§. 703. *Ontol.*), adeoque modificatio sit (§. 704. *Ontol.*) & hinc nonnisi in variatione limitum terminetur (§. 830. *Ontol.*); elementis insita vi nonnisi limites variantur. Enimvero quia principium mutationum internum entis, adeoque vis, quæ eidem inest (§. 870. *Ontol.*), natura est (§. 145. *Cosmol.*); in elementis rerum limites variantur a natura eorundem.

Jam in elementis continentur rationes ultimæ eorum, quæ in rebus materialibus deprehenduntur (§. 191. *Cosmol.*), consequenter & mutationum, quæ in corporibus contingunt. Cum adeo in corporibus nulla ponatur mutatio, nisi positis aliis elementis rerum (§. 118. *Ontol.*), in his vero omnis mutatio fiat a natura eorundem *per demonstrata*; omnis quoque corporum mutatio a natura elementorum proficiscitur. Vis motrix, quæ naturam rerum mundi hujus adspectabilis absolvit (§. 506. *Cosmol.*), non est nisi vis elementorum confuse percepta (§. 110. *Psychol. ration.*), atque adeo a natura elementorum, quæ in vi ipsis insita consistit *per demonstrata*, minime differt. Mutationes igitur omnes, quæ corporibus accidunt, a natura fiunt. Omnis eorum mutatio, cum ad mutationem seu variationem limitum redeat, *per demonstrata*; a natura quoque in corporibus variari limites rerum materialium patet.

Idem etiam de corporibus independenter a theoria elementorum ostendi potest hoc modo. Mutatio omnis rei durantis, adeoque etiam corporum, in variatione modorum consistit (§. 703. *Ontol.*), cumque adeo modificatio sit (§. 704. *Ontol.*), variatione limitum tota absolvitur (§. 830. *Ontol.*). Enimvero in corporibus nulla accidere potest mutatio, nisi per motum (§. 128. *Cosmol.*). Limites adeo variantur in corporibus per motum, nec per eum aliud quid in iisdem efficitur nisi limitum variatio. Motus pendet a vi motrice (§. 137. *Cosmol.*) & hæc

& hæc natura corporum est (§. 145. *Cosmol.*), nec natura universa est nisi aggregatum omnium virium motricium, quæ corporibus in mundo coëxistentibus simul sumtis insunt (§. 507. *Cosmol.*). Limites adeo corporum a natura mutantur.

Quoniam animabus hominum similiter inest vis quædam, qua actuantur, quæ per facultates ejusdem in eadem possibilia intelliguntur (§. 55. *Pfychol. ration.*), & in vi ista natura animæ consistit, quatenus actuantur (§. 60. *Pfychol. ration.*); eodem, quo ante, modo evincitur, limites in anima variari a natura ejusdem.

Denique brutorum animæ sunt substantiæ simplices (§. 753. *Pfychol. ration.*), quarum status mutatur (§. 754. & seqq. *Pfychol. ration.*). Quamobrem cum substantiis ejus generis, quarum status mutatur, vis quædam insita sit (§. 776. *Ontol.*); animæ quoque brutorum vi quadam instructæ sunt, adeoque principium mutationum ipsis inest (§. 870. *Ontol.*). Principium istud internum cum sit natura entis (§. 145. *Cosmol.*); vis illa natura animæ est. Unde porro consequitur, ut ante, in animabus brutorum limites variari a natura.

Potest idem etiam ostendi hoc modo. Animæ brutorum sunt substantiæ simplices (§. 753. *Pfychol. ration.*), quarum status mutatur (§. 754. & seqq. *Pfychol. ration.*), consequenter finitæ (§. 835. *Ontol.*). Quamobrem cum omnis substantia finita contineat in se principium mutationum (§. 871. *Ontol.*), adeoque vim quandam (§. 870. *Ontol.*); inde porro consequitur, ut ante, in animabus brutorum limites variari a natura.

Elementa rerum materialium (§. 778.), corpora omnia in hoc mundo adspectabili (§. 779.), animæ humanæ (§. 781.) & brutorum sunt creaturæ Dei (§. 783. 777.). Quamobrem cum præter hæc entia non cognoscantur alia rationis lumine; in his autem omnibus limites mutantur a natura per demonstrata;

evidens omnino est limites creaturarum , quotquot earum cognoscimus, a natura variari.

Atque adeo jam patet; quid circa ea, quæ in rerum natura fiunt, Deo sit tribuendum, quid naturæ. Nimirum Deus conservat, quod substantiale est in corporibus, & per hoc ipsam quoque rerum naturam (§. 848.); natura autem variat limites substantiali inhærentes (§. *præf.*) & nulla conservatione, nulla creatione divina indigentes (§. 851.). Nimirum Deus omnipotentia sua existentiam largitur elementis vi activa instructis, vi vero elementorum, quæ omnipotentia divina indigent, ut subsistant, status elementorum continuo mutatur, sicque quoad nos resultant mundi sensibilis phænomena. Similiter Deus existentiam largitur animabus, quæ cessante actione ejus existere nequeunt; vi vero ipsa insita continuo variatur status illarum. Et sic liquido apparet, quomodo natura agat quod suum est, nec tamen agat sine Deo, nulla virium naturæ & omnipotentia divini confusione facta.

§. 853.

Quoniam quod substantiale est in corporibus, a Deo con-
servatur (§. 848.), nec in ortu corporum quicquam substan-
tiale produciunt (§. 833.) ac multo minus in modificationibus
eorundem (§. 832. *Ontol.*); natura vero non nisi limites ejus
quod substantiale est, mutat (§. 852.); *potentia naturæ non est
nisi potentia modificandi substantias (§. 703. Ontol.), seu potentia
modificatrix.*

Atque adeo apparet; quænam potentia naturæ superiora sunt, & quænam eandem minime excedunt. Nimirum quicquid fieri potest per modificationes substantialis existentis, id a natura fieri potest; quod vim aliam requirit, a natura proficisci nequit.

§. 854.

Natura rerum tantummodo accidentia ad actum perdu-
(*Wolfii Theol. Naturalis.*) *Quænam
Kkk kk cere natura est.*

*ficere va-
leat.*

cere & conservare, nihil vero ad actum ejus, quod substantiale est, conferre valet. Etenim naturæ non competit nisi potentia modificatrix (§. 853.). Quamobrem cum modificatio in variatione modorum consistat (§. 704. *Ontol.*), modi vero accidentia sint (§. 779. *Ontol.*); a natura tantummodo accidentia ad actum perducuntur, consequenter cum conservatione enti detur, ut existere pergat (§. 842.), in actu conservari possunt. *Quod erat primum.*

Quoniam itaque substantia accidens non est (§. 768. Ont.) natura nihil ad actum ejus, quod substantiale est, conferre potest. Quod erat secundum.

Posterius etiam ostenditur hoc modo. Cum in corporibus nihil sit substantiale præter entia simplicia (§. 177. *Cosmol.*), rerum materialium elementa (§. 182. *Cosmol.*); ad actum ejus, quod substantiale est, nil conferri potest, nisi quatenus efficitur, vel ut elementum, quod antea non existebat, existere incipiat, vel ut existere pergat. Enimvero enti simplici nondum existenti dari nequit, ut existat, nisi ubi ex nihilo producitur (§. 691. *Ontol.*), consequenter creatur (§. 697. *Psybol. ration.*), & cum conservatione detur, ut existere pergat, quod coepit (§. 842.), conservatio vero continuata creatio fit (§. 845.), nec enti simplici dari potest, ut existere pergat, nisi eadem actione, qua creatur. Quoniam itaque naturæ nulla competit potentia creatrix (§. 775.), nec conservatrix, quæ continuata creatione sese exerit (§. 846.); natura quoque ad actum ejus, quod substantiale est, nihil prorsus conferre valet.

Ceterum hinc intelligitur, quo sensu accipiendum sit, quando affirmatur, Deum creaturæ non posse communicare, ut conservet seipsam; posse tamen communicare, ut conservet aliam. Etenim si creaturæ denegatur potentia conservatrix sui ipsius, veluti homini, id inprimis accipiat de ea actione, qua quid confertur ad substantialis actum: ubi ve-

ro ipsi tribuitur potentia conservatrix corporis, id intelligitur de ea actione, qua quid confertur ad accidentium actum. Sed ut hæc clarius intelligantur, de ortu & conservatione corporum adhuc nonnulla nobis annotanda sunt.

§. 855.

Quoniam natura tantummodo accidentia producere & *Qualis sit* conservare valet. (§. 854.); *potentia naturæ non est nisi pro-* *potentia* *ductrix & conservatrix accidentium, consequenter sola divina naturæ.* *est productrix & conservatrix substantiarum.*

Notandum hic obiter, potentiam conservatricem, quatenus a nobis accipitur, proprie denotare eam, qua conservantur substantiæ. Unde eandem soli Deo vindicavimus & naturæ simpliciter denegavimus (§. 846.). Dicitur ea a Scholasticis *potentia conservatrix directa*. Quemadmodum vero communiter, vel Grammatica teste, accidentia per modum substantiæ consideramus, fictione non inutili non modo in communi sermone, verum etiam in scientiis; ita quoque quoad conservationem per modum substantiarum spectari possunt, & hinc dici potest quædam conservari a natura, quatenus nimirum non conservantur nisi accidentia. Et hæc *potentia conservatrix* a Scholasticis dicitur *indirecta*, quoad Deum, quatenus nimirum Deus utitur causis secundis ad conservationem accidentium. Sed hæc omnia clariora evadent ex sequentibus.

§. 856.

Quoniam nonnisi mera accidentia oriuntur, si quod cor- *Cur natu-* *pus novum ex aliis præexistentibus oritur; nec nisi accidentia* *re potentia* *intereunt, si interit (§. 126. Cosmol.); a natura rerum acci-* *corpora o-* *dentia ad actum perducere & conservari possunt (§. 854.), adeo-* *riantur &* *que potentia naturæ corporibus ex aliis præexistentibus producen-* *conserven-* *dis & productis conservandis sufficit.* *tur.*

Atque adeo patet a priori, cur natura corpus nullum creare

possit, corpora tamen generare valeat: cur rebus conservandis non sufficiat, corpora tamen, quorum substantialitas ab ipsa prorsus independens, qua talia conservare possit. Ita naturæ potentia generatur ex semine arbor & eadem quoque conservatur ac vegetatur, etsi eandem, nullo semine præexistente, & absque materia in vegetationem seminis influente, ad actum perducere non possit, nec sine pabulo conveniente ejus incrementum procurare valeat. Similiter patet, cur naturæ potentia intereant corpora, quamvis ea nihil annihilare valeat. Ita patet cur arbor possit mori & lignum, ex quo constat, corrumpi, non alia vi requisita nisi ea, quæ naturæ est: quemadmodum in Physicis exponitur disertius.

§. 857.

*Anima-
rum hu-
manarum
conserva-
tio.*

Animæ humanæ non possunt conservari a natura, sed a solo Deo conservantur. Etenim anima hominis substantia simplex est (§. 48. *Psychol. ration.*), per essentiam & naturam suam incorruptibilis (§. 729. *Psychol. ration.*), quæ interire nequit nisi per annihilationem (§. 732. *Psychol. ration.*). Quoniam itaque natura rerum tantummodo accidentia conservare, nihil vero ad actum ejus, quod substantiale est, conferre valet (§. 854.); natura quoque rerum animam conservare nequit.

Enimvero creatura nulla quoque se ipsam conservare valet, sed a Deo conservetur necesse est (§. 843.). Quamobrem cum anima humana sit creatura Dei (§. 781.), quæ nonnisi per creationem oriri potest (§. 698. *Psychol. ration.*); evidens est, eandem etiam non aliter conservari posse nisi a Deo, continuo creationis actu (§. 845.)

Cessat nimirum in anima ratio conservationis, quæ locum habet in conservatione corporum. Etenim ut corpora conserventur seu existere pergant (§. 842.), nonnisi accidentia conservanda sunt, cum eorum essentia tanquam entium compositorum (§. 119. *Cosmol.*) meris accidentibus constet (§. 789. *Ontol.*). Enimvero si anima conservari debet, quæ substan-

tia simplex est (§. 48. *Psychol. ration.*), substantia conservanda. Corporum conservatio, quæ fit naturæ vi, supponit conservationem substantialitatis; sed conservatio animæ est ipsa substantialitatis conservatio.

§. 858.

Animæ brutorum non possunt conservari a natura, sed a Conserva- solo Deo conservantur. Sunt enim substantiæ simplices (§. 753. *Psychol. ration.*), in se incorruptibiles (§. 769. *Psychol. ration.*), rum bru- quæ interire nequeunt nisi per annihilationem (§. 768. *Psychol. ration.*). Enimvero natura rerum tantummodo accidentia conservare, nihil vero ad actualitatem ejus, quod substantiale est, conferre valet (§. 854.). Quamobrem natura nil quicquam ad conservationem animarum brutorum conferre, adeoque multo minus eas vi sua conservare potest.

Constat vero creaturam nullam conservare posse semetipsam, sed necesse esse ut conservetur a Deo (§. 843.). Quamobrem cum animæ brutorum sint creaturæ Dei (§. 783. 777.), quæ non oriri possunt nisi per creationem (§. 768. *Psych. ration.*); patet omnino easdem etiam aliter conservari non posse, quam a Deo, continuato creationis actu (§. 845.).

Quæ ad præcedentem propositionem annotavimus, ea quoque ad præsentem repetenda sunt.

§. 859.

Si conservatio divina cesset, creaturæ annihilantur. Quo- Quomodo- niam enim per conservationem enti datur, ut existere pergat quid anni- (§. 842.), quemadmodum per creationem, ut existere incipiat, biletur. nullo alio præexistente, quod in actualitatem ejus quomodo- cunque influere poterat (§. 697. *Psychol. ration.* & §. 540. *Ont.*), actione creationis & conservationis quoad Deum non differen- te (§. 844.); siquidem conservatio divina cessare ponatur, crea-
tura

tura amplius existere nequit, & dum existere definit, nihil ejus actu superest. Quoniam adeo annihilatur, si, quod existit, ita existere definit, ut nihil ejus amplius actu super sit (§. 540. *Ontol.*); cessante conservatione divina creaturæ annihilentur necesse est.

Patet adeo modus, quo quid annihilari possit.

§. 860.

*Cur anni-
hilatio a
actionem
positivam
non requi-
rat.*

Quoniam creatura annihilatur, cessante conservatione divina (§. 859.), adeoque tantummodo requiritur, ut actio aliqua cesseret; ad annihilationem nullam requiri actionem positivam, sed tantummodo actionis omissionem patet.

Quod si a Deo creaturæ dari posset, ut semetipsam conservaret, seu cessante actione divina existere pergeret; positiva quadam opus esset actione ad ejus annihilationem, quemadmodum horologium, quod construxit artifex, ab eodem destrui nequit nisi actione quadam positiva, propterea quod ad sui conservationem nulla artificis actione opus habet, sed cessante ejus actione, qua idem construxit, existere pergit.

§. 861.

*Cur anni-
hilatio soli
Deo possi-
bilis.*

*Solus Deus aliquid annihilare potest; natura nihil anni-
hilare valet.* Ut enim quid annihiletur, non opus est actione quadam positiva, sed tantummodo cessatione actionis (§. 860.), nempe conservationis divinæ (§. 859.). Quoniam itaque hæc potentia conservatrix soli Deo propria est, nec naturæ rerum competere potest (§. 846.); ideo quoque actio conservatrix cessare nequit, nisi voluntate Dei, consequenter non nisi Deus quidpiam annihilare valet, nec naturæ vis annihilandi, qualis nulla datur, competere potest.

Qui creaturæ a Deo dari posse opinantur, ut cessante actione divina existere pergat, ad annihilationem actionem
quar-

quandam positivam requirere tenentur (*not. §. 860.*), consequenter & peculiarem potentiam annihilandi statuere debent, quæ a potentia creatrice differt. Tum vero non adeo in propatulo est, cur potentia annihilandi sit Deo soli propria, nec creaturæ ulli communicari possit. Concessum tamen semper ab omnibus naturæ vi nihil annihilari posse, experientiæ fide, quod istiusmodi quid nunquam fuerit observatum.

§. 862.

Quoniam Deus facere potest, quicquid vult (§. 352.), & *Cur ab ejus*
mundum liberrime creaverit (§. 431.); *a voluntate divina unice voluntate*
pendet, num quid annihilare velit. *dependeat.*

De hac voluntate cum nullum per hanc rerum seriem nobis præbuerit indicium, nec ex attributis divinis a priori colligi possit, num quid annihilare velit; ex lumine rationis demonstrari nequit, num Deus quidpiam annihilaturus sit, quod creavit. Qui defendunt, Deum nihil eorum, quæ creavit, annihilaturum; vel argumenta petunt ex Scriptura sacra quæ non sunt hujus fori; vel rationes probabiles afferunt, quæ jam in medio relinquimus. Sufficit itaque hic evicisse, a liberrima Dei voluntate pendere, utrum quid annihilare velit, nec ne.

§. 863.

Mundus adspectabilis a Deo annihilari potest. Etenim *Mundus*
creatura omnis, consequenter & totus mundus hic adspectabi- *quomodo*
lis (§. 778.), a Deo conservatur (§. 843.). Quamobrem cum *inserire*
creaturæ annihilentur cessante conservatione divina (§. 859.); *possit.*
totus quoque hic mundus adspectabilis annihilabitur, si Deus
eundem conservare cesset. Quoniam vero mundum produ-
cere liberrime decrevit (§. 506.); ita & liberrime eundem fecit
& conservat (§. 525.). Quare cum a voluntate ipsius liber-
rima pendeat, utrum eundem conservare velit, nec ne; *quin*
actio

actio conservatrix cessare possit, dubitari haud quaquam potest. Patet itaque Deum mundum hunc adspectabilem annihilare posse.

Annihilatio mundi non confundenda est cum interitu, quæ in transformatione consistit, ut aliam sui exhibeat faciem. Quodsi enim ponas eum in aliam faciem transformari; idem fiet salvis rerum elementis, eo modo, quo corpora intereunt & per transformationem prodeunt alia. Utrum istiusmodi transformatio totius mundi sit possibilis nec ne, salvis nempe rerum elementis, consequenter salva tota mundi substantia (§. 177. *Cosmol.*); ego non definio.

§. 864.

An mundus per se in nihilum recidere possit. Ipsa natura mundum annihilare nequit, nec mundus vi propria tandem in nihilum recidere potest. Etenim natura nihil annihilare valet, sed solus Deus aliquid annihilare potest (§. 861.). Quamobrem nec natura ipsa mundum annihilare potest, nec mundus vi propria sensim sensimque tandem in nihilum recidere potest.

§. 865.

An animæ seipsas annihilare possint. Animæ hominum atque brutorum seipsas annihilare nequeunt. Etenim solus Deus aliquid annihilare potest (§. 861.), consequenter animæ hominum atque brutorum nihil annihilare possunt. Quamobrem eadem nec seipsas annihilare valent.

§. 866.

Animæ interitus in ipsius potestate non est. Quoniam anima interire nequit nisi per annihilationem (§. 732. *Psychol. ration.*), seipsam vero annihilare minime valet (§. 865.); anima efficere nequit, ut ipsamet intereat, aut semetipsam destruere non potest.

Hæc propositio probe tenenda est, cum maximi sit momenti in philosophia practica. Potest homo violentas sibi infer.

inferre manus & hoc modo destruere corpus; sed animæ interitum non æque in potestate sua habet.

§. 867.

Annihilatio miraculum est. Etenim annihilatio vim naturæ universæ excedit, utpote nihil prorsus annihilare valentis (§. 861.). Jam vero quod vim naturæ universæ excedit miraculum est (§. 523. *Cosmol.*). Est igitur annihilatio miraculum. *Annihilatio cur sit miraculum.*

Cum constet Deum aliquid (§. 861.) & ipsum mundum ad spectabilem annihilare posse (§. 863.); hoc etiam modo patet, Deum miracula facere posse. Est autem annihilatio miraculum negativum, non positivum, quia non requirit peculiarem quandam actionem, sed tantummodo actionis cessationem (§. 860.).

§. 868.

Conservatio divina miraculum est. Creatio enim mundi miraculum est (§. 768.). Enimvero conservatio non est nisi creatio continuata (§. 845.). Ergo & conservatio divina miraculum est. *Conservatio totius mundi miraculum est.*

Mundus quemadmodum per miraculum cæpit, ita per miraculum quoque conservatur, etsi in eodem continuo oriantur & intereant corpora naturaliter & corpora etiam conserventur qua talia naturaliter citra miraculum. Nimirum quod a Deo provenit immediate, conservatio nempe ejus, quod in mundo substantiale est, miraculum est; quod vero naturæ debetur, nimirum quod continua materię modificatione oritur & conservatur, naturale est. Magnum adeo istud miraculum, cui mundus ortum suum debet, hodiernum subsistit & subsistet, quamdiu aliquis erit mundus, immo aliqua præter Deum existet creatura.

§. 869.

Sine conservatione divina natura rerum nihil agere potest. Necessitas
(Wolffii Theol. Naturalis) LII II *Quo- conserva-*

tionis divi- Quoniam potentia naturæ non est nisi productrix & conserva-
ne ad actio- trix accidentium (§. 855.), accidentia vero sine substantiis exi-
nes natura. stere nequeunt (§. 791. *Ontol.*); natura agere nequit nisi substan-
 tiis existentibus. Quamobrem cum Deus substantiale in cor-
 poribus conservet (§. 848.), potentia sibi propria (§. 846.); na-
 tura rerum nihil agere potest sine conservatione naturæ.

Nimirum natura se habet ad substantiale, quod in corpori-
 bus est, non absimili prorsus modo, quo se habet artifex ad
 materiam, quam ipse nec producere, nec conservare valet.
 Quemadmodum enim artifex agere nequit materiam modifi-
 cando, nisi aliena virtute producat & conservetur, aut si
 mavis, nisi adsit materia, quam modificare valet; ita nec natura
 accidentium mutatione producere valet corpora & producta
 conservare atque porro modificare, nisi Deus producat &
 conservet, quod substantiale est. Dixi aliquali similitudini
 hic esse locum; non omnimodæ. Neque enim diffitemur, si
 ad fontem ejus, quod apparet seu sensu percipitur, substanti-
 as nempe simplices, rerum materialium elementa, recurritur,
 aliquam deprehendi diversitatem. Sed quibus eam perspicere
 datum est, illi hac illustratione opus minime habent.

§. 870.

*Necessitas
 conserva-
 tionis divi-
 ne ad actio-
 nes creatu-
 rarum.*

*Nulla creatura sine conservatione divina quicquam agere
 valet.* Etenim si conservatio divina cesset, creaturæ omnes
 annihilantur (§. 859.). Quamobrem cum id, quod annihilatur,
 ita existere desinat, ut nihil ejus amplius actu superfit, quod anni-
 hilatur (§. 540. *Ontol.*); creatura quæcunque cessante conserva-
 tione divina existere desinit, nec quicquam ejus amplius actu
 superest. Quoniam itaque per se patet, quod non existit, id
 nec agere posse; nulla creatura sine conservatione divina agere
 quicquam valet.

Poterat hæc demonstratio etiam applicari ad propositio-
 nem præcedentem. Constat enim elementa rerum materia-

lium

lium esse creaturas Dei (§. 778.) nec mundum hunc adspicibilem, nec naturam rerum ejusque ordinem subsistere posse, nisi conservatis elementis (§. 847.). Quamobrem si cesset conservatio divina, nulla amplius existit materia, quam modificare valet natura (§. 853.); nulla existit natura, quæ materiam modificare potest. Unde patet, absque conservatione divina nullam posse concipi naturæ actionem, consequenter conservationem divinam ad naturæ actiones absolute necessariam esse.

§. 871.

Quoniam animæ nostræ (§. 781.), nec non animæ brutorum sunt creaturæ Dei (§. 783. 777.); immo quia totus homo quæ ejusdem animæ & corpus creatura Dei est (§. 782.); Neque actiones animæ humane, neque animæ brutorum agere possunt, nec totus animarum. homo quicquam agere valet sine conservatione divina.

§. 872.

Ens unum dicitur concurrere ad actionem entis alterius, quatenus in actione ipsius continetur aliquid rationis, cur agat alterum. *Ens unum*

Ita ad homicidium concurrit, qui illud suadet vel jubet: *concurrat* etsi enim suasio vel jussio non contineat homicidii rationem *ad actionem* sufficientem, continet tamen aliquid rationis, ac ideo ab homicida quæsito, cur hoc fecerit, allegatur. Similiter qui dat artificem materiam operis faciendi, ad opus concurrit. Et qui ex marsupio nummos extractos inscius perdit, ad eorum inventionem concurrat.

§. 873.

Concursus alicui ad actionem alterius est actio, quæ in se continet aliquid rationis, cur agens agat, vel egerit. *Concursus quid sit.* Quamobrem cum per rationem intelligatur, cur quid potius sit, quam non sit (§. 56. Ontol.); per concursum ex parte intelligitur, cur agens agat, vel egerit.

Ita concursus ejus, qui homicidium suadet, ad homicidium in ipsa suasionem consistit, & per hanc intelligitur, cur ipsum perpetraverit homicida, alius forsan non perpetraturus, aut saltem non adeo prompte perpetraturus. Similiter concursus ejus, qui dat aurifabro aurum & gemmas ad faciendum anulum, ad anulum in ipsa datione auri atque gemmarum consistit, ac ex eadem intelligitur, cur ex hoc auro atque hisce gemmis ab auri fabro hoc tempore factus fuerit annulus. Concursus denique ejus, qui ex marsupio extractos nummos in seius perdit, ad eorum inventionem in ipsa extractione consistit, ac ex eadem intelligitur, cur hosce nummos invenire potuerit alter. Ut adeo intelligatur, qualis sit concursus unius ad actionem alterius, & quantum is ad eandem concurrat, probe dispiciendum, quid ad actionem alterius intelligendam faciat actio concurrentis. Neque hoc sua caret utilitate, ubi agitur de imputatione actionis alienæ, quemadmodum clarius constabit in Moralibus: immo usus est, ut satis circumspecti simus, ne alterius actio mala nobis imputari possit.

§. 874

*Concursus
Dei ad
actionem
naturæ &
creatura-
rum.*

Deus ad singulas actiones naturæ, & singulas creaturarum actiones, immo actiones animarum tam hominum, quam brutorum, & quascunque hominum actiones per conservationem concurrit. Etenim sine conservatione divina natura rerum nihil agere potest (§. 869.), nec creatura ulla (§. 870.), neque animæ sive hominum, sive brutorum, neque homo integer qua animam atque corpus, quicquam agere valent (§. 871.). Quoniam adeo sine conservatione divina intelligi nequit, cur natura, vel creatura ulla, in specie animæ hominum & brutorum, & homo integer qua animam ac corpus agant, in conservatione divina quin contineatur aliquid rationis, cur natura & creatura quælibet, ipsæ animæ hominum atque brutorum, immo hinc integer homo agat, dubitari haud qua-

quaquam potest (§. 56. *Ontol.*). Enimvero ens unum concurrat ad actionem entis alterius, quatenus in actione ipsius continetur quidpiam rationis, cur agat alterum (§. 872.). Deus itaque concurrat ad singulas naturæ & singulas creaturarum actiones, immo ad actiones animarum tam hominum, quam brutorum & quascunque hominum actiones per conservationem.

Concursus hic divinus ad singulas creaturarum actiones adeo manifestus est, ut in dubium revocari non possit nisi ab eo, qui vel conservationem divinam ignorat, vel concursus notione distincta destituitur. Quamobrem ne quid circa eum dubii remaneret, nostrum fuit notionem concursus exemplis obviis illustrare, ut clarius percipiatur. Maximi autem momenti est concursum divinum ad creaturarum actiones non modo agnoscere, verum etiam intimius perspicere, quemadmodum ex sequentibus elucescet.

§. 875.

Quoniam Deus per conservationem concurrat ad singulas creaturæ cujuslibet actiones (§. 874.); concursus Dei per conservationem universalis est.

Universalitas concursus divini.

§. 876.

Deus in concursu universali conservat substantiam agentis & largitur vires agendi. Etenim concursus universalis fit per conservationem creaturarum (§. 875.). Enimvero quod substantiale est in corporibus, conservat Deus (§. 848.) & animæ humanæ, substantiæ simplices (§. 48. *Psychol. ration.*), ab eodem conservantur (§. 857.), nec non brutorum animæ (§. 858.), substantiæ itidem simplices (§. 753. *Psychol. ration.*). In concursu adeo universali Deus conservat substantiam agentis. Quod erat unum.

Jam substantiale, quod datur in corporibus, sunt elementa

eorundem (§. 177. 182. *Cosmol.*) quæ singula vi agendi prædita (§. 196. *Cosmol.*), unde vis activa corporum resultat (§. 180. *Cosmol.*). Quoniam itaque Deus conservat corpora quatenus indefinenter istis elementis actualitatem seu existentiam largitur (§. 847.); evidens est, ipsum in concursu universali corporibus largiri vires agendi.

Porro anima humana vi agendi prædita est, unde omnes ejus actiones proficiscuntur (§. 53. 60. *Psychol. ration.*), nec sine istiusmodi vi brutorum animæ, substantiæ simplices (§. 753. *Psychol. ration.*) mutabiles (§. 754. *Psychol. ration.*), concipi possunt (§. 776. *Ontol.*). Quamobrem cum Deus animas humanas (§. 857.) & brutorum conservet (§. 858.); patet denuo Deum animabus quoque tam hominum, quam brutorum in concursu universali largiri vires agendi.

Quoniam itaque præter corpora & elementa, per quæ aggregantur, atque animas hominum & brutorum nulla nobis naturali lumine innotescunt agentis, hisce vero singulis Deus in concursu universali largitur vires agendi *per demonstrata*; liquet omnino, in concursu universali Deum agenti largiri vires agendi. *Quod erat alterum.*

Atque adeo patet, quid sibi velint Theologi ac philosophi affirmantes Deum naturam agentis in agendo sustentare. Etenim per naturam non intelligunt, nisi vires agendi, quæ creaturis insunt. Sustentat vero Deus agens, quatenus eadem existentiam largitur, adeoque substantiam conservat, ut agere possit. Ast in agendo sustentat, quatenus conservat cum vi agendi. Enimvero cum plurimum intersit, ut rite intelligatur, quomodo Deus vires agendi largiatur, in concursu præsertim ad actiones malas, ne quid eidem tribuatur culpæ; lubet modum largiendi vires agendi distincte explicare.

§. 877.

*Quomodo
Deus lar-*

*Deus agenti in concursu universali tribuit agendi vires;
qua-*

quatenus actum indefinenter impertitur substantiis absque viribus istis existere minime valentibus. Vis, quæ animæ humanæ unica inest (§. 57. *Psychol. ration.*), ipsi essentialis (§. 66. *Psychol. ration.*). Et cum brutorum animæ non minus sint substantiæ simplices (§. 753. *Psychol. ration.*), quæ quoad facultates inferiores cum animabus humanis conveniunt (§. 754. & seqq. *Psychol. ration.*); idem de ipsis quoque intelligitur. Cumque vis illa, quæ prædita sunt elementa rerum materialium (§. 196. *Cosmol.*) & unde vis activa corporum resultat (§. 180. *Cosmol.*), sit primum, quod de ipsis concipi potest, & unde cetera deducuntur, quæ de iisdem cognoscuntur (§. 197. & seqq. *Cosmol.*); quin ipsis quoque sit essentialis dubio caret (§. 168. *Ontol.*). Quamobrem cum essentia rerum sint immutabiles (§. 300. *Ontol.*), nec Deus animas hominum atque brutorum & elementa rerum materialium absque istis viribus ad actum perducere potest. Quoniam itaque Deus in concursu universali, utpote qui fit per agentis conservationem (§. 875.), agenti dat, ut existere pergat (§. 842.); vires eidem aliter non tribuit, nisi quatenus indefinenter impertitur actum substantiæ absque vi ista existere minime valenti.

giatur in
concursu
universali
vires agen-
di.

Propositio hæc probe perpendenda ob rationes paulo ante (not. §. 876.) adductas. Nimirum Deus conservat substantias simplices, elementa rerum materialium (§. 847.), & animas tam hominum (§. 857.), quam brutorum (§. 858.), continuato creationis actu (§. 845.) impertiendo ipsis existentiam (§. 842.), quam in prima rerum creatione iisdem dare cæpit (§. 766.). Elementis (§. 196. *Cosmol.*) & animabus (§. 53. *Psychol. ration.*) inest vis activa, qua continuo modificantur. Atque ita agunt vi sibi propria, nec minus natura universa cum vi motrice omnium corporum ex elementorum viribus resultante (§. 180. *Cosmol.*) eadem (§. 507. *Cosmol.*) vi sibi propria agit, suntque singulorum agentium actiones ipsis propriæ, utut vires eorundem non subsistant nisi per omnipotentiam Dei agentis.

Pro-

Produxit Deus in prima creatione & in hunc usque diem conservat, ac in posterum conservabit entia, quæ, ubi existunt, per se agere possunt & agunt, etiamsi non agant cessante actione divina. Actioni debetur divinæ, quod entia per se agere valentia existant, sed ipsorum actionibus acceptum referendum, quod modificentur & per eorum modificationes oriantur atque intereant corpora in mundo sensibili. Hæc qui rite perpendit, quæ Dei sunt & creaturarum, optime discernit citra ullam confusionem, & manifestam differentiam inter naturam atque Deum perspiciet, illiusque ab hoc continuam in agendo dependentiam agnoscat.

§. 878.

*Specificatio
actionum
creatura-
rum unde-
nam sit.*

Specificatio actionum a creaturis est. Actiones sunt quædam status agentis mutatio (§. 713. *Ontol.*). Quamobrem cum eorum, quæ præter essentiam enti cuidam insunt vel inesse possunt, in essentia ejus contineatur ratio (§. 167. *Ontol.*) ; per rationem vero intelligatur, cur quid potius sit, quam non sit (§. 56. *Ontol.*) ; per essentiam quoque agentis intelligitur, cur tales sint ipsius actiones, adeoque tales sunt agentis actiones, quia hæc ipsi essentia est. Specificantur adeo actiones creaturarum per essentiam earundem, consequenter actionum specificatio a creatura est.

Inde sane est, quod actionem explicaturi, qualis sit, & rationem reddituri, cur talis sit, ad essentielles determinationes confugiamus, & quod per eas explicari intelligibili modo possit, non attento concursu divino. Exemplo res manifesta. Homo movet brachium. Quodsi intelligere volueris, cur hoc modo brachium movere possit ; ex structura ejusdem redditur ratio. Structura brachii est essentia ejusdem (§. 276. *Coimol.*). Redditur adeo ratio ex essentia brachii, cur istiusmodi sit motus. Per eam intelligitur possibilis, etiamsi actu hoc modo non moveatur brachium. Concurrit Deus ad motum brachii, tum quatenus sine ejus actione non conservatur brachium hoc modo mobile, tum quatenus homini lar-
gitur

gitur vires, quibus motus brachii per essentiam possibilis ad actum perducitur. Perducitur autem ad actum viribus homini propriis & specificatur seu talis fit per essentiam brachii. Homo adeo movet brachium per naturam suam, & movet hoc modo per essentiam suam, sed movere non posset, nisi Deus substantiam ejus conservaret & vires agendi largiretur, hoc est, nisi ipsi daret, ut brachium movere posset.

§. 879.

Creaturae in agendo dependent a Deo. Etenim nulla creatura *Dependen-* agere quicquam potest sine concursu divino (§. 870. 872.), *tia creati-* non modo substantiam agentis conservat, verum etiam vires *raam in* agendi impertitur (§. 876.). Quamobrem cur agat penitus *in agendo a* telligi nequit, nisi per concursum divinum, Dei actionem (§. *Deo.* 873.). Quoniam itaque id ratio est, per quod intelligitur, cur quid potius sit, quam non sit (§. 56. *Ontol.*); in Deo continetur ratio, cur creatura agat. Quoniam itaque ens unum ab altero dependet, quatenus ejus, quod ipsi inexistit, ratio in altero continetur (§. 851. *Ontol.*); creatura quaelibet a Deo in agendo dependet.

Ut dependentia creaturae a Deo in agendo rite intelligatur, nec ad ea trahatur, quae ad eandem minime spectant; probe perpendendum est, quomodo ea demonstretur: demonstratio enim distinctam hujus dependentiae notionem animo insinuat. Nimirum dependentia creaturae a Deo in agendo tota est a concursu divino. Quamobrem cum in anterioribus eundem satis distincte explicaverimus, nihil quoque obscuri circa dependentiam creaturarum a Deo in agendo superesse amplius potest. Nobis enim jam negotium est cum dependentia universali, quae creaturis omnibus communis est. Patebit autem ex sequentibus hominem in agendo moraliter quoque dependere: sed ea dependentia suo loco explicanda non est hujus loci.

§. 880.

*Dependen-
tia hominis
in agendo
a Deo.*

Quoniam homo est creatura Dei (§. 782.); creaturæ autem omnes in agendo a Deo dependent (§. 879.): *homo etiam a Deo in agendo dependet. Et eodem modo etiam patet, quod anima in volendo quoque a Deo dependeat (§. 781.).*

Quando de actionibus hominum hic nobis sermo est, has intelligimus, quæ ab anima atque corpore simul profisciscuntur, & ideo *humanæ* appellari solent, liberæ autem, quatenus, a libertate voluntatis pendent. Vi igitur corollarii præsentis homo in agendo a Deo etiam dependet, quando libere agit. Quod autem hæc dependentia minime obstat, quo minus libere agat, nec libertatem ullo modo lædat, mox disertius docebimus, et si acutiores per se vi anteriorum idem perspicere jam valeant.

§. 881.

*Dependen-
tia actio-
nis crea-
turarum a
Deo qualis
sit.*

Actiones creaturarum a Deo dependent qua actiones, hoc est, in genere spectatæ; non vero qua tales seu in specie consideratæ. Etenim Deus in concursu universali conservat substantiam agentem & vires agendi largitur (§. 876.), quatenus indefinenter impertitur actum substantiæ absque viribus istis existere minime valenti (§. 877.). Atque adeo per concursum divinum intelligitur, cur existat creatura, quæ agere potest, consequenter actionis qua actionis seu in genere spectatæ ratio in Deo continetur (§. 56. Ontol.), & hinc actio qua actio seu in genere spectata a Deo dependet (§. 851. Ontol.). Quod erat primum.

Enimvero specificatio actionum a creatura est (§. 878.), atque adeo per ea, quæ creaturæ agenti insunt, intelligitur, cur talem jam potius edat actionem, quam aliam, non vero per ea, quæ insunt Deo. Quoniam itaque ratio, cur talis sit actio creaturæ, in Deo non continetur (§. 56. Ontol.); nec actio
qua

qua talis, hoc est, in specie spectata a Deo dependet (§. 851. *Ont.*).
Quod erat alterum.

Quod si actio qua talis, seu in specie spectata a Deo dependeret, ratio aliqua ejus in Deo containeretur, cur talis potius sit, quam alia (§. 851. *Ontol.*), adeoque intelligi penitus non posset, cur talis sit, nisi per ea, quæ Deo insunt (§. 56. *Ontol.*). Enimvero vel Physica loquitur, nos actiones creaturarum intelligibili modo explicare posse per ea, quæ rebus insunt, non recurrendo ad attributa divina. Et idem quoque de actionibus humanis qua animam elucescet ex philosophia morali: immodè actionibus animæ jam pater ex Psychologia rationali. Cavendum vero, ne propositionem præsentem male interprete- ris, quasi actio quælibet in singulari spectata a Deo independens dicatur. Etenim vi principiorum anteriorum nulla datur creaturæ actio in singulari, quæ non dependeat a Deo, siquidem is concurrat per conservationem ad quamlibet in singulari, cum quolibet momento & substantiam agentem conservet, & vires agendi largiatur, ita ut sine concursu di- vino actio illa perpetrari minime posset (§. 876.). Sed qua- tenus actio ista in singulari talis est, rationem sui agnoscit non in Deo, sed in creatura (§. 878.). Unde actio quælibet in singulari, qua actio, seu in genere spectata a Deo depen- det; non vero qua talis, seu in specie considerata. Absit vero, ut quis sibi persuadeat, distinctionem inter actionem in genere & in specie spectatam esse inanem. Nisi enim eam probe perspectam habueris, nullo modo intelligi potest, quo- modo homo agat dependenter a Deo & tamen agat libere, & quomodo non obstante dependentia a Deo actiones tamen sint creaturarum propriæ & agentibus liberis imputari, a Deo autem omnis culpa removeri possit. Ubi vero eandem inti- me perspexeris, omnis in argumento hoc intricato protinus evanescet obscuritas, nec ulli amplius difficultati relinquetur locus, quæ alias insuperabilis apparet.

§. 882.

*Dependen-
tia actio-
num huma-
narum &
volitionum
a Deo.*

Quoniam homo est creatura Dei (§. 782.) , ipsa etiam anima ejusdem (§. 781.) ; actiones quoque singulae hominis qua actiones, seu in genere spectatae, non autem quae tales, seu in specie consideratae a Deo dependent, & in specie singulae etiam volitiones quae volitiones, seu in genere spectatae a Deo dependent, non autem quae tales, seu quatenus tendunt ad hoc objectum, non ad aliud.

E. gr. ponamus hominem injurias sibi illatas vindicaturum velle necem inimici. Quod velit a Deo est : nisi enim Deus actualitatem impertiretur & vim activam largiretur, fieri non posset ut vellet, propterea quod cessante actione divina, quae actualitatem & vim activam adipiscitur, in nihilum recideret (§. 859.). Enimvero quod haec volitio dirigatur in necem inimici, id homini tribuendum, non Deo. Volitio itaque in genere spectata, quatenus scilicet est actus quidam volendi, a Deo dependet ; sed quatenus ea dirigatur in necem inimici, adeoque specificè considerata, a Deo minime dependet. Ipsum hoc exemplum illustrat, quae ad propositionem praecedentem de utilitate distinctionis actionum in genere & in specie spectatarum annotavimus. Nec inutile est, si quis ad plura exempla animum advertit, ut applicatione evadat lucidior & familiarior. Utemur propositione praesente deinceps tanquam principio in demonstrandis aliis, atque adeo consultum duximus eam sub praecedente, sub qua continetur, subsumi.

§. 883.

*Concurfus
Dei ad
actiones
malas,*

Deus ad actiones malas hominis non concurrat, quatenus male sunt ; sed quod male sint, ab homine habent. Constat ex anterioribus creaturas in agendo a Deo dependere per concursum universalem (§. 879.), quo ipsis tribuitur vis agendi earumque substantia conservatur (§. 876.). Enimvero actiones homi-

hominum a Deo dependent qua actiones, seu quatenus in genere spectantur; non autem qua tales actiones, seu quatenus in specie spectantur (§. 882.). Quamobrem Deus non concurrat concursu universali ad actiones humanas nisi qua actiones, seu in genere spectatas, non vero qua tales, seu in specie spectatas. Actiones internæ malæ sunt, quatenus animam & ejus statum reddunt imperfectiorem (§. 574.); externæ autem sunt malæ, quatenus corpus & statum nostrum externum reddunt imperfectius (§. 575.). Quatenus igitur spectantur tanquam malæ, non simpliciter tanquam actiones, sed tanquam actiones tales considerantur. Patet igitur Deum ad actiones hominis malas non concurrere, quatenus malæ sunt. *Quod erat unum.*

Enimvero cur actiones sint tales, seu earundem specificatio a creatura (§. 878.), adeoque in homine ab homine est (§. 782.). Quamobrem porro patet, quod ab homine habeant actiones, ut sint malæ. *Quod erat alterum.*

Poterat quoque propositio præsens hoc modo ostendi. In concursu universali Deus conservat substantiam agentem & largitur vires agendi, quatenus actualitatem indefinenter impertitur substantiæ absque viribus istis existere minime valenti (§. 877.). Quoniam itaque vi concursus universalis Deo tribui nequit, nisi quod agens, dum agit, existat & vi agendi præditus sit, consequenter quod jam agat; Deus utique vi concursus universalis non concurrat nisi ad actiones qua actiones, sive in genere spectatas. Jam actionum specificatio a creatura (§. 878.), adeoque etiam humanarum specificatio ab homine est (§. 781.), consequenter hominitribuendum, non concursui divino, quod actiones sint tales. Quamobrem cum actiones hominis tam internæ, quam externæ malæ sint, quatenus animam & ejus statum reddunt imperfectiorem (§. 574-575.); actiones malæ sunt malæ, non quatenus in genere

spectantur, tanquam actiones, sed quatenus in specie spectantur tanquam tales actiones. Patet igitur quod actiones humanæ sint malæ, nontribuendum esse concursui Dei, sed homini eas perpetranti, consequenter Deum non concurrere ad actiones malas, quatenus malæ sunt; sed eas ab homine habere, quod sint malæ.

Puto me concursum Dei ad actiones malas in demonstratione propositionis præsentis, modo principia in anterioribus sufficienter demonstrata perceperis, tanta claritate exposuisse, ut liquido appareat malum, quod actionibus hominum inhæret, esse ab homine, salvo quidem concursu divino, salvaque hinc orta dependentia hominis in agendo a Deo, nihil tamen mali a concursu divino & hominis in agendo a Deo dependentia in actionem derivari. Labet tamen argumentum difficile, ubi non singula ad vivum rescentur reductione ad notiones distinctas, similitudine aliqua illustrare, quod ideam quandam insinuet animo acumine sufficiente destitutorum, qua juvetur attentio ad demonstrationem rite percipiendam requisita. Ponamus itaque patrem nullis pepercisse sumptibus, ut filius ad mercaturam exercendam idoneus evaderet. Ponamus porro eundem filium, cui de alimentis abunde prospicit, tabernæ mercibus instructæ præficere. Ponamus denique hunc incautum merces credere emtoribus, qui solvendo non sunt, ac nummos a solventibus acceptos erogare desideriorum suorum explendorum gratia, ut rationem administrationis redditurus bona parentis dilapidasse deprehendatur. Patet omnino, parentem concurrere ad actiones filii improbandas, qua actiones seu in genere spectatas; sed non quatenus censuram merentur. Quod vero istiusmodi sint, filii unice tribuendum esse. Etenim nisi pater ad mercaturam exercendam educasset filium, eundemque tabernæ præfecisset, nec merces debitoribus, qui solvendo non sunt, credere, nec nummos pro mercibus acceptos profundere potuisset. Concurrit adeo parens ad hæc actiones, quatenus agendi largitus est potentiam & alimentorum præstatione filium conservat (§ 842.). Enimvero contra voluntatem parentis est, quod

rem

rem suæ fidei commissam male administret, & improbanda maxime administratio tota tribuenda imprudentiæ & malæ voluntati filii. Ecce igitur, quomodo fieri possit, ut quis concurrat ad alterius conservationem & vires agendi largiatur; hoc tamen non obstante alteri in totum tribuendum sit, ut male agat, consequenter quod concursus, qui præstatur agentis conservatione ac virium agendi largitione, non fiat nisi ad actiones in genere spectatas, non vero in specie tales, ac ideo quod malum ipsis inhaeret totum sit ab agente.

§. 884.

Deus concurrit ad id, quod physicum est in actionibus, Concurrit malis, non vero ad id, quod morale est, seu quod perinde est, Dei ad a-
concurrit ad actiones malas, quatenus physice spectantur, non autem quatenus spectantur moraliter. Concurrit enim ad actiones malas in genere spectatas, non vero in specie tales, explicatur,
 veluti quatenus volitiones & motus corporis sunt, non vero quatenus volitiones ad hoc objectum tendunt & motus iisdem respondet qua talibus (§. 882.), seu quatenus actiones tam internæ, quam externæ malæ sunt (§. 883.). Enimvero actiones hominis internæ, quatenus spectantur ut volitiones & volitiones animæ simpliciter seu in genere, & motus corporis, quatenus similiter considerantur ut motus ad nutum animæ secuti vel intermissi, sunt actiones physice spectatæ: eadem vero, quatenus internæ considerantur tanquam malæ, & externæ tanquam motus corporis iisdem respondentes, adeoque & ipsi mali, moraliter spectantur (§. 568.). Deus igitur ad actiones hominis malas concurrit, quatenus physice; non autem, quatenus moraliter spectantur.

E. gr. ponamus furem extendere brachium ad rem alienam auferendam. Quod brachium extendere velit, concursui divino tribuendum. Quod idem ad nutum animæ extendere valeat, huic itidem acceptum ferendum. Enimvero

ro quod velit extendere ad rem alienam auferendam & ea intentione actu extendat; id nonnisi hominis est, libertate sua, qua fruitur, abutentis. Extensio brachii & volitio hujus extensionis physicum quid est, homini quippe naturalis. Quod vero hæc actio tendat ad auferendum alteri, quod suum est, moralitatem habet, & quidem mala est. Atque adeo patet Deum concurrere ad id, quod physicum est in actione furis, non vero ad id, quod morale est. Nimirum physicum actionis tantummodo concursu divino indiget, non vero morale ejusdem. Etenim Deo concurrente fur qua homo, animo & corpore constans, existit & velle, & brachium movere ad nutum animæ potest. Sed quatenus libere vult ac brachium movet, rem alienam appetit & ad eam auferendam brachium extendit; id ipsi tribuendum, libertate sua abutenti.

§. 885.

*Concursus
Dei ad
abusum
libertatis.*

Deus non concurrat ad abusum libertatis, qua abusum. Ponamus enim, Deum concurrere ad abusum libertatis, qua abusum. Quoniam malum morale abusu libertatis irrepit in actiones liberas (§. 580.); Deus ad actiones malas concurrat, quatenus malæ sunt, determinando scilicet appetitum ad malum, consequenter quod actiones sint malæ, a Deo est, non ab homine. Quod cum sit absurdum, quia constat Deum ad actiones malas non concurrere, quatenus malæ sunt, sed quod malæ sint, homini in totum tribuendum esse (§. 883.); fieri quoque nequit, ut Deus ad abusum libertatis concurrat, qua abusum.

Idem etiam directe ostenditur hoc modo. Deus homini in concursu universali tribuit agendi vires, quatenus actum indefinenter impertitur substantiæ, qua animam scilicet atque corpus, sine viribus istis existere minime valenti (§. 877.). Quod vero hoc agat modo, ab homine est (§. 878.). Quamobrem cum homo in volendo ac nolendo liber sit (§. 942. *Psychol. empir.*), adeoque polleat facultate ex pluribus possibilibus

bilibus sponte eligendi, quod ipsi placet, ad nullum eorum per essentiam suam determinata (§. 941. *Psychol. empir.*) atque vi, qua pollet (§. 53. *Psychol. ration.*), ipsi essentiali (§. 66. *Psychol. ration.*) ac naturali (§. 67. *Psychol. ration.*) eliciuntur appetitiones atque aversiones tales (§. 55. *Psychol. ration.*), homo autem libertate abutitur, quatenus malum appetit sub ratione boni & bonum avertitur sub ratione mali (§. 896. *Psychol. empir.*); patet homini tribuendum libertatis abusum, non vero Deo, consequenter Deum ad abusum libertatis non concurrere, qua abusum.

Nimirum Deus conservat hominem, qui libertate sua abuti potest per essentiam atque naturam suam; homo autem sua sponte eadem abutitur, Deo in determinationem appetitus ad malum minime influente. Aliter vero sese res habet in actionibus bonis, quemadmodum inferius sumus demonstraturi. Cavendum itaque, ne, quæ de actionibus malis dicuntur, perperam ad bonas applicentur: quantum enim sit discrimen inter concursus ad actiones bonas atque malas, suo clucescet loco, hic autem deficientibus adhuc principiis demonstrari nondum potest. Quodsi dependentiam hominis in agendo a Deo eo usque extendere velis, ut ipse animam determinet ad volendum hoc potius, quam aliud, & ad hoc potius, quam aliud nolendum; abusus libertatis totus a Deo derivandus, nec homo appetet malum, nisi quia Deus vult, ipsum malum appetere, nec averfabitur bonum, nisi quia Deus vult ipsum bonum averfari. Constat autem, & animam se ipsam determinare ad volendum, vel nolendum motivis suis convenienter (§. 932. *Psychol. empir.*), & fieri non posse, ut Deus velit malum morale (§. 581.), consequenter dependentia hominis in agendo a Deo in præjudicium libertatis hominis & voluntatis ipsius divinæ extendi nequit. Ceterum hic nobis tantummodo cum viribus naturæ negotium est, non autem cum viribus gratiæ, quæ fori philosophici non sunt, adeoque Theologis e altiori lumine sapientibus discutiendæ relinquuntur, ne falcem in alienam legerem immittamus.

§. 886.

*An Deus
ad imper-
fectionem
hominis
concurrat.*

Deus non concurrat ad imperfectionem hominis accidentalem.
Etenim malum morale consistit in imperfectione accidentali (§. 577.). Enimvero Deus non concurrat ad malum morale, quod actioni hominis inhaeret (§. 884. 374.). Deus igitur non concurrat ad imperfectionem hominis accidentalem.

Ponamus hominem negligere occasionem scientia rerum scitu ipsi maxime necessariarum animum imbuendi, adeoque in crassa sibi ac aliis nocua versari ignorantia, quam evitare potuisset, modo voluisset. Cum Deus non determinet voluntatem ad neglectum istum, sed homo (§. 923. *Psychol. empir.*) libertate sua abutens (§. 580.), etsi actus volitionis physice spectatus non eliciatur sine concursu divino (§. 884.); homo ignorantia illa laborat Deo non concurrente. Quamobrem quia nemo non fatetur, istiusmodi ignorantiam ad imperfectionem hominis eamque accidentalem referri debere (§. 528. *Ontol.*); evidens est, Deum ad hanc imperfectionem accidentalem minime concurrere. Eodem prorsus modo idem patet in exemplo quocunque alio, ut adeo, quod in medium attulimus ad propositionem illustrandam, non invitis methodi legibus demonstrationis vicem subire queat.

§. 887.

*Quod homo
seipsum
reddat ac-
cidentaliter im-
perfectum.*

Quoniam Deus minime concurrat ad hominis Imperfectionem accidentalem (§. 886.); imperfectio accidentalis tota ab homine est, consequenter homo semetipsum reddit accidentaliter imperfectum.

Et quid hoc apparet ex modo allato exemplo de ignorantia crassa & nocua hominis occasionem proficiendi negligenteris (not. §. 886.). Neque enim Deo tribui potest, quod eadem laboret, propterea quod ipse voluntatem ejus ad neglectum occasionis proficiendi minime determinavit; sed homini ipsi eadem laboranti, qui & appetitum suum ad neglectum istum

istum sua sponte determinavit, & volitioni prave convenienter agit. Si quacuidam dubia adhuc suboriri possunt, non aliunde est, quam quod anteriora non satis perceperit, quibus tanquam fundamento nititur præsens propositio. Juvabit tamen ad dispellendas tenebras animum advertere ad simile, quo superius usi sumus ad concursum Dei ad actiones malas illustrandum (not. §. 883.).

§. 888.

Deus non vult, sed tantummodo permittit hominem fieri accidentaliter imperfectum. Fieri non potest, ut Deus velit malum morale (§. 581.). Quamobrem cum malum morale in imperfectione accidentali consistat (§. 577.); nec fieri potest ut Deus imperfectionem hominis accidentalem velit, seu ut velit ipsum fieri accidentaliter imperfectum. Quod erat unum. *Quatenus imperfectio hominis accidentalis a Deo dependeat.*

Similiter cum Deus malum morale permittere decreverit (§. 585.), quæ vero ab æterno decrevit, ea in tempore facit, quemadmodum decrevit (§. 525.); quin malum morale permittat dubitandum non est. Consistit vero malum morale in imperfectione accidentali (§. 577.). Quamobrem patet, Deum imperfectionem hominis accidentalem permittere, seu, quod perinde est, Deum permittere, ut homo fiat accidentaliter imperfectus. *Quod erat alterum.*

Ita Deus non vult hominem negligere occasionem animum scientia rerum ipsi scitu maxime necessariorum imbuendi, ac ideo versari in crassa sibi ac aliis nocua ignorantia, quam evitare potuisset, modo voluisset. Permittit tamen, ut homo proficiendi commodissimam occasionem negligat, ac ideo in tanta ignorantia versetur, quemadmodum idem ab æterno permittere decrevit (§. 504. 585.).

§. 889.

Deus non concurrit ad actiones malas, quatenus tendunt ad Dei ad in-
Concursus ad Dei ad in-

*trinfecam
actionum
malitiam
non exten-
dendus.*

ad imperfectionem hominis & status ipsius ; sed homo se statumque suum ipsemet imperfectiorem reddit. Etenim Deus ad actiones hominis malas non concurrir, quatenus malæ sunt, sed quod malæ sint, ab homine habent (§. 883.). Enimvero actiones malæ internæ atque externæ, quatenus moraliter spectantur, consequenter quatenus malæ sunt (§. 568.), hominem ejusque statum, qua animam atque corpus, reddunt imperfectiorem (§. 574. 575.). Quamobrem Deus non concurrir ad actiones malas, quatenus ad imperfectionem hominis ejusque statum tendunt; sed quod eo tendant, ab homine habent, consequenter homo se statumque suum ipsemet imperfectiorem reddit.

Equidem hæc propositio jam continetur sub anteriore, qua concursus Dei ad imperfectionem hominis accidentalem rejicitur (§. 888.); etenim imperfectio hæc non consistit nisi in ea, de qua sermo est in propositione præsentē: quoniam tamen hæc ipsa plurimum habet usum, in philosophia præsertim practica; ideo consultum fuit eandem non omitti, ne inutiles posthac in demonstrando causentur ambages.

§. 890.

*Quomodo
Deus ver-
setur circa
actiones
malas qua-
tales.*

*Deus velle nequit, ut homo se statumque suum reddat im-
perfectiorem, sed tantummodo permittit, ut homo hoc faciat.* Etenim fieri non potest, ut Deus velit hominis actiones malas qua malas (§. 581.). Quamobrem cum actiones hominis tam externæ, quam internæ, quatenus moraliter spectantur, adeoque quatenus malæ sunt (§. 568.), ad imperfectionem hominis statusque ejus, qua animam & corpus, tendant (§. 574. 575.); fieri omnino nequit, ut Deus velit, hominem se statumque suum reddere imperfectiorem. *Quod erat unum.*

Permittit autem Deus malum morale (§. 585. 525.), consequenter actiones malas, quibus inhæret (§. 374.). Quoni-

am itaque actiones malæ quæ tales tendunt ad imperfectionem hominis statusque ipsius *per demonstrata*; Deus utique permittit, ut homo se statumque suum reddat imperfectiorem. *Quod erat alterum.*

Posterius etiam probatur a posteriori. Etenim homo se statumque suum imperfectiorem reddit, quemadmodum indubia experientia constat, nec ab ullo in dubium revocari potest. Jam vero Deus velle nequit, ut homo hoc faciat *per demonstrata* num. 1. ad actiones ipsius, quatenus tendunt ad imperfectionem ipsius atque status ejus, minime concurrens (§. 889.), & quia hominem, etiam male agentem, conservat viresque agendi largitur ipsi (§. 874. 876.), dici nequit, quod nolit hominem se statumque suum imperfectiorem reddere. Quamobrem cum id permittat, quod, cum ab homine neque fieri, neque non fieri velit, quo minus idem fiat, impedire non vult (§. 584.); quin Deus permittat, ut homo se statumque suum reddat imperfectiorem extra omnem controversiam positum est.

Equidem vulgo ex eo, quod homines faciunt, quæ Deus non vult, infertur, cum ut hoc faciant permittere, nec fallit illatio; sed ut satisfaciatur philosopho, qui evidentiam rationis sectatur, ex ipsa notione permissionis hoc deducendum, quemadmodum a nobis factum. Cæterum quæ ad propositionem præcedentem annotavimus, ad præsentem quoque applicanda.

§. 891.

Non dedecet Deum permittere, ut homo se statumque suum imperfectiorem reddat. Neque enim dedecet Deum permissio im-
missio mali moralis (§. 586.), consequenter nec dedecet ut per-
mittat, perpetrari ab homine actiones, quibus id inhæret (§. 374.). Enimvero actiones malæ, quatenus moraliter spectan-
tur, adeoque malæ sunt (§. 568.), tendunt ad imperfectionem Deum de-
Nnn nn 3 homi-
deceat,

hominis statusque ipsius (§. 574. 575.), adeoque homo eas perpetrans se statumque suum imperfectiorem reddit. Non igitur Deum dedecet permittere, ut homo se statumque suum reddat imperfectiorem.

Equidem hæc propositio demonstratu facillima videtur; sed ut ejus veritas percipiatur, haud pauca sunt, quorum scientia animus imbutus esse debet. Patebit hoc, si demonstratio in sua principia remota resolvatur eo modo, quem in Logica (§. 992.) docuimus. Quamobrem caveant, ne demonstrationi tribuant inevidentiam, quam ex eo male colligunt, quod se nondum convictos sentiant, qui suam ignorantiam agnoscere & accusare tenentur.

§. 892.

An imperfectio hominis accidentaliter repugnet perfectioni summæ mundi & fini a Deo intento.

Quod homo se statumque suum imperfectiorem reddat minime obstat, quo minus mundus sit omnium possibilium perfectissimus, nec quo minus fini a Deo per creationem universi intento magis satisfaciatur ceteris. Etenim malum morale non obstat, quo minus in mundo, qui existit, major sit perfectio quam in ceteris (§. 550.), consequenter quo minus idem sit omnium possibilium perfectissimus, seu summa ejus, quæ dari potest, perfectio: neque obstat idem, quo minus fini a Deo intento omnium maximo conveniat (§. 617.). Jam actiones malæ, quatenus moraliter spectantur, consequenter quatenus malæ sunt (§. 568.), adeoque malum morale ipsis inhaeret (§. 374.), tendunt ad imperfectionem hominis atque status ejusdem (§. 574. 575.), atque adeo homo male agens se suumque statum imperfectiorem reddit. Quare quod homo se statumque suum imperfectiorem reddat, non impedit, quo minus hic mundus sit omnium possibilium perfectissimus, adeoque summa ejus sit, quæ in mundo aliquo dari potest, perfectio: nec idem obstat, quo minus hic ipse, qui existit, mundus fini a Deo per creationem

tionem ejus intento magis satisfaciat ceteris possibilibus omnibus.

Toto igitur cœlo a vero aberrant, qui ex imperfectione hominis accidentali imperfectionem mundi hujus adspectabilis inferunt. Sed ut errorem agnoscant suum, tenenda sunt, quæ ad propositionem præcedentem annotavimus.

§. 893.

Deus non concurrit ad actiones malas, nisi quatenus concurrit ad ordinis naturæ conservationem, sive cum qua animam spectes, sive eundem in mundo adspectabili consideres. Etenim Deus non concurrit ad actiones malas hominum, quatenus moraliter spectantur, sed tantummodo quatenus spectantur physice (§. 884.). Enimvero actiones malæ internæ si physice spectentur, per easdem leges appetitus ac aversionis nascuntur, quibus bonæ (§. 569.). Quamobrem cum ordo naturæ quoad animam conservetur, quatenus actiones internæ hominis juxta eandem legem appetitus ac aversionis consequuntur (§. 570.); Deus non concurrit ad actiones malas, nisi quatenus concurrit ad ordinis naturæ qua animam spectati conservationem.

Concursus divini ad actiones malas restrictio.

Porro actiones malæ externæ, quatenus physice spectantur, eodem modo consequuntur, quo bonæ (§. 572.). Quamobrem cum ordo naturæ consuetus in mundo adspectabili conservetur, aut saltem nonnisi ordinario quodam modo secundum peculiarem quendam ordinem turbetur per actiones malas, quatenus physice spectantur (§. 573.); Deus ad actiones malas non concurrit, nisi quatenus concurrit ad ordinem naturæ in mundo adspectabili spectatum.

Propositio præsens ostenditur etiam hoc modo. Deus ad actiones hominum quascunque concurrit per conservationem (§. 874.). Quamobrem cum in concursu universali con-

ser-

Tervet substantiam agentis & largiatur vires agendi (§. 876.); ad actiones quoque malas concurrir, quatenus conservat substantiam animæ atque corporis & homini quoad utramque substantiam agendi vires largitur. Enimvero anima in appetendo etiam malo (§. 896. *Psychol. empir.*) sequitur legem appetitus (§. 904. *Psychol. empir.*) & in averſando etiam bono (§. 896. *Psychol. empir.*) legem averſionis (§. 907. *Psychol. empir.*). Quamobrem cum Deus impertiat vires agendi, quatenus actualitatem indefinenter confert substantiæ absque viribus istis existere minime valenti (§. 877.); animæ quoque largitur vires appetendi & averſandi, quatenus continuo ad actum perducit substantiam, cui non inest vis nisi appetitiones & averſiones malas secundum eandem legem eliciendi, juxta quam eliciuntur bonæ. Quoniam itaque lex ista appetitus & averſionis animæ naturalis est (§. 522. *Psychol. ration.*) & per eam datur ordo quoad appetitiones & averſiones in anima (§. 478. *Ontol.*); non datur ordo naturæ in anima, quatenus appetitiones & averſiones, adeoque actiones internas hominis (§. 567.), spectas, nisi quatenus appetitiones & averſiones singulæ per eandem legem consequuntur, adeoque ordo naturæ quoad animam conservatur, quatenus animæ datur vis non aliter eliciendi appetitiones ac averſiones, nisi juxta istam legem. Patet itaque Deum non concurrere ad actiones malas internas, nisi quatenus concurrir ad conservationem ordinis naturæ quoad animam.

Porro cum actiones externæ sint motus corporis volitionibus ac nolitionibus animæ respondentes (§. 567.), atque adeo vi commercii inter animam & corpus intercedentis consequantur (§. 962. *Psychol. empir.*): Deus ad hosce motus concurrir, quatenus conservat substantiam utramque & largitur vires agendi dependenter a se invicem (§. 874. 876.), consequenter quatenus conservat commercium inter animam atque corpus.

pus. Quodsi jam hoc commercium explices per harmoniam a Deo præstabilitam (§. 638. *Psychol. ration.*), actiones malæ externæ secundum consuetum naturæ ordinem contingunt (§. 573.), consequenter commercium inter animam & corpus conservatur, dum consuetus naturæ ordo conservatur, atque adeo Deus ad actiones malas externas non concurrit, nisi quatenus ad conservationem ordinis naturæ consueti concurrit. Quodsi vero commercium istud influxui physico tribuere malis, actiones malæ externæ fiunt secundum peculiarem ordinem, quo consuetus continuo interrumpitur (§. 573.). Quoniam ista interruptio ordinis naturæ in mundo adspectabili stante influxu physico inevitabilis est (§. 579. *Psychol. ration.*); non alius naturæ ordo in systemate influxus physici per naturas rerum possibilis, quam isto modo continuo interrumpendus, consequenter nec a Deo aliter conservari potest. Atque adeo nec in isto systemate Deus ad actiones malas externas concurrit, nisi quatenus ad conservationem ordinis naturæ concurrit.

Nimirum ordo naturæ a Deo non aliter conservatur, quam qualis per naturam rerum possibilis. Datur aliquis ordo naturæ in mundo adspectabili, qui est rerum materialium. Datur alius ordo naturæ animæ unicuique proprius, quem ex Psychologia, præsertim rationali, cognoscere licet. Sed quia datur aliqua harmonia inter mutationes, quæ in anima contingunt, & inter mutationes, quæ in mundo adspectabili accidunt (§. 540. *Psychol. ration.*); ordo uterque aliter conservari nequit, quam hac harmonia salva possibilis. Etsi itaque in systemate harmoniæ præstabilitæ ordo naturæ in mundo adspectabili in gratiam animæ nunquam interrumpitur, sed idem constanter salvus sit; in systemate autem influxus physici continuo interrumpatur (§. 573.); in præsentem tamen negotio, ubi de concursu Dei ad actiones malas agimus, perinde est, qualis esse debeat ordo naturæ, ut harmonia animæ ac corporis subsistat. Et sane si concursus divinus in se spectetur in utro-

(*Welfi Theol. Naturalis*)

O o o o o

que

que systemate unus idemque est: neque enim Deus aliud agit, quam ut actualitatem impertiatur animæ & corpori simul certo quodam modo, qualiscunque tandem ille sit, dependenter a se invicem agere valentibus. Ceterum cum concursui divino tribui nequeat, nisi quod actiones malæ physice spectant non repugnent ordini naturæ, sive eum quoad animam, sive quoad mundum integrum adspectabilem spectes, ita ut Deus non concurrat ad easdem, nisi quatenus per hunc concursum non obstante malo morali, quod actionibus inhaeret, ordo naturæ conservatur; hinc demum clarissime perspicitur, quid velit *Campanella* affirmans, si quæ in mundo eveniunt ad Deum referuntur, nullum dari in eodem malum. Etenim actiones malæ, quatenus a Deo pendent, nihil habent mali; sed cum bonis in eundem censum veniunt, quoniam actiones malæ & bonæ, siquidem physice spectentur, ambæ eodem modo consequuntur & secundum naturæ ordinem sunt. Quatenus vero vitium ipsis inhaeret, a Deo minime dependentes nullum ad ordinem universi, nec ordinem seriei mutationum in anima naturalis respectum habent. Hæc qui probe perpendit, clarissime jam perspicit, cur malum morale tantummodo sit imperfectio in parte, nullam autem invehat imperfectionem in totum. Veritatem sublimem qui capere non possunt; iudicium suum suspendant venerabunda in autorem naturæ mente, ne temerariis iudiciis in Majestatem divinam injurii fiant.

§. 894

Limitationes originarie dicuntur, quæ per essentiam rebus insunt, consequenter vel sunt determinationum essentialium, vel attributorum.

Limitationes originarie quænam dicantur.

Nimirum essentialia determinationes, quas & essentialia entis simpliciter appellamus, ipsam entis essentiam constituent (§. 143. *Ontol.*). Quamobrem si determinationes essentialia fuerint limitatæ; hæ ipsæ limitationes enti per essentiam insunt. Jam attributa per essentialia determinantur (§.

145. *Ontol.*), adeoque una cum essentialibus insunt (§. 145. *Ontol.*), ac ideo insunt, quia essentialia insunt (§. 166. 56. *Ontol.*). Limitationes igitur attributorum enti similiter insunt per essentialiam. Utique jam includuntur in idea rei: unde limitationes originarie etiam dici poterant, quæ in idea rerum jam continentur.

§. 895.

Limitationes originarie a rebus inseparabiles sunt. Ex-Immutabi-
enim insunt rebus per essentialiam (§. 894.), adeoque tamdiu *litas limi-*
insunt, quamdiu essentia non mutatur. Sunt vero essentiz *tationum*
rum immutabiles (§. 300. *Ontol.*). Ergo etiam necesse est *originarie*
tationes originarias esse immutabiles. Jam cum immutabile *rum.*
sit, pro quo, iisdem manentibus ceteris, quæ simul insunt, nihil
substitui potest (§. 291. *Ontol.*); pro limitatione quæcunque
originaria salva determinatione rei intrinseca, cui inhæret non
alia substitui potest. Limitatio igitur originaria a re, cui inest,
separari nequit.

E. gr. Essentia animæ consistit in vi repræsentativa uni-
versi situ corporis organici in universo materialiter & consti-
tutione organorum sensoriorum formaliter limitata (§. 66.
Psychol. ration.). Duplex hæc limitatio originaria est (§. 894.),
ac ideo ab anima inseparabilis, ita ut fieri nullo modo pos-
sit ab anima aliter repræsentari universum, quam ut ex muta-
tionibus in organis sensoriis factis ratio repræsentationis red-
di possit. Quæ igitur limitationes adhærent ceteris, quæ hinc
necessario consequuntur; ex non minus inseparabiles sunt ac
illa vis repræsentativæ universi in genere spectatæ limitatio.

§. 896.

Deus rem nullam, neque etiam hominem absque limitatio- Limitatio-
nibus originariis producere potest. Etenim Deus ens finitum *nes origi-*
seu limitatum nullum, adeoque nec hominem, absque limita- *narie num*
tionibus essentiz ac naturæ ipsius in divinis ideis inhærentibus a Deo au-
producere potest (§. 379.). Sunt vero limitationes istæ, quæ ferri poss-
per sunt,

per essentiam rebus insunt, originariæ (§. 894.). Quamobrem Deus rem nullam, neque etiam hominem, absque limitationibus originariis producere potest.

Poterat idem ostendi indirecte hoc modo. Ponamus Deum rem aliquam, veluti hominem, producere absque limitationibus originariis. Cum absque iis produci nequeat, nisi eadem a re sint separabiles; necesse est limitationes originarias a re, cui insunt, separabiles esse. Quod quoniam absurdum est (§. 895.); fieri non potest, ut Deus rem aliquam, veluti hominem absque limitationibus originariis producat.

Hanc propositionem non alio fine addimus, quam ut compendio loquendi non destituamur. Rem ipsam enim jam supra evicimus, quemadmodum & alia huc spectantia. Cum enim malum metaphysicum in limitationibus determinationum essentialium consistat (§. 272.); adeoque in iis, quas originarias in sua extensione ad attributa dicere libuit (§. 994.); quæcunque de malo metaphysico in anterioribus demonstrata sunt, ad omnes limitationes originarias promiscue applicanda veniunt. Mali adeo metaphysici quemadmodum absoluta est necessitas, ita non minus limitationis originariæ cuiuslibet eadem est necessitas. Et sane ex hac necessitate est, quod Deus animam producere non potuerit, nisi vi repræsentativa universi instructam, quæ situ corporis organici in universo materialiter & constitutione organorum sensoriorum formaliter limitatur, hoc est, quæ clare sibi non repræsentat nisi ea, quæ in organum sensoriorum agunt, neq. alio claritatis gradu, quam qui convenit motui in organo sensorio fibrillis sensoriis impresso.

§. 879.

Mali moralis ortus.

Malum morale ex limitationibus originariis oritur seu per limitationes originarias fieri potest, ut actiones hominis sint moraliter male. Etenim malum morale abusu libertatis irrepit in actiones liberas (§. 580.).

Quamobrem cum malum non

non appetamus nisi sub ratione boni, nec bonum aversemur nisi sub ratione mali (§. 896. *Pfychol. empir.*); libertate abutimur, quod malum pro bono, bonum ex adverso pro malo reputemus, consequenter malum morale, quod actionibus liberis inhaeret (§. 374.), ex erroneo de bono atque malo iudicio ortum suum trahit. Nemo non confiteretur hominem in iudicando errare posse, propterea quod facultas cognoscendi, qua gaudet, limitata est, ut adeo ex notionibus demonstrari non sit opus: Etenim si ea esset illimitata, quemadmodum intellectus divinus (§. 166.), omnia quoque nobis repraesentaremus distincte, quemadmodum ab intellectu divino repraesentantur (§. 164.), consequenter fieri non poterat, ut malum videretur bonum & bonum ex adverso malum. Malum igitur morale oritur ex limitationibus facultatis cognoscitivæ, ac in primis intellectus, cuius est iudicare (§. 325. *Pfychol. empir.*). Jam vis repræsentativa universi essentialiter limitata tum quoad objectum, tum quoad modum repræsentandi objectum (§. 66. *Pfychol. ration.*), ac ideo quoque ipse intellectus, qui rationem sufficientem in ista vi habet (§. 387 *Pfychol. ration.*), adeoque hac posita & ipsa ponitur (§. 118. *Ontol.*), iisdem limitationibus obnoxius est (§. 279. *Pfychol. empir.*). Quoniam limitationes originariæ sunt, quæ per essentiam rebus insunt (§. 894.); limitationes facultatis cognoscitivæ, ac intellectus in specie, quoad objecta & modum ea repræsentandi utique originariæ sunt. Quamobrem patet malum morale ex limitationibus originariis animæ derivari, consequenter per eas fieri posse, ut actiones hominis malo morali inficiantur.

In præsentī non disquirimus, nisi de possibilitate ortus mali moralis: quod & philosophi est, & præsentī instituto satisfacit. Non autem inquirimus, quomodo id, quod erat possibile per essentiam hominis, ad actum fuerit perductum: id enim historicum est, nec ex notionibus a nobis demon-

strari potest, cum tanta nobis non sit intellectus amplitudo, quæ veritatibus historicis sive factis a priori demonstrandis sufficit. Quæ igitur Theologi de origine mali moralis quoad veritatem historicam S.S. autoritate consili docent; his minime opponenda sunt, quæ a nobis demonstrantur. Factum enim opponi nequit, quatenus actualitas determinatur, veritati universali, qua possibilitas enunciatur. Et quamvis malum morale per limitationes originarias sit possibile, per eas tamen non necessarium est, propterea quod in iisdem non contineatur ratio sufficiens actus, adeoque positæ limitationibus originariis malum morale non ponitur nisi quoad potentiam, nondum vero quoad actum. Quæ vero in actum influunt, multa sunt ac varia, de quibus suo tempore in philosophia morali dicemus.

§. 898.

*An Deus
hominem
illabilem
creare po-
tuisset.*

Quoniam per limitationes originarias fieri potest, ut actiones hominis sint moraliter malæ (§. 897.), Deus vero hominem absque limitationibus originariis producere nequit (§. 896.); Deus quoque hominem talem producere non potuit, ut impossibile esset actiones malas ab eodem perpetrari.

Stylo Theologorum dicendum erat: homo per essentiam suam est labilis (§. 897.), adeoque fieri non potuit, ut crearet illabilem (§. 557.). Qui essentias rerum arbitrarias fingunt, sumunt, quod probare nesciunt, contrarium: sed anguntur ac misere se torquent, ubi Deum mali autorem accusare non debent. Recolenda hic sunt animo, quæ de potentia libertate abutendi dicta in superioribus (§. 710. & seqq.). Ceterum jam patet, quod ibi nondum constare poterat (not. §. 710.), potentiam abutendi libertate ex limitationibus originariis resultare. Etenim si intellectus non limitaretur formaliter, seu quoad modum representandi objecta, nec bonum videri poterat, quod est malum, nec vicissim malum, quod bonum est, consequenter nec malum appeti poterat sub ratione boni, nec bonum averfabile foret sub ratione mali, quemadmodum in abusu libertatis accidit. Atque hoc pacto poten-

poten-

potentia abutendi libertate ex limitationibus originariis resultat. Non omnes in materia, quam distincte non cognoscunt, eadem iisdem terminis enunciant. Quamobrem necesse est quæ eadem videntur diversis modis tamen enunciari, ut satisfiat omnibus. Confer itaque, quæ supra dicta sunt (§. 711.).

§. 899.

Gubernatio est directio actionum ad certum finem.

Gubernatio quid sit.

Ita Princeps dicitur gubernare subditos, quatenus eorum actiones dirigit ad finem civitatis, salutem nimirum, tranquillitatem ac securitatem publicam. Homo gubernat seipsum quatenus actiones suas dirigit ad finem sibi convenientem. Nemo non affirmat, quod seipsum gubernare nesciat, qui actiones dirigit ad alios fines, quam dirigere debebat.

§. 900.

Deus gubernat hoc universum. Etenim Deus hoc universum produxit propter finem aliquem (§. 603.), eumque ultimum (§. 628.), nec constituit fines particulares nisi in relatione ad finem totius mundi (§. 626.), singulos ultimo (§. 631.) ac sibi invicem subordinans (§. 633.). Quamobrem cum in horum finium particularium numero sint quæcunque ex natura & essentia rerum materialium consequuntur (§. 645.), adeoque corporum omnium actiones (§. 713. *Ontol.*), & ipsæ etiam mala moralia, adeoque actiones hominum, quibus insunt, ad manifestationem gloriæ suæ, finem ultimum (§. 629.), dirigantur (§. 681.); omnium omnino creaturarum actiones a Deo ad fines certos, tandemque ultimum dirigi patet (§. 779 782.). Quoniam itaque gubernatio in directione actionum ad certum finem consistit (§. 899.); Deus hoc universum gubernat.

Patet igitur Deo propriissimo sensui tribui gubernationem hujus universi, eodem scilicet, quo Princeps dicitur gubernare civitatem (*not.* §. 899.).

§. 901.

§. 901.

Guberna- *Deus gubernat hoc universum, dum omnia inter se connectit.*
tio universi Quatenus enim tam coëxistentia, quam successiva in hoc uni-
in quo con- verso inter se connectuntur, a se invicem dependent per modum
sistat. finis a medio (§. 665), agentia propter fines a Deo intentos, ac si ipsamet eos intenderent (§. 661.). Quamobrem dum Deus sapientia sua eadem inter se connectit (§. 666.), actiones eorum dirigit ad certos fines, tandemque mediantibus hisce ad finem ultimum (§. 635.). Gubernat vero Deus hoc universum, dum actiones creaturarum dirigit ad certos fines (§. 899.). Quamobrem ipsum gubernat, dum omnia inter se connectit,

Patet adeo gubernationem divinam rejici, si nexus rerum in hoc universo tollitur. Equidem res inter se jam spectantur tanquam connexæ in idea universi, quæ datur in intellectu divino (§. 181.), antecederet ad decretum (§. 434.); cum tamen liberrime existentiam ejus ab æterno decreverit (§. 506. 504.), nihil inde adversus gubernationem divinam concluditur. Quatenus enim vi intellectus divini omnia in hoc universo connectuntur, gubernatio universi possibilis. Dum Deus mundum hunc producere decrevit, eo modo mundum gubernare constituit, quo vi istius nexus gubernari potest. Denique dum eundem & creavit (§. 760.), & hodiernum conservat (§. 843.), viresque agendi creaturis largitur (§. 876.), ac ordinem, juxta quem agere tenentur, præscripsit (§. 825.); mundum quoque actu gubernat ipso opere exequens, quæ ab æterno decrevit. Hæc gubernatio Deo digna, qui cum sit omniscius (§. 301.) ac præsciat omnia (§. 524.); ab æterno decernere potuit, quomodo mundum gubernare voluerit, & huic decreto convenienter in tempore facit omnia: minime autem instar hominis quid fiat in mundo demum experiri tenetur, ut exinde consilium capiat, quid fieri debeat, ne fine per creationem mundi intento excidat. In majestatem divinam injurii sunt, qui ideam gubernationis confusam, quam

ex

ex imperiis hominum hausere, perperam ad Deum transe-
runt, non attento discrimine, quod inter Principes & Deum
summum Monarcham intercedit. Finge Principem, qui no-
rit omnes subditorum actiones infallibili præscientia ab initio
regiminis usque ad finem ejusdem, nec minus certo præsci-
at omnes eventus, qui civitatem quomodocunque attingunt,
in regimine attendendos. Quodsi jam is unico decreto sta-
tuit singula, quæ durante regimine suo fieri debent, ac cautus
providet, ut eadem ad nutum executioni demandentur; quis id-
eo negaverit eum gubernare civitatem. De Deo autem tan-
to magis idem affirmandum in casu simili, qui is ad singulas
creaturarum actiones concurrat, quemadmodum ante abunde
satis explicavimus. Athei, qui nexum rerum ab absoluta necessi-
tate liberum non agnoscunt, gubernationem divinam tollunt,
non quod res in universo inter se connexas deprehendant;
verum quod omnes nullo fine ex necessitate absoluta ita agere
putent. Sed atheorum errores notabimus suo loco.

§. 902.

Deus mundum sapientia sua gubernat. Et enim Deus hoc *Quomodo*
universum gubernat, dum omnia in eodem inter se connectit *Deus mun-*
(§. 901.). Enimvero nexus rerum in hoc universo sapientia *dum gu-*
divina constitutus est (§. 666.). Mundum igitur Deus sapi- *bernet.*
entia sua gubernat.

Poterat idem etiam ostendi hoc modo. Corpora & tota
rerum natura agunt propter fines a Deo intentos, ac si ipsamet
eos intenderent (§. 661.), ita ut Deus finem, quem per existentiam
hujus mundi intendit, hoc est, ultimum (§. 628.), ex asse
consequatur (§. 621.). Quamobrem cum Deus mundum gu-
bernet (§. 900.), adeoque corporum omnium in eodem &
totius naturæ actiones ad fines istos dirigat (§. 899.); actiones
omnium corporum in mundo totiusque naturæ ad fines cer-
tos ita dirigit, ut eosdem ex asse & per eosdem finem ulti-
mum consequatur. Enimvero sapientiæ est dirigere actiones

(*Wolfii Theol. Natur.*)

Ppp pp

ad

ad fines ex se consequendos & particulares ita subordinare ultimo, ut vi eorum hunc consequaris (§. 678. *Psychol. ration.*). Deus itaque mundum hunc sapientia sua gubernat.

Tanto major sapientia est, qua mundus gubernatur, quod Deus totam gubernationem decreverit ab aeterno & talem fecerit naturam universam talesque corporum essentias, ut voluntati ipsius conformiter agant, ita ut nullis decretis temporariis, nullo consilio in tempore ineundo opus sit. Patet hoc ex simili, quo paulo ante usi sumus (*not.* §. 901.). Etenim si Princeps initio regiminis omnia decernere posset unico actu, quæ toto regiminis tempore decernenda forent, ac ita in civitate instrueret omnes, ut deinceps voluntati ejus convenienter omnia administrarentur sine particularibus imperiis; nemo non fateretur, majorem ipsi esse sapientiam, quam qua opus habet ad consilia occasione ferente quovis tempore ineunda & decreta particularia formanda, modo perpendere possit, quænam ad hoc requirantur, ut unico actu decernantur singula per totum regiminis tempus ordinanda & unico actu in civitate ita constituentur, ut toto regiminis tempore nil quicquam fiat nisi decretum. A notionibus attributorum divinorum nimis adhuc remotum habent animum, qui hæc capere non possunt.

§. 903.

**Gubernatio
Dei a boni-
tate pen-
dens.**

Deus bonitate sua hoc universum gubernat. Etenim Deus gubernat hoc universum, dum omnia inter se connectit (§. 901.). Nexus rerum in hoc universo bonitate divina constitutus est (§. 740.). Deus igitur bonitate sua hoc universum gubernat.

Poterat idem etiam ostendi hoc modo. Omnes rerum & naturalium (§. 648.) & artificialium usus sunt fines a Deo intenti (§. 649.). Quamobrem cum Deus mundum hunc gubernet (§. 900.), adeoque actiones creaturarum ad fines hosce dirigat (§. 899.); bonitatis vero divinæ sit, quod in hoc universo

universum

unum inserviat usibus alterius (§. 739.); quin Deus bonitate sua gubernet hoc universum dubitari nequit.

Quodsi ergo meditemur, quomodo in hoc universo unum usibus alterius inserviat, ita ut ipsa mala, quatenus moralia sunt actiones physicae, physica autem causae naturales, ad bona a Deo aliis conferenda concurrant (§. 689. 872.); quomodo Deus bonitate sua hoc universum gubernet, invictis experimentis docemur. Ceterum cum per ipsum rerum nexum demonstretur, quod Deus & sapientia, & bonitate sua hoc universum gubernet; clarissime constat, quantum conducat ad gubernationem divinam intimius perspiciendam nosse nexum rerum omnium in hoc universo, sed a liberrima Dei voluntate dependentem: neque enim negamus, si quis cum *Spinoza* fatalem rerum concatenationem statuatur, a voluntate divina prorsus independentem, tolli gubernationem divinam. Sed quantum in eo fallatur *Spinoza* & qui cum eo sentiunt, & ex anterioribus abunde liquet, & suo loco in parte secunda uberior demonstrabitur.

§. 904.

Ordo naturae & directio malorum ad bonos fines pertinet ad Ordonationem gubernationem universi. Etenim ordo naturae continetur regere & directio malis motus (§. 559. *Cosmol.*) & corpora, quorum actiones *medi-directio mali* ante motu fiunt (§. 133. 134. *Cosmol.*), secundum eundem ad bonum agunt (§. 566. *Cosmol.*) propter fines a Deo intentos (§. 661.). *cur sit gubernatio* Quamobrem cum ordo naturae contingens sit, seu ab absoluta gubernationis necessitate liber (§. 561. *Cosmol.*), & Deus naturae leges agendi divinae praescripserit ab essentia corporum minime pendentes (§. 825.); patet Deum actiones creaturarum juxta ordinem naturae dirigere ad certos fines. Quoniam itaque gubernans universum (§. 900.) actiones creaturarum ad certos fines dirigit (§. 899.); ordinem naturae ad gubernationem universi pertinere patet.

Deus dirigit mala physica & moralia ad bonum finem (§. 680.). Quamobrem cum directio actionum creaturæ ad bonos fines, quales sunt mala physica & moralia, quatenus ad bonum dirigenda (§. 680.), sit gubernationis divinæ (§. 899.); directio malorum ad bonos fines in hoc universo est gubernationis divinæ.

Ordo naturæ aperte loquitur gubernationem hujus universi divinam. Quia enim Deus hoc universum sapientia ac bonitate sua gubernat; ideo omnia sunt ordine. Obtinet idem in civitate, ubi subditi reguntur sapientia & bonitate. In ea nimirum civitate, in qua sapiens ac bonum regimen celebratur, omnia sunt ordine, quemadmodum cæterus hominum, qui a superiore non gubernatur, in summa degeret confusione. Ita similiter directio malorum, quæ eradicari sapientia non permittit, gubernationem divinam manifesto prodit. Ac idem obtinet in civitate, ubi pœnarum inflictione deterrentur a malo perpetrando, qui ab eodem minime abstererent, si impune quidvis facere liceret, atque sic malum, quod impediri non potuit, dirigitur in bonum futurum. Exemplum aliud habet in mulctis in pios usus conversis. Enimvero in cæteru hominum, qui nullius imperio subsunt, mala impune grassantia in bonum finem non diriguntur.

§. 905.

*Voluntas
Dei de di-
rectione
actionum
humana-
rum.*

Deus vult, ut homo actiones suas liberas dirigat ad perfectionem sui statusque sui. Etenim velle nequit, ut se statumque suum imperfectiorem reddat (§. 890.). Vult igitur, ut eundem ac se reddat perfectiorem, consequenter ut actiones suas liberas ad sui statusque sui perfectionem dirigat.

Idem etiam sic ostenditur. Quoniam Deus vult, quod in se optimum (§. 383.); fieri quoque non potest, quam ut velit actiones hominum liberas esse bonas. Enimvero actiones hominum liberæ sunt bonæ, quæ ipsum atque statum ejusdem perficiunt (§. 554. *Psychol. empir.*). Deus igitur vult, ut homo actio-

actiones suas liberas dirigat ad perfectionem sui statusque sui.

Eccce tibi voluntatem Numinis de directione liberarum actionum! Probe notanda est propositio præsens, qua Dei de hac directione voluntas enuncitur: est enim principium fecundissimum, unde deducuntur, quæcunque de rectitudine actionum humanarum demonstrari possunt, quemadmodum fidem oculatam dabimus in universo Jure naturæ.

§. 906.

Quoniam Deus vult, ut homo actiones suas liberas dirigat ad perfectionem sui statusque sui (§. 905.) ; actiones voluntati humane divine conformiter determinat, qui eas ad sui statusque sui perfectionem dirigat. *Actionum voluntati divine conformis determinatio.*

Nondum demonstramus, Deum ad hanc actionum directionem hominem obligare. Pertinet enim hæc obligatio ad jus Dei in hominem, quod capite sequente explicaturi sumus. Sufficit jam constare, Deum directionem istam velle.

§. 907.

Bonitatis divine est, quod velit hominem actiones suas dirigere ad sui statusque sui perfectionem. Quoniam enim Deus vult hominem actiones suas dirigere ad sui statusque sui perfectionem per hypoth. quin sit pronus ad ejusdem perfectionem promovendam dubitari nequit. Qui pronus est ad aliorum perfectionem promovendam, is bonus est in alios (§ 695.). Deus igitur bonus est in hominem, dum vult, eum actiones suas liberas dirigere in sui statusque sui perfectionem, consequenter quod hoc velit bonitatis divine est. *Cur Deus istam directionem velit.*

Quod si Deus noller hominem actiones suas ad sui statusque sui perfectionem dirigere, sed contrarium vellet; pronus utique foret ad eorum imperfectionem promovendam.

Quemadmodum itaque si bonum præbet hominibus, dum pronus est ad eorum perfectionem promovendam (§. 695.); ita vicissim malum sese probaret in eosdem, si pronus esset ad eorum imperfectionem promovendam. Et si neque veller, neque noller eos actiones suas ad sui perfectionem dirigere, sed ipsi perinde foret, quomodocunque tandem actiones suas dirigant; eos prorsus negligeret; nec ullam ipsorum curam haberet. Obtinet hoc in hominibus, quemadmodum obvia experientia docemur. Si in alios bonum possidemus animum, nos velle constat, ut ipsis bene sit, consequenter, si sapimus, ut sui statusque sui perfectionem promoveant (§. 557. *Psychol. empir.*). Quod si malo in alios sumus animo, nos nolle, ut ipsis bene sit, sed potius malle ut male sit, consequenter nolle ut actiones suas dirigant ad sui statusque sui perfectionem (§. 557. *Psychol. empir.*), sed malle potius, ut eas dirigant ad sui statusque sui imperfectionem (§. 568. *Psychol. empir.*), nemo non novit. Denique si neque bono, neque malo, sed indifferente in alios sumus animo; eorum nos nec bonum, nec malum tangit, sed perinde nobis est, si ipsis bene sit, si male, consequenter quomodocunque actiones suas dirigant. Non absque ratione in re intelligentibus satis obvia declaranda desudamus: etenim plurimum refert in praxi morali nosse, ex quo tandem fonte proficiscatur voluntas divina de directione actionum humanarum, quemadmodum suo tempore suoque loco elucescet. Nostrum igitur est non modo veritatem propositionis præsentis beneficio rationis intime perspicere, verum etiam omnem adhibere operam, ut ejusdem plane convictum & de ea prorsus confirmatum teneamus animum: id quod obtinebitur, si non modo demonstrationem propositionis præsentis, verum etiam ea mediteris, quæ ad hanc illustrandam in medium adduximus, donec nullam assentiendi repugnantiam in te experiaris. Hæc autem tanto sollicitius inculcamus, quod vulgo veritas tam utilis non sine manifesto damno non agnoscatur: immo multorum animos contraria obsideat opinio.

§. 908.

Quoniam bonitati divinæ tribuendum, quod Deus velit *Bonitatem* hominem actiones suas dirigere ad sui statusque sui perfectionem (§. 907.); qui actiones suas liberas ad sui statusque sui perfectionem dirigit eo animo, ut voluntati divinæ conformiter eas agnoscit. dirigat (§. 906.); bonitatem Dei in se agnoscit, & vicissim qui bonitatem Dei in se agnoscit, actiones suas liberas ad sui statusque sui perfectionem dirigere vult, atque actu dirigit, nisi vel ignorantia, vel aliis causis suo loco distinctius explicandis in transversum agatur.

Hæc vera sunt, etiam non attenta obligatione divina ad hanc actionum directionem: id quod probe notandum. Sane si consilium nobis impertitur amicus, de cuius bono in nos animo sumus persuasi; idem sequimur hanc, cur sequamur, reddentes rationem, quod certi simus ipsum nobis non suadere nisi quod nobis salutare. Ex adverso qui bonum alteri consilium dat, de eo, qui ipsum contemnit, conqueritur, quod agnoscere nolit, quam bene cupiat ei.

§. 909.

Deus etiam vult, ut homo actiones suas dirigat ad aliorum voluntatum hominum statusque eorundem perfectionem. Ponamus Dei de actionibus enim, si fieri potest, Deum velle ut homo tantummodo dirigat actiones suas ad sui ipsius statusque sui, non vero etiam ad aliorum statusque eorundem perfectionem. Quatenus igitur vult, ipsum actiones suas dirigere ad sui ipsius statusque sui perfectionem, quin quæ homini bona sunt velit dubitari nequit (§. 557. *Psychol. empir.*): quatenus vero non vult, ut actiones suas simul dirigat ad aliorum & status eorundem perfectionem, quin quæ homini bona non velit, sed velit potius quæ mala sunt, non minus extra dubitationis aleam omnem positum est (§. 568. *Psychol. empir.*). Quamobrem si Deus non

non vult, ut homo actiones suas simul dirigat ad perfectionem aliorum statusque eorundem; simul vult quæ homini bona sunt & quæ bona non sunt, seu quæ mala sunt. Quod cum sit absurdum (§. 28. *Ontol.*), immo bonitati divinæ, qua præditus est (§. 699), repugnet (§. 695.); dici nequit, Deum non velle, ut actiones suas dirigat homo ad perfectionem aliorum statusque eorundem.

Idem etiam directe ostenditur hoc modo. Deus summe bonus est erga homines, ita ut bonitatem majorem concipi repugnet (§. 699.). Quoniam ergo bonus erga alios ad aliorum perfectionem promovendam pronus est (§. 695.); Deus adeo pronus est ad hominum statusque eorundem perfectionem promovendam, ut omnia & velle, & facere dicendus sit, quibus eorum & status eorundem perfectio promoveretur. Fieri itaque haud quaquam potest, ut non velit hominem actiones suas ad aliorum statusque eorundem perfectionem promovere, consequenter necesse est velle eum, ut homo unusquisque actiones suas quoque dirigat ad aliorum statusque eorundem perfectionem.

Hominem non sibi tantummodo, sed aliis quoque consulere posse; ipsa experientia docemur. Quemadmodum creaturæ ceteræ nostris inservire possunt usibus; ita homo unus alteri auxilio esse potest. Et sicuti usus rerum inanimatarum & animantium brutorum sunt fines a Deo intenti (§. 648.), ac ideo Deus velle dicendus est, ut creaturæ hosce sibi mutuo præstent usus (§. 932. *Ontol.*); ita quoque dubitari nequit, quin hominibus dederit aliis inserviendi vires, ut unus alteri auxilium præstet. A vero igitur quam longissime absunt, qui sibi persuadent se sibi soli vivere.

§. 910.

Directio a-
ctionum
voluntati

Quoniam Deus vult, ut homo actiones suas dirigat ad aliorum statusque eorundem perfectionem (§. 909.); *si homo actio-*

actiones suas dirigit ad aliorum statusque eorundem perfectionem; divine voluntati divine conformiter easdem dirigit, seu, quod perin- formis. de est, directio actionum ad aliorum statusque eorundem perfectionem voluntati divine conformis.

Patet itaque, ut homo voluntati divinæ convenienter vivat, non sufficere, ut suam promoveat perfectionem, sed requiri præterea, ut aliorum quoque commodis pro virili interserviat, nec quicquam faciat, quod quomodocunque ad aliorum imperfectionem tendat.

§. 911.

Similiter quia *Deus* vult, ut homo actiones suas dirigat *Insepara-* non minus ad aliorum statusque eorundem (§. 909.), quam ad *bilitas boni* sui statusque sui perfectionem (§. 905.); fieri non potest, ut *alieni a* velit hominem actiones suas ita dirigere ad sui statusque sui *proprio.* perfectionem, ut tendant ad aliorum statusque eorundem imperfectionem, consequenter *non vult, ut homo promoveat per-* perfectionem sui statusque sui *cum imperfectione aliorum statusque* eorundem, adeoque cum verum bonum sit, quod revera nos statumque nostrum perficiat (§. 557. *Psychol. empir.*), verumque malum, quod revera nos statumque nostrum imperfectiores reddat (§. 568. *Psychol. empir.*), *non vult, ut bonum nostrum* promoveamus *cum malo alterius.*

Hinc liquet, nos in dirigendis actionibus nostris aliorum constanter rationem habere debere, nec sufficere, ut eas tantummodo ad nos statumque nostrum referamus, siquidem eas voluntati divinæ convenienter dirigere velimus. Principium hoc maximi usus est in definienda moralitate actionum. Quæ incautis suboriri possunt difficultates in applicatione ejusdem; eas semovebimus alio loco, ubi idem applicaturi sumus. Tum vero constabit, quanti sit usus in moralitate actionum rite definienda.

§. 912.

*Qualis sit
perfectio,
ad quam
actiones
dirigende
ex volun-
tate Dei.*

Perfectio hominis statusque ejusdem, ad quam Deus vult ut dirigat actiones suas, accidentalis est. Quoniam enim perfectio essentialis continetur consensu determinationum essentialium (§. 528. Ontol.), essentialis vero rerum immutabiles sunt (§. 300. Ontol.), adeoque nulla determinationum essentialium abesse, nec iis, quæ rei insunt, alia superaccedere, neque in ejus, quæ adest, locum diversa ab eadem substitui potest (§. 291. Ontol.); posita essentia rei ponitur quoque ejus perfectio essentialis, ab ea prorsus inseparabilis. Cum itaque fieri non possit, ut perfectio essentialis ulla capiat incrementa; ea omnino perfectio, ad quam homo dirigere debet secundum Dei voluntatem actiones suas, & quam promoveri iisdem vult Deus, essentialis esse nequit. Enimvero præter perfectionem essentialem, quæ consensu determinationum essentialium continetur, & perfectionem accidentalem, quæ dicit consensum determinationum accidentalium cum essentialibus, alia concipi nequit (§. 528. Ontol.). Perfectio igitur hominis statusque ejusdem, ad quam Deus vult ut actiones suas dirigat, vel quam Deus vult ut actionibus suis promoveat, accidentalis est.

Demonstratio propositionis præsentis abstracta est, qualis convenit propositioni abstractæ. Ipsa autem propositio ideo contemnenda non est, quod sit abstracta: ejus enim usus indemonstrandis aliis mox elucescet. Non putandum est veritatem omnem adeo obviam esse sensui, ut per imagines rerum pateat.

§. 913.

*Actio naturalis
quenam
sit.*

Actiones naturales dicuntur, quæ ab arbitrio nostro minime pendent, aut, quæ ex essentia & natura rei necessario consequuntur. Opponuntur liberis, quæ ab arbitrio nostro pendent, seu ex essentia & natura rei non necessario consequuntur,

PP 752

E. gr.

E. gr. Actio naturalis ventriculi est digestio ciborum: hæc enim arbitrio nostro minime subiecta, cum cibos digerat ventriculus, quemadmodum per causas naturales fieri potest, siue velimus, siue nolimus. Ingestio cibi vero in os & ejus deglutitio, quæ in ventriculum demittitur, est actio libera: etenim in arbitrio nostro positum est, utrum cibum in os ingerere ac deglutire velimus, nec ne.

§. 914.

Si actiones libere tendere debent ad perfectionem nostram Identitas statusque nostri, cum naturalibus per easdem rationes finales determinari debent. Cibus a ventriculo digeritur, ut corpori alendo inserviat. Quoniam ventriculus vi structuræ suæ hunc habet usum, ut cibum digerere possit, & cibus digestus usui est in corpore alendo; usus vero rerum naturalium sunt fines a Deo intenti (§. 648.) : Deus homini ventriculum cedit, ut alimentis conservari possit. Atque adeo digestio cibi in ventriculo determinatur per conservationem corporis, tanquam rationem finalem (§. 932. Ontol.). Dico igitur, quod ingestio cibi in os ac ejus deglutitio per eandem rationem finalem determinari debeat, scilicet quod in os non sit ingerendus, nec ingestus deglutiendus, nisi qui conservationi corporis conducit, si hæc actio dirigenda ad perfectionem corporis humani. Etenim perfectio essentialis ventriculi consistit in aptitudine, quam per structuram suam, adeoque essentialiam suam habet (§. 276. Cosmol.), digerendi cibos & perfectio corporis humani qua vivi in eo, quod per structuram seu essentialiam suam aptum sit ad conservationem sui. Digestio itaque cibi est actio ventriculi, eaque naturalis (not. §. 913.), non modo conveniens perfectioni ventriculi, verum etiam tendens ad perfectionem status interni corporis humani, conservationem nimirum ipsius. Quod si ergo ponamus, hominem assumere cibos sanitati corporis nocuos eosque deglutire; actio hæc li-

bera (*not. §. cit.*) contrariatur perfectioni corporis essentiali, adeoque & accidentali (§. 528. *Ontol.*) , consequenter ad eandem non tendit. Quamobrem si ad eam dirigenda, non assumendus, nec deglutiendus est cibus, nisi quem sanitati conducere novimus, consequenter actio libera determinanda est per eandem rationem, per quam determinatur naturalis.

Poterat idem fine applicatione ad exemplum aliquod speciale ostendi hoc modo. Ponamus actionem liberam per aliam rationem determinari, quam naturalem. Quoniam consensus consistit in tendentia ad idem aliquod obtinendum (§. 503. *Ontol.*) ; actiones liberæ cum naturalibus minime consentiunt, consequenter cum perfectio consistat in consensu, qui datur in varietate (§. *cit. Ontol.*) , nulla quoad actiones inest statui hominis perfectio (§. 705. *Ontol.*). Et quia homo, quemadmodum ens omne, perfectus est, quatenus determinationes intrinsecæ per rationem quandam generalem explicari possunt (§. 530. *Ontol.*) ; actiones liberæ per aliam rationem, quam naturales, ex essentia rei necessario consequentes (§. 913.), determinatæ ad perfectionem hominis statusque ejusdem tendere nequeunt. Necesse igitur est ut per eandem determinentur, qua determinantur naturales, siquidem ad perfectionem hominis dirigendæ.

Directe ostenditur hoc modo. Homini non potest tribui perfectio, nisi quatenus determinationes intrinsecæ per rationem quandam generalem explicari possunt (§. 530. *Ontol.*). Et idem eodem modo intelligitur de statu ejus extrinseco, utpote qui per mutabilia extrinseca, adeoque determinationes extrinsecas (§. 122. *Ontol.*) , constituitur (§. 706. *Ontol.*). Quoniam actiones sunt status mutationes (§. 713. *Ontol.*), consequenter cum constanter non in finit subjecto (§. 290. *Ontol.*) modi (§. 151. *Ontol.*) , atque adeo in accidentium numero (§. 779. *Ontol.*); quin omnes tam naturales, quam liberæ per eandem

dem rationem determinari debeant, siquidem ad perfectionem hominis dirigendæ, dubitandum non est.

Identitas determinationis actionum naturalium & liberarum maximi momenti est in demonstranda moralitate actionum, quemadmodum ex jure naturali constabit. Ipsum principium cum sit admodum abstractum, nemo miretur demonstrationem ex principiis abstractis constari. Quoniam tamen hæc non sunt ad omnium palatum, quorum interest nosse actionum naturalium & liberarum determinationem per easdem rationes finales; consultum omnino nobis visum fuit, primo loco præmittere demonstrationem ad casum aliquem specialem applicatam, ut nascatur in animo idea exemplaris, qua lux affunditur demonstrationibus abstractis. Quamobrem conducit demonstrationem primo loco positam sibi reddere familiarem, antequam abstractas meditemur: quod qui faciunt hunc simul experientur usum, ne in applicando principio fecundissimo hæsitent, nec applicatione peccent. Juvat quoque propositio præsens attentionem, qua in determinandis actionibus liberis opus est, ne ejus defectu ab illarum rectitudine deviemus. Quanti vero sit hic usus, tum demum comprehendere licebit, ubi omnimodam actionis rectitudinem distincte explicaverimus.

§. 915.

Quoniam Deus vult, ut actiones liberas dirigamus ad nostri ac aliorum perfectionem (§. 905. 909.), hæc autem ipsæ actiones huc dirigi nequeunt, nisi cum naturalibus per easdem rationes finales determinantur (§. 914.); Deus utique vult, ut actiones liberas per easdem rationes finales determinet homo, per quas determinantur naturales.

*Identitas
determina-
tionum na-
turalium
& libera-
rum volun-
tati divine
conformis.*

Ita e. gr. patet, velle Deum, ut homo vescatur cibo, qui sanitati conducit, ut adeo, qui voluntati divine convenienter cibis frui voluerit, eos seligere debeat, quos sanitati minime nocuos experitur. Similiter liquet velle Deum, ut homo

eam capiat cibi quantitatem, quam sanitas conservanda fuerit.

§. 916.

*Diversitas
determina-
tionis vo-
luntati di-
vine con-
traria.*

Quia voluntati divinae conformis est determinatio actionum liberarum per easdem rationes finales cum naturalibus (§. 915.); ultro liquet determinationem actionum naturalium & liberarum per rationes finales diversas voluntati divinae contrariari, consequenter *Deum nolle, ut homo actiones liberas per diversas rationes finales determinet, quam per quas naturales determinantur.*

Determinatio actionum naturalium ab essentis rerum pendens (§. 913.) a Deo est, qui rebus hasce essentias dedit, quatenus eas existere decrevit ab aeterno ac in tempore ad actum perduxit. Sibi metipso adeo foret contrarius, si vellet actiones liberas per rationes diversas ab iis determinari, per quas determinantur naturales. Ita fieri non potest, ut Deus velit, hominem vesei cibi sanitati nocuis, qui vult hominem esse sanum ac eam fecit corporis humani structuram, ut singulae organorum vitalium functiones ad conservationem ejus pulcherrime conspirent.

§. 917.

*Perfectio
hominis in
quo con-
sistat.*

*Perfectio hominis consistit in aptitudine representandi perfectionem Dei summam, seu manifestandi gloriam ipsius. Homo enim, quatenus ens est, Deum repraesentat tanquam ens a se & necessarium, quod intellectu, voluntate & potentia praeditum, & vi immutabilis ejus decreti autorem sui agnoscit (§. 818.); quatenus vero cum ceteris in systema relatum, eum repraesentat tanquam sapientem & bonum, eundemque omniscium ac summa ratione praeditum (§. 819.). Quamobrem cum ens sit per determinationes essentielles, unde cetera pendent (§. 168. Ontol.), & vi eundem cum rebus ceteris in systema redigi possit (§. 167. Ontol.); determina-
tiones*

tliones essentielles ac ceteræ independentes hominem aptum efficiunt ad repræsentandam perfectionem Dei. Quoniam itaque determinationes omnes essentielles ac ceteræ inde necessario resultantes tandem ad repræsentationem perfectionis divinæ tendunt; perfectio hominis, tam essentialis, quam accidentalis naturalis (§. 528. *Ontol.*), in aptitudine repræsentandi perfectionem Dei summam consistit. Quodsi actiones liberæ per easdem rationales finales determinentur, per quas determinantur naturales, quemadmodum vult Deus (§. 915.); eadem quoque ita determinandæ sunt, ut homo per eas aptus efficiatur ad repræsentandam perfectionem ipsius summam. Unde quæ hinc nascitur perfectio (§. 503. *Ontol.*) eaque accidentalis (§. 528. *Ontol.*), etiam quatenus a libertate ejus pender, in aptitudine repræsentandi perfectionem summam Numinis consistit. Enimvero præter perfectionem essentialem & accidentalem, cum naturalem, seu necessariam, tum eam, quæ a libertate ejus pender, non concipi potest alia. Quamobrem omnis perfectio hominis consistit in aptitudine repræsentandi perfectionem Dei summam seu manifestandi gloriam ejus.

Quæ supra prolixè annotavimus, cum evinceremus perfectionem mundi in aptitudine patefaciendi summam Dei perfectionem consistere (§. 673.); hic quoque probe expendenda veniunt. Nimirum aptitudo ista repræsentandi perfectionem Dei summam perfectio generalis est, unde deinceps cetera ad perfectionem hominis essentialem atque accidentalem spectantia vi essentiae consequuntur: sit ita quod nos ex essentialibus determinationibus primum concludamus perfectionem specialem, ac deinde ab hac tandem ascendamus ad generalem. Ceterum hæc propositio maximo usui est in philosophia practica: id quod inprimis elucescet, ubi ostendemus, quomodo officia hominis erga Deum ad gloriæ divinæ illustrationem tandem redeuntia diffundantur per omnia

omnia officia reliqua & omnes adeo hominis actiones liberas. Taceo ea, quæ per hanc propositionem in Theologia revelata clarius intelliguntur: quo refero gravitatem peccati, quæ multum momentum in ea habet. Utinam omnes veritatem hujus propositionis perciperent, ut intelligerent, qualis homo esse debeat, & longe aliam ipsi convenire vitam, quam quæ vivitur, & aliam beatitudinem, ac felicitatem, quam quæ quæritur. Sed de his suo tempore suoque loco dicemus plura.

§. 918.

Voluntas Dei de directione actionum humana-rum ad sui gloriam. Deus vult, ut homo dirigat actiones suas liberas ad manifestationem gloriæ divinæ. Vult enim Deus, ut homo dirigat actiones suas ad perfectionem sui (§. 905.). Quoniam itaque perfectio hominis in aptitudine manifestandi gloriam Dei consistit (§. 917.); necesse est ut Deus velit hominem actiones suas dirigere ad gloriæ divinæ manifestationem.

Vulgo dicitur, hominem dirigere debere actiones suas ad gloriam Dei; sed cum demonstrativa methodo utamur, propositiones ita enunciandæ sunt, ut cum principiis anterioribus consentiant. Propositio præsens iis consentientibus ita etiam efferri poterat, quod Deus velit aptitudinem hominis representandi ipsius perfectionem summam, seu promovendi gloriam ejusdem.

§. 919.

Quomodo gloria Dei manifestare potest gloriam divinam, quam si attributa divina manifestentur per actiones liberas. Homo per determinationem actionum liberarum non aliter manifestare potest gloriam divinam, quam si attributa divina per modum motivorum in eandem influant, seu, quod perinde est, si attributa divina sint motiva actionum liberarum. Et enim motiva sunt ratio sufficiens actuum volitionis & nolitionis (§. 887. Psychol. empir.). Quamobrem cum posita ratione sufficiente ponatur id, quod propter eam potius est, quam non est (§. 118. Ontol.); positis motivis ponuntur volitiones ac nolitiones animæ, consequenter per motiva volitiones atque nolitiones.

nolitiones determinantur (§. 113. *Ontol.*). Quod si jam homo per determinationem actionum liberarum gloriam divinam promovere debet, necesse est ut verbis factisque testetur, se agnoscere perfectionem Dei absolute summam & quod eadem gaudeat pro certo habere (§. 610.). Quamobrem aliter fieri nequit, ut per determinationem actionum liberarum gloriam divinam promoveat, quam si perfectiones divinæ aut, si mavis, attributa Dei sint motiva actionum liberarum.

Idem etiam ostenditur hoc modo. Quoniam homo gloriam divinam promoveret, quatenus verbis factisque testatur, se agnoscere perfectionem Dei absolute summam & quod eadem gaudeat pro certo habere (§. 610.); per actiones liberas eandem aliter promovere nequit, quam si ex attributis divinis intelligitur, cur hoc potius velit, quam nolit, & vicissim hoc potius nolit, quam velit. Enimvero ex motivis volendi intelligimus, cur quid potius velimus, quam non velimus, & ex motivis nolendi perspicimus, cur quid potius nolimus, quam non nolimus (§. 888. *Psychol. empir.*). Quamobrem per actiones liberas gloriam divinam promovere aliter nequit homo, quam si attributa divina sint motiva volendi ac nolendi.

Principium hoc fecundissimum est in explicandis hominis erga Deum officiis, præsertim ubi ostendendum, quomodo homo per actiones quascunque liberas gloriam divinam promovere vel illustrare debeat: id quod absque ejus ope ostendi haud quaquam potest. Applicatione hujus principii universa philosophia practica alienam prorsus induit formam, & actiones bonæ a malis facillime distinguuntur.

§. 920.

Deus vult, ut homo actiones suas dirigat ad perfectionem Voluntas totius universi. Vult enim ut dirigat actiones liberas ad sui Dei de aliorumque ac status sui & aliorum perfectionem (§. 905. 909.). rectione a-
(*Wolfii Theol. Natur.*) R r r r r Quam- *tionum*

*liberarum
respectu
universi.*

Quamobrem cum perfectio hominis omnis consistat in aptitudine repræsentandi perfectionem Dei summam (§. 917.), non potest non velle, ut ita actiones suas liberas dirigat, quo quoad perfectionem accidentalem, quæ ab iis pender (§. 912.), tum ipse, tum alii apti sint ad repræsentandum perfectionem divinam. Enimvero perfectio totius mundi consistit in aptitudine patefaciendi perfectionem Dei summam (§. 673.) & creaturæ omnes sunt specula perfectionum divinarum (§. 785.), quatenus per determinationes ipsis intrinsecas colligi potest, qualia sint attributa divina (§. 784.), adeoque perfectionem Dei summam repræsentant. Quamobrem patet, velle Deum, ut homo actiones suas dirigat ad perfectionem totius universi.

Homo tanquam creatura Dei (§. 782.) quoad determinationes essentielles & quæ inde pendent accidentales, quatenus libertas hominis in eas minime influit, quemadmodum creaturæ ceteræ, quæ hoc universum constituunt, perfectus est: alias enim totus mundus non esset omnium possibilium perfectissimus (§. 326.). Immo si prolixioribus esse liceret, eaque supponi possent, quæ de structura corporis humani & ejus cum anima harmonia suo tempore apertius dicemus, ex ipsa notione perfectionis (§. 503. & seqq. *Ontol.*) demonstrari poterat eodem prorsus modo, quo idem de oculo ostendimus (*not. § 503. Ontol.*) & de vita hominis indicavimus, cum definitionem perfectionis in genere illustraremus. Vi hujus perfectionis homo perinde ac creaturæ ceteræ omnes aptus est ad perfectionem divinam repræsentandam, quatenus inde colligere datur, quænam sint attributa divina, quemadmodum prolixè satis docuimus (§. 799. & seqq.). Et hoc pacto hominis quemadmodum totius universi perfectio tandem redit ad aptitudinem patefaciendi perfectionem Dei summam, seu manifestandi gloriam ipsius (§. 673.). Quodsi homo actiones suas liberas dirigit ad sui aliorumque perfectionem; quæ ab iisdem pendent non minus, quam essentialis, eum aptum efficiunt ad attributa divina repræsentanda, determinationibus accidentalibus cum essentialibus consentienti-

bus

bus, utpote per easdem rationes finales cum naturalibus determinatis (§. 914.). Quod si porro actiones liberae per attributa divina tanquam motiva determinantur, libertatis quoque usu homo gloriam divinam manifestat & sic quoque qua libera creatura perfectionem Dei repraesentat; quatenus ex hac liberarum actionum determinatione perspicitur, quod Deum ea perfectione praeditum agnoscat, quae ipsi competit. Major ergo aptitudo repraesentandi perfectionem Dei in homine concipi nequit, adeoque vi ejusdem dignissimus, qui locum teneat in serie rerum perfectissima, ad summam Dei perfectionem repraesentandam apta (§. 673.). Liquido igitur constat hoc pacto hominem actiones suas liberas ad perfectionem totius universi dirigere, consequenter Deum, qui vult, ut easdem ad sui & aliorum perfectionem dirigat & per attributa divina tanquam motiva determinet, velle ut easdem dirigat ad perfectionem totius universi. Sublimis haec veritas, quae vulgo non agnoscitur, maximi momenti est non minus in philosophia morali, quam in omni religione tam naturali, quam revelata. Quamobrem nec piguit eam explicare uberius. Quomodo ex iis, quae de voluntate divina quoad directionem actionum liberarum hominis diximus, deducatur concursus Dei ad actiones bonas, sequente demum capite docere licebit.

§. 921.

Deus velle nequit, ut actiones suas liberas homo dirigat ad imperfectionem totius universi. Vult enim ut dirigat ad perfectionem totius universi (§. 920.). Quamobrem cum fieri non possit, ut idem simul velit & non velit (§. 28. Ontol.); nec velle potest, ut eas ad imperfectionem totius universi dirigat.

Directio actionum voluntati divinae contraria.

Quod igitur id faciant homines, saltem sit Deo permitte, quemadmodum jam supra evicimus (§. 888.). Non vero est, quod excipias, quoniam mundus foret perfectior, si homines actiones suas liberas omnes dirigerent ad perfectionem

ctionem universi, mundum hunc non posse esse omnium possibilium perfectissimum. Etenim si homines actiones suas liberas non dirigant ad perfectionem totius universi, sed potius ad imperfectionem ejusdem; id saltem arguit imperfectionem accidentalem in homine, adeoque in parte. Quamobrem cum imperfectio in parte non tollat perfectionem in toto, sed facere possit ad majorem perfectionem totius, quatenus admissa hae imperfectione in parte propter rerum omnium nexum perfectioni in toto locus est, qua alias careret; nihil hinc adversus summam mundi totius perfectionem concluditur. Enimvero hae satis aperta sunt per ea, quae de malo morali demonstrata sunt in superioribus (§. 550. & seqq.). Actiones enim liberae malae sunt, quae tendunt ad imperfectionem hominum atque totius universi. Unde & hinc patet, Deum hanc directionem velle non posse: quia certum est cum velle non posse malum morale (§. 581.).

§. 922.

Providentia quid sit. Decretum Dei de conservatione & gubernatione rerum omnium in hoc universo & concursu ad earundem actiones dicitur *Providentia divina*. Et hinc Deus rebus *providere* dicitur, quatenus eas conservat & gubernat atque ad actiones earundem concurrat.

Terminus providentiae cum apud philosophos, tum apud Theologos receptus. Quamobrem nostrum quoque fuit eodem uti, ne incautis rem ipsam negare videamur, dum a termino abstinemus.

§. 923.

An detur. *Datur Providentia divina.* Etenim Deus creaturas omnes conservat, nulla seipsam conservare valente (§. 843.), ad singulas earundem actiones concurrat (§. 874.), ne malis quidem hominis exceptis (§. 883.), quatenus physice spectantur (§. 884.), atque hoc universum gubernat (§. 900.). Quoniam itaque

que Deus , qui omnes rerum materialium effectus & omnes nostras cogitationes, seu, quicquid in hac rerum serie in tempore existit, ab æterno præscivit (§. 524.), in tempore faciat, quemadmodum decrevit (§. 525.) ab æterno (§. 504.); quin ab æterno rerum omnium in hoc universo conservationem ac gubernationem & concursum ad actiones quascunque earundem decreverit, dubio prorsus caret. Atat decretum Dei de conservatione & gubernatione rerum omnium in hoc universo atque concursu ad quascunque earundem actiones est ipsa providentia divina (§. 922.). Patet itaque dari providentiam divinam.

Qui adeo providentiam Dei negant, dependentiam mundi & omnium, quæ in eo sunt, a Deo minime agnoscunt, sed eum ab ipso prorsus independentem fingunt: sit ita, quod creationem seu ortum mundi a Deo in dubium non vocent.

§. 924.

Providentia divina æterna & immutabilis est. Est enim *Immutabi-* providentia decretum Dei de rebus conservandis & gubernan-*litas pro-* dis, & concursu ad earundem actiones (§. 922.). Sed decre-*videntie* tum Dei æternum (§. 504.) atque immutabile est (§. 509.). *divinae.* Providentia igitur divina æterna & immutabilis est.

Nimirum Deus providens rebus creatis quoad conservationem & gubernationem earundem non hodie demum statuit, quid fieri debeat, sed idem jam decrevit ab æterno, nec ulla adest decreti immutandi ratio. Factum hoc est vi præscientiæ divinæ infallibilis: unde & vulgo doctrina de præscientia divina ad providentiam referri solet. Absit autem, ut quis sibi persuadeat, æternitate & immutabilitate tolli providentiam aut in fatalem necessitatem converti. Qui enim ita sentiunt, effectum præscientiæ divinæ minime capiunt. Finge parentem, quamprimum infans nascitur, præscire omnia, quæ per totum vitæ tempus, quod exacte præcogni-

tum habet, ipsi sunt eventura, seu, ut magis philosophice dicamus, prævidere omnes circumstantias, in quibus infans per totum vitæ tempus successive sit constituendus. Quod si j in simul decernit, quid facere in quocunque casu, & quomodo actiones ejus dirigere & conservationi ejusdem prospicere velit, ac deinceps hoc suum propositum, a quo ut recedat casu existente nulla ratio ex improvise emergens suadere potest, continuo exequatur; nonne perinde fiunt omnia, ac si in dato demum casu initio consilio demum decernatur, quid fieri debeat, & decretum recens executioni demandetur. Sit ita, quosdam ex æternitate ac immutabilitate providentiæ divinæ fatalem rerum necessitatem intulisse: an ergo veritati quicquam derogatur, quod quidam eam male capientes inde intulerint, quæ nullo consecutionis filo consequuntur? Ostendendum potius nullam esse consequentiam: id quod satis perspicuum est iis, qui superiora satis percepere, quæ de præscientia divina, salva libertate humana, & de dependentia mundi a libero Dei decreto abunde demonstrata sunt. Si quis vero hebetior fuerit, quam ut longam concatenatarum demonstrationum seriem capere possit, aut nimis impatiens, quam ut eam afferre velit attentionem, qua opus est; is agnoscat, suum non esse, ut statuat de rebus captum ejus transcendentibus, & fidem habeat illorum dictis; quibus veritatem profundam penitus inspicere datum est. Si qui fuerint philosophi acumine præditi, qui providentiam divinam in fatalem rerum necessitatem converterunt; illi eandem ex immutabilitate ac æternitate providentiæ divinæ non intulerunt; etsi nec ea concipi possit nisi æterna atque immutabilis, sed ex alio fonte error eorum profluxit, veluti juxta *Spinosam* ex necessaria mundi a Deo dependentia creationis actu æterno ac in se immutabili.

§. 925.

Obiectum providentiæ divinæ. fiunt in hoc universo, nec quicquam judicari debet adeo abjectum, ad quod sese non extendat providentia divina. Etenim crea-

creatura nulla, qualiscunque tandem sit, seipsam conservare potest, sed omnis a Deo conservetur necesse est (§. 843.). Similiter nulla datur creaturæ cujuscunque actio, ad quam Deus non concurrat (§. 874.) & quam gubernans hoc universum (§. 900.) non dirigat ad certum finem (§. 899.). Quamobrem cum providentia divina versetur circa ea, quæ a Deo conservantur atque gubernantur & ad quorum actiones concurrat (§. 922.); providentia divina sese extendit ad omnia, quæ sunt ac fiunt in hoc universo.

Quodsi vero omnia, quæ sunt ac fiunt in hoc universo, providentiæ divinæ subiunt, quemadmodum modo demonstravimus; nihil quoque nominari potest, quod ab eadem sit eximendum, consequenter nihil adeo abjectum judicari potest, ad quod providentia divina sese non extendat.

Universalitas providentiæ divinæ adeo obvia est, ut mirum omnino videatur, qui fieri possit, ut a nonnullis in dubium revocetur. Apparet vero esse eos, qui de universalitate illius dubitant, a notionibus distinctis procul remotos & judicium sibi sumere de rebus, quas per notiones confusas tanquam per transennam inspiciunt. Cum sibi multa videantur adeo abjecta, ut eorum cura ipsos minime tangat; Deum, ens summum, multo magis fastidire debere colligunt, quæ exigui vel nullius usus videntur. Enimvero mox ostendemus, quæ nobis ex parte nostri nullius usus vel exigui admodum videntur, talia non esse judicio Dei. Ceterum universalitas providentiæ divinæ magnum pollicetur, immo maximum usum in moralibus, præsertim ubi de fiducia erga Deum & de patientia agitur.

§. 926.

Quoniam nihil censeri debet adeo abjectum, quod non *Universalitas decretum est de rebus conservandis & gubernandis (§. 922.), ti divini.*
nihil

nihil quoque adeo abjectum videri debet, cujus Deus non habuerit rationem, cum conservationem ac gubernationem hujus universi decerneret, & cujus conservationem & gubernationem non decreverit ab æterno (§. 504.).

Avicula, quæ decipula capitur, res vilis æstimatur. Sed vi corollarii præsentis Deus ab æterno decrevit, quod eo momento, quo capitur, capi debeat. Et quia de ejus conservatione statuit decreto suo æterno: non interire potest nisi eo momento, quo ejus interitum decrevit. Ceterum cum Deus malum morale tantummodo permittere decreverit (§. 585.), nec ad actiones malas quæ tales concurrat (§. 884.); cavendum ne decretum divinum, quo rebus singulis providetur, in præjudicium Numinis interpretemur: id quod facile evitabitur, si quæ de concursu Dei ad actiones malas dicta sunt, immo in genere de malo morali passim tradita, probe perpendantur.

§. 927.

Providentia divina quomodo executioni detur.

Deus providet rebus per nexum rerum in hoc universo. Etenim mundum gubernat, dum omnia inter se connectit (§. 901.), & vel experientia obvia constat, corpora quoad conservationem pendere a corporibus aliis, consequenter quæ corpora rationem conservationis suæ habere in aliis corporibus (§. 851. *Ontol.*), adeoque vi nexus rerum conservari (§. 10. *Cosmol.*). Quamobrem cum Deus rebus provideat, quatenus eas conservat atque gubernat (§. 922.); per nexum rerum in hoc universo iisdem providet.

Quod rerum materialium una concurrat ad conservationem alterius, non multa attentione cognoscitur. Hinc Scholastici dixerunt: nullum corpus posse conservare seipsum, Deum tamen dare corporibus facultatem conservandi alia. Qui nexum rerum ex Cosmologia perspectum habet, & rerum materialium dependentiam quoad actum a ceteris intime perspectum (§. 83. *Cosmol.*); is conservationem unius per alias a priori

priori agnoscit. Quoniam decretum, quod providentiam appellamus (§. 922.), per nexum rerum exequitur Deus, quoad gubernationem non solum, verum etiam conservationem rerum in mundo adspectabili; providentiam divinam plenius agnoscit, qui nexum istum profundius scrutatur. Oppido igitur falluntur, qui nexum rerum sapientem cum fatali necessitate confundentes sibi ac aliis persuadere conantur, tolli per eum providentiam divinam. Quod si hoc ipsum animos eorum anxios tenet, quod res æterno ac immutabili decreto inter se sint connexæ; dubium hoc jam sustulimus in anterioribus (not. §. 901. 924.), & quæ de modo providendi dicemus, nebulas omnes prorsus dispellent. Notandum vero dubia, quæ ab æternitate & immutabilitate decreti oriuntur, non esse alia, quam quæ perplexos reddunt eos, qui præscientiam divinam non capiunt: id quod mirum videri non debet, cum præscibilitas a nexu rerum (§. 232.), ipsa autem præscientia a decreto pendear, quo nexus rerum statutus (§. 528.), consequenter ab ipsa providentia (§. 922.).

§. 928.

Deus sapientia, bonitate ac potentia providet rebus. Pro-Dependen-
videt enim rebus per nexum earundem cum aliis (§. 927.). tia pro-
Nexus vero rerum sapientia ac bonitate Dei simul constitutus est videntia
(§. 741.). Deus igitur sapientia ac bonitate sua rebus provi- a sapientia
det, bonitate ac

Enimvero Deus quoque rebus providet, quatenus eas con- potentia
servat (§. 922.). Quamobrem cum potentia conservatrix sub- Dei.
stantiarum seu rerum quoad substantialitatem soli Deo propria
(§. 855.), sine hac conservatione vero divina, qua Deus rebus
largitur vires agendi (§. 876.), nihil in rerum natura ad aliorum
corporum ortum & conservationem quicquam conferre possit
(§. 856 869); Deum etiam potentia sua rebus providere
palam est.

Hinc liquet decretum Dei, quo sapientiæ ac bonitati suæ convenienter actum hujus nexus rerum, qui in universo observatur, determinavit, esse providentiam divinam, non quatenus omnia naturali quadam necessitate ex essentiis rerum consequuntur, sed quatenus hic ipse nexus per essentias rerum possibilis sapientia ac bonitate divina constitutus. Ex eo autem intelligitur, cur quidam fatum Stoicorum, quod per optimum ac sapientissimum rerum nexum interpretantur, ab impietate & absurditate absolvant, eidem objecta ab aliis, qui idem cum necessaria rerum concatenatione, qualem defendit *Spinoza*, unum idemque esse sumunt. Nobis perinde est, quid Stoici statuerint: sufficit demonstrasse, quo respectu nexus rerum in hoc universo referatur ad providentiam divinam.

§. 929.

Ordo naturæ & directio malorum ad bonos fines una cum ea & per eorum permissione pertinet ad providentiam divinam. Etenim *nammissio ac directio malorum ad bonos fines pertinet ad gubernationem universi (§. 904).* Sed quæ Deus de gubernatione rerum decrevit, ea pertinent ad providentiam divinam (§. 922.). Quamobrem ordo naturæ & directio malorum ad bonos fines pertinet ad providentiam divinam.

Deus mala permittere decrevit (§. 585.). Quodsi permissionem non decrevisset, nec de ejus directione ad bonos fines decernere quid potuisset. Quoniam itaque decretum de directione mali supponit decretum de permissione & idem ad providentiam divinam spectat *per demonstrata*; mali quoque permissio ad providentiam divinam pertinet.

Cum providentia divina plurimum influat in praxin, non inutile est specialius quædam recenseri, quæ ad eandem spectant, ne demum opus sit per illationem eadem colligi, ubi iis habemus opus in demonstrando, vel eorum cognitio animum subire debet in praxi. Quamobrem ea etiam tantummodo recensemus, quæ huic usui inserviunt.

§. 930.

§. 930.

Quoniam ordo naturæ pertinet ad providentiam divi- *Naturalia*
 nam (§. 929.), quæ vero in mundo adspectabili fiunt, secun- *fiunt se-*
 dum naturæ ordinem fiunt (§. 566, *Cosmol.*) ; *Quæcunque na-* *cundum*
turaliter fiunt, secundum providentiam divinam fiunt. *providen-*

Qui sibi persuadent tolli providentiam divinam, si in mun- *tiam.*
 do adspectabili omnia fiant naturaliter, nec Deus actiones
 naturæ determinet aliter, quam quomodo vi essentiae ac na-
 turæ corporum consequuntur (§. 509. *Cosmol.*) ; illi provi-
 dentiae divinæ & attributorum Dei, sine quibus ea intelligi ne-
 quit, notionem non satis profunde introspiciunt. Condo-
 nandum hoc est vulgo : quod distincta rerum cognitione de-
 stituitur ; sed nec philosopho, nec Theologo, cujus rerum
 divinarum cognitio a cognitione vulgi in eo differre debet,
 quod sit distincta. Deus nimirum autor naturæ est (§. 822.),
 quæ agit secundum leges, eidem præscriptas (§. 826.) & vio-
 lari nescias (§. 827.). Unde est, quod dudum affirmaverint
 & philosophi, & Theologi, Deum in gubernando hoc uni-
 verso uti causis secundis, nimirum non defectu potentiae, sed
 vi sapientiae, cujus non minus, quam illius speculum est.

§. 931.

Quoniam permissio mali & ejus directio ad bonos fines *Fata fini-*
 ad providentiam divinam pertinet (§. 929.) ; *nihil nobis acci-* *stra homi-*
dere potest mali, quaecunque tandem sit, nisi Deo providente, num pro-
adeoque cum Deus rebus provideat sapientia ac bonitate sua videntia
 (§. 928.), *secundum sapientiam atque bonitatem ipsius.* *divine*

Probe hic notandum est, quod providentia divina exten- *subsumt.*
 datur ad maxima minima, ita ut nihil judicari possit adeo
 leve atque abjectum, quod eidem minime subsit (§. 925.).
 Ponamus e. gr. tibi ab altero unum evelli malo animo capil-
 lum : dubitandum non est, Deum evulsionem hanc vi provi-
 dentiae suæ permittere & ad bonum quendam finem dirigere,

quatenus vi sapientiae ac bonitatis summae saluti tuae prospicere ab aeterno decrevit. Et si hoc admodum paradoxum videatur ; rationi tamen convenientissimum vi demonstrationum anteriorum. Quamobrem & dubio caret, quod rationes sapientiae ac bonitati conformes deprehensus sit, qui ad ea, quae ex malo levissimo consequuntur, animum advertit in perscrutanda rerum mutua a se invicem dependentia acumine sufficiente usus.

§. 932.

*An fortuna
na provi-
dentiae di-
vine subsit.*

Fortuna pertinet ad providentiam divinam, aut si mavis, subest providentiae divinae. Est enim fortuna causarum quidam concursus, minime praevius (§. 540.), hominibus nimirum, non Deo fortunam omnem ab aeterno praescienti (§. 543.), & effectus illius sunt in numero finium a Deo intentorum, sive secunda fuerit, sive adversa (§. 651.), qui ab eo tam fini ultimo (§. 652.), quam aliis finibus particularibus ita subordinantur, ut sint media aliorum consequendorum (§. 654.). Quoniam itaque nexus rerum successivarum in hoc universo consistit in dependentia causati a causa & finis a medio & actionis causae efficientis a fine simul (§. 665.); quin fortuna in nexu rerum contineatur dubitari nequit. Enimvero Deus providet rebus in hoc universo per nexum rerum (§. 927.). Providet igitur etiam iisdem per fortunam cum secundam, tum adversam, adeoque fortuna pertinet ad providentiam divinam.

Idem etiam sic ostenditur. Cum fortuna sit causarum quidam concursus (§. 540.), adeoque in numero causarum naturalium contineatur, quin naturaliter fiant, quae fortuna eveniunt, dubitari nequit, modo istum concursum per exempla tibi clare ac distincte representaveris, quae in medium attulimus, cum definitionem fortunae recepto usui loquendi conformem evinceremus (§. 541.). Enimvero quicquid naturaliter fit, providentiae divinae est (§. 930.). Quamobrem quod for-

fortuna evenit, providentiæ divinæ tribuendum, adeoque fortuna eidem subest.

Continetur fortuna qua talis, hoc est, qua concursus causarum minime prævisus (§. 540.), utpote vi decreti divini futura facta ab æterno (§. 544.), in æterno isto ac immutabili decreto divino, quo rebus universis consulitur, & quod providentiam appellamus (§. 922.). Quando itaque in propositione præsentē affirmamus, fortunam pertinere ad providentiam divinam; hoc ipsum nobis volumus, quod ea, quæ sunt fortunæ, simul contineantur in numero illorum, quæ de conservatione ac gubernatione rerum in hoc universo a Deo fuere ab æterno decreta. Et quatenus Deus vi hujus decreti dirigit effectus fortunæ ad certos fines (§. 654.), perinde ac effectus ceteros naturales (§. 633. 645.); fortuna eodem modo subest providentiæ divinæ, quo subsunt cetera omnia. Quemadmodum adeo quædam sunt Deo volente, quædam eodem nonnisi permittente, aut, ut alii loqui amant, alia sunt voluntate Dei plena, alia nonnisi permissiva, quam plenam non esse constat (§. 584.); ita etiam effectus fortunæ alios Deus vult, alios nonnisi permittit, quatenus nempe in causarum concurrentium numero etiam locus est malæ hominum voluntati. Ut paucis dicam, quæ de fortuna dicenda sunt, quatenus ad providentiam divinam refertur; cum ex parte Dei fortuna nulla sit, sed ipsi tantummodo locus sit in serie causarum naturalium ex parte hominis (§. 542.); quomodo res ceteræ omnes sese habent in decreto providentiæ divinæ, eodem quoque modo sese habet fortuna. Quamobrem quæ de rebus quibuscunque in hoc universo quoad providentiam divinam demonstrantur, tanquam de causis secundis, quibus utitur Deus rebus providendo, eadem etiam de fortuna omni tenenda sunt. Usui autem est in Moralibus fortunam a providentia Dei non excludi

§. 933.

Deus providentia sua enti cuicunque tantundem confert boni, Quomodo quantum salva sapientia ipsius fieri potest. Etenim Deus rebus Deus con-
Sss s s 2 pro-sulat crea-

turis providentia sua.

providet sapientia ac bonitate sua (§. 928.). Quoniam itaque bonus in alios bona pro virili, seu, quantum datur, conferre studet (§. 696.); Deus quoque, quantum per sapientiam ipsius datur, providentia sua enti cuicunque bona conferre studet, seu, quod perinde est, providentia sua tantundem confert boni, quantum sapientia ipsius salva eidem conferri potest.

Patet adeo providentiam divinam tendere ad bonum creaturæ cujuslibet, adeoque etiam hominis (§. 782.). Unde est, quod mala, quæ nobis eveniunt non nostra culpa, sed Deo providente, certo dirigantur ad bonum finem, nec nobis eveniant, nisi ut participes fiamus boni alias non obtinendi.

§. 934.

Idem ulterius deducitur.

Deus providentia sua tantundem ab ente quocunque arcet mali, quantum salva sapientia ipsius fieri potest. Etenim Deus enti cuicunque tantundem confert boni, quantum sapientia ipsius salva fieri potest (§. 933.). Enimvero nemo non concedit, bonum sibi esse, ut a malo immunis præstetur, seu evitacionem mali esse in bonorum numero. Quamobrem etiam patet, Deum providentia sua tantundem ab ente quocunque arcere mali, quantum salva sapientia ipsius fieri potest.

Hinc intelligitur, providentiam divinam tendere etiam ad arcendum malum a creatura qualibet, adeoque etiam ab homine (§. 782.). Unde est, quod mala, quæ a nobis habesse deprehendimus, cum in ea incidere non impossibile esset, providentia divina a nobis arceri certo persuasi esse debeamus.

Mala physica & moralia cur providentia non contrariantur.

§. 935.

Non repugnat providentiæ divinæ, quod Deus hominem in mala tam physica, quam moralia ruere sinat. Etenim bonitati divinæ non repugnat, quod Deus hominem in mala ruere sinat (§. 725.), neque is sapientia sua salva impedire potest, ne homo

homo in mala tam physica, quam moralia ruat (§. 726.). Quoniam Deus sapientia ac bonitate sua providet rebus (§. 928.); quod bonitati ac sapientiz ejus non repugnat, id nec providentiz divinæ contrariatur. Minime igitur repugnat providentiz divinæ, quod Deus hominem in mala tam physica, quam moralia ruere sinat.

Qui providentiam divinam in dubium vocant, vel eandem prorsus negare audent, a malis physicis & moralibus arma ad eandem oppugnandam petunt. Etenim cum Deus summe bonus sit, ita ut majorem bonitatem concipi posse repugnet (§. 699.); non dubitandum esse colligunt de sincera ejus voluntate obruendi hominem bonis omnis generis & arcendi ab eodem malum quodcunque. Cum sit omnipotens (§. 349.) atque vi omnipotentiz suæ facere possit, quod vult (§. 352.), non dubitari posse arbitrantur, quod Deus in hominem bonum quodcunque conferre & malum quodcunque ab eodem avertere queat. Providet Deus rebus bonitate ac potentia sua (§. 928.). Quamobrem si datur providentia divina, necesse est ut homo omni genere bonorum abundet, neque malo morali obnoxia fiant actiones ipsius, nec ipse ruat in mala physica. Contrarium cum loquatur experientia; nullam esse providentiam divinam exclamant. Enimvero falluntur in eo, quod bonitati divinæ repugnet, quod hominem ruere sinat in mala physica & moralia. Contrarium enim ostendimus supra (§. 725.). Falluntur non minus in eo quod Deus salva sapientia tollere possit malum omne: cujus itidem contrarium supra demonstravimus (§. 726.). Nulla igitur sunt arma, quibus adversus providentiam divinam pugnant.

§. 936.

Quod res una in universo faciat ad conservationem aliterum per
rius, id tribuendum est providentiæ divinæ. Cum enim pro- *causas se-*
 videntia divina sit decretum Dei de rerum non minus conser- *cundas est*
 vatione, quam gubernatione (§. 922.); quin providentiæ divi- *providen-*
 næ tribuendum sit quodcunque Deus de rerum conservatio- *tiæ divinæ.*
 ne-

ne decrevit, extra omnem dubitationis aleam positum est. Jam quæ vi nexus rerum quomodocunque in mundo consequuntur, ea voluntati divinæ conformiter fieri in ea, quam ad se invicem habent, relatione certum est (§. 447.), consequenter cum determinatio voluntatis divinæ ad aliquid agendum sit decretum divinum (§. 497.), constat Deum decrevisse, & quidem ab æterno, ut ea fiant, quæ vi nexus rerum in mundo hoc ad spectabili consequuntur. Quando itaque observamus, rem unam in hoc universo facere ad conservationem alterius, Deum ab æterno decrevisse patet, ut res una ab aliis & per alias conservetur, ac ideo eas produxisse (§. 525.) & conservare, ut per eas conserventur alie, consequenter quod res una in universo faciat ad conservationem alterius, id tribuendum est providentiæ divinæ.

Idem etiam ostenditur hoc modo. Quoniam providentia divina sese extendit ad omnia, quæ sunt ac fiunt in hoc universo (§. 925.); dubitari nequit, quin etiam extendatur ad ea, quæ res una confert ad conservationem rei alterius. Quamobrem quod res una faciat ad conservationem rei alterius, quin providentiæ divinæ tribuendum sit, negari haud quam potest.

E. gr. Animalia conservantur vegetabilibus. Nullum adeo dubium est, quin providentiæ divinæ tribuendum sit, quod terra edat gramina atque herbas & arbores ferant fructus & semina, ne animalibus desit pabulum unicuique eorundem speciei conveniens. Nec minus a providentia divina derivandum, quod tempestates eo alternent modo, ut gramina ac herbarum late crescant & arbores fructus ac semina ferant. Idem eodem modo dicendum est de iis omnibus, quæ ad conservationem corporis humani quomodocunque faciunt. Sed de hisce particularibus dicendum nobis erit in Telelogia, quæ nexum rerum quoad particularia contemplatur

platur in hoc mundo adspētabili observabilem. Sufficit in Theologia naturali explicasse principia generalia.

§. 937.

Quod unum inserviat usibus alterius in universo, tribuendum est providentiæ divinæ. Quoniam providentiæ divinæ usus sese extendit ad omnia in hoc universo (§. 925.), quin etiam sunt pro-
sese extendat ad usus, quos res in eodem sibi mutuo præstant, videntis
dubitandum non est. Quamobrem quod unum in hoc universo divinæ,
usibus alterius quomodocunque inserviat, providentiæ divinæ
utique tribuendum.

Poterat idem ostendi hoc modo. Bonitatis divinæ est, quod in hoc universo unum inserviat usibus alterius (§. 739.). Quoniam vero Deus etiam bonitate sua providet rebus (§. 928.); quin providentiæ divinæ tribuendum sit, quod bonitati ejusdem ferre acceptum tenemur, dubitandum non est. Quod itaque unum in hoc universo inserviat usibus alterius, tribuendum omnino est providentiæ divinæ.

Immo propositio præsens demonstratur etiam hoc modo. Deus rebus in hoc universo providet per nexum earum (§. 927.). Jam cum usus rerum sint fines a Deo intenti (§. 648.) & nexus rerum consistat in dependentia finis a medio (§. 665.); ad hunc referri debet, quod unum inserviat usibus alterius. Idem igitur tribuendum esse providentiæ divinæ palam est.

Propositio præcedens sub præsentē per modum corollarii subsumi poterat: si quod enim in hoc universo quicquam confert ad conservationem alterius; hoc ipso alteri aliquem sui præbet usum. Ita usus est graminum atque herbarum in alendis pecoribus; usus olerum ac carnium in alendis hominibus; usus insectorum in alendis avibus, quæ iisdem vescuntur. Ceterum propositio præsens principium fecundissimum est bonitatem & sapientiam divinam ex providentia agnoscendi.

§. 938.

Modus providendi. *fiunt*, attentus hodie demum decerneret, quid fieri debeat, seu, quid facere ac permittere velit. Cum enim Deus decernat, quod ipsum decet (§. 516.), consequenter cujus in attributis ipsius continetur ratio, cur hoc potius decernat, quam aliud (§. 332.), sit vero sapientissimus (§. 640.) ac summe bonus (§. 699.); si hodie demum attentus ad ea, quæ fiunt, quidpiam decerneret, non sane aliud decernere posset, quam quod salva ipsius sapientia ac bonitate decerni poterat. Quamobrem cum salva sua sapientia impedire nequeat, ne homo in mala physica & moralia ruat (§. 726.), nec bonitati ipsius repugnet, quod idem fieri permittat (§. 725.); si hodie demum quid decerneret, hoc tamen non obstante non impediret, quo minus homo in mala physica & moralia rueret. Quoniam tamen bonitatis divinæ est mala dirigere ad bonum finem (§. 733.) & physica immittere, ut adversus malum morale præmuniatur, vel ab eodem desistat (§. 734.), vel ut immittat malum physicum minus, vel etiam permittat morale minus, quo majus avertatur (§. 735.); quin Deus hodie demum quid decernens hoc atque mali permissionem ac directionem decerneret, dubitandum non est. Immo cum vi sapientiæ summæ omnia referre debeat ad finem ultimum & per modum mediæ subordinare fini ultimo (§. 689 *Psychol. ration.*); si quid hodie demum decerneret, non aliud decernere poterat quam quod sese habet per modum mediæ ad finem ultimum tendentis. Jam Deus æterno suo decreto quo providentia omnis continetur (§. 922), omnia in hoc universo sapienter, immo sapientissime decrevit (§. 643.), & enti unicuique tantundem conferre boni statuit, quantum sapientia ipsius salva fieri potest (§. 698.) consequenter bonitati suæ convenienter decrevit (§. 697.), ut ideo rebus singulis

gulis, qualescunque tandem fuerint (§. 926.), sapientia ac bonitate sua provideat (§. 928.). Mala physica non decrevit, quatenus talia sunt (§. 566.), adeoque non in relatione ad partes (§. 565.), sed potius ad totum universum (§. 563.), & moralia tantummodo permittit statuit (§. 585.), quatenus abusu libertatis irrepunt in actiones liberas (§. 580.), utrique in hac rerum serie faciens locum, quatenus salva sapientia summa tolli nequeunt (§. 676.). Mala autem tam physica, quam moralia dirigit ad bonum finem (§. 680.). Denique æterno suo decreto, quo providentia continetur (§. 922.), nihil eorum, quæ fiunt in mundo, absolute spectatum decrevit, sed in relatione ad totum (§. 519.), non constituens fines particulares nisi in relatione ad finem totius mundi (§. 626.). Quamobrem si Deus hodie demum ad ea, quæ singulis momentis fiunt in universo, attenderet ac inito consilio statueret, quid facere aut permittere velit; non aliud quidquam decernere poterat, quam quod decrevit ab æterno. Quoniam itaque æternum istud ac immutabile decretum providentia divina est (§. 922. 924.); Deus utique rebus singulis in hoc universo ita providet, ac si ad ea, quæ fiunt, attentus hodie demum decerneret, quod facere aut permittere velit.

Difficile est plurimis, immo difficillimum concipere, quomodo Deus omnia decernere potuerit ab æterno, salva libertate hominum, cum tamen providenti tribuatur, quod ob actiones naturales decernat eventus in mundo materiali. Inde est, quod alii libertatem in agendo negent; ac fatali cuidam necessitati omnia subiciant, providentiam divinam in eam convertentes; alii vero decreta particularia in tempore demum facta defendant, juxta quæ Deus causas secundas ad actiones determinat ex essentiis & natura earundem minime secuturas, providentiam divinam contingentium tollentes & naturale cum supernaturale confundentes, aut præternaturale quoddam fingentes, quod sit inter naturale & miraculo-

sum quasi intermedium. Error prior praxi nocet; posterior theoriæ. Etenim si inevitabili fato subjiciuntur omnia, ad male agendum proclives se satis excusatos arbitrantur, quod aliter agere non possint, & tanto evadunt audaciores, quanto certius esse existimant evitari non posse, quod est in fati, juxta illud vulgare: quod volunt fata, non tollunt vota. Et si error non noceat semper; nocere tamen potest sæpius, nempe ubi non agitur de evitando periculo manifesto imminente, sed de bono aliquo obtinendo, aut cupiditatibus explendis. Quod si vero decreta temporaria singas, quibus convenienter Deus determinat actiones, quarum sufficiens ratio non continetur in essentiis ac natura rerum, naturæ ordo a Deo continuo turbatur & ipsa mundi perfectio nulla est, quippe qui comparandus venit horologio continuis aberrationibus obnoxio, ut index singulis fere momentis vel sit promovendus, vel retro-agendus. Praxi autem error iste magis favet, quam nocet, ubi quis fuerit hebetior, quam ut capere possit, quomodo cum præscientia divina & futurorum contingentium determinata veritate ab æterno libertas hominis in agendo consistere possit. Unde videas vulgum non aliter sentire, quam quod Deus ad ipsorum actiones attendat & his convenienter decernat, quid in mundo materiali fieri velit, & tam causas secundas necessarias, quam liberas juxta istud decretum determinet, ut eidem convenienter agant, quod alias non egissent. Quoniam itaque hebetioribus difficulter persuadeas gubernationem rerum omnium divinam, errore isto sublato; ideo libuit propositionem præsentem demonstrare, ut appareat, errorem tolerari posse in iis, qui veritatem capere nequeunt. Qui vero hanc capere voluerit, ei perpendenda veniunt, quæ de præscibilitate rerum omnium, ipsarum etiam actionum liberarum hominis, in superioribus evidenter demonstrata sunt. Ita enim cum præscientia divina libertatem humanam & cum libertate ordinem naturæ ac totius universi perfectionem consistere deprehendet, nec quicquam sumendum erit, quod nullo experimento confirmari, nedum demonstrari possit.

§. 939.

Deus per concursum suum præsentia distinguit a præteritis Quomodo atque futuris. Quoniam in Deo continuo existit idea mundi *Deus præ-* hujus adspectabilis (§. 181.), Deus autem æternus est (§. 74.), *sentia a* omnia distincte cognoscit, quæ in eadem continentur (§. 156.), *præteritis* eademque intuitive (§. 207.) atque simul (§. 160.); omnia, quæ & *futuris* ad mundum præsentem quomodocunque spectant, Deo præ- *distinguat.* sentia sunt ab æterno in æternum, sive præsentia sint, sive præterita, sive adhuc futura. Enimvero Deus ad singulas actiones naturæ & singulas creaturarum actiones, immo actiones animarum tam hominum, quam brutorum, & quascunque hominum actiones concurrat (§. 874.), substantiam agentis cujuslibet conservando & vires agendi largiendo (§. 876.), quatenus actum indefinenter imperitur substantiis absque viribus istis, ex quibus nascuntur actiones (§. 723. *Ontol.*), existere minime valentibus (§. 877.). Quamobrem cum sibi conscius sit semper & sui, & eorum, quæ sibi repræsentat (§. 187.); quænam sint, ad quæ jam concurrat, hoc est præsentia cognoscit, adeoque a præteritis & adhuc futuris distinguit (§. 228.). Patet itaque Deum per concursum suum præsentia in hac serie rerum distinguere a præteritis atque futuris.

In confesso est apud omnes, Deo omnia esse præsentia ab æterno, ita ut quoad ipsum nihil dici possit præteritum, nihil futurum. Quamobrem capto difficile videbatur, quomodo eidem constare possit, quænam jam actu existant, adeoque præsentia sint; quænam existere desierint, adeoque præterita sint; quænam denique in posterum extitura, adeoque futura sint (§. 228.). Nostrum igitur erat docere, quomodo in serie rerum, qua Deo omnia tanquam præsentia exhibentur, ea tamen, quæ actu præsentia sunt, discernantur ab iis, quæ præterita & adhuc futura sunt. Dum vero modum explicamus, quo Deus præsentia agnoscit tanquam præsentia, nihil affir-

matur, quod non verum experiamur in nobismetipsis. Etenim nemo non ex eo cognoscit opus aliquod sibi præsens, cui conficiendo operam impendit.

§. 940.

*Quomodo
Deus præ-
terita &
futura
qua talia
agnoscat.*

Deus præterita tanquam præterita sibi repræsentat per dependentiam præsentium ab iisdem & futura tanquam futura per eorundem dependentiam a præsentibus. Deus in quolibet minimo, quod inest universo, cognoscit totum universum (§. 161.). Quamobrem cum cujuslibet in mundo existentia, immo modus quilibet determinetur per mundum integrum (§. 87. *Cosmol.*), adeoque præsens quoad actualitatem suam dependeat ab omnibus præteritis, & futura omnia a quolibet præterite (§. 116 851. *Ontol.*); Deus vero præsens a præteritis & futuris discernat per concursum suum (§. 939.): dependentiam quoque ejus, quod præsens esse cognoscit, ab omnibus præteritis & futurorum omnium a præterite distincte cognoscit. Præterita igitur sibi repræsentat tanquam præterita per dependentiam præsentium a præteritis & futura tanquam futura per eorundem dependentiam a præsentibus.

Atque adeo jam intelligitur, quomodo in rerum serie, quæ tota præsens est, simul a Deo, quatenus ejus idea continuo datur in intellectu ipsius, alia repræsententur tanquam præsentia, alia tanquam præterita, alia vero tanquam futura, ut adeo Deus exactissime norit, quænam quovis momento dato sint præsentia, quænam præterierint, quænam adhuc futura sint. Nemo non agnoscere tenetur possibilitatem hujus cognitionis, qui notionem intellectus divini & nexus rerum in universo distinctam habet.

§. 941.

*Cur Deus
omnium
recordetur,*

Deus recordatur continuo omnium præteritorum, nec ullius unquam oblivisci potest. Etenim Deus, qui omnia, adeoque

eoque præterita, præsentia atque futura, simul cognoscit (§. nullius 160.), per concursum suum præsentia a præteritis distinguit *obliviscatur* (§. 939.) & præterita tanquam præterita sibi repræsentat per *tur*. dependentiam præsentium ab iisdem (§. 940.). Quoniam itaque Deo tribuitur recordatio, quatenus præterita novit (§. 238.); eum continuo recordari omnium præteritorum patet. *Quod erat unum.*

Quoniam Deus continuo præterita sibi tanquam præterita repræsentat (§. 940.); fieri haud quaquam potest, ut id, quod in idea universi continuo ipsi præsentem (§. 181.) refert præteritum, agnoscat tanquam certo intervallo ante retulisse præsens, consequenter ut divino modo recognoscat præteritum (§. 173. *Psychol. empir.*). Quamobrem cum oblivio denotet impotentiam præterita recognoscendi (§. 215. *Psychol. empir.*); Deo utique rei nullius oblivio tribui potest. *Quod erat alterum.*

Posterior etiam hoc modo evinci poterat. In intellectu divino continuo datur ideatorius mundi adspectabilis (§. 181.); quæ cum Deo essentialis sit (§. 188.), ob essentialium immutabilitatem nequidem per omnipotentiam Dei (§. 344.) ab eodem avelli potest. Jam quoniam Deus omnium sibi conscius est, quæ in idea ista continentur (§. 187.); fieri nullo potest modo, ut quicquam in eadem insit, cujus sibi non semper, omnia quippe simul cognoscens (§. 160.), conscius sit. Distinguit autem præsentia a præteritis (§. 939.), & præterita tanquam præterita sibi repræsentat (§. 940.). Quamobrem concipi nequit, quod Deus ullius præteriti non continuo sibi conscius sit tanquam præteriti. Quoniam itaque præteriti obliviscitur, qui idem sibi amplius repræsentare nequit, vel sibi non conscius est, quod id in numero præteritorum sit (§. 215. *Psychol. empir.*); per essentiam divinam nullo modo fieri potest, ut Deus ullius præteriti obliviscatur, nec ejus amplius recordetur.

Deus

Deus ideas nullas in particulari producit, sed semper idea totius universi eadem claritate in intellectu ipsius fulget, ob simultaneam cognitionem omnium (§. 160.). Quamobrem præsens ubi sit præteritum, idea ejus non evanescit in intellectu divino, quemadmodum in humano, adeoque non opus est, ut denuo reproducatur, quippe continuo contenta tanquam idea particularis in idea totius universi. Deus igitur, quando recordatur, non perinde ac homines ideas, quas ante habuerat, postquam evanuerant, iterum reproducere tenetur. Atque adeo ex parte Dei nullum locum habet impotentia ideas reproducendi rerum, quas tanquam præsentes agnoverat vi concursus sui (§. 939.), consequenter ob eandem Deus dici nequit oblivisci rei ullius, quemadmodum nobis accidit (§. 216. *Psychol. empir.*). Idea rerum præteritarum cum non reproducantur a Deo, quemadmodum a nobis; ita quoque fieri non potest, ut recognitio præteritorum in eo locum habeat, qua nos ideas reproductas recognoscimus, nobis conscii, quod eas jam ante habuerimus (§. 173. *Psychol. empir.*). Respondet nimirum actui recognitionis repræsentatio præteriti tanquam præteriti per dependentiam præsens ab eodem (§. 940.): quæ cum sit in Deo continua, nec fingi in eodem potest impotentia præterita recognoscendi, in qua oblivio consistit hominum (§. 215. *Psychol. empir.*). Atque adeo patet, quomodo recordatio in Deo eidem competente modo explicetur ac oblivio tanquam ipsi repugnans agnoscat. Ceterum ipsa propositio usum non contemnendum habet in Moralibus, quod Deus nullius præteriti oblivisci possit, utpote in praxin multorum officiorum influens.

§. 942.

*Scientia
visionis in
Deo.*

Deo competit scientia visionis. Etenim Deus omnia præscivit ab æterno (§. 534.), in tempore certo futura, quemadmodum præscivit (§. 533.). Postquam mundus ab ipso creatus est (§. 760.) & conservatur (§. 843.) atque gubernatur (§. 900.); per concursum suum præsens distinguit a præterito & futu-

futuro (§. 939.) & præterita sibi repræsentat tanquam præterita per dependentiam præsentia a præteritis; adhuc futura autem tanquam futura per eorundem dependentiam a præsentibus (§. 940.). Quoniam itaque scientia visionis ab æterno cognoscuntur, quæ in tempore futura sunt, & ubi mundus adspectabilis actu existit, tam præsentia, quam futura adhuc atque præterita (§. 230.); Deus scientiam visionis competere liquet.

Scientia visionis Deo competit quoad intellectum: dependet tamen partim a decreto ipsius, partim a potentia creatrice ac conservatrice, quæ cum creatrice eadem (§. 845.), quemadmodum ex demonstratione intelligitur. Nemo igitur miretur, quod, cum jam supra de intellectu divino agentes scientiam visionis definiverimus (§. 230.), nunc demum ex intervallo demonstramus, eam Deo competere. Quoniam enim vi demonstrationis pendet a decreto Dei quoad præscientiam æternam futurorum, a potentia creatrice & conservatrice quoad cognitionem præsentium tanquam præsentium, præteritorum tanquam præteritorum & futurorum adhuc tanquam futurorum; eam Deo non ante vindicare licuit, quam postquam de decreto divino & ejus executione, creatione scilicet ac conservatione, egimus. Equidem per scientiam simplicis intelligentiæ, quæ datur in Deo (§. 226.) & qua res cognoscuntur ut possibiles & existibiles (§. 221.), jam intelligitur; quod series hæc rerum, qua mundus hic adspectabilis, constituitur (§. 55. *Cosmol.*), sit possibilis, & si in ea sumatur H ut præsens, quæ H antecedunt, G, F, E, D &c. esse præterita, I, K, L, M &c. adhuc futura: enimvero cum ante decretum series tota non spectetur tanquam futura, nec antequam mundus creetur atque conservetur, H considerari possit ut præsens, neque etiam G, F, E, D &c. spectari possunt tanquam præterita, I, K, L, M, N &c. tanquam adhuc futura. Unde liquet scientiæ visionis demum esse locum post decretum & actum creationis & conservationis, quando nempe mundus spectatur tanquam certo exiturus aut actu exi-

stems. Scientia adeo visionis a scientia simplicis intelligentiæ recte distinguitur, habetque distinctio fundamentum in re. Quoniam itaque illa ab hac distinguenda venit, ubi cognitionem rerum, quæ in Deo datur, distincte intelligere volueris; quæ a se invicem re ipsa differunt, diversis etiam nominibus insignienda sunt. Et quia termini simplicis intelligentiæ ac visionis dudum in scholis Theologorum atque Philosophorum recepti fuere; eos immutari nefas existimeretur (§. 147. *Discurs. pralim.*). Non inepte autem scientia præsentium, præteritorum & futurorum, qua talium, atque præscientia futurorum omnium ab æterno visionis scientia appellatur: quoniam enim Deus omnia intuitive cognoscit (§. 207.), ut ipsi ab æterno præsentia sint omnia, ac hodie, ubi mundus existit, præterita atque futura non minus præsentia sint, quam ipsa actu præsentia; omnia quasi videt, quæ nunc sunt, antea fuere, ac in posterum adhuc exitura sunt. Ceterum ex modo, quò Deus in præsentibus videt præterita atque futura, patet, quomodo nos ratiocinando ex præsentibus colligere valeamus præterita & futura: etenim & nos ratiocinando assequimur præterita, quatenus ab iis pendent præsentia; futura vero, quatenus ea a præsentibus pendent.

S. 943.

Conservatio rerum
Deo S. S.
autoritate
vindicanda.

Deo juxta S. S. tribuenda est rerum omnium in hoc universo conservatio eodem sensu, quo supra eandem ipsi vindicavimus. Etenim Ad. XVII. 24. 25. Deus dicitur fecisse mundum & omnia, quæ in eo sunt, & adhuc dare omnibus vitam & inspirationem, sive halitum, & omnia. Immo vers. 26. eidem tribuitur, quod ex uno omne genus hominum inhabitet super universam faciem terræ. Et mox additur vers. 28. nos in ipso vivere, moveri & esse. Quod Deus fecerit mundum & omnia, quæ in eo sunt; ad actum utique creationis pertinet, quò ad actualitatem perducta sunt, quæ ante nondum existebant. Quod vero omnibus adhuc det vitam & halitum & omnia, & in ipso vivamus, moveamur & simus, & genus

nus hominum ab uno homine propagetur, ad actum creationi contradistinctum, quo nempe existentia eorum, quæ per creationem cœpere, continuatur, conservationem nimirum rerum creatarum spectat. Ex conservatione rerum probatur, quod Deus re creata nulla indigeat, sibi ipsi sufficientissimus, propterea quod in creatura nil detur, ad quod non indigeat Deo. Ipsi adeo tribuitur existentia quoque nostri, tribuuntur vires agendi, quas habemus, tribuitur quoque rerum conservatio per causas secundas, veluti conservatio specierum per generationem: quod enim de hominibus affirmatur, idem etiam extendendum esse ad res ceteras eodem modo, vel etiam simili aliquo conservatas nemo non largitur, cum nulla disparitatis ratio allegari possit. Docet adeo Paulus, cujus ea sunt, quæ recitavimus verba, quæcunque a Deo creata sunt per se seu propria virtute existentiam, quam accepere, continuare minime posse; sed Dei opus esse actione continua, qua existentiam, quam semel impertitus est in prima creatione, impertiri pergat. Ex mente igitur Apostoli actus creationis continuatur, quatenus per eundem indefinenter impertitur ei, quod substantiale est in hoc universo, actualitas: quo sensu supra conservationem continuatam creationem diximus (§. 845.). Tribuitur quoque Deo autori, quod per modificationes substantialis in prima creatione ad actum perducti & ab ipso continuata creatione conservati prodit, veluti conservatio generis humani per generationem, quia scilicet Deus ordinem naturæ, cujus autor est, conservat. Et ex eadem ratione alibi in sacris omnia tribuuntur, quæ in natura rerum quomodocunque generantur, secundum naturæ ordinem, veluti *Job. V. 10.* Deus dicitur dare pluviam super faciem terræ, & irrigare aquis universa. Ita *cap. XXXVIII. 25.* Deus dicitur dare vehementissimo imbri cursum & viam sonanti tonitruui, ut taceamus alia, quæ passim huc spectantia magno numero le-

guntur in Scripturæ sacræ libris, præsertim in Psalmis. Abunde igitur liquet, autoritate S. S. Deo tribuendam esse conservationem huius universi ac omnium, quæ in eo sunt, eo prorsus sensu, quo supra eidem conservationem vindicavimus.

Juxta Apostolum creatura omnis, tum ut existat, tum ut agat, continuo indiget Deo, ipse autem neque ut existat, neque ut agat, indiget creatura ulla, quippe quæ non habet, nisi quod acceperit a Deo. Etenim si Deus indigeret re aliqua extra se, ut ipse existere posset, seu ad sui conservationem; necesse utique esset, ut independenter ab ipso existeret: at Deus fecit omnia, quæ præter ipsum existunt, iisque continuo actualitatem impertitur, quam diu existere pergunt, consequenter re nulla alia ad sui conservationem indiget. Creatura nulla agit nisi vi a Deo accepta & quam per actum conservationis eidem continuo impertitur. Nihil adeo virium cum habeat creatura, quas non acceperit a Deo; ad agendum non indiget ipse viribus aliunde accipiendis, quippe cum non acciperet, nisi quod ipse dedisset alteri. Hoc modo argumentatur Paulus, probaturus Deum non indigere re aliqua, quæ sit in hoc universo. Cum autem probet per actum conservationis, & simul amoveat dubium, quod oriri poterat ex conservatione corporum per causas secundas, quatenus hanc quoque tribuit Deo ordinis naturæ auctori; actus utique conservationis ex illis Apostoli verbis tanquam ex loco classico optime declaratur, qualis sit ex mente S. S.

§. 944.

*Concurfus
Dei ad
actiones
creatura-
rum juxta
S. S.*

Deus juxta S. S. concurrat ad omnes creaturarum actiones.
In loco ante citato dicimur moveri in Deo. Actiones hominis externæ sunt motu organorum corporis, five voluntariæ fuerint, five naturales: quemadmodum nemo non novit. Quamobrem patet juxta S. S. hominem nullam edere actionem sine Deo. Per ea igitur, quæ insunt homini, penitus intelligi nequit, cur agat, si actionem prorsus distincte concipere velis,
con-

consequenter non tota ratio sufficiens actionis in solo homine reperitur (§. 56. *Ontol.*), sed restat quidpiam, quod quaerendum in Deo. Quamobrem cum ens unum ad actionem entis alterius concurrat, quatenus in eo continetur aliquid rationis, cur agat (§. 872.); Deum juxta S. S. ad omnes omnino hominis actiones tam naturales, quam voluntarias concurrere patet. Actiones naturales ab arbitrio nostro minime pendent, sed totae ex natura & essentia rei consequuntur (§. 913.), adeoque homini cum corporibus omnibus communes sunt. Quoniam itaque Deus juxta S. S. ad actiones hominum naturales concurrat *per demonstrata*; quin juxta eandem dicendus sit etiam concurrere ad actiones quascunque corporum quorumlibet, consequenter ad actiones quaslibet naturae (§. 507. *Cosmol.*), dubitandum non est.

Nemo miretur, concursum divinum ex scripturae verbis vi principiorum philosophicorum vindicari. Etenim S. S. veritates, quas docet, non demonstrat, quippe cui fides habenda ob auctoritatem divinam, quae ipsi convenit, neque adeo omnia revocat ad notiones distinctas, sed in claris acquiescit, modo ad mentem ejus intelligendam sufficiant. Ita si legimus nos moveri in Deo; facta applicatione ad casum particularem inferimus, nos sine Dei ope non posse extendere brachium: quo ipso agnoscimus concursum Dei ad actiones nostras, etsi distincte explicare non possimus, quomodo Deus ad easdem concurrat. Et illa cognitio & vulgi, & eruditorum captui conveniens sufficit, ut omnimodam nostram a Deo dependentiam agnoscamus grato in ipsum animo. Levi autem attentione ad motum brachii, vel alterius organi discimus, Deotribuendum esse, quod nobis vires agendi impertiatur, quemadmodum a nobis demonstratum est in superioribus in eorum gratiam, qui veritatem philosophicam capere possunt & quorum firmus ac immotus non est assensus, antequam veritatis convincentur.

§. 945.

Concurfus ad actiones malas juxta S.S. Deus juxta S. S. concurrir etiam ad malas hominum actiones, sed non quatenus male fit. Poteramus propositionem præsentem per n. corollarii inferre ex præcedente: etenim S. Scriptura docente Deus ad omnes hominis actiones concurrir, adeoque concurrere etiam debet ad malas. Concurrir Deus ad omnem motum nostrum. Quamobrem cum actiones malæ sint non minus motus organorum corporis, quam bonæ; Deus ex mente Apostoli ad actiones quoque malas concurrir. Enimvero actiones malæ non ideo sunt malæ, quia sunt motus organorum corporis, sed quia tendunt ad nostri statusque nostri vel alterius statusque ejusdem imperfectionem (§. 565. *Psychol. empir.*). Ergo Deus Apostolo doctore non concurrir ad actiones malas, quatenus malæ sunt. Actiones externæ phyſice ſpectantur, quatenus ſunt motus organorum corporis; moraliter vero, quatenus vel bonæ, vel malæ (§. 568.). Quoniam itaque Deus ex mente Apostoli ad actiones hominis concurrir, quatenus ſunt motus organorum corporis; Deus ad actiones malas juxta S. S. concurrir, quatenus ſpectantur phyſice, non autem quatenus ſpectantur moraliter, ſeu quatenus malum ipsis inhaeret, quemadmodum ſupra demonſtravimus (§. 884.).

Poteramus in his equidem acquieſcere, cum hic tantummodo probare conſtituerimus, ſuperius demonſtrata conſentire iis, quæ de concuſſu Dei ad actiones malas docet S. S. conſultum tamen duximus idem adhuc alio modo oſtendere. Inſervit huic inſtituto exemplum Joſephi a fratribus non ſine magno ſcelere in ſervitutem venditi, propterea quod Joſephus ipſe hanc venditionem Deo tribuere videtur, utpote affirmans, fratribus ſibi metuentibus, ne injuriam illatam vindicaret, ſe miſſum eſſe a Deo ante ipſos pro eorundem ſalute in Ægyptum

tum *Gen. XLV. 5.* immo mox subjungens *vers. 8.* se non ipsorum consilio, sed Dei voluntate missum esse in Ægyptum. Venditio fratris, filii parenti seni charissimi, in duram servitutem, profecta ex mera invidia erga fratrem & defectu amoris in parentem, utique mala erat. Ad hanc autem malam actionem voluntatem suam determinaverant fratres scelesti per invidiam erga fratrem & defectum amoris in parentem, alias invidiz obicem posaturi. Quoniam malum morale juxta S. S. Deo placere nequit (§. 599.); ideo nec placere potuit invidia erga fratrem, nec defectus amoris in parentem, consequenter nec venditio fratris in servitutem ex invidia ista ac defectu illo amoris profecta. Quamobrem quoque Deus nullo modo ad venditionem istam, quatenus mali animi effectus est, concurrere potuit juxta S. S. Cum Josephus hoc modo veniret in Ægyptum, inquem alias non profecturus erat, ibidemque ad maximam dignitatem eveheretur, non siue maximo comodo & parentis, & totius familiz suæ; Deus etiam juxta S. S. mala dirigens ad bonum finem (§. 688.), venditionem istam ab æterno permittere decrevit (§. 600.), quatenus actio physice spectata erat medium Josephum ad summam dignitatem evehendum in Ægyptum deportandi. Apparet itaque Deum ad actionem malam fratrum non concurrisse, quatenus mala est, nec eandem decrevisse, propterea quod mala est; sed quia eandem dirigere poterat in finem convenientem providentiz suæ. Cum autem ad omnes actiones concurrat Deus per conservationem (§. 874.), juxta S. S. ipsi quoque tribuendam (§. 943.); negari haud quasquam potest, quod concursui quoque isti locus fuerit in venditione impia ausu scelesto fratrum Josephi facta.

Puto ex Josephi exemplo a nobis dilucidato clarissime constare, quomodo actiones malæ contineantur in æterno providentiz decreto tanquam permittendæ & ad bonum fi-

NCIB,

nem, consequenter & ultimum, manifestationem gloriæ divinæ (§. 629.) dirigendæ (§. 635.), ita tamen ut mali quia malum existentia non decernatur, & quomodo Deus vi ejusdem decreti concurrat ad actionem malam physice, sed non moraliter spectatam, ita ut nulla mali culpa in ipsum redundet, sed hæc tota tribuenda sit homini libertate sua per decretum illæsa abutenti. Obiter monemus factum fratrum Josephi satisfacere etiam philosopho doctrinam arduam non nisi ex principiis rationis enodaturo: admitti enim debet tanquam factum, quod ab Historico narratur, seposita licet autoritate S. S. divina, unde conficitur, quæ inde probantur esse menti S. S. consequenter ipsius Dei consentanea. Mirifice cum exemplum istud concursum Dei ad actiones malas illustret; ut attenta mente iterum iterumque trutinetur suadeo certo confidens fore, ut nebulae omnes, quibus alias obtunditur mentis acies, protinus evanescant.

§. 946.

Universa-
lizas pro-
videntiæ
divinæ ju-
xta S. S.

Deus juxta S. S. rerum etiam vilissimarum curam gerit, seu nihil judicare debet adeo abjectum, quod non sit objectum providentiæ divinæ. Docet hoc disertis verbis ipse Christus Matth. X. 29 & seqq. Etenim discipulos suos convicturus, quod Deus eorum curam summam gerat, ita ut sine voluntate Dei ipsis nil obtingere possit, a minori ad majus argumentatus: Nonne, inquit, duo passeret esse videntur, & unus ex illis non cadet super terram sine patre vestro? Vestri autem & capilli capitis numerati sunt. Nolite ergo timere: multis passeribus meliores estis vos. Christo igitur docente rerum quarumvis vilium, quales sunt passeret, tantam curam gerit Deus, ut nihil iisdem accidere possit nisi volente ipso, consequenter quod is ab æterno decrevit. Immo hominum eam curam gerit, ut æterno isto decreto definitum sit, quodcumque ipsi per omne vitæ tempus accidere debeat, etiamsi tam vile atque abjectum æstimetur, ut ab ipso homine non curetur. Etenim Deus, qui

qui ab æterno novit omnia (§. 319.), nostros quoque capillos numeravit, & in æterno isto ac immutabili decreto, quod providentiam salutamus (§. 922.), de singulis statuit, quid fieri debeat, ita ut nullum eorum evellatur, nisi eo præcise momento, quo Deus id fieri decrevit. Patet adeo providentiam divinam, Christo Doctore, extendi ad omnia, ita ut nihil censeri possit adeo abjectum, quin providentiæ divinæ sublit. Inculcat idem Christus *Matth.* VI. 20 & seqq. ubi docet, Deum volatilibus prospicere de esca, cujus nulla ipsa tenet cura, & ipsammet curam gerere coloris florum & graminum, ut certi evadamus, eundem quoque curam hominum gerere, ne desint cibi ac vestimenta, quibus ad sui conservationem opus habent. Etenim si Deus rerum quarumvis tam animatarum, quam inanimatarum, ac hominum præsertim tanquam creaturæ omnium præstantissimæ in his terris curam gerit; hoc ipso universalitas providentiæ divinæ patet, nec quicquam adeo vile censeri potest, ut eidem subducatur.

Christus universalitatem providentiæ divinæ tanquam adeo manifestam supponit, ut a nemine in dubium revocari possit, qui animum advertit ad ea, quæ in mundo fiunt. Ex eo enim, quod Deus avium & florum atque graminum curam gerit, incredulitatem eorum redarguit, qui Deo providenti diffidunt.

§. 947.

Que sunt exigui usus nostro judicio, talia non sunt ju- **Diversi-**
dicio Dei. Etenim entis compositi contingentis, adeoque cor- **tas judicii**
poris cujuscunque (§. 119. *Cosmol.*), existentia ejusdemque modi **nostri ac**
determinantur per mundum integrum (§. 87. *Cosmol.*), & si Dei de usu
contingens unum, quod in mundo contingere debet, mutari **rerum.**
ponatur in contrarium, vel in seriem rerum aliquid intrudi
supponatur, cujus actus per præcedentia non determinatur;
sequens mundi pars non amplius erit eadem, quæ alias futura
(*Wolffii Theol. Naturalis.*) **Xxx xx** **erat**

erat (§. 116. *Cosmol.*). Quoniam itaque sequentia dependent a præteritis omnibus, & futura simul a quolibet præsentē (§. 228.), usus vero in dependentia actualitatis rei cujusdam alterius, quæ mala non est, ab aliqua re consistit (§. 646.); usus rei cujuslibet in hoc universo sese extendit ad omnia in tota rerum serie sequentia. Deus in quolibet minimo, quod est in universo, cognoscit totum universum (§. 161.), distincte prorsus, citra ullam confusionem (§. 156.), ac intuitive (§. 207.) quemadmodum nos præsentia intuemur, etsi pro modulo aciei visus. Omnem igitur usum, quem habet in serie rerum unumquodque in determinando actu sequentium, sive propinquum, sive quocunque intervallo remorum, Deus distinctissime cognoscit ac intuitive. De usu adeo rerum judicat in relatione ad totum universum. Enimvero nemo nescit, nos in usu rerum immediato acquiescere, immo sæpissime ne hunc quidem attingere, consequenter exigui usus æstimare, quorum usus immediatus non magni momenti est, & nullius usus reputare, quorum nullum perspicere valemus, aliter prorsus judicaturos, siquidem divinæ mentis acie integrum rerum nexum intuitive perinvestigare daretur. Quamobrem quæ nostro judicio exigui sunt usus, talia non sunt judicio Dei.

Pretium rebus decernimus ex usu, quem præbent: immo plurimi res æstimare non solent nisi ex usu, quem nobis præbent. Unde vilia & abjecta videntur, quæ exiguum aut nullum usum habere judicantur; saltem quæ nobis nulli usui sunt; in pretio vero habentur, quorum multum & magnum experimur usum. Vides itaque Deo non videri vilia & abjecta, ideoque contemnenda, quæ nostro judicio talia habentur, etsi supponas eundem quoque rerum pretium statuere ex usu, quem præbent aliis. Qui machinarum notiones prorsus distinctas habent, his non deerit idea exemplaris, qua lux affunditur propositioni præsentī capiti diffi-

cillimæ hebetioribus. Etenim sunt subinde partes quædam exiguæ, quas mechanisimi imperiti abesse posse existimant, salva machina, non agnoscetes usum immediatum, nedum mediatum, quem habent. Has abjectas judicat imperitus Mechanicæ; sed aliter longe sentit Mechanicus, cui operis sui adest idea distincta, qua omnem usum mediatum per totam machinam sese diffundentem perspicit. Ceterum hæc propositio probe perpendenda, ne indignum videatur Deo rerum minimarum cura: qua negata aut in dubium vocata proclivis est ad omnem prorsus providentiam divinam negandam lapsus.

§. 948.

Deus juxta S. S. omnia gubernat in hoc universo, eodem prorsus sensu, quo nos gubernationem rerum omnium eidem vindicavimus. Etenim nulla fere datur creatura, cujus actiones non dicantur dirigi a Deo ad certos fines. Constat corpora, ex quibus hic mundus adspectabilis componitur (§. 119. Cosmol.), dividi in corpora totalia & partialia, quorum illa sunt juxta S. S. Sol, Luna, Stellæ atque terra; hæc vero, quæ in Tellure generantur, inanimata & animata. Ita Gen. I. 16. & seqq. Deus dicitur fecisse duo luminaria magna: luminare majus, nimirum Solem, ut præffet diei, & luminare minus, scilicet Lunam, ut præffet nocti, & stellas, & posuisse eas in firmamento cœli, ut lucerent super terram. Unde Christus Matth. V. 45 Deo hodiernum tribuit, quod Sol orietur super improbos ac bonos, ob multiplicem usum, quem a præsentia ejus percipiunt homines, ipsa etiam animantia bruta. Quo spectant verba Davidis, quæ leguntur Psalm. CIV. 19. & seqq. Terram conservat Numen providum incorruptam aliis in ea, ipsi hominibus, intereuntibus, aliis de novo genitis Eccles. I. 4, ut præbeat habitaculum hominibus atque animantibus brutis Jes. XLV. 18. Tribuuntur eidem meteora, veluti pluvia & nix, Job. V. 10. Psalm. CXLVII. 7. & seqq. Matth. V. 45. ut terra fiat fecunda

Gubernatio rerum omnium Deo juxta S. S. tribuenda.

Psal. CIV. 13. 14. & in locis desertis, in quibus nullus degit homo, irrigetur, ne exarescat, *Job.* XXXVIII. 25. & seqq. Dirigere dicitur ipsam sortem, ut ratio, cur ita potius cadat, quam aliter, ipsi tribuenda veniat, *Proverb.* XVI. 33. Præterea hominum dirigit cogitationes, *1. Sam.* X. 9. *Psal.* CV. 25. *Apoc.* XVII. 17. & actiones externas, *Gen.* XLV. 8. Non opus esse existimo loca Scripturæ congerere, in quibus actiones creaturarum Dei directioni subjiciuntur, cum hospes in ea esse debeat, cui hoc minime fuerit perspectum. Enimvero directionem actionum ad certum finem diximus supra gubernationem (§. 899.) & in hoc significatu eam Deo vindicavimus (§. 900.). Liquet igitur autoritate S. S. tribuendam esse Deo gubernationem omnium in hoc universo eo sensu, quo supra eidem eandem vindicavimus.

Haud difficile fuerat singula, quæ de gubernatione divina in specie a nobis demonstrata fuere, S. S. consentanea probare. Sed his ambagibus non videtur opus, propterea quod ea ex hac ipsa notione deduximus, quam S. S. consentaneam probavimus, nec instituti nostri ratio aliud exigit, quam ut ostendatur, terminos in Theologia naturali & revelata receptos, quibus utimur, a nobis accipi in sensu S. S. conveniente: id quod omnino necessarium probatu, cum inde aestimetur philosophiæ cum S. S. consensus, cujus beneficio illa manuducatur ad religionem revelatam.

§. 949.

Providentia Deo juxta S. S. tribuenda.

Deo tribuenda juxta S. S. providentia eodem sensu, quo ipsi eandem vindicavimus. Etenim autoritate S. S. tribuenda ipsi est conservatio (§. 943.), tribuendus est concursus ad singulas creaturarum actiones (§. 944.), tribuenda denique est gubernatio (§. 948.) eodem sensu, quo conservationem, & gubernationem, & concursum ei vindicavimus. Enimvero decretum Dei de conservatione & gubernatione rerum omnium in hoc

hoc universo & concursu ad singulas creaturarum actiones isto sensu acceptis dicitur nobis providentia (§. 922.), quam Deo competere ostendimus (§. 923.). Patet itaque auctoritate S. S. Deo tribui debere providentiam eodem prorsus sensu, quo nos eidem providentiam vindicavimus.

Vocabulum providentiae nullibi legitur in sacris, nisi Sap. XIV. 3, ubi Deus providentia sua gubernare dicitur naves in mari, quia dedit & in mari viam & inter fluctus semitam firmissimam. Addit hujus gubernationis rationem, nimirum quod Deus, etsi per omnipotentiam facere possit, quod vult, absque opera causarum secundarum, hac tamen uti malit, ut omnia fiant sapientiae suae conformiter, *vers. 4. 5.* Facile apparet providentiam hic redire ad rerum creaturarum conservationem & actionum, quae a causis secundis proficiscuntur, directionem, quae est ipsa gubernatio (§. 899.). Quamobrem providentiae vocabulum ibidem accipitur eo sensu, quo idem supra definivimus (§. 922.).

CAPUT VI.

De Jure Dei in Creaturas.

§. 950.

Actio libera recta est, quae rationem sufficientem in essentia & attributis agentis habet, consequenter nulli determinationi essentiali vel attributo contradicit. *Minus recta* est illa, quae determinationi alicui essentiali vel attributo contradicit. *Actio quam dicatur, recta, quam, minus recta.*

E. gr. Per essentiam suam corpus humanum tendit ad sui conservationem, cum ita constructum sit, ut singulae organorum vitalium functiones ad eam tanquam finem referantur. Inter attributa itaque corporis nostri referendum, quod sit ad sui conservationem aptum. Quod si jam capiamus

mus cibum, quem sanitati ac conservationi corporis prodesse novimus, ea quantitate, quæ non nocet; actio hæc libera rationem sufficientem in essentia corporis ac inde pendente attributo ejusdem agnoscit, quatenus nempe per hoc attributum, ex essentia corporis fluente intelligitur, eam hujus cibi hac quidem quantitate sumendi electioni nihil obstat ex parte corporis nostri. Et eatenus ea dicitur recta. Obiter monemus rationem istam, per quam patet rectitudo actionis, non semper desumendam esse immediate ab essentia vel attributo agentis, verum etiam mediate ab iis, quæ longa licet rationum concatenatorum serie inde deducuntur. Ex adverso, si quis cibum capit, quem sanitati inimicum jam expertus, vel quem ea quantitate sumtum sibi non prodesse novit, cum actio repugnet attributo corporis, nimirum aptitudini ad sui conservationem, minus recta dicenda. Vernacula dicimus eine unredhte Handlung, & de committente, er habe unrecht gethan. Immo si quis etiam inscius capit cibum, quem sumtum sanitati inimicum experitur, cum actio adhuc attributo isti repugnet, erit & ipsa minus recta: neque enim nostra scientia quod rectum, vel minus rectum facit. Non nego, ut rectitudo actionum & multiplices defectus, quibus obnoxia est, penitus intelligantur, multa adhuc dicenda superesse; sed ea non sunt hujus loci. Notionem rectitudinis actionum humanarum adequatam, quantum datur, efficere studebimus in Philosophia practica universal, quæ alteri parti Theologiæ naturalis succedet: ibique una tradentur defectus omnes, quæ quoad nos locum habere possunt. Sufficit hic dixisse, quæ ad illam intelligendam satisfaciunt.

§. 951.

*Moralitas
actionum
quid sit.*

Differentia actionum liberarum quoad rectitudinem est id, quod *Moralitatis* nomine venit.

Unde actiones spectantur moraliter, quatenus rectitudinis in iis considerandis habetur ratio, ut rectæ a non rectis distinguantur.

§. 952.

§. 952.

Hinc nascitur differentia inter possibilitatem ac impossibilitatem physicam atque moralem. Nimirum *physice impossibilitas* & *impossible est*, quod potentiae agentis vel viribus ejusdem repugnat. *possibilitas* Ex adverso *physice possibile est* quod potentiae agentis vel viribus ejusdem non repugnat. *physica* & Ast *moraliter impossibile est*, quod *moralis*. salva actionis rectitudine fieri nequit: Et e contrario *moraliter possibile est*, quod eadem rectitudine salva fieri potest.

Ita *physice impossibile est*, ut homo volet: etenim per structuram corporis humani fieri nequit, ut volet, consequenter potentiae locomotivae hominis repugnat. Similiter *physice impossibile est*, ut homo, cujus vires sufficiunt tantummodo 90. librarum ponderi sustentando, moveat pondus ducentarum librarum, propterea quod tantum pondus viribus ejus repugnat, seu easdem superat. Ex adverso *physice possibile est*, ut homo comedat cibum sanitati inimicum, vel cibi boni eam capiat quantitatem, quae sanitati nocet. Ast idem *moraliter impossibile est* homini intelligenti, ac rectitudinis actionum tenaci observatori, propterea quod salva rectitudine actionis fieri nequit, ut comedamus cibum sanitati noxium, vel eam capiamus cibi sani quantitatem, quae nobis nocua est (not. §. 951.). Ex adverso *moraliter possibile est*, ut homo capiat cibum sanum ea quantitatem, quae sanitati non nocet, quia hoc salva rectitudine actionis fieri potest (not. §. 951.).

§. 953.

Facultas agendi physica est potentia agendi quod physice possibile est. Facultas vero agendi moralis est potentia agendi, quod moraliter possibile.

Ita facultatem agendi physicam habemus comedendi cibum quamvis quacunque quantitate, sive is sanitati proficiat, sive differat.

physica & moralis quomodo differat.

sive noceat ; ast facultatem agendi moralem non habemus nisi comedendi cibum sanitati amicum ea quantitate, qua eidem non nocet.

Jus quid sit.

§. 954.

Facultas agendi moralis Jus dici solet.

Unde qui cibos comedit sanitati amicos ea quantitate, quæ eidem non nocet jus habere dicitur comedendi cibos sanos ea quantitate, quæ sanitati minime nocet. Non dico, quod jus ideo habeat in cibos, quos comedit : fieri enim poterat, ut comederet cibos alienos, in quos nullum jus habet. Sed hoc tantummodo dico, quod jus habeat ad comedendos istiusmodi cibos in genere spectatos, etsi non habeat jus ad hos præcise in singulari spectatos, qui sunt juris alterius.

§. 955.

Proprietas quid sit.

Jus disponendi de ipsa substantia rei pro arbitrio suo dicitur Proprietas. Et qui proprietatem rei habet Proprietarius appellatur.

Ita qui de ipsa substantia libri alicujus disponere potest pro arbitrio suo, ut eum vendere vel donare alteri queat, proprietatem libri habet, diciturque *Proprietarius* ejusdem.

§. 956.

Fructus quid dicantur.

Fructus dicuntur res ex rebus aliis quomodocunque provenientes.

Ita fructus agrorum sunt fruges ex iisdem enatæ; fructus arborum poma, quæ ferunt; fructus pecorum pecora ex ipsis prognata.

§. 957.

Jus utendi quid sit.

Jus utendi est facultas moralis disponendi de quolibet rei usu pro arbitrio suo.

Ita jus utendi libro est jus legendi in eodem & excerptandi

ex eo, quæcunque notatu digna leguntur. Jus utendi fructibus arborum est jus eos comedendi, & ficeram ex iisdem conficiendi.

§. 958.

Jus fruendi est facultas disponendi de fructibus rei pro arbitrio suo. *Jus fruendi quid sit.*

Ita jus fruendi, quod quis habet in arboribus, est jus percipiendi fructus, quos ferunt, & perceptionem fructuum concedendi aliis.

§. 959.

Dominium dicitur jus pro arbitrio suo disponendi de ipsa rei substantia, ejus usu atque fructu. *Dominium quid sit.*

Ita Dominium agri est ei, qui de agro ejusque usu ac fructu pro arbitrio suo disponere valet, ita ut eum vendere vel donare alteri, semina quæcunque eidem committere ac fructus prognatos percipere aut aliis eorundem perceptionem concedere valeat. Et ei horum jurium exercitium natura liberum est, qui dominium agri habet,

§. 960.

Quoniam ius disponendi de substantia rei est proprietas (§. 955.), ius disponendi de usu rei jus utendi (§. 957.), ius denique disponendi de fructu rei pro arbitrio suo jus fruendi (§. 958.); dominium vero est jus disponendi pro arbitrio suo de ipsa rei substantia, ejusque usu ac fructu omni (§. 959.): *dominium complectitur proprietatem atque jus utendi ac fruendi.*

Exemplum, quod modo dedimus de dominio agri, propositionem præsentem illustrat.

§. 961.

**Dominium
um plenum
quando sit.**

Dominium dicitur plenum, quod proprietatem omnem ac jus utendi atque fruendi omne prorsus illimitatum continet.

Ita agri dominium plenum est nobis, si nemini præterquam nobis quidpiam proprietatis competat & si nullus, præterquam nos, quicquam de ejus usu ac fructu disponere possit nobis invitis. Loquimur de possibilitate morali, non physica: hæc enim facti est, non juris.

§. 962.

**Minus plenum
quod
dicatur.**

Unde simul intelligitur, quandonam *dominium sit minus plenum*, quando scilicet proprietas cum jure utendi ac fruendi sine omni prorsus limitatione ac restrictione nobis non competit.

Ita dominium agri minus plenum nobis est, si eum alienare non possumus absque alterius voluntate, vel si alteri usumfructum, aut saltem fructum concedere tenemur.

§. 963.

**Quale jus
Deo com-
petat in
creaturas.**

Deo competit dominium plenum totius universi ac naturæ rerum & omnium, quæ in eo sunt, sive in prima statim creatione fuerint facta, sive hodie demum generentur aut quomodocunque producantur a natura rerum. Etenim Deus mundum ex nihilo produxit (§. 759), perducendo ad actum substantias, nullo alio præexistente in eundem influente (§. 766.), eodemque creationis actu ordinem quoque naturæ constituit (§. 765.). Fecit autem hunc, qui existit, mundum liber ab omni coactione externa (§. 321.) atque interna (§. 351.). Cumque creatura nulla seipsam conservare possit (§. 843.), nec naturæ rerum potentia conservatrix substantialitatis rerum conveniat (§. 846.); continuato adhuc creationis actu (§. 845.);

mur.

mundum hunc adspectabilem & quaecunque in eodem sunt corpora , atque naturam rerum ejusque ordinem conservat (§. 849.), una cum animabus hominum (§. 857.), atque brutorum (§. 858.), in prima statim creatione a Deo creatis (§. 780. 783.), adeoque ex nihilo productis (§. 697. *Psychol. ration.*) ; ita ut creaturæ omnes , totus scilicet hic mundus adspectabilis & omnia elementa rerum materialium (§. 778.) , corpora non modo in prima origine rerum producta , verum etiam hodiernum genita (§. 779.), animæque humanæ (§. 781.) atque brutorum (§. 783. 777.) annihilarentur, conservatione divina cessante (§. 859.). Deus igitur de toto hoc universo pro arbitrio suo disponere potest , nec non de tota natura rerum ac omnibus, quæ in eo sunt, siue in prima creatione fuerint facta, siue quomodocunque producantur a natura rerum, cum nihil insit creaturis, quod non habeant a Deo *per demonstrata*. Disponere autem potest non modo de ipsis creaturis , sed etiam de mutuis usibus, quos sibi invicem præstant, & cum quæ naturæ opera producuntur fructuum instar considerari possint (§. 956.), de fructibus quoque hujus universi , quoniam in ipsis rebus nihil reperitur , quod liberrimæ ipsius voluntati obstare aliquo modo possit. Quoniam itaque facultas disponendi de substantia, ejusque usu ac fructu dominium est (§. 959.), idque plenum, si quoad singula nullo modo fuerit limitatum (§. 961.); Deo utique competit dominium plenum totius universi ac naturæ rerum & omnium, quæ in eo sunt, siue in prima creatione fuerint facta, siue hodie demum generentur, aut quomodocunque a natura producantur.

Ex demonstratione propositionis præsentis patet , Deo competere dominium creaturarum omnium propter creationem atque conservationem. Etenim uterque actus, qui non est nisi unus idemque actus continuatus (§. 845.), nihil continet , a quo alteri cuidam enti facultas quædam disponendi

Xyy yy a

de

de aliqua creatura pro arbitrio suo competat, adeoque omnis dispositio Deo soli convenit, ita ut ipsius solius sit de rebus ipsis, earumque usu & quæ per modum fructuum inde prodeunt, pro liberrima sua voluntate decernere, quod placuerit. Nemo non agnoscit opus esse artificis, quod ex materia sua liberrima sua voluntate seu proprio motu, quod dicitur, fecit, ipsique plenum tribuit in eo dominium, non alia de causa, quam quod nulla ne quidem fingi possit ratio, cur alteri cui-dam concedenda sit facultas de eodem nullo modo pro suo arbitrio disponendi, consequenter jus quoddam in ipsum tribui queat (§. 954.). Quamobrem cum sine ratione sufficiente nil esse possit (§. 70. *Ontol.*), nec jus aliquod alteri in opus artificis tribuitur. Quæ igitur valent de artifice opus quoddam proprio motu ex materia sua faciente, eadem quoque valere debent de Deo, omnia creante ex nihilo ac conservante ne in nihilum recidant, adeoque non influente ullo modo in opus ipsius, in quod alteri jus aliquod competat. Dominium adeo plenum creaturarum omnium tribuendum est Deo, nec quicquam, quod extra Deum datur, fingi potest, quod dominio ejus eximi possit vel ulla rationis specie.

§. 964.

*Dominus
quid sit.*

Dominus rei dicitur, cui competit dominium.

Ita dominus agri est, cui competit dominium agri: dominus libri, cui dominium libri est.

§. 965.

*Deus Do-
minus mun-
di, nature
& omnium,
que in
mundo sunt*

*Deus est dominus nature, totius mundi ac omnium, que in eo sunt, sive in prima creatione fuerint facta, sive hodie demum generentur, aut quomodocunque a natura producantur. Et enim Deo competit dominium nature universæ totiusque mundi ac omnium, quæ in eo sunt, sive in prima creatione fuerint facta, sive hodie demum generentur, aut quomodocunque a natura producantur (§. 963.). Enimvero dominus rei est, cum ejus dominium competit (§. 964.). Quamobrem Deus est domi-
nus*

nus naturæ totiusque mundi ac omnium, quæ in eo sunt, sive in prima rerum creatione fuerint facta, sive hodie demum generentur, aut quomodocunque a natura producantur.

Unde apparet, Deum recte dici Dominum absolute *κατ' ἐξουσίαν*. Neque enim est alius præter Deum, qui tam augusto nomine Dominus dici possit.

§. 966.

Quoniam Deus est Dominus totius mundi ac omnium, quæ in eo sunt, sive in prima creatione fuerint facta, sive hodie generentur, aut quomodocunque a natura producantur (§. 965.), totus autem mundus & omnia elementa rerum materialium (§. 778.), atque corpora non modo in prima rerum origine producta, verum etiam hodiernum genita (§. 779.), una cum animabus hominum (§. 781.) & brutorum (§. 783.), consequenter homines atque omnia animalia viventia, quocunque nomine veniant, sint creaturæ Dei, nec præter hæc creaturas naturæ lumine cognoscantur alix; Deus dominus est omnium creaturarum, ac in specie hominum atque omnium animantium, quocunque tandem nomine veniant.

Equidem autoritate S. S. constat, præter creaturas a nobis commemoratas dari etiam angelos, qui cum sint a Deo creati, adeoque perinde ac mundus hic adspectabilis ex nihilo producti (§. 697. *Psychol. ration.*), non minus dominio Deo subijciuntur, quam cetera ab eodem facta, quemadmodum ex demonstratione colligitur, quæ Deo dominium mundi ac omnium, quæ in eo sunt, vindicavimus (§. 963.). Unde eodem modo, quo in propositione præcedente, evincitur, Deum quoque esse dominum angelorum. Verum enim vero eum in philosophia non demonstrantur, nisi quæ naturæ lumine cognoscuntur, angelorum vero existentia ex principiis ratio-

nis demonstrata a nobis non fuerit ; nec nostrum fuit angelorum dominium asserere. Ne tamen quis existimet, angelos a dominio Dei a nobis excludi ; hæc annotari consultum duximus,

§. 967.

*Servus qui-
nam sit.*

Servus dicitur homo, qui est in dominio alterius.

Ita vocabulum accipitur in Jure Romano, ubi de servitute agitur, personali scilicet. Et hinc apud JCtos Romanos servi in numero rerum sunt, quemadmodum pecora. Apud nos sublata est servitus, nec famuli nostri in servorum numerum referendi.

§. 968.

*Homines
servi Dei.*

Homines omnes sunt servi Dei. Etenim hominum omnium dominus cum sit Deus (§. 966.); Dei dominio subjiciuntur (§. 964.). Quoniam itaque servus est, qui est in dominio alterius (§. 967.); homines omnes sunt servi Dei.

Patet adeo, ipsos quoque Reges esse servos Dei, eodem prorsus sensu, quo eorum subditi servi Dei sunt. Dominium enim Dei cum universale sit, totum quoque genus humanum, nemine excepto, in servitute divina constituitur.

§. 969.

*Cur corpo-
ra & natu-
ra volunta-
tem Numi-
nis exe-
quantur.*

Corpora & tota rerum natura agunt, quæ Deus vult, seu voluntati divine conformiter, vel, quod perinde est, voluntatem ejus exequentur. Etenim corpora & tota rerum natura agunt propter fines a Deo intentos, ac si ipsamet eos intenderent (§. 661.). Quamobrem cum propter finem agat, qui ideo agit, ut quid sit vel fiat (§. 932. Ontol.) ; corpora & tota natura rerum ideo agunt, quod agunt, ut fiat, vel sit in hoc universo, quod Deus intendit, seu esse aut fieri vult. Voluntatem adeo Dei exequentur, seu ea agunt, quæ Deus vult,

Pote-

Poterat etiam ostendi hoc modo. In corporibus nulla mutatio accidere potest nisi per motum (§. 128. *Cosmol.*), consequenter cum actiones sint in mutationum numero (§. 713. *Ontol.*), omnes corporum actiones in motu consistunt. Enimvero constat ex Cosmologiz Sect. II. capite quarto dari regulas motus, quas corpora in agendo violare nesciunt, & quibus ordo naturæ continetur (§. 559. *Cosmol.*). Quamobrem cum Deus sit autor ordinis naturæ (§. 763.), adeoque eundem constituerit (§. 762.); corpora secundum naturæ ordinem agentia agunt juxta voluntatem Numinis, adeoque agunt, quæ Deus vult, seu voluntatem ejus exequuntur.

Immo probari etiam poterat hoc modo. Quæcunque in mundo materiali fiunt naturaliter secundum naturæ ordinem fiunt (§. 566. *Cosmol.*). Quoniam itaque Deus est autor ordinis naturæ (§. 763.); patet ut ante actiones corporum naturales fieri secundum voluntatem divinam, adeoque corpora voluntatem Numinis exequi.

Porro natura rerum leges a Deo ipsi præscriptas observare tenetur in agendo (§. 827.). Quamobrem cum leges istæ non sint aliæ, quam leges motus, cum natura non sit nisi vis motrix corporum (§. 507. *Cosmol.*), leges autem motus non sint absolute necessariæ, sed contingentes (§. 527. *Cosmol.*), adeoque aliæ quoque esse potuissent (§. 294. 85. *Ontol.*), consequenter liberrima Dei voluntate præscriptæ (§. 941. *Psycho-empir.* & §. 431. *Theol. natur.*): natura universa non agit, nisi quod Deus vult, seu voluntatem ejus exequitur.

Corpora & natura universa omni in agendo libertate destituuntur, quemadmodum nemo non concedit, utpote ad agendum determinatæ per essentiam & naturam suam. Deus dum liberrime produxit hoc universum, cum cetera omnino non minus producere potuisset (§. 342.), modo ipsi libuisset (§. 352.), consequenter corpora, quæ in eodem existunt (§. 119. *Cosmol.*) & naturam rerum fecerit liberrime (§. 763.);

cor-

corpora & natura universa ad hæc agenda determinata per essentiam & naturam suam existunt, quia Deus voluit ut hæc agerent. Atque adeo non agunt, nisi quæ Deus vult, & hoc modo voluntatem ejus exequuntur. Poterat idem simili aliquo illustrari, ut idea quadam veluti exemplari lux quadam affundatur propositioni præsentī. Pone mechanicum peritum construere horologium, quod vi structuræ, quam animo concepit, tempus in scrupulis secundis per plures dies citra ullam alterationem indicare possit, ut exactam habeat Astronomus observator temporis mensuram. Etsi horologium necessario moveat indicem eo, quo tum contingit moveri modo, neque fieri possit, ut moveatur aliter; quatenus tamen horologium ideo constructum, quod tempus adeo exacte indicare valet, alias non construendum; dicendum omnino est, horologium agere ex voluntate artificis, consequenter eandem exequi. Nimirum nisi artifex ex intentione horologium fecisset, quod tempus tam exacte metitur, ut idem metiretur; nec horologium daretur, quod tempus indicaret tanta exactitudine, consequenter nec fieret, quod vult. Fit igitur quod vult, quia horologium construxit, adeoque idem agit, quod vult artifex.

§. 970.

Cur homo
actiones li-
beras se-
cundum
Dei vo-
luntatem
determina-
re debeat.

Homo actiones liberas non determinare debet suo arbitratu, sed necesse est, ut eas determinet, quemadmodum vult Deus. Etenim homo servus est (§. 968.), adeoque cum servus sit in dominio ejus, cujus est servus (§. 967.), in dominio Dei est. Quamobrem cum dominum tribuat jus pro arbitrio disponendi de usu rei (§. 959.); Deo quoque competat jus disponendi pro suo arbitrio de usu hominis omni, quem habere potest, consequenter etiam de liberis ejus actionibus, quatenus scilicet ab iis pender, quod vult (§. 646.). Patet itaque necesse esse, ut homo actiones suas determinet liberas, quemadmodum vult Deus, adeoque ipsum easdem non suo determinare debere arbitratu.

Quodsi

Quodsi Deus veller, ut homo actiones quasdam suo arbitratu determinaret, quin id faceret recte dubitandum non est; etenim sic quoque eas determinaret, quemadmodum vult, propterea quod contra voluntatem alterius non agitur, ubi is agenti liberum relinquit, quid facere velit. Quodsi Dominus liberum relinquit servo quid facere velit; nemo contendere valet, quod contra voluntatem ejus faciat, si facit quod vult. Enimvero si liberum non relinquit, servi est in omnibus facere voluntatem Domini, nec quicquam facere potest, nisi constiterit velle eum, ut hoc faciat.

§. 971.

Quoniam homo actiones suas liberas secundum Dei voluntatem determinare debet, non suam (§. 970.); *voluntas Dei propriae ipsi esse debet loco propriae voluntatis.* *abnegatio.*

Et si itaque homo libera voluntate gaudeat, ut velle possit, quod lubet; ita tamen agere debet, ac si libertate voluntatis careret, quasi per essentiam atque naturam suam perinde ac corpora, agentia necessaria, ad agendum, quod Deus vult, determinatus esset (§. 969.). Atque hinc patet, quid sit *abnegatio voluntatis propriae*, scilicet propositum firmum nil quicquam agendi, nisi quod voluntati divinae conforme. Ita enim non agimus, quod lubet nobis, parum solliciti quid fieri velit, quasi propria voluntate destitueremur, Deique voluntas nostra esset.

§. 972.

Necessitas agendi secundum voluntatem Dei moralis est, Necessitas non physica. Etenim cum homo in volendo ac nolendo liber sit (§. 942. *Psychol. empir.*), adeoque agere possit, quod *cundum* placet (§. 941. *Psychol. empir.*), ac ideo etiam quod Deus non vult, potentia ipsius agendi non repugnat, ut agat, quod Deus non vult, consequenter physice possibile est, ut agat contra voluntatem Numinis (§. 952.). *Quamobrem physica non est* *lis sit.*
(*Wolfii Theol. Naturalis.*) Zzz zz neces-

necessitas agendi secundum voluntatem Dei, adeoque tantummodo moralis (§. 953.).

Nimirum necessarium est, cujus oppositum impossibile (§. 279. *Ontol.*). Quodsi ergo oppositum fuerit physice impossibile, erit idem *physice necessarium*: si vero oppositum moraliter tantummodo impossibile, erit idem *moraliter necessarium*.

§. 973.

**Obligatio
passiva &
activa
quid sit.**

Necessitas moralis agendi est id, quod uno nomine Obligatio, passiva scilicet, dici solet. Etenim obligatio activa non est nisi connexio motivi cum actione.

Cum definitionem obligationis activæ in Moralibus primum proponeremus, qui eam cum passiva confundebant, mirati sunt, quod significatum ex ipsorum opinione adeo insitatum termino dudum in Jure, Theologia & Philosophia recepto tribuere audeamus. Atar! in salvo res est: non definimus obligationem activam, nisi consentiente & communi, & in disciplinis recepto usu loquendi. Etenim quomodo Princeps obligat subditos ad non committenda delicta? Nonne decernendo & exequendo pœnas in transgressores? Quinam est effectus pœnæ? Nonne ob pœnam, quam evitari non posse cogitat delictum patraturus, hoc ipsum sibi repræsentat tanquam malum, ac ideo idem patrare non vult, etsi ob rationes alias, per quas idem tanquam bonum repræsentatur, patrare mallet? Repræsentatio delicti tanquam mali est motivum id non committendi (§. 887. *Psychol. empir.*). Princeps adeo obligat subditos ad delicta non committenda motivum cum actione connectendo. Immo ex natura animæ demonstrari poterat, quod aliter homo ad aliquid committendum, vel omittendum obligari non possit, nisi motivum connectendo cum actione: id quod alio loco commodius docebitur. Nec aliter sese res habet, quando dicimus amicum esse obligatum alteri, ut petenti denegare non possit quod, ut faciat, cupit. Enimvero ex ipsa illa obligatione acti-

va nascitur passiva. Per motivum enim, quod obligans alterum cum actione connectit, qui obligatur moraliter necessitatur ad actionem committendam, vel omittendam (not. §. 972.). Atque ita adest necessitas agendi moralis, passiva illa obligatio, quam communiter nomine obligationis indignant.

§. 974.

Homo obligatus est ad actiones liberas non ex suo arbitratu, sed secundum voluntatem Dei determinandas. Etenim homo ad actiones suas liberas non determinare debet pro arbitrio suo, agendum sed necesse est ut eas determinet, quemadmodum vult Deus secundum (§. 970.), estque hzc necessitas agendi secundum voluntatem Dei moralis, non physica (§. 972.). Quamobrem cum moralis agendi necessitas sit passiva obligatio (§. 973.); homo obligatus est ad actiones liberas non ex suo arbitratu, sed secundum voluntatem Dei determinandas.

Atque ita intelligitur obligatio hominis ad actiones suas liberas voluntati divinæ conformandas, quæ fluit ex jure Dei in hominem. Quomodo autem Deus eundem sibi obliget, ex notione obligationis activæ demonstrabitur paulo post.

§. 975.

Homo obligatur ad actiones liberas ad sui statusque sui, Obligatio ac aliorum hominum statusque eorundem, immo ad perfectionem totius universi dirigendas. Etenim homo obligatur ad actiones liberas juxta Dei voluntatem determinandas (§. 974.). Vult autem Deus, ut homo actiones suas dirigat ad perfectionem sui statusque sui (§. 905.) atque hominum aliorum statusque eorundem (§. 909.), immo ad perfectionem totius universi (§. 920.). Obligatur itaque homo ad actiones liberas dirigendas ad sui statusque sui, ac aliorum hominum statusque eorundem, immo ad totius universi perfectionem.

Obligationem hic deducimus ex voluntate Numinis tanquam Domini nostri, cum hic tantummodo agatur de obligatione divina, non autem de naturali, quam illi contradistinctam explicabimus in Philosophia practica universalis. Absit itaque ut quis sibi persuadeat, nos in eorum abiisse sententiam, qui negata actionum intrinseca honestate ac turpitudine nullam in homine obligationem quoad directionem actionum liberarum agnoscunt, quam quæ est a superiore. Agitur hic de jure Dei in homines ac obligatione, quæ inde oritur: suo autem loco agetur de actionum naturali honestate ac turpitudine & obligatione, quæ ex ipsa hominis natura resultat, ubi notionem legis naturalis & ejus identitatem cum divina explicabimus. Ceterum cum ex superioribus abunde constet, quid sibi velit actionum liberarum directio ad sui aliorumque ac status tam proprii, quam alieni, & totius universi perfectionem; qualis sit hæc obligatio, qua homo tenetur Deo tanquam servus Domino suo, sufficienter intelligitur, ut adeo non opus sit ad eam dilucidandam plura hic in medium afferri. Quomodo autem directio actionum huic obligationi conformiter fiat, per omnia actionum genera earundemque species ostendemus in Jure naturali,

§. 976.

Idem ulterius expenditur.

Homo obligatur ad actiones liberas per easdem rationes finales determinandas, per quas determinantur naturales. Obligatur enim ad actiones liberas juxta voluntatem Dei determinandas (§. 974.). Quamobrem cum Deus velit, ut eas determinet per easdem rationes finales, per quas determinantur naturales (§. 915.); homo utique obligatur ad actiones suas liberas per easdem rationes finales determinandas, per quas determinantur naturales.

Qui obligationem, qua homo Deo tenetur, penitus inspicere voluerit, ad animum sibi revocet, quæ superius ostendimus (§. 914.), quod aliter fieri non possit, ut actiones hominis liberæ ad sui statusque sui perfectionem tendant, nisi cum naturalibus per easdem rationes finales determinentur.

§. 977.

§. 977.

*Homo obligatur ad actiones suas liberas ad gloriæ divinæ Adbuc ul-
manifestationem dirigendas. Obligatur enim ad easdem volun-
tati divinæ conformandas (§. 974.). Quamobrem cum dire-
ctio actionum liberarum ad manifestationem gloriæ divinæ sit
voluntati divinæ conformis (§. 918.); quin homo obligetur ad
actiones suas liberas ad gloriæ divinæ manifestationem diri-
gendas dubitari nequit.*

Obligatio dirigendi actiones liberas ad sui statusque sui perfectionem, obligatio eas dirigendi ad perfectionem totius universi & denique obligatio easdem dirigendi ad manifestationem gloriæ divinæ non sunt diversæ obligationes; sed una alteram continet. Sane obligatio dirigendi actiones ad manifestandam gloriam Dei continet obligationem eas dirigendi & ad sui statusque sui, & ad totius universi perfectionem, & obligatio actiones dirigendi ad sui & status sui perfectionem continet etiam obligationem eas dirigendi ad totius universi perfectionem. Etenim dum homo eas dirigit ad perfectionem sui statusque sui, easdem una dirigit ad perfectionem totius universi, & si in directione ad perfectionem sui nihil desideratur, easdem simul dirigit ad manifestationem gloriæ divinæ. Hæc omnia clarissime patebunt, ubi directionem actionum liberarum ad sui perfectionem specialius exposuerimus. Modus vero dirigendi actiones ad sui perfectionem consistit in determinatione earundem per easdem rationes finales, per quas determinantur naturales, & modus eas simul dirigendi ad manifestationem gloriæ divinæ in determinatione per motiva ab attributis divinis desumpta, quæ inter etiam locum habet jus Dei in hominem, dominium ipsius. Hæc omnia manifesta sunt per ea, quæ de his in anterioribus demonstravimus (§. 905. & seqq.), & ex principiis istis tanquam ex fonte suo deducitur omnis actionum humanarum rectitudo in Jure naturali evidentissime demonstranda.

§. 978.

Obligatio
hominis ad vine
actionum
omissio-
nem.

Homo obligatur ad omittendas actiones, quæ voluntati divinæ contrariantur. Obligatur enim ad actiones liberas non suo arbitratu, sed Dei voluntate determinatas (§. 974.). Quamobrem si Deus vult, actiones quasdam non committi, adeoque omitti, quin homo ad eas omittendas obligetur dubitandum non est. Obligatur itaque ad omittendas actiones, quæ voluntati divinæ contrariantur.

Obligatio hominis ex dominio Dei, cui subicitur, fluens & committenda, & omittenda respicit. Quamobrem jus Dei in se non minus violat, si omittenda committit, quam si committenda omittit. Quodsi tanquam servus Dei omnes officii sui partes explere voluerit; & committendorum, & omittendorum rationem habere debet sollicitus, ne in ullo horum reprehensionem incurrat.

§. 979.

Obligatio
ad non com-
mittenda
& non
omittenda.

Homo obligatur ad non omittendas actiones voluntati divinæ conformes, & ad non committendas eidem contrarias. Obligatur enim ad actiones liberas non suo arbitratu, sed secundum Dei voluntatem determinandas (§. 974.). Quoniam itaque obligatur ad committendas actiones, quas committi vult Deus; & ex adverso ad omittendas actiones, quas omitti vult Deus: fieri non potest, ut ipsi integrum sit seu permisum omittere actiones, quas Deus vult committi, seu quæ voluntati ejusdem conformes sunt, & ex adverso committere actiones, quas omitti vult Deus, consequenter quæ voluntati ipsius contrariantur. Patet adeo hominem obligari ad non omittendas actiones voluntati divinæ conformes, & ad non committendas voluntati divinæ contrarias.

Obligatio, de qua hic agitur, *negativa* dici potest, quemadmodum altera de committendis, ac omittendis, quæ Deus committi ac omitti vult, *positiva*.

§. 980.

Homo obligatur ad non determinandum actiones suas li- berras per rationes finales diversas ab iis, per quas determinan- tur naturales. Obligatur enim ad determinandum actiones suas liberas per easdem rationes finales, per quas determinantur naturales (§. 976.), adeoque ipsi liberum non est eas deter- minare per rationes ab his diversas, per quas naturales deter- minantur, consequenter necesse est, ut eas per diversas non de- terminet. Quoniam hæc necessitas physica non est, sed moralis (§. 972.), adeoque obligatio passiva (§. 973.); homo utique obligatur ad non determinandum actiones suas liberas per ratio- nes finales diversas ab iis, per quas naturales determinantur.

Ponamus e. gr. hominem quendam modice capere cibum sanum, sed non quia sanitati corporis consequendæ prodest, verum ex avaritia, quia cibus iste vili comparatur pretio, adeoque modica ejusdem quantitas non multos poseit nummos. Vi propositionis præsentis actio libera bona nondum dici potest, nec homo obligationi suæ ad cibum sanum modicæ quantitate sumendum satisfacit. Probe igitur notanda est hæc propositio, ut rectitudo actionum liberarum penitus intel- ligatur, tum ne in defectibus, quibus eadem laborant, perviden- dis cœcutiamus: id quod quanti sit usus in Moralibus, ubi de imputatione agitur, suo loco clarissime constabit. Non suf- ficit agere quod bonum est, sed agendum etiam bene. Unde Scholastici inculcarunt, non esse bonum nisi ex integra causa.

§. 981.

Homo obligatur ad non omittendum in actionibus liberis Eadem ul- determinandis motiva ab attributis divinis ac in specie a domi- nio Dei in hominibus desumpta. Homo obligatur dirigere actio- nes suas ad manifestationem gloriæ divinæ (§. 977.) Quam- obrem

obrem cum per actionum liberarum determinationem gloriam divinam aliter manifestare nequeat, quam si attributa divina sint motiva illarum (§. 919.); homini integrum non est, ut motiva ab attributis divinis desumpta omittat. Adest igitur moralis quædam necessitas non omittendi motiva ab attributis divinis desumenda (§. 972.): quæ cum sit obligatio passiva (§. 973.), homo obligatur ad non omittendum in actionibus liberis determinandis motiva ab attributis divinis desumenda. *Quod erat unum.*

Deo competit dominium plenum in hominibus (§. 966.), quod cum in ipsa Dei essentia atque natura rationem sui agnoscat, quemadmodum ex resolutione demonstrationis, qua dominium universale ipsi asseritur (§. 963.), facile patet; inter attributa Dei utique connumerandum venit. Quoniam itaque obligatur ad non omittendum motiva ab attributis divinis desumenda, *per demonstrata num. I.* omnino etiam obligatur ad non omittendum motiva, quæ desumuntur in specie a domino Dei in hominibus. *Quod erat alterum.*

Actio igitur, ceteroquin recta, bona tamen nondum est, si omittantur motiva ab attributis divinis desumpta. Probe hæc perpendenda veniunt, ut de rectitudine actionum humanarum iudicium fieri possit. Quoniam ex redemptione per Christum facta nova nascitur obligatio distincta & a naturali, quæ ex ipsa hominis natura fluit, suo loco in philosophia practica universali explicanda & stabilienda, & a divina, quæ ex creatione atque conservatione originem suam derivat, hætenus a nobis evicta; in Christianis rectitudo actionum postulat quoque motiva ab opere redemptionis desumpta, Theologis evolvenda atque ex Scriptura sacra probanda in Theologia morali: de quo apertius quædam dicemus in Philosophia practica, ut omnis actionum rectitudo penitus intelligatur & differentia virtutis christianæ a philosophica seu naturali distincte percipiatur.

§. 982.

*Homo obligatur ad omittendas actiones, quæ tēnunt ad Adbuc ul-
sui statusque sui atque aliorum hominum quorumcunque sta-terius ex-
tusque eorundem imperfectionem. Etenim homo obligatur ad penditur.
omittendas actiones, quæ voluntati divinæ contrariantur (§. 978.). Enimvero cum directio actionum ad sui statusque sui
(§. 906.) atque ad hominum aliorum statusque eorundem
perfectionem sit voluntati divinæ conformis (§. 910); ideo
directio actionum ad hominum aliorum statusque eorundem
non minus, quam ad sui atque status sui imperfectionem vo-
luntati divinæ contrariatur, ita ut eidem repugnet, si quis sui
statusque sui perfectionem promoveat cum imperfectione a-
liorum statusque eorundem (§. 911.). Quamobrem homo
utique obligatur ad omittendas actiones, quæ tendunt ad sui
statusque sui atque aliorum hominum quorumvis statusque
eorundem imperfectionem.*

Atque adeo patet, quænam circa actiones non commit-
tendas, seu omittendas considerata veniant, & quomodo in
examinanda actionum rectitudine non modo nostri ac Dei,
Domini nostri, sed propter Deum etiam aliorum hominum
rationem habere debeamus. Quodsi ergo quis omnem a-
ctionum humanarum rectitudinem a voluntate divina deri-
vare voluerit; fecundissima jam habet principia, ex quibus
de singulis committendis ac omittendis statui potest. Atque
his principiis utemur in philosophia practica, Jure inprimis
naturæ, sit ita, quod in philosophia practica demonstraturi
simus, actionibus intrinsecam esse honestatem ac turpitudi-
nem, agnoscendam etiam ab iis, qui vel Deum non agno-
scunt, vel Jus ejus in hominem ignorant.

§. 983.

*Consilium dare dicitur, qui significat, quid sibi videatur, Consilium
ut fiat. Suadere dicitur, qui significat, quid fieri velit in alterius Suasio §.
(Wolffii Theol. Naturalis.) Aaa aaa ta- Jussus*

quomodo
differant.

tamen arbitrio relinquens, quid facere velit. *Iubere* dicitur, qui significat, quid fieri velit, in alterius arbitrio non relinquens, quid facere velit. Unde *Consilium* est significatio ejus, quid danti videatur, ut fiat. *Suasio* est significatio voluntatis suae de eo, quod fieri debet, ita tamen, ut in arbitrio alterius relinquatur, quid facere velit. *Jussus* vero est significatio voluntatis suae de eo, quod ab altero fieri debet, ita ut in arbitrio ipsius non relinquatur, quid facere velit.

Differentia inter consilium, suasionem atque jussum probe notanda est: neque enim solum plurimum habet usum in doctrina praesente, verum etiam maximi momenti est in doctrina de imputatione suo tempore in philosophia practica universali explicanda. Etsi enim doctrina de imputatione actionum liberalium etiam in Theologia naturali suum habere possit usum, ut evidentius appareat, malum morale, quod Deus permittit (§. 585.), nullo modo ei posse imputari; consultius tamen videtur, eam tradere suo loco. Quoniam vero plurimum refert, ut differentiam consilii, suasionis atque jussus rite percipiamus; definitiones, quas dedimus, exemplo quodam illustrandae veniunt. Ponamus itaque Titium nobis narrare injuriam a Sempronio sibi illatam, & ex nobis quaerere, quid nobis videatur, ut faciat. Nemo non dicet, Titium a nobis expetiisse consilium, quid ob injuriam a Sempronio sibi factam facere debeat. Vult vero Titius, ut ipsi mentem nostram de eo, quod fieri debet, aperiamus. Quamobrem ubi ipsi eandem significamus, consilium, quod expetit, impertimur. Nimirum Titius nos consulit, hoc est, vult, ut disquiramus, quid sit agendum, adeoque consultemus (§. 498.), & quid statuamus facta consultatione ipsi significemus: quod dum facimus, consilium ipsi dare dicimur. Consultatio est actus intellectus, nec per se in eundem influit voluntas seu appetitus, etsi per accidens fieri possit, ut in iudicium, quo de eo, quod fieri debet, statuitur, appetitus influat, quemadmodum fieri vulgo solet, ut homines habeant intellectum ab appetitu pendulum. Hoc ipsum vero in pra-

præsentem non attenditur. Atque adeo consilium, quod damus alteri, non consistit nisi in significatione judicii, quod facta consultatione de facto alieno resultat. Ponamus in casu dato nos alteri significare, quod injuriam illatam eo, quem dicimus, modo vindicandam esse existimemus, v. gr. Sempronium ad certamen singulare provocando: consilium alteri dari dicimur, quod injuriam illatam certamine singulari vindicare debeat. Nobis tamen consilium dantibus perinde est, sive idem faciat, sive non faciat: neque enim vel verbis, vel alio quocunque modo significamus nos velle, ut faciat. Immo si ex nobis quaeratur, num hoc facere debeat, an vero a certamine singulari sit abstinendum; ultra consilii limites non progredientes regerimus, nobis ita videri, ipsius vero esse, quid facere velit. Et ubi alter consilium nostrum non prorsus probare videtur; dicere solemus: hanc nostram esse sententiam, ipsi integrum esse, quid facere velit, addita ratione, quod consilia non necessitent. Quamdiu itaque nullo indicio probari potest, nos voluisse, ut Titius injuriam illatam certamine singulari vindicet, consilii limites non egredimur, nec Titius salva veritate asserere potest, nos ipsum vel jussisse, vel eidem suasse, ut certamen singulare ineat cum Sempronio. Ponamus jam porro nos contendere, injuriam a Sempronio illatam aliter quam certamine singulari vindicari non posse, additis rationibus, quibus Titius adducatur, ut hoc faciat; nemo non affirmabit, nos eidem suasse certamen singulare cum Sempronio ineundum. Dedimus autem hoc ipso indicia, quod velimus, ut hoc faciat, etsi Titii arbitrio adhuc relictum fuerit, quid facere velit, cum nulla adhuc adsint indicia, quibus significavimus, nos ipsius arbitrio hoc non reliquisse. Unde etiam Titius quaesitus, cur in certamen singulare cum Sempronio descendit, respondet: Titium hoc ipsi persuasisse, memor scilicet rationum, quas ille protulit & quibus tandem cessit. Quod si vero rationes istæ nondum videantur Titio sufficientes, ut certaminis singularis periculum subeat; cum aliis ea de re locutus affirmat, nos equidem ipsi suasse certamen singulare, se tamen ejus periculum subire nolle. Ponamus denique

nos asseverare, Titio incumbere necessitatem certaminis singularis cum Sempronio ineundi, & nisi hoc fecerit, se nullum cum ipso amplius commercium habiturum, immo contradicenti irasci; nemo non dicet, nos jussisse Titium, ut certamen singulare subeat. Quodsi jam expendas differentiam, quæ inter suasionem & jussum intercedit, non aliam deprehendes, quam quod in utroque casu quidem voluerimus, ut Titius cum Sempronio in certamen singulare descendat, in priori tamen ipsi integrum reliquerimus, num hoc facere velit, in posteriori autem ab eo exegerimus, ut faciat. Ad consilium, suasionem & jussum in praxi distinguendum sæpe recurrendum est ad interpretationem, de qua, quæ satisfaciunt, demonstrabimus in Jure naturali.

§. 984.

*Præceptum
quid sit.*

Præceptum. Jussus ejus, qui habet jus alterum obligandi, dicitur. Definiri etiam potest, quod sit jussus alterum obligans.

Ita parentibus competit jus obligandi liberos ad faciendum, quod jubent. Dicuntur itaque liberis præcipere, quod quid facere debeant, & eorum jussus præcepta sunt. Similiter qui præest civitati; ei est jus obligandi subditos ad faciendum quod jubet, & ejus jussus sunt præcepta. Nimirum si quid parentes facere jubent liberos, ex eorum jussu nascitur obligatio passiva in liberis, qua hoc facere tenentur, & ubi immorigeri fuerint, pœnis coërceri possunt, adeoque metu pœnarum eos obligant parentes ad obedientiam. Similiter si quid superior in civitate a civibus fieri jubet, ex ejus jussu in civibus nascitur obligatio ad id faciendum. Et dum pœnas decernit in eos, qui jussa facere detrectant; eos obligat ad obedientiam.

§. 985.

*Disuasio,
vetatio &
prohibitio*

Disuadere alteri quid dicitur, qui ei significat nolle se, ut hoc faciat, ita tamen ut in ejus arbitrio positum relinquat, utrum

utrum id omittere velit, nec ne. — Ast *vetare* dicitur nobis, si *quomodo* voluntatem suam alteri ita significet, quod quid ab eodem fieri *differant*, nolit, ut in ejus arbitrio positum non relinquat, utrum id omittere velit, nec ne. Quod si qui quid vetat habeat jus alterum obligandi, ne hoc faciat, *prohibere* id dicitur. Unde *Dissuasio* est significatio voluntatis nostræ de facto alterius, liberum alteri relinquens, num idem omittere velit. *Vetatio* est significatio voluntatis nostræ de facto alterius, in arbitrio alterius non relinquens, num idem omittere velit. Ast *Prohibitio* est vetatio ejus, qui habet jus alterum obligandi ad quid omittendum, vel non faciendum.

Maximi usus est in doctrina præsertim de imputatione, dissuasionem, vetationem & prohibitionem a se invicem distinguere. Quamobrem etsi non sumus nescii, vetationem & prohibitionem vulgo pro synonymis haberi; nostrum tamen fuit a se invicem nominibus distinguere, quæ re ipsa distinguuntur, adeoque iisdem tribuere significatum fixum, qui in demonstrandis veritatibus arduis usui erit. Ceterum ut quicquid sit discriminis, clarissime perspiciatur, exemplo aliquo id declarare lubet. Esto idem, quo paulo ante usi sumus ad illustrandam differentiam inter consilium, suasionem, & jussum (*not. §. 983.*). Ponamus, itaque nos Titio quærenti, quid injuria a Sempronio sibi illata sit faciendum, respondere, eam esse dissimulandam, non vindicandam, propterea quod ex vindicatione metuendum malum ipsa injuria majus, in medio tamen relinquere, quid ipse facere velit. Nemo non agnoscit, nos tantummodo consilium dare nudum consulenti. Unde si hoc Titius sequatur, quæsitus ab aliis, cur injuriam a Sempronio sibi illatam non vindicet, respondet nos ipsi dedisse consilium eam dissimulandi, non vindicandi. Enimvero ponamus ulterius, nos Titio non sine commotione animi repræsentare periculum, quod subire teneatur injuriam vindicaturus, & rogare, ut ejus vindicandæ animum deponat: etsi enim ipsi liberum sit facere, quid velit, nec id a nobis impediri possit, dolere

tamen vicem ejus, quod præsentissimo periculo nulla prorsus urgente necessitate sese exponat. Nemo non fatebitur, nos omni modo dissuadere Titio vindictam. Dissuademus itaque, dum ipsi nostram de facto non patrandò significamus voluntatem, aut, quod perinde est, de facto patrandò noluntatem, ita tamen ut ipsi integrum relinquamus, quid facere velit, ne, si res ex voto non cadat, nullam in nos culpam conjicere queat. Quodsi vero Titio interroganti respondemus, ab injuria vindicanda ipsi esse prorsus abstinendum, nec nobis cum eo ullum fore negotium, immo non permittere nos posse, ut hoc faciat, quantum quidem a nobis pendet. Non nudam hic esse suasionem facile apparet: etenim non tantummodo significamus, quemadmodum ante, quid fieri velimus, si ex nostra voluntate sit statuendum; verum insuper, quod velimus, ut alter voluntatem suam nostræ conformet. Unde etiam imperativo utimur voluntatem nostram alteri significantes. Deest vocabulum usu communi loquendi satis comprobatum. Dehortatio satisfacere videtur, immo non dubito, fore plerosque, qui pro dehortatione habituri sint. Enimvero cum in Moralibus inquirere sumus in modos, quibus quis influit in actiones alterius; dehortationem, quemadmodum a dissuasionem differt, ab eo etiam actu abire, de quo nobis jam sermo est, clarissime constabit. Libuit itaque appellare vetationem, ut eam jussui nudo opponamus, quem a præcepto distinguere placuit, usu loquendi communi non prorsus reclamante, modo ad notionem fixam & determinatam reducat, & ab inconstantie labe purgetur. Ponamus denique Titio præfectum esse a parente Mævium, ut ejus actiones moderetur, ne incautus periculo sese committat, hunc autem illi sancte affirmare, quod non sit permissurus, ut injuriam vindicaturus cum Sempronio in certamen singulare descendat, sed autoritate Magistratus idem potius impediturus, additis minis aliis cum coercendi, ni morem gerere velit; nemo non affirmabit, Mævium prohibuisse Titio vindicationem injuriæ a Sempronio sibi illatæ. Ecqua vero differentia intercedit inter actum Mævii & nostrum, quem vetationem appellare libuit? Sane nulla, nisi quod

VET.

veratio in casu uno fiat ab eo, qui jus Titium obligandi habet, in altero autem ab eo, qui jure eum obligandi destituitur. Cum autem hæc differentia magnum momentum trahat in doctrina de imputatione; eam omnino attendendam esse concedet, qui momentum istud perspectum habet. Modo autem insinuavimus nos actus, quibus quis influit in facta tantæ commissionis, quam omissionis alterius, accuratius exposituros in Moralibus. Hic enim nonnisi delibamus, quæ præsentī instituto sufficiunt.

§. 986.

Deo competit jus obligandi hominem ad actiones non suo Jus obligandi divi-
arbitratu, sed juxta voluntatem divinam determinandas. Pot-
 namus enim eidem non competere jus obligandi hominem ad *num.*
 actiones suas voluntati divinæ conformandas. Quoniam jus est
 potentia agendi moralis (§. 954.), potentia autem agendi mo-
 ralis facultas agendi quod moraliter possibile (§. 953.); mo-
 raliter possibile non est, ut hominem obliget ad actiones non
 suo arbitratu, sed juxta voluntatem divinam determinandas,
 consequenter nec homo obligatur ad actiones suas liberas non
 suo arbitratu, sed secundum Dei voluntatem determinandas:
 quod cum sit absurdum (§. 974.); Deo utique competit jus obli-
 gandi hominem ad actiones liberas non suo arbitratu, sed juxta
 ipsius voluntatem determinandas.

Idem etiam ostenditur hoc modo. Homo est servus Dei
 (§. 968.), adeoque in dominio ipsius (§. 967.). Quamobrem
 cum dominium sit jus pro arbitrio disponendi omni modo de
 eo, quod est in dominio (§. 959.); Deus quoque habet jus dispo-
 nendi de actionibus liberis hominis pro arbitrio suo. Quoni-
 am vero hoc jus foret nullum, si non necesse esset, ut homo
 actiones suas non suo arbitratu, sed ex voluntate Dei deter-
 minaret, sed huic integrum relinqueretur, quid facere vellet,
 consequenter si non obligaretur ad faciendum, quod Deus
 vult

vult (§. 973.); quin Deo competat jus obligandi hominem ad actiones liberas non suo arbitratu, sed juxta voluntatem ipsius determinandas dubitari haud quaquam est.

Quoniam jus obligandi homines ad certam actionum liberarum determinationem, quod Deo competere evicimus, ex dominio fluit, cui homo subjicitur, quemadmodum ex demonstratione directa propositionis presentis patet; juri obligandi ea tribuenda amplitudo, quæ dominio convenit. Dominium Dei plenum est (§. 963.), adeoque quicquid in eodem juris concipi potest, prorsus illimitatum est. Quamobrem jus quoque obligandi hominem nulla prorsus limitatione imminutum. Atque ideo nulla concipi potest actio libera, quæ eidem eximi possit, ac modus obligandi arbitrio Dei prorsus relictus. Hæc probe notanda veniunt tum ad agnoscendam bonitatem divinam, qua in hominem abundat; tum ad tollendas querelas iniquas de nimia Dei severitate.

§. 987.

*Obligatio
divina as-
serta.*

Deus hominem obligat ad actiones non suo arbitratu, sed juxta voluntatem ipsius determinandas. Constat experientia obvia, ex quibusdam actionibus sequi necessario mala physica, & alia eadem contingenter comitari; ex quibusdam ex adverso necessario sequi bona physica, & alia eadem contingenter comitari. Quoniam hæc debentur nexui rerum in hoc universo, vi cujus ratio sequentium sufficiens continetur in antecedentibus (§. 10. *Cosmol.*), adeoque positæ antecedentibus ponuntur consequentia (§. 118. *Ontol.*); Deus autem hoc universum gubernat, dum omnia inter se connectit (§. 901.); quin voluntate Dei ista consequantur dubitandum non est. Enimvero actiones nobis representamus tanquam bonas, quatenus ex iisdem consequuntur bona physica & hæc alia contingenter comitantur, aut tanquam malas, quatenus inde necessario resultant mala physica & hæc alia contingenter comitantur: id quod nemo non ex seipso addiscere valet, nec hic prolixa indiget demon-

demonstratione, consequenter mala physica cum actionibus nostris connexa sunt motiva nolitionis; bona autem physica motiva volitionis (§. 890. *Pfych. emp.*). Quoniam itaque Deus motiva nolitionis ac volitionis cum actionibus liberis connectere voluit; hominem autem obligat ad certas actiones omittendas & alias committendas, quatenus motiva cum iisdem connectit (§. 973.); patet ipsum hominem obligare ad certam actionum liberarum determinationem. Constat autem Deo competere jus obligandi hominem ad actiones non suo arbitratu, sed secundum voluntatem ipsius determinandas (§. 986.). Quamobrem cum repugnet, Deum obligare hominem ad actiones voluntati suæ contrarias, & potius velle intelligatur eas actiones committi & omitti, ad quas committendas & omittendas eundem obligat; quin jure suo usus eundem obliget ad actiones liberas non suo arbitratu, sed secundum voluntatem ipsius determinandas, dubitare nullo modo licet.

De hac obligatione activa Dei, per quam valida sit obligatio hominis passiva, cum sine ista hæc a Deo remissa intelligatur, multa dici poterant, immo ipsa demonstratio accuratius evolvi poterat; sed cum in philosophia practica universali omnem obligationem activam & passivam ex instituto declaraturi simus, hic brevioribus esse licet. Quamobrem non solliciti sumus de objectionibus, quæ circa contingentem bonorum & malorum physicorum nexum cum actionibus hominum liberis formari poterant, quatenus quotidie videmus ex actionibus bonis consequi plurima mala physica, ex malis autem bona, ut ideo mali censeantur feliciores bonis & infelicitas existimetur virtutis comes. De his enim demonstraturi sumus suo loco, quæ satisfaciunt, principiis sufficientibus hic nondum instructi. Ne tamen nihil dixisse videamur & rem totam in ancipiti reliquisse; cauti sumus in demonstratione propositionis præsentis, ex quibusdam actionibus mala physica necessario consequi, & hæc ipsa commitari alia contingenter, & similiter ex quibusdam actionibus

(*Wolffi Theol. Natur.*)

Bbb bbb

bona

bona physica necessario consequi & hæc ipsa comitari alia contingenter. Hoc ipso nimirum innuimus, actionum moralitatem potissimum æstimandam esse ex iis, quæ necessario ex actionibus nostris consequuntur, cum per ea constituatur intrinsecum earundem discrimen; non tamen prorsus negligenda esse quoque ea, quæ contingenter consequuntur, cum non minus per hæc, quam per illa pateat obligatio activa divina, & in Moralibus magni momenti sit, ut eorum etiam ratio habeatur. Conjungimus ideo ea, quæ necessario consequuntur, cum istis, quæ contingenter eadem comitantur, ut intelligatur, ad contingentia sola non esse animum advertendum; sed ea una cum necessariis esse conjungenda & simul perpendenda, siquidem de obligatione divina activa statuere volueris. Quomodo autem determinandæ sint actiones, ut voluntati divinæ sint conformes, non contrariæ, ex anterioribus abunde patet, ut multis demonstrationum ambagibus non sit locus. Ne tamen desit propositio usum suum habitura, lubet eam per modum corollarii inferre.

§. 988.

*Obligatio
divina quo
tendat.*

Quoniam *Deus* obligat homines ad actiones non suo arbitratur, sed juxta voluntatem ipsius determinandas (§. 987.), vult autem, ut actiones suas dirigat ad sui statusque sui (§. 905.) & aliorum hominum statusque eorundem (§. 909.), immo totius universi perfectionem (§. 920.), nec non ad manifestationem gloriæ suæ (§. 918.); *homines* quoque obligat ad dirigendas actiones suas ad sui & aliorum statusque sui ac aliorum, immo totius universi perfectionem atque gloriæ divinæ manifestationem, consequenter etiam ad omittendas actiones, quæ tendunt ad sui & aliorum statusque sui ac aliorum imperfectionem (§. 28. Ontol.), & ad non omittenda motiva ab ipsius attributis desumenda (§. 919.).

In his continetur omnis agendorum & non agendorum
nume-

numerus, ad quæ Deus nos obligat, simulque intelligitur, quod obligatio passiva & activa eandem habeant latitudinem (§. 975. & seqq.), nec passiva ulla ex parte a Deo remittatur. Ablit adeo ut quis sibi persuadeat, actiones quasdam esse adeo leves, ut in iis Deus hominem reliquerit propriæ libertati.

§. 989.

Deus præcipit, ut homo actiones suas liberas dirigat ad Quamam sui aliorumque statusque sui ac aliorum, immo totius universi perfectionem ac gloriæ suæ manifestationem. Vult enim, ut homo *Deus.* actiones suas liberas ad sui statusque sui (§. 905.) & aliorum statusque eorundem (§. 909.), immo totius universi perfectionem (§. 920.) atque gloriæ divinæ manifestationem dirigat (§. 918.) & ad hanc ipsam directionem obligat (§. 988.), jure eum obligandi, quod habet, usus (§. 986.). Quamobrem cum voluntas ipsius & obligatio de hac actionum directione per demonstrationes anteriores, nexum veritatum universalium patefacientes (§. 446. *Psychol. ration.*), adeoque beneficio rationis cognoscatur (§. 483. *Psychol. empir.*); homo autem rationem habeat a Deo (§. 786.), ejus usum tanquam finem intendente (§. 648.); quin suam homini voluntatem de actionum directione & obligatione ad eandem beneficio rationis significet dubitari nequit. Enimvero qui alteri voluntatem suam de facto ipsius significat, nec in ejus arbitrio positum relinquit, quid facere velit, ipsum hoc facere jubet (§. 983.) & ubi ipsi jus est alterum obligandi, præcipit (§. 984.). Deus itaque homini præcipit, ut actiones suas liberas dirigat ad sui statusque sui & aliorum statusque eorundem, immo totius universi perfectionem ac gloriæ divinæ manifestationem.

Equidem demonstratio tota procedit juxta canonem logicum, cui competit definitio, ei competit definitum (§. 349. Log.), utpote in applicatione definitione præcepti, quæ

in definitionem jussus resolvitur (§. 983.), consistens; non tamen inconsultum est, ut probe perpendatur, quomodo ista applicatio fiat. Nimirum ut constet, Deum præcipere eam actionum liberarum directionem, quam abunde inculcavimus, demonstrandum est 1. ipsum eandem velle, 2. voluntatem suam nobis patefacere, 3. nec in arbitrio nostro relinquere, num voluntatem nostram suæ conformare velimus, & 4. facere hoc usum jure suo nos obligandi. Ea enim sunt præcipientis-requisita, quorum uno deficiente præceptum nullum est (§. 983. 984.). Voluntas Dei patet per demonstrationes superiores (§. 905. 909. 918. 920.). Quod non arbitrio nostro relinquat, utrum volenti morem gerere velimus, nec ne; patet ex obligatione activa (§. 988.), per quam valida efficitur passiva necessitatem moralem imponens homini ad actiones suas voluntati divinæ conformiter determinandas (§. 973. 974.). Quod voluntatem suam una cum obligatione nobis patefaciat, ex eo colligitur, quod voluntas pariter divina, quam obligatio tam activa, quam passiva via demonstrationis, adeoque beneficio facultatum animæ rationalis nobis innotescat, quas cum in finem nobis concessit Deus, quatenus nos istis facultatibus instructos liberrime creavit. Et intelligitur Deum jubere illam, quam propositio præsens urget, actionum directionem. Quod denique hoc faciat jure suo nos obligandi usus, patet ex eo, quod ipsi hoc jus per demonstrationem vindicavimus (§. 986.). Nihil adeo relinquitur probandum, quod non sufficienter probatum fuerit, consequenter sufficienter quoque probatum, voluntatem Dei de liberarum actionum directione esse præceptum.

§. 990.

*Quodnam
Deus pro-
bibeat.*

Deus prohibet, ne homo actiones suas liberas dirigat ad sui ac aliorum imperfectionem, & ne omittat actiones tendentes ad sui & aliorum statusque sui & aliorum perfectionem, atque ne omittat motiva in determinandis actionibus liberis ab attributis divinis desumpta. Præcipit enim, ut actiones nostras liberas dirigamus ad nostri & aliorum statusque nostri, & aliorum

rum perfectionem atque gloriæ divinæ manifestationem (§. 989.), consequenter cum per determinationem actionum liberarum gloriam divinam non aliter manifestare possimus, quam si attributa divina sint earundem motiva (§. 919.), nobis præcipit, ut attributa ipsius sint motiva nostrarum actionum. Quoniam itaque præceptum est jussus ejus, qui habet jus alterum obligandi (§. 984.), jussus vero est significatio voluntatis de eo, quod ab altero fieri debet, ita ut in ejus arbitrio non ponatur, quid facere velit (§. 983.); Deus nobis significat, se velle ut actiones nostras dirigamus ad nostri & aliorum statusque nostri ac aliorum perfectionem, & ut attributa ipsius sint motiva nostrarum actionum, nec in arbitrio nostro relinquit, ut aliter faciamus, usus jure suo nos obligandi, quod ipsi competit (§. 986.). Quoniam adeo ipse simul nobis significat, se nolle, ut actiones nostræ tendant ad nostri & aliorum, statusque nostri atque aliorum imperfectionem, & ut omittantur actiones tendentes ad perfectionem nostri & aliorum statusque nostri & aliorum, vel etiam motiva ab ejus attributis desumpta, nec in arbitrio nostro relinquit, utrum id facere velimus, nec ne (§. 988.), consequenter cum significatio voluntatis de facto alterius in arbitrio alterius positum id minime relinquens sit vetatio (§. 985.), Deus autem habeat jus nos obligandi ad actiones voluntati ipsius conformiter determinandas (§. 986.), & vetatio ejus, qui obligandi jus habet, sit prohibitio (§. 985.); nobis prohibet, ne actiones nostras liberas dirigamus ad nostri & aliorum, statusque nostri ac aliorum imperfectionem, ne omittamus actiones tendentes ad nostri & aliorum, statusque nostri ac aliorum perfectionem, & ne omittantur motiva ab attributis ipsius desumpta.

Potest etiam independenter a propositione præcedente ostendi hoc modo. Deus vult, ut homo actiones suas liberas dirigat ad perfectionem sui statusque sui (§. 905.) &

aliorum statusque eorundem (§. 909.) atque ad manifestationem gloriæ suæ (§. 918.), consequenter velle nequit, ut omitat actiones ad sui statusque sui & aliorum statusque eorundem perfectionem tendentes, vel etiam ut omitat motiva ab ipsius attributis desumta (§. 919.), aut ut committat actiones ad sui & aliorum statusque sui ac aliorum imperfectionem tendentes. Quoniam hæc omnia per demonstrationes superiores nexum veritatum universalium patefacientes (§. 446. *Psychol. ration*), adeoque beneficio rationis, quam a Deo usum ejus tanquam finem intendente (§. 648.) habemus (§. 780.), cognoscuntur (§. 483. *Psych empir.*); Deus homini beneficio rationis significat, quod illa ab eodem fieri nolit. Et quia hominem ad ea non facienda obligat (§. 988.), adeoque necessitatem moralem non faciendi imponit (§. 973.); in arbitrio ipsius non relinquit, quid facere velit. Quamobrem cum significatio voluntatis de facto alterius liberum ipsi non relinquens, num id omittere velit, sit vetatio (§. 985.); Deus vetat, ne homo actiones suas liberas dirigat ad sui & aliorum statusque sui atque aliorum imperfectionem, & ne omitat actiones tendentes ad sui statusque sui & aliorum statusque eorundem perfectionem, immo ne omitat in determinatione actionum suarum motiva ab attributis ejus desumta. Quia vero ipsi jus est obligandi hominem ad actiones suas juxta voluntatem ipsius determinandas (§. 986.), vetatio vero ejus, qui jus obligandi alterum habet, prohibitio est (§. 985.); Deus omnino prohibet, ne homo actiones suas liberas dirigat ad sui & aliorum, statusque sui ac aliorum imperfectionem, & ne omitat eas, quæ ad perfectionem sui aliorumque ac status sui ac aliorum perfectionem tendunt, vel etiam in determinandis actionibus motiva ab attributis ipsius desumta.

Sunt qui præceptum latiori sensu sumunt, ut prohibitiones sub se complectatur, distinguentes præcepta in affirmativa

tiva & negativa, quorum illa a nobis præcepta simpliciter, hæc vero prohibitiones dicuntur. Nobis tamen consultius visum præcepta a prohibitionibus distingui. Ratio patebit suo loco, quando nimirum in philosophia practica universali notionem juris evolvemus.

§. 991.

Bonitatis divina est, quod velit hominem actiones suas dirigere ad aliorum statusque eorundem perfectionem. Quoniam enim Deus vult hominem actiones suas dirigere ad aliorum quoque statusque eorundem perfectionem *per hypoth.* nemo autem non per se intelligit, perfectionem hominum singulorum magis promoveri, si unusquisque non modo ad sui & status sui, verum etiam ad aliorum statusque eorundem perfectionem actiones suas dirigat; quin Deus maxime pronus sit ad perfectionem hominum promovendam ecquis dubitet? Enimvero qui pronus est ad aliorum perfectionem promovendam, is bonus est in alios (§. 695.). Deus igitur bonus est in hominem, dum vult ipsum actiones suas dirigere ad aliorum statusque eorundem perfectionem.

Cur Deus directionem actionum ad aliorum perfectionem velit.

Veritas propositionis præsentis adeo certa est, ut directio actionum ad aliorum statusque eorundem perfectionem ex ipsa bonitate divina demonstrata a nobis fuerit in superioribus (§. 909.). Absit autem, ut quis sibi persuadeat, sic committi circulum in demonstrando, quod supra voluntatem Dei de directione actionum ad aliorum statusque eorundem perfectionem ex bonitate divina, hic vero bonitatem divinam ex voluntate de directione actionum ad aliorum statusque eorundem perfectionem demonstramus. Etenim hic tantummodo sumitur per modum hypotheseos, Deum velle ut homo actiones suas dirigat ad aliorum statusque eorundem perfectionem, non vero supponitur tanquam demonstratum, consequenter non aliud obtinet, quam quod in omni propositionum conversarum demonstratione fieri solet, veluti

cum

cum ex parallelismo linearum angulorum alternorum æqualitas & ex æqualitate angulorum alternorum vicissim parallelismus linearum demonstratur. Poterat propositio præsens inferri ex altera, quod Deus velit vi bonitatis suæ hominem actiones suas dirigere ad sui statusque sui perfectionem, propterea quod perfectio nostri statusque nostri magis promoveatur, si mutua sit hominum obligatio ad aliorum quoque perfectionem pro virili promovendam: quæ etiam ratio erat, ut eam in superioribus prætermitteremus. Quoniam tamen eadem utimur in propositione sequente demonstranda, quæ in Moralibus maximi momenti est; ne quid deesse evidentiz videatur, consultius visum fuit eandem hic demonstrari.

§. 992.

*Fons præceptorum
& prohibitionum.*

Præcepta Dei ac prohibitiones ejusdem a bonitate divina proficiscuntur. Deus enim præcipit, ut actiones nostras ad nostri aliorumque, ac status nostri & aliorum perfectionem dirigamus (§. 989.) & prohibet, ne has omittamus & ne eas dirigamus ad nostri aliorumque, statusque nostri & aliorum imperfectionem (§. 990.). Quamobrem cum præcipiens jubeat, ut quid fiat, jure suo alterum obligandi usus (§. 984.), adeoque velit, ut alter hoc faciat, nec in arbitrio ejus ponat, utrum velit, nec ne (§. 983.), ac similiter qui prohibet, vetet, ne quid fiat jure suo alterum obligandi usus (§. 985.), adeoque nolit, ut aliter agat, in arbitrio ipsius non relinquens, quid agere velit (§. cit.); quin seria sit Dei ac immota voluntas de dirigendis actionibus ad sui aliorumque, statusque sui ac aliorum perfectionem, non vero ad imperfectionem, nullo modo dubitari potest. Est vero bonitatis divinæ, quod Deus velit hominem actiones suas dirigere ad sui statusque sui (§. 907.) & aliorum statusque eorundem perfectionem (§. 991.). Quare bonitatis quoque divinæ est, quod hanc directionem præcipiat, contrariam vero prohibeat, consequenter præcepta & prohibitiones Dei a bonitate ipsius proficiscuntur.

Pro-

Propositio præsens probe notanda ob maximum, quem in Moralibus sponder, usum, in philosophia practica universali uberiori luce collustrabitur, & præterea ampliabitur, cum ibidem ostensuri simus, etiam voluntatem Dei de directione actionum nostrarum ad manifestationem gloriæ ipsius, immo de directione ad perfectionem totius universi, tribuendam esse bonitati divinæ. Taceo in præsentī, quod etiam in ipso modo obligandi bonitatis divinæ vestigia luculenta reperiri simus.

§. 993.

Præcepta ac prohibitiones Dei non sunt nuda consilia.

Præcepta enim (§. 984.) & prohibitiones Dei nos obligant (§. 985.), adeoque necessitatem moralem agendi imponunt (§. 973.), scilicet committendi, quæ præcipiuntur (§. 984. 983.) & omittendi, quæ prohibentur (§. 985.), consequenter arbitrio nostro non relinquitur, ut quæ præcipiuntur omittamus, quæ prohibentur committamus. Enimvero qui consilium dat, nobis tantummodo significat, quid ipsi agendum, hoc est, committendum vel omittendum videatur: tantum abest, ut necessitatem hoc a nobis committendi vel omittendi imponat, ut ne quidem significet quid ipse fieri velit, sed omnia arbitrio nostro relinquat (§. 983.). Præcepta igitur & prohibitiones Dei non sunt nuda consilia.

Præcepta ac prohibitiones Dei non tantummodo consilia sunt.

Quidam cum animadverterent, præcepta ac prohibitiones Dei a bonitate ipsius proficisci, quemadmodum modo demonstravimus (§. 992.), atque tendere ad felicitatem hominis, quemadmodum in Philosophia practica clarissime evincemus; inde perperam intulerunt, præcepta ac prohibitiones Dei nuda esse consilia. Nos qui persuasissimi sumus nullum esse errorem, cui non insit aliquid veri, ac ideo ex aliorum erroribus proficere studemus, ab iis reprehendendis & perstringendis alieni, quique quod verum & rectum est etiam in errantibus probamus atque laudamus, in Philosophia morali idiomate patrio conscripta probaveramus ab iis, qui

(Wolffii Theol. Natur.)

Ccc ccc

præ-

præcepta & prohibitiones Dei pro nudis consiliis venditaverant, recte sumi, quod proficiantur tum quoad ipsam eorundem substantiam, tum quoad obligationem positivam a bonitate divina, hancque veritatem maximi esse in praxi usus; esse tamen leges ex ipsa notione legis, quæ obligationem involvit, demonstraveramus. Inde qui malevolo in nos sunt animo inferébant, nos leges divinas pro nudis consiliis habere, adeoque omnem obligationem tollere & omnem morum doctrinam funditus evertere. Quantum vero a veto absint, qui præceptis divinis ac prohibitionibus vim legum denegant, propterea quod ex bonitate proficiantur, per demonstrationes nostras abunde patet. Immo suo loco ostendemus, ne leges quidem humanas esse rectas, nisi ex sapientia & bonitate proficiantur.

§. 994

*Concursus
Dei ad
actiones
bonas.*

Deus ad actiones bonas concurrat, quatenus bonæ sunt.
Deus enim actiones præcipit tendentes ad nostri aliorumque, atque status nostri & aliorum perfectionem (§. 989.), adeoque bonas (§. 370.), & prohibet actiones tendentes ad nostri aliorumque atque status nostri & aliorum imperfectionem (§. 990.), adeoque malas (§. 371.), & jure suo nos obligandi usus (§. 986.), ad bonas committendas, malas omittendas nos obligat (§. 988.), motiva cum actionibus connectendo necessitatem moralem tam bonas committendi, quam malas omittendi imponens (§. 973.). Quamobrem per præcepta & prohibitiones divinas iplisque inhaerentem obligationem intelligitur, cur homo, servus Dei (§. 968.), voluntati Domini sui (§. 966.) satisfactorius (§. 974.) omissis malis bonas committat, consequenter in voluntate Dei tanquam Domini nostri continetur ratio actionum bonarum, malis prorsus omissis, commissarum. Quoniam itaque ad actiones alterius concurrat is, in cuius voluntate continetur aliqua ratio, cur alter egerit (§. 872.), Deum ad actiones bonas, quatenus bonæ sunt, concurrere liquet.

Deum

Deum concurrere ad actiones bonas, quæ tales, eas præcipiendo & ipsis oppositas prohibendo docent etiam Theologi. Quando vero ad hunc concursum porro referunt, quod largiatur vires bonum agendi, id ad Theologiam revelatam pertinet: loquuntur enim de viribus gratiæ, quas nescit ratio. Naturales vero quæ homini sunt vires, per gratiam perficiendæ, ac ad sublimiorem gradum evehendæ, quod in concursu Dei sint attendendæ, ex superioribus jam constat (§. 876.).

§. 995.

Deus hominibus concessit dominium earum rerum, quibus ad promovendam sui & aliorum atque status sui & aliorum perfectionem habent opus. Etenim Deus hominem obligat ad dirigendas actiones suas ad sui & aliorum atque status sui & aliorum perfectionem (§. 988.), adeoque hoc faciendi necessitatem moralem imponit (§. 973.). Quamobrem cum id facere non possit, nisi ipsi competat facultas disponendi de substantia, usu atque fructu earum rerum, quibus ad sui & aliorum statusque sui ac aliorum perfectionem promovendam habet opus, fini huic convenienter, consequenter dominium in istis rebus (§. 959.); necesse est ut Deus eidem concedat dominium earum rerum, quibus ad promovendum sui & aliorum atque status sui & aliorum perfectionem habet opus.

Dominium rerum a Deo hominibus concessum.

Dominium, de quo hic loquimur, est totius generis humani, nec tollit communionem primævam, quam alibi distinctius explicaturi sumus, consequenter singulis tribuit jus æquale ad ea, quibus habent opus. Cur vero ab isto dominio universali, quæ communionem primævam involvit, fuerit descendendum & dominia singularia introducenda, suo loco demonstrabitur in Jure naturali.

§. 996.

Homo dominio a Deo concessio utitur, si de his disponit ad Usus & pro-abusus do-

*minii in
quo confi-
sat.*

promovendam sui & aliorum statusque sui & aliorum perfectionem; abutitur vero, si disponit ad promovendam sui & aliorum statusque sui & aliorum imperfectionem. Etenim Deo competit dominium plenum rerum omnium in hoc universo, five in prima statim creatione fuerint factæ, five hodie demum generentur aut quomodocunque producantur a natura rerum (§. 963.) & homini nihil huius domini concessit, nisi quatenus rebus quibusdam habet opus ad sui & aliorum atque status sui & aliorum perfectionem promovendam (§. 995.). Quamobrem cum homo obligetur ad actiones liberas non ex suo arbitratu, sed secundum voluntatem Dei determinandas (§. 974.); de rebus, quarum dominium Deus ipsi concessit, aliter disponere non debet, nisi ad promovendum sui & aliorum statusque sui & aliorum perfectionem, consequenter quatenus ab iisdem pendet actualitas ejus, quod bonum est; non vero quod est malum (§. 370. 371.). Quamobrem cum usus rei consistat in dependentia actualitatis rei cujusdam alterius, quæ mala non est, ab eadem, abusus vero in dependentia ejus, quæ mala est (§. 646.); homo dominio a Deo concessio utitur, si de iis disponit ad promovendam sui & aliorum statusque sui ac aliorum perfectionem, abutitur vero, si disponit ad promovendum sui & aliorum statusque sui ac aliorum imperfectionem.

E. gr. Deus hominibus concessit dominium fructuum, quos edunt arbores, cum habeant usum in alendo corpore. Homo obligatus est ad corporis sui & aliorum conservationem. Quamobrem si fructibus vescitur, vel si vescendos aliis dat, quatenus ad corporis conservationem faciunt sanitati proficui; dominio, quod in iis a Deo concessum habet, utitur. At si fructibus vescitur, vel aliis vescendos dat, qui sanitati vel suæ, vel aliorum nocent, dominio, quod in iis habet, abutitur. Jus hominis in creaturas hic consideratur in relatione ad Deum, non vero in relatione ad homines alios, quavis dominium universale quoad usum & abusum etiam subsistat

in dominio singulari, quod singulis respectu singulorum competit. Quinam vero sint diversi utriusque juris effectus, inter se minime confundendi, suo explicabimus loco in Jure naturali, ne plus sibi arroget homo juris, quam ipsi competit. Missa igitur jam facimus, quæ ad hoc argumentum dilucidandum in medium afferri poterant, ne disciplinarum limites præter necessitatem confundamus.

§. 997.

Deus Dominus summe bonus est. Etenim præcepta ac *Qualis sit* prohibitiones Dei a bonitate ejus proficiunt (§. 992.), quam *Dominus* summam esse constat, ita ut majorem concipi repugnet (§. 699.), *Deus.* consequenter hæc homini præcipit Deus, non alia, quia summe bonus est, & hæc prohibet, non alia, quia summe bonus est. Enimvero præcipit homini committenda & prohibet non committenda, quatenus jus obligandi hominem ad facienda & non facienda habet (§. 984-985.). Quamobrem cum hoc jus ipsi competat, quatenus eidem est jus disponendi de actionibus liberis hominis, consequenter quatenus dominium in homine habet (§. 959.), adeoque dominus ejusdem est (§. 964.); Deus Dominus summe bonus est.

Poterat etiam ostendi hoc modo. Deus summe bonus est, ita ut majorem bonitatem concipi repugnet (§. 699.), enti cuicumque, adeoque etiam homini, tantundem boni conferens, quantum sapientia sua salva conferri potest (§. 698.). Est vero idem Dominus hominis (§. 966.). Quamobrem patet Deum esse Dominum summe bonum.

Non licet excipere quod hominem in mala ruere sinat: neque enim hoc repugnat bonitati ipsius (§. 725.). Neque contra bonitatem dominii divini urgere licet, quod eidem mala physica immittat, citra ipsius culpam: dirigit enim ea ad bonum finem (§. 680.), hæc autem directio bonitati ipsius tribuenda (§. 733.).

§. 998.

Idem ulterius expenditur.

Deus servos suos amat, easque vult esse felices, non infelices. Homines sunt servi Dei (§. 968.) & Deus eorum Dominus est (§. 965.), idemque summe bonus (§. 997.). Quamobrem cum alterum amet, qui in eundem bonus est (§. 700.); quin Deus servos suos impense amet dubitari haud quaquam potest. *Quod erat unum.*

Vult autem idem Deus, Dominus hominum (§. 966.), servorum suorum (§. 968.); eorum felicitatem (§. 706.), infelicitatem vero velle nequit (§. 707.). Quamobrem ulterius liquet, Deum velle ut servi sui sint felices, non infelices. *Quod erat alterum.*

Falluntur adeo, qui se infelices existimant, quod sint servi Dei, nec sui juris. Etenim quatenus homo facit, quæ servo Dei facere non est integrum, libertate sua abutitur: hoc autem libertatis abusu se reddit infelicem. Quando vero servum Dei fidelem se præstat, faciens ea, quæ vult Dominus, eam felicitatem consequitur, quæ in ipsum cadere potest. Sed hæc multo adhuc clariora evadent in Moralibus.

§. 999.

Dominium Deo juxta S. S. tri- buendum.

Deo juxta S. S. competit dominium in creaturis, quale ipsi in superioribus vindicavimus. Etenim Deus ipse Jerem. XVIII. 3. & seqq. jus suum in hominem comparat cum jure figuli in vasa sua. Quemadmodum nimirum figulus ex luto suo pro arbitrio suo vas facit & de eodem pro arbitrio itidem suo disponit; ita etiam Deus hominem fecit, qualem voluit, & de eo disponit, quemadmodum sibi videtur. Jus figuli in vasa sua dominium est (§. 959.). Quamobrem jus Dei in homines erit quoque dominium, eo scilicet sensu, quo ipsi idem vindicavimus in superioribus (§. 963.). Quod vero jus Deo competit in hominibus, idem etiam ipsi competit in rebus ceteris omni-

omni-

omnibus. Etenim jus figuli oritur ex eo, quod vas fecerit ex luto suo, de quo pro arbitrio suo disponere valet, ita ut nemini rationem reddere teneatur, cur tale potius vas faciat, quam aliud. Constat vero Deum fecisse omnia ex nihilo (§. 759.); ita ut nullum extiterit ens, cui rationem reddere teneretur, cum has potius res produxerit, quam alias, & liberrime constituisse hunc rerum ordinem, ita ut nemini integrum fuerit alium potius, quam hunc requirere (§. 765.). Quamobrem eadem est origo juris in res ceteras omnes, quæ sunt in hoc universo, quæ est juris in homines. Cum igitur jus in homines sit dominium eo sensu acceptum, quo supra idem definivimus (§. 959.); Deo etiam tribuendum est dominium in rebus ceteris omnibus autoritate S. S. quale eidem competere in superioribus demonstravimus.

Simile, quo utitur Deus ad jus suum in creaturas illustrandum, ideam exemplarem domini suppeditat, cui creaturæ subjiçantur, probe adeo perpendendum, ne quid obsecuritatis circa doctrinam maximi momenti supersit.

§. 1000.

Deus præcipit in S. S. ut actiones nostras liberas dirigamus ad nostri aliorumque statusque nostri ac aliorum perfectionem eodem prorsus sensu, quo hanc actionum directionem ab eo præcipi in superioribus demonstravimus. Christus Matth. V. 48. liberarum actionum directionem præcepturus: Estote, inquit, vos perfecti, sicut pater vester cælestis perfectus est. Deus juxta S. S. vult, quod ipsum decet, eodem prorsus sensu, quo idem ex principiis rationis evicimus (§. 412.). Quamobrem cum nostro sensu Deum deceat, cujus aliqua in essentia vel attributis ipsius continetur ratio, cur id potius velle debeat, quam aliud (§. 332.); ex mente etiam S. S. dicendum est, Deum ita determinare actiones suas liberas, ut per attributa ipsius intel-

S. S. consensus circa actionum liberarum directionem.

intelligi possit, cur hoc potius agere voluerit, quam aliud (§. 56. *Ontol.*). Atque adeo liberz Dei actiones consentiunt cum essentia & attributis ejus, consequenter ad perfectionem Dei pertinent (§. 503. *Ontol.*). Quodsi ergo Christo Doctore in determinandis actionibus liberis Deum imitari debemus; rationes earum quoque ab essentia & natura nostra desumere debemus, aut si mavis, ab iis, quz necessario insunt, consequenter cum actiones naturales ex essentia & natura rei necessario consequantur (§. 913.), liberz etiam per easdem rationes determinandz sunt, per quas naturales determinantur, veluti quz corpus respiciunt, per corporis conservationem, ad quam tendunt omnes functiones organorum corporis. Enimvero si actiones liberz cum naturalibus per easdem rationes finales determinantur; ad perfectionem nostram statusque nostri tendunt (§. 914.). Quare Christo Doctore actiones liberz dirigendz sunt ad nostri ac status nostri perfectionem, eodem prorsus sensu, quo hanc actionum directionem a Deo præcipi demonstravimus (§. 989.).

Ad perfectionem, quam Christus nobis præcipit, disertis verbis etiam requirit amorem inimicorum, & beneficia in eos conferenda *vers.* 44. Præcipit autem proximum, hoc est, hominem promiscue omnem, diligere tanquam nosmetipsos *Matth.* XIX. 19. Qui alterum amat, tanquam seipsum, ex ejus felicitate eandem percipit voluptatem, quam ex propria percipere potest (§. 633. *Psychol. empir.*). Vult igitur Christus, ut ex hominum aliorum felicitate, etiam si inimico in nos sint animo, eandem voluptatem percipiamus, quam ex propria percipere solemus. Quoniam igitur eadem nobis esse debet cura aliorum hominum, ipsorum etiam inimicorum, quz propriæ salutis; quin quoad alios liberz nostras actiones eodem modo dirigere debeamus, quo eas quoad nos dirigere tenemur dubitandum non est. Enimvero Christo Doctore actiones nostræ dirigendz sunt ad nostri statusque nostri perfectio-

nem per demonstrata. Eodem igitur Doctore eadem dirigendæ sunt ad aliorum statusque eorundem perfectionem.

Consensum doctrinæ nostræ de directione liberarum actionum ad nostri & aliorum statusque nostri ac aliorum cum doctrina Christi citato loco uberius explicavimus in Horis Subsecivis A. 1730. Trimestri vernali num. V. p. 343. & seqq. Quamobrem non opus est, ut hic simus prolixiores. Quæ igitur uberius dici poterant ad sensum verborum Christi demonstrandum; ea ibidem proposita legantur.

§. 1001.

Quoniam Deus præcipit juxta S. S. actionum liberarum directionem ad nostri & aliorum statusque nostri ac aliorum perfectionem eodem prorsus sensu, quo eandem ab eo præcipi supra demonstravimus (§. 1000.); hoc ipso simul patet, quod *Consensus S. S. quoad prohibitiones divinas.* juxta S. S. etiam prohibeat actionum liberarum directionem ad nostri aliorumque statusque nostri ac aliorum imperfectionem eodem sensu, quo nos eandem ab ipso prohiberi in superioribus demonstravimus (§. 990.).

Non igitur opus est, ut in iis demonstrandis simus prolixiores, quæ cum per se pateant ultro conceduntur. Ceterum cum ista actionum directio, quam voluntati divinæ conformem stabilivimus, sit generale principium, ex quo omnem rectitudinem actionum liberarum, consequenter jus naturæ universum suo loco deducemus, & eandem quoque tanquam agendorum & non agendorum normam generalem proposuerit Christus, quemadmodum loco citato (not. §. 1000.) clarissime ostendimus; eo ipso evicimus consensum totius Juris naturalis a nobis in posterum tradendi ac universæ theoriæ moralis cum doctrina Christi consensum. Etenim quæ ex principio menti Christi conformi deducuntur, observato demonstrandi rigore, ne inde fluere videantur, quæ non fluunt, ea ejusdem quoque menti consona esse debent.

(Wolffii Theol. Natur.)

Ddd ddd

Quam-

Quamobrem si Christus de actionum nostrarum directione nihil præcepisset, quam quod perfecti esse debeamus, sicut pater noster cælestis Deus perfectus est, omnem morum theoriam menti ejus conformem via demonstrationis reperire liceret.

§. 1002.

*Consensus
S. S. quoad
obligationem.*

Deus hominem juxta S. S. obligat ad agenda & non agenda eodem sensu, quo idem in anterioribus probavimus. Deus Exod. XX. 5. 6. mala physica comminatur præcepta ejus transgredientibus; bona autem pollicetur iis, qui eadem custodiunt. Non opus est, ut proluxa interpretatione malorum physicorum comminationem & bonorum physicorum promissionem in verbis istis S. S. contineri evincamus: etenim cum istiusmodi comminationum & promissionum plena sit Scriptura sacra, in quibus exempla specialia afferuntur aperte loquentia, quod Deus immittere decreverit mala physica præcepta ejus transgredientibus, bona vero physica eadem custodientibus, non opus est ut in re manifesta & a nemine in dubium vocata, qui in lectione S. S. peregrinus ac hospes non est, sinus prolixiores. Enimvero cum mala physica actiones voluntati divinæ contrarias consequantur, Deo decernente; hoc ipso repræsentantur tanquam malæ. Et quia bona physica sequuntur actiones voluntati divinæ conformes, Deo itidem decernente, eo ipso agenti repræsentantur tanquam bonæ. Quoniam itaque boni & mali repræsentationes motiva sunt, boni nempe repræsentationes motiva volitionis, repræsentationes mali motiva nolitionis (§. 890. *Psychol. empir.*); Deus liberrime utraque decernens (§. 593.) juxta S. S. motiva cum actionibus hominum liberis connectit. Quamobrem cum nostro sensu hominem obliget, dum motiva cum actionibus ejus liberis connectit (§. 973.); juxta S. S. hominem obligat ad

ad agenda & non agenda eodem sensu, quo idem in anterioribus probavimus (§. 987.).

Quodsi prolixioribus esse liceret, explicanda inprimis erat phrasis S. S. *visitare iniquitatem in aliquo*, ut dilucide constaret visitationem istam in immissione malorum physicorum consistere, istiusmodi præsertim, quæ ex actione non necessario consequuntur; sed potius contingenter, vi nexus scilicet rerum in hoc universo a Deo liberrime facti, quatenus ob convenientiam quoque nexus mali physici cum morali hanc potius rerum seriem, quam aliam perducere ad actum maluit Deus, justitiam suam fini suo ultimo convenienter demonstraturus. Similiter explicari debebat, quid sit *benefacere agenti*, ut non minus elucesceret benefacta ista consistere in immissione bonorum physicorum, istiusmodi inprimis, quæ ex actionibus non necessario consequuntur, sed potius contingenter easdem excipiunt, denuo vi nexus rerum a Deo liberrime facti, quatenus is ob convenientiam quoque nexus boni physici cum morali hanc rerum seriem producere maluit justitiam suam demonstraturus. Sed horum omnium uberiores discussionem S. S. interpretibus ac Theologis relinquimus, principiorum nostrorum philosophicorum usum in interpretandis oraculis divinis non sine animi voluptate insigni expecturis. Nobis sufficit digito quasi demonstrasse, quid fieri debeat & qua via sit incedendum, ut ad scopum quæsitum feliciter perveniatur. Equidem loci S. S. quo ad probandam propositionem præsentem utimur, interpretatio præcipue exigat, ut doceatur, quomodo Deus puniat ob male facta parentes in liberis, ita tamen ut liberi non ideo dicendi sint puniri ob facta aliena, hoc est, ut mala physica ob male facta parentum liberis immissa rationem pænæ habeant quoad parentes, non vero quoad liberos; sed ea non sunt hujus loci, etsi ad plenius intelligendam obligationem divinam activam faciant. Dabimus autem alibi principia, quæ cum principiis Theologiæ naturalis conjuncta plenissimam argumento arduo atque difficili lucem affundent.

§. 1003

*Consensus
S. S. quo-
ad domini-
um rerum
hominibus
concessum.*

Deus juxta S. S. hominibus concessit dominium rerum omnium, quæ usui ipsi esse possunt. Cum Deus protoplastos creasset, dixit ad eos Gen. I. 28. *Crescite & multiplicamini, & replete terram, & subjicite eam, & dominamini piscibus maris & volatilibus cæli, & universis animantibus, quæ moventur super terram & vers. 29. Dedi vobis omnem herbam afferentem semen super terram, & universa ligna, quæ habent in semetipsis seminem generis sui, ut sint vobis in escam: & cunctis animantibus terræ omni- que volucri cæli, & universis, quæ moventur in terra, & in quibus est anima vivens, ut habeant ad vescendum.* Deus omnium rerum, adeoque etiam terræ & eorum, quæ in ea sunt, Dominus (§. 999.), cum vi dominii sui de iis pro arbitrio suo disponere possit (§. 959.), protoplastis & ex iisdem propagatis, adeoque toti generi humano Act. XVII. 28. concedit jus terram sibi subjiciendi & omnibus animantibus, sive in aquis, sive in aëre, sive in terra degant dominandi (§. 954). In textu Hebræo jus illud subjiciendi terram exprimitur verbo *וַיִּשְׁבֹּט*, quod apud Hebræos usitatum ad denotandam actionem, qua victor in potestatem suam redigit hostem devictum cum iis, quæ ipsi sunt. Exempli loco esto David, qui Deo legitur consecrasse argentum & aurum gentium, quas *subegerat*: ubi in textu Hebræo vocabulum istud legitur, quo jus in terram hominibus concessum exprimit Deus. Jure Gentium moribus veterum approbato hostis devictus fiebat servus victoris 2. Petr. II. 19. consequenter dominio ejusdem subiciebatur (§. 967.) Quamobrem cum Deus hominibus concedit jus sibi subjiciendi terram; iisdem concedit dominium terræ. Quoniam vero hic sermo est de protoplastis & omnibus eorum posteris; terræ dominium, de quo loquitur S. S. generale est, competens æ quali-

qualiter toti generi humano, nullo discrimine facto. Quod vero jus in terram humano generi in prima rerum creatione concessum etiam extendatur ad ea, quæ in terra sunt & usui ejus inservire possunt; ex jure dominandi animantibus cujusvis generis & vescendi omnibus vegetabilibus colligitur. Dum poma arboris vescimur, ejus substantia perit, & in horum numero sunt omnia, quæ in ciborum censum veniunt, ut salva substantia non sit eorum usus. Quamobrem cui conceditur jus poma vescendi, ei utique conceditur jus disponendi & de substantia, & de usu ejus. Quoniam itaque ex poma fructus provenire nequit, nisi quatenus venditur vel permutatur, qui vero de substantia ejus pro arbitrio suo disponere valet, idem vendere ac permutare, consequenter fructum aliquem ex eo percipere potest (§. 956.); cui competit jus vescendi poma, eidem etiam competit Jus fruendi (§. 958.). Enimvero dominium cum sit jus de substantia, usu ac fructu rei disponendi (§. 959.); ex jure vescendi vegetabilibus patet homini esse concessum eorundem dominium. Concedit vero Deus homini dominium terræ, quia habitaculo opus habet; concedit dominium vegetabilium, quia cibus opus habet ad sui conservationem. Conservatio corporis injungitur homini a Deo, dum præcipit directionem actionum ad sui statusque sui & aliorum statusque eorundem perfectionem, contrarias vero prohibet (§. 1000.). Quamobrem liquet; Deum humano generi concessisse dominium vegetabilium, quia eorum usus requiritur ad explendam obligationem, qua in dirigendis actionibus liberis tenetur. In interpretandis juribus interpretatio extensiva locum habet ob rationis identitatem, qua posita poni etiam debet, quod per eam determinatur (§. 118. *Ontol.*). Nullum adeo dubium est, dum Deus dominium terræ concessit humano generi, eum quoque concessisse dominium rerum omnium, quæ in ea sunt, & quibus homines

habent opus ad sui aliorumque & status sui aliorumque perfectionem promovendam.

Quoniam vero Deus dominium rerum omnium, quæ sunt in terra & quibus homo ad se aliosque perficiendum habet opus, juxta S. S. concessit; nulla sane ratio est, cur hoc jus non extendi etiam debeat in omnia animalia, sive in volatiliū, sive natatiliū, sive quadrupedum genere fuerint. Unde facile intelligitur ex ipso contextu, quale sit illud jus, quod Deus in hominem transtulit, dum eum jussit dominari omni animantium generi, ut ulteriori explicatione non sit opus. Ipsum tamen vocabulum Hebraicum *מר*, quod in textu occurrit, satis superque innuit, non aliud jus a Deo homini in animantia bruta concessum, quam quod modo per consequentiam ex contextu eidem vindicavimus. Hoc enim vocabulo utitur S. S. quando loquitur de iis, qui ab hoste capti in potestatem ipsius rediguntur. Constat vero per anteriora subjectionem istam constituisse in jure domini. Deus adeo expressis verbis hominibus concessit jus disponendi de omnibus animantibus, in quocunque genere sint, cum de eorum substantia, tum usu atque fructu (§. 959.). Quoniam tamen etiam juxta S. S. homini præcipit, ut actiones suas dirigat in universum omnes ad sui & aliorum statusque sui & aliorum perfectionem (§. 1000.) & prohibet ne eas dirigat ad imperfectionem (§. 1001.); quin etiam huic directioni juxta S. S. subest dominium in animantia bruta concessum extra dubitationis aleam positum est. Atque adeo abunde patet ex verbis ipsius Dei, quod in prima statim creatione hominibus concesserit dominium rerum, quæ usui ipsius quomodocunque inservire possunt.

Cum dominium concedatur propter usum, usum vero requirat actionum liberarum directio a Deo præcepta; facile apparet, ea dominio hominis subiecta non esse, quorum

rum usus absque hoc jure obtineri potest. Ita Solis usum, quem terricolis præbet, percipere licet, etiamsi non sit in dominio nostro. Deus igitur nobis non constituit dominium in Sole. Concessit tamen jus utendi, quatenus pro arbitrio nostro disponere licet de usu radiorum solarium multiplici terram illustrantium & calefacientium. Unde liquet jus hominum augeri ipsa rerum naturalium cognitione, sine qua usum, quem præbere possunt, non intelligunt. Absit itaque ut tibi persuadeas dominium universale in omne animantium genus homini inutile esse, propterea quod multa dentur, quorum nullus nobis est usus. Neque enim dubitandum est, dari usus rerum, eosque maxime præclaros, quos ignoramus. Sed de hisce omnibus suo loco, ubi jus omne in creaturas homini competens explanaturi sumus, quando Jus naturæ in systema redigemus.

CAPUT VII.

De attributis divinis, quæ per
antiora demonstrantur.

§. 1004.

Deus est ens infinitum. Etenim Deus est ens a se (§. 67.), *Infinitudo* cui competit intellectus infinitus (§. 167.), & voluntas *essentia* infinita (§. 357.). Quamobrem cum idem sit Spiritus *divina* (§. 124), atque adeo primum, quod de eo concipi debet, sit intellectus atque voluntas ipsius (§. 643. *Psychol. ration*), consequenter intellectus & voluntas ad essentiam ipsius pertineant (§. 144. *Ontol.*); ens infinitum est.

Deus adeo vi demonstrationis per ipsam essentiam suam infinitus est, ut adeo infinitudo ab eodem inseparabilis sit (§. 300. 291. *Ontol.*). Tollens nimirum infinitudinem, & ipsum Deum tollit, qui sine infinitudine concipi nequit.

§. 1005.

§. 1005.

*Substantia-
litas Dei.*

Deus est substantia per eminentiam. Est enim ens infinitum (§. 1004.). Sed ens infinitum per eminentiam substantia est (§. 847. *Ontol.*). Deus igitur per eminentiam substantia est.

Patet itaque, hoc non obstante, quod substantiæ dederimus definitionem, quæ enti tantummodo finito competit (§. 768. *Ontol.*), demonstrari posse, quod Deus sit substantia. Qui hoc videre non potuerunt, quidnam per eminentiam ens esse possit, non intellexerunt: quæ ἀβλεψία eo minus ferenda videbatur, præsertim cum in aliorum injuriam verteretur, quod perspicillis vulgaribus philosophiæ scholasticæ evitari poterat, quæ tradit substantiæ definitionem non nisi enti finito convenientem, Deum tamen per eminentiam substantiam vocat ac ideo eum supra prædicamenta, in substantiam atque accidens divisa, non vero in prædicamentis collocat. Salva igitur est veritas, salvæ sunt methodi leges, & sua sponte corruunt consequentiæ, quas inepte cumulant consequentarii scioli imperitiæ pœnas dantes, vel philosophiæ tyronibus se deridendos propinando. Ne vero in eodem cum ipsis scopulos impingat, qui veritatis amore sincero trahitur, probe mediteretur, quæ de ente per eminentiam satis clare ac distincte docuimus in philosophia prima (§. 845. & seqq. *Ontol.*).

§. 1006.

*Modi per
eminentiam
Deo tri-
buendi.*

Deo modi nulli actu insunt, per eminentiam tamen modificabilis est. Est enim Deus ens infinitum (§. 1004.). Sed enti infinito nulli quidem insunt modi (§. 840. *Ontol.*), ipsum tamen per eminentiam modificabile est (§. 846. *Ontol.*). Quamobrem Deo modi nulli insunt, per eminentiam tamen modificabilis est.

Agedum! illustremus propositionem præsentem exemplo aliquo, tum ut rectius intelligatur, tum ne inter tricas inanes refe-

referatur. Alii mundi possibiliæ sunt, in quibus ad actum deducerentur possibilia, quæ in præsentæ actum non consequuntur (§. 101. *Cosmol.*), Deo non minus intime perspecti, ac is, qui existit (§. 141. 156.), & eos is non minus ad actum perducere poterat, quam hunc produxit (§. 342.), qui unus tantummodo existit (§. 117.). Ex parte adeo objecti absolute impossibile non est, ut existat mundus alius quicumque a præsentæ diversus. Porro Deus hunc, qui existit, ex ceteris elegit mundum liberrimus ab omni coactione externa (§. 321.), atque interna (§. 351. 430.). Absolute itaque impossibilis non est electio & productio mundi alterius cujuscunque. Hæc per ea, quæ Deo insunt, possibilis concipitur, non tamen per ea necessario determinatur. Est igitur electio ac productio mundi alterius ab eo, qui existit, diversi analogum modi (§. 842. *Ontol.*). Et quatenus modi hoc analogum in Deo concipitur, per eminentiam modificabilis est. Atque hæc essentia divina modificatio per eminentiam in causa est, quod in iis, quæ de Deo concipimus, aliud sit ordine prius, aliud posterius, etsi nullum sit prius, nullum posterius tempore, quemadmodum in entibus finitis, in quibus ob modificationem seu modorum variationem successioni locus. Quoniam tamen aliquid ordine prius, aliud posterius est altero; ideo nos, qui ratiocinando unum ex altero colligere debemus intuitiva Dei cognitione destituti, per modum successionis in Deo concipimus, quæ simul insunt, ob modificationem per eminentiam, salva exclusionem reali omnium modorum. Vides itaque propositionem præsentem non esse nullius usus, sed sine ea non satis intelligi posse summam Dei in decernendo libertatem. Sane qui sibi persuasere, quasi Deus per essentiam suam determinatus fuerit ad productionem hujus universi, ipsique omnem in creando libertatem ademerunt, fatali rerum, omnium necessitate introducta; non intellexerunt modificabilitatem entis infiniti per eminentiam. Et hic *πρῶτον ψεῦδος* latet.

§. 1007.

Deus est Spiritus infinitus. Etenim Deus Spiritus est *Qualis Spiritus*
(*Wolffii Theol. Natur.*) Eee eee (§. 124.), *sic Deus.*

(§. 124.), idemque ens infinitum (§. 1004.). Est igitur Spiritus infinitus.

Ostenditur etiam hoc modo. Deus est substantia per eminentiam (§. 1005.), eidemque competit intellectus infinitus (§. 167.) & voluntas infinita (§. 357.), eademque liberrima (§. 431.). Quamobrem cum substantia intellectu & voluntate libera prædita sit Spiritus (§. 643. *Psychol. ration.*); Deus Spiritus infinitus est.

Non nego ad determinationes essentielles Spiritus infiniti, si tanquam Synonymon Dei sumatur, pertinere quoque omnipotentiam, quam Deo competere (§. 349.) ipsique soli propriam esse tanquam creatricem, nec ulli creaturæ communicabilem supra evicimus (§. 775.): neque enim potentia creatrix ex intellectu & voluntate infinita deduci potest, sed a posteriori ejus agnoscitur & realitas, & inexistencia in essentia divina, quatenus agnoscimus mundum aliquem existere & ejus actualitatem vi intellectus ac voluntatis divinæ non concipere licet absque potentia creatrice. Sufficit tamen ad agnoscendam spiritualitatem Dei & infinitudinem ejus demonstrandam, quod sit intellectu infinito & voluntate infinita præditus, propterea quod intellectus & voluntas libera alii enti competere nequit quam spiritui. Quod enim spiritus infinitus gaudet potentia creatrice, id quidem inde est, quod idem sit ens a se, a quo adeo ens omne, quod est ab alio quoad actualitatem suam dependet.

§. 1008.

*Quomodo
Deo actio
competat.*

Actio Deo competit per eminentiam. Deus enim ens infinitum est (§. 1004.). Enimvero enti infinito actio per eminentiam competit (§. 848. *Ontol.*). Deo igitur actio per eminentiam competit.

Ut hæc propositio rite intelligatur, animo recolenda est demonstratio, qua evicimus, enti infinito per eminentiam competere actionem. Necessæ est autem modum, quo Deo tribuitur

tribuitur actio, probe perpendi, ne circa immutabilitatem oriantur difficultates insuperabiles, quæ aliquos in transversum egerunt, ut mundi creationem per emanationem æternam ex essentia divina sternerent, unicum extra se agendi actum in Deo actu æterno intellectus & voluntatis coexistentem concipientes, atque adeo mundi continuam creationem ad essentiam divinam referentes. Actio in ente finito in modorum numero est (§. 713. 313. & seqq. *Ontol.*): at in ente infinito, quod Deus est (§. 1004.), modus nullus hoc im habet (§. 1006.), adeoque actio non nisi per eminentiam eidem tribui potest (§. 845. *Ontol.*).

§. 1009.

Deus prorsus immutabilis est. Est enim ens infinitum (*Immutabilis* §. 1004.). Sed enti infinito nulla actu mutabilia insunt (§. 839. *Ontol.*). Deo igitur nulla actu mutabilia insunt, consequenter ipse prorsus immutabilis est. *litas divina.*

Idem etiam ostenditur hoc modo. Deus est Spiritus (§. 124.). Quamobrem cum Spiritus sit substantia intellectu & voluntate libera prædita (§. 643. *Psycol. ration.*); Deus quoque substantia est intellectu & libera voluntate prædita. Cumque præter intellectum & voluntatem liberam ipsi quoque competat omnipotentia (§. 349.), qua actualitatem impertiri valet omni possibili (§. 347.); determinationes essentialis sunt intellectus, voluntas & omnipotentia cum aseitate ipsi itidem tribuenda (§. 67.). Quamobrem cum in essentialibus determinationibus contineatur ratio ceterorum omnium, quæ ipsi convenire possunt (§. 168. *Ontol.*); quæ Deo tribuenda sunt prædicata, vel in aseitate, vel in intellectu, vel in voluntate, vel denique in omnipotentia rationem sufficientem agnoscunt. Cum aseitas consistat in independentia existentia ab alio (§. 28.), ita ut vi ejus ortus ac interitus Deo repugnet (§. 46.); fieri non potest, ut per aseitatem aliquid Deo accedat, quod ante non inerat, vel in locum ejus, quod inerat

substituatur aliud, quod non inerat. Quamobrem quia impossibilitas substitutionis alterius pro eo, quod simul inest, vel accessionis ejus, quod non inest, sit immutabilitas (§. 291. *Ontol.*); per aseitatem intelligitur, Deum quoad ea, quæ per eandem ipsi tribuenda, esse immutabilem, consequenter in aseitatem nulla continetur ratio sufficiens ullius mutationis (§. 56. *Ontol.*), adeoque cum sine ratione sufficiente nil quicquam esse possit (§. 70. *Ontol.*), nec per aseitatem Deo ulla accidere potest mutatio, seu, Deus nulli mutationi obnoxius, quatenus est a se, consequenter eatenus immutabilis.

Porro quoniam Deus omnia cognoscit simul (§. 160.), omniaque vult simul (§. 355.), unico æterno intellectus ac voluntatis actu (§. 319.); nec vi intellectus ac voluntatis quicquam Deo inesse potest, quod ipsi non inexistit ab omni æternitate, atque inexistiturum est in æternum. Quamobrem patet, Deo nec vi intellectus ac voluntatis ullam accidere posse mutationem (§. 290. *Ontol.*).

Denique cum omnipotentia Dei ad essentiam ipsius pertineat, utpote ipsi qua Deo competens (§. 349.) & vi ejusdem facere possit, quæ vult (§. 352.); si ab æterno voluit, quicquam præter eum existere, quod nondum extiterit, id citra ullam mutationem in Deo factam æternæ ipsius voluntati convenienter tunc existere incipit, quando id existere voluit, sive potius vult. Est vero conservatio continuata creatio (§. 845.), adeoque nec aliqua in Deo accidit mutatio, dum mundus existere pergit, vi potentia ejusdem, consequenter per eandem nulla prorsus in ipso mutatio locum habet.

Quoniam igitur Deo nil quicquam inesse potest, quod non rationem sui sufficientem in aseitatem, intellectu, voluntate ac omnipotentia ipsius agnoscat, per aseitatem vero, intellectum, voluntatem atque potentiam nulli mutationi locus est in Deo *per demonstrata*; nullam prorsus mutationem ei acci-

accidere posse patet, adeoque ipsum esse prorsus immutabilem liquet.

Per mundi creationem & conservationem nulla intrinseca Deo accidit mutatio; sed tantummodo extrinseca, quatenus oritur relatio, cui antea non erat locus, nimirum ut jam Deus sit creator, conservator & gubernator universi, quod ante non erat. Cum vis creatrix, quæ cum conservatrice eadem (§. 844.), soli Deo propria sit (§. 775. 846.), adeoque nullam ejus notionem habeamus, utpote quæ alterius prorsus generis est, quam quæ nobis est potentia; mirum videri haud quaquam debet, quod continuum potentiae divinæ actum, cui effectus externus non responderet, nisi quando Deus immutabili voluntate vult, instar actionis non sine temporis tractu absolvendæ & continuo iteratæ nobis imaginemur, quemadmodum in nobis continuationem ejusdem actionis deprehendimus. Sane propter hoc ipsum potentia Dei nobis incomprehensibilis est (§. 170.).

§. 1010.

Quoniam Deus prorsus immutabilis est (§. 1009.), *Immutabilis* idem vero & sapientissimus (§. 640.), & summe bonus (§. 699.), *litas* & omnipotens (§. 349.); *sapientia* quoque, *bonitas* & *omnipotentia* ejus prorsus immutabilis, consequenter fieri nequit, ut vel *sapientia*, vel *bonitas*, vel *omnipotentia* Dei ulla unquam capiat incrementa, vel decrementa.

Quod sapientia Dei, bonitas & potentia ejus nulla capiat incrementa, nec capere ulla possit, ex eo etiam liquet, quod & illa (§. 640.), & ista (§. 699.), & hæc sit absolute summa (§. 348.), ita ut majorem ea sapientia, bonitate & potentia, quæ Deo competit, concipi posse repugnet. Insunt Deo per essentiam, quemadmodum ex demonstrationibus superioribus liquet, adeoque attributa (§. 146. *Ontol.*), consequenter in se immutabilia (§. 313. *Ontol.*), ut adeo nec ulli decremento obnoxia fieri possint. Ceterum hoc corollarium addere lubuit ob usum, quem experimur, in praxi morali.

§. 1011.

*Quomodo
Deo insint,
quæ de ipso
prædicantur;*

Quicquid Deo inest, id vel ad essentialia, vel ad attributa pertinet, aut, si quid modi analogum est, id per modum attributi inest. Etenim Deus est ens infinitum (§. 1004.). Enimvero quicquid enti infinito inest, id vel ad essentialia, vel ad attributa pertinet, aut, si quid modi analogum est, id per modum attributi inest (§. 841. *Ontol.*). Ergo quicquid Deo inest, id vel ad essentialia, vel attributa pertinet, aut, si quid modi analogum est, id per modum attributi inest.

Hinc patet, cur, quæ de Deo prædicantur, dicantur in universum attributa ipsius, ita ut nec actiones ipsius ex eorum numero excludantur. Qui enim methodi ignari sunt, nec notionem entis in genere distincte concipiunt, quam in philosophia prima evolvimus; essentialia ab attributis non distinguunt. Accedit, quod ex attributis tanquam primo inexistentibus assumtis demonstrando colligantur essentialia, ut adeo ex parte cognoscentis essentialium speciem præ se ferant attributa & vicissim attributorum essentialia. Possunt tamen ea etiam in Deo a se invicem distingui, quemadmodum ex anteriori tractatione omni abunde liquet, ac deinde disertius docebitur. Etsi autem attributa absolute necessario insint (§. 304. *Ontol.*); non tamen ideo Deus absolute necessitati subjiciendus, quemadmodum visum est multis. Quod enim modi analogum est, ut per modum attributi insit, alio tamen modo inexistit, quam attributa. Differentiam inexistentiæ rite percipere maximi momenti est. Exponimus itaque eandem in propositione sequente.

§. 1012.

*Differentia
inexisten-
tiæ*

Essentialia & attributa Deo inexistunt absoluta necessitate; modorum vero analogia, etsi per modum attributorum insint, necessitate tantummodo hypothetica. Etenim si ens quoddam concipiendum, primo loco in eo ponenda sunt, quæ sibi mu-

tuo

tuo non repugnant, quæ tamen non per alia determinantur, nec quorum unum determinatur per alterum (§. 142. *Ontol.*), consequenter cum essentialia entis sint, quæ sibi mutuo non repugnant, nec tamen per se invicem determinantur (§. 143. *Ontol.*); ens nullum sine essentialibus concipi potest. Quoniam itaque Deus tanquam ens a se (§. 67.) in numero entium est; nec ipse sine essentialibus concipi potest. Enimvero essentia rerum sunt absolute necessaria (§. 303. *Ontol.*), adeoque essentialia eidem absoluta necessitate inexistant. Essentialia itaque Deo absoluta necessitate inexistant. *Quod erat primum.*

Porro attributa entis cujuscunque absolute necessaria sunt (§. 304. *Ontol.*). Quamobrem cum Deus, ens a se (§. 67.), sit in numero entium, ejus quoque attributa absolute necessaria sunt, consequenter ipsi absoluta necessitate inexistant. *Quod erat secundum.*

Denique modi analogum est, cujus oppositum Deo enti infinito (§. 1004.) absolute non repugnat, quod tamen rationem sufficientem in eodem non agnoscit, cur actu unquam sit (§. 842. *Ontol.*). Quoniam vero absolute impossibile non est, quod enti non absolute repugnat, seu contradictionem cum ejus essentialibus involvit (§. 79. *Ontol.*); absolute impossibile non est ut analogis modorum opposita insint Deo, consequenter cum absolute necessarium non sit, cujus oppositum absolute impossibile non est (§. 279. 301. *Ontol.*); nec absolute necessarium est, ut opposita analogis modorum Deo non insint, consequenter ipsa analogia modorum absoluta necessitate non inexistant. Et quoniam id actu Deo inesse nequit, cujus ratio sufficiens in eodem non datur, cur insit (§. 70. *Ontol.*); analogis modorum opposita eidem nunquam inesse possunt actu. Quamobrem cum tantummodo hypothetice necessarium sit, cujus oppositum nonnisi sub data conditione impossibile (§. 302.

302. *Ontol.*) analoga modorum tantummodo hypothetice necessaria sunt, consequenter nonnisi hypothetica necessitate inexistunt. Est vero Deus prorsus immutabilis (§. 1009.), adeoque quod ab æterno ipsi æterno (§. 74.) inexistit, idem inexistere quoque debet in æternum (§. 291. *Ontol.*). Fieri adeo nequit, ut præter hæc analoga modorum, quæ ipsi insunt, alia ipsis opposita insint unquam actu. Quoniam itaque ea in re cum attributis conveniunt, quorum utpote absoluta necessitate inistentium *per demonstrata* oppositum Deo unquam inesse nequit, per modum attributorum insunt. Et hoc modo liquet, analoga modorum, etsi Deo insint per modum attributorum, non tamen nisi hypothetica necessitate inesse.

Modus, quo quæ de Deo prædicantur eidem insunt, probe perpendendus, si quidem omnis difficultas circa libertatem voluntatis divinæ evanescere debet. Sane qui cum probe cognitum atque perspectum habet, ei libertati non amplius contraria videbitur electio mundi optimi, ita ut electio alterius pro moraliter impossibili habenda. Nostrium itaque erat eundem distincte exponere, ut de singulis prædicatis, quæ Deo tribuimus, ex demonstratione iudicium fieri possit, qua necessitatis specie eidem tribuenda veniant. Quæ enim vi principii contradictionis inferuntur, qualia sunt, quæ ab aseitatem & intellectu divino pendent, ea absoluta necessitate Deo conveniunt; quæ vero vi principii rationis sufficientis consequuntur, qualia sunt, quæ a voluntate Dei pendent, ea nonnisi hypothetica necessitate de Deo enunciantur. In rebus finitis, in quibus successioni est locus, contraria diverso tempore inesse possunt, essentialibus ac attributis manentibus iisdem: unde modi rebus non insunt instar attributorum, quorum opposita nunquam inesse possunt. Ast in ente infinito, in quo omnia simul insunt, quæ actu inesse possunt (§. 838. *Ontol.*), id singulare est, quod modorum analogis inexistentibus opposita nunquam actu insint, atque hæcenus cum attributis conveniant. Non inutilem operam sumet, qui
modum

modum inexistentiæ omnium prædicatorum, quæ in anterioribus de Deo enunciamus, examinaverit: ita enim fiet, ut tandem clarissime perspiciat, quomodo Deus velle non possit, nisi quod se decet, tendens ad id, quod optimum, sine ullo tamen libertatis præjudicio; immo ut intelligat, quomodo in Deo sine mutatione interna locum habeant, quæ a nobis nec concipi, nec explicari possunt nisi per actuum plurium successionem.

§. 1013.

Deus semper idem permanet ab æterno in æternum. Est Deus cur enim prorsus immutabilis (§. 1009.). Quamobrem cum im- *semper* mutabile sit ens, in quo nihil inest, pro quo aliud substitui potest *idem*, manentibus ceteris, quæ eidem insunt, iisdem, neque etiam iisdem non repugnantibus aliquid accedere potest (§. 291. *Ontol.*); nihil inest Deo, pro quo aliud unquam substitui possit, nec quicquam eidem unquam super accedere valer. Deus adeo nunquam differt a seipso, consequenter semper idem est ac permanet. Quoniam vero Deus quoque æternus est (§. 74.); idem permanet ab æterno in æternum.

Deus adeo non senescit instar hominum; nec vires ejus languescunt, quemadmodum hominibus accidere solet. Et quia Deus semper idem est; Theologia quoque naturalis, etsi agat de ente singulari, non vero universali, quemadmodum disciplinæ ceteræ philosophicæ, nullam subit mutationem. Atque hoc singulare habet, quod historiæ demonstrativæ specimen exhibeat.

§. 1014.

Deus non est in tempore. Etenim prorsus immutabilis Cur Deus est (§. 1009.), semperque idem manet ab æterno in æternum *non sit in* (§. 1013.). Quoniam itaque nulla datur variabilium in Deo *tempore*, successio (§. 291. 181. *Ontol.*); tempus vero non datur nisi ex-
(*Wolfs Theol. Naturalis.*) Fff fff isten-

istentibus successivis in continua serie (§. 574. *Ontol.*); Deus in tempore non est.

Unde superius demonstravimus (§. 792.), ante creationem mundi nullum fuisse tempus, sed hoc ipsum cum mundo demum cœpisse, etsi Deus ante mundum extiterit (§. 92.).

§. 1015.

Cur mundus & ens finitum sit in tempore.

Mundus & omne ens finitum in tempore est. Etenim mundus est series rerum simultanearum & successivarum inter se connexarum (§. 48. *Cosmol.*), etiam hic adspectabilis (§. 55. *Cosmol.*), consequenter si mundus aliquis existit, res successivæ in continua serie existunt. Quamprimum res successivæ in continua serie existunt, tempus datur (§. 574. *Ontol.*). Mundus igitur existere nequit, nisi in tempore. *Quod erat unum.*

Porro ens finitum omne non simul est, quod esse potest (§. 835. *Ontol.*), & successive alios aliosque status habet, quam primum existit (§. 834. *Ontol.*). Quamobrem ubi ens finitum existit, continua datur mutationum successio (§. 705. *Ontol.*). Enimvero quam primum datur continua mutationum successio, tempus datur (§. 574. *Ontol.*). Datur itaque tempus, quamprimum ens quoddam finitum existit, consequenter ens omne finitum in tempore est. *Quod erat alterum.*

Ne quis sibi imaginetur ens finitum, quod non habeat mutationes nisi conservatis iisdem aliquandiu statibus interruptas, vel etiam in eodem statu permanens sine ulla mutatione, quemadmodum veteres finxere chaos ante creationem mundi nulli mutationi obnoxium, repetenda sunt, tum quæ de ente simplici & compositi ex simplici ortu in *Ontologia*, tum quæ de elementis rerum materialium & corporum ex iisdem ortu demonstrata sunt in *Cosmologia*. Etenim ens finitum aut erit simplex, aut compositum. Si fuerit simplex sine vi concipi nequit, quæ continuo tendit ad mutationem subjecti, cui inest (§. 725. *Ontol.*), quemadmodum in anima nostra

nostra quovis momento experimur & in Psychologia rationali clarissime demonstravimus. Quodsi fuerit compositum, non erit nisi simplicium aggregatum (§. 794. *Ontol.*), consequenter cum rationes ultimæ eorum, quæ in rebus materialibus seu compositis deprehenduntur, in elementis rerum, seu simplicibus (§. 182. *Cosmol.*), contineantur (§. 191. *Cosmol.*); nihil in composito mutabile concipitur nisi per continuas mutationes simplicium explicabile. Atque adeo ens finitum, quod non continuas subeat mutationes, non nisi abortus imaginationis est, vi cujus in perceptionibus confunduntur, quæ diversa sunt, ut mutabilia mentiantur formam fixorum. Ceterum quemadmodum in propositione præsentē ex ipsa notione entis finiti ostendimus, quod sit in tempore; ita quoque ex ipsa notione entis infiniti demonstrari poterat, quod in tempore esse nequeat. Cum enim in ente infinito omnia sint simul, quæ eidem actu inesse possunt (§. 838. *Ontol.*); nulla in eodem successio locum habet (§. 569. *Ontol.*). Quamobrem quia tempus non datur nisi existentibus successivis in continua serie (§. 574. *Ontol.*); tempus nullum datur, etiamsi existat ens infinitum, consequenter ens infinitum in tempore non est. Unde cum Deus ens infinitum sit (§. 1004), in tempore esse nequit.

§. 1016.

Æternitas Dei & tempus infinitum differunt. Quoniam Differentiam Deus æternus est (§. 74.), ens vero æternum est, quod æternitatis nec initium, nec finem existendi habet (§. 39.); Deus nec initium, nec finem existendi habet. Existit vero necessario (§. 1009.), ut adeo impossibile sit ipsum non existere (§. 279. *Ontol.*), & prorsus immutabilis est (§. 1009.), semper idem ab æterno in æternum (§. 1013.). Æternitas igitur Dei consistit in actualitate immutabili eorum, quæ ipsi insunt. Enimvero cum tempus non detur nisi existentibus successivis in continua serie (§. 574. *Ontol.*); idem infinitum dici nequit, nisi quatenus nullum assignari potest initium, nullus finis, consequenter limes

nullus, ultra quem augeri amplius potest five ex parte ante, five ex parte post, quemadmodum loquuntur philosophi, hoc est, nisi in sensu mathematico (§. 796. *Ontol.*). Patet itaque æternitatem Dei non esse tempus infinitum.

Differentiam inter æternitatem Dei & tempus infinitum probe perspexit *D. Thomas*, dum contendit, etiam si mundus esset ab æterno, æternitatem tamen ejus non fore eandam cum æternitate Dei. Mundi enim æternitas non foret nisi tempus infinitum, cum ex adverso æternitas Dei sit necessaria existentia juncta essentiae ac omnium eorum, quæ ipsi insunt, immutabilitati, ita ut Deus non existeret in tempore infinito, si vel maxime eidem coëxisteret tempus infinitum. Propositio hæc magni momenti in disputatione contra atheos, quemadmodum suo loco constabit, ubi atheismum omnem funditus eradicaturi sumus.

§. 1017.

Æternitatis divine incommunicabilitas.

Æternitas Dei nulli enti finito communicari potest. Ponamus enim si fieri potest, æternitatem Dei enti cuidam infinito communicari. Quoniam æternitas est existentia nec initium, nec finem habens (§. 39.); si ens finitum ponatur æternum, existentiae ejus nullum initium, finis nullus assignari potest. Quamobrem cum ens omne finitum in tempore existat (§. 1015.); nullum temporis, in quo existit, initium, finis nullus assignari potest, adeoque tempus hoc caret limitibus, ultra quos amplius augeri potest, consequenter infinitum est (§. 796. *Ontol.*). Enimvero Deus non existit in tempore (§. 1014.), adeoque etsi idem æternus sit (§. 74.), consequenter ejus existentia nec initium habet, nec finem (§. 39.), non tamen in tempore infinito existit. Patet itaque æternitatem Dei nulli enti finito communicari posse.

Æternitas nimirum Dei est attributum divinum ex aeternitate fluens ac infinitudine. Quamobrem cum enti nulli attributa

tributa entis alterius communicari possint (§. 45. *Psych. rat.*), nec attributum entis a se atque infiniti æternitas enti finito communicari potest.

§. 1018.

Ens unum præsens dicitur alteri, si ita coëxistunt, ut uni Præsentia quidpiam insit, cujus ratio immediata datur in altero. Quo- quid sit. niam itaque ens unum ab altero dependet, quatenus ejus, quod ipsi inexistit, ratio in hoc altero continetur (§. 851. *Ontol.*); *ens unum, quod alteri præsens est, quoad determinationes intrinsecas vel actu dependet, vel saltem dependere potest ab altero propter coëxistentiam.* Quodsi duo entia coëxistentia A & B simul consideramus atque ea, quæ ipsis in se spectatis seu absolute conveniunt, perpendentes porro inquiremus, an inter ea, quæ ipsi B conveniunt absolute, quidpiam occurrat, per quod aliquid de A intelligi possit, quod absque eo intelligi non poterat, adeoque in casu præsentis nonnisi coëxistente B, ens A ad B refertur, & eodem modo B ad A referri potest (§. 855. *Ontol.*). Quamobrem patet *præsentia ad se invicem referri quoad coëxistentiam.* *Præsentia igitur definiri potest per relationem entium quoad coëxistentiam, ideo quia coëxistunt, quoad determinationes intrinsecas vel actu a se invicem dependentium, vel dependere saltem valentium.*

Notionem præsentia distinctam nemo hætenus dedit, etsi clara satis, sed confusa tamen sit omnibus, ipsi etiam vulgo, præsentia ab absentibus optime distinguenti. Neque adeo facile videtur præsentiam accurate definire, ut satisfaciat omni in casu. Nemo reprehendat, quod terminis admodum abstractis in ea definienda usi simus: convenit enim præsentia enti omni, adeoque nonnisi per ea definiri potest, quæ enti omni conveniunt, consequenter notio præsentia per terminos abstractos explicanda, utpote in notiones abstractas

resolvenda. In propatulo est, quod præsentia supponat coëxistentiam, ut ea non sit nisi coëxistentium: unde si homo moritur & corpus ejus in terra corrumpitur, non amplius præsens dicitur. Non tamen sola coëxistentia ad præsentiam sufficit, alias anima adhuc præsens foret corpori mortuo, nondum corrupto, cum utraque substantia adhuc existat, consequenter anima a corpore separata & corpus mortuum, sed nondum corruptum, in coëxistentium numero sint (§. 369. *Ontol.*). Omnis adeo quæstio huc redit, quid in coëxistentibus porro supponi debeat, ut tanquam sibi invicem præsentia considerari possint. Præsentiam ipsam non esse determinationem aliquam enti intrinsecam, nemo non admittit, consequenter non nisi in relatione quadam quoad determinationem intrinsecam consistere potest, cui propter coëxistentiam locus est. Jam si determinationes intrinsecas coëxistentium spectes, aut eadem a se invicem dependent, aut non dependent: nobis autem hic perinde est, quocumque modo a se invicem dependeant, & sive dependentia spectetur quoad earundem actualitatem, sive tantummodo quoad potentiam proximam. Nemo affirmaverit, nisi usu loquendi reclamante, dum ens unum alteri tanquam præsens consideramus, relationem fieri quoad independentiam determinationum intrinsecarum, alias enim Sol horto præsens dici debebat, quando radiis suis eum amplius non ferit. Relinquitur itaque, ut in præsentia fiat relatio quoad determinationes intrinsecas dependentes. Atque adeo tandem enascitur præsentiæ notio distincta, quod sit relatio entium quoad coëxistentiam, quatenus unum coëxistentium pendet ab altero quoad determinationes intrinsecas. Enimvero necesse est eandem uno alteroque exemplo illustrari. Solem in horto præsentem dicimus, si radiis directis planum ejus ferit. Solem & horum coëxistere, nemo in dubium vocat. Quod quoad coëxistentiam ad se invicem referantur, dum Solem in horto præsentem dicimus, non minus liquet. Dum vero Sol radiis suis planum horti illustrat, dantur in eodem determinationes intrinsecæ, quæ ante non inerant. Lumine enim Solis collustratus conspicitur, calor, quo ab eodem sovetur, eidem in-
est

est, superficies madida exsiccat, ut terra fiat arida, ut alias mutationes in sensus non adeo incurrentes taceamus, & horum omnium ratio in Sole tanquam causa (§. 886. *Ontol.*) continetur (§. 36. *Ontol.*), consequenter quoad has determinationes planum horti a Sole dependet (§. 851. *Ontol.*). Cumque ex his ipsis determinationibus præsentiam Solis colligamus, ita ut etiam jam absentem ibidem præsentem fuisse ex iisdem probemus; earum dependentiam a Sole ad præsentiam ejus pertinere negari haud quaquam potest: sublata enim hac dependentia, salva tamen adhuc coëxistentia, præsentia omnium consensu tollitur. Patet autem tolli relationem Solis & horti quoad coëxistentiam in dependentia determinationum intrinsecarum in plano horti a Sole, consequenter Solis præsentia nonnisi in hac relatione consistit. Similiter anima dicitur præsens corpori vivo, & vicissim corpus vivum animæ. Quamdiu corpus vivum est, perceptiones animæ rationes habent in mutationibus, quæ in organis sensoriiis contingunt, atque adeo anima quoad hæc determinationes ipsi intrinsecas a corpore dependet. Ex adverso dantur motus organorum corporis, quorum ratio est nutus animæ, atque adeo determinationes hæc corpori intrinsecæ ab anima dependent (§. 851. *Ontol.*). Corpus vivum & anima coëxistunt, quod denuo per se manifestum est, nec quoad determinationes intrinsecas a se invicem dependere possent, nisi coëxisterent. Enimvero etsi cognoscamus, animam a morte corporis adhuc superesse, & corpus mortuum corruptioni nondum obnoxium adhuc existere conspiciamus, consequenter coëxistentiam per mortem non fuisse sublatam in dubium non revocemus, animam tamen corpori præsentem & corpus animæ præsens amplius esse negamus. Negamus vero ideo, quia sublata est dependentia quoad determinationes intrinsecas mutua a se invicem. Quamdiu autem hæc subsistit, & animam corpori præsentem, & corpus animæ præsens dicimus. Patet adeo denuo præsentia non denotari nisi eam animæ ac corporis relationem ad se invicem quoad coëxistentiam, quatenus ea infert mutuam determinationum intrinsecarum a se invicem dependentiam. Eodem modo sese res habet in exemplo
alte

quovis alio. Nulli itaque dubitamus, quin notionem praesentiae bene explicaverimus, ut definitione nostra tuto uti liceat in demonstrandis iis, quae ad praesentiam pertinent. Sane si per definitionem nostram demonstratur, ens aliquod alteri praesens esse, eodem modo praesens esse intelligitur, quo Sol horto, quem lumine suo collustrat, corpus animae & anima corpori, consequenter quo corpus aliquod corpori alteri, substantia simplex compositae & composita simplici praesens est. Satisfacit itaque omni in casu, cum praeter substantias simplices atque compositas non dentur aliae (§. 685. *Ontol.*). Immo cum praesentiae notionem & corporibus, & animae applicabilem ex ipsa notione entis in genere deduxerimus; hoc ipso satis constat, eam esse universalem & promiscue ad entia quaecunque applicari posse. Poteramus eandem tradere in philosophia prima; sed cum eadem utamur in omnipraesentia Dei demonstranda, consultius visum eandem Theologiae naturali reservari, ut, ubi animus eadem recenter imbutus fuerit, bene praeparati ad demonstrationem arduam accedamus, nec quicquam obscuritatis circa eam remaneat.

§. 1019.

*Praesentia
agentis.*

Si ens unum A in alterum B agit, A ipsi B praesens est, seu agens praesens est patienti. Si A agit in B, ipsum B patitur ab ipso A: quod nemo in dubium vocabit. Quamobrem cum passio sit mutatio status, cujus ratio continetur extra subjectum, quod statum suum mutat (§. 714. *Ontol.*); dum A agit in B, in ipso B mutatio quaedam accidit, cujus ratio continetur in ipso A. Quoniam in omni mutatione intrinseca unum, quod non inerat, substituitur ei, quod inerat (§. 290. *Ontol.*); a mutatione in B facta eidem insunt determinationes, quae ante non inerant (§. 122. 112. *Ontol.*), consequenter quoad hasce determinationes patiens B ab agente A dependet (§. 851. *Ontol.*). Quod agens A & patiens B coëxistant, nemo in dubium vocare audeat: nisi enim existente patiente B existeret etiam A, ad-
eoque

eoque A & B coëxisterent (§. 569. *Ontol.*), A in B agere non intelligitur. Agens igitur A & patiens B ita coëxistunt, ut patiens B ab agente A quoad certas determinaciones intrinsecas dependeat *per demonstrata*. Quamobrem cum præsentia consistat in ea entium quoad coëxistentiam relatione, qua quoad determinaciones intrinsecas unum ab altero vel actu, vel saltem potentia dependet (§. 1018.); agens A patienti B, dum in ipsum agit, præsens esse dubitari nequit.

Ponamus hortulanum ex arbore resecare surculos gemmis gravidis destitutos; nemo non affirmabit, ipsum arbori, dum hoc facit, esse præsentem. Immo exemplo Solis, quo notionem præsentia modo illustravimus (*not. §. 1018.*), veritas propositionis itidem confirmatur. Dum enim Sol terram in horto exsiccat, ut arida reddatur; in eam agit. Inde autem præsentia Solis colligitur. Patet itaque per propositionem præsentem concludi præsentiam eo sensu, quo ex communi loquendi usu ens unum alteri præsens dicitur, ita ut etiam ex effectu superstitæ actionem præteritam agnoscentes recte inferamus, agens eo, dum egit, tempore fuisse patienti præsens. Unde porro liquet, qui admittit actionem alicujus entis in aliud; cum quoque admittere debere agentis præsentiam respectu patientis eo sensu, quem vocabulum præsentia ex communi loquendi usu accepit. Probe hoc notandum, cum non ab omnibus agnosceatur: unde deinceps logomachia circa omnipræsentiam divinam oriuntur, non tollendæ, nisi lumine notionis distinctæ præsentia collustrentur, quo arcentur tenebræ, quas confusa notio peregrina multa admixta habens offundit.

§. 1020.

In quodcumque ens agens liberum agere potest, modo velit; Præsentia præsens est. Etenim si agens libere in ens aliquod agere agentis ob potest, modo velit; in id actu agit, quam primum vult. *possibilitatem* Enimvero si actu agit, eidem præsens est (§. 1019.). *Quam-tem præxi-*
(*Wolffii Theol. Natur.*) Ggg ggg *ob-mamagendi.*

obrem cum ex voluntate agentis nihil quoad coëxistentiam ipsius & entis alterius mutetur, quod per se patet; agens liberum etiam præsens esse debet enti alteri, in quod agere potest, si velit.

E. gr. Si quis fuerit in Bibliotheca & librum quandam ex repositoio, cui adstat, tollere possit, modo velit; eidem libro præsens est. Unde intelligitur, cur in definitione præsentiæ non tantummodo dependentiam actualem coëxistentis unius a coëxistente altero quoad determinationem intrinsecam requisiverimus; sed potentialem sufficere dixerimus (§. 1018.). Atque ideo præsens propositio independentem a præcedente, eodem prorsus, quo præcedens, modo ex ipsa definitione præsentiæ demonstrari poterat. Non est quod in allato exemplo excipias, si liber ex repositoio tollitur, mutari tantummodo situm ejus, adeoque determinationem quandam extrinsecam, minime verò intrinsecam. Etenim dum tollitur, movetur: motus vero, quatenus spectatur in mobili, est intrinseca determinatio, consequenter dum tollitur, ab agente dependet quoad determinationem aliquam intrinsecam. Vi propositionis autem præsens concluditur præsentiæ ex usu loquendi talis. Demonstratur enim ex definitione præsentiæ, quam usui communi loquendi conformem esse satis superque ostendimus (not. §. 1018.).

§. 1021.

*Sensui quæ-
nam præ-
sentia.*

Quod sensu percipimus, id nobis præsens est. Quod enim sensu percipimus, id in organa nostra sensoria agit, seu mutationem quandam eidem inducit (§. 56. *Psychol. empir.*). Enimvero quodcumque ens in alterum agit, id eidem præsens est (§. 1019.). Quod igitur sensu percipimus, id nobis præsens est.

Ideo in Psychologia empirica definitionis nominalis loco posuimus (§. 39. *Psychol. empir.*), notioni præsentiæ generali convenienter (§. 1018.), quod corpora in mundo adspectabili nobis præsentiæ dicantur, quæ mutationem corpori nostro

stro inducere valent, nisi scilicet ullum superaccedat obstaculum accidentale.

§. 1022.

Quoniam quæ videmus, audimus, tangimus, ea sensu per-
cipimus (§. 68. *Psychol. empir.*); quicquid videmus, vel tangimus, casus.
Et cujus vocem vel sonum quemcunque audimus eo, in quo sumus loco
editum, id nobis præsens est. *Speciale*

Nemo non fatetur hominem esse præsentem sibi, quem videt.
Nemo non concedit, poculum quod propriis tangit manibus
esse sibi præsens. Nemo non sponte colligit præsentiam amici,
voce ejus audita, vel præsentiam canis audito latratu. Ita
solenne est omnibus præsentiam rerum colligere ex eo, quod
sensu percipiuntur. Procedit autem illatio vi definitionis præ-
sentia datæ (§. 1018), utpote in quam resolvitur demonstratio
propositionis præcedentis, ex quo corollarium præsens deduci-
tur, si resolutio instituatur (§. 992. *Log.*).

§. 1023.

Anima corpori Et corpus anima præsens est per unio-
nem, seu quatenus illa cum eodem unitur. Etenim animæ u-
nio cum corpore non consistit, nisi in harmonia naturali ani-
mæ ac corporis coexistentium (§. 723. *Psychol. ration.*), ad-
eoque tamdiu subsistit, quamdiu harmonia ista continuatur.
Enimvero cum harmonia ista consistat in explicabilitate per-
ceptionum animæ per mutationes in corpore contingentes &
motuum voluntariorum in corpore per volitionem ac nolitio-
nem animæ, vel etiam appetitiones atque averfiones sensitivas
ejusdem (§. 539. *Psychol. ration.*), perceptiones vero in anima
per mutationes in corpore sint explicabiles, quatenus earum
ratio ex iis, quæ in corpore contingunt, reddi potest, & vi-
cissim motus voluntarii in corpore sint explicabiles per appe-
titio-

titiones ac averfiones animæ, quatenus ratio motuum voluntariorum ac spontaneorum ex iis reddi potest, quæ in anima accidunt (§. cit.); anima cum corpore unitur, quatenus eidem ita coëxistit, ut ratio perceptionum in anima ex iis, quæ in corpore contingunt, & ratio motuum voluntariorum ac spontaneorum in corpore ex iis, quæ in anima accidunt, reddi potest, & tamdiu durat, quamdiu utrumque obtinet, consequenter quia ens unum dependet ab altero, quatenus ejus, quod uni inexistit, ratio in hoc altero continetur (§. 851. *Ontol.*), animæ unio cum corpore confistit in continua dependentia quoad determinationes intrinsecas entis unius ab altero. Quoniam itaque præsentia consistit in relatione entium coëxistentium, quatenus vi coëxistentiæ entia ista quoad determinationes intrinsecas vel actu a se invicem dependent, vel dependere saltem possunt (§. 1018.); anima corpori & corpus animæ præsens est per unionem.

Necesse est, ut modum, quo substantia una alteri præsens esse possit, in specie explicemus, ne a se invicem separanda confundamus diversa pro iisdem habentes: id quod eum vulgo accidat, doctrinæ per se clare nebulae affunduntur, ut de præsentia rerum cogitaturi nesciamus, quo mentis aciem convertere debeamus. Ita enim facillime evitari posse confidimus difficultates, quas in hac doctrina passim obvias experimur, & terminatum iri speramus controversias, quæ subinde magna animi contentione de præsentia quarundam rerum agitantur: immo nulli dubitamus hoc modo tandem distinctiones præsentiae reales a fictis, utiles ab inutilibus separatum iri. Ceterum ex demonstratione propositionis præsentis patet, unionem animæ cum corpore mutuam utriusque substantiæ præsentiam necessario inferre, nec concipi eas posse inter se unitas, nisi etiam concipiantur sibi mutuo præsentes. Quoniam hinc eadem unio, per quam anima corpori & corpus animæ præsens est, in systemate etiam harmoniæ

moniz præstabilitæ subsistit (§. 724. *Psychol. ration.*); immo sine ea harmoniz præstabilitio intelligi nequit (§. 624. *Psychol. ration.*); in systemate harmoniz præstabilitæ necessaria est mutua animæ ac corporis præsentia, nec sine præsentia hac harmonia ista concipi potest. Inanis adeo est eorum metus, qui sibi imaginantur eam subsistere posse, etiamsi anima sit Constantinopoli, corpus Romæ. Loquuntur enim, quæ sensum nullum habent, & terminos proferri non nisi inanes patet, ubi distinctis notionibus explicanda, quæ iis denotantur, præsentiam corporum localem cum præsentia substantiæ simplicis & compositæ mutua per notionem confusas a se invicem non distinguentes, quemadmodum jam alias innuimus (not. §. 723. *Psychol. ration.*), & ex ulterius dicendis magis elucescet.

§. 1024.

Quoniam unio animæ cum corpore per omnem vitam subsistit, nec nisi per mortem tollitur, quod tanquam a posteriori *Præsentia ista quamdiu durat.* notum hic sumitur; anima vero corpori & corpus animæ per unionem præsens est (§. 1023.); *Anima corpori & corpus animæ per omnem vitam præsens est, dum autem corpus moritur, præsens eidem anima esse desinit.*

Inde est, quod quidam mortem in derelictione corporis ab anima facta consistere sibi persuaferint, ac ideo vitam a præsentia animæ in corpore derivaverint. Ostendemus autem suo tempore in physicis, vitam corporis non pendere a præsentia animæ, sed potius ejus præsentiam a vita corporis, & quamvis verum sit, morte corporis dissolvi animæ cum eodem unionem, nec tamen mortem in dissolutione ista consistere.

§. 1025.

Anima corpus mortuum præsens esse nequit. Corporis *Cur animæ corpus mortuum præ-* enim mortui organa in universum, consequenter & sensoria, *sens esse* a functionibus suis plenarie cessant (§. 733. *Psychol. ration.*). *Quam-* nequeant.

Quamobrem cum motus ab objectis sensibilibus imprimatur nervis sensoriis & impressus ad cerebrum usque propagetur, dum anima lentit (§. III. *Psychol. ration.*); mortuo corpore objecta sensibilia nullum amplius motum nervis sensoriis imprimere valent, qui inde ad cerebrum propagetur. Quamobrem cum objectum ab anima non percipiatur, si fibrillis nerveis motum imprimere nequeat (§. 129. *Psychol. ration.*); nec anima amplius percipit objecta sensibilia, consequenter nullæ amplius in anima dantur perceptiones, quarum ratio in organorum sensoriorum mutatione consistit. Quoniam itaque anima a corpore dependet in determinationibus suis intrinsicis, quatenus earum ratio in mutationibus, quæ corpori accidunt, continetur (§. 851. *Onol.*); corpore mortuo quoad determinationes intrinsecas non amplius ab eodem pendere potest. Impossibile igitur est, animam corpori mortuo ita coexistere, ut quoad determinationes intrinsecas ab eodem pendeat, vel saltem pendere possit. Quamobrem cum præsentia consistat in eacoexistentium relatione, qua una quoad determinationes intrinsecas vel actu dependet ab altero, vel ab eodem saltem dependere potest (§. 1018.); animæ corpus mortuum præsens esse impossibile est.

Quod si corpus mortuum fuerit corruptum, ut nec structura organorum sensoriorum amplius supersit, multo adhuc clarius intelligitur, animæ materiam, ex qua organa ista constabant, præsentem amplius esse non posse, etiamsi fingamus eam omnem in eodem loco congestam conservari.

§. 1026.

Cum corpori mortuo etiamsi nondum corrupto

Corpori mortuo; etiamsi nondum corruptioni obnoxio, anima præsens esse nequit. Demonstratur eodem fere modo, quo propositio præcedens. Nimirum quoniam in corpore mortuo, etsi ipsa organa adhuc sint integra, nec ipsum corpus

pus corruptioni adhuc obnoxium sit, organa omnia a functionibus suis plenarie cessant (§. 733. *Psychol. ration.*); nec fieri sensus esse potest, ut ad nutum animæ adhuc moveantur organa, consequenter ut in corpore mortuo dentur motus voluntarii. Nulli adeo in eodem dantur motus, quorum ratio in anima continetur, immo dari nequeunt (§. 56. *Ontol.*). Quamobrem cum corpus non amplius quoad modificationes suas ab anima dependere possit (§. 851. *Ontol.*); nec corpori anima præsens amplius esse potest.

Quodsi corpus mortuum fuerit corruptum, structura organorum prorsus destructa, multo adhuc clarius intelligitur animam materiæ, ex qua constabat corpus, præsentem amplius non esse posse, etiamsi fingamus omnem in eodem loco congestam conservari. Propositiones duæ posteriores ideo adjiciuntur proxime præcedenti, ut clarius intelligatur non ex accidente esse, ut anima corpori, nec corpus animæ a primo statim mortis articulo præsens amplius non sit; sed præsentiam animæ ac corporis mortui mutuam ipsi naturæ & essentiæ animæ atque naturæ corporis repugnare. Hoc autem pacto apparet, modum præsentiae per ipsam naturam rerum defini.

§. 1027.

Substantia simplex præsens esse nequit enti cuicunque al- Cur sub-
veri nisi tota. Etenim substantia simplex omni prorsus caret *stantia sim-*
parte (§. 673. *Ontol.*). Quamobrem si enti cuidam præsens sit, *plex tota*
fieri non potest, ut aliqua eius pars eidem tantummodo præ- *præsens sit.*
sens sit. Necesse igitur est, ut præsens sit tota.

Totalis præsentia fluit ex simplicitate, quæ non patitur substantiæ diffusionem, qualis concipitur in composito, ex pluribus a se invicem distinctis adeoque extra se invicem existentibus constante.

§. 1028.

§. 1028.

*Cur anima
tota præ-
sens sit.*

Anima tota præsens est corpori, cui unitur. Etenim anima substantia simplex est (§. 48. *Psychol. ration.*), eademque corpori præsens per unionem (§. 1023.). Quamobrem cum substantia simplex tota præsens esse debeat enti alteri cuicunque, cui præsens est (§. 1027.), anima quoque tota præsens est corpori, cui unitur.

Scholastici addunt, animam quoque totam esse præsentem parti cuilibet corporis, sed citra multiplicationem sui: id quod vulgo absurdum existimatur ab iis, qui localem præsentiam corporum a præsentia animæ non distinguunt. Non tamen simpliciter repugnat notioni præsentia, quam dedimus. Nimirum vi definitionis supra datæ (§. 1018.) & ex qua præsentiam animæ in corpore, cui unitur, deduximus (§. 1023.), anima corpori præsens est, quatenus eidem ita coëxistit, ut motus organorum ab ejus voluntate dependeant. Quamobrem cum in qualibet corporis parte dentur motus, & Scholastici omnes motus, etiam vitales animæ subjeceriat, etsi hos libero ejus arbitrio subduxerint; secundum eos omnino dici debebat, animam esse præsentem cuilibet corporis parti. Et quoniam ens simplex præsens esse nequit alteri nisi totum (§. 1027.), anima, quemadmodum de corpore ostendimus in propositione præsentem, tota cuilibet parti præsens esse debet. Manet tamen ens unum in se præsus individuum propter simplicitatem. Ergo præsens est nonnisi una in toto corpore & qualibet ejus parte, consequenter tota in corpore toto & tota in qualibet parte citra sui multiplicationem. In se igitur istiusmodi præsentia nihil habet, quod repugnat: id quod probe notandum, ne deinceps difficultates circa omnipræsentiam Dei enascantur, nebulis ab imaginatione coortis. In eo tantummodo difficultas est, num anima cuilibet parti corporis præsens dici possit, si vel maxime præsentiam restringas ad ea organa, quibus motus voluntarii inexistere possunt: vitales enim nullo modo ab anima pen-

pendere immediate, sed a causis physicis materialibus suo loco demonstrabitur in Physica, qualiscunque tandem dependentia motuum corporis ab anima admittatur. Quid igitur inventis recentiorum physicis sit consentaneum, porro explicandum, ne in præjudicium veritatis quicquam statuatur. Consultum adeo nobis videtur sequentem subjicere propositionem.

§. 1029.

Anima immediate præsens non est nisi ei cerebri parti, ubi datur communicatio nervorum sensoriorum & motoriorum; mediate tamen toti corpori & singulis ejus partibus, per quas illi disperguntur. Anima enim corpori præsens est per unionem cum corpore (§. 1023.), consequenter cum unio ista consistat in harmonia naturali animæ atque corporis coëxistentium (§. 723. *Psychol. ration*), harmonia autem ista in explicabilitate perceptionum animæ per mutationes in corpore contingentes & motuum voluntariorum in corpore per volitiones ac nolitio- nes animæ, seu appetitiones & aversiones ejus in genere (§. 539. *Psychol. ration.*), anima corpori præsens est, quatenus ratio motuum voluntariorum ac spontaneorum in anima continetur (§. cit.), adeoque corpus quoad eosdem ab anima dependet (§. 851. *Ontol.*). Constat vero ex anatomicis experimentis motum musculorum perfici motu ex cerebro ad eosdem propagato, & alias jam evicimus, dum in sensationibus animæ motum ab objectis sensibilibus impressum nervis sensoriis ad cerebrum usque propagari demonstravimus (§. III. *Psych. ration.*), nervorum sensoriorum ac motoriorum per totum corpus dispersorum communicationem in cerebro dari, ac præterea omnibus phantasmatis, seu ideis vi imaginationis productis (§. 93. *Psychol. empir.*), in cerebro respondere ideas materiales (§. 206. *Psychol. ration.*), nec minus judicia (§. 403. *Psychol. ration.*),
(*Wolfs Theol. Natur.*) Hhh hhh ac

*Animæ
præsentia
mediata &
immediata
in corpore.*

ac ipsa ratiocinia in eadem per ideas materiales vocabulorum, quibus efferuntur judicia illorum compositionem ingredientia, repræsentari (§. 414. *Psycbol. ration.*). Quamobrem cum ideas materiales in cerebro sint motus nervorum sensoriorum vel ex organo sensorio in idem propagati, vel ex istis in cerebro enati (§. 112. *Psycbol. ration.*), ex hisce vero nascentur motus nervorum motoriorum ad musculos propagandi, quemadmodum appetitiones ac averfiones ex perceptionibus ac operationibus intellectus, prouti requirit constans modificationum animæ ac corporis harmonia, per universam Psychologiam rationalem stabilita; corpus ab anima potissimum pendet quoad motus nervorum motoriorum in cerebro ex motibus in sensoriis nervis quomodocunque derivatos. Præsentia igitur cum fundetur in immediata dependentia determinationum intrinsecarum corporis ab anima (§. 1018.); animam proprie loquendo, aut, si mavis, immediate nonnisi præsens est ei cerebri parti, ubi datur communicatio nervorum sensoriorum & motoriorum. *Quod erat unum.*

Enimvero quoniam motu isto per nervos sensorios ad musculos propagato per experimenta anatomica suo loco distinctius exponenda determinatur motus voluntarius & spontaneus organi cujuscunque corporis nostri; mediantibus nervis motoriiis motus voluntarii ac spontanei organorum corporis ab anima dependent, consequenter corpus ipsum quoad hosce motus mediate dependet ab anima eidem coëxistente. Quamobrem cum relatio animæ ac corporis quoad coëxistentiam, vi cujus quoad motus voluntarios atque spontaneos ab animæ nutu dependet, sit præsentia ejus (§. 1018.); nil utique obstat, quo minus animam omnibus istis partibus præsentem dicamus mediate, per quas nervi motorii disperguntur, consequenter cum per totum corpus seu singulas ejus quascunque partes dispergantur, quemadmodum in Anatomia docemur, corpori

pori toti atque singulis ejus partibus. *Quod erat alterum.*

Abfit ut tibi persuadeas, vel aliis persuadere coneris demonstrationem propositionis præsentis nonnisi hypotheticam esse ac in solo systemate harmoniæ præstabilitæ subsistere. Neque enim sumimus quod huic systemati proprium est, motus nervorum motoriorum in cerebro per solum mechanismum ejusdem enasci ex motu sensoriorum; sed nobis perinde est, quocunque id fiat modo, sive per influxum physicum animæ in corpus, sive per immediatam Dei potentiam, sive quocunque alio modo. Qui enim Psychologiam rationalem probe perspectam habent, ii animæ ac corporis harmonicis modificationes continuas in dubium revocare minime possunt, in omni systemate explicandi commercium mentis ac corporis mutuum salvas. Ceterum jam intelligitur, si anima cum Scholasticis dicatur præsens tota in corpore toto & tota in qualibet ejus parte, citra sui multiplicationem, id nonnisi de præsentia mediata intelligi posse, de præsentia autem immediata verum non esse. Patet porro, à præsentia animæ mediata dependere decisionem quæstionis de sede animæ, quemadmodum annotatum est a *Cartesio*.

§. 1030.

Elementa rerum materialium sibi præsentia sunt, si im- Præsentia
mediata ratio, aut, si mavis, proxima ratio mutationum, quæ elemento-
accidunt in uno, continentur in mutationibus, quæ contingunt rum.
in altero. Quoniam mutationum omnium, quæ in uno elemento contingunt, ratio reddi potest ex mutationibus, quæ in altero contingunt (§. 209. *Cosmol*); elementa ita coëxistunt, ut propter hanc ipsam coëxistentiam unum ab altero dependeat quoad determinaciones intrinsecas (§. 851. *Ontol.*). Quamobrem cum ens unum alteri præsens sit, si ita coëxistunt, ut in uno quidpiam insit, cujus ratio immediata datur in altero,

& præsentia ipsa in eorundem relatione quoad coëxistentiam consistat, ob quam quoad determinaciones intrinsecas unum ab altero vel actu, vel saltem potentia dependet (§. 1018.); quin elementum, cujus mutationes habent rationem immediatam in mutationibus alterius, huic ipsi alteri præsens sit dubitari nequit.

Ex elementorum nexu, quo constituuntur corpuscula primitiva (§. 229. *Cosmol.*), facile probari potest, unum elementum multis simul præsens esse, & quidem singulis totum (§. 1027.), utpote substantia simplex (§. 182. *Cosmol.*). Sed nostrum jam non est specialia de præsentia elementorum tradere, sufficit modum præsentiæ generaliter definiri, quatenus ad illustrandum præsens de omnipræsentia Dei argumentum facere potest.

§. 1031.

Præsentia

*substantia-
rum simpli-
cium inter
se.*

Quoniam elementa rerum materialium sunt substantiæ simplices (§. 182. *Cosmol.*), & quæ de mutua dependentia quoad determinaciones intrinsecas demonstrata sunt (§. 209. *Cosmol.*), iisdem conveniunt, quatenus substantiæ simplices sunt, facile patet, quæ de præsentia elementorum demonstrata sunt (§. 1030.), ea quoque de præsentia substantiarum simplicium tenenda esse. Quamobrem *substantia simplex una, finita* scilicet (quales quippe sunt elementa rerum materialium) *substantiæ simplici alteri finitæ præsens est, quatenus ratio proxima sive immediata mutationum unius in mutationibus alterius continetur.*

Non hic attenditur modus, quo substantia simplex una dependet ab altera: qualiscunque enim tandem sit, in præsentia perinde est.

§. 1032.

*In loco esse
quid dica-
tur.*

In loco esse dicitur, quod certam seu determinatam quandam spatii partem implet. Quamobrem cum spatium impleatur

tur, quatenus in spatio imaginario fingitur pars immobilis ejusdem extensionis cum eo, quod idem implet (§. 609. *Ontol.*); *in loco quid est, quatenus in spatio imaginario fingi potest pars immobilis ejusdem cum ipso extensionis.*

Nimirum spatium imaginarium nobis repræsentamus vi imaginationis tanquam extensum uniforme continuum, in se indivisibile ac immobile & a rebus existentibus penetrabile (§. 599. *Ontol.*). Extensa igitur concipimus tanquam in hoc spatio existentia, quatenus parti cuidam spatii coextenduntur, atque adeo locum nobis imaginamur tanquam partem illius, cujus limites actu mentis designari possunt, etsi re ipsa ob ejus indivisibilitatem constitui nequeant. Unde in loco esse dicimus, quod istiusmodi partem extensione sua implet. Etenim si quæritur, in quo loco fuerit globus ligneus, quem jam manu tenemus; digito demonstramus eam spatii imaginarii partem, in qua ante erat, & ubi quæritur, quemnam locum occupaverit, partem istam iisdem limitibus circumscribimus, quibus terminatur globus, loco ideo magnitudinem tribuentes, etsi alias cum instar puncti cujusdam fixi in immobili spatio imaginario consideremus (§. 608. *Ontol.*). Etsi ad communem usum imaginaria sufficiant; cavendum tamen ne cum realibus confundantur. Etenim ex hoc fonte propullulant omnes difficultates, quæ in doctrina de præsentia rerum in genere & de omnipræsentia Dei in specie occurrunt, non tollendæ, nisi imaginaria a realibus distinxeris.

§. 1033.

Omne corpus in loco est; substantia simplex in loco esse Cur corpus nequit. Cum enim quid sit in loco, quatenus in spatio imaginario fingi potest pars immobilis ejusdem extensionis cum ipso (§. 1032.); quod est extensum, ubi existit, in loco existit, *substantia simplex non* quod vero extensum non est, in loco esse non potest. *Enimvero corpora sunt extensa* (§. 122. *Cosmol.*), substantiæ autem simplices extensæ non sunt (§. 675. *Ontol.*). Corpus igitur

Hhh hhh 3

omne

omne in loco est ; substantia autem simplex in loco esse nequit.

Hinc substantiæ simplices dici solent *illocales*, quia ipsis repugnat esse in loco.

§. 1034.

*Cur animæ
non sint
in loco.*

Quoniam anima tam humana (§. 48. *Psychol. ration.*), quam brutorum substantia simplex est (§. 753. *Psychol. ration.*) ; substantia autem simplex in loco esse nequit (§. 1033.): *animæ non minus brutorum, quam hominum in loco esse nequeunt.*

Observavit hoc *Cartesius* sedem animæ in corpore determinaturus. Enimvero qui corpus ab anima distinguere nesciunt, multoque minus imaginaria a realibus separare norunt, materialia cum immaterialibus turpiter confundentes nec præsentiam ab existentia in loco distinguentes animæ ac omni substantiæ simplici, ipsi adeo Deo, extensionem tribuunt, ut tam animam in corpore, quam Deum in toto mundo præsentem sibi imaginari valeant. Nostrum igitur est, ut ex notionibus quoque realibus explicetur, quid sit esse in loco.

§. 1035.

*Illocalitas
elemento-
rum.*

Similiter quia elementa rerum materialium substantiæ simplices sunt (§. 182. *Cosmol.*) ; *elementa quoque rerum materialium non sunt in loco.*

Non obstat, quod corpora, elementorum aggregata (§. 176. *Cosmol.*), sint in loco (§. 1033.). Etenim elementa rerum materialium non sunt extensa (§. 184. *Cosmol.*) & hoc tamen non obstante corpora, quæ inde aggregantur (§. 176. *Cosmol.*), extensa sunt (§. 221. *Cosmol.*), extenso oriente ex non extenso (§. 223. *Cosmol.*). Quamobrem cum quid sit in loco, quatenus extensum est (§. 1032.); paradoxum videri nequit, quod locale ortum suum deriveret ab illocali. Qui locum elementi & substantiæ simplicis in universum instar puncti mathematici

tici in spatio imaginario dati imaginantur; monstrum imaginationis in lucem edunt, quod a ratione abhorret, quippe non admittente, nisi quod ex notionibus distinctis ab imaginibus separatis certo ratiocinio colligitur. Sumunt enim simplices substantias prodire ex continui divisione, quasi lineam infinita divisione in puncta mathematica resolvendo, adeoque puncta zenonica pro elementis rerum materialium venditant (§. 215. *Cosmol.*), & his omnes substantias simplices deinceps assimilant: quod quam sit a veritate alienum & rationi adversum, satis ostendimus (§. 217. 218. *Cosmol.*). Qui imaginationi nondum valedixere, notiones distinctas ab imaginibus, hoc est, quod distincte agnoscitur ab eo, quod confuse perceptum eidem adhæret, separare nescientes; illis persuaderi nequeunt, quæ sunt solius rationis, utpote convictionis incapabibus (§. 999. *Log.*). Patiantur itaque, quod ipsorum objectiones insolubiles ipsis visæ contemnantur, quemadmodum Mathematicus contemnit, nec responsione dignatur objectiones hominum Matheseos imperitorium contra angulum contactus, vel lineas asymptotos, vel theoriâ infinite parvorum.

§. 1036.

Inimò quia ipse *Deus* substantia simplex est (§. 83.), *Illocalitas* is quoque *in loco esse haud quaquam potest* (§. 1033.). *Dei.*

Illocalitas Dei fluit ex ipsius simplicitate. Qui vero Deo tribuunt infinitam, hoc est, interminatam extensionem; eundem localem faciunt & substantiæ suæ diffusionem rebus omnibus inexistentem, seu, substantiam divinam per omne spatium imaginarium diffusam sibi imaginantur, intellectum vero, voluntatem & potentiam per infinitam extensionem quasi diffusa tacite supponunt, unde alia inferunt, quæ distinctam explicationem minime ferunt. Sed cum istiusmodi idolis tribus, quemadmodum *Verulamius* vocat, nobis nihil est negotii. Colunt ea acumine metaphysico destituti, nonnisi rerum metaphysicarum studio comparando, quemadmodum mathematicum rerum mathematicarum tractatione acquir-

tur.

tur. Cum *nullibi esse* proprie dicatur, quod in loco nullo est; Deus vero in loco non sit, *vi præsens*, nec animæ in loco esse possint (§. 1034.): sequitur omnino, dicendum esse hoc sensu, quod Deus sit nullibi, quod animæ sint nullibi. Immo etiam dicendum erat, elementa rerum materialium esse nullibi (§. 1035.). Enimvero cum per inconstantiam loquendi dicatur etiam nullibi esse, quod prorsus non existit; consilium *Augustini* probamus, qui in simili casu linguam temperari, veritatem retineri jubet. Ne igitur dictione incauta infirmis scandalum creetur, ab ea abstinendum, etiamsi eadem utantur *Cartesiani*.

§. 1037.

*Præsentia
localis
quanam.*

Localiter præsens esse dicitur, quod cum præsens est rebus aliis, in loco existit. Unde *præsentia localis* est, quæ cum existentia in loco conjuncta.

E. gr. Sol horto, quem radiis directis ferit, localiter præsens est. Etenim dum horto præsens est, simul in loco existit. Solis adeo præsentia localis est.

§. 1038.

*Localis
præsentia
in re aliqua.*

Hinc porro *in re aliqua localiter præsens* est, quod intra limites ejus, cui præsens est, rei certum occupat locum.

Ita facile per definitionem præsentiæ probatur, cor corpori humano præsens esse. Occupat vero intra ambitum corporis, hoc est, in ea spatii imaginarii parte, quam implet corpus humanum, locum aliquem. Localiter Sol præsens est horto (*not. §. 1037.*), non tamen localiter præsens est in horto, cum intra ejus terminos non contineatur illa spatii imaginarii pars, quam extensione sua implet corpus Solis. Atque adeo apparet, localem præsentiā simpliciter talem non esse eandem cum locali præsentiā in re; sed hæc duo a se invicem distinguenda esse.

§. 1039.

§. 1039.

Quodsi adeo partem imaginariam spatii consideres tanquam rem a corpore diversam, & eandem certo quodam limite circumscribis; *corpus in eo loco præsens* dicitur, quod intra istos limites seu terminos locum quendam occupat. *Præsentia in loco.*

Observavimus hoc iam alibi (§. 61. *Psychol. empir.*). Nimirum repletio loci extensione corporis in eodem existentis facta consideratur per modum determinationis eidem intrinsecæ, quæ dependet a re in eo existente, consequenter & coëxistente. Atque hoc respectu loco præsens dici potest res locata (§. 1018.), seu, quemadmodum usuratus est, præsens in loco. Imaginaria insunt hisce locutionibus; quamobrem nec aliter explicari possunt nisi per imaginaria, quæ supponuntur, & quorum confusione nascitur idea confusa præsentia in loco.

§. 1040.

Corpus omne præsens est in loco & localiter præsens rebus, vel in rebus. Etenim omne corpus in loco est (§. 1033.), consequenter certam spatii imaginarii partem intra aliam certis limitibus pro arbitrio circumscribendam implet (§. 1032.). Quamobrem cum in loco præsens sit, quod intra terminos, quibus pars quædam spatii imaginarii circumscribitur, constituitur, seu locum quendam occupat (§. 1039.), adeoque aliam spatii imaginarii partem intra eandem implet (§. cit.): corpus omne in loco præsens est, in quo scilicet existit. *Localis præsentia in loco conveniat.*

Similiter cum corpus omne in loco sit (§. 1033.), dum rebus aliis præsens est, in loco aliquo existit. Quamobrem quia localiter præsens est, quod cum præsens est rebus aliis in loco existit (§. 1037.); corpus omne rebus aliis, quibus præsens est, localiter præsens est.

Quodsi iam porro intra limites ejus rei, cui præsens est, certum locum occupet, quia in re aliqua localiter præsens est, quod intra limites ejus rei, cui præsens est, certum locum occupat (§. 1038.); erit corpus in hoc casu localiter præsens in re ista.

Patet adeo præsentiam localem & præsentiam in loco convenire corpori omni, nec repugnare ulli. Nimirum corpus omne semper præsens est in aliquo loco, &, ubi rebus aliis præsens est, localiter præsens est vel rebus, vel in rebus: non tamen ideo, quod rei alicui localiter præsens est, etiam in ea re localiter præsens est, multo minus utriusque localis est præsentia in eodem præcise loco. Ita Sol. localiter præsens est horto, sed non in horto, etsi per inconstantiam loquendi posterius dicamus radios Solis cum Sole ipso confundentes. Ast cor localiter præsens est in corpore, etsi etiam localiter præsens sit corpori toti, quia sanguis a corde propellitur per omnes corporis partes & hæc motu illius alterantur: non tamen cor & corpus integrum eundem præcise locum occupant, seu in eodem præcise sunt loco.

§. 1041.

*Illocalis
præsentia
animarum
& elemen-
torum.*

Animæ humanae & brutorum, immo ipsa elementa rerum materialium localiter præsentia non sunt. Etenim animæ brutorum & hominum (§. 1034.); immo ipsa etiam elementa rerum materialium in loco esse nequeunt (§. 1035.), quamvis totæ præsentibus sint corporibus, quibus uniuntur (§. 1028.). Enimvero localiter præsens non est, quod dum præsens est in loco non existit (§. 1037.). Animæ igitur humanæ atque brutorum, immo ipsa rerum materialium elementa localiter præsentia non sunt.

Patet adeo localem præsentiam, quæ est corporum (§. 1040.), non convenire animabus, neque elementis rerum materialium. Cautè igitur Scholastici affirmant animas *existere in aliquo ubi*, non autem in aliquo loco, ne præsentia localis corporum

porum cum præsentia illocali animarum & in genere substantiarum simplicium confundatur: in quarum numero cum sint elementa rerum materialium (§. 182. *Cosmol.*), dicendum quoque est ipsorum phrasi, elementa rerum materialium existere in aliquo ubi, non autem in loco, ad discernendam illocalem eorum præsentiam a locali corporum. Per propositionem autem præsentem patet illocalem præsentiam convenire animabus promiscue omnibus & rerum elementis, quatenus sunt substantiæ simplices. Etenim simplicitati repugnat existentia in loco (§. 1033.), consequenter & localis præsentia, cum existentia in loco coniuncta (§. 1038.). Ceterum ex dictis liquet, cur a dictione *Cartesianorum*, substantiam simplicem seu immaterialem esse nullibi, consultius abstinetur, etsi rite explicata nihil vitii habeat. Quoniam enim esse nullibi ab iis, qui ex notionibus distinctis de rebus judicare non solent, adeoque plurimis, facillime explicetur per esse in nullo ubi, phrasi autem Scholasticorum dudum ante *Cartesium* in philosophia recepta in nullo ubi est, quod plane non existit; verendum omnino est, ne existentiam rei negare videatur, qui eam nullibi esse dixerit, malevolorum criminationibus & cavillationibus ad speciem compositis sese obnoxium reddens.

§. 1042.

Deus localiter præsens esse nequit. Demonstratur eodem prorsus modo, quo propositio præcedens. Etenim *Deus præsens* non est in loco (§. 1036.). Quamobrem cum localiter præsens esse nequeat ens ullum, quod dum præsens est in loco aliquo non existit, seu cuius præsentia cum existentia in loco non coniuncta (§. 1037.); Deus quoque localiter præsens esse nequit.

Nimirum Deo itidem tanquam enti simplici (§. 83.) existentia in loco (§. 1033.), adeoque & localis præsentia repugnat. Equidem *D. Thomas* affirmat, Deum esse ubique, & ut in re, & ut in loco: non tamen hinc recte colligitur, quod localem Deo tribuat præsentiam, qualis est corporum (§. 1040.).

Unde caute dicit, eum esse ut in loco, non vero simpliciter, esse in loco. Quemadmodum enim alia, quæ per se Deo tribui nequeunt, eidem per eminentiam recte tribuuntur; ita etiam localis præsentia per eminentiam tribui potest. Sed hæc clarius explicabuntur deinceps, ubi ostensuri sumus, quomodo differat esse in loco & esse ut in loco, & quod esse ut in loco non denotet nisi præsentiam localem per eminentiam talem, cum illocali præsentia minime pugnantem. Quoniam vero in iis, quæ de locali & illocali præsentia hætenus demonstrata sunt, notionem spatii imaginarii supponimus, cui convenienter quoque explicandæ sunt omnes Scholasticorum dictiones, ne errores ipsis affingas, nec verum quod ipsis inest perspicias; ad dispellendas tandem omnes nebulas addendum erit, quænam de existentia in loco ex notione spatii reali consequantur, & ex notione ejus imaginaria deducta ultra veritatis limites in errorem trahantur.

§. 1043.

Existencia in loco quibus conveniat & repugnet vi notioni spatii realis. Corpus omne per essentiam suam existit in loco; elemento autem uni, multoque magis animæ ipsique Deo existentia in loco repugnat. Quoniam spatium non est, nisi ordo simultaneorum, seu coexistentium (§. 569. *Ontol.*), quatenus coexistunt (§. 590. *Ontol.*), & confusa ejus idea in anima, quæ spatii imaginarii est, nascitur, dum ordinem coexistentiarum in nexu elementorum confuse percipimus (§. 106. *Psychol. ration.*); pars spatii concipi nequit nisi per ordinem quorundam elementorum inter se connexorum coexistentium, quatenus scilicet ita inter se connexa coexistunt, nec pars spatii impleri intelligitur, nisi quatenus plura elementa ita aggregantur, ut vi nexus inter ea intercedentis certo ordine coexistent. Unde patet per elementum unum, utpote substantiam simplicem (§. 182. *Cosmol.*), adeoque partibus carens (§. 673. *Ontol.*), nec particulam aliquam spatii concipi, nec intelligi posse, quomodo ea impleatur. Elemento igitur uni repugnat esse in loco (§. 1032.).

Et

Et quoni in animæ tam hominum (§. 48. *Psych. ration.*), quam brutorum sunt substantiæ simplices (§. 753. *Psych. rat.*), immo ipse Deus ens simplex est (§. 83.), neque vero Deus, neque anima ulla in numero elementorum materialium deprehenditur, utpote specie differentes ab iisdem, etsi convenientes genere quæ entia simplicia : multo magis liquet animabus hominum, immo Deo ipsi repugnare, ut sint in loco (§. 1032.).

Enimvero quoniam corpora sunt substantiarum simplicium aggregata (§. 176. *Cosmol.*), adeoque corporis in genere spectati essentia in hac aggregatione consistit (§. 155. *Ontol.*); per essentiam corporis in genere spectati & pars spatii concipitur, & quomodo impleatur intelligitur. Corpus adeo omne per essentiam suam in loco existit (§. 1032.).

Ex demonstratione propositionis præsentis patet, vi notionis spatii realis de existentia in loco eadem consequi, quæ ex notione spatii imaginarii consequuntur, nisi quod per notionem spatii realis intelligatur clarius, cur existentia in loco corpori omni sit essentialis, adeoque per essentiam suam non possit existere nisi in loco; substantiis vero simplicibus non modo in genere, verumetiam animabus ac ipsi Deo in specie repugnet existentia in loco, cum verendum non sit, ne per notiones confusas nobis non advertentibus irrepat aliquis error. Atque adeo simul liquet, substantiis simplicibus nec posse tribui existentiam quasi in puncto quodam intra spatium imaginarium, etenim hoc pacto substantiam simplicem imaginarem per modum puncti mathematici: quod etsi contra simplicitatem animarum ac ipsius Dei objiciatur a defensoribus extensionis animarum atque Dei, a veritate tamen abhorret, quemadmodum vel ex iis patet, quæ de elementis rerum materialium demonstrata sunt in Cosmologicis, ita ut abortum imaginationis nominasse idem sit ac destruxisse. Obiter monemus, quomodo notiones communes, quas terminis receptis jungimus, dum aliquid imaginarii sapiunt, eas revocando

cando ad distinctas & ab imaginibus separando danda sit opera, ut terminorum receptorum significatus salvetur : cuius cum specimen illustre habeamus in præsente de existentia in loco doctrina, nostrum omnino esse duximus attentionem lectoris ad ipsum excitare.

§. 1044.

*Esse ut in
loco quid
sit.*

Quod in loco non est, dicitur *esse ut in loco*, quando præsens est rei in loco existenti,

Vulgo in loco esse dicitur, quod est præsens rei in loco existenti; sed esse in loco & esse ut in loco, non distinguitur in notionibus confusis. Vidimus tamen D. Thomam unum ab altero distinguere acuminē singulari, quo polluit in perlustrandis notionibus confusis, & quod quid præsens esse possit rei in loco existenti, etsi ipsummet in loco non existat, per demonstrationes anteriores abunde patet, ut adeo de realitate distinctionis nullum supersit dubium, ac nonnisi cæcucientes eam inter tricas & steriles nugas Scholasticorum referant, Acumen in rebus distinguendis Scholasticis denegandum non est, utpote quod studio philosophiæ Aristotelicæ sibi compararunt, etsi dono distinctæ explicationis pro more seculi fuerint destituti, quod hodiernum plurimis negatur,

§. 1045.

*Anima-
rum exi-
stentia ut
in loco.*

Anima tam hominum, quam brutorum sunt ut in loco. Et enim animæ tam brutorum quam hominum in loco esse nequeunt (§. 1034.), præsentes tamen sunt corporibus, quibus uniuntur, totæ (§. 1028.), Quamobrem cum corpus omne per ipsam essentiam suam sit in loco (§. 1033, 1043.); animæ in loco non existentes præsentes sunt rebus in loco existentibus. Enimvero quod in loco non est, attamen præsens rei in loco existenti, idem est ut in loco (§. 1044.). Animæ igitur tam hominum, quam brutorum sunt ut in loco,

Habet

Habet in eo anima, quod cum eidem repugnet esse in loco, tamen sit ut in loco, aliquid similitudinis cum coëxistentia Dei & rerum materialium; non tamen ideo coëxistentia ipsius atque corporum cum coëxistentia divina confunditur: salva enim est, quemadmodum ex mox dicendis clarius elucescet, differentia, quanta inter ens finitum seu limitatum & infinitum seu illimitatum intercedit. Quamobrem quoad præsentiam idem obtinet, quod in ceteris attributis divinis deprehenditur per omnes demonstrationes superiores, quippe quæ animabus nostris ea differentia conveniant, quam fert differentia entis finiti ac infiniti, aut si mavis limitati & illimitati. Et hæc similitudo proderit ad existentiam Dei non in loco, sed ut in loco intelligendam.

§. 1046.

Deus præsens est rebus omnibus in toto universo, seu omni Præsentia creaturæ. Etenim creatura ulla existentiam propria virtute continuare nequit (§. 840.), sed Deus, quam dedit in principio, dare pergit, quamdiu durat (§. 841.), consequenter indefinenter in creaturas agit (§. 842.). Quamobrem cum ens unum alteri præsens sit, si in ipsum agit (§. 1019.); Deus omni creaturæ, seu rebus omnibus in toto universo indefinenter præsens est.

Monuimus jam supra (not. §. 1019.), ex actione entis unius in alterum præsentiam concludi eodem sensu, quo hortulanus arbori præsens dicitur, ex qua surculos gemmis gravidis destitutos resecat, & Sol. terram exsicicans horto præsens est. Hinc & D. Thomas sumit ibi rem esse, ubi operatur, ac inde concludit, Deum esse in rebus omnibus, seu, quod perinde est, esse rebus omnibus præsentem, ut agens in id, quod agit: in concursu nimirum universali, qui fit per conservationem (§. 874.), substantiæ agenti, quam conservat, vires agendi largitur (§. 876.). Ceterum ex propositionis præsentis demonstratione intelligitur, præsentiam Dei ex ipsa ejus ac creaturæ essentia & natura fluere, ita ut creatura
nulla

nulla concipi possit sine præsentia divina ut existens vel unico momento, quantumcunque hoc assumatur.

§. 1047.

*Cur Deus
totus crea-
turis præ-
sens sit.*

Deus omni creaturæ totus præsens est. Etenim ens simplex est (§. 83.), & substantia per eminentiam (§. 1005.), idemque præsens omni creaturæ (§. 1046.). Enimvero substantia simplex præsens esse nequit nisi tota enti cuicunque, cui præsens est (§. 1027.). Deus igitur omni creaturæ totus præsens est.

Hinc patet, Deum non tantummodo virtute sua seu omnipotentia esse rebus omnibus præsentem, sed substantialiter, cum sine substantialitate concipi non possit Deus totus. Nec probatu difficile foret, nihil in Deo concipi, quod non in præsentiam ipsius certo quodam modo influat: id quod probe notandum est, cum maximo usui sit in praxi officiorum erga Deum suo loco explicanda.

§. 1048.

*Extensio
præsentiæ
divinæ.*

Deus totus præsens est toti mundo adspectabili & singulis rerum materialium elementis, corporibus item singulis, sive in prima rerum origine productis, sive hodiernum genitis, singulis animabus humanis, singulis animabus brutorum. Etenim Deus præsens totus est omni creaturæ (§. 1047.). Sed totus hic mundus adspectabilis & singula rerum materialium elementa (§. 778.); corpora singula non modo in prima origine rerum producta, verum etiam hodiernum genita (§. 779.), singulæ animæ humanæ (§. 780.), singulæque brutorum animæ creaturæ Dei sunt (§. 783. 777.). Deus igitur totus præsens est toti mundo adspectabili & singulis rerum materialium elementis, corporibus singulis non modo in prima rerum origine productis, verum etiam hodiernum genitis, animabus humanis singulis & singulis animabus brutorum.

Vides

Vides adeo quam late pateat præsentia divina, etiamsi Deus rebus omnibus præsens sit quoad substantiam suam (not. §. 1047.). Scriptura sacra præter creaturas, quarum existentia lumine rationis nobis innotescit, mentionem quoque facit angelorum, sed et inquam creaturarum Dei. Quemadmodum itaque omnia, quæ ex principiis rationis de creaturis demonstrantur, ad angelos applicanda veniunt; ita ex eadem ratione patet, præsentiam quoque divinam, quæ ex ipsa Dei ac creaturæ essentia atque natura fuit, ad angelos quoque esse extendendam. Absit itaque quis sibi ac aliis persuadere audeat, negari quod Deus eodem modo præsens sit angelis, quo rebus ceteris omnibus præsentem demonstravimus, limites Theologiæ naturalis cum limitibus revalatæ minime confundentes, ut tanto evidentius pateat, quænam Theologia revalata naturali superaddat.

§. 1049.

Deus totus est præsens toti mundo & totus præsens singulis ejus partibus citra multiplicationem & diffusionem sui. Et-Modus præ- sentia divi- enim Deus totus præsens est mundo toti & singulis corporibus na uberius sive in prima rerum origine productis, sive hodiernum genitis explicatur. (§. 1048.). Enimvero mundus est totum aliquod & entia singula in eodem vel simul, vel successive existentia, hoc est, corpora sive in prima rerum origine producta, sive hodiernum genita (§. 119. Cosmol.), sunt ejus partes (§. 61. Cosmol.). Deus igitur totus præsens est mundo toti & totus præsens est singulis ejus partibus. Est vero ut ens omne (§. 329. Ontol.) unus, adeoque totus præsens est rebus singulis citra sui multiplicationem (§. 331. Ontol.). Præterea substantia est per eminentiam (§. 1005.), idemque inextensus (§. 85.), consequenter substantia divina multorum extra se invicem existentium unione non constituitur (§. 548. Ontol.). Quamobrem fieri nequit, ut quidpiam substantiæ divinæ præsens sit huic rei, quidpiam alteri, consequenter Deus pluribus rebus simul præsens, citra
(Wolffii Theol. Natur.) Kkk kkk *sui*

fui diffusionem. Patet itaque Deum totum esse præsentem toti mundo & totum esse præsentem singulis ejus partibus citra sui multiplicationem & diffusionem.

Quæ hic de præsentia Dei demonstrantur, ex notionibus rerum adeo evidenter consequuntur, ut, nisi in evidentiam rationis injurius esse volueris, ea in dubium revocare non possis. Quemadmodum itaque Geometræ de angulo contactus & lineis assymptotis absque ulla hæsitacione admittunt, quæ ex notionibus evidentia rationis colliguntur, refragante licet imaginatione; ita quoque philosophus ab idololatræ imaginationis cultu alienus contradicere nequit iis, quæ ex notionibus Dei & creaturarum seu rerum ab ipso omnimode dependentium consequuntur. A vero igitur toto cælo aberrant, qui inter nugas Scholasticorum referunt, quæ veritati manifestæ consentanea sunt. Nos igitur non pudet ea systemati nostro inferere, quæ firma demonstratione nituntur: sit ita quod rideantur ab imperitis, quorum est sapere ultra id, quod intelligunt, & ridere ea, quæ horizontem ipsorum transcendunt.

§. 1050.

Intime præsens rei a tota diversum & diversum ab aliis, quæ simul ad eandem quid dicatur, pertinent, cui non sit præsens.

Ita homini præsens intime dicendum ens ab eo diversum, quod & animæ, & corpori singulisque huius partibus, qualescunque tandem eadem ponantur, præsens est.

§. 1051.

Intima præsentia Dei. *Deus intime præsens est rebus omnibus, quibus præsens est.* Cum ens omne vel simplex sit, vel compositum (§. 685. *Ontol.*); res etiam, quibus Deus præsens est, vel in simplicium, vel in compositorum numero esse debent. Enimvero cum simplex partibus caret (§. 673. *Ontol.*), adeoque plura
a se

a se invicem & a toto distincta in eodem concipi nequeant (§. 341. *Ontol.*); vi simplicitatis fieri nequit, quin Deus substantiæ simplici intime præsens (§. 1050.). Quamobrem cum elementa corporum sint substantiæ simplices (§. 182. *Cosmol.*), ex quibus aggregantur (§. 176. *Cosmol.*), corpora vero, ex quibus mundus tanquam partibus componitur, entia composita sint (§. 119. *Cosmol.*); quæ in corpore tanquam a se invicem & a toto corpore, diversa distinguuntur, tandem non sunt, nisi elementa. Enimvero substantiis simplicibus Deus intime præsens est *per demonstrata*. Nihil adeo in corpore quocunque, consequenter in ente aliquo composito, quod in hoc mundo existit, distinguere potest tanquam diversum a toto & diversum ab omnibus, quæ simul ad idem pertinent, cui non præsens sit Deus, corporibus omnibus totus præsens (§. 1048.). Quoniam itaque rei intime præsens est ens alterum, in qua nihil concipi potest a tota diversum & diversum ab aliis, quæ simul ad eandem pertinent, cui præsens non sit (§. 1050.); Deus quoque omni enti composito, quod existit, intime præsens est. Atque adeo patet, eum intime præsentem esse rebus omnibus, quibus præsens est.

Ob intimam hanc præsentiam Deus dicitur *esse in re*, aut, si esse in re de locali præsentia sumitur (§. 1038.), adeoque aliquid imaginarii admixtum habet, accuratius cum *D. Thoma*, ut *in re*, cum is localiter præsens non sit (§. 1042.).

§. 1052.

Deus est ut in loco omni. Etenim Deus in loco non est (§. 1036.): *Existentia* est tamen præsens omni corpori (§. 1048.). Quamobrem cum ut *Dei ut in loco* sit, quod in loco non est, præsens tamen rei in loco existenti *loco*. (§. 1044.), & corpus omne in loco existat, (§. 1043.); Deus est ut in loco. Jam corpus omne per essentiam suam in loco existit, elemento autem uni multoque magis animabus existentia in loco

repugnat (§. 1043.). Quamobrem cum præter corpora & elementa rerum materialium, ex quibus illa aggregantur (§. 176. *Cosmol.*), atque animas non dentur entia alia, adeoque corpora omnia simul omnia loca occupent; patet porro, Deum esse, ut in loco omni.

Angeli, quorum mentionem facit S.S. sunt spiritus, adeoque substantiæ simplices, quæ & ipsæ perinde ac animæ nostræ in loco non sunt. Quamobrem subsistit demonstratio propositionis præsentis, etiamsi corporibus elementorum aggregatis præter animas jungas angelos, ut omne prodeat creaturarum genus. Qui Deum ubique esse affirmant, eum ut in loco omni esse tuentur. Ast Ubiquitarii Deum in loco omni quasi substantiæ suæ diffusionem per spatium imaginarium existere sibi imaginantur.

§. 1053.

*Quomodo
res omnes
Deo sint
præsentēs.*

Res omnes, aut, si mavis, creaturæ omnes Deo per eminentiam præsentēs sunt. Quod sensu percipimus, id nobis præsens est (§. 1021.). Deus sensu caret (§. 157.), adeoque sensu nihil percipere potest. Enimvero sensu percipimus objecta externa intuitionem organis sensoriiis qua talibus inducentia (§. 67. *Psychol. empir.*), consequenter quæ actu sunt sive existunt, adeoque præsentia (§. 228.). Quamobrem cum Deus per concursum suum præsentia in toto universo a præteritis atque futuris distinguat (§. 939.); in Deo datur quod vicem sensus omnis supplet, adeoque per eminentiam sensu percipit omnia præsentia in toto hoc universo. Patet igitur res omnes in hoc universo, seu, creaturas omnes Deo per eminentiam præsentēs esse.

Præsentia nihil denotat quod rebus intrinsicum est, utpote nonnisi rerum quoad coexistentiam relatio (§. 1018.). Quamobrem etsi creaturæ Deo per eminentiam præsentēs dicantur, non tamen quid tribuitur creaturis, quod per eminentiam insit;

fit; sed tantummodo relatio quædam ad Deum, propterea quod ipsi quid per eminentiam inest.

§. 1054.

Omni præsentia est præsentia ad omnia entia a se diversa *Omni præsentia quid sit.*

Supponit omni præsentia notionem præsentia, qua de causa hætenus de præsentia satis prolixè egimus, ne quid lucis in hoc argumento alias satis obscuro desiderari possit. Addit autem notioni præsentia omnem amplitudinem, quæ concipi potest, ita ut nihil tanquam ne existens fingi quidem possit, cui non sit præsens illud ens, quod omni præsens est. Unde & Scholastici Deum præsentem dicere in spaciis extramundanis imaginariis: id quod non esse prorsus sine mentis sonum, quemadmodum videtur in rebus metaphysicis vel defectu acuminis, vel neglectu discussionis accuratæ cœcutientibus. Etenim præter hunc mundum plures adhuc alii possibiles sunt (§. 101. *Cosmol.*), quibus producendis non minus sufficit potentia Dei, quam sufficit huic, qui existit (§. 342.), per ejus adeo omnipotentiam existuri, modo vellet (§. 352.). Cum in mundo omnia simultanea inter se connectantur (§. 48. *Cosmol.*), adeoque ratio coexistentiæ sufficiens in ipsis coexistentibus continetur (§. 10. *Cosmol.*); in mundo omni datur ordo simultaneorum, quatenus coexistunt (§. 472. *Ontol.*). Quamobrem cum ordo simultaneorum, quatenus coexistunt, spatium sit (§. 589. *Ontol.*); tot possibilia sunt spacia, quot mundi, non nisi autem unum actuale, quemadmodum unus tantummodo existit mundus (§. 117.). Quodsi mundi isti existerent, eodem, quo ante (§. 1046.), modo ostenderetur, Deum esse rebus omnibus in ipsis existentibus præsentem, consequenter præsentia divina in omnibus istis spatiis possibilis. Atque hæc præsentia divinæ possibilitas in mundo omni possibili est id, quod a Scholasticis præsentia in spatiis extramundanis imaginariis appellatur. Rite adeo intellecta tantum abest, ut vel absurda dicatur, vel inter steriles ungas referatur, ut potius notionem omni præsentia reddat sublimiorem, quemadmodum notio

omnipotentia divinar, immo & omniscientia augustior evadit, si ea non tantummodo ad ea refertur, quae ad actum perduntur, verum etiam ad cetera, quae in statu nudae possibilitatis permanent. Quae igitur laudantur in ceteris attributis divinis, cur reprehendi debent in omnipraesentia? Studio talia inculcamus, ut excitemus eorum attentionem, qui praecipitantia in iudicando facile dant locum, ubi praecipitata iudicia speciem acuminis blandientis praeseferunt.

§. 1055.

Omnipraesentia divina.

Deus est omnipraesens. Etenim Deus totus intime praesens toti mundo & singulis partibus omnibusque animabus (§. 1048. 1051.). Cumque praesens sit omni creaturae (§. 1046.); si ceteros mundos possibiles ad actum perducere vellet (§. 352.), quemadmodum potest (§. 342.), nonnisi creaturas complexuros (§. 777.), eodem modo praesens singulis futurus intelligitur. Praeterea creaturae omnes Deo per eminentiam praesentes sunt (§. 1053.). Nullum adeo concipi potest ens ut actu existens, cui non praesens intelligatur Deus & quod eidem non praesens esse debeat per eminentiam. Quamobrem cum omnipraesens sit, cujus praesentia ad omnia entia a se diversa extensa (§. 1054.); Deus omnino omnipraesens est.

Patet ex demonstratione propositionis praesentis, praesentiam Dei in spatiis imaginariis extramundanis distincte explicatam demonstrationem omnipraesentiae divinae ingredi.

§. 1056.

Magnitudo praesentiae divinae.

Praesentia Dei omnium maxima est, quae concipi potest. Etenim Deus totus intime praesens est toti mundo & totus singulis, quae in eodem existunt (§. 1048. 1051.): immo cum omni creaturae praesens esse debeat (§. 1046.), & potentia eius ad omnia extendatur (§. 343.), nullum ens praeter ipsum concipi

cipi potest tanquam existibile, aut producibile, cui non præsens esse debere intelligatur, quamprimum existit. Quamobrem cum præsentia major concipi non possit, quam si ens aliquod totum intime præsens est omnibus ceteris a se diversis, præsentia tum omnem limitationem respuente; præsentia Dei utique omnium maxima est, quæ concipi potest.

Patet adeo, Deo convenire præsentiam, qualis esse debet entis, quod omnem prorsus limitationem respuit quoad ea, quæ de ipso prædicantur.

§. 1057.

Deus totus simul præsens est rebus omnibus. Etenim De- *Præsentia* us totus intime præsens est mundo toti & singulis, quæ in eo sunt *divina successiones* (§. 1048. 1049. 1051.), & res omnes per eminentiam ipsi præ-*cessiones* sentes sunt (§. 1053.). Quamobrem nihil concipi potest, cui *nescia, seu* non sit præsens & quod ipsi præsens non sit; sed cui demum *simultanea* præsens fieri aut quod ipsi præsens fieri possit. Præsens igitur est totus omnibus simul rebus.

Patet adeo, Deo convenire præsentiam, qualis esse debet entis infiniti, in quo sunt omnia simul, quæ eidem inesse actu possunt (§. 838. *Ontol.*). Patet autem ex demonstrationibus superioribus (§. 1046.), Dei præsentiam pendere ab iis, quæ ipsi insunt, nempe ab actu conservatorio.

§. 1058.

Deus non potest moveri de loco in locum. Deus enim *Deo repugnans* non est in loco (§. 1036.). Quamobrem cum motus sit con-*gnans locum* tinua loci mutatio (§. 642. *Ontol.*); nec locum continuo mul-*lis motus.* tando moveri potest. Enimvero quamvis sit ut in loco (§. 1052.), adeoque ipsemet quidem in loco non existens præsens tamen sit rebus in loco existentibus (§. 1044.); quoniam tamen rebus omnibus totus simul præsens est (§. 1057.) & quidem in-
time

time (§. 1051.), ut nihil in iis concipi possit tanquam ab ipsis, vel ab aliis ad eas simul pertinentibus diverſum, quibus totus præſens non fit (§. 1050.); nec fingere licet, quod deſinat eſſe ut in loco aliquo, & eſſe incipiat ut in loco alio, conſequenter ut ſucceſſive fit ut in loco alio. Atque adeo patet nullo modo dici poſſe, quod Deus de loco in locum moveatur.

In eo adeo differt præſentia Dei a præſentia noſtra, quod non quemadmodum nos de loco in locum moveri teneatur, ut ſucceſſive præſens fiat aliis aliisque rebus, ſed quod ſimul totus fit præſens rebus omnibus, præſens exiturus pluribus, ſi plures creare veller, & ita exiſtens ut in loco quocunque, ut etiam extra eum exiſtat. Patet itaque de præſentia Dei cogitatuſcos imaginem præſentia noſtra ſeponere debere, ne per ſe clara tenebris involvantur.

*Reſtituo
actionum
divinarum*

Actiões Dei liberæ omnes rectæ ſunt. Etenim cum actiones liberæ ab arbitrio Dei ſeu liberrima ejus voluntate pendeant (§. 913.), adeoque rationem ſufficientem in eadem agnoſcant (§. 851. *Quæſt.*), conſequenter poſito acta voluntatis divina ponantur (§. 118. *Ontol.*), vel ſint ipſi actus liberrimæ voluntatis divinae (§. 567.); Deus vero velit, quæ ipſum decent (§. 335.): actiones liberæ omnes Deum decent. Quamobrem cum ipſum deceat, cujus aliqua in iis, quæ ipſi inſunt ſeu in eſſentia vel attributis ipſius continetur ratio, cur id potius velle debeat, quam aliud (§. 332.); actionum liberarum ratio aliqua in iis, quæ ipſi inſunt, ſeu in eſſentia vel attributis ipſius contineri debet. Quamobrem cum actio libera ſit recta, quæ rationem aliquam aut quod perinde eſt, reſpectu libertatis ſufficientem habet in eſſentia & attributis agentis, neque adeo ulli determinationi eſſentiali vel attributo contradicit (§. 950.); actiones Dei liberæ omnes rectæ ſunt.

Idem

Idem etiam ostenditur hoc modo. Cum actiones Dei liberae vel sint ipsimet voluntatis ejus liberrimæ actus, vel ab iis minimum pendeant, quemadmodum ex demonstratione anteriore patet; Deus vero velit quod perfectionibus divinis seu, quod perinde est, essentiae ac attributis divinis convenit; quod vero iisdem repugnat, id ut velit fieri nequit (§. 445.): actiones Dei liberae essentiae & attributis ejus conveniunt, iisdem vero repugnare nequeunt. Quoniam adeo per Dei essentiam & attributa ejusdem intelligitur, cur hæ sint ipsius actiones liberae non aliae, oppositæ esse nequeant; ratio earum sufficiens in essentia & attributis divinis continetur (§. 56. *Ontol.*). Quoniam itaque actio libera recta est, si rationem sufficientem (qualis nempe ad actiones liberas sufficit, ubi agens semetipsum citra coactionem externam & internam ad volendum determinat) in essentia & attributis agentis habet (§. 950.); actiones Dei liberae omnes rectæ sunt.

Probe notandum est, undenam nascatur rectitudo actionum divinarum, nimirum ab essentia & attributis divinis, & quomodo inde nascatur salva libertate, nimirum ut essentialia determinationes & attributa divina sint tantummodo motiva earundem, quæ libertati minime nocere constat (§. 931. *Psychol. empir.*). Scilicet si actio aliqua refertur ad Deum, tum necessario essentiae atque attributis ejusdem vel convenit, vel non convenit (§. 53. *Ontol.*), atque adeo rectitudo est quidpiam eidem intrinsicum, nec arbitrio demum ei inducitur. Ast nulla adest coactio interna, vel externa, cur Deus id velit potius quod rectum est, quam quod rectum non est; sed semetipsum ad id, quod rectum est, determinat, cum physice impossibile non foret, ut voluntatem suam quoque determinaret ad id, quod rectum non est. Hæc igitur probe notanda sunt, ut suo loco rectius de actionum humanarum intrinsicæ honestate ac turpitudine judicetur, & ut agnoscat, quomodo liberrime faciat, quod rectum est, qui nullis præjudiciis & cupiditatibus noxiis præpeditum habet animum.

§. 1060.

Reclitudo actionum divinorum quomodo aestimanda. *Actionum divinorum reclitudo aestimanda ex essentia & attributis divinis omnibus simul sumtis.* Etenim actiones divinæ rectæ sunt, quatenus nullæ determinationi essentiali vel attributo contradicunt (§. 950.). Enimvero si actionis alicujus reclitudo tantummodo aestimaretur ex uno vel aliquot attributis divinis, vel ex una aut altera determinatione essentiali, neglectis ceteris; fieri poterat, ut uni vel alteri determinationi essentiali contradiceret; veluti si bonitati quidem aut omnipotentia conveniret, sapientia tamen aut omniscentia repugnaret, consequenter recta dici non posset. Aestimanda igitur est ex omni essentia & omnibus attributis divinis.

Patet adeo, cur subinde actiones Deo tributæ non modo in Theologia naturali, verum etiam in ipsa S.S. nonnullis videantur minus rectæ; eas nimirum referentes ad attributum Dei unum, sepositis ceteris, quorum non minus habenda est ratio. Cautè igitur procedendum, ne temerarij judicij in sanctitatem Dei simus injuri.

§. 1061.

Difficultas judicii de reclitudine actionum divinorum. *Reclitudo actionum divinorum a nobis difficulter dijudicatur; sapius tamen satis probabiliter cognoscitur.* Etenim reclitudo actionum divinorum aestimanda est ex convenientia cum singulis determinationibus essentialibus & attributis divinis (§. 1060.). Enimvero quid Deus velit, adeoque libere agat, ex convenientia cum attributis divinis difficulter a nobis cognoscitur; sapius tamen probabiliter cognosci potest (§. 446.). Quamobrem cum in dijudicandis actionibus Dei liberis omnis questio redeat ad hoc quid Deus velit; reclitudo actionum divinorum a nobis difficulter dijudicatur; sapius tamen probabiliter cognosci potest.

Dupli-

Duplicem usum habet propositio præsens, alterum, ut arceantur temeraria de actionibus Dei judicia; alterum, ut excitetur attentio ad inquirendas earundem rationes & via, qua in iis indagandis sit eundem, pateat.

§. 1062.

Constantia voluntatis est immutabilitas actus ejus in dato casu, seu quoad actionem unam. *Perpetuitas voluntatis* est identitas actus ejus in omni casu, seu quoad omnes actiones.

*Constantia
& perpetuitas vo-
luntatis
quid sit.*

E. gr. ponamus nos velle, quod æquum est, in dato aliquo negotio. Constans dicenda erit voluntas, si nullis rationibus nos adduci patiamur, ut contrarium velimus. Ast eadem dicenda erit perpetua, si in nullo negotio velimus, nisi quod æquum est, ita ut nos semper æquos præbeamus aliis.

§. 1063.

Sanctitas est constans & perpetua voluntas non faciendi, nisi quod rectum est.

*Sanctitas
quid sit.*

Notionem hanc esse usui loquendi conformem, vel ex eo patet, quod sanctum esse negemus, in cujus actionibus aliquis quoad rectitudinem actionum defectus notetur, & probaturi, quod sanctus non sit, defectus actionum commemoramus.

§. 1064.

Quoniam constantia voluntatis est immutabilitas actus ejus in dato casu & perpetuitas identitas ejusdem in casu omni (§. 1062.), sancto autem voluntas constans atque perpetua est non faciendi nisi quod rectum est (§. 1063.); qui sanctus est, & semper facere vult quod rectum est, & nullo in casu se a proposito suo dimoveri patitur, ut faciat quod rectum non est.

Clare adeo jam intelligitur, qualem se probet sanctus in actione.

actionibus suis: quod usui esse potest, ne quis sibi sanctus videatur, cum non sit.

§. 1065.

Summa

Dei sancti- concipere non detur. tas.

Deus est sanctissimus , ita ut sanctitatem divina maiorem Etenim actiones Dei liberae omnes rectae sunt (§. 1059.), adeoque nulla earum datur, in qua aliquis notetur defectus. Quamobrem nullo dubitari potest modo, quin Deus semper velit, quod rectum est, cumque voluntas ipsius sit immutabilis (§. 368.), nec fieri potest, ut ab eo, quod rectum est, ullo modo vel tantillum dimoveatur. Quoniam itaque voluntas ipsi constans & perpetua est non faciendi nisi quod rectum est (§. 1062.), sanctus vero est, cui voluntas constans & perpetua non faciendi nisi quod rectum (§. 1063.) ; Deum esse sanctum constat. Et quia impossibile est, ut in sanctitate quid desideretur, si omnes actiones liberae fuerint rectae, nec minima in ulla a recto notetur deviatio, & agens ita velit quod rectum est, ut nunquam fieri possit, quin ab eo vel tantillum quibuscunque rationibus abducatur, quemadmodum id patet de sanctitate divina *per demonstrata*; quin Deus sit sanctissimus, ita ut sanctitate ipsius maiorem concipere non detur evidentissimum est.

Rectitudo voluntatis deficit vel ex parte intellectus, quatenus agens ignorat, quid rectum sit, vel ex parte appetitus, quatenus ob rationes extrinsecas, quae ipsi contrarium repraesentant tanquam appetibile, quod rectum agnoscit, non vult. Neutrum in Deo locum habet. Omniscius enim intime perspicit, quid sit rectum, ut ejus de actionis rectitudine iudicium ne tantillo quidem a vero aberrare possit. Voluntas ejus non fertur nisi in optimum, adeoque voluptatum apparentium illecebris non flectitur in contrarium, quemadmodum humana. Nihil adeo in Deo quod obstat, quo minus sit sanctissimus. Ceterum cum voluntas in eo concipiatur per modum actus, non per modum potentiae nuda seu facultatis (§. 356.), sanctitas

vero

vero sit voluntas constans & perpetua non faciendi nisi quod rectum est (§. 1063.); ideo patet, cur voluntas Dei dicatur sancta & sanctissima. Sane virtutes morales etiam de humana voluntate prædicantur in concreto: unde qui castus est, ei castam tribuimus voluntatem.

§. 1066.

Deus sanctissimum se probavit in creatione, sanctissimum Qualem probat in conservatione & gubernatione rerum. Etenim Deus sanctissimus est, ita ut sanctitatem divina majorem concipere non detur (§. 1065.). Quamobrem cum sanctissimus sit, quatenus in rectitudine actionum ipsius nullus notatur defectus (§. 1064.), creatio vero (§. 760.) conservatio (§. 843.) & gubernatio sint actiones divinæ (§. 901.); nec in creatione, conservatione & gubernatione hujus universi defectus ullus notari potest, adeoque & in hisce quin se sanctum probet, dubitari nequit.

Deus se gessit in creatione, qualem se gerat in conservatione & gubernatione universi.

Probari etiam poterat hoc modo. Omnis actio Dei recta est (§. 1059.), consequenter & creatio, conservatio & gubernatio hujus universi (§. ante cit.). Quamobrem cum sanctissimum se probet, qui nunquam facit, nisi quod rectum est (§. 1064.); Deus in creatione, conservatione & gubernatione hujus universi sanctissimum se probat.

§. 1067.

Bonitas sapientiæ attemperata, aut, temperamentum bonitati vi sapientiæ adhibitum est *Iustitia*. Ut adeo *Iustus* sit, qui *quid sit.* bonitatem sapientiæ attemperat, seu temperamentum bonitati vi sapientiæ adhibet.

Non ignoro esse plurimos, qui cum justitiam concipiant per virtutem, qua jus alteri suum redditur, & justitiam vindicativam per eam, qua bene meriti præmiis decorantur,

male facientes puniuntur, facile & sibi, & aliis persuadent significatum vocabuli receptum a nobis immutari, nec ea, quæ de viro justo prædicantur omnium consensu, ex nostra definitione deduci posse. Immo qui ad criminandum proni sunt animo, per definitionem nostram justitiam Dei vindictivam tolli argutantur: unde consequentarii porro inferunt, tolli meritum Christi & omnem religionem christianam funditus subverti. Atat! bona verba, quæso. Quicquid de justitia vel communiter prædicatur, vel de justitia Dei, etiam vindictiva, enunciatur; id omne, modo verum sit, ex nostra definitione demonstratur. Dabimus fidem oculatam, non modo in sequentibus quoad ea, quæ Deum concernunt; verum etiam suo tempore in philosophia practica: immo ea, quæ communibus justitiæ notionibus insunt, inde deducuntur. Inprimis clarissime constabit, quomodo Deus esse possit justus erga creaturas, etsi iis nil debeat. Definitionem justitiæ davius generalem eamque realem, quæ ambitu suo & humanam, & divinam omnem complectitur, ita ut a priori intelligatur, cur insit sive Deo, sive homini. Immo in philosophia practica justitia universalis, ab Interpretibus *Aristotelis* non satis perspecta, in omnibus omnino hominum actionibus conspicua singulari quadam ratione stabilietur, ita ut non confundatur cum virtutibus ceteris, quarum complexum vulgo denotare dicitur, sed singulis virtutibus quidpiam addat, quod vulgo non attenditur, quatenus in omnibus actionibus aliorum quoque habenda ratio est, ita ut sine justitia nullius actionis rectitudo omnimoda concipi queat. Utinam eruditi ad intelligendum aliorum dicta, quam ad reprehendendum proniores eam diligentie suæ partem in intelligendo utiliter collocarent, quam in reprehendendo inutiliter, nec citra aliorum injuriam minime condonandam consumunt! Sed demus exemplum justitiæ, qua definitio nostra illustretur & idea quædam exemplaris in animo nascatur, ad eam rectius intelligendam ac promte applicandam proficua. Magistratus, cui finis civitatis, salus & tranquillitas ac securitas publica suprema lex est, per bonitatem fertur in salutem omnium civium, quibus singulis bene esse cupit:

enim;

enimvero ne singulis consulat cum detrimento universitatis, vi sapientiæ finem civitatis consecuturus in eos, qui delinquent, fini isti contrarium facientes, severe animadvertit, prout finis illius conservatio necessitatem imponit. Nemo non dicit animadversionem esse justam, nec severitatis nimiae ac crudelitatis notam inurit Magistratui, cujus alias lenitatem atque clementiam deprædicat. Enimvero quid, quæso, facit Magistratus, dum hoc pacto se justum probat? Nonne bonitatem sapientiæ attemperat, & exceptiones contra bonitatem sapientiæ elidit? Non alia igitur de causa justus dicitur, quam quatenus temperamentum bonitati, vi sapientiæ adhibet, adeoque in hoc ipso temperamento, quæ eidem tribuitur, justitia consistit. Ecce igitur tibi notionem justitiæ generalem, quam dedimus, ab ipso exemplo justitiæ vindictivæ abstrahi: id quod satis de universalitate notionis testatur, insunt enim universalia singularibus (§. 232. *Ontol.*), & determinationes generales singulis speciebus (§. 237. *Ontol.*).

§. 1069.

Actio aliam respicit directe, quæ fit alterius gratia; indirecte autem, quæ cum alterius gratia non fiat, alterius tamen *Respectus actionum ad alios directus & indirectus.* simul rationem habet.

Distinguimus hic actionum liberarum respectum ad alios directum & indirectum non sine ratione. Directus enim est fundamentum justitiæ particularis, indirectus universalis, quemadmodum suo loco explicabitur. E. gr. si quis termino solutionis comparente promte solvit, quod debet; solutio directe respicit alterum: ejus enim gratia fit, nimirum ut justo tempore accipiat, quod suum est, nec conquerendi causam habeat, quod suum sit penes alium. Enimvero si parens modice bibit vinum in prandio quod certa quantitate haustum sanitati suæ conducere expertus, sanitatis conservandæ gratia; modicus vini haustus in prandio directe non respicit alterum, sed semetipsum. Enimvero quatenus exemplo suo docet liberos mensæ simul accumbentes, non esse hau-

hauriendum vinum, nisi quod ea, qua hauritur, quantitate sanitati conducere experti sumus & motivum similiter faciendi instillat; modicus vini haustus respicit liberos, adeoque alios, sed indirecte. Per hanc ideam, quæ animo ingeneratur exemplo dato, acutiores quasi per transennam conspicient justitiam universalem per omnes omnino actiones liberas diffusam, suo loco explicandam distinctius.

§. 1069.

*Justitia
circa quas recte
actiones
versetur.*

Justitia versatur circa actiones alios vel directe, vel indirecte respicientes, seu iusti sumus erga alios. Etenim qui iustus est, bonitatem sapientiæ attemperat (§. 1067.). Quoniam bonitas in pronitate ad aliorum perfectionem promovendam consistit (§. 695.), circa alios versatur, non circa ipsum agentem, consequenter actiones ejus, qui bonus est in alios, cum vel aliorum gratia fiant, vel ad alios tantum una dirigantur, justitia utique non versatur circa actiones nisi quæ vel directe, vel indirecte respiciunt alios (§. 1068.), adeoque erga alios iusti sumus.

Equidem subinde quis injuste erga seipsum quoque agere dicitur: etiam in vernacula nostra dicere solemus, er *handele ungerecht an sich selbst*, consequenter justitia etiam admittenda videtur respectu ipsius agentis, ita ut nihil absurdi insit dictioni, quod iustus sit erga seipsum. Enimvero salvatur dictio non inutili, & in aliis quoque casibus philosophiæ practicæ recepta fictione, qua hominem consideramus tanquam diversum a seipso, quatenus animam quoad facultates superiores spectatam consideramus tanquam ens diversum ab anima quoad facultates inferiores consideratam & cum corpore suppositum constituentem, quemadmodum expressius docebitur suo loco.

§. 1070.

*Summa Dei
justitia.*

Deus est justissimus, ita ut justitiam divinam majorem concipere

cipere non liceat. Deus summe bonus, ita ut bonitatem majorem concipi repugnet (§. 699.). Quoniam vero bonus est erga homines & creaturas suas omnes, quatenus iis bona confert (§. 696.), tantundem autem enti cuicunque boni confert, quantum salva sapientia ipsius fieri potest (§. 698.); bonitatem suam summam sapientiæ attemperat itidem summæ, ut ea majorem concipi repugnet (§. 640.). Quamobrem cum bonitas sapientiæ attemperata sit justitia (§. 1067.), neque adeo justitia major concipi possit, quam si bonitas summa, qua majorem concipi repugnat, attemperetur sapientiæ summæ, qua itidem majorem concipere non datur; Deus est justissimus, ita ut justitiam divina majorem concipere non liceat.

Apparet adeo justitiam ex ceteris attributis divinis probari posse, etiamsi non supponatur Deus homini quicquam debere, aut esse homini aliquod ius, quod a Deo exigere possit, ita ut is eidem ad dandum quidpiam vel faciendum obligetur. Qui justitiam sine istiusmodi jure intelligi non posse tacite sumunt; iis divina justitia sapissime suspecta: unde deinceps nascuntur querelæ, quod improbis omnia cedant ex voto, bonis vero sit male. Istiusmodi autem querelæ prorsus injustæ protinus evanescent, ubi justitiam Dei per sapientiam & bonitatem ejus concipis, quemadmodum omnem tandem justitiam etiam in hominibus concipi debere paulo ante insinuavimus (*not.* §. 1067.). Justitiæ notio cum resolvatur in notionem sapientiæ ac bonitatis, sapientia vero & bonitas divina in perfectionem intellectus ac voluntatis Numinis; Logicæ peritus facile videt, justitiam divinam plene intelligi haud quaquam posse, nisi ab eo, qui probe perspecta habet, quæ de intellectu & voluntate divina a nobis demonstrata fuere, & quæ ex iis de sapientia atque bonitate porro deduximus. Cui enim notionum resolutio perspecta est, is non ignorat, tamdiu notioni alicui obscuritatis quidpiam relinqui, quamdiu notionem, in quas resolvitur, omnes ante clare & distincte perceptas familiares non experimur. Ita enim insunt perceptioni, quatenus confusa est ob limitatam animæ vim, quæ

claritatem causantur, etsi nonnisi resolutione facta ea adesse agnoscamus: in casu autem opposito, vel ex iis quædam deficiunt, unde obscuritas; vel prorsus contraria tacite immiscentur, unde contradictio latens nascitur, non tollenda, nisi distincta notionum analysi. Contradictio illa latens influit in assensum, ut quandam in se repugnantiam ad assentiendum experiatur, qui eam non animadvertit, atque adeo minus recte suspectam reddit notionem veritati consentaneam, propterea quod illa repugnantia a natura intellectus derivatur, atque adeo vitium cognoscentis tribuitur objecto cognoscendo. Quæ modo diximus, non tantum de justitiæ notione tenenda sunt, sed de ceteris omnibus, quæ in alias resolvuntur, nec immediate ab imaginibus abstrahuntur, non suppositis in abstrahendo, nisi quæ in imagine clare percipimus. Qui vero hæc probe perpenderit, is non mirabitur, si vel clarissimæ non sufficienter intelligantur ab aliis, nec evidentissimis assensum præbeant alii: immo nec mirabitur, cur tyrones, antequam notiones præcedentes omnes familiares experiuntur, in systematica tractatione, ubi omnia plana & perspicua sunt, multa tamen non recte intelligant. Unde est, quod ad censendum proniores, quam ad intelligendum in affingendis erroribus luxurientur, cum propriis larvis pugnaturi & in sciamachia victores lauream reportaturi.

§. 1071.

Justitia a-
ctionum
divinarum

Omnes Dei actiones, sive directe, sive indirecte respiciant creaturas, justæ sunt. Etenim Deus justissimus est, ita ut ipsius justitia majorem concipi repugnet (§. 1070.). Enimvero cum justitia versetur circa actiones, quatenus vel directe, vel indirecte respiciunt alios (§. 1069.); actiones justæ sunt, quatenus a justitia proficiuntur, aut, si mavis tales sunt in relatione ad alios, quia agens justus est. Quamobrem patet, omnes Dei actiones justas esse, sive directe, sive indirecte creaturas respiciant.

Ex principio hoc generali haud difficulter deducuntur specialiora, quorum quædam annotare lubet.

§. 1072.

*Quicquid Deus fecit in prima rerum creatione, quicquid Qualem
adhuc facit in earum conservatione & gubernatione; justum & rectum Deus se ge-
est. Creatio (§. 697. Psychol. ration), conservatio (§. 842.) & rat tan-
gubernatio rerum actio divina est (§. 899.). Enimvero actio quam crea-
divina omnis recta est (§. 1059.), & quatenus sive directe, sive tor, conser-
indirecte respicit creaturas, iusta (§. 1071.). Creatio igitur, vator &
conservatio & gubernatio rerum iusta & recta est. Enimvero gubernator
actiones divinæ plures involvunt, seu nostro saltem concipiendi hujus uni-
modo, in plures resolvuntur, quemadmodum ex iis patet, quæ versi.
de creatione, conservatione & gubernatione rerum supra de-
monstravimus. Unde porro conficitur, quicquid Deus in pri-
ma rerum creatione fecit, quicquid hodiernum in conservatio-
ne & gubernatione eorundem facit, id omne rectum ac justum
esse.*

Propositio hæc maximæ utilitatis in praxi morali, modo
sufficienter perspectum fuerit, quid sit rectum, quid sit justum:
vocabula enim non satis intellecta in appetitum minime influ-
unt, influxu a claritate & evidentia pendente.

§. 1073.

Quoniam quicquid *Deus* in prima rerum creatione fecit, *Quod nihil
rectum & justum est (§. 1072.), ipso autem creationis actu, quo nisi quod
mundum hunc adspectabilem produxit, naturæ quoque ordinem rectum &
constituit (§. 765.); nihil fecit in ordine naturæ, quod non sit justum in
rectum atque justum, aut, si mavis quod non recte ac juste fecerit. naturæ or-
dine.*

Pater igitur, qui naturæ ordinem censuræ subjiciunt, vel
ea reprehendere audent, quæ naturæ ordine eveniunt, in

sanctitatem (§. 1065.) & justitiam Dei esse injurios. Quod nobis subinde quædam minus recte, vel minus juste fieri videantur, id vel inde est, quod hæc ipsa non satis a nobis cognoscantur, vel quod rectitudinis ac justitiæ notionem non satis distinctam habeamus. Ad evitandam adeo temeritatem in judicando praxi morali valde nocuam rectitudinis & justitiæ notiones probe expendendæ.

§. 1074.

*Directio
malorum
ad bonum
finem cur
sit justitiæ
divinæ.*

Directio malorum ad bonum finem est justitiæ divinæ. Directio malorum ad bonum finem est bonitatis divinæ (§. 733.), simul tamen a sapientia divina proficiscitur (§. 684.). Quamobrem cum Deus mala ad bonum finem dirigit, bonitatem sapientiæ attemperat. Quoniam itaque justus est, qui bonitatem sapientiæ attemperat (§. 1067.) ; Deus utique justus est, dum mala ad bonum finem dirigit, consequenter malorum ad bonum finem directio est justitiæ divinæ.

Quivis facile admittit, Deum, quia justus est, mala dirigere ad bonum finem, modo ad exempla animum advertat, quale est illud Josephi supra expensum (§. 688.). Ex nostra definitione justitiæ id veluti sua sponte fluit, manifesto indicio, eam a communi significatu non recedere. Probatur enim termini distincte explicati significatum esse usui loquendi conformem, ubi ostenditur, quæ per notionem communem de re prædicantur, ex notione data rite inferri. Ceterum propositione præsentem docemur, ad justitiam divinam agnoscendam prodesse scrutationem directionis malorum ad bonum finem, quæ nullis in justitiam divinam injuriis querelis concedet locum. Sane quicquid de justitia Dei specialius demonstramus, quemadmodum cetera omnia, non alio fine inculcamus, quam ut sint usui per universam praxin moralem. Quantum enim distincta & evidens attributorum & operum divinorum cognitio influat in praxin moralem, suo loco suoque tempore fidem dabimus oculatam.

§. 1075.

§. 1075.

*Justitiæ divinæ est, quod hominem in mala physica & moralia ruere sinat. Cur ejus-
lia ruere sinat. Neque enim repugnat bonitati divinæ, quod ho- dem sit,
minem in mala tam physica, quam moralia ruere sinat (§. 725.), quod homi-
nec sapientia sua salva id impedire potest (§. 726.). Sapientia nem in ma-
igitur bonitatem attemperat, dum eum in mala physica atque la ruere
moralia ruere sinat. Quoniam itaque justus est, dum bonitatem sinat.
sapientia attemperat (§. 1067.) ; ideo juste hominem in mala
physica & moralia ruere sinat, seu, quod perinde est, justitiæ di-
vinæ est, quod hominem in mala physica & moralia ruere sinat.*

Quod si animum advertere lubet ad exempla, quotidie ubivis
obvia, rationes speciales justitiæ divinæ patebunt. Sed nostrum
non est ad ea jam descendere. Sufficit enim tradidisse principia,
quæ notionum directricium munere funguntur.

§. 1076.

*Justitiæ divinæ est permissio mali moralis, seu, Deus malum Permissio
morale juste permittit. Etenim Deus salva sapientia sua summa mali mora-
atque perfectissima mala moralia ex hac rerum serie tollere ne- lis cur sit
quit (§. 676.) & abusum libertatis, quo malum morale irrepit justitiæ di-
in actiones liberas (§. 580.), permittere sapientissime decrevit vine.
(§. 714.), nec hæc permissio bonitati ipsius repugnat (§. 722.).
Patet igitur Deum permittere malum morale, quatenus bonita-
tem sapientia attemperat. Enimvero quatenus bonitatem sapi-
entia attemperat, justus est (§. 1067.). Justus igitur est, dum
malum morale permittit, seu malum morale juste permittit.*

Cum jam sæpe de permissione mali egerimus, & ter-
minus etiam vulgo usitatus sit; neminem puto fore adeo te-
merarium, ne quid gravius dicam, ut inde inferat, nos malas

actiones facere juris permissivi, ita ut Deus homini integrum reliquerit, utrum malum committere, an omittere velit. Superius enim jam ostendimus, malum a Deo esse prohibitum (§. 990.). Permissio igitur mali, de qua hic loquimur, physica est; minime autem moralis, quæ a lege oritur. Magnam inter utramque intercedere differentiam, clarius constabit, ubi in Philosophia practica universalis de jure permissivo acturi sumus. Etenim permissio physica tollit tantummodo coactionem externam, ne quis invitus omittere cogatur, quod vult facere: at moralis, quæ dicitur, homini confert jus aliquid vel committendi, vel omitterendi, & tertium obligat ad non impediendum agentem, qui suo jure utitur.

§. 1077.

*Pœna quid
dicatur.*

Malum physicum ab eo, qui alterum obligandi aliquod jus habet, ob malum morale eidem immissum *Pœna* dicitur.

Notio pœnæ ad philosophiam practicam spectat, & ibidem evolvitur: ubi etiam patebit, cur non modo jus pœnarum competat ei, qui jus quoddam universale alterum obligandi habet, verum etiam cui jus istiusmodi nonnisi particulare in casu quodam dato convenit. Consultius videri poterat eam hic prorsus omitti, nisi de justitia vindicativa quædam tradenda fuissent, ne quæ alii loco reservantur, a nobis negari dicantur. Id autem per se intelligitur, jus exigendi pœnam tam late pateri, quam jus istud obligandi, unde oritur; sed hæc omnia suo loco explicabuntur disertius.

§. 1078.

*Deum homines
punire ob male
facta.*

Deus hominem ob male facta punit. Constat experientia, ex malo morali sequi mala physica, alia quidem necessario, alia contingenter. Quoniam ea consequuntur vi nexus rerum in hoc universo, vi cujus ratio sequentium sufficiens in

in antecedentibus continetur (§. 10. *Cosmol.*), adeoque positis antecedentibus consequentia ponuntur (§. 118. *Ontol.*), nexus vero rerum ab absoluta necessitate liber voluntate Dei liberissima constitutus est (§. 667.); quin Deus velit ex malo morali sequi illa mala physica, quæ quomodocunque inde sequuntur, dubitandum non est. Et quoniam idem nexum rerum sapientia divina constitutus (§. 666.), vi cujus unum fit propter alterum (§. 689. *Psychol. ration.*); quin Deus ideo mali physici participem esse velit eum, qui malum morale commisit, similiter dubitandum non est. Qui malum physicum alteri immittit ob malum morale jure suo alterum obligandi usus, eundem pœna afficit (§. 1077.). Quamobrem cum Deo competat jus obligandi homines ad actiones juxta voluntatem divinam componendas (§. 986.); mala vero physica ob moralia hominibus immittat *per demonstrata*; Deum punire hominem ob male facta patet.

Probe notandum est pœnarum numero esse, quæ insunt rerum nexui. Qui enim justitiam Dei vindicativam negant, hoc minime agnoscunt. Vociferationes illorum, qui per nexum rerum & experientiæ, & rationi satis probatum, & in anterioribus a fatali & absolute necessaria rerum concatenatione, quæ nomine *fati Stoici* vulgo traducitur, satis discrevimus, pœnas omnes tolli clamant, merito contemnendæ, cum contrarium ostenderimus, ex ipso nimirum rerum nexu pœnas a Deo exigi solitas derivantes. Etsi autem ex principiis rationis demonstrari minime possit præter eas pœnas, quæ insunt nexui rerum, aliis etiam locum esse in altera præsertim vita, quæ a morte corporis initium capit, non tamen ideo negantur, cum juxta canonem vulgarem unius positio non sit alterius exclusio. Sane qui prætendit omnia, quorum mentionem facit S. S. ex principiis rationis demonstrari debere; is negare tenetur revelationem rationi impervia superaddere, aut quæ rationi pervia sunt cum iis confundi jubet, quæ sola revelatione innotescunt.

§. 1079.

*Justitia
Dei in pu-
niendo.*

Irrogatio pœnarum est justitiæ divinæ, seu Deus juste punit male facientes. Ex demonstratione propositionis præcedentis patet, pœnas, quibus Deus afficit homines ob male facta, inesse nexui rerum sapientia divina constituto (§. 666.). Enimvero Deus gubernat hoc universum, dum omnia inter se connectit (§. 901.), adeoque quod puniat homines ob male facta (§. 1078.), ad gubernationem hujus universi pertinet. Quamobrem cum justum sit, quicquid Deus in gubernatione hujus universi facit (§. 1072.); juste quoque male facientes punit, seu pœnarum irrogatio justa est.

Qui hebetiores sunt, quam ut de Deo divino, non humano modo cogitare possint, pro pœnis non agnoscunt mala physica, quæ in nexu rerum continentur, consequenter re ipsa omnes pœnas temporales tollunt, etsi ipsimet quid faciant non intelligant. Sed condonanda est *æcelsia* ab impietate remota. Ceterum hic repetenda sunt, quæ supra (not. §. 901.) annotavimus, ubi demonstravimus gubernationem divinam in ipso rerum nexu contineri. Nemo non largitur, pœnarum irrogationem ad gubernationem universi pertinere. Quamobrem si absurdum non est, sed potius attributis divinis conforme, quod in rerum nexu contineatur gubernatio, immo omnis providentia divina; nec absurdum videri debet, quod in eodem nexu pœnæ corporales, tam naturales, quæ ex actionibus necessario consequuntur, quam positivæ, quæ ob circumstantias contingentes inde resultant, etiam contineantur. Quæ vero S. S. de pœnis æternis docet, ea non sunt hujus loci, cum ad ea pertineant, quæ rationi impervia revelatio superaddit Theologiæ naturali.

§. 1080.

*Justitia
vindicti-
va quid sit.*

Justitia vindictiva dicitur, qua pœnæ decernuntur & irrogantur male facientibus.

In-

Ita ad justitiam vindicativam in civitate refertur sanctio pœnalis, quæ legibus prohibitis adjungi solet, ut a delictis pœnarum metu abducantur ad ea committenda proclives.

§. 1081.

Deo competit justitia vindicativa. Etenim Deus punit *Justitia* homines ob malefacta (§. 1078.) & quatenus hoc facit, justum *vindicati-* se probat (§. 1079.), adeoque punit malum, quia justus est. *va Deo* Enimvero pœnas decernere & in delinquentes statutas exequi *competit.* justitiæ vindicativæ est (§. 1080.). Patet itaque Deo conveni-
re justitiam vindicativam.

Vides ergo justitiam Dei vindicativam ex definitione justitiæ, quam dedimus (§. 1067.), fluere, modo demonstrati-
ones in sua principia remota resolvere didiceris, ut adeo va-
nus ac irritus sit eorum conatus, qui ob ἀβελήϊαν, qua labo-
rant, sibi & aliis persuadere conantur per eam tolli justitiam
vindicativam. Discant igitur posthac cautius mercari homines
ἀΦιλόσοφοι, nec sibi judicium sumant de iis, quæ horizontem
ipsorum transcendunt, ne in veritatem fiant injurii, etsi leve
videatur quavis per malitiam injuria afficere philosophos. Sa-
lutaria monita nullibi censenda intempestiva.

§. 1082.

Justitia vindicativa Deum decet. Malum morale Deo *Justitia* placere nequit (§. 588.), adeoque displicet. Enimvero cum *vindicati-* justitia vindicativa, quæ ipsi competit (§. 1081.), male facientibus *va cur* pœnas decernat, easque exequatur (§. 1080.), malum vero mo- *Deum de-* rale, quod actionibus liberis inhæret (§. 374.), in imperfectione *ceat.* accidentali consistat (§. 577.) & perfectioni essentiali contrarie-
tur (§. 578.); ex justitia vindicativa intelligitur, Deum ex actio-
nibus malis tædium percipere (§. 518. *t. sycbl. empir.*), adeoque
malum morale, ob quod eadem malæ dicuntur (§. 374.),
(*Wolffii Theol. Natur.*) Nnn nnn eidem

eidem displicere (§. 542. *Psycbol. empir.*). Manifestat igitur justitia vindicativa mali moralis displicentiam, fini ultimo, quem per existentiam hujus universi intendit (§. 629.), consequenter sapientia, qua gaudet (§. 640.), summæ convenienter (§. 689 *Psycbol. ration.*). Quoniam itaque Deum decet, cujus ratio continetur in iis, quæ ipsi insunt, cur id potius velle debeat, quam aliud (§. 332.); justitiam vindicativam Deum decere patet.

Qui sibi imaginantur, quasi dedeceat Deum justitia vindicativa; eam bonitati divinæ adversam judicant, vel cum cupidine vindictæ vitiosis hominum affectibus debitam inopportune comparant, obliti sapientiæ summæ, ac intellectus & voluntatis summæ perfectionis, unde eam pendere satis superque ex superioribus constat, modo nexum veritatum ex demonstrationibus conspieuum intime perspexeris. Quæ igitur sapientia summa suadet, etsi animum ab eadem non sufficienter intellecta avertenti videantur dura, dura non sunt, nec bonitati summæ quicquam derogant. Lenitas in Principe non laudatur, qui furta & latrocinia impune grassari permittit, ut, qui securitatis gratia in civitatem coiverant, ab aliorum injuriis securi non sint. Defectu sapientiæ censuram incurrit, qua quicquid facit ad finem civitatis dirigere debebat. Mutat bonitas speciem, nisi cum sapientia in concordiam redeat, ut justitiæ locus sit (§. 1067.).

§. 1083.

Convenientia justitiæ tribuenda, quia sanctissimus est. Etenim cum Deum deceat vindicative cum sanctitate Dei. *Justitia vindicativa convenit sanctitati divinæ, seu Deo* (§. 1082.); cur male facientes punire potius velit, quam impunitos relinquere in iis, quæ ipsi insunt, seu in essentia & attributis ejusdem ratio continetur (§. 332. 1080.). Quamobrem cum actio recta sit, quæ rationem sufficientem in essentia & attributis agentis habet (§. 950.); dum Deus punit male facientes justitiæ vindicativæ locum faciens, quod rectum est, facit.

facit. Quamobrem cum sanctissimus sit (§. 1065.), quatenus nunquam facere vult, nisi quod rectum est, nec unquam se a proposito suo dimoveri patitur, ut, quod rectum non est, faciat (§. 1064.) ; iustitia vindicativa ipsi tribuenda, quia sanctissimus est, adeoque sanctitati ejus summæ convenit.

Propositio hæc probe notanda, ut sanctitatem Dei in iustitia vindicativa tremebundi veneremur, quemadmodum suo loco clarins docebitur. Multa adhuc de iustitia vindicativa Dei demonstrari poterant ; sed cum ea pateant per theoriam hujus iustitiæ generalem alibi tradendam, prolixiores jamjam esse nolumus.

§. 1084

Deus maxima fruitur voluptate, quæ maior concipi nequit. Et Summa quæ nulli creaturæ communicari potest, Et quidem perenniter. Et Deus per enim Deus spiritus perfectissimus est (§. 387.), & semetipsum *enniter* cognoscit atque possibilia omnia (§. 141.), tam in se spectata, *fruitur, vobis* quam in certa systemata redacta (§. 155.), & quidem prorsus *di-lupras.* stincte, nihil confuse (§. 156.), ac intuitive (§. 207.), cum veritatibus omnibus universalibus (§. 162.). Omnem adeo perfectionem possibilem, non modo summam sui ipsius, verum etiam rerum ceterarum omnium quarumcunque simul intuetur. Quamobrem cum intuitiva perfectionis cognitio sit voluptas (§. 511. *Psychol. empir.*), & gradus voluptatis pendeat partim a gradu perfectionis (§. 516. *Psychol. empir.*), partim a certitudine cognitionis (§. 517. *Psychol. empir.*) ; Deus fruitur voluptate maxima, quæ major concipi nequit, & quæ creaturæ nulli communicari potest.

Est vero Deus immutabilis (§. 1009.), consequenter & intuitus perfectionis suæ summæ ac reliquæ omnis possibilis perennis est. Unde patet, summam istam, quæ fruitur, voluptatem perennem itidem esse.

Voluptas illa, quæ Deus fruitur, ab ea, cujus nos participes fieri possumus, prorsus diversa est. Hujus enim perceptionem nonnisi confusam habemus, quemadmodum plerarumque qualitatuum sensibilem, ita ut nominali quadam definitione eam explicare nequeamus. Ast in Deo nulla perceptio confusa locum habet, ut adeo voluptas ejus nobis sit prorsus ineffabilis. Quatenus tamen in nobis ex intuitu perfectionis voluptas oritur, & Deo denegari nequit intuitus omnis perfectionis possibilis, præsertim summæ perfectionis, quæ ipsi propria est ac enti nulli communicari potest, quin ei per eminentiam tribuamus voluptatem fieri haudquaquam potest, etsi eandem explicare minime valeamus.

§. 1085.

*Beatitudo
quid sit.*

Beatitudo est non impeditus progressus ad majores indices perfectiones.

Nemo non beatum appellat, qui omni bonorum genere affluit, ita ut bona apparentia cum veris confundentes beatum prædicent, qui multarum opum ac honoris multi sit particeps. Ostendemus suo loco & ex alibi dictis (§. 554. & seqq. *Psychol. empir.*) jam intelligitur, vera bona hominis non consistere nisi in perfectionibus, præsertim animæ, ita ut fortunæ bona, quæ dicuntur, in eorum censum non veniant, nisi quatenus ad perfectiones animæ atque corporis vel consequendas, vel conservandas, vel augendas conducunt. Quamobrem si ex veritate de beatitudine, qualis in hominem cadit, statuendum, eam concipere non licet nisi per progressum minime impeditum ad majores indices perfectiones. Unde Ethica, quæ media præscribere debet ad beatitudinem perveniendi, docet, quomodo animam ac corpus & utriusque gratia statum quoque nostrum externum perficere debeamus, & quomodo eandem operam pro virili etiam aliis præstare queamus. Nulli igitur dubitamus, qui ad notionem beatitudinis usui loquendi non minus, quam veritati consentaneam investigandum diligentiam acumini junctam attulerint, facile nobiscum in ea definienda consensuros.

§. 1086.

§. 1086.

Quoniam beatitudo in non impedito progressu ad ma- *Beatitudi-*
jores indies perfectiones consistit (§. 1085.) ; *Beatitudo tanto nis gradus*
major est, quanto majores sunt perfectiones, ad quas progressus non
impeditur. Et quia ubi duo ad eundem progrediuntur perfe-
ctionis gradum, differentia non contemnenda, si unius progres-
sus minus impeditur, quam alterius ; *Beatitudo quoque ma'or*
dicenda, si progressus ad majores indies perfectiones minus impedi-
tur, quam si magis impeditur : sit ita, quod beatitudini videatur
extrinsecum.

Ex hisce principiis suo loco in philosophia practica univer-
sali deducuntur, quæ de beatitudine humana cognitu necessaria
atque utilia, & in philosophia morali derivabuntur, quæ ad bea-
titudinem consequendam conducunt. Ad ea vero hic animum
adverti oportet, ut beatitudinem summam concipiamus.

§. 1087.

Summa beatitudo consistit in non impedita possessione ac frui- *Summa*
tionem perfectionum absolute summarum. Etenim gradus beatitu- *beatitudo*
dinis tanto sunt majores, quanto majores sunt perfectiones, ad *in quo*
quas non impeditur progressus (§. 1086.). Quamobrem si *consistat.*
quod ens perfectiones possidet absolute summas, quibus majores
conciipi repugnat, non datur ultra progressus, adeoque bea-
tudo cum terminum attigit, quo ulterior non datur. Quoni-
am itaque ulterius progredi non licet, beatitudo in progressu ad
majores perfectiones consistere amplius nequit: quia tamen mi-
nus beatus foret, qui ad minores perfectiones regreditur, necesse
est ut constanter conservetur summa perfectio. Unde liquet
beatitudinem summam, qua scilicet majorem concipi repugnat,
non posse consistere nisi in possessione ac fruitione non impedita
perfectionis summæ.

Nulla difficultas est, quod beatitudo summa videatur mutar genus, cum ea consistat in possessione perfectionis, quæ vero summa non est in progressu ad perfectionem: id enim obtinet in omnibus, quæ enti finito & infinito quasi communia sunt, prædicatis. Sane intellectus finitus facultas est, quia operationes ipsius successive sunt per naturam entis finiti (§. 835. *Ontol.*): alit intellectus absolute maximus, qualis est divinus (§. 169.), actus est, non facultas (§. 163.), quia operationes ipsius simultaneæ sunt (§. 160.) per naturam entis infiniti (§. 838. *Ontol.*). Unde Scholastici dudum annotarunt, Deum non esse in prædicamentis, sed supra prædicamenta, ne confundatur differentia inter ens finitum atque infinitum. Ea autem vis est infinitudinis, ut in prædicatis, quæ ab ente finito ad infinitum salva differentia inter utrumque intercedente transferuntur, mutet genus. Mox clarius hæc patebunt per ea, quæ de modo perveniendi ad notiones perfectionum divinarum docebuntur.

§. 1088.

*Beatissimus
quinam sit.*

ma. Beatissimus dicitur, cui competit beatitudo absolute summa. Quamobrem cum beatitudo absolute summa in non impedita possessione ac fruitione perfectionis absolute summæ consistat (§. 1087.); Qui beatissimus est, perfectionem summam ita possidet atque eadem fruitur, ut in possessione ac fruitione eiusdem nullo modo impediri possit,

§. 1089.

*Summa Dei
beatitudo.*

Deus beatissimus est. Est enim Spiritus perfectissimus (§. 387.), ideoque prorsus immutabilis (§. 1009.), adeoque summam perfectionem ita possidet, ut nihil quicquam eidem unquam decedere possit (§. 291. *Ontol.*). Præterea maxima fruitur voluptate, quam major concipi nequit (§. 1084.), consequenter cum voluptas sit intuitus perfectionis (§. 511. *Psychol. empir.*), ac ideo tanquam ex perfectione proveniens pro fructu ejus re-

de habeatur (§. 956.), beatitudine summa constanter fruitur. Et quoniam nulla re extra se voluptatis percipiendæ gratia indiget (§. 426.), consequenter beatitudine summa fruitur in dependenter ab omni re extra se existente *per demonstrata*, ac præterea independenter ab omni alio ente existit (§. 70.); nihil quoque datur, quod ipsum in possessione ac fruitione perfectionis summæ quomodocunque impedire possit. Enimvero beatissimus est, qui perfectionem summam ita possidet ac eadem ita fruitur, ut neque in possessione, neque in fruitione ejusdem ullo modo impediri queat (§. 1088.). Patet igitur Deum esse beatissimum.

Beatitudinem Dei esse absolute summam, ita ut majorem ea concipi repugnet, ex demonstratione satis patet. Vidimus (§. 1086.) beatitudinis gradus potissimum æstimari ex gradu perfectionis, quæ possidetur; simul tamen rationem haberi libertatis ab impedimentis in progressu ad perfectionem, vel in possessione ac fruitione ejusdem. Perfectio Dei summa est, qua major concipi nequit. Summus adeo esse debet beatitudinis ipsius gradus. Nil quicquam datur, quod Deum in possessione ac fruitione perfectionis suæ quomodocunque turbare possit. Liber igitur est ab omni impedimento, quod beatitudinem aliquo modo diminuere poterat. Quamobrem nec ex hoc capite beatitudine ejusdem major quædam concipi potest. Certissimum igitur est, beatitudine divina majorem concipi haud quaquam posse.

§. 1090.

Beatitudo divina nulli enti finito communicabilis. Cum *Incommu-* enim Deus sit beatissimus (§. 1089.), beatissimus vero sit, cui *nicabilitas* beatitudo absolute summa competit (§. 1088.); Deo compe- *beatitudi-* tit beatitudo absolute summa. Quamobrem cum in possessio- *nis divina.* ne ac fruitione non impedita perfectionis summæ consistat (§. 1087.); non cadere potest in ens, nisi quod perfectionis abso-
lute

lute summæ particeps fieri potest. Enimvero perfectio summa Deo tanquam spiritui perfectissimo (§. 387.) & infinito convenit (§. 1007.). Quamobrem cum enti nulli attributa alterius entis communicari possint (§. 45. *Psychol. ration.*) ; nec enti cuidam finito summa perfectio , qua majorem concipi repugnat , communicari potest. Patet itaque beatitudinem Dei nulli enti finito communicari posse,

Qui prætendunt Deum , cum sit summe bonus , creaturas rationales ejus beatitudinis , qua ipse gaudet , compotes facere debere , nimirum ut ejusdem gradus cum divina sit ipsarum beatitudo ; bonitatem divinam ad impossibilia extendunt. Volunt enim creaturam , ens finitum , converti in infinitum , seu Deificari : quam vero sit absurda Deificatio creaturæ cujusdam satis intelligunt , qui primas philosophiæ primæ notiones de essentiis rerum animo comprehenderunt. Ens finitum converti nequit in infinitum , nec spiritus perfectionum limitatarum in perfectissimum. Ergo nec beatitudo , quæ per essentiam & naturam suam infinito propria , in finitum cadit.

§. 1091.

*Cur ea in
hominem
non cadat.*

Quoniam homo quilibet ens finitum est (§. 837. *Ontol.*) , beatitudo autem divina nulli enti finito communicari potest (§. 1090.) ; nec ea homini ulli communicari potest.

Beatitudo divina a beatitudine humana tanto intervallo distat , quanto summa Dei perfectio ab ea , quæ in hominem cadit , removetur , hoc est , quanto admodum finitum distat ab infinito. Innumeri adeo gradus beatitudinis intermediæ inter divinam & eam , quæ in hac vita in hominem cadit , interjacent , quorum ens finitum particeps fieri potest & quæ nec naturæ humanæ repugnant.

*Similitudo
Dei & ani-
mæ.*

§. 1092.

*Datur quedam similitudo essentialis inter Deum & ani-
mam*

nam, quantam admittit differentia inter ens infinitum & finitum. Enim anima sibi repræsentat hoc universum (§. 62. *Psychol. ration.*), per essentiam (§. 66. *Psychol. ration.*) & naturam suam (§. 67. *Psychol. ration.*), producens continuo ideam totius universi non modo quoad statum præsentem; verum etiam quoad omnes præteritos atque futuros, sed pro diversa dependentia status præsentis a præteritis & futurorum a præsentem continuo diversam (§. 190. *Psychol. ration.*). Et ex hac vi repræsentativa ratio reddi potest ceterorum omnium, quæ de anima observantur (§. 529. *Psychol. ration.*). In Deo itidem continuo existit idea non modo hujus, qui existit mundi, sed ceterorum quoque omnium possibilium (§. 181.), vi cujus Deus sibi non modo repræsentat hoc universum, verum etiam cetera omnia quoad omnes status possibiles (§. 121.). Et hæc ideæ omnium mundorum possibilium Deo essentielles sunt (§. 188.), ac per anteriora patet, ex eo, quod Deus sibi omnes mundos possibiles repræsentare possit derivatam esse rationem ceterorum, quæ ipsi insunt. Patet adeo vim, quæ Deo tanquam substantiæ simplici (§. 83. 1005.) inest, perinde esse universi repræsentativam, quemadmodum ea est, quæ animabus nostris tanquam substantiis simplicibus (§. 48. *Psych. ration.*) inesse deprehenditur. Quamobrem cum substantiæ simplices distinguantur per vires ipsis inexistentes; ideo liquet inter Deum atque animam similitudinem quandam essentialem intercedere.

Enimvero in Deo intuitus ideæ universi illimitatus est, in anima valde limitatus (§. 184), ita ut Deus omnia cognoscat distincte, nihil confuse (§. 156.) & omnia simul (§. 160.); anima vero nonnisi clare ac distincte sibi repræsentet ea, quæ per mutationes in organis sensorii corporis explicari possunt (§. 62. *Psychol. ration.*), consequenter successivæ sunt claræ ac distinctæ perceptiones. Quoniam in ente infinito omnia sunt

(*Wolffii Theol. Naturalis.*)

Ooo ooo

simul

simul, quæ eidem actu inesse possunt (§. 838. *Ontol.*), finitum autem non simul est, quod esse potest (§. 837. *Ontol.*), sitque finitum limitatum (§. 173.), adeoque infinitum illimitatum; ea inter Deum atque animam intercedit similitudo essentialis, quam admittit differentia inter finitum & infinitum.

Qui particularia, quæ in Psychologia rationali de anima traduntur, conferre voluerit ac potuerit cum iis, quæ de Deo demonstrantur in Theologia naturali; is de similitudine essentiali inter Deum & animam intercedente plenius convincetur & quomodo ubivis obtineat differentia, quæ entis finiti ac infiniti est, clarissime perspicier. Constat autem hac collatione, animæ inesse, quæ Deo insunt, infinito ad finitudinem depresso, & Deo inesse, quæ animæ insunt, finito ad infinitudinem elevato. Immo per hoc ipsum intelligent acutiores, cur eorum, quæ Deo insunt, ad finitudinem depressione substantia simplex fiat anima ad unionem cum corpore quodam organico propendens; at elevatione eorum, quæ animabus insunt, ad infinitudinem prodeat substantia simplex, quæ anima esse nequit, infinitudine quemadmodum in ceteris mutante genus. Inde est, quod Deus, quemadmodum superius demonstravimus, anima mundi esse nequeat (§. 159.). Atque ita demum intelligent, qui cum acumine veritatis jungunt amorem, non esse steriles ac inanes trias, quibus tuto carere possumus in philosophia, quæ in Psychologia rationali de anima paradoxa, quia hætenus non expensa, videntur. Faciunt enim tum ad attributa divina clarius intelligenda, tum ad differentiam inter Deum & animam intimius inspicendam. Quamobrem qui in Psychologia rationali probe fuerint versati, ii luce quadam fruuntur in Theologia naturali, qua carent ceteri, quotquot dogmatum Psychologiæ rationalis vel prorsus imperiti sunt, vel ea nondum satis familiaria experiuntur.

§. 1093.

Deus definiri potest per substantiam, quæ omnes mundos
pos-

*Definitio
Dei.*

possibiles sibi maxime distinde atque simul repræsentat. Ex enim Deus omnes mundos possibiles (§. 141.) quoad omnia, quæ ipsis insunt, prorsus distinde (§. 156.) atque simul sibi repræsentat (§. 160.), estque substantia per eminentiam (§. 1005.). Quæ igitur hic sumuntur, veritati consentanea sunt. Constat vero ex anterioribus, ex hac ipsa mundorum possibilium omnium repræsentatione distincta & simultanea rationem reddi tandem ceterorum omnium, quæ ipsi insunt, & acutiores facile perspicient, ex iisdem servato demonstrandi rigore deduci cetera, quæ de Deo a nobis demonstrata fuere. Quamobrem cum definitionem ingredi non debeant, quæ per ea, quæ simul definito insunt, determinantur (§. 730. *Log.*), adeoque rationem sufficientem in iisdem agnoscunt (§. 116. *Ontol.*); quin vis repræsentativa omnium mundorum possibilium, qua iidem distinde prorsus & simul repræsentantur, Deo definiendo sufficiat dubitari nequit, nisi ab eo, qui Logicæ & methodi prorsus imperitus est.

Definitionem hanc Dei in Metaphysica idiomate patrio sub titulo: Vernünftige Gedanken von Gott, der Welt und Seele des Menschen, auch allen Dingen überhaupt, edita proposueramus non alio fine, quam ut similitudinem essentialem inter Deum atque animam intercedentem tanto clarius perspicere liceret, atque adeo via perveniendi ad notiones attributorum divinarum mox monstranda magis clara & accessibilis redderetur. Sed dici non potest, quantam inde calumniandi & criminandi anam desumerit infensissimus quidam scientiæ hostis, qui plusquam Vatiniæ in me odio laborat, quasi per eam omnis religio & naturalis, & christiana everteretur, & impio consilio atheismi fundamentum strueretur. Equidem rident periti imperitiam, damnant probi malum animum, ut adeo istis criminationibus nihil opponi necesse sit; ne tamen per fraudulentiam sibi familiarem novis criminationibus

ansam darem, quasi animum lectoris a periculo dogmatum meorum avertendi studio definitionem istam omitterem, eam conveniente hoc loco apponere visum fuit.

§. 1094.

*Essentia
divina.*

Essentia divina consistit in vi repræsentativa omnium mundorum possibilium distincta prorsus & simultanea. Etenim per demonstrationes anteriores omnes patet, ex repræsentatione omnium mundorum possibilium distincta prorsus, ut nihil confuse perceptum in eadem admittatur, atque simultanea rationem reddi posse ceterorum omnium, quæ de Deo cognoscuntur. Hæc ipsa vero repræsentatio cum sit necessaria (§. 189), necessarii vero oppositum impossibile esse constet (§. 279. *Ontol.*), cur Deo insit rationem nullam habet (§. 56. *Ontol.*), consequenter primum est, quod de Deo concipitur. Enimvero primum, quod de ente aliquo concipitur, & in quo ratio continetur sufficiens, cur cetera vel actu insint, vel inesse possint, est essentia ejus (§. 168. *Ontol.*). Patet itaque essentiam divinam consistere in vi repræsentativa omnium mundorum possibilium prorsus distincta & simultanea.

Quoniam entia per essentiam a se invicem distinguuntur; per hanc ipsam vim repræsentativam mundorum omnium possibilium distinctam prorsus & simultaneam Deus a substantiis ceteris omnibus distinguitur: neque enim præter ipsum datur substantia, cui eadem vis competat. Equidem animabus nostris competit quoque vis repræsentativa universi, & in ea essentia ejusdem consistit (§. 66 *Psyche. ration.*), sed a divina prorsus diversa, quippe quæ materialiter situ corporis organici in universo, formaliter autem constitutione organorum sensoriorum limitatur, cum divina prorsus illimitata sit. Non est quod excipias voluntatem liberam & potentiam creatricem exinde deduci minime posse. Id enim inde est, quod vim istam non intuitive cognoscamus, qualis in se est, sed ejus notionem formemus duce idea vis repræ-

repræsentativæ universi nobis inexistentis. Quamobrem cum necesse sit ejus realitatem a posteriori demonstrari, nimirum per contingentem existentiam hujus universi; mirum sane non est, quod nonnisi supposita hujus universi existentia contingente voluntatem liberam & potentiam creatricem ex illa deducere valeamus, quemadmodum a nobis factum. Si quis cum *Cartesio* Deum per ens perfectissimum definit, existentiam ejus a priori demonstraturus (quod quomodo rite procedat, parte secunda docemus); ex notione summiæ perfectionis potentiam creatricem non deducere potest, nisi supposita contingente hujus mundi existentia, immo nec sine hac supposita libertatem voluntatis divinæ demonstrabit. Potentiam enim creatricem & liberrimam voluntatem esse possibilem nonnisi a posteriori patet. Sermo nobis jam est de eo, quod in potestate est. Neque enim posteris præscribimus limites, ultra quos progredi non debeant, quos nostris intellectis & ulterius progredi posse certi sumus, & progressuros ulterius confidimus. Ceterum non sine ratione propositionem præsentem adjicimus: etenim hoc pacto doctrina psychologica redditur utilior, cum eo, quem mox explicaturi sumus, modo ex ea tota doctrina Theologiæ naturalis derivetur, & Psychologia rationalis atque Theologia naturalis lucem sibi mutuo affundant. Qui terminum essentiae non intelligunt, & omnia attributa divina cum eadem identificari audiunt; essentiam divinam per complexum omnium attributorum explicant, adeoque propositione præsentem facile offenduntur, qua minus de Deo dici videatur, quam debebat. Sed his consulere non licet aliter, nisi ut methodi demonstrativæ leges cognoscant, quibus perspectis nullæ amplius nebulae intellectum obfuscabunt.

§. 1095.

Si notiones distinctas eorum, quæ animæ nostræ per essentiam & naturam ejus insunt, a limitationibus liberemus; notiones habemus perfectionum divinarum, seu attributorum Dei. perfectionem. Etenim inter Deum atque animam datur similitudo quæ num divi-

Ooo ooo 3

datur naturam perveniat.

dam essentialis, quantam admittit differentia inter ens infinitum atque finitum (§. 1092.). Quoniam itaque similitudo in identitate eorum consistit, per quæ entia a se invicem discerni debebant (§. 195. *Ontol.*) & quidem si essentialis sit, similitudinem essentialium & eorum, quæ per ea determinantur, supponit (§. 210. *Ontol.*); necesse est ut, quæ animæ per essentiam & naturam suam insunt, eadem sint cum iis, quæ insunt Deo per essentiam & naturam ipsius, quatenus identitas quædam salva differentia inter ens infinitum atque finitum subsistere potest. Quodsi ergo eorum, quæ animæ nostræ per essentiam atque naturam ipsius insunt, notiones distinctas quæveris; cum determinationes, quæ eas ingrediuntur, a se invicem distinguere (§. 88. *Log.*), immo si terminos quoque noveris, quibus illæ exprimuntur, alteri enumerare valeas, limitationes eorum, quæ animæ nostræ per naturam & essentiam ipsam insunt, perspicies. Quamobrem si inde tollas limitationes omnes, quæ adsunt; prodibunt notiones eandem rerum, quatenus conveniunt enti infinito, consequenter notiones eorum, quæ insunt Deo, atque adeo pater, nos habere notiones attributorum divinatorum, si notiones distinctas eorum, quæ animæ insunt per essentiam & naturam ejus, a limitationibus liberemus.

Deum intuitive non cognoscimus, cum rerum a nobis diversarum cognitio intuitiva ad sensus restringatur & imaginandi facultatem, quæ a sensu pendet (§. 117. *Psychol. empir.*). Deus igitur invisibilis (§. 89.) intuitive a nobis pro præsentē cognoscendi modo cognosci nequit. Cognosci ideo debet per creaturas, quatenus ex iis, quæ ipsi insunt, colligimus, quæ Deo inesse debent, quemadmodum a nobis factum in anterioribus, ubi omnes demonstrationes doctrinæ generali de mundo hoc adspectabili superstruximus. Enimvero si a rebus materialibus ad Deum argumentari volueris, notiones attributorum habere debes: neque enim eæ abstrahi possunt

a rebus, unde fit argumentatio, cum iisdem non insint. Formandæ igitur sunt eo, quem in propositione præsentate insinuavimus, modo. Atque hoc pacto patet cognitionem Dei, qualis iam in nos cadit, nobis esse possibilem propter animæ cum Deo similitudinem essentialem, quam paulo ante evicimus (§. 1092.). Sine si ista similitudine destitueremur, nec cognitionis Numinis capaces essemus. Præsens igitur propositio utilitatis maximæ est, & utilitatem spondet tanto maiorem, quanto accuratior nobis est animæ cognitio. Quamobrem utilissimam operam sumit, qui Psychologiæ tam empiricæ, quam rationali addiscendæ gratia lapidem omnem mover. Sed ne in applicanda propositione præsentate aberremus, exemplo aliquo doceri debet, quomodo rite applicetur. Intellectus noster est facultas res distincta representandi (§. 225. *Psychol. empir.*). Limitatur autem duplici modo tum quoad objectum, tum quoad modum representandi objecta (§. 279. *Psychol. empir.*). Quod enim objectum attinet; nemo non novit, se quædam saltem sibi representare posse, non vero omnia: quod modum representandi concernit, non minus unicuique perspicuum est, se non aliter sibi distincte quid representare posse, quam ut acquiescat in confuse perceptis, & quantum a perceptione prorsus distincta seu adequata absimus, Psychologiæ rationalis peritus intimius perspicit; & plane obvium est, nos nonnisi successive ea, quæ sub cognitionem nostram cadunt, nobis representare valere. Remove igitur limitationes, quæ insunt intellectui nostro. Extende eum ad possibilem omnia quomodocunque spectata, adeoque non tantummodo in se considerata, verum etiam ad se invicem omni possibili modo relata. Arce quicquid confuse percipitur & non admitte nisi distincte representata. Tolle in representando successionem, ut, quæ vi entis intelligentis representari possunt, represententur simul. Cum hoc pacto prodeat representatio prorsus distincta & simultanea omnium possibilium tam in se spectatorum, quam ad se invicem relatorum, facultate representandi in actum purum degenerante; in hoc ipso autem actu consistat intellectus divinus (§. 164.): exemplo hoc clarissime docemur, quomodo per ea,
quo-

quorum nobis sumus conscii de anima nostra, ad notiones eorum, quæ Deo insunt, perveniatur. Cautione tamen non una opus est, ne in applicatione principii heuristici Theologiæ naturalis in antropomorphismum incidas, vel etiam notiones incompletas pro completis amplectaris. Quibus ea satis cognita atque perspecta sunt, quæ de usu facultatum animæ in veritate cognoscenda in Logica, de notionibus entis qua talis vere directricibus in omni veritatum investigatione in Ontologia & de anima ejusque affectionibus in Psychologia utraque docuimus; is facile sibi cavebit, ne a vera via aberret. Qui vero inopportune per se sapere volunt, cum per alios sapere debeant, intempestive sese inventorum numero ingerentes; ii sibi imputent, si quod audent ex voto minime cedat, & alii eorum temeritatem accusent, non principium heuristicum damnent, quo vel inscii utuntur ipsimet. Ceterum qui ad hætenus dicta animum advertit, abunde perspiciet utilitatem definitionis Dei paulo ante datæ (§. 1093.), vi præsentis propositionis juxta definitionem animæ nostræ essentialem factæ (§. 66 *Psychol. ration.*), quippe cum per eam Psychologia rationalis ad singularem usum, qui merito maximi habendus, reducat, alias non facile a quovis observandum.

§. 1096.

*Sensus Deo
per eminentiam
tribuendi.*

Deo tribui possunt sensus per eminentiam. Deus sensu caret (§. 157.), adeoque eo modo tribui ipsi nequit sensus ullus, quo nobis insunt. Ibi vero, ubi res omnes Deo per eminentiam præsentibus evicimus (§. 1053.), jam ostendimus, Deum per eminentiam sensu percipere omnia præsentia in toto hoc universo. Patet igitur eidem per eminentiam sensus tribui posse.

Quænam Deo per eminentiam tribuantur, hic loci doceri debet, ne principio illo heuristico investigandi notiones eorum, quæ Deo tribui debent, abutamur & ejus abusu in Anthropomorphitarum & Anthropomorphistarum errores incidamus, de quibus apertius dicemus in parte secunda.

§. 1097.

§. 1097.

Quoniam visus & auditus sunt in numero sensuum (§. 68. *Psybol. empir.*), sensus vero tribui Deo possunt per eminentiam (§. 1096.); ipsi etiam *visus & auditus per eminentiam tribui possunt.*

Visus & auditus per eminentiam Deo inexistens.

Hinc etiam Deo per eminentiam, sed hieroglyphico quodam sensu tribui possunt organa sensoria, veluti oculus & auris. Nimirum sensus, quatenus facultas animæ est (§. 67. *Psychol. empir.*), Deo similitudinem quandam essentialem cum anima habenti (§. 1092.) per eminentiam inest sensus (§. 1096.). Sed cum nullum possibile sit corpus, cui tanquam anima uni-ri possit (§. 148.), nec organis sensoriis habet opus, neque adeo sensoria organa ipsi tribui possunt, ne per eminentiam quidem. Restat igitur, ut ipsi tribuantur hieroglyphico quodam sensu, qui in sensuum per eminentiam inexistentiæ fundamentum habet (§. 151. *Psychol. empir.*). Quid vero denotent sensus, ac in specie visus & auditus, per eminentiam ita dictus, quid organa sensoria, veluti oculus & auris, in significato hieroglyphico de sensu per eminentiam accepto usurpata; ex hisce facile perspicitur, & exemplo supra (not. §. 91.) allato illustratur. Conferenda hic sunt, quæ de metaphorico Deo in S. S. attributorum membrorum corporis humani significato evicimus (§. 103.).

§. 1098.

Deo per eminentiam inest imaginatio. Caret Deus imaginatione (§. 157.), atque adeo sensu proprio eidem tribui nequit. Enimvero imaginatio facultas est producendi perceptiones rerum sensibilibum absentium (§. 92. *Psybol. empir.*), ad- eoque sibi repræsentandi præterita non modo atque futura (§. 228.), verum etiam ea, quæ cum possibile sint, nunquam tamen existunt. Jam constat Deum sibi repræsentare omnia possibile tum absolute spectata, tum in systemata redacta (§. *Wolfs Theol. Natur.*)

Imaginatio per eminentiam Deo tribuitur.

PPP PPP

155.)

155.), distincte prorsus (§. 156.) atque simul (§. 160.), eaque intuitive cognoscere (§. 207.), ipsa vi intellectus (§. 164.). Et in ea rerum serie, qua continentur ea, quæ ad actum perducenda, seu certo quodam tempore existentia, præterita tanquam præterita sibi repræsentat per dependentiam præsentium, quæ a ceteris eidem seriei inexistentibus per concursum suum distinguit (§. 939.), a præteritis & futura tanquam futura per dependentiam eorundem a præsentibus (§. 940.). Vis igitur repræsentativa mundorum omnium possibilium Deo essentialis (§. 1094.), & potentia conservatrix, qua ad omnes creaturarum actiones concurrir (§. 874.), supplet vicem imaginationis illimitatæ, si talem fingere licet. Quamobrem cum per eminentiam dicatur inesse quod proprie loquendo non inest, ejus tamen loco enti inest aliud, quod vicem ejus supplet, quod proprie eidem repugnat (§. 845. *Ontol.*); quin Deo per eminentiam insit imaginatio dubitari nequit.

Phantasmata, quæ vi imaginationis ab hominibus finguntur, sed cum contradictionem involvant distincte intellectu, existere nequeunt, imperfectioni facultatis cognoscendi, quæ animæ humanæ competit, tribuenda sunt, consequenter a Deo ab omni errore prorsus immuni (§. 294.) removenda sunt. Et absolum foret quærere, num facultas fingendi Deo per eminentiam insit. Quatenus tamen omnia impossibilia cognoscit (§. 307.) atque novit, quamnam eorum ens unumquodque finitum intelligens pro possibilibus amplectatur (§. 309.), neque ipsum fugiant omnes errores, qui ab intellectu finito admitti possunt (§. 310.); istiusmodi phantasmata tanquam aberrationes in ideis rerum intelligentium finitorum perspicit, non vero per se insunt intellectui divino.

§. 1099.

Memoria Deo competit memoria per eminentiam. Memoria consistit in facultate ideas reproductas recognoscendi (§. 175. *Psych.*)
per eminentiam

Psychol. empir.), adeoque cum vi imaginationis reproducantur *Deo tribuenda.* (§. 92. *Psychol. empir.*), imaginationem supponit, nec sine ea in ente aliquo datur. Quamobrem cum Deus imaginatione careat (§. 157.), nec memoria ipsi proprie loquendo, hoc est, eo sensu, quo nobis tribuitur, tribui potest. Enimvero constat Deum integram rerum seriem; quæ actum consequuntur, sibi simul repræsentare (§. 155. 160.), & in ea præsentia a ceteris per concursum suum distinguere (§. 939.), præterita autem tanquam præterita sibi repræsentare per dependentiam præsentium ab iisdem (§. 940.). Quoniam itaque vi memoriæ res per ideas reproductas repræsentatæ tanquam præteritæ agnoscuntur (§. 175. *Psychol. empir.*) ; vis repræsentativa hujus universi simultanea atque distincta Deo essentialis (§. 1092.) & potentia conservatrix, qua ad actiones creaturarum concurrit (§. 874.), memoriæ vicem supplet. Memoria igitur Deo per eminentiam tribuenda (§. 845. *Ontol.*).

Recte igitur Deo tribuitur memoria omnium præteritorum perfectissima : etenim non modo præterita omnia sibi repræsentat, ita ut ipsi continuo idealiter præsentia sint eorundemque sibi optime conscius est, ita ut nihil effugiat conspectum ipsius; verum etiam novit, quod aliquando fuerint præsentia. Quoniam magnitudo memoriæ æstimatur ex numero rerum, quarum ideas reproducere & reproductas recognoscere valemus, tum diverso tempore sigillatim perceptarum, tum eodem tempore in continua serie simul perceptarum (§. 194. *Psychol. empir.*); memoria autem, quæ Deo per eminentiam tribuitur, ad omnia præterita simul extenditur : memoria divina majorem concipi minime posse patet. Est adeo absolute maxima.

§. 1100.

Oblivio rei nullius in Deum cadit. Deus omnia possibili- *Oblivio cur*
lia sive absolute spectata , sive in systemata redacta sibi repræ- *in Deum*
sentat non cadat.
P p p p p p a

sentat (§. 155.), distincte (§. 156.) atque simul (§. 160.) & quidem intuitive (§. 207.) & omnia præterita a præsentibus continuo distinguit (§. 940.). Quoniam oblivio consistit in impotentia ideas reproductas, consequenter res per eas repræsentatas recognoscendi (§. 215. *Psychol. empir.*) ; facile patet eam Deo prorsus repugnare, consequenter nullius prorsus rei oblivio in eundem cadit.

Mirum videri non debet, oblivionem non perinde ac memoriam Deo per eminentiam tribui posse : quæ enim Deo per eminentiam tribuuntur, ea ipsi non repugnant simpliciter, sed tantummodo quatenus quid imperfectionis admixtum habent. Ast quæ ab imperfectione aliqua tota pendent, quemadmodum oblivio, ea Deo nullatenus tribui possunt ; sed simpliciter repugnant.

§. 1101.

*Appetitus
sensitivus
cur Deo
nullo modo
convenire
queat.*

Deo appetitus sensitivus nullo modo convenire potest. Appetitus sensitivus oritur ex repræsentatione boni confusa (§. 580. *Psychol. empir.*). Enimvero Deus omnia cognoscit distincte, nihil prorsus confuse (§. 156.). Quamobrem appetitus sensitivus proprie loquendo ipsi convenire nequit. Sed ex distincta boni repræsentatione nascitur appetitus rationalis, sive voluntas (§. 880. *Psychol. empir.*), adeoque appetitus sensitivus nonnisi imperfecta quædam voluntatis species est. Quoniam itaque Deo competit voluntas absolute perfectissima (§. 386.), non alio quodam opus est, quod vicem appetitus sensitivi in eodem suppleat, consequenter appetitus sensitivus in Deo nec per eminentiam datur (§. 845. *Ontol.*). Nullo igitur modo eidem convenire potest.

Repetenda hic sunt, quæ modo de oblivione annotavimus, ad appetitum sensitivum mutatis mutandis applicanda.

§. 1102.

§. 1102.

Deo averfatio fenfitiva nullo modo convenire poteft. Aver- *Cur nec*
fatio fenfitiva oritur ex repræfentatione mali confufa (§. 582. *averfatio*
Psychol. empir.). Quoniam itaque Deus omnia diftincte, nihil *fenfitiva.*
confufe cognofcit (§. 156.); averfatio fenfitiva in fenfu proprio
eidem convenire nequit. Et quia ex diftincta mali repræfen-
tatione voluntas oritur (§. 881. *Psychol. empir.*) ; nec alio quo-
dam opus eft, quod averfationis fenfitivæ vicem fuppleat. Quam-
obrem nec averfatio fenfitiva per eminentiam Deo convenire
poteft (§. 845. *Ontol.*). Convenit igitur nullo prorfus modo.

Noluntatem in fpecie Deo convenire non demonftravimus,
propterea quod cum fumme perfectâ voluntate connectatur,
quæ cum ad optimum tendat (§. 383.), omnis mali averfionem
infert. Sane ea de caufa vulgo actus nolitionis ad voluntatem
fimul refertur, etfi nobis confultius vifum ab appetitu averfa-
tionem, a voluntate voluntatem diftingui.

§. - 1103.

Deus affectibus caret. Affectus funt actus vehementiores *Cur affecti-*
appetitus fenfitivi, & averfationis fenfitivæ (§. 603. *Psychol. empir.*). *bus careat*
Enimvero Deus caret appetitu fenfitivo (§. 1101.) ; caret etiam *Deus.*
averfatione fenfitiva (§. 1102.). Ergo etiam caret affectibus.

Idem etiam oftenditur hoc modo. Affectus ex confufa
boni & mali repræfentatione oriuntur (§. 605. *Psychol. empir.*).
Enimvero cum Deus omnia diftincte, nihil confufe cognofcat
(§. 156.) ; nec boni malique repræfentatio confufa in eodem
locum habet. Quamobrem nec ulli affectuum locus efle poteft,
adeoque affectibus caret.

Facile patet, affectus omnes in fpecie de Deo negandos

PPP PPP 3

efle,

esse, quæcunque demum nomine veniant, nempe ut Deo repugnare censeantur ea specie, quam in hominibus habent. Cum in corpore sanguis ac fluidum nerveum motu extraordinario agitur, quando anima affectibus commovetur (§. 611. *Psychol. empir.*), & cum hisce motibus harmonica mutatio in anima respondeat (§. 511. & seqq. *Psychol. ration.*); in affectibus animæ mutatio quædam inest, quæ a corpore pendet, seu per motus in eodem contingentes explicabilis. Huius mutationis nobis consci sumus, sed nonnisi confuse perceptæ, dum passionem animæ percipimus. Immo hæc ipsa mutatio est proprie id, quod affectus seu passionis animi nomine insignimus. At hanc in Deum cadere non posse, nulli corpori per modum animæ uniendum (§. 158.), nemo non videt. Hinc D. Thomas: Actus, inquit, voluntatis, ut habent mutationem ex parte corporis, non ponuntur in Deo: quo ipso appetitus sensitivus cum passionibus animæ seu affectibus, quales, dantur in nobis, a Deo remouentur,

§. 1104.

*Affectus
Deo per
eminenti-
am tribu-
endi.*

Affectus Deo insunt per eminentiam. Quoniam Deus affectibus caret (§. 1103.); eo quoque sensu iidem tribui nequeant, quo eos nobis inesse deprehendimus. Deus omne bonum & malum distincte cognoscit (§. 156.), & voluntas ipsius tendit ad id, quod tam in se (§. 383.), quam in relatione ad seipsum optimum est (§. 385.), malum vero morale velle nequit (§. 581.), nec id ipsi placere potest (§. 588.). Quoniam itaque affectus ex confusa boni & mali representatione oriuntur (§. 605. *Psychol. empir.*) & in actibus vehementioribus appetitus sensitivi & aversionis sensitivæ consistunt (§. 603. *Psychol. empir.*); Deo utique conveniunt actus volitionis ac nolitionis ex distincta boni & mali representatione, qui eodem tendunt, quo tendunt affectus, sed cum Dei actiones æternæ nonnisi rectæ sint (§. 1059.), quatenus non tendunt nisi ad id, quod rectum est. Actus adeo voluntatis divinæ suppleant vicem affectuum.

ctuum, consequenter affectus Deo insunt per eminentiam (§. 845. *Ontol.*).

Patet hinc, quomodo explicandi sint affectus, quando de Deo usurpantur. E. gr. Deo tribuitur amor, quatenus is concipitur velle felicitatem creaturarum intelligentium, cum amor denotet dispositionem animi ad voluptatem ex alterius felicitate percipiendam (§. 633. *Psychol. empir.*) & eodem impellitur amans ad voluptatem amanti creandam, ac tedium ab eo avertendum (§. 652. *Psychol. empir.*). Dei singulis adeo affectibus, quorum theoriam tradidimus in *Psychologia empirica* integro capite (§. 603. & seqq.) demonstrari poterat, quomodo per eminentiam insint Deo: id quod imprimis usui esse poterat in interpretanda S. S. in qua affectus Deo tribuuntur, utique non eo sensu, quo nobis insunt; sed per eminentiam. Enimvero cum specialia nonnulla tradituri simus in parte altera *Theologiæ naturalis*; hanc quoque explicationem eo differimus. Ceterum quemadmodum in anthropomorphismum incidunt, qui Deo affectus tribuunt, quales in se observant, Deum imaginantes quoad facultates inferiores sibi similem; ita ex adverso ab uno extremo in alterum delabuntur, qui nec per eminentiam affectus Deo tribuunt: unde inferunt, quæ ab errore noxio non distant. Atque adeo intelligitur, quam sit necessaria cognitio entis per eminentiam notio, & quod perperam inter steriles nugæ & inanes tricas ab iis referatur, quibus solenne est contemnere ac traducere, quæ non intelligunt. Sane citra notionem entis per eminentiam, quam in *philosophia prima* explicavimus (§. 845. *Ont.*), non satis distincte intelligitur, quomodo Deo quædam citra errorem tribui possit, quæ eidem non convenire deprehenduntur: id quod imprimis usui est in interpretanda S. S. ubi multa Deo tribuuntur, quæ non nisi per eminentiam eidem insunt, nec bene consulitur auctoritati ejus, si ad caprum vulgi humano more de Deo loqui dicatur.

§. 1105.

*Præsentia
localis per
eminenti-
am Deo tri-
buenda.*

*Præsentia localis per eminentiam Deo tribuenda, seu De-
us localiter præsens est, aut in loco præsens est per eminentiam.*
Cum Deus localiter præsens esse nequeat (§. 1042.); nec pro-
prie loquendo, hoc est, eo sensu, quo corporibus tribuitur (§.
1043.), præsentia localis seu existentia in loco eidem tribui po-
test. Enimvero Deus totus præsens est singulis corporibus (§.
1048.) in loco existentibus (§. 1033.). Quamobrem cum cor-
pus totum sit in eo loco, in quo existit, ac ideo in eodem loco
præsens dicatur; quia locum istum substantia sua implet (§. 1039.);
patet præsentiam divinam, qua totus præsens est corpori cuicun-
que in loco existenti, supplere vicem præsentia localis, cum pe-
rinde sit ac si in isto loco existeret (§. 1037.). Patet itaque De-
um per eminentiam localiter præsentem esse (§. 843. *Ontol.*),
adeoque præsentiam localem per eminentiam Deo tribui posse.

Atque ita clarissime intelligitur; præsentiam divinam ut in
loco, ceu loquitur *D. Thomas*, esse præsentiam localem per emi-
nentiam. Quæcunque igitur a præsentia locali corporum
pendent, ea quoque ob præsentiam localem per eminentiam
Deo tribuuntur, veluti quod videat omnia, quæ in loco isto
contingunt, & quod agat in ea, quæ in eodem existunt.

§. 1106.

*Dependen-
tia mundi
ab uno Deo.*

*Unus est Deus creator, conservator & gubernator uni-
versi.* Ex demonstrationibus anterioribus patet, mundum
a Deo uno pendere quoad creationem, conservationem ac gu-
bernationem. Quamobrem cum plures dii præter rationem
admitterentur, uno mundi creationi, conservationi ac guber-
nationi sufficiente; unus tantummodo Deus est creator, con-
servator & gubernator universi.

Idem

Idem etiam ostenditur hoc modo. Mundus, qui existit, ens unum est (§. 60. *Cosmol.*) & totum aliquod (§. 61. *Cosmol.*), ac ideo vi demonstrationum anteriorum rationem sufficientem, quam in seipso minime habet (§. 90. *Cosmol.*), in uno ente a se, cui intellectus prorsus illimitatus & potentia creatrix ac illimitata competit, rationem actualitatis sive existentiae suæ sufficientem agnoscit. Quamobrem cum non admittatur Deus, nisi quatenus admittitur ens a se, in quo sufficiens ratio existentiae contingentis hujus universi continetur (§. 67.); unus quoque tantummodo datur Deus. Hic vero ipse Deus mundum creavit (§. 760.), conservat (§. 847.) atque gubernat (§. 900.). Unus igitur est Deus, creator, conservator & gubernator hujus universi,

Per Deum non intelligimus nisi ens a se, quod mundum hunc creavit, adhuc conservat atque gubernat. Ea communis omnibus Dei notio est, nec qui quærent, an sit Deus, nec qui affirmant dari Deum, aliud ens intelligunt. Et qui demonstrat, dari ens a se, quod mundum hunc, qui a se esse nequit, potentia sua ad actum perduxit, ac hodiernum conservat atque gubernat, omnium judicio Dei existentiam demonstrasse censeretur. Quamobrem cum per omnes Theologiæ naturalis demonstrationes liquido constet, unum tantummodo esse ens, a quo mundus creatus fuit, ac hodiernum conservatur & gubernatur; hoc ipso unitatem Dei evictam esse negari haudquaquam potest. Quodsi ponas entia plura Deo creatori, conservatori ac gubernatori hujus universi similia, sed a quibus quoad essentiam & existentiam nullatenus dependeat hoc universum, nullatenus debeant omnia, quæ in eodem sunt: non modo sumis, quod probare minime potest, sola mentis fictione, cum nulla adsit ratio sufficiens, cur eorum existentia admittatur; verum etiam quod absque omni utilitate fingitur, cum istiusmodi ens, a quo mundus hic nullatenus dependet, ad nos minime pertineat. Enimvero ne quis in fictione inutili sibi reperisse videatur

)Wolffi Theol. Natur.)

Qqq qqq

non

non quod pueri in faba, propositionem sequentem addere lubet.

§. 1107.

Cur Deus

fit unus.

Præter Deum unum mundi creatorem, conservatorem & gubernatorem non datur alius Deus. Est enim Deus spiritus perfectissimus (§. 387.) & qui ipsi competit intellectus (§. 166.), quæ voluntas (§. 388.), quæ potentia, nullo modo limitatur (§. 354.), unde & cetera ipsius attributa, veluti sapientia (§. 640.) & bonitas (§. 699.), eo gradu ipsi tribuuntur, quo major concipi non potest. Quodsi ergo alius adhuc poneretur Deus, unus non differet ab altero. Cum igitur inter plures Deos nulla concipi possit differentia specifica, unus nonnisi Deus possibilis (§. 181. *Ontol.*). Est vero Deus ensa se (§. 67.) consequenter ideo existit, quia possibilis (§. 34.). Unus adeo tantummodo Deus existit, adeoque præter unum istum Deum mundi creatorem, conservatorem & gubernatorem (§. 1106.) non datur alius, qui sit Deus.

Hoc argumento ad unitatem Dei probandam jam usus est D. Thomas, & notionum ontologicarum gnari robur ejus perspiciunt. Ne tamen in re tanti momenti, qualis præsens propositio est, quæ præter Deum, quem nos veneramus, mundi creatorem, conservatorem & gubernatorem non dari alium, qui sit Deus, pronunciat, quicquam lucis desit; unum alterumque illustrationis gratia addere lubet. Si res in statu puræ possibilitatis considerantur, non admittuntur tantumquam plura, nisi quæ differunt: alias enim idem bis tantummodo poneretur, quod an fieri possit, demum quæritur, ubi de existentia quæstio incidit. Ita in serie numerorum non admittitur nisi unus binarius, cum inter duos binarios nulla intercedat differentia, & in serie naturali, quæ tantummodo omnes numeros posibles exhibet, nulla datur ratio, cur binarius vel alius quicunque numerus bis poni debeat. Jam ei, quod possibile, existentia non repugnat (§. 133. *Ontol.*); ut vero existat, ratio sufficiens detur necesse est, cur existat potius

rius, quam non (§. 70. *Ontol.*) Quodsi jam ens ideo existit, quia possibile, quemadmodum de ente a se ostendimus (§. 34), consequenter de Deo (§. 67.), & unum tantummodo istiusmodi ens possibile concipitur, quemadmodum spiritus perfectissimus, qui est Deus (§. 387.), cur unum existat ratio sufficiens datur, utpote in possibilitate ipsius contenta: sed nulla datur, immo dari nequit ratio sufficiens, cur idem ens bis ponatur, propterea quod eadem intrinseca esse debet. Et hoc modo impossibile est, ut spiritus perfectissimus in serie entium actualium bis ponatur, quemadmodum binarius in aliqua numerorum serie, ubi ratio cur actu ponatur non in ipso binario, sed extra ipsum datur, consequenter per essentiam binarii non repugnat, ut in serie aliqua bis poni possit. Cum vero entia contingenter existentia rationem existentiae suæ non habeant in seipso, sed extra se in alio (§. 310. *Ontol.*); per se non implicat ens idem in singulari poni bis, sed ne bis ponatur sapientiæ divinæ repugnat. Unde jam patet, *principium indiscernibilem*, quod excludit existentiam duorum individuorum similium, per omnem rerum actualium seriem regnare, ita ut Deus, cui tanquam causæ primæ substant omnia, non habeat sui similem per ipsam essentiam suam; cetera vero non agnoscant sui similia individua seu in singulari per voluntatem ipsius, quæ summa sapientia regitur. Ceterum hinc intelligitur, quomodo principium rationis sufficientis influat in demonstrationem unitatis divinæ, ita ut absque eo firmiter non demonstretur, nonnisi unum existere Deum, ac impossibile esse ut plures existant; quemadmodum ex demonstratione propositionis præcedentis liquet, quomodo una cum principio rationis sufficientis nexus rerum in hoc universo influat in demonstrationem, qua evincitur, nonnisi unum Deum esse creatorem, conservatorem ac gubernatorem hujus universi.

§. 1108.

*Vita Dei consistit in continuo intellectu ac voluntatis actu. Vita Dei Deus est spiritus (§. 124.). Quamobrem cum spiritus intel- in quo cons-
tu situr.*

Qqq qqq 2

ctu & voluntate libera gaudeat (§. 643. *Psycbol. ration.*), adeoque actuosus fit, quatenus actu intelligit atque vult (§. 108.); Deus quoque actuosus est, quatenus intelligit & vult. Enimvero intellectus divinus (§. 163.), perinde ac voluntas actus est, non facultas (§. 356.), isque unicuique (§. 160. 355.), æternus (§. 319.) atque immutabilis (§. 190. 368.). In unico igitur, æterno & immutabili, ideoque continuo intellectus & voluntatis actu (§. 554. *Ontol.*) actuositas ejus consistit. Quamobrem cum vita entis cuiuscunque in continua actuositate ejusdem consistat (§. 108.); vitam Dei in continuo intellectus & voluntatis actu consistit.

Deus nimirum spiritus vitam spiritus vivit, & spiritus infinitus vitam infiniti vivit spiritus. *Cartesiani* actum intellectus & voluntatis communi nomine cogitationem appellant, ac ideo vitam Dei in cogitatione consistere affirmant, consentientes in re, etsi in verbis dissentire videantur. Actiones Dei ad extra, quales sunt creatio, conservatio & gubernatio hujus universi, sunt Dei vivi, sed non vita ipsa in actu omnipotentiae extra se operantis consistit; cum enim liberrime mundum aliquem produxerit (§. 431.), adeoque nullum producere potuisset, si libuisset (§. 430.); non minus vivus fuisset, quam ubi mundum creavit creaturamque conservat ac gubernat. Ceterum dum actum voluntatis & intellectus divinum continuum appellamus, notionem continuitatis proprie nonnisi in composito locum habentis per analogiam ad illum transfertur, quemadmodum fert usus loquendi.

§. 1109.

Depend- *Creaturae viventes omnes vitam a Deo habent.* Etenim
tia vitæ creatura nulla seipsam conservare potest, sed a Deo conser-
creatura vetur necesse est (§. 843.), adeoque etiam viventes a Deo con-
rum a Deo. servantur. Jam cum creatura nulla sine conservatione di-
vina

viam quicquam agere possit (§. 870.) & ad singulas ejus actiones per eorum conservationem concurrens (§. 874.) vires agendi eis largiatur (§. 876.); viventes quoque vires, quas habent, agendi a Deo habent, consequenter cum vivum sit, quod vi activa præditum (§. 107.) & in continua actuositate, qua vi intrinseca in vivente actuantur, quæ per essentiam in eodem possibili, vita consistat (§. 108.), quin creaturæ viventes omnes vitam a Deo habeant dubitari nequit.

Hæc propositio usui est in philosophia practica, ubi agitur de jure hominis in vitam suam & aliorum. Patet autem ex demonstratione, hominem non vivere nisi dependenter a Deo ipsiusque vita, modo eandem in sua principia resolvere noveris. Vita igitur creaturæ nulla est sine vita Dei, etsi Deus vivat independenter a re omni alia (§. 113.). Unde patet differentia vitæ creaturarum a vita Dei: hæc enim prorsus independens est, illa autem tota dependens.

§. 110.

Juxta S. S. Deus prorsus immutabilis. Emphaticus est *Consensus* locus *Jac. I. 17.* quo idem asseritur. Etenim, Apostolus ait, apud *S. S. quoad* Deum, quem Patrem luminum vocat, non esse transmutatio- *immutabi-* nem, nec vicissitudinis obumbrationem. Ex contextu liquet, *litem.* Apostolum inculcare, quod boni agendi vires homo accipiat a Deo, qui quicquid bonum ac perfectum dare debeat. Et ut Deum boni constantem datorem agnoscamus, addit, quod nulla transmutatio, immo ne quidem quod umbram alicujus vicissitudinis referre possit, penes Deum locum habeat. Cum Deum Patrem luminum vocet, facile colligitur, hoc ipso nos moneri, ne, quæ de immutabilitate Dei dicuntur, ad solam voluntatem; verum etiam ad intellectum referamus. Et quia de datione boni sermo est, ad potentiam quoque extendenda sunt. Ne vero quis existimet, ex accidente fieri posse, ut quædam

mutatio accidat; emphatice admodum affirmat, ne umbram quidem vicissitudinis penes Deum locum habere. Arque adeo patet, Apostolum docere Deum prorsus immutabilem esse, ita ut nihil in eo concipi possit, quod non semper sit idem.

Quod si quis demonstrationem pleniorē immutabilitatis divinæ, quam supra dedimus (§. 1009.), perpenderit; is perspiciet, Apostolum eodem modo omnimodam Dei immutabilitatem probare, quo eandem evicimus. Unde demonstratio ista verbis Apostoli lucem affundit, quatenus attentionem excitat, ne quid facile eidem sese subducatur, quod in contextu latet.

§. III.

Consensus S. S. quoad negationem existentie in tempore. Deus juxta S. S. non est in tempore. Juxta Jacobum loc. cit. penes Deum nulla est vicissitudinalis obumbratio, hoc est, nihil in Deo datur, quod vel minimam vicissitudinis, adeoque successionis (§. 569. *Ontol.*) speciem mentiatur, quemadmodum umbra quoad terminos suos assimilatur corpori, a quo projicitur. Quamobrem cum tempori locus non sit absque existentibus successivis in continua serie (§. 574. *Ontol.*); juxta Jacobum nullum in Deo locum habet tempus, immo ne quidem habere videtur, consequenter Deus in tempore non est.

Hinc & nullum quoad Deum temporis discrimen est. Ita *Psalms*. XC. 4. mille anni ante oculos Dei dicuntur esse tanquam dies hesternæ, quæ præterit. Et *Petrus*. Ep. II. c. I. 3. affirmat, unum diem apud Dominum esse sicut mille annos & mille annos sicut diem, ut adeo quoad Deum inter diem & annum & annos mille nulla intercedat differentia.

§. IIII.

Consensus S. S. quoad num. identitatis. Deus juxta S. S. semper idem manet ab æterno in æternum. Disertis verbis hoc docetur *Psalms*. CII. 27. Etenim de coelis & terra, hoc est, phrasi Hebræorum, de toto mundo dicitur;

citur, quod periturus sit, quod Deus mutaturus sit eundem: *sem eorum* est de ipso Deo ex adverso asseveratur, quod permaneat, quod *quæ Deo* idem ipse sit, nec anni ejus unquam finiantur. Ex oppositio-*insunt, cou-* ne Dei ac mundi clarissime elucet, ex mente Scriptoris sacri, *stantem.* Deum semper esse eundem & quidem ab æterno in æternum, quemadmodum evicimus supra (§. 1013.), ita ut probatione non sit opus.

§. 1113..

Deo juxta S. S. tribuenda omnipræsentia, quæ locali per Consensus eminentiam respondet, ita ut in loco quidem non sit proprie lo- *S. S. quoad* quendo, sit tamen ut in loco. Deus Actor. XVII. 27. *ἐμπαν* omnipræ- non procul esse dicitur ab unoquoque nostrum, idque ex eo *sentiam.* probatur *vers.* 28. quod in eo vivamus, moveamur & simus, seu *Dei.* ut ante legitur *vers.* 25. quod omnibus det vitam, inspiratio- nem & omnia. Uberius explicata hæc leguntur *Psal.* CXXXIX. 7. & seqq. ubi *David*: Quo ibo, inquit, a spiritu tuo & quo a facie tua fugiam? Si ascendero in cœlum, tu illic es: si descendero in infernum, ades. Si sumsero pennas meas diluculo, & habitavero in extremis maris; etenim illius manus deducet me & tenebit dextera tua. Ipse denique Deus apud *Jeremiam* c. XXIII. 23. Putasne, inquit, Deus e vicino ego sum & non Deus de longe? Si occultabitur vir in absconditis: & ego non videbo eum? Num quid non cœlum & terram ego impleo? Constat per cœ- lum & terram stylo Hebræorum intelligi mundum (§. 68.), & non procul esse seu vicinum aut propinquum esse idem omnino est ac præsentem esse phrasi nostra: de quo cum nulla sit dubitatio, ut prolixè probetur opus non est. Ex verbis adeo Davidis liquet, nullum neque in tota terræ superficie, neque intra eandem, neque in cœlis, atque in universo mundo reperiri posse locum, ubi rei in eodem existenti præ- sens

sens non sit Deus. Juxta S. S. itaque præsentia Dei extendenda est ad omnia, quæ in hoc universo existunt, ubicunque extiterint. Quamobrem cum omnipræsentia sit præsentia ad entia omnia a se diversa extensa (§. 1054.); Deo juxta S. S. tribuenda est omnipræsentia. Præsentia Dei ab Apostolo probatur ex eo, quod Deus nobis existentiam continuo largiatur, & vires agendi impertiatur, consequenter eodem prorsus modo, quo supra (§. 1046.) demonstravimus Deum esse præsentem rebus omnibus in toto universo. Quamobrem cum demonstratio nostra resolvatur in notionem præsentiæ supra explicatam (§. 1018.), quin ea sit menti S. S. conformis dubitari nequit. Juxta S. S. Deus ens simplex est (§. 100.) atque inextensus (§. 101.), & incorporeus (§. 102.). Quamobrem cum omne corpus sit in loco (§. 1033.), adeoque extensione sua partem quandam spatii impleat (§. 1032.); substantia vero simplex in loco esse nequeat (§. 1033.): nec juxta S. S. dici potest, Deum esse in loco, & rebus præsentem substantiæ suæ diffusionem. Ipse tamen Deus affirmat, se cælum atque terram, hoc est totum mundum implere. Quamobrem cum id fieri nequeat substantiæ suæ diffusionem, quippe quæ simplicitati repugnat *per demonstrata*; proprie loquendo in loco non est; est tamen ut in loco ex mente S. S. atque adeo juxta S. S. Deo tribuenda præsentia localis per eminentiam, qualem ipsi vindicavimus (§. 1105.) & cum ex mente S. S. Deus præsens sit rebus omnibus in quibuscunque hujus universi locis existentibus, præsentia localis per eminentiam explicanda est per existentiam ut in loco (§. 1044.), quemadmodum & a nobis factum est (*not.* §. 1105.).

Ex demonstratione propositionis præsentis manifestus est plenissimus notiois præsentia ac omnipræsentiæ divinæ, quam dedimus, cum S. S. consensus. Unde porro liquet, quicquid in superioribus de præsentia rerum & omnipræsentiæ divinæ

divina-demonstratum fuit, in interpretatione illorum S. S. locorum usum habere, in quibus de præsentia Dei agitur.

§. III4.

Juxta S. S. actiones Dei omnes rectæ sunt & sanctus di- Consensus
citur eodem sensu, quo actionum rectitudinem & sanctitatem S. S. quoad
eidem vindicavimus in superioribus. Deus dicitur rectus *et actionum*
Psal. XXV. 8. ac ideo docere decerrantes in via, quemadmo- *rectitudi-*
dum fert litera textus Hebræi, seu, ut vertit vulgatus inter- *nem & san-*
pres, legem dare delinquentibus in via. Facile apparet recti- *clitatem.*
tudinem de Deo prædicari respectu actionum, seu eum dici
rectum ob rectitudinem actionum. Deus superiorem se non
habet, adeoque actiones ejus rectæ dici nequeunt, quatenus
conveniunt voluntati alterius, quemadmodum recte facere di-
cit servus, quia facit quod vult Dominus. Relinquitur itaque
actionem divinam esse rectam, quatenus convenit ejus attributis,
seu nulli attributo contradicant, quemadmodum supra actionum
liberarum rectitudinem explicavimus (§. 950.) & eandem Deo
vindicavimus (§. 1059.).

Deus etiam in S. S. dicitur sanctus. Ita enim angelorum
unus clamat ad alterum *Jes. VI. 3.* Sanctus, sanctus, sanctus
Dominus Deus exercituum. Et *Lev. XIX. 2.* Deus Judæos
sanctos esse jubet, quia ipse sanctus est. Quoniam *1 Thess. I.*
4. Apostolus affirmat, hanc esse voluntatem Dei, sanctifica-
tionem nostram, ut abstineamus a fornicatione, fornicatio ve-
ro in illarum actionum numero est, quæ rectæ non sunt;
sanctitatem referri ad actiones rectas liquet. Sanctitas tribui-
tur adeo agenti ob actiones rectas, consequenter denotare ne-
quit nisi voluntatem constantem & perpetuam faciendi quod
rectum est, & non faciendi, quod rectum non est, quemadmo-
dum supra explicavimus (§. 1063.) Juxta S. S. igitur Deus
dicendus est sanctus, quia nunquam vult, nisi quod rectum

(*Wolffii Theol. Natur.*)

Rrr rrr

est

est, velle autem nequit, quod rectum non est: quo sensu supra sanctitatem ipsi vindicavimus (§. 1064.).

Quando itaque Deus nos sanctos esse jubet, quia ipse sanctus est; non aliud præcipit, quam ut semper velimus quod rectum est & ab hac voluntate nunquam ulla ratione nos dimoveri patiamur, quemadmodum ipse semper vult, quod rectum est, & se ab hac voluntate nulla unquam ratione dimoveri patitur, & quia ipse non vult nisi quod rectum est & se ab ea voluntate nunquam dimoveri patitur. Cum enim ipsemet velle nequeat, nisi quod rectum est; ideo nec placere potest, nisi quod rectum est. Hinc sanctificari dicimur, quatenus voluntas dirigitur in id, quod rectum, consequenter quod Dei voluntati conforme est. Unde sanctificatio consistit in directione voluntatis ad id, quod rectum est, seu voluntati divinæ conforme. Et sanctum se probat, qui rectus est iudicio Dei, rectis actionibus ex sanctitate provenientibus.

§. 1115.

Qualis Dei Deo juxta S. S. tribuenda sanctitas absolute summa. Cum sanctitas Hebræi careant superlativo, nec in textu Hebræo occurrere potest juxta S. S. est vocabulum, quod Latinorum superlativo respondeat. Dicitur autem sanctus *קדוש* *קדושים*, ita ut adjectivum sanctus sumatur substantive tanquam synonymon Dei veri, veluti *Jes. XL. 25.* & Deus dicatur Sanctus Israël *Jes. XL. 21.* & Sanctus Jacobi *Jes. XXIX. 23.*, quemadmodum ibidem dicitur Deus Jacobi. Juxta S. S. itaque ea Dei sanctitas est, qua major enti cuidam alteri, immo cui æqualis alteri convenire nequit. Non igitur dubitari potest, quin ex ejus mente Deo tribuenda sit absolute summa.

§. 1116.

Consensus Juxta S. S. Deus justus est eodem sensu, quo supra eundem S. S. quoad justum esse evicimus, & justitia etiam vindicativa eidem tribuenda.

buenda. Deus *Pf.* CXLV. 17. justus dicitur in omnibus viis suis & sanctus in omnibus operibus suis. Deus sanctus est, quatenus non vult nisi quod rectum est (§. 1114.), consequenter in operibus suis sanctum se probat, quatenus nil facit, nisi quod rectum est. Enimvero rectitudo actionum spectatur in earundem ad agentem relatione (§. 950.), adeoque sanctitas in relatione operum divinorum, hoc est, omnium quæ Deus facit, ad ipsummet seu voluntatem ipsius. Quoniam itaque justitia sanctitati contradistinguitur, ea spectari nequit in relatione actionum ad voluntatem ipsius, quatenus nempe ea non dirigitur nisi in id, quod rectum est, seu attributis divinis convenit. Necesse igitur est, ut justitia spectetur in actionibus divinis, quatenus extra ipsum referentur ad entia alia ab ipso diversa, consequenter ad creaturas, quoniam ex anterioribus satis patet, nihil præter Deum existere, quod non sit creatura: id quod brevitatis gratia prolixâ demonstratione evincere superfedemus, cum a nemine, quæ mundi dependentiam a Deo uno admittit, in dubium vocetur. Et sane ubi in sacris homines Deo justitiæ laudem tribuunt; eum justum pronunciant, quatenus in rectitudine actionis divinæ nihil reprehendi potest quoad ipsos. Exemplo esto Pharaon *Exod.* IX. 27. Etenim cum Hebræos dimittere nollet, & Deus post alias plagas, quibus Pharaon ad mutandum propositum adduci minime poterat, universam terram Ægypti grandine prægrandi percuteret inter tonitrua & fulgura, non sine maximo damno hominum & pecudum, frugum inprimis ac arborum; Pharaon Deum hoc facientem justum appellat. Deus plagis, quibus afficiebat Ægyptum, utebatur tanquam medio, quo id obtineret, ut Hebræi salvi ac incolumes ex terra Ægypti emigrarent, Pharaone Rege non resistente. Pertinet igitur hæc actio ad sapientiam divinam (§. 678. *Psychol. ration.*), Deo juxta S. S. eodem sensu tribuendam, quo nos eam sumimus

(§. 686.). Durum videbatur tot plagis affici Ægyptum, propterea quod Rex dimittere nollet subditos, ut pro lubitu emigrarent & sese imperio ejus subducerent, adeoque plagæ istæ repugnare videbantur bonitati divinæ, quam summam esse supra demonstravimus. Pharaon tamen non accusat bonitatem divinam, nec conqueritur de nimia Numinis severitate, sed factum Dei ad se referens & agnoscens, quod sit ad voluntatem suam flectendam necessarium, per sapientiam divinam rectum agnoscit, quod per bonitatem minus rectum dici posse videbatur, ac ideo Deum justum appellat. Vocat igitur justum, quatenus bonitatem sapientiæ attemperat, adeoque eadem ipsi fuit justitiæ notio, quam supra proposuimus (§. 1067.) & cui convenienter evicimus Deum esse justissimum (§. 1070.). Judicium Pharaonis de facto Dei, quemadmodum ex contextu liquet, non alio fine recensetur, quam ut malignus ejus animus pateat, quod plaga cessante populum dimittendi voluntatem denuo mutaverit, ac ut extra omnem dubitationem ponatur, recte fecisse Deum, quod plagas duriores præcedentibus adderet. Probatur igitur ab Historico sacro judicium Pharaonis: sed non probaretur, nisi termini acciperentur eo sensu, quo sumit Pharaon. Ex autorum itaque S. S. mente dicendum est, justitiam esse temperamentum bonitatis divinæ per sapientiam summam factum. Justitiam vindicativam in S. S. tribui Deo, adeo exploratum est omnibus, qui eandem vel obiter legerunt, ut supervacaneum videatur id probare velle. Etenim ea decernuntur poenæ & decreta irrogantur male facientibus (§. 1080.). Deus autem in S. S. non modo poenas statuere legitur in male facientes; verum etiam ideo justus appellatur. Unicum adduxisse sufficiat locum, quo idem probatur. David *Psal. VII. 12.* Deum vocat judicem justum & eum quotidie minari asseverat: quales vero sint illæ minæ, & quomodo Deus exequatur, quod minatus est, ipsemet docet *Exod. XX. 5.* ubi se perse-

qui

qui affirmat iniquitatem parentum in liberos vel ad tertiam usque & quartam osorum sui generationem. Et Christus in primis *Matth. XXV. 41. & seqq.* supplicio afficiendos æterno docet eos, qui male fecerint in hac vita.

Justitiæ notionem, quam supra stabilivimus (§. 1067.) menti S. S. conformem esse, forsan dubitari poterat ab iis, qui animum ad probationem allatam advertunt. Vix enim credibile videbitur, Pharaonem, dum Deum probante Scriptore sacro justum appellavit, animo perpendisse, quod plagis horrendis Ægyptum afficiens non agat quidpiam bonitati summæ adversum, quia eosdem exigit sapientia summa. Enimvero facilis est responsio. Non nobis quæstio est de eo, quod distincte expendit Pharaon; sed quod continetur in perceptionibus ejus confusis, quodque adeo distincte perpendisset, siquidem notiones confusas ad distinctas revocasset. Quod igitur facta notionum confusarum evolutione in iis deprehenditur, id omnino in distincta notione ponendum, ne distincta diversa sit a confusa. Quid vero insit notionibus confusis, ex circumstantiis præsentibus colligendum, observatis legibus animæ in usu facultatum inviolabilibus, quos in Psychologia exposuimus. Totum vero studium philosophi in eo colloceatur, ut notiones confuse revocentur ad distinctas, ostendendo quid hisce insit.

§ 107.

Deo juxta S. S. tribuenda est beatitudo eodem sensu, quo Consensus eam ipsi vindicavimus. Deus beatus dicitur 1. *Tim. VI. 15.* *Vi S. S. quoad beatitudinem Dei.* dendum vero, quonam sensu. Vocabulo Græco *μακάριος* respondere Hebraicum *יְהוָה* nemo linguæ utriusque vel mediocriter gnarus novit. Quamobrem ad indagandam notionem beatitudinis juxta S. S. Deo tribuendæ usui sunt tum loca veteris Testamenti, in quibus vocabulum *יְהוָה* occurrit; tum loca novi, in quibus Græcum *μακάριος* extat. Virum beatum Rrr rrr 3 dicit

dicit David *Psalms*. I. 1 & seqq. qui nec impiorum consiliis aurem præbet benignam, nec eorum male facta imitatur; sed cui constans & perpetua voluntas non faciendi, nisi quæ legi divinæ conveniunt, consequenter quæ vult Deus, ac qui ideo in lege divina die ac nocte meditatur, consequenter nihil industriæ suæ in eo desiderari patitur, ut quid voluntati divinæ conveniat indies magis magisque cognoscat. Comparat autem virum beatum cum arbore ad aquæ rivum lata & fructum suum suo tempore ferente; quo ipso innuit, eundem in cognitione veritatis ad actiones recte dirigendas utilium continuo proficere & actiones suas ad rectitudinem componere, quippe actiones rectæ fructibus comparantur, quos edit arbor. Perficitur intellectus, dum in veritatis ad rectam actionum directionem utilis cognitione proficit. Perficitur voluntas & homo integer, quatenus actiones liberæ spectantur quoad animam & corpus, dum promptitudinem actiones ad rectitudinem componendi easque exequendi consequimur. Atque adeo liquet Davidem vocare hominem beatum ob continuum eumque non impeditum progressum ad majores indies perfectiones, consequenter menti S. S. conformem esse notionem beatitudinis, quam dedimus supra (§. 1085.). Jam cum Deus juxta S. S. sit prorsus immutabilis (§. 1110.); continuo progredi nequit ad majores perfectiones, consequenter ejus beatitudo consistere nequit ex mente S. S. nisi in non impedita possessione ac fruitione perfectionum, quas habet, consequenter in S. S. beatus dicitur eodem sensu, quo nos eum beatissimum esse evicimus (§. 1089.).

Notionem beatitudinis per multa alia S. S. loca stabilire poteramus nisi dicta pro instituto nostro sufficerent. Sane beatitudo æterna a Christo fidelibus promissa in progressu ad majores indies perfectiones consistit, quemadmodum facile intelliget, qui quæ in promissis divinis contineantur intelligit. Sed hæc Theologis evolvenda relinquimus.

§. 1118.

Deus juxta S. S. nonnisi unus est, nec datur præter ipsum Consensus alius, qui sit Deus. Unitatem Dei maxime urget S. S. ita Moses *Deut. VI. 4.* Audi, inquit, Israël, Dominus Deus noster Deus *unitatem.* unus est. Quoniam Moses Hebræos ad attentionem excitat, dum unitatem Dei iisdem inculcat; eandem tanquam dogma maximi momenti proponit. Atque adeo liquet S. S. maxime urgere unitatem Dei. Unitatem Dei in novo Testamento urgent quoque Apostoli. Ita Paulus *Epbes. IV. 6. & I. Tim. II. 5.* unus est, inquit, Deus. Quod vero præter hunc Deum, quem cœli terræque creatorem colimus, non sit alius, disertis verbis docet Moses *Deut. IV. 35.* non alium esse Deum præter unum, qui Hebræos eduxerat ex Ægypto, pronuncians. Et Deus ipse *Jes. XLIV. 6. & c. XLV. 21. 22.* repetita vice affirmat, præter se non esse alium, qui sit Deus. Similiter Apostolus *I. Corinb. VIII. 4.* nullum esse Deum nisi unum docet.

Quæ de Trinitate revelantur in S. S. ea rationi impervia sunt & in illorum numerum referenda, quæ rationi superaddit revelatio, consequenter hujus loci non sunt.

§. 1119.

Deus est substantia prima & increata. Est enim substantia per eminentiam (§. 1005.) atque ens omnium primum (§. 92.). Est ergo substantia prima. *Qualis substantia sit Deus.* Quod erat primum.

Ortus vero non est (§. 79.), adeoque ex statu possibilitatis in statum actualitatis perductus non est (§. 541. *Ontol.*), consequenter nec ex nihilo productus (§. 690. *Ontol.*). Quamobrem cum ex nihilo productum sit, quicquid creatum est (§. 697. *Pfyscb. rat.*); Deus substantia increata est. Quod erat alterum.

§. 1120.

Deus omnium rerum causa prima est; creatura sunt causæ secundæ. *Qualis causa sit Deus.*

secunda, dependenter a prima operantes. Etenim contingentia in mundo non habent rationem sufficientem actualitatis suæ in serie successivorum, sed in ente alio extra seriem istam constituto, eoque necessario (§. 90. *Cosmol.*). Quamobrem cum ens istud necessarium, in quo ratio ultima eorum, quæ in hoc mundo adspectabili sunt atque fiunt, continetur, Deus sit (§. 67. 71.), causa vero prima sit, in qua ratio actualitatis eorum, quæ in hoc mundo adspectabili sunt atque fiunt, continetur (§. 866. 881. *Ontol.*); Deus utique est rerum omnium causa prima.

Cum adeo creaturæ, utpote a Deo creatæ (§. 777.), adeoque productæ (§. 697. *Psych. raz.*), non sint causæ primæ *per demonstrata*; causa vero secunda dicitur, quæ primæ subest, seu prima nonnisi existente datur; creaturæ non sunt nisi causæ secundæ.

Enimvero creaturæ in agendo a Deo dependent (§. 879.). Quamobrem cum sint causæ secundæ, prima autem Deus sit *per demonstrata*; causæ secundæ non agunt sive operantur nisi dependenter a prima.

Quoniam causæ primæ ac secundarum frequens mentio fieri solet tum a philosophis, tum a Theologis; propositionem præsentem addere consultum duximus coronidis loco.

F I N I S

Partis primæ Theologia Naturalis,

CONSPECTUS

TOTIUS OPERIS.

Theologiæ naturalis Prolegomena,

Page. 1

P A R S I.

Qua existentia & attributa divina a posteriori demonstrantur,

CAPUT I.

De existentia Dei & Attributis independentibus,

25

CAPUT II.

De Intellectu Dei, & Attributis independentibus,

114

CAPUT III.

De Potentia & Voluntate Dei,

312

CAPUT IV.

De Sapientia & Bonitate Dei.

563

CAPUT V.

De Creatione & Providentia divina.

727

CAPUT VI.

De Jure Dei in creaturas.

929

CAPUT VII.

De Attributis divinis, quæ per anteriora demonstrantur.

979

FINIS CONSPECTUS.

(*Wolfii Theol. Natur.*)

Sss sss

INDEX

INDEX

RERUM PRÆCIPUARUM,

IN QUO NUMERI PARAGRAPHS *ET. n.* NOTAS
PARAGRAPHORUM DENOTANT.

- A.**
- A**busus, Definitio, 646
Abutendi libertate potentia num ab
 homine tolli possit, 718
Abusus libertatis causa mali moralis, 580.
 in se præscibilis & ab æterno præsci-
 tus a Deo, 713. cur a Deo permittat-
 tur; 714. cur non obstet perfectioni
 mundi, 715. num a Deo impediri po-
 tuerit, 715. quomodo impediri pos-
 sit, 716. an eum impedire Deum de-
 ceat, 717. an sit necessarius, 720
Abusus libertatis permissio num bonita-
 ti divinæ repugnet, 722
Accidentia a natura ad actum perducun-
 tur, 854
Actio quo sensu Deo tribuatur, 1008.
 infert præsentiam respectu patien-
 tis, 1020
Actiones, ad quas homo obligatur,
975 & seqq.
Actiones creaturarum quantum a Deo
 dependeant, 881
Actiones Dei sunt rectæ, 1059. justæ 1071
Actiones externa quænam dicantur, 567.
 quomodo physice & moraliter spe-
 ctentur, 568
Actiones humane. Divisio in externas &
 internas, 567. Dependencia a Deo,
882. directio voluntati divinæ con-
 formis, 905. 906. 910. directio
 voluntati divinæ contraria, 921. di-
 rectio ad imperfectionem universi,
 cur non impediatur summam mundi
 perfectionem, 921. respectus ad
 alios directus & indirectus, 1068
Actiones interna quænam dicantur 567.
 quomodo physice & moraliter spe-
 ctentur, 568. ordo earum natura-
 lis, 570
Actiones libera quænam dicantur, 913.
 quo modo inficiantur malo morali,
580. cur secundum voluntatem Dei
 determinandæ, 970
Actiones male num turbent ordinem
 naturalem modificationum animæ,
571
Actiones male externa quomodo actu-
 entur, quatenus physice spectantur,
572. quomodo sese habeant in con-
 suetis systematis explicandi com-
 mercium animæ ac corporis 573.
 quomodo se habeant ad corpus &
 statum externum, 575
Actiones male interne quomodo actu-
 entur, quatenus physice spectantur,
569. quales sunt quoad animam,
574

Actio

Index Rerum Principiarum

- Actiones naturales* quænam dicantur, 913. cur liberæ cum iisdem eodem modo determinandæ, 914-915. non diverso, 916
- Actio recta & minus recta* quænam dicatur, 950
- Actionum specificatio* undenam sit, 878
- Actualitas rerum* unde pendeat, 433
- Actualitatis contingentium* ratio ultima, 438. juxta S. S. 440
- Actuosum* quid sit, 108
- Adversarii auctoris* vociferationes absurdas continuant, n. 68. confunduntur, n. 993
- Æternitas*. Definitio 39. quomodo Scholasticorum definitio intelligenda, n. 39. quomodo differat a tempore infinito, n. 42. n. 1016. cur tempori incommensurabilis, 40. immensitas evicta, 42. & imaginabilis effecta, 43
- Æternitas Dei* evicta, 74. consensus S. S. 76. ejus incommunicabilitas, 1017
- Æternitas cognitionis* divinæ, 319
volitionis ac nolitionis divinæ, 319
- Æternitas decretorum* divinorum, 504
juxta S. S. 591
essentiarum, 195
- Æternum* quid dicatur, 39
- Affectus* cur in Deum proprie non cadant, 1103. quomodo insint per eminentiam 1104. in quos errores hic facilis est prolapsus n. 1104
- Amoris Dei* universalitas, 746. objectum, 704
- Amoris rerum inanimatarum & brutorum* signum, 703
- Anima* cur non sint entia a se, 59. quale sint ens, 61. 139. quid sint respectu Dei, 781-786. quando a Deo creatæ, 780-783. existentia non in loco, 1043. sed ut in loco, 1045. illocalitas, 1034. præsentia mediata & immediata in corpore, 1029. præsentia illocalis, 1041. quomodo sint præsentia suis corporibus & partibus quibuslibet, 1028. vita qualis sit, 109
- Anima humana* qualis sit spiritus, 139. in quo ente existentia suæ rationem sufficientem habeat, 64. a Deo, ut omnis creatura, conservatur, 843-852. sine concursu Dei agere non potest, 871. seipsum annihilare 865. & destruere nequit, 866. similitudo cum Deo, 182. 1092.
- Anima brutorum* a Deo conservantur, 843-852
- Anima natura* per naturam Dei illustratur, n. 184
- Anima mundi* cur non sit Deus, 159
error unde profluxerit, n. 159
- Animalium Dominus*, quoniam sit, 966
- Annihilatio* cur in mundo non detur, 836. cur sit miraculum, 867. quomodo fieret, 859. cur actionem positivam non requirat, 860. cuiusnam possibilis, 861. unde pendeat, 862
- Annihilatio entis a se* cur impossibilis 38
- Apertum* quid dicatur, 179
- Apperceptio* continua in Deo, 187
- Appetitus sensitivus* cur Deo nullo modo convenire queat, 1101

- Arenarius* Archimedis quid sibi velit, n. 43
- Aseitas* quid sit, 28. cur animæ repugnet, 59. cur mundo repugnet, 50. 58. cur elementis rerum materialium competere nequeat, 52. cur atomis materialibus repugnet 53. cur materiæ uniformi ac indivisæ, & spatio imaginario contradicat, 54. non fuit ex simplicitate, 60
- Athei* quomodo optime refutentur, 12
- Atomi materiales* cur non sint entia a se, 53
- Attributa Dei* unde in Theologia naturali deducenda, 6. unde fluant, 69. quo sensu indigentur in S. S. 16. qualia Deo tribuenda, 115. quomodo caute demonstrantur, 135. 137. quomodo eorum notiones acquirantur, 1095
- Auditus* Deo per eminentiam tribuitur, 1097
- Aversatio sensitiva* cur Deo competere nequeat, 1102
- Autor ordinis nature* quinam dicatur, 762. quinam sit, 763
- B.
- B***eatissimus* quinam sit, 1088
- Beatitudo.* Definitio, 1085. gradus, 1086
- Beatitudo summa* in quo consistat, 1087
- Deo vindicata, 1089
- Beatitudo Dei* juxta S. S. 1117. cur incommunicabilis, 1090. 1091
- Beneficia hominum* quantum tribuenda bonitati divinæ, 742. etiam juxta S. S. 751
- Bonitas.* Definitio, 695. fons, 701
- Bonitas* erga bruta & res inanimatas, 702
- Bonitas summa* Deo vindicata, 699. etiam juxta S. S. 744. defensiva, 709. quomodo dijudicanda, 727. 728. cur homini dijudicatu impossibilis, 729. quinam eam agnoscant, 908. ejus effectus, 733 & seqq. inper scrutabilitas, 731. 732. incomprehensibilitas, 730. immutabilitas, 1010. extensio, 738. juxta S. S. 753.
- Bonitas Dei* circa mala moralia 727. in permissione abusus libertatis, 722. in directione malorum, 733. quoad rerum usum, 739. in directione actionum humanarum præscribenda, 907. in præceptis & prohibitionibus, 992. in gubernatione universi, 903. in providentia divina, 928. in beneficiis hominum spectanda, 742
- Bona* in mundo quomodo pendeant a malo, 689. omnia Deo accepta ferenda juxta S. S. 752
- Bona physica & moralia* quomodo bonitati Dei adscribenda, 737
- Bonum*, in se, 370. in relatione ad aliud, 370. in relatione ad Deum quid dicatur, 394. morale. 374. physicum 373. quantum Deus conferat in creaturas, 698
- Boni alieni* a proprio inseparabilitas ex voluntate Dei, 911
- Bonus* erga alios qui sit, 696. quamnam faciat, 696. ejus character, 697 signum, 700
- Brevissima* via a Deo electa cur in casu

Index Rerum Præcipuarum.

- casu particulari cognitu difficillima, 637
- C.
- C**atalepsis quid sit, n. 475
- Causa mali moralis*, 580
- Causa rerum qualis sit Deus*, qualis creatura, 1120
- Certitudo executionis decretorum divinorum juxta S. S.* 597
- Christiana religionis hostes in quo eam impugnando peccent*, n. 457
- Coactio voluntatis divinæ cur impossibilis*, 321
- Cogitationum præscibibilitas* 235. præscientia, 524. recordabilitas, 243 recordatio, 941. e longinquo prævisio juxta S. S. 598
- Cognitio conditionata Deo asserita*, 304. etiam juxta S. S. 305. quando ad simplicem intelligentiam referatur, 306
- Cognitionis eorum omnium*, quæ rebus actu inesse possunt, possibilitas, 145
- Cognitio Deo quo sensu tribuenda*, 141. quænam juxta S. S. tribuenda, 295
- Cognitio distincta possibilium Deo vindicata*, 156
- Cognitionis divinæ necessitas*, 311 universalitas, 154. etiam juxta S. S. 209. objectum, 141
- Cognitio historica. Definitio* 252. Deo universaliter vindicata, 253. etiam juxta S. S. 256
- Cognitio Numinis qualis ex Theologia naturali hauriatur*, 2
- Cognitio intuitiva Deo vindicata*, 207
- Cognitionis intuitiva mundi rationalis umbra in homine*, 269
- Cognitio philosophica Deo universaliter asserita*, 266
- Cognitionis philosophica objectum*, 265
- Cognitio rerum abjectarum Deo tribuenda*, etiam juxta S. S. 209
- Cognitio simultanea Deo vindicata*, 160. etiam juxta S. S. 216
- Cognitio singulorum cum cognitione omnium in Deo connexa*, 161
- Cognitio sui distincta Deo juxta S. S. tribuenda*, 220
- Cognitio symbolica omnis quod & quomodo Deo perspecta sit*, 277. etiam juxta S. S. 299
- Cognitio universalium Deo vindicata*, 264. 270. quomodo ex cognitione singularium resultet, 147. qualis sit in Deo, 270. qualis in homine. n. 276
- Cognoscibilia omnia in quonam contineantur*, 153. quod Deo perspecta, 154
- Comprehensibile quid dicatur*, 171
- Concursus. Definitio*, 873
- Concursus Dei ad actiones creaturarum*, 874. juxta S. S. 944. ad quasnam extendatur, 875. quo non extendendus, 889. quomodo fiat, 874. in quo consistat, 876. ad actiones bonas quæ tales, 994. ad actiones malas, 883. 884. 893. juxta S. S. 945. ad abusum libertatis, 885. ad imperfectionem hominis num datur, 886
- Congelatio quid dicatur Medicis*, n. 475

Index Rerum Præcipuarum.

- Connubii* S. S. & rationis utilitas, [218](#)
- Consensus* S. S. cum philosophia quomodo evincatur, [n. 99](#)
- Conservatio* quid sit, [842](#). [845](#). Deo vindicata, [843](#). etiam juxta S. S. [943](#). circa quid versetur. [844](#). [848](#). quomodo fiat, [844](#). [849](#). num mutationem in Deo inferat, [1009](#). cur sit miraculum, [868](#). cur ad actiones animarum necessaria. [871](#)
- Conservatio per causas secundas* cur sit providentiæ divinæ, [936](#)
- Consequentiarum*, illorum proprium [195](#). præcipitantiæ suæ [admonentur](#), [n. 570](#)
- Consequentiariorum* mos pervertendi dicta autorum notatur, [n. 549](#)
- Consilium Dei* quid sit, [504](#)
- Consilium* quid sit, [498](#). [983](#)
- Consilium* quo sensu juxta S. S. Deo tribuatur, [590](#)
- Constantia voluntatis*. Definitio, [1062](#)
- Consultatio*. Definitio, [498](#). cur decretum præcedat, [499](#). quando necessaria, [500](#). quomodo Deo tribuenda, [501](#). cur ea non habeat opus, [501](#)
- Consultatio Dei* quid sit, [502](#). etiam juxta S. S. [590](#)
- Contingentia* ab existentia separanda, [800](#)
- Contingentia* animæ, [61](#)
elementorum materialium, [56](#)
mundi adspectabilis, [55](#)
- Contingentium actus* ratio ultima [438](#). juxta S. S. [440](#)
- Contingentium veritas* quomodo ante & post decretum spectetur, [538](#)
- Contingentium veritas determinata* quomodo sese habeat ad præscientiam, [539](#). quomodo spectetur ante & post decretum, [538](#)
- Contradictiones* cur non habeant locum in revelatione divina, [453](#)
- Contradictio apparens* quando in revelatione divina locum habeat, [466](#)
- Contradictoria* cur Deus velle & facere nequeat, [345](#)
- Contra rationem* quid sit, [454](#)
- Corpora* quid sint respectu Dei, [786](#)
per essentiam existunt in loco, [1043](#). quomodo voluntatem Dei exequantur, [969](#). hodie genita cur sint creaturæ [779](#). etiam juxta S. S. [790](#). quatenus conservatione indigeant, [844](#). quomodo agant propter finem, [661](#)
- Corporis Deo per modum animæ uniendi* impossibilitas, [158](#)
- Corporis cujusvis idea* in Deo qualis, [200](#)
- in *Corporum* ortu quid conservetur, [832](#). in interitu quid conservetur, [831](#). in corruptione num quid annihilatur, [830](#)
- Corpus omne* cur sit in loco, [1033](#)
- Corpus mortuum* an animæ præsens esse possit, [1025](#)
- Cosmologia* num sit usus in Theologia naturali. [11](#)
- Creatio mundi* demonstrata, [760](#). etiam juxta S. S. [787](#). quo sensu locum habeat in systemate autoris contra obtrectatores, [n. 760](#). in quo consistat, [766](#). cur sit unicus actus, [765](#). cur sit miraculum, [768](#). quale sit miraculum [773](#). quod in conservatione

tionem continetur, 844. cur non inferat mutationem in Deo, [1009](#).
an hodiernum obtineat, 834
Creator mundi. Definitio, 762. quinam sit, [763](#). quinam juxta S. S. [788](#)

Creatura quæ dicantur, [777](#). juxta S. S. [789](#). [790](#). quænam sint, [778](#) & seqq. [781](#) & seqq. quid sint respectu Dei, [785](#). juxta S. S. [791](#). cur malo metaphysico carere nequeant, [380](#). cur sine conservatione divina agere non possint, [870](#). quomodo sint specula perfectionum divinarum, [799](#). quomodo annihilari possint, [859](#). num propria virtute existentiam continuare possint, [840](#). num existant virtute Dei, [841](#). cur nulla seipsam conservare possit, [843](#). cur in agendo dependeant a Deo [879](#). quales sint causæ, [1120](#). quales causæ miraculorum, [473](#)

Creaturarum a Deo dependentia qualis sit, 881. cur accurate cognoscenda, [800](#)

Criteria revelationis divinæ, [451](#)
[452](#). [464](#). [467](#). [468](#). [491](#).

Cursus nature constantia, 828
D.

Decere ens liberum quid dicatur, 332

Decretum. Definitio, [497](#). quod Deotribuendum, etiam juxta S. S. 590

Decretorum liberorum anime præcibilitas, [233](#). recordabilitas, [241](#)

Decretum Dei æternum, 504. juxta S. S. 591. liberrimum [506](#). juxta S. S. [593](#). immutabile, [509](#). juxta S. S. [594](#)

incomprehensibile, 512. imper-scrutabile, [513](#). juxta S. S. [592](#). Deo dignum, [517](#). juxta S. S. [596](#). unicum, [520](#). in se intelligibile, [508](#). Deo penitus perspectum, 511. Deum decens, 516. captum hominum transcendens [514](#). sapiens, 641. 642. universale, 926. cur non sit casus purus, [507](#). quale habeat objectum, 515. quales effectus, [522](#). ad quæ non extendendum, [518](#). quomodo tanquam multiplex spectetur, 521. quomodo influat in præscientiam, [523](#). an contingentiam & libertatem tollat, [527](#). an in re decreta quid mutet, 526. quomodo versetur circa fortunam [545](#). quomodo quoad malum metaphysicum, 546. 547. & physicum, 566. atque morale, [585](#). quomodo se habeat quoad melius, [551](#). quomodo influat in determinationem veritatis contingentium ab æterno, [538](#). quomodo referatur ad potentiam Dei, [525](#). cur ejus executio certa, [525](#). juxta S. S. [597](#)

Decreta temporaria Dei nulla, 505

Demonstratio quomodo rite perpendatur, [698](#)

Demonstrationes cur locum habere debeant in Theologia naturali, 2

Dependentia actionis creaturarum a Deo, [881](#). actionum humanarum a Deo [882](#). creaturarum a Deo cur accurate cognoscenda, [800](#)

Deus. Definitiones. [125](#). [1093](#). definitio nominalis in usum systematis, [67](#). ejus consensus cum S. S. & crimina-

minationes inanes, n. 68. falsa notio, n. 73
Dei definitio nominalis 67. cur in Theologia naturali necessaria, 5. qualis eligenda, 5. 7. quænam eidem inferenda, 7
Dei existentia demonstratur, 69. quomodo ex creatione mundi demonstratur, 757. quando insufficenter probetur, n. 8. cur in Theologia naturali non pluribus argumentis evincenda, 10. qualis sit, 70. & seqq.
Deus non existit, in tempore, 1014. juxta S. S. III. non existit in loco, 1043. sed ut in loco, 1052
Dei essentia 1094. est spiritus, 124. independens, 125. & perfectissimus 387. etiam juxta S. S. 422. atque infinitus, 1007. intellectu, 122. etiam juxta S. S. 130. & voluntate libera, 123. etiam juxta S. S. 131. præditus. Naturæ ejus & animæ differentia, 186
Dei attributa. Est a se, 67. æternus, 74. juxta S. S. 76. sempiternus, 75. juxta S. S. 77. incorporeus, juxta S. S. 102. 133. 134. invisibilis, 89. juxta S. S. 96. insensibilis, 88. non imaginabilis, 88. incorruptibilis, 93. juxta S. S. 95. interitus expers, 94. non extensus, 85. juxta S. S. 101. actuosus, 105. juxta S. S. 106. ratione præditus, 140. sensu & imaginatione 157. atque affectibus carens, 1103. vivus, III. juxta S. S. 112. omni-
 sciens, 302. juxta S. S. 303. ab errore immunis, 294. omnium eorum, quæ sibi repræsentat, conscius, 187. autor omnis veritatis, 290. solus inventor,

293. sapientissimus 640. juxta S. S. 686. historicus absolute summus, 255. philosophus absolute summus 268. omnipotens, 349. juxta S. S. 415. non nisi optimum volens, 389. juxta S. S. 407. summe bonus, 699. juxta S. S. 744. justissimus, 1070. juxta S. S. III6. omnipræsens, 1055. juxta S. S. III3. sibi sufficientissimus, 428. juxta S. S. 429. voluptatis percipiendæ gratia nulla re indigens, 426. non alia re indigens ad sui conservationem, 424. omnium creator, 763. conservator, 843. & gubernator, 900 ac Dominus 963. 997. semper idem ab æterno in æternum, 1013. juxta S. S. III2

Dei actiones. Omnes mundos possibiles sibi repræsentat, 121. quænam cognoscat, 141. 154. 155. 307. quomodo cognoscat modum per ratiocinia perveniendi ad veritates universales ab intuitu remotas, 274. cur aliter judicet quam nos de perfectione rerum, 396. & de usu earum, 447. quænam velit, 385. juxta S. S. 411. quid velit respectu sui 335. 412. quomodo omnia velit, 355. quod malum morale velle nequeat, 581. quod velit felicitatem creaturarum, 706. 707. quomodo se gerat in electione mundi, 334. mundum & elementa rerum materialium creavit, 758. 760 nec non animas hominum, 780 & brutorum, 783. omnia conservat, 843. & gubernat, 900. ad actio-

Index Rerum Precipuarum.

- nes creaturarum concurrir, [874](#)
 servos suos amat, [998](#). malos pu-
 nit, [1078](#). nihil facit frustra, [663](#)
 solus quid annihilare potest, [861](#)
Deus cur semper vigilet, nunquam
 dormiat, [185](#). juxta S. [S. 211](#). hiero-
 glyphice representari potest, [91](#)
 juxta [S. S. 98](#). qua in re a rebus materia-
 libus distinguatur, [n. 93](#). cur tanquam
 anima corpori uniri nequeat, [158](#).
 mundum facere nequit absque malo
 metaphysico, [377](#). quomodo mun-
 dum gubernet, [902](#). [903](#). quod non
 indigeat aliena informatione, nec
 alieno auxilio, [425](#). cur fortunæ
 non subsit, [542](#). quomodo veretur
 circa actiones malas, qua tales
[890](#). cur non senescat, [1013](#)
Dei animus erga homines, [705](#)
 cognitio qualis sit, [156](#)
Deo quænam tribui nequeant, [136](#)
[137](#). cur aperta omnia, [180](#). quid
 maxime placeat, [330](#)
Deum quinam imaginari velint, [n. 88](#)
 quid deceat, [333](#) sq.
Dictum S. S. quomodo extra [scopum](#)
 primum ad probandum verita-
 tes alias transferatur, [n. 210](#). num ex-
 tra scopum primum classicum
 esse possit, [n. 210](#)
Dictum S. S. *classicum* in quo a ceteris
 differat, [n. 96](#). ejus usus, [n. 96](#)
Directio actionum quænam voluntati
 divinæ conformis. [905](#). [909](#). [910](#)
 quænam a Deo præcepta juxta
 S. S. [1000](#)
*Directio actionum ad alienam perfectio-
 nem* cur Deus velit, [991](#)
 (*Wolfsi Theol. Natur.*)
Directio actionum ad gloriam Dei quo-
 modo contineatur sub directione
 ad sui perfectionem, [977](#). cur vo-
 luntati divinæ conformis, [918](#)
Directio mali ad bonum finem quo-
 modo faciat ad perfectionem, eam-
 que majorem universi, [682](#). [683](#).
 quod sit bonitatis, [733](#). juxta S. S.
[749](#). & justitiæ divinæ, [1074](#). quod
 pertineat ad gubernationem uni-
 versi, [904](#)
Disuasio quid sit, [985](#)
Divinitas in quo consistat juxta S. S.
[422](#)
Dogmatum philosophicorum cum S. S.
 consensus & dissensus cur subinde
 æstimatu difficilis, [n. 422](#)
Dogmata Theologiæ naturalis quænam
 sint, [4](#)
Dominium quid sit, [959](#). quænam
 jura complectatur, [960](#). in quonam
 ejus usus & abusus consistat, [996](#)
Dominium plenum quodnam dicatur,
[961](#)
Dominium minus plenum quodnam
 dicatur, [962](#)
Dominium plenum mundi ac naturæ
 Deo vindicatum, [963](#)
Dominium in creaturas Deo compe-
 tens juxta S. S. [999](#)
Dominium rerum hominibus a Deo con-
 cessum, [995](#). juxta S. S. [1003](#)
Dominium generi humano toti compe-
 tens quale sit, [n. 995](#)
Dominus quinam dicatur, [964](#)
Dominus creaturarum quinam sit,
[965](#). [966](#)

Index Rerum Principiarum.

Doni miraculose collatio in quo consistat 472. juxta S. S. 474

E.

E*clasis.* Definitio, 475. exemplum singulare, u. 475

Effectus fortune finibus particularibus subordinati, 654

Effectus nature quomodo sint præscibiles, 232. quomodo fines a Deo intenti, 645. quomodo a miraculo pendeant, 774

Electio mundi libera a coactione interna, 351. quamnam habeat rationem objectivam, 325. quamnam subjectivam, 337

Electio mundi perfectissimi qualis intellectus sit signum, 328. qualis voluntatis signum, 400

Electio mundi non perfectissimi cur signum intellectus perfectissimi esse nequeat, 329. qualis voluntatis signum 401

Elementa rerum materialium cur non existere potuerint, 57. cur non sint a se, 52. sed ab alio, 58. 756. facta a Deo, 758. in quonam rationem sufficientem existentie habeant, 64. quamnam producenda, ut hic existat mundus, 755. cur nullum in ortu corporum oriarur, 832. nullum in corporum interitu intereat, 830. cur in Theologiam naturalem ab Autore introducti, n. 244

Elementa eadem quamdiu subsistant, 835

Elementorum rerum materialium dependentia ab ente a se 64. non existentia in loco, 1043. sed ut in loco, 1052. illocalitas, 1035. presentia, 1030. præsentia illocalis, 1041. Vita, 440

Elementorum status præscibibilitas, 236
recordabilitas, 244. veritas determinata ab æterno, 531

per *Eminentiam* quomodo Deo competat scientia singularium & universalium, 300. quamnam præterea per eminentiam ipsi competant, 1005. 1006. 1008. 1099. 1104. 1105

Ens omne quomodo Deum repræsentet, 818. quomodo cum repræsentet in systemate cum aliis, 819. quomodo a Deo dependeat, 817

Entia in mundo qualia sint, 248

Ens a se. Definitio, 27. a quibus sit diversum, 62. ubi rationem existentie habeat, 31. quomodo distinguatur ab entibus, quæ sunt ab alio, 31. cur existat, 34. an oriri & interire possit, 37. 46. cur annihilari nequeat, 38. cur compositum esse nequeat, 47. cur non sit extensum, 48. qualia habeat prædicata, 65. quas proprietates, 30 & seqq. quando non nisi unum admittendum, 66

Entis a se existentia, 29. qualis ea sit, 32. 35. 36. privilegium in existendo, 34. simplicitas, 49

Ens ab alio. Definitio, 28. in quonam rationem existentie suæ habeat, 63

Entia ab alio quamnam sint. -58. 61

Ens compositum cur non sit a se, 47

Ens finitum nullas mutationes subiens num sit possibile, 1015

Ens limitatum cur sit finitum, 173

Est necessarium quale sit ens, 33
cur

Index Rerum Principiarum.

cur vi propria existat, [26](#). nec aliena indigeat, [25](#)
Entis necessarii existentia, [24](#). cur in ea demonstranda caute sit procedendum, [n.24](#)
Eus primum Definitio, [44](#). quale sit, [45](#)
Eus simplex cur non sit a se, [60](#)
Eus ultimum. Definitio, [44](#). quale sit, [45](#)
Entia universalia in systema referri possunt, [257](#)
Entium universalium nexus expenditur, [257](#)
Error cur non cadat in Deum, [294](#)
Error circa mali metaphysici inexistentiam notatur, [n.546](#)
Erroris intrinseca & extrinseca possibilitas, [n.309](#)
Errorum cognitio cur non dedecet Deum, [310](#). falsa imputatio qua culpa inficiatur, [n.155](#)
Erroribus ab hominibus committendos quomodo cognoscat Deus, [310](#)
Essentia divina in quo consistat, [1094](#)
Essentie divine infinitudo, [1004](#)
Essentie rerum quomodo sint media Dei, [645](#)
Essentiarum consecutiones necessariae, quomodo sint fines, [645](#). quomodo subordinentur sibi invicem & fini ultimo, [658](#)
Essentiarum æternitas asserta, [195](#) unde sit, [195](#). necessitas unde, [194](#)
Essentiarum necessitas non temerarie in philosophiam & Theologiam olim introducta, [n.678](#)

Esse ut in loco quid significet, [n.1042](#). [1044](#)
Etymologia num præbeat argumenta realia, [n.268](#)
Eventus in mundo materiali cur veritatem determinatam habeant ab æterno, [537](#). cur sint præscibiles, [237](#). cur recordabiles, [239](#)
Evidentia unde nascatur, [n.247](#)
Excessus quid dicatur, [475](#)
Existentia cur detur ratio, [31](#)
Existentia Dei cur firmiter non concludatur nisi a contingentia rerum, [799](#)
Existentia Deo essentialis, [72](#). etiam juxta S.S. [78](#)
Existentia hominis quidnam involvat, [92](#)
Existentia in loco cuinam conveniat, [1043](#). cui repugnet, [1043](#)
Existentia in ubi quid significet, [n.1041](#)
Existentia necessaria Dei quomodo representetur per mundum, [799](#)
Existere vi propria quid sit, [n.26](#)
Existibile quid dicatur, [221](#). quomodo Deus cognoscat, [225](#)
Existibilitatis principium, [223](#). [224](#)
Extensum ens cur a se esse nequeat, [48](#)

F.

Facta quænam dicantur, [249](#)
Factorum omnium cognitio Deo vindicata, [251](#)
Factibile quid dicatur, [n.546](#)
Facultas agendi moralis quid sit, [253](#)
Facultas agendi physica quid sit, [253](#)
Fanaticorum somnia quomodo detegantur, [n.450](#)

Fata

T t t t t 2

Index Rerum Præcipuarum.

- Fata sinistra* hominum quod subsint
providentiæ divinæ, 931
- Felicitas creaturarum* a Deo intenta,
706. juxta S. S., 747
- Fines* quales Deus sibi constituat, 618
cur a Cartesio ex Physica eliminati,
n.691. cur negentur a Spinoza, n.665
quomodo Deus eos consequatur,
621
- Finis electio* Deo liberrima, 620
- Finium subordinatio* definitur, 630
Deo vindicatur, 631. 632. 633
quomodo fiat, 634. quomodo a
Deo facta, 635
- Finis creationis* qualis sit, 618. quod
detur, 603
- Finis creationis ultimus* quod detur,
628. qualis sit, 629. juxta S. S.
687
- Finis decreti divini* existentia, 604
- Finis universi* quinam sit, 608
- Finium in universo* multitudo, 660. in
eorum numero quænam sint, 645.
648 & seqq.
- Finitum ens* cur sit in tempore, 1015.
- Fortuna.* Definitio, 540. divisio in
secundam & adversam, 540. signi-
ficatus receptus vocabuli, 541
quomodo in casu particulari dete-
gatur, n.541. cur ex parte Dei nulla,
sed tantum hominum, 542. cur
præscita ab æterno, 543. quod sub-
sit providentiæ divinæ, 932. quod
gloriam divinam manifestet, 654
quomodo a Deo decreta, 545
& quod Deum deceat, 638. 639
- Fortuna effectus* sunt fines Dei, 651
subordinantur sui ultimo, 652
- consequenter gloriæ divinæ, 653
- Fortuna præscibilitas*, 544. futurizio, 544
- Fructus* quid sit, 956
- Frustra* quid facere quid significet,
662. num Deus faciat, 663. num na-
tura faciat, 664
- Futurizio rerum* unde pendeat, 522
juxta S. S., 595
- Futurum.* Definitio, 228
- Futurum adhuc* qua tale quomodo
Deus agnoscat, 940
- Futurorum cognitio* cur quoad nos
arctis limitibus contineatur, n.240
- Futurorum præscientia* unde pendeat,
523
- G.
- G**enera rerum quomodo cogno-
scentur, 147
- Gloria Dei* quid sit, 610. quomodo
per actionum liberarum determi-
nationum manifestetur, 919. quo-
modo per usus rerum, 656. quo-
modo per rerum naturam, 657
- Gloria divina manifestatio* finis decre-
ti, 611
- Grammatica universalis* usus præcla-
rus, n.496
- Grammatici* a philosophia arcendi
n.268
- Gubernatio universi* definitur, 899
Deo vindicatur, 900. ex S. S. 948. in
quo consistat, 901. quomodo pos-
sibilis, 901. quænam ad eam refe-
renda, 904
- Gubernationis universi dependentia* a sa-
pientia Dei, 902 a bonitate Dei,
903

H.

Harmonia præstabilitæ utilitas in demonstranda aseitatis animæ impossibilitate, n. 59
Hebetiores infirmitatis suæ admoniti, n. 550. n. 623. n. 683. n. 924
Hieroglyphica representatio Dei cur possibilis, 91. S. S. conformis, 98 exemplo illustratur, 91. quomodo ab imaginibus differat, n. 91
Historicus. Definitio, 254. cur Deus sit summus, 255
Historici nomen num Deum dedecet, 255
Homo num illabilis creari potuerit, 718. 898. quomodo in agendo a Deo dependeat, 880. cur Dei potentiam metiri nequeat, 361. cur fortunæ sublit, 542. servus Dei, 968
Hominum Dominus quinam sit, 966
Hypotheses philosophicæ cur ad interpretationem S. S. non adhibendæ, n. 787

L.

Idea rerum Deo essentielles, 188. juxta S. S. 219. necessariæ, 189. immutabiles, 190. cur per errorem a potentia Dei deriventur, n. 224
Idearum conditio in cerebro, 478 diversitas, 189. 197.
Ideæ arbitrariæ evertuntur, 191. detecto erroris fonte, n. 191
Ideæ corporis cujusvis in Deo qualis sit, 200
Ideæ mundi qualis sit in Deo, 200 mutabilis in anima, 183. quomodo a Deo producat, 201. quomodo divina differat a nostra, 205

Ideæ mundorum omnium in Deo continuo existens, 181. immutabilis, 183
Ideæ mundi rationalis quomodo detur in Deo, 261
Ideæ mundi sensibilis quomodo cognoscatur a Deo, 206
Ideæ sensibilibus quales sint in Deo, 196. quomodo differant a nostris, 196. quomodo nostræ manifestæ Deo, 198. 199
Idem cur semper sit Deus, 1012
Illocalitas animarum, 1034. elementorum 1035. Dei, 1036. unde fluat, 1036
Imaginabile quid dicatur, 87
Imaginatio Deo non competens, 157 juxta S. S. 217. nisi per eminentiam, 1098
Imago Dei cur pingi & sculpi nequeat, 90. juxta S. S. 97
Immaterialitas Dei evicta, 183. non sufficit probandæ carentiæ sensuum & imaginationis, n. 157
Immensitas definitur, 41
Immensitas intellectus divini, 176. juxta S. S. 213. sapientiæ divinæ, 693 juxta S. S. 694. rationis divinæ, 285
Immensum quid dicatur, 41
Immersio mundi rationalis in sensibilem & intelligibilem 259. 260
Immutabilitas Dei, 1009. juxta S. S. 110. sapientiæ ac bonitatis divinæ, 1010. ideæ mundi in Deo, 183. idearum in Deo, 190. naturæ rerum, 837
Imperfectio qualis sit malum morale, 577
Imperfectio accidentalis hominis undenam sit, 887. quantum a Deo pendeat, 888

Index Rerum Principiarum.

- Imperscrutabilitas* bonitatis 731. divinæ, 732. decreti divini, 513. sapientiæ divinæ, [690. 691](#)
- Impossibilia* quomodo cognoscat Deus, [308](#). num velle possit, 313. cur fræcere nequeat, [344](#). quænam homo pro possibilibus habeat, quomodo cognoscat Deus, [309](#)
- Impossibilem absolutorum & hypotheticorum* cognitio cur Deo tribuenda, [307](#)
- Impossibilitas faciendi* quænam defectum potentiæ arguat, [378. 547](#)
- Impossibilitas faciendi mundum absque malo metaphysico* cur non sit defectus potentiæ, [378](#)
- Impossibilitas faciendi impossibilia* num sit defectus potentiæ, [346](#)
- Impossibilitas physica & moralis* quomodo differant, [952](#)
- Incommunicabilitas* æternitatis divinæ, 1017
- Incomprehensibile* quid dicatur, [170](#)
- Incomprehensibilitas intellectus* divini, 172. 174. decreti divini, 512. bonitatis divinæ, 730. magnitudinis bonitatis divinæ, [743](#). rationis divinæ, [282. 283](#)
- Independentia* Dei, [70](#). entis a se, [30](#)
- Inexistentia* eorum, quæ de Deo prædicantur, diversitas, [1012](#). cur ea perspecta esse debeat, [1012](#)
- Infelicitatem creaturarum* cur Deus velle nequeat, [707](#)
- Infelicitas hominum* unde sit, [708](#). juxta S. S. [748](#)
- Infininitudo* essentiæ divinæ, [1004](#). intellectus divini, [167](#). juxta S. S. [215](#). rationis divinæ, [281](#)
- Influxus* physicus animæ in corpus qualitas occulta, [n. 436](#)
- In loco esse* quid significet, 1032. quænam possint & non possint, [1033](#) & seqq.
- Insensibile* quid dicatur, [87](#)
- Insensibilis* est Deus [88](#)
- Intellectus* num in visionibus operari possit, [486](#). Deo vindicatus, 122 juxta S. S. [130](#)
- Intellectus finiti & infiniti* differentia quomodo intimius perspicuiatur, [n. 206](#)
- Intellectus divinus* definitur, [164](#). num sit actus, an facultas, 163. quomodo differat ab humano, [165](#). quod careat limitibus, [166](#). juxta S. S. [215](#). ejus infinitudo, [167. 215](#). perfectio summa, [168](#). juxta S. S. [218](#). magnitudo, 169. incomprehensibilitas, 174 [immensitas](#), [176](#). puritas, [178](#). juxta S. S. [214](#). fons omnis possibilitatis, [n. 192](#)
- Intellectus divini incomprehensibilitas* quomodo intelligibilis fiat, 177 [immensitas](#) quomodo insufficienter probetur, [176](#) [magnitudo](#) quomodo intelligibilis fiat, 177
- Intellectus perfectissimi* signum naturale. [328](#)
- Intelligentia* eorum, quæ Deus vult, [316](#)
- Interitus* cur enti a se repugnet, [46](#)
- Interminabilitas* quid sit, [n. 39](#)
- Interpretatio* S. S. ex contextu. [n. 126](#)
- Interpretatio extensiva* S. S. [n. 296](#)
- Interpretum* S. S. officium quoad stylum, [496](#)

Index Rerum Principuarum.

Intuitus idea mundi in Deo qualis, 184. in anima qualis, 184
Inventores cum quibusnam comparari possint, n. 292
Inventoribus quid tribuendum circa veritatem, n. 292
Invisibile n. 87
Invisibilis est Deus, 89. juxta S. S. 96
Jus quid sit, 954
Jus fruendi quid sit, 958
Jus natura cur ad certitudinem extendendum, n. 467. quantum dependeat a Theologia naturali, 21
Jus obligandi Deo competens, 986
Jus utendi quid sit, 957
Jussus quid sit, 983
Justitia definitio, 1067
Justitia Dei in omnibus, quæ facit, 1070. 1072. 1073. juxta S. S. 1116. in puniendo, 1079
Justitia vindicativa definitur, 1080
 Deo vindicatur, 1081. ex S. S. 1116
 an Deum deceat, 1082. an sanctitati conveniat, 1083
Justus quinam dicatur, 1067
 L.
L *abilitas* homini essentialis, 898
Libertas cur in hominibus influat in cognitionem, n. 311
Libertas Dei in eligendo fine, 620
Libertas voluntatis divina summa, 431
Libertas voluntatis divina a coactione interna, 351
Legi natura adversa revelatio divina num præcipere possit, n. 467
Limites rerum num creentur & conserventur, 851. quod a natura mutantur, 852
Lipitum absentia ab intellectu divino,

166. juxta S. S. 215
Limitationes originariæ quænam dicantur, 894. num a Deo auferri possint, 379. 896. num sint separabiles a subiecto, 895.
Localis præsentia quænam, 1037. cuiusnam conveniat, 1040
Localis præsentia in re quænam, 1038
Locus quomodo distincte cognoscitur, 146
Loci classici S. S. notio fructuosa, n. 95.
n. 96
Luxuria voluntatis divinæ, 341
 M.

M *agnitudo* quænam detur, 150
Magnitudo quomodo cognoscatur, 151. intellectus divini, 169. 177. bonitatis divinæ, 743. juxta S. S. 745
 potentiæ divinæ, 350. juxta S. S. 416
Mala quomodo implicentur bonis 675. quomodo dirigantur ad gloriam Dei, 681
Malum in se quid sit, 371
 in relatione ad aliud quid dicatur, 371
Malum physicum 374 morale 374
Malorum aversio quomodo pendeat a bonitate divina, 736
Malorum in bonum finem directio definitur, 679. Deo vindicatur, 680
 ex S. S. 688. quomodo fiat, n. 688
Malum metaphysicum definitur, 372
 necessario ingreditur omnem mundum, 376. num per miraculum ab ente tolli possit, 381. num a decreto dependeat, 546. num in decretum influat, 547. quamnam perfectionem ex ente excludat, 548

548. an sit verum malum, n.548. num
tanquam finis intendatur, 669
- Malum morale.* Definitio, 374. ratio
determinans, 579. dependentia a
sapientia Dei, 676. præscientia æter-
na, 587. juxta S. S. 600. ortus & pos-
sibilitas, 897. in quo consistat, 577.
cui perfectioni contrarietur, 578. cur
sapientiæ Dei non repugnet, 677
cur nexum rerum eidem non sub-
ducat, 678. mundo optimo inexi-
stet, 549. quomodo seriei rerum
implicetur, 552. 556. juxta S. S. 601
num tolli possit per miracula, 553
num sit verum malum, 576. cur
non obstitit decreto creationis,
583. num in decretum per se in-
fluat, n.582. cur Deo placere nequeat,
588. juxta S. S. 599. cur Deus id
velle nequeat, 581. quomodo irre-
pat in actiones liberas, 580. quo-
modo sese habeat ad finem mun-
di, 617. quomodo finibus a Deo
intentis implicetur, 674. num per
se a Deo intendatur, 668. quænam sit
ejus causa, 883. quomodo ex nexu
rerum resultet, 554. quomodo in
casu particulari auferri possit, 555
cur non repugnet providentiæ di-
vinæ, 935
- Mali moralis permissio* quem habeat
finem, 680. quod faciat ad manife-
stationem gloriæ divinæ, 613. juxta
S. S. 614. quod Deum non dedecet,
586. juxta S. S. 602
- Malum physicum.* Definitio, 373. de-
pendentia a sapientia Dei, 676. ne-
cessitas, 554. 557. præscientia æter-
na, 562. mundo optimo inexistit,
549. ex nexu rerum resultat, 554
quomodo ex morali consequatur,
723. quomodo seriei rerum impli-
cetur, 552. 556. quomodo tolli pos-
sit, 553. 555. quomodo eveniat, 558
an sit contra naturæ ordinem, 559
num tollatur contra naturæ ordi-
nem, 561. cur non repugnet ma-
jori perfectioni universi, 550. cur
non repugnet sapientiæ Dei, 677
cur nexum rerum eidem non sub-
ducat, 678. quo respectu a Deo
decreta, 566. quo respectu non
sit malum, 563. cur non repugnet
perfectioni mundi, 564. quo respec-
tu sit malum, 565. quomodo sese
habeat ad finem mundi, 617. num
a Deo intendatur tanquam finis,
670. quomodo finibus a Deo in-
tentis implicetur, 674. quomodo
pendeat a bonitate Dei, 734. 735
- Manifestatio gloriæ* quid sit, 610
- Matæologi consequentarii* notantur,
n.156
- Materia indivisa & uniformis* cur a se
esse nequeat, 54
- Matheos usus* in Metaphysicis com-
mendatur, n.275
- Media*, quibus Deus utitur, 607. 624
625. 636. 645
- Melius* quomodo spectetur in decreto
divino, 551
- Membra corporis humani* quo sensu
tribuantur Deo in S. S. 103
- Memoria* quomodo per eminentiam
Deo tribuatur, 1099
- Miracula* Deo possibili, 363. juxta
S. S.

Index Rerum Principiarum.

- S. S. 418. cur sint opus folius Dei, 470
 quodnam rationi cognitum, n. 768
 quale detur in mundo rationali,
455. quænam tollendis malis physicis
 & moralibus sufficiant, 553. cur
 Deus non patretur superflua, 489.
Miraculum primigenium. Definitio, 772.
 cur ab aliis distinguendum, n. 773
Miraculi primigenii effectus quomodo
 differant a miraculoso, n. 773
Modi quomodo Deo tribuantur, 1006
Modificationum animæ præscibilitas,
234. recordabilitas, 242
Morale bonum, 374
Moralitas actionum quid sit, 951
Moraliter impossibile quid sit, 952. quo
 sensu infaçibile dicatur, n. 722
Moraliter possibile quid sit, 952. neces-
 sarium n. 972.
Motiva voluntatis divinæ unde desum-
 ta, 340. juxta S. S. 408
Motiva ab attributis divinis desumpta
 cur homo in determinandis actio-
 nibus omittere non debeat, 981
Motus legibus motus adversi a Deo
 produci possunt, 365
Motus localis cur Deo repugnet, 1058
Motus transcreatio Cartesiana qualitas
 occulta, n. 436
Mundus quomodo Hebræis dicatur,
406. qualium entium sit comple-
 xus, 248. quod nonnisi facta con-
 tineat, 250. quomodo unus ab al-
 tero differat, 324. cur non sit ens
 a se, 50. 58. cur non existere potuerit,
 • 50 cur sit ens contingens, 55. cur
 sit ab alio 51. cur nullus a malo
 metaphysico liber esse possit, 376
 (*Wolfii Theol. Natur.*)
- cur absque malo metaphysico a
 Deo fieri nequeat, 377. cur non sit
 ens a se, sed ab alio, 58. quod sine
 possibilitum nexu non conceptibi-
 lis, 152. quod omnis in Deo repræ-
 sentetur, 121. juxta S. S. 208. qui-
 nam fini a Deo intento maxime
 conveniat, 615. 616. quinam ad
 manifestandam gloriam divinam
 maxime faciat, 622. quomodo im-
 mutatio ejus Deo possibilis, 367
 cujusnam electio Deum deceat,
333. an majus spatium occupare
 potuerit, 794
Mundi unius existentia probatur, 117
 quoad Deum non necessaria, n. 430
 sed libere decreta, 351. & sapien-
 tissime, 641. 642. cur Deus eam de-
 creverit, 611. 623. juxta S. S. 612.
 num detur ratio ejus objectiva,
119. quænam sit ratio, 615. quod
 in tempore existat, 1015. quomo-
 do interire possit, 829. quod
 ejus annihilatio Deo possibilis, 863
Mundi productio ex nihilo, 759. quod is
 factus sit ab alio, 757. nempe Deo,
758. quomodo Deus eum produ-
 xerit, 746. an citius eum creare po-
 tuerit, 793. quod Deus quemcunque
 alium producere potuerit, 342
 quomodo a Deo conservetur, 847
Mundi creatio a creatione elementor-
 um pendens, 754
dominus quinam sit, 965
status primus qualis sit, 769
 cur per essentiam & naturarum re-
 rum inexplicabilis, 771
Mundus adspectabilis in quo rationem
 Uuu uuu suf.

- sufficientem existentiae habeat, [64](#) quantae sit perfectionis, [326](#). quod omnium optimus, [382](#). totus bonitatis divinae plenus, [738](#). juxta S. S. [753](#). num absque hisce hominibus condi potuerit, [721](#). num Deo magis placeat ceteris, [331](#). num placeat ob malum morale, [589](#). an ob idem prae ceteris electus, [582](#)
- Mundi adspectabilis dependentia* ab uno Deo, [1106](#). ab existentia Dei necessaria, [800](#). ab aeternitate, [814](#). ab intellectu, [801](#). & omniscientia, [810](#) a libera voluntate Dei, [803](#). a ratione divina, [812](#). a sapientia, [805](#). a bonitate, [807](#). [808](#). a potentia, [803](#)
- Mundus adspectabilis* quomodo representet Deum, [820](#). quomodo existentiam necessariam, [799](#). aeternitatem, [815](#). [816](#). intellectum, [802](#) & liberrimam voluntatem, [804](#) omniscientiam, [811](#) sapientiam, [806](#) bonitatem, [809](#). & potentiam Dei, [804](#)
- Mundus intelligibilis* quinam dicatur, [202](#). qualis sit, [203](#). quomodo a sensibili differat, [204](#)
- Mundus optimus* quod existat, [382](#) juxta S. S. [406](#). quinam ejus existentiam docuerint, [11406](#). quales sint adversarii ejus, [11616](#). quod ejus electio non pugnet cum libertate, [11622](#). quod haec sit signum spiritus perfectissimi, [402](#). quoad intellectum, [328](#). voluntatem, [400](#). & potentiam, [403](#). [404](#). & signum Dei veri & omnipotentis juxta S. S. [420](#). [423](#). quomodo gloriam Dei manifestet, [622](#)
- Mundus perfectissimus* cur non sit ens omnium perfectissimum, [11326](#). cur Deum deceat, [333](#). cujusnam intellectus, [328](#). potentiae signum, [403](#) [404](#)
- Mundus rationalis*. Definitio, [258](#) differentia ab intelligibili, [11258](#). amplitudo, [263](#). quomodo sensibili & intelligibili immergatur, [260](#). cur non contineat, quae sunt supra rationem, [455](#). cur Deo cognitus, [262](#) qualis ejus sit in Deo cognitio, [269](#)
- Mundus sensibilis* quinam dicatur, [202](#) qualis sit, [203](#). differentia ab intelligibili, [204](#). quomodo conservetur, [850](#)
- Mutabilitas* ideae mundi in homine [183](#)
- Myopia* adversariorum nexus rerum, [11665](#)
- Mysterium*. Definitio, [458](#). quod ex principiis rationis non sit demonstrabile, [459](#). quod sit possibile. [460](#). quod non contradicat rationi, [462](#). quod sit miraculum in mundo rationali, [11458](#). quod in revelatione divina locum habeat, [463](#)
- Mythologia* quid sit, [111](#)
- N.
- N**atura num sit diversa ab omnipotentia Dei, [824](#). an sit a Deo creata, [11822](#). quomodo in creatione facta, [823](#). quomodo se habeat ad substantiale corporum, [11869](#) quomodo agat, [664](#). an sine conservatione divina agere possit, [869](#). quanam producat, [854](#) num frustra quid faciat, [664](#) quomodo agat propter finem, [661](#). quomodo secundum leges a Deo

Index Rerum Principiarum.

Deo præscriptas, [n. 825](#). cur hæc observare teneatur, [827](#). quod voluntatem Dei exequatur, [969](#). quod mundum annihilare nequeat, [864](#)
Natura dominus quinam sit, [965](#)
Naturæ leges quomodo a Deo præscribi potuerint, [n. 761](#) [825](#) [826](#)
Naturæ potentia qualis sit, [853](#) [855](#)
Naturæ vires an Deus reficere teneatur, [839](#). an natura senio langueat, [838](#)
Natura naturans. Definitio, [n. 822](#)
naturata. Definitio, [n. 822](#)
Naturæ animæ repugnantia num revelatio præcipere possit, [467](#)
Naturalia cur fiant secundum providentiam, [930](#)
Naturalistæ quomodo confutandi, [20](#)
Necessitas cognitionis divinæ, [311](#)
 mali physici & moralis, [554](#) [557](#)
 agendi secundum voluntatem Dei qualis sit, [972](#)
Nexus rerum in universo in quonam consistat, [665](#). ab absoluta necessitate immunis, [667](#). sapientia & bonitate Dei constitutus, [666](#) [740](#) [741](#)
 quomodo sit fundamentum præscibilitatis, [232](#). quod sine eo gubernatio divina non subsistat, [n. 901](#)
 qualem defenderit Spinoza, [n. 665](#)
 quomodo in Deum injuriæ ejus adversarii, [n. 805](#)
Nexus entium universalium expenditur, [257](#)
Notiones quales Theologiæ naturalis convenient, 13. quænam in revelatione divina præsupponantur, [494](#)
 quomodo ad eas perveniatur, [495](#)

Nolitionis actus quomodo oriatur, [318](#)
Nullibi esse num dici possit *Deus*, [n. 1036](#)
 vel alia substantia simplex, [n. 1042](#)
Numeri quomodo cognoscantur, [148](#)
Numeri rerum [152](#)

O.

Objectiones quales contemnendæ, [n. 1035](#)
Obligandi jus Deo competens, [986](#)
Obligatio activa quid sit, [973](#)
 passiva quid sit, [973](#)
 negativa & positiva quænam sit, [n. 979](#). ejus principia, [979](#) [980](#)
[981](#) [982](#)
Obligatio divina adstructa, [987](#). juxta S. [S. 1002](#). cur non exactius exponatur, [n. 987](#). quo tendat, [988](#)
Obligatio Christianorum *peculiaris*, [n. 981](#)
Obligatio hominis ad agendum secundum voluntatem Dei, [974](#) & seqq. ad actiones liberas naturalibus conformiter determinandis, [976](#). ad actiones omittendas, [978](#). ad non committendas & non omittendas, ad manifestationem gloriæ divinæ, [977](#)

Olivio cur in Deum non cadat, [941](#)
[1100](#)

Oculus quo casu Deo tribuatur, [n. 91](#)
Oeconomia gratiæ num faciat ad majorem perfectionem universi, [n. 556](#)
Officia erga Deum unde demonstrentur, [n. 77](#)

Omniscientia. Definitio, [301](#). explicata uberius, [n. 301](#). Deo vindicata, [302](#). juxta S. S. [303](#)

Omnipotentia. Definitio, [347](#). qualis sit, [348](#). Deo vindicata, [349](#). ex S. S. [415](#). quanta, [350](#). juxta S. S. [416](#)

Uuu uuu 2

Index Rerum Præcipuarum.

416. signum ejus naturale, 403.
404. juxta S. S. 423
Omnipraesentia. Definitio. 1054. Deo
 asserta, 1055. ex S. S. 1113
Omnisufficientia Dei, 428
Ontologia usus in Theologia natura-
 li, II. in S. S. interpretanda, 219
Opera artis Deo rectius, quam arti-
 ficibus perspecta, 650
Optimum in se quid Deus judicet,
393. cur homo eodem modo æ-
 stimare nequeat, 396. num sit o-
 ptimum in relatione ad Deum, 405
Optimum in relatione ad Deum quid
 Deus judicet, 395. cur homo
 eodem modo æstimare nequeat,
396
Optimi electio num Deum deceat, 384
385
Ordo alius quomodo hisce rebus im-
 poni potuerit, n. 825
Ordo naturalis actionum internarum,
570. modificationum animæ qua-
 lis, n. 571. num per malas actiones
 turbetur, 571
Ordo natura quomodo a Deo consti-
 tutus, 761. quomodo ab eo con-
 servetur, 847. qualis conserve-
 tur, n. 893. qualis sit in systemate
 harmoniæ præstabilitæ, 573. quod
 sit contingens, n. 761. quod con-
 stans, 828. quod pertineat ad gu-
 bernationem universi, 904. quod
 ad providentiam divinam, 929
 quod a Deo turbari possit, 366
 num turbetur per mala physica,
559. 561. num his sublati subsi-
 stere possit, 560
Ordinis natura constitutio cur sit mira-
 culum, 770. quale sit, 773
Organa sensoria proprie Deus non ha-
 bet, 134. quo sensu Deo tribuantur,
n. 1097
Ortus cur enti a se repugnet, 46
 P.
P*adagogia* Theologiæ naturalis ad
 revelatam, 19
Particularia quomodo Deus velit, 441.
 quomodo decernat, 519. cur de-
 creta fuerint, 606
Particulares fines quomodo Deus con-
 stituerit, 626. quales sint, 627
Perfectio, ad quam dirigendæ actiones
 humanæ, qualis sit, 912
Perfectio Dei absolute summa quoad in-
 tellectum, 168. quoad voluntatem
386. juxta S. S. 421. quod ejus pa-
 refactio sit finis universi, 608.
 juxta S. S. 609. cur eidem con-
 venientia Deus velit, 445
Perfectio essentialis cum malo morali
 pugnat, 578
Perfectio hominis accidentalis in quo
 consistat, 917. quomodo se ha-
 beat ad summam perfectionem
 mundi & finem a Deo intentum, 892
Perfectio mundi unde enascatur, 671.
 in quo consistat, 672. 673. num
 subsistat malo physico & morali
 omni sublato, 556. quod sit me-
 dium, quo Deus finem suum con-
 sequitur, 607. cur mala physica ei-
 dem non repugnent, 564
Perfectio rerum quomodo a Deo æsti-
 metur, 391. cur hominibus divi-
 no more æstimari nequeat, 396.
 cur

Index Rerum Principiarum.

- cur eidem convenientia Deus velit, cur repugnantia nolit, [443](#)
- Perfēctissimum in suo genere* quid iudicet Deus, [392](#). cur eidem maxime placeat, [330](#)
- Permissio*. Definitio, [584](#). Divisio in voluntariam & involuntariam, [584](#)
- Permissio abusus libertatis* quomodo facta, [714](#)
- Permissio mali* a Deo sapienter decreta, [644](#). pertinet ad providentiam Dei, [929](#)
- Permissio mali moralis* a Deo decreta, [585](#). juxta S. S. [600](#). cur Deum non dedecet, [586](#). quod sit iusta, [1076](#)
- Permissio*, ut homo ruat in mala, iusta, [1075](#)
- Perpetuitas voluntatis* quid sit, [1062](#)
- Philosophia* num S. S. interpret, [n.22](#) quem habeat usum in probandis veritatibus ex S. S. [n.944](#). num damnetur in S. S. [268](#). ejus consensus cum S. S. [n.948](#)
- Philosophus*. Definitio, [267](#). cur Deus sit summus, [268](#). an ejus nomen Deum dedecet, [n.268](#)
- Physice possibile* quid sit, [952](#)
impossibile quid sit, [952](#).
necessarium [n.972](#)
- Physicum bonum*, [373](#)
malum [373](#)
- Pena*. Definitio, [1077](#). quod ea Deus iuste homines afficiat, [1079](#)
- Penitentia decreti* in Deum non cadit, [510](#)
facti in Deum non cadit, [369](#). juxta S. S. [414](#)
- Possibile* quidnam falso assumatur, [435](#)
 quod sit objectum generale voluntatis divinæ, [314](#)
- Possibilia omnia* in quonam continentur, [152](#). quod a Deo cognoscantur, [155](#). quomodo sese habeant ante & post decretum ad intellectum divinum, [528](#). quomodo in se spectentur, [142](#). quomodo ut in systemata redacta spectentur, [142](#). quamnam ex spectatis in se cognoscantur, [143](#). quæ cognoscantur, si spectantur ut in systemata redacta, [144](#)
- Possibilia absolute talia* quomodo Deus cognoscat, [225](#)
- Possibilitas* cuinam enti ad existendum sufficiat, [34](#). cur non sit sufficiens ratio voluntatis divinæ, [315](#)
- Possibilitas eorum*, quæ sunt supra rationem, [456.457](#)
- Possibilitas physica & moralis* quomodo differat, [952](#)
- Possibilitas rerum* unde sit, [192](#). a voluntate Dei independens, [434](#)
- Possibilitas agendi proxima* cur inferat praesentiam, [1020](#)
- Posterorum progressus in scientiis* modulo nostro non æstimandi, [n.444](#)
- Potentia abutendi libertate* quale sit malum, [710](#). an tolli possit, [711.718](#)
 quomodo spectetur in decreto divino; [712](#). non inferat actum abusus, [719](#). est absolute necessaria, [720](#). num bonitati Dei repugnet, [722](#)
- Potentia conservatrix* Deo propria & creaturæ incommunicabilis, [846](#)
 directa & indirecta quomodo differat, [855](#)
- Potentia creatrix* Deo propria, [767.855](#)
 incommunicabilis, [767.775](#). cur Deo tribuatur, [n.767](#)

Index Rerum Principuarum.

- Potentia Dei* Definitio , 222. ob-
 jectum , 224. 341. ad voluntatem
 relatio , 352. juxta S. S. 413. cur
 latius pateat voluntate , 353. quo-
 modo differat a potentia creatura-
 rum , 776. cur ad eam ab hac non
 valeat argumentatio , n. 776. quod
 sit illimitata , 354. & immensa , 360.
 quod capium humanum transcen-
 dat , 362. juxta S. S. 417. quod vim
 naturæ superet , 364
- Potentia miraculosa* enti finito incom-
 municabilis , 471
- Potentia naturæ* cur corpora oriantur
 & conserventur , 856
- Præceptum* quid sit , 984
- Præcepta Dei* num sint consilia , 993
- Præceptorum divinorum* fons , 992.
 summa , 989. juxta S. S. 1000.
- Præcipitancia judicandi* in philosophia
 evitatu difficilis , 262
- Prædicanda de Deo* quomodo ipsi in-
 sint , 1011
- Prædicata absoluta & hypothetica* gene-
 rum & specierum quomodo cognos-
 cantur , 147
- Præscibile.* Definitio , 231
- Præscibilitas* clarissime explicatur , n. 242
 quo fundamento nitatur , 231. per
 omnes mundos possibiles diffunditur ,
 n. 232. a nexu rerum pendet , n. 232.
 ad scientiam visionis spectat , n. 246.
- Præscibilitas* abusus libertatis , 713. co-
 gitationum , 235. status elementor-
 um , 236. & dependentiæ statuum
 a se invicem in omnibus , 237.
 statuum mundi , 236. mali meta-
 physici , 562
- Præscientia.* Definitio , 231
- Præscientia divina* demonstratur , 524.
 ex S. S. 598. æterna , 534. infallibi-
 lis , 532. quodnam habeat obje-
 ctum , 535. dependet a decreto 523
 528. an contingentiam & libertatem
 tollat , 530. præsupponit præscibili-
 tatem , 528. in re præscita nil mutat 529.
 concipitur per determinatam verita-
 tem contingentium , n. 529. cur præsci-
 bilitas non sit sufficiens ejus ratio , 234.
 mali moralis juxta S. S. 600
- Præsens.* Definitio , 228. quomodo
 Deus a præteritis & futuris distin-
 guat , 939
- Præsentia sensui* quænam sint , 1021.
 1022
- Præsens intime* quid dicatur , 1050
- Præsentia* quid sit , 1018. agentis 1019
- Præsentia in loco* quid significet , 1039.
 cuiam conveniat , 1040
- Præsentia animarum* illocalis , 1041
 animæ & corporis mutua ,
 1023. quamdiu duret , 1024
 animæ in corpore mediata
 & immediata , 1029. quo-
 modo se habeat in corpo-
 re toto , 1028. quomodo in
 qualibet parte , n. 1028.
- Præsentia Dei* intima , 1051. succes-
 sionis expers , 1057. illocalis , 1042.
 per eminentiam localis , 1105. quo
 usque extendenda , 1046. 1047
- Præsentia divina* extensio 1048. modus
 1049. magnitudo , 1056
- Præsentia elementorum* , 1030. quod
 sit illocalis , 1041
 patientis & agentis , 1019
- Præteritum.* Definitio , 228
- Præ-*

Index Rerum Præcipuarum.

Præterita qua talia quomodo Deus agnoscat, [940](#)
Præteritorum cognitio humana ætatis limitibus constringitur, [n. 240](#)
Prævisio cogitationum e longinquo juxta S. S. [n. 598](#)
Primitas Dei, [92.](#) juxta S. S. [99](#)
Primitas entis quid excludat, [n. 45](#)
Principium actualitatis, [433](#)
 possibilitatis, [193](#)
 præsentiam colligendi, [1020](#)
Principii indiscernibilium universalitas evicta, [n. 1107](#)
Principiorum philosophiæ utilitas in consequentiis ex S. S. inferendis, [n. 100](#)
[n. 212](#)
Principiorum Logicæ utilitas in S. S. interpretanda, [n. 219](#)
Probatio per consequentiam ex S. S. quando habeat locum, [n. 131. n. 132](#)
Productio creaturæ absque malo metaphysico impossibilis, [380](#)
Prohibitio quid sit, [285](#)
Prohibitiones Dei num sint nuda confilia, [293](#)
Prohibitionum divinarum fons, [992](#)
 summa, [990.](#) juxta S. S. [1001](#)
Promotio gloriæ divinæ quid sit, [610](#)
Proprietarius quid sit, [n. 955](#)
Proprietas quid sit, [955](#)
Propositum quid sit, [503.](#) Deo tribuitur in S. S. [590](#)
Providentia divina. Definitio, [922](#)
 existentia, [923.](#) juxta S. S. [249.](#)
 æternitas & immutabilitas, [924.](#)
 quomodo executioni detur, [927](#)
 quomodo sese habeat, [928.](#) quænam ad eam pertineant, [929](#) & seqq.
 quousque sese extendat, [925.](#) juxta S. S. [946.](#) quomodo creaturis

consultat, [233. 234.](#) cur capto difficilis, [n. 238](#)
Providentia divina modus, [938](#)
 leges quomodo ex observationibus deriventur, [n. 447](#)
Pseudopropheta nostri temporis, [n. 468](#)
Psychologiæ usus in Theologiâ naturali, [n.](#)
Puritas intellectus divini, [178](#)
 rationis divinæ, [288](#)
Puritas cur rationi limitatæ repugnet, [287.](#)

Q.

Qualitates occultæ quænam sint, [436](#)
Quantitatis finitæ & infinitæ heterogeneitas, [175](#)

R.

Rationis ac fidei connubium quid sit, [455](#)
Ratio quando sit pura, [286](#)
 contra *Rationem* quid sit, [454](#)
 supra *Rationem* quid sit, [455.](#) cur quæ sunt supra rationem non sint impossibilia, [456. 457.](#) cur non contra rationem, [461](#)
Ratione cur bruta melius homine uti videantur, [n. 661](#)
Ratio, cur Deus hunc mundum elegerit, [615. 616](#)
Ratio Deo vindicata, [140.](#) ex S. S. [296](#)
Ratio divina num sit actus an facultas, [284.](#) limitum *expers*, [280.](#) juxta S. S. [298.](#) absolute summa, [279.](#) infinita, [281.](#) juxta S. S. [298.](#) incomprehensibilis, [282. 283.](#) immensa, [285.](#) pura, [288](#)
Rationis divina magnitudo, juxta S. S. [297](#)
 Re-

Index Rerum Præcipuarum.

- Ratio limitata* cur pura esse nequeat, 287
Ratio obiectiva quænam dicatur, 118
Ratio obiectiva existentia mundi unde desumenda, n. 118. 1120
Ratio proxima & remota quænam dicitur, 437
Ratio subiectiva quænam dicatur, 336
Ratio ultima quænam dicatur, 437
Ratio sufficiens influit in demonstrationem unitatis divinæ, n. 1107. voluntatis divinæ quænam sit, 339
Rationis spheram transcendere quid dicitur, n. 455
Ratiocinatio cur non cadat in Deum, 274
Recordabile quid dicatur, 238
Recordabilitas clarius explicatur, 239
242. spectat ad scientiam visionis, n. 246
Recordabilitas cogitationum, 243
præteritorum in anima per libera decreta, n. 240
eventuum in mundo materiali, 239
Recordatio quomodo de Deo intelligatur, 238
Recordatio præteritorum quomodo Deo tribuenda, 941
Reclitudo actionum definitur, 950
Reclitudo actionum divinarum demonstrata, 1059. ex S. S. 1114. unde nascatur, n. 1059. quomodo æstimanda, 1060. cur iudicium de eo difficile, 1061
Regularitas actionum malarum quatenus a Deo pendeat, n. 570
Rerum immutabilitas per decretum, 526. per præscientiam, 529
Rer omnes in universo sapienter decretae, 643. quomodo Deo præsentent, 1053
Res aliter substantialiter, quam sunt, num facere potuerit Deus, n. 557
Relationes Rerum quomodo cognoscantur, 149
Religionis Christianæ defendendæ principia, n. 456. 463
Respectus actionum ad alios *directus* & *indirectus* quid sit, 1068
Revelatio divina quod sit *possibilis*, 449. quod sit miraculosa, 450. quod rationi & experientiæ contradicere nequeat, 464. quomodo per visionem fiat, 487. quomodo per somnium facta dignoscatur, 469
Revelationis divinæ criteria, 451 & seqq. criterium desumptum ab objecto, 451 a Deo revelante, 452 a modo perveniendi ad cognitionem 468. a veritatibus, 464. ab agendis, 467. a stylo, 491
Revelationis divinæ criteriis cur sit opus, n. 448
Revelationis modus quando actus mixtus, 490
Rhetoricæ rationalis usus præclarus, n. 495
Ruere in mala quando dicatur homo, 724. an Deus id permittere possit, 725. 726.

S.

Sanctitas Dei quid sit, 1063. summa demonstratur 1065. juxta S. S. 1114. quanta juxta S. S. 1115
Sanctus qualis sit, 1064
Sanctus Deus in omnibus actionibus, 1066. 84.

<i>Sapientia Dei.</i> Quomodo in ea demon- stranda sit procedendum, n. 603. de- monstrata, 640. ex S. S. 686. Summa, 640. immensa, 693. juxta S. S. 694. immutabilis, 1010. imperscrutabilis, 691. juxta S. S. 692. quomodo verse- tur circa malum physicum & mora- le, 726. 676. & seqq. spectetur in di- rectione mali physici & morali , 684. in permissione abusus libertatis 714. 715. in gubernatione mundi, 902. in providentia divina, 928. quomodo manifestetur per mala physica & moralia, 685	<i>Servus Dei</i> cur sit homo, 968 <i>Similitudo</i> animæ cum Deo, 182. 1092. cur cognitu utilis, n. 1092 <i>Simplicitas</i> entis a se, 49 Dei, 83. juxta S. S. 100 <i>Singularium cognitio</i> universalis Deo vindicata, 247 <i>scientia</i> quomodo Deo insit, 300 <i>Situs</i> quomodo distincte cognoscatur, 146
<i>Scientia naturalis</i> immutabilitas unde pendeat, n. 827 <i>Scientia simplicis intelligentie</i> quænam dicatur, 221. Deo vindicata, 226. quid per eam cognoscatur, 227. quomodo res in eadem spectentur, 229. obje- ctum, 221 <i>Scientia visionis.</i> Definitio, 230. intrin- seca possibilitas, n. 246. Deo vindi- cata, 942 <i>Scriptura sacra</i> quomodo juvet Theo- logiam naturalem, 22 <i>Scriptura S.</i> per Scripturam interpre- tatio, n. 96 versio quoad sensum litera- lem cur accurata esse debeat, n. 95 <i>Sempiternitas</i> cur peculiari nomine in- digitanda, 77. Deo vindicata, 75. juxta S. S. 77 <i>Sempiternum</i> quid sit, n. 75 <i>Sensui</i> quænam præsentia, 1020 <i>Sensus</i> Deo denegantur, 157. juxta S. S. 217. per eminentiam tribuendi , 1096 <i>Servus</i> quinam dicatur, 967 (<i>Wolffii Theol. Natur.</i>)	<i>Sociniani</i> quomodo præscibilitatem fu- tutorum tollant, n. 233 <i>Somnium supernaturale</i> quale sit, 482 <i>Spatium</i> quomodo distincte cognosca- tur, 146. unde notioni ejus lux afful- geat, 146. 148. quando cæperit, 792 quomodo a Deo factum, 796. num creatum fuerit, n. 796. an extra mundum detur, 795. cur organum sensorium Dei esse nequeat, n. 159 <i>Spatium imaginarium</i> cur a se concipi nequeat, n. 54 <i>Species rerum</i> quomodo cognoscantur, 147 <i>Specificatio actionum</i> undenam sit, 878 <i>Speculum rei alterius</i> quomodo sit ens unum, 784 <i>Speculum perfectionum divinarum</i> crea- tura, 786 <i>Spiritualitas Dei</i> asserta , 124. juxta S. S. 132. qualis sit, 1007 <i>Spiritus</i> qualis sit Deus, 125. 138. 387 <i>Spiritus contingens</i> possibilis, n. 139 <i>Spiritus independens</i> quale sit ens, 126 quænam ejus attributa, 127. & seqq. <i>Spiritus perfectissimus</i> Deus est, 387. juxta S. S. 422. ejus signum naturale, 402 Sta-

Index Rerum Principuarum.

Statuum alternatio juxta S. S. in Deo
non datur, 212

Stylus qualis conveniat revelationi di-
vinæ, 491. & seqq. 496

Suasio quid sit, 983

Substantia qualis sit Deus, 1119

Substantia agentis a Deo conservatur,
876

Substantialitas Dei per eminentiam,
1005

Sublationis mali physici & moralis effe-
ctus, 555. 556

Substantia simplex in loco esse nequit,
1033. tota præsens enti alteri, 1027

Substantiarum simplicium præsentia in-
ter se, 1031

Substantiale in corporum ortu & inte-
ritu conservatur, 831. 833

Subtilitas nimia quando non accusan-
da, n. 46

Sufficientissimus sibi ipsi quinam dica-
tur, 427. est Deus 428. juxta SS. 429

Supra rationem quid sit, 454. num quod
supra rationem sit contra eandem,
461

Systema causarum occasionalium quali-
tas occulta, n. 436

Systematis causarum occasionalium usus
singularis, n. 472

Systematis cosmologici auctoris præroga-
tiva insignis, n. 760

T.

Tectum quid dicatur respectu intel-
lectus, 179

Tempus quomodo distincte cognosca-
tur, 146. unde notioni ejus lux af-
fulgeat, n. 146. n. 148. quando cœpe-
rit, 792. quomodo fecerit Deus, 797

Termini ἀγχαφai seu in S. S. non extan-
tes num de Deo usurpandi, n. 77

Theologi quinam dicantur Gentilibus,
n. 1

Theologia divinitio apud Gentiles, n. 1

Theologia civilis quænam olim dicta,
n. 1

Theologia fabulosa quænam olim dicta,
n. 1

Theologia naturalis definitur, 1. cur na-
turalis appelletur, n. 1. qua methodo
tractanda, 2. & seqq. quodnam ha-
beat objectum, 4. quibus utatur
principiis, 8. num detur, 23. quo-
rum causa tradatur, n. 3. cur per sci-
entiam definiatur, n. 3. cur satiet ani-
mum sciendi cupidum, 17. cur non
negligenda Christianis, n. 18. quas-
nam philosophiæ partes præsuppo-
nat, 11. an cedat in præjudicium re-
velatæ, n. 20. unde auxilium expe-
ctet, 22. ejus limites cum revelatæ
limitibus non confundenda, n. 1048

Theologiæ naturalis usus in Jure naturæ,
n. 21. in refutandis atheis, 12. in con-
futandis Naturalistis, 20. in inter-
pretanda S. S. quoad articulos mix-
tos, n. 600

Theologiæ naturalis systemata commu-
nia qua laborent imperfectione, n. 6

Theologia revelata cur non indigeat de-
finitione nominali Dei, 9

Theologia revelata & naturalis quoad
modum tractandi differentia, 9

D. Thomas laudatur, n. 546. n. 683
n. 799. n. 1044. non omnia argu-
menta pro existentia Dei allata tan-
quam genuina admisit, n. 799

Ventus

U.

Ventus impetuosus quo sensu dicatur
malus, n.565

Verba quomodo sese habeant in reve-
latione divina quoad numerum, 492
quoad qualitatem, 493

Veri Dei signum naturale, 402. juxta
S.S. 423

Veritas omnis unde, 290. quando cœ-
pescint veritates 291. quando ei pre-
tium recte statuatur ex utilitate, 292.
quomodo dependeat ab inventore
292. quænam necessaria, quænam
arbitraria, n.536

Veritates contingentes. Definitio, 465.
quomodo in earum determinatio-
nem ab æterno influat decretum,
n.538. cur iis revelatio contradicere
possit, 466

Veritas determinata futurorum unde-
nam sit, 536

Veritatum levium & sterilium inventio
an Deum dedecet, n.291. n.293

Veritates necessariae. Definitio, 465. cur
revelatio iis contradicere nequeat,
466

Veritates universales quod a Deo co-
gnoscantur, 162. quomodo cogno-
scantur 270. quod cognoscantur ab
æterno, 291

Veritatum universalium nexus in quo
consistat, 271. quomodo a Deo co-
gnosceatur, 272. 273

Vetatio quid sit, 285

Vires agendi Deus largitur, 876. quo-
modo largiatur, 877

Vires primitive scholasticorum quali-

tates occultæ, n.436

Vis qualis Deo tribuenda, 116

Vis activa Dei, 104. juxta S. S. 106

Vis gravitatis tanquam vis primitiva
est qualitas occulta n.436

Visio, Visum, Definitio, 476. status ce-
rebri in eadem, 478. 485. cur in ecsta-
si vel quasi ecstasi contingat, 479.

quando apparitio habeatur, 488.
num intellectus in ea operari possit,
486. quantum cum somnio conveni-
at & disconveniat, 481

Visio naturalis. Definitio, 480. quænam
sit, 483

Visio supernaturalis, Definitio, 480
quænam sit, 484

Visus Deo per eminentiam tribuendus,
1097

Vita quid sit, 107. 108. quomodo Deo
conveniat, 113. juxta S. S. 114

Vita creaturarum a Deo dependet, 1109

Vita Dei in quo consistat, 1108

Vita clementorum rerum materialium,
110

Vivum quid dicatur, 107

Ultimatio Dei, 92. juxta S. S. 99

Ultimatio entis quid excludat, n.45

Unitas Dei evicta, 1106. 1107. juxta S. S.
1108

Universalitas propositionum ex S. S.
deductarum quomodo custodien da,
n.600

Universalium cognitio Deo vindicata
289. quomodo in eodem habeat 10-
cum, 275. cur non sit symbolica,
276

Universalium cognitio intuitiva expli-
ca

X x x x x 2

- cata & illustrata, [275](#)
Universalium dependentia mediata &
 immediata a se invicem, [n.257](#)
Universalium scientia Deo quomodo
 in fit, [303](#)
Vocabula quo sensu accipienda in
 Theologia naturali, [14.15](#)
Vociferationes absurdæ. [n.68](#)
Volitionis actus quomodo oriatur, [318](#)
Volitio temporaria cur non cadat in De-
 um, [320](#)
Voluntas imperscrutabilis quando di-
 catur, [397](#)
Voluntas libera Deo vindicata 123. [431.](#)
 juxta S. S. [131](#)
Voluntas divina num sit actus, an fa-
 cultas, [356.](#) quod sit actus unicus;
[355.](#) quod non sit casus purus, [432](#)
 an admittat rationem subjectivam,
[338.](#) num habeat motiva, 312. quo
 tendat, [383.](#) in quod feratur juxta
 S. S. [411.](#) cur nullo modo feratur
 in incognitum, 317. quando tan-
 quam ratio ultima allegari possit,
[439](#)
Voluntas divina qualis sit. Nimi-
 rum libera a coactione externa, [321](#)
 juxta S. S. [410.](#) & interna, [430.](#) co-
 gi nescia, 321. independens a rebus
 volitis, [340.](#) juxta S. S. [410.](#) æterna,
[319.](#) juxta S. S. [409.](#) illimitata, [388.](#)
 infinita, [357.](#) incomprehensibilis,
[358.359.](#) captrum hominis transcen-
 dens, [399.](#) immutabilis, [368.](#) im-
 perscrutabilis, [398. 442.](#) juxta S. S.
[419.](#) perfectissima, [386.](#) spontanea,
[322.323.](#) qualis sit in particulari, [441](#)
Voluntatis divina lex, [396](#)
 motivum, [389.](#) juxta
 S. S. [407](#)
Voluntas divina de actionum humana-
 rum directione, [905. 906. 909. 910.](#)
[914.915.916.921](#)
Voluntatis divina cognoscenda modus a
 priori, [443. 445.](#) cur difficilis, [444.](#)
[446.](#) quando utilis, [n. 446.](#) quando
 tutior, [n. 444.](#) quando probabilis,
[n. 446.](#)
Voluntatis divina cognoscenda modus a
 posteriori, [447](#)
Voluntatis divina cognoscenda modus
 per revelationem, [448](#)
Voluntatis divina explicanda principium, [446](#)
Voluntas humana cur feratur in incognitum,
 dum fertur in cognitum, u. 317. cur mu-
 tabilis, [n. 368](#)
Voluntatis propria abnegatio, 971
Voluntatis perfectissima signum naturale,
[400. 401](#)
Voluptate quanta fruatur Deus, [1084](#)
Ufus rei quid sit, [646.](#) quod fini ultimo
 subordinetur, 655. quomodo subordine-
 tur, [656.](#) quando in finem abeat, [647.](#)
 quando optime comprehendatur, [n. 21.](#)
Ufus exigui nostro judicio cur non sint tales
 judicio Dei, [648](#)
Ufus domini in quo consistat, [996](#)
Ufus rerum artificialium cur sint fines Dei,
[649](#)
Ufus rerum naturalium quod sint fines Dei,
[648.](#) quod aliis finibus subordinentur,
 657. quantum tribuendi bonitati divinæ,
 739. juxta S. S. [n. 711](#)
Ufus rerum naturalium mutui sunt provi-
 dentia divinæ, 739. [937.](#)
Ufus Theologiae naturalis, [12.17.18.19.20.21.](#)

F I N I S.

INDEX

INDEX

LOCORUM SCRIPTURÆ SACRÆ,

QUÆ
IN HOC OPERE CITANTUR ET EXPLICANTUR.

Veteris Testamenti.

<i>Cap.</i>	<i>Vers.</i>	<i>Paragr.</i>	<i>Cap.</i>	<i>Vers.</i>	<i>Paragr.</i>
<i>Gen. I.</i>	1.	68. 76	<i>Gen. XXXI.</i>	6.	416
		99. 208	<i>XXXII.</i>	12.	210
		n. 408. 787	<i>XXXVII.</i>	5. & seqq.	688. sq.
		790	<i>XXXIX.</i>	2. & seqq.	688. sq.
	8.	215	<i>XL.</i>		688. sq.
	16. & seqq.	948	<i>XLI.</i>		688. sq.
	27.	787	<i>XLV.</i>	4 & seqq.	688. sq.
	28.	1003		5.	749. 751
	31.	406. 744			752. 945
<i>I. II.</i>		746		7.	751
<i>II.</i>	7.	787		8.	751. 945
<i>III.</i>	1. seqq.	409	<i>Exod. III.</i>		948
	8.	103		1. & seqq.	481
<i>IV.</i>	14. 16.	103		4. & seqq.	299
<i>VI.</i>	5	299		14.	78. 299
	6	n. 414	<i>IV. & seqq.</i>		418
	14. & seqq.	299	<i>IX.</i>	27	1116
<i>VII.</i>	1	299	<i>XX.</i>	4	97
<i>XII.</i>	1	299		5.	97. 1002
<i>XIII.</i>	16	210. 299			1116
<i>XV.</i>	5. 6	210. 299		6.	1002
<i>XVI.</i>	10	210	<i>XXV.</i>	10. & seqq.	299
<i>XVII.</i>	1	299. 415	<i>Levit. XIX.</i>	2.	1114
<i>XXI.</i>	30. 33	76	<i>XXVI.</i>	1.	97
<i>XXII.</i>	12.	210.	<i>Nam. XXIII.</i>	19. 20.	594. 597
	17	299			414
<i>XXIV.</i>	12. 14. 49.	753		20.	414
<i>XXVI.</i>	2. & seqq.	299	<i>Deut. IV.</i>	15. & seqq.	97
<i>XXX.</i>	1	299			<i>Deut.</i>

Index Locorum Scripturae Sacrae.

Cap.	Vers.	Paragr.	Cap.	Vers.	Paragr.
<i>Deut.</i> VI.	4. 35.	III 8	<i>Psalms</i> CV.	25.	948
XI.	26.	748	CVI.	1.	744
XXXI.	19.	748	CVII.	1.	744
<i>Jos.</i> III.	10.	II 2	CXIV.	19.	295
X.	12. 13.	418	CXV.	3.	413
	14.	474	CXVIII.	1.	744
<i>1. Sam.</i> I.	35.	414	CXIX.	64.	753
II 9.	22.	299	CXXI.	4.	211
X.	9.	948	CXXXIX.	3.	598
XXIII.	10. & seqq.	305		7. & seqq.	III 3
XXVI.	7.	211	CXLV.	9.	746
<i>2. Sam.</i> VII.	4.	299		17.	III 6
XVII.	7.	594	CXLVI.	8. 9.	744
<i>1. Reg.</i> III.	16. & seqq.	686	CXLVII.	4.	210
	28.	686		5.	213
IV.	30. 34.	686. 694		7. & seqq.	948
V.	12.	686	<i>Prov.</i> XVI.	4.	687
<i>2. Reg.</i> XIX.	16.	II 2		33.	948
<i>Job.</i> V.	10.	943. 948	<i>Eccl.</i> I.	4.	948
XXXVIII.	25. & seqq.	943. 948	XI.	1.	790
<i>Psalms</i> I.	1. sq.	II 7.	<i>Jes.</i> VI.	1.	98
V.	5.	599		3.	III 4
VII.	12.	III 6			
XXV.	6.	103	XIV.	27.	594. 595
	8.	III 4	XXIII.	24.	101
XXXIII.	II.	594	XXIX.	23.	III 5
	18.	103	XL.	21. 25.	III 5
LVII.	II.	753		28.	76
XC.	2. 3.	76	XLII.	8.	598
	4.	n. III 1	XLIII.	6.	99
XCIV.	9.	217	XLIV.	6.	78. 598. III 8
	26.	208		7.	598.
CII.	27.	76. III 2		9. 10.	97
CIV.	12.	440		24.	99
	13. 14.	948	XLV.	12.	299
	19. & seqq.	948		18.	948
				21. 22.	III 8
					<i>Jes.</i>

Index Locorum Scriptura Sacra.

<i>Cap.</i>	<i>Verf.</i>	<i>Paragr.</i>	<i>Cap.</i>	<i>Verf.</i>	<i>Paragr.</i>
<i>Jes.</i> XLVI.	5. & seqq.	97	<i>Matth.</i> X.	29. & seqq.	256
	9.	218			946
		219. 220		30.	209. 210
		299	XI.	26.	411
	10.	218. 219		29.	98
		220. 299	XIII.	24. & seqq.	601
		595			602
XLVIII.	3. 4. 5.	598	XIX.	16. 17.	n. 256
LX.	13. 14.	103			745
<i>Jerem.</i> XVIII.	3. & seqq.	999	XXV.	19.	1000
XXIII.	23.	1113		26.	76
	24.	n. 101		31. & seqq.	599
XXXII.	17.	416		41. seq.	1116
XLV.	12.	299	XXVI.	42.	131
<i>Ezech.</i> I.	25. & seqq.	98	<i>Marc.</i> XVI.	17. & seqq.	418
III.	23.	98			474
VIII.	2. 4.	98	<i>Luc.</i> I.	37.	416
XXXIII.	11.	747	<i>Joh.</i> III.	11.	412
<i>Dan.</i> IV.	32.	410		16. 408. 409.	746
<i>Amos.</i> IX.	5.	103	IV.	24.	n. 102. 132
<i>Sap.</i> XIV.	3.	n. 945			133
<i>Bar.</i> II.	20. 22. 35.	76	V.	17.	106
<i>1. Mac.</i> I.	25.	76		26.	114
				30.	131
			VI.	38.	131
			VII.	17.	131
			XV.	26.	98
			XXIV.	30.	n. 102
				39.	n. 132. 133
			<i>Actor.</i> II.	23.	600
			VII.	30.	n. 481
			VIII.	18. & seqq.	n. 474
			IX.	5.	476
			XIV.	15.	112
			XV.	18.	130. 208. 210
					215
					<i>Actor.</i>
NOVI TESTAMENTI.					
<i>Matth.</i> III.	16.	98			
	17.	411			
V.	39.	492			
	44.	749. 750			
		1000			
	45.	745. 948			
	48.	745. 1000			
VI.	20. & seqq.	946			
VII.	12. 21.	131			
X.	16.	98			

Index Locorum Scripturae Sacrae.

Cap.	Verf.	Paragr.	Cap.	Verf.	Paragr.
<i>Actor.</i> XVII.	24.	130. 943	<i>Ephes.</i> IV.	6.	1118
	25.	429. 943	V.	1.	n. 496
	27.	1113	<i>Col.</i> I.	15.	96
	28.	943. 1003	II.	8.	268
<i>Rom.</i> I.	1.	609	<i>1. Theff.</i> I.	4.	1114
	13.	95	<i>1. Tim.</i> I.	17. n. 95. 96686. 694	1118
	20.	420. n. 422	II.	5.	1118
		423. 609. 791	IV.	4.	790
	21.	687.	VI.	15.	1117
	21. 22. 23.	97		16.	n. 96
	25.	97. 788		17.	112
		789. 790	<i>2. Tim.</i> I.	9.	409
VIII.	16.	98. 132	<i>Hebr.</i> I.	12.	76
IX.	18.	593	IV.	13.	208. 215
	19.	131	VI.	17.	594. & n.
	22. 23. 411.	412 596	VII.	24.	95
		& n.	XI.	4.	787
XI.	33.	419. 592	<i>Jac.</i> I.	17.	1110
		692. 694	II.	18.	593
	34.	130		26.	132
XV.	4.	749	<i>1. Petr.</i> II.	23.	98
XVI.	26.	76	III.	12.	103
<i>1. Cor.</i> I.	21.	411	IV.	19.	788
II.	II.	130	V.	6.	103
IV.	7.	752	<i>2. Petr.</i> II.	19.	1003
	16.	n. 496	III.	8.	n. 1111
VIII.	4.	1118		16.	749
XV.	53.	95	<i>1. Job.</i> I.	5.	n. 214
<i>2. Cor.</i> VI.	18.	415	III.	1.	746
<i>Ephes.</i> I.	4.	n. 408. 409	IV.	19.	746
	5.	131. 411	<i>Jud.</i>	25.	686. 694
	II.	590	<i>Apoc.</i> I.	8.	77. 99
III.	II.	591		18.	77
	20.	417	IV.	2. & seqq.	98
			V.	6.	98
			XIII.	18.	130
			XVII.	17.	948

F I N I S.

